

ერევან-შატრიანი



სახელმწიფო გამომცემლობა
„საბჭოთა საქართველო“
თბილისი 1959

თარგმანი
ივანე მატყვარკიანისა

საერო კრება

1789

I

ბევრს დაუწერია იმ კურთხეული დროის ამბავი, როდესაც 1789 წელს ხალხი და მოქალაქენი კეთილშობილთ გაუმკლავდნენ. ბევრს დაუწერია, მაგრამ ისინი სწავლულები იყვნენ, წარჩინებულნი და წუთისოფელს ზემოდან დაჰყურებდნენ ბატონკაცურად, მე კი ერთი მოხუცებული გლეხკაცი გახლავართ და ჩემებურად, მდაბიურად მოგიტხრობთ ჩვენს საქმეებს; უმთავრესი ის არის, კაცმა საკუთარ საქმეს მოუაროს; რაც ჩემი თვალთ მინახავს და რაც ვიცი, ის უნდა გამოვიყენო კიდეც.

მოგესხენებათ, 1789 წლამდე ფალსბურგის საბატონოზედ ხუთი სოფელი იყო მიწერილი: ვილშბერგი, მიტტელბრონი, ლუტცელბურგი, ჰალტენჰაუზენი და ჰაცელბურგი. ისიც გეცოდინებათ, რომ მოქალაქენი და ვილშბერგელები და ჰაცელბურგელები თავისუფალნი იყვნენ და დანარჩენი სამი სოფლის მცხოვრებნი, კაცი თუ ქალი, ყმები იყვნენ და საბატონო მიწაწყალს ვერსად წაუვიდოდნენ, მანამ მოურავისაგან ნებას არ აიღებდნენ.

მოურავის ხელთ იყო ჩვენი ბედ-იღბალი, ის იყო ჩვენი მსაჯული, ჩვენი ბატონი და პატრონი; მოურავს ნება ჰქონდა განესაჯა ადამიანი და მისი საქციელი, დაესაჯა იგი და წამებაც კი მიეყენებინა.

დამნაშავეს სამამასახლისოსთან მიიყვანდნენ ხოლმე, — ეხლა იქ სკოლა გახლავთ, — და დაუწყებდნენ კითხვას; ვაი იმის ბრალი, თუ გაჯიუტდებოდა და არ გამოტყდებოდა: ისეთი ხმით აღრიალებდნენ გზირი და ჯალათი, რომ საბრალოს ყვირილი მოედანზედ ჩამოდებოდა. მერე, ბაზრობა დღეს, საღრჩობელას ამართავდნენ ზედ

შუა მოედანზედ, დიდი მუხების გვერდით და ჯალათს მიუგდებდნენ — ახლა შენ იციო. იმანაც მართლა და კარგად იცოდა თავის საქმე: საწყალ კაცს თოკს რომ გადუღებდა კისერზედ, თითონაც მხრებზედ შეაჯდებოდა — ცოცხალი არ გადარჩესო.

გულქვა უნდა ყოფილიყო ადამიანი, რომ იმ ღროში ავი გაეხედნა რამე.

ფალსბურგს საბაჟო ჰქონდა. ამ საბაჟოს ვერავინ ასცდებოდა და რაც უნდა ყოფილიყო — შალი, მატყლი თუ სხვა რამ ამგვარი — ურემზედ მანეთს გვახდევინებდნენ. ფიცარზედ, ბოძზედ, სარზედ, მარგილზედ, ურემზედ აბაზი იყო გადასახადი; აბრეშუმზედ, ხავერდზედ, ძვირფას მათუღზედ — თუმანს გვართმევდნენ; საპალნიან ცხენზედ ორი შაური იყო; ხურჯინიან კაცზედ — ნახევარ შაური; სახედარის საპალნე თევზზედ — ათი შაური, ერბოზედ, კვერცხზედ, ყველზედ, სახედარის საპალნეზედ — ექვსი შაური, თითო ქვა მარილზედ — სამი შაური, ერთ კოდ პურზედ ან ქერზედ — სამი შაური, ღორზედ და ცხვარზედ — ნახევარ შაური და სხვ.

ისე რომ ქალაქელი კაცი ვერც საჭმელ-სასმელს იყიდდა, ვერც ტანსაცმელს შეიძენდა, მანამ მებატონეს თავისას არ მიართმევდა: საბაჟო, რასაკვირველია, მებატონესი იყო.

საბაჟოს დავახწევდით თავს და შიგ ქალაქში უარესი მოგველოდა: ყველა მელუქნე, ყველა მოვაჭრე, შიგ ფალსბურგში იქნებოდა თუ სოფელში სადმე, ვალდებული იყო ყოველ ნაყიდ ან გაყიდულ რუმბ ღვინოზედ ექვსი თუნგი საბატონოდ გადაედგა. მამულს იყიდა ვინმე, ან სახლ-კარს, ას თუმანზედ ხუთი ბატონისთვის უნდა მიერთმია; მემკვიდრეობა დარჩებოდა ვისმე, ას თუმანზედ ხუთი ბატონისა იყო. რამდენიც უნდა გაყიდულიყო პური, ქერი, სიმინდი და სხვა ჭირნახული ქალაქის მოედანზედ, კოდზედ ნახევარ შაური ბატონისა იყო.

წელიწადში სამჯერ — სააღდგომოდ, საშობაოდ და საახალწლოდ მოედნის ქირას აგროვებდნენ ბატონის სასარგებლოდ.

ქირას გვახდევინებდნენ აგრეთვე მოედნის და სასწორისას. ათ ლიტრაზედ შაური უნდა მიგვერთმია.

საჩივარს დავიწყებდით რასმე და სულ ტყავს გაგვაძრობდნენ: მოურავთან ვიჩივლებდით, ჯარიმას გადაგვახდევინებდა; ბატონს ვეახლებოდით, კარისკაცნი უარესს გვიშვრებოდნენ. საქონელს გავრეკდით სადმე, საძოვარს გადაგვახდევინებდნენ; ღორს გავიჩენდით, ბატონის ტყეში რკოსა სჭამსო, ტყის ქირას გვართმევდნენ, შეშას გამოვიტანდით ტყიდან — სალბაშს გადაგვახდევინებდნენ;

ხელობას ვისწავლიდით რასმე, ბატონის მუშა უნდა ვყოფილიყავით. მამულს ხომ თავისი ღალა ედო — ყოველი მოსავლის მებათედი: ამ მებათედიდან ორი წილი ბატონისა იყო და მესამედი ბერებისა. გარდა ამისა პურზედ კიდევ ცალკე გვართმევდნენ ღალას — მებათელსავე; ეს ბერებისთვის იყო დაწესებული, მაგრამ ბატონს შეშურებოდა და წაერთმია — ეკლესიას ჩემი თავი მირჩევნიაო.

და ახლა, თუ გნებავთ გაიგოთ — როგორ დაემონაგებინა იმოდენა ხალხი ჩვენს ბატონს და როგორ მიესია საწყალ მუშა კაცისთვის თავის მოურავები, გზირები, ჯალათები და კარისკაცები, ამასაც მოგახსენებთ. ამ ორასი წლის წინად ჩვენი ქვეყანა ხელმწიფეს ერთ ბავარიელ თავადისთვის უწყალობებია. მაშინ თურმე არც სადმე მებატონე ცხოვრობდა, არც მუშა ხალხი და არც გზები იყო; უდაბური ტყე იყო თურმე და თავადიშვილს გროშისოდენი სარგებლობაც არა ჰქონდა იმოდენა მამულიდან. ადგა და ალზასში და ლორენში ხმა დააგდო: „ვისაც შრომა უნდა და მკლავიც უჭრის, ჩემს ტყეში დასახლდეს და ბედსა ვწევო: მამულს მიცემ, გარდასახადს არას გამოვართმევ და ისე ვაცხოვრებ, რომ სულ ქუდს ჰქერში ისროდესო; ჩემთვის კი არა ვზრუნავ, ჩემი პირადი სარგებლობისთვის... ღმერთმა დამიფაროს! მე ღვთისა და კაცის მომადლიერებასა ვცდილობო. საფრანგეთის და ალზას-ლორენის გზები ზედ ფალსბურგზედ გადის; ყოველი მგზავრი, ვაჭარი და ხელოსანი — მეურმე, მჭედელი, დურგალი თუ მექუთრკლე ფალსბურგში უნდა გაჩერდეს და იქვე გაშალოს თავის სავაჭრო, როგორადაც ყოველმა პირაჯმა, ფეიქარმა, მეიარაღემ და. სხვ. ჰო და, რადგან ჩემი სულისთვის ვიღწვი და ღვთის სადიდებლადაო, ვინც ფალსბურგში დასახლდება, არც ღალას გადაეხანდევენებ, არც რამე ხარჯსაო; შენობისთვის მასალას მუქთად ვუწყალობებ; ეკლესიას ავუშენებ, რომ სიტყვა ღვთისა მოისმინონო; სკოლისთვის სახლს ავუგებ, რომ ბავშვებს ჰქვმარიტი სარწმუნოება ასწავლონ, რადგან მოზარდი თაობის გონება ხნულია, რომელშიაც შეიძლება იმისთანა საუცხოვო ყვავილი მოვიყვანოთ, რომ მის სუწნელება ცასაც ახარებდეს და დედამიწასაცაო“.

კიდევ ბევრი რამ აღუთქვა თურმე — ისეთ თავისუფლებას დაჰპირებოდა, რომ ეს ამბავი მთელს ქვეყანას მოსდებოდა და საიდან გინდა, რომ არ წამოსულიყვნენ ამ სამოთხისდარ ტყეში დასასახლებლად. სახლები აიშენეს, ტყე გაჩეხეს, ახოები გატეხეს და დახნეს, გზები გაიყვანეს; ერთი სიტყვით უდაბურ ტყეს ფასი დასდევს. რაც აქამდე უსარგებლოდ ეგდო, ახლა ძვირფას მამულად იქცა!

ადგა ის თავადიშვილი და მთელი თავისი მამული — ტყე-ღრე,

მიწები და მცხოვრებნი თავიანთი სახლ-კარით და საქონლით ლორენის მებატონეს მიჰყიდა!.. ორმოციათასი ოქრო აიღო თურმე. რა ექნა? ის მარტო ღვთისა და კაცის მომადლიერებას ცდილობდა და თავის სულისთვის იღვწოდა და არა ჯიბისთვის! მოსახლეთა უმეტესი ნაწილი ლუტერის სჯულისანი იყვნენ, რადგან თავადმა გამოუცხადა — ჩემს მამულში სრული თავისუფლება ექნება ყველა სარწმუნოებასაო; მერე რაკი ამოდენა ოქრო ჩაიხსრიალა ჯიბეში, სარწმუნოებაც დაავიწყდა და თავის დაპირებაც; და ახალმა ბატონმა — მე ხომ არაფერს დაგპირებივართო, — თავისი კაცები შემოუსია ფალსბურგელებს — აბა, კათოლიკობა მიიღეთ, თორემ ვინც გაკერპდება და თავისებურად ილოცავს ღმერთს, ჩვენი მამულიდან განვდევნით და, რაც კი სარჩო-საბადებელი აქვს, ჩვენდასასარკებლოდ წავართმევთო!

ბევრმა დაუტევა მაშინ ლუტერანობა; ზოგმა კი სარწმუნოება ირჩია და აიყარნენ საწყლები — კაცი, ქალი, ბაღლი და მიდიოდნენ წიალ-წიალით.

რაკი ამ მხრივ ყველაფერი რიგზედ მოიყვანა, ბატონმა ბრძანება გასცა: ჩემს ერთგულს და გულითად საყვარელ ყმებს ვთხოვ, ცოტა რამ დახმარება გამიწიონ, რომ ფალსბურგის ციხეები გავამაგროვო. შემოუსია ხალხს მოურავები და ქუღზედ კაცი გაიყვანეს საიუშავოდ თავიანთ ურმებით და საქონლით. ქალაქს გალავანი შემოავლეს, საფრანგეთის და გერმანიის მხრივ დიდრონი კარები გაუკეთეს; საშენებლად სულ თლილ ქვასა ხმარობდნენ. მთელს გალავანს გარედან გარშემო წყლით სავსე თხრილი შემოუვლეს. შიგ ქალაქში მშვენიერი პალატი ააგეს — აქ სასამართლო იქნება, რომ ობოლი და ქვრივ-ოხერი არავინ დასჩაგროსო; ეკლესია ააშენეს — მღვდელი ძმობასა და ერთობას გვიქადაგებსო — და ზედ ეკლესიის გვერდით გააკეთეს სახლი მოძღვარისთვის, რომ თვალ-ყური ეჭიროს თავის სამწყსოზედაო; ბოლოს მოედანი მოაწყეს, რომ ყური ეგდოთ — ვინ რასა ჰყიდდა და ყველაფერზედ გადასახადი დაედოთ. რაკი ასე კარგად მოაგვარა საქმე, ბატონმა თავისი კაცები გამოგზავნა და დაგვაღო ხარჯი, ბეგარა, ღალა, კულუხი სხვადასხვა გადასახადი და ჯარიმა... რაც კი სურდათ, ვინ იყო პატრონი? და მუშაობდა საწყალი ხალხი, მუშაობდა 1583 წლიდან 1789 წლამდე, სულ წელებზედ ფეხს იდგამდა და წელები კი სიმშვილით ეწოდა; მუშაობდა საწყალი ხალხი ლორენის მებატონისთვის, მუშაობდა მარტო იმიტომ, რომ ვიღაც გერმანელი თავადისთვის დაპირება დაეჯერებინა და მის მამულში დასახლებულიყო.

ამავე დროს მებატონემ ქალაქში სხვადასხვა ამქრები დააწესა

და მით უფრო შეავიწროვა ხალხი. ყველა ხელოსანი ამქრებდად შედგა და, ვაი იმის ბრალი, ვინც ამქარში არ იყო: ლუკმა პურს ვერ იშოვიდა, რადგან ამქარს გარედ მუშაობის ნება არა ჰქონდა. ხელოსნები კიდევ ამქარში — ერთმანეთში წინაღვე შეთანხმდებოდნენ და იმ ფასს თხოულობდნენ, რაც სურდათ.

ხელობის სწავლას სამს, ოთხს და ხშირად ხუთ წელიწადსაც ანდომებდნენ. მერე ამოდენი ხნის შეგირდობის შემდეგ ოსტატისთვის ფული უნდა მიერთმიათ, თორემ თავის დღეში არ დალოცავდა. და რაკი დაილოცებოდა და ამქარში შევიდოდა, თითონაც ისე იქცევოდა, როგორც მას ექცეოდნენ: სულ ტყავს აძრობდა შეგირდებს.

დღეს რომ ხედავთ, აგეთი კი არ იყო ქალაქი. მართალია ძველი ქუჩები, ძველი თლილი ქვით აგებული შენობები უცვლელად დარჩა, მაგრამ ერთ სახლსაც ვერსად ნახავდით, რომ ცოტაც არის შნოიანი ყოფილიყო. უბრალოდ გალესილი სახლები იცოდნენ, წვრილ-წვრილი კარებით და ფანჯრებით. დუქნებს პატარა თაღები ჰქონდა და ზოგან თერძს დაინახავდით თავის ტახტზედ მოკეცილს, ზოგან ფეიქარს, ზოგან ხარაზს...

საზიზღარი რამ იყვნენ მაშინდელი ჯარისკაცნი; ვითომ ქალაქს ამაგრებენო, მაგრამ ნამდვილად კი იმიტომ ჰყავდა მებატონეს, რომ ხალხის აჯანყებისა ეშინოდა. დღეში ერთხელ აკმევდნენ პურს. დადიოდნენ ქუჩა-ქუჩა და ნასუფრალს აგროვებდნენ, რომ უბედურ ჯარისკაცებს საკმელ-სასმელი ჰქონოდათ რამე. ეს ძველი ამბავი კი ნუ გგონიათ: სულ რამდენიმე წელიწადიც არ გასულა მას შემდეგ, რაც ეს სამარცხვინო წესი გადაეარდა და 1789 წელიც დადგა.

უბედური იყო ხალხი: გამხდარი, გაყვითლებული, ღარიბ-ღატაკი; ერთი კაბა დედასაც ეცვა, შვილსაც, შვილიშვილსაც; ისე უფრთხილდებოდნენ, როგორც თვალის სინათლეს.

ქუჩას მოკირწყლულს სადა ნახავდით და ღამე სანათი ხომ სიზმრადაც არავის ენახა. ფანჯრებს შუშის ნაცვლად გაქონილი ქაღალდი ეკრა...

იარგლივ ყველგან სიღარიბე, შიმშილი... და იქვე ოქრომკედლით მოსილი ბატონის შვილები, მოურავი და მათი მხლებლები, თავით ფეხამდე ვერცხლითა და ოქროთი შემკულნი, მძიმედ შეიარაღებულნი, თითქო აგერა საომრად მიდიანო.

ღამშეული ხალხის კვნესა-გოდება... და იქვე ქუბივით ჩასუქებული ბერების თითქმის ტიტველნი, უპერანგონი, მეტი ღვინისაგან ცხვირპირ ალეწილნი თავიანთ მზიარული ღიღინით, მეტადრე როდესაც სურსათით დატვირთულნი მონასტრისაკენ მიბრძანდებოდნენ.

ისე მახსოვს ყველაფერი, თითქო გუშინ იყოვო, და ღმერთს მადლობას ვწირავ: გმადლობ შენ, ღმერთო, რომ დაჩაგრულ ხალხს იმდენი გრძნობა და შეძლება მიეცი, რომ წამოიწია და უღელი მოიხსნა. ღმერთო, რა უბედურნი ვიყავით! განა მარტო ქალაქში, სოფელში უარეს დღეში ვიყავით. ვისაც თავის თვალით არ უნახავს, ვერც კი წარმოიდგენს — რა გაჭირვებაში იყო გლეხკაცი. რასაც მოქალაქე იხდიდა, იმასვე ახდევინებდნენ გლეხკაცსაც და გარდა ამისა ათასი ბეგარა და ღალა სხვა ედო. განა სოფელს ნახავდით, რომ ან საბატონო, ან საეკლესიო არა ყოფილიყო! ჰო და რომ ვმუშაობდით — ან საბატონოდ ვმუშაობდით, ან საეკლესიოდ. გლეხკაცს თავისთვის მარტო ხრიოკებიღა რჩებოდა.

მერე იმ ხრიოკსაც ისე ვერ მოიხმარებდა საწყალი კაცი, როგორც უნდოდა; სახნავი სახნავად უნდა დარჩენილიყო, საძოვარი საძოვრად; ახალს ხომ ვერაფერს გააჩენდა. საძოვარი რომ მოეხნა, მონასტერს ღალა დააკლდებოდა, სახნავს დასტოვებდა საბალახედ და ბატონს დააკლდებოდა; თუ არა-და შერეკავდა ბატონი თავის საქონელს და მოაძოვებდა. გლეხკაცის მიწაში რაც ხეხილი იყო, სულ საბატონოდ იყიდებოდა, თითონ ხელს ვერას ახლებდა; იმას მარტო თვალი უნდა სჭეროდა და თუ გახმებოდა რამე, სამაგიეროდ ახალი უნდა დაერგა და ეხარებინა. ჭირნახულს აჩრდილებდნენ ეს ხეები, მიწას ასუსტებდნენ, თავიანთ ფესვებით ხვნას აძნელებდნენ, მაგრამ გლეხკაცი თევზივით მუხჯად უნდა ყოფილიყო.

ამასთან მებატონეებს ნადირობა უყვარდათ — შესხდებოდნენ ცხენებზედ, გაირეკავდნენ ქორ-მეძებრებს და დაერეოდნენ ყანებს — ისე ააოხრებდნენ, ისე გასთელავდნენ, საცა კი გაივლიდნენ, გეგონებოდა მტერი შემოსევია ქვეყანასაო. გლეხკაცს კი აკრძალული ჰქონდა ნადირის მოკვლა: თავის ვენახში რომ კურდღელი მოექლა — ნადირი ბატონისა იყო — წუთისოფელს გამოასალმებდნენ.

გლეხკაცი კი არა, გლეხკაცისა საქონელიც კი დევნილი იყო. დღით ჯერ ბატონისა და მონასტრის საქონელი გავიდოდა მინდორში და მერე, მხოლოდ ერთი საათის შემდეგ, სოფლის ნახირი მისდევდა უკან და, რასაკვირველია, მშვიერი რჩებოდა.

ყველა მებატონეს და მონასტერს აუარებელი მტრედი ჰყავდა; კალიასავით მოედებოდნენ მტრედები ყანებს და საწყალ კაცს დღიურის მაგივრად ორი დღისა უნდა ეხნა, თუ უნდოდა რომ ცოლშვილი შიმშილით არ ამოსწყდომოდა.

გარდა ამისა ყოველ გლეხკაცს უნდა მიერთმია ბატონისთვის წლის განმავლობაში 15 ჩანახი შერია, ათი დედალი, სამოცდაოთხი კვერცხი; სამი დღე თავად უნდა მოხმარებოდა ბატონს, სამ-სამი

დღე კიდევ ყოველი თავის შვილის ან საქონლისა და ურმის მაგიერ. როგორც კი სჯახლიდან ზარის ხმას გაიგონებდა, უნდა ავარდნილიყო და გაეთიბნა ბატონის საბალახე, ბალახი გაეშალა, გაეხმო და თივა ჯაურებად დაედგა, თუ არა და ააწიოკებდნენ, დედა-ბუღიანად აიკლებდნენ; ბატონი რომ შენობას დაიწყებდა რასმე, გლეხკაცს თავის საქონლით უნდა მიეზიდნა საჭირო ქვა, ხე-ტყე, კირი. ბატონიც თავის წყალობას არ აკლებდა და, როცა ამუშავებდა, გლეხკაცს დღეში ერთ ჭადს აძლევდა და ერთ თავ ხახვსა.

ეს იყო ბატონყმობა.

იქნება არც კი დამიჯეროთ — სასოფლო თორნე გვექონდა, სასოფლო წისქვილი, სასოფლო საწნახელი და ყველას იქ უნდა გვეცხო პური, ყველას იქ უნდა გვეფქვა და გვეწურნა; და რასაკვირველია, ქირასაც კარგს გვახდევინებდნენ. იქნება არ დამიჯეროთ, საცა კი საქონელს დავკლავდით — ტყავი ბატონის ჯალათისა იყო; საცა კი საქონელი დაგვეჩხებოდა, ან დაგვეხოცებოდა, ტყავი მაინც იმისი იყო. და ამოდენა გადასახადს ბოლოს მოსდევდა მეთადი, რომელიც ძირს უთხრიდა უიმისოდაც გაღატაკებულ გლეხკაცის ოჯახს: მოსავლის მეთადი მღვდელს მიჰქონდა. ის არა კმაროდა გლეხკაცისთვის, რომ თავისი ოფლით იმოდენა ბერებს აცხოვრებდა, არა! მეთადიც გაიღე, შენ მაგდენი რად გინდაო!

ვინ მოსთვლის? ყველა რომ მომაგონდეს, რასაც საწყალი გლეხკაცი იხდიდა, მგონი ჩემს დღეშიც ვერ გავათავო.

ისე აწუხებდნენ უბედურს, გეგონებოდათ ბატონმა და სამღვდელოებამ პირობა შეკრეს — გლეხკაცობა ამოვწყვიტოთო — და რას არ ჩჩადიოდნენ, რომ მართლა უკიდურესობამდის მიეყვანათ ის ბედშავი, ისა!

მაგრამ ეგ კიდევ არა კმარა, გლეხკაცს ჯერ ისევ სული უდგასო! მანამ გერმანიისა იყო ლორენი, საქონელსავეთ ქედმოხრილნი ვმუშაობდით და იმოდენა სამსახურს მაინც ვერ ავდიოდით: ბატონსაც ვემსახურებოდით, მოურავსაც, ბატონის კაცსაც, მღვდელსაც, ბერსაც, მონოზანსაც. მაგრამ ლორენი რომ საფრანგეთს შეუერთდა, უარესი დღე დაგვადგა. იმოდენა გაჭირვებას კიდევ ახალი ქირი მოემატა: მეფის სასარგებლოდ დაგვადეს ხარჯი — სამ-სამი აბაზი თითო შვილზედ და მეოცედი მთელი წლის მოსავლისა; ოღონდ მოსავლიდან ჯერ ბატონი წაიღებდა თავისას, მერე მღვდელი, მერე ბერი და დანარჩენიდან — გლეხის წილიდან მეოცედს კიდევ მეფისთვის გვახდევინებდნენ: მოგეხსენებათ მებატონეები და სამღვდელოება არავითარ ხარჯს არ იხდიდნენ. მერე ხარჯი დაადეს თამბაქოს, და ასე გასინჯეთ მარილსაც კი... ამ ხარჯსაც მართო ჩვენ

ვიხილდით, თორემ მებატონეს და სამღვდელოებას ვინ რას გაუბე-
დავდა?

კიდევ კარგი რომ საქმეზედ გამოეყენებინათ რაზედმე! ხომ იმო-
დენა სარჩო შექქონდათ მებატონეებს, ბერებს და მონაზნებს—სა-
ცა კარგი მამული იყო, იმათი იყო, საცა კარგი მოსავალი იყო, იმა-
თი იყო, ჩვენი მარტო შრომა იყო: უნდა მოგვეხნა, დაგვეთესა, მო-
გვემკო და ჭირნახული კი მებატონესთვის მიგვეერთმია. ღიად, იმას
მოგახსენებდით—კიდევ კარგი რომ საქმეზედ მოეხმარებინათ თა-
ვიანთი სიმდიდრე — ან გზები გაეყვანათ, ან რუები გაეჭრათ, ან ჭა-
ობი დაეშროთ, ან მამული გაეპატიურებინათ, სკოლები აეშენებინათ
და საავადმყოფო სახლები, მაშინ კიდევ ჰო — რაღა გვეთქმოდან; მაგ-
რამ უბედურებაც ის იყო, რომ თავიანთი თავისა და პირადი სიამოვ-
ნების გარდა არა სწამდათ რა. ლუი როანელმა იცოდა—ხომ კარდი-
ნალი იყო და სულიერი მამა მთელი ქვეყნისა, —სავერნში ისეთ ქეიფს
ეწეოდა, რომ ერისკაცს გაუჭირდება; გადაჰკრავდა ნუნუას და...
მუშაკაცი დესანახავად ეჯავრებოდა და ვაი იპის ბრალი, ვინც ერთი
დღის სავალზედ არ აუქცევდა გზას — მიახვევდა თავის მხლებლებს
და სულ ტყავს გააძრობდნენ ხოლმე. მებატონეებმა იცოდნენ, მთე-
ლი ქვეყნის ხოხობს გაიჩენდნენ; ნაფუზრებს ქვითკირით შემოჰლო-
ბავდნენ, ზედ შუშის ჭერს დახურავდნენ და თურინჯის ხეებს ინა-
ხავდნენ; ბალებს მარმარილოს ნაქანდაკეევით ამკობდნენ, ყველგან
ჩახრუელას მართავდნენ—მეფეს ვერსალში ასე აქვს და ჩვენც უნდა
გვექონდესო. ქვეყნის ფულებსა ხარჯავდნენ უნამუსო ქალებზედ.
სულ დიბა-ატლასით მორთული დაჰყავდათ ურცხვად, თითქო მაჰ-
მადიანები იყვნენ და ცოლებს ხელსახოცივით იცვლიდნენო. საცა
ქვას ფეხს წამოჰკრავდით, ბერი წამოგარდებოდა: დამშეული მგლე-
ბივით დაწანწალებდნენ სოფელ-სოფელ — ხედავთ, რა გლახაკნი,
ღვთისმოსავნი ვართო, —და მონასტერში კი ქვეყნის უწესოებას და
გარყვნილებას სჩადიოდნენ. სამართალი იმისი იყო, ვინც მეტს
ქრთამს გაიღებდა, მართალი ის იყო, ვინც მეტს დახარჯავდა; ყველ-
გან გარყვნილება, ყველგან გახრწნილება, უსინიდისობა და უღმერ-
თობა! საშინელი დრო იყო! მით უფრო საშინელი, რომ ამოდენა
უბედურებას ქვეყანა ვერ გაუძლებდა, თვით გლეხკაცის ძალით რომ
არ აღჭურვილიყო მებატონე.

მართლაც, რაკი გლეხკაცს, ყმაწვილ ბიჭს ჯარში წაიყვანდნენ,
ისე დაავიწყდებოდა სოფლური გაჭირება, თითქო თავის დღეში სი-
ღარიბე არ უნახავსო; დედ-მამასაც კი დაივიწყებდნენ ხოლმე, თა-
ვის აფიცრების და უფროსის გარდა არავისღა იცნობდნენ და მათ-
თვის დედ-მამას კი არა, ღმერთსაც კი შეებრძოლებოდნენ. მეფე და

მებატონეები, რომელნიც ჯარისკაცებს ინახავდნენ, ქვეყანას ამო-
აწყვეტიხებდნენ, რომ ებრძანებინათ; და ამავე დროს გლეხკაცს
უფლება არა ჰქონდა — აფიცრობა მიეღო: ვილაც წუბაკ გლეხს ვინ
ადირსებდა ეპოლეტებს? სამაგიეროდ მოწყალების თხოვნას არავინ
უშლიდა, თუ ბატონის გულისთვის სადმე ბრძოლაში დაიჭრებოდა,
ამის უფლება კი ყველა ჯარისკაცსა ჰქონდა. საცა კარგ ბიჭს დაი-
ნახავდნენ, ჯარში წაიყვანდნენ — ზოგს წაიტყუებდნენ სხვადასხვა
დაპირებით, ზოგს შუა გზაში გააკავებდნენ და ძალად მიათრევდნენ.
განა მიწას ხეირიან მუშას შეარჩენდნენ? დაბერდებოდა და — წადი
მოწყალეობა ითხოვეო! ჰო და ყველა ხომ ვერ შესძლებს მოწყალების
თხოვნას? ბევრნი გავარდებოდნენ ხოლმე და ავაზაკობას იწყობდ-
ნენ; ერთხელ, მახსოვს, 12 კაცი ჩამოალრჩეს ფალსბურგში. რა ექ-
ნათ? ცუდაობას დაჩვეულნი, ღონე მიხდილნი, ხელმწიფის სამსა-
ხურში დაბერებულნი... რა ექნათ, რომ გროში არავის ეძლეოდა
ხაზინიდან?

სამინელი დრო იყო ჩვენი დრო: მებატონეებს და სამღვდელოე-
ბას ჰქონდა ყველაფერი და ხალხს კი არაფერი.

II

მადლობა ღმერთს, წავიდა ის დრო და გლეხკაცმაც წილი დაიდო
თავის ნაჭირნახულევში. არც მე ჩამოვრჩი სხვებს უკან და აქედან
სამი დღის სავალზედ იციან მოხუცი მიშელის სახლ-კარიც, გადა-
ჭიმული ხოდაბუნებიც, სამი დღის ზვარიც და გუთნეული ხარ-
კამეჩიც.

ბედს ვერ დავემდურები: ჩემი პატარა იაკობი პარიზში პოლი-
ტეხნიკურ სკოლაშია პირველ კურსზედ; ჩემი ქრისტიანე მარტენელ
ტყის მცველსა ჰყავს; ყულიეტა ფორბენსა ჰყავს, — ძაან ყოჩალი ბი-
ჭია, ღვთის წინაშე, და კარგი ალაგიცა აქვს; ჩემი მიშელი, ჩემი იმე-
ლი — რა ვქნა უმცროსია და მგონი იმიტომ მიყვარს ასე ძალიან, —
ექიმობას აპირებს; შარშან ნანსში კიდევ დაიჭირა პირველი — ბა-
შელიეს — ეგზამენი და თუ იშრომა — კაცმა იშრომოს, თორემ შეუ-
ძლებელი არა არის რა.

ამოდენა სიკეთე ერთმა დღემ მომცა, 1789 წელმა. ოთხმოცდა-
ცხრამდე ვინ რას მადირსებდა? ჩემი დღენი შრომით უნდა გამეტა-
რებინა და ჩემი ნაწევ-ნადაგი კი ბატონს უნდა წაეღო. ხშირად
გავჩერდები ზოლმე შიგ შუა დარბაზში და გაშტერებული შევცქერი
აქაურობას, თითქო ჩემი თავისა არა მჯერა. ეს სავსე ოჯახი, ეს
ჩემი მოხუცებული დედაკაცი თავის წვრილფეხობით; ეს ჩემი გადა-

ყრუებული მურა — იქვე ცეცხლის პირას, ნადვერდალში წაუყვია ცხვირი და ისე შემომტკერის, თითქო წარსულს მაგონებს: გახსოვს რა დღეში ვიყავითო? ეს ჩემი ვაშლები — ბიჭმა ბოძი შეუდგა, ტოტები არ დაემტვრესო; ბაღში ფუტკრის ბზუილი, ეზოში გოგობიჭების მხიარული სიმღერა, კალოზედ ჩვენი ძველი ოროველა; აგერ ძნის ურემი მოაქვთ... რა კარგად გადაუტყლაშუნა მეურმემ მოლტი ნიშა ხარს... დიად, ვდგევარ შუა დარბაზში ასე ჩაფიქრებული, მაგონდება ჩვენი ძველი მიწური, ქოხი მაინც ყოფილიყო, სორო იყო, რომელშიაც სცხოვრობდა საწყალი მამაჩემი თავის ცოლ-შვილით; უბრალო ორმო იყო მიწაში ჩათხრილი, ფანჯრის ნაცვლად სანათური ჰქონდა დატოვებული და ზუზუნით ჩამოდიოდა ქარი, წვიმა და თოვლი. ცეცხლს ავანთებდით — კომლი გვახრჩობდა, არ ავანთებდით და სიცივით გაფიჩხებულნი სიკვდილს შევენატრიდით ღმერთსა. მომაგონდება ხოლმე ცხონებული მამაჩემი; მომაგონდება საწყალი დედაჩემი; მომაგონდება იმათი გაჭირებული ცხოვრება, დაუდგრომელი წვა-დაგვა და შიმშილი; შეუწყვეტელი შრომა — ეგება ბაღებს მჭადი და ლობიოს შეჭამადი არ დააკლდეთო; მომაგონდება იმათი დაგლეჯილ-დაფლეთილი კონკები; სასოწარკვეთილი, უიმედო, დაჩაგრული, დამცირებული, ყველასაგან შეურაცხყოფილი ადამიანის სახე და თავითფეხამდე თრთოლა ამიტანს... და თუ მაყურებელი არავინა მყაეს, ცრემლსაც ველარ შევიმაგრებ ხოლმე. თან კი ბრაზი მერევა.

განა ჩემს სიცოცხლეში დამავიწყდება, რა დღეში ვყავდით უბედურები! საქონელს უკეთ ეპყრობიან. სისხლსა გვწოვდნენ. აგერ ოთხმოცი წლის კაცი ვარ, მგონი უნდა დამშვიდებულიყო გული, დაევიწყნა იმოდენი დამცირება, მაგრამ არა, თითქო გუშინ იყო ყველაფერიო — ამიშფოთდება ხოლმე სული და სულ კბილებს ვაკრაჭუნებ. მაგრამ რას იზამთ? ჩვენივე გლეხკაცის შვილი გამოტყვრება ვინმე და გაზეთში წერას დაიწყებს: „1789 წელმა დაგვლუპა, იმ დრომდე ბედნიერნი ვიყავით და მას შემდეგ სულით ხორცამდე დავიღუპენითო; წინად პატიოსნებით სავსე ვიყავით, დულდა და გადმოდოდა გლეხკაცის ოჯახი და ახლა კი, სადღაა ძველი დროვო!“ უსინდისონი! ხელში რომ ჩამივარდება ხოლმე იმათი ნაწერი, ცოფიანივით გავგოღდები და, იმ დროს რომ თითონ დამწერს შევხვდებოდე სადმე, მგონი სისხლი შევანთხიო ზედ!

ჩემი მიშელი მამშვიდებს ხოლმე:

— ნეტავი შენა, პაპა-ჩემო, რა გაჯავრებს? მაგას რომ სწერენ, იმიტომ სწერენ, რომ შესყიდულნი არიან: ხალხი გააბრიყვეთ, იქნება ისევ ძველებურად ბატონყმობა ჩამოვარდესო. რა ქნან, იმათი

ხელობაც ეგ არის — ოღონდ ფული დაანახვე და თუნდა თავის თავის ლანძღვას დასწერენ.

ამაზედ მე უფრო ვბრაზდები:

— როგორ თუ ფული დაანახვეო? 92-დან 99-მდე ასობით კაცი დაეხვრიტეთ მაგათზედ ერთი ათასად უკეთესები, სულ კეთილშობილი, პატიოსნებით სავსე კაცები! დაეხვრიტეთ, იმიტომ, რომ თავის თავს იცავდნენ. და ეგენი რას იცავენ? ეგენი ხომ გლეხკაცები არიან, ჩვენი ძმები? მაშ ჩვენა გვალატობენ რაღა? საკუთარ დედამას ღალატობენ, საკუთარ ცოლ-შვილს და სამშობლოს, ოღონდ ქისა გავიმსოთო?!

მე რომ ხშირად ვკითხულობდე ამ გაზეთებს, ბრაზით გული გამისკდება. ჩემდა საბედნიეროდ, ჩემი დედაკაცი ფრთხილად არის და თუ სადმე თვალი მოჰკრა, მაშინვე ხელიდან წამგლეჯს და დაფხრეწს. მაგრამ რას იზამთ! როგორც ჭირს ვერ დაუქეტავთ კარებს, ისე ამგვარ გაზეთებს: რასაც ერიდებით, ყველგან ის დაგხედებათ.

მეც სწორედ ამიტომ მოვიწადინე დამეწერა გლეხკაცის ისტორია; მინდა ჩვენი წვა-დაგვა აგიწეროთ და მით გავაცრუოთ იმ მოღალატე ვაჟბატონების გესლიანი სიტყვები. დიდი ხანია ეს განზრახვა მაქვს; ვიცი დიდი შრომა მომეღის, მაგრამ თუ სიკეთე გინდა ქვეყნისა, შრომას არ უნდა გაუბოდე. გარდა ამისა მტყუანს სიმართლის კარებამდე უნდა მიჰყვე, თორემ ქვეყანას მართალი ეგონება და სიმართლე დაიჩაგრება. ჰოდა, გავიკეთებ ჩემს სათვალეებს და ვახსენებ ღმერთსა; წელიწადი ვუჯდები საწერკალამს და ამ საქმეს კი დავამთავრებ.

გავერთობი კიდევ. წარსულის და აწმყოს შედარება გამახარებს: სხვა არა იყოს რა თავისუფლება მაინც მოვიპოვეთ. როდი ავჩქარდები, დავიწყებ და თავიდან ბოლომდე სულ რიგზედ ავწერ ყველაფერს; ურიგოდ არა ვარგა რა.

ახლა კი ვიწყებ.

სხვისა რა მოგახსენოთ და მე კი ვერაფერს დამაჯერებს, რომ 1789 წლამდე გლეხკაცი ბედნიერი იყო. მე მოვესწარ იმ ნეტარდროსა, — ეხლა ხომ ამ სიტყვით იხსენიებენ წარსულს ჩვენი მეგაზეთეები — მახსოვს ჩვენი ძველი სოფლები; მახსოვს სასოფლო თორნე, რომელშიც გლეხკაცი წელიწადში ერთხელ, მარტო სააღდგომოდ აცხობდა პურს; მახსოვს სასოფლო საწინახელი, რომელშიც გლეხკაცი სხვისას სწურავდა, ბატონისას და მონასტრისას; მახსოვს თითონ გლეხკაციც — ჩამომხმარი, ჩაყვითლებული, ფეხშიშველი, უპერანგოდ შალის ჩოხაში გახვეული; ცოლი უარეს დღეში ჰყავდა! ზამთარ ზაფხულ ერთი და იგივე ტურტლიანი ჯღანები,

თითონ უარესად ქუჭყიანი — ეხლანდელს რომ ენახა ვისმე, იტყო-
და ტყის ნადირიანო. იქვე ცარიელი ჰადისაგან მუცელ გასიებული
ბავშვები დაბობლავდნენ ტალახში შიშველ-ტიტველნი. მე რომ არა
ვთქვა, განა თვით მებატონეს კი ვერ დავიმოწმებ; ბევრსა ცდილობ-
დნენ, მაგრამ რაც გულის ასარევი იყო, იმათაც გულს ურევდა და
აი რასა სწერს ერთი მათგანი: „წვიმისა და მზის ქვეშ შეუსვენებლად
მუშაობს უბედური ხალხი, ოფლს იწურავს, წლებზედ ფეხს იდ-
გამს, რომ ქვეყანა გამოჰკვებოს და ნუთუ თითონ მუშას შიმშილით
უნდა ვკლავდეთო?“ კარგ გუნებაზედ ბრძანდებოდა, ეტყობა,
ის ბატონი, ეს რომ დასწერა. დასწერა და მეორე დღეს აღარც კი
ახსოვდა, რაც დასწერა.

საქონელს უკეთ ეკიდება ყოველი ქრისტიანი, ვიდრე უწინდელ
დროში გლეხკაცს ეკიდებოდნენ; განა ამის დავიწყება შეიძლება?
აჯერ თვალწინ მიდგას ჩვენი სოფლები და, იქნება არც კი დამი-
ჯეროთ, ჩემს პატარა ბიჭობაში მოხუცებულები ამბობდნენ — უწინ
უარეს დღეში ვიყავითო. მოიგონებდნენ ხოლმე სვედების შემოსე-
ვას, საფრანგეთის და ლორენის ომს, როდესაც ჩამომხრჩვალნი
გლეხკაცები მტევანივით ეკიდნენ ხეებზედ; მოიგონებდნენ ხოლმე
დიღჭირიანობას, რომელმაც თურმე მუსრი გაავლო ქვეყანას; ფი-
ცავდნენ, მთელი დღე რომ გევლო, სულიერ ადამიანს ვერსად ნახავ-
დიო. მოიგონებდნენ ხოლმე გვალვას და ქვეყნის დამშევას. მოიგო-
ნებდნენ წარსულს მოხუცებულები და ღმერთს შეჰალაღებდნენ —
ღმერთო, გვიხსენ ჭირისაგან, ომისაგან და შიმშილისაგანაო! მაგრამ
შიმშილისაგან საწყლები ღმერთმაც ვეღარ იხსნა — ყოველ წელს
შიმშილი იყო. ან რა გააძღობდა? ჩვენს მაზრაში ოცდარვა მღვდე-
ლი იყო, 47 მონასტერი ბერებისა და 19 მონაზვნებისა. ახლა უფ-
როსი სამღვდელოება, ახლა მებატონეები და მათი შინაყმანი! სად
მოვიდოდა იმდენი პური, რომ ამათა ჰყოფნოდა?.. მაშინ ხომ კარ-
ტოფილი არ იცოდნენ და ბედშავ გლეხკაცს მჭადის მეტი არა რჩე-
ბოდა რა და ისიც იმდენი არა ჰქონდა, რომ კუჭი გაეძღო.

გამაძლარი გლეხკაცი ძნელი საპოვნელი იყო.

რასაცა შრომობდა, სულ ბატონისათვის შრომობდა. უნდა მოე-
ხნა ბატონის ნაფუზარი, დაეთესა, გაეთოხნა, მოერწყო, მოემკა, მიე-
ტანა, გაელეწა, გაენიავებინა, პური გაერეცხა და დაეფქვა; თივა მო-
ეტანა, ვენახი დაეზარა, გაემარგლა, მოერწყო, შეეყელა, მოეკრიფა,
დაეწურა, ქვევრები გაერეცხა; სულ ბატონის მამულს უნდებოდა,
მანამ დრო იყო მუშაობისა. თავისს ცოლ-შვილისთვის არაფერი!
დადგებოდა შემოდგომა, ბატონი თავისს მოსავალს დააბინავებინებ-
და თუ არა, გლეხკაცი სხვაგან მიდიოდა. მშვიერი, ტიტველი შინ ყო-

ფილიყო თუ გარეთ, სულ ერთი არ იყო? გარეთ განიკითხავდა ვინმე მაინც.

მაგრამ ბერებმა ყაყანი მორთეს: თუ კი ქვეყანა მათხოვრობას დაიწყებს, ჩვენ რაღა გვერგებო! გლეხკაცს წიალი აუკრძალეთ, თორემ ჩვენ აქედან ავიყრებით და ჰეშმარიტი სარწმუნოება დაილუპებო! მაშინ ბატონმა მოურავმა და მამასახლისმა ქალაქისამ ბრძანება გასცეს, რომლითაც გლეხკაცს ეკრძალებოდა მათხოვრობა. ბერებმა თავისკენ მიიმხრეს ჯარი და ვაი იმის ბრალი, ვისაც ხელგაწვდილს მიასწრებდნენ — საუკუნოდ გამოასალმებდნენ თავის არემარეს; მაგრამ შიშმილი უფრო მძლავრი ყოფილა, ვიდრე დაპატიმრების შიში და ხშირად მთელი სოფელი მიდიოდა ლუკმა პურის სათხოვნელად.

ღმერთო; რავგარ ამცირებს ადამიანს სიღარიბე! დიად, სიღარიბე და ცუდი მაგალითი. ყველგან და ყოველთვის მათხოვარს ხედავდა გლეხკაცი — ბერებს; ზორბა ახოვანი ბიჭები გადიკიდებდნენ გუდას და დადიოდნენ სოფელ-სოფელ ხელგაწვდილნი და ფეხშიშველნი. რა სჭირდათ საიმიისო? ერთ ბარის დაკვრახედ, რომ მოენდომებინათ, დღიურს გადააბრუნებდნენ. მაგრამ არა, დადიოდნენ ასე, ყველას სახლში უვარდებოდნენ და მდაბლად, უსირცხვილოდ მოწყალებას თხოულობდნენ; ხედავდა ამგვარს მაგალითს მშვიერ-მწყურვალნი გლეხკაცი და, — თუ კი შემძლებელი კადრულობს, მე ხომ თვით ღმერთი მიბრძანებს მოწყალების თხოვნასაო!

საუბედუროდ, ერთი რომ თხოულობს, თუნდა მართლა ძალიანაც უჭირდეს, მეორეს უნდა ჰქონდეს რამე, რომ განიკითხოს, ამასთან მოყვასის სიყვარულიც უნდა გაეგებოდეს. სად იყო განკითხვა? ქვეყანა იმას გაიძახდა, რომ ყველა თავისთვის და ღმერთი ყველას თვისაო.

დადგებოდა ზამთარი და ხმა გავარდებოდა: ურმებით პური მიჰქონებიათ ქალაქისკენ, დასცემიან ვილაც მაწანწალები და გაუძარცვავთო. მაშინვე მღევარს გაუყენებდნენ და საქმე საღრჩობელათი გათავდებოდა, რომელზედაც ხშირად ათობით ერთად აღრჩობდნენ დაჭერილებს.

სწორედ იმ საშინელ დროს სცხოვრობდა ერთი საწყალი მუშაკაცი ცოლით და ექვსი ერთი-ერთმანეთზედ წვრილი შვილით; საწყალი, იმიტომ რომ სულს იქით არა ებადა რა: გროში ფული არსად ჰქონდა, ერთი ხელის დადება მამული არ ებადა; სხვა საქონელს ნუ იტყვი, ქათამი არა ჰყავდა; თავის ხელობის გარდა ცხოვრებისათვის სხვა საღსარი არა ჰქონდა რა: უნდა ეწნა გოღორი, მოსაკიდი, კალაბი, კოკოზა და სხვა... არავითარი იმედი, რომ თითონ თუ არა,

შვილებს მაინც უკეთესი დღე მოელოდათ; იმიტომ რომ ასე უნდა ყოფილიყო: ზოგი კეთილშობილად იბადებოდა და ქვეყანა იმისი იყო, ზოგი გლეხკაცად იბადებოდა და უკუნითი უკუნიისამდე სხვის მონად და ყმად უნდა დარჩენილიყო.

მომავონდება ხოლმე ჩვენი ოჯახის შიმშილი, ზამთრის გრძელი დამეები უცეცხლოდ და ულოგინოდ, გულის ფანცქალი — არიქა გზირი მოდის, დაგვაწიოკებს დედა-ბუღიანადაო! მაგრამ დადგებოდა გაზაფხული და დიდი ხნის ყინვების შემდეგ ისევ მზეს ვეღარსებოდით; შემოისროდა ჩვენს მიწურში მზე სტუმრად თავის სხივებს და ნათელს მოჰფენდა ჩვენს ბნელს ორმოს; დაგვივლიდა გათოშილ ტანში ქვეყნის მაცხოვრებელი სიტბო, დაგვაფიწყდებოდა ჩვენი შავი და ბნელი ყოფა და მაინც სიცოცხლეს შევხაროდით: გარედ გავიღოდით დიდით პატარამდე და ისეთი სიცილი და მხიარული ყიჟინა გაგვქონდა ბალებს, თითქო ჩვენზედ ბედნიერი არავინ არისო. რა არის სიყმაწვილე!

ან არა და შორიდან მამაჩემს დავინახავდით ტყიდან მომავალს. ქუდის ჩაჩი თავს ვერ უფარავს და ქარი უთამაშებს უღროოდ გათეთრებულს თმას; ზურგზედ უშველგებელი კონა წნელი ჰკიდია; წელში თავის წალღუნა გაურჰკვია. მოდის დაღლილ-დაქანცული, წელში მოხრილი... მაგრამ დაგვინახავს თუ არა, სახე გაუბრწყინდება, პირს ღიმილი მოუვა. ჩვენც გავკურცხლავდით — ვინ წინა და ვინ უკანა, მისაგებებლად გაჩერდებოდა, ერთი ხელით აყუდებულ კონას შეიმაგრებდა და მეორეთი გულში ჩაგვიკრავდა სათითაოდ. ჩვენ ხომ ბედნიერნი ვიყავით და იმ წამს იმასაც დავავიწყებდით ხოლმე იმოდენა ვარამს.

რა გულკეთილი რამ იყო! რა ძალიან ვუყვარდით! დედაჩემი! საწყალი დედაჩემი! ჯერ ორმოცი წლისა საღ იყო, რომ სულ მთლად გათეთრებულიყო, წელში მოხრილიყო იმოდენა გაჭირებისაგან, მაგრამ მაინც ყოჩაღად იყო და მთელი დღე ისე დატრიალებდა, ერთს წამს არ შეისვენებდა; ხან ვისა შველოდა და ხან ვისა, ამით მაინც დავებმარო ჩემს წვრილ-შვილსაო. დადამდებოდა და კიდევ სხვის ჯარას მიუჯდებოდა და სხვის მატყლს ართავდა. იმდენი ვიყავით, ჭამა არ გვინდოდა? ახლა სხვადასხვა ხარჯი და გადასახადი სთქვით. გასტუმრება არ უნდოდა? ღმერთო, რა მამაცი უნდა იყოს ადამიანი, რომ თავისი დღენი შრომაში გაატაროს და ჯილდოს კი მარტომმარტო საიქიოს ელოდეს?

ეს კიდევ არაფერი. უბედურებს ერთი კიდევ სხვა ჭირი სჭირდათ — საერთო ჭირი ყოველი გლეხი კაცისა. ვალი ჰქონდათ.

ჯერ ისევ ბავშვი ვიყავ, მაგრამ ისე კარგად მახსოვს, თითქო

გუშინ იყო. მამაჩემი ქალაქს ბაზრობაზე გასაყიდად კალათებს წაიღებდა, რომ დაბრუნდებოდა ხურჯინიდან ნავაქრს იღებდა და თანაც იტყოდა ხოლმე:

— ეს მარილი, ეს ოსპი... მაგრამ გროში აღარსად ჩამრჩა, გროში. ღმერთო, ღმერთო! რა იმედი მქონდა, ცოტა რამ უნდა გადავარჩინო რობენისათვის მეთქი.

ჩვენი ქვეყნის სისხლის მსმელი იყო ეს რობენი. მიტელობრონში იდგა და ქვეყანა თავის ბრჭყალებში ჰყავდა გაკავებული. ერთი საშინელი, დაბალ-დაბალი, სქელი, შუახნის კაცი იყო. გათხლეშილი ცხვირი, მომცრო მრგვალი თვალები, უზარმაზარი პირი და ყურები, ზაფრანის ფერი პირისახე... დადიოდა სოფელ-სოფელ, ყოველთვის ფეხით, ზურგზედ გუდა ეკიდა, ხელში კომბალი, უკან კიდევ უშველებელი ძალი მისდევდა, დადიოდა და თავის ფულების სარგებელს აგროვებდა; კაცი არ იყო, რომ იმისი არა მართებოდარა; ზოგს სამი მანეთი, ზოგს ექვსი, ზოგს თუმანი და თუმან ნახევარიც. შევიდოდა სახლში და თუ აღთქმული სარგებელი მზად არ იყო, თავის გუდაში ჩაუძახებდა, რასაც კი მოახელებდა: ათიოდე კვერცხი, ერთი ჯამი კარაქი, ერთი ჩარექა არაყი, კვერეული ყველი — ეს სარგებლის სარგებელი იყო. რა გვექნა? დეე დაგვარბიოს, ოლონდ ნუ გვიჩივლებს და ბოქაულს ნუ შემოგვისევსო.

რამდენი უბედურია, დღესაც რომ ზედ კისერზედ აზის ამგვარი მოვახშე და უღმერთოდ სისხლსა სწოვს. რამდენია უნუგეშო გლეხკაცი, რომ თავის ნამუშავარს ერთიანად ვალში აძლევს ვილაც ღმერთზედ ხელაღებულს უსინდისოს და ვალს კი არაფერი აკლდება?

ჩვენსა რობენი ვერაფერს იპოვიდა ხოლმე, რომ გუდაში ეკრა და აპიტომ არც კი შემოდიოდა. კარს მოგვირაკუნებდა და შემოგვძახებდა:

— პეტრე! ჰაი, პეტრე!

წამოხტებოდა მამაჩემი, გავარდებოდა გარეთ და ქუდმოხდილი, ძალზედ აკანკალებული თავს დაუკრავდა.

— ბატონო რობენ...

— გამარჯობა შენი! — ვენახი ლამის გამიხმეს, მოდი ერთი ორიოდ დღე მომეხმარე, ერთი კარგად მოვრწყათ. ჰა?

— გიახლებით, ბატონო რობენ.

— ხვალ დილით?

— დიად, ბატონო რობენ.

რობენი თავის გზას გაუდგებოდა. შემოვიდოდა მამაჩემი შინ მომაკვდავივით ფერმიხდილი და ისევ კალათის წვნას შეუდგებოდა:

პირმოკუმული. თავჩაქინდრული კრინტს არ დასძრავდა. მეორე დღეს დილა აღრიანად გუდაში ერთ ჭადს ჩაიდებდა, ბარს გაიდებდა მხარზედ და რობენის ვენახისაკენ გასწევდა..

ილაჯგაწყვეტილი დედაჩემი კი ბედს ემდუროდა:

— ნეტამც არ გათენებულიყო ის დღე, როდესაც ჩვენ თხის ყიდვა მოვიწადინეთ. გენაცვალეთ, ამისთანა ჭირი გინახავთ! ლამის ერთმა თხამ სულ თან გადაგვიტანოს! შვილები გამიწყდეს, თუ ათჯერ მაინც არ გადაგვეხადოს იმ თხის ფასი! თხაც მოგვიკვდა და ვალიც ვალად გვადევს... არა, ამისთანა უბედურება გინახავთ!..

სასოწარკვეთილი ზევით აღაპყრობდა ხოლმე ხელებს და ღმერთს სამართალსა სთხოვდა.

სადამოხედ მამაჩემი ხელცარიელი მოდიოდა შინ. ასე ამუშავებდა რობენი და ერთი-ორი თვით თავს დაანებებდა; მაგრამ დიდი ხნით კი არა: როგორც კი თავისუფლად ამოისუნთქავდა საწყალი მამაჩემი, მგონი რობენმა თავი დამანებაო! და კარებს კი მოუტაკუნებდა:

— პეტრე! ჰაი, პეტრე!

იტყვიან — იმ კაცს სენი სჭირს რამე და გულს უღრღნის და სისხლს უშრობსო. ღარიბი კაცის სენი კიდევ ეს არის — მოვანშე, რომელიც ფულს გასესხებს, ვითომ სიკეთესაც გიშვრება და საუკუნოდ ყურმოჭრილ ყმად კი გიხდის: დაგაწვება ის უღმერთო ისა და გწუწნის წურბელასავით! სიკვდილამდე იმის ხელიდან ვეღარა გიხსნის რა, მოკვდები და შენს ობოლ ცოლ-შვილს უარესს უზამს.

განა შემძლიან ავიწეროთ, რამდენი ტანჯვა და მწუხარება აიტანეს ჩვენებმა ამ რობენისაგან? მოსვენება აღარა ჰქონდათ იმისი შიშით, ძილი აღარა ჰქონდათ, დღითი დღე ბერდებოდნენ და წელში იხრებოდნენ; ერთად ერთი იმედილა დარჩენოდათ: თუ ერთს რომელსამე კენჭი ასცდაო, ჩვენსას იტყოდნენ ხოლმე, ჯარში სხვის მაგვირად გავგზავნით და აღებულ ფულს ვალში მივცემთო.

ექვსნი ვიყავით, ოთხი ვაჟი და ორი ქალი: ნიკო, ელისაბედი, მე, კლავდი, მატურიანი და პატარა სტეფანე; უკანასკნელი სნეული ბავშვი იყო, დაკლანჭული ფეხები ჰქონდა და გამხდარი. ჩაყვითლებული იყო; ჩვენ სოფელში საწყალს „პატარა იხვს“ ეძახდნენ, რადგან მართლა იხვივით დაბაჯბაჯებდა; სხვანი სულ კარგად ვიყავით.

დაგვაცქერდებოდა დედაჩემი, ნიკოს, კლავდის და მე და იტყოდა:

— ნუ სწუხარ, ჩემო პეტრე. ისე როგორ გავგიწყრება ღმერთი, რომ სამივეს ერგოს კენჭი. ერთი მაინც გადარჩება და მაშინ კი მი-

ფთხილდეს რობენი! ვალს გადაეუხსნი თუ არა, ემაგ წალდით ზედ შუაზედ გაეუკობ თავსა!

მართლა უბედური უნდა იყოს აღამიანი, რომ ასეთი აზრები მოსდიოდეს. მამა არას უპასუხებდა და ჩვენ კიდევ სრულიად სამართლიანად მიგვაჩნდა დედამისის სიტყვები. დარწმუნებულნი ვიყავით, რომ ჩვენ ჩვენი დედ-მამის საკუთრება ვართ, როგორც საქონელი. რას იზამთ: უბედურება ისე აუხვევს ხოლმე კაცს თვალებს, რომ სწორედ ველარას ხელაგს. 29-მდე მებატონეების და მოქალაქეების გარდა ყველანი ასევე უყურებდნენ თავის შვილებს: ჩვენი საკუთრებაა, როგორც გვინდა ისე მოვიხმართ, საცა გვინდა, იქ ვუკრამთ თავსა, თუნდა ჯარისკაცად მივყიდით ვისმეო. ხალხის მტრებს ძალიან მოსწონთ ამგვარი შეხედულება დედ-მამისა: ხედავთ, რა ნეტარი დრო ყოფილა, რა ტკბილი განწყობილება ყოფილა მამა-შვილს შუა, რა პატივისმცემელი და მორჩილი ყოფილა უნცროსი უმფროსისათ!

უბედური მამაჩემი იმდენად გულკეთილი და შეგნებული კაცი იყო, რომ თავისდღეში შვილის გაყიდვას არ იფიქრებდა. რამდენჯერ მომხდარა, შუა ზამთარში, როცა შიმშილი ძალიან შეგვაწუხებდა და მოწყალეების სათხოვნელად გავვისტუმრებდა, ცხარე ცრემლითა ტიროდა ხოლმე. პატარა სტეფანეს თავის დღეში არსად გაუშვებდნენ, მეტადღე ავდარში. დიდი ხანი არც მე მივლია: სულ სამჯერ-ოთხჯერ თუ ვყოფილვარ ქალაქში, რადგან რვა წლისა არც კი ვიყავი ჯერ, რომ ნათლიაჩემმა ივანე ლერუმ დამიჭირა მწყემსად. ჩვენი სოფლის ბოლოში ქალაქის გზაზედ დუქანი და გომები ჰქონდა ნათლიაჩემს და საღამოზედ, საქონელს რომ დავაბინავებდი, მართო მაშინდა მივდიოდი შინ.

დიდი ხნის ამბავს მოგახსენებთ, მაგრამ ისე მახსოვს ყველაფერი, თითქო თვალწინ მიდგასო: ნათლიაჩემს დუქნის კედელზედ სამი მტრედი ეხატა და უშველებელი ასოებით ეწერა „სამი მტრედი“. დუქნის ბანიდან შორს, შორს, ქალაქი მოიანდა, თითქო ცაზედ შავი ლაქი დაუსვამთო. დუქნის წინ ეზოში პატარა სამჭედლო გქონდა და უკან კიდევ დაქანებული საბალახე; შიგ ერთი უზარმაზარი მუხა იდგა და მუხის ძირში კამკამა წყარო გამოდიოდა. მოჩხრიალებდა წმინდა წყალი, მთელს მაწას გარშემო უვლიდა და ამწვანებდა. მუხა კიდევ საამოდ აჩრდილებდა იქაურობას. ერთხელ ჯარს გაველო და უფროსებს საქეფოდ მუხის ჩრდილში სკამები გაეკეთებინებინათ და მას შემდეგ, როცა კი ჩვენ სოფელში ჯარი გაჩერდებოდა რამე, უფროსნი ამ მუხის ჩრდილში შეექცეოდნენ. ისეთი საუცხოო ადგილი იყო მართლა ეს ჩრდილი თავის წყაროთი, რომ ახლო-მახლო

მებატონეები და იმათი ქალები ყოველ კვირა მოდიოდნენ „ტივო-ლიში“ წყაროს დასაღვად და დროს გასატარებლად.

ერთხელ მახსოვს დიდი საზოგადოება შეიყარა საქეიფოდ მუხის ქვეშ. ზემოდ წყაროს სათავეში ბატონი დოზე იდგა — დიდი, გამოჩენილი მებატონე იყო — სავსე ჩარქვა ეჭირა ხელში და ლათინურად რაღასაც ბრძანებდა. ქვემოდ ქალები ისხდნენ ბალახზედ თავიანთ ხაბარდებით, ატლასის კაბებით, ატლასისავე ფენსაცმელით, და გულმოდგინეთ ყურს უგდებდნენ და კისკისებდნენ, თუმცა ლათინურისა არა ესმოდათ რა. ერთობ კი ცოტას გადაჰკრავდნენ, მერე წამოდგებოდა ვინმე, ჭიანურს დაუკრავდა და გაიმართებოდა ლხინი. წამოდგებოდნენ იმოდენა მებატონეები, სულ დიდი გვარის შვილები, კლავნიით და ზღაზვნით, ტანისა და ფეხის თამაშით მიბრძანდებოდნენ ქალებთან და მდაბლად თავს დაუკრავდნენ და ხელს გაუწოდებდნენ. ქალებიც ერთი პრანჰვა-გრეხით, თვალებისა და ტუჩების ღმეჭით წამოდგებოდნენ, ხელს მისცემდნენ და დაიწყებდნენ ხეტიალს და პროწიალს; იმდენს იპროწილებდნენ, მანამ თავბრუ დაეხვეოდათ.

მაშინ უფრო დინჯი, დარბაისლური ცეკვა იცოდნენ! მოსამსახურენი — მოხუცებული ჯარისკაცი და შინა ყმანი კი სუფრას უმატებდნენ — ეს ქადა-ნაზუქიო, ეს შემწვარი ინდოურებიო, ეს სუკებიო, ეს წითელი ღვინოო.

გარედან კი მტვრიან ქუჩიდან მშვიერი ხალხი შესცქეროდა და პირს ნერწყვი უშრებოდა. უყურებდნენ დამშეული სოფლელები ბატონების ქეიფს, ბატონებისაგან საკმელ-სასამელის გაოხრებას — ღვთის მოცემულს სულ აქეთ-იქით აქცევდნენ — და გულში ხელს იცემდნენ: აჰ, ნეტავი აიმ სუფრაზედ ერთ წამს დამსვა და მე ვიცი, როგორ განოვიმსებ ფერდებსაო!

დაღამდებოდა და წამოიშლებოდნენ მოქეიფენი, ყმაწვილები ხელს გაუწვდიდნენ ქალებს, ეტლებში ჩასხამდნენ და ქალაქისაკენ მიეშურებოდნენ.

ვინ არა ყოფილა ნათლიაჩემის მუხის ქვეშ? საცა გამოჩენილი და შემძლებელი კაცი იყო ვინმე, აქ უნდა მოსულიყო დროს გასატარებლად — მებატონეები, აფიცრები, კარდინალები, მსაჯულები, ვინ იცის? სადღა არიან ნეტავი თავიანთ ფქვილწაყრილი კულულებით? მგონი იმ დროს მოწამედ მეღა ვარ ცოცხალი და, მე რომ არ მეხსენებინა, არაგინ ახსენებდა ქვეყანაზედ, როგორადაც შარშანდელს შემოდგომის ფოთოლს.

რაკი ნათლიაჩემს დავუდექ მწყემსად, შიში აღარაფრისა მქონდა: პურს ნათლიაჩემთან ეკამდი და ქალამანი უცვეთი მეძლეოდა. რამ-

დენი ჩემი ტოლი ბიჭი შემომნატროდა — ნეტავი მეც დამიპიროს ვინმე, კუქს მაინც გავიძღობო. მეც კი ვცდილობდი ყველაფრით დამეკმაყოფილებინა ნათლიაჩემი და ნათლიჯალაბი ეკატერინე; ასე გასინჯეთ ქარგალ ვალენტინს და მოსამსახურე გოგოს ნიკოლსაც კი სულ თავს ვეველებოდი; ყველა მადლიერი მყავდა. ერთი კი დავეძახე ვისმე და ჩიტივით მივეფრინდებოდი. ხან სამკედლოში საბერველს მაწვევინებდნენ, ხან საბძელსუნდ ამგზავნიდნენ — საქონელს ჩალა ჩამოუყარეო; კატა რა არის, ნათლიაჩემის კატაც კი მომადლიერებული მყავდა. სუფრის ბოლოს რომ გამოვიჭიმებოდი ხოლმე და სავსე ჯამს შექამაღს მომიდგამდა დიასახლისი, ზედაც კონბოსტოს მწნილს!.. პური ხომ თავსაყრელი გვექონდა... არა, ღმერთი არ გამიწყრებოდა, გამეჯავრებინა ვინმე?! კვირაობით კიდეც სახსნილოს გააკეთებდნენ ხოლმე და ჩემს ნებისად, ძლომამდე მაქმევდნენ ყველაფერს. დამშვიდებული მაინც ვიყავ, სიღარიბე ლუქმას არ მითვლის მეთქი.

კაცი რომ კარგ ალაგს მოხვდეს, ფეხი უნდა მოიკიდოს. ჰოლად როგორც კი ინათებდა — ზაფხულში ოთხ საათზედ და ზამთარში ხუთზედ, მე ნათლიაჩემის ბოსელთან ვიყავი და კარს ვარაკუნებდი. გომში ჯერ ყველას ეძინა, საქონელი ზარმაცად იცოხნებოდა. მოჯამაგირე მაშინვე გაიღვიძებდა და ჯერ ისევ ბნელი ბოსელის კარს გამიღებდა. შევიდოდი, ბოსელიდან სამზარეულოში ავიდოდი, ნაცარს გავექეჭდი, ნაკვერჩხალს გავაჩაღებდი და ცეცხლს ავანთებდი. და მანამ დედაკაცი ძროხებსა სწველიდა, მე ნიჩაბს ავიღებდი და ლამაზად დავაკრიალებდი ბოსელს. მერე საბძელიდან მგზავრების ცხენებისთვის და საქონელისთვის ბზე გამომქონდა. ადგებოდნენ და გაუკვირდებოდათ, საქონელს მოვლილს რომ ნახავდნენ. ამასობაში მგზავრებიც შეაბამდნენ ხოლმე და მე მდაბლად ქულს ვუხილდი, მშვიდობის მგზავრობა მოგცეთ მეთქი ღმერთმა.

ჩვენი ვაჭარი კაცი ხომ იცით რა არის: ხშირად პასუხს არც კი მადირსებდნენ, ზედაც არ შემომხედავდნენ; მაგრამ ვიცოდი, რომ კმაყოფილნი მიდიოდნენ, საყვედურს ვერაფრისას გვეტყოდნენ და მეც მეტი არა მინდოდა რა.

რომ შემზადდებოდა ყველაფერი, დედაკაცი ერთ ჯამ დოს მომაწოდებდა ან მაწონს, ჩავიყრიდი შიგ პურსა და თვალის დახამხამებზედ გადავავორებდი. გულაში კიდეც ერთ პურს ჩამიღებდა, ერთ-ორ თავ ხახვს, ხანდახან ერთ კვერცხსაც ან ერთ ნაჭერ ყველს, წამოვავლებდი ხელს ჩემ შოლტს და გავირეკავდი საქონელს. წინ მოზერობა მიკუნტრუშებდა, უკან ღინჯად მუშა საქონელი მისდევ-

და და ისეთი რჩევით გამივლიდნენ წინა. რომ ყველას ცალ-ცალკე მივეალერსებოდი ხოლმე.

თუ ქალაქიდან ბორნისკენ საბანაოდ ყოფილხართ როდისმე, ადვილად მიხვდებით. საით დამყავდა საძოვრად საქონელი: ჭაობებში შევრეკავდი და აქა-იქ თუ მოწინწინილდნენ რასმე. იქ უნდა მიმერეკნა, რადგან უფასოდ სხვაგან არსად გვიშვებდნენ; ტყეში მარიაამობისთვის გასვლაჲდე საქონელს არ გაგვატარებინებდნენ—ტოტები ჯერ ნორჩი აქვს ხეს, ჯერ არ გამავრებიან; მარიაამობისთვის გასულს კი შევრეკდით ხოლმე შიგ დამშეულ საქონელს და, გაქვს ღვთის წყალობა, ისინი ძღებოდნენ. მანამ კი ჭაობში, ლაფში უნდა ვყოფილიყავით.

ქალაქელი მეღორეც ხშირად ამორეკდა ხოლმე თავის ღორებს — მეტადრე სიცხეში; დაერეოდნენ ჭაობს ღრუტუნით, ღინგს ტლაპოში ჩაჰყოფდნენ და ისეთი მყაყოფილება ეტყობოდათ პატარა ვიწრო თვალებში, რომ ჩემდა უნებურად სიცილს მგვრიდა: — დახე, დახე! ღორის სამოთხე ლაფი ყოფილა-მეთქი.

ჩვენი საქონელი კი მთელ არემარეს მოეფინებოდა. გამოვუდგებოდი, ზოგს შოლტის ტკაცუნით ვაშინებდი, ზოგს ქვით, ზოგს კომბალს ვესროდი. ახლა სხვა სოფლის მწყემსებიც მოვიდოდნენ: — ერთს ორთავ თვალთ ბრმა ძროხა წამოეყვანა, მეორეს ზურგ წამხდარი ცხენი და ერთობ კი ყველა გუდა გამოფხეკილი მოდიოდა. კიდევ კარგი, თუ გზაზედ სტაფილოს მოახელებდნენ სადმე ან თალგამს, თუ არა და შოლტის ტყლაშუნი თუ გააძლობდა, თორემ სხვა არა ებადათ რა. მაგრამ რა? სტაფილოსაც შოვნა უნდოდა! ვაი იმის ბრალი, ვისაც მეველე მოასწრებდა: კისერზედ ჰინჰარს შემოაჩვენებდნენ და ისე შემოატარებდნენ მთელი სოფლის ქუჩებს. მაგრამ შიმშილი უარესი იყო. მეორედაც იქნება გადარჩენილიყო, მესამედ კი შიგ შუა სოფელში, მოედანზედ, ისიც ბაზრობა დღეს გაატიტვლებდნენ და ისე გაწყებლავდნენ, ისე რომ... ისე გავარჯიშებული ჰქონდა ჯალათს ხელი, რომ ყოველ დაკვრაზე მართლა ტყავს აძრობდა შოლტით. კიდევ დაიჭერდნენ და მაშინ კი ცემის შემდეგ ციხეში უკრავდნენ თავს.

ხშირად მოხდება ხოლმე, წამოდგება ვინმე მდიდარი კაცი და ლანძღავს ახალს დროებას. ლანძღავს და რა ენით ლანძღავს! მე კი უცებ მომაგონდება, რომ ამ ვაჟბატონის პაპა და ბიძა სტაფილოს ქურდობისათვის გაწყებლეს სწორედ იმ დროს, რომელსაც ასე შენატრის და სიცილს ველარ ვიკავებ: საკვირველ არიან, ადამიანო, საქმენი შენნი!

არა, ისიც კი უნდა მოგახსენოთ, რომ ძველი დრო მეც მენანება.

ბატონყმობა კი არ მენანება თავისი გზირით, მოუავეით, ჯალათით და ბერებით. ოჰ, ღმერთმა დამიფაროს! მენანება იმიტომ, რომ ყმაწვილი ვიყავ. რა ვუყოთ, რომ მებატონეები არ ვარგოდნენ, ქვეყანა კი წალკოტივით მშვენიერი იყო და! შევერევოდი ხოლმე ტყესა, წინ საქონელი მიმიდიოდა, გავერთობოდი; მერე ჩემი ძმა ნიკო მოვიდოდა, კლავდი, ელისაბედი, მატურინი, გუდას წამგლეჯდნენ. პურს ამოიღებდნენ... სულ კი არ შემიჭამდნენ, იცოდნენ, რომ ნათლიაჩემს ხუმრობა არ უყვარდა და პირდაპირ სასლში მიეჭრებოდა: ის ბაჭი მშვიერი რად მოკალითო?!

მე ჩემი გულითა ვშველოდი, ნიკო თავის მუშტით. განა პატარა ბიჭს ნახავდით საღმე, რომ წელსზედ შურდული არ ჰქონიყო? ისეთ ომს ავუტეხდით ხოლმე ერთი სოფლის ბიჭები მეორისას, ისეთ ქვიშს სროლას ავტეხდით, რომ სულ ლაწა-ლუწი გაჰქონდა იჭაურობას. შურდულით რომ ვერას გავხდებოდით, მერე კომბლებითაც დავერევოდით ერთმანეთს. მაგრამ ვის შეეძლო ხელი ეხლო ჩემთვის? მოვარდებოდა ჩვენი ნიკო თავის ცალ ტოტა შარვლით და ჯარისკაცის უკალთო ახალუხით, ფეხშიშველა და თავშიშველა, მოვარდებოდა და ბღღვირს ადენდა! ჩვენი სოფლის ბიჭებს ყოველთვის ის მიუძღოდა წინ. ერთი კი შესძახებდა, აბა ბიჭებო, თქვენი ჰირიმეთო და რაც უნდა ბევრნი ყოფილიყვნენ წინააღმდეგნი, მაინც სულ კუდით ქვას ასროლინებდა. გადახედავდა ბიჭებს და შესძახებდა:

— თქვენ ეი... ვინც კი ხელს ახლებს მიშელის!.. გამიფთხილდეს!.. მეც გაგიყებით მიყვარდა, ღვთის წინაშე. ცოტა არ იყოს მწყინდა, ხახვს რომ წამართმევდა ხოლმე, მაგრამ რა? ძმა იყო და!

ხანდახან საქონელსაც ვაჭიდებდით ხოლმე. გადგებოდა განზედ ჩვენი ნიკო და ისეთი აშბავი ჰქონდა, გეგონებოდათ მეორედ მოსვლა არისო.

— არიქათ, ნიშამ აჯობა! ჰა, ყოჩაღ! ჰა, შენი ღმერთის ჰირიმე! ცოტა კიდეც! ცოტა კიდეც!

ბევრი კარგი ხარისთვის მოგვიმტვრევია რქა, ბევრი დავვისახიჩრებია.

მზე შეგვაწუხებდა და ჩრდილს მოვძებნიდით და იქ დავყრიდით საქონელს. ჩვენც იქვე მივეყრებოდით, საქონელზედვე მივდებდით თავს, ხან რას ვიტყოდით, ხან რას; ხან სიმღერას დავძახებდით.

როგორც შებინდებოდა და შინისკენ გავწევდით, ისეთი მტვერი ავარდებოდა, გეგონებოდათ მტრის ჯარი შემოსევია ქვეყანასაო. მივრეკავდი საქონელს, დავაბინავებდი, ბზეს დავუყრიდი და სამზარეულოში ავიდოდი. ვახშმად ნათლიაჩემთან ვიყავი ხოლმე. ზა-

ფხულში, როცა სამჭედლოში ვშველოდი, ხშირად დიდ ვახშობამდე დამიგვიანდებოდა; დასაძინებლად კი მამიჩემის ქოხს მივატანდი სოფლის მეორე მხარეზედ.

III

ამგვერად გაირბინა ორმა წელიწადმა. ჩემი და-ძმანი მოწყალე-ბაზედ დაიარებოდნენ, მე სულ იმის ზრუნვაში ვიყავი, ნათლიაჩემი მესიამოვნებინა. ჯერ ათის წლისა არ ვიყავი, რომ ხელობის სწავლა მოვიწოდებ და დღე და ღამ იმასლა ვნატრობდი, ნეტავი ხელობა მასწავლა რამე, რომ ალალი ლუკმა-პური მქონდეს მეთქი. მგონი მიმიხვდა ნათლიაჩემი და, როცა კი შეიძლებოდა, სამჭედლოში ვყავდი და ხელობას მასწავლიდა.

ეხლაც თვალწინ მიდგას ცხონებული. წამოიქნევედა იმოდენა ჩაქუჩს და გადმომძახებდა:

— ნუ გეშინია, მიშეღე! შენ გაისარჯე... ღმერთი მოწყალეა.

თითონაც ძალიან გამრჯე კაცი იყო, ღვთის წინაშე.

ისე მუშაობდა მთელი დღე ხან დუქანში, ხან გომში, ხან სამჭედლოში, თითქო ერთი მოჯამაგირეც არა ჰყავსო. მუშაობდა მთელი დღე და დაღლა არ იცოდა. ან რა დაღლიდა — მდევსა ჰგავდა. მშვენიერი წარმოსადეგი, ახოვანი კაცი იყო და ისეთი უშველებელი უღვაშები ჰქონდა, რომ ყურებზედ იხვევდა. იმ დროში ჯარის მჭედლებმა იცოდნენ, უზარმაზარ წვერ-უღვაშს დაიყენებდნენ ხოლმე და ნათლიაჩემიც მგონია იმათ ბაძავდა.

რამდენადაც ნათლიაჩემი კარგი ვაჟკაცი იყო, იმდენად უშნო და უღაზათო იყო ჩვენი ქარგალი ვალენტინი. ერთი აყლაყუდა, აწოწილი კაცი იყო, მეტი სიმაღლისაგან წელში მოხრილი, გამხდარი, გამხდარი, რომ ადამიანი კი არა ცარიელი ძვალი და ტყავი იყო; იმისთვის რომ გეკითხათ, სულ ყველაფერი კარგად იყო მოწყობილი ამ წუთისოფელში: ბატონყმობაც კარგი იყო, ბერებიც, ღალაკულუხიც! ერთი სიტყვით ქვეყანა ედემად მიაჩნდა ჩვენ ვალენტინს და ადამიანი ანგელოზად.

— ახლა, შე მხეცო. შენა, — შეუტევედა ხოლმე ნათლიაჩემი, — ეგ ბატონყმობა რომ არა ყოფილიყო. ხომ თავისუფალი იქნებოდი, გეყურება, თავისუფალი?!. ხელოსანი კაცი ხარ, შენც ადამიანურად იცხოვრებდი... ეხლა კი სხვის საკუთრება ხარ, სხვის საქონელი!

— შენ რაც გინდა ბრძანე, ოსტატო, — მიუგებდა დინჯად ვალენტინი, და მე კი ღმერთიცა მწამს, სარწმუნოებაც, ბატონყმობაც და ჩვენი მეფეცა. ღვთისაგან დაწესებულს ადამიანიშვილი არ უნდა ეწინააღმდეგებოდეს.

ამ სიტყვებზედ მხრებსლა აიჩეჩლა ნათლიაჩემი. ან ჩალა ეთქმოდა?

— რა გაეწყობა, ძმავ, რაკი აგრე ჰოგწონს შენი ყოფა-ცხოვრება, დეე კარგი იყოს. — თან ჩაქუჩს მოიქნევდა და ისეთი გაშმაგებით დაუწყებდა ცემას, თითქო რკინაზედ ყრილობს ჯავრსაო... ჩვენც ისევე საქმეს შევუდგებოდით.

მართალი უნდა სთქვას კაცმა, ვალენტინისთანა პატიოსანი კაცი ჩემს დღეში არავინ შემხვედრია, მაგრამ უბედურს თავი, ტვინის მაგივრად, ბზით ჰქონდა გამოტენილი და სწორედ ინდოურივით გამოყეყეჩებული იყო; ალბად ღმერთმა გააჩინა ასეო, ვიტყოდით ხოლმე, და რაც უნდა მტკნარი სისულელე ეთქვა, არ ვუთქვინებდით.

ნათლი-ჯალაბი თავის ქმარს ეთანხმებოდა და მოჯამაგირე გოგო ნიკოლი კიდეც ნათლი-ჯალაბს.

ასე ვმუშაობდით ყველანი და საქმეც კარგად მიდიოდა. ნათლიაჩემს ყოველ წელს კარგი მოგება რჩებოდა და ჩვენ სოფელში იმაზედ გაკეთებული კაცი მგონი ორი არა ყოფილიყოს. თუ შეეძარებოდა ვინმე, ისევე ყასაბი კოშარი თუ, თორემ სხვა ვერავინ.

უნდა მოგახსენოთ, რომ მთელი ალზასი ჩვენ სოფელზედ დაიარებოდა, რომ ბაზრობა დღეს ქალაქში ჩასულიყო, სავერნის გზა უფრო მოკლე იყო, მაგრამ იმისთანა აღმართები ჰქონდა, რომ ყევარი ხარ-კამეჩი უნდა მიეშველებინათ, რომ ურემი აეტანათ. თითონ გზაც არ ვარგოდა — ზედ უზარმაზარი ქვები ეყარა, ნიაღვარისაგან დახრამული იყო და — შორს მოუარე და შინ მშვიდობით მიდიო, — სწორედ ასე შერებოდნენ მეურმეები, ვაკეზედ წამოვიდოდნენ, შორეულ გზაზედ, მაგრამ შიში კი არაფრისა ჰქონდათ. გამვლელს და გამომვლელს ნათლიაჩემის დუქანში უნდა გამოეშვა.

დუქანს გომი შველოდა, გომს სამკედლო. მანამ საქონელს დავუტყედდით, ან ურმის თვალს რკინას შემოვავლებდით, მეურმე დუქანში შევიდოდა. პურს გასტეხდა, ყელს გაისველებდა და თან თავის ურემს გადმოსცქეროდა თანჯარიდან.

ბაზრობა დღეს ჩვენი დუქანი ისე გაიტენებოდა ხოლმე ხალხით, რომ ნემსი ვეღარსად ჩავარდებოდა. ზოგი ცხენით იყო, ზოგი ურმით, და უმრავლესობა კიდეც ფეხით — საწყალს ხალხს ზურგით მიჰქონდა გასასყიდად, ვისაც რა ებადა. ქალაქიდან მომავალს თითო ოროლა გროში ყველას მოეპოვებოდა და დასასვენებლად, რასაკვირველია, ჩვენსა ჩამობტებოდნენ; თითო ჯამიც რომ დაელიათ, ისიცა კმაროდა. რომ გუნებაზედ მოსულიყვენენ, აჭიკჭიკებულიყვენენ, და დაურიღებლივ გამოეთქვათ თავიანთი ფიქრები. დასხდებო-

დნენ და მოსთქვამდნენ, თავიანთ ვარაშ და შავბედს დასტიროდნენ; მეტადრე დედაკაცები — ცხარე ცრემლით შეჰლაღადებდნენ ღმერთს — ამ გაჭირებას დაგვიხსენიო და თან მებატონეებს და მოურავებს სწყევლიდნენ; რომ დაიწყებდნენ და ჩამოსთვლიდნენ — რა უჯიათად და უღმერთოდ იქცეოდნენ მებატონეები, სულ ცოფსა ჰყრიდნენ. ბოლოს ისევ ქმრები გაუჟავრდებოდნენ — გაჩუმდი, დედაკაცო, ხათაბალა არა შემამთხვიო რაო! მაგრამ გაბრაზებული დედაკაცები ქმრებზედ ამოიყრიდნენ ხოლმე ბატონების ჯავრსა და ყარგა ლამაზად გამოლანძღავდნენ იქვე, იმოდენა ხალხში.

აღზახელი ვაჭრები საბაჟოსა ჩიოდნენ, რადგან აღზასიდან ლორენში სავაჭროს გადმოტანა უბაჟოდ არ იქნებოდა და რასაც იგებდნენ, ორი იმდენი საბაჟოზედ ეხარჯებოდათ, ერთი სიტყვით ყველა ჩიოდა, ყველა ბედს ემდუროდა და ყველაზედ ძალიან ურია, მაგრამ ის უფრო გაჩუმებული იყო: საცა კი მოასწრებდნენ, სულ ტყავს აძრობდნენ საწყალს, ეს შენ უნდა გადაიხადო, ეს კიდევ შენმა სახედარმაო! ისიც იხდიდა — უარესი არ მიყონო; სხვა კი ყველა ხმამაღლა გაიძახოდა თავის სამდურავს და ლანძღვა-გინება არც ბატონს აკლდა, არც ბერს და არც მღვდელს.

ბოლოს, როცა ამდენი წყევლა-კრულვით და ლანძღვით გულს მოიფხანდნენ, წამოდგებოდა ვინმე და იტყოდა:

— ახია ჩვენზედ! ხვალ რომ საქონლის მაგივრად უღელი შეგვადგან კისერზედ, ისიც ახი იქნება ჩვენზედ! რას იზამ? მებატონე — მებატონეა და გლეხკაცი კიდევ იმისი ყურმოჭრილი ყმა; აღზად ჯე დაუწესებია იმ დალოცვილ ღმერთსა, რომ მებატონე სუფრის თავში უნდა ბრძანდებოდეს გამოჭიმული და გლეხკაცი კი შიშითა კედებოდეს. რას იზამ?!.. აბა, რა გერგება, დახლიდარო? ფული მიიღე. გაგიმარჯოთ!

ადგებოდა და სხვანიც თან გაჰყვებოდნენ. ხშირად ამისთანა ლაპარაკის დროს მოხუცებული ვინმე დაიჩოქებდა და შეღალღადებდა — ღმერთო, ყოვლად ძლიერო, შენ გვიხსენ ამ ტანჯვისაგან, განა ჩვენ კი შენი შექმნილი არა ვართ, რაზედ აგვარიდე შენი შადლიო? ერთი დაიწყებდა და იმოდენა ხალხი მუხლის თავებზედ დაეციემოდა და ერთხმად შებღავლებდნენ — ღმერთო, შენ იყავ ჩვენი შემწეო!

საწყალი ხალხი! ლოცვა, ვედრება და ღმერთი! ეს იყო იპათი მანუგეშებელი. ჯერ ფიქრადაც არავის მოსდიოდა, რომ შეიძლება ერთმანეთს მხარი მიეცეთ და მონობის უღელი მოვიხსნათო; ჯერ ვერც კი წარმოედგინათ, რომ უბატონოდ და უმოურავოდ ცხოვრება შეიძლებოდა; ვერც კი წარმოედგინათ, რომ, თუ კი ხალხი ბოინ-

დომებდა, გროშსაც აღარავის მისცემდა, შუქთაზოო ბატონის და ბერების მაგიერად ღალას თავის ორმოში ჩაჰყრიდა და კულუხს თავის ქვევრებში ჩაასხამდა. ეს აზრები შემდეგში გავრცელდა ხალხში და, გაქვთ ღვთის წყალობა, ხალხმა ამით ისარგებლა! წინად კი ხალხს თავის თავისა კი არა, მარტო ღმერთის იმედი ჰქონდა.

იმოდენა ხალხი დადიოდა ჩვენს ღუქანში, იმდენს ლაპარაკობდნენ სხვადასხვა საზოგადო და კერძო საქმეებზედ, რომ ჩემისთანა პატარა ბიჭისთვის უკეთესი სკოლა არ შეიძლებოდა. ვიდრე და შეეცქეროდი, სიტყვა არ გამომეპარებოდა. მთელი მიღეთის ხალხს ვიცნობდი; ვიცოდი, ვის რა აწუხებდა, ვინ სადა ვაჭრობდა, რას ჰყიდა ან რას ყიდულობდა და თუ შემდეგში ცოტა რამ სარჩო-საბადებელი მეც შევიძინე, იმიტომ უფრო შევიძინე, რომ ბავშობიდანვე ვიცოდი მამულის და საქონლის ფასი და ყადრი. ღმერთმა უშველოს ებრაელ მშულს და პარბერგელ მათე ფიშერს: ჩვენ ღუქანში შეიყრებოდნენ, დიდი ხანი ევაჭრებოდნენ ერთმანეთს, სულ ხვითქი სდიოდათ ორივეს, მანამ მორიგდებოდნენ. ბოლოს დაღლილ-დაქანცულნი შეთანხმდებოდნენ და აბა დაკაო, ერთმანეთს ხელს გაუშვერდნენ. თანაც დამიძახებდნენ: ბიჭო! ერთი ჩარეკი თეთრი ღვინო ჩამოგვისხიო.

ჯერ ბალღი ვიყავ, მაგრამ სულ სმენად გადავიქცეოდი ხოლმე. ჩარეკიანს წყალს ვავლებდი და ყური კი იქითყენა მქონდა.

ეგ ხომ ეგრე, და ყველაზე ძალიან კი ის მიყვარდა, რომ ვახშამთ უკან, ხალხს რომ გავსატუმრებდით და დაწყნარდებოდა იქაურობა, ნათლიაჩემი გაზეთის კითხვას დაიწყებდა.

ეხლა სხვაა. რაც უნდა მიყრუებულნი სოფელი იყოს, ღუქანში რამდენიმე გაზეთი მაინც მოიპოვება. ყველას უნდა, ქვეყნისა თუ არა, თავის მაზრის საქმეები მაინც იცოდეს და კვირაში ორჯერ-სამჯერ მაინც წაიკითხოს გაზეთი. ვინ შერცხვენილი იქნება, რომ ვირივით ყურდაშვებულნი იყოს და ქვეყნის საქმეების მიმდინარეობის შეგნებას არა ცდილობდეს. 1789 წლამდე კი კითხვა აგრე რიგად არ უყვარდათ: ნეტავი ღმერთმა იმდენი შემადლებინოს, ჩემს ვარამს გავუძლო, ქვეყნის საქმეები რაში მეკითხებაო, იძახდნენ! მაშინ კაცი იმიტომ იყო ქვეყანაზედ, რომ სამეფო და საბატონო ტვირთი ეზიდა და ყველასთვის სამსახური გაეწია, ან კითხვა რად უნდოდა, ან ცოდნა? ათასში ერთმა არ იცოდა კითხვა და ვინც იცოდა, გაზეთს ვერ გამოიწერდა, რადგან ძალიან ძვირი იყო გაზეთი: ნათლიაჩემი ხომ შეგნებულნი კაცი იყო და საკმარი შეძლებაცა ჰქონდა და იმასაც კი ვერ გაებდა იმოდენა ფულის დახარჯვა გაზეთის დასაკვეთად.

ჩვენდა საბედნიეროდ, ჩვენი მეწვერილმანე შოველი ისე არ და-

ბრუნდებოდა შინ, რომ ნათლიაჩემისთვის ერთი დასტა გაზეთები არ მოეტანა.

სადღაა დღეს მეწვრილმანე შოველი! 1789 წელმა ბოლო მოუღო და მას შემდეგ ბევრიც, რომ ეძებოთ, ვეღარსად იპოვნით. წინად კი დიდ საქმეებს სჩადიოდა ეს მეწვრილმანე. მთელი ჩვენი ქვეყანა ფეხქვეშა ჰქონდა მოღებული — ზურგზედ თავის საწვრილმანო ეკიდა და სხვადასხვა წიგნები — ანბანი, ლოცვანი, კალენდრები — და დადიოდა სტრასბურგიდან მეცში, იქიდან ტრევში, ნანსში, ტულში, ვერდონში; ტყეში, ღრეში, მთის მწვერვალზედ, საცა კი ადამიანის საცხოვრებელი იყო, ყველგან იმასა ჰნახავდით თავის საწვრილმანოთი და წიგნებით. გლეხკაცის ქოხში, ეკლესიის გალავანში, მონასტერში, ყველგან ის იყო და ყველგან გაშლილი ჰქონდა თავის წიგნები. ანბანსა ყიდდა, ლოცვანს. მაგრამ რამდენ აკრძალულ თხზულებას გაავრცელებდა? ჟანეაკ რუსოსას, ვოლტერისას, რეინალისას, ჰელვეციუსისას...

შოველისთანა გამბედავი და ყოჩაღი კაცი აღზას-ლორენში ბევრი არ მოიძებნებოდა. ერთიბეწვა, პატარა კაცი იყო, გამხდარი, პირმოკუმული და ჩაფიქრებული, იმოდენა კალათი ეკიდა, გეგონებოდათ ჰიანჰველას მთა წამოუყიდნიაო, მაგრამ სიმძიმეს არც კი იმჩნევდა. გაივლიდა და ისე გადახედავდა კაცსა, თითქო გულის გულში უნდა ჩაუძვრესო; დარწმუნებით იცოდა, ვინ რა კაცი იყო, რა სწადდა, უნდა მორიდებოდა, თუ შეიძლებოდა მინდობოდა და თავის წიგნები მიეცა. და მართებდა კიდევ ეს სიფთხილე და მორიდება — ამ წიგნების გავრცელებისათვის ჩამოხრჩობა იყო გადაწყვეტილი.

შინ რომ დაბრუნდებოდა, ღამე შემოვიდოდა ნათლიაჩემისას, როდესაც დუქანში აღარავინ იყო და სოფელს ეძინა. თან თავის პატარა მარგალიტას მოიყვანდა. საცა კი უნდა წასულიყო, რაც უნდა შორს წაეღო სავაჭრო, თავის ქალიც თან დაჰყავდა.

ფეხის ხმაზედ ვიცნობდით ხოლმე და ვიტყოდით:

— აგერ შოველი მოდის. ახალ ამბებს გავიგებთ, გაზეთებს მოგვიტანდა.

ნიკოლი კარის გასაღებად გაეგებებოდა. შოველი და მარგალიტა შემოვიდოდნენ და მეგობრულად მოგვესალმებოდნენ... ისე ამიტოვდება ხოლმე გული ამ მოგონებაზედ, თითქო ჩვიდმეტი წლის ბიჭი ვიყო... აგერ მომავონდება პატარა შავთვალწარბა მარგალიტა, თავის მოკლე კაბით და გიშერივით შავი, წელზედ გაშლილი თმით.

გაზეთებს ნათლიაჩემს მისცემდა, თითონ კი ბუხარს მიუჯდებოდა.

ბრძა, მარგალიტას თავის წინ დაიყენებდა. ნათლიაჩემი თან გაზე-
თებსა შლიდა, თან მიესალმებოდა:

— სხვა, შოველ! როგორაა ჩვენი საქმეები?

— არა უშავსრა, ჩემო ივანე, ღვთის ძაღლით, ნელ-ნელა იღვი-
ძებს ხალხი. ბევრ წიგნებს ვყიდი, ხალხი კითხულობს, გონს მო-
დის, — მამა რომ ლაპარაკობდა, პატარა მარგალიტა თვალს არ ამო-
რებდა, ეტყობოდა ეყურებოდა, რასაც შოველი ამბობდა.

შოველი კალვინის რჯულისა იყო, და ფრიად დევნილიც იყო
თავის სჯულისათვის. თავის სამშობლო ლაროშელიდან გამოედგოთ,
ლიქსჰეიმში დასახლებულიყო. იქიდან განედევნათ და ეს ათი-თორ-
მეტი წელიწადია ჩვენს სოფელს შემოჰკედლებიყო. საბრალო მო-
კლებული იყო ყოველგვარ უფლებას. პატარა ქოხის გარდა მამუ-
ლი არა ებადა რა და ისიც სულ დაკეტილი ჰქონდა, რადგან სულ
სხვაგან იყო; მოვიდოდა, ერთი ხუთი-ექვსი დღე შეისვენებდა და
ისევ გზას გაუდგებოდა. ხალხი ურჯულოს ეძახდა, მაგრამ ამ ურ-
ჯულოს უფრო უკეთ სწამდა ქრისტეს სწავლა, ვიდრე მთელი ჩვენი
ქვეყნის ბერებს. ცოდნით ხომ იმდენი იცოდა, რომ მეცნიერების
სალარო ჰქონდა თავში.

ნათლიაჩემს ძალიან უყვარდა პატარა შოველი და დიდ პატივ-
საცა სცემდა.

გადაშლიდა ნათლიაჩემი გაზეთებს, რიგზედ დაალაგებდა და გა-
ფაციცებით დასცქეროდა:

— ეს უტრეხტიდან მოდის, ეს კლევიდან, ეს სტრასბურგიდან.
აბა ვნახოთ, რას იწერებიან? აბა ენახოთ?!. აი დალახვრა ღმერთმა!..
სად არის ჩემი სათვალეები?.. ეი, ნიკოლ, ჩემი სათვალეები ხომ არ
გინახავს? ემანდ ფანჯარაზედ უნდა იყოს...

გაიკეთებდა სათვალეებს და ხვამალა კითხვას დაიწყებდა. მე
ჩემს კუნჭულში გავინაბებოდი და სმენად გადავიქცევოდი, ყველა-
ფერი დამავიწყდებოდა, აღარც შინ დაბრუნება მომაგონდებოდა,
აღარც შიში, მეტადრე ზამთარში, როდესაც თოვლს დასდებდა და
სოფლის ახლო-მახლო მგლები დაწანწალდებნენ.

რაკი ვახშამი ავალაგეთ, მეც უნდა შინ წავსულიყავ, მით უფრო
რომ მამაჩემი ყოველთვის მელოდა და უჩემოდ არ დაიძინებდა; მაგ-
რამ ისე გამიტაცებდნენ სათათრეთის ამბები ან კიდევ ამერიკისა
და სხვადასხვა ქვეყნებისა, რომ ხშირად ათ საათამდე დავრჩენილ-
ვარ, და აი, ახლაც, ამას რომ ვწერ, ასე მგონია ისევ იქ ნათლია-
ჩემისასა ვარ, კედლის საათის მხრივ მიკუნჭული და ყურს ვუგდებ
გაზეთის კითხვას. აგერ მარჯვნივ ნათლიაჩემის ოთახის კარი და
დიდი განჯინა, ჩემს პირდაპირ საძილე ტახტი. ნათლიაჩემი კი-

თხულობს, ნათლი-ჯალაბი ეკატერინე — იქვე ტახტზედა ზის და წინდასა ქსოვს. იქვე ტახტის ბოლოს მიმჯდარა ნიკოლი და ყურს უვადებს გაშტერებული. საწყალი ნიკოლი—ნაყვავილარი დასჩნეოდა და ისე დაემანინჯებინა საცოდავი, რომ მტერსაც კი შეებრალებოდა. დიად! თვალწინ მიდგას მთელი ოთახი. ნიკოლს თვალები დაუხუჭვია და პირღია ზის; ნათლი-ჯალაბი წინდასა ქსოვს; ძველებური საათის ენა მიდი-მოდის და აკაკუნებს; ნათლიაჩემს კალთაში მუთაქა ჩაუდვია, ცხვირზედ რკინის უღლიანი სათვალეები წამოუტყვია. აი როგორც ეხლა მე და თავის გაზეთის მეტი აღარა აგონდება რა. მაგრამ თუ ძალიან საინტერესო შეხვდა რამე, შეჩერდება, სათვალეების ზემოდან გადმოგვხედავს და თან შემოგვძახებს:

— ჰხედავთ, რა ამბები ხდება ამერიკაში?! გენერალ ვაშინგტონს ინგლისის ჯარი დაუმარცხებია. ჰა, ყოჩაღ, ბიჭო! თავისუფლებისთვის იბრძვის და! ვერა ხედავ, შოველ, რას ჩადიან ის კურთხეულის შვილები, ჰა?

— დიად, ჩემო ივანე, — უაასუხებს მეწვრილმანე, — ჯერ ოთხი წელიწადი არ არის მას აქეთ, რაც ამერიკელები აჯანყდნენ — ჩვენ თავისუფლად გვინდა ვიცხოვროთ, ინგლისელების უღელი აღარ გვინდაო! ქუდზედ კაცი გამოვიდა, იარაღი აიღეს და შეუტიეს:—ამოდენა ხარჯს რომ გვადებთ, აბა მოდიოთ და წაიღეთო! იმოდენა ხარჯს იხდიდნენ მართლა, რომ ჩვენ ხომ უკიდურეს მდგომარეობაში ვართ და იმაზედ მეტის გადახდა ჩვენც კი გაგვიჭირდებოდა. — ჰოდა, ზომ ხედავ, ჯერ კარგად მიღის იმათი საქმე და თავიანთ მტარვალებს კიდევც ამარცხებენ.

პირს ღიმილი მოუვიდოდა და რამდენიმე წამი ისე იყო გაჩუმებული, სახე გაბრწყინებული. მერე ისევ დაიღვრებოდა და ნათლიაჩემიც გაზეთის კითხვას შეუდგებოდა.

გერმანიის მეფის, ფრედერიკ მეორის სახელი სულ ციებას მოჰგვრიდა ხოლმე ნათლიაჩემს, როცა კი გაზეთში შეხვდებოდა. წამოვარდებოდა გაათფრებული და ხან აქეთ ეცემოდა, ხან იქით.

— ვერა ხედავთ იმ მუზმუზელას იმას! ის სულ წაწყმედილი სუბიზი არა ყოფილიყო, ვნახავდი როსბახში როგორ გვაჯობებდა!

— დიახ, ჩემო ივანე, — დაამშვიდებდა ხოლმე შოველი, — სუბიზი იყო და კიდევ იმიტომ უბოძა მეფემ ათას რვაასი თუმანი პენსია.

ერთმანეთს გადახედავდნენ. ცოტა ხანი გაშტერებული შესცქეროდა ნათლიაჩემი და მერე უარესად გაბრაზებული დაიძახებდა:

— ათას რვაასი თუმანი! წელიწადში ერთ კაცს?! იმ გამოტყინებულს იმას! არა, სავერნიდან ფალსბურგისკენ სამეფო გზა ვერ შე-

უკვთებიან — ფული არა გვაქვსო, და ერთ ვიღაც გადაყრუებულს კი ბავდენს უნდა აძლევდნენ! ერთის დღის სავალზედ უნდა მოუაროს კაცმა, რომ ლორენიდან აღზასს მივიდეს და ისინი კი ათას თუმნობით არიგებენ! პური გაძვირდა, ღვინო გაძვირდა, საკლავი გაძვირდა, — ქვეყანა დიმიშა, ქვეყნისთვის არასა ზრუნავენ და...

— ეჰ, რას იზამ, ჩემო ივანე — ეგ პოლიტიკის საქმეა. პოლიტიკა ჩვენი კვუის საქმე არ არის. პოლიტიკა ისეთი რამ არის. რომ მე და შენ, უბრალო მომაცვდავთ, პოლიტიკისა არა გვეყურება რა. უნდა ვიშრომოდ და ხარჯი ვაძლიოთ; დახარჯვით კი მეფე უჩვენოდაც კარგად დახარჯავს.

ნათლიაჩემი რომ ასე გაჯავრდებოდა, ნათლი-ჯალაბი წამოხტებოდა, გარეთ გავარდებოდა, მიათვალეირ-მიათვალეირებდა და ნათლიაჩემიც უცბად დამშვიდდებოდა, რადგან კარგად იცოდა — რისა იყო ეს სიფრთხილე. დიდი სიფრთხილე გვეპარებდა მართლა, თორემ ჯაშუშებით სავსე იყო ქვეყანა. რომ სცოდნოდათ, რას ვამბობდით მეფის, მებატონეების და ბერების შესახებ, ავი დღე დავადგებოდა.

შოველი და პატარა მარგალიტა ადრე წავიდოდნენ ხოლმე. მე კი სულგანაბული იქამდე ვიჯექი ჩემს კუნჭულში, მანამ ნათლიაჩემი უკანასკნელ გაზეთს არ დაჰკეცავდა; მაშინ მეც მოვაგონდებოდი და დამიყვირებდა:

— ბიჭო, მიშელ! მანდ რას აკეთებ, იქნება შენც გეყურება რამე?!.. პასუხს არც კი დამაცდიდა და თითონვე განაგრძობდა:

— აბა, ზვალ დილის სისხამზედ შენ საქმეს უნდა შეუდგე. ხომ იცი, ზვალ ბაზრობაა და ჩვენ სამქედლოს ბევრი საქმე ექნება. გაიქე, მიშელ, და ზვალ არ დაიგვიანო.

სწორედ მაშინ მომაგონდებოდა ხოლმე — ვაიმე დედავ, მგლეზბი-მეთქი! და სამზარეულოში შევარდებოდი მკვარის საპოვნელად. სოფელში ყველას ეძინა, სინათლე აღარსაიდან მოჩანდა, თოვდა, ქარი ზმუოდა. მოვუყიდებდი მკვარს და — ღმერთო, შენ მიშველე მეთქი! გავრბოდი თავგადაგლეჯილი.

ღვთის წინაშე, ვაჟკაცსაც შეეშინდებოდა იმ დროს და მე ხომ სულ ბავშვი ვიყავი. უდაბნოსავით მიჩუმებული სოფელი, მიყრუებული, ჩაზნელებული სახლები, მუხლამდე თოვლი. ქარის გრიალი და თან მგლების ღმუილი. ისე ღმუოდნენ ის ამოსავარდნები, თითქო ერთმანეთს უქაზიანო. მეც გავრბოდი, რაც ძალი და ღონე მქონდა, ისე მიეჭროდი. სუნთქვა შემეკვრებოდა ხოლმე. თმა ამეშლებოდა, და გიჟივით მიეფრინავდი თოვლიან ქუჩაში. სულ ჩიტივით გადავფრინდებოდი აგროვილ თოვლზედ ან პატივის გროვაზედ; იმის-

თანა გროვაზედ გადავხტებოდი ხოლმე, რომ ცემით რომ მოეკა-
ლით, ღღისით იმაზედ ვერ გადავხტებოდი. მივრბოდი და თან ანთე-
ბულ მკვარს მივაქროლებდი, მივრბოდი და თუ, ჩემდა საუბედუროდ,
აღამიანს დავინახავდი საღმე, იმაჲ ხომ. არ ვიტყვოდი — აღამიანია
მეთქი, რაღაც საშინელებად მომეჩვენებოდა, ელდა მეცემოდა, ხმა
ჩამივარდებოდა... მაგრამ აგერ ჩვენი მიწურიც.

საწყალი მამაჩემი! ჯერ არ დაუძინია, ზის და კალათსა სწნავს,
ყური კი კარისაკენ უჭირავს. დამინახავს და გამხიარულდება, თით-
ქო გულიდან ლოდი მოეშვაო.

— რა გვიან მოხვედი, ბიჭო! ყველასა სძინავს. იქნება კიდევ
გაზეთის კითხვაში გაერთე?

— დიად, მამაჩემო... აი, მიირთვი.

ნათლიაჩემმა იცოდა ვახშმის შემდეგ ერთ კარგ ნაჭერ პურს
ჩამიდებდა უბეში, იმ პურს მამაჩემს წამოვუღებდი ხოლმე. გამო-
მართმევდა პურსა და თან მიაღერებდა:

— დეწეკი, დაიძინე, ჩემო ბიჭიკო! აგრე გვიან ნულარ დარჩები
გარედ; ხომ იცი, შვილო, ბინდისას ჩიტიც თავის ბუდეს მონახავსო.
ვერა ხედავ, როგორა ღმუიან მგლები...

ერთი ძველი ზანდუკი გვექონდა თივით გატენილი და იმ ზან-
დუკში ვიწეკით ბავშვები. გავხვევოდით თივაში, ჩავეხუტებოდით
ერთმანეთს და ისე ტბილად გვეძინა, თითქო ყუითუქზედ წვანან
და ატლასის საბანი ხურავთო.

მაგრამ საქმე სწორედ ეს ჩათბობა იყო. ჩემი და-ძმა ლუკმა-
პურის სათხოვნელად სოფელ-სოფელ დაწიალებდნენ და დალა-
ლულ-დაქანცულნი ჭერეხივით მიეყრებოდნენ და ხვრინვას ამოუშ-
ვებდნენ. მე კი მანამ ჩავთბებოდი და ძილი მომერეოდა, ათასნაირი
ფიქრი მიტრიალებდა თავში. ქარის გრიალი თანდათან უფრო
ძლიერდებოდა, მგლების ღმუილი თანდათან უფრო ახლო ისმოდა;
ისეთ თქარათქურით შემოვარდებოდნენ ხოლმე დამშეული მგლები
სოფელში, იტყოდით ცხენოსანი ჯარი მოდისო. ატყდებოდა ძალ-
ლების ყეფა, გლუხკაცების ყიჟინა — და მეორე ღღეს ხმა გავარდე-
ბოდა, მგლებს ძალლი მოუტაცნიათ და იქვე ორღობეში შეუტამაიათო.

რამდენჯერ მოვარდნილან პირდაპირ ჩვენ კარებამდე, ძალღს
აღარ დარიდებიან და კარის ფხაჭუნი დაუწყიათ. წამოდგებოდა მა-
მაჩემი, ერთ მუჭა ჩალას ცეცხლს მიუკიდებდა და ამით აშინებდა.
ხანდახან სულაც არ დაგვაძინებდნენ, ისე აგვიტყდებოდნენ ხოლმე
ის ვერანები.

აბა რა სათქმელია და მე კი ყოველთვის იმ აზრისა ვიყავი, რომ
უწინდელ დროში ზამთარი უფრო სუსხიანიც იყო და უფრო ხან-

გრძლივით. ხანდახან ისეთ თოვლს დასდებდა, რომ მეზობლამდე ვე-
ლარ გადავიდოდით; გარს უშველებელი ტყეები გვერტყა, მზე ჩვე-
ნამდე ძნელად ატანდა და იღო ასე თოვლი, აპრილამდე არ და-
დნებოდა. ამასთან მებატონეებმა და მონასტრებმა იცოდნენ, საცა
კი დასასვენებლად მიწა იყო, ზედ წყალს მოატბორებდნენ, ისე რომ
მინდორში რომ გაგეარათ, გაგიკვირდებოდათ — ეს აუარებელი
ჭაობები რად დაუგუბებიათო. ახლა ის წყალი ანოტივებდა და აცი-
ვებდა ჰაერს!

ბა ახლა გაიარეთ ჩვენს მინდორში. ისეა დამუშავებული, სა-
მოთხე გეგონებთ. წვიმის გუბესაც ვერსად ნახავთ, არამც თუ ძა-
ლად დეგუბების ვისმე. ეს იმიტომ რომ ესლა მიწა იმას ეკუთ-
ვნის, ვინც მიწასა მუშაობს და ყადრი იცის მამულისა. ყველგან ხნუ-
ლებსა ნახავთ, ნათეს-ნათფარცხს. ყველგან ღეთისაგან კურთხეულს
ჯეჯილსა ნახავთ. მზეც უფრო ყველგანა სვდება, გაზაფხულიც
თითქმის უფრო ადრე დგება. რა ვიცი, მე კი ასე მგონია-და! ასე თუ
ისე, ეს კი მართალია, და ჩემი ხნის კაცი ყველა დამემოწმება, რომ
უწინდელ დროში უფრო ადრე დაზამთრდებოდა ხოლმე, გაზაფხუ-
ლი უფრო გვიანა დგებოდა და ისე გათამამებული იყვნენ მგლები,
რომ შიგ სახლში გვიცივიდებოდნენ და საქონელსა და ძაღლებს
გტაცებდნენ.

IV

ზამთარი გადიოდა, აღდგომამდე სულ ორი თუ სამი კვირადა
რჩებოდა, როდესაც ჩვენს სოფელში ერთი უცნაური ამბავი მოხდა.
იმ დილას ძალიან გვიან გამომეღვიძა და როგორც მოგეხსენებათ,
გაფაციცებით ვიცვამდი ტანთ — ეგების მალე წავიდე, ნათლიაჩემი
არ განიჯავრდეს მეთქი. წინა დღეს სარეცხი ჰქონდათ და წყალი შე-
ენახათ — იატაკი გავარეცხინოთო. ეს საქმე მე და ნიკოლს გვებარა
და წელიწადში ორჯერ-სამჯერ ისე გავაკრიალებდით იატაკს, რომ
ზედ ერბო აიკრიბებოდა.

თოვლი ის იყო დნებოდა. ჯერ საქონელი მინდორში არ გადიო-
და, მაგრამ ჰაერში გაზაფხულის სითბო ტრიალებდა და ყველგან
ღია ჰქონდათ კარები და ფანჯრები. ბოსლებიდან საქონელს გარედ
ერეკებოდნენ, რომ იქაურობა უფრო თავისუფლად დაეგავათ.
კლოდ ჰურე გუთანსა მართავდა, ჩვენი მეზობელი პეტრე უღელსა
სთლიდა. ცოტა ხანს უკან ხვნას დავიწყებდით და ცდილობდნენ
ყველაფერი მზადა ჰქონოდათ.

მართლა მშვენიერი დღე იყო, ნამდვილი გაზაფხულის დღე და
დიდით პატარამდე სულ გარედ გამოსულიყვნენ.

შორიდანვე დავინახე, რომ სულ ღია იყო ნათლიაჩემის სახლის ფანჯრები. კარებზედ, სწორედ კიბესთან ბერი ბენედიქტეს ჯორი ება, თავისი ხურჯინებით და კალათებით.

ვიფიქრე — ჩვენსა ბევრი ხალხი იქნება და ბერი ბენედიქტე უქადაგებს მეთქი. მართლაც, საცა კი ბლომად ხალხსა ნახავდა, წამოდგებოდა, ქადაგებას დაიწყებდა და მერე მოწყალებასა სთხოვდა; კარგა ფულსაც აგროვებდა. დადიოდა სოფელ-სოფელ თავის ჯორით და უარს არაფერზედ ამბობდა, ოღონდ კი მიგეცათ რამე. გაყვითლებული წვერი ჰქონდა, თითქო პირისახეზედ ჯაგარი ამოსვლიაო; ცხვირი ისე ჰქონდა მიჭყლებილი, თითქო მწიფე ლეღვი მიუტრავთო; დაქანებული შუბლი ჰქონდა, უშველებელი ყურები, ერთი ბეწვა, ბაყაყსავით მრგვალი თვალები. საცა კი მივიდოდა, თან არყის სუნს შეიტანდა და ქადაგებას, ოღონდ კი ფულის იმედი ჰქონოდა.

ნათლიაჩემს ჰქირავით ეჯავრებოდა, მაგრამ ნათლი-ჯალაბი ეკატერინე ძალიან ღვთის მლოცავი ადამიანი იყო და ბერ ბენედიქტესაც ღიდ პატივსა სცემდა; სუფრიდან საუკეთესო ნაჭერს ყოველთვის იმას შეუწინახვდა ხოლმე; გაჯავრდებოდა ნათლიაჩემი — საქმე არა გქონია! ვილაც მაწანწალას სახლში როგორ უშვებო? მაგრამ ნათლი-ჯალაბიც მაგრა დახვდებოდა ხოლმე:

— მე კი შენსავით უღმერთო არა ვარ, რომ არც ბერი მწამდეს და არც მღვდელი! მე მინდა სამოთხეში ალაგი მქონდეს. განა მადლი არ არის, ლოცვითა და მარხვით მისუსტებულს ბერს ლუკმა მივაწოდოვო?!

რალას ეტყოდა ნათლიაჩემი? თავს დაანებებდა. შენი ნება იყოსო.

შინ შევედი. მთელი ქვეყანა ჩვენს დარბაზში იყო. ჩვენებურების გარდა, აღზასელებიც ბევრნი იყვნენ. იქვე იყვნენ ნათლი-ჯალაბი, ნიკოლი, ვალენტინი; ერთი სიტყვით, დიდით-პატარამდე ყველანი იქ იყვნენ და გარს ეხვივნენ ნათლიაჩემს, ის კი შუაში იდგა, ხელში ერთი კარგად მოზრდილი პარკი ეჭირა, რალაცა ნაფტკვენებს აჩვენებდა. ეს ნაფტკვენები ჰანოვრიდან მომივიფიდაო, ამბობდა ნათლიაჩემი, ეს რომ დავთესოთ, იმისთანა მსხვილ ფესვებს გაიკეთებს, იმისთანა დალოცვილ და ბარაქიან ფესვებს, რომ წლითი წლობამდის საქმელი გვექნება და ქვეყანაზედ შიმშილი ამოვარდებო. აი, მიირთვით ვისაც გენებოთ, მეც მეყოფა და თქვენცაო! წაიღეთ, დათესეთ და მერწმუნეთ არ ინანებთ! ლოცვა-კურთხევით მოიხსენიებთ ამ მცენარის გადმომტანსაო.

ისე მხიარული ნათლიაჩემი ჩემს დღეში არ მინახავს. იდგა შუა

ოთანში, თან ნაფცქვენებს გვაჩვენებდა, თან ისეთი ალერსიანად გვაწვდიდა — წაიღეთ, დათესეთო, თითქო მართლა ქვეყნის ხსნა იმ ნაფცქვენებში იყო. სულ უკან კუნჭულში შოველი იღვა თავის მარგალიტათი.

გამოართმევდნენ ნაფცქვენებს, დიდი ხანი სინჯავდნენ, სუნავდნენ და ისევ პარკში ჩაუშვებდნენ; პირს რაღაც ცუდი ღიმილი მოსდიოდათ, თითქო უნდა სთქვან და კი ვერ გაუბეღიათ დაცინვაო:

— გიჟები ხომ არა ვართ, ნაფცქვენი ვთესოთ. ვის უნახავს, ვის გაუგონია?...

ზოგიერთები ერთმანეთს დაცინვით თვალს უშვრებოდნენ და იდაყვს ჰკრავდნენ:

— ხედავ, სიბერის დროს რა სისულელეს სჩადის ეს კაციო.

უცბად წინ წამოვიდა ბერი ბენედიქტე, წინ წამოყო თავი. ნაფცქვენებს დასუნა, დაიღრიჯა და გაიხარხარა. გაიხარხარა ბერმა და იმოდენა ხალხსაც სიცილი წასკდა.

ეწყინა ნათლიაჩემს და ესლა უთხრა:

— არა, რომ იცინით, იცით კი რაზედ იცინით? როგორ არა გრცხვენიათ! მე საქმეზედ გელაპარაკებით და თქვენ იმის მაგივრად, რომ საგანი შეიგნოთ, მოჰყოლიხართ და გიჟებივითა ხარხარებთ!

ისინი კი უფრო და უფრო იცინოდნენ. ამ დროს ბერმა შოველი დაინახა კუნჭულში და წამოიძახა:

— ახლა კი ვიცო! ეგ თესლი ამ ვაჟბატონის შემოპარებულია! ახლა კი ვიცო...

მართალიც იყო. ჰანოვრიდან შემოტანილს ყველაფერს ბაჟი ედო და შოველს ეს პარკი უბაჟოდ გამოეტარებინა საზღვარზედ. იქ კარგა ხანია ამ მცენარესა სთესენ და ძალიან მაღლიერნიც არიან მის ნაყოფისაო, — ამბობდა ჩვენი მეწვრილმანე.

— ეგ ხომ ქრისტიანი არ არის, ეგ მწვალელებლია! — ყვიროდა ბერი. — გეყურება, ხალხო, ეგ მწვალელებლია, ქრისტეს მტერია! ნუ თუ მაგ ურჯულოსაგან შემოტანილ თესლს დასთესთ?! ნუ თუ გგონიათ, ღმერთმა აკურთხოს და ნაყოფიერება მისცეს რასმე, რასაც კი მაგის ცოდვილი ხელი შეეხება?!

— იმდენი ღმერთმა დღე მომიმატოს, რამდენი შენ ამ მცენარის ნაყოფი ინატრო, ბერო! დამაცადე, დავთესო, თუ სულ თვალეები არ გაბრეცინო, და ეს უღვაში მომჭერი! გეყურება?

— დამაცადე, დავთესო! — შესძახა ბერმა და თან თვალეები და ხელეები ცისაკენ აღაპყრო, თითქო უნდოდა ეთქვა: ღმერთო, მიუტევე, რამეთუ არ იცის, რას სჩადისო! — მერმე რომ დასთესო, იქნება გგონია მაგან ნაყოფი მოგცეს რამე! ოჰ, უგუნურო! ნეტავა

იმდენი მიწა გქონდეს, სიმინდი და ლობიო დასთესო და ცოტაოდენი მწვანელი მოიყვანო... გადაყარე ეგ ეშმაკის თესლის ნაფცქვენი, გადაყარე!... ეგ შენ არას მოგცემს! გეყურება, ეგ შენ ნაყოფს არას მოგცემს, თუ არადა მე ბერი ბენედიქტე არა ვყოფილვარ.

— შენგან ბევრი სხვაც გამიგონია, მაგრამ კი არა დამიჯერებია რა, — მიუგო ნათლიაჩემმა და პარკი განჯინაში შესდო. მაგრამ მოაგონდა, რა წინდაუხედავად მოექცა ბერს და თვალით ანიშნა თავის ცოლს — ახლა შენ იციო. იმანაც ერთი წყვილი კარგი ძეხვი გამოუტანა ბერს და ამით დაამშვიდა, თორემ გაჯავრებული რომ გაგვესტუმრებინა, ვინ იცის რა მოსდებოდა: წუწკი ბერები ყველგან თავისუფლად დაიარებოდნენ და ერთი კი ეთქვა სადმე — მკედელი ივანე კეთილ-საიმედო კაცი არ არისო, მგონი ღმერთიც ვერას გვიშველიდა. ახლა კი ძეხვით მომადლიერებული გავისტუმრეთ ჩვენი ბერი და შიში აღარა გვქონდა. ხალხიც უკან გაჰყვა.

მარტო მელა დავრჩი და ისეთი ბრაზი მერეოდა, რომ შემძლებოდა, იქვე წავახრჩობდი. არა, კაცი გალანძლო, თავის სახლში კაცი შეარცხვინო და აგრე?

ბერი ბენედიქტე კი გარედაც არ იშლიდა:

— იმედი მაქვს, ეკატერინე ქალო, მიწას მაგ ნაფცქვენებისათვის არ მოაცდენთ! რას იტყვის ქვეყანა? ღმერთი არ გაგიწყრეთ, არ დასთესოთ, თორემ მე აქ აღარ გამეველება: შიმშილით დავიხოცებით მე და ჩემი ჯორი. არა, უნდა წავიდე, ვილოცო. ღმერთს შეგავედროთ, რომ გონებაზედ მოგიყვანოთ!

ვითომ უნაგირს უსწორებდა თავის ჯორს, განგებ იგვიანებდა, რომ ხალხისთვის გაეგონებინა თავის სიტყვები; ისინიც გულიანად იცინოდნენ, და ნელ-ნელა შინისკენ მიდიოდნენ.

ნათლიაჩემი ფანჯრიდან გასცქეროდა და იძახდა: მოდი შენა და ამ ბრიყვებს სიკეთე უყავი რამე. რა გამოვიდა? კი არ დაგიფასებენ და!

— ზომ იცი, ჩემო ივანე, ჩვენი მებატონეები და ბერები სულ იმასა ცდილობდნენ და ცდილობენ, რომ ხალხს სწავლა-განათლება არ მიაკარონ და მით უფრო მეტად და ადვილად დაიმონანონ და ამუშაონ. მაშ ამ ხალხს რად ამტყუენებ? ხალხისა რა ბრალია, რომ ავი და კარგი ვერ გაურჩევია? მე რომ ერთი კალოს ტოლი ალაგი მქონდეს, მე თითონ დავთესდი მაგ მცენარეს; თავის თვალით რომ ნახავდნენ და თავის პირით რომ იგემებდნენ, მაშინაც დამცინებდნენ? მგონი თავის წონა ფულად ეთხოვათ სათესლედ ეს ნაფცქვენები. რადგან, ავი მოგახსენე კიდევაც, ამ მცენარემ ერთი ათად მეტი მოსავალი იცის, ვიდრე სიმინდმა. კაი ვაჟკაცის მუშტის ტოლა ფეს-

ვებს გაიკეთებს და იმისთანა გემრიელი და ნაყოფიერი საქმელია, რომ მეტი არ შეიძლება. ამას წინაღ გემო ვნახე და თესლიც იმიტომ წამოვიღე, რომ მართლა ძალიან მომეწონა; მოყვითალოა, ფხვიერი, წაბლის გემო აქვს და პირში ისე იშლება, როგორც ყველიერის ქადა. გინდა მოხარშავ, გინდა მოხრაკავ, გინდა სხვა საქმელს დაურევ...

— დარწმუნებული ბრძანდებოდე, ჩემო შოველ, რომ მეც შენსავით მოვიქცევი. არა ნებათ, ძალიან კარგი! მე დაეთესავ და მართო მე მექნება. ვნახოთ ვინ ინანებს! რომ წაელოთ, დანარჩენი ბოსტანის მეოთხედსაც არ ეყოფოდა და ახლა კი მთელ ბოსტანში ამას დაეთესავ.

— ძალიან კარგს იხამ, მერწმუნე. საცა გინდა დარგე, ყველგანა ხარობს. მაგან მიწის დაწუნება არ იცის, მაგ დალოცვილმა! უფრო კი ქვიშნარი ტყვარს.

ამის შემდეგ შოველი შინისკენ გაემგზავრა, ნათლიაჩემი სამკედლოში შევიდა, მე და ნიკოლმა ბარგი გარედ გავალაგეთ და იატაკის რეცხვა დავიწყეთ. მაგრამ მთელი ის დღე და მას შემდეგ მთელი ჩემი სიცოცხლე გონებიდან არ მომშორებია ეს ჩხუბი და ბერი ბენედიქტეს სიტყვი.

ნადეჟკენი, რასაკვირველია — მიხვდებოდით, კარტოფილის ნაფცქვენი იყო. შოველს მოეთანა შორიდან და ის დღე იყო და ის, მას შემდეგ შიმშილი აღარ ყოფილა ჩვენში: დამშეულ ხალხს კარტოფილი მაინცა ჰქონდა საქმელად.

ფანჯარასთან ისე ვერ მივალ, ისე ვერ გადავხედავ ამ დაცემულს, თვალგაღუწვდენელ მინდორს, რომ ცხოვრებული შოველი არ მომაგონდეს. ქვემოთ წყლიდან დაწყებული ტყიან მთის მწვერვალამდე მწვანე ხავერდით ბიბინებს ჩვენი მიწები და ჟმეტისი ნაწილი ღარიბი კაცის პურით, ესე იგი კარტოფილით არის ნათესი. დადგება შემოდგომა, კარტოფილის თხრის დრო მოვა და ისეთი მხიარული ქრიალული მოდის მინდვრიდან, თითქო კარტოფილს კი არა, ყანასა მკის მამითადიო. დიდი, პატარა, ქალი, კაცი სულ მინდორშია; ზოგი სთხრის, ზოგი აგროვებს, ზოგი ურემზედ უღებს და ყველგან სიმღერა, სიცილი, ხუმრობა ტრიალებს და თან მომავალის იმედი და უშიშრობა — ღმერთი მოწყალეა, შიმშილი ვეღარას დაგვაკლებსო! უწინ კი ჯერ ქრისტიანობისთვის სად იყო, რომ ჭადი აღარავისა ჰქონდა და დამშეული ხალხი უკანასკნელ ავეჯს და საქონელს ჰყიდდა, რომ ცოლშვილი გამოეკვება როგორმე. ბოლოს, როცა გასაყიდიც აღარა ებადა რა, წვრილ-შვილს მოწყალეობის სათხოვნელად ჰგზავნიდა, თითონ სამუშაოდ მიდიოდა, სამუშაოდ — ცარიელი ლუკმა-პური მაინც ვიშოვოთო. მომაგონდება უწინდელი

დამშეული გლახაკი, მომაგონდება ცხონებული შოველი და ნათლიაჩემი, მომაგონდება — რამდენს დასცინოდნენ საწყლებს სწორედ ამ კარტოფილის გაჩენისათვის და ვინატრებ ხოლმე:

— ოჰ, ნეტავი კი ერთს საათს წამოვახედოთ თქვენი საფლავიდან, თქვენ დალოცვილთ! ნეტავი გაჩვენათ, რამდენი კარტოფილი მოჰყავთ ჩვენს მაზრაში, რომ ღირსეულად დაათასოთ ის ღვაწლი, რომელიც თქვენ ჩვენს ქვეყანას დასდეთ. ნეტავი ბერი ბენედიქტეც გაცოცხლდეს ერთ წამს, რომ საკუთარი თვალითა ნახოს, რა მძღარია ჩვენი გლახაკი ამ მცენარის წყალობით: რამდენს გაიცინებენ ჩვენი გლახაკები, რომ ნახონ საღმე ბერი ბენედიქტე თავის მძიმედ დატვირთული ჯორით.

ჩაფიქრდები ხოლმე და წარმომიდგება, რომ ღმერთი ყოველად სამართლიანია და მიცვალებულს ქვეყანას არ აშორებს: კაცი მიიცივლება, მაგრამ მისი სული მაინც თავს დაგვტრიალებს და ღვთაური სიმართლით დასცქერის თავის საქციელს, თავის სიკეთითა სტკბება, და თუ ავი ჩაუდენია რამე, სწუხს და იტანჯება. საუკუნეები გაივლიან, ქვეყანა იცივლება და ადამიანის ღვაწლი და სიკეთე კი უკუნითი უკუნისამდე დაუვიწყარი დარჩება. მე რომ მკითხონ, მართო თავის საქციელით არის ადამიანი უკვდავი.

მაგრამ ისევ კარტოფილის ამბავს შევუდგეთ: ნათლიაჩემი დარწმუნებული იყო, რომ შოველის ნათქვამი სულ მართალი გამოდგებოდა, მაგრამ ჯერ კიდევ ბევრი უსიამოვნება მოელოდა. მე ჩემს ღღეში ვერ წარმოვიდგენდი, რომ ჩვენი ხალხი ასეთი შეუგნებელი და შეუხდობელი იქნებოდა, მაგრამ ამ ამბავმა, ეგ კი არა, მეტიც დამანახვა. მთელი ქვეყანა იმასლა გაიძახოდა, რომ მჭედელი ივანე გაგაყებულა, თალგამის ნაფცქვენს თურმე სთესს და იძახის — სტაფილო ამოვაო. გამვლელ-გამომვლელი ვაჭრები და მეურმეები ეკვის თვალთ შესცქეროდნენ საწყალ ნათლიაჩემს და დაცინვით ეკითხებოდნენ: ხომ კარგადა ხარ, ივანე, ავადმყოფობას ხომ არასა გრძნობო? ისიც კაცი იყო, სწყინდა, რასაკვირველია, და საღამოზედ, როცა უცხონი აღარავინ გვყავდა, თავის ნაღველს აღარა მალავდა და მწარედ უჩივოდა ხალხს. ყველანი თანავეუგრძნობდით.

თუმცა ბევრს დასცინოდნენ, თუმცა ქვეყნის მასხარად გახადეს, მაგრამ თავისი არ დაიშალა, ბოსტანი დაბარა, ცოტა პატივი დააყარა და თავით ბოლომდე სულ კარტოფილი დათესა. მე და ნიკოლი ვეხმარებოდით.

მაგრამ ახლა უარესი გვიყვეს: განალა გაივლიდა ვინმე, რომ არ აწოწილიყო და ღობეზედ არ გადმოეხედა. თან თავს იქნევდნენ და ოხრავდნენ — ეჰ, ახლა კი სრულიად შეშლილა ეს უბედურია!

მაგრამ თქმით კი აღარავინ არას ეუბნებოდა, რადგან ეწინოდათ — ბარი თავზედ არ დაგვამტვრიოსო!

რომ აგიწეროთ, რამდენს დაგვცინოდნენ ყველას, ვინც კი ნათლიაჩემის სახლში ვიყავით, არც კი დამიჯერებთ. ასეა! ოღონდ კი მასხარად აიგდოს ვინმე ჭკუათხელმა და სხვა ქვეყანაზედ არა უნდა-რა. ჩვენებურებსაც საუკეთესო შემთხვევად ეჩვენათ ნათლიაჩემის წადილი და ერთი კი ეხსენებინა ვისმე მკედელი ივანეს ნაფცქვენები, დიდით პატარამდე სიცილით იუჟუებოდნენ.

როგორც კი დამინახავდნენ მინდორში ტოლი ბიჭები, მაშინვე ყვირილს მორთავდნენ:

— აგერ ჰანოვრული ნაფცქვენები! როგორა ხართ შენ და ნათლიაშენი?

გამიბრაზდებოდა გული, ველარ მოვითმენდი, განზედ გავუდგებოდი და გაუწკაპუნებდი შოლტსა. მაგრამ რას ვიზამდი? ხშირად ათნი მომვარდებოდნენ, უღმერთოდა მცემდნენ და თან მიყვიროდნენ:

— ემანდა შენი ნაფცქვენები! ემანდა შენი ჰანოვრული ნაფცქვენები!

განა ისე დღე გავიდოდა, რომ ნაცემი არ მოვსულიყავ სახლში? ჩემდა საუბედუროდ, აღარც ჩემი ძმა ნიკო მყავდა ქომავად, აღარც კლოდი. ნიკო ტყეში მუშაობდა — მოჭრილ ხეებს ტოტებს აცლიდა, და კლოდი მამაჩემს შევლოდა კალათების დაწვენას, ან არა და ჭალაში დაიარებოდა წნელის და ცოცხის მოსატანად.

ერთის სიტყვით, მარტო ვიყავ და მარტო მე მხვდებოდა გვერდებში — საღამოზედ სულ აჭრელებული მივიდოდი ხოლმე შინ. ბრაზისაგან ცრემლი გამშრალი მქონდა და ერთხელ არ მიტირნია.

წარმოიდგინეთ, რა ძალიან ვნატრობდი იმ ნაფცქვენების ამოსვლას! დღე და ღამ სულ იმის ნატვრაში ვიყავი, ნათესი ამოსულიყო და ჩვენი მტრები შერცხვენილი მენახა. ჯერ გათენება სად იყო, რომ მე ბოსტანში ვიყავი და გაშტერებული დავცქეროდი მიწას. იქნება სადმე მწვანე ნიშანი მაინც დავინახო რამე-მეთქი, მაგრამ ჯერ არაფერი ჩანდა და დაღონებული, გულდაწყვეტილი მივდიოდი ჩემ საქმეზედ და თან ბერ ბენედიქტეს ვწყევლიდი; სულ იმის ბრალია, იმას რომ არ დაეწყევლა, აქამდე კიდევ ამოვიდოდა მეთქი.

უწინდელ დროში ყველას გვწამდა დაწყევლა და შელოცვა: დარწმუნებული ვიყავით, ავ კაცს შეეძლო შეელოცა, ჯადო გაეკეთებინა ადამიანისთვის და დიდი ზიანი მიეცა: ან სულ დაესნეულეებინა, ან საქონელი გაეწყვიტა, ან მოსაყალი წაეხდინა. რამდენი

დედაკაცი დაუწვავთ — კუდიანია და ქვეყანას აზიანებსო! მეც რომ ნება მქონოდა, გარწმუნებთ, დიდ ხანს აღარ ვაბოგინებდი ბერ ბენდიქტეს, ისე გაჯავრებული ვიყავ იმაზედ.

ჩვენებურებს ვილა ჩივის, ახლო-მახლო სოფლის ბიჭები უარესად გადამეკიდნენ, და მეც ისე მაგრა ვუღდექი, რომ გმირად წარმოვიდგინე ჩემი თავი; კარგი რომ არ იყოს, არც შოველი და ნათლია-ჩემი დასთესდნენ-მეთქი, ვიძახდი, და ვამაყობდი, რომ მე კეთილ საქმისთვის ვიბრძოდი. ჩვენებმა და ნათლიაჩემის სახლობამ არა იცოდა რა ამ ცემა-ტყეპისა, თუმცა ნაცემი რომ მივიდოდი; მამაჩემი გაიკვირებდა ხოლმე:

— ბიჭო, მიშელ! მე ყველაზე წყნარი შენ მეგონე და შენ კი ლამის ნიკოსაც გადააქარბო. ისე დღე არ გავა, ნაცემი არ შემოხვიდე შინ. რადა, შვილო, რადა ჩხუბობთ? რა გაქვთ გასაყოფი? გაფთხილდი, მაგ შოლტს ნუ ეხუმრები, თორემ ადვილად იცის კაცის დაბრმავება. პატარა კი აღარა ხარ, შვილო, ჩვენი შებრალებაც უნდა გქონდეს...

თავს ჩაღუნავდა დაღონებული და ჩაფიქრებული ისევ თავის საჭმეს შეუდგებოდა.

მთვარიან ღამეს მთელი ოჯახი გარეთ ვმუშაობდით, რომ მკვარი გამოგვეზოგა. ვახშობა რომ მოატანდა, წამოდგებოდა მამაჩემი: წნელს მოაჯროვებდა და შეჰკრავდა, მერმე ერთ წამს ცას დააცქერდებოდა და იტყოდა:

— ღმერთო ძლიერო! შენ იყავ შემწე ჩემი წვრილშვილისა! ისეთი ჯრძნობით, ისეთი ღალატით იტყოდა ხოლმე ამ სიტყვებს, თოქო ხვალინდელ დღეს ვეღარ გაათენებს და უკანასკნელად შეჰგედრის ღმერთსაო. ღმერთმან იკის, საწყალ მამაჩემს უფრო უკეთ ეყურებოდა ლოცვაცა და ვედრებაც, ვიდრე იმ ბერებს, რომელთაც ენაზედ „მამაო ჩვენო“ და „მრწამს ერთი ღმერთი“ აკერიათ, და გულში კი ბიწიერების მეტი არა უღევთ რა.

მერე შინ შევიდოდით და დავიძინებდით.

თიბათვე იდგა, მოსავალი კარგი იყო და სამკალად ემზადებოდნენ; ყველა ხარობდა ნათლიაჩემის გარდა: იმის ბოსტანში ჯერაც არა ჩანდა რა.

მამაჩემმა რამდენჯერმე მკითხა: რა მცენარე დაუთესია ნათლიაშენსაო! და მეც ყველაფერი ვუამბე, რაც კი ვიცოდი; ვუქე, ვუქე, რომ ცამდე ავწოე.

— ღმერთმა ინებოს, შვილო, — მიპასუხა მამაჩემმა, — ღმერთმა ინებოს. რადგან გვიჭირს კიდეც. სიღარიბე დღითი დღე მატულობს, ხარჯს დღითი დღე მეტსა და მეტს გვახდევინებენ და თუ

ღმერთმა მოწყალება არა მოიღო რა ჩვენზედ, სიცოცხლეს სიკვდილი ემჯობინება.

ღელაჩემიც კვერს უკრავდა:

— სიკვდილი სჯობიან, მამ არა და! ვაი იმის ბრალი, ვისაც ვალი აქვს, ყურმოჭრილი ყმა უნდა იყოს სხვისი. ნეტავ არ იქნება, მართლა მაგისთანა გააჩინონ რამე! ჰანოვრიდან კი არა, თუნდ ჯოჯოხეთიდან მოეტანოთ, ოღონდ კუჭი გავიძლოთ.

და მართლსაც ამბობდა. საუბედუროდ, ნათლიაჩემის ბოსტანში არა ამოდიოდა რა. თითონ ნათლიაჩემსაც ეკვი შეუვიდა, იქნება ბერმა ბენედიქტემ რომ დამცინა, საფუძვლიანად დამცინაო. ასე გასინჯეთ, კინალამ ხელმეორედ დაგვაბარვინა ბოსტანი, სამყურა ბალახი უნდა დაეთესოვო. კიდევ კარგი რომ სახლში დაუშალეს, — ეგ რომა ქნა, ხომ სულ თითით საჩვენებელი გახდები; იმდენს დაგვინებენ, რომ აგყრიან აქედანაო; თუ გინდა კაცად ითვლებოდე, ინათესი უნდა ამოიყვანო, თორემ ცუდად არის ჩვენი საქმეო. — ამიტომ არის და, რომ ახალის დაწყებას ვერავენ ბედავს; ამიტომ არის, რომ ყველანი ერთხელ გაკვეთილ გზაზედ დავდივართ და ახალ ბილიკს ჭირივით ვერიდებით: ბრიყვების და რეგვენების დაცინვისა გვეშინია, — გვეშინია, ხალხმა მასხარად არ აგვიგდოსო. რამდენ ჭკვიანს და მცოდნე კაცს დაუნებებია თავი სასარგებლო საქმისათვის მარტო იმის შიშით, რომ ქვეყანა მასხარად ამიგდებსო. კიდევ ამიტომ არის, რომ ასე დაქვეითებულნი ვართ ყველაფერში და ახალ აზრს და საქმეს სამი დღის სავალზედ გავუბრბით.

მგლოვიარესავით შეწუხებულნი ვიყავით ყველანი. კიდევ კარგი, რომ ამ დროის განმავლობაში შოველი ლორენში დადიოდა თავის სავაჭროთი, თორემ სიცოცხლეს გაუმწარებდა ნათლი-ჯალაბი ეკატერინე; სულ იმ ეშმაკის კერძის ბრალია, მაგას რომ ნაფცქვენებო არ მოეტანა, არც ეს უბედურება დაგვემართებოდაო.

ერთ დილას, ასე ოთხი საათი იქნებოდა, ჩვეულებრივ მივედი ნათლიაჩემის საქონლის გასარეკად. მშვენიერი დღე თენდებოდა. ის იყო ნიკოლისთვის კარი უნდა მიმეკაკუნებინა, რომ ვთქვი — მოდი ბოსტანს დავათვალიერებ, იქნება ღმერთმა მოგვხედა მეთქი. გადავხედე და გაქვეავებულივით შევრჩი ლობეს. სიხარულისაგან სუნთქვა შემეკრა, სულს ვეღარ ვიბრუნებდი: ღამე ცვარი გავარდნილიყო, მიწა დაეღობო და ისე ამწვანებულიყო ჩვენი ბოსტანი, მტერსაც კი იამებოდა.

როცა გონს მოვედი, ლობეზედ გადავხტი, დავწვიდი, ფოთოლს სინჯვა დავუწყე, მაგრამ ამისთანა მცენარე ჩემს დღეში არ მენახა, თავით ბოლომდე გადავიარე, რომ დავრწმუნებულიყავი — მართ-

ლა ამოსულა-მეთქი, და რაკი დავრწმუნდი, რომ ყველგან ამოსულიყო და მომცდარი ერთი კვალიც არ იყო, თვალის დახამხამებაზედ ნათლიაჩემის ფანჯრის წინ გავჩნდი და ბრახუნი დავუწყე. ისეთი ძალით ვაბრახუნებდი ფანჯარას, თითქო სახლს ცეცხლი მისცემიაო.

— ვინ არის? — გამომძახა ნათლიაჩემმა.

— გააღე, ნათლიაჩემო!

ფანჯარა გააღო და გაკვირვებულმა ყურება დამიწყო: ხომ არ გაგიჟებულაო?

— ამოსულა, ნათლიაჩემო, ამოსულა!

ძალიან გაჯავრებული დამცქეროდა, ძილი რად დამითრთხეო, მაგრამ ამ სიტყვის გაგონებაზედ კი სახე გაუბოწყინდა.

— კარგი ერთი და!

— ამოსულა, ნათლიაჩემო! ისე ბიბინებს მთელი ბოსტანი, ისე ამწვანებულა, რომ გაგიკვირდება.

— ჰა, ყოჩაღ, მიშელ; მახარობელი შენისთანა უნდა აი! — იძახდა ნათლიაჩემი და თან სწრაფად ტანთ იცვამდა.

— ეკატერინე! დედაკაცო! ამოსულა, ადამიანო, არ გეყურება, ამოსულა!

ჩიტვით წამოფრინდა ნათლი-ჯალაბიც; ერთ წამს ჩაიცივეს და ბოსტანში ჩამოვიდნენ. ნახეს, დარწმუნდნენ, რომ მართალს ვეუბნებოდი. იმათაც მთელი ბოსტანი მოიარეს, თითქმის ყველა კვალში გაჩერდნენ და ფოთლები სინჯეს. ჩემს დღეში ვერ წარმოვიდგენდი, რომ ამ ჭაღარაშერთულ კაცს ასეთი განხარება შეეძლებოდა.

— სულ მართალი გვითხრა შოველმა, რაც გვითხრა. — სთქვა ბოლოს ნათლიაჩემმა, — ერთი ვნახოთ, ესლა რადას იტყვიან ბერი ბენედიქტე და ჩვენი მეზობლები. გმადლობ, შენ ღმერთო, რომ მტრის გულისად არ გამხადე! ახლა საქმე ის არის, ყოველ ძირს გარშემო მიწა შემოვაყაროთ. შოველმა სთქვა, მიწის შემოყრა ძალიან რგებსო. შოველი ჰკვიანი კაცია, ჩვენზედ მეტი გაეგება და რაკი სთქვა რამე, კიდევ უნდა გავუგონოთ.

ნათლი-ჯალაბიც ეთანხმებოდა.

ბოლოს შინ ავედი. მე საქონელი გავირეკე და ისე გავიარე სოფელი, ხმა არავისთვის გამიცია. გავედი თუ არა მინდორში, ბიჭებმა ყვირილი მორთეს:

— აგერ ჰანოგრული ნაფცქვენები! ნაფცქვენებს გაუმარჯოს!

ახლა კი გული დამშვიდებული მქონდა; დაცინვა აღარ მეწყინა და მშვიდად მივუგე:

— დიად, დიად, მე ჰანოვრული ნაფცქვენების მომხრე ვარ. თესვაშიაცა ვშველოდი და...

პირი გააღეს და გაკვირვებულნი შემომყურებდნენ.

— რას გაიკვირვებთ! წადით, ნათლიაჩემის ბოსტანში გადაიხედეთ, რა კარგად ამოსულა ის ნაფცქვენები! დაიცადეთ, იქნება თქვენვე გვეხვეწებოდეთ: ცოტა ჩვენც მოგვეცითო!

ისეთი ამაყად შევყურებდი, ისეთი კილოთი ველაპარაკებოდი, რომ პასუხიც კი ველარ მოახერხეს. ერთმანეთს შესცქეროდნენ განცვიფრებულნი — იქნება მართალს ამბობდესო?! მაგრამ როცა გონს მოვიდენ, ალბად მოაგონდათ უფროსთაგან ვაგონილი, რომ ნაფცქვენის დათესვა მტკნარი სიგიჟეაო, და ისეთი ყოყინა დამცეს, ისეთი სტვენა დამიწყეს, რომ სხვა დროს იქნება ზედ შევკვდომოდი; იმ დღეს კი ვგრძნობდი, რომ სიმაართლე ჩემკენ იყო და ხმაც არ გავვიცი: დღეს აგრე იყვირებთ, ხვალ კი ინანებთ-მეთქი.

სალამოზედ, საქონელი რომ მივრეკე, ჯერ სოფელში არაფერს ამბობდნენ. მაგრამ მეორე დღეს და მეტადრე მესამე დღეს ხმა გავარდა, რომ მქედელი ივანეს ნაფცქვენები ამოსულაო, არც ბოლოცა, არც თალგამი, არც სტაფილო, რაღაც უცნაური მცენარეაო. დილით სალამომდე ჩვენი ბოსტანის ღობეს ხალხი ეხვეოდა და გაჩუმებულნი სინჯავდნენ ფოთლებს. ახლა კი აღარ დაიცინებოდნენ. ნათლიაჩემმა გვიბრძანა — ხმა არავის გასცეთ. უწინდელი მასხარათ ავღება არავის უსაყვედუროთო; კაცმა თავის შეცდომა თითონვე უნდა შეიგნოს, თორემ თუ კი უსაყვედურებ, უფრო გააბრაზებო.

ჩვენ ხომ ასე კარგად დაგვარიგა, თითონ კი ვერ შეიკავა თავი და ერთს სალამოს, თავის სახლის წინ ბერი ბენედიქტე რომ დაინახა თავისი ჯორით, ველარ მოითმინა და გადასძახა:

— ჰა-ჰაი, ბერო! ახლაც იტყვი, ეშმაკის თესლიაო?! აბა გადახედე ჩემს ბოსტანს... ნახე როგორ აკურთხა ღმერთმა ურჯულოს მოტანილი მცენარე?

— ვნახე, ვნახე, — უპასუხა ბერმა ურცხვად, — ღმერთსა ვფიცავ, მე ეშმაკის თესლი მეგონა, თურმე კი ღვთისაგან კურთხეულ ბალახი ყოფილა... მით უკეთესი, მით უკეთესი, ჩემო ივანე! შენ ერთი კარგი სადილი გააკეთე — დაგვაძლევინე შენი ნაფცქვენები. თუ გემრიელი საჭმელია, დიდი სიამოვნებით შევეჭკევი.

ყოველთვის ასე იყო, ბერი ყოველთვის მართალი იყო: კარგად წავიდოდა საქმე — ღვთისაგან არისო, იტყოდა; წახდებოდა-და — ეშმაკის მოგონილია, ქვეყნის წასაწყმედად და იმიტომ არ იხეირაო.

ღმერთო, რა სულელი უნდა იყოს ადამიანი, რომ ამ ბერისთანა თავხედს სიტყვას უსმენდეს და პატივსა სცემდეს. რამდენი ქვრივ-

ოხერი, რამდენი ობოლი და უძლური იღუპება ულუქმაპუროდ, როდესაც ამ ბერისთანა მუქთანხორა მაწანწალებზედ ისარჯება ქვეყანა, რა ვქნათ, ცოდოა, ღმერთი დაგვიმადლებსო. ჩემდა საბედნიეროდ, იმათთვის ჩემს ღღეში არა მიმიცია რა და არც არას მივცემ.

ნაბრძანები მაქვს, თუ მაწანწალამ — ბერი იქნება თუ ერის კაცი — მოწყალება ითხოვა, სამზარეულოში შეიყვანეთ, სწორედ იმ დროს, როდესაც ბიჭები სუფრას უსხედან და გაჩქარებულნი ილუქმებიან. შევა სამზარეულოში, სუფრაზედ სასმელ-საჭმელს დაინახავს, ჯამით შექაშადს და ღოჭით ღვინოს და პირში ნერწყვი მოუვა. სწორედ მაშინა ჰკითხავს ჩემი გუთნისდედა:

— რაო, რა გინდა?

თუ პასუხის მაგივრად დაიღრიჯნენ და — მოწყალება მოიღეთო ითხოვეს, გუთნისდედა პეტრე ხელში ბარს მისცემს: აი, ძმავ, საქმეში დაგვეხმარე და სუფრაზედაც გვერდს მოგისვამთო. ასში ერთი არ დარჩება: თავს დაღუნავენ და მიდიან — ჩვენ შრომისა არა ვიცით რა. ჩვენ სხვის ნაშრომით ვიკვებებითო. თან იწყევლებიან:

— ღმერთმა მოგიგოთ სამაგიერო! აღარც ღმერთი გწამთ, აღარც ბერი! წახდა, წაირყვნა ქვეყანა!

მე კი ვდგევარ კარებში და გულიანად ვიცინი, ღმერთმა კარგი მგზავრობა მოგცეთ-მეთქი.

სხვებიც რომ ასე მოეჭინენ ბერებს და ერთობ ყველას, ვისაც შრომა შეუძლია, ქვეყანა ერთი ორად გამდიდრდებოდა და საწყალ გლეხკაცსაც მეტი დარჩებოდა თავის ნაჭირნახულევიდან. მაგრამ დროა ჩვენს ბოსტანს მივუბრუნდეთ. დროა მოგახსენოთ, როგორი პატივისცემა და დიდება დაიმსახურა ნათლიაჩემმა კარტოფილის წყალობით.

მკათათვეში თეთრად აყვავდა ჩვენი ბოსტანი; ისე აიწია ნათესმა, რომ ღეროები თითქმის ღობის ნახევრამდე ამალდნენ. ცხელოდა, ამომწვარს ჰგავდა ჩვენი არე-მარე და ბოსტანი კი თავი-გულივით იყო აყვავებული. რწყვა არ უნდოდა, რადგან ღამის ცვარი სრულიად საკმარისი იყო ამ უცნობი მცენარისთვის.

დიდით პატარამდე სულ კარტოფილზედლა ვლაპარაკობდით — სულ იმის სჯაში ვიყავით, ნეტავი როგორ ფესვებს გაიკეთებსო. ასე გასინჯეთ, გაზეთებიც კი დაგვაფიწყდა, რადგან სათათრეთს და ამერიკის ამბებს ჩვენი საქმეები გვერჩივნა.

ენკენისთვის დამდეგს ყვავილი დასცივდა, ყლორტები დაუხმა და ყველანი იმ აზრისა ვიყავით, რომ დროა ფესვები მოვთხაროთო, მაგრამ ნათლიაჩემი სულ სხვას გაიძახოდა:

— შოველმა სთქვა, ოქტომბერში შემოდისო. პირველ ოქტომ-

ბერს ერთი ძირი გავსინჯოთ და, თუ ივარგა, სულაც დაეთხაროთ.

მართლაც, პირველ ოქტომბრამდე ხელი არავის გვახლებინა. პირველ ოქტომბერს კი, მახსოვს ბურუსიანი დღე იყო, ნათლიაჩემმა აიღო ბარი და ბოსტნისკენ გასწია. ჩვენც უკან დავედევნეთ.

პირველსავე კვალში გაჩერდა და ერთ ძირს დაჰკრა ბარი; კარგა ღრმად დაიყვანა და რომ გადმოაბრუნა, ათამდე უშველებელი, ვარდისფერი კარტოფილი ამოაყოლა. მეორედ დაჰკრა და მეტი ამოიღო, აგრეთვე შესამეზედ, ასე რომ კალათი ნახევრამდე მოჰყარა ერთმა ძირმა. ჩვენ კი ვიდექით და შევცქეროდით გაშტერებულნი. ჩვენი თვალისაც კი აღარა გვეჯეროდა.

ერთი ძირი რომ ამოთხარა, მერე შუა ბოსტანში გადავიდა და ახლა იქ დაჰკრა ბარი. აქ უფრო მეტი და მსხვილი ამოვიდა და მაშინ სთქვა გახარებულმა ნათლიაჩემმა:

— გმადლობ, შენ ღმერთო!... ახლა კი ვიცი, რა ყოფილა ეს მცენარე. მერმის, ფერდობზედ რომ ორი დღიური მაქვს, სულ ეს უნდა დავეთესო. თესლად წლევიანდელ მოსავალს შევიწინაბავ. რაც დამრჩება, კარგ ფასად გავყიდი; მერწმუნეთ, უფასოდ რომ მივცე, ყურადღებასაც არავინ მიაქცევს და წაახდენენ.

ნათლი-ჯალაბს კარტოფილი კალათში ჩაეყარა და გახარებულნი წავედით შინისკენ, რომ ეს ახალი საქმელი დაგვეძლია.

ჩვენ ბედზედ წინა ღამით შოველი დაბრუნებულიყო ლორენიდან და უთხრეს თუ არა ნათლიაჩემს, აქ არისო, დამიძახა: — აბა გაფრინდი, მოახსენე, ცოტა ხანს აქ გადმობრძანდესო. კარგა მანძილი მქონდა გასაველელი, მაგრამ მართლა გაფრინდი და ერთ წამს შოველის სახლთან დავიბადე. დამინახა თუ არა, მაშინვე სთქვა, ალბად კარტოფილი ამოვიღიათო.

ნათლიაჩემი კიბეზედ ჩამოეგება კარტოფილით სავსე კალათით და შესძახა:

— ჰხედავ, შოველ! ეს ორი ძირის ნაყოფია, და ერთი ამოდენი კიდევ მოსახარშავად შევდგით.

— მაშ კარგი მოსავალი გექონია, — უბასუხა შოველმა, — აკი გითხარი, კარგი სხმა იცის-მეთქი.

— დღეს სადილად, რასაკვირველია, ჩვენთანა ხარ. ერთი გემოთა ვნახოთ, თუ კარგია, ბედსა ვწევთ ჩვენს სოფელს.

— კარგი კი არა, მერწმუნე. უკეთესი არა იქნება რა. — უბასუხა მეწვრილმანემ. მეტადრე შენთვის არის კარგი: მარტო თესლად რომ გაჰყიდი, იმაშიაც კარგ თანხას აიღებ.

— ვნახოთ, ვნახოთ! — იძახდა ნათლიაჩემი და სიხარულისაგან ხან აქეთ ეცემოდა, ხან იქით, — ვნახოთ ერთი, რა გემოსია?

ნათლი-ჯალაბი კვერცხსა სთქვეფდა ერბო კვერცხისთვის, ცეცხლისპირას ყვერული იხარშებოდა. ნიკოლმა მარნიდან წითელი ღვინის ჭაშნიკი ამოიტანა. სუფრა გაშლილი იყო. ერთი სიტყვით აღდგომას არა ვყოფილვარ ასე გახარებული.

მეტადრე ნათლიაჩემი და შოველი! კარგად ესმოდათ ორივეს, რომ ეს ახალი მცენარე თავისი ნაყოფით სასარგებლო რამ უნდა ყოფილიყო, მაგრამ ვერ წარმოედგინათ, რომ ეს უბრალო ბალახი ძირიანად შესცვლიდა ხალხის მდგომარეობას, შიმშილს ამოაგდებდა და კაცობრიობას უფრო მეტს სიკეთეს მოუტანდა, ვიდრე მეფეები და დიდებულნი, რომლებსაც ძლიერს ვუწოდებთ და ძეგლებს ავუშართავთ ხოლმე. მეტადრე ნათლიაჩემს: ისე უხაროდა თავის საარგებლობა, რომ საზოგადო სარგებლობას არც კი დაჰფიქრებია.

— ოღონდ თალგამის გემო ჰქონდეს და მე მეტი არა მინდარა, — ნატრობდა ნათლიაჩემი.

— თალგამი რა სახსენებელია! — უპასუხა შოველმა, — თითებს დაიკვნეტ, ჯერ გემოდ ნახე. კარგი რომ არა ყოფილიყო, დარწმუნებული რომ არ ვყოფილიყავი, რომ სასარგებლო იქნებოდა შენთვისაც და ქვეყნისთვისაც. იმ სიმძიმე პარკს კი არა ვზიღამდი იმ სიშორიდან, კინაღამ წელი მოვიწყვიტე. უმამულობა სთქვი, თორემ მე თითონ დავთესავდი და დეე, მე ავეგდე მასხარად.

— არა, ჩემო შოველ, მე, ურწმუნო თომასი არ იყოს, მანამ გემოს არა ვნახავ, მანამ არ დავმშვიდდები. შენ იქნება ძალიანაც მოგწონდეს და... ხომ იცი, ზოგს მღვდელი მოსწონს...

— ჰოდა გემოსაც ნახავ და კიდევ მოიწონებ, — უპასუხა სიცლით შოველმა. — აგერ სუფრა გაშლილია, დიდი ხანი კი არ უნდა მაგის მოხარშვას.

— აბა დაბრძანდით! — დაგვიძახა სწორედ ამ დროს ნათლი-ჯალაბმა. ძველ დროში სახლის პატრონი და მოჯამაგირეები ერთ სუფრაზედ სჭამდნენ პურსა, და წარმოიდგინეთ რამდენნი ვიქნებოდით იმ დღეს სადილად.

ის იყო უნდა დავლაგებულებიყავით — სუფრის თავში შოველი და ნათლიაჩემი თავის ცოლით, სუფრის ბოლოს მე და პატარა მარგალიტა, რომ ამ დროს ნათლიაჩემმა ფანჯარაში გადიხედა და შეჰყვირა:

— მამაო ქრისტეფორე! აქეთ, აქეთ!

ლუტცელბურგელი მღვდელი მამა ქრისტეფორე ერთი უზარმაზარი, ჩასხმული, ნამდვილი მთიული იყო. კიბეზედ რომ ფეხი შემოსდგა, სახლმა ზანზარი დაიწყო; ნალებით დაქედილი წაღები ეცვა და საცა კი ფეხს დაადგამდა, რაც უნდა მაგარი ფიცარი ყოფილიყო,

თავის ნაფეხურების კვალსა სტოვებდა. კარებში რომ ვერ შემოეტიო, დაიკუნა და გვერდ-გვერდ შემოვიდა. გახუნებული ანაფორა, ძველისძველი ქუდი, უშველებელი ყავარჯენი — ნამდვილი სოფლელი ღარიბი მღვდელი იყო.

— აქა მშვიდობა! — იმისთანა ხმითა თქვა, თითქო იქეკაო, მე და მარგალიტა შევხვით.

— ისევ ერთადა ხართ, თქვე შეთქმულებო თქვენა? თუნდა დაიფიცავ, რომ ნანტის კანონის * აღდგენასა ცდილობთ.

— რა კარგ დროს შეგვესწარ, მამაო ქრისტეფორე, — შესძახა ნათლიაჩემმა, — დაბრძანდი, დაბრძანდი.

— რა გაეწყობა! ხომ იცი, საბძელი რომ გეწოდეს, ხელი მოითბეო, — უპასუხა სიცილით მღვდელმა და კუნჭულში მიაყუდა ყავარჯენი და ზედ თავისი ქუდი ჩამოჰკიდა. აჰა, დაბრძანდი! იქნება ფიქრობ ამითი შემისყიდო და დამაჩუმიო? ვერ მოგართევს, ჩემო ივანე! სულ ეს კი გაგიყებს აი, ეს შოველი! არა, უნდა წავიდე, დაგაბეზლო, თორემ ან წარღვნას მოგეგვრის ეს ცოდვილი, ან ჰირსა.

— რომ დამაბეზლო, მთაში გადაკარგულ მღვდლებს ვილა მოგიტანთ აკრძალულ წიგნებს? — ჰკითხა ღიმილით შოველმა.

— ჩუმად, შე წყეულო, შენა! — ხარხარებდა მამა ქრისტეფორე. — მე სახარების ერთი მუხლი მიჩვენებია მთელ შენს აკრძალულ ფილოსოფოსების ნაწერებს.

— მერმე ჩვენც მაგას არა ვჩივით? — შეჰყვირა შოველმა. — ჩვენც მაგას არა ვტირით? მაშ რად გვიშლიან ჩვენ პროტესტანტებს სახარების კითხვას?

— იმიტომ გიშლიან, რომ თითონაც არა გაეგებათ რა. ეჰ, შოველ, ღმერთს რომ სისულელე არ გაეჩინა, ხომ აღარც უბედურება იქნებოდა ქვეყანაზედ.

მერმე ჩვენთან მოვიდა — აბა, ყმაწვილებო, ალაგი დამითმეთო და როგორც იყო მე და მარგალიტას შუა მოთავსდა. ჩვენ აღარც კი ვჩანდით, იმოდენა მთა-კაცი იყო მღვდელი, და ისეთი საშინელი ხმით ლაპარაკობდა, რომ ჩვენ იმის ყურებასლა ვუნდებოდით და შიმშილიც კი გადაგვავიწყდა.

ბავშვივით გულჩვილი კი იყო იმოდენა მღვდი კაცი. მარტოხელი იყო, სამწყსო კარგი ჰყავდა და ყოველთვის აიღებდა იმდენს, რომ თითონაც ჰყოფნოდა და ცოტა რამ შავი ღლისთვისაც გადაეღო.

* ნანტი ქალაქი. ნანტის კანონის ძალით, რომელიც მეფე ანრი მეოთხემ გამოსცა 1598 წ., პროტესტანტებს მიეცათ სრული თავისუფლება რკულისა, მაგრამ მეფე ლუი მეოთხემეტემ 1865 წ. ეს კანონი გააუქმა.

იმას კი თავის გახუნებული ანაფორის მეტი არა გააჩნდა რა, თუმცა მთელი დღე ისევ მუშაობდა, როგორაც უბრალო ღარიბი გლეხ-კაცი. მუშაობდა, მუშაობდა, და საცა გაჭირებულსა ნახავდა, ისიც იქ იყო და, რაც ჰქონდა, სულ ღარიბ ხალხსვე ურიგებდა. ზამთარში სკოლა ჰქონდა თავის სახლში და ზაფხულში, როდესაც ბავშვები სასკოლოდ ვეღარ იცლიდნენ, მთელი დღე ქვის ან მუხის ხატებსა სთლიდა და მთაში უგზავნიდა იმ საყდრებს, რომლებსაც საშუალება არა ჰქონდათ ეკლესიისთვის შეეძინათ რამე.

მთელმა ხეობამ იცოდა მამა ქრისტეფორეს ჭასიათი და სამი დღის სავალზედ ჩამოუტანდნენ ხოლმე კლდეს ან მუხის ნაჭერს. ზოგი სთხოვდა წმინდა გიორგი გამოგვიხატეო, ზოგი პეტრე და პავლეო, ზოგი რას და ზოგი რას.

ნათლიაჩემი და მამა ქრისტეფორე პატარაობიდანვე ერთად შეზრდილიყვნენ და ძალიან უყვარდათ ერთმანეთი.

— მართლა, ქრისტეფორე, როდის გახსნი შენს სკოლას?

— აი, რთვილს ჩამოაგდებს და ვახსენებთ ღმერთსა, — უპასუხა მღვდელმა. სწორედ ამიტომ წამოვედი, მინდა ქალაქს ჩავიდე და ცოტა საწერ-კალამი და ქაღალდი ვიყიდო. მინდოდა ენკენისთვის გასულს დამეწყო, მაგრამ მთაში ერთ ეკლესიას წმინდა პეტრეს ხატს დავპირდი და იმან შემავიანა: თუ დროზედ არ ჩავაბარე, საყდარს ვერ აკურთხებენ.

— ძალიან კარგი, მაშ იმ კვირია დაიწყებ.

— დიად, ორშაბათს, ღვთით.

— მოდი, მამაო, ეგ ბიჭი წაიყვანე, ემანდ გვერდზედ რომ გიზის. საწყალი პეტრეს ბიჭია. ხომ იცნობ? ჩემი ნათლულია და დარწმუნებული ვარ, არ შემარცხვენს.

სიხარულისაგან ისე გავწითლდი, როგორც ჰარხალი. განა არა, სულ იმასა ვნატრობდი — ნეტავი ერთი ანბანი მასწავლა-მეთქი.

ამ დროს მღვდელი ჩემკენ მობრუნდა, თავზედ ხელი დამადო და მითხრა:

— აქ მიყურე!

უფრო უარესად გავწითლდი, მაგრამ რა გეეწყობოდა, შევხედე.

— რა გქვია!

— მიშელი მქვია, მამაო.

— ჰო და კეთილი იყოს ნათლიაშენის წადილი. ორშაბათს მოდი, ჩემი სკოლის კარები ყოველთვის ღიაა და რაც მეტი მოწაფე მყავს, იმდენად კმაყოფილი ვარ.

— შენ გიშველა ღმერთმა, მღვდელო! აბა კარგი სიტყვა მაგასა ჰქვია აი! — შეჰყვირა მეწვერილმანემ.

ან ღროს ღვინო დაისხა ნათლიაჩემმა:

— ღმერთმა გაცოცხლოს, მამაო ქრისტეფორე, ღმერთმა გაუ-
მრავლოს ქვეყანას შენისთანა მუშაკნი!

ღღეს რომ ყველა სოფელში მშვენიერი სახლია აგებული სკო-
ლისთვის და ყველგან ნასწავლი და განათლებული მასწავლებელია
პყავთ, ისე კი არ იყო უწინ. სად იყო სკოლა?

ათასში ერთმა 'არ იცოდა წერა-კითხვა და ვინც იცოდა, იმის-
თანა პატივცემული იყო ყველასგან, რომ ეხლა ვერც კი წარმოი-
დგენთ. მეც გამეზარდა სკოლაში სიარული, სულ ცას დავეწიე:

— წერას ვისწავლი, კითხვას ვისწავლი, ვიძახდი ჩემს გულში,
კაცი გავხდები, იქნება ჩემ ოჯახს გამოვადგე რითიმე!

არა, ადამიანმა თავის თავზედ უნდა სცადოს ეს ყველაფერი,
იმისთანა ღროს უნდა შეხედეს, როგორც ჩვენი ღრო იყო, რომ
ჩემი მოთხოვნა არ გაიკვირვოს. მე კი ისეთ ღროს შევესწარ, ისეთ
გაქირებას ვხედავდი ჩემი მშობლებისას, რომ მართლა უბედური
უნდა ვყოფილიყავ, რომ ამისთანა შემთხვევით არ მესარგებლა. ან
როგორ არ ვისარგებლებდი? იმავე თავითვე სულ იმის ფიქრში ვი-
ყავი, როდის იქნება საკუთრივ ყოფნა შემეძლოს და სხვის თვალ-
წარბში მყოფრებელი არ ვიყო-მეთქი. ხომ კარგად მექცეოდნენ ნათ-
ლიაჩემისას, ხომ შეიღვივით ვუყვარდი ყველას, და მაინც ამასა
ვეფირობდი: სხვა რას უნდა გრძნობდეს, როდესაც ყოველ წამს
წაყვედრებენ — მოჯამაგირე ხარ და შენი ალაგი იცოდეთ... სულ
გაღამავიწყდა, რომ სულფრაზედ ვზივარ, აღარც ჰამა მახსოვდა,
აღარც სმა. კინალამ წამოვხტი და შინისკენ მოვკურცხლე, — მამა-
ჩემო, ორშაბათს სკოლაში მივდივარ-მეთქი. მაგრამ ამ ღროს კარ-
ტოფილი მომაგონდა და გონებაზედ მოვედი.

აგერ კარტოფილიც შემოიტანეს. გაუფუცქენელი მოეხარშათ
წყალში. კანი დახეთქოდა და მშვენიერი ყვითელი ნაყოფი დაფხვნო-
და. მღვდელ ქრისტეფორეს ჯერ არ ენახა და კინალამ თან გაგვიტანა
მე და მარგალიტა... — რა ვქნა, ეგ რა არის, ივანე? რა ხილია, საი-
დან არისო? — შენ ხილი ნახე, მეხილეს რასა კითხულობო, — უპა-
სუხა ნათლიაჩემმა და ყველას ჩამოგვირიგა.

გემოდა ვნახეთ და ისე მოგვეწონა ყველას, რომ ერთხმად შევ-
ძახეთ:

— იპ, რა კარგია, ამისთანა გემრიელი ჩემს ღღეში არა მიჭამია-
რა.

ყველაზედ მეტად გაკვირვებული მღვდელი იყო; რომ უთხრეს,
ნახევარ ღღის მიწიდან ათი-თხუთმეტი ტომარა ამოვაო, არ დაი-
ჯერა და სულ იმას იძახდა:

— შეუძლებელია, მავ სიკეთეს ვინ გვალარსებს ჩვენ ცოდვილთაო!!

იმისთანა განხარებულნი ვიყავით, ისეთ აღტაცებაში მოგვიყვანა კარტოფილმა, რომ გაფცქვნას ვეღარ ვითმენდით და რომ არ შეგვრცხვინოდა. გაუფცქნელს ვადავყლაპავდით; ისე ვიღეჭებოდით, თითქო სამი დღის დამშეულნი ვართო. ბოლოს ისევ მღვდელმა შეირცხვინა:

— კმარა, კმარა, დიასახლისო, თორემ ეგ იმისთანა საუცხოვო რამ არის, რომ ძლომა ვერ მოგვეცილება და მეტი კი ყველა მავნებელია.

ყველანი დავეთანხმებით, თუმცა რომ მოეტანათ, კიდევაც გაიხლებოდით.

წასვლის წინ მღვდელმა ჩვენი ბოსტანი დაათვალიერა, შოველს დაწვრილებით გამოჰკითხა კარტოფილის თესვა-შოველა და რომ გაიგო, მთიან ალაგს, ქვიშნარში უკეთ მოდის ვიდრე ბარშიო, ძალიან იამა და სთქვა:

— ყური მიგდეთ! შოველ, შენ ამ მცენარის თესლის მოტანით და შენ, ივანე, ამის გაჩენით მიუხედავად ბერების და რეგვენების დაცინვისა, მეტი შესძინეთ ჩვენს ქვეყანას, ვიდრე მთელი ქვეყნის ბერებმა თავიანთი ლოცვით და მარხვით: თქვენ ღარიბ კაცს ლუკმა-პური გაუჩინეთ.

მერმე ნათლიაჩემსა სთხოვა — ცოტა მეც შემინახე თესლად, რომ ჩემს ბაღში დავეთესო ხალხის სამაგალითოდ; სულ ორი წელიწადი არ გავა და კაცს ვეღარ ნახავთ, რომ ეგ მცენარე არ გაეჩინოსო. შემდეგ ამისა გამოგვეთხოვა და ქალაქის გზას გაუდგა.

აი, როგორ შემოვიდა ჩვენს ქვეყანაში კარტოფილი. მეგონა ამ ამბის გაგება ჩვენ გლუხკაცებს ასიამოვნებდა და ამიტომ მოგახსენეთ.

წლის თავზედ ნათლიაჩემმა სამოცი ტომარა კარტოფილი ამოიღო ფერდობის მიწიდან. მაგრამ ვიღაცას ხმა გაეცრცელებინა ხალხში — კარტოფილს ნუ სჭამთ, თორემ ჭირი შეგეყრებათო და ჯერ არავინა სთესდა, ერთი ორი კაცის გარდა. ჩვენდა საბედნიეროდ, ცოტა ხანს უკან გაზეთებში ეწერა — ერთმა კაცმა სახელდობრ პარმანტიემ, პარიზის მიდამოში მოიყვანა კარტოფილი და მეფეს დააძლევინაო. მეფემ ძალიან დაუბადლა და მაღიანადაც შეექცაო. ამის შემდეგ კი ყველამ მოინდომა იმის გაჩენა და ნათლიაჩემმა იმდენი გაყიდა სათესლედ, რომ მართლა ბლომად ფული აიღო.

ჩემი სიცოცხლე ამ დღიდან იწყება. ვინც არა იცის რა და არც საშუალება აქვს სწავლისა, ისე განვლის წუთისოფელს, როგორც ერთი უბრალო ხარი: თავის დღენი სხვისთვის იმუშავენს, თავისი შრომით სხვას გაამდიდრებს და როდესაც დაბერდება და დასუსტდება, პანდურსა ჰკრავენ — აღარ მოგვმორლები, რას ჩაგვციები-ხარო!

როგორც კი ირაყრაყებდა, გამაღვიძებდა მამაჩემი. წამოვხტებოდი, პირზე წყალს შევისხამდი, საჩქაროდ ჩავიცვამდი, გადავიკიდებდი აბგას და გავწევდი სკოლისკენ; სიცივისაგან ფრთებშესხნულივით მივხტოდი და თან გათოშილ თითებზედ ვიბერავდი.

რა კარგად მაგონდება ყველაფერი, თუმცა დიდი ხნის ამბავს მოვახსენებთ: მთის ფერდობზედ ამაველი ბილიკი, ტყის პირი თავის გატიტვლებული, გათოვლილი ხეებით და აკლამისებრივი სიჩუმით; აგერა სოფელიც, აგერა დაბალ-დაბალი საყდარი მუხანზედ ამართულ სამრეკლოთი, იქვე სასაფლაოვო თოვლით დაფარული საფლაფის ქვებით; ძველის-ძველი სახლები, გაყინული წყალი, გაჩერებული წისქვილი... რა კარგი ხარ, სიყმაწვილევ! სულ ყველაფერს დაივიწყებს ადამიანი, ჰირსაც, ლხინსაც, და სიყმაწვილეში ნახულს და გაგონალს კი თავის დღეში არა!

ყველაზედ უწინ თითქმის ყოველთვის მე მივდიოდი სკოლაში. შევიდოდი ცარიელ ოთახში თუ არა და მამა ქრისტეფორეს დედაც თან შემომყვებოდა. ხომ ღრმა მოხუცებაში იყო, მაგრამ იმისთანა ჰანზაყად, იმისთანა მარდად მიდი-მოდიოდა, ისე უვლიდა თავის სახლკარს, რო ბევრ ყმაწვილ ჭალსა სჯობდა. შემოვიდოდა და ბუხარში ცეცხლს გააჩენდა. მე იქვე შეშაზედ ჩამოვჯდებოდი და ხელებს ვითბობდი; მერე ოთახს დავკვიდი; ტილოს ავიღებდი და ჯერ სკამს გადავწმენდი, მერე შავ დაფას, ფანჯრებს, მამა ქრისტეფორეს სამფეხა სავარძელს და კუნჭულში დიდ ჯვარცმას.

ოთახს რიგრიგითა ვგვიდით, მაგრამ რადგან ადრე მივიდოდი ხოლმე, მე დავიწყებდი და თუ მომისწრობდა, ვისიც რიგი იყო, ის გაათავებდა, თუ არა და მევე გავათავებდი, რადგან ზოგნი ძალიან შორეულ სოფლებიდან დაიარებოდნენ და უგვიანდებოდათ.

იქ გავიცანი ყველა ჩემი კარგი მეგობრები — ლუი ფროსსარი — მამასახლისის შვილი, საწყალი სრულიად ყმაწვილი კაცი, მოკლეს რევოლუციის დროს; ალოი კლემანი ყუმბარამ გაიტანა; ცხონებული ოთხმოცდათორმეტში უკვე აფიცერი იყო; დომინიკე კლოსი — შემდეგში სავერნში დაბინავდა და სახელოვანი ღურვალიც

იყო; ფრანსუა მეიერი — ჯარის თერძი; 1820-ში ძალიან მდიდრად იყო და მერე საღდაც გადიკარგა; იმისი ღღესაც არავინ იცის რა. ჩემი ძმასავით ერთგული ანტონი, გვარდიის ოფიცერი; 1815 შემდეგ ხშირად მესტუმრებოდა ხოლმე, დავსხდებოდით და წარსულს გავიხსენებდით; ხან რა მოგვაგონდებოდა, ხან რა; იაკობ მესსიე — უმფროსი ტყის მკველი; ჰუმბერ პერსენი — ფოსტის უფროსი და ორმოცდაათი კიდევ სხვა, რომელნიც, რევოლუცია რომ არ მომხდარიყო, კაცად ვერ გახდებოდნენ.

1782 წლამდე ხარაზის შვილი ხარაზი უნდა ყოფილიყო, ხუროს შვილი — ხურო; თავის წოდებიდან ვერავინ გამოვიდოდა. ოცდაათის, ორმოცის წლის შემდეგ რომ მისულიყავი, იმავე ალაგას, იმავე საქმეზედ ნახავდი კაცსა — დაბერებული დაგხვდებოდა, თორემ სხვაფრივ იგივე უნდა ყოფილიყო. ეხლა კი ყველას შეუძლია, თუ კი შრომა უყვარს და თავში ტვინი უღვეს, კაცად იქცეს და უმაღლეს ხარისხამდე მიაღწიოს; სულ წყალში გადასაგდები უნდა იყოს კაცი, რომ ეხლანდელ დროში წარჩინებას არა ცდილობდეს, იმიტომ, რომ სულ უბრალო გლეხკაცის შვილს შეუძლია, თუ კი ნიჭი, მეცადინეობა და პატიოსნება შესწევს, მთელ საფრანგეთის მოთავედ გახდეს.

მაშ ვადიდოთ უფალი ღმერთი ჩვენი, რომ თავისი სხივი მოპვინა ჩვენს ხალხს! ვეცადნეთ ამ ცვლილებით ჩვენც ვისარგებლოთ.

საღდა არიან ჩემი ძველი მეგობრები? შარშან ორნიღა ვიყავით ცოცხალნი: იოსებ ბრუსუსი — ქულებსა ჰკერავდა ქალაქში — და მე. გაზაფხულზედ ქუდის სასყიდლად რომ მივიდოდი, ხმაზედ მიცნობდა ხოლმე. მაშინვე გამოვიდოდა, ცხონებული ძლივსღა დაათრევდა მარჯვენა ფეხს და შემომცინებდა:

— ოჰ, მიშელს გაუმარჯოს, მიშელს!

ხელს მომხვევდა და თავის საღგომ ოთახში გამიყვანდა; საიდანღაც პატარა ხელადით ღვინოს გააჩენდა, დავსხდებოდით და წარსულის, სიყმაწვილის მოგონებაში ტკბილად ვჭუჭჭუყებდით. ვამოთხოვებისას, კარამდე მიმაცილებდა, მხარზედ ხელს დამკრავდა და ნუგეშსა მცემდა:

— ნუ გეშინია, ჩემო მიშელ! ჯანი იყოს, თორემ სიბერეს არა უჭირს რა. ნუ გეშინია! ეს კი იცოდე, მე რომ დამმარხავთ, მერე შენც უნდა მოემზადო ნელ-ნელა.

საწყალი ბრუსუსი! შემოდგომაზედ ისიც დავასაფლავეთ და მარტო მეღა დავრჩი. და თუმცა მეუბნებოდა — შენც უნდა მოემზადო, ჯერ მე სრულიადაც არ ვემზადები. ჯერ არაა ჯერ რა დროსა? ჯერ ჩემი ისტორია უნდა გავათავო; და მერე ამას რომ გავა-

თავებ, იქნება ღმერთმა სხვა მაგონოს რამე და ახლა იმის გათავება მადროვოს. რა მეჩქარება? სიკვდილს ყოველთვის მოესწრება ადამიანიშვილი!

ერთი სიტყვით, მამა ქრისტეფორეს სკოლაში გავიცანი ყველა ჩემი კარგი მეგობრები. ზოგი მოვახსენეთ და ბევრს კიდევ შემდეგში მოვახსენებთ, როცა იმათი სახელები მომაგონდება.

რვა საათი რომ გახდებოდა, ისინიც კარს შემოაღებდნენ და სალამს მისცემდნენ მასწავლებელს:

— დილა მშვიდობისა, მამაო ქრისტეფორე!

სად იყო მამა ქრისტეფორე? ის ჯერ ისევ თავის ოთახში ბრძანდებოდა, მაგრამ მაინც თავისას გაიძახოდნენ, ბუხარს შემოეხვეოდნენ, ხუმრობდნენ, იცინოდნენ. მაგრამ შემოგვესმოდა თუ არა იმის ფეხის ხმა, ყველანი ჩვენს ალაგს დავსხდებოდით და ისე ჩაეჩუმდებოდით, თითქო ოთახში არავინ არისო: ყველამ ვიცოდით, რომ მამა ქრისტეფორეს ძალიან ეჯავრებოდა ხმაურობა და მეტადრე ჩხუბი. რამდენჯერ გაუგდია კლასიდან პანდურის კვრით შეგირდები მარტო იმიტომ, რომ ჩხუბის ატეხასა ცდილობდნენ. ისე ვყავდით გაწვრთნილი, რომ ზევით ვერ ავიხედავდით, თვალი არ შემოგვასწროსო.

აგერ მობრძანდა, კარებში გაჩერდა და იქიდან დაგვათვალიერა, ხომ ყველა რიგზედ არისო; წამოვდექით, ჩუმადა ვართ ყველანი; კლასში ცეცხლის გუგუნია ისმის. შემოვიდა, ერთს შეგირდს ლოცვა ათქმევინა, მერე დავსხედით და დავიწყეთ ყველამ ერთხმად: ბ, ა, ბა. კარგა ხანი ვიძახეთ, ბა, გა, და... ბოლოს კმარაო, გვიბრძანა.

— აქ გამოდი, იაკობ.

იაკობი იახლა და თავდაღუნული დგას მის წინაშე.

— ვინ შექმნა ცა და ქვეყანა?

— ღმერთმა.

— შენ ვილამ გაგაჩინა?

— ღმერთმა.

— რისათვის გაგაჩინა შენ ღმერთმა?

— იმისთვის, რომ ვადიდო იგი, ვილოცო, ვემსახურო და მით მოვიპოვო სასუფეველი ღვთისა.

ერთსა ჰკითხავდა, მეორეს, მესამეს. ჩვენ კიდევ ყურს ვუგდებდით. სამი თვის შესული არ ვიყავ სკოლაში, რომ სულ ზეპირად ვიცოდი ჩემი კატეხიზმოსი.

მერე წაგვიკითხავდა რასმე და — აბა მიაძებთო! ან არა და უკანდან მოგვივლიდა და თუ ცუდლუტობას შენიშნავდა ვისმე, ყურს

დაუსრესდა. თან კი იმედს აძლევდა: — შენ ეცადე, ძალიან ბიჭი დადგებო.

მე ისე მეშინოდა, ნათლიაჩემთან არა სთქვას რა-მეთქი, რომ სულ სმენად გადავიქცევოდი ხოლმე. ვცდილობდი, ვცდილობდი, რომ მეტი არ შეიძლება. მოვიდოდა, მხარზედ ხელს დამადებდა და შემომძახებდა: ჰა, ყოჩად, მიშელ, ცდილობ და კმაყოფილიცა ვარ შენით!

ერთხელ ძალიან კარგად ვუთხარ გაკვეთილი და ძალიანაც დამიმაღლა:

— ნათლიაშენს უთხარი — მღვდელი ძალიან მემადლიერება თქო. გეყურება, სწორედ აგრე უთხარი.

იმ დღეს ყენი რომ შემომხვედროდა, თავს არ დავუკრავდი, მაგრამ ნათლიაჩემს კი არა ვუთხარი რა, სიამაყეში არ ჩამომართვან-მეთქი.

მარტის დამდგეს კარგადა ვკითხულობდი. ჩემდა საუბედუროდ, ნათლიაჩემი მთელი წელიწადი არ შემინახავდა ისე უსაქმურად და რაკი გაზაფხული დადგა, მე ჩემს საქონელს უნდა მივპატრონებოდი და სკოლას უნდა მოვმცდარიყავ. ჩემი ანბანი და კატეხიზმოსი გუდით დამქონდა მინდორში და, მანამ საქონელი სძოვდა, მე ხის ჩრდილში ვიჯექი და ვიმეორებდი, რაც მამა ქრისტეფორესაგან მესწავლა. ისე რომ ზამთარში ხელმეორედ რომ მივედი სკოლაში, სხვებსავით კი არ დამვიწყებოდა ნასწავლი, უფრო გაზეპირებული მქონდა და მამა ქრისტეფორემ იმ შეგირდებთან დამსვა, რომელნიც შეძლებული კაცის შვილები იყვნენ და სასწავლებლად მთელი წელიწადი დადიოდნენ. რაც კი მაშინდელს დროს შეეფერებოდა, ყველაფერი ვისწავლე; წერა-კითხვა, სამღვთო რჯული, ანგარიში — ცოტ-ცოტა ყველა ვიცოდი და 1781 წ. საკმარისად მომზადებული ვიყავი, რომ ჩემს სიცოცხლეში პირველად ვზიარებულიყავ. ზიარებით დამთავრდა ჩემი სწავლა, რადგან, რაც კი თითონ იცოდა მამა ქრისტეფორემ, ყველაფერი მასწავლა. დანარჩენი მე თითონ უნდა შემეძინა შრომით და დაკვირვებით.

ამის შემდეგ ნათლიაჩემმა მენახირედ მოხუცებული იერი დაიქირა და მე კი სამკედლოში ვეზმარებოდი, ისე რომ რამდენიმე თვის შემდეგ, როდესაც მკლავში ცოტა რამ ღონე მომეცა, მეც კარგად ვცემდი კვერსა. ნათლი-ჯალაბი და ნიკოლი დიდ პატივსა მცემდნენ, რადგან საღამოობით, როდესაც სამკედლოში მუშაობას შევწყვეტდით, ახლა მე ვუკითხავდი გაზეთებს და პატარ-პატარა წიგნებს, რომელიც შოველს მოჰქონდა. ვკითხულობდი, მაგრამ ხშირად წაკითხულის ნახევარიც არ მესმოდა. მაგალითად, გაზეთში რომ

გვიხელობდი „ვერგინის უფლებათა“, სახელმწიფო ხარჯით, ერის წარმომადგენელთა ამორჩევით, — სრულიადაც არა მეყურებოდა რა და ჩემს თავში არა რჩებოდა რა. განა არა, ვგრძნობდი, რომ ეს მეც შემეხებოდა, რომ რიდასთვისაც ფულსა მთხოვდნენ, მაგრამ რისთვის, რად, ეს მე არ მესმოდა, როგორადაც არ მესმოდა, რა საშუალებას ხმარობდა მართებლობა, რომ გლეხკაცისთვის უკანასკნელი გროში ამოეცალა ჯიბიდან.

სულ სხვა იყო, როცა ჩვენი ქვეყნის შესახებ ეწერა რამე გაზეთში. გაქვს ღვთის წყალობა, რომ მე ის მეყურებოდა. მარილს საკმარისად დიდი ხარჯი ადევსო, რომ წავიკითხავდი, რასაკვირველია, ადვილად გავიგებდი; რადგან ყოველ კვირა მე თითონ დავიარებოდი სახელმწიფო საწყობში მარილის სასყიდლად. ოქროს ფასს გვახდევინებდნენ მარილში. ერთ კვირას რომ არ მივსულიყავით, მეორეზედ კარგადაც შეგვთათხავდნენ:

— შენ ჰეი, წარსულ კვირას რატომ არ მოხვედი, ჰა, შე... იქნება ჩუმად სადმე ყიდულობ შემოპარებულ მარილსა?! გამიფრთხილდი, თორემ მე ვიცი შენი!..

ასე იყო დადებული: აწერილი ვყავდით — ოჯახში რამდენი სული ვიყავით და დადებული იყო სულზედ რამდენი უნდა გვეყიდნა მარილი.

ან არა — გაზეთში დალაზედ ეწერა რამე. მომავონდებოდა ჩვენი მინდორი, მომკილი, სამეულებად დალაგებული ძნა, და შორიდან მომავალი მოურავი:

— აბა, გავყოთო!

და რაც უნდა წვიმა და ავდარი ყოფილიყო, უნდა იქ დაეხვედროდით მოურავს, ურემი შებმული გვექონიყო და ჩვენი საქონლით აგვეტანა ბატონის კარზედ იმისი წილი.

ამას რა დიდი გაგება უნდოდა: რასაც ჩემი თვალითა ვხედავდი, სუყველა კარგად ვიცოდდი.

და რაც არ მეყურებოდა, შოველსა ვკითხავდი.

— შენ გინდა გაიგო, რა არის სატახტო მაზრა? — მეუბნებოდა ჩვენი მეწვრილმანე. — მაგაზედ ადვილი რა არის, ჩემო მიშელ; რომელიმე უძველესი და საუკეთესო მაზრა, რომელშიაც მეფობა დაწყებულია, მაგალითად, პარიზი, ან ორლეანი, სამეფოდ, სატახტოდ დაუდვიათ, ესე იგი მეფის საკუთრებად. ამისთანა მაზრას, სატახტო მაზრას — მეფისაგან განწესებული მოურავი განაგებს და განაგებს ისე, როგორც იმასა ჰნებავს: კანონმდებელიც ის არის, მსაჯულიც, ხარჯის გამწერელიც, მომგროვებელიც... ბატონია მთელი მაზრისა. რამდენსაც უნდა, იმდენს დაადებს ხარჯს ხალხს და იმდენს გადაახ-

დევინებს. იმის წინააღმდეგ ხმას ვერავინ ამოიღებს. რადგან, თუ უჩივლეს, მეფესთან უნდა უჩივლონ და მეფე კი თითონ მოურავ-თანვე გაგზავნის მოჩივარს. წადი, სამართალს ას მოგცემსო.

უწინდელ დროში სატახტო მაზრის მცხოვრებნი თითონვე აირჩევდნენ ხოლმე თავიანთ შორის ხარჯის გამწერლებს და სხვა საქმეების გამგებლებს; ამ ამორჩეულთ მიანდობდნენ ქვრივ-ობლის შეწყალებას, დიდის და პატარის გარჩევას; მაგრამ აგერა ორასი წელიწადია, მეფეებმა წაართვეს ხალხს ეს უფლება და, როგორც გითხარი, თითონა ჰნიშნავენ უჯიათ მოურავეებს, რომ, თუ მოხერხდა, ცხრა ტყავი გააძრონ კაცსა. გაიგე, მიშელ?

— დიად, ბატონო შოველ.

— ჰოდა სხვა მაზრებში, რომელნიც სატახტოდ არ დაუდვიათ, აი, როგორც მაგალითად, ჩვენი მაზრაა, საქმე სხვანაირად არის. აქ მეფის მოურავის გარდა, დროგამომშვებით დიდებული მებატონეები და სულიერი მამანი შეიყრებიან ხოლმე საქვეყნო საქმეების გასარიგებლად: ისინი დაადგენენ სამეფო ხარჯს, მერე საბატონოს, მერე სამღვდლოებისას, მონასტრებისას, გზებისას, მდინარეებისას, ეკლესიებისას, და სხვ. ეს იმიტომ არის, რომ უწინ ჩვენი მაზრა სრულად თავისუფალი ყოფილა და ხალხსაც იმდენი ძალ-ღონე ჰქონია, რომ მებატონეების წინააღმდეგ ხმის ამოღება სცოდნია. მაგრამ საფრანგეთის მეფეს ჩვენი მებატონეებისთვის თავის კაცები შეუჩენია, შეუსყიდნია საჩუქრებით და დიდების დაპირებით და იმათაც გაუყიდნიათ თავისი სამშობლო და თავისუფალი მაზრა საფრანგეთისთვის შეუერთებიათ. მეფისთვის აღთქმა ჩამოურთმევიათ — ჩვენს მაზრას საფრანგეთს შეგუერთებთ იმ პირობით, რომ ჩვენ წარჩინებულთ და დიდებულთ არა დაგვაკლდეს რა, არამედ კიდევაც მოგვემატოსო და ხალხს კი თუნდა ტყავი გააძრეთ, ოღონდ კი ჩვენც გვარგუნეთ რამეო. ასე გაყიდეს სამშობლო, მებატონეები მებატონეებად დარჩნენ, და ჩვენ კი ძველებურზედ უარეს დღეში ჩავვარდით: უწინ მარტო ბატონი გვკამდა, ახლა ბატონიცა გვკამს და მეფეც. აი რა შეგვიძინეს ჩვენმა დიდებულებმა, როდესაც ჩვენი ქვეყანა სამეფოს შეუერთეს. რაც გვქონდა, სულ წაგვართვეს და თუ შეგვარჩინეს რამე, მხოლოდ ერთილა შეგვარჩინეს: ჩვენ ოფლი უნდა ვღვაროთ იმათ ქეიფისა და ფუფუნებისათვის! ეს არის ჩვენი დანიშნულება და ამას, შენც დამეთანხმები, არავინ წაგვართმევს... გაიგე, მიშელ?

— დიად, ბატონო შოველ.

— ჰო და გახსოვდეს!

ნათლიაჩემი კი ბრაზობდა:

— ვერე სიმართლე სადღაა. ჰა. სიმართლე სადღაა?! — განა ჩვენ კი ფრანგები არა ვართ? განა ჩვენ კი იმავე ენას არ ვლაპარაკობთ და ერთსა და იმავე ერს არ შევადგენთ?! ჰო და რად არის განსხვავება? რით არიან ისინი ჩვენზედ მეტი, რომ ისინი ხარჯს გვახდევინებენ და ჩვენ კი ვაძლევთ, და ვაძლევთ! თუ ხარჯი საზოგადო საჭიროებათათვის არის დადებული, ყველამ უნდა გადიხადოს, დიდმაც და პატარამაც, გლეხმაც და თავადმაც, ყველამ შეძლებისამებრ. თუ არა და, მაშ მებატონეების საქონელი ვყოფილვართ?!

— ეჰ, ჩემო ივანე, თუ კაცი ხარ, ერთ რამე გარდასახადს დამისახელებ, რომ ან მებატონეები იხდიდნენ, ან სამღვდელთა, ან მონასტრები? სამეფოს ჩვენ ვინახავთ, ჩვენ, თევზივით დამუხუჯებული გლეხკაცები! მეც ვიცი, რომ აქ სიმართლე არსად არის, მაგრამ რას იზამ? ბევრიც რომ გაჯავრდე, იოტის ოდენასაც ვერას გახდები.

თავის დღეში არ გაჯავრდებოდა შოველი, რაც უნდა მომხდარიყო. რამდენჯერმე უამბვნია ჩვენთვის თავის ოჯახის თავგადასავალი და ყოველთვის იმისთანა წყნარი კილოთი ულაპარაკვნია, თითქო სწორედ ასე უნდა მომხდარიყო. სამშობლო ქვეყანაში თურმე კარგა შეძლებული კაცი იყო იმის მამა, მაგრამ პროტესტანტი რადა ხარო — სახლიც წაართვეს, ვენახიც, მიწებიც, რაც ფული და ავეჯი ჰქონდა ისიც და ცარიელი კაცი განდევნეს თავის მიწა-წყლიდან. დაიწყო სიარული, საფრანგეთში თითქმის ყველა ქალაქს შეეხიზნა, მაგრამ ყველგან და ყოველთვის დევნილი იყო თავის რჯულის გამო; საწყალს შეილებსა სტაცებდნენ, რომ „ნამდვილ ქრისტიანად“, ესე იგი კათოლიკურ რჯულში აღეზარდათ. ერთხელ ჯარი მიუსაიეს და ხმლის ყუით ცემა დაუწყეს — კათოლიკური რჯული უნდა მიიღოთ; მოხუცებული პაპა შოველისა ტყეში გაქცეულიყო და მეორე დღეს დანარჩენებიც იქ ასულაყვნენ: არც სახლი გვინდა, არც კარი, ოღონდ რჯულს ნუ გამოგვაცვლევინებთო; მაგრამ დაეჭირათ და საწყალი მოხუცებული ცამეტი წლით ციხეში ჩაეგდოთ: ერთი ფეხით თურმე ტახტს დააკრეს და ისე იყო ტახტზედ გაკრული; მასთან სხვანაც იყვნენ: ზედამხედველად ერთი კაცისმკვლეელი ყაჩაღი დაენიშნათ; ისე სცემდა თურმე პატიმრებს, რომ მათრახითა ხოცავდა საწყლებს და ვინც ღროზედ არ მოკვდებოდა, ტახტიდან აპვლეჯდნენ... მიკრული ფეხი ტახტზედვე რჩებოდა და ცოცხალ-მკვდარს ზღვაში ჩაუძახებდნენ.

გვიამბობდა ხოლმე ამ შემაძრწუნებელ ამბავს და იმის მაგიერ ჩვენ გვერეოდა ბრაზი და ის კი ისე მშვიდად იყო, ისე მშვიდად

მოსწევდა ბურნუთს, თითქოს თავის ოჯახის ამბავს კი არა, ზღაპარს გვეუბნებო. პატარა მარგალიტა კი სრულიად გაფითრდებოდა: ააქანკალებდა და გაჩუმებული გამოიყურებოდა შავ წამწამ ქვეშოდან.

თავის ოჯახის ამბავს ამ სიტყვებით გაათავებდა:

— აი, რამდენი რამა გემართებს ჩვენ, შოველებს, ჩვენი მეფეებისა: ლუი ძლიერისა, ლუი დიდსულოვანისა და სხვებისა. უცნაურია ჩვენი ამბავი. იმავე თავითვე დევნილი ვყოფილვართ და დღესაც მე ადამიანად არსად ვირიცხები, ადამიანის უფლებანი მე არსადა მაქვს. ჩვენმა კეთილმა მეფემ, ტახტზედ რომ აბრძანდა, იმოდენა ეპისკოპოსთა და მთავარეპისკოპოსთა თანდასწრებით და ლოცვა-კურთხევით. გვარზედა და სახარებაზედ დაიფიცა ჩვენი ამოწყვეტა — ღმერთსა ვფიცავ, მთელს ჩემს ძლიერებას მოვასმარ, რომ ჩემს სამეფოში ეკლესიის მიერ დაწყვეტილი ურჯულო არსად ვაბოგინოვო... მღვდელი სულიერი მამა უნდა იყოს ყოველი ქრისტიანისა და თქვენი მღვდლები კი თავის დღეში არ მოგვეცემენ არც დაბადების მოწმობას, არც ნათლობისას, არც ქორწინებისას, ან მიცვალებისას. კანონით აკრძალული გვაქვს ყოველი უფლება — მსაჯულად ჩვენ ვერ გავხდებით და მასწავლებლად ხომ უფრო ვერა. ერთად ერთიდა დაგვრჩენია: უმიწაწყლოდ, უსახლკაროდ უნდა დავლიოთ ჩვენი დღენი, როგორც პირუტყვეა იმიტომ, რომ ჩვენ აკრძალული გვაქვს ყველა ის, რაც ადამიანს ადამიანადა ხდის. და ღმერთმან იცის, რომ ავს არას ჩავდივართ; მთელი ქვეყანა იტყვის, რომ ჩვენისთანა პატიოსნად სხვა ბევრი არავინა ცხოვრობს.

— თან კი გაიძახიან, ქრისტიანები ვართო! — ჩაუმატებდა ნათლაჩემი.

— იმათი რა მოგახსენო, და ჩვენ კი ქრისტიანები ვართ და ქრისტიანული შებრალებაც ვიცით თვით მტრისაც კი. დიად, თვით მტრისაც კი, ჩვენი მტარვალების საბედნიეროდ! ნეტავი აგრე არ ყოფილიყო! მაგრამ რა? ყველას გადახდა უნდა, სარგებლით და სარგებლის სარგებლით; ასეა ამ წუთისოფელში; სულ ყველას გადახდა უნდა! დღეს თუ არა, ხვალ! წლეულს თუ არა, მერმის! ათის წლის შემდეგ! ასის წლის შემდეგ, მაგრამ გადაუხდელი კი არა დარჩება რა!

ცხადია. რომ ხარჯის და ერთობ სხვადასხვა გარდასახადის ცოტა რამ შემსუბუქებით ხალხს აუხვევდნენ თვალებს და შოველს კი ვერა; უნდა გენახათ იმისი გაყვითლებული სახე, ღრმად ჩამჯდარი, ჩაფიქრებული თვალები, იმისი ყოველთვის მოკუმული ტუჩება, რომ გეგრძნოთ — რა ძალ-ღონის კაცი იყო. უნდა გენახათ ეს უბ-

რალო, მაგრამ ძლიერებით სავსე მეწვერილმანე. რომ თქვენდა უნებურად თავი მოგეხარათ მის წინაშე.

— ამას ან სულ ყველაფერი უნდა მისცეთ, რიც ერგება, ან არა და არაფერი, — იტყოდით თქვენ გულში; — ამან მოთმენაც იცის, რამდენადაც კი საჭიროა; მაგრამ როცა საჭირო იქნება, იარაღსაც აიღებს. მანამ კი არც ციხისა ეშინიან, არც წამებისა და თავგანწირული ქვეყანას აკრძალულ წიგნებს უზიდავს, ოღონდ კი ხალხში თავისი აზრები გაავრცელოს; ყველას ერიდება, არაფრისა ეშინიან და თუ მოხდა რამე, ვაი იმის ბრალი; ვინც ამის წინააღმდეგ იქნება! ის პატარა გოგოც მამასა ჰგავს: ამათი ჯიშისა ადვილად გატყდება, მოხრით კი თავის დღეში არ მოიხრება.

მე ამას არა ვფიქრობდი, რადგან ჯერ ამოდენი შეგნება არა მქონდა, მაგრამ ვგრძნობდი კი. შოველს დიდად პატივსა ვცემდი. შორიდანვე ქუდს ვუხდიდი და გულში მიხაროდა: შენ გლახკაცის მხარე გიჭირავს, შენც ჩვენი ყოფილხარ-მეთქი.

იმ დროინდელი გაზეთები რაღაცა სახელმწიფო გასაავალს სწერდნენ და ნათლიაჩემი ხშირად იტყოდა ხოლმე: ვერ გამოვია, რატომ არ უნდა ჰფარავდეს შემოსავალი გასაავალსაო? ნეტავი იმოდენა ფული რაზედ იხარჯებაო? ხალხი თავის გარდასახადს ნაღდად იხდის... ან ვინ რას შეგვარჩენს? გროშს არავინ გვადროვებს! გადასახადს ყოველ წელს გვიმატებენ და თუ შემოსავალი გასაავალს არა ჰყოფნის, მაშ სახელმწიფო ხაზინა ქურდების ხელში ყოფილა. ჩვენი კეთილი მეფე ძალიან კარგს იზამს, რომ ეს ქურდები მოსძებნოს. ქურდი გლახკაცი არ უნდა იყოს, რადგან ოღონდ კი ხარჯი წაართვან და მერე შორიდანაც ველარ დაინახავს თავის ფულს: მაშასადამე, ქურდი დიდებულთაგანი უნდა იყოს, სწორედ იმ დიდებულთაგანი, რომელნიც მეფეს გარს ახვევიანო.

ამ სიტყვებზედ ვალენტინს თავისი დაეპართებოდა ხოლმე და გააფთრებული შეჰყვირებდა:

— რა არის, ოსტატო!? სხვა არა იყოს რა. ღვთისა მაინც არ გეშინია, რადა სცოდავ აგრე? ჩვენს მეფეს გარშემო სულ წარჩინებული და დიდებული თავადაზნაურობა და ეპისკოპოსები ახვევია. იმათ თავიანთი სახელი და დიდებაც ეყოფათ! ძალიან არ ეჭირვებათ თქვენი ფული?!

— კარგი, კარგი, ვალენტინ, ხომ იცი მე და შენ ვერ შევთანხმდებით, მე ხომ არ გიშლი, შენ შენი აზრისა იყო, ჰო და ნურც შენა მწვედები ხოლმე ყელში, მე რომ ჩემი აზრი გამოვთქვა. იქნება გინდა დამარწმუნო, რომ გასაავალის გამრავლება გლახკაცის ბრალი იყოს? საიდან სადაო, ძმავ, სახელმწიფო ხაზინის ახლო მე და შენ

მგონი სამი დღის მანძილზედაც არ მიგვიშვან. აბა როგორ მოვაპარავდით? და თუ იპარავს ვინმე, ის იპარავს, ვინც იქვე ახლო არის. ან თვით დიდებულნი იქნებიან ან არა და იმათი მსახურები.

მართალსაც ამბობდა ნათლიაჩემი. რევოლუციის წინად ხალხმა არ იცოდა, სად მიდიოდა იმოდენა ფული, რაზედ და როგორ იხარჯებოდა. სახელმწიფო ხაზინა თავადაზნაურთა და სამღვდლოების ხელთ იყო და, მამასადამე, პასუხის მგებელნიც მარტო ისინი უნდა ყოფილიყვნენ.

მაგრამ, მართალი უნდა მოგახსენოთ, ჯერ არავის სჯეროდა, რომ შემოსავალი გასაავალზედ ნაკლები იქნებოდა. აქეთ-იქით ხმები დადიოდა, ხანდახან გაზეთებშიაც ეწერა, მაგრამ გაცკრით, გაუბედვად და დიდი მორიდებით. სწორედ ამ დროს დანიშნა მეფემ სახელმწიფო ხაზინის გამგედ ერთი ყენეველი ვაჭარი, სახელდობრ ნეკეკერი. ეს კაცი საქმეს ვაჭრულად შეუდგა. ვაჭარმა იცის, თუ გაკოტრება არ უნდა, ჯერ თავის ქონებას და ხარჯს ანუსხავს. ნეკეკერმაც მოინდომა მთელი საფრანგეთის სახელმწიფო შემოსავლის და გასავლის აღრიცხვა. მოინდომა და კიდევ აღრიცხა.

გაზეთები ამ შემოსავალ-გასავლის აღრიცხვას „ნეკეკერის ანგარიშს“ ეძახდნენ.

საუთუნეთა განმავლობაში ეს პირველი იყო; პირველად ეუბნებოდნენ გლეხკაცს: აი რაზედ დაიხარჯა შენი ფულიო. ეს მარტო ვაჭარს შეეძლო — გლეხკაცებისთვის მოეხსენებინა — აი, თქვენი ფული სად წავიდაო, და სხვანი კი, თავადაზნაურნი და სულიერი მამანი, იმდენად თავმოყვარენი იყვნენ, რომ გლეხკაცების წინ თავს არ დაიმცირობდნენ და ანგარიშს არ მისცემდნენ! აბა როგორ ეადრებოდათ!! ნეკეკერის ანგარიშმა ქვეყანა გადაარია. იმაზედ მეტი სალაპარაკო აღარა გვქონდა რა. ვილას ახსოვდა ამერიკელთა ბრძოლა თავისუფლებისთვის, ვაშინგტონი, ლაფაიეტი, ინდოეთის ზღვაზედ ბრძოლა? ნეკეკერის ანგარიშმა ყველა დაგვავიწყა. იჯდა ნათლიაჩემი და ყოველ საღამოს ამ ანგარიშსა სინჯავდა: მეფე-დედოფლის სასახლეს — ამდენი, ბატონიშვილებს — ამდენ-ამდენი; მეფის საყვარელ შვეიცარიელ ჯარს — ამდენიო, ჯარის უფროსებს, მეფის კარის კაცებს და მოსამსახურეებს — ამდენი, დედოფლის მოახლეებს — ამდენი, მონასტრებს, ეპისკოპოსებს — ამდენიო. გადადიოდა მილიონები და მილიონები!

სულ ცოფსა ჰყრიდა ნათლიაჩემი:

— ახლა კი ცხადადა სჩანს, რადა ვართ ასე ღარიბ-ღატაკნი! ახლა ცხადად სჩანს. რად დავიარებით ფეხშიშველი და თავშიშველი, ახლა კი გავიგე, რად იხოცება ამოდენი ხალხი შიმშილით და სიცი-

ვით; ესლა კი ვხედავ. რად რჩება ამოდენა მამული დაუმუშავებელი! ახლა კი ცხადია! ღმერთო! ღმერთო! ნუ თუ ამოდენა უსამართლობას ვერა ჰხედავ?! მარტო მეფეს წელიწადში ხუთასი მილიონი! და კიდევაც იძახიან — არა ჰყოფნისო?! გასავალი შემოსავალზედ მეტი იქნება, მაშ რა?! ამას ბრმაც დაინახავს.

— მართალია, ძალიან სანანურია ასე უღმერთოდ ფლანგვა ჩვენი ოფლით და სისხლით მოხვეჭილი სარჩო-საბადებლისა, — ეტყობა ხოლმე თავისებურად აუღელვებლივ შოველი, მაგრამ ეგეც დიდ ღვთისწყალობად უნდა მივიღოთ, რომ გავიგეთ მაინც, რაზედ იხარჯება ხალხის ნაღვაწევი ფული. აქამდე ვინ რა იცოდა? ვფიქრობდით, ნეტავი იმოდენა ფულს რას უშვრებიან? სად მიაქვთ? ზღვაში ხომ არა ღუპავენო? ახლა კი სულ უქანასკნელ გროშამდე ნაანგარიშევი და, ვისაც უნდა, ადვილად გაიგებს, რაზედ რამდენი იხარჯება.

ნათლიაჩემი კი მაინც არა ცხრებოდა:

— მართალს ამბობ, შოველ. ჩემთვის მართლა და ღვთის წყალობაა ვიცოდე, რომ მე იმიტომ ვიწვი-ვიდაგები, რომ ვილაც დიდებულმა მეფის კარის კაცმა თავისთვის სასახლე იყიდოს. დიად, დიდი ღვთის წყალობაა! მე საკმარის ქადაც არ მარჩენდნენ, მარტო იმიტომ, რომ თავად არტუას ლხინი უნდა გაემართა და ოცი ათასი თუმანი დაეხარჯა! მე დილით საღამომდე ოფლში ვიწურები, იმიტომ რომ დედოფალმა ერთს ვისმე გალატაკებულს თავადიშვილს იმდენი უწყალობოს, რასაც მე მთელი ჩემი სიცოცხლე სიზმარშიაც ვერა ვნახავ! დიდი ღვთის წყალობაა, თქვენმა მზემ!

მიუხედავად ამისა ნათლიაჩემს მაინც ძალიან მოსწონდა ის გარემოება, რომ ანგარიში უნდა მიეცათ ერისთვის და, რაკი პირველმა ბრაზმა გაუარა და ცოტა დამშვიდდა, სხვაფრივ დაიწყო ლაპარაკი.

— ტიურგოს შემდეგ ჩვენ ამისთანა კარგი მინისტრი არა გვეყოლია. პირდაპირა სჩანს, რომ ცდილობს ხალხს ტვირთი შეუქმნებულს, ხარჯი შეუმციროს და სახელმწიფო შემოსავალ-გასავალში სასტიკი ანგარიში დააწესოს. იმას ისე შეუჩნდნენ დიდებული მებატონეები და მთავარეპისკოპოსები, რომ სამსახურიდან გააძევეს; ან რას ახერებდნენ ხალხის მოყვარეს ხალხის მტრები? ნეკყერსაც არა ნაკლებ აითვალწუნებენ! ეს მაინც დარჩეს თავის ალაგას. ეტყობა კი, ასე ადვილად არავის დაუვარდება, მეტადრე თუ თვით მეფემაც მხარი მისცა. ცოტა მაინც შერაცხვებათ ჩვენ დამღუპველთ! და ისე უსირცხვილოდ ველარ გაბედავენ ფულის ფლანგვას! ახლა მაინც გაიგებენ, რად შესცქერის იმათ ასეთი ზიზღით გლეხკაცი; იტყვიან,

ალბად ნეკერის ანგარიში წაუქითხავს და გაუგია, რომ ჩვენი ოქრომკედით მოსილი ტანისამოსი, ჩვენი კერცხლის ხმალ-ხაოჯალი და ეს აუარებელი სიმდიდრე შექმნილი გვაქვს ამ გლეხის შრომით, რომელიც ჩვენ წავართვითო.

მაგრამ ყველაზედ უმეტესად ნათლიაჩემს ის ახარებდა, რომ ნეკერი თავის ანგარიშს შემდეგი სიტყვებით აბოლოვებდა: სახელმწიფოს დიდი ვალი დაედო, რადგან შემოსავალი გასაავალს ვერა ჰვარავს; ამ ვალის გადახდა მარტო მაშინ შეიძლება, როდესაც მეზატონეებს, სამღვდლოებას და მონასტრებს უპირატესობა აღარა ექნებათ რა და ისინიც გადაიხდიან ყველა იმ ხარჯს, რომელსაც ეხლა მარტო გლეხაკობა იხდის.

— აი შენი ღმერთის ჭირიმი, შენი! — იძახდა ნათლიაჩემი. — ძლივს გვედირსა ქრისტიანული აზრების მინისტრი!

ელვასავით მოედო ქვეყანას ეს ამბები. ყველგან რაღაცა ცვლილებაზედ ლაპარაკობდნენ, ერთიერთმანეთს ახალს ცხოვრებას ულოცავდნენ. შოველი და მისი პატარა მარგალიტა მთელი სამი კვირა შინ აღარ დაბრუნებულან: დადიოდნენ სოფელ-სოფელ და ნეკერის ანგარიშსა ჰყიდდნენ. პატარა წიგნაკად იყო დაბეჭდილი ეს ანგარიში, ფასი დიდი არ ედო და დიდძალს თურმე ასაღებდა შოველი. მარგალიტამ კიდევ მითხრა, რამდენი ცალი გაეყიდნათ იმ ცოტა ხანში, მაგრამ მას შემდეგ იმდენი დრო გავიდა, რომ ველარ მომიგონია.

ბაზრობა დღეს რომ ხალხში ჩარეულიყავით, ერთსღა გაიგებდით: ბატონყმობა უნდა გადავარდეს, მეზატონეებსაც ხარჯს ადებენ, ხარჯი შეძლებისდა გვარად იქნება განაწილებულიო.

— ჰა, რასა იქ. როგორა ხარ, ივანე? ხომ კარგ გუნებაზედ ბრძანდებიან ჩვენი ბრწყინვალე ბატონები? გეცოდინება, იმათაც ხარჯს ადებენ, როგორც აქამდის ჩვენ გვედო.

— ძლივს, ძლივს, ჩემო ნიკოლოზ: ღმერთმა უშველოს ბატონ ნეკერს. სახელმწიფო ზარალი და ნეკერი რომ არა ყოფილიყო, მგონი დღესაც არავის შეეწუხებინა ჩვენი თავადაზნაურობა. მაგრამ ეტყობა ძალიან დაზარალებული ყოფილა სახელმწიფო ხაზინა, რომ ჩვენი ხარჯი აღარა ჰყოფნის და ახლა მეზატონეებს და სამღვდლოებას მიმართეს. არ გებრალეება, ნიკოლოზ, საწყალი ბერები? არა, თითონ რა აბადიათ, სულ შიმშილით იხოცებიან...

და ორივე გულიანად იცინოდა. თან ერთმანეთს ბურუნუთს შესთავაზებდნენ, და ბერებს და მეზატონეებს დასცინოდნენ.

ეს 81-ში იყო. მაგრამ მალე გაგვიცრუვდა იმედი. ცოტა ხანს უკან გავიგეთ, რომ თავადი არტუა, დედოფალი მარიამ-ანტუანეტა და

ერთი გადაყრუებული მინისტრი მორეპა გადაჰკიდებოდნენ ნეკ-კერს — ამ უბრალო ხალხის შვილს და წარმომადგენელს — სახელმწიფო ხაზინის ანგარიში რად გამოაქვეყნეო. ისე გადაჰკიდებოდნენ, რომ ან თითონ უნდა დაენებებინა სამსახურისთვის თავი, ან ისინი შეუწინდებოდნენ მეფეს და დაათხოვნიებდნენ. ხალხი ეჭვის თვალით ელოდა სატახტო ქალაქიდან ყოველ ახალ ამბავს და დიდალა შიშობდა ნეკკერის დათხოვნას. აქეთ-იქით მუქარა ისმოდა.

1781 წ. თიბათვეს ნათლიაჩემმა მარილის ამოსატანად გამგზავნა სახელმწიფო საწყობში. პარასკევი დღე იყო. ქალაქში რაღაც არეულობა იყო. თავად ტალარიუს, სახლთან სამხედრო მუსიკა იღგა, დიდებულთა სახლების წინ საყვირს უკრავდნენ; ქუჩებში ჯარები მიდი-მოდოდნენ. ახალი წლის უქმეები გეგონებოდათ, რომ ისე დაღონებული არა ყოფილიყო ხალხი. მეთევზეების და მეხილეების ყვირილიც კი აღარ ამხიარულებდა ბაზარს.

აუარებელი ხალხი შეგროვილიყო მარილის საწყობთან. ისე დაღონებულიყვნენ, თითქო მგლოვიარენი არიანო. გაჩუმებულნი შესცქეროდნენ ერთმანეთს და მხოლოდ აფიცრების მხიარული, ხმამაღლივი ლაპარაკიდა ისმოდა მოედანზედ, მით უფრო ხმამაღალი და თავხედური, რომ ძალადა ჰყვიროდნენ, თითქო ამოდენა ხალხს ნიშნს უგებენ და დასცინიანო.

ის იყო მარილი მომიწონეს და შინისკენ გავწიე, რომ მოედნის თავში რამდენიმე ალაფის ლაპარაკს მოვკარი ყური:

— ეჰ, მორჩა, გათავდა! წასულია ჩვენი საქმე! რიღას იმედი უნდა გვქონდეს: ნეკკერი დაუთხოვნია მეფეს.

ნეკკერი დაუთხოვნიო? განა არა. ეს სამი თვეა სულ ამის შიშში ვიყავით დიდი და პატარა. შინისკენ გავეშურე. ქალაქის კარებთან ჩვეულებრივ ისხდნენ ჯარისკაცები და ჩიბუხს ეწეოდნენ, თითქო საამისო არათფერი მომხდარაო.

მანამ მე შინ ავიდოდი, ნათლიაჩემს კიდევ გაეგო ყველაფერი ქალაქიდან მომავალ ვაჭრებისაგან. ვაჭრები ჯერ ისევე ჩვენსა იყვნენ, რომ ავედი.

— ეგ შეუძლებელია, — ყვიროდა ნათლიაჩემი. — შეუძლებელია! ნეკკერი რომ დაითხოვონ, ზარალს ვიღა შეავსებს? სხვები ბველებურადა სწირავდენ და ხაზინას ერთი ათად მეტ ვალს დაადებენ! ეს ქეიფი და დროს გატარებაო. ეს სანადიროდ გამზადებაო, ეს ლამაზი გოგოებიო, მგონი ჩიტებზე ოქროებს ესროდნენ! რაში შურით გლენჯაკის ოფლი და სისხლი?! ეგ შეუძლებელია! ერთიათად იმატებს სახელმწიფო ზარალი!

მავრამ როდესაც ვუამბე, რა გლოვა-წუხილს მისცემოდა ხალხი,

რა მზიარულებაში იყვნენ ჯარი და ქალაქის მამასახლისი და გამგენი, მაშინ კი დარწმუნდა, მართალი ყოფილაო და შუბლი შეიკრა:

— ეეჰ! ეტყობა მართლა დაუთხოვნიათ ის დალოცვილი ისა! მე კი მეგონა, ჩვენი კეთილი მეფე მხარს მისცემს და მტრის გულისად არ გახდის-მეთქი!

იქნება კიდევ ბევრი რამ ეთქვა, მაგრამ იმდენი ხალხი გვეხვია, იმდენი იყო იმათში ჩვენთვის უცნობი, რომ ნათლიაჩემმა ჩაქუჩს წამოავლო ხელი და შემოგვძახა:

• — აბა, ბიჭებო, დაკათ, დაკათ, რომ დიდებულთ საქეიფო ფული ვუშოვოთ! აბა ჰა!

და თან ისე ხარხარებდა. რომ იმის სიცილი ნათლი-ჯალაბს გაეგო და ფეხშიშველა გამოვარდა — ნეტავ რა მოხდაო?

სალამომდე ხმა აღარ ამოგვიღია, ან როგორღა ვიტყოდით რასმე? ბუზივით ირეოდა ხალხი და ყველა იმასა ცდილობდა, სხვისაგან გაეგო რამე; თითონ კი არავინ არას ამბობდა.

სალამოზედ კი, როდესაც სრულიად მარტონი დავრჩით და კარები მივკეტეთ, ნათლიაჩემმა თავისუფლად ამოანთხია თავის გულის ვარამი:

— მაშ გვაჯობეს რაღა თავადმა არტუამ და ჩვენმა მშვენიერმა დედოფალმა? ვაი იმ კაცის ბრალი, ვინც მფლანგავ ცოლს აჰყვება! ციდან ჩამოსული ანგელოზიც რომ იყოს, გულითაც რომ უყვარდეს თავისი ხალხი და ცდილობდეს ტვირთი შეუშუბუშუქოს, ბევრსაც რომ ეცადოს, ქეიფსა და ლხინს და სხვადასხვა დროს გატარებას ვერ ამოაგდებს; ამ მხრივ ლამაზი ცოლისთანა ჯიუტი არა იქნება რა; ქვეყნის დაღუპვას არ დაინანებს, ქმარ-შვილს გაიმეტებს, ოლონდ ლხინსა და სიამოვნებას ნუ მოაკლებენ! რა ქნას, თუ კი ღმერთს მარტო ლხინისთვის გაუჩენია? მანამ ცოცხალაა, იმას არშიყობის მეტი არა უნდა რა: ოლონდ კი თავს ევლებოდნენ, საცა კი ყოჩალი ბიჭია ვინმე და იმაზედ უბედნიერესი არავინ იქნება. აი, თუნდა ჩვენი საწყალი რემფალი: რა უქირდა, იყო თავისთვის. მშვიდად, წყნარად და მართლა რომ ბატონკაცურად ცხოვრობდა. მამა-პაპას საკმარისი მამული დაეტოვებინა და ასი წელიწადი რომ ექამა, მეთხუდაც ვერ დახარჯავდა, თუნდა სამსახურშიაც არ ყოფილიყო; მაგრამ ერთი ქარაფშუტა ქალი შეერთო — რას ვაქნევ ცარიელ სილაძაზხეს? — და დღესაც თავბედს იწყევლის. საცა კი ლხინი და დროს გატარებაა, ისიც იქ უნდა ბრძანდებოდეს და სულ ახალ-ახალი კაბები და სამკაული ჰქონდეს. ისე ფლანგავს ფულსა, თითქო ბზეა და ქარმა შემოიტანაო, არ გავა ხუთი-ექვსი წელიწადი და მოვალეები კი წამოადგებიან თავზედ ლამაზი ცოლის ქმარს! სახლ-კარსაც გაუყდიან, მამუ-

ლებსაც, ცოლის სამკაულებსაც. წავიდეს და ირიკაოს! ბოლოს? ქმარს ციხეში უკრავენ თავსა, რატომ ვალებს არ იხდიო და ცოლი კიდევ ერთ კობტა ბიქს ვაპყვება ვაჟმე. აი, რა იცის მფლანგავი ცოლის აყოლამ. აი, რითი გათავდება ხოლმე ამგვარი საქმე, სულ ერთია, ~~ქრძო~~ იქნება იგი თუ სახელმწიფო.

თან უფრო და უფრო ბრაზი ერეოდა. ჯერ ვერ გაებედნა და ვერ ეთქვა, რომ ჩვენი დედოფალი მარიამ-ანტუანეტა სამეფოსა ღუპავდა თავის საქციელით, მაგრამ ცხადად ეტყობოდა, რომ სწორედ ამასა ფიქრობდა.

საშინელი ავდრიანი დღე იყო. კოკისპირულად წვიმდა, თან ისეთი ქარი ქროდა, რომ ძირიანად ჰგლეჯდა იქაურობას. და სწორედ იმ დროს, როდესაც ვახშაში გავათავეთ და ცოტა არ იყოს დავმშვიდდით, იმ დროს, როდესაც მე ქუდს წამოვავლე ხელი და შინისკენ გაქცევას ვაპირებდი და ნიკოლი ქრაქს ანთებდა, რომ ჩემთვის გამოენათებინა, უტბად ვიღამაც ქუჩის კარი დაგვიკაჯუნა.

იმდენი იყვირა იმ საღამოს ნათლიაჩემმა, რომ თუმცა წვიმდა და ქარი ჰქროდა, ეტყობა ყური დაგვიგდეს ჯაშუშებმა. გავშრით, გავშემდით. ისევ ნათლი-ჯალაბი ეკატერინე მოვიდა გონს. შანდალს ხელი წამოავლო და სამზარეულოსკენ გასწია, — თან წაგეჩურჩულა — სუთ, ეგონებათ, რომ გვძინავსო. დარწმუნებულნი ვიყავით, რომ კარს ჯარისკაცები გვადგენენ ჩვენ დასაჭერად მეფის სახელით მოსულნი და გულგახეთქილები ვიდექით და არ ვიცოდით, რა გვექნა. ამ დროს ნაცნობმა ხმამ დაიქუნა:

— მე ვარ, ივანე, ქრისტეფორე მღვდელი. გაადე, თორემ ძვლებამდე ჩამატანა!

ძლივს არ ამოვისუნთქეთ!

ნათლიაჩემი კარებს ეცა. ნათლი-ჯალაბს სანთელი მიჰქონდა.

— შენა, მღვდელი?

— დიად, დიად, მე ვარ.

— რომ იცოდე, რა რიგად შეგვაშინე!

შინ შემოვიდნენ. შევხედეთ თუ არა, მაშინვე ვიგრძენით, რომ მღვდელი ქრისტეფორე ნაწყენი იყო. არც ნათლი-ჯალაბს მიესალმა იმ დამეს, არც ჩვენ, როგორც ყოველთვის იცოდა, ყურადღება არავის მიაქცია, დასველებული ქუდი გაბერტყა და სთქვა:

— სავერწში ვიყავი. ვნახე გამოჩენილი კარდინალი როანელი. ღმერთო, ღმერთო! კარდინალი და ეგეთი სულიერი მეუფე ქვეყნისა და ეგეთი? ჯერაც გონს ვერ მოვსულვარ!

ისე გაჯავრებული იყო. — აღარც კი აგონდებოდა. რომ ძვლებამდე დაესველებინა წვიმას. ხან აქეთ ეცემოდა, ხან იქით, თითქო

ალაგი ვერ უპოვნიაო. ჩვენც გაშტერებულნი შევცქეროდით: ჩვენ დღეში არ გვენახა ჩვენი კეთილი მღვდელი ასე აღელვებული.

— დიად, ვნახე ჩვენი სულიერი მეუფე, — მიუბრუნდა ისევ ნათლიაჩემს, თითქო ჩვენ ვერც კი გვხედავსო; — ვნახე პაპის მოადგილე, წმინდა მამა, რომელიც მაგალითს უნდა გვიჩვენებდეს სიკეთისას და ყოველ სათნოებისას! ვნახე და იცი როგორა ვნახე; მარტოდ-მარტო გამოქიმულიყო ეტლში და ბაზრობა დღეს, როცა დიდი ქუჩა ხალხით სავსეა, გიჟივით მოაქროლებდა ცხენებს. რამდენი ჭურჭელი დაამტვრია, რამდენი სავაჭრო გაიტანა, ვინ იცის? ისე ურცხვად იცინოდა, ისე უნამუსოდ... ფუ, შეარცხვინა ღმერთმა!

— იცი, ნეკერი დაუთხოვნიათ!

— ვიცი, ვიცი! აკი გეუბნები, სავერნში ვიყავ და ჩვენ სულიერ მამასაც ვეახელ. ღმერთო, ღმერთო! რა მომადიქრებინებდა, რომ ჩვენს ქვეყანას ამოდენა მუქთახორა ბებერი ეყოლებოდა! გაეგოთ თუ არა, ნეკერი დაუთხოვნა მეფესაო, მაშინვე სავერნს მოსულიყვნენ და დიდის ამბით ულოცავდნენ კარდინალს ნეკერის დათხოვნას.

ცოტა ხანს შემდეგ მწარე სიცილით განაგრძო:

— მოდი შენა და ამისთანა კარდინალს ქვრივ-ობოლი შეაბრალო! მოდი შენა და შესჩივლე: მეუფეო, გაჭირვებაში ვართ ღვთის მოსაგნნი, შეგვეწიე რითიმე: გვაწუხებენ, მეუფეო, სხვადასხვა ხრიკს გვიდებენ და თვით საკურთხეველში გვიცვივიან; დაგვექომაგე, რადგან შენი ერთი სიტყვა კმარა. რომ უკუიქცნენ შეურაცხმყოფელნი ეკლესიისანი... მოდი შენა და მოახსენე: მეუფეო, ჩვენს საკუთარ სახლ-კარში აღარ გვასვენებენ, ცოლ-შვილს გვიწიოკებენ, დღე და ღამ, როცა კი უნდათ, სახლში გვიცვივიან ვიღაც შეიარაღებულნი — ნეტავი სამეფო ჯარის ტანისამოსი მანც ეცვათ, რომ უბრალო ქურდები არ გვეგონოს? — სახლში გვიცვივიან, სახლს გვიქოთებენ... წავლენ და იმათ სიტყვაზედ, იმათ სინიდისზედ და სიმართლეზედ არის დამოკიდებული ჩვენი ბედი და იღბალი. მერე ვინ არიან, რით იცით, რომ ღირსნი არიან მართებლობის მხრივ ასეთი უსაზღვრო ნდობისა? რითი დამსახურეს ეს ნდობა? კეთილი ცხოვრებით, საქველმოქმედო საქმეებით, თუ ჭეშმარიტ პატიოსნებით, რომ ამ ჯაშუშების ხელთ ჩაგიგდიათ ჩვენი სიკვდილ-სიცოცხლე? და ხშირად ჩვენი პატიოსანი სახელიც კი?! მოდი შენა და მოახსენე: მეუფეო, შენ უნდა იყო ჩვენი ქომაგი, შენ უნდა გვიშუამდგომლო მეფის წინაშე, შენ უნდა შეგვეწიო, შენ უნდა შეავედრო მეფეს ის უბედურნი, რომელნიც ციხეში ღებებიან მარტო იმიტომ, რომ ჯაშუშებ-

მა სახლში რამდენიმე ლიტრა ჩუმად შექნილი მარილი უპოვეს!
აბა მოახსენე... თითონ იცის, როგორც დაგიხვდება!

— რა დაგმართვია, მღვდელი? რა ვქნა, არ იტყვი რა არის შენს
თავსა?

ცოტა ხანს გაჩერდა მღვდელი, თითქო აზრების მოკრებასა ცდი-
ლობსო და დაიწყო:

— ცული საქმე დამემართა. გუშინ ჯაშუშები დაერივნენ ჩემს
სამწყსოს, საწყალ ხალხს სახლები დაუჩხრიკეს, ერთ წვრილშვილ
კაცს, იაკობ ბაუმგარტენს, სახლში მარილი უპოვეს და ციხეში ჩა-
აგდეს. მეც ავდექი და კარდინალს ვეახელ, ვთხოვე, საწყალ კაცს
შესწვენოდა. მგონი ეს ჩემი მოვალეობა არის. მე მეგონა, კარდინა-
ლიც ამ აზრისა უნდა იყოს-მეთქი. მეგონა, შეიბრალებდა უბედურ
მამას, რომელსაც სახლში ექვსი ერთიერთმანეთზედ პატარა შვილი
დარჩა სრულიად უნუგეშოდ და ულუკმაპუროდ; მეგონა ჩვენი მე-
უფე შეიბრალებდა საწყალ კაცს და სთხოვდა გაეთავისუფლებინათ.
ღიად, აგრე მეგონა, მაგრამ ჯერ, მანამ მის მეუფება მინახულებდა,
სწორედ ორი საათი მალოდინეს შუა ქუჩაში მშვენიერი ძვირფასი
სასახლის წინ, რომელშიაც მთელი ქვეყნის ბერები თავისუფლად შე-
დიოდნენ და მე კი... აბა მე რად შემიშვებდნენ, უბრალო სოფლის
მღვდელს? მე ხომ იმ ბერებსავით ნეკეკერის დათხოვნას არ მივულო-
ცავდი?! ბოლოს მეც მაღორეს, მეც შემიყვანეს იმ ბაბილონში, სა-
დაც სუფევს ოქროზედ და ვერცხლზედ დამყარებული დიდება და
ამპარტავნება, სადაც ყველაფერი დიბა-ატლასით და ძვირფასი
თვლებით არის შემკული; ღიად, შემიყვანეს და ღმერთსა ვფიცავ
ღილის 11 საათიდან საღამოს ხუთ საათამდე გვალოდინეს მე და ორი
კიდევ სხვა ჩემსავით უბრალო სოფლელი მღვდელი. მოსამსახურე-
ებიც კი ჩვენ დაგვცინოდნენ, — მიდი-მოდიოდნენ და იცინოდნენ.
ერთი იმათგანი მალ-მალე გადმოგვხვდავდა და სხვებს დაუძახებდა:
წვერცამეტა მღვდლები ისევ აქ არიანო! რა მექნა, უნდა მომეთინა.
ვიფიქრე, მეუფეს მოვახსენებ მეთქი. ამ ღროს მოვიდა ერთი მოსა-
მსახურეთაგანი და სიცილით გვითხრა: წადით, მეუფე ღღეისწორამ-
დინ ვერ გინახულებთო!

ეს რომა სთქვა მღვდელმა ქრისტეფორემ, ისე დაჰკრა იატაკს
თავისი ყავარჯენი, რომ ას ნაჭრად დაამსხვრია. საზარელი სანახა-
ვი იყო.

— ნეტავი კი კარგად მიგვექელა და სხვა არა მინდა რა, — უთხ-
რა ნათლიაჩემმა.

— მარტონი ვყოფილიყავით, მე ვიცოდი, რასაც ვუზამდი! ისე
დაუხსრესლი ყურებს, თავის ღღეში არ დავიწყებოდა. მაგრამ, ღმერ-

თო ძლიერო, შენთვის შემომიწირავს მსხვერპლად ჩემი ასეთი დამცირება და შეურაცხყოფა.

და ისევ სიარული დაიწყო. ღმერთო, რა ძალიან გვებრალებოდა საწყალი მამა ქრისტეფორე! ნათლი-ჯალაბმა პური და ღვინო გამოიტანა; — არც კი დამჯდარა, ისე შენაყრდა ცოტათი. პურის ჰამაში სრულიად დამშვიდდა და დაწყნარდა. მაგრამ დამშვიდებულმა იმისთანა სიტყვები სთქვა, რომ ჩემს ღღეში არ დამავიწყდება:

— სამართალი აღარსად არის. სახელმწიფოს ხალხი ინახავს, დიდებულნი და წარჩინებულნი კი ღუპავენ და ძირს უთხრიან. სახელმწიფოს ხალხი ასაზრდოვებს და დიდებულნი კი სძარცვავენ. სათნოებას და პატიოსნებას ფეხქვეშ სთელავენ. სარწმუნოებას მასხარად იგდებენ! ღმერთიც კი აღარა სწამთ, უღმერთოდ მეტსა ვცოდავთო! ჰოდა, ვინ არიან ეს დიდებულნი, რის მაქნისნი არიან? ცხოვრებით გლეხკაცი აცხოვრებს; მტრისაგან იარაღით ხელში გლეხკაცი იფარავს და ჩემისთანავე გლეხკაცის შვილი ქადაგებს — პატივი ეციოთ დიდებულთა სახელს, ნუ შეეხებით დიდებულთა დიდებას და ბატონობასაო! ნუ შეეხებით დიდებულთა საკუთრებას, თუშეცა ეს საკუთრება ხალხის ოფლი და სისხლიაო! როდემდის უნდა ვიყვნეთ ამ ყოფაში?! ეგ არ ვიცი და ის კი კარგად ვიცი, რომ შეუძლებელია დიდხანს გაგრძელდეს ეს ჯოჯოხეთური ცხოვრება! შეუძლებელია, რადგან ეს ყოფა წინააღმდეგია ბუნებისა და ღვთის განგებისა! მართლა უსინდისო, ქვეყნისა და ღვთის მტერი უნდა იყოს კაცი, რომ წმიდა ტაძარში იდგეს და ქადაგებდეს — უნდა ემორჩილებოდეთ და გიყვარდეთ ის, რაც დათრგუნვილი და გმობილი უნდა იყოსო. ამ ყოფას ბოლო უნდა მოეღოს, რადგან ამაზედ მეტს დამონავენას პირუტყვიც ვერ აიტანს, არამც თუ ადამიანი.

მღვდელი ქრისტეფორე იმავე ღამეს გაემგზავრა შინისკენ — წავიდე ჩემს სამწყსოს მივეპატრონო.

ცოტა ხანს უკან ჩვენც დავიშალენით. დაღონებული, დაღვრემილი ვიყავით ყველანი და ყველაზედ უმეტეს ნათლიაჩემი:

— მებატონეებს და დიდებულთ ქვეყანაზედ თავის მეტი არავინ არად მიაჩნიათ. რომ შეეძლოთ უჩვენოდ ცხოვრება, აქამდის ხსენებაც აღარსად იქნებოდა ჩვენი. ვაი, რომ ვერ მოუხერხებიათ! როცა დავეკირდებით და ან ჯარისკაცად ვახლავართ, ან ხელოსნად, ან მღვდლად, სულ იმასა ცდილობენ, რაც შეიძლება მეტი დამცირება და შეურაცხყოფა მოგვაყენონ; და როგორც კი ნახავენ, რომ საჭირო აღარა ვართ... პანღური და პანჩური! სხვა ჯილდო რა საჭიროა ჩვენთვის?! ჰოდა სცდებიან, რომ ასე გვეკიდებიან! ეხლა ხაზინის ზარალი ყველამ გავიგეთ და ამას დიდი შედეგი მოჰყვება... ბევრი

ცვლილება მოხდება... სახელმწიფო ხაზინას ხალხი აესებს, მაშასადამე, უმთავრესობა და უპირველესობაც ხალხისა უნდა იყოს! კმარა რაც ხანი ჰქამეს მებატონეებმა და სამღვდლოებამ საწყალო ხალხის ნაპირნახულევი! კმარა, დროა ჰკუაზედ მოვიდეთ!

დიდი ვახშმობა გადასული იყო. როდესაც შინ მივედი. რა დამძინებდა, ხან მღვდელი ქრისტეფორეს ნათქვამი მაგონდებოდა, ხან ნათლიაჩემისა. მეც ყველაფერში ვეთანხმებოდი ნათლიაჩემს, შოველს და ქრისტეფორე მღვდელს. რა მე? მთელი ქვეყანა ეთანხმებოდა, მაგრამ ჯერ ჩვენი დრო არ მოსულიყო და ჯერ კიდევ ბევრი ტანჯვა-წვალება უნდა გამოგვევლო, ვიდრე განთავისუფლებას ველირსებოდით.

VI

უიმისოდაც გაჭირებულთ იმ დროს ისეთი უბედურება შეგვემთხვა, რომ ნეკერიც დაგვაიწყდა, დედოფალიც და თავადი არტუაც. იმოდენასა მუშაობდა საწყალო მამაჩემი, და მაინც ისე ზამთარი არ დადგებოდა, რომ შვილები მოწყალების სათხოვნელად არ გაეგზავნა. ჩვენი პატარა სტეფანე ხომ ისეთი სნეული იყო და იმასაც კი ამუშავებდნენ — თავის საკმარი ჰადის ფასი მაინც აიღოსო. კლოდი ერთ მონასტერში იდგა მეკარედ; ნიკო ისევ ტყეში მუშაობდა და საკმარისად კარგ ფულსაც იღებდა, მაგრამ როგორც კი ერთ-ორ გროშს მოახელებდა, აღარ მოისვენებდა, მანამ დუქანში არ შევიდოდა და კარგად არ გადაჰკრავდა; გადაჰკრავდა, გაჭირვებულბოდა და ან სცემდა ვისმე, ან ნაცემი მოვიდოდა შინ; დედას თითქმის არაფერს აძლევდა. ლიზა და პატარა მატურინი ნათლიაჩემს ეხმარებოდნენ ტივოლში, როდესაც დროს გასატარებლად ქალაქელადიდაცობა ეწვევოდა ხოლმე; მაგრამ ეს მარტო ერთხელ მოხდებოდა კვირაში და რადგან ამით საკმარისს ვერას შოულობდნენ, მოწყალებაზედ დაიარებოდნენ. ჯერ ქარხნები არსად იყო, რომ იქ ემუშავნათ და ლუკმა პურის ფასი მაინც აეღოთ; გასაყიდად წინდების და პაჭიჭების ქსოვა ჯერ ჩვენ სოფლებში არ იცოდნენ; არ იცოდნენ აგრეთვე ჩალის ქუდების ქსოვა; ამ ბოლოს დროს ვისწავლეთ ჰკუა და ჩვენი გლეხის გოგოების ნაქსოვი, სხვა ხელსაქმე რომ არა ეთქვა რა, ჩალის ქუდები მთელს საფრანგეთში ხომ მოფენილია და სამზღვარგარედაც ბევრი გააქვთ; ამ ბოლოს დროს ვისწავლეთ ჰკუა და ჩემს პატარა ბიჭობაში კი ისე გაიზრდებოდა ქალი, ისე გახდებოდა ოცის წლისა, რომ ოცს გროშს ვერ აიღებდა.

ეგ კიდევ არაფერი, უბედურება ის იყო, რომ ჩვენი ვალი დღითი

დღე მატულობდა და მთელი თერთმეტი მანეთი გამხდარიყო. როგორც კი გავიდოდა სამი თვე და მოგვირაკუნებდა კარებს რობენი:—აბა, პეტრე, უნდა მომეხმარო. წაიყვანდა მაძაჩემს და სრული სამი დღე ამუშავებდა თავის ვენახებში. ეს იყო ჩვენი უბედურება, თორემ სიღარიბეს როგორც იქნებოდა გავუძლებდით. მით უფრო, რომ ჩვენი სიღარიბე ღვთააგან განწესებული გვევონა, და, რასაკვირელია, ვემორჩილებოდით. მაშინ რა ვიცოდით, რომ სხვადასხვა საჭირო სანოვაგეს რომ გარდასახადს ადებდნენ, იმ გარდასახადს ვაჭარი კი არ იხდიდა, ჩვენ ვიხდიდით და რაც შაურად ღირდა, იმაში ჩვენ ათ შაურს გვახდევინებდნენ! იმოდენა ზაყი ელო ყველა საჭირო საგანს, რომ კოდ პურში ათი კოდის ფასს ვაძლევდით და ლიტრა მარილში თუნდა ოცი ლიტრისას.

რა ვიცოდით? ისიც კი არ ვიცოდით, რომ სულ ოთხი-ხუთი საათს სავალზედ, შვეიცარიაში იმდენი კი არა, ნაკლებიც რომ გვეშრომნა, უკეთესადაც ვიცხოვრებდით და შავი ღღისათვისაც გადავდებდით რასმე. არა ვიცოდით რა და კიდევაც კარგა ხანი გავა, ვიდრე საწყალი გლეხკაცი შეიგნებდეს, რომ იმ ხარჯს გარდა, რომელსაც ნაღდ ფულად ართმევენ, ან რომლისთვისაც ბეგარაზედ გაჰყავთ, სხვასაც ბევრ ხარჯს ახდევინებენ; წელიწადში რომ ხუთი მანეთი შეაწერონ, სულ წყევლა-კრულვით აიკლებს ქვეყანას და წელიწადში იქნება ათჯერ ხუთ მანეთსაც იხდიდეს და იმას კი ვერა ჰხედავს: ლიტრა მარილი რომ აბაზი ღირდეს და მართებლობამ ხარჯი დაადოს ლიტრაზედ უზალთუნი, რასაკვირელია, რომ ექვს შაურ ნაკლებ ვეღარსად იყიდი; ახლა ვაჭარიც ისარგებლებს შემთხვევით და უზალთუნის წილ ერთ აბაზს წაუმატებს! ეს მაგალითად მოვიყვანე, თორემ მართებლობა თავის დღეში არ დასჯერდება უზალთუნს და ტყავს აძრობს საწყალ კაცს, ოღონდ ისე აძრობს, რომ თითონ არსადა სჩანს.

დღეს, რასაკვირველია, იმოდენა ხარჯი აღარ ადევს სხვადასხვა სანოვაგეს, აღარც იმოდენი საბაყობია, რაც ჩემს დროში იყო. და უწინ კი თითქმის სუყველაფერს, რაც კი ხალხისთვის უსაჭიროესს მოთხოვნილებას შეადგენს, უშველებელი ხარჯი ელო; მამასისხლად ვყიდულობდით ყველაფერს. უღმერთოდ გვძარცვავდნენ და საშინელი სიღარიბეც იყო ყველგან!

ოჰ, როგორ მინდოდა შემემსუბუქებანა რითიმე ჩვენი გაჭირებული ცხოვრება? როგორ მინდოდა დავხმარებოდი რითიმე ჩემს დედ-მამას! სულ იმას ფიქრობდი, მერმისს ნათლიაჩემი შეგირდანას დამინიშნავს და მოვაგროვებ, ვალს იმით გადავიხდი მეთქი.

ერთიორად ძალას მიმატებდა ეს ფიქრი; ეს იყო ჩემი ოცნება,

ეს იყო ჩემი მანუგეშებელი, და რაც უნდა დაღლილი ეყოფილიყავი, მაინც ფრთებს მასხავდა ეს იმედი.

ამოდენა აღმართს დაღმართიც ექაებაო, ნათქვამია; სწორედ ასე ზოვიდა ჩვენი საქმე: ჩვენდა საბედნიეროდ ჩემს ძმას ნიკოს, ჯარისკაცებს რომ აგროვებდნენ, კენჭი არ შეხვდა. მაშინ კენჭი არ იცოდნენ: ვისაც შავი ბილეთი ამოუვიდოდა, ჯარში წაიყვანდნენ, ვისაც თეთრი, ის თავისუფალი იყო; ჩვენ ნიკოსაც თეთრი ბილეთი ერგო.

განაღა შეიძლება წარმოიდგინოთ, რა სიხარული იყო ჩვენს სახლში!

გაიგო თუ არა დედაჩემმა, ნიკოს თეთრი ბილეთი ამოუვიდაო, მაშინვე სთქვა, სხვის მაგივრად უნდა გავგზავნოო. ნიკო სამაგალითო ახოვანი ბიჭი იყო, სწორედ იმისთანა ზორბა და კოსტა, როგორიც ძალის-ძალად მიჰყავდათ ხოლმე სამეფო ჯარში და, სულ ცოტა რომა ვსთქვათ, ხუთ-ექვს თუმანს მაინც მოგვეცემდნენ; ვალს გადავიხდიდით და... ჩემს დღეში არ დამაგვიწყდებია ჩვენი სიხარული. ეხვეოდა დედაჩემი ნიკოს, ჰკოცნიდა, და ეხვეწებოდა:

— უნდა გაგყიდოთ, შვილო! ბევრ ცოლშვილიან კაცს ამოსვლია შავი ბილეთი და კარგ ფულს მოგვემენ.

მარტო ცოლშვილიანი კაცის მაგივრად შეექლო სხეას წასვლა, მაგრამ, ვინც სხვის მაგივრად წავიდოდა, ექვსის წლის მაგივრად თორმეტი წელიწადი უნდა ყოფილიყო სამსახურში. ეს დედაჩემზედ კარგად იცოდა ნიკომაც. მაგრამ წარბიც არ შეუხრია, თითქო საქეიფოდ გზავნიან სადმეო:

— როგორც თქვენი ნება იყოს! მე ყველგან კარგად ვიქნები.

მამაჩემს ის ერჩივნა, თავისი პირმშო შვილი სახლში ჰყოლოდა; ამბობდა, თუ კი იშრომა, ტყუშიც აიღებს იმდენს, რომ ვალი გადაიხადოს, სხვა არა იყოს რა ბეგარაზედ მაინც ივლისო; მაგრამ დედა სულ სხვაფრთხივად სჯიდა და წამ და უწუმ კუნჭულში სადმე მიიყვანდა და ჩასჩურჩულებდა:

— გაჩუმდი. კაცო, შე ჩემი ცოდვიო სავსევე, შენა! შინ დარჩება და ცოლსაც შეირთავს! ვითომ არ იცი, რომ ლორისის ქალს ეკურკურება. ჯვარს გადაიწერს, დაწერილშვილდება და აბა მაშინ გადაგიხდის ვალებს აი! დიად, იმედი გაქონდეს!

ველარ ითმენდა მამაჩემი, თვალი ცრემლით ევსებოდა და ნიკოს ეკითხებოდა:

— იქნება არ გინდა, ბიჭო? რატომ არას ამბობ?

— მინდა, მამა, მინდა! ვალს გადახდა უნდა. უფროსი მე გყევარ და ვალიც მე უნდა გადავიხადო.

ძალიან მოსიყვარულე გოლისა იყო საწყალი ბიჭი.

ეს იყო და ესა. მივარდა დედაჩემი და გულში ჩაიკრა; ჰკოცნიდა, ეალერსებოდა: — მე კი არ ვიცოდი, რომ მშობლების პატივისმცემელი ხარ; აგრე, შენ გენაცვალოს დედაშენი, აგრე უნდა გიყვარდეს, შვილო, შენი მოხუცებული დედა-მამა; უნდა გებრალეობდეს, შვილო, შენი და-ძმანი; რა გიშავს, გენაცვალე! შენ ისეთი ბიჭი ხარ, პირდაპირ სამეფო ჯარში ჩაგრიცხავენს ისე მოგიხდება თეთრი ტანსაცმელი, რომ მგონი მტერსაც თვალები დაუყენო!

— კარგი, დედა, კარგი!

ნიკო კარგადა ჰგრძნობდა, — მე გამწირეს, რომ ოჯახს ეშველოს რამეთუ, მაგრამ რაღა ეთქმოდა! ისე იყო, თითქო დიდი სურვილი აქვს სხვის მაგივრად ჯარში წავიდესო. ამასთან, ცოტა არ იყოს, კიდევ უხაროდა, საკუთარი იარაღი მექნებოდა.

მამაჩემი ბუხართან მიმჯდარიყო, თავი დაედუნა და ქვითინებდა. დედაჩემი მხარზედ დაჰყარდნობოდა და თავისებურ ნუგეშსა სცემდა; კარგი ერთი და შენც იტყვი ვაჟიკაცი ვარო: იმდენს როგორ არ მოგეცემენ, რომ ვალიც გადავიხადოთ და ცოტა რამაც დაგვრჩეს. ერთ თხას მაინც ვიყიდი სხვა არა იყოს რა; რძე და ყველი სახლში იყოს, თორემ შიში აღარაფრისა გვექნება. თუ ერთი ღორიც გავიჩინე! იმისთანა ბურვაკები გაგიზარდო, რომ თითებს ილოკავდე!

რაღა ეთქმოდა მამაჩემს? იმ დღეს მკვდარივით იყო საწყალი.

მეორე დღეს დილით მამაჩემი და ნიკო ქალაქს იყვნენ. ღმერთო, რა შეწუხებული ამოვიდა მამაჩემი ქალაქიდან! საქმე გაეთავებინათ, ჰორიგებულიყვნენ კიდევ: ნიკო მეპურე უოსისის შვილის მაგივრად მიდის, თორმეტი წელიწადი ემსახურება და ფასსაც შვიდ თუმანსა და ორ მანეთს იღებს. ამ ფულიდან ჯერ რობენის ვალს გავისტუმრებთ და დანარჩენს სახლში მოვიხმარებთო.

როგორღაც წამოსცდა ერთი თუმანი ან თუმან ნახევარი ნიკოს მივცეთო, მაგრამ დედაჩემმა ყვირილი მორთო: რად უნდა, საქმელსასმელს არ დააკლებენ და ტანისამოსსაო! ასე გასინჯეთ, წინდა-პაჭიკიც კი სახელმწიფო ექნება და ფული რომ მივცეთ, უნდა წავიდეს და ლოთობა დაიწყოს, დაითვრება. წაეჩხუბება ვისმე და ამ სიკეთის დროს რომ დააშავოს რამე და ციხეში დაიჭირონ, ის მირჩევნია, თავისი ხელით ყელი გამომლადროსო!

ნიკოს არც ეს ეწყინა. იცინოდა თავისთვის და იძახდა:

— კარგი, კარგი! რად მინდა ფული? მე უფულოდაც არა მიჰკირს რა.

მამაჩემი კი ისევ ისე იჯდა განმარტოებული და ცრემლი სდიოდა. განა დედას კი არ ენანებოდა უფროსი შვილის მოშორება,

მაგრამ რა ექნა? ოჯახის გაჭირებასა ხელავედა და სხვა ხსნა რომ არსაა იყო, გულს იმაგრებდა; ნიკო ვაუკაცი იყო და თავის თავს თითონ უბატრონებდა; დედას წვრილშვილი ჰყავდა საზრუნავი: მატურინი, ლიზა, სტეფანე და იმ დროში შვილი თუმანი და ორი მანეთი მთელი სიმდიდრე იყო.

საქმე გათავებული იყო, ერთი კვირის შემდეგ უნდა ხელი მოეწერათ პირობის წვრილშვილს. ჩვენი ნიკო ყოველ დღე ქალაქს დაიარებოდა და რადგან ყოსსის შვილის მაგივრად მიდიოდა ჯარში, ყოსსი კარგად უხვდებოდა და კარგადაც უმასპინძლებოდა: შეიყვანდა ღუქანში და — რაც გნებავდეს, მოიკითხო! ისიც შეექცეოდა! ეს კოწახურიანი ძეხუებო, ეს ლორია, ეს ჩახხიო; ზედაც წითელი ღვინო! შეიყრებოდნენ იმისავით სხვის მაგივრად ჯარში წამსვლელი ბიჭები, გადაჰკრავდნენ, მოჰყვებოდნენ სიმღერას და დილით საღამომდე ლხინი და ქეიფი ჰქონდათ.

მე კი ერთიორად მუყაითად ვიყავი ჩემ საქმეზედ. მიხაროდა, რომ შეჩვენებულ რობენის ბრწყალეებიდან განეთავისუფლდებოდი და გულს დავიმშვიდებდით; მიხაროდა, რომ მოხტეებულ მამაჩემს აღარავინ შეაწუხებდა, — წამოდი, მომეხმარეო — და ერთი-ორად მეტი ძალითა ვცემდი ჩაქუჩს. ნათლიაჩემიც ძალიან კმაყოფილი მყავდა.

ერთ დილას, როდესაც გაცხარებული ვმუშაობდით სამკედლოში და ჩაქუჩს სულ ჭახი-ჭუხი გაჰქონდა და აქეთ-იქით ნაპერწკლები დაქროდნენ, უცბად თავს წამოგვადგა ერთი უზარმაზარი სამეფო ჯარისკაცი; ქუდი საქონრეზედ მოექცია, ხმალი ზურგზედ გადაეგდო, ეტყობოდა ცოტა გადაკრულში ბრძანდებოდა.

— ბიძაჩემს გაუმარჯოს, ბიძაჩემს!

ისეთი რიხით მიესალმა ნათლიაჩემს, თითქო უბრალო ჯარისკაცი კი არა, დიდი სარდალი ბრძანდებო.

ნათლიაჩემმა ჯერ ვერ იცნო. კარგა ხანი სინჯა, ნეტავი ვინ უნდა იყოსო, და მერე უთხრა:

— ოჰ, შენ ბრძანდები, ლოთიბაშო! მაშ ჯერ არ ჩამოუბრჩვიხარო?!

— შენც კი არ გამოცვლილხარ. ბიძაჩემო, — უთხრა სიცილით ჯარისკაცმა. ძველებურად ხუმრობ... წამო, ერთი ჩარევი ჩამოასხმე-ვინე... ყელი გავისველოთ...

— საქმე მაქვს და შენისთანა მაწანწალასთვის თავს ვერ დავანებებ, — უთხრა ნათლიაჩემმა და ზურგი შეაქცია. აბა, ბიჭებო, დაჰკათ!

ჩვენ ჩვენ საქმეს შევუდევით და ჯარისკაცი კი სიცილით გავიდა ქუჩაში.

მართლა ნათლიაჩემის ძმისწული იყო, სოფელ კარტვანიდან. ყმაწვილ კაცობაში თურმე ისე შეაწუხა თავისი უვარგისი ქცევით მთელი სოფელი, რომ იმის ჯარში წასვლა დედ-მამასაც კი გაეხარდათ. ეხლა ღრობებით იყო დათხოვნილი და ძველი ნაცნობების და ნათესავების სანახავად ამოსულიყო.

მეორე დღეს ნათლიაჩემმა ქალაქს გამგზავნა მარილის ამოსატანად. ქალაქში, როგორც კი მოედანზედ გავედი, ვიღამაც დამიყვირა:

— მიშელ! მიშელ!

მივჩხედე, ჩვენი ნიკო და გუშინდელი ჯარისკაცი დუქნის კარებთან იდგნენ და კარგა ნასვამივ იყვნენ. ნიკომ ხელი წამავლო, ჩვენი სადღეგრძელო უნდა დალიოთ.

— დუქანში შესვლას, ყოსსთან წავიდეთ არა სჯობიან?

— ნეტავი შენა! მომწყინდა იმისი ძეხვი და ლორი. შემოდი აქ! ვკითხე, მერე ფული სადა გაქვს-მეთქი? მაგრამ იერემიამ, იერემია ერქვა ჯარისკაცს, შემომიტია: საქმე არა გაქვს, მაგაზედ როგორ ლაპარაკობ?! ერთი მიწა-წყლის შვილნი ვართ და ეგ მე ვიცი, როგორც გაგიმასპინძლდებიო!

რა გინდა სულო და გულო, რომ იმან არ მოითხოვა, მაგრამ ჩემი გული კი ვერ მოიგო. დუქანი მთვრალი ჯარისკაცებით იყო სავსე. ყველანი რალასაც ღრიალებდნენ, წეკოს ეწეოდნენ და თან ღვინოსა სვამდნენ. გარდა ამისა არც იმდენი დრო მქონდა, რომ დუქანში დავგვიანებულიყავ. ჩვენთანვე იჯდა ერთი ჩვენებური ბიჭი ივანე და ისიც იერემიას სტუმარი იყო. სამი მოხუცებული ჯარისკაცი შეუმჩნევლად თავს დაგვტრიალებდა: მიდი-მოდიოდნენ, თვალ-ყურს გვადევნებდნენ და თან ჩიბუხს ეწეოდნენ. ისეთი საზიზღარი შეხედულობისანი იყვნენ სამივენი, თავიანთ დაფლეთილი ტანისამოსით და ლოთობისაგან ჩასისხლიანებულ თვალებით, რომ კაცს გულს აურევდნენ. თავს დაგვტრიალებდნენ და რამდენჯერმე თვალით რალაცა ანიშნეს იერემიას; ნიკოს ძველი მეგობრებით ელაპარაკებოდნენ და რაც უნდა ეთქვა, ისინი მხარზედ ხელსა სცემდნენ — ჰა ყოჩაღ, ნიკოო! თან გულიანად ხარხარებდნენ.

მიკვირდა, გონს ვერ მოვსულიყავ: სად ჩვენი ნიკო — სად ჯარისკაცები და იერემია? რად დახარჯავდა იერემია ჩვენთვის იმოდენა ფულს?

ცოტა ხანს უკან საყვარის ხმა შემოგვესმა, ჯარისკაცები თავთავიანთ ბინაზედ უნდა წასულყვნენ. უმეტესი ნაწილი მაშინვე წა-

მოდგა და შინისაკენ გაეშურა; გარეთ შევიცარიელი ჯარისკაცები გარბოდნენ. ჯარს ტანისამოსზედ ვიცნობდით: შევიცარიელებს წითელი ტანისამოსი ეცვათ, და ფრანგებს კი თეთრი. დუქანში მარტო მოხუცებულები დარჩნენ; იმათ თავიანთი ვადა ემსახურნათ და ახლა, თუმცა ჯარში დარჩენილიყვნენ, ცოტა მეტი თავისუფლება ჰქონდათ მინიჭებული, ვიდრე მოსამსახურე კაცებს.

— რამდენი წლოსა ხარ? — მკითხა იერემიამ და რომ გაიგო თორმეტისა ვიყავი, ზედაც აღარ შემომხედა.

ნიკომ სიმღერა დაიწყო, სხვებმა ბანი მისცეს. დუქანი ხელმეორედ გაივსო ხალხით; ჩვენებმა ხელმეორედ დაიწყეს სმა. მე კი ავდექი, წამოვივიდე ჩემი გულა და გზას გავეუდექი.

ავედი შინ. კარგა ღამე გავიდა და ნიკო კი არსად იყო. მეორედ დღეს ქალაქს უნდა წასულიყვნენ, პირობის წერილზედ ხელი მოეწერათ და ფული მიეღოთ. მამაჩემს მთელი ღამე თვალი არ მოუხუჯავს, თავად შეწუხებული იყო და მე ხომ თავისი დავმართე, როდესაც ვუამბე, როგორა ვნახე ჩვენი ნიკო დუქანში იერემიასთან და სხვებთან მოქეიფე.

დედაჩემი უფრო გულმაგრად იყო:

— რა უშავს, გენაცვალეთ? გასათხოვარი გოგო ხომ არ არის, რომ ცხრაკლიტულში გვეყავდეს დაკეტილი. ყმაწვილი ბიჭია, უნდა დრო გაატაროს, მარა?! ერთი ორ დღეს კიდევ იქეიფებს თავის სამშობლო ქვეყანაში და მერე კი იქნება იმ სიშორეზედ უკრან თავი, რომ აღარც თავის ტოლ-სწორსა ხედავდეს, აღარც თვისსა და ტომსა. გენაცვალეთ! რა გენადღლებათ იქეიფოს, თუ კი არა ეხარჯება რა!

მაგრამ მამაჩემი მაინც ჩაფიქრებული და დაღონებული იყო. დედამ რომ ვერა გააწყო რა, წავიდა და ბავშვებს მიუწვა; მე და მამაჩემილა დავრჩით. კარგა ხანი ვიყავით ისე, მერე მომიბრუნდა და მითხრა:

— დავწვეთ, მიშელ! იქნება დაგვეძინოს. ირაყრავებს თუ არა, წავალ და ვნახავ... ალბად იმის თავს არის რამე, თორემ აქამდე შინ მოვიდოდა. იმ საქმესაც გავათავებ, წავალ, ხელს მოვუწერ... ჩემს დაპირებას ავასრულებ.

ის იყო ტანისამოსს ვიხდიდით, რომ ფეხის ხმა შემოგვესმა: ვილაც მოეჩქარებოდა ჩვენკენ, სოფელზედ კი არა, ქვემოდან მოდიოდა, ორლობეზედ.

წამოხტა მამაჩემი, კარს ეცა — აგერ ნიკო მოდისო!

კარი გააღო და ნიკოს მაგივრად ივანეს კი შეეფეთა. წუხელის რომ ნიკოსთან და იერემიასთან ქეიფობდა დუქანში. გაყვითლებულიყო, სირბილისაგან ძლივსლა ქშინავდა:

— ნუ შეგეშინდებათ კი... ერთი უბედურებაა თქვენს თავსა. მამაჩემი კანკალმა აიტანა.

— რა მოხდა, შვილო?! — სთქვი, თუ ღმერთი გწამს?

— თქვენი ნიკო დაიჭირეს, დაამწყვდიეს. იერემიას ხომ იცნობთ, ჯამი ესროლა და თავი გაუტუნა. განა არა, ვეუბნებოდი გაფრთხილდი მეტქი, მაგრამ რომ ვერა გავაგონე რა! ვეუბნებოდი, აგერ საში წელიწადია უკანა მღევენ ეგ ჯარისკაცები, მასმევენ, მაკმევენ, მაქეიფებენ, უნდათ როგორმე წამიტყუილონ და ხელი მომაწერიონ, ხან რასა მპირდებიან, ხან რასა, მაგრამ ვერ მივართვი! ქეიფით ვიქეიფებ, რა მენარჯება? მაგრამ ხელს კი არ მოვუწერ! ვიცი და, რაც უნდათ ჩემგან: თუ ერთი ხელი მომაწერინეს პირობაზედ და მოწმებიცა ჰყავთ, რომ ჩემი საკუთარი ხელით დავსვი ჯვარი, ხელსა მტაცებენ და თორმეტი წელიწადი მიყოლიებენ ჯარში. ბევრი მიჰყავთ ასე მოტყუებით, მეტადრე თუ კარგი ბიჭი მოეწონათ სადმე.

— ღმერთო, ღმერთო! — შეჰყვირა მამაჩემმა, — რაღა ჩემზედ მოიცალე, შე მადლიანო, შენა! მე მუხლი მომეკეცა და იქვე ჩავიჩოქე, კარებთან. ჩვენები წამოხტნენ და შეშინებულნი გარს ეხვეოდნენ ივანეს.

— მერე ნიკომ ხელი მოაწერა? — ჰკითხავდა მამაჩემი. — სთქვი რაღა, ბიჭო, მოაწერა თუ არა? რა ვიცი, როგორ მოაწერდა, როდესაც ხაბაზ ყოსს გავურვიგდით კიდევ და იმის შვილის მაგივრად უნდა წასულყო?! —

— საქმეც ის არის, რომ ხელი მოაწერა და! მისი ბრალი კი არ არის, თავი არ მომიკვდება! ძალიან ბევრი ვსვით, თორემ რა ღმერთი გაუწყრებოდა!? რომ ნახეს ძალიან მთვრალიაო, აუტყდნენ ხელი მოაწერეო; მე კი ვანიშნებდი, ნუ, ნუ მოაწერ-მეთქი; მაგრამ აღარა გაეგებოდა რა. იმ დროს მე დამიძახეს, გარედ გამიტყუეს და მანამ მე შინ შევბრუნდებოდი, იმას კიდევ მოეწერა; იერემია ჯიბეში იდებდა ქალაღს, ავდექი და სამშარეულოში გავიყვანე — ...ხელი მოაწერე, ბიჭო? ჰო, მოვაწერეო! — მერე რომ არას მოგცემენ! შვიდ გროშასაც არ მოგცემენ ეგენი; რაზედ დაკარგე შვიდი თუმანი და ორი მანეთი? ეგრე როგორ მოგატყუეს!.. გაბრაზდა, გაცოფდა, ვილა შეიმაგრებდა? შევარდა და იერემიასა სწვდა, დახიე ქალაღით! ამაზედ იერემიამ სიცილი დაიწყო; სიცილი აგრე კი არ უნდაო, მივარდა თქვენი ნიკო, სტაცა საკინძში ხელი... გამშველებელი არავინ იყო, ყველას სეირის ყურება უნდოდა და ეშინოდათ კიდევ, იერემიას მაგივრად ჩვენ არ მოგვხვდესო. დახლიდარმა ყვირილი დაიწყო — მიშველეთო! მე კუნჭულში მიმჭეპყეს და ძვრა აღარსაითა მქონდა. ამ დროს იერემიამ ხმალი იშიშვლა. შენ ხმალი

ამოიღო, სტაცა ნიკომ ჯამს ხელი — სულ ჯამებითა ვსვით იმ ღამეს — და შიგ თავში კი სთხლიშა! ასე გასინჯეთ ჯამიც კი გატყდა, აბა იერემიას რა მოუვიდოდა? გადაითხლაშა იმოდენა კაცი ზედ სუფრაზედ, იმოდენა ჭურჭელი დაამტვრია, გვეგონა სული დალიაო. დახლიდარი კი ისევ ისე — მიშველეთო! გაჰყვიროდა. იმდენი ეყვირა, რომ ქალაქის ასასები შემოვიდნენ დუქანში. მე როგორც იყო სამზარეულოში გაეძვერი და იქიდან გამოვიპარე. ის იყო მოედანზედ გავედი და წინ კი შემხვდნენ ასასები — გაეკავებინათ თქვენი ნიკო, ხელები უკან გაეკრათ და ციხისკენ მიჰყავდათ. თან აუარებელი ხალხი მისდევდა; იძახოდნენ, კაცი მოკლაო. მაგრამ ამასაც კი დიდი მნიშვნელობა აქვს, რომ იერემიამ ხმალი იძრო! ხმალი არ უნდა ამოეღო! მას ყელს ხომ არ მიუშვერდა, მოდი მომკალიო! ყველაფერი იერემიას დაბრალდება და ნიკოს გაამართლებენ. ჯვარზედა და სახარებაზედაც რომ დამაფიცონ, მაშინაც კი ვიტყვი, რომ ეს უბედურება მართო იერემიას ბრალია.

ყელი რომ გამოეჭრათ, სისხლი არავის გამოგვივიდოდა, ისე შეწუხებულნი ვიყავით ყველანი. ყველანი ვტიროდით, დედა, მამა, ბავშვები! განა სატირალი არა გექონდა? ოჯახი დალუპული და ნიკო კაცის მკვლელი!

ქალაქის კარი რომ ღია ჰგულებოდა, მამაჩემი იმ წამსვე გაიჭრებოდა, მაგრამ ღამე კარი ყოველთვის დაკეტილი იყო და დილამდე უნდა მოეთმინა.

ჩვენ ტირილზედ მეზობლებს გამოელვძიათ და გამოგვხედეს; თითქმის ყველანი ამდგარიყვნენ, ჩაეცვათ და სულ ჩვენსა შეიკრიბნენ; იღგა შუა ოთახში ივანე და ყველას ცალცალკე უამბობდა ჩვენ უბედურებას; ჩვენ კი ცხარე ცრემლითა ვტიროდით. ეჰ, რა ცუდია სიღარიბე! ყოველი უბედურება ღარიბ კაცს დაატყდება ხოლმე თავზედ!

თავდაპირველად დედაჩემმა წყევლა დაუწყო ნიკოს, მერე კი, რაკი პირველმა ბრახმა გაუარა, ცრემლი მოერია და მწარედ დასტიროდა თავის შვილის უბედურებას და გაცრუებულ იმედებს.

ის იყო ინათლა და გაემზადა კიდევ მამაჩემი. ქული დიხხურა, ჯოხი აიღო და წასვლა დააპირა. მაგრამ მე შევყენე: ჯერ ადრეა, სად მიხვალ, ყველას ეძინება; სჯობია ნათლიაჩემს მოველაპარაკოთ, იქნება გვირჩიოს რამე, ან თითონაც წამოგვყვეს ქალაქს-მეთქი, — ვუთხარი და დამეთანხმა კიდევ. კარგა ხანი მოვიცადეთ და ხუთი საათი რომ შესრულდა, როცა სამკედლოში მუშაობას იწყებენ, ნათლიაჩემს კარი დაუთქაკუნეთ.

კარი თვითონვე გაგვიღო და განცვიფრებული დარჩა, როცა მამა-

შვილი დაგვინახა. ისე შეწუხებული იყო მამაჩემი, ისეთი ფერი ედო, რომ ყველა შეატყობდა, ამ კაცის თავს რაღაც ამბავი არისო. მე ყველაფერი დაწვრილებით ვუამბე და ვთხოვე, დაგვხმარებოდა რითიმე.

იქნება სხვა დროს ასე არ გაჯავრებულიყო ნათლიაჩემი, მაგრამ დღეს კი საქმეში იმის ძმისწული ერია და ძალიანაც გაჯავრდა. ეხლა რაღა უნდა გიშველოთ? თქვენი ნიკო ისეთი ლოთი ყოფილა, რომ ერთი ჩარეკი ღვინისთვის მგონი სულსაც გაყიდის და ჩემი პატიოსანი ძმისწული კიდევ უარესი! რაღა ეშველება, საქმე გათავებულია? ეხლა სასამართლოს ველარ ასცდება თქვენი ნიკო! და თუ მაინც და მაინც არ დაგიშლიათ, მგონი სუყველას ისა სჯობდეს, რომ თქვენი ნიკო, რაც შეიძლება, საჩქაროდ გაემგზავროს თავის ჯარისკენ; იქნება თავი დაანებონ... რა ბრიყვულად მოტყუებულა! რა ურცხვად ჩაუთრევიათ ის სულელი, ისა!

სრულიად მართალს ამბობდა ნათლიაჩემი, რაღა ეშველებოდა? მაგრამ ისე მწარედ ქვითინებდა მამაჩემი, რომ უცბად სადღესასწაულო ტანისამოსი ჩაიცვა, ახალი ქუდი დაიხურა და უთხრა:

— რა გატირებს, კაცო? ცოცხალს ხომ არ დაიტირებ იმ ბიჭს?! აი, წავიდეთ, ვნახოთ, იქნება კსდევ მოხერხდეს რამე. მე იმედი არა მაქვს რა, მაგრამ, ხომ იცი, ცდა ბედის მონახევრეაო.

ნათლი-ჯალაბს უთხრა, სადილად მელოდეო, სამჭედლოში ვალენტინს ცოტა რამ საქმეები დააბარა და თავდაღუნულები გავემგზავრენით ქალაქისაკენ. გზაში ნათლიაჩემმა რამდენჯერმე წამოიძახა:

— აღარა ეშველება რა! კაცმა თავისი ხელით დაუსვა ჯვარი. მოწმები რომ არ დასწრებოდნენ, კიდევ ჰო! ნეტავი კი ზორბა ბიჭი არ ყოფილიყო და! ემაგრე მოტყუებით მიჰყავთ, თორემ მარტო კენჭით რომ მიჰყავდეთ, სამეფო ჯარი მგონი იმის ნახევარიც არ იყოს, რაც ეხლა არის. თუ ერთი გააბეს, განაღა ხელიდან გაუშვებენ მაგისტანა ლოქოს? ჯარისკაცი სწორედ მაგისტანა უნდა და! რაც ნაკლებადა აქვს ტვინი, იმდენი თავგამოდებით შეებრძოლება მტერს. ან არა და განა ჩემს ძმისწულს ამ დროს სახლში გამოუშვებდნენ, ეშმაკობა რომ არაფერი ყოფილიყო: ალბად დაჰპირდა, გამიშვით, ცოტა ფულიც გამატანეთ და იმისთანა ბიჭებს მოგიყვანთ, უკეთესი აღარ შეიძლებოდესო. აბა ერთ-ორს მაინც ნუ მიუყვანს, მგონი ცემით გახეთქონ! არა, გვიანდაა! ჩვენ იმას ველარას ვუშველით!

ნესტარივითა გვხვდებოდა გულში ყოველი იმისი სიტყვა. მაგრამ რაკი ქალაქში შევედით, ნათლიაჩემს რაღაცა იმედი მოეცა და უფრო მხიარულად გვითხრა:

— ჯერ ერთი საავადმყოფოში მივიდეთ. იქ ერთ მოხუცებულ მოხელეს ვიცნობ იაკობ პელლეტიეს, ის დაგვეხმარება და იერემიას გვაჩვენებს. თუ ის ქალაღი დაგტყუეთ როგორმე, ჩვენი საქმე კარგად არის!

საავადმყოფოსთან მივედით. კარებთან თოფიანი დარაჯი მიდმოდიოდა. ნათლიაჩემმა ზარი ჩამოაწკარუნა და ცოტა ხანს უკან ერთმა მოხუცებულმა ჯარისკაცმა გაგვიღო კარი. ნათლიაჩემი შევიდა, ჩვენ კი გვითხრა — მანდ დამიცადეთო.

დავრჩით გარეთ დაღონებულნი; გაქვავებულსავით ვიდექით და თვალი ველარ მოგვეშორებინა იმ კარებისთვის, საიდანაც ნათლიაჩემი უნდა გამოსულიყო და ჩვენი ხსნა გამოეტანა.

ცოტა ხანს უკან კარები გაგვიღეს და ნათლიაჩემმა ეზოში შეგვიყვანა. ჯერ ეზო გავიარეთ, მერე ერთი ქვეყნის ოდენი ოთახები და კიბეები; ბოლოს, სულ ზევით, ერთ პატარა ოთახში შეგვიყვანეს, რომელშიაც თავგატეხილი იერემია დაეწვინათ. ისე პატარა ტახტზედ დაეწვინათ ავადმყოფი, იმდენი მჩვრები შემოეხვიათ თავზედ, რომ ცხვირზედ და ულვაშებზედღა ვიცანით ჩვენი იერემია.

ჩვენ შესვლაზედ წამოიწია, იდაყვზე დაეყრდნო და გაშტერებული გვსინჯავდა — ეს რა ჯურის ხალხი უნდა იყოსო?

— გამარჯობა, იერემია! — უთხრა ნათლიაჩემმა. ამ დილას გავიგე, რა ხიფათი გადაგხდენია და ძალიანაც მეწყინა.

იერემიამ პასუხი არ გასცა. ან სადღა იყო თავზედ ხელაღებული, თავხედი იერემია? მოკუნტულიყო, მოკრუნჩხულიყო, ძლივსღა კნავოდა.

— დიად, ძალიან მეწყინა, ჩემო იერემია. ღმერთს მადლობა შესწირე, რომ აგრე ადვილად გადარჩი. ძალიან კი გადარჩენილხარ, ღვთისა წინაშე! ექიმმა მითხრა, გაივლის, არა უშავს რა. ოღონდ ერთი ორი კვირა არც ღვინო დაელევა, არც არაყიო!

იერემია მაინც პასუხს არ აძლევდა, ბოლოს აგვხედ-დაგვხედა და გვკითხა:

— თქვენ ჩემთან უსაქმურად არ მოხვიდოდით? სთქვით, რა გინდათ?

— აი. ჩემო იერემია, მე ძალიან მიხარია, რომ ისე ცუდად არა ხარ, როგორც მითხრეს. ეს საწყლები ჩვენი სოფლიდან მოდიან... შენ სანახავად... ეს ნიკოს მამა და ეს იმის ძმაა.

— აჰა! — შეჰყვირა იერემიამ. — ეხლა კი ვიცი, რა გნებავთ ჩემგან! ბატონი ბრძანდებით, აგერ ჯიბეში მაქვს იმისაგან ხელმოწერილი პირობის ქალაღი, აი მიირთვიოთ!... ჰაი თქვე... არა, ვინა გგონივართ? იქნება გგონიათ... არა!.. თავი რომ გამაგდებინონ, მაინც არა-

ვის მივცემ! გეყურებათ, თავი რომ გამაგდებინონ! ის წუპაკი, ისა! ჯამი რომ მთხლიშა თავში! ეგ არის ვაჟკაცობა?! ის მყრალი, ისა! ის ლაჩარი, ისა! აჰ, ნეტავი კი ჯარში ჩემს ასში მოჰყვეს და სხვას ღმერთს ჩემს ღღეში არასა ვთხოვ!.. მე ვუჩვენებ მაშინ სეირსა..

თან კბილებს აკრაჭუნებდა, მუშტს გვიღერებდა, და ცოფსა ყრიდა. მერე უცბად თავზედ საბანი წაიხურა და ზურგი შემოგვაქცია.

— ყური მიგდე, იერემია! — უთხრა ნათლიაჩემმა.

— შენც შეგარცხვინა, შენი ყურის მგდებელიცა!

ამას კი არ მოელოდა ნათლიაჩემი.

— მოიტა პირობის წერილი!

— გასწით, გაეთრიეთ აქედან! — სიბრაზისაგან ძლივსღა ხრიალებდა იერემია. ისე გაბრაზებული იყო, რომ მოსამსახურეებმა გვირჩიეს, თავი დაანებეთ, მოშორდით, ბრაზით არ დაიხრჩოსო. რაღას ვიზამდით, წამოვედით, მაგრამ ვიდრე გამოვიდოდით, ნათლიაჩემმა შიგ ყურში ჩასძახა:

— ავი კაცი მეგონე, ჩემო ძმის წულო, უკანასკნელთაგან უკანასკნელი მეგონე მას აქეთ, რაც საწყალ მამაშენს უკანასკნელი უღელი ხარი და ურემი მოჰპარე და გაუყიდე, რომ შენს გუნებაზედ გეჭეიფნა. ავი კაცი მეგონე, მაგრამ არ მეგონა, რომ აგრე უსინდისო, აგრე წამხლარი და გარყვნილი იქნებოდი. ეხლა სხვა არა მინდა რა, ნეტავი ფეხზედ დგომა შეგეძლოს, რომ ერთი ალიყური სილა გაგკრა.

ისე გაჯავრებული იყო ნათლიაჩემი, რომ მოსამსახურეებმა გაიყვანეს ოთახიდან და კარი მიკეტეს. მორჩა, უკანასკნელი იმედიც გაგვიქრა.

ქუჩაში რომ გამოვედით, ნათლიაჩემმა გვითხრა:

— ხომ ხედავთ, რომ ტყუილადღა ვეწვალებით. თქვენი ნიკო დამწყვდეული ეყოლებათ, ვიდრე სამეფო ჯარის ბინაზედ არ გაისტუმრებენ. დამიჯერეთ, ტყუილად ვკარგავთ დროს. ისევ ჩვენ სახლ-კარს მივეპატრონოთ, ისა სჯობიან. — და უცბად სიცილი წასკდა. იცინოდა და თან იძახდა, — თქვენ რაც გინდათ სთქვიით და ძალიან კი დაუსახიჩრებია ჩემი პატიოსანი ძმისწული! ჰა, ყოჩად ბიჭო! იმისთანა დალი დაუსვამს ზედ შუბლზედ, უკეთესს ცხენსაც ვერ დაასმენ ხოლმე.

ისე გულიანად იცინოდა, რომ ბოლოს ჩვენც წაგვიტყუა და სიცილი დავიწყეთ.

— ყოჩალი ბიჭი კი არის, — ამბობდა მამაჩემი; — ყველაზედ მძლავრი ეგა მყავდა, ეგ უბედური, ეგა! რასაც კი ხელს დაჰკრავდა..

თან იცინოდა, მაგრამ მოაგონდა ცოცხლად დაკარგვა უფროსი შეილისა და თვალს ცრემლი მოერია.

ნათლიაჩვენი შინ წავიდა. ჩვენ კი ციხეში მივედით ნიკოს სა-
ნახავად. ცალკე ოთახში დაემწყვდიათ, ლოგინის მაგივრად ერთი
ზურგი თივა მიეგდოთ.

— რას იზამ, — უთხრა მამაჩემს, — უბედურება ვის არ უწე-
რია; ალბად ჩემი წერაც ეგ იყო; ვიცი, განა არ ვიცი, რომ გროშსაც
ველარ აიღებთ ჩემში, მაგრამ რა ვქნათ, ტირილით ველარას გაა-
წყობ.

არ გვეგონა, რომ ნიკო ისე შეწუხებული დაგვხვდებოდა. ისეთი
მწუხარება ეტყობოდა, ისეთი შენანება, რომ მამას ხმაც აღარ ამოუ-
ლია, გადაეხვია და კოცნა დაუწყო. გამოთხოვებისას სულ კანკალი
დააწყებინა საწყალს და ფერმიხდილმა ისლა გვთხოვა, თუ შეიძლე-
ბა ხვალ ჩემი და-ძმანი მაჩვენეთო.

სამი დღის შემდეგ ჩვენი ნიკო თავის ჯარის ბინაზედ გაისტუმ-
რეს. ისე გაჯავრებული იყო დედაჩემი, რომ თხოვნა არ აუსრულა
და ბავშვები არ აჩვენა. მარტო მე ჩავედი იმ დღეს ქალაქს და ყვე-
ლას მაგივრად მე გამოვეთხოვე. ერთ ურემზედ ისხდნენ ექვსნი იმა-
სავით უჯეროდ, მოტყუებით ჩათრეულნი. დარაჯად ურემს აქეთ-
იქით ოთხი ცხენოსანი ჯარისკაცი მისდევდა.

შორიახლო მივდევდი ურემს და ვუყვიროდი:

— მშვიდობით, ნიკო, მშვიდობით!

ნიკო ქუდს მიქნევდა. თვალი ცრემლით ევსებოდა, რომ იმ სი-
შორეზედ მიდიოდა, მთელი თორმეტი წლით და არც მამასა ხე-
დავდა, რომ გამოთხოვებოდა, არც დედას და არც პატარა და-ძმას.
რა ქნას ლარიბმა კაცმა? იმან რომ აქეთ-იქით იაროს, ქადა-ნაზუქს
ხომ არ ჩამოუყრის ზეციდან ღმერთი? მამაჩემი თავის საქმეს უჯდა,
დედა გაჯავრებული იყო. შემდეგში კიდევ ნანობდა, რომ არ გა-
მოვეთხოვე; ერთხელ კიდევ რატომ არა ვნახეო! რატომ არ შევუნდე,
რად გავაყოლე ჩემი წყევლაო! მაგრამ გვიანდა... ჩვენი ნიკო ქ. ვა-
ლანსიენში იყო სამეფო ჯარისკაცად და კარგა ხანი გავიდა, ვიდრე
იმის ამბავს გავიგებდით რასმე.

VII

ძვირად დაგვიჯდებოდა ნიკოს შეცდომა და კიდევ დიდი ხანი
ვიქნებოდით რობენის ბრჭყალებში, რომ ნათლიაჩემს არ შევცო-
დებოდით და ის არ შეგვწევნოდა: სწორედ იმ საღამოს, როდესაც
ნიკო გაისტუმრეს, დაღონებული დამინახა და მითხრა:

— ნუ სწუხარ, ჩემო მიშელ, ვიცი რობენი ძალიან გაწუხებთ.

მეტი უჯრითი და უღმერთოა ის ოჯახდასაქცევი, ისა! მამაშენი ისეთი ღარიბი კაცია, რომ იმის ვალიდან თავის დღეში ვერ ამოვა და ისევ შენ უნდა გადაიხადო. თუმცა შენი შეგირდობა ჯერ არ გათავებულა, მაგრამ ახლავე დაგინიშნავ პატარა ჯამაგირს; ყოჩალი ბიჭი ხარ და კარგადაც მუშაობ. თვეში მანეთს მოგცემ და შენ იცი როგორც მოიხმარებ.

სიხარულით კინალამ გავვიყდი. ასე გასინჯეთ, ჩემს მაცურებელს ნათლი-ჯალაბს და ნიკოლს ცრემლი მოერიათ. გვიანობამდის მადლობაც კი ველარ მოვახერხებ:

— ნათლიაჩემო, შენ იმისთანა სიკეთე დასდე ჩვენ ოჯახს, რომ მამა არ უზამდა თავის შვილსა.

სწორედ ამ დროს შემოვიდა შოველი თავის პატარა მარგალიტათი:

— ყოჩალ, ივანე! აქამდის ხომ პატივისმცემელი ვიყავ შენი და დღეის იქით ერთიორად შემეყვარდები, — უთხრა შოველმა ნათლიაჩემს და ხელი ჩამოართვა. მერე მხარზედ ხელი დამადო და მითხრა:

— მამაშენმა დამავალა, მიშელ, თქვენი ლიზასთვის ალაგე მეპოვნა რამე. ს. ვასელონში, ტუსენს ნდომებია გოგო და მეც თქვენი ლიზა ვურჩიე. ბინა ექნება, საჭმელ-სასმელი, ერთი წყვილი ფეხსაცმელი და წელიწადში სამი მანეთი ჯამაგირი. თუ კარგად მოიქცა და თავი მოაწონა, შემდეგში კიდევაც მოვამატებინებ. ახლა კი დასაწყისში მეტი საჭირო არ არის.

ვერ წარმოიდგენთ, რა სიხარული იდგა ჩვენ ქოხში, როდესაც ეს ამბები მოვიტანე. ლიზა ხომ სულ ციბრუტივითა ტრიალებდა, რომ შესძლებოდა, იმავე წამსვე ამოიდებდა ილიაში თავის ბოღჩას და გზას გაუდგებოდა; მაგრამ საუბედუროდ არ შეიძლებოდა: კონკების მეტი ლიზას ტანისამოსი არა ჰქონდა რა და იმ კონკებით ხომ ვერ გავისტუმრებდით. დაუარა დედაჩემმა მეზობლებს და ვის რასა სთხოვდა, ვის რასა; შოველმა თავის ჩუსტები მისცა ლიზას, ნიკოლმა კაბა, ნათლი-ჯალაბმა ორი თითქმის ახალი პერანგი, ლეტუმის ქალმა შალი და დედამა და მამამ თავისი ლოცვა-კურთხევა და დარიგება.

მოემზადა ჩვენი ლიზა, ერთი კი გადაგვკოცნა ყველანი და გზას გაუდგა. ისე აირბინა აღმართი, თითქო მოსამსახურე გოგოდ კი არა, ქალბატონად მიბრძანდებო. ჩვენ კი კარებში ვიდექით და შევცქეროდით. აღმართი აიარა, ტყის პირს შეჰყვა, აგერ ხეებსაც მოეფარა და ერთხელ არ მოიხედა უკან...

ჩვენები ტიროდნენ.

ასეა ღარიბი კაცის საქმე. შვილები ჰყავს, ზედ დაჰხარის და

ისინი კი, როგორც კი ტუჩებზედ დედის რძე შეაწრებთ, შორს-შორს მიფრინავენ ლუკმა პურის საშოვრად. მოხუცებულ დედა-მამალა რჩება ობლად მამა-პაპეულ ქოშში.

ამ დღიდან ჩვენმა ვალმაც იკლო. როგორც კი თვე გავიდოდა და ნათლიაჩემი მანეთს მიბოძებდა, მე და მამაჩემი რობენისკენ გავ-წევდით. შვეიდოლით იმ უღმერთოს სახლში, რომელსაც თავის ქსელში ჰყავდა გაბმული მთელი ჩვენი მაზრა, სალამს მივცემდით და იქვე კარებთან ავიტუზებოდით. მთელი ქვეყნის სიმდიდრე იქ ჰქონ-და, იმ ერთ ოთახში; კარი და ფანჯრები სულ რკინის ჩარჩოებით ჰქონდა გამაგრებული; თითონ იქვე კუნჭულში ტახტზედ იჯდა თავის ანგარიშებში გართული; გვერდზედ თავისი ერთადერთი მეგობა-რი და დარაჯი — უზარმაზარი ძაღლი უჯდა.

— ეეჰ, კიდევ თქვენა? რა ძალიან ეშურებით ჩემს ნახვას! ძა-ლას ვინ გატანთ? ვინა გთხოვთ?! ღმერთია მოწამე, მე თქვენ არ გაწუხებთ! გქონდეთ რა; თუ გნებავთ, კიდევაც წაიღეთ. რამდენი გჩნებავთ? ერთი თუმანი? ორი? კაცი თქვენსავით სანდო იყოს, თო-რემ ფულს ვინ დაუჭერს?!

— არა, არა, ბატონო რობენ, — ვეტყვოდი ხოლმე მე, — რადგან მამაჩემი ისე ჰყავდა დაშინებული, რომ ხმასაც არ იღებდა. არა, ბატონო, აი, ეს ჩვენი ფულის სარგებელი და ესეც თავნის გადასა-ხდელად. დააწერეთ, ბატონო. ჩვენს თამასუქს, რომ თავნის ნაწილიც მიიღეთ, დააწერეთ.

რაკი დარწმუნდა — ამათ ველარ გავბტყენი, ხელიდან გამისხლ-ტნენო, პირდაპირ საწერ-კალამს მიმართავდა ხოლმე და თან ბუტ-ბუტებდა:

— მოდი შენა და ამას იქით კაცს სიკეთე უყავი! განა სიკეთეს დაინახავს ვინმე! განა მადლიერი დაგრჩება ვინმე!

თან კი სწერდა, მივიღე ამდენ-ამდენიო. მე ყოველთვის გვერდზე ვუდებო და ჩავყურებდი, თამასუქზედ სწორედ დაწეროს მეთქი. ჩა-ვყურებდი და როგორ ჩავყურებდი! ვიცოდი, რა იუდასთანა მქონდა საქმე და ვფთხილობდი, კიდევაც არა გვიეშმაკოს რა-მეთქი.

მამაჩემი გონს ვერ მოსულიყო: მე ვერ ვუბედავ, ამოდენა კაცი ვარ და ეს ბალღი როგორ მარჯვედ უგებს პასუხსაო! უკვირდა და თანა მლოცავდა: შენ გააძლიეროს, შვილო, ღმერთმა! შენა ხარ ჩვენი მხსნელი, შენა ხარ ჩვენი ოჯახის დედაბოძი, შენა, შვილო, თორემ ჩვენ რის მაქნისნი ვართ? წერა ჩვენ არ ვიცით და კითხვა, პირუ-ტყვივით მუნჯი და უტყვნი ვართ და ვისაც უნდა, ის წამოგვაჯდე-ბა კისერზედ!

მივიდოლით შინ და იქ უმეტესად მაქებდა; მიუბრუნდებოდა

ბავშვებს და შესძახებდა: ჩვენი უფროსი ეს არის, გაიგეთ? ჩვენი უფროსიც ეს არის და ჩვენი ბატონიც, რადგან ყელიდან საბელსა გვხსნის. ამას ცოდნა აქვს!.. წიგნი იცის, წიგნი და ჩვენ კი არა ვიცით რა. ჰოდა, ყოველთვის ამის სიტყვაზედ იყავით; უამისოდ ჩვენ არად ვარგივართ და როგორც უბედურნი ვიყავით, კიდევაც ისე უბედურნი ვიქნებოდით.

ბატონო, უფროსო!.. ეს მეტიმეტი იყო და იმას კი მართალს ამბობდა, რომ წიგნის უცოდინარობა სწორედ რომ პირუტყვადა ჰხდის ადამიანს. რა უნდა ქნას უბედურმა, რობენს რომ ჩაუვარდეს ხელში? უნდა იყოს გაჩუმებული და თავისი ღღენი რობენისთვის მუშაობდეს. ცოცხლად გადაჰყლაპავს ბედშავს რობენი თავის ცოლ-შვილით, მამულ-დედულთ და საქონლით.

წელიწადნახევარი მეტი ვუზიდეთ რობენს ფული, ვიდრე ვალს გადავიხდიდით და თამასუქს უკანვე გამოვიტანდით. რომ ველარა მოგვიხერხა რა, გამოგვიცხადა: სად დავნიშნო, აგრე წვრილ-წვრილად რომ მოგაქვთ? არ მინდა, აღარ მივიღებო!

— ძალიან კარგი, თუ თქვენ არ მიიღებთ, ქალაქს ჩავიტან და თქვენს სახელობაზედ სასამართლოში შევიტან-მეთქი, — ვუპასუხე და უცბად მოლბა და ფულიც მიიღო.

ბოლოს გადავიხადეთ ვალი, თამასუქი გამოვართვით და შინ მივიტანეთ. ფეხზედ აღარ იდგა სიხარულით დედაჩემი. ნეტავი კითხვა ვიცოდე. ჩემი თვალთ დაერწმუნდე, რომ აღარ გვმართებს რა იმ ურიის კერძისაო! თან მეკითხებოდა:

— შეილო, მიშელ... მორჩა? მართლა მორჩა?!

— მორჩა, დედა, მორჩა! ჩვენ იმისი აღარა გვმართებს რა.

— აბა ერთი ეს თამასუქი წამიკითხე, შეილო, შენ გენაცვალოს დედაშენი.

გარს შემომეხვივნენ ყველანი და პირდია ჩასცქეროდნენ თამასუქს.

ბოლოს რომ ჩავედი და წავიკითხე „მივიღე სრულად“, სიხარულისაგან თამაშობა და ხტუნვა დაიწყეს; უცხოს რომ დაენახა ვისმე, ველური ხალხი ეგონებოდა. დედაჩემი ხომ ყველაზედ უარესი იყო.

— გენაცვალეთ, ის შეჩვენებული თხა აღარ გახსოვთ?! კინაღამ დედაბუდიანად კი დაგვლუბა და! რა ძვირად დაგვიჯდა იმისი ყიდვა! უი, ღმერთმა გკითხოს, რობენ, ღმერთმა!..

ცოტა ხანს უკან რობენი ჩვენს სოფელში ყოფილიყო და ჩვენსა მოსულიყო, ფული ხომ არა გნებავთ, მოგართმევთო?.. აელო დედაჩემს ორთითი, გამოსდგომოდა და კუდით ქვა ესროლინებინა:

— ძლივს გავთავისუფლდით და შენ კიდევ გინდა ხელში ჩაგვიგდო! შენ გინდა კიდევ ყმად დაგვისაბლო! შე ქოფაკო, შე...

მირბოდა თურმე რობენი და მისდევდა დედაჩემი. ფიცავდა, ვერ დავეწიე, თორემ რომ დავწეოდი, ცოცხალი არ გადამრჩებოდაო. საშინელებაა! რამდენი ტანჯვა-წვალება და შეურაცხყოფა უნდა მიაყენო ადამიანს, რომ დედინებისათვის დაჩაგრული და დამცირებულიც კი მოთმინებიდან გამოვიდეს, გაშმაგდეს და მოსაკლავად აღარ დაინდოს კაცი! ხალხს მოვალეზედ უარესი მტერი სხვა არავინა ჰყავს. და აკი ისიც არ დაინდობს ხოლმე თავის სისხლისმსმელ მტერსა; და ჯერ მაგალითი არ ყოფილა, რომ ამგვარ წურბელას ან თითონ არ გადახდეს საწყალი ხალხის ცოდვა, ან იმის შვილსა და შვილიშვილსა. კაცს თავის შეცოდება მეცხრე თაობამდე გადახდებაო, ნათქვამია. ჰოდა, ეს კარგად უნდა ახსოვდეთ ამ უღმერთობებს; უნდა ახსოვდეთ, რომ, რაც უნდა დაჩაგრული, მიწასთან გასწორებული და საქონელივით პირუტყვი იყოს ხალხი, უცბად წამოიწევეს ხოლმე, წელში გასწორდება და მატლივით გასრესავს თავის მტრებს! ჩემს სიცოცხლეში ხუთჯერ-ექვსჯერ ვნახე ამის მაგალითი. ხალხმა თავის მოსისხლე მტრების დასჯა მოინდომა და ქვეყნის ჯარმა ვეღარა უშველათ რა. ეს კარგად უნდა ახსოვდეთ! მე კარგ რჩევას ვაძლევ და ვაი იმას, ვინც არ გამოიგონებს და არ ისარგებლებს. მე ჩემს ისტორიას უპირველეს ყოვლისა გლეხკაცთათვისა ვწერ, მაგრამ გლეხკაცებს გარდა სხვასაც ბევრს გამოადგება: კაცი რომ კარგ თესლს გადააყრის თავის ხნულსა, მარტო თავისთვის კი არა ხარობს — კარგ პურს გამოვაცხობო; იმას ის უფრო ახარებს, რომ ქვეყანას კარგ პურს მივაწვდი და მადლიერი დამრჩებაო.

ჩვენს ოჯახში რომ ეს ამბები იყო, სამეფოს ცხოვრებაც ძველებურად მიმდინარეობდა: ვხნავდით, ვთესავდით, ხარჯს ვიხდიდით, ბეგარაზედ დავდიოდით; ბერები მოწყალეებას თხოულობდნენ და თან ქეიფობდნენ, ჯარისკაცები იარაღის ხმარებაში ვარჯიშობდნენ. ვის ახსოვდა ხალხის გაჭირება, ხალხის ენა და ჩვეულება? მეტადრე ისა გვწყინდა, რომ საფრანგეთის სამსახურში მყოფ უცხო ჯარებს, მაგალითად, შვეიცარიელებს, ბრძანებას გერმანულად აძლევდნენ. არა, სისულელე არ არის? ჩვენს ჯარებთან ერთად უნდა ყოფილიყვნენ ისინიც, ჩვენს ჯარებთან ერთად უნდა გამკლავებოდნენ საზოგადო მტერს და ბრძანება კი ჩვენებს ფრანგულად უნდა მიეღოთ და იმათ კი გერმანულად. ჯერ ისევ ბავშვი ვიყავი, რომ ერთი ჩვენებური მოხუცებული ჯარისკაცი მარტენ ერო აძაგებდა ამ წესს და ფიცავდა, პრუსიის ომში დიდი ზიანი მოგვცა ამ ვითომდა უბრალო გარემოებათ. მაგრამ ჩვენს მეფეებს და მებატონეებს ძალიან ეჯავრებოდათ

ხალხის და ჯარის დამეგობრება და სულ იმას ცდილობდნენ, ჯარისთვის ხალხი შეეძქლებინათ; და რადგან იცოდნენ ჯარი — ხალხის შვილიაო, და, მაშასადამე, არც ძალიან სანდო არისო, უცხო ტომის ჯარები ჰყავდათ დაქირავებული — შვეიცარიელები და გერმანელები, რომ უფრო კარგად დამონავებინათ ხალხი. უცხო ტომის ჯარები ჰყავდათ, რადგან ჩვენ არ გვენდობოდნენ; ჩვენ იმათი პატიმრები ვიყავით და დარაჯებად უცხოელი ჯარები გვეხვია.

შემდეგში ვნახავთ, რა საზიზღრად უღალატეს ამ უცხო ტომის ჯარებმა საფრანგეთს, რომლის პურსაცა სჭამდნენ და უფროსთაგან დაწყებული უკანასკნელ ჯარისკაცამდე მტერს მიუღვნენ.

ახლა კი განვაგრძო ჩემი ისტორია.

სალამობით გაზეთებს ვკითხულობდით, ხან მარტონი, ხან შოველიც შეგვესწრებოდა. ნათლიაჩემმა სრული ქეშმარიტებით დაახასიათა მებატონეები, ეპისკოპოსები და თვით დედოფალიც. მართლაც და, მას შემდეგ, რაც ნეკერი დაითხოვეს, სახელმწიფო ხაზინის ზარალი იმათ აღარც კი აგონდებოდა. გაზეთებში იმასლა სწერდნენ, მეფე-დედოფალი თავის ამალით და დიდებულთა თანადასწრებით სანადიროდ წაბრძანდნენო; მეფემ სასეირნოდ წასვლა მოინდომა და დიდი საზოგადოება მიიპატიჟაო; ლხინი, ქეიფი, დროსგატარება, საჩუქრები და პენსიები; ისე ჰფანტავდნენ ფულებს, თითქო ქარისაგან შემოტანილი ბზე არისო. ჩვენ მშვენიერ დედოფალს მარიამ-ანტუანეტას, თავად არტუას და მეფე-დედოფალთან დაახლოვებულ თავადიშვილებს და მოსამსახურე პირებს არც კი აგონდებოდათ სახელმწიფო ხაზინის ზარალი; რა გინდა სულო და გულო, რომ იმათ არა ჰქონოდათ და აბა რა დროს ფულის დაზოგვა იყო?

ნეკერი რაღასაც მიჰქარავდა?! პანღური და პანჩური! ვერ იპოვიდნენ თუ თავის გუნების მინისტრებს?! მინისტრად იმისთანა კაცი დანიშნეს, რომ ანგარიშს ხაზინისას თავის თავსაც არ აძლევდა, არამც თუ სახალხოდ გამოექვეყნებინა.

კითხულობდა ნათლიაჩემი ამ ქეიფების აღწერას, მაგრამ ისე მიეჩვია, რომ ბოლოს დროს აღარც კი ბრაზობდა; ჩაახველებდა, სათვალეებს შუბლზედ გადიგდებდა და იტყოდა:

— აბა ცხოვრება ამასა ჰქვიან აი! ჩვენი კურთხეული მეფე თავის მეძებრებს უფრო კარგად ინახავს, ვიდრე მუშა კაცს თავისი მებატონე. რასაც ჩვენი მეფე თავის ქორ-მეძებრებზედ და მიმინობზედ დახარჯავს, ქვეყანას რომ მოანდომოს, ღარიბი კაცი ძნელი საპოვნია იქნება. მეფის კარს ხომ ათასობით და ათი ათასობით ირევთან დამშეული კეთილშობილნი და გაუწუწუებულ ფინიასავით ელიან ნასუფრალს. იმასაც რაში ენანება ხალხის ფული? ჰყავს თავისთან

და აქედებს! კარგსა სჯამენ და კარგსა სვამენ; კარგი აცეით და კარგი ხურავთ! ყრიან და სძინავთ! ჩვენ კი ოფლში ვიწურებთ... ნეტავი ვისთვის?...

— ნუ ჯავრობ, ივანე, — ეტყოდა ხოლმე ღმრთილი შოველი — კარგი უნდა სვან და კარგი უნდა ჩაიცვან, რამ ვაქრობა არ შედგეს.

— რაო. ვაქრობაო?!

— მაშ არ იცი! თუ გინდა, რომ ნამდვილი ვაქრობა არ შედგეს, ისე უნდა მოაწყო საქმე, რომ ფული იხარჯებოდეს და გლეხების ჯიბეში კი არ ჩადიოდეს. ვაქრობას ფუფუნება შექქმნისო, ამბობენ ჩვენი მინისტრები და რაკი ისინი ამბობენ, ჩვენ რაღა გვეთქმის, ჩვენც უნდა ვერწმუნოთ. ჩვენ უნდა ვინაშე ვთხოვთ და ხარჯი ვაძლიოთ; დიდებულებმა უნდა იქეიფონ და ჩვენი ნაშრომი დასარჯონ!.. იმათ ოქრომკედით ნაკერი ხავერდის ტანისამოსი უნდა ჩაიცვან და ძვირფასი თვალ-მარგალიტით შემკული იარაღი ატარონ. ახლა სახლის მოწყობილობა? ახლა იმათი მოსამსახურეები და მოახლებები? ახლა იმათი ჩაცმა-დახურვა და სამკაულები? ჩვენსაგათ ჭადითა და ლობიოს შეჭამაღლით კი არ იხეთქენ კუჭსა. ისეთ ფულებსა ხარჯავენ, ჩემო ივანე, რომ მე და შენ სიზმარშიც ვერსადა ვნახავთ. ფულებსა ხარჯავენ და ვაქრობაც წინ მიდის, დღითი დღე იზრდება და მატულობს.

— კარგი ერთი და! შენ ხუმრობ და მე კი არა მკითხავ! რამდენი კაცი მოსცდება იმ ოქრომკედის არსებობის ქსოვანედ! რამდენი კაცი მოსცდება იმათ ტანისამოსის კერვანედ! რამდენი კაცი მოსცდება იმათ სამსახურში! ღმერთო, ღმერთო! მერე თითონ რის მაქნისი არიან? ნუთუ მარტო იმიტომ შეგვქმნა ღმერთმა ამოდენა ხალხი, რომ მეზატონეები ვაქეიფოთ?! შეუძლებელია! თუ აგრეა, აღარც გაზეთები მინდა, აღარც ეს გულის სახეთქი აპბები!

მაგრამ ვერ მოითმენდა და სხვა გაზეთში უარესს წააწყდებოდა ხოლმე. ეს წვეულებანიო, ეს წარმოდგენებიო, ეს სიერობაო — „ქალები ქირმანის შალით და კაცები ქულაჯებით!“ ან არა და სხვადასხვა ცერემონიები, რომლებზედაც იმოდენი ფული იხარჯებოდა, რომ სახელმწიფოს ძირს უთხრიდა.

— ნეტა რას გვატყუებდა ნეკერი? — მწარედ იცინოდა შოველი, — საიდან მოიგონა, ხაზინას ფული არა აქვსო? მგონი ჩვენ დღეში არა გვქონია ამდენი! აღარც კი ვიცით, სად შევინახოთ!

და ისეთი ეშმაკური ღმრთილი გადმოგვხედავდა, ისე აენთებოდა პატარა თვალები, რომ შიგ გულში გვცემდა თავის სიტყვებს და ჩვენც გვაბრაზებდა.

ღმერთმან უწყის, ძუნწობით არ მოგვდიოდა, მაგრამ ოთხმოც-

დაცხრამეტი წილი საფრანგეთისა შიმშილისა და სიცივისაგან იყო შეწუხებული და ამ დროს განა ცოდვა არ იყო იმოდენა ფულის ხარჯვა სამკაულებზედ და ქეიფზედ?

შოველისთანა იმედინად კი მაინც არავინ იყო. ისე არ გამოგვეთხოვებოდა, რომ იმედი არ მოეცა:

— ნუ გეშინიანთ! მშვენიერად მიდის საქმე. ჩვენი გადასახადი, სახელმწიფო ხარჯი და სახელმწიფო ხაზინის ზარალი ყოველ წელს მატულობს და მატულობს. მეტი რა გვინდა? რამდენიც მეტი ვალი გვექნება, ცხადია, იმდენი უფრო მდიდარი ვყოფილვართ. ხომ მართალია, ივანე?

— მართალზედ მართალია! — უპასუხებდა ნათლიაჩემი და ქუჩის კარამდე მიაცილებდა.

ვკითხულობდით გაზეთებს, ვკითხულობდით წიგნებს და გულა გვისივდებოდა. ცხადად სჩანდა, რომ მებატონეები ჩვენ აღამიანად არ გვთვლიდნენ და თავიანთ საკუთრებად, საქონელივით პირუტყვ და ყურმოჭრილ ყმად ვუნდოდით. მაგრამ რა შეგვეძლო, ჯარი იმათკენ იყო. გულში ხელს ვიცემდით და ვიძახდით: რა ბედნიერნი არიან მებატონეები! ჩვენ კი... ნეტავი რა შევეცოდეთ უფალს, რომ ასეთი უღელი დაგვადო იმ დალოცვილმა?

აქაო და დედოფალი, თავადი არტუა და სხვა დიდებულნი სულ დროსტარებას და ქეიფს უნდებიან, ჩვენც ასე გვინდაო, იძახდნენ თავადაზნაურნი და სულ უბრალო მიყრუებულ, მთაში გადაკარგულ სოფელში რომ მისულიყავით, იქაც იმასა ნახავდით, რაც ვერსალში მეფის სასახლეში ხდებოდა. კეთილშობილნი ქეიფობდნენ, ხალხი ფავის ბედსა გლოვობდა. გადაჰკრავდნენ მებატონეები და ბერები და გამობრძანდებოდნენ ქუჩაში. ვილას შეეძლო გავლა! ჯერ ჯარისკაცებსაც ცემითა ჰკლავდნენ და გლეხკაცს ხომ... მაგრამ გლეხკაცი რა სახსენებელია? აბა მოხუცებულ ლორან დიუშემენსა ჰკითხეთ, რას ჩადიოდნენ აფიცრები? კარგა ლამაზად შექეიფიანდებოდნენ შამპანიური ღვინით და საცა ლამაზი ქალი მოეწონებოდათ, თავიანთსა მიათრევდნენ: წამობრძანდით, ლხინი გვაქვს, დროს გავატარებთ, ცოტა ხანს ცეკვა გვინდაო; და თუ აუხირდებოდა ვინმე, თავხედი მამა ან ქმარი და ქალს არ გაატანდა, იმდენს მიართყავდნენ, იმდენს, რომ ჰკუთას ასწავლიდნენ.

ვერ წარმოიდგენთ, როგორა გეწყინდა, როგორ გულს გვიკლავდა, მოქეიფე ბატონებს რომ დავინახავდით და იმათთან ერთად მოქალაქეთა ქალებს! მოდიოდნენ ქუჩაში მუსიკით და სიმღერით და მკლავში მკლავგაყრილი მოჰყავდათ ჩვენი ღები—ჩვენსავით გლეხკაცის — ოღონდ შემძლებელი მოქალაქის ქალები! ჩვენი თვალითვე

შეცქეროდით ჩვენს შერცხვენას, მაგრამ რა შეგვექლო? სევდას გულშივე ვიმარხავდით. ქალებს კი უხაროდათ იმათთან ყოფნა: ალბად ეგონათ — კეთილშობილთან დროსტარება კეთილშობილებას შეგვექნოს!

ერთადერთი იმედილა გვექონდა — სახელმწიფო ხაზინის ზარალი. ვისაც კი ცოტაც არის მაინც ეყურებოდა რამე, ყველა გრძნობდა, რომ ამ ზარალს უნდა ემატნა, მეტადრე მის შემდეგ, რაც დედოფალმა და თავადმა არტუამ ხაზინის ზედამხედველად მეფეს კალონი დაანიშნინეს. ოთხი წელიწადი იყო თავის ალაგას და სულ თავბედი გვაწყევლინა! ხაზინაში რომ აღარ იყო რა, იმან სახელმწიფო ვალებს მიმართა! თან ხარჯი მოგვიმატა, მაგრამ ისე ტკბილად შემოგვიძვრა, რომ ვერა გავიგეთ რა: ბრძანება გასცა, ვინც არაყსა ჰყიდის, თუნგზედ აბაზი ხაზინის სასარგებლოდ უნდა გადიხადოსო. რას გავუგებდით ეშმაკობას? ჩვენ გვეგონა ხარჯი სირაჯებს შეაწერესო; საქმით კი სულ სხვა გამოვიდა: უწინ თუნგ არაყს ოთხ აბაზად ვყიდულობდით, ახლა უცბად მანეთად და მეტადაც გახდა. ვისაც დაევა და საჩივარი აქვს რამე, სასამართლოში არზით შემოვიდეს და ყოველ არზაზედ სამი აბაზი გადიხადოსო. ვიფიქრეთ ახია ავ კაცზედ, ეს ხარჯი მაინც დაავიწყებს სასამართლოში თრევასაო; მაგრამ საქმით კი სხვა გამოდგა: ფეხი ვერსად გადავდგივით, რომ ქალაღი, არზა არ ეთხოვნათ და ზედ სამი აბაზი ხარჯი. ვინ მოსთვლის იმის ეშმაკობას? დაწვრილებით რომ მოგიყვებ, შორს წავა. კალონის შემდეგ ავი და უჯრითი მინისტრი სხეაც ბევრი ყოფილა, მაგრამ იმისთანა საზიზღარი კი არც ერთი! მემკვიდრეობასავით დარჩათ იმათ კალონის ხრიკები და რაც უნდა უტვინო და გამოჩერჩებულნი ყოფილიყო მინისტრი, კალონის საშუალებას მიმართავდა ხალხის მოსატყუებლად და დიდად ჰკვიანი კაცის სახელს იხვეჭდა. საკვირველი ქლესა კაცი იყო, ქვეყანა მხოლოდ თავის სასარგებლოდ უნდოდა და სახელმწიფო ხაზინაში ისე ურევდა ხელებს, როგორც საკუთარ ჯიბეში; იჯდა და სჭამდა! თან დიდებულებს აქეიფებდა: მობრძანდით, ბატონო, მიირთვიეთ, მანამ ნდობა გვაქვს და ფულს გვაძლევენ!... ჩვენს შემდეგ ქვა ქვაზედაც ნულარ დებულაო!

ხომ ცარიელი თვალთმაქცობა იყო იმის მინისტრობა და მაინც ყველას ვერ გვატყუებდა. ნათლიაჩემი ისე არ აიღებდა ხელში გაზეთს, რომ ჯავრობა არ დაეწყო:

— ჯავრით გამხეთქავს, ის ფლიდი, ისა! სიცრუისა და სიყალბის მეტი რომ არა გამოსდის რა? ჩვენს ფულს ისე ფლანგავს, თითქო იმის პაპის ნაშოვნნი იყოს და ჩვენი რომ აღარა ჰყოფნის, ვალსა და ვახშს გვადებს კისერზედ! იმოდენა ვალს დაადებს სახელმწიფო ხა-

ზინას, რომ ჩვენ კი არა, იქნება ჩვენი შვილიშვილებმაც ვეღარ გადაიხადონ. იმას რა ენაღვლება? მანამ აძლევენ, აიღებს და როცა გადახდის ვადა მოვა, ადგება და ინგლისში ამოჰყოფს თავს! წადი შენ და სდიე გაპარულ მინისტრს! ვალი კი ჩვენ გაგვიხდება თავში საცმად!

ამ საშინელ ყოფას მთელი ქვეყანა გრძნობდა გარდა მეფისა, დედოფლისა და დიდებულ მებატონეებისა; ისინი ისეთი მადლიერები იყვნენ კალონისა, რომ დღე და ღამ მის დღეგრძელობას ევედრებოდნენ ღმერთს. ან რად იქნებოდნენ უმადურნი? იმათი ვალები კალონმა გადაიხადა სახელმწიფო ხაზინის ფულით და იმისთანა პენსიები და საჩუქრები გაუბოძა, რომ სულ იმის მზესა ჰფიცავდნენ.

სამღვდელოება უფრო ფხიზლად იყო; ის კარგადა ჰგრძნობდა, რომ კალონის თვალთმაქცობა დიდად აზარალებდა სახელმწიფოს. ისე არ დაბრუნდებოდა თავის მგზავრობიდან შოველი, რომ გაზარებული პირდაპირ ჩვენსა არ შემოსულიყო. შემოვიდოდა, სიცილით მოგვესალმებოდა და თავის ალაგს დაიჭერდა, კუნჭულში, ბუხართან:

— ვერ წარმოიდგენ, რა კარგად მიდის საქმე, ივანე! მღვდელს ვეღარსად იპოვი, სულ უბრალო ღარიბ-ღატაკ მღვდელს, რომ უანჯაკ-რუსოს „სავოიარელ მოძღვარს“ არა კითხულობდეს. ლოცვანი არ გამიყიდნია იმდენი, რაც მე დღეს ვოლტერის ნაწერებსა ვყიდი; მერე ვიზედ? სულ მღვდელზედ, მთავარზედ, დიაკვანზედ. უშედევო კი არ გეგონოს ამგვარი წიგნების კითხვა: წარმოიდგინე, ქადაგება დაიწყეს! და იცი რასა ქადაგებენ? გიყვარდეს მოყვასი შენით, ქვრივ-ოხერი და ღარიბი განიკითხეო, საწყალი ხალხი გებრალბოდესო. იქნება არც კი დამიჯერო, ჩვენი მღვდლები ღარიბთათვის ფულს აგროვებენ. საქველმოქმედო საქმეებით არის გატაცებული მთელი ალზას-ლორენი. ერთ მონასტერში ზედამდეგს ტბის გაშრობა დაუწყია: ახალი თევზი არ მინდა, სჯობს გაჭირვებულ ხალხს სამუშაო გავუჩინოო; მეორე მონასტერში გადუწყვეტიათ, წლეულს ღალას ნუ ავიღებთ, ხალხი ძალიან გაჭირებულიაო, და უპატივით კიდეც; ერთგან კიდეც პურს აჭმევენ ღარიბებს — ვინც უნდა მივიდეს და რა დროც უნდა იყოს, მაშინვე სუფრას გაშლიან. ეხლა მიხვდნენ განა თავიანთ დანიშნულებას! მაგრამ სულ არაარობას მაინც ნაგვიანევი სჯობია. მიხვდნენ და უნდათ ერთბაშად გაირიგონ თავიანთი საქმე. ძალიან ეშმაკები კი არიან, ღვთის წინაშე! ყველაზედ უკეთ ბერები ხედავენ, რომ სახელმწიფო გემი ნელ-ნელა იღუპება და ხალხში მეგობრებს იჩენენ, რომ დაღუპვის დროს ხელი გამოგვიწოდოს ვინმემ და სიკვდილს გადაგვარჩინოსო.

იმისთვის რომ გეკითხათ, დღეს-ხვალ უნდა ჩამონგრეულიყო ძველი წესწყობილება! ჩვენ კი ამახედ ფიქრსაც ვერა ვბედავდით. 1784, 1785 და 1786 წლებში ჩვენ შოველს უფრო და უფრო სიმხიარულე ემჩნეოდა, თითქო აგერ ხვალინდელი დღე განთავისუფლებას უქადისო. არწივმა იცის, ზევით აფრინდება ცაში, ძალიან ზევით, რადგან ძალიან შორს შეუძლიან დანახვა და იქიდან უფრო ცხადად და გარკვევით ხედავს ქვეყანას; სწორედ ასე იყო შოველიც: იმისთანა იმედიანად შესცქეროდა მომავალს. თითქო წინასწარმეტყველია და დარწმუნებით იცის ქვეყნის ბედ-იღბალიო.

პატარა მარგალიტა ხომ მართლა მარგალიტი იყო. ისე არ გაივლიდა ჩვენ სამკვედლოსთან, რომ არ გაჩერებულიყო და არ მოვეკითხნეთ; დილა მშვიდობისა, ბატონო ივანე!... ვალენტინს გაუმარჯოს!.. რასა იქ, როგორა ხარ, მიშელ?.. ისეთი ტკბალი ხმით შემოგვძახებდა, ისეთი ტკბილ ღიმილს შემოაშუქებდა, რომ შიგ გულში ჩამრჩებოდა ხოლმე იმისი ნარნარი ხმა.

აბა რას მოვითმენდი? იქვე მივაგდებდი ხოლმე ჩაქუჩს და გარეთ გავვარდებოდი. მივვარდებოდი, მეგონა სულ მთლად უამბობ ჩემი გულის პასუხს-მეთქი და ენა კი ჩამივარდებოდა. ვიდექი ისე მუნჯივით და შევცქეროდი პატარა მარგალიტას. მაგრამ პატარა კა აღარ იყო: წამოიზარდა, დამშვენდა. იმისთანა კონტა კოპწია რამ იყო, რომ... ვუყურებდი და გული მიცვდებოდა: იმოდენა საპალნე ეკიდა იმ პაწაწკინტელა გოგოს, რომ ვაყკაცს გაუჭირდებოდა იმისი ზიღვა. გამომეთხოვებოდა, წავიდოდა; მე კი ვიდექი გაშტერებული, თვალი ვეღარ მომეშორებინა და სულ იმას ვნატრობდი. ნეტავი თან წამიყვანოს და თავის სავაჭრო მე მაზიდვინოს-მეთქი. ბოლოს გონებახედ ნათლიაჩემი მომიყვანდა:

— რა იქენ, ბიჭო?.. მიშელ, ჰა, მიშელ!

— გიახლები, ნათლიაჩემო, გიახლები!

გაეწითლდებოდი, გავფითრდებოდი. შევიდოდი სამკვედლოში და გიყვივით მივვარდებოდი ჩემს ჩაქუჩს.

ახლა კი აღარა მიჭირდა რა: მეც ვალენტინისავით ქარგალი ვიყავი და თვიური ჯამაგირი მქონდა; დედაჩემიც კი მადლიერი იყო თავის ბედისა; ჩემი და ლიზა კარგ ალაგას იყო, მაგრამ შინ მოკითხვის გარდა არას ვზაენიდა; იმისთანა ოჯახში იყო, რომ სუფთად უნდა სცმოდა და მთელ თავის ჯამაგირს ტანისამოსზედ ხარჯავდა. კლოდი მონასტერში იყო მოჯამაგირედ და რასაც იღებდა, თითქმის სულ შინ ჩამოჰქონდა; სტეფანე და მატურინი კალათებს და გალიებსა სწნავდნენ და ქალაქში ჰყიდდნენ. ყველას ძალიან გვიყვარდა ერთმანეთი; რაც უნდა ავი დარი ყოფილიყო, სტეფანე შორს, შორს გამომეგებებოდა, ხელს დამიჭერდა და შემომცინებდა:

— ჩქარა, მიშელ! იცი დღეს რა კალათი დავწანი! ნახე, როგორ მოგეწონოს!

მართლა ძალიან კარგადა სწნავდა. მამაჩემი სულ იმის ქებაში დყო, უფრო ეცდებო:

— საუცხოოვო რამ არის. ამისთანა მშვენიერს მეც ველარ ვახერხებ. დავბერდი, შვილო, რა გაეწყობა!

რამდენჯერმე მოვიწადინე, სტეფანეს სკოლაში ვატარებ მამა ქრისტეფორესთან-მეთქი, მაგრამ შორი გზა მაშინებდა და ისევ შინ ვასწავლიდი წერა-კითხვას. ისე ცდილობდა საწყალი, ისეთი გულით უნდოდა ესწავლა, რომ რაც უნდა დამეგვიანა, ის მაინც მელოდა: მიშელი მოვა და წიგნს მასწავლისო.

მოწყალების სათხოვნელად აღარავინ გადიოდა! ვმუშაობდით და ერთი ლუკმაპური ჩვენცა გვქონდა; ძლივს ჩვენცენაც გადმოიხედა ღმერთმა.

კვირაობით, ლოცვა რომ გამოვიდოდა, შევიყვანდი მამაჩემს სამიკიტნოში და ნახევარ ჩარქქ წითელ ღვინოს მივართმევდი. ღვინოს შეექცევოდა, თან ხალხსა ხედავდა და ქვეყნის ამბები ესმოდა; ხალხსა ხედავდა და თითონაც ხალხში ერევოდა. დედაჩემს თავისი ძველის-ძველი ნატვრა აუუსრულე და ერთი ისეთი თხა ვუყიდე, ჯიქანს მიწაზედ დაათრევდა; საწყალი დედაჩემი! ერთი თხა, ებრაელ შმულისაგან ნაყიდი თხა იყო საჭირო, რომ სრულიად ბედნიერი ყოფილიყო. თვითონ აძოვებდა, თვითონ უვლიდა და ისე უფრთხილდებოდა, როგორც თავის თვალის ჩინს. ერთი სიტყვით, ჩემი მოხუცებულები ისე კმაყოფილნი იყვნენ, რომ მეტის ნატვრაც კი ვერ მოეხერხებინათ და მათი მაყურებელი მეც დიდი ბედნიერი ვიყავ.

საღამოობით, როგორც კი საქმეს გავათავებდით, მე ჩემს წიგნებს ჩაუუჯდებოდი; ნათლიაჩემის წიგნები ჩემს ხელთ იყო და კვირა დღეს, გამოვიდოდა თუ არა წირვა, მე შინ მივეშურებოდი. ჩემი ტოლი ბიჭები ბურთაობდნენ, ქიდაობდნენ, მე კი სულ იმასა ვცდილობდი მალე გამეთავებინა ერთი, რომ მეორე დამეწყო.

1785 წ. დიდი სირცხვილი ჰამა საფრანგეთმა: როანელმა კარდინალმა, სწორედ იმ ღვთისაგან გმობილმა, რომელიც ისე ძალიან ეჯავრებოდა მამა ქრისტეფორეს, მოიწადინა ჩვენი ახალგაზდა დედოფლის მარიამ-ანტუანეტას შეეცდენა ძვირფასი თვალ-მარგალიტით.

როანელმა ერთი სამეფოს დარი სამკაული ანდო ვიღაცა მსახიობ ქალს, დედოფალთან საქმე გამირიგეო. იმ ქალმა დაჰკრა ფეხი და ინგლისში გავიდა: იმოდენა განძიც თან გაიტანა. ეს ამბავი გამოქვეყნდა, დიდით პატარამდე სულ ამაზედლა ლაპარაკობდნენ, მაგ-

რამ როანელს კი ვერა უყვეს რა. ან რას გაუბედადნენ სულიერ მე-
უფეს მთელი ქვეყნისას? სტრასბურგში გაისტუმრეს საცხოვრებ-
ლად, ვითომდა დავსაჯეთო!

— მე ხომ სულ უბრალო გლეხკაცი ვარ, — იძახდა ნათლია-
ჩემი, — და აბა გაბედოს ბერმა ბენედიქტემ ან სხვა ვინმე ბერმა და
ჩემ დედაკაცს აკადროს რამე?! შიგ თავში ვთხლიშავ ჩემს ჩაქუჩს!

მეც ასევე მოვიქცეოდი. ჩვენი მეფე კი დიდად გულკეთილი
ბრძანდებოდა და ამით უფრო მეტად შეარცხვინა დედოფალი. არა,
ისე როგორ დამცირდა დედოფალი, რომ ვიღაცა კარდინალმა იმის
შეცდენა მოიწადინა? ისიც რითი? საჩუქრებით, სამკაულებით! მთელ
ქვეყანას მოედო ეს ამბავი, ამის მეტი სალაპარაკო აღარა გვქონდა
რა. განა ამის შემდეგ კიდევ შეგვრჩებოდა დიდებულთა პატივისცე-
მა? საცა კი პატიოსანი კაცი იყო, ყველანი ზიზღით შეჰყურებდნენ
მებატონეების და ეპისკოპოსების უნამუსო ქცევას, გარყვნილებას
და გახრწნილებას. სახელმწიფო ხაზინის ზარალი აღარც კი გვაგონ-
დებოდა. დაზარალებულ ხაზინას განა კალონი შეავსებდა თავის სი-
ცრუით და ფლიდობით!?

დაზარალებული, თითქმის გაკოტრებული ხაზინა, შერცხვენლი,
სახელგატეხილი დედოფალი; სულით ხორცამდე გარყვნილი თავად-
აზნაურობა და სასულიერო წოდება... ჩვენისთანა ბედნიერი განა იყო
სადმე ერი?

დადგა 1786 წ. სწორედ ახალწლის წინა ღამეს დაბრუნდნენ
შოველი და პატარა მარგალიტა. ლორენიდან მოდიოდნენ. იმათ მოი-
ტანეს ამბავი, რომ მეფეს დიდებულნი მიუწვევია, ვერსალში კრება
აქვს დანიშნული, კრებამ უნდა განიხილოს კალონის ანგარიში და
გამოძებნოს საღსარი სახელმწიფო ვალების გარდასახდელად.

ნათლიაჩემი სიხარულით კინლამ გაგიჟდა:

— ახლა კი გვიშველა ღმერთმა! ჩვენს კეთილ მეფეს შეჰბრა-
ლებია საწყალი ხალხი და დიდებულთაც ხარჯს ადებს!

მაგრამ შოველს ძალიან ეწყინა ეს სიტყვები. ისე ეწყინა, თითქო
ავი ჰკადრეს რამეო; ბოლოს კარგა ხნის სიჩუმის შემდეგ, უბასუხა:

— მეფემ დიდებულთა კრება იმიტომ მოიწვია, რომ სხვა გზა
აღარა ჰქონდა რა. იცი, რამოდენი ვალი ადევს სახელმწიფოს? 1630
მილიონი! იქნება გგონია, ამოდენა ვალი თავდაზნაურებმა და ეპის-
კოპოსებმა გადახადონ ეგ არის, დიად! მაგის იმედი გქონდეთ და
კარგად იქნება თქვენი საქმე! შეიყრებიან და დაადგენენ: ეს ვალი
გლეხკაცს დავაჰდითოთ კისერზედაო! ჩვენი მშვენიერი დედოფალი
და თავადი არტუა? ხომ იცი, რა ამბები ჩაიდინეს?!. ხალხი დაღუ-
პეს, სახელმწიფო ხაზინა გააკოტრეს. თავს ლაფი გადისხეს, საუკუ-

ნოდ შეარცხვინეს ჩვენი მეფეების სახელი, საქვეყნოდ, მოურიღებლად ირუშობდნენ, თითქო ყურადღებასაც არ აქცევენ ერის ძრახვასაო და როცა დადგა დღე განკითხვისა, იმოდენა ვაჟკაცობა და პატიოსნებაც კი ვერ გამოიჩინეს, რომ პასუხისსაგებლად თვითონვე გამოსულიყვნენ: დიდებულნი დაიბარეს — მოდით, სახელმწიფოს თქვენი დახმარება სჭირიაო. მერე ჩვენ?! ჩვენ, უბედურნი, რომ ამოდენა ხარჯს ვიხდით და სარგებლობას კი ვერასა ვხედავთ?! რატომ ჩვენ კი არ დაგვიბარეს?! რატომ ჩვენც არ გვეუბნებიან, სახელმწიფოს თქვენი დახმარება სჭირიაო?! აბა როგორ გვიკადრებენ ჩვენ, წუპაკებს, ტეტიებს! ჩვენ რა სახსნებელნი ვართ?!

როგორ წარმოვიდგენდი, რომ შოველს ასეთი გაბრაზება ეცოდინებოდა. ჩემი თვალით რომ არ მენახა, არც კი დავიჯერებდი. სულ ცოფსა ჰყრიდა; ბრახისაგან ისე თრთოდა, თითქო გაუცივებიაო.

მარგალიტაც იქვე იდგა, დასველებული, გათოშილი. ზურგზედ თავის საწვრილმანო ეკიდათ მამა-შვილს და ზედ კიდევ თითო მტკაველი თოვლი ედოთ. შოველი რომ ისე გაჯავრებული ნახა, უნდოდა დაემშვიდებინა, რაღაცა ეთქვა, მაგრამ იმან ყურიც არ ათხოვა; არც ნათლიაჩემს მოუსმინა პასუხი. მაშინ კი ველარ მოითმინა ნათლიჯალაბმა, თავი დაანება თავის ჯარას და შოველს შეუტია:

— რა ვქნა, რას ჩასციებიხარ მეფეს?! თუკი შეუძლიან რამე, ხალხსაც არ აკლებს თავის წყალობას და რაც არ შეუძლიან, ძალად ხომ ვერ შეაძლებინებთ! თუ არა და მე ნებას არავის მივცემ, ჩემს სახლში უკადრისად მოიხსენოს ან მეფე ან დედოფალი! არავის! უმართებულოდ სიტყვასაც არავის ვათქმევინებ!

ვალენტინი სიხარულით ფეხზე აღარ იდგა:

— ჰე, ვენაცვალე ღმერთსა! ჰე, ძლივს ჯავრი არ ამომყარა! არა, ამისთანა იქნება? აღარც ღმერთი სწამთ, აღარც ღვთის მოადგილე და ღვთისაგან მირონცხებული მეფეები?!

შოველი და მარგალიტა სწრაფად წავიდნენ შინისკენ და ამის შემდეგ ჩვენსა აღარ გაუვლიათ. ჩვენსკენ რომ გაივილიდნენ, მეტადრე სამკვედლოს ახლო რომ მოუნდებოდათ გავლა, თვალს აგვარიღებდნენ. ნათლიაჩემი ძალიან სწუხდა, რადგან მართლა გულით უყვარდა ჩვენი მეწვრილმანე. სწუხდა და ვალენტინს უსაყვედურებდა:

— სულ კი შენი ბრალია! არა, ვინ გეუბნებოდა ბარი ათ შაურადაო! შენ რომ შენებური როხვა არ დაგეწყო, ჩემი საუკეთესო მეგობარი დღეს მე თვალს არ ამარიდებდა. მე შენს თავს იმის ერთი ფრჩხილი მირჩევნია, რადგან იმის ერთ ფრჩხილში უფრო მეტი ტვინია, ვიდრე მაგ გამოტვინებულ გოგრაში!... ერთმანეთს მოვეუსმენ-

დით, ერთმანეთისას გავიგებდით, მოვრიგდებოდით როგორმე. იქნება მართლაც ამბობდა!..

— ჰოდა, მე კიდევ იმას ვამტკიცებ, რომ მართლაც არ ამბობდა, — შეუტია ვალენტინმა, — მე ვამტკიცებ, რომ დიდებულთ ხალხის სიკეთე და ბედნიერება უნდათ და თავისი დღენი მარტო ხალხის კეთილდღეობასა ზრუნავენ და სხვას არაფერს!

გადახედავდა ნათლიაჩემი... სისხლი ყელში მოებჯინებოდა, მაგრამ ჩაბოჭავდა ჩაქუჩს, თითქო ეშინია, თავში არა ვდრეუზოვო და წაიღუდუნებდა:

— რა ვქნა, რომ კარგი ხელოსანი ხარ... თორემ იმისთანა პან-ლურსა გკრავდი, მგონი...

ამ სიტყვებს ისე იტყოდა, ვალენტინს არ გაეგო, თორემ ერთი უბედურება დატრიალდებოდა: ხომ უბრალო ქარგალი იყო და ამისთანა შეურაცხყოფას თავის ოსტატსაც არ მოუთმენდა. იმისთანა ამაყი გულის პატრონი იყო, გაგიკვირდებოდათ, ამ უტვინოს იმოდენი თავმოყვარეობა ვინ მისცაო. ბევრს კი არ აღროვებდა! იმავ დღესვე შეპკრავდა თავის ბარგი-ბარხანას და გასწევდა; საცა იმუშავებდა, ლუკმაპურს ყველგან იშოვიდა. ნათლიაჩემმა ეს კარგად იცოდა და ფთხილობდა: ერთი მეგობარი ხომ დაეკარგე და ახლა ეს მეორეც არ გამექცესო.

ისე გვწყინდა შოველის შემოწყრომა, თითქო გულის საყვარელი მოგვიკვდა ვინმეო. ყველანი დაღონებული ვიყავით და ყველაზედ მეტად ნათლიაჩემი. ბოლოს ერთ დილას შოველი და მარგალიტა ნათლიაჩემმა ჩვენ სამჭედლოსთან დაინახა მიმავალი, გულის თქმას ვეღარ გაუძლო და გზაზედ გადაუდგა:

— კმარა, შოველ! რაც მოხდა, მოხდა! ნუთუ ისევ გაჯავრებული ხარ?!

ერთმანეთს ხელი ჩამოართვეს, თუმცა ქუჩაში რომ არ ყოფილიყვნენ, ნათლიაჩემი გულში ჩაიკრავდა თავის საყვარელ მეგობარს. რამდენიმე დღის შემდეგ შოველი და მარგალიტა ელზასიდან რომ დაბრუნდნენ, ბინდისას ძველებურად ჩვენსა მოვიდნენ და ამის შემდეგ ამ მცირე უსიამოვნებაზედ ხმაც აღარავის ამოუღია.

ეს იმ დროს იყო, როდესაც მთელი სამეფოს დიდებულნი ვერსალში იყვნენ შეკრებილნი და, შოველისა არ იყოს, თავიანთ საქმეებს არიგებდნენ და არა ხალხისას. კრებას მოესმინა კალონის სიტყვა — „სახელმწიფოს იმოდენი ვალი ადევს, რომ ხაზინის ჩვეულებრივი შემოსავლით მის სარგებელსაც ვერ გადაიხდის; ვალის გადახდა მარტო მაშინ შეიძლება, თუ ყველა მაზრაში სამაზრო კრებებს მოვეუწოდებთ, რომ მამულები დავათასოთ და ხარჯი მამულისა კვა-

ლობაზედ გავაწეროთ*. კრებას მოესმინა კალონის წინადადება და ცივი უარი გამოეცხადებინა.

ეს ამბები შოველმა გვიამბო. ნათლიაჩემმა რომ გაიგო, კრებამ უარი განაცხადაო, მწარედ ჩაიციხა და თქვა:

— აი, შეარცხვინათ ღმერთმა! ნეტა რასა ფიქრობენ ის უსინდისონი, ისა?!

შოველი არ ჯავრობდა, თითქო წინაღვე იცოდა, რომ სწორედ ასე უნდა მომხდარიყო ყველაფერიო.

— მაშ არ იცოდი? — უთხრა ნათლიაჩემს. ვინ არის თავის თავის მტერი, რომ თავის მამულს ხარჯი შეაწეროს? აბა ეთქვათ, ახალი რამ ხარჯი შევაწეროთ ხალხსაო; ღვთის წყალობა მქონდეს, მალე გაეთავებინათ საქმე! ასჯერ ჰოს იტყოდნენ და ერთი არა არ წამოსცდებოდათ. თუ არა და დიდებულნი მიუწვევიათ და ეუბნებოდნენ — თქვენს თავს, თქვენს მამულებს თქვენვე ხარჯი უნდა დაადოთო! თუ გიყები არ არიან, თუ ცოტაოდენი პატივისცემა აქვთ თავის თავისა და თავის ჯიბის ყადრი იციან, თავის ღლეში არ დასთანხმდებიან!

ცოტა ხანს უკან ამ კრების განაჩენიც წავიკითხეთ გაზეთში. უნდა გენახათ მაშინ ჩვენი მეწვერილმანე. უხაროდა, უხაროდა, რომ მეტი არ შეიძლება: საქმის მაგივრად ხედავთ რას სჩადიანო?! და მართლაც, აი, რით იწყებოდა განაჩენი: — „მეფის სიტყვის შემდეგ პირველი მინისტრი მიუახლოვდა ტახტს და ვიდრე მივიდოდა, სამჯერ თაყვანი სცა. პირველად, ვიდრე თავის ადგილიდან დაიძროდა, მეორედ რამდენიმე ნაბიჯის შემდეგ და მესამედ, როდესაც ტახტის პირველ საფეხურზედ შედგა. შემდეგ ამისა დაიჩოქა და მუხლმოყრილმა მოისმინა მეფის ბრძანება“.

— მორჩა და მოისვენა! — იცინოდა შოველი, — მეტი რაღა გინდათ? ხედავთ როგორ ზრუნავენ სამეფო საქმეებისთვის! განა მეტი ზრუნვაღა შეიძლება?!

ბოლოს მეფემ კალონიც დაითხოვა და სახელმწიფო ხაზინის მინისტრად დებრიენი დანიშნა, ტულუზელი ეპისკოპოსი. მაშინ კი თვით დიდებულნიც დათანხმდნენ და რამოდენიმე ხარჯიც იტვირთეს, მაგრამ პარიზელებმა კი დიდი უარი გამოაცხადეს, რადგან უფრო კარგად იცოდნენ საქმის ვითარება და კარგადა ხედავდნენ, რომ მეფეებისაგან საქეიფოდ აღებულ ვალებს იმათ ადებდნენ კისერზედ. პარლამენტად შეიყარნენ პარიზელი დიდებულნი და ერთხმად დაადგინეს: ჩვენ ხარჯს ვერას დავიდებთ; ხარჯის დადება მართო საერო კრებას შეუძლიან, მართო საერო კრებასა აქვს უფლება აქამდე უხარჯოს ხარჯი დაადოსო... და საერო კრება მართო დიდე-

ბულთაგან კი არ შესდგებოდა, საერო კრება მთელი ერის წარმომადგენელთაგან უნდა შემდგარიყო; მუშაც უნდა ყოფილიყო, გლეხკაც, მოქალაქეც და თავადაზნაურობაც, რომ ერთხმად და ერთმანეთის თანხმობით დაედგინათ ხარჯის გაღება.

საერო კრება! ელვასავით მოედო მთელ ქვეყანას ეს სიტყვა.

როანელმა ხომ შეარცხვინა დედოფალი, — საქვეყნოდ თავი მოსჭრა და ესლა პარიზის პარლამენტმა მეტი უყო მეფეს და თვით მეფობასაც: პირდაპირ გამოაცხადა, ხარჯის გაწერა მარტო საერო კრებას შეუძლია და რასაც აქამდის ხალხს ხარჯს აწერდით, საერო კრების დაუქითხავად, ეგ უკანონობა იყო, ესე იგი ნამდვილი ქურდობა იყოვო.

აი, როგორ დაიწყო რევოლუცია.

განა ცხადი არ უნდა ყოფილიყო ყველასთვის, რომ დიდებულნი და სამღვდელეობა შეერთებულიყვნენ და იმავე თავითვე მთელი საუკუნეების განმავლობაში ხალხს ატყუებდნენ და ჰყვლევდნენ! ცხადი იყო, რადგან პარიზის პარლამენტი ამბობდა ამას და ამ პარლამენტს შეადგენდნენ მთელი სამეფოს კანომდებლები და უდიდესი მსაჯულნი. თითქო უსინათლონი ვიყავით და უტბად თვალი აგვეხილაო, ისე მივხვდით ყველაფერს. მაშ მწველელ ფურად ვყოლივართ რაღა ჩვენს ბატონებს! მაშ იმათი კეთილდღეობა და სიმდიდრე, იმათი განცხრომა და ფუფუნება ჩვენი ოფლით და სისხლით ყოფილა უკანონოდ შეძენილი! მაშ იმათი დიდებულება სრულიადაც არა ყოფილა რა! და ჩვენზედ მეტი უფლება იმათ კანონისამებრ არა ჰქონიათ რა! მაშ ჩვენზედ დიდი, ჩვენზედ უკეთესი არაფრით ყოფილან და მარტო ცოდნით დაეუჯაბნივართ! მაშ მარტო ჩვენს უცოდნარობაზედ ყოფილა აგებული იმათი დიდებულება!... ამოდენა ხანი გვატყუებდნენ, მღვდლის პირითაც კი იმას ჩავგჩინებდნენ — გლეხიკაცი ღმერთს გაუჩენია ყმად და თავადაზნაური ბატონადაო!

ჰოდა წარმოიდგინეთ, რა გახარებული იქნებოდა შოველი, როდესაც პარიზის პარლამენტის განაჩენს წაიკითხავდა.

— ახლა კი დადგა ჩვენი დრო! — იძახდა გახარებული მეწერილმანე, — ბევრი ცვლილება მოხდება სახელმწიფო წესწყობილებაში! ახლა კი ბოლო მოედება ხალხის უბედურებას! დღეიდან იწყება ახალი ხანა, ხანა სიმართლისა და თავისუფლებისა.

VIII

ელვასავით მოედო პარიზის პარლამენტის განაჩენი მთელს ქვეყანას. სოფელში თუ ქალაქში, ბაზრობას თუ ეკლესიაში სალაპარაკოდ საერო კრებადა გექონდა; გზაში რომ შეხვედროდნენ, ერთი

კი მიესალმებოდნენ — გამარჯობა შენო! და მაშინვე, სულაც რომ უცნობნი ყოფილიყვნენ, საერო კრებაზედ ჩამოაგდებდნენ ლაპარაკს.

— ახალი ხომ არა ისმის რა? ნეტავი გვეღირსება როდისმე საერო კრება?

და მოჰყვებოდნენ! ყველა თავისას ჩიოდა და თავისას იმედოვნებდა. ერთი გაიძახოდა, საბაჟოები აღარსად იქნება და სრულიად თავისუფლად შეგვეძლება ყველგან სიარულიო, მეორე ამბობდა, ბეგარაზედ აღარ გავიყვანენ, საბეგრო საქმე თვით მართებლობამ უნდა იყისროსო; მესამე ამბობდა, სამღვდელოებას და თავადაზნაურთაც ხარჯს ადებენო. დაიწყებდნენ სჯასა, შეჰყვებოდნენ, შეხურდებოდნენ და იქვე სამიკიტნოში შევიდოდნენ სადმე, უფრო ადვილად შევთანხმდებოთო.

— ისიცა კმარა, რაც ხანი გვევლიფეს და გვეკრიჭეს, — გაიძახოდნენ ყველანი, — ჩვენ გვინდა ჩვენი ფულის ანგარიში ვიცოდეთ, იქნება ერთითად მეტს გვახდევინებენ, ვიდრე საქიროა!

ქალები უარესნი იყვნენ!

ჩვენდა საუბედუროდ იმ წელს საშინელი გვალვა დაიჭირა და იმისთანა ავი დრო დადგა, რომ მოხუცებულნი ფიცავდნენ: ჩვენს დღეში არ შევსწრებებივართ ასეთს გაჭირებასაო. ისე გავიდა ნახევარი თიბათვე, მთელი მკათათვე და მარიამობისთვე, რომ წვეთი არსად ჩამოვარდნილა. გახმა და დაიწვა ქვეყანა. ყანები ისე აიბუვა, რომ თივადაც კი ველარ გამოვიყენეთ. მეტი გვალვისაგან დედამიწა დასკდა. კარტოფილიც კი არ მოვიდა... და დაიმშა ქვეყანა. ამოდენა უბედურებას საშინელი ზამთარი მოჰყვა; ისეთი თოვლი დასდო და ისეთი ყინვები დაიჭირა, რომ 1788 წლის ზამთარი ხალხს დღესაც არ დავიწყებია.

ამბობდნენ, პურის სიძვირე იმიტომ ჩამოვარდა, რომ რამდენსამე კაცმა შეისყიდა, რაც კი მთელს საფრანგეთში პური მოვიდაო... კალოზედ ყიდულობდნენ პურს, გაჭირებულ კაცს ნახევარ ფასად ართმევდნენ და გემებით ინგლისში ისტუმრებდნენო; და ახლა, როდესაც შიმშილი ჩამოვარდა, ნელ-ნელა შემოაქვთ ჩვენივე პური და მამასისხლადა ჰყიდიანო. შოველი ამტკიცებდა, ეს ამხანაგობა დიდი ხანია არსებობს და თვით მეფე ლუი XV-ც ურევიაო. ჩვენ არა გვჯეროდა; ან როგორ წარმოვიდგენდით, რომ ჩვენი ღარიბ-ღატაკის და ქვრივ-ობოლის პატრონი მეფე ამხანაგად მიუდგებოდა იმ იუდეებს, რომელნიც ხალხის დამშევას განიძრახავდნენ! მაგრამ შემდეგში დავრწმუნდით, რომ შოველი მართალს ამბობდა.

ჩვენ ხალხს თავის დღეში არსად გამოუვლია ის ტანჯვა, რომე-

ლიც 1788 — 1789 წლის ზამთარში ნახა. თვით 1817-შიაც კი არ ყოფილა ისეთი სიძვირე, როგორიც იმ ზამთარს იყო. ისე დაიმშა ქვეყანა, რომ იასაულებით სახლში გვიცვივდებოდნენ და ექებდნენ, ეგება სადმე დამალული პური ვიპოვოთ, რომ ბაზარში გავატანიოთ! საბჭელში, ძარში, მარანში, ქვევრებშიაც კი პურს დაეძებდნენ.

მე რომ ჯამბაგირი არა მქონოდა და კლოდს თავისი ფული სულ შინ არ ეგზავნა, სრულიად უნუგემოდ დარჩებოდნენ ჩემი მოხუცებული დედ-მამა და ნორჩი და-ძმა. ხალხი ათასობით იხოცებოდა შიმშილისაგან. წარმოიდგინეთ, რა ქრისტეს ტირილი იქნებოდა პარიზში! ლუკმა პური თურმე თავის წონა ოქროდ იყიდებოდა! მიუხედავად ამისა, თუმცა ქვეყანას იმოდენა ვაიეაგლახი დაატყდა, საერო კრება არავის ავიწყდებოდა. ან როგორ დაგვაიწყდებოდა? რამდენიც ხანი გადიოდა და ჩვენი უბედურება მატულობდა, იმდენი მეტი იმედით და მოუთმენლად მოველოდით საერო კრების მოწოდებას. ჩვენი ფული რომ ისე ცუდდებოდა, არ მიეფლანგათ, დღეს არც ამ უკიდურეს მდგომარეობაში ვიქნებოდითო, გაიძახოდა ხალხი. აქეთ-იქით მუქარა ისმოდა: გეყოთ, გეყოთ, რაც ჭამეთ! ახლა კი ფრთხილად, თორემ გლუხკაცის მოთმინებასაც საზღვარი აქვსო! ჩვენ თქვენი კალონები და ბრიენები არ გვინდა! ჩვენ იმისთანა მინისტრები გვინდა, რომ ხალხისთვისა ზრუნავდნენ, როგორც ნეკერი და ტიურგო!

და იმ საშინელ ზამთარში, იმ საშინელ ყინვაში, როდესაც ქვევრებში ღვინო და არაყი იყინებოდა, შოველი და მარგალიტა ისევ ისე დაუსვენებლივ დაიარებოდნენ ზღვას-ლორენში და სავაქროსა და წიგნებს ატარებდნენ. თავით ფენამდე ტყავში იყვნენ გახვეულები, მაგრამ იმისთანა სიცივე იყო, რომ ძალს არავინ გაუშვებდა გარეთ, და ისინი კი მიდიოდნენ თავიანთ კალათებით, თითქო სიცივეს არც კი გრძნობენო. დიდძალ პატარ-პატარა წიგნებსა ჰყიდდნენ, რომლებიც პარიზიდან მოსდიოდათ. ხშირად, როცა შინ იყვნენ, ჩვენც შემოგვიტანდნენ ახალ წიგნებს; მივუსხდებოდით გაჩაღებულ ბუხარს და დავიწყებდით კითხვას. დღესაც შენახული მაქვს მამინდელი წიგნაკები. რომ ნახოთ, გაიკვირებთ: ნუ თუ ასეთი მართალი და საფუძვლიანი აზრები ტრიალებდა ხალხში რევოლუციის წინადაო! ქვეყანა გამოფხიზლდა, ღრმა ძილიდან გამოერკვა! ყველას მოსწყინდა იმოდენა სიცრუე და სიყალბე, გარდა თავადაზნაურობისა და იმათგან შესყიდული ჯარისა. რაც უნდა წიგნაკი აგელო, ყველგან ერთი და იგივე აზრი იყო გატარებულ: ქვეყანა მუშაკაცი-საა და არა მუქთახორა მებატონეებისაო! რაც უნდა წიგნაკი წაგეკითხა, ყველგან ერთსა და იმავე დასკვნას მიადგებოდი. ათი წილი

საფრანგეთისა სწორედ იმავე თვალთ უყურებდა სასახლეს. მინისტრებს და სამღვდლოებს, რა თვალთაც ჩვენ უყურებდით.

მაგრამ ამ დროს ჩვენს ოჯახში ერთი ჩემთვის ძალიან საწყენი ამბავი მოხდა. მით უფრო საწყენი, რომ ჩემდა უნებურად დამარწმუნა, რომ ერთი ხიდან ბარიც გამოვა და ნიჩაბიცაო.

ქრისტიანობისთვის შუა რიცხვები იყო; ქალაქიდან მომავალმა მეზობელმა შეგვატყობინა, დღეს ბაზრობას ფოსტის მოხელე გამოვიდა და ხალხს დაუძახა: — ფოსტაში წერილებია დარჩენილი და შეატყობინეთ, თუ პატრონს იცნობთ, მოიკითხოთ. სხვათა შორის თქვენი გვარიცა სთქვა, პეტრეს სახელობაზედ ქალაქში წერილი მოსულა და ამოიტანეთ.

დღევანდელი წესები კი არ იყო მაშინ, ეხლა რომ სახლში მოგვართმევინ ხოლმე წერილებს! ბატონი ბენე — ფოსტის უფროსი, გამოვიდოდა ბაზრობა დღეს მოედანზედ და შესძახებდა: — ხალხო, აქ ლუტცელბურგელი ხომ არავინ არის? წერილია, იქნება აუტანოთ! ჰალტენჰაუზელი ხომ არავინ არის?

— მე გახლავარ!

— თუ შეიძლება, ეს წერილი წაუღე, აგერ ექვსი კვირაა ფოსტაში გდია და არავის მოუკითხია.

მისცემდა წერილს და მერე კი აღარა ენაღვლებოდა რა, მიუვიდოდა თავის პატრონს თუ არა.

ჩვენ რომ შეგვატყობინა მეზობელმა, განა არა, მინდოდა წამომელო, მაგრამ ერთი აბაზი მთხოვა და ფული არა მქონდაო; და რომ მქონოდა კიდევ, რა ვიცო, იქნებ თქვენ არც კი მიგელოთო...

მოდი შენა და ამისთანა გაჭირებაში აბაზი გადიხადე ერთ უბრალო წერილში! ვიფიქრე, ეგდოს, არ ამოვიტან-მეთქი, მაგრამ დედა და მეტადრე მამაჩემმა აღარ მომისვენეს: ჩვენი ნიკოსაგან იქნება, ამოიტანე, შვილო, იქნება რას იწერებო. ისე უნდოდათ ნიკოს ამბავი გაეგოთ, რომ იძახდნენ, ოღონდ წერილი ამოიტანე და ორი კვირა პურს არა ვჭამოთ.

რაღა მეთქმოდა, ავდექი და წავედი. წერილი მართლა ნიკოსაგან იყო. მოუთმენლად თურმე მელოდნენ ჩვენები, ამოვიდეს, წაგვიკითხოსო. ისე გაუხარდათ წერილის მიღება, თითქო ნიკოსა ხედავდნენო. ვკითხულობდი და დედაჩემს შევცქეროდი, ყურს მიგდებდა და თან დაპაღუპით სდიოდა ცრემლი. წერილი ქრისტიანობის პირველს იყო დაწერილი... მინისტრი ბრიენი დაითხოვეს და ოცი ათასი თუმანი პენსია მისცეს, გამოცხადებული იყო საერო კრება 1789 წ. პირველ მაისს უნდა მოხდესო. სახელმწიფო ხაზინის მინისტრად ისევ ნეკერი დანიშნეს, მაგრამ ნიკო ამ ამბებს ყურადღებასაც არ

აქცევდა, თითქო იმის სამშობლოს კი არა, სულ სხვა უცხო ქვეყანას შეეხებოდა. ის სულ სხვას იწერებოდა... მაგრამ სჯობს თვით წერილი წაიკითხოთ და თქვენი თვალითა ნახოთ, რასა ფიქრობდა ჯარისკაცი იმ დროს, როდესაც მიწასთან გასწორებული ქვეყანა აღდგომას შენატროდა. განა გასამტყუნარია საწყალი ნიკო! სხვა თავის ამხანაგებზედ ის არც უკეთესი იყო, არც უარესი, სრულიად უსწავლელი კაცი იყო და საქმეებს ისე უყურებდა, თითქო ადამიანი კი არა, ტყის ნადირიყო. გარდა ამისა თითონ წერა არ იცოდა, და იქნება სულ იმან ჩაუმატა ის საზიზღარი სიტყვები, ვისაც წერილი დააწერინა.

აი, თვით წერილიც:

სახელთა მამისათა და ძიხათა და ხულისა წმიდისათა.

პეტრე ბასტიენს და ეკატერინეს იმის მეუღლეს
სამეფო ჯარის მესამე რაზმის ათისტავი ნიკოლოზ ბასტიენი.

პარიზიდან.

საყვარელო დედავ და მამავ! საყვარელო და-ძმანო!

იმედი მაქვს ჯერ ცოცხალნი ხართ, რადგან ამ ოთხ წელიწად ნახევარში დიდი პატარამდე ხომ ვერ ამოწყდებოდით. მე ძალიან კარგად გახლავართ. მართალია, ჯერ ისე არ დამსქელებია კისერი, როგორც ფალსბურგელ ყასაბს, მაგრამ, კვენანაში კი არ ჩამომართვით, ვაჟკაცობით იმასაც არ დაეუფარდები; მაღა მგლისა მაქვს და სხვა კიდევ უკეთესი. უმთავრესი ის არის, კაცს მაღა ჰქონდეს.

საყვარელო დედავ და მამავ, ეხლა რომ მნახოთ სადმე ჩემი ცხენით, ჩემი ბუზმენტიანი ქუდით და სამხედრო სალამის მისაცემად ამოღებული ხმალით... ან არა და სალამო ხანს ბულვარზედ სადმე მოსეირნე რომელიმე ნაცნობ ქალით მკლავი მკლავში გაყრილი, გაკვირვებული დარჩებით, რადგან თქვენს დღეში არ დაიჯერებთ, რომ მე თქვენი შვილი ვარ. რომ მოვინდომო, როგორც სხვები შერებიან და კეთილშობილი ვარ-მეთქი — ვთქვა, ყველგან დამიჯერებენ, მაგრამ თქვენ კარგად იცით, რომ მე ამას არ ვიკადრებ, რადგან მე არ მინდა თქვენი ჭალარა თმის შერცხვენა, რომლისაც დიდი პატივისმცემელი ვარ უკუნითი უკუნისამდე. ისიც გეცოდინებათ, რომ პირველ წელს უფროსი ათისტავი იერემია ძალიან მღვენიდა, საქმე გამიჭირა, ჯამით თავი რად დამისახიჩრეო! მღვენიდა, სიცოცხლეს მიმწარებდა, დალი რად დამასვიო, მაგრამ მეც დღეს ათისტავი ვარ და მალე იმისი სწორიც ვიქნები. სამხედრო სალამის მეტი მე იმისი არა მმართვებს რა. ერთი დღეც იქნება, ერთმანეთს შეეხვდებით სადმე და მაშინ კი მიფრთხილდეს! არ დაგიმალავთ და მოგახსენებთ,

რომ ჩვენს ჯარში იარაღის ხმარებაში მე ბევრი არავინა მჯობია და ჯერ ერთი წლის შესული არც კი ვიყავ, რომ ნოაილში ორი კაცი დავეჭერი. ესლა კი ლაფუქერის, ლოზუნის და ბუკეს გარდა ჩვენს ჯარში მრუდედ ვერავინ შემომხედავს. საქმე ის არის, კაცს თვალმა და მკლავმა არ უმტყუნოს! და თვალი და მკლავი ხომ ღვთისაგან არის მონიჭებულნი: ზოგს მისცემს და ზოგს არა! სხვა ჯარებიდანაც კი მოდიან ჩემთან საბრძოლველად. მკათათვის პირველს. ჯერ ისევ ვალანსიენში ვიდექით, ჩვენი რაზმის აფიცრები დანაძლევებოდნენ კონტრს რაზმის აფიცრებს: თითო ბიჭი გამოვიყვანოთ, ვნახოთ, ვინ აჯობებსო! ერთი ბიჭი ჰყავდათ, ძალიან ყოჩალი და იარაღში ძალიან განთქმული. ჯავრი მჭირდა იმისი, რადგან სულ იმას დამცინოდა — ალზასელოვო! მწყინდა. სანაძლეო რომ გავიგე, ავდექი და ორი კაცი გავუგზავნე — თუ ბიჭი ხარ, გამობრძანდი-მეთქი. საქმე გარიგდა და მეორე დღეს ბაღში შევხვდით ერთმანეთს. გიყვიეთ მომპარდა! ისე ხტოდა, როგორც ვეფხი! მაგრამ მესამე ნახტომზედ ისე მარჯვედ ვატაკე ხმალი შიგ მარჯვენა ტუტუს თავში, რომ აღარც კი ამოუსუნთქია. ორი დღე და ღამე დამწყვდეული ვიყავი, რაღა გაქვს აგრე უბედური ხელიო! მაგრამ ჩვენმა მაიორმა თავის სუფრიდან გამომიგზავნა ერთი კალათი სულ საუცხოო საქმელ-სასმელი. მამ! სანაძლეო მოვაგებინე და არ მაქეიფებდნენ? მას შემდეგ ძალიან პატავსა მცემენ ჩემი უფროსები. ჰოდა რომ იცოდეთ, რა ამბები ხდება აქ, რომ იცოდეთ, რა ცუდად იქცევიან აქაური მოქალაქენი და როგორა ცდილობენ აჯანყებას, მეტადრე ხელოსნები და მუშები, რასაკვირველია, მიხვდებით, რა ადვილად შემიძლია თავი ვისახელო და საგმირო საქმეები ჩავიდინო. მარიამობისთვის 27 იყო. ისეთი აჯანყება მოხდა ქალაქში, მეტი არ შეიძლება. ახალ ხიღზედ შეგროვილიყვნენ აჯანყებულები. შედედებული მაწონივით იძვროდა ხალხი. დაკათ მაგ წუბაკებსაო! გვიბრძანეს და ღვთის წყალობა გაქვთ, მე იმ დღეს ჩემს ცხენს ხალხი ვასრესინე! მას აქეთ ისე დღე არ გაივლის, რომ ხან აქ არ იყვნენ აჯანყებულები და ხან იქ; მოსვენება აღარა გვაქვს! ისე ვცემთ, ისე ვჟლეტავთ, რე ვმუსრავთ, რომ ან სულ ამოვჟლეტავთ, ან არა და ჭკუას ვასწავლით! მეორე დღეს ახალ ხიღზედ სულ კერეხივით ეყარნენ დაჭრილ-დახოცილები. ნეტავი გენახათ! ვერ წარმოიდგენთ, რა კარგი სანახავი იყო იმოდენა მუცელ გამოღადრული ლეში! მე მხარმარჯვენივ ვიყავი მეორე რიგში და ცოცხალი არავინ გადაპრჩენია! სამართებელივითა პარსავდა ჩემი ხმალი! ჩვენი უფროსი რეინახს ფიცავდა, დღეს ისეთნაირად მივარტყით, რომ აჯანყებას თავის დღეში ველარ გაბედავენო. მე კი არ ვიცი! არა, ძალიან თავს გავიღნენ და ვილაცა მყრა-

ლი მუშები, ხელოსნები, გლეხები და ხედავთ რაებს სჩადიან? ჰო-
და მოხვდათ! დისციპლინამ იცის და! ბრძანება გამოვიდა?! უნდა
აილო იარაღი და წახვიდე! გიბრძანეს, ესროლეო!? უნდა ესრო-
ლო, თუნდა კიდევ იცოდე, რომ შენი ხელით გულის საყვარელ
დედ-მამას ან და-ძმას დახოცავ! ისე უნდა გადაიარო ზედა, ისე უნ-
და გადაქელო, ვითომ პატივზედ გადაგირბენია! ჩემდა საუბედუ-
როდ წერა-კითხვა არ ვიცი, თორემ ძალიან წინ წავიდოდი. მაგრამ
ნურც ამისთვის შესწუხდებით: წერა-კითხვას კი არა, რა ვიცი რას
არ ვისწავლი, ოღონდ იერემიას არაფერში ჩამოვრჩე და იმის ჯავ-
რი ამოვიყარო! ერთი ყმაწვილი კაცი გვირეგია ჯარში, დიდი გვა-
რის შვილია და წიგნი კარგად იცის; ის ანბანს მასწავლის, მე იარა-
ღის ხმარებას; ჰოდა შიგ ძირში მომჭვრით ნახევარი უღვაში, თუ
წიგნიც არ ვისწავლო! ამ ცოტა ხანში რომ ჩემს წერილს მიიღებთ,
ჩემი ხელით დავწერ, და მანამ კი ბევრს გაკოცებთ და ღმერთსა
ვთხოვ სრულიად მოგანიჭოთ, რაც კი გინატრიათ რამე ამ წუთი
სოფელშიაც და საიქიოსაც.

+

თქვენი ნიკოლოზ ბასტიენი

ათისთავი სამეფო ჯარის მესამე რაზმისა

1 ქრისტიშობისთვის 1788 წ.

საწყალი ნიკო! ბრძოლაზედ და კაცისკვლაზედ უკეთესი იმისთვის
ქვეყანაზედ სხვა არა არსებობდა რა. მისი უფროსები ისე უყურებ-
დნენ, თითქო ყოჩია და მარტო საჭიდაოდა ჰყავთო. აქებდნენ, აქე-
ზებდნენ და იმასაც ეგონა, ადამიანის უმთავრესი დანიშნულება
ადამიანისავე კვლა არისო. როგორ გამემტყუნებინა? რომ არ იყო-
და, საწყალმა, რას სჩადიოდა? მაგრამ მრცხვენოდა, ეს წერილი
შოველს და ნათლიაჩემს როგორ წავაკითხო მეტქი. დედაჩემი კი აღ-
ტაცებაში მოიყვანა ნიკოს წერილმა და მეტი ნეტარებისაგან ღმერთს
მადლობას სწირავდა.

— მე კი არ ვიცოდი, რომ ჩემი ნიკო წინ წავიდოდა. ენაცვა-
ლოს დედა, დღეს-ხვალ აფიცრობასაც მიიღებს. თუკი ათისთავობა
მიუღია! ნეტავი იმასა, ვინც გარედ გავა და ხალხში გაერევა. იმი-
ტომა ვართ ასე ღარიბ-ღატაკნი, რომ ვყრივართ ჩვენს სოროში,
თითქო მხეცები ვიყვეთ. ნეტავი იმასა! ნახავთ, თუ აფიცრობა არ
მიიღოს და კეთილშობილობა არ დაიმტკიცოს, აი ნახეთ!

ნიკოს ამბავმა მამაჩემიც ძალიან ასიამოვნა, მაგრამ შეაწუხა
კიდევ: რა არის. იარაღისა და ბრძოლის მეტს არას იწერება! დღეს
იმან აჯობა, ხვალ რომ სხვამ აჯობოსო? ღმერთმა კი დაიფაროს,
და იმასაც რომ ატაკონ მარჯვენა ძუძუს თავში? ჩვენ კი ჩვენი და-

გვემართება და! ღმერთი არ არის? განა იმ უბედურს. ნიკოს რომ მოუქლავს, ან დედა არ ეყოლებოდა, ან მამა, ან ცოლ-შვილი?!

— ნეტავი კი შენ არ მოჰყვებოდე ხოლმე და! — შეუტია დედაჩემმა, წამოავლო წერილს ხელი და დაუარა მეზობლებს:

— ჩემი ნიკოს წერილი, გენაცვალებ! ათისთავობა მიუტიათ! ისე თურმე ხმარობს იარაღს, რომ თავადაზნაურნი ებარებიან შეგირდად. იცით რამდენი კაცი მოუქლავს! დედ-მამას და ძმას არ დაეინდობ, თუ მრუდედ შემომხედაო!

მთელი სამი დღე ატარა ასე ნიკოს წერილი და მერე, როცა ყველას ახარა თავის ბედნიერება, ისევ მე მომცა. ნათლიაჩემსაც გაეგო, ნიკოსაგან წიგნი მიუღიათო და მკითხა, რას იწერებო? რა გაეწყობოდა, უნდა ამოველო და წამეკითხნა. საღამო ხანი იყო. შოველი და მარგალიტაც იქ იყვნენ. როგორც იყო, გავათავე, წაიკითხე. ყველანი გაჩუმებულნი იყვნენ, მე კი ოფლში ვიწურებოდი. მრცხვენოდა, მრცხვენოდა, რომ იმ დროს იქ ყოფნას, ჯოჯოხეთში ყოფნა მერჩივნა. ბოლოს ნათლიაჩემმა თქვა:

— უბედურება არ არის, პატიოსან ოჯახში ამისთანა მხეცი გამოერიოს? უბედურს კაცის კვლის მეტი კი აღარა აგონდება რა და! დედ-მამას არ დაეინდობ. და-ძმას დაეხოცავ, თუ მიბრძანესო! დისციპლინა ეს არისო! მოდი შენა და ნუ იტყვი, რომ დისციპლინა აღამიანის გამამხეცებელი ყოფილა!

— მაგისი რა მოგახსენო, — მიუგო შოველმა, და ეს კი ვიცი, რომ ძალიან საინტერესო ამბებს იწერება; პარიზში ხალხი აჯანყებულა, იქამდის მისულა საქმე, რომ ხალხის წინააღმდეგ ჯარები გაუყვანიათ, ხალხი უხოცნიათ და ჩვენ კი არა ვიცოდით რა! ვაზეთებშიაც რომ არასა სწერენ! განა არა, ამას წინად, ამბობდნენ დიდძალი ჯარები გაისტუმრეს გრენობლსა, ბორდოს და ტულუზისაკენაო, მაგრამ მიზეზი კი არავინ იცოდა. ეხლა კი ცხადია: ალბად იქაც ეშინიანთ ხალხის აჯანყებისა. რა კარგი ნიშნებია, რომ იცოდეთ! რა კარგი ნიშნებია! განა ვერა ხედავთ, რომ საშინელი ძალით მოედო ქვეყანას განთავისუფლების სურვილი და მის შეყენებას და შეფერხებას ჯარებით და ზარბაზნებით ველარ მოახერხებენ?! პარიზში რომ ხალხი არ აჯანყებულაო და ჯარს არ გამკლავებოდა, არც დებრიენს დაითხოვდნენ, არც საერო კრებას დანიშნავდნენ. საშინი ბრძოლა და ჯარი კი არ არის, ან არა და რა შეუძლიან ჯარს, როდესაც მთელი ერი ერთი წადილით არის გატაცებული? ოღონდ ხალხმა გულთ მოინდომოს რამე, ოღონდ ხალხში თანხმობა იყოს და იმაზედ მძლავრი აღარა არის რა! ქარი არ აათამაშებს ისე ადვილად ჰაერში ბუმბულს, როგორც ხალხი აიცილის თავის გზიდან ყვე-

ლას, ვინც კი მის წინააღმდეგობას გაჰბედავს... მერწმუნეთ, კარგი ამბავი მოგვიტანა მაგ წერილმა... ღროა საქმეს შევედგეთ! ღროა ამორჩევისათვის შევემზადნეთ. უნდა ვეცადნეთ, რომ სიმართლისა და თავისუფლებისათვის ამართოს ხალხმა თავისი დროა.

დიდად ნასიამოვნები იყო შოველი და იმ საღამოს ბევრი ილაპარაკა; ისეთ იმედიანად შეჰყურებდა ხვალინდელ დღეს, თითქო დარწმუნებულია, რომ ხალხის ხსნა საერო კრებაზედ არის დამოკიდებული. ხალხიც შოველსავით იმედიანად შეჰყურებდა მომავალს. დამშეულიც ვიყავით, ზამთარისაგანაც შეწუხებული, მაგრამ არც კი ვიმჩნევდით. ჰაერში ახალი რაღაც ტრიალებდა და ისე გვაერთებდა, ისე გვაკავშირებდა გლეხკაცს, ხელოსანს და მოქალაქეს, რომ ჩვენი ერთობა ჩვენვე გვიკვირდა. ტყუილად კი არ ამბობდა შოველი, დიდი ამბები მოხდებაო. ყველანი ვგრძნობდით, რომ დიდი ამბები უნდა მომხდარიყო, ყველანი ვგრძნობდით, რომ ჩვენი ბედ-იღბალი ჩვენ ხელთ იყო და ეს გრძნობა ერთიასად გვიმატებდა ძალას და მხნეობას. ახალი ცხოვრება იწყებოდა და სულ უკანასკნელი, მშვიერ-მწყურვალნი და თითქმის ტიტველი ღარიბ-ღატაკიც კი ისე ამაყად შეჰყურებდა ცას, თითქო გუშინდელი ქედმოხრილი ყმა კი არა, იმავე თაობითვე თავისუფალი კაცი ყოფილიყო.

IX

გაზაფხულდა. პური კი არა, ქატოც აღარსად მოიპოვებოდა, მაგრამ ქვითკირივით გავუმავრდით ამ უბედურებას და მომავალითღა ვცოცხლობდით. ისე დაიმშა ჩვენი მთა, ისე დაიმშა, რომ აღამიანის ნაცვლად, ჩონჩხებიღა დაიარებოდნენ. თოვლ ქვევიდან, მიწაში ფესვებსა სთხრიდნენ და იმასა სჭამდნენ. ღობის ძირას შარშანდელ გამხმარ კინჭარს ეძებდნენ და იმასა ხარშავდნენ. საშინელება იყო ჩვენი მდგომარეობა, მაგრამ გაზაფხულიც მოიპარებოდა ნელ-ნელა.

ბერები ველარა ბედავდნენ მოწყალების თხოვნას, რადგან ეშინოდათ, დამშეულმა ხალხმა არა აგვიტეხოს რაო. და მართლაც, სულ ცოტა რამ კმაროდა, რომ გაჭირებული ხალხი მოთმინებიდან გამოსულიყო და ჯავრი ამათზედ ამოეყარა. რომ მოგვესწრო სადმე, პირდაპირ ჩავაქვეავდით, მით უფრო რომ ამ უკანასკნელ ხანს ჩვენს მაზრაში რომ ჯარი გადმოიყვანეს, ბერებს სრულიადაც აღარ ექომაგებოდა.

ესეც რომ არ ყოფილიყო, როგორც მოგეხსენებათ, ჰაერში ახალი რაღაც ტრიალებდა. იქნება არც კი ნებავდათ. მაგრამ თავისდა უნებურად იძულებულნი იყვნენ გამოექვეყნებინათ მეფის ბრძანება

საერო კრების შესახებ. ხმა დადიოდა, როცა საერო კრების დღეს დანიშნავენ, ბრძანებით აცნობებენ მაზრის უფროსს და ის კიდევ ყველა მამასახლისს შეატყობინებს და ყოველ სამამასახლისოს და ეკლესიის კარებზედ განცხადებას გააკვრევენ. გარდა ამისა მღვდლები წირვის შემდეგ წაუკითხავენ თავიანთ სამწყსოს და რაკი ამგვარად მთელს ერს გამოუცხადებენ მეფის ბრძანებას, ამის შემდეგ დანიშნულ დღეს ერთი კვირის განმავლობაში, ქალაქში შევიკრიბებით ყველანი, ერი და ბერა, გლეხი და თავადი, მუშა და ხელოსანი, შევიკრიბებით, ჩვენს გაჭირვებას ავწერთ, საერო კრებისთვის ჩვენს წარმომადგენელთ ამოვირჩევთ და იმათ მივანდობთ, კრებას ჩვენი გაჭირვებული ცხოვრება აცნობონ. როდის იქნება საერო კრება, ამას შემდეგში გავვაგებინებენო.

ეს იყო, ამაზედ მეტი ჩვენ არა ვიცოდით რა. ის კი ვიცოდით, რომ თუ მართლა საქმე ჩვენი გაჭირვებული ცხოვრების აწერაზედ მივარდებოდა, ღმერთო! ღმერთო! მგონი იმდენი რამ გვეთქვა, იმდენი უსამართლობა, დამცირება და შეურაცხყოფა აგვეწერა, რომ ქვასაც კი შევბრალებოდით.

ვერსალში დიდებულთ და სამღვდლოებას ერთი კრება კიდევა ჰქონდათ: უნდოდათ საერო კრებისთვის შეთანხმებულიყვნენ და მომზადებულიყვნენ. თუ ცოტაც არის მაინც კიდევ ჰქონდა ვისმე თავადაზნაურობის და დიდებულების იმედი, ამ კრებამ ეს იმედიც გაჰფანტა და ახლა კი ყველანი დარწმუნდნენ, რომ დიდებულნი ხალხისთვის ავის მეტს არასა ზრუნავენ. ახლა კი ყველანი დარწმუნდნენ, რომ თუ ხალხმა თავისთვის თითონ არ იზრუნა, მეფე და მებატონეები არას მისცემენ. საერო კრებაო, რომ იტყოდნენ, თან ხალხიო, დაატანდნენ და ყველამ იცოდა, რომ მოქალაქე, ვაჭარი, მუშა, ხელოსანი და გლეხკაცი ერთად იყვნენ, ერთი მიზნისკენ მისწრაფოდნენ და ერთს ძალას წარმოადგენდნენ — ხალხის ძალას. ამბობდნენ უწინდელ დროში კიდევაც ყოფილა საერო კრება, კიდევაც ყოფილან ჩვენი წინაპრნი საერო კრებაზედ მიწვეულნი, მაგრამ მეფის, დიდებულთა და სამღვდლოების წინაშე დაჩოქილნი წამდგარან და კისერზედ თოკი ჰქონიათ მიბმული ნიშნად მონობის და ყმობისაო. წარმოდგინეთ ჩვენი აღშფოთება, როდესაც ვერსალის კრების განაჩენი გავიგეთ, რომლითაც დიდებულთ დაედგინათ, ძველებურად მუხლმოყრილნი და ყელზედ თოკშებმულნი მივიღოთ კრებაზედ ხალხის წარმომადგენელნიო! როგორც წესი და რაგია, ჩვენც ისე უნდა მოვიქცეთო! თუკი 1614 წ. ასე ყოფილაო?!

მაშინ კი მგონი თვით ვალენტინმაც შეუუერთხა დიდებულთ! მაშინ კი ყველა დარწმუნდა, რომ პარიზელმა პარლამენტმა საერო

კრების მოწოდება ხალხის სიყვარულით და მის საშველად კი არა, მარტო იმიტომ მოიწადინა, რომ დიდებულთ არ უნდოდათ თავიანთ მამულების დაკვალად გაეღოთ ის ხარჯი, რომელსაც საწყალი ხალხი იხდიდა.

გაზეთებში ეწერა, დიდძალი პური შემოდის რუსეთიდან და ამერიკიდანაო, მაგრამ ჩვენს სოფელში და მარტო ჩვენს სოფელში კი არა, ყველგან მთაში, არამც თუ პური არავის მოჰქონდა გასასყიდად, სახლში გვევარდებოდნენ და ერთი ჩანახიცი რომ ეპოვნათ საღმე. იმასაც გვართმევდნენ, თქვენ აქ პურს ინახავთ და დიდ ქალაქებში კი ყველგან აჯანყდა დამშეული ხალხი და პური იმათ უნდა მივაწოდოთო! თქვენ პური რად გინდათ, თქვენ მოთმინებაც გეყოფათ; პური იმას უნდა, ვისაც მოთმინება არა აქვსო.

თებერვლის გასულს, სწორედ იმ დროს, როდესაც ძალიან შეგვაწუხა შიმშილმა, შემოესივნენ ჩვენს სოფელს იძაულები და სახლი არ გადარჩათ გაუჩხრეკავი. ვახშმად, რასაკვირველია, ნათლიაჩემს ეწვივნენ ღუქანში: მაზრის უფროსი, პოლიციის უფროსი და რამდენიმე კიდევ სხვა მოხელე და მამასახლისები.

საუბედუროდ შოველიც იმ საღამოს დაბრუნებულიყო აღზახიდან და ჩვეულებისამებრ ნათლიაჩემთან შემოსულიყო. სასტუმრო ოთახში დაედვა თავისი საწვრილმანო და თითონ კი ბუხარს მისჯდომოდა. კარი რომ შეაღეს და უცბად თავზედ წაადგნენ სახელმწიფო მოხელენი თავიანთ ოქრომკედით ნაკერი ტანისამოსით და ქულებით, ჩვენი შოველი, ცოტა არ იყოს, შეკრთა. მით უფრო, რომ პოლიციის უფროსი ბატონი დეჟარდენი ისე უყურებდა, თითქო კატამ თავვი დაინახა და ემზადება, ისკუპოს და ზედ დაახტესო. ცული შეხედულება ჰქონდა, ღვთის წინაშე, იმ დროს ბატონს დეჟარდენს! სხვებმა გაჩქარებით მოიხადეს წამოსასხამები და სმზარეულოსაკენ გაეშურენ; იმან კი მარტო ხმალი მოიხსნა, იქვე კუნჭულში მიაყუდა და მერე შოველის საწვრილმანოს მივარდა. გახსნა და წიგნების სინჯვა დაიწყო.

შოველიც იქვე ცოტა უკან იდგა. ახლა კი დამშვიდებულიყო. ორივე ხელები შარვლის ჯიბეებში ჩაეწყო და ისე დასცქეროდა პოლიციის უფროსს, თითქო ეს წიგნები იმისი არც კი იყო.

მაზრის უფროსი და მოხელეები მიდი-მოდიოდნენ, ხელებს იფშენებდნენ და იძახდნენ:

— ეგეც ხომ გადავაგორეთ! ღმერთო, რა ჰირად აგვიტყდა ეს სოფლების ჩხრეკა!.. დააჩქარე, მზარეულო, პური გეშია!

და გულიანად იცინოდნენ.

სამზარეულოს კარი ღია იყო და მართლა მშვენიერი, სურნელე-

ბით სავსე სუნი შემოდოდა შემწვარის და მოხრაკულისა. ერთ მამასახლისს, ხელობით ხაბაზს, ველარ მოეთმინა, ტაფა აეხადნა და შიგ ჩასცქეროდა, თან ნათლი-ჯალაბსა ჰკითხავდა, რა და რა მასალა უყავიო. ნიკოლი სუფრასა შლიდა; ბ. დეჟარდენი იდგა და წიგნებს სინჯავდა. ცალ-ცალკე ამოიღებდა, ყოველ წიგნს გასინჯავდა და იქვე შავიდაზედ დასდებდა.

— შენა ჰყიდი ამ წიგნებს? — ჰკითხა ბოლოს შოველს, ისე, რომ იმისკენ არც კი მიუხედნია.

— დიად, ბატონო, — მოახსენა დაშვილებული ხმით შოველმა.

— იცი, რომ ამგვარ წიგნების გავრცელებისთვის საღრჩობელაზედ ამართავენ ხოლმე შენისთანა მაწანწალებს?

— მაგას რად ბრძანებთ, ჩემო ბატონო? საღრჩობელაზედ ამ პატარ-პატარა წიგნაკებისთვის? აბა, რომელი გახლავთ აქ თქვენი დასაწუნი? აი, მაგალითებრ, ესა: რა უნდა იზრუნოს საერო კრებამ, უბრწყინვალესი თავადი ორლენელია; ან ფიქრი და მოსაზრება მამულის შეილისა. საერო კრების შესახებ; ხვეწნა-მუდარა და სათხოვარი კალატოზებისა; აქ საშიში არაფერი გახლავთ.

— რატომ მეფის ნებართვა არა აქვს ამ წიგნებს?

— თქვენ კარგად მოგგხსენებათ, ბატონო, რომ მინისტრი ბრიენის შემდეგ წიგნების ბეჭდვა და ვაჭრობა თავისუფალი გახლავთ.

ის კი ისევ ისე ეძებდა, იქნება აკრძალული ვიპოვო რამეო. ახლა კი სხვებიც გარს შემოხვევოდნენ. მე და ნათლიაჩემი უფრო უკან ვიდრეკით თაროსკენ და სულ ჰირის ოფლს გვახსავდა. შოველი კი იმედიანად გაღმოგვხედავდა ხოლმე, თითქო განსაცდელში ჩვენა ვართ და ის გულს გვიმაგრებსო. ეკვი არ იყო, საწვრილმანოში აკრძალული წიგნები ჰქონდა დამალული და თითქო რალაც სუნი მისდისო, ისე ჯაშუშურად ჩხრიკავდა ბ. დეჟარდენი წიგნებს.

ცოტა კიდევ და კიდევ გათავდებოდა წიგნების სინჯვა, მაგრამ ამ დროს ოთახში ნათლი-ჯალაბი ეკატერინე შემოვიდა და წვნიანი შემოიტანა. იმის დანახვაზედ ყველანი სუფრას ეცნენ, ვინ წინა და ვინ უკანა, და ყველაზედ წინ მაზრის უფროსი სუფრის თავში გამოიჭიმა და დაიწყო ყვირილი:

— მობრძანდით, ყმაწვილებო. დაბრძანდით!.. რა დედლური გაუკეთებია ჩვენს დიასახლისს! ერთი შემოხედეთ და მობრძანდით მეთქი, ყმაწვილებო! რა დროს ეგ ოხერი წიგნებია, რა ექნა! მამაჩემი არ წამიწყდებია, მარტო მე ვახსენებ ღმერთსა, თუ ახლავე ყველანი არ დაბრძანებულხართ!

და წამოავლო კიდეც ჩამჩას ხელი. იმ დროს ნიკოლმაც მადის მოსაყვანად საგანგებო არაყი მიართვა, ბიჭს კიდეც ზელადებით ღვინო მოჰქონდა. ბ. დეჟარდენმა რაკი ნახა, მე არ მელიან და უჩემოდაც კარგად შეექცევიანო, გაბრაზებით გადმოხედა შოველს და შეუტია:

— შენ ეი კიდეც ჩამივარდები ხელში!

და რაღაცა წიგნი ეჭირა, წიგნებზედ დაახალა და სუფრისკენ წავიდა, შოველმა წყნარად ჩაალაგა კალათში თავის წიგნები, წამოიკიდა ზურგზედ და მძიმედ თავი დაუკრა სუფრაზედ მსხდომთ. ჩვენ კი ისეთი მზიარული თვალით გადმოგვხედა, რომ უცხოც იტყოდა, ამ კაცის სიცოცხლე ბეწვზედ ეკიდა და აგერ განსაცდელს გადაჩენილაო. გულიდან ძლივს მოგვეშვა ლოდი და თავისუფლად ამოვისუნთქეთ.

შოველი წავიდა. ჩვენი სტუმრები მშვენიერ ვახშამს შეექცნენ, საღვებგებლობები გააჩინეს, ზედ მრავალჯამიერი დასძახეს; გაიმართა ლხინი და დროსტარება. რა უჭირდათ! ქალაქიდან კარგი ღვინოები წამოეღოთ და საქწვადედ სუკები.

კარებში კი გლახები მოგროვილიყვნენ და ქუდმოხდილნი ხელგამოწვდილნი ევედრებოდნენ, მოწყალეა მოიღეთო! დედაკაცებს თან თავიანთი შვილები წამოეყვანათ და ისეთი კენესით შესთხოვდნენ განკითხვას, ისეთი მწარე ცრემლით ევედრებოდნენ, რომ ქვასაც კი მოალბობდნენ. იდგნენ საწყალი ბავშვები დამშუული შოშიასავით პირდაღებულნი და ბატონების სუფრას შესცქეროდნენ. მაგრამ გლახები ვის ახსოვდა? ისე გაერთვნენ ქეიფში, ისეთი სიმღერა დასძახეს, რომ ვიღაც მათხოვარი კი არა, თვით ქრისტე ღმერთიც რომ მოსულიყო, იმასაც არ მიხედავდნენ. ღვინო ულეველი ჰქონდათ, ცხელ-ცხელი ცვრიანი მწვადი თავზედ საყრელი; ისხდნენ და შეექცევოდნენ! სიმღერას გაათავებდნენ და ახალ-ახალ ამბებს უამბობდნენ ერთმანეთს.

მხოლოდ გათენებისას, ასე სამ საათზედ აიშალნენ და ზოგი ქალაქისკენ წავიდა და ზოგი კი მთაში, რომ იქაც დაეწიოკებინათ საწყალი ხალხი და პური ეძებნათ.

მეორე დღეს საღამოზედ შოველი და მარგალიტა მოვიდნენ ჩვენს სანახავად. ჯერ შინ არ შემოსულიყვნენ, რომ ნათლიაჩემმა შესძახა:

— როგორ შეგვაშინე, შოველ, რომ იცოდე, როგორ შეგვაშინე! ღმერთო, როგორ უძლებ მაგ ცხოვრებას?!! განა შენი სიცოცხლე სიცოცხლეა? ყოველ დღე ყოველ წამს სულ იმის ფიქრში ვიყვებ, რომ აგერ დამიჭერენ და ჩამომახრჩობენ მეთქი! არა, ძმაო, მე მაგ

ყოფას ორ კვირასაც ვერ გავუძლებდი! გავგიჟდებოდი! ჩემი ხელით თავს ჩამოვიხრჩობდი! ორ კვირასაც ვერ გავუძლებდი, მაგ ცხოვრებას, შიშით გული გამიხკდებოდა!

— ორ კვირას კი არა, მე ორ საათსაც ვერ გავუძლებდი! — დაუმატა ნათლი-ჯალაბმა. მართლაცა და, ყველას გვიკვირდა, ამოდენა შიშს როგორ გაუძლო, რატომ გული არ გაუსკდაო? ის კი ისეთი ღიმილით შემოგვეცქეროდა, თითქო ბავშვებს უსაფუძვლო შიშს უქარვებსო.

— ეჰ, კარგი თ ერთი, ნურც აგრე გააზვიადებთ. რის შიში, რის გულის ხეთქვა, რას ბრძანებთ! შიში მაშინა მქონდა, როცა მართლა ჩამოსახრჩობადა მდევდნენ, ამ ათი-თხუთმეტი წლის წინად. სიტრთხილე აბა მაშინა მქირდა! კურღლელი არ იქნება ისე გაფრთხილებული, როგორც მე ვიყავი. ამსტერდამში დაბეჭდილი, და მამასადამე აკრძალული, წიგნები დამქონდა და ძალიანაც ვასაღებდი. რომ დავეჭირეთ, ისე ციმციმად ამწევდნენ და... ჩამომახრჩობდნენ. არც არას მკითხავდნენ, არც გამასამართლებდნენ, თოკი და მაგის ჯანიო, იტყოდნენ. დღეს კი რა მიშავს, კიდევ რომ დამიჭირონ? გაუსამართლებლად ხელს ვერ მახლებენ, ერთი ბეწვი რა არის, ბეწვს ვერ მომგლეჯენ თავიდან! უწინდელი დრო კი არ არის! ამ ათის წლის წინად რომ დავეჭირეთ, მაშინვე წამებას მიმყენებდნენ: ან მკლავის ძვლებს დამიმსხვრევდნენ, ან ძარღვებს გლეჯას დამიწყებდნენ, — ამას ამხანაგებიც ეყოლება და იქნება გასცესო.

— შენ რაც გინდა სთქვი, შოველ, და ერთ ხანად კი ფერი გეცვალა! თუნდა დავითიცავ, აკრძალული წიგნი გექნებოდა რაშე.

— მქონდა, მაშ არა მქონდა! აგერა, სულ ძირში მქონდა ჩამალული. — სთქვა შოველმა და კალათიდან შეხვეული გაზეთები ამოიღო. აბა ვნახოთ, როგორ არის ჩვენი საქმე.

კარი ჩაკეტეთ, ფანჯრების დარაბები მივხურეთ და შუაღამე კარგად გადავიდა, რომ ჩვენ ისევე გაზეთებს ვკითხულობდით. მე მგონი სიამოვნებით წაიკითხავთ მაშინდელი გაზეთებიდან ამოწერილ ამბებს. ძველისძველი ამბებია, მაგრამ ჩვენი აწმყო კი იმ ძველმა შობა და!

ერთი და იგივე გაისმოდა მთელ საფრანგეთში: დიდებულნი შეერთებას ცდილობდნენ, ერთმანეთს მხარს აძლევდნენ და ყოველ ღონისძიებასა ხმარობდნენ, რომ საერო კრება არ მომხდარიყო. ბეზანსონში დიდებულთა კრებას დაედგინა, საერო კრების მოწვევის შესახებ თვით მეფის ბრძანებასაც უნდა ვეწინააღმდეგოთ, რადგან თვით ღვთისაგან არის დაწესებული, რომ კეთილშობილნი და იმათი

მაჟღელები არავითარ ხარჯს არ იხდიდნენო! იმავე თავიდან ასე ყოფილა ეს ათაბი წელიწადი მეტია და კიდევაც ასე უნდა იყოს უკუნითი უკუნისამდეო!.. ეს რომ ხალხს გაეგო, თავს დასხმოდა დიდებულთ და კრება დაეშლინებინა.

პროვანსში დიდებულთა კრებაზედ უმრავლესობას მეფის ბრძანების წინააღმდეგობა გამოეცხადებინა: მეფემ კი არა, თვით ღმერთმაც რომ გვიბრძანოს, ჩვენ საერო კრების მოწვევას არ ვიკაბულებთო. და იქ პირველად გაისმა მირაბოს სახელი, რომელსაც პირდაპირ გამოეცხადებინა: სიმათლე ჩვენკენ კი არა, ჩვენგან დაჩაგრული ხალხისკენ არის და მეც ამის შემდეგ ხალხთან და ხალხისკენ ვიქნებო. დიდებულთაგან მეფის ბრძანების და საერო კრების მოწვევის წინააღმდეგობა „არც სასარგებლოა, არც ღირსეული და არც კანონიერიო“. იმისთანა მჭერმეტყველებით და რიხით ამბობდა თურმე თავისას მირაბო, იმისთანა საფუძვლიანად და სამართლიანად, რომ მაშინვე ვთქვით, თუ ამისთანა დიდებულმა კაცმა მხარი მოგვცა, შიში არაფრისა უნდა გექონდესო. ის რომ თავისას ამბობდა, სხვა თავადაზნაურები თურმე განცვიფრებით შესეკეროდნენ — არა, ეს კეთილშობილი არ არის, თორემ ასეთ მტენარ სისულელეს არ იტყოდაო. შემდეგ კრებაზედ კი მირაბო სულაც აღარ მიიღეს და მით დაამტკიცეს თავისი სოლომონებრივი გონიერება.

ყველგან ბრძოლა იყო. ბრეტანში ქ. რანში თავადაზნაურნი ხოცავდნენ მოქალაქეებს, — რად იმახით, საერო კრება საჭირო არისო; საცა კი ყმაწვილი კაცისას გაიგებდნენ — ღონიერი, ყოჩაღი ბიჭი არისო, ოღონდ ხალხის შვილი კი ყოფილიყო და დაეცემოდნენ შეიარაღებულნი და ანდერძს აუგებდნენ. მოქალაქეთ კი ჯერ ვერ მოეხერხებინათ შეერთებულიყვნენ და იარაღითვე გაეცათ პასუხი. იმის მაგივრად, რომ წელში გამართულიყვნენ და ვაჟკაცურად დახვედროდნენ, ისინი ბრეტანის სხვადასხვა ქალაქებს სთხოვდნენ შველას. აი, რა პასუხი მისწერა იმათ ნანტის ახალგაზრდობამ: თქვენი კვნესით შეერთებული ნანტის ყმაწვილკაცობა განცვიფრებული ეკითხება თავის თავს: ნუ თუ ეს შესაძლებელია?! ნუ თუ შესაძლებელია, ასე ადვილად, უსამართლოდ, უდანაშაულოდ ხალხის ქლევტა, როგორც ქ. რანში დიდებულნი სჩადიან!? სისხლს სისხლი ჟნდა და კაცის მკვლელს სამაგიეროდ დასჯა. ამით ვაღიარებთ, რომ ჩვენი კეთილი მეფის სურვილს საერო კრების მოსაწვევად და მით ხალხის ტვირთის შესამსუბუქებლად და მონობიდან გასათავისუფლებლად მოწინააღმდეგეთ მარტო დიდებულნი, სამშობლოს მტერნი, აღუდგებიან, რომელთათვის დაჩაგრული ხალხის კვნესა-გოდება

ციური სიტყვებით სავსე ყურთ დამტკბობი მუსიკაა. ამით ვაღიარებთ, რომ ჩვენ ერთხმად დავადგინეთ და შევიფიცეთ, ჩვენი ხელით დავწყვიტოთ ჩვენი მონობის ჯაჭვები და ამიტომ იარაღს ვიღებთ და მოვესწრაფებით მტარვალთა დასასჯელად. ვიცით, ხალხის მტერნი აჯანყებულად ჩაგვრიცხვენ და ცოფიან ძაღლსავით დევნას დაგვიწყებენ; მაგრამ წინააღმდეგ ვაცხადებთ საყოველთაოდ: წმინდა არს ჩვენი წადილი! ჩვენს პატიოსნებას და სამშობლოს ვფიცავთ, თუ ბედმა გვიმუხთლა და ჩვენთა მტერთა სასამართლოს ჩაუვარდით, ვაჟაკურად მივიღოთ ყოველი შეურაცხყოფა და წამება, რომელსაც ისინი მოგვაყენებენ. დადგენილია ქ. ნანტში, სავაქრო დარბაზში, 28 იანვარს 1789 წ.

ამას ნანტელი ყმაწვილკაცობა იწერებოდა, უფრო ნოქრები და წერილი ვაჭრები.

ქ. ანჟერში მოსწავლე ყმაწვილკაცობა შეყრილიყო და შეიარაღებული რანელების მოსაშველელად მოდიოდა. იქვე ანჟერში ქალებს გაემართათ კრება და რანელებს ატყობინებდნენ თავიანთ კრების დადგენილებას: „განაჩენი ქ. ანჟერელ ყმაწვილკაცების დედათა, დათა და მეუღლეთა კრებისა. ამით ვაღიარებთ, რომ გულს ლახვარით გვეცა ქ. რანში თავადაზნაურთაგან მოქალაქეთა დევნა და ხოცვა. ამით ვაღიარებთ, რომ იმათი სისხლი ჩვენი სისხლია და იმათი ხოცვა — ჩვენი სიკვდილი. ჩვენ, ქალები, დღეიდან ყოველთვის ხალხთან ვიქნებით და რაც შეგვიძლიან ბუნებისდა კვალად ერთგულად ვემსახურებით, რომ ჰქონდეს შევეუმსუბუქოთ. ამით ვაცხადებთ, რომ ხალხის წადილი ჩვენი წადილია და მისი მიზანი — ჩვენი მიზანი. ჩვენ ყოველთვის იქ ვიქნებით, სადაც სამშობლოს კეთილდღეობისთვის თავგანწირულნი ჩვენი ვაჟაკნი იქნებიან და ვეცდებით ბარგის ზიდვაში, სურსათის მომზადებაში და დაქრილთ მოვლაში მაინც გამოვადგეთ თავისუფლებისათვის მებრძოლთ. ამით ვაცხადებთ, რომ არც სახელმწიფოს და არც მეფის და სარწმუნოების წინააღმდეგ ჩვენ კრებად მოწოდებულ ქალებს არა გვწადიან რა, მაგრამ ვფიცავთ, სიკვდილს ვირჩევთ და ჩვენს შვილებს, ქმრებს და ძმებს კი ვერ ვუღალატებთ, რადგან ჩვენს შემარცხველ უმოქმედობას იმათთან სიკვდილი გვირჩევნია.“

ნათლიაჩემს ცრემლი მოერია. ჩვენც ტირილი დავიწყეთ. თან ერთმანეთს იმედს ვაძლევდით:

— ყოჩაღ, ქალებო! ნეტავი ხვალ ჩვენ მოგვიხდეს იარაღის აღება!

და ასეთი გულმაგრად, მამაკურად შევეყურებდით ერთმანეთს,

რომ ჩვენვე გვიკვირდა: ნუ თუ ჩვენ ვართ გუშინდელი ქედმოხრილი და პირუტყვი მონებიო?!

შოველმა ცოტა ხნის ფიქრის შემდეგ თითი აიშვირა და სთქვა:

— ჰოდა დაუფიქრდნენ ამ ამბავს დიდებული თავადაზნაურნი და ეპისკოპოსნი! დაუფიქრდნენ და შეიგნონ, თუ შეუძლიანთ! ნუ თუ ამ ნიშანს ვერ ხედავენ, ახალი დროის ნიშანს: იმის მაგიერად, რომ თვალცრემლიანი ესვეწებოდეს — შინ იყავ, რა გრჯის, საქმე უშენოდაც გარიგდება თუ გასარიგებელიაო! დღეს ქალი თავის ქმარ-შვილს თავისი ხელით ულესავს ხანჯალს და თითონაც თან მისდევს, წადი იბრძოლე, იარას მე შეგიხვევ ჩემი ხელითო! ამას ქალი იშვიათად იზამს ხოლმე, მაგრამ როდესაც ამას იზამს, იქ მტერი უბრძოლველდაც დამარცხებულია!

X

რამდენიმე დღის შემდეგ, 20 მარტს 1789, ის იყო გაზაფხულის მზემ გამოიხედა და თოვლმა დნობა დაიწყო, ხმა გავარდა, სოფელში სამამასახლისოს კარებზედ უშველებელი განცხადება გაუკრავთო. განცხადებას დიდი, დიდი ბეჭედი აზის იის სამი ფერით შეზამებული და ამასთანავე განცხადებანი ყველგან არის გაკრული ეკლესიების და მონასტრების კარებზედ, რომ ყველამ იცოდეს, როდის არის ხალხი ქალაქს დაბარებული საერო კრებისათვის თავის წარმომადგენელთა ასარჩევადო.

მართალიც იყო. განცხადებაში ეწერა, რომ თავადაზნაურობა, სამღვდელოება, ვაჭრები, ხელოსნები და გლეხკაცობა უნდა შეკრებილიყვნენ ქალაქში თავიანთ წარმომადგენელთა ასარჩევად.

„ბრძანება მეფისა საერო კრებისათვის წარმომადგენელთა არჩევისათვის 24 იანვარს 1789 წ.“.

ბრძანებაში ეწერა, რომ მეფე აცნობებს თავის ერთგულ ქვეშევრდომთ თავის სურვილს, რომ მომავალ საერო კრებისთვის, ამ დიდებულ და მართლა საქვეყნო კრებულისთვის წარმომადგენელთა ამორჩევაში ყველამ მიიღოს მონაწილეობა. მეფესა სურს, რომ მის საბრძანებელში ყველგან, ყველა კუთხეში, ყველა მთაში მიმალულ სოფელში და ქოხში, ცნობილ იქნას მისი სურვილი, საერო კრების მოწოდების შესახებ, რომ ყველას თავისუფლად შეეძლოს თავისი ჭიბბოროტი გვაცნობოსო. მეფე დარწმუნებულია, რომ ამგვარად შემდგარი კრება ყოველთვის სრული სიმართლით აცნობებს მას მთელი სამეფოს მდგომარეობას და მით გაუადვილებს ერის გაჭირვებას დროზედ და ჭეშმარიტი დახმარება აღმოუჩინოს.

ამის შემდეგ განცხადებაში მოხსენებული იყო, რა რიგ უნდა მოხდეს თავადაზნაურობის და სამღველოების წარმომადგენელთა ამორჩევა, რამდენი წარმომადგენელი უნდა ჰყავდეთ ყოველგვარ მონასტრებს ორივე სქესისას და სხვა და სხვა. ბოლოს ხალხს შესახებ ეწერა:

1) ყოველ ფრანგს, ანუ საფრანგეთში დასახლებულს და ჩვენს ქვეშევრდომად ჩაწერილს, 25 წლისას და სახელმწიფო ხარჯების გამღებს, ნება აქვს წარმომადგენელთა ამორჩევ კრებას დაესწროს, აირჩიოს და არჩეულ იქნას და მონაწილეობა მიიღოს ხალხის საჭიროებათა აღწერაში.

2) ამგვარად არჩეულნი წარმომადგენელნი, ას კომლზედ ერთი, ორას კომლზედ ორი და სამასზედ — სამი, შეიყრებიან სამაზრო ქალაქში და მაზრის უფროსის თავმჯდომარეობით შეადგენენ სამაზრო კრებას, რომელიც გამოიკვლევს და შეადგენს თავის ამორჩეულთა საჭიროებათა აღწერილობას და ამოირჩევს თავისთა შორის წარმომადგენელთ სათემო კრებაზედ დასასწრებლად და მაზრის საჭიროებათა აღწერილობის წარსადგენად.

3) სათემო კრებაზედ ხალხის წარმომადგენელნი განახილავენ ყოველი მაზრის საჭიროებათა აღწერას, რომელთაგან ერთს საზოგადო, სათემო საჭიროებათა აღწერილობას შეადგენენ და თავისთა შორის ამოირჩევენ ოთხს წარმომადგენელს საერო კრებაზედ დასასწრებლად.

4) მეფის სურვილია, გაათავებენ თუ არა სათემო კრებები თავიანთ საჭიროებათა აღწერილობას, მაშინვე დაუყოვნებლივ დანიშნულ იქმნას დრო და მოწვეულ იქმნას საერო კრება.

ყველა დაინახავს ჩვენი ძველი დროის და აწინდელს წესდების განსხვავებას. ბევრიც რომ სთქვან არაო, დღეს ჩვენ წარმომადგენელად ნაცნობ კაცს კი არ ვირჩევთ, რომელსაც ვიცნობთ და ვენდობით, არამედ იმას ვირჩევთ, ვისაც პარიზიდან გამოგვიგზავნიან, — დიდი კაცია, დიდი ჰკუისა და ნიჭის პატრონიო! იქნება დიდზედ დიდიც იყოს, მაგრამ ჩვენ კი არ ვიცნობთ და! უნდა მივენდვნეთ უცნობს და ვუთხრათ, შენთვის უცნობი მაზრის და უცნობი ხალხის წარმომადგენელი და ქომავი უნდა ბრძანდებოდეთ. ჩვენს დროში სხვა რიგად ვსჯილით და ჩვენ შორისვე ვირჩევდით, ვასიც უფრო მეტი ნდობა გვქონდა. ესენი შეიყრებოდნენ, მოილაპარაკებდნენ და თავიანთში ამოირჩევდნენ უფრო ნიჭიერებს, უფრო გამბედავებს და მცოდნე კაცებს! ისინი უნდა დასწრებოდნენ საერო კრებას, რომ ღიდებულ მეფის და თავადაზნაურთა და ეპისკოპოსთა

კრებულში ჩვენი წარმომადგენელიც კაცად ჩაეგდოთ!.. ჩვენ ის ვერ გვიღალატებდა, გარწმუნებთ!

გაიხსენეთ, რა შესძინეს ხალხს ჩვენმა ძველმა დროის წარმომადგენლებმა და რას შერებიან დღევანდლები? შეადარეთ და ადვილად დაინახავთ, რომელია უკეთესი: ჩვენ შორის ჩვენივე ტოლი გლეხკაცი ავირჩიოთ, რომელსაც ვიცნობთ, თუ პარიზიდან გამოგზავნილი ნასწავლი კაცი, რომელსაც მაზრისა და თემის უფროსები ან იმათი ცოლები სწყალობენ! ამით ამ ბატონების დამცირება არ მინდა; მაგრამ ორივეც რომ კარგნი იყვნენ, განა კარგებში კი უკეთესს არ უნდა ვირჩევდეთ? განა ცხადი არ არის, რომ ხალხის წარმომადგენელი მართლა წარმომადგენელი უნდა იყოს იმ ხალხისა, რომელმაც იგი ამოირჩია? თუ კი მართებლობის შემწეობით იქნება ამორჩეული, რასაკვირველია, მართებლობის წინააღმდეგ ველარას იტყვის, თუნდა იმის ამომრჩეველნი კი არა, მთელი ქვეყანაც იჩაგრებოდეს, მართებლობის მოხელეთა და წესწყობილებისაგან. ამას რა დიდი ხაზი და ლარი უნდა! წარმოიდგინეთ, რომ ლუი XVI-ს საერო კრების წარმომადგენელთა ამორჩევა ხალხის ნებაყოფლობაზედ კი არა, მაზრის და თემის უფროსთათვის მიენდო: ხალხი უფიცია და თქვენ დაეხმარეთ, რომ ღირსეული წარმომადგენელი ამოირჩიოსო. იცით რა მოხდებოდა? ამგვარად მართებლობის შემწეობით ამორჩეულნი თავის დღეში ვერ გაბედავდნენ მეფის წინააღმდეგობას, ძალა-უნებურად მოიწონებდნენ ყველაფერს, რასაც კი მართებლობა მოიწადინებდა, და ჩვენ დღესაც იმ გაჭირებაში ვიქნებოდით, რომელშიაც 1789 წლამდე ვიყავით.

მგონი საჭირო არ იყოს, მოგახსენოთ, რა სიხარულით მივეგებებით დიდი და პატარა ამ განცხადებას; ჩვენს ნეტარებას საზღვარი აღარა ჰქონდა, რაკი დავრწმუნდით, რომ საერო კრება უთუოდ მოხდებოდა. მით უფრო გვიხაროდა, რომ ხალხი ექვის თვალით უყურებდა ამ ამბებს და ბევრნი ამბობდნენ, მანამ ჩვენის თვალთ არა ვნახავთ, არ დავიჯერებთ, რომ ჩვენ მეფე მაგისტანა წყალობას გვიზამსო. და მართალსაც ამბობდნენ: იმდენს გვატყუებდნენ საუკუნეთა განმავლობაში, რომ ახლა მართალიც აღარ გვჯეროდა.

იმავე დღეს ნაშუადღევის ხუთ საათზედ მე და ნათლიაჩემი გაცხარებით ვმუშაობდით სამკვედლოში და ერთმანეთს შევცინოდით გახარებულნი. გადმომხედავდა ნათლიაჩემი და წამდაუწუმ გადმომძახებდა:

— ხედავ, მიშელ! ხედავ, რა კარგად მოვიდა საქმე! ერთი საერო კრებაცა ვნახოთ! თუ იქაც აღჩუს დაგვიჯდა კოჭი, მერე კი აღარა გვიჭირს რა!

—რატომ არ უნდა დაგვიჯდეს, ნათლიაჩემო?! ჩვენ ხელთ არ არის? საქმე ის არის, კოჭი კარგად ვაგდოთ! და ისევე ჩაქუჩებს ავაყოლებდით. გაბარებული კაცი ხომ ერთიასად ღონიერია მუშაობაში.

თოვლი დნებოდა. ისეთი ტალახი იყო ჩვენს ქუჩაში, ისეთი ჭყაბი იდგა, რომ მუხლამდე ლაფში ვიფლობოდით. თოვლი დნებოდა, ქუჩებში წყალი მიმდინარეობდა და სულ გაგვანადგურა, პატივი აღარავის შეგვარჩინა. არიქათ, მიშველეთო, — დაიკვილებდა სადმე საწყალი დედაკაცი და ნიჩბით ან ცოცხით უნდოდა პატივის შემაგრება, მაგრამ წყალთან ვერასა ხდებოდა და გაჰკვივოდა: მიშველეთ, ვინა ხართ ქრისტიანებიო! ბედისაგან დაჩაგრული კაცისთანა გაუბედავს და უსაზროს ხომ ვერას წარმოადგენს აღამიანი: ეს ხარჯიო, ეს ბეგარაო, ეს ბატონიო, ეს მღვდელიო და აზრადაც არავის მოგვდიოდა ქვით მოკირწყვლა ქუჩისა; ძნელი ხომ არათერია, მაგრამ მოფიქრება არ უნდოდა? და დავტოპავდით ისე ტალახში, წელამდე ლაფში ამოხუნხლულები!

უცბად ხუთი თუ ექვსი კაცი მოგვადგა კარზედ. ექვსივე ზემოდან, მთიდან მოშავალნი; ექვსივე სახელგანთქმულნი და ყველასაგან პატივცემული კაცები: იაკობ ლეტუმეი, ნიკოლოზ კოშარი, კლოდ ჰურე, გოტიე კურტუა, ერთის სიტყვით, ვინც კი გამოჩენილი და გავლენიანი კაცი მოიპოვებოდა ჩვენს სამამასახლისოში, სულ იქ იყვნენ, ჩვენს სამკედლოს კარებზედ. მოვიდნენ, ქუდი მოგვიხადეს, სალამი მოგვცეს და ჯოხებზედ დაეყრდნენ, თითქო დიდი ხნის მასლაათს აპირობენ ამ შუა ქუჩაშიო.

— ოჰ, გამარჯვებათ თქვენი! — მიესალმა ნათლიაჩემი. ლეტუმეის გაუმარჯოს! რასა იქ, ჩემო ჰურე! გამარჯვებათ, გამარჯვებათ! ვაი გამიწყრა ღმერთი, ეს ქულები რაზედ მოგიშვლებიათ, კაცო?!

და სიცილი დაიწყო. ისინი კი იღგნენ და ისე დარბაისლურად და ჩაფიქრებულნი გამოიყურებოდნენ, რომ ნათლიაჩემი გაკვირვებული დარჩა: რა მოსვლიათ ამ კაცებსაო? ბოლოს ერთიორად წელში მოიხარა ლეტუმეი და ნათლიაჩემს უთხრა:

— ბატონო ლერუ! თუ უკაცრავად არ ვიქნებით, ცოტა საქმე გვაქვს შენთან.

— ჩემთან?

— დიად, ბატონო, საერო კრების შესახებ.

— ჰო, ეგ სხვაა! ძალიან კარგი... მობრძანდით!.. ტალახში რას გაჩერებულხართ?

რიგ-რიგით შემოვიდნენ სამკედლოში ექვსივენი, იმ პატარა ალაგში ძლივსა ვეტევოდით; იღგნენ თავიანთ ჯოხებზედ და

ყრდნობილნი და ზოგი საქოჩრეს იფხანდა, ზოგი კიდევ ლეტუმის შეკყურებდა: თქვი რალა, შე კაი კაციო, რალას გვალოდინებო!

— ნიბრძანეთ, რისთვის გასჯილხართ? — უთხრა ნათლიაჩემმა, როცა დარწმუნდა, რომ ისინი აგრე ადვილად ენას ვერ ამოიდგამდნენ. — მიბრძანეთ, ნუ დამერიდებით და, თუ შემძლია, გარწმუნებთ, არათერში დაგზარდებით.

— აი, შენი ჭირი მე, — დაიწყო ხურო კოშარმა. — ჰოდა ჩვენც იმიტომ მოგძებნეთ, რომ შენი იმედი გვქონდა. ორასი კომლო არა ვართ, ჩვენი სამამასახლისო, რომ ვთქვათ.

— დიად, ორასი კომლი ვიქნებით!

— ჰოდა ორასმა კომლმა ორი წარმომადგენელი უნდა აირჩიოს, თუ არა? ხომ ორი კაცი უნდა აირჩიოს?

— დიად, მერე?

— ჰოდა მერე ისა, რომ ერთი შენ უნდა იყო, ბატონო ლერუ! დიად, ერთი შენა და მეორე? მეორე რომ არავინა გვყავს?!

— როგორ? თქვენ გინდათ ხალხის წარმომადგენლად მე ამირჩიოთ? — შეჰყვირა ნათლიაჩემმა და სახეზედ სიამოვნებამ გადაჰკრა და თვალები გაუბრწყინდა.

— ჰოდა შენა! ერთი შენა, მაგრამ მეორე რომ არავინა გვყავს?

— აი, რა მოგახსენოთ, — უთხრა ნათლიაჩემმა. — აჲ ამ გახურებულ ქურასთან დგომას, ის არა სჯობიან შინ ავიდეთ და იქ მოვილაპარაკოთ. თუ ჩემმა დედაკაცმა ერთი ხელადა ღვინოც მოგვაწოდა, ხომ სულაც აღარა გვიჭირს რა! ტვინი გაგვინათლდება და ისე ლამაზად მოგავგარებთ საქმეს, რომ უკეთესი არ შეიძლებოდეს.

რასაკვირველია, დაეთანხმნენ. მე სამქედლოში დავრჩი და ის იყო ჩაქუჩი ავიღე, რომ ნათლიაჩემმა შემომყვირა შუა ქუჩიდან:

— წამო, რალა, მიშელ? ეს ისეთი საქმეა, რომ საქიროა, ყველანი შევთანხმდეთ.

და ერთად შევედით დუქნის დიდ ოთახში. იქვე ფანჯარასთან მაგიდას შემოვუსხედით გარშემო. ნათლიაჩემმა ხელადით ღვინო ამოატანინა, ყველი და პური. დაისხეს, ერთმანეთი ადღეგრძელეს. ნათლი-ჯალაბი კი განცვიფრებული იყურებოდა, რა ვქნა, ამ კაცს ხომ არა დამართვია რაო? ლეტუმე ცდილობდა ნათლი-ჯალაბისათვის კრების მიზეზი აეხსნა, მაგრამ პირს გააღებდა და, თითქო ენა სასას მიეკვრაო, იყო ისე პირგაღებული. ბოლოს ისევე ნათლიაჩემმა დაიწყო:

— ცოდო აღიარებული სჯობიანო, ნათქვამია, მეც ჩემს ცოდვას მოვახსენებთ: თქვენმა წინადადებამ ძალიან მასიამოვნა. თქვენა გნებავთ თქვენს წარმომადგენლად ამომირჩიოთ? მე თანახმა გახლა-

ვართ, რადგან კაცი თავის ქვეყნის შვილია და, მაშასადამე, მისი ყურმოჭრილი ყმა და ოსამსახურე უხდა იყოს. შე თანახმა ვარ. ოღონდ ამას კი მოგახსენებთ, თუ ჩემთან შოველიც არ ამოგიჩხვიათ, მე იძულებული ვიქნები, უარი მოგახსენოთ.

— შოველი?! კალვინისტი?! — შეჰყვირა ლეტუმიემ და ისეთი განცვიფრებით შესცქეროდა ნათლიაჩემს, თითქო თავისთავს ეკითხება — ხომ არ გაგიყდა, ეს რა წამოროშა ამ კაცმაო?

სხვებიც ისევე გაშტერებულნი შესცქეროდნენ ნათლიაჩემს და ყვიროდნენ:

— როგორ?! კალვინისტი და ჩვენი წარმომადგენელი?!

— მომისმინეთ, — უთხრა წყნარად ნათლიაჩემმა. — ჩვენ რომ კაცებს ამოვიჩხვეთ და სამაზრო კრებაში დასასწრებლად გავგზავნით, იმას კი არ მივანდობთ, საერო კრება საეკლესიო კრებად გახადეთ, სარწმუნოებრივი საქმეები განიხილეთ და საღვთისმეტყველო კითხვები აღძრით შვიდ საიდუმლოებათა შესახებო. ჩვენ ჩვენი საქმეების გასარიგებლად ვგზავნით იქ კაცებს, საქვეყნო, საერო საქმეებისთვის, და უპირველესად ყოვლისა იმას დავავალებთ ჩვენ ამორჩეულ კაცებს, რომ ბეგარა შეგვიმსუბუქონ, ხარჯი შეგვაძირონ, მღვდლისა და ბატონის უღლიდან გამოგვიშვან, და თუ საქმე გაჭირდა, არც ბატონს დაუფარდნენ, არც ბერს და არც მღვდელს! ჰოდა თქვენ რომ მე მომმართეთ, და, მაშასადამე, თქვენთვის გამოსადეგ კაცად მიცანით, მე მგონი არც შემცდარი ხართ! რაც გლეხკაცს და იმის უფიცობას შეეფერება, ცოტათი მეც მიჭრის გონება, მაგრამ ეგ არა კმარა. თქვე კაი კაცებო, ჩვენ იმისთანა ბრძოლა მოგველის, რომ მართო მაგითი ფონს ვერ გავალთ. რა ვიცი, წიგნიც კარგი ვიცი, ანგარიშიცა, ჩვენი ყოფა-ცხოვრებაცა! ისიც კარგად ვიცი, რომ ქედზედ უღელი მადევს და პირში აღვირი მაქვს ამოდებული, მაგრამ საქმე რომ საქმეზედ მივიდეს, მე, უკაცრავად პასუხია, ყროყინის მეტს ვერას მოვახერხებ. მოვეყვები და იქნება ჩემზედ უკეთ ჩვენს სოფელში სხვამ ვერც კი იყროყინოს! მაგრამ, აკი მოგახსენეთ, მაგითი ვერას გავხდებით და! იცით იქ რა კაცებთან გვექნება საქმე? ისეთ სწავლულ და გამოცდილ კაცებს გამოგზავნიან თავადაზნაურნი და ბერები, ისეთ გაეშმაკებულ, გაფლიდებულ, ქლესა კაცებს, რომ მგონი სიტყვაც არ მათქმევინონ. შე რომ ერთი ვთქვა, ისინი ათასობით დამაყრიან და გამამტყუნებენ. იმიტომ რომ იმათ სწავლა აქვთ, კანონებიც კარგად იციან, ადათი და წესიც, და ყველაფერიც. იქნება სულ ტყუილს მეუბნებოდნენ, იქნება ცრუობდნენ და გულში მევე დამცინოდნენ — ჰაი. შე საწყალო, შენაო! მაგრამ მე კი ვერას გავუგებ და რა? კიდევ რომ მიგრ-

ძნოს გულმა, — არ დაუჯერო, ფლიდობსო. პასუხს კი ვერ მოვე-
ხერხებ და! პირში ბურთს კი ვერ ჩაეჩრი და! ჰოდა მივალო, ვილა-
პარაკებთ, ვილაპარაკებთ და იმის მაგივრად, რომ ცოტა რამ თავი-
სუფლება შევიძინოთ, ისინი უმეტესად დამონავებულს გამოგვის-
ტუმრებენ შინა.

ლეტუმიე ისევ ისევ პირლია შესცქეროდა ნათლიაჩემს.

— ეგ ყველა კარგი, მაგრამ შოველი?.. კალვინისტი!.. მერე
რომ... — ლულულულებდა შეშინებული ლეტუმიე.

— მოითმინე, გავათავო, — განაგრძო ნათლიაჩემმა. — მე თა-
ნახმა გახლავართ თქვენი მონდობილობა ვიკისრო და, თუ გამოვა
ვინმე და ჩვენი მაზრისა და ჩვენი ხალხის სასარგებლოს იტყვის
რასმე, გარწმუნებთ მეც მხარს მივცემ და გავამაგრებ, მაგრამ მე
რომ ვერას ვიტყვი! მე რომ ვერავის რას ვუპასუხებ! რა გქნა, მაგ-
დენი სწავლა არა მაქვს და რა ვუყო! არც სწავლა და არც ცოდნა!
მერწმუნეთ, სულ ძირიანად რომ გადავებრუნოთ ჩვენი სამამასახ-
ლისო, სანთლებით რომ ვეძებოთ, შოველისთანას ვერავის ვიპო-
ვით. შოველისთანად ჩვენს გაჭირებას ვერავინ იტყვის. შოველის-
თანად ჩვენს სიკეთეს, ჩვენც კი ვერ მოვინდომებთ, იმიტომ რომ
ჩვენ ჩვენს ცხვირს იქით ვერასა ვხედავთ. აგრე კი ნუ უყურებთ!
რა არის, რომ იმან არ იცოდეს? კანონებიო, წესებიო. მეფისა და
პარლამენტების ბრძანება და განაჩენებიო, ვინ მოსთვლის?! ისე ჩა-
მოსთვლის ჩვენს მეფეებს და იმათ ამბებს, გეგონებათ დაბეჭდილსა
კითხულობსო. იმას კი ნუ იტყვით, მეწვრილმანე არისო. მაგ მე-
წვრილმანეს თავით ბოლომდე წაუკითხავს ყველა ის წიგნები, რომ-
ლებიც ამ ოცი წლის განმავლობაში ზურგით უტარებია და ხალხში
გაუსაღებია. იქნება გეგონოთ გზაში რომ არის, აქეთ-იქით იყურე-
ბოდეს და ამწვანებული ტყით სტკებებოდეს, ან აყვავებულ მინდვ-
რით, და შორს დათოვლილ მთების ქედით? თქვენც არ მომიკვდეთ!
ცხვირი წიგნში წაუყვია და მიდის ისე ნელ-ნელა! ან არა ჩვენი გან-
თავისუფლების გზა-კვალსა და საღსარს ეძებს! საბუთებსა და სა-
ფუძველს ეძებს! რალა ბევრი გავაგრძელო, თუ გნებაეთ, რომ ჩვე-
ნი ყოფა-ცხოვრება შეიცვალოს, თუ გნებაეთ, რომ გლეხკაცი ბა-
ტონის ყურმოჭრილ ყმად კი არა, თავისუფალ ადამიანად იქცეს,
პირველად შოველი ამოირჩიეთ და მერე მე. ათუ შოველი იქა მყავს,
აღარაფრისა მეშინია; თუ ის იქ არ არის, მე რის მაქნისილა ვიქნები?
უიმისოდ მეც ნუ ამომირჩევთ, რადგან ახლავე უარს მოგახსენებთ.

ისეთი დაბეჯითებით, ისეთი ცხარი რწმუნებით ამბობდა ამას

ნათლიაჩემი, რომ ისინიც დაარწმუნა. მაგრამ არ უნდოდათ აკრე ადვილად დასთანხმებოდნენ, ქეჩოს იფხანდენ და ერთმანეთს თვალით ეკითხებოდნენ.

— ძალიან კარგი, — სთქვა კოშარმა, — მაგრამ საქმე ის არის, მიიღებენ კი შოველს?

— რატომ არ უნდა მიიღონ! განცხადებაში წარმომადგენელთა სარწმუნოების შესახებ არაფერი სწერია. იქა სწერია, ყველას ნება აქვს აირჩიოს თავისი წარმომადგენელი და თითონაც იქმნას არჩეული, ოღონდ ფრანგი იყოს, არა ნაკლებ 25 წლისა და ხარჯს იხდიდესო. შოველი ფრანგია და ხარჯსაც, ჩვენზედ მგონი მეტს იხდის და არა ნაკლებს. ეგეც რომ არ იყოს, განა არ გახსოვთ, შარშან ჩვენმა კეთილმა მეფემ მოქალაქეებრივი უფლებანი მიანიჭა კალვინისტებს, ლოტრანგებს და თვით ებრაელთაც. შარშან არ იყო, როგორ არ გეხსოვებათ! ჩვენ შოველი ამოვირჩიეთ და დანარჩენზე ნურას ვიწუხებთ. მერწმუნეთ, კალვინისტი ყოველი უფრო მეტს სიკეთეს შეგვიძენს და მეტს პატივს დაგვდებს, ვიდრე სამასსამოცდასამი ბერი. მერწმუნეთ, ის იმისთანა ცოდნით, ჭკუით და გაბედვით დაეხმარება ჩვენ ხალხს, რომ თვით დიდებულთაც შეშურდეთ. საქვეყნოდ სახელს გაუთქვამს ჩვენს სოფელს! ერთი ხელადა კიდევ, ეკატერინე!

ჩაფიქრდნენ ჩვენი სტუმრები, ეტყობოდათ დიდ გაჭირებაში იყვნენ: ვერც ჰო ეთქვათ, ვერც არა. ამ დროს ნათლიაჩემმა ღვინო მიაწოდა და უთხრა:

— გადაჭრით მოგანსენებთ, თუ შრველს არ ამოირჩევთ, არე მე მინდა. თუ შოველს ამოირჩევთ და, დიდი მადლობით ვიკისრებ თქვენს ბრძანებას. ღმერთმა განაძლიეროს ჩვენი მეფე!

გული მოუღბათ იმათაც და შესძახეს:

— ღმერთმა განაძლიეროს ჩვენი მეფე!

და როცა დალიეს, ლეტუმე წამოდგა და თქვა:

— ახლა მოდი შენა და ჩვენს ქალებს კალვინისტი გაუხსენე!... ეჰ, რა გაეწყობა! ბატონო ლერუ, თუ კი უშოველობა არ შეიძლება, აი, ჩემი ხელი.

— აი, ჩემი ხელი! — დაიძახა მეორემ, მესამემ... და ყველამ ხელი ჩამოართვეს.

ის ხელადა გამოსცალეს და წამოდგნენ კიდევ შინისკენ წასასვლელად. სოფელში ამათხედ გავლენიანი კაცი აღარავინ იყო და დარწმუნებული ვიყავით, რასაც ესენი მოინდომებდნენ, სოფელიც იმას იზამდა.

— მაშ აგრე, საქმე გათავებულია, — უძახდა ნათლიაჩემი კა-
რებიდან და პირს კმაყოფილების ღიმილი მოსდიოდა.

— გაჩარხულია, გაჩარხული! — უყვიროდნენ მიმავალნი და
ცდილობდნენ ღრმა ლაფში არ ჩაეტოპნათ.

ჩვენ ისევე სამკედლოში შევედით. მაგრამ მუშაობას ველარ ვა-
ხერხებდით, რადგან სულ სხვა ფიქრებმა გაგვიტაცეს ორივე. შვიდ
საათამდე ვიმუშავეთ და მერე კი შინ ავედით.

წარმომადგენელთ ამორჩევა კვირას იყო დანიშნული. შოველი
და მარგალიტა აგერ ორი კვირა იყო, რაც სავაჭროდ იყვნენ წასუ-
ლები და თავის დღეში არ გაეყიდნათ იმდენი წიგნები, რასაც იმ ხა-
ნებში ჰყილდნენ; ნათლიაჩემი იძახდა, თუ კვირაძღე არ გაჩნდნენ,
კვირას არჩვენებზედ მაინც დაესწრებიანო.

იმ სადამოს ახალი აღარა მომხდარა რა და მეც შინისკენ გა-
ვეშურე.

XI

კვირადღეს მართლა სამაგალითო მშვენიერი დღე დაგვიდგა,
თითქო ხალხთან ბუნებაცა ხარობსო, იმ დილას სრულიად მოიწმინ-
და ცამ, მზემ გამოაშუქა და არემარე თავისი სხივებით დაამშვენა.
ჯერ შვიდი საათი არ შესრულებულიყო, რომ მე და მამაჩემი გზას
გავუღდექით. მივდიოდით და საცა კი ჩვენი მთიდან თვალი მიგვიწვ-
დებოდა, ყველგან მიმავალ ხალხსა ვხედავდით. ყველანი მორთულ-
მოკაზმულიყვნენ, და ისეთი სიმღერა დაფდაფი მოისმოდა ყველა
მხრიდან, თითქო ერობაზედ სადმე მიდიან და მიიმღერიანო. ცოტა
ხანს უკან სულიწმინდის ეკლესიის დიდი ზარის ხმაც შეერია ხალ-
ხის ყრიაშულს და თან მოჰყვა ყველა სოფლების ეკლესიების ზა-
რის წკარუნი. სულის წმიდის ეკლესიაში რომ წირვა გამოვიდოდა,
არჩევნები მაშინ დაიწყობო, ამბობდნენ.

მივდიოდით ნელ-ნელა მე და მამაჩემი; იმის პატივისცემა რომ
არა მქონოდა, ხელად ჩავიბრუნდი ქალაქამდე; მაგრამ მამაჩემი
უკვე მოხუცებული, სიღარიბისაგან გატეხილი, წელში მოხრილი
კაცი იყო და ნელი ნაბიჯით მიდიოდა ჩაფიქრებული; ნელ-ნელა
აბოჯებდა, სიფრთხილით, და სულ აქეთ-იქით იცქირებოდა, თითქო
ეშინია, უცბად არა მეცეს რაო. საწყალი მამაჩემო! თავის სიცო-
ცხლეში იმდენი ტანჯვა-წამება ენახა, იმდენი ავი დღე დაელამები-
ნა, რომ სუყველაფრისა ეშინოდა. ასჯერ მეტჯერ შემეხვეწა:
მიშელ, გაფთხილდი, ხიფათი არა იყოს რაო! წამ და უწუმ გაჩერ-
დებოდა და თვალცრემლიანი მეტყოდა:

— შვილო, მიშელ... შენ გაჩუმდი... ხმა არ ამოიღო... არა წა-

მოგცდეს რა... - ხომ-იცე, შვილო, სიფთხილეს თავი არ ასტიკვავო. აი, ნახავ, თუ უბედურება არა მოხდეს რა... ჩემოდენა კაცსა, შვილო, სიზმარიც დაეჯერება...

მე კი ძალიან იმედიანად ვიყავი. ნათლიაჩემისა და შოველისაგან იმდენი რაბა მქონდა გაგონილი, იმდენი წიგნები მქონდა წაკითხული, გაზეთებიდან ისე კარგად ვიცოდი, რა ამბები ხდებოდა რანში, მარსელში, პარიზში და სხვა ქალაქებში, რომ ჩემდა უნებურად ძვალსა და რბილში მქონდა გამჯდარი ის რწმენა, რომ ჩვენი დახსნა მარტოდ-მარტო საერო კრებას შეეძლო. შიში და სიფრთხილე ფიქრადაც არ მომდიოდა. ან არა და განა თვრამეტი წლის ბიჭმა იცის კი შიში რა არის? ტყუილუბრალოდ კი არ ჩამიარა სამშედლოში მუშაობამ. პიტლო კლდისაგან გამოქანდაკებულს მიგავდა მხარ-ბეჭი და ხელით ნალს ვამტვრევდი. ის იყო უღვაშიც ამიმწვანდა! კობტა ტანისამოსი, კობტა გვერდზედ გადაგდებული ქუდი! ისეთი თავმომწონე ბიჭი ვიყავ, ისეთი თავმომწონე და არშიყი... ეეჰ, რა კარგი რამ ხარ, სიყმაწვილევ! საცა კი გოგოს თვალს მოეკრავდი, დავაშტერდებოდი, სულ თვალით შევკვამდი ხოლმე! რის შიში, რის რიდი?! მამაჩემის ხვეწნა, შვილო, არა წამოგცდეს რაო, მე სიცილად არა მყოფნიდა.

აგერ მოედანზედაც გავედით. ქვეყანი გარედ იყო. ჩვენი დუქნის ფანჯრები ღია იყო. დიდ ოთახში ნათლიაჩემი და ვალენტინი ისხდნენ და პურსა სჭამდნენ: ჩარეკით ღვინო. ედგათ და ისე იღმურძლებოდნენ, თითქო სამი კვირის სავალზედ მიდიანო. ორივე მორთულიყვნენ: ნათლიაჩემს მჭედლის ტანისამოსი ეცვა, როგორც ოსტატს შეჭფერის, და ვალენტინს საქარგლო ხალათი. დავინახეს და ერთი ყვირილი მორთეს:

— აგერა მოდიან! აგერა! აქეთ, აქეთ!

შევედით, მივესალმენით.

— ჩამომართვი, ბასტიენ! ეს ღმერთმა ადღეგრძელოს ჩვენი კეთილი მეფე!

მამაჩემმა ჩამოართვა წითელი ღვინით სავსე ფიალა და თვალთ ცრემლი მოერია.

— დიდაც, ბატონო ივანე, ღმერთმა ადღეგრძელოს ჩვენი კეთილი მეფე! გაუმარჯოს ჩვენს კეთილ მეფეს!

ეჰ, რას იზამთ? იმ დროს ისე გვეგონა, ყოველი კეთილი მეფისაგან აყრია ხალხსაო; მაშინ ჩვენთვის მეფე ადამიანიშვილი კი არა, ღვთაებრივი არსება იყო, რომელსაც ჩვენ შვილებივით ვუყვარდით და რომლის საზრუნავი ჩვენი კეთილდღეობის გარდა არა იყო რა.

ის ჩარეკა გამოვცალეთ და კიდევ მოვიდნენ სოფლის მოთავენი,

ისევ ისინი, რომლებიც ამას წინად ნათლიაჩემს სამჭედლოში ეწვივნენ. ოღონდ თან ლეტუმიეს მოხუცებული მამაც წამოეყვანათ, საწყალი ბერიკაცი! ისეთი მოხუცებული იყო, რომ ძლივს და ხედავდა, ყურთასმენა თითქმის აღარა ჰქონდა და სიარული ხომ სრულიადაც აღარ შეეძლო და ორი ბიჭი შესჯდომოდა მხრებში და ისე მოჰყავდათ, მაგრამ მაინც წამოსულიყო: არჩევანს მეც უნდა დავესწრო, ჩემი უფლებით მეც უნდა ვისარგებლოო. და მანამ ნათლიაჩემი ღვინოს ამოატანინებდა, იქ მყოფნი სიხარულით შეჰყურებდნენ ერთმანეთს და იძახდნენ:

— ძლივს არ მოვესწართ ამ დღეს! ახლა კი გათავდა ჩვენი წვლება! აბა, კაცებო, ერთხმად! მტერს თვალები დაეუყენოთ!

და ერთმანეთს ეხვეოდნენ და იცინოდნენ. თოვლივით გათეთრებული მოხუცი თავისას ჩიოდა:

— ოჰ, რა გრძელი ყოფილა სიცოცხლე! დმერთო, რამსიგრძე ყოფილა! მაგრამ დღევანდელი დღის დამსწრეს, წარსული კირი ღზინად მეჩვენება.

ამაზედ ნათლიაჩემმა უბახუხა:

— მართალსა ბრძანებთ, ბატონო ლეტუმიე, რთველში გაზაფხულის ყინვა ვიღას აგონდება? ემანდა მწივე ყურძენი, — მისდევით და კრიფეთ! ძალიან ძვირად დაგვიჯდა ეს რთველი, ბევრი ვიტანჯეთ, ბევრი ვაი-ვაგლახი ვნახეთ, ჩვენი სისხლით მოვრწყეთ ყოველი ვაზის ძირი, მართალია, მაგრამ წარსულს ვიღა ჩივის? გავიხაროთ! მოვკრიბოთ, დავწუროთ და ქვევრები გავავსოთ! თუ კარგად მოვიქეცით, ღვთის მადლით ჩვენც გვეყოფა და ჩვენს შვილიშვილებსაც! გაუმარჯოს ჩვენს მეფეს!

და ყველამ ერთხმად დაიძახეს:

— გაუმარჯოს ჩვენს მეფეს! გაუმარჯოს!

ერთი ხელადა კიდევ ამოვიტანეთ. კარგა ლამაზად შევნაყრდით და გზას გავუღვიქით. მგონი, რომ კარგ გუნებაზედ ვიქნებოდით, ჰა?

ჩვენებურები სულ ერთად იდგნენ მოედანზედ და ჩვენსა გველოდნენ: ისინიც ჩვენ შემოგვიერთდნენ და ისეთი სიმღერით და სტვირებით გაგვიძღვნენ წინ, თითქო საქორწილოდ მიდიანო. საცა კი გაიხედავდით, ყველგან სიმღერა ისმოდა და ყველგან, ყველა ეკლესიაზედ ზარსა რეკდნენ. სწორედ ისე. როგორც აღდგომა დამეს იციან. განაღა მივდიოდით? მივდიოდით კი არა, მივთამაშობდით, მივხტოდით, ქუდებს ცაში ვისროდით და წამდაუწუმ ვყვიროდით:

— ჩვენს მეფეს გაუმარჯოს! გაუმარჯოს ხალხისთვის მზრუნველ მეფეს!

საკვირველი გუგუნის გაჰქონდათ ზარებს — მთაში და ბარში, საცა კი სამრეკლო იყო, ყველგან ზარის რეკა ისმოდა და რაც მეტად ვუახლოვდებოდით ქალაქს, იმდენად მეტი იყო ეს ჟრიაბული.

ქალაქი მორთულიყო, გალამაზებულიყო. ყველგან დროშები ფრიალებდნენ, თეთრი აბრეშუმის ოქრომკედით იის ფერად ნაკერი დროშები. არა, მე ჩემს დღეში ისე არა მომწონებია რა, როგორც მაშინ ჩვენი ქალაქი მომეწონა!

ბევრი რამ მინახავს შემდეგში: რესპუბლიკის გამარჯვებანი, ჩვენი უძლეველი სიმაგრენი და იქიდან ზარბაზნის ქუხილი, სამშობლოსთვის თავგანწირვა აურიცხველი ხალხისა და ერთხმად გრიალი „საფრანგეთს გაუმარჯოსო! რესპუბლიკას გაუმარჯოსო!“ მაგრამ ისე არაფერი ჩამრჩენია გულს, როგორც ეს დღე ჩამრჩა. მაშინ სისხლის ღვრას არავინ ფიქრობდა; ჩვენ გვინდოდა ძმურად გადავხვევოდით ერთმანეთს და ისე გაგვერიგებინა ჩვენი საქმეები.

ის იყო ქალაქს მივუახლოვდით და მამა ქრისტეფორეც დაგვეწია. მოდიოდა და თან თავის სამწყსო მოსდევდა. რომ დავინახეთ ერთმანეთი, გავჩერდით, ქუდები მოვიხადეთ და შეეყვირეთ:

— ჩვენს კეთილ მეფეს გაუმარჯოს!

მამა ქრისტეფორე და ნათლიაჩემი ერთმანეთს გადახვივნენ და კოცნა დაუწყეს. მერე სიცილით, ხუმრობით, სიმღერითა და თამაშით მივადექით ქალაქის კარებს; ჩვენზედ წინ ბევრი სხვა სოფელი მისულიყო და შესავალში აუარებელი ხალხი შეგროვილიყო. კარებთან დარაჯი იდგა და იმან გვანიშნა გაჩერდითო. ხიდზედ იმდენი ურმები შემდგარიყო, რომ ველარც წინ მიდიოდნენ, ველარც უკან: ყველას თურმე უნდოდა არჩევანს დასწრებოდა და ვისაც სიარული აღარ შეეძლო, ურმით წამოსულიყო; ერთი ჩავალთ, ამ ბედნიერ დღესაც ვნახავთო, იძახდნენ ძალზედ მოხუცებულები, და მერე კი სიკვდილისაც აღარ გვეშინიანო. ბევრნი ტიროდნენ სიხარულისაგან.

ამის შემდეგა თქვან, თუ არ შერაცხვებათ, რომ უწინდელეს თავის საქმისაც კი არა ესმოდათ რაო! შინ არავინ დარჩენილა, არავინ, სუყველანი უკანასკნელ მოხუცამდე და კუტამდე იმას გაიძახოდნენ — უფლება გვაქვს და კიდევ გამოვიყენებთო.

კარგი ნახევარი საათი გვალოდინეს შესავალში, ვიდრე ხიდზედ შევდგებოდით. ბოლოს, როგორც იყო, ქალაქშიაც შევედით.

ხალხით სავსე იყო იქაურობა, და მერე რა ხალხით! ისეთი ჟრიაბული იდგა, თითქო მკვდრები ყოფილან და გაცოცხლებულანო. ქუჩის თავში დაიძახებდა ვინმე, ჩვენს მეფეს გაუმარჯოსო! და

გაჰქონდა იმოდენა ხალხს გრიალი, ქუჩის ბოლომდე: გაუმარჯოს! გაუმარჯოს!

რაკი მოედანზედ გავედით, ისე გაგვეკედეს ხალხში, რომ ველარც წინ წავედით, ველარც უკან, საცა კი თვალი მივაწვდინეთ, ყველგან ხალხი იყო, და გასავალი არსათა ჩანდა.

სულიწმინდის ეკლესიაში წირვა იდგა, მაგრამ იქამდინ ვინ მიგვალწევინებდა? ჯარისკაცსაც კი ყურადღებას აღარავინ აქცევდა, თუცა წესიერების დასაცავად დაეყენებინათ; ბევრს ყვიროდნენ, მიიწიეთ, აქეთ ნუ მოდიხართო, მაგრამ თითონ იმათ მიაწვდინებდა ხოლმე ხალხი, და ისე მიამწყვედევდა საღმე კუნძულში, რომ ხმლის ამოდებასაც ველარ ახერხებდნენ.

სწორედ იმ დროს მოაგონდა ნათლიაჩემს, — ჩემი მეგობარი იაკობ რენოდოს ლუდხანა ხომ აქვე არისო და გვანიშნა, მომყევითო, მე, მამაჩემს, ვალენტინს და მამა ქრისტეფორეს. ბევრი ვეწვალეთ, ბევრი მუჯღუტუნი წაგვეკრეს, მაგრამ, როგორც იყო, ლუდხანასთან მივედით, მაგრამ იქ იმდენი ხალხი იყო, რომ აღამიანს აღარ შეესვლებოდა და უკანა კარიდან მოვუარეთ, სამზარეულოდან, და ისე შევედით.

ღიასახლისმა მაშინათვე იცნო ნათლიაჩემი და პირველ სართულში აგვიყვანა ცალკე ოთახში; ცოტა ღვინო ამოგვიტანა, ლუდი და ძეხვი; ჩვენც მეტი არა გვინდოდა რა.

ჩვენებურები კი იდგნენ და გაშტერებულნი აქეთ-იქით იყურებოდნენ: ის კაცები ცამ ჩაყლაპა, თუ დედამიწიამო?! ეს არის ეხლა აქ არ იყვნენო?! მაგრამ რა გვექნა? იმოდენა ხალხის დაძახება შეუძლებელი იყო.

პირველ საათამდე იქ ვიყავით, და მაშინ კი, როცა ვნახეთ, რომ თითქმის ნახევარ ხალხმა გაათავა თავისი და მოედანზედ ცოტა თავისუფლად ამოისუნთქეს, ქვეით ჩავედით ჩვენც და ჩვენებურების ძებნა დავიწყეთ. ოსინი თურმე კიდევ დაეძახათ: მოდით, ახლა თქვენი რიგიაო. გავიგეთ თუ არა, მაშინვე საავადმყოფოს ქუჩაზე მოვუარეთ და წინ დავხვდით; ჩვენებურებს კი ეგონათ — დიდი ხანია აქ გველიანო და ერთმანეთს ეუბნებოდნენ:

— აგერა, ვეყო! აქ არა ყოფილან! ჩვენ კი ხალხში ვეძებდით!

სამაზრო სამმართველოს ძველი შენობა გატენილი იყო ხალხით. კიბემდის კი მივალწიეთ, როგორც იყო, და იმის იქით კი ველარა გავაწყეთ რა, რადგან ჯერ ველშებურგელებს არ ვათავებინათ და იმათ გამო ზედ კიბეზედ მოგვიხდა ლოდინი. და იმ ლოდინში, როდესაც გაჩუმებულნი ყველანი ერთი ფიქრით ვიყავით გატაცებულნი და ძალზედ აძაგძაგებულ გულს ველარ ვიმეგრებდით, როდესაც

ჩვენს გარშემო წამდაუწუმ საშინელი გრგვინვა გაჰქონდა ხალხის დახილს, ჩვენს მეფეს გაუმარჯოსო! სწორედ იმ ლოდინში, იმოდენა ხალხის ყრიაშულში, ყური მოგკარ ნაცნობს, სალამურივით ტკბილ ხმას. ჩვენი მარგალიტა, ჩვენი პატარა მარგალიტა იყო იქვე სადღაც ხალხში და გაიძახოდა:

„რა არის ხალხი? რა არის ხალხი? მღვდელი სიესის თხზულება. ბატონებო, ახალი წიგნი არა ვნებავთ? სიესის თხზულება — რა არის ხალხი! იყიდეთ, ბატონებო! სათემო კრებები, თხზულება თავადი ორლეანელისა, ვისა ნებავს სათემო კრებები?“

ნათლიაჩემთან მივედი და ვკითხვე:

— ჩვენი მარგალიტას ხმა არ გეყურება, ნათლიაჩემო?

— როგორ არა. რამდენი ხანია ყურს ვუგდებ. რა კოჩალები არიან მამაცა და შვილიც. აბა მაგათ უნდა სთქვან აი, ჩვენს ქვეყანას კეთილსინდისიერად ვემსახურეთო! ძაან, ძაან ღვაწლი დაგვდეს, ღვთის წინაშე. იქნება გაძვრე როგორმე და მარგალიტა ნახო, უთხარ შოველი გამოგზავნოს. ისიც მანდვე იქნება, ხალხში. დეე თვალითა ნახოს, როგორ ამოვირჩევთ. როგორ იამება!

მეტი თქმა კი აღარ მინდოდა! ზოგს მხარი წავეკარი, ზოგს ნიდაყვი და როგორც იყო ზევით ავედი და კიბის თავს მოვექეცი, გადავიხედე, აგერ ჩვენი მარგალიტა! შუა მოედანზედ გაჩერებულა, თავისი კალათი იქვე სკამზედ დაუდვია და ხელში წიგნები უჭირავს. ხან გამვლელსა სწვდება კალთაში, და დააყენებს, ხან გამომვლელსა. ხან ერთ წიგნს შესთავაზებს, ხან მერარეს!.. ისეთი სისწრაფით ასაღებდა წიგნებს, ქალი კი არა, პატარა ალქაჯი გეგონებოდათ. მარდი, ცქვიტი, სიცოცხლით სავსე, ისე აშუქებდა თავის გიშერივით შავი თვალებით, რომ იმის დანახვაზედ არჩევანიც დამავიწყდა და მთელი ქვეყანაც, ვიდეკი გაშტერებული და პატარა მარგალიტას მეტს ველარას ვხედავდი.

კარგა ხნის შემდეგ. გონზედ რომ მოვედი, როგორც იყო, მარგალიტამდე მივალწიე და ის იყო უნდა დამეძახა, რომ თითონვე მტაცა ხელი და შემომლიმა:

— რა არის ხალხი? ბატონო, ახალი წიგნი! აი, გასინჯეთ მღვდელი სიესის თხზულება — ინებეთ, ბატონო!

— რა ვქნა. ველარა მცნობ, მარგალიტა?

— მიშელ. შენა? — და გულიანად გაიკასკასა.

იცინოდა და თან შუბლიდან ოფლს იწმენდა: და თმას ისწო-

რგბდა. თმა გაშლოდა და მხრებზედ მოჰფენოდა. რა სიხარულით შეეყურებდით ერთმანეთს!

— რამდენს შრომობ, მარგალიტა! რამდენს ეწვალები!

— ნეტავი შენა, მიშელ! საქმე კეთდებოდეს, თორემ... არა უშავსრა, მომავალი ჩვენია. ჩვენ ეს წიგნები გავავრცელოთ.

კაბის ქობა დამანახვა. ისე ჰქონდა ტალახში გასვრილი და დაფხრეწილი, თითქო სამი თვის საველი გამოუვლიაო.

— წუხელი წამოვედით ლუნეველიდან, მთელი ღამე ვიარეთ. ექვსასი წიგნი წამოვიდეთ — რ ა ა რ ი ს ხ ა ლ ხ ი? და დღეს იმდენი გავყიდეთ, იმდენი! რომ სულ ასიც აღარ გვექნება.

ისეთი კმაყოფილი იყო თავის თავისა, ისეთი ბედნიერი, რომ თითქო მეც გადმომედო იმის სიხარული, ხელი ჩამოვართვი და... სულ სხვა მინდოდა მეთქვა, მაგრამ ენამ მიმტყუნა და ვკითხე:

— მამაშენი სადღაა?

— არ ვიცი. ქალაქში უნდა იყოს. საცა კი ხალხია, ისიც იქ არის. დუქნებში, ლუდხანებში; გაუყიდავი ერთიც არ დაგვრჩება სიესის წიგნი. მე დარწმუნებული ვარ, რომ მამამ აქამდე თავისები კიდეც გაყიდა და ახლა ჩემს საძებრად მოდის.

და უტბად ხელი გამომგლიჯა და ხუმრობით შემომიტირა: ახლა კი წადი! აგერ, ჩვენებურები შეიყვანეს დარბაზში!

— მე რომ ჯერ ოცდახუთის წლისა არა ვარ, მე ჯერ ხმა როდი მაქვს.

— ეგ სულ ერთია! წადი, ნუ მაცდენ! ტყუილად დროს ნუ მაკარგვინებ!

და ისევ წიგნებს მივარდა და დაიწყო:

— ბატონებო, ახალი წიგნები, სიესის წიგნი, რ ა ა რ ი ს ხ ა ლ ხ ი?...

განცვიფრებული წამოვედი. მე მარგალიტა ყოველთვის თავის მამასთან მენახა და ახლა, მართო რომ ვნახე, სულ სხვანაირად მეჩვენა. იმის გამბედაობა მაკვირებდა. მოვედიოდი და ვფიქრობდი:

— გაკირებას ის პატარა გოგო უფრო უკეთ დაახწევს თავს, ვიდრე შენ, ჩემო მიშელ.

აგერ კიბეზედ ავედი, აივანზედ გამოვედი, ხალხს გადმოვხედე და ჯერ ისევ იმავე ფიქრით ვიყავ გატაცებული. ბოლოს ნათლია-ჩემმა გამომიყვანა ფიქრიდან:

— რაო, ბიჭო? ვერსად იპოვნე?

— როგორ არა, ნათლიაჩემო, ოღონდ მარგალიტა მართო გახლავთ მოედანზედ: შოველი ქალაქშია თავის წიგნებით.

ამ ლაპარაკით შევედით დიდ დარბაზში, რიგი ჩვენ სოფელზედ

მომდგარიყო. არჩევანი ხმამაღლა იყო და რიგ-რიგად უნდა გაეცლო ყველას მაზრის უფროსის წინ და დაესახელებინა თავისი წარმომადგენელი. ჯერ ისევ გარედ ვიყავით, რომ დარბაზიდან ხმა გამოდიოდა:

— ივანე ლერუ! მატურინ შოველი! მჭედელი ივანე ლერუ! მატურინ შოველი! მჭედელი ლერუ! შოველი!

ნათლიაჩემი ისე გაწითლებულიყო, როგორც ჭარხალი.

— ნეტავი შოველი კი აქ იყოს და! რა ბედნიერი იქნებოდა! — მითხრა ნათლიაჩემმა.

ჩემდა უნებურად უკან მივიხედე და სახტად კი დავრჩი: შოველი იქვე იდგა ჩვენს უკან გაშტერებული: ეს რა მესმის, ყური ხომ არ მატყუებსო?

— ეს შენი საქმე იქნება, ივანე! — უთხრა ნათლიაჩემს.

— დიად, — უპასუხა ნათლიაჩემმა სიხარულით.

— შენგან არ მიკვირს. — უთხრა შოველმა და ხელი ჩამოართვა — დიდი ხანია გიცნობ! მაგრამ იცი რამ გამაკვირვა და მეტადრე ასე ძალიან რამ მასიამოვნა? როგორ წარმოვიდგენდი, რომ კეთილმორწმუნე კათოლიკეები კალვინისტს აირჩევდნენ თავიანთ წარმომადგენლად? ხალხი ყურადღებას აღარ აქცევს თავის ძველ ცრუმორწმუნეობას და, მამასადამე, გამარჯვება ხალხისაა.

ნელ-ნელა მივდევდით ხალხს და ორ-ორი შევდიოდით დიდ დარბაზში. აგერ ტანტრევიანივით ამადლებულ ალაგას მაზრის უფროსი ბატონი შნეიდერი ოქრომკედით ნაკერი შავი ხავერდის წამოსასხამით. აგერ იმის ამაღა სულ დიდებულნი, წარჩინებულნი პირნი. იქვე კედელზედ მშვენიერად გამოქრილი ჯვარცმა.

ჩვენებურებმა როგორც დაიწყეს — ლერუ და შოველიო, ისევე გაათავეს. სხვა ერთს არავინ დაუსახლებია. მარტო ერთმა სთქვა. ნიკოლოზ ლეტუმეი: და შოველიო! და მაზრის უფროსს ღიმილი მოუვიდა, ამას ივანე ლერუს გარდა ვინ იტყოდაო! და ერთმა კიდევ — ლერუ და ლეტუმეიო! სთქვა და ეს ერთიც შოველი იყო. შოველს კი კარგად იცნობდა მაზრის უფროსი და ღიმილი კი არა, უსიამოვნებაც დაეტყო სახეზედ, მაგრამ თავი შეიმაგრა. სწორედ იმ დროს მიუახლოვდა იმას ბატონი დეჟარდენი და რაღაცა წასჩურჩულა ყურში.

მე ხმა არა მქონდა და მარჯვნივ მხარეს გავედი. მერე ნათლიაჩემს და შოველს გავყევი. ქუჩაში გავედით, მაგრამ ვაი იმ გასვლას. სულ ოფლში გავიწურეთ, მანამ ხალხიდან გამოვიდოდით. უკან გავლა არ შეიძლებოდა, რადგან ჩვენს უკან მიტტელბრონელები იდგნენ და თავიანთ რიგს ელოდნენ. ავდექით და ძველ ბაზარში

გავედით. იქ კი ცოტა თავისუფლად ამოვისუნთქეთ. შოველი გამოგვეთხოვა:

— სალამომდის! შინა გნახავთ და მოვილაპარაკოთ!

ცოტა რამ კიდევ ჰქონდა გასასყიდი წიგნები.

მე და ნათლიაჩემი ერთად ავედით შინ. ხალხიც ნელ-ნელა მოდიოდა. დაღლა ეტყობოდა ყველას, მაგრამ სიმხიარულე კი არავის დაჰკლებოდა. მეტადრე იმას, ვინც ქალაქში შენაყრებულები და ღვინო ცოტა მეტი მოსვლოდა, ისეთი სიმღერითა და ყიყინით მიდიოდნენ, თითქო მაყრიონი არისო. მამაჩემი და ვალენტინი ძალიან გვიან ამოვიდნენ. ჩვენ რომ ისინი გვეძებნა, იქნება ვაზშმო-ბამდისაც ქალაქში ვყოფილიყავით.

ვანშამი რომ ავალაგეთ, შოველი და მარგალიტა მოვიდნენ. შოველმა გაზეთები მოგვიტანა და სხვათა შორის სიტყვები და განაჩენები თავადაზნაურთა და სამღვდელოების კრებებისა. მართლა საუტხოო სიტყვები ეთქვა ამ კრებებზედ და გაკვირვებული დარჩა ნათლიაჩემი:

— რა ვქნა, როგორ დავიჯერო, რომ ეს სიტყვა კეთილშობილის ნათქვამი იყოს? თუ მაგრე ფიქრობენ, ისე უღმერთოდ რად გვეკიდებინ?

აი, რა უთხრა პასუხად შოველმა:

— მომავალში სიტყვა და საქმე ერთმანეთს აღარ უღალატებენ. დიდებულნი კარგად ხედავენ, რომ ძალა ხალხის ხელთ არის და ტკბილი სიტყვით უნდათ გული მოგვიგონ. მაგრამ ხალხმაც უნდა შეიგნოს თავისი ძალ-ღონე და სამართლიანად მოიხმაროს იგი. მაშინ აღარც დაჩაგრული იქნება სადმე და აღარც დამჩაგრელი.

XII

ახლა კი მინდა ერთი ამბავი მოგახსენოთ, რომლის მოგონებებზედ ისე მიცემს გული, თითქო ოცი წლის ბიჭი ვიყო. მინდა ჩემი ბედნიერება გიამბოთ.

და მანამ კი საჭიროა იცოდეთ, რომ ჩვენ მიერ ამორჩეული წარმომადგენლები აპრილში შეიკრიბნენ ქ. ლიქსპეიშიში სამაზრო კრებად, რომ ხალხის გაჭირებული მდგომარეობის აღწერა შეედგინათ. ნათლიაჩემი და შოველი ორშაბათს დილით გაემგზავრებოდნენ და შაბათს სალამომდე იქ იყვნენ. ბინა რომ არსადა ჰქონდათ, დუქნებში ჩამოხტებოდნენ ხოლმე. მთელი სამი კვირა გასტანა ამ კრებამ.

ადვილი წარმოსადგენია რა მოძრაობა იქნებოდა იმ დროს ჩვენს მთაში: ბატონყმობა უნდა გადავარდესო, საბაჟოები აღარ უნდა

იყოსო. ხარჯი ყველას უნდა დაედოსო, გაიძახოდნენ ყველანი და ისეთს ცხარე ბაასსა და კამათს ასტენდნენ, რომ ჩვენვე გვიყვირდა, თითქო არა ვიცოდით რა და ახლა კარგად ვლაპარაკობთო! ღუქნები ყოველთვის ხალხით სავსე იყო; დასხდებოდნენ, წითელ ღვინოს მოიდგამდნენ და ისეთი გაბრაზებით სჯიდნენ სხვადასხვა საზოგადო საქმეებს, ვეგონებოდათ, ერთმანეთს მივარდებიან და მოსაკლავად არ დაინდობენო. განუწყვეტელი ყვირილი იდგა ღუქნებში, თუმცა უმთავრესის შესახებ ყველანი თანახმანი ვიყავით და ყველას, მთლად ხალხს, ერთი და იგივე გვინდოდა. კიდევ კარგი, რომ ასე იყო, თორემ უთანხმოება რომ ჩამოგვრევოდა, მგონი ერთმანეთი ამოგვეელიტა.

მე და ვალენტინი ძველებურად ვმუშაობდით სამკედლოში; ხანდახან ვცდიდი ხოლმე გამოვლაპარაკებოდი, იქნება დავარწმუნო, რომ ავი არა გვწადიან რა-მეთქი. მაგრამ სულ ტყუილი იყო: ვალენტინისთვის რომ გეკითხათ, ქვეყანა დაიღუპება, თუ გლუხებმა აჯობეს მებატონეებს და სამღვდელოებასაო. რამდენჯერმე ვცადე, მაგრამ იმისთანა მტკნარ სისულელეს ამბობდა, რომ ციდან ჩამოსულ ანგელოზსაც კი გააჯავრებდა. მეკი უნცროსიც ვიყავ; პატივისცემაც მქონდა მისი, და თავი დავანებე: ვაი თუ გაგბრაზდეს და ვაწყენინო რამე-მეთქი. მეტიც იქნებოდა იმასთან ლაპარაკი: ზემოთ მთაში, სადღაც ტყეში. ერთი პატარა ქოხი ებადა და თუ იტყოდა რასმე, სულ იმის ოცნებაში იყო, ოსტატს დავეთხოვები, შინ წავალ და ჩიტებს მახეებს დავუგებო. ისე გაიტაცებდა ხოლმე ეს ოცნება, იმისთანა ნეტარებით გაუბრწყინდებოდა სახე, თითქო ქვეყანაზედ ამ ქოხის და ჩიტების დევნის იქით ღმერთს აღარა გაუჩენია რაო. დიდით პატარამდე ყველანი გულის ფანქვალით მოველოდით ხვალინდელ დღეს, ვგრძნობდით, რომ სულ ძირიანად უნდა შეცვლილიყო ჩვენი ცხოვრება და ის კი ჩიტების დევნასა ფიქრობდა:

— ხედავ, რა კარგი დარები დაიჭირა, მიშელ! ძაან, ძაან იბაჟტყებენ მწყერები. დადგება მარიამობისთვე და კიდევ დავეთხოვები ოსტატს, მწყერი მარიამობისთვეში უნდა ნახო შენ! ისეთია, როგორც ღუმალ! მეტადრე როდესაც ყურძენს თვალი შეუფა!

გრძელი პირისახე უფრო გაუგრძელდებოდა, ყურებამდე გაწეულ პირის ნაპობზედ სიხარულის ღიმილი გადაჰკრავდა და ისე მოხუჭავდა თვალებს, თითქო აგერ კიდევ დახოცა მწყერები, დატყვნა და შამფურზედაც ააგოო. განა სადმე ცხენი გადარჩებოდა, რომ ძუა არ დაეგლიჯა!

ჩემი გონება კი სამაზრო კრებასთან იყო. იმ წელს, ენკენის-

თვეში. მეც უნდა გამოვცხადებულყავ ჯარში და კენჭი ამომედო, დღე და ღამ სულ იმის ფიქრში ვიყავი, ნეტავი ჯარს დაშლიან თუ არა-მეთქი.

მაგრამ საქმე სხვანაირად დატრიალდა.

აგერ რამდენიმე ხანია, საღამოობით შინ რომ მივიდოდი, ჩვენსა სტუპრები დამზღვდებოდნენ — ლეტუმის ცოლი და იმისი გასათხოვარი ქალი. თავიანთ მატყლს ჩვენსა ჩამოიტანდნენ და დედაჩემთან ერთად ართავდნენ. მამაჩემი, მატურიანი და სტეფანე იქვე კალათებსა სწნავდნენ. ერთადა საქმობდნენ, თან ლაპარაკით შეეჭყევივოდნენ და ათი საათი რომ გახდებოდა, შინისკენ გაემგზავრებოდნენ. იმ დროში ლეტუმის ძალიან შემძლებელ კაცად ითვლებოდა და კარგი რვა დღის ხოდაბუნი ჰქონდა გადაჭიმული. ქალიც ლამაზი ჰყავდა: მაღალ-მაღალი, ჩასუქებული გოგო იყო და წითლად დაჟღაჟი გაუდიოდა. დღეც ხშირად მინახავს ლეტუმის ანო — გაიდებდა მხარზედ კოკას და სამკვდლოსკენ ჩამოივლიდა, ვითომ წყალზედ მივდივარო. გაივლიდა, სამკვდლოში შემოიხედავდა, და გამოივლიდა, კიდევ შემოიხედავდა. მე კი ფიქრადაც არა მომდიოდა რა. საღამოზედ შინ რომ მივიდოდი, ანოს ისე მივესალმებოდი, როგორც ზრდილობა მოითხოვდა: გავეხუმრებოდი, ერთი-ორ ტკბილ სიტყვას ვეტყოდი. ყმაწვილი ბიჭი და ლამაზი გოგო! ანო კი არა, ვინც უნდა ყოფილიყო, ყველას ასე მოვექცევოდი; და სხვა კი, ღმერთმა ხომ იცის, მე არა მწადდა რა.

მაგრამ დედაჩემი სულ სხვა თვალთ თურმე გვიყურებდა. ერთხელ მითხრა:

— იცი, მიშელ, კვირას, ლუტცელბურგში ლხინსა მართავენ, ძალიან კარგს იზამ, რომ შენი ახალი ტანისამოსი ჩაიცვა და აიარო. ბევრს ისიამოვნებ.

გამიკვირდა, რადა მგზავნის-მეთქი, მაგრამ დედაჩემმა ხეირიანი პასუხი არ მომცა:

— ადი და ნახავ!

მამაჩემი კი ჩაფიქრებული მუშაობდა. ნახა, რომ დედაჩემის პასუხმა არ დამაკმაყოფილა და მითხრა:

— ლეტუმის ძალიან შემძლებული კაცია... ადი, შვილო, ანოც იქ იქნება.

ძალიან შევწუხდი. ის კი არ ბრძანოთ, ქალი არ მომწონდა და იმიტომ შესწუხნაო. არა, ანოს დასაწუნი არა ჰქონდა რა, მაგრამ რა დროს ჩემი ცოლიანობა იყო? პირდაპირ უარის თქმა ვერ მოვახერხე და ცნობისმოყვარეობით იყო თუ სისულელით, თუ არ ვიცი

უფრო მამიჩემის პატივისცემით, რადგან აშკარად ეტყობოდა, რომ ამით ძალიან ვასიამოვნებდი, ვუპასუხე:

— როგორც მიბრძანებთ. ეს კია, რომ ჯერ ჩემი ცოლის შერთვა მეტად ადრე იქნება. ვინ იღის, იქნება კენჭიც მერგოს.

— ახლა ეს მომიყვება!.. ნეტა რა გეხარჯება? ახვალ, დროს გაატარებ, შენც ისიამოვნებ, და იმათაც ასიამოვნებ. სხვა კი არაფერი! — შემომიტია დედამ.

რალა გაეწყობოდა, უნდა დავთანხმებოდი.

კვირას, წირვა რომ გამოვიდა, ეკლესიიდან პირდაპირ მთისკენ გავწიე. გავუდევ გზას, შევეყევი მთის ბილიკს და თან სულ იმასა ვფიქრობდი, ნეტავი რისთვის მივდივარ, ვინ მე და ვინ ეს ამბავი მეთქი?

ლუტცელბურგში ხილის ყურზედ ცოტა მარჯვნივ ქვრივ ბერნელსა ჰქონდა დუქანი და დუქანზედ კიდევ უკეთესი დაჩრდილული ეზო. როცა კი ლხინი გაიმართებოდა, უთუოდ იმ ეზოში უნდა გამართულიყო, რადგან მამა ქრისტეფორე ამ მხრივ სრულიად არ ჰგვანდა სხვა მღვდლებს და ისე უყურებდა ყმაწვილების დროსტარებას და ცეკვა-სიმღერას, თითქო არც კი ხედავს და დაირის ხმა არც კი ესმისო. იმ დღესაც ბერნელის ეზოში გაემართათ ლხინი და ბლომად ხალხიც მოგროვილიყო. ღვინოსა სვამდნენ და თან სიმღერებს დასძახოდნენ. ყმაწვილებს კი ცეკვა გაემართათ.

შევედი, მივიხედ-მოვიხედე, გოგოები დავათვალიერე... ის იყო წინ წავიწიე და ლეტუმის ცოლმაც დამინახა:

— აქეთ, მიშელ, აქეთ!

ლამაზი ანოც იქვე იყო. დამინახა და ცეცხლივით აენთო. მივედი, ხელი ჩამოვართვი და სათამაშოდ გავიწვიე.

შემომცინა... გამომყვა და თამაშობაში რამდენჯერმე წამოიძახა.

— ოჰ, მიშელ! ოჰ, მიშელ!

ყველაფერი შეიცვალა და ქალები ისევ ისეთები არიან, როგორც ყოველთვის ყოფილან. რევოლუციის წინად თუ მის შემდეგ, რაც კი მე ჩემი თავი მახსოვს, ქალი იგივე იყო, რაც ეხლა არის. რამდენჯერმე ვითამაშეთ, თან ვლაპარაკობდით, ვხუმრობდით, ვიცინოდით. ლეტუმის ცოლის სიხარულს საზღვარი არა ჰქონდა; თამაშით აწითლებული ანო კმაყოფილებას უფრო დაემშვენებინა და თავდახრილი, მორცხვი, მართლა ლამაზი რამ იყო. პოლიტიკაზედ ხმაც არ ამოგვიღია, მერწმუნეთ! ვითამაშობდით, დროს ვატარებდით, მერე ერთი კარგი ქადა გაიხელით და ცოტა რამ ღვინოც დავაყოლეთ ზედ. რას იზამთ? ჩვენი ცხოვრება კი ეს არის და!

სულ კი დედაჩემი მაგონდებოდა:

არც ახლა დამრჩები მადლიერი? რამდენ ქებას მოგიტანენ შენი შვილისას!

მაგრამ შებინდდა და მომწყინდა იქაურობა. აღარც გამოთხოვე-ბა მომგონებია, აღარც ზრდილობა, დავკარ ფეხი და შინისკენ წამოვედი. გზის შესამოკლებლად პირდაპირ დავეშვი ფიჭვის ტყიან კლდეზედ.

გაზაფხულისდა კვალად ძალიან ცხელოდა. ისე იყო ამწვანებუ-ლი მთელი არე, თიბათვე გეგონებოდათ. ღმერთო, რა კარგად მა-ხსოვს ყველაფერი. რამდენი ხანია მას შემდეგ, და ეს კი ისევ თვალ-წინ მიდგას, თითქო გუშინ იყო.

ბოლოს მთის მწვერვალზედ გავედი. დავდექი და ჩვენს სოფელს გადავხედე. იქვე ჩემს ქვევით შარა გზაზედ, სულ სამას ნაბიჯზედ ერთი პატარა, მტკრისაგან გათეთრებული და კალათ ქვეშ მოხრი-ლი ქალი დავინახე; მიდიოდა გაჩქარებული, თითქო მდევარი მის-დევსო. მაშინვე ვიცანი:

— ბიჭო, ჩვენი მარგალიტა! დიად, ჩვენი მარგალიტა!

გამოვეკიდე, მთა ჩავიბინე...

— მარგალიტავ, შენა?!

შედგა. უკან მოიხედა... გამტვერიანებულ სახეზედ წურწურით ოფლი სდიოდა, თმა გაშლოდა. შედგა და შემომცინა:

— ოჰ, მიშელ! ნეტავ სხვა ნატვრაც ასე ამისრულდებოდეს ხოლმე.

ზურგზედ იმოდენი საპალნე ეკიდა, რომ თამას მხრები ჩაკჭრა. ვიდექი და გაკვირებული, გულამღვრეული შევყურებდი ამ პაწაწა, პაწაწკინტელა, მაგრამ ბევრ ვაუკაცზედ მარჯვე გოგოს.

— სად დაღალულხარ აგრე? — მკითხა მარგალიტამ. — შორი-დან მოდიხარ?

— არა, ლუტცელბურგიდან მოვდივარ. ლხინში ვიყავი და ბევ-რი ვითამაშე.

— კარგია! მე კი დაბოდან მოვდივარ; მთელი მაზრა მოვიარე. იცი რამდენი წიგნი გავყიდე, მეტადრე სიესის „რა არის ხალხი“. ძალიან დროზე კი მივედი, ის იყო საძვდელოების წარმომადგენ-ლები იკრიბებოდნენ. გუშინ წინ დილას ლიქსეიმში ვიყავი, ლო-რენში.

— რა ვქნა, რა ხარ მარგალიტა, რომ მაგდენ სიარულს უძლებ?

— სულ უბრალო ადამიანიშვილი, როგორც სხვანი. ცოტა არ იყოს, დაღლა. შემომეპარა! მაგრამ იცი, უმთავრესი უკვე გათავე-

პულია. ახლა თვით ღმერთიც ვეღარ შეაყენებს ხალხის მოძრაობას.

თან ისე გულიანად იცინოდა, თითქო ზურგზედ მძიმე ტვირთი კი არა, სულ უბრალო ცარიელი კალათი ჰკიდიაო. მაგრამ აღბად ძალიან დაღლილი იყო, რომ იქვე გზის პირას კედლის ნანგრევზედ ჩამოსდგა თავისი კალათი და მითხრა:

— მოდი ცოტა შევისვენოთ, მიშელ! სული მოვიბრუნოთ!

მივევარდი, კალათი მოვხადე და კედელზედ შევდგი.

— დავსხდეთ, მარგალიტა, შევისვენოთ; ღმერთმან იცის, შენ უფრო ძნელი ხელობა აგირჩევია, ვიდრე ჩვენ, ვაჟკაცებს.

— იქნება მართალიც იყოს, მაგრამ რომ იცოდე, რა კარგად არის ჩვენი საქმე. შენც უნდა დადიოდე და ჩემსავით ქვეყანას ხედავდე, რომ ასე გიხაროდეს. როგორ არ გეხსომება, გუშინ არ იყო, რა პირუტყვივით დამონავეებული იყო ჩვენი გლეხკაცი; დღესა? დღეს ვეღარც კი იცნობ. ზოგი ხალხი საუკუნეში ვერ გაივლის იმ გზას, რაც ჩვენ ამ რამოდენიმე წლის განმავლობაში გავიარეთ. ჩვენ წინაპართაგან დაკარგული უფლებანი ხომ მოვიპოვეთ, ახლა სხვებსაც ბევრს მოვიპოვებთ. მოვითხოვთ და მოვიპოვებთ კიდევ! ჩვენ ჩვენსას არავის რას შევარჩინოთ! მეფეს კი არა, ღმერთსაც წავედავებთ! ყველანი თანასწორნი უნდა ვიყოთ! ხარჯიც თანასწორად უნდა გვედოს, ყველა ნიჭისა და შრომისდა კვალად უნდა იყოს დაჯილდოვებული და წარჩინებული! რა საჭიროა შენთან სიტყვა გავაგრძელო, თავისუფლება გვინდა, თავისუფლება!

და ისე მიყურებდა, თითქო უნდა გულის გულში ჩამიძვრეს და ჩემი გულის პასუხი ამოიკითხოსო. მე კი აღტაცებული შევცქეროდი და ვფიქრობდი:

— ჩვენც ვიტყვით, კაცნი ვართო! ჩვენც ვიტყვით, ჩვენი ქვეყნის შეილნი ვართო! რა შევძინეთ ჩვენს ქვეყანას? რა შევმატეთ? რითი გადავუხადეთ ჩვენს აღმზრდელ სამშობლოს ამოდენა სიკეთე? აი, რამდენს იტანჯება მამაშვილი საზოგადო საქმისთვის. ჩვენ? ჩვენ ჩვენი პირადი ბედნიერების გარდა არა გვაგონდება რა.

თითქო მიხვდაო ჩემს ფიქრებს, ტკბილად შემომღიმა და მითხრა:

— ასე, ჩემო მიშელი. ხალხის საჭიროებათა აღწერა თითქმის ყველგან გაათავეს. დავბუქდავთ პატარ-პატარა წიგნაკებად და უყურე, როგორ მოვფინოთ ჩვენი ქვეყანა! მოიცა, გამოვიდეს! სულ დაიტაცებენ! ათასობით გავყიდის მანამ კი მე მარტო დავდივარ სავაჭროდ: მე და მამაჩემს ამის მეტი საღმარე არა გვაქს რა საცხოვრებლად: მე უნდა ვიარო, მამაჩემის წილიც მე უნდა ვიშრომო, რადგან ის ხალხის სამსახურს უნდებდა. გუშინწინ ცოტა რამ ფული

მივუტანე ლიქსპეიმში, ერთი კვირა ეყოფა; გუშინ და დღეს კიდევ ვივაჭრე; ზეგ კიდევ ვნახავ და ერთი კვირის ფულს კიდევ მივცემ. არა გვიშავს რა! საერო კრება რომ გაიხსნება, აბა საქმე მაშინ იქნება, აი! თუ გვინდა, ხალხი გამოვაფხიზლოთ, უნდა სუყველაფერი გავაგებინოთ, რაც კი კრებაზედ ან ითქმის ან მოხდება; აბა საქმე მაშინ იქნება, აი! დიდი გარჯა მოგვინდება, მაგრამ საქმეს ხომ ვერ ვუღალატებთ? ხალხმა დაწვრილებით უნდა იცოდეს ყველაფერი, რომ გონება გაეხსნას, განათლდეს და თავისით განსაჯოს თავის მომავალი. არა, მიშელ?

— დიად, დიად, მარგალიტა! შენც მამაშენივით მელაპარაკები და შიგ გულში მხვდება შენი სიტყვები.

კედლის ნანგრევზედ იჯდა თავის კალათის ქვემოდან. ჩამავალი მზის სხივები მოჰტენოდნენ ჩვენს ქვემოდ თვალუწვდენელ მინდორს და ოქროს ფერად შეემკოთ ტყე და ველი. იმისთანა მშვენიერი რამ იყო ბუნება, რომ ორივე გაგვიტაცა და გაჩუმებულნი გავყურებდით თვალის წარბტაც სურათს. ცოტა ხანს უკან მარგალიტას შევხედე. ნიდაყვზედ დაყრდნობილიყო და... ჩამავალი მზე კი არა, ამომავალ მზეზედაც უმშვენიერესად მეჩვენა მაშინ ჩემი მარგალიტა. ქვეყანაზედ აღარა მახსოვდა რა, იმის მეტი.

ბოლოს, თითქო იგრძნო, რომ იმას ვუყურებდი და მკითხა:

— ძალიან მტვრიანი ვარ, მიშელ?

პასუხის მაგივრად მე ჩემი ვკითხე:

— რამდენი წლისა ხარ, მარგალიტა?

— ამ ორი კვირის შემდეგ, კვირაცხოვლობა დღეს თექვსმეტი წლისა გავხდები. შენ, მიშელ?

— მე მეცხრამეტეში გადავდექი.

— იმიტომაც აგრე ღონიერი ხარ და!—წამოხტა მარგალიტა და თასმაში მკლავი გაკყო.—ცოტა ამიწიე! გმადლობ, აღარა მიშავს რა.

მე რომ მძიმე მეჩვენა, იმას რა სიკეთეს დააყრიდა იმოდენა ტვირთი?

— მაგ სიმძიმეს როგორ დასძრავ, მარგალიტა? მოდი, შინამდინ მე წამოგიღებ.

წარბიც არ შეუხრია. სიმძიმისაგან წელში მოხრილი მოდიოდა ჩემს გვერდით. ერთი კი შემომცინა და მითხრა:

— როცა თავისუფლებისთვის იღწვის ადამიანი, ტვირთის სიმძიმეს არ უნდა გრძნობდეს.

რალა მეთქვა, თუმცა ძალიან კი შემრცხვა. რომ არ შემრცხვენოდა, დავიჩოქებდი და თაყვანსა ვცემდი.

მარგალიტა კი ისე მოაბიჯებდა, თითქო დაღლა არც კი იცის რა არისო. მოდიოდა და მელაპარაკებოდა:

— იცი რა ამბავი დააწიეს ლიქსპეიმში სამაზრო კრებაზედ მებატონეების და სამღვდლოების წარმომადგენლებმა! მაგრამ ღვთის წყალობა გაქვს, კარგი პასუხი იმათ მიიღეს! ერთი დაიბეჭდოს ხალხის გაკვირებათა აღწერა! სუყველაფერი იქნება მოხსენებული, არაფერი გამოგვეპარება. მეფე გაიგებს მდგომარეობას და ხალხიც შეიგნებს თავის ყოფას. საერო კრება გაიხსნას! მამაჩემი ამბობს, სამაგალითო კრება იქნებაო და მეც ეგრე მგონია. ვნახოთ! ვნახოთ! საქმე ის არის, მხარი მივცეთ ჩვენ წარმომადგენელთ. გავამაგროთ, რომ იმედი ჰქონდეთ ჩვენი! დარწმუნებულნი იყვნენ, რომ მარტო ისინი კი არა, ყველგან და ყოველთვის იმათთან იქნება მთელი ხალხი.

ამგვარი ბაასით შევედით ჩვენს სოფელში, მარგალიტა შინამდე მივაცილეთ. კარგა ღამე იყო. ჯიბიდან ერთი უზარმაზარი გასაღები ამოიღო, კარი გააღო და გამომეთხოვა:

— ღამე მშვიდობისა, მიშელ! გმადლობ!

— ძილი ნებისა, მარგალიტა!

ჯერ არც ღედას ეძინა ჩვენსა, არც მამას. ეტყობოდათ მე მელოდნენ და შევედი თუ არა, ისე შემომამჩერდნენ, თითქო მეკითხებიან — გაათავე თუ არა საქმეო? რაკი ნახეს, რომ არას ვეუბნებოდით, მკითხეს:

— ლხინში იყავი, მიშელ?

— დიად.

— მერე?

— მერე რა? კარგი დროება გავატარეთ.

— მერე?

— მერე ავდექი და წამოვედი.

— მარტოდმარტო?

— დიად.

— იმათ კი არ დაუცადე?

— არა.

— არც არაფერი უთხარი?

— რა უნდა მეთქვა?

მაშინ კი გაჯავრდა დედაჩემი, გაბრაზდა და ყვირილი დაიწყო:

— უი შენ კი რა გითხრა, შენ!... შენც იტყვი, კაცი ვარო?! კაცი კი არა, ვირი ხარ, ვირი! შე რეგვენო. შენა! და ის კიდეც შენზედ უვარესი რეგვენია, ის გოგო, რომ შენ მოსწონხარ! არა, კიდეც რომ

ინაზება! ნეტა რა ხარ, ვინა ხარ, შე გლახა, შენა! ლუკმა პურის ნატრულს ლეტუმზე ქალს აძლევს და კიდევცა სწუნობს! უი შენ კი...

სულ ცოფსა ჰყრიდა. მე კი ვიდექი და შევეყურებდი სრულიად დამშვიდებული. ბოლოს მამამ უთხრა:

— კმარა, თავი დაანებე!.. ნუ ყვირი აგრე, დედაკაცო!

მაგრამ დედაჩემს აღარავისი არ ესმოდა და უფრო მალლა გაჰკივოდა:

— არა, ამისთანა უტვინო გინახავთ ვინმე, თქვენი ჰირიმეთო აგერა ექვსი თვე სრულდება, ფეხქვეშ ვეგები ვირგლა ლეტუმზე, ეგება ამ ბიჭს შეერთო, მამულიანი გოგოა-მეთქი, და ეს კი... უი, შენამც... აგრე მცოდნოდა, განა სახლში კი შემოვუშვებდი... ქა, გული გამიწყალეს თავიანთ სიმდიდრეზედ ლაპარაკით! ეს მიწებიო, ეს ვენახიო, ეს ძროხებიო! მე კი გული მისივდებოდა! მაგრამ რას ვიზამდი? ვიყავი ჩემთვის გაჩუმებული, ვითმენდი, ბრაზს გულში ვიკლავდი... და როცა საქმე საქმეზედ მოვაგვარე, როცა ყველაფერი გავათავე, ეს ვაჟბატონი აღარა ნდომობს. მაშ ვინა გნებავს? ჰა, შე ჩემი ცოდვით სავსე, შენა?... ქა, ვერა ხედავთ, რა დიდი კაცია! იმისთანა დიდი ოჯახის ქალები ეძლევა, რომ ლეტუმზეს გომბიოს როგორ იკადრებს! უი, შენ კი... ნეტა რა შეგცოდენ, ლმერთო, რომ ამისთანა უჯიშო გამიჩინე ეს გულმკვდარი ესა!

მინდოდა პასუხი მიმეცა, მაგრამ უფრო ძალიან შემომიტიხა:

— გაჩუმდი შე... სანაგვეზედ სადმე ამოგზდება შიმშილით სული და შენთან ერთად ჩვენც შიმშილით დავიხოცებით!

აბა რა მეთქვა? კარგ მთქმელს კარგი მსმენელი უნდაო, და მე რომ მსმენელი არა მყავდა! ის თავისას გაიძახდა:

— დიალ, არა ნებავს ამ ვაჟბატონს! მოდი შენა და შვილები გაზარდე! იქნება გგონიათ სიკეთით გადაგიხადონ ადგებიან და ერთ ჩარეკა ღვინოზედ გაიყიდონ თავსა! აი, ნახავთ, თუ ამანაც ეს საქმე არ დაგვმართოს! ნახავთ! თუ არა და წაევა და ერთ უნამუსოს გადაეკიდება ვისმე! მაშ არა და! აღბადა ჰყავს ვინმე, თორემ უარს არ იტყოდა!

ხელში ცოცხი ეჭირა და გაჯავრებული იქნევდა. ეს რომ თქვა, უცბად გაჩერდა და დამაშტერდა. მე მეტი აღარ შემეძლო და სრულიად ფერმიხდილი ავედი ყავარში, რადგან ზაფხულში იქ მეძინა ხოლმე. დედაჩემი კი მაინც ისევ ისე ჯავრობდა:

— გაიქეცი განა! არ გეჭაზნიკა! მიგიხვდი განა, შე... მე კი არ ვიცოდი, რომ ეყოლებოდა ვინმე!.. თუ კაცი ხარ, უარს იტყვი!

დანა რომ დაესვათ, სისხლი არ გამომივიდოდა. სირცხვილისაგან ვიხრჩობოდი, ძლივსლა ვსუნთქავდი. მივედი და მკვდარივით მი-

ვეგდე და ქვემოდან კი ისევ წყევლა-კრულვა და ლანძღვა ისმოდა: შე უსინდისო, შენა... შე უნამუსო...

მამაჩემი ცდილობდა დაემშვიდებინა როგორმე, მაგრამ მით უფრო აბრაზებდა. დიდი ხანი იჯავრა, დიდი ხანი! მეორე საათი იყო, როდესაც გული მოიოხა და გაჩუმდა. მე კი ვეგდე თივაზედ და ცხარე ცრემლითა ვტიროდი.

— ნეტავ რას მერჩის-მეთქი, ვიძახდი ჩემს გულში, რა დავაშავე? ჯერ ათის წლისა არ ვიყავ, რომ მუშაობა დავიწყე — ბავშვობაც კი არ ვიცი რა არის. ვმუშაობდი, რომ ვალი გადამეხადნა, ვმუშაობდი, რომ მოხუცებულ მამაჩემს დავხმარებოდი... და ახლა კი რეგენიცა ვარ, უსინდისოც, უნამუსოც!? რა დავაშავე? იმ ქალის და იმის მზითვის შერთვა არ მინდა, სხვა ხომ არაფერი! მე რე ამიტომ უნდა გამწიროს მშობელმა დედამ? ამიტომ უნდა დამწყევლოს!?

ცრემლი შემაშრა. ბრაზი მახრჩობდა. პატარა სტეფანეს ტკბილად ეძინა იქვე ჩემს გვერდით, მე კი რა დამაძინებდა? იმისთანა ფიქრები მომდიოდა, რომ ჭირის ოფლს მასხამდა, სისხლი ყელში მომებჯინა და მახრჩობდა.

ოთხი საათი იქნებოდა, რომ ავდექი და ფეხაკრებით, რაც კი შეიძლებოდა ჩუმად, ძირს ჩამოვედი. მამაჩემს არ ეძინა, და მკითხა: — შენა, მიშელ? სად მიხვალ, შვილო?

— ცოტას გავივლი, მამა!

მინდოდა მივსულიყავ და გულში ჩავკროდი, რადგან ვიცოდი, მამაჩემს კარგად ეყურებოდა ჩემი მწუხარება, მაგრამ ვგრძნობდი, რომ არც დედაჩემს ეძინა და პირდაპირ კარისაკენ წავედი. ერთი სიტყვაც არის რომ ეთქვა დედას, ერთი სიტყვა, შევდგებოდი და ძველებურად მივეალერსებოდი, მაგრამ ის არას ამბობდა და მეც გარედ გამოვედი.

ჩვენ ქვევით მინდორი ბურუსით იყო მოცული. კარგად სუხიანი დილა იყო, მაგრამ მე კი სისხლი მიდულდა და ცეცხლი მეკიდებოდა. მივდიოდი ზევით მთაში, და სულ იმას ვნატრობდი, სად არის ახლა ერთი ცივი ქარი, რომ გული გამიგრილოს-მეთქი. მივდიოდი ისე უგზო-უკვლოდ და მარტო ღმერთმა იცის, რასა ვფიქრობდი მე მაშინ. აქ რალა დამაყენებს-მეთქი, ვიძახდი, ავდგები და სავერნში წავალ, ან კატრვანში; ქარგალი ვარ, ხელობა კარგად ვიცი, ნუ თუ ერთ ლუქმაპურს ვერა ვჭამ? და იმავე დროს საწყალი მამაჩემი მაგონდებოდა და მატურინი და პატარა სტეფანე. მომაგონდებოდა მოხუცებული მამაჩემი და ამიჩქროლდებოდა გული და თვალთაგან ცხარი ცრემლი წამსკდებოდა. მაგრამ რა? დედაჩემი

თავის დღეში არ დაივიწყებს. ლეტუმის ხოდაბუნს და წამ და უწუმ იმას წამომაყვედრებს, შენ დაგვლუპე, თორემ ესლა ჩვენისთანა გაკეთებული იქნება არც კი ყოფილიყო ვინმე ჩვენს სოფელშიო! იმდენი ფიქრები მერეოდა თავში, რომ აღარც დაფიქრება შემეძლო, აღარც მოსაზრება და ისე უგრძნობლად მივიღიოდი მთისკენ.

გონებაზედ მარტო მაშინ მოვედი, როდესაც მზე ამოვიდა და შუქი მოჰფინა ბუნებას. დილის ნიაგმა დაბერა და სევდა გამიქარვა. უცბად მომაგონდა ჩემი ფიქრები, ჩემი თავისა შემრცხვა და მაღლა წამოვიძახე:

— უნდა დარჩე, მიშელ! სუყველაფერი უნდა აიტანო და უნდა დარჩე! ნუ თუ მოხუცებულ მამაშენს უღალატებ! ან პატარა დამას? განა არ იცი, რომ შენს იქით იმათი იმედი არავინ არის? დედა გიჯავრდება? რა ვუყოთ, რა? მშობელი დედაა და იმიტომ გიჯავრდება. უნდა დარჩე, მიშელ, უნდა დარჩე!

ეს ფიქრები და ჩემი დაბრუნება ერთი იყო. რომ უფრო მოკლედ მომეჭრა, ჭალაზედ ჩამოვიარე, მერე ვენახებზედ და სოფელს დავუპირდაპირდი. თან გულს ვიმაგრებდი. შორიდანვე ვხედავდი ჩვენს სამკედლოს და საკომურიდან ამომავალ კვამლს, ეტყობოდა ვალენტინი ამდგარიყო და ქურაში ცეცხლი გაეჩინა.

მეც ფეხი ავაჩქარე. ის იყო სოფელში შევედი და ვნახოთ გზის პირიდან შოველის პატარა ბოსტანიდან რაღაც ხმაურობა შემომესმა. გადავიხედე: აედო პატარა მარგალიტას ბარი და გაჩქარებული ბარავდა მიწას კარტოფილის დასათესად. გავკვირდი, გავშტერდი, წუხელის არ იყო ისე დაღალულ-დაქანცული მოვიდა! როგორ შესძლო, რომ ასე ადრე ადგა და აგერ მეორე კვალსა ბარავს-მეთქი? ვფიქრობდი და გაშტერებული შევცქეროდი ღობის გარედან.

რა იცოდა, რომ ვუყურებდი. ფეხი ხ ის ფლოსტებში ჩაეყო და ისეთი მამაცად ჩაუგდებდა ხოლმე ბარს, თითქო თავის დღეში ბარვის გარდა არაფერი სცოდნიაო. მე კი ვუყურებდი და, თითქო დღეს პირველად ვხედავო, ცალ-ცალკე ვუსინჯავდი შავ თვალ-წარბს, ახლად გადაშლილ ვარდივით ჩაწითლებულ ტუჩებს, ლამაზად გადატყეცილ შუბლს და მსხვილ ნაწინავებს. მამასა ჰგავდა, იმისავით გამხდარი იყო, მაგრამ ისე სცემდა ბარს, თითქო ხელ-ფეხი ფოლადისა აქვსო. შევყურებდი და მიკვირდა: ეს ხომ ჩვენი პატარა მარგალიტაა და რატომ აქამდის ვერ ვხედავდი იმის სილამაზეს-მეთქი?

დიდი ხანი ვუყურე ასე და უცბად, დედაჩემის სიტყვა მომაგონდა: ანოს იმიტომას სწუნობს, რომ სხვა ეყოლება ვინმეო!

— დიად, დედაჩემო, მართალი ხარ, მე სხვა მყავს, სხვა მიყვარს... ამას არც გადაჭიმული ხოდაბუნი აქვს, არც რამე მზითვი

და ძროხები, მაგრამ შრომა იცის და ჩემი ცოლიც ეს იქნება. ჩვენი შრომით შევიძინებთ ყველაფერს... ჯერ კი... ჯერ ამის გული მოვიგო! და მოვიგებ კიდევ, თუ ბიჭი ვარ! ჩემი შრომით მოვიგებ!

და ამის შემდეგ ერთხელ არ მახსოვს ჩემი გარდაწყვეტილება შემეცვალოს; მარგალიტას თაყვანსა ვცემდი, ვალმერთაბდი და, მეც არ ვიცი რად, ჩემად ვიგულებდი. აზრადაც არ მომდიოდა, რომ შეიძლებოდა სხვაზედ გათხოვილიყო.

ქუჩაში მინდვრისკენ მიმავალი სოფლელები გამოჩნდნენ, და მეც სრულიად დამშვიდებული და გახარებული გავეშურე სამკვედლოსკენ. ვალენტინს ყველაფერი მოემზადებინა, სახელო გადაეწია და გულგადაღელი იდგა ჩაქუჩით ხელში.

— რა დარია, მიშელ, რა დარია! — შემომყვირა მიმავალს, — აჰ, ნეტავი კი დღეს კვირა ყოფილიყო და! თავი არ მომიკვდება, მთელ ტყეს შემოვირბენდი!

— კვირა გუშინ იყო, ჩემო ვალენტინ, — ვუთხარი მე და ჩემი ტყავის წინსაფარი გავიკეთე, — გუშინდელიც გვეყოფა, ახლა საქმეს შევუდგეთ.

— მერე, რომ იცოდე, რამდენი რამა გვაქვს გასაკეთებელი. ბებრუცუნა რანცაუმ ოცდაოთხი თავისავით უკბილო ცული მოგვიტანა. ნეტავი სად მოაგროვა ამდენი? ერთმა მთიულმა კიდევ ურმის თვლები მოგვიტანა, რკინით შემომიჭედეთო.

— მით უკეთესი, ვალენტინ. აბა დავიწყეთ?!

— ვახსენოთ ღმერთი და დავიწყეთ.

იმისთანა მხორული გულით ჩემს დღეში არ დამიწყია მუშაობა. რკინა უკვე ცხელი იყო. გამოიღო ვალენტინმა, დასდო გრდემლზედ და ავაყოლეთ ჩაქუჩები!

ყოველთვის ასე ვიცოდი ჩემს სიცოცხლეში. ყოველთვის, როდესაც კი ნათლად, გარკვევით შევიგნებდი, რაც მინდოდა, რაც უნდა ძნელი და მიუღწეველი ყოფილიყო, რაც უნდა შრომა და სიფთხილე დაჰჭირებოდა, მე მაინც ისე მხიარულად ვიყავი ხოლმე, თითქო კიდევ გავათავე საქმე და მიზანს მივალწიეო. ცუდ გუნებაზედ მართო მაშინა ვარ ხოლმე, როდესაც გამიტაცებს მატყუარი ოცნება და გარკვევით მეც არ ვიცი, რას ვფიქრობ, ან რა მწადიან! მაშინ მოვიშლები ხოლმე, მაშინ აღარად ვარგვივარ.

ჭაზა-ჭუხი გაჰქონდა ჩაქუჩს. სიმღერაც მაშინ მომაგონდა, შიარებიც. ისეთი მხიარულად ვიყავი, რომ ვალენტინსაც კი გაუკვირდა. ან რაღა მქონდა სატირალი? სიცოცხლის მიზანი მქონდა და მას შეეხაროდი.

ძნელი კი იყო, ღვთის წინაშე, იმ დროს ჩემი წადილის აღსრუ-

ლება, ძალიან ძნელი იყო. იმავე დილას, შვიდი საათი იქნებოდა, რომ ცხადად მაგრძნობინა ვალენტინმა ეს სიძნელე. ვალენტინმა რასაკვირველია, არა იცოდა რა, თორემ ხმას როგორ ამოიღებდა? შვიდი საათი იქნებოდა, როდესაც მარგალიტამ გაიარა ჩვენს სამკედლოსთან; ზურგზედ თავისი კალათი ეკიდა და წიგნების გასასყიდად მიდიოდა. ვალენტინმა თვალი გაადევნა და მითხრა, — რა იცოდა, რომ ტყვიასავით მომხვედებოდა გულში ყოველი იმისა სიტყვა:

— აი, იმ პაწიასა ხედავ, მიშელ? ხედავ, როგორ მიაბიჯებს? არც თოელს შეუშინდება, არც წვიმას, არც სიცივეს და სიცხე-პაპანაქებას: ჯოჯოხეთში ჩაძვრება, ოღონდ თავისი შეჩვენებული წიგნები გაყიდოს. ურჯულონი რომ არ იყვნენ მამაცა და შვილიც და უზნეო წიგნებს რომ არ ავრცელებდნენ, სწორედ რომ წამებულივით წმინდანნი იქნებოდნენ. მაგრამ რას იზამ, რომ ღვთისა წილ ჰავენ სულს ემსახურებიან და სულ იმისთანა წიგნებსა ჰყიდიან, რომლითაც ჩვენი წმინდა სარწმუნოება შეირყევა და ღვთისაგან განწესებული წესწყობილება შეიშუსრება. ეგენი ქვეყნისა, ღვთისა და მეფის დაუდგრომელი მტრები არიან და თუ ჯილდო მოვლით რამე, იცოდე მაგათი ჯილდო სახრჩობელა იქნება.

— ვალენტინ! ვალენტინ! სახრჩობელა? რისთვის, რა დააშავეს?

— დიად, სახრჩობელა, — განაგრძო ვალენტინმა, — და სახრჩობელა კი არა, თუ სამართალი არის სადმე, ცოცხლად საკირეში დასაწვავნი არიან, ეგ უღმერთონი! ჩასაქვავებელნი არიანი განა ჩვენ მ-გათ უნდა ვექომავებოდეთ, როდესაც თავიანთ ჰკუით, ცოდნით და გამოცდილებით, სიტყვით და საქმით ჩვენ წინააღმდეგ იღწვიან და მარტო ჩვენს დაღუპვასა და წაწყმედასა ცდილობენ? როგორც აღამიანი მარტო მაშინ მოისვენებს, როდესაც მგელის გვარი ამოწყდება, ისე ეგენი უნდა ამოვწყვიტოთ, რადგან ეშმაკები არიან. ეშმაკები რომ არ იყვნენ, ცხვარივით უვენებელნი რომ იყვნენ, ხომ შიშიც აღარაფრისა გვექნებოდა: მივდგებოდით და ვკრეჭდით და ვკრეჭდით! ეგენი კი, ეგ კალვინისტები... ოო, მაგათი ჰირსავით უნდა ერიდოს კაცი!

— ეგენიც ღვთის გაჩენილნი არიან, ვალენტინ!

— ღვთის გაჩენილიო!? — შეჰყვირა ვალენტინმა და ცასკენ აღაპყრო ხელები — ეგენი რომ ღვთის გაჩენილნი იყვნენ, განა მოძღვარი თავის წიგნში არ ჩასწერდა? აბა სადა სწერიან მერე? მაგათი არც დაბადება იწერება, არც ქორწინება, არც სიკვდილი, რადგან უწმინდურნი არიან! ეგენი რომ ღვთის გაჩენილნი იყვნენ, განა პირუტყვივით მინდორში დაფლავდნენ, წმინდა სასაფლაოდან ერ-

თი დღის სავალზედ? განა სავსასურში არ მიიღებდნენ? მერე იმის-
თანა სწავლულ კაცს, როგორც შოველია?! ეგენი რომ ღვთის გა-
ჩენილნი იყვნენ, ხომ არც ასე გადაიკიდებდნენ მთელ ქვეყანას!
არა, ჩემო მიშელ! მეც კი ვწუხვარ, რადგან მავნე წიგნების გავრცე-
ლების გარდა სხვას ვერას უსაყვედურებს მათთა კაცი, მაგრამ ჩვე-
ნი ოსტატი ძალიან სცდება, რომ აგრე დაახლოვებული ჰყავს ეგენი.
შოველის ბოლო ან სახრჩობელაა ან საკირე! მეტისმეტს სჩადის და
რა! აღარც შიში აქვს ვისიმე, აღარც რიდი! დიდი სიბრძევე მოგვივი-
და, დიდზედ დიდი, რომ ეგ ამოვიჩიეთ! იმიტომ რომ, რაკი ეს
არეულობა გათავდება და ძველებური წესიერება ჩამოვარდება,
სულ პირველად ხელს შოველს და იმის ქალსა სტაცებენ! იქნება
ოსტატიც ზედ მიაყოლონ და ჩვენც, ჩვენც, რომ რამდენიმე წელი-
წადი ციხეში ვიყვნეთ და განვიწმინდნეთ! მე ეს სასჯელი არ და-
მიმსახურებია, მაგრამ თუ დამიჭირებს და ციხეში მიკრეს თავი, მა-
შინ მეც აღარას ვიტყვი, რადგან ჩვენმა კეთილმა მეფემ უსამართ-
ლო არა იცის რა! სამართალი სამართალია! ალბათ დავაშავეთ რაჟე,
რომ გვსჯიან. უდანაშაულოდ რად დავგვსჯიან? ასე, ჩემო მიშელ!
სამართალზედ უკეთესი ამ ქვეყნად არა იქნება რა.

თავი დაღუნა, თვალები დახუჭა და ისე იდგა კისერწაშვერილი,
თითქო ჯალათს ელის, რომ ცული დაჰკრას და თავი გააგდები-
ნოსო. მე კი შევეცქეროდი და ვკვირობდი:

— ღმერთო, ნუ თუ შეიძლება ასე ბრმად დაბადებულ იყოს ადა-
მიანიშვილი! ნუ თუ ისე დაბერდება ეს უბედური, რომ გონება არ
გაეხსნება?

სწორედ ამ ლაპარაკმა დამარწმუნა, რომ მთელი ქვეყანა ამე-
შლებს, თუ მარგალიტა ვითხოვე. ჩვენებურებს კარგად ვიცნობდი:
ბევრი კი არ უნდოდათ! ჩამაქვავებდნენ! მაგრამ საკვირველი ის
იყო, რომ არც შიშსა ვგრძნობდი, არც მწუხარებას. მე მარგალიტა
მინდოდა და მთელ ქვეყანას გადავთელავდი და ჩემსას კი ავასრუ-
ლებდი!

სადამოზედ სრულიად დამშვიდებული წავედი შინისკენ. მიე-
დიოდი უშიშრად და სულ იმასა ვფიქრობდი: რაც უნდა სთქვას
დედაჩემმა, რაც უნდა მლანძლოს, პასუხს არ გავცემ-მეთქი. ის იყო
სახლთან მივედი და მამაჩემიც გამომეგება, შემკრთალი, გაყვითლე-
ბული, წელში ერთიორად მოხრილი. ხელი მომხვია, იქვე ორღობე-
ში შემიყვანა, რომ არავის დავენახეთ და აკანკალებული ხმით შე-
ნიშობდა:

— შვილო, მიშელ!.. წუხელ ძალიან გაჯავრდა დედაშენი... სა-
შინელება იყო... ახლა რას აპირებ? მიდიხარ, შვილო?

და თვალეში ჩამაკვირდა. ისეთი შეწუხებული, ისეთი საცოდავი საწყალი მამაჩემი ჩემს ღღეში არასოდეს მინახავს.

— არა, მამა, მე არსად მივდივარ. მეჩე თქვენ, მე რომ წავიდე? შენ, პატარა სტეფანე და მატურიანი? შეუძლებელია, მამა, სად უნდა წავიდე?!

სახე გაუბრწყინდა, პირს ღიმილი მოეცემა. იტყობით, სამართლიან ამოდებული მკვდარი იყო და გაცოცხლდაო.

— ეგრე, შეილო, ეგრე შენი ჭირიმე. განა არ ვიცოდი, რომ არ წახვიდოდი, არ მიმტყუნებდი. რა კარგი ვქენ, რომ მოგელაპარაკე! ახირებული რამ არის დედაშენი, კაცისას კი არას გაიგებს და! იცი, რამდენი ტანჯვა-წვალება მინახავს, შეილო? მაგრამ რა დროს ეგ არის. ოღონდ შენ ნურსად წახვალ და მე თქვენი ჭირის სანაცვლო ვიყო.

ხელი დამიჭირა და თვალეში ჩამცქეროდა გახარებული. საწყალი მამაჩემი!

— არა, არა, მამა, მე არსად წავალ. დედა კიდევაც იჯავრებს, ვიცი, მაგრამ რა გაეწყობა? დედაა, დეე იჯავროს! დედაჩემისაგან ყველაფერს ავიტან.

ახლა კი სრულიად დარწმუნდა, რომ არსად წავიდოდი.

— ეგრე, შენი ჭირიმე! იცი, მოდი ჯერ მე შევალ... შენ ცოტა ხანი აქ მოიცადე და მერე შემოდი, რომ ექვი არა აილოს რა დედაშენმა, თორემ, თუ ერთად დაგვინახა, სიცოცხლეს ჩამამწარებს.

— ბატონი ხარ, მამა. მიბრძანდი, მე აქ დავიცდი.

ის მაშინვე წავიდა და ცოტა ხანს უკან მეც შევედი შინ. წყნარად, დამშვიდებული შევედი და შევდექი კარებში. დედაჩემი კერასთან იჯდა და ჯარას ართავდა პირმოკუმული. იქნება ეგონა, ვეტყობი რასმე, ან ჩემს წასვლას შევატყობინებდი. თვალს მადევნებდა და მზად იყო ექექნა და ხელმეორედ ლანძღვა და წყევლა დაეწყო. მატურიანი და სტეფანე იქვე ფეხით უსხდნენ და კალათებს სწნავდნენ. მამაჩემი წალდით ფიჩხსა სჭრიდა და ცალი თვალი ჩემზედ ეჭირა. მე კი ვიდექი კარებში... ცოტა ხანს უკან ჩვეულებრივად მივესალმე:

— საღამომშვიდობისა, მამა! საღამომშვიდობისა, დედა! დღეს ძალიან დაღლილი ვარ, ცოტა მეტი ვიმუშავეთ და წავალ, დავიძინებ. ღამე მშვიდობისათ!

ყავარისკენ გაეწიე. პასუხი არავინ გამცა. ჩემი თავისა კმაყოფილი ვიყავ და ძალიანაც დამეძინა იმ ღამეს.

მეორე დილას, სამუშაოდ რომ ჩავედი, ჩვენი დუქანი ხალხი სავესე დახვდა, გზაზედ კიდევ მომავალნი ჩანდნენ, ზოგი ურმებიც. ზოგი ფეხით: სამაზრო კრებაზედ ხალხის საჭიროებათა აღწერა გათავდა და დღეს-ხვალ ქალაქ მეცს წაიღებენ სათემო კრებაზედ წარსადგენადო.

რაც ლიქსპეიმში სამაზრო კრება გაიხსნა, ჩვენი წარმომადგენლები იქ იყვნენ და ზოგს თავის ცოლ-შვილიც წაეყვანა. ახლა, რაკი კრება დაიხურა, უკანვე ბრუნდებოდნენ და იმათ სისარულს საზღვარი არა ჰქონდა, რომ თავიანთ სახლ-კარს და საკუთარ კერას მოეპატრონებოდნენ.

მოდოდნენ და გვიყვიროდნენ:

— გათავდა, კრება დაიხურა! თქვენებიც ამ საღამოზედ დაბრუნდებიან!

მე და ვალენტინსაც ძალიან გვიხაროდა ნათლიაჩემის მოსვლა: საქმეს უფრო მხიარულად ვაკეთებდით სამუშაოდ. მთელი ასი წელიწადი რომ ერთ კაცთან იმუშაო და მერე, თუნდა სამი კვირაც, გვერდთ აღარ გიდგეს, ძალიან მოიწყენ. ისე ჩვენ ვიყავით მოწყენილი. მოგვაგონდებოდა ნათლიაჩემის ძახილი:

— დაჰკათ, ბიჭებო! დაჰკათ!

ან არა, დიდგებოდა და შემოგვძახებდა:

— კარგით! სული მოვიბრუნოთ!

დიად, ძალიან მოწყენილნი ვიყავით. რაღაცა გვაკლდა!

სამუშაოდ შევემზადენით, და თან დუქანს გაცეკეროდით; ბუზივით ირეოდა ხალხი. წამდაუწუმ გამოვიდოდნენ ან ნიკოლი ან ნათლი-ჯალაბი და სკამს გამოიტანდნენ, რომ ურმიდან ქალები გადმოსულიყვნენ; მერე ერთმანეთისა, ნათესავების და ნაცნობების მოკითხვას მოჰყვებოდნენ. ძველებურად კი აღარ ეხვეოდნენ ერთმანეთს: მას შემდეგ, რაც იმათი ქმრები ხალხის წარმომადგენლად იყვნენ არჩეულნი, დიდკაცურად იქცეოდნენ ეს ქალები და ერთმანეთს: „ქალბატონო“-ო უპტყელებდნენ.

ვალენტინი გულიანად ხარხარებდა.

— მიშელ, ჩვენი იაკობის ცოლს ვერა ხედავ, როგორ გაბატონებულა! ნამდვილი ბრწყინვალე თავადიშვილის ცოლია, რაღა! კარნიკის ცოლს შეხედე, უარნიკისას, ფეხშიშველა რომ დადიოდა ხოლმე, მუხლამდე დაკარწახებული კაბით... კნენინას ვახლავარ! დასცინოდა სამუშაოდან ვალენტინი და მძიმედ თავს უკრავდა. პატიოსნურ ყოფა-ქცევას აბა ეხლა ვისწავლით, აი!

კიდევ კარგი, რომ შორს იყვნენ და არა ესმოდათ რა.

ხომ ისეთი სულელი რამ იყო და იმათ კი ძალიან დასცინოდა და დასაციხიც იყვნენ: ისე იკლაკნებოდნენ, ისე იღრიცებოდნენ, თითქო ტაკიმასხარად ქცეულანო. ალბად ამ კლაკვნა-გრეხაში ჰპოვებდნენ ისინი დიდ განათლებას და ვალენტინიც იმიტომ დასცინოდა:

— კარგი მოგივათ, კარგა თქვენ იქცევით. ისე გიხდებათ ეგ ქცევა, როგორადაც ჩვენი ბერი ბენედიქტუს ჯორს ხავერდის კაბა მოუხდება! თქვე უბედურებო, თქვენა! თქვე ჰკუთახელნო! მაგ ჰკუთ გინდათ აუჯანყდეთ ჩვენს დიდებულ მეფეს, დედოფალსა და დიდებულთ?! ოოჰ, ნეტავი კი ერთი დღის მეფობა მომცენ და! მე ვიცი, რა თავისუფლებასაც მოგცემდით! სულ ტყავს გაგაძრობდით, თქვენ!... და თუ მადლიერნი არ იქნებოდით, უცხოეთიდან უფრო მეტ ჯარს მოვიყვანდი და ისე გაგიხდიდით საქმეს, რომ...

გააბა ჩვენმა ვალენტინმა! კიდევ კარგი, რომ ყოველი აზრი ვიცოდი იმისი და არა მწყინდა, თორემ რომ აყვოლოდი, ერთმანეთს შევაკედებოდით. ჩვეულებადა ჰქონდა, დაიწყებდა ლაპარაკს, საბელივით გააბამდა და მოსთქვამდა გაუთავებლად.

ბოლოს, როგორც იყო, ისევ მუშაობა დავიწყეთ, გავახურეთ რკინა და დავუწყეთ ჰედვა. გავებით საქმეში და კარგა ხანი ისე ხმის ამოუღებლივ ვიყავით. ჩაქუჩები მარტო მაშინ დავასვენეთ, როდესაც სამჭედლოს კარი შემოაღო მარგალიტამ და ჩვეულებრივად შემოგვიცინა: დილა მშვიდობისაო! ხელში გატეხილი უტარო ბარი ეჭირა.

— მიშველეთ რამე, ბარი გამიტყდა. იქნება დღესვე გამიკეთოთ. მე დღეს შინა ვარ და... ხვალ დილისთვის მაინც იყოს.

ვალენტინმა ბარი ჩამოართვა და სინჯვა დაუწყყო. მე კი სიხარულით ფეხზედ აღარ ვიდექი და პატარა მარგალიტას შეეხაროდი: დღესვე გაგიკეთებ მაგ ბარს, დღესვე; ნახავ, რა კარგად გაგიკეთებ!

ბოლოს თვით მარგალიტამაც იგრძნო, რა ძალიან მიამა იმისაგან დასაქმება და თავისებურად ტუბილად შემომხედა.

ვალენტინი კი ჯერ ისევ ბაჭსა სინჯავდა და თავს იქნევდა:

— ხვალ დილისთვის ვერა და ხვალ საღამოს რომ გამოიარო, კი მზად იქნება.

— კარგი ერთი, — შევეუტიე ვალენტინს, — რა არის მანდ ორი დღისა! მართალია, საქმე ბევრი გვაქვს, მაგრამ ყველაზედ უწინ ჩვენი მარგალიტას ბარი უნდა გაკეთდეს. აქ მომე, ვალენტინ, მე ვიცი მაგის ყადრი!

— შენ პირს შაქარი, ოღონდ იცოდე, ძალიან გაწვალებს, აგრე კი ნუ უყურებ!

მარგალიტა კი იცინოდა.

— მაშ ხვალ დილისთვის გამიკეთებ, მიშელ?

— ხვალ დილისთვის კი არა, ამაღამვე მოგართმევ.

გამოგვეთხოვა და წავიდა. მე მაშინვე საქმეს შევეუდექი. გავახურე ბარი და ისეთი ლამაზი, კოხტა და სუბუქი რამ გამოვიყვანე, თითქო უბრალო ბარი კი არა, ოქროს ნივთია რამეო. ისე ჩემს ღღეში არაფერზედ ვცდილვარ, როგორც ამ ბარის გაკეთებაზედ ვცდილობდი; ჩემი ცოდნა ზედ დავასრულე და მართლა სამაგალითო რამ გამოვიყვანე; ვაკეთებდი და თან მკედლის სიმღერას ვმღეროდი:

— დაჰკა, მკედელო, ჩაქუჩი!...

მე დავიწყე და ვალენტინმაც ბანი მომცა. რაც უნდა მხიარულად ვყოფილიყავ და მხიარული სიმღერა დამეწყო, ის მაინც ნალვლიანი ხმით მომცემდა ხოლმე ბანს, თითქო გული სტკივა და უკენისისო. ვმღეროდით, თან ჩაქუჩს ვათამაშებდით. ისეთი სისწრაფით და ისე ადვილად ჩემს ღღეში არ მიხმარია ჩემი ჩაქუჩი; ისე ვზელდი ჩემ ბარს, თითქო ლითონი კი არა, უბრალო წმინდა სანთელიაო. ვალენტინი წამ და უწყუმ თვალს გადმოავლებდა და თავისთვის ბუტბუტებდა.

— ყველას თავისი ნიჭი აქვს. ჩემი ოსტატი ნაღით არის განთქმული; იმისთანა ნაღს გამოიყვანს, რომ რა სთქვას კაცმა! მე კიდევ რაზა-კოჭაკში ვერაფერს მაჯობებს. ნიჭია, ნიჭი, ღვთისაგან ნაბოძებები და ნაკურთხი ნიჭი! პირში ჩამაფურთხეთ, თუ მართალს არ ვამბობდე! არა, ნიჭი რომ არ იყოს, ამისთანა ბარს გამოიყვანდა! ოსტატსაც გაუჭირდება ამისთანა ბარის გაკეთება! მიშელის ნიჭიც ბარი ყოფილა!

მიღი-მოდიოდა, თან თვალს მადევნებდა და წამდაუწყუმ მკითხავდა:

— დაგეხმარო, მიშელ?

— არა, არა! — ვეუბნებოდი ამაყად და უფრო მარჯვედ ვატრიალებდი ჩაქუჩს.

და ისევ სიმღერას დავძახებდი:

— დაჰკა, მკედელო, ჩაქუჩი!..

ბოლოს, ჯერ ხუთი საათიც არ იყო, რომ ბარი სრულიად გავათავე. ისე ბრწყინავდა, როგორც ვერცხლი; ზარივით წკრიალებდა! დიდი ხანი სინჯა ვალენტინმა, დიდი ხანი ატრიალა ხელში და ბოლოს მითხრა:

— ბებერ რებუტოკს ხომ იცნობ, მიშელ, რიბოპიერში რომ ვაჭრობს. მთელ ალზას-ლორენი და თვით შვეიცარიაც კი იმისაგან ყიდულობს ბარს, წერაქვს, ცულსა და სახნის-საკვეთს; ჰოდა, ისეთი მშვენიერი რამ არის ეს ბარი, ისე ხელოვნურად არის გამოყვანილი,

რომ თვით ბებერი რებზტოკიც კი დაუსვამდა ზედ თავის რ-ს ჩემი გაკეთებულიაო. ყოჩაღ, მიშელ! შოველისთანა ბარი მგონი ბევრს არა ჰქონდეს და გარწმუნებ, შოველისა იქნება ძვლებიც აღარსად იყოს და ეგ ბარი კი ღღევანდელივით ახალი იყოს!

წარმოდგინეთ, როგორ მიაშებოდა ვალენტინის ქება, რადგან საქმეში ძალიან დახელოვნებული იყო. მაგრამ ისე იმის ქება არ მახარებდა, როგორც მარგალიტას ნახვა და სიამოვნება. მე მინდოდა ბარი მზამზარეულად გაკეთებული მიმერთშია და ტარი უთუოდ შინდისა მეშოვნა. გავათავე თუ არა, მაშინვე მოხუცებულ რიგოსთან მივირბინე, რომელსაც ყოველთვის გამოუღეველი ჰქონდა ცულისა და ბარის ტარები; იმანაც ისეთი კონტა და სუბუქი ტარი გაუკეთა, იმისთანა ლამაზად გამიწყო ბარი, რომ უკეთესი არ იქნებოდა.

შვიდ საათამდე კიდევ ვიმუშავე, ბარი კი იქვე კარებს უკანა მქონდა მიყუდებული და მერე კი საჩქაროდ დავიბანე პირი და შოველიანთკენ გავწიე. მარგალიტა კარზედ იჯდა და კარტოფილსა ფტკენიდა. ბარი შორიდანვე დავანახვე; გახარებული მივეშურებოდი და თან ვუყვიროდი:

— გავათავე, მარგალიტა, გავათავე! აბა გასინჯე. როგორ მოგწონს?

გამომართვა და კარგა ხანს სიამოვნებით სინჯა. მე კი სუნთქვა მიძნელდებოდა, ისე მიცემდა გული.

— რა კარგი რამ არის, მიშელ! ეს ვალენტინის გაკეთებული იქნება.

მეწყინა. სისხლი თავში ამივარდა და ვუპასუხე:

— მაშ მე არაფერი მცოდნია! არაფრის გაკეთება შემძლება!

— მაგას ვინ ამბობს? მაგრამ ეს ისეთი მშვენიერი რამ არის, რომ!... ძალიან მარჯვე ხელოსანი ყოფილხარ, მიშელ!

და ისე ტკბილად გადმომხედა, რომ წელანდელი სიტყვები მაშინვე დამავიწყა. მაგრამ იმავე დროს ფასი მკითხა და ხელახლად გული მომიკლა:

— მერე ძვირად არ დამიჯდება ამისთანა კარგი ბარი? რა გერგება, მიშელ?

— უთუოდ გინდა მაწყენინო, მარგალიტა? როგორ? ძლივს შეღირსა და დამსაქმე... ისიც რა, ერთი უბრალო ბარი... მე მინდა გასიამოვნო რამე... მე კმაყოფილი ვარ, რომ შენი სასიამოვნო შემიძლია რამე და შენ კი მეკითხები, რა გერგებაო.

არ მოელოდა, რომ ასე მეწყინებოდა და დამშვიდება დამიწყო:

— აბა დაფიქრდი, მიშელ, რა გითხარ აგრე საწყენი?! განა ყოველ შრომას თავისი ჯილდო არ უნდა ჰქონდეს?! თუ არა და განა

შენი ოსტატის ნახშირს ფასი არა აქვს? განა შენი ოსტატი დღევანდელ დღეში ჯამაგირს არ გაძლევს?

მეც ვხედავდი, რომ მართალს ამბობდა, მაგრამ მე ჩემსას გავიძახოდი: არა, არა! ეგ სულ სხვაა! თან ბრაზი მერეოდა, მაგრამ საიდანღაც გაჩნდა შოველი. მხარზედ ხელი დამადო და მითხრა:

— რაო? რა ამბავი გაქვთ? იქნება თქვენც ჩხუბი მოგდით?

ის იყო ლიქსპეიმიდან მოსულიყო და მხიარულად გვათვალერებდა ორივეს. შოველის დანახვაზედ ხომ სულ ერთიანად ამერია დავთრები და ხმა ველარ ამოვიღე.

— ჩხუბით არა ვჩხუბობთ, — უპასუხა მარგალიტამ, — თუმცა არც უიმისოა. ბარი გავაკეთებინე და ფასს კი არ მართმევს.

— ფასს კი არ გართმევს? ვითომდა რატომაო?

ჩემდა საბედნიეროდ ერთმა კარგმა აზრმა გამიარა თავში და ვუთხარი:

— არა, ბატონო, რომ მომკლათ, მე თქვენგან გროშს არ ავიღებ. ასჯერ მაინც გითხოვებიათ ჩემთვის თქვენი წიგნები; ჩემი და ლიზა თქვენ დააყენეთ იმისთანა პატიოსან ოჯახში და ეგეც რომ არ იყოს, თქვენი მეცადინეობით არ არის, რომ ჩვენი გლეხკაცობა თავის უჭლებათა მოპოვებასა ცდილობს? მე რომ თქვენს საქმეს ვაკეთებ რასმე, ფასისთვის კი არა, იმიტომ ვაკეთებ, რომ თქვენი სიკეთის გადახდასა ვცდილობ, თუმცა თქვენ იმდენი სიკეთე მოგიძღვით, რომ ნეტავი ღმერთმა ერთი მეასედის გადახდა შემაძლებინოს. ჰოდა, სულ დაღუპული და უსინდისო უნდა ვიყო, რომ თქვენგან ფული ავიღო. ამას მე კი ვერ ვიზამ და!..

დამაშტერა თავისი პატარა თვალეები შოველმა და ისე მიყურებდა, თითქო გულში მიძვრებო.

— კარგი, მიშელ, კარგი! ოღონდ ერთი რამ გავიწყდება: მე სიკეთეს იმიტომ კი არა ვთვისდი, რომ ფული აღარავისათვის მიმეცა. მეც სულ დაღუპული და უსინდისო ვიქნებოდი, ეგ განძრახვა რომ მქონოდა. მიხვდი, მიშელ?...

ისე გამაბა, ისე გამაკავა, რომ პირლია დავრჩი. შემრცხვა, გაწითლდი, კინალამ ვიტირე.

— ეჰ, ბატონო შოველ! რომ იცოდეთ, როგორა ვწუხვარ...

ალბათ გულში მოხვდა გულით ნათქვამი და ჩემი ყოფა აგრძობინა, რომ დამეთანხმა:

— არა, მიშელ, არა, მე სრულიადაც არ მინდა გაწყენინო რამე, რადგან შენ, ვიცი, პატიოსანი და ყოჩალი ბიჭი ხარ. დასამტკიცებლად ამისა მიმიღია შენი საჩუქარი. ჰა, მარგალიტა, მივიღოთ მიშელის საჩუქარი?

— უნდა მივიღოთ, რა გაეწყობა? თუ კი აგრე იამება, უარს როგორ ვეტყვი?...

შოველმა ბარის სინჯვა დაიწყო და ძალიანაც მაქო, მართლა სამაგალითო ხელოსანი ყოფილხარ და იმედი მაქვს, ისე მოაწყობ საქმეს, რომ საკუთარი სამჭედლო გქონდეს და შენოდენა შეგირდებს ამუშავებდეო. ამის შემდეგ, როდესაც ხელი ჩამომართვა და შინ შევიდა, როდესაც მარგალიტა გამომეთხოვა და „ღამე მშვიდობისა, მიშელ! გმადლობ-ო“ დამიძახა, ჩემს სიხარულს საზღვარი არ ჰქონდა. მიხაროდა, რომ შოველი და მეტადრე მარგალიტა ვასიამოვნე; მიხაროდა, რომ შოველს ისე კარგად მიეუგე პასუხი, რადგან ის საბუთები რომ არ მეთქვა, შოველი სულ სხვას იფიქრებდა და მე კი არ მინდოდა, რომ სცოდნოდა ვისმე, რა თვალით ვუყურებდი მარგალიტას. მაშ სიფრთხილე გმართებს-მეთქი, ვუთხარი იმ დღეს ჩემს თავს და გადავწყვიტე, მინამ საქმეს საქმეზედ არ მივიყვანდი და საცოლოდ არ ვითხოვდი, კრინტიც არავისთან დამეძრა.

ამ ფიქრებით მივიდიოდი სამჭედლოსაკენ. შევედი ღუქანში და ნათლიაჩემი კი დამიხვდა; ის იყო მოსულიყო და საგარეო ტანი-სამოსს იხდიდა:

— ნიკოლ, ჰაი ნიკოლ! ჩემი ახალუხი! ჩემი საღამური ქული! იიპ, შენ გიშველა ღმერთმა! რა სჯობს შინ ყოფნას და ძველს, შეჩვეულ ტანისამოსს? ნიკოლ, ნიკოლ! ჩემი ხის ფლოსტები რაღა იქნა? ოპ, მიშელს გაუმარჯოს, მიშელს! ძლივს შინ არა ვარ!... ერთი ავათამაშოთ ჩაქუჩები, მიშელ! მგონი, იმდენი საქმე მოგიგროვდათ, რომ...

— მაგდენი არაფერი, ნათლიაჩემო. წვრილმანი საქმე სულ თავის დროზედ კეთდებოდა და რაც შეეხება დაგსბერგიდან შემოკვეთილს, ის კიდევ გუშინწინ ჩავაბარეთ.

— ჰა, ყოჩაღ, ბიჭებო!

იმ დროს ნათლი-ჯალაბიც შემოვარდა. გადაეხვია გახარებული, თან ჰკოცნიდა და თან ეკითხებოდა:

— მორჩა ივანე? სრულებით მორჩა? ხომ აღარ წავიყვანენ?

— აღარა, ეკატერინე, აღარა! მადლობა ღმერთს, გავაფავეთ. ახლა კი კარგად არის ჩვენი საქმე: ჩვენი რვეული, რომელშიაც ავწერეთ ხალხის ყოველი საჭიროება. ზეგ უნდა წავიდეს ქ. მეცს სათემო კრებაზედ. მაგრამ იცით, რამდენი წვალემა ვნახეთ! შოველი რომ არა გვყოლიყო, ვინ იცის, დღესაც არაფერი გვექონიყო. საკვირველი კაცია, საკვირველი! ყველაფერი იცის, ყველაფერი გაეგება! ყველაფერზედ შეუძლიან თავისი აზრი წარმოსთქვას და დაასაბუთოს. ჩვენმა სოფელმა დიდი სახელი გაითქვა, რომ ის ამოირჩია. სათემო

კრებაზე დასასწრებლად და ჩვენი რვეულის წარსადგენად ყველამ შოველი ავირჩიეთ! იმიტომ რომ შოველისთანად ხალხის მტრებს წინააღმდეგობას ვერვინ გაუწევს. იმისთანა პასუხს ვერავინ მისცემს. უკუნითი უკუნისამდე რომ არსებობდეს ჩვენი სოფელი, ამისთანა სასახელოს ველარას იზამს. ესლა შოველს მთელი სამეფო იცნობს და ყველამ იცის, რომ ის ჩვენი ამორჩეულია, ყველამ იცის, რომ ჩვენებურია და თუ ამოვირჩიეთ, იმიტომ ამოვირჩიეთ, რომ შეგნებულები ვართ და ღირსეულად დაფასება შეგვიძლია იმის ჰკუა-გონებისა, მიუხედავად იმის სარწმუნოებისა.

ამ ლაპარაკის დროს ნათლიაჩემი საგარეო ტანისამოსს იხდიდა და საშინაოს იცვამდა. ბოლოს გაიხალა წალები და ფეხები ხის ფლოსტებში ჩაჰყო.

— დიად, ასზედ მეტნი ვიყავით ხალხის წარმომადგენელი სამაზრო კრებაზედ, ჩვენ შორის თხუთმეტი უნდა ამოგვერჩია, რომ სათემო კრებას დაესწრნენ და ჩვენი რვეული წარადგინონ. წარმოდგინეთ თხუთმეტში ჩვენი შოველი მეოთხეა! ჰოდა, ისეთი ღვინო და ნადიმი უნდა გადავიხადო ჩვენი წარმომადგენლის სასახელოდ, რომ მტერს თვალეზი დავეუყენო! ლეტუმიეს და კოშარს. უკვე შევატყობინე, ქალაქში ვნახე და იქვე დავაბარე ზემოურებიც მოეწვიათ. იცი, დედაკაცო, შენ რომა გაქვს მარანში მიმალული ბოთლები... გეხსოვება, ძველი ღვინო გაქვს, დაბეჭდილი... მგონი ერთი მტკაველი მტვერი აღევს, ჰა?... უნდა გავხსნათ, უნდა გავხსნათ სულ ძველისძველი საგანგებოდ შენახული ბოთლები! შენ ერთი კარგი სადილი გავგიკეთე! ნიკოლი ამ სადამოსვე წავიდეს და ექვსი გირვანქა საქონლის ხორცი წამოიღოს, სამი გირვანქა—საკატლეტე, საუკეთესო ხარისხის ცხვრის ორი ფეხი. კუნცთან რომ იყიდოს, უფრო პირიანად იშოვის; ეს კი უთხრას, მკედელმა ივანემ გამომგზავნაო. ღმერთი არ გავიწყრეთ და უნივროდ არ შესწვათ ხორცი! მართლა, ძეხვები ხომ გვაქვს? რა კარგი იქნება კომბოსტოს მწნილით მოხრაკული?... ლორიც გვექნება. რომელიც უფრო დიდი იყოს, ის ჩამოაღებინე, ყველი იქნება, სალათი, ცოტა რამ ხილი. ისე უნდა დავხვდეთ, რომ ყველა მადლიერი დაგვრჩეს. მაშ! დეე ყველამ გაიგოს, რომ ჩვენი წარმომადგენელი სათემო კრებაზედ დასასწრებლადაც არის ამორჩეული და მეოთხე ადგილი უჭირავს. მეოთხე ადგილი, იმაზედ უკეთესად სულ სამი კაცი იცნეს! დეე ყველამ გაიგოს, რომ ჩვენ, ჩვენ ამოვირჩიეთ შოველი! ჩვენ ამოვირჩიეთ ეს კაცი, რომელსაც გუშინ ჩვენს მეტი არავინ იცნობდა და დღეს კი მთელი საფრანგეთი იმედიანად შემოჰყურებს, რადგან ხალხს თავის უფლებათა მოპოვებაში შოველმა უფრო მეტი სამსახური გაუწია, ვიდრე ათასმა სხვამ. მაგრამ ამის

შესახებ მერეც ვილაპარაკებთ. საცა კი გაქნილი. გარეცხილი იყო ვინმე, ყველა ჩვენს კრებაზედ გამოეგზავნათ, რომ ხალხისთვის წინააღმდეგობა გაეწიათ, მაგრამ ხმასაც ვერ ამოიღებდნენ ხოლმე შოველის შიშით, მაშინვე ბურთს ჩასჩრიდა პირში!

აშკარად ეტყობოდა, რომ გზაში სადმე გაჩერებულიყო და ცოტა რამ გადაეკრა: მარტოდმარტო ლაპარაკობდა. ხელებს იქნევდა და ლოყებს იბერავდა, სწორედ ისე, როგორც ჩვეულებრივ კარგი სადილის შემდეგ იცოდა. ჩვენ ყურს ვუგდებდით გაჩუმებულნი.

ნიკოლმა სუფრა გაშალა და ნათლიაჩემიც გაჩუმდა. ვახშმად ხმა აღარავის ამოუღია; სამაზრო კრებაზედ ვფაქრობდით ყველანი. წასასვლელად რომ შევემზადეთ, ნათლიაჩემმა შემაყენა და მითხრა:

— მამაშენს უთხარ, შენმა ძველმა მეგობარმა დაგაბატოვა თქო; იქნება შენ არც კი იცი, რომ მე და მამაშენი ძველი მეგობრები ვართ: ორმოცდაჩვიდმეტში კენჭი ერთად ამოვიღეთ. აგრე უთხარ, არ დაგავიწყდეს. ხვალ სადილად ჩემთანა ბრძანდებოდე თქო, სწორედ შუადღისას. კი არ დაიგვიანოს.

— ბატონი ბრძანდები, ნათლიაჩემო. ღმერთმა შენი სიკეთე ჩვენც გადაგვახდევინოს.

— თქვენისთანა პატიოსანს რომ მიიწვევს ვისზე კაცი, სიკეთეს თავის თავს უზამს. ახლა კი მშვიდობით, ჩემო მიშელ! არ დაგავიწყდეს, ხვალ შენც ჩამოდი.

მეც შინისკენ გავეშურე. ნათლიაჩემს თავის დღეში არა უთქვამს რა ჩემთვის ისეთი სასიამოვნო, როგორც იმ ღამეს მამაჩემის შესახებ მითხრა და ამით ერთიასად უფრო მეტად შემაყვარა თავი.

XIV

ჩვენებს რომ ვუამბე, ხვალ ნათლიაჩემს დიდი წვეულება აქვს, მთელი სოფლის წარჩინებულნი პირნი ჰყავს მიწვეული და მე და მამაჩემიც დაპატიჟებული ვართ-მეთქი, დიდად გაიხარეს; ნათლიაჩემისაგან დიდი პატივისცემა იყო ჩვენი მიწვევა. მართალია, მეგობრები ვიყავითო, — სთქვა მამაჩემმა და მოაგონდა თავისი სიყმაწვილე. მოაგონდა თავისი ყმაწვილობიკობა, ორმოცდაჩვიდმეტში კენჭის ყრა, როდესაც ისა და ნათლიაჩემი ხელი-ხელ გაყრილნი დასეირნობდნენ ქალაქში, მერე ჩემი ნათლობა. მოაგონდა ტკბილი წარსული. დაწვრილებით, თითქო თვალწინ უდგასო, დაგვიხატა გავლილი დღენი და ბოლოს მწარედ ამოიოხრა:

— აჰ, რა დრო იყო! რა დალოცვილი დრო იყო!

დედაჩემიც კმაყოფილი იყო, მაგრამ ჯერ ისევ გაჯავრებული იყო ჩემზედ და გაჩუმებული ართავდა; ხმაც არ ამოუღია, რომ თავისი კმაყოფილება არავისთვის შეემჩნევიდნენ. მეორე დღეს კი, რომ ავდექით, სუყველაფერი მზად დაგვხვდა — სუფთა სარეცხი და გაწმენდილი ტანისამოსი იქვე ეწყო დალაგებული: იმ ღამეს კიდევ გაერეცხა, კიდევ გაეშრო, კიდევ დაეკერებინა. და შუადღემ რომ მოაღწია და მე და მამაჩემი გზას გავუდექით, დედაჩემი გარეთ გამოგვეყვა და მეზობლებს შესძახა:

— ივანე ლერუსთან არიან სადილად დაპატიჟებული. დიდი წვეულება აქვს დღეს. მთელი სოფლის წარჩინებული პირნი ჰყავს მიწვეული!

მოხუცებული მამაჩემი ძლივს მოდიოდა; თავდაღმართზედ ხელი მომკიდა და სიცილით მითხრა:

— ისე ვართ დღეს მორთულები, როგორც ამორჩევის დროს ვიყავით. ის დღეა და ის, მას აქეთია ჩვენ ავი არა მოგვსვლია რა და ნეტავი მომავალშიც არა შეგვემთხვეს რა... მიშელ, ფრთხილად იყავი, შვილო, მეტადრე სადილზედ! ადამიანიშვილნი ვართ, სუფრაზედ უფრო ადვილად აჭიკჭიკდება ხოლმე კაცი... არა წამოგცდეს რა. შვილო, თორემ..

— ნუ გეშინია, მამა, ისე გავფრთხილდები, რომ არ წამოცდება რა.

სულ რიდასიც ეშინოდა, სულა კანკალებდა, როგორც საბრალო კურდღელი თრთის და კანკალებს, რადგან ყველგან და ყოველთვის თან დასდევს მტერი. და განა მარტო მამაჩემი? ასევე თრთოდა ყოველი ხანში შესული გლეხკაცი, რომელსაც მებატონის და მონასტრის ყმობა ეწვნია და დარწმუნებულიყო, რომ სამართალი გლეხისთვის არ არის დადებულიო.

რა საქმეს გაარიგებდა ასე დაშინებული ხალხი? ჩვენი ყოფაცხოვრების შესაცვლელად ისევ ყმაწვილკაცობა უნდა გამოსულიყო და უმფროსთაგანი თუ ჩაერეოდა ვინმე, მარტო შოველისთანა თავგანწირული ჩაერეოდა. რადგან იმისთვის სიცოცხლეს მნიშვნელობა არა ჰქონდა, თუ თავისუფლების მოპოვებას არ ვეცდებოდით. რევოლუცია რომ მარტო გლეხკაცობაზედ ყოფილიყო დამოკიდებული და მოქალაქეთ არ დაეწყოთ, დღესაც იმავე ყოფაში ვიქნებოდით, რა ყოფაშიაც 78 წ. ვიყავით. რას იზამთ? ტანჯვა გაუბედაობას და უიმედობას ჰბადავს. უბედური მხდალზედ მხდალია.

ისეთი მხიარული ლაპარაკი და სიცილი ისმოდა ნათლიაჩემის სახლიდან, რომ იტყოდით, აღდგომა დღეაო. სახლი საგსე იყო სტუმრებით. ლეტუმზე, კოშკარი, კლოდ ჰურე, კურტუა და ნათლიაჩემი

ერთ კუნჭულში იდგნენ სუფრის თავში და გაცხარებით ლაპარაკობდნენ რაღასაც. იმისთანა დიდი და შემკული სუფრა ჩემს დღეში არ მენახა. ისე იყო აკრელებული ხელადებით და ფიალებით, ნაზუქითა და ლავაშებით, ისეთი ძვირფასი დანა-ჩანგალი და ჭურჭელი ელაგა, რომ თვალი ზედ დაგვრჩა.

— აჰა, აგერ ჩემი ძველი მეგობარიც მოვიდა! — შეჰყვირა ნათლიაჩემმა და წინ მოგვეგება. ორივე ხელები მხრებზედ დააწყო მამაჩემს და უთხრა:

— რა კარგი ჰქენ, რომ ჩამოხვედი, ჩემო პეტრე! ვერ წარმოიდგენ, როგორ მინდოდა შენი ნახვა, ისე მომაგონდება ხოლმე შენს ნახვაზედ ჩვენი სიყმაწვილე, თითქო გუშინ იყოო.

— თჳ. რა დრო იყო, რა ბედნიერი დრო იყო. გახსოვს, კენჭის ამოსაღებად რომ წავედი? რა მხიარულად ვიყავით! ეეჰ, წავიდა ის დრო და სიმხიარულეც თან წაიღო. წავიდა და აღარ მობრუნდება.

— როგორ თუ არ მობრუნდება, — შეჰყვირა ლეტუმიემ, — როგორ თუ არ მობრუნდება? იცი გუშინ რა საქმე მოუუგეთ ჩვენს მებატონეებს და სამღვდლოებს? იცი რა გამარჯვებული მოვდივართ? და მარტო ჩვენ კი არა, მთელმა ქვეყანამ, მთელმა ჩვენმა ხალხმა გაიმარჯვა. სიმხიარულე ეხლა გემართება, აი! გაუმარჯოს სიმხიარულეს!

და ქუდი ჰქერსა ჰკრა. ჩვენ კი გულიანად ვიცინოდით და თან ცალი თვალით ხელადებს გადავხედავდით ხოლმე. ვლაპარაკობდით, ვხუმრობდით, მაგრამ თვალი კი სუფრაზედ გვეჭირა.

დარბაზის ბოლოში კარი ღია იყო და სამზარეულოდან იმისთანა სურნელება გამოდიოდა, რომ სადილნაჭამსაც კი მადას მოჰგვრიდა. ბუხართან ორი ჩასუქებული ინდოური ეკიდა შესაწავად; ნათლი-ჯალაბი მორთულ-მოკაზმული მიდი-მოდოდა ქვაბებშუა და ხან ერთს ჩახედავდა, ხან მეორეს. ნიკოლს უშველებელი ჩანგალი ეჭირა და შემწვარის გადაბრუნებას ცდილობდა. ნათლიაჩემი კი, როგორც მასპინძელს შეშვენის, ხან ერთს გამოელაპარაკებოდა, ხან მეორეს, ყველას უღიმოდა და ისე მხიარულადა ჰყავდა თავის სტუმრები, რომ მეტი არ შეიძლება. ძველი კაცი იყო, მუშაკაცი, და ადამიანის ყადრი და პატივისცემა იცოდა. შრომის დროს შრომა უყვარდა და ოჯახში ყაირათი. მაგრამ თავის დროზედ ისე გულუხვად დაუხვდებოდა, თუნდა მთელი სოფელიც სწვეოდა, თითქო თავის ნაშრომით კი არა, ციდან ჩამოყრილი ქადა-ნაზუქით უხვდება სტუმრებსო. და როდისღა დაუხვდებოდა სოფელს, თუ არა დღეს? სოფელმა პატივი სცა და თავის წარმომადგენლად აირჩია; სოფელი ენდო და თავის ბედ-იღბალი მიანდო; სოფელი ენდო და იმის რჩე-

ვით თავის მეორე წარმომადგენლად შოველი აირჩია. განა ამოდენა პატივისცემას გადახდა არ უნდოდა? ასე იყო ჩემს დროში, ასე მოიქცა მაშინ ყოველი პატიოსანი კაცი და ამიტომ იყო, რომ წესიერება არსად დარღვეულა. ხალხის წარმომადგენლები კარგად გრძნობდნენ, რომ ისინი ხალხის შვილნი და ხალხის წინამძღოლნი არიან და მართლმწიფდობდნენ კიდევ. როგორც შეეძლოთ. შემდეგში კი მათი შვილები სულ სხვაფრივ მოიქცნენ: არ ვიცი ამპარტავნობამ გაიტაცა, ფული-სიყვარულმა თუ სისულელემ, ზურგი შეაქციეს თავის ამოპრჩევლებს: ვინ თქვენა და ვინ ჩვენა? ჩვენ ხალხთან რა უნდა გვქონდეს საერთო?! — ჩვენ კეთილშობილნი ვართო! — კეთილშობილნი კი არა. რომ ეთქვათ ყალბი კეთილშობილნიო, უფრო მართალი იქნებოდა. დიად, ამ ვაჟბატონებმა არ იკადრეს თავისი გამზრდელი ხალხი, მებატონეებში ჩაერივნენ და არც ხალხს შესძინეს რამე, არც თავის თავს, რადგან მებატონეებს იმათი მართო შრომა უნდოდათ და არა თვით ისინი. აი ჩვენი ისტორია, მოკლეთ რომ მოვქრათ.

სუფრის თავში კი იდგნენ მოხუცებულები და სასოფლო და საზოგადო საქმეებზედ ლაპარაკობდნენ. შემოვიდოდა ვინმე იმათივე ხნისა და ერთხმად შეჰყვირებდნენ:

— აა, პლეჩს გაუმარჯოს!.. აგერა რიგოც მობრძანდება! რიგოს ვახლავართი... აქეთ მობრძანდი, აქეთ... რასა იქ, როგორა ხარ?...

ვალენტინი და მე სულ უკან ვიდევით. ის ისევ თავისას გაიძახდა: ღმერთმა გააძლიეროს მეფე, დედოფალი და ბატონებო! უიმათოდ გლახკაცი შიშნულით მოკვდებაო! მაგრამ მეფე-დედოფალზედ მეტად მგონი ღვინო უყვარდა და ისეთი თვალთ გადახედავდა ხოლმე სუფრას, თითქო ჯავრობს. რალას უყურებენ, რატომ არ დასხდებიან, რადროს საქმეებზედ ლაპარაკიან!

შუადღემ რომ დაჰკრა, ნიკოლი მოვიდა და მიჩურჩულა: — გაიქცი, შოველს მოახსენე მობრძანდესო. ის იყო მინდოდა ქული ამელო, რომ თვითონ შოველი და მარგალიტა შემოვიდნენ. ყველამ ყვირილი დაიწყეს:

— აგერ, შოველიც მობრძანდა!

შემოვიდა შოველი, ჯერ საერთო სალაში მოგვცა და მერე სათითაოდ დაგვიარა ყველას და ხელი ჩამოგვართვა. ვუყურებდით და ჩვენვე გვიკვირდა; თითქო ჩვენი შოველი იყო, მაგრამ თითქო გამოცვლილიყო კიდევ. ეხლა ხომ ველარავინ გაუბედავდა წიგნების ჩხრეკას და მუქარას?.. სათემო კრებაზედ ჩვენი მაზრიდან 15 კაცი უნდა წასულიყო და 15-ში მეოთხე შოველი იყო. სახეზედაც ეტყობოდა, რომ დიდად კმაყოფილი იყო: თვალები უბრწყინავდა, პირს

ღიმილი მოსდიოდა და იმისთანა მაღალი საყელო გაეყეებინა, რომ ყურთამდე სწვდებოდა.

ლეტუმის ძალიან უნდოდა, შოველს ღირსეულად დაზვედროდა, კარგი სიტყვა ეთქვა და შეექო, მაგრამ შოველმა თავისებური ღიმილით მოკლედ მოაპრევიანა:

— ბატონო ლეტუმე, აგერ წვნიანი შემოიტანეს... ვერა ხედავთ, რა მშვენიერი სუნი ასდის?

და მართალიცა სთქვა: ნათლი-ჯალაბმა წვნიანი შემოიტანა და ნათლიამ დაინახა თუ არა, დაიძახა:

— დაბრძანდით, დაბრძანდით!.. ლეტუმე, შენ შენი სიტყვა სუფრაზედ ბრძანე, შოველის სადღეგრძელოს რომ სვამდე. ხომ იცი, მშვიერ მუცელს ყური არა აქვსო: აქეთ მობრძანდი, კოშარ! შოველ, შენ აქეთ, სუფრის თავში! ვალენტინ, ჰურე, პეტრე, დასხედით რალა, რას დგეხართ?

ბოლოს ყველანი დავსხედით და კარგადაც დავსხედით, მამაჩემი, ვალენტინი და მე სუფრის ბოლოში მოვექეციეთ, სწორედ ნათლიაჩემის პირდაპირ.

ნათლი-ჯალაბი კი წვნიანს არიგებდა.

მე ჩემს ღლეში არ მენახა ამისთანა წვეულება და გაკვირვებითა ესინჯავდი ყველაფერს. საწყალი მამაჩემი უფრო გაკვირვებული იყო.

— ღვინო თქვენ თვითონ დაისხით, ხალხო, ყველას სათითაო ხელადა გიდგათ, — სთქვა ნათლიაჩემმა.

იმისთანა კარგი რამ იყო წვნიანი და ისეთი წყურვილი აგვტეხა, რომ გავათავეთ თუ არა, მაშინვე ავივსეთ ფიალები. ვილაცამ თქვა, მოდით ჯერ ჩვენი წარმომადგენლების სადღეგრძელო დავლიოთო, მაგრამ მასპინძელმა არ იყაბულა: ეს სულ უბრალო, შინაური ღვინოა და ჩვენი წარმომადგენლების სადღეგრძელოდ იმისთანა ღვინოს მოგართმევთ. — ძველისძველი ღვინო მაქვს ბოთლებით შენახული, — რომ ზიარებასავით შეგერგოთო. რასაკვირველია, დაეთანხმნენ და დიდი პატივი სცეს... ცივად ხორცს.

ლეტუმე ამტკიცებდა, რომ ყოველ მუშას, გლეხაკი იქნება, რომ მიწასა რწყავდეს თავის ოფლით, თუ ხელოსანი, ყოველდღე უნდა ჰქონდეს ერთი კარგი ნაჭერი ასე ცივად მოხარშული ხორცი და ერთი კარგი ხელადა ღვინოო. კოშარიც დაემოწმა და გააბეს ბაასი. აქედან საზოგადო და სახელმწიფო საქმეებზედ გადავიდნენ, მაგრამ ამ დროს შემოვიდა კომბოსტოს მწნილით შემწვარი ძეხვი და უცბად გააჩუმა ყველანი.

მარგალიტა და ნიკოლი სუფრას უვლიდნენ; ჰურჭელსა სცვლი-

დნენ, კერძა და ხელადებით ღვინოს არიგებდნენ. ნათლი-ჯალაბს საკმელები შემოჰქონდა.

პირველი საათი იქნებოდა, როდესაც შემწვარი შემოიტიანეს და ძველი ღვინოც მოითხოვა ნათლიაჩემმა; კარგა შექეიფიანებული იყვნენ ყველანი. კმაყოფილებით უყურებდნენ ერთმანეთს წვეულნი და ძველებურად ხუმრობდნენ.

— მაშ?! ჩვენც ადამიანები ვყოფილვართ, — იძახდა კოშარი, ჩვენცა გვქონია ადამიანის უფლებანი. თუ კაცია და წინააღმდეგს იტყვის ვინმე!.. თუ კაცია! მე ვარ პასუხისმგებელი!..

მოხუცებული კურტუა, ჯარში ნამყოფი და ნამსახური, პასუხად ეუბნებოდა:

— ჩვენ თუ ადამიანები არა ვართ, ეგ იმიტომ რომ კარგი ღვინო და კარგი სადილი ყოველთვის სხვასა ჰქონია. ჩვენ კი... ომის წინ, როცა ჩვენც საჭირონი ვიყავით, რა გინდა სულო და გულო, რომ ჩვენ არ დაგვპირებოდნენ! ომის შემდეგ კი, ვილას ახსოვდა დაპირება? დისციპლინაც მაშინ მოაგონდებოდათ, სამსახურის სისასტიკეც, სამხედრო სასჯელიც და ისე გვცემდნენ ხმლის ყუით, რომ კარგი პატიოსანი გლეხკაცი საქონელს არ მოეკიდება ისე უდიერად. ჯარისკაცის ცემაზედ მეტი სამარცხვინო განაღა იქნება რამე? განა ის არა კმარა, რომ თავი აქვს განწირული უბედურს? დიალ, ეგ ხომ სამარცხვინოა და მაგაზედ უარესი კიდევ ის არის, რომ რაც უნდა ვაჟკაცი და ნიჭიერი იყოს გლეხკაცი, აფიცრობას არ მისცემენ, გლეხი რაღა ხარო!

ლეტუმეი კი გაბრწყინვალებულს მომავალს ხედავდა, თითქო წარსული და აწმყო იმისათვის აღარც კი არსებობსო:

— ეგ ყველაფერი მორჩა, გათავდა, ხალხო! წავიდა, თქვენი ჰიროც წაუღია! საქმე მომავალია! ჩვენი რვეულები მზად არის, საერო კრება ნახავს, რა უნდა ხალხს, რა ესაჭიროება, რა უშველის და რა ავნებს, ჩვენი კეთილი მეფე რომ გაიგებს ჩვენს გაჭირვებას, იტყვის: სრულიად მართალი ყოფილა ხალხი! რატომ დიდებულებს კი არ უნდა ეღვათ ხარჯი?! რატომ თანასწორნი არ უნდა იყვნენ კანონის წინაშე დიდებული და გლეხკაციო? სწორედ ასე იტყვის, თორემ აი, ხომ ნახავთ. არა, თუ ყველანი ფრანგები ვართ, ხარჯიც ყველამ უნდა გავიღოთ და მოქალაქეობრივი უფლებანიც ყველას უნდა გვქონდეს. თუ ცვდები რაშიმე, აი აქ არა ვართ, მითხარით, რაში ცვდები!

ისე მკერამეტყველურად ლაპარაკობდა ლეტუმეი, რომ ყველას მოეწონა, თუმცა არ უხდებოდა კი, ღვთის წინაშე, ეს მკერამეტყველება: ყურთამდე გაბობილ პირს ისე აღებდა, თითქო გადაყლაპავს

უპირობს იქაურობასო; თვალებს ხუჭავდა, თავს უკან გადაიგდებდა და მარჯვენა ხელს სიტყვებს აყოლებდა. მაგრამ მგონი ეს ბევრს არავის შეუნიშნავს და რომ გაათავა, ყველამ ქება დაუწყო. ასე გასინჯეთ, მამაჩემმაც კი, ფრთხილმა მამაჩემმაც კი წამოიძახა:

— ყოჩაღ, ლეტუმიე! რაც მართალია, მართალია!.. ჩუმად იყავ, მიშელ, არა წამოგცდეს რა!.. თან კარებისკენ გაიხედა, თითქო ეშინია, ჯარისკაცები არ შემოვიდნენ და სათითაოდ არ დაგვიკვირონ ყველანიო.

ბოლოს ნათლიაჩემმა გაივსო ფიალა და დაიძახა:

— ეს ღმერთმა აცოცხლოს ჩვენი შოველი, ჩვენი წარმომადგენელი და ჩვენი მასახელებელი შოველი. ღმერთმა შეაძლებინოს სათემო კრებაზედაც ისევე მაგრად დაუხვდეს გლეხკაცის მტრებს, როგორც აქამდის უდგა. ღმერთმა აცოცხლოს ხალხისა და იმის უფლებათა მფარველად. ჩვენ შოველის სიყვარული, და შოველის ხალხისადმი ერთგული სამსახური ნუ მოუშალოს ღმერთმა. ღმერთმა აცოცხლოს ჩვენი შოველი მრავალ ქამიერ!

— ღმერთმა აცოცხლოს შოველი! შოველი ადღეგრძელოს! შოველს გაუმარჯოს! — ყვიროდნენ ყველანი და თან სავსე ფიალას სცლიდნენ.

იმ ხმაურში ვიღაცამ დაიძახა: — ღმერთმა აცოცხლოს ჩვენი წარმომადგენელი ივანე ლერუ და შოველიო! — და ახლა ეს სადღეგრძელო დალიეს იმავე ხმაურითა და ყიყინით.

ისეთი ხმაური იყო დარბაზში, რომ ჰერი ინძრეოდა; ქუჩაში მიმავალნი ჩერდებოდნენ და იყურებოდნენ—აბა, კაი სმა აქა სცოდნათო! ბოლოს, როცა ცოტა წესიერება ჩამოვარდა, მარგალიტამ და ნიკოლმა თეფშები გამოგვიცვალეს და ნათლი-ჯალაბმა ტკბილი შემოიტანა. ერთხელ კიდევ დავისხით ღვინო და ყველანი შოველს მივაჩერდით. ის კი იჯდა თავისთვის, მშვიდად, წყნარად, თითქო წვეულებაზედ კი არა. თავის ოთახში ზის მარტოდ-მარტოო, ცოტა არ იყოს, იმ ძველ ღვინოს წამოეწითლებინა, თორემ როგორც შოველი გვენახა ყოველთვის, ეხლაც ისეთი იყო, რომ ნახა, ყველანი შეშემომყურებენო, ადგა და იმის მაგივრად, რომ სხვებივით ვისიმე სადღეგრძელო დაეღია, დამშვიდებული კილოთი შემდეგი სიტყვები თქვა:

— დიად, პირველი ნაბიჯი უკვე გადავდგიო, მაგრამ ჯერ გამარჯვებას ნუ დავიკვებებო. ჯერ კიდევ დიდი შრომა, დიდი გაჭირებული ბრძოლა მოგიხდება, თუ გვინდა, რომ მართლა მოვიპოვოთ ჩვენი უფლებანი. ადვილი კი ნუ გგონიათ ბევარისა და ღალის უარყოფა, ხარჯის შემცირება, საბაჟოების გაუქმება და მეტადრე ბა-

ტონყმობის გადაგდება. ჩვენი გამარჯვება სხვის დამარცხება იქნება და აგრე ადვილად არ დამარცხდებიან ჩვენი მოწინააღმდეგენი. აგრე ადვილად არ გაუშვებენ ხელიდან ტკბილ ლუკმას! იქნება გგონიათ, რა კი სიმართლე ჩვენკენ არის, ველარას გაბედავენო? სიმართლესაც დაივიწყებენ, რჯულსაც და სარწმუნოებასაც და ცხარედ შეგვებრძოლებიან. გამაგრება მაშინა გვმართებს. ჩვენც იმდენი ვეცადნეთ, რომ თუ უბრძოლველად არ მოგვცეს, ძალა დავატანოთ. ჯარსაც მოიშველებენ, მოსამსახურეებსაც, ერთი სიტყვით ყველას, ვინც კი იმათ ლუკმაზედ არის და გადიდკაცებას ცდილობს. დიდი შებრძოლება მოგვიხდება... მე გგონია, რომ გამარჯვებული ხალხი დარჩება... იმიტომ რომ ხალხს უნდა გამარჯვება! იმიტომ რომ ხალხი მხარს მისცემს თავის წარმომადგენელთ, თუ უნდა რომ მძიმე და აუტანელი ტვირთი მართლა მოიხსნას. ხალხი მხარს მისცემს თავის წარმომადგენელთ...

— მხარს მივცემთ და აგრე! — შეჰყვირეს ლეტუმიემ, კოშარმა, ჰურემ და ნათლიაჩემმა და თან მუშტს უღერებდნენ უხილავ ბტერს. — გავწყდებით, ცოლშვილიანად გავწყდებით და ამ უღელს კი მოვიხსნით! ჩვენ თუ არა, ჩვენ შეილებს მაინც შეეძლებათ თავისუფლად ცხოვრება!

შოველი ელოდა, სანამ გაათავებდნენ და მერე განაგრძო:

— კიდევ მოგახსენებთ, გამარჯვებული ხალხი დარჩება, რადგან თვით ხალხი ჰგრძნობს, რომ ამოდენა უსამართლობას ბოლო უნდა მოეღოს და ვინ უნდა მოუღოს ბოლო, თუ არ თვითონ ხალხმა?! გამარჯვებული ხალხი დარჩება, მაგრამ რას ვაქნევთ ამ გამარჯვებას, თუ კი შემდეგში, როდესაც სახელმწიფო ვალის გადასახდელად საღსარს აღმოაჩენენ და საერო კრება დათხოვნილი იქნება, დიდებულნი ისევ ბატონყმობას შემოიღებენ? რად გეუცხოვათ ჩემი სიტყვები? ეგ პირველი მაგალითი კი არ იქნება: უწინაც რამდენჯერმე ყოფილა საერო კრება. ბევრი რამაც დაუღგენიათ ხალხის სასარგებლოდ, მაგრამ დაშლილა თუ არა ეს კრებები. მეფეს და დიდებულთ ისევ ძველებურად, თავისებურად უწირავთ, თითქო არც კრება ყოფილა და არც არა დაუღგენია რაო. დიად, ბატონყმობას რომ გადავაგდებთ, მერე უფრო ძნელი საქმე უნდა გავარიგოთ: იმოდენი ძალა უნდა მოვიპოვოთ, რომ დიდებულთ წინააღმდეგობა გავუწიოთ და ბატონყმობა ხელმეორედ არ შემოვალდებინოთ. ამ ძალას ხალხი წარმოადგენს და ხალხიდან გაყვანილი ჯარი. გარდა ამისა კაცს თავის ხსნა და თავისუფლება ერთ დღეს კი არ უნდა უნდოდეს, ან ერთ თვეს, ან ერთ წელიწადს, არა; ისე უნდა გაუჯდეს სულში და გულში ეს ნდობა, რომ მის მეტი არც დღე და არც ღამე არა აგონდებოდეს

რა. დიდი სიფრთხილე გვმართებს. მოგეხსენებათ, ბევრი მონდომებს მღვრიე წყალში თევზის დაჭერას; ჩვენთან ჩვენი იქნება, სხვასთან სხვისი და თუ მივენდეთ, ჩვენი გამარჯვებით ის ისარგებლებს და ჩვენ ხელცარიელი დავრჩებით. საჭიროა, ჯარი ხალხისკენ იყოს; ამისთვის საჭიროა, რომ სულ უბრალო, სულ უკანასკნელ ჯარისკაცს ნება და უფლება ჰქონდეს, თუ კი ვაჟაკობა და ნიჭი შესწევს, წინ წავიდეს, აფიცრობა მიიღოს და ისევე წარჩინებულ-დიდებულ კაცად გახდეს, როგორც ესლა მარტო მებატონეები არიან.

— ეს ღმერთმა აცოცხლოს ჩვენი შოველი! — შეჰყვირა კურტუამ, — აბა, ხალხო!..

მაგრამ შოველმა ანიშნა, ჯერ ნუ, ცოტა კიდევ მომითმინეთო, და განაგრძო:

— ძნელი წარმოსადგენია, რომ ამის შემდეგ ჯარი დიდებულთ მიემხროს და ხალხს წინააღმდეგობა გაუწიოს. ჯარი ჩვენსკენ იქნება და ჩვენთან ერთად შეებრძოლება ხალხის მტერს. შემდეგ ამისა და უმთავრესი ეს გახლავთ, გთხოვთ ყურადღება მიაქციოთ ჩემ სიტყვებს, შემდეგ ამისა, თუ გვინდა რომ ჯარი და ხალხი არ მოატყუონ, თუ გვინდა, რომ ჯარსა და ხალხს თვალი არ აუბან და თავისივე ხელით არ წაარყვნივინონ ამოდენა ვაი-ვაგლახით შეძენილი თავისუფლება. თუ გვინდა, რომ ჩვენში შუღლი არ ჩამოაგდონ და ერთმანეთს არ წაგვიდონ — თქვენც კარგად იცით ამით ვინ ისარგებლებს! — ერთი სიტყვით, თუ გვინდა, რომ გამარჯვება შეგვრჩეს და სასურველი ნაყოფი მოგვიტანოს, საჭიროა ისე მოვაგვაროთ საქმე, რომ სრული თავისუფლებით შეგვეძლოს ვწეროთ და გამოვთქვათ ჩვენი გულისპასუხი, საჭიროა თავისუფლება სიტყვისა და მწერლობისა. ესლა რომ უსამართლობას გვიზამენ რასმე, უნდა დავიწყოთ სიარული და დიდებულთან მივიდეთ ვისთანმე: „ასე, შენი ჭირიმე, ბატონი მჩაგრამს, ასე უსამართლოდ მეკიდება“... ბატონზედ ბატონთან ვჩივით... უკაცრავად პასუხია, მგელი მგლის ძვალს გასტეხს?! მაგრამ აბა უფლება გქონდეს ჩვენი საჩივარი ხალხს მოუახსენოთ? აბა ხალხს უფლება ჰქონდეს თვითონ დააყენოს მსაჯულები?! მაშინ განლა გაბედავს ვინმე უსამართლობას? ან სადლა იქნებოდა მაშინ უსამართლობა? უსამართლობას მაშინ სჩადის კაცი, როდესაც დარწმუნებულია, დამსჯელი არავინა მყავსო... საჭიროა ხალხი განათლდეს, რომ შეიგნოს თავის უფლებანი და სწორედ ამიტომ არის, რომ დიდებულთ ასე ეჯავრებათ ხალხის განათლება. ასე ეჯავრებათ, რადგან ხალხის განათლება და იმათი დაღუპვა ერთია. სწორედ ამიტომ არის, რომ ეკლესიაში გვიქადაგებენ ხოლმე: „ნეტარ არიან გლახაკნი სულითაო!“ სწორედ ამიტომ არის, რომ წიგნებსა და ჟურნალ-

გაზეთებს ბორკილს ადებენ სხვადასხვა ახალ-ახალი კანონებით. თითქო მწერლობის წახრჩობა უნდათო. სწორედ ამიტომ არის, რომ ვინც კი ჩვენს განათლებას მოინდომებს, განდევნილია სამშობლოდან და თავისი დღენი შორს, შორს ობოლ-ტილად უნდა დალიოს. სახრჩობელას ნულარ იტყვით, თუმცა სამშობლოდან განდევნას მე ჩამოხრჩობა მირჩევნია. ხომ იცით რამდენი დაუხრჩვიათ! რამდენი მოუკლავთ!.. მაგრამ არა! ხალხისთვის თავგანწირულნი, მკვდარი კი არა, წამებულნი არიან! თითონ თუ აღარა, იმათი ღვაწლი მაინც ხალხშივე რჩება და განათლებასა ჰყვენს! ნუ დავივიწყებთ ჩვენთვის წამებულთ. ვიკითხოთ იმათი ნაწერი და ვეცადნეთ შევიგნოთ, რას ქადაგებდნენ. გაუმარჯოს ხალხისთვის თავგანწირულთ! გაუმარჯოთ მრავალ უამიერ!

და ჩვენც შევძახეთ:

— გაუმარჯოთ! გაუმარჯოთ!

ბევრმა ვერც კი გაიგო, ვიზედ ლაპარაკობდა შოველი, მაგრამ ისინიც, გაუმარჯოთო, გაიძახოდნენ და ღვინოსა სვამდნენ. ისეთი ყვირილი იდგა დარბაზში, რომ ნათლი-ჯალაბი ეკატერინე შემოვიდა და გვითხრა: აგრე ნუ ყვირით, მთელი სოფელი თავს გვახვევია, ეგონებათ, რომ მეფის წინააღმდეგ აჯანყებას ვაპირობთო.

ვალენტინი მაშინვე გარეთ გავიდა და მამაჩემი ისე მიყურებდა, თითქო მეკითხება: დრო არ არის თავს ვუშველოთო?

— ეგ არაფერი, ეკატერინე, — უპასუხა ნათლიაჩემმა. — ჩვენ მეტი არა გვითქვამს რა, ჩვენ ისა ვთქვით. რაც უნდა გვეთქვა, და ახლა კი კმარა.

ყველანი გაჩუმებულნი იყვნენ და ვაშლსა და თხილს შეეჭყევოდნენ. გარედან ვილაცა მოხუცებულის ხმა ისმოდა.

— ჩვენი მათუსალემი, ვეყო! — დაიძახა ლეტუმეიმ.

— რა კარგ დროს მოსულა, სთქვა ნათლიაჩემმა და უბრძანა, აქ შემოიყვანეთო.

მარგალიტა გავიდა და შემოიყვანა ყველასაგან ცნობილი მოხუცებული მათუსალემი. ნამდვილად დომინიკი ერქვა და მათუსალემს იმიტომ ეძახდნენ, რომ იმ ხნის კაცი მეტისმეტად იშვიათი სანახავია. ას წელზე მეტისა იყო. ისე ჩაპყვითლებოდა სახე, ისე ჩასქნობოდა, რომ დამკვნარ თურაშაულსა ჰგავდა. თან ფანდური დაჰქონდა და იმისთანა ძველებურ სიმღერებს ამბობდა, იმისთანა საცოდავობას იტყოდა ხოლმე ძველი დროისას, რომ ყველას აგვატირებდა.

— მობრძანდი, მათუსალემი! — შესძახა ნათლიაჩემმა, — მობრძანდი! მობრძანდი და ძველებურად დაგვლოცე!

მოსუცებულმა ღვინო ჩამოართვა, პირჯვარი გადისახა, მერე აქეთ-იქით თავი დაუქრა, დალოცა იქ მყოფნი და ისე დალია. ნათლი-ჯალაბი, მარგალიტა და ნიკოლი იქვე იდგნენ და უყურებდნენ.

ღვინო რომ გაათავა, ნათლიაჩემმა სთხოვა, გვიმღერე რამეო, მაგრამ მოსუცებულმა უარი უთხრა: დავებრდი, რამდენი ხანია აღარა ვმღერი და თუ გნებავთ, ფანდურს კი დავუქრავო.

და დაჰკრა. იმისთანა ძველებური სიმღერა დაუქრა, ისე ააკენესა სიმები, ისე აატირა, თითქო ცოცხალი ადამიანი მოსტქვამსო. გაკვირვებული ვეკითხებოდით ერთმანეთს, ნეტავ რა სიმღერას უქრავსო?

— ეგ ხომ გლეხის სიმღერაა! — წამოიძახა უცბად მამაჩემმა.

და ყველამ შესძახეს:

— მართლა, ეგ ხომ გლეხის სიმღერაა. აბა, პეტრე, უნდა სთქვა გლეხის სიმღერა! უთუოდ უნდა სთქვა!

მე არც კი ვიცოდი, რომ მამაჩემმა სიმღერა იცოდა, იმის ღინიც კი არ გამეგონა ჩემს დღეში, არამც თუ სიმღერა.

— რალა მახსოვს?! — იძახდა მამაჩემი. — აღარც ლექსი მახსოვს, აღარც კილო. პირველი სიტყვაც კი არ მაგონდება.

მაგრამ აქედან შოველი სთხოვდა, იქიდან ნათლიაჩემი და სტუმრები, თანაც იძახდნენ, ყმაწვილბიჭობაში პეტრეს სიმღერაში ვერა-ვინ სჯობდაო... უნდა დათანხმებულყო, რა გაეწყობოდა, და საერთო სურვილი აესრულებინა. გაწითლდა, თავი დაღუნა და სთქვა:

— ეჰ, რაკი აგრე გსურთ, ვიტყვი და თუ არ ვარგოდეს, თქვენი ბრალი იყოს.

და დაიწყო. ფანდურს ააყოლა თავისი ხმა და ისეთი გულსაკლავი ლექსი თქვა, ისეთი მწუხარება და უიმედობა დაგვიხატა. ისეთი კენესა ყველასაგან დაჩაგრულის და შეურაცხყოფილის გლეხისა, რომ ქალებისას ნულარ იტყვიო, ვაჟკაცინი ქვითინებდნენ... საჭონელი რომ არა ჰყავდა, უღელში თითონ შეება საწყალი გლეხი და მეუღლედ თავისი ცოლი შეება. მაშ რა ექნა, როგორ გაეღეწა კალო? აგერ გაღეწა, გაანიავა... მოცვიდნენ მოურავი და იმის მხლებლები... აგერ ჯარი შემოესია. სოფელს ცეცხლი წაუქიდეს, გაანადგურეს, გაჟლიტეს იქაურობა. ქალები გააუხატიურეს... აგერ შიმშილი, კირიანობა...

გლეხკაცის უბედურებასავით დაუბოლოებელი იყო მამაჩემის სიმღერა.

ხომ ნასვამი ვიყავი და ჯერ ისევ მესამე ხანას ამბობდა, რომ თავი დავღუნე და ქვითინი დავიწყე. სხვანიც ყველანი ტირილდნენ. ლეტშივე, ჰურე, კოშარი და ნათლიაჩემი კი ბანს აძლევდნენ: გე-

გონებოდათ მომკვდარა ვინმე და „განუსვენესა“ გალობენო.

მარგალიტაც მღეროდა. ისე კვნესოდა, თითქო მართლა უღელში აბამენ და ღმერთს შველას შესთხოვსო. საშინელება იყო... ერთხანად თმები ამეშალა... სტუმრებს გადავხედე. ისე გაყვითლებულნი ისხდნენ ყველანი, თითქო სამარიდან ამოსულანიო. შოველი სუფრის თავში პირმოკუმული იჯდა და მგელივით გაბრაზებით იცქირებოდა შორს სივრცეში.

გაჩუმდა მამაჩემი. ფანდურის ხმაღა ისმოდა.

— ძალიანი სიმღერა თქვი, პეტრე! — უთხრა მამაჩემს შოველმა, — ძალიანი სიმღერა თქვი, პეტრე, და ძალიან კარგადაცა თქვი. ისე თქვი, როგორც ჩვენი ძველნი ამბობდნენ; გული თან ამოაყოლე, რადგან გულით გიგრძენია ეგ ტანჯვა-წვალება. ემაგრე იტანჯებოდნენ ჩვენი ძველნი მრავალ საუკუნეთა განმავლობაში; ემაგრე იტანჯებოდნენ და იმიტომ ამბობდნენ ამისთანა სავალალო, სატირელ ლექსს. სიმღერა კი არა, უბედურთა გოდება იყო ეგ სიმღერა.

და, რადგან ყველანი გაჩუმებულნი ვიყავით, დაუმატა:

— გლეხის სიმღერა ხომ გათავდა, მოდიო, ახლა სხვა ვთქვათ რამე.

და უცბად ფეხზედ წამოვხტივთ ყველანი. ყველაზედ უწინ მე წამოვდექი და დავიყვირე:

— დიად, ახლა სხვა ვთქვათ რამე... მაგან გული მოგვიკლა!

— ძალიან კარგი, ძალიან კარგი! ოღონდ დიასახლისისა არ იყოს, ნუ ვიყვირებთ კი.

ნათლიაჩემმა თავის რიხიანი ხმით მჭედლის სიმღერა დასძახა, მე და ვალენტინმა ბანი მივეცივთ და ისე გაემხიარულდით, თითქო სამჭედლოში ვართ და ჩაქუჩებს ვიქნევთო. ჩვენი სიმღერაც დასალონებელი იყო, მაგრამ ფოლადივით მაგარი და გულის გამმაგრებელი და სიმაგრე ხომ იმედია.

ბევრი კიდევ სხვა სიმღერა ვთქვით იმ დღეს და კარგი სიმღერებიც, მაგრამ მამაჩემის სიმღერა ისე ჩამრჩა გულში, რომ აი, ახლაც, ამას რომა ვწერ, ყურში მიდგას და გული მიკვნესის, გული მიკვნესის და ვიძახი:

— ოჰ, დიდებულო, წმინდაო რევოლუციავ! თუ საფრანგეთში არის სადმე გლეხკაცი, რომელსაც შენი სიკეთე არა სწამს, ადგეს და თავის მამა-პაპეული გლეხის სიმღერა ისწავლოს. იქნება გულისტკივილით მაინც მიხვდეს თავის შეცდომას და აღარა გცოდოს!

იმ ღამეს ძალიან გვიან ამოვედით შინ მე და მამაჩემი. მეორე დღეს შოველი მეცს წავიდა. საერო კრება შორს აღარ იყო.

შოველის წასვლის შემდეგ სულ სათემო კრების საქმეებზედა ვლაპარაკობდით; ზოგი ამბობდა, სამივე წოდების — თავადაზნაურობის, სამღვდელოების და ხალხის წარმომადგენელნი ერთად იქნებიან და სხდომაც ერთად ექნებათო; ზოგი კი სულ სხვა აზრისა იყო: თავადაზნაურნი და სამღვდელონი მავას თავის დღეში არ იზამენ და ცალ-ცალკე იქნებიანო; დიდი სჯა და ბაასი გვექონდა ამის შესახებ, თუმცა დარწმუნებით ჯერ არა ვიცოდით რა.

მეფის ბრძანებაში ეწერა, ხალხს იმდენი წარმომადგენელი ეყოლება, რამდენიც თავადაზნაურთ და სამღვდელოებას ერთადაო; ამიტომ ჩვენ გვინდოდა ყოველი კითხვა ისე გადაწყვეტილიყო, რომ ცალ-ცალკე დაჰკითხებოდნენ ყოველ წარმომადგენელს და ხმები ისე მოვადგოვებინათ; მაშინ გამარჯვება ჩვენი იქნებოდა და ბატონყმობის სახსენებელიც იქნებ აღარსად დარჩენილიყო; თავადაზნაურობა და სასულიერო წოდება კარგად გრძნობდა ამას და ამბობდა, — ცალ-ცალკე ყოფილიყო: წარმომადგენელს კი არა, ყოველ წოდებას უნდა დავეკითხოთ და ხმები ისე მოვადგოვოთო; მაშინ, რასაკვირველია, ისინი გვაჯობებდნენ: იმათ ყოველთვის ორი ხმა ექნებოდათ, ჩვენ კი ერთი, და ბატონყმობის გადაგდების მაგივრად, უფრო მძიმე უღელს დაგვადებდნენ ქედზედ.

აბა მაშინ უნდა გენახათ, რა გაბრაზებული იყვნენ ნათლიაჩემი, ლეტუმიე, კოშარი და ერთობ ყველანი, ვისაც კი ცოტა რამ შეგნება ჰქონდა და ამ კითხვის საშინელ შედეგსა ჰგრძნობდა. შებინდებოდა თუ არა და შეწყდებოდა მუშაობა, შევიკრიბებოდით ჩვენი მუხის ქვეშ და ზოგი თავისას გაიძახოდა, ზოგი თავისას. შინ ისე ცხელოდა, რომ აგერ რამდენიმე ხანია სკამები გარეთ გავიტანეთ და ჩვენი დუქნის სტუმრებსაც მუხის ქვეშ, ჩრდილში მივიღებდით ზოლმე. იმისთანა ცხელი გაზაფხული ჩემს დღეში აღარ მახსოვს; ჯერ ისევ აპრილი იდგა და იწვოდა ქვეყანა; მართალია, შემდეგ, მაისში დიდი ქარები და წვიმები დაიჭირა, მაგრამ აპრილში ისე ცხელოდა, რომ შუაგული ზაფხული გევგონებოდათ. მე და ვალენტინს ისე დაგვცხებოდა ზოლმე სამჭედლოში, რომ პერანგის ამარადა ვმუშაობდით.

— ბიჭო, მიშელ! აქ გამოდი ერთი! — შემომძახებდა წამდაუწყებელ ნათლიაჩემი და მეც უნდა გავსულიყავ, ამეწია ერთი უშველებელი კოკა ცივ-ცივი წყალი და ზედ თავზე დამეშვა. — ხომ დავიწვი, ასე რომ არ გავგრილდეთ! — რიგოს ცოლი მაგდანი — იქვე, ჩვენ პირდაპირ იდგა — სიცილითა კვდებოდა ზოლმე.

ერთი სიტყვით, ძალიან ცხელდა და ისე მოველოდით დაღამებას და აგრილებას, როგორც მონოზანი სულის ცხონებას. ამოვიდოდა მთვარე, დავსხდებოდით ჩვენი მუხის ქვეშ, ერთ ხელადა თეთრ ღვინოს ამოვიტანდით და ისეთი ამბავი გვქონდა, თითქო მკვდელ ლერუს ღუქანში კი არა, თვით საერო კრების სხდომასზე ვართო.

სულ გარეთ იყვნენ დიდით პატარამდე; ქალები თავიანთ ხელსაქმეს გამოიტანდნენ, ბავშვები იქვე თამაშობდნენ და ისეთი მხიარული ხმაურობა იდგა ქუჩაში, რომ გაიამებოდათ. ჩვენ კი ვისხედით მუხის ქვეშ და დაუბრუნებლად ვბაასობდით. ვიცოდით, რომ ყოველი ჩვენი სიტყვა საქვეყნოდ გახდებოდა, მაგრამ რაღაც იმედი გვიღვიოდა გულში და შიშს გვაფიწყებდა.

ხანდახან მარგალიტაც მოვიდოდა ხოლმე. იქვე განზე გავდგებოდით და ჩვენთვის ტკბილად ვკიკჭიკებდით, ვიდრე უფროსების ბაასს გაბრაზება არ დაეტყობოდა და ჩვენც არ წაგვიტყუებდა: ვნახოთ ერთი რასა ჯავრობენო. უფრო ნათლიაჩემი და ლეტუმიე ბრაზობდნენ. წამოხტებოდა ლეტუმიე, რაც ძალი და ღონე ჰქონდა მუშტს დაჰკრავდა მაგიდას და დაიყვირებდა:

— კმარა! ასე ცხოვრება შეუძლებელია! პირუტყვები ხომ არა ვართ! ჩვენ უნდა საქვეყნოდ გამოვაცხადოთ, რომ რაცა ვართ, ჩვენა ვართ, ჩვენ, გლეხკაცები!

ნათლი-ჯალაბი კი თავის მაგიდასა ჩიოდა:

— ღვთის გულისთვის; ბატონო ლეტუმიე, მაგიდამ რა დაგიშავათ?! მაგასაც ხომ ხმა არა აქვს, რომ მებატონეებს მიუღდეს!

ასე, ამგვარად მიმდინარეობდა ჩვენი ცხოვრება; დღე დღეს მისდევდა. კვირა — კვირას და მე არ მახსოვს, რომ ისეთი კმაყოფილი ვყოფილიყავ როდისმე ჩემი ბედისა, როგორც იმ განაფხულს ვიყავი, როდესაც თავისუფლად შევეტრფოდი ჩემს მარგალიტას, თუმცა ვერა ვბედავდი და ვერ ვეუბნებოდი, როგორ მიყვარდა. არა, ისე ბედნიერი მე ჩემს დღეში აღარ ვყოფილვარ!

ერთს საღამოს, ასე რვა საათი იქნებოდა, ჩვეულებისამებრ ვისხედით მუხის ქვეშ და ვლაპარაკობდით. ლეტუმიე რაღასაც გაჰყვიროდა, კოშარს თავისი გრძელი ცხვირი წვერში წაეყო და გაჩუმებული ჩიბუხს ეწეოდა. ჩვენთვის უშიშრად, უდარდელად ვლაპარაკობდით და მგონი ყველაზედ უშიშრად კოშარი ბრძანდებოდა, თუმცა, სწორედ იმ დღეს შემოეტანა ფარულად საზღვარგარეთიდან ერთი ტომარა თამბაქო. თავისი ხელობა (ხურო იყო) მაძღარ ლუქმას ვერ აჰმევედა და ძალიან რომ გაუჭირდებოდა, საზღვარს გავიდოდა, გრაუფტალში სულ იაფად ერთ კარგ ტომარა თამბაქოს იყიდდა და

შემოპარებდა როგორმე; ჩვენში კი თამბაქოს იმისთანა დიდი ბაჟი ელო, რომ მამასისხლად იყიდებოდა; რასაკვირველია, ყველანი ასე შემოპარებულსა ყიდულობდნენ, რადგან გირვანქას ერთ აბაზად შო- ულობდნენ და ღუქანში კი მანეთადაც ძნელი საშოვარი იყო.

პოლიტიკური ბაასი ჩვეულებისამებრ ათ საათამდე უნდა გაგრძე- ლებულიყო, მაგრამ ჯერ მგონი ცხრაც არ იყო, რომ ვიღაც კაცმა შემოაღო ქუჩის კარი და ნელი ნაბიჯით წამოვიდა ჩვენსკენ. თან ორი ქანდარმი მოსდევდა; მოდიოდა და სულ აქეთ-იქით იყურებო- და, თითქო რაღასაც ზვერავეს და დაეძებსო. მოვიდა, მოგვიახლოვდა. ეს გახლდათ მატურინ პულე, დაბალ-დაბალი, საშობაო ქუბივით ჩასუქებული, ჩამრგვალებული, ჩაწითლებული, სამკეცი დაბაბით შემკული პულე. ამბობდნენ, იმისთანა უცნაური მჭამელია, რომ ერთი კარგი ბატკანი საუზმედ არ ეყოფაო. და მეორე კიდევ სადი- ლადაო. აბა რას ეყოფოდა ამისთანა მჭამელს თავისი მცირე ჯამა- გირი — სადღაც მონასტერში მეკარედ იყო? და მარტო ჯამაგირზედ რომ ყოფილიყო, შიმშილით მოკვდებოდა. იქნება სწორედ ამიტომ იყო, რომ პულე არც დედას დაინდობდა, არც მამას, არც და-ძმას და ნათესავს, ოღონდ კუჭი გაეძლო როგორმე. თვით ღმერთსაც კი დააბეზლებდა, ოღონდ დასაბეზლებელი ჯილდო ეშოვა და თუმცა ღორსავით უგუნური შეხედულობა ჰქონდა, იმისთანა გაიძვერა რამ იყო, რომ უბაჟოდ შემოპარებული საქონელი არსად გამოეპარებოდა. დღე და ღამ სულ იმის ცდაში იყო, მახეში გავაბა ვინმეო და თუ ცხოვრობდა, დასაბეზლებელი ჯილდოთი უფრო ცხოვრობდა. ვიდ- რე თავის ჯამაგირით. აი. რა ცუდია მუცლის აყოლა: გულს მუცელი გადაეფარება და ადამიანს ჭამისა და სმის გარდა აღარა მოაგონდე- ბა რა!

მოდიოდა და ორივე ქანდარმიც თან მოსდევდა, ორივე უზარ- მაზარი, მშვენიერი, წარმოსადეგი ვაჟკაცი, თუმცა ყვაილისაგან დასახიჩრებული კი იყვნენ. ძალიან მძვინვარებდა რევოლუციის წინ ყვაილი: ადამიანიშვილს ვერსადა ნახავდით, რომ ამ სენს თავისი ნი- შანი არ დაედო. საცა ლამაზ ქალს შეხვდებოდით, ყვაილისაგან უნდა ყოფილიყო წამხდარი, და კაცები კიდევ უარესად დასახიჩრე- ბული იყვნენ; მეტადრე ბევრი იყო ცალთვალა და უსინათლო ხომ ასე იყო და ვერ წარმოიდგენთ, რა ძნელი იყო ყვაილის აცრის შე- მოღება! უფრო ძნელი, ვიდრე კარტოფილის შემოღება იყო. ხალხი ყოველთვის წინააღმდეგობას გაუწევს ხოლმე იმას, რაც იმისთვის სასარგებლოა. ეს არის ხალხის უბედურება!

მოვიდნენ, შორიხლო გაჩერდნენ და პულემ ყველანი დაგვა-

თვალერა. დიდი კმაყოფილება დაეტყო. მერე კოშარს დააკტერდა და სთქვა:

— ემანდა! ახლა კი აღარსად წაგვივა!

ყველანი აღვშოთოდით, რადგან მთელმა ქვეყანამ იცოდა, რომ კოშარი თვით პულეს უზიდავდა თამბაქოს და სულ მუქთად უზიდავდა. მაგრამ პულე კოშარს კი არა, ღვიძლ ძმას არ დაინდობდა და არ დაინდო კიდევ:

— ემანდა! შეჰკარით!

ორივენი კოშარს მივარდნენ. საწყალს ჩიბუხი გავარდა, ორივე ხელებით მაგიდას დაებლაუქა და ყვირილი დაიწყო:

— რას მერჩით?! რა დავაშავე?!

სახტად დავრჩით ყველანი. შეშინებულნი ვუყურებდით ერთმანეთს და ველარა მოგვესაზრა რა. პულე კი იცინოდა, თითქო ადამიანის ტანჯვა გულს უხარებდო:

— რა უნდა დაგეშავებინა! წუხელ გრაუფტალიდან ცოტა რამ სანაქებო თამბაქო შემოგიტანია და იმისთვის გიახელით... საბძელში რომა გაქვს ყავრის ფიცრებში მიმალული.

მაშინ კი ყველანი დავრწმუნდით, რომ კოშარი დაებეზღებინა ვისმე: თავისივე შურიანი მეზობელი დააბეზღებდა, თორემ ასე ზედმიწევნით პულეს რა ეცოდინებოდა? ყველანი შევეკრით, რადგან ამ დანაშაულისათვის უბედურს საუკუნოდ მადნებში სამუშაოდ გაისტუმრებდნენ სადმე.

შემკრთალნი, გაქვავებულნი ვიდექით და ხმის ამოღებასაც კი ველარ ვახერხებდით, რადგან პოლიციის წინააღმდეგობისათვის მაშინ ერთიათად სასტიკადა სჯიდნენ დამნაშავეთ, ვიდრე დღეს: სულ ყველაფერს წაართმევდნენ, რაც კი რამ ებადათ — სახლ-კარს, მამულს, საქონელს და ავეჯს და თითონ სადმე შორს, მარსელს გაგზავნიდნენ სახელმწიფო გემებზედ სამუშაოდ. გაგზავნიდნენ და ის იყო და ის! — ველარც ცოცხალს ნახავდა ვინმე, ველარც მკვდარს! სულიან-ხორციანად დაღუპული იყო თავის ცოლ-შვილისა და დედ-მამისათვის! რამდენი კაცი გაუუბედურებიათ ამგვარად ჩვენს მთაში! თვით ჩვენ სოფელშიაც საწყალი მოხუცებულის ქენევივის შვილი ამისთვის დაკარგეს. პულემ დააბეზლა თურმე, საზღვარგარეთიდან მარილი შემოიტანაო, და დაიჭირეს საწყალი ქვრივის დედისერთა შვილი და საუკუნოდ გამოასალმეს თავის სამშობლო მიწა-წყალს. ამბობდნენ — უბედური იქ გაგზავნეს, სადაც პილპილი და შაქრის ლერწამი მოდისო. რაც რამ ებადათ, ისიც წაართვეს და იმის შემდეგ ქენევივი მოწყალეებითა ცხოვრობდა.

წარმოიდგინეთ, როგორ შეგვეშინდებოდა, პულე რომ დავინახეთ.

— აბა, შეჰკარით! — ყვიროდა პულე; — შეჰკარით და წავიდეთ. კოშარი კი მაგიდას ებლაუჭებოდა და თავისას იძახდა:

— ვერ წამიყვანთ, ვერა!

ღვთის წყალობა გაქვთ ლეტუმის ხმა ჩაუფარდა! ისე გაჩუმებულყო, თითქო თევზით პირში წყალი უდგასო. ჩხავანა კატაო, სწორედ ამისთანა კაცებზე არის ნათქვამი: ყვირის და ყვირის, თითქო უნდა, რომ თავის თავი მოატყუოს—ნახე რა ბიჭი ვარო! და ერთი დღის სავალზე რომ ჟანდარმი მოაჩვენოთ, შიშით გული გაუსკდება! და ხშირად გულმაგარი და მამაცი სწორედ ის არის ხოლმე, ვინც ყველას მშიშრად და მხლლად მიაჩნდა.

იმდენი სწიეს ჟანდარმებმა, იმდენი აჯანჯლარეს ჩვენი კოშარი, რომ კინაღამ აგლიჯეს კიდეც, მაგრამ ამ დროს მარგალიტამ, იქვე ჩემს გვერდით რომ იდგა, დაარღვია სიჩუმე:

— ფრთხილად, ბატონო პულე! თქვენ უფლება არა გაქვთ ეს კაცი დაიჭიროთ!

და იმოდენა ხალხი, იქ მყოფნი და გარედან შემოსულნი, უცბად ჩვენკენ მობრუნდნენ; ნათლიაჩემი, ლეტუმე, ნათლი-ჯალაბო.. მომაკვდავის ფერი ედვა ყველას. განა არა, ყველამ იცნო მარგალიტას ხმა, მაგრამ თავის ყურისა არა სჯეროდათ: მარგალიტა ამას როგორ გაბედავდაო? და შიშით თრთოდნენ. ყველაზე გაკვირვებული და განცვიფრებული კი თვით პულე ბრძანდებოდა. თავი ძალა აედო, ჩასისხლიანებულ თვალებს აქეთ-იქით აცეცებდა და ჰკვირობდა:

— ვინ, ვინ იყო თავხედი, თავხედ ხელადებული, რომ ეს გამიბედაო?! ჩემს ღვეში ჩემთვის არავის რა გაუბედნია და ხედავთ აქ რა მაკადრესო?!

ასე გვიყურა ცოტახანი და მერე შეჰყვირა:

— რომელი ხარ, რომ მეფის წინააღმდეგობასა პბედავ?

მარგალიტამ ისევ მშვიდად უპასუხა, თითქო აქ არაფერიო:

— მე გახლავართ, ბატონო პულე. მარგალიტა შოველი, ხალხის წარმომადგენლის შოველის ქალი. ცუდ საქმეს სჩადიხართ, ბატონო, ძალიან ცუდ საქმეს; თქვენ გნებავთ, კაცი დაიჭიროთ, თუმცა მსაჯულის ბრძანება კი არა გაქვთ.

მერე ადგა და პულესა და ჟანდარმებს მიუახლოვდა, რომლებიც ჯერ მაინც თავს არ ანებებდნენ კოშარს.

— ნუ თუ მეფის ბრძანება არ იცით? ვეღაცას დაუბეზლებია და თქვენც ბედავთ და კაცს იჭერთ საღამოს ექვსი საათის შემდეგ, თუმცა მეფის ბრძანებით ეგ აკრძალულია! იქნება გნებავთ, ძალა დაატანოთ, ღამე სახლში. შეუვარდეთ და სახლი გაუჩხრიკოთ. აგრე

რომ იყოს. მაგის უფლება რომა გქონდეთ, ყველა მაწანწალა და ქურდი მაგით ისარგებლებს და საცა გაკეთებულ კაცსა ნახავს, სახლში შეუვარდება: მეფის ბრძანებით სახლი უნდა გაგიჩხრიკოთ! ქვეყანა ქურდებს დარჩებათ, მეფის ბრძანებით რომ არ იყოს ეგ აკრძალული. მეფის ბრძანებაა — სახლის გასაჩხრეკად დღით მობრძანდეთ და თან ორი პატიოსანი კაცი დაისწროთ.

ისეთი დინჯად, უშიშრად ლაპარაკობდა, გეგონებოდა თითონ შოველიაო. პულეს კი თანდათან ბრაზი ერეოდა, თავს ძლივს იმაგრებდა, სულ კანკალებდა იმ სისქე კაცი. მარგალიტას სიტყვებმა ცოტა ჩვენც გონებაზე მოგვიყვანა. ეზოში და გარეთ ქუჩაში კი ხალხი მოგროვილიყო, მთელი სოფელი თავს დაგვესხმოდა და ჩუმი დრტვივნა ისმოდა. უცბად მოხუცებულის ხმა გაისმა, მოხუცებული ენევეივის ტირილი და წყევლა-კრულვა:

— ვერ გაძეხი განა, შე წაწყმედილო, შენა! ჩემი შვილი, ჩემი უბედური ფრანსუა არ გეყოფოდა?! სისხლი მოგწყურდა განა, შე გულმკვდარო! ის არ გეყოფოდა?! ახლა წვრილშვილი კაცის დაღუპვა მოიწადინე?!

საწყალი ბებერი! მოიწევდა და ყავარჯენს უქნევდა პულეს.

— სად არის ჩემი ბიჭი, შე ღვთის მტერო, შე იუდავ, შენა! შენ გამიუბედურე, შენა, შე იულის კერძო! ღმერთო, ღმერთო! ნუ თუ სამართალი აღარა გაქვს, შე დალოცვილო, შენა! ნუ თუ ასე უნდა ინავარდოს ამ სულითხორცამდე წაწყმედილმა! ერთხელაც იქნება მოკვდები, შე უბედურო. ცას ხომ არ შეაბერდები. იქ არ წარსდგება, ღვთისა წინაშე! იქ დაგხვდება ჩემი უბედური შვილი და იქ გაგისწორდება, იქ!

ისეთი ხმით მოსთქვამდა მოხუცებული, რომ დავიწვით იმის საცოდაობით. ხალხი ნელ-ნელა გარს გვერტყმოდა და მუქარა გაისმოდა. პულე შეკრთა. ამ დროს ნათლიაჩემი წამოდგა წინ და უთხრა:

— ნუ თუ იმ უბედურის ტირილი არ გესმით, ბატონო პულე! საშინელებაა, საშინელება! რა ადამიანი უნდა იყოს, რომ ეგ ცოდვა ეღვას და ხელმეორედაც კიდევ სცოდავდეს?..

ენევეივი აღარას ამბობდა, მაგრამ იმისთანად ქვითინებდა, რომ ჩვენც აგვატირა ყველანი.

— დიად, ბატონო პულე, საშინელებაა, რასაც თქვენ სჩადიხართ. დაფიქრდით, ასწონ-დასწონეთ თქვენი საქციელი. ცუდ დროში ვართ, შეიძლება ხვალ უარესი დღე დაგვიდგეს, და ყველაზედ უარესი პოლიციის მოხელეებს და ჟანდარმებს! წლეულს ეს მეხუთედ მოდიხართ ჩვენ სოფელში და ღამით გვივარდებით სახლში. შარშან ზამთარს კიდევ ლუტცელბურგში ბრძანდებოდით და შუა-

ღამისას შეუვარდით ოჯახში ერთ საწყალ კაცს. დღეს მოგიტომენენ, ხვალ... და ზეგ კი, იქნება აღარც კი მოგიტომინონ. მერე ჩვენ რა ვქნათ, ჩვენ, უფროსებმა და მოხუცებულებმა? ჩვენ რა ვქნათ, რომ წინააღმდეგობა გაგიწიოთ ვინმემ? ჩვენც თქვენ დაგეხმაროთ, სიმაართლისა და მეფის ბრძანების წინააღმდეგ? ჩვენც თქვენ დაგეხმაროთ, თუმცა ვიცი, რომ მეფის ბრძანებას არღვევთ და ფეხითა სთელავთ? თქვენ დაგეხმაროთ, თუ იმათ, ვინც მართალია, ვისაც უსამართლოდ ეკიდებით და დაღუპვას უპირებთ? თქვენ დაგეხმაროთ, თუ იმას, ვინც თავისუფლების დაცვასა ცდილობს? დაფიქრდით, ბატონო, ღვთის გულისთვის, დაფიქრდით! მე ამის მეტს არას მოგახსენებთ!

ეს თქვა ნათლიაჩემმა და იქვე მაგიდასთან დაჯდა. ხალხი კი უფრო და უფრო გრგვინავდა. ეზოში რომ ვეღარ ეტეოდნენ, ლობეზედ ამომძვრალიყვნენ, ვნახოთ რითი გათავდება ეს საქმეო. კოშარი კი თავისას გაიძახოდა:

— არ წამოვალ! რომ მომკლათ, არ წამოვალ! ჯერ ბრძანება მოიტანეთ!

პულემ ნახა, რომ ჟანდარმებიც შეშინდნენ და თითქმის თავი დაანებეს კოშარს; ნახა, რომ რაც უნდა ებრძანებინა, ისინი აღარ დაემორჩილებოდნენ და ჯავრის ამოსაყრელად მარგალიტასკენ წამოვიდა. უცბად გამოიწია და შემოუტია:

— სულ შენი ბრალია, შე... კალვინისტო, შენა! შენ რომ აქ არა ყოფილიყავი, სუყველაფერი კარგად გარიგდებოდა, შე ეშმაკის თესლო, შენა!

სისხლი თავში ავარდნოდა და ისე მორბოდა მარგალიტასკენ ინდოურივით გაფხორილი, თითქო უნდა მივიარდეს და თმებით ათროსო. მოვარდა... ის იყო ხელი აცლო და მეც წავიწიე წინ, თვალი თვალში გაეუშტერე და გულში კი მიხაროდა:

— ნეტავი დაჰკრა, ნეტავი დაჰკრა, შე უბედურო, რომ ფიცხლავ ანდერძი აგიგო-მეთქი!

ისე შეეყურებდი, თითქო ხელში მიჭირავს და დაბაბიან თავს ქვაზედ ვუგლიო.

უცბად ფერი წაუვიდა და უკან დაიწია.

— კარგი, — სთქვა ბოლოს პულემ, — ხვალ იყოს, განა ხვალ კი ვეღარ მოვალთ!

ჟანდარმები ძალიან კარგად ხედავდნენ ხალხის მღელვარებას და მუჭარას და ძალიანაც იამათ, ეს რომ გაიგეს. კოშარს მაშინვე თავი დაანებეს და ისიც წამოდგა და წელში გასწორდა; საკინძე ჩა-

მოგლევჯილი ჰქონდა, ოფლში იწურებოდა და ისეთი ფერი ედვა, თითქო სულთმობრძავი არისო.

მე კი არ ვიძროდი ადგილიდან. მარგალიტა რომ მობრუნდა და ყურება დამიწყო, გონებაზე მარტო მაშინ მოვედი და მარტო მაშინ შევნიშნე, რომ იმოდენა ხალხი მე შემომყურებდა. ისე მეწყინა პულეს წასვლა, ისე მეწყინა, რომ საღსალამათი მიდიოდა, რომ კინაღამ გამოვუდექი; ჩხუბის გუნებაზედ ვიყავი და გული მიბრაზდებოდა, ისე რად გავუშვი, რატომ კარგად არ ჩავებუნენ-მეთქი!.. საღდა ის დრო! ჟამნი რბიან და ჩვენცა გვცვლიან! თორემ რად უნდა მიკვირდეს მაშინდელი ჩემი გაბრაზება და ჩხუბის სურვილი! თვრამეტი წლისა მარტო ერთხელ არის ადამიანი, მკლავიც მაშინ შესწევს და სიყვარულის ალითაც მაშინ იწვის. პულეს კი არა, მთელს ქვეყანას შევებრძოლებოდი მაშინ!

კარგა ხანი მიყურა მარგალიტამ და მერე სიცილით მითხრა:

— ხედავ, მიშელ, როგორ მიძუნძულებენ!

— მაგაზედ უკეთესს ვერას იზამდნენ, — ვუპასუხე მე.

მაგრამ ჯერ ქუჩაში არც კი გასულიყვენ, რომ საშინელი ყიყინი დასცა ხალხმა. ზოგი რალაცას უყვიროდა, ნიშნს უგებდა, ზოგი უსტვენდა, ზოგი გულიანადა ხარხარებდა; მთელ ჩვენ უბანში თავიდან ბოლომდე ყიყინი და პულეს დაცინვა ისმოდა. კოშარიც ამ ხმაურობამ მოიყენა გონზედ. მიიხედ-მოიხედა, თითქო აღარც კი ახსოვს რა მოხდაო, და ხელადით ღვინოსა სწვდა, მოიყუდა და ამოუსუნთქებლად გამოცალა.

— აჩქარდით, ბატონო კოშარ, — ეუბნებოდა მარგალიტა, — თუ მართლა სახიფათო გაქვთ რამე, ჩქარა ტყეში მიმალეთ, თორემ ხეალ გვიანლა იქნება.

უნდა გენახათ, რა კმაყოფილი იყო ჩვენი პატარა მარგალიტა და რა ბედნიერი იყო საწყალი კოშარი, ხელადა დასდგა, და მარგალიტასკენ წამოვიდა; დარწმუნებული ვარ, მადლობა უნდა გადაეხადა, მაგრამ ჯერ ისევ კანკალებდა შიშისაგან. თითქო რალაც მოაგონდაო, ხმაც აღარ ამოიღო, არც კი გამოგვეთხოვა და გიჟივით მოჰკურცხლა თავის სახლისაკენ.

აკი მოგახსენებთ, მთელი სოფელი თავს დაგვედო. იმისთანა მზიარული ხმაურობა გაისმოდა ჩვენს ეზოში, იმისთანა გამარჯვებული ხუმრობა და სიმღერები, გეგონებოდათ დღეობაა და ღამის სათეველად მოსულა ხალხიო. პულე და ჟანდარმები ჯერ შორს არ იქნებოდნენ და, რასაკვირველია, კარგად გაიგებდნენ ჩვენი სიმზიარულის მიზეზს. რა გუნებაზედ იქნებოდნენ? მეტადრე პულე! კაცი სანადიროდ წავიდა და თითონ კი გაება მახეში!

გახარებულმა ნათლიაჩემმა ღვინო ამოატანინა და იმ ღამეს კიდევ დიდი ხანი ვისხედით მუხის ქვეშ. ან რა დაგვაძინებდა? ყველა იმას გაიძახდა, — მარგალიტა რომ არა ყოფილიყო, მე მინდოდა კარგი პასუხი გამეცა იმ მამუზღარა პულესთვისაო, — მაგრამ ამავე დროს იმასაც ამბობდნენ, რომ კოშარი მარგალიტამ დაიხსნა განსაცდელისაგანო.

— გამოქრილი შოველია, ჩვენი პატარა მარგალიტა, — იძახდა ნათლიაჩემი, — ისევე უშიშარი, ისევე პირში მთქმელი და დაურიღებელი. ახლა რამდენს გაიცინებს შოველი, ამ ამბავს რომ გაიგებს! რამდენს გაიცინებს, რომ ეტყვიან — შენმა გოგომ ყანდარმები გააქციაო!

მეც იქვე მარგალიტას ახლო ვიდექი და გაჩუმებული ყურს ვუგდებდი ამ ლაპარაკს. ჩემზედ უბედნიერესი მგონი სხვა არავინ ყოფილიყო ჩვენს მაზრაში!

და ბოლოს, როცა ლაპარაკით მოვიღალენით და შინისკენ წასასვლელად ავიშალენით, როდესაც ნათლიაჩემმა ეზოს კარი მოკეტა და უკანასკნელად დაგვიძახა: — ღამე მშვიდობისათ, მეგობრებო! ღმერთმა ნუ მოგიშალოთ ღღევანდელისთანა გამარჯვებაო! — როდესაც ზოგი ზევით წავიდა და ზოგი ქვევით, მე და მარგალიტა სულ უკან დავრჩით და ნელი ნაბიჯით წავედით შოველიანთკენ.

მშვენიერი, მთვარიანი ღამე იყო; ჩუმი, წყნარი ღამე, ფოთოლიც კი არსადა შრიალეზდა. აქა-იქ კარებს მიხურავდნენ, ან ღამე მშვიდობისაო, ერთმანეთს ეთხოვებოდნენ; ეს რომ არ ყოფილიყო, აღამიანის ხმაურობას რომ არ დაერღვია ღამის სიჩუმე, სწორედ ის დრო წარმოგიდგებოდათ, როდესაც, როგორც ამბობენ, ერთი პირი ძილი წყალსაც მოუვიაო!

სახლამდე მივიყვანე მარგალიტა. აგერ ამწვანებულ მსხლის ჩრდილში ჩამალული პატარა სახლი; აგერ დაბალ-დაბალი ღობე; აგერ იქვე სახლის გვერდიდან მოჩუხჩუხე ანკარა წყარო; ისე მიყუჩებულა იქაურობა, ისეთი მყუდროებაა ყველგან, რომ ხმის ამოდებას ველარა ვბედავთ. ვდგევართ ერთად და ერთმანეთისთვის თვალი ვერ მოგვიშორებია.

დიდი ხანი ვიყავით ასე; მერე ისევ მარგალიტამ დაიწყო:

— რა ღამეა, მიშელ, — დაეწაფა, წყალი დალია, პირი მოიწმინდა... — იცი, მიშელ, შენ რომ არ ყოფილიყავი... მთელი სოფლის ბიჭები იქ იყვნენ და... არა, ყველაზედ ყოჩალი შენა ყოფილხარ! იქნება გგონია, არ ვიცოდი, რომ ჩემს უკან იდექი! ღმერთო, რა საშინელი სანახავი იყავი! ჰოდა, კიდევ შენ შეაშინე პულე, რომ ისე

მოძურწა! კუდამოძუებული მიეშურებოდა ის უბედური, ისა! — მეუბნებოდა მარგალიტა და გულიანად იცინოდა.

— ნეტავ, რას ფიქრობდი იმ დროს, მიშელ, რომ ისეთი საშინელი სახე გქონდა!

— მე იმას ვფიქრობდი, რომ თუ ღმერთი გაუწყრა და მარგალიტას ხელი ახლო, ან ცუდი სიტყვა აკადრა რამე, აქვე, ამ წამსვე გავაქრობ-მეთქი.

ღამაშტერდა. გაწითლდა...

— მერე ხომ შენც დაიღუპებოდი?

— ჯერ კი იმას გაესრესდი და! მერე ჩემთვის რაც უნდა ექნათ! რა კარგად მაგონდება ყველაფერი! თვალწინ მიდგას პატარა მარგალიტა, თვალწინ მიდგას ის ნეტარი, წყნარი ღამე; თვალწინ მიდგას ჩემი მარგალიტა და გარკვევით მესმის ყოველი იმისი სიტყვა. რა კარგი რამა ხარ, სიყვარულო! მაშინ მარგალიტა თქვესმეტი წლისა იყო და ჩემს თვალში დღესაც არ დაბერებულა.

ცოტა ხანი კიდევ ვიყავით გაჩუმებულნი! მერე თითქო ფიქრიდან გამოერკვავო, მივიდა მარგალიტა, კარი გააღო... უცბად გამობრუნდა, ხელი გამომიწოდა და აღელვებული ხმით მითხრა:

— ღამე მშვიდობისა, მიშელ! გმადლობ!

და ვიგრძენ, რომ ხელი მომიჭირა. ღმერთო, როგორ ამიკანკალდა გული!

კარი მოკეტა. ვიდექ და გაშტერებული ვუყურებდი მარგალიტას სადგომს. ზემო ოთახში უუქი გამოჩნდა. ეტყობა დასაძინებლად ემზადება-მეთქი, ვიფიქრე და შინისკენ წავედი.

მივდიოდი და სიხარულისაგან ატოკებულს გულს ძლივს ვიმაგრებდი:

იცის მარგალიტამ, იცის, რომ მიყვარს!

იმისთანა აღელვებული და აღტაცებული ჩემს დღეში აღარ ვყოფილვარ.

XVI

გადაწყვეტილი მქონდა — მარგალიტა ჩემი უნდა ყოფილიყო.

— ჯერ პატარაა, ვიძახდი ჩემს გულში, ჯერ პატარაა; მაგრამ ამ თხუთმეტ თვეზედ თვრამეტი წლისა გახდება და მაშინ გაიგებს, რა დიდი ბედნიერებაა ქალისთვის გათხოვება. მით უფრო გაიგებს, რომ მე ჩემ სიყვარულს აღარ დავუმალავ და რაკი ნახავს, რომ ასე გაგიყვებით მიყვარს. შევეთანხმდებით და საბრძოლველად მოვემზადებით. მაშინ უყურეთ დედაჩემის ყვირილს; აბა რას ინდომებს „ურ-

ჯულოს, კალვინისტს?“ ჩვენი მღვდელიც დედაჩემისკენ იქნება და მთელი სოფელიც. მაგრამ ეგ არაფერი! მე დარწმუნებული ვარ, მამაჩემი ღიდად ისიამოვნებს და მამა-შვილურადაც დამლოცავს, როდესაც ავუხსნი, რა ძალიან მიყვარს ჩემი მარგალიტა და რა ბედნიერება იქნება ჩემთვის იმის შერთვა. უმისოდ ღმერთმა ერთ დღესაც ნუ მაცოცხლოს-მეთქი, ვეტყვი, და დარწმუნებული ვარ, მამაჩემი მზარს მომცემს და არც დედას შეუშინდება; არც მთელ სოფელს. ბევრიც რომ იყაყანონ, მე ჩემსას ვიზამ! ჯვარს დავიწერთ, კატრვანის გზაზედ სადმე რულეტში პატარა სამქედლოს დავდგამ და დავიწყებ მუშაობას. კაცს მკლავი უჭრიდეს, თორემ საქმე არსად მოაკლდება. იქნება ნათლიაჩემივით ერთი პატარა დუქანიც გავხსნა! რა ბედნიერ ვარსკვლავზედ ვყოფილვარ დაბადებული, ღმერთო! მერე თუ შვილიც მოგვეცა!.. იჯავროს დედაჩემმა! დამებადება ბალღი, ერთი ორ-სამ კვირას დავიცდი; მერე დავიწყებ სიარულს და თავს დაუფრამ დედაჩემს. მივალ და ვეტყვი: აი, დედაჩემო, აჰა, დასწყევლე, თუ შეგიძლია! გული მოუღებება, თვალს ცრემლი მოერევა, იქნება ბევრიც იყვიროს, მაგრამ შეგვირიგდება და ისევ ძველებურად, ტბილად ვიცხოვრებთ.

გამიტაცებდნენ ხოლმე ეს ფიქრები და ამიჩქროლდებოდა გული. ან არა და შოველი მომაგონდებოდა. არა მგონია, რომ იუკადრისოს ჩემი სიძეობა. რა ვიცი, ჩემზედ უკეთესი ვინ უნდა უნდოდეს? ყმაწვილი ბიჭი ვარ, კარგი მუშა ბიჭი, კარგი ხელოსანი! ლოთი მე არა ვარ და შფოთი. თუ დღეს არა მაქვს რა, ხვალ მექნება. კაცს შრომა უყვარდეს, თორემ ღმერთი მოწყალეა, ყველაფერს შეიძენს. არა, შოველისა შიში არა მაქვს, იმას კიდევ იამება.

და გამიმზიარულდებოდა გული. საქმე გათავებული, გარიგებული მეგონა და ქვეყანაზედ ჩემზედ უბედნიერესი და უძლიერესი აღარავინ მიმაჩნდა.

მაგრამ ცრუია წუთისოფელი: გაგაქცევს, გაგაქცევს და როგორც იტყვი — აგერ მივედი, მიზანს მივახწიეო, წაგაბოროძიკებს და ყირამალა გადაგატრიალებს.

ერთ დილას, პულე რომ გავაქციეთ, იმის შემდეგ მეხუთე თუ მეექვსე დღეს, ებრაელი შმულის ცხენსა ვჭედდით, რომ ეზოში ზემო-უბნელი სტეფანის ცოლი შემოვიდა. ქალაქში ყოფილიყო, მწვანელი და კვერცხები გაეყიდნა და შინისკენ მიდიოდა. მივიდა, ნათლიაჩემს მიესალმა და წერილი მიაწოდა:

— ფოსტით მოსულიყო, ბატონო ლერუ, და მე გამომატანეს ქალაქიდან.

გადახედა ნათლიაჩემმა და დაინახა თუ არა, მეციდან არის, შეპყვირა:

— შოველის წერილი! მკლავს მოვიჭრი, თუ ეს შოველის წერილი არ იყოს! აქ მოდი, მიშელ! აბა ერთი წაიკითხე, ის ოხერი სათვალეები შინ დამრჩენია!

გავხსენი წერილი და დავიწყე ხმამალა კითხვა. მაგრამ თავშივე, სულ ათი სტრიქონი არ წამეკითხა, რომ ავკანკალდი და კინაღამ გული წამივიდა. შოველი იწერებოდა, სათემო კრებამ საერო კრების წარმომადგენლად ამირჩია და ჩემს მარგალიტას უთხარით, რაც შეიძლება მალე წამოვიდეს, ქ. მეცუმი ყსაბხანის ქუჩაში ერთი დუქანია, სახელად „თიხის ჯამი“, იქ მიკითხოს; აჩქარდეს, რადგან, შოვა თუ არა, მაშინვე ვერსალისაკენ უნდა გავემგზავროთო.

გრძელი, გრძელზედ გრძელი წერილი იყო და მე კი ამის მეტი არა დამხსომებია რა. მე მარტო ის გავიგე, რომ მარგალიტა უნდა წასულიყო და სხვა რა ეწერა, რას ვკითხულობდი, იმისი აღარა მენადვლებოდა რა. ჩვენებური დიაკვანივით შეუგნებლად ვკითხულობდი წერილს და რომ გავათავე, იქვე კუნძზედ დავეშვი.

ნათლიაჩემი კი შინისკენ გაექანა ყვირილით:

— ეკატერინე, სათემო კრებასაც შოველი ამოუტრჩევია ხალხის წარმომადგენლად და ახლა ვერსალს მიდის საერო კრებაზედ! ეკატერინე!

ეს რომ შეიტყო ვალენტინმა, ხელები ალაპყრო და შეჰლაღადა:

— რა ღღეს შემასწარ, ღმერთო! შოველი სასახლეში უნდა იყოს? იმოდენა დიდებულებთან და ეპისკოპოსებთან ერთად! ღმერთო, ღმერთო!

— ვითომ და რატომაო, — შემოუტია მოხუცებულმა შმულმა, — შოველი ძალიან ჰკვიანი კაცია, ნამდვილი ვაჭრული კაცია! რითო დაუვარდება დიდებულებს და ეპისკოპოსებს?

მე კი ცეცხლი მეკიდებოდა:

— მორჩა, გათავდა! იქნება თვალითაც ველარსად ვნახო ჩემი მარგალიტა! წავა და ვინ იცის!..

ხალხისა რომ არ შემრცხვენოდა, ქვითინს დავიწყებდი. თან მწარე ფიქრები მერეოდნენ და უფრო გულს მიკლავდნენ: — ჰაი თუ დამცინებდნენ, რომ სცოდნოდათ, რომ მარგალიტა მიყვარს. ჰაი თუ მასხარად ამიგდებდნენ! არა, სად ერთი უბრალო მკვედელი და სად ხალხის წარმომადგენელი! საიდან სადაო?.. მარგალიტა ცაშია და მე კი ქვესკნელში!..

ქუჩაში ხალხი შეგროვდა. მეზობლები გამოვიდნენ, ნათლი-ჯაღაბი, ნიკოლი... მოდიოდნენ და ყვიროდნენ:

— შოველი ვერსალში მიდის, საერო კრებას უნდა დაესწროს, ხალხის წარმომადგენლად ამოურჩევიათ!

და ემატებოდა და ემატებოდა ხალხი. ნათლიაჩემი სამკედლოში შემოვარდა და შემოგვეყვირა:

— სულ არ გადაგვრია ამ ამბავმა, დასწყევლა ღმერთმა ეშმაკი! ბიჟო, მიშელ, ჩაირბინე, მარგალიტას შეატყობინე!

წამოვდექი, მაგრამ რა? ისე მეძნელებოდა იმისი ნახვა, თითქო ჩემს მარგალიტასთან კი არა, სულ უცხო ქალთან მივდივარო. მეშინოდა — ტირილი არ დავიწყო, ჩემი სიყვარული არ გავუშეღავენო და საქმე სასაცილოდ არ გავიხადო-მეთქი. ისე მეშინოდა, რომ შოველის სახლთან რომ მივედი, კარებთან ავიტუზე და კარგა ხანი შესვლას ვერა ვებედავდი.

მარგალიტა სარეცხს აუთოებდა და ძალიან გაიკვირვა ჩემი მისვლა; გაიკვირებდა, მაშ რა! როგორც ვმუშაობდით სამკედლოში, ისე პერანგა წამოვსულიყავი სახელოებაწეული.

— რა მოხდა, მიშელ? — შემომძახა შეშინებულმა.

— კარგი ამბავი მომაქვს, ნუ გეშინიან!

— მაინც?

— მამაშენი ხალხის წარმომადგენლად აურჩევიათ და ვერსალს მიდის საერო კრებაზედ.

მეგონა იამება-მეთქი. ის კი გაყვითლდა, დაბარბაცდა და ფერ-მისხილი ფეხზედ ძლივსლა იდგა.

— რა დაგემართა, მარგალიტა?

პასუხის გაცემა ველარ შესძლო. — ალბად სიხარულისაგან მოუვიდა-მეთქი, — ვიფიქრე, მაგრამ ამ დროს მარგალიტას ცრემლი გადმოსცივდა და უცბად გულში ჩამიკრა. მომეხვია და იძახდა:

— ოჰ, მიშელ! რომ იცოდე, რა ბედნიერია დღეს მამაჩემი!

მყავდა ისე გულში ჩაკრული ჩემი პატარა მარგალიტა და მიკვირდა, — ნეტავ ისე მწარედ რა ატირებს-მეთქი? — თავი ველარ შეეკავებინა და ისე გულამოსკვნით ტიროდა, რომ მთელი ტანითა თრთოდა. ტიროდა და მე კი ჩემსას შევევდროდი ღმერთსა: — ნეტავი შეიძლებოდეს, ასე გულში ჩაკონებული მყავდეს, ერთმანეთი საუკუნოდ აღარავინ განგვაშოროს-მეთქი. თან გული მიბრაზდებოდა და ჩემს თავს ვეკითხებოდი: — რადა, რად უნდა დავკარგო, რად უნდა დავთმო? აბა მოვიდნენ და წამართვან! აბა მოვიდნენ?!

მაგრამ ვინ უნდა მოსულიყო? მამა იბარებდა, მამას შვილს ხომ არ წავართმევდი?

დიდი ხანი იტირა მარგალიტამ. მერე ხელიდან გამისხლტა, პირს წყალი შეისხა და სიცილით მითხრა:

— რა სულელი რამა ვარ, მიშელ! არა, რა მქონდა სატირელი, რა მატირებდა?

მე აღარა ვუპასუხე რა, ან რა უნდა მეტყვა? მე ჩემს მარგალიტას შევეტრფოდი და უკანასკნელად შევყურებდი სიყვარულით სავსე თვალებით, მარგალიტა კი ვერას ხედავდა.

მერე მოვიდა, ხელი დამიჭირა და მითხრა:

— აბა წავიდეთ, მიშელ! წავიდეთ!

ჩვენი ღუქნის დიდი დარბაზი გატენილი იყო ხალხით. მე ვერ ავიწერტ, როგორ ულოცავდნენ მარგალიტას შოველის არჩევას. ჯერ ნათლიაჩემმა, ნათლი-ჯალაბმა და ნიკოლმა გადაჰკოცნეს; მერე სოფლის მოხუცებულებმა სათითაოდ მიულოცეს და ხელი ჩამოართვეს. ისეთი მოწიწებით ებაასებოდნენ ჩვენს პატარა მარგალიტას ლეტუმიე, ჰურე და თვით მოხუცებული რიგო, რომ მეტი აღარ შეიძლებოდა. კარგა ღამემდე, დიდ ვახშობამდე ხალხით სავსე იყო ჩვენი ღუქანი; რიგი მიდიოდა, რიგი მოდიოდა, და ყველას მარგალიტას ნახვა და მილოცვა უნდოდა. განა მარტო ვაჟიკაცები? ქალები, ბავშვები, სულ იქ იყვნენ და სულ მარგალიტას ეხვეოდნენ. დიდი ძალი ღვინო დაილია იმ ღამეს, დიდი ძალი! სულ შოველის სადღეგრძელოსა სვამდნენ. ისეთი ხმაურობა იდგა, გეგონებოდათ ქორწილიაო. და ყველაზე მეტად თვით ნათლიაჩემი ყვიროდა თავის რიხიანი ხმით.

— შეგარცხვინა ღმერთმა, მიშელ, შეგარცხვინა! — ვიძახდი ჩემს გულში. მთელი სოფელი ხარობს, დიდსა და პატარას იამა შოველია და მარგალიტას ბედნიერება და შენ კი თავ-პირი ჩამოგტირის?! არა გრცხვინა!?

ჩემთან მარტო ვალენტინი იჯდა და თავისებურად მოსთქვამდა:

— მეორედ მოსვლაა, თქვენი ჭირიმეთ, მეორედ მოსვლა, თორემ ვილაც მაწანწალა მეწვრილმანეს სასახლეში ვინ შეუშვებდა?! ეს სწორედ მეორედ მოსვლაა, რომ დიდი და პატარა აღარავის გააჩნია; მთა-ბარი გასწორებულა და დიდებულ მებატონესთან ვილაცა შოველი უნდა გამოიჭიმოს — მე ხალხის წარმომადგენელი ვარო! ქრისტიანი მაინცა ყოფილიყო!

იქნება არც კი დამიჯეროთ, ისე ვიყავ აღრენილი, რომ მეც ვეთანხმებოდი. ნეტავ რა იქნა ჩემი მხნეობა? იქ დარჩენა შეუძლებელი-და იყო, იმოდენა ხალხში. დარბაზში რომ ადგილი აღარ იყო. მარგალიტა სამზარეულოში გასულიყო და ვისაც ამის ნახვა უნდოდა, იქ უნდა შესულიყო და იქ მიელოცნა. მე კი წამოვავლე ჩემს ქუდს ხელი და წავედი. მეც არ ვიცოდი, საით მივდიოდი. გავედი მინდორში და გზას გავეყევი.

სამაგალითო გაზატხული იდგა და იმისთანა პირი უჩანდა ჯე-

ჯილს, იტყოდით ღმერთს თავისი კალთა აქ დაუბერტყიაო. ყვაოდა იქაურობა, ჰაერში ფრინველების ჟრიაბული იდგა. მე კი დაღონებულ-ლი, გულმოკლული მივიდიოდი და იმისთანა უიმედობა და სასოწარ-კვეთილება მერეოდა, რომ სიცოცხლე მძიმე ტვირთად მიმაჩნდა.

თუნდა სამჯერ მივეგდე მწვანეზედ ღონემიხდილი, მაგრამ შვე-ბას ვერსად ვპოვებდი: ერთსა და იმავე აზრს მოეცვა ჩემი სული და გული და საშინელი სისწრაფით მერეოდა და მიმორჩილებდა. ან რი-ღას იმედი უნდა მქონოდა? მარტოდმარტო ვიყავ, ვიღუპებოდი და არც მხსნელი მოჩანდა ვინმე, არც გულშემატკივარი!

მორჩა!.. სიკვდილის მეტი აღარა დამრჩენია რა!

ამის მეტი აღარა მაგონდებოდა რა.

ბოლოს, როცა დაღამდა, ავდექ და ჩემდა უნებურად შინისკენ წავედი. ჩვენ უბანში, იქვე ჩვენს ახლო, მხიარული სიმღერა ისმოდა. ცოტა ხანი ყური დავუგდე და ვთქვი:

— ნეტავი რა გაქვთ გასახარელი? სიცოცხლე ცრემლის ზღვა არის და სიყვარული — სიზმარი!

შინ შევედი. მამაჩემი კალათებს სწნავდა, დედა ჯარას უჯდა. ჩვეულებრივ მივესალმე. გადმომხედა საწყალმა მამაჩემმა და შემომ-ყვირა:

— რამ გაგაყვითლა აგრე? ავად ხომ არა ხარ, შვილო?

არ ვიცოდი რა მეპასუხნა, მაგრამ დედაჩემმა არ დამაცადა:

— ავად კი არა და! ვერა ხედავ, დალეულია! ცოტა მეტი მოს-ვლია შოველის სადღეგრძელო!

— მართალსა ბრძანებ, დედა, — ვუთხარი მე მწარე ღიმილით, მართალსა ბრძანებ, ცოტა მეტი მომივიდა. რას იზამ? ეგ იმისთანა შემთხვევა იყო, რომ იქაც რომ არ დამელია სადღა დავლევდი?

— რა გიშავს, შვილო! — მითხრა ტკბილად მამამ და ხელი მომ-ხვია, — დაწევი, დაიძინე!

გამოვეთხოვე და ავედი ჩემს ყავარში. კიბეზედ ძლივს ავედი, მუ-ხლი მეკეცებოდა. ავედი, სანთელი ავანთე. იქვე ჩემს გვერდით პატა-რა სტეფანეს ეძინა. ვუყურებდი და ცრემლი მერეოდა.

— ღმერთო, რა ძალიანა ჰგავს მამას! ზედ გამოჭრილი მამაჩემია!

გული ამომიჯდა და ტირილი დავიწყე. კარგა ხანი ვიყავი ასე. მერე დავეწოდე, ვაკოცე და აღთქმა დავუდე ჩემს პატარა ძმას:

— ვფიცავ, მე შენ არ გიღალატებ! რაც კი მეზადა, ყველა წა-მართვა ღმერთმა, მე აღარა შემარჩინა რა! ჰოდა ვფიცავ შენთვის-ღა გავიპირებ და შენთვისღა ვიცხოვრებ. იქნება შენ უფრო ბედ-ნიერი იყო! იქნება შენი შეყვარებული არსად წავიდეს და შენ მაინც მოგცეს ღმერთმა, რაც ჩემთვის დაიშურა!

დავწეკი, მაგრამ ვაი იმ დაწოლას! მთელი ღამე თვალი არ მომიხუჭია! სულ იმას ვფიქრობდი, უნდა გავმაგრდე, თორემ გამიგებენ და ქვეყნის სალაპარაკოდ გავხდები-მეთქი. — და უნდა გავმაგრებულაყავი კიდევ, თორემ რომ გავგოთ, მარგალიტა მიყვარდა, მაშინ იქნებოდა ჩემი შერცხვენა! მთელი ღამე სულ ამ ფიქრებში ვიყავი, მთელი ღამე სულ გამაგრებას და გამხნევებას ვცდილობდი და მეორე ღღეს ისე დამშვიდებული მივედი სამკედლოში, თითქო ჩემს ღღეში დარდისა არა მცოდნია რაო.

მარგალიტას სანახავად ახლა სხვა სოფლელებიც მოდიოდნენ და არამც თუ სოფლელები, ქალაქიდანაც კი ამოვიდნენ, ვინც კი წარჩინებული პირნი იყვნენ. კერძო პირთ თან მოჰყვნენ მოსამსახურე პირნი და ყველა, ვინც საზოგადოებაში გარეული იყო და უკან ჩამორჩენა არ უნდოდა, ყველა მარგალიტას სანახავად და მოსალოცად მოდიოდა. ღმერთმა ხომ იცის, რომ მარგალიტა იმათ არც მამით იცნობდა და არც ღვლით, მაგრამ მოდიოდნენ თავ-თავიანთი სამსახურის შესაფერი ტანისამოსით მორთულნი! მოდიოდნენ ჩვენი მაზრის წარმომადგენლის ბ. შოველის ქალის მოსაკითხად და მისალოცავად. ულოცავდნენ და უცინოდნენ, თითქო მართლა გულით უხარიათ შოველის ამორჩევას! და გულში რომ ჩაგეხდნათ კი, იქნება შოველის სიმტრის მეტი არა ედოთ რა. სწორედ გუგული მოგაგონდებოდათ, რომელიც გაკეთებულს მზამზარეულს ბუდეს დაეპატრონება და თითონ კი ერთ ბწყერ ჩალას არ მიიტანს იმის გასაკეთებლად. ამ ვაებატონებისთვის უმთავრესი ის იყო, გარემოებით ესარგებლათ და მძიმედ თავის დაკვრით და მოკითხვით და მილოცვით კარგი ჯამაგირიანი ადგილი ეშოვნათ. ვიღრე შოველს ამოირჩევდნენ, რომ ენახათ საღმე, იქნება მარგალიტასთვის და იმის მამისთვის საღამიც არ მიეცათ და ახლა კი თითონ მოგვადგნენ კარზე, მოგვიკითხეს, და მოწიწებით გვთხოვეს: თუ გნებავდეთ რამე, ნუ დაგვერიდებით თქვენს უმორჩილეს მონებსაო! მერე რისთვის? მარტო იმისთვის, რომ შოველი ვერსალშია, სასახლეში დაიარება და იმის შემწეობით საქმეს გავირიგებთო! ფუ, შეარცხვინათ ღმერთმა! ბრაზი მერეოდა და ძლივსლა ვიმაგრებდი თავს. მინდოდა მივარდნოდი და იმ უსინდისოებზედ ამომეყარა ჩემი ჯავრი!

ნათლიაჩემი, ნათლი-ჯალაბი და მარგალიტა მიიღებდნენ ხოლმე მისალოცად მოსულ სტუმრებს. მე და ვალენტინი ჩვენთვის სამკედლოში ვმუშაობდით და იქიდან ვხედავდით ყველაფერს. ჩემზედ არანაკლებ ჯავრობდა ვალენტინი, მაგრამ იმას სულ სხვა აჯავრებდა:

— უყურე, მიშელ! აგერ, ბატონი მსაჯული! აგერ, ბატონი ხაზინადარი. ხედავ რა მძიმედ დაუკრა თავი! აბა ზრდილობა მაგას

ჰქვიან, აი! აგერ, ბურნუთის კოლოფი გახსნა. უყურე, რა ლამაზად ამოიღო! ხედავ, რა კობტად ჩამოიწმინდა დაბნეული ბურნუთი! თუნდა დავიფიცავ, წმინდა კარდინალისაგან ისწავლიდა, თორემ ბურნუთს მაგრე მოხდენილად წმინდა კარდინალის გარდა არავინ სწევს. ჰოდა, რაც კარდინალის სასახლეს მოუხდებდა, უბრალო ღუქანში არ გამოდგება, არა! ისიც ვისთან, ვიღაცა შოველის გომბიოსთან! ღმერთო! ნახე როგორ შემოტრიალდა ქუსლზედ! ვერ დაინახე, მიშელ! ქუსლზედ შემოტრიალდა და ყველას ერთობ დაუკრა თავი.

რა იმათი თავის დაკვირისა მცხელოდა, კაცი აღარ ვიყავი: იმოდენა დიდებულებს რომ ვხედავდი მარგალიტასთან, უფრო მეტად ვგრძნობდი, რა საშინელი ზღვარი იდგა მე და იმას შუა. თუ ჩვენ, უვიცოთ, არ ვიცოდით, რა დიდი რამ იყო საერო კრების წარმომადგენლობა, ამ ქალაქელებმა ხომ კარგად იცოდნენ. ალბად დიდი კაცი გამხდარა შოველი, რომ ყველა იმის ქალის სანახავად მოეშურებოდა. ტყუილუბრალოდ თავს რად შეიწუხებდნენ! იმისთანა პატიოსანი ხალხი ეხვია მარგალიტას, იმისთანა მდიდარი და წარჩინებული ყმაწვილკაცობა, რომ ზედაც აღარ შემომხედავდა. მე თვითონ ვგრძნობდი, რომ დიდი სისულელე მოუვიდოდა, რომ ესლა მარგალიტას, ვინმე დიდებული ყმაწვილი კაცის მაგივრად, ერთი ღარიბ-ღატაკი, გლეხის ბიჭი, უბრალო მჭედელი შეერთო. მე თითონ ვგრძნობდი, რომ დიდი სისულელე მოუვიდოდა და მით უფრო ვიტანჯებოდი.

ხუთ საათამდე არ გამოლულან სტუმრები. მარგალიტა იმ დამეს უნდა წასულიყო პარიზისკენ მიმავალ დილიყანსით. ნათლიაჩემმა თავისი მაფრაშა ათხოვა, მამინაცვლისაგან დარჩენოდა ერთი კარგი მოზრდილი მაფრაშა; აგერ ოცდაათი წელიწადია არ გვიხმარიაო, მითხრა, და კარგად გასინჯე, იქნება დაკერება მოუხდესო. ჩამოვიტანე, გავსინჯე. ვთქვი, მოდი მივდგები და სულ ნაკუწ-ნაკუწად ვაქცევ-მეთქი, მაგრამ მომაგონდა, რომ მარგალიტასთვის ვამზადებდი, მომაგონდა, რომ ეს უკანასკნელად ვენმარებოდი ჩემს მარგალიტას და თვალი ცრემლით ამევსო. მივდექი და ისე შევაკეთე, იმისთანა სიყვარულით და ალერსით ვბერტყავდი და ვაკერებდი, თითქო მინდა ჩემი გულის პასუხი დავაბაროვო.

ხუთ საათზე მარგალიტა შინ წავიდა და რადგან მაფრაშა სრულიად მზად მქონდა, ვალენტინს ვუთხარი — დავიღალე, ცოტას გავივლი და შენ თუ არ დამზარდები, ეს მაფრაშა მარგალიტას მიუტანე-მეთქი. მაშინვე წამოიკიდა და წავიდა. მე კი იმისთანა ყოფაში ვიყავი, რომ იქ მისვლას ვერ შეეძლებდი; ვიცოდი, რომ თუ კი მარ-

ტოს შევხვდებოდა, აღარც ჩემს სიყვარულს დაუშვალავდი. ამიტომ, ისევ მორიდება ვამჯობინე, ჩავიცვი და ღუქანში შევედი.

ღვთის მაღლით, ყველანი წასულიყვნენ. ნათლიაჩემი დახლს. სთვლიდა და იმისთანა კარგ გუნებაზედ იყო, რომ სულ პარი-პარა-ლოს გაიძახოდა. თან თავის ღუქანის ქებაში იყო: არა, სად გინახავთ სხვა ღუქანი, რომ ამდენი წარჩინებულნი და დიდებულნი სწვევოდნენო? ნათლი-ჯალაბი ხომ უფრო მხიარულად იყო.

ნიკოლი სუფრასა შლიდა.

ნათლიაჩემმა რომ დამინახა, მითხრა, მარგალიტა საჩქაროდ შენაყრდა და ახლა შინ არის და ბარგსა და შოველისთვის წიგნებს ალაგებსო. მაფრაშისა მკითხა, დახეული ხომ არ იყოო? და მეც მოვახსენე — დავაკერე და ვალენტინს გავატანე-მეთქი.

სწორედ იმ დროს შემოვიდა ვალენტინი და მაშინვე პურის საქმელად დავსხედით.

ვიფიქრე, რვა საათზედ უფრო ადრე შინ წავალ, ისე რომ არავის რას ვეტყვი-მეთქი. ან რალა საჭირო იყო ნახვა და გამოთხოვება? ჩვენ შორის ყველაფერი გათავებული იყო და, მაშასადამე, რაც მალე განვმორღებოდიტ ერთმანეთს, ის ემჯობინებოდა.

წავიდეს-მეთქი, ვფიქრობდი. ნათლიაჩემი მისწერს შოველს, რომ შეუძლოდ ვიყავი და იმიტომ ველარ ვნახე. ან არა და, ვილას ვახსოვარ, რომ მაშინვე თვალში ეცეთ, რატომ მიშელი არ მოვიდაო? არც კი მოვაგონდები!

აალაგეს სუფრა და მეც გამოვედი. კარგად ჩამობნელებულიყო. შოველიანთ ზემო ოთახში სანთელი ენთო. დავდექი და ფანჯრებს ყურება დაუწყე, მაგრამ ფანჯარასთან მარგალიტა მოვიდა და მეც გამოვბრუნდი და აჩქარებული ნაბიჯით, თითქმის სირბილით გავწიე შინისკენ. ის იყო მეორე ქუჩაში უნდა შემეხვია, რომ მარგალიტას ხმა შემომესმა:

— მიშელი მიშელ!

შევდექი. ისე მომხვდა მისი ძახილი, თითქო გულზე ლოდი მელო და ამაცილესო.

— რა გინდა, მარგალიტა?

ვგრძნობდი, რომ გული გულის ალაგას ველარ შემეკავებინა.

— როგორ თუ რა მინდა? ამოდი ცოტა ხანი. ხომ იცი, მივდივარ. ეს არის ეხლა შენს სანახავად მოვდიოდი.

ავედი ფერმიხდილი, ენადაბმული. მარგალიტა თავის პატარა ოთახში იყო. მაფრაშა უკვე გავესო და აქეთ-იქით იყურებოდა.

— ნეტავი კი არა დამავიწყდეს რა და! ძალიანა ვჩქარობდი! ძირ-

ში წიგნები ჩავაწყე. მერე სარეცხი და სულ ზევით ჩემი ორი კაბა. მგონი ყველაფერი ჩავალაგე. რა ვიცი, კი აღარა ჩანს რა და!

მე კი ვიდექი გაშტერებული და ხმა ვერ ამომელო.

— იცი, მიშელ, სახლი შენ უნდა ჩაგაბარო, თვალი გექიროს, აქ მოდი!

ხელი დამიჭირა და სამზარეულოს უკან პატარა საკუჭნაოში გამიყვანა, რომელშიაც ცარიელი თაროების მეტი არა იყო რა.

— აი, მიშელ, აქ შეგვიწინახავ მსხალსა და, თუ ხომანდულმა მოიხსნა, ცოტა ვაშლსაც. ბევრი არა იქნება რა, მაგრამ მით უფრო უნდა გაუფრთხილდეთ, რომ ბევრი არ იქნება. გაიგე, მიშელ?

— გავიგე, მარგალიტა, გავიგე! — ვუპასუხე და თავს ძლივსღა ვიმაგრებდი.

თავის მამის საწოლი ოთახი მაჩვენა, პატარა მარანი და მერე ეზოში გამიყვანა. ცალ-ცალკე ჩამაბარა ყოველი ხე, ყოველი ბუჩქი და მეტადრე მაისის ვარდები.

— თუ გინდა, მიშელ, რომ მე და შენ ყოველთვის მეგობრები ვიყოთ, ამ ვარდებს ძალიან გაუფრთხილდი, ამის ფასს არაფერს გაბარებ.

— მაგათ კარგად მოვუვლი, მაგრამ რას დარდობ აქაურ ვარდებს, თუ კი შენ სხვაგან მიდინარ-მეთქი, — ვფიქრობდი.

ვერძნობდი, რომ გულში ტკბილი იმედი შემომეპარა და რაღაც ნეტარებას მიქადდა. გული ამემღვრა, თვალთავან კინაღამ მღუღარება წამსკდა და ჩემს თავს ვეკითხებოდი:

— ღმერთო! ნუ თუ უკანასკნელად ვხედავ ჩემს მარგალიტას?

ისევ სახლში შევედი და ახლა შოველის წიგნები მაჩვენა. მწყობრად იყვნენ დალაგებული ორ ფანჯარას შუა და ეტყობოდა, რომ ამით პატრონს ამაზედ უქვირფასესი არა ებადა რა.

— მანამ ჩვენ იქ ვიქნებით, მიშელ, იქნებ ეს წიგნები სულ გადაიკითხო. გასაღები შენ გექნება, ჩამოდი ხოლმე, როცა კი მოცლით იყო და იკითხე. ისწავლე, მიშელ! უსწავლელი კაცი არაფერია, სრულიად არაფერი!

გულში შეპარული ტკბილი იმედი კი უფრო და უფრო იზრდებოდა. ვხედავდი, რომ წასვლის დროსაც კი ჩემზე ზრუნავდა და სწორედ იმას მირჩევდა, რაც თვითონ მეც აუცილებელ საქიროებად მიმანდა ყველა ადამიანისათვის. ვხედავდი, რომ ჩემზედ ზრუნავდა და გული მიკვნესდა:

— განა მარგალიტას კი არ ვუყვარვარ? ვუყვარვარ, მაგრამ... ოჰ, რა ბედნიერები ვიქნებოდით!

— აი, გასაღები, მიშელ! იქნებ ხშირად დახედო აქაურობას,

თორემ ცოტა არ იყოს ნესტიანია კედლები და შმორის სუნი დადგება. მე დარწმუნებული ვარ, რომ ყველაფერი რიგზედ დაგვხვდება. როდესაც შინ დავბრუნდებით.

— ნუ თუ კიდეც დაბრუნდებით, მარგალიტა? მაშ დროებით მიდიხართ? — შეეყვირე გახარებულმა. ხმა მიკანკალებდა, სულს ძლივსდა ვიბრუნებდი.

— აბა, რა საკითხავია?! — შემომიტია განცვიფრებულმა მარგალიტამ, — მაშ იქ რა უნდა გავაკეთოთ, შე სულელო, შენა? იქნება გგონია, სასახლეში მილიონები დაგვირიგონ და საცხოვრებლად საუკუნოდ იქ დავჩრჩეთ?

და სიცილი წასკდა.

— მოვალთ, მაშ იქ ხომ არ დავჩრჩებით! მოვალთ და გარწმუნებ, უფრო ღარიბნი მოვალთ, ვიდრე აქედან მივდივართ. როგორც კი ხალხის უფლებანი კანონიერად აღიარებულ იქნება, ჩვენ ჩვენს ქოხს მოვეპატრონებით და ძველებურად წიგნების და საწვრილმანოს ვაჭრობას დავიწყებთ. იქნება წლეულსვე მოვიდეთ, თუ არა და მერმის უთუოდ დავბრუნდებით.

— ოჰ, მარგალიტა! მე კი მეგონა, საუკუნოდ გშორდებოდი! — და უცბად ცრემლი წამსკდა; გული ამომიჯდა და ბავშვივით ქვითინი დამაწყებინა. მათრახაშხედ ჩამოვჯექი და თვალებზედ ხელები მივიფარე; სირცხვილით ვიწოდო, რომ ჩემი გულის საიდუმლო გავაგებინე და თან ღმერთს მადლობას ვწირავდი, რაკი დავრწმუნდი, რომ მარგალიტა ისევე მოვიდოდა. მარგალიტა გაჩუმებული დამყურებდა. კარგა ხანი ვიყავით ასე, რადგან ვეღარ მოვიბრუნე გული. უცბად ვიგრძენ, რომ მხარზედ ხელი დამადო და თითქო ელვაჲ გამირბინა მთელს ტანშიო, ფეხზედ წამოვხტი. გაყვითლებული, სახეშეშლილი იდგა მარგალიტა და ისე უბრწყინავდნენ შავი თვალები, თითქო ცეცხლს აფრქვევენო!

ხელით წიგნებზე მანიშნა და ტკბილად მითხრა:

— ეცადე, მიშელ, და მამაჩემსაც შეუყვარდები.

სანთელი აიღო და კარებისკენ გასწია, მეც წამოვიკიდე მათრახაშხ და თან ვაყვები. მინდოდა კიდე მეტკვა რამე, მაგრამ ხმის ამოღებას ვეღარ ვახერხებდი.

გამოვედით, კარი დავკეტეთ და გასაღები კი ჯიბეში ჩავიდეთ. ცა ვარსკვლავებით იყო მოჰქედილი, მთვარე კაშკაშებდა, და მშვენიერი გრილი სიო ბერავდა. მეც აღარა მაწუხებდარა, გული დამშვიდებული მქონდა და შევძახე:

— რა ღამეა, მარგალიტა, რა ღამეა! მადლობა ღმერთს, რომ ასე-

თი კარგი დარი დაგიდგა. მგზავრობაში ავი დარისთანა საძაგელი არა იქნება რა!

ისეთი მხიარული ვიყავი, თითქო სიკვდილის პირს ვიყავ და უცბად გამომაბრუნეს. მარგალიტა კი ჩათვიქრებული იყო და ნათლიაჩემის დუქნამდე ხმა არ ამოუღია. აქ კი მითხრა:

— არ დაივიწყო, მიშელ, რასაც დამპირდი!

დილიქანს ათ საათზედ უნდა გამოვევლო და უნდა ავჩქარებულყავით, თორემ ველარც კი მივუსწრებდით. ყველანი გამოეთხოვნენ, ყველამ გადაჰკოცნეს, მე და ნათლიაჩემის გარდა, რადგან ჩვენ ქალაქამდე უნდა გავყოლოდით. გადავიწერეთ პირჯვარი, ვახსენეთ ღმერთი და გზას გაუდექით. ნიკოლი და ნათლი-ჯალაბი გზაზედ გამოვიდნენ და გვიყვიროდნენ:

— ღმერთმა მშვიდობის მგზავრობა მოგცეს, მარგალიტა! იქნებ მალე დაბინავდეთ!

მარგალიტაც მადლობას უხდიდა:

— გმადლობთ! გმადლობთ! თქვენი თავი მიცოცხლოს ღმერთმა!

ისე მიმქონდა იმოდენა მაფრაშა, თითქო ბუმბული იყოსო. მე და მარგალიტა ერთად მივდიოდით. გზაში რამდენჯერმე მკითხა:

— ძალიან მძიმეა, მიშელ, მაფრაშა?

— რამ გაამძიმა, მარგალიტა, რას ამბობ!

ნათლიაჩემი წინ მიგვიძლოდა და გვაჩქარებდა:

— ავჩქარდეთ, დილიქანსმა არ გაგვისწროს!

— ცოტა ხანს უკან ქალაქსაც მივატანეთ. საფრანგეთის კარებში შევიარეთ; ქუჩის ბოლოში უნდა ჩავსულიყავით, იქ, სადაც დღეს ლუცის სახლია, რადგან დილიქანსი იქ ჩერდებოდა. ჯერ ნახევარი ქუჩაც არ ჩავვევლო, რომ მოედნიდან მომავალი დილიქანსის ვრალი შემოგვესმა და ჩვენც ავჩქარდით. თითქმის გავრბოდით.

— ძალიან დროზედ კი მოვუსწარი, აი! — სთქვა ნათლიაჩემმა და ისე ქშინავდა, თითქო წისქვილის ქვა უზიდნიაო.

ის იყო მოვედით და დილიქანსმაც შემოაშუქა ეკლესიის ქუჩიდან. ჩვენდა სასიამოვნოდ, ჩვენი ბებერი შშულიც იქ დაგვიხვდა, ებრაელი შშული. ისიც თურმე მეცს მიემგზავრებოდა.

დილიქანსი გაჩერდა. რამდენიმე ალაგი კიდევ იყო თავისუფალი. ნათლიაჩემმა დალოცა მარგალიტა, აკოცა... მე მაფრაშა დავაკარ დილიქანსს და ვიდექი ისე, მარგალიტასთან მისვლას ვერა ვბედავდი.

— მოდი რალა, მიშელ! — დამიძახა მარგალიტამ და ლოყა გამომიშვირა.

მივვარდი, მოვეხვიე... ის კი ჩამჩურჩულებდა:

— ისწავლე, მიშელ! ისწავლე!

შშელი კიდევ ჩანჯდარიყო, დილიჯანსში.

— თქვენთვის ჩამიბარებია, ბატონო შშელ, შოველის ქალი. იმედი მაქვს პატრონობას გაუწევთ.

— დაშვიდებული ბრძანდებოდეთ, — უპასუხა მოხუცებულმა ებრაელმა, ჩვენი წარმომადგენლის ქალს არავინ შეაწუხებს. ენდეთ ღმერთს, ისე მივიყვან, რომ ცივ ნიავსაც კი არ მივაკარებ.

ძალიან კმაყოფილი ვიყავი, რომ ჩემი მარგალიტა სულ მარტო არ იქნებოდა უცნობ მგზავრებთან და ძველი ნაცნობი ჩვენებურივე თანამოგზაური ეყოლებოდა. აგერ, ფანჯარაში გადმოყო თავი და ხელი გადმომაწოდა. ცოტა ხანს უკან კონდუქტორიც მოვიდა და თავისი ადგილი დაიჭირა.

— აბა, გაუჯავრდი! — შესძახა მეეტლეს.

დაიძრა უზარმაზარი დილიჯანსი.

— მშვიდობით, მარგალიტა, მშვიდობით!

— მშვიდობით, ბატონო ლერუ! მშვიდობით, მიშელ!

წინ დილიჯანსი მიდიოდა და უკან ჩვენ მივდევდით ჩაფიქრებულები. ქალაქის კარი კიდევ ნელა გაიარა და მერე კი ისე გაჰკრა, რომ მტვერსდა ვხედავდით შორს სარბურვის გზაზე.

— ზვალ დილით რვა საათზედ ქ. მეცში შეველენ, — სთქვა ნათლიაჩემმა. — შოველი წინ გამოეგებება მარგალიტას და ხუთი-ექვსი დღის შემდეგ ვერსალში იქნებიან.

მე გაჩუმებული მივდევდი.

ჩვენს სოფელში ძალიან გვიან ავედით. მე პირდაპირ შინ წავედი. ჩვენებს ღრმა ძილით ეძინათ. ავედი ჩემს ყავარში, მივეგდე და მკვლარით მივიძინე.

XVII

მას შემდეგ, რაც მარგალიტა წავიდა, რამდენიმე დღე სრულიად შშვიდად გავატარეთ. გავდრდა კიდევ. საქმე ბევრი გვქონდა, თითქმის მთელი დღე დაუსვენებელი ვმუშაობდით და საღამოს, როგორც კი მოვიცილდი, შოველის წიგნებისკენ მივეშურებოდი. სულ რჩეული წიგნები ჰქონდა იმ დალოცვილს: მონტესკიე, ვოლტერი, ბიუფონი, ჟანჟაკ-რუსსო. ყველა გამოჩენილი მწერლის თხზულებანი შოვეროვებინა თავის ღარიბ სადგურში და უმთავრეს და საუკეთესო ალაგზედ ისინი დაელაგებინა. როგორ დავაჰყუეტდი ხოლმე თვალებს, როცა წიგნში ჩემი აზრების დამამტკიცებელ საბუთს შევხვდებოდი რასმე! როგორ გამეხარდა, როდესაც ერთხელ შემთხვევით გადავშალე ერთი უზარმაზარი წიგნი: „ენციკლოპედიური ლექ-

სიკონი“ დალაშქრის და დიდროსი! როგორ მომეწონა ანბანზედ და-
ლაგებული ახსნა და განმარტება ყოველი საგნისა, სადაც ყველანაირად
შეუძლია იპოვოს და წაიკითხოს სწორედ ის, რის ცოდნაც უნდა და
ესიამოვნება!

ჩემს სიხარულს საზღვარი აღარ ჰქონდა! გადავფურცლე, გა-
დავფურცლე და „მკედელი“ ვიპოვე; დაწვრილებით იყო მოყვანილი
მკედლების ამბავი პირვანდელი დროის „დაბადებაში“ მოხსენებუ-
ლი თუბალკაინიდან დაწყებული ჩვენი დროის მკედლებამდე; ად-
ვილად გასაგები ენით იყო განმარტებული რკინის ლითონის მო-
პოვება, გადადნობა და შემუშავება. ისეთი დაწვრილებით იყო აწე-
რილი ჩვენი ხელობა, რომ გამიკვირდა და მეორე დღეს ნათლიაჩემს
რომ ვუამბე, არც კი სჯეროდა, და მითხრა:

— რა გიჭირთ, შვილო! ოსტატისაგან ცალკე სწავლობთ და
წიგნებიდან კიდევ ცალკე; ვაი ჩვენი ბრალი, რომ ჩვენს დროში
ისეთი ძვირი საშოვნელი იყო წიგნი, რომ სიზმრადაც ვერა ვნახავ-
დით!

ვალენტინს ისე მოეწონა ჩემი ნაამბობი, რომ აღტაცებით შემო-
მყურებდა.

მაისის დამდეგს 9 თუ 10 შოველის წერილი მივიღეთ. იწერე-
ბოდა, ვერსალს მშვიდობით მოვედით და ერთ ხარაზთან დავდექით
წმინდა ფრანსუას ქუჩაზე, თვეში ოთხ მანეთადო; საერო კრება
გაიხსნა და დრო არა მაქვს ვრცელი წერილი მოგწეროთო. წერილს
ასე ათავებდა: „იმედი მაქვს, მიშელი არ დამერიდება და, როცა კი
მოინდომებს, წასაკითხად შინ წაიღებს ჩემს წიგნებს. იხმაროს და
გაუფრთხილდეს, რადგან მეგობარს ყოველთვის პატივისცემით უნ-
და ეკიდებოდეს კაცი და ჩვენ კი მაგ წიგნებზედ უკეთესს მეგობარს
ვერსად ვიშოვიო“. ნეტავი მაპოვინა სადმე ეს წერილი! უცნაური
ჩვეულება ჰქონდა ნათლიაჩემს: მიიღებდა თუ არა ვისგანმე წე-
რილს, მთელ ქვეყანას აჩვენებდა და წასაკითხად ხან ვის გაუბოძებ-
და, ხან ვის. ვინ იცის, ვის შერჩა შოველის წერილი, რომელმაც მე
იმედით ამიესო გული!

შოველის სიტყვებიდან ცხადად ჩანდა, რომ მარგალიტას არ
დაემალა თავის მამისთვის ჩვენი საუბარი და ისიც კმაყოფილებას
გვიცხადებდა. მეც მეტი არა მინდოდა რა. გახარებული, გულდამ-
შვიდებული იმისთანა იმედიანად შევყურებდი მომავალს, იმისთანა
ძალით და დაბეჯითებით ეცდილობდი ჩემს განათლებას, რომ ჩემი
მარგალიტას და წიგნების გარდა აღარა მახსოვდა რა. იმ დღიდან
დაწყებული ყოველ საღამოს შინ მიმქონდა ერთი წიგნი ენციკლო-
პედიური ლექსიკონისა და ვკითხულობდი ნაშუალამევის პირველ ან

ორ საათამდე. დედაჩემი მიჯავრდებოდა, მაყვედრიდა, ბევრ სან-
ზღვს სწავაო, მაგრამ მე ჩემსას არ ვიშლიდი. და როდესაც დედა
შინ არ იყო, მამაჩემიც სწავლის საჭიროებას მიმტკიცებდა:

— ისწავლე, შვილო! ეცადე კაცი გახდე! უცოდინარი კაცი კ-
ცი კი არაა, პირუტყვაა, პირუტყვივით უბედური! პირუტყვივითა
შრომობს და სულ სხვისთვისა კი შრომობს. ისწავლე, შვილო!..
დედაშენს ყური არ უგდო!

და არც ყურს ვუგდებდი: კარგად ვიცოდი, რომ თუშეცა ჯავ-
რობდა, ჩემი სწავლით, თუ კი შევაიძინდი რასმე, პირველად დედა-
ჩემივე ისარგებლებდა.

სწორედ იმ დროს იყო, რომ მამა ქრისტეფორეს და ერთობ
ლუტცელბურგელებს ციებ-ცხელება სჭირდათ და ძალიან ავადაც
იყვნენ. იმისთანა შეწუხებულები და მისუსტებულები იყვნენ, რომ
ზოგი ფეხზედ ძლივსლა იდგა.

მე და ნათლიაჩემი ყოველ კვირა მივდიოდით მამა ქრისტეფო-
რეს სანახავად. ისე გამხდარიყო იმოდენა მღვრივით კაცი, რომ
ცარაელი ძეალი და ტყავილა იყო და იმედი აღარავისა ჰქონდა, რომ
ის იმ ავადმყოფობას გაუძლებდა.

ძალიან რომ გაუქირდათ, დიმერინგიდან მოხუცი ფრეილინგენი
დაიბარეს, რომელმაც თურმე უებარი წამალი იცოდა ციებ-ცხე-
ლებისა: წყალში მოხარშული ოხრახუშის თესლი. ამ უბრალო წამ-
ლით მოარჩინა მთელი სოფელი და სხვათა შორის მამა ქრისტეფო-
რეც ნელნელა ფეხზედ წამოაყენა.

მთელი მაისი სულ იმას გაიძახოდენ, რომ პარიზს ქურდები შეს-
ჩვევიან და იკლებენ იქაურობასო. ჯერ იქ ინავარდებენ და მერმე
აქეთ-იქით სოფლებს მოედებიანო! უნდა გენახათ, რა ყოფაში
იყვნენ ჩვენებურები! გაჯავრდებოდნენ, გაბრაზდებოდნენ და ზო-
გი ორთითს აიტაცებდა, ზოგი ცულს!.. წავიდეთ, დავხოცოთ ის
ქვეყნის მტრებიო! მაგრამ მერმე ხმა გავრცელდა. რომ ქურდები
პარიზშივე, წმინდა ანტონის უბანში ვილაც ქალაღლით მოვაქრე
რევეიონის ღუქანში დაეხოცათ და ჩვენებურებიც, ცოტა ხნით
მაინც ღამწვიდნენ. ცოტა ხანს შემდეგ კიდევ დაიწყეს ქურდებ-
ზედ ლაპარაკი და იმისთანა საშინელებას და დაუნდობლობას ამ-
ბობდნენ იმ უღმერთობისას, რომ მარტო იმასლა ვცდილობდით.
თოფი და თოფის წამალი გვეშოვა როგორმე და კარგი ტყვიით გა-
ვმასპინძლებოდით, თუ ჩვენც გვესტუმრებოდნენ. ეს ხმები მით
უფრო გვაშინებდნენ, რომ აგერ ორი თვე სრულდებოდა. შოველი-
საგან წერილი აღარ მოგვდიოდა და პარიზის ამბებისა დარწმუნე-
ბით აღარა ვიცოდით რა. გაზეთებში კი... ვინ იცის, ნებას მისცემდნენ

გზეთში მართალი ეთქვათ რამე? ბოლოს, მადლობა ღმერთს, შოველისაგან მეორე წერილიც მივიღეთ და ეს წერილი კი ჩემი ხელით გადმოვწერე და დღევანდლამდე შენახული მაქვს. თვით შოველის წერილი ნათლიაჩემმა ნაცნობებს გაუბოძა და ისე მოიარა მთელი მთა, რომ კაცი არსად დარჩენილა, რომ ის არ წაეკითხოს. წერილთან ერთად პარიზული გაზეთებიც გამოგზავნა.

სწორედ იმ დღეს, როდესაც ეს წერილი მივიღეთ, გვეწვია მ. ქრისტეფორე თავისი ძმით; კარგი კაცი იყო ცხონებული პატერნი, 1814 ისიც ვაჟკაცურად გაუმკლავდა სამშობლოზედ მოსულ შტერს!

მ. ქრისტეფორეს აღარ აციებდა და ცოტა ღონეზედაც მოსულიყო. იმ დღეს სადილად დაიჭირა ნათლიაჩემმა ისიცა, იმის ძმაც და შოველის წერილი ერთად წაეკითხეთ. ნათლი-ჯალაბი, ნიკოლი და ორი სამი ჩვენებური მოხუცებული კიდეც სხვანი დაესწრნენ და ყველას ძალიან უკვირდა: შოველი კეკვიანი, ფთხილი კაცია და აგრე დაუბრუნებელ წერილს როგორ იწერება? იქნება ვის ჩავარდნოდა ხელშიო?!

მაგრამ, აი, თვით წერილიც. ყველა ნახავს. რა ამბები ხდებოდა პარიზში და რის იმედი უნდა გვექონოდა დიდებულთა და სამღვდელოთაგან, თუ ისინი ისევ ბატონებად დარჩებოდნენ:

„ბატონს ივანე ლერუს. ბარაკელ მქედელს, ფალსბურგის ახლო.

მკათათვე 1789 წ.

„ერთი წერილი კიდევაც უნდა მიგელოთ ჩემი. წარსულ 6 მაისს მოწერილი, რომლითაც გაუწყებდით ჩვენს მოსვლას ვერსალში. იმასაც გწერდით, რომ თვეში ოთხ მანეთად დავიჭირეთ სახლი წმინდა ფრანსუას ქუჩაში, ძველ ქალაქში. ხარაზ ანტონ პიშოსთან; დღესაც იქვე ვდგევართ და თუ მოიწეროთ რამე, უმთავრესი ის არის, რომ მისამართი კარგად გარკვევით დასწეროთ.

როგორია წელს მოსავალი? ბატონმა ივანემ და მიშელმა რომ ამის შესახებ მაცნობონ რამე, ძალიან დამავალებენ. აქ ძალიან ავი დარი იდგა, სულ ქუხდა და თავსნმა იყო. მზეს ძალიან იშვიათად ვხედავდით. ამბობენ, წელს ძალიან ცუდი მოსავალი იქნებაო. ნეტავი თქვენი აზრი მაცნობოთ. მარგალიტას ძალიან უნდა თავის პატარა ბოსტანის და მეტადრე ვარდების ამბავი გაიგოს რამე.

ისე ვართ აპოდენა ქალაქში, როგორც უცხო ტომისანი. ჩემთან ამავე სახლში ორი ამხანაგი მყავს — ერთი გახლავთ ნაპურის ხსლო მეზონსელები მამა იაკობი და მეორე პეტრე ჟერარი. ვიკიდან. ქვემო სართულში ისინი დგანან და ზემოდ მე და მარგალიტა. მარგა-

ლიტა ბაზარში დადის და სადილს გვიკეთებს. ძალიან კარგად მოვეწყვნით, ყოველ საღამოს მამა იაკობის ოთახში შევიყურებით ხოლმე და ჩვენს საქმეებზედ ვბაასობთ; შევლაპარაკდებით, შევხუროდებით, მაგრამ უერარო ჩიბუხს მოუკიდებს, მე ბურნუთის წევას დაიწყებ და ბოლოს შევთანხმდებით კიდევ.

ასე გახლავთ ჩვენი საქმე. ახლა საერო საქმეები მოგახსენოთ! მე ვალდებული ვარ, ყველაფერი გაცნობოთ, რაც კი აქ მოხდება; მაგრამ რაც ხანი აქა ვართ, უსიამოვნებისა და წინააღმდეგობის მეტი არა გვინახავს რა. თავადაზნაურობა და სასულიერო წოდება, მეტადრე თავადაზნაურობა, იმისთანა წინააღმდეგობას გვიწევს და ისე მტრულად გვეკიდება, რომ ვერც კი წარმოგვიდგენია, რითი უნდა გათავდეს ჩვენი ასეთი შეძლება. ისე გვექცევიან, რომ დღეში რამდენჯერმე გვეცვლებოდა აზრი: ხან იმედით სავსენი ვიყავით და ხან კიდევ იმედმიხდილნი სასოწარკვეთილებას ვეძლეოდით. ძალიანი მოთმინება და სიმშვიდე დაგვკირდება, ვიდრე ვაჯობებდეთ და ჩვენს პატივისცემას ვასწავლიდეთ! რომ შესძლებოდათ, ახლოც არ მიგვიკარებდნენ; მაგრამ რაკი ნახეს, რომ ჩვენ უიმათოდაც კარგად შევადგენდით კონსტიტუციას, ჩვენთან მობრძანება იკადრეს და მას შემდეგ სამივე წოდების წარმომადგენელნი ერთად, ერთ კრებადა ვართ შეკრებილნი.

ამიტომ იყო, რომ არასა გწერდით:— რა მომეწერა, დანამდვილებით მეც არა ვიცოდი რა! დღეს კი საქმე უკვე მოგებული გვაქვს და ვესწრაფები დაწვრილებით გიამბოთ თავიდან ბოლომდე.

ეს წერილი ყველას წაუკითხეთ, რადგან მე აქ ჩემთვის კი არა, მთელი ქვეყნისთვისა ვარ და დიდი უსინდისობა მომივა, არა ვაცნობო რა თავის საქმისა იმ ხალხს, რომელმაც მე თავის წარმომადგენელად ამომირჩია. მე ყოველდღე ვნიშნავ, რაც კი მოხდება და ამიტომ, იმედი მაქვს, არა დამავიწყდებოდა რა.

ვერსალში 30 აპრილს მოვედიტ მე და სამი კიდევ სხვა წარმომადგენელი ჩვენის სათემო კრების მიერ ამორჩეულნი. „სამეფო სასტუმროში“ ჩამოვხტით. სასტუმრო ხალხით სავსე იყო. მე არ ავიწერო, რა უღმერთოდ მოგვექცნენ ამ სასტუმროში, რა ფულს გვართმევდნენ ერთ მათლაფა წვენში, ან ერთ ფინჯან ყავაში; განცვიფრდებით, რომ გაიგოთ! ტყავი გაგვაძრეს! სასტუმროს პატრონიც და იმისი მოსამსახურენიც სულით ხორცამდე დაღუპული და დამახინჯებული არიან და ფულისა და დიდებულ ბატონების მეტი აღარა სწამთ რა! არიან თავიანთის თითქმის უზრუნველად და თავადაზნაურთა ფულებით მდიდრდებიან! აი, თურმე, სად მიდის ჩვენი ფულები! საწყალი, დამშეული ხალხის ნაკირნახულევი ფუ-

ლები! ერთ მათლაფა წვენიში რომ ფულს გვახდევინებენ, იმ ფულად ჩვენ სოფელში სამ საუკეთესო ბიჭს ვამუშავებ დილიდან საღამომდე! აბა გაბედეთ და სიძვირე გაიკვირვეთ! თითოთ საჩვენებელი გახდებით: ნეტა ვინ არის ეს გლახაკი, რომ გროშებზე ლაჰარაკობსო?! — აქ დიდებული მარტო ის არის, ვინც ბზესავეთ აბნევს ფულს.

რასაკვირველია, მე იქ არ დავდგებოდი. ვისაც თავისი დღენი, 35 წლის განმავლობაში წვა-დაგვის მეტი არა უნახავს რა, მან კარგად იცის ფულის ყადრი და ვილაც მუქთახორა თავადიშვილების დაცინვას არ შეუშინდება. იმოდენა ფული რომ მთხოვეს, თვით სასტუმროს პატრონი დავიბარე თავისი შავი სერთუკით და თეთრი ყელსახვევით და პირდაპირ ვუთხარი, რისიღ ღირსი იყო. ეტყობა პირველად ესმოდა ამისთანა სიმართლე და პასუხის მაგივრად უნდოდა მასხარად ავეგდე, მაგრამ აქაც ღირსეული პასუხი მივეცი და თითონ ისევე შევარცხვინე. მე რომ ხალხის წარმომადგენელი არა ვყოფილიყავ, პანდურის ცემით გამომისტუმრებდნენ! ჩემდა საბედნიეროდ, იქ უკვე იცოდნენ, ვინ ვიყავი და მეტი ვერა გამიბედეს რა. ეერარმა მიაშბო მეორე დღეს, სულ იმასლა გაიძახიან იმოდენა სასტუმროს მოსამსახურენი, რომ შეგვარცხვინა ჩვენმა წარმომადგენელმაო! ბევრი ვიცი, ღვთის წინაშე. იმათი შერცხვენისა რა მოგახსენოთ და ის კი ვიცი, რომ ლაქიის სალაშს და პატიოსანი კაცის შრომას ერთი და იგივე ფასი არ უნდა ეღვას!

მინდოდა ჯერ ეს გარემოება მეამბნა თქვენთვის, რომ უფრო კარგად გაგეგოთ, ვისთან გვაქვს დღეს ჩვენ საქმე.

იმ ღამეს არაფერი და მეორე დღეს, გათენდა თუ რა, მაშინვე სახლის ძებნა დავიწყე. ჩემი გუნების ოთახი ვიშოვნე და ბარგი გადავალაგე. გადავედი და ორი ჩემი ამხანაგიც ჩემთან გადმოვიდნენ. ჩვენთვის ღამაზად მოვეწყენით და ძალიან ყაირათიანადაც ვცხოვრობთ.

უნდა გენახათ ვერსალი 3 მაისს, როდესაც საერო კრების წევრნი მეფეს უნდა ხლებოდნენ. მთელი პარიზი ფეხზე იდგა! მეორე დღეს სულიწმინდის ეკლესიაში წირვა უნდა მოგვესმინა და იმოდენა ხალხი მოგროვილიყო ქუჩებში, გეგონებოდათ მთელი საფრანგეთი აქ შეკრებილაო.

მაგრამ ჯერ იმას ვიამბობთ, მეფემ როგორ გენახულა.

სამეფო სასახლე პატარა ფერდობზედ არის აგებული ვერსალში, ქალაქსა და ბაღებს შუა. სასახლის წინ მშვენიერი ეზოა დაცემული და აქეთ-იქით, მარჯვნივ და მარცხნივ დიდრონი შენობები მინისტრების საცხოვრებლად. გარს იმისთანა წალკოტი არტყია,

იტყვიტ ვედმის ბალიაო. პარიზიდან მომავალი შორიდანვე დაინახავს მალღობზედ ამართულ სასახღესაც და ბაღსაც. ეზოს მშვენიერი რკინის მოაჯირი არტყია. სასახღეს უკან ჩახრუეღებით და მარნარიღოს ძვირფასი ნაქანდაკევიტ შემკული ბაღი უძკეს. რამღენი ათასი კაცი უნდა გაეყვანათ ბეგარაზედ, რამღენი ქვრივ-ობოღისთვის უნდა წაერთმიათ ხარჯის ფული, რომ ეს სასახღე აეგოთ და ეს წალკოტი გაეშენებინათ?! მაგრამ მაგას ვინა ჩივის? ისეთი ნეტარეღებით ცხოვრობენ ამ პალატებში დიდებულნი და იმათი შინაყმანი, რომ... ქვეყანაზედ ქვა ქვაზედაც ნუღ დებულა, ოღონდ ჩვენ ეს ფუფუნება არ მოგვაკღღღესო! ხომ იციტ თავს რითი იმართღებენ: ჩვენ რომ ასე არა ვფღანგოთ, ვაქრობა შესღღებაო! მოღი და ნუ იტყვი: საფრანგეთს, აგერ საუკუნე სრულღება, შიმშიღლიტ კუჭი ეწვის მარტო იმიტომ, რომ ვერსაღღში განცხრომიტ ბრძანღებოღღენ ჩვენი ბატონებო!

ჩვენ წინაღვე ვიცოღღიტ, რომ 3 მაისს მეფეს უნდა ვხღებოღღიტ; რამღღენიღე დღას წინაღ გააკრეს ამის შესახებ განცხადებანი.

ხაღხის წარმომადგენღღნი ბევრი აცხადებღღენ უკმაყოფიღღღებას, რომ თავაღღანაურობის და სასულიერო წოღღების წარმომადგენღღნი ყვეღა ცაღღ-ცაღღკე ბარათიტ მოიწვიეს და ჩვენთვის კი განცხადება გააკრეს ქუჩებშიო. მე და ჩემმა ამხანაგებმა ამ გარემოებას მაღღღენი ყურადღება არ მივაქციეღღიტ და დანიშნულ დროზედ, სწორედ შუაღღღისას წავეღღიტ „მცირე“ დარბაზისკენ. საერო კრება ამ „მცირე“ დარბაზშია მოთავსებულღღი. ეს დარბაზი სასახღღის გარეთ არის, ცაღღკე, პარიზის გზაზედ, მოეღღანაზედ, რომეღღღზედაც უწინ რაღღაცა შენობა ყოფიღღა მეფის დროს გასატარებღღელ „მცირე ნივეტების“ შესანახავად. მე არ ვიცი — რაღღა უნდა იყოს მეფის დროს გასატარებღღელი „მსხვიღღი ნივეტები“ და ეს „მცირე დარბაზი“ კი მართღღა მშვენიერი რამ არის. გვერღღიტ ორი დარბაზი კიღღვე სხვა აკრავს, ერთში სასულიერო წოღღება იკრიბება და მეორეში თავაღღანაურობა.

წყობისაღღ გავემგზავრენიტ მცირე დარბაზიდან. გარშემო ხაღღხი გვეხვეოღღა და ყვიროღღა: გაუმარჯოს მეღღამე წოღღებას! ეტყობოღღღათ, კარგად იცოღღღენ, რომ ჩვენ იმათი წარმომადგენღღნი ვიყავიტ და სულ თავს გვევღღებოღღენ. მეტაღღრე წინა დღღიტ ამოსული პარიზეღღები.

სასახღღის ეზოს შესავაღღ კართან შევიცარიღღელი ჯარისკაციბი იღღღენ. ჩვენ თავისუფღღად შევეღღიტ ეზოში, მაგრამ ხაღღხი კი არ შემოღღუშვეს. ეზო შევიარეღღი, შევეღღიტ სასახღღეში, მშვენიერი ხაღღღებით დაფენიღღი მარმარიღღოს კიბე ავიარეღღი. ყვავიღღებით იყო მო-

ფენილი იქაურობა. აქეთ-იქით სულ ოქრომკედით მოკაზმული შინა-
კმანი იდგნენ თავმოხრილნი, ორ-ორნი ყოველ საფეხურზედ.

პირველ სართულში ერთს დარბაზში შეგვიყვანეს, რომ იმისთანა მშვენიერს, იმისთანა დიდს და მდიდრად მორთულს, ადამიანის-
შვილი თავის დღეში ვერას ნახავდა, მეგონა სატახტო პალატი-
მეთქი. თურმე უბრალო, მისავალი ოთახი ყოფილიყო.

ერთი თხუთმეტი წამის შემდეგ ჩვენს პირდაპირ კარი გააღეს
და შემდეგ ოთახში გაგვიყვანეს. ეეჰ, ჩემო ივანე, ბევრიც რომ ვე-
ცადო, მე იმის სიმშვენიერეს ვერ ავიწერ! იმისთანა თალებით
ჰქონდა ჰერი შეკრული, იმისთანა სურათები იყო კედლებზედ გა-
მოხატული, რომ ზღაპრადაც არსად გაგვეგონება ამისთანა საკვირ-
ველება. ამასთან თვალგაღუწვდენელი რამ იყო: შიგ იმრდენა ხალ-
ხი ვიყავით და აჩუკი ვჩანდით. აქეთ-იქით კედლებთან მეფის მცვე-
ლი ჯარისკაცნი იდგნენ ხმალ ამოღებულნი.

უცბად მარცხენა მხარეს ვილაცამ დაიძახა:

— მეფე მობრძანდება! მეფე!

კარგა ხანი კიდევ გვესმოდა ეს ძახილი: მეფე! მეფეო! ბოლოს
დარბაზში შემობრძანდა „ცერემონიის გამგე“ და დაიძახა:

— ბატონებო, მეფე მობრძანდება!

ვიცი, ჩემო ივანე, ამას რომ წაიკითხავ, შენებურად შეჰყვირებ:

— ღმერთო, რამოდენა კომედია სცოდნიათო! ვიცი, რომ კომე-
დიაა, მაგრამ უნდა ნახო, რა კარგადაა აქეთ მომზადებული ეს კომე-
დია, რომ დიდებულთ ამპარტავნობა გაუზვიადონ და ჩვენ კიდევ
დიდებულთა პატივისცემა! უმთავრესი „ცერემონიის გამგე“ მარ-
კიზ დებრეზე იმისთანა მძიმე ოქრომკედით იყო მორთული, რომ
ჩვენს უბრალო ღარიბ ტანისამოსთან, ის ჩვენსავით უბრალო მო-
წყვდივად კი არა, უმაღლეს ქმნილებად გვეჩვენებოდა; შეხედუ-
ლება ხომ იმისთანა ჰქონდა, თითქო უნდა დაგვიძახოს: თქვენ ჩემს
წინაშე მატლი ხართ, ჩემი ფეხის მტვერიო! მოუახლოვდა ერთს
ჩვენგანს, ყველაზედ უფროსს, რომელიც წინ იდგა და მდაბლად
თავი დაუკრა. სწორედ იმავე დროს გამობრძანდა მეფე, მარტოდ-
მარტო გამოიარა მთელი დარბაზი და სავარძელთან მივიდა.

მეფისთვის სავარძელი მოემზადებინათ შუა დარბაზში, მაგრამ
ფეხზედ იდგა და ქუდი ილღიაში ეკიბრა. „ცერემონიის გამგემ“
ანიშნა ჩვენს უფროსს, წინ წამოდექიო, მიიყვანა და მეფეს წარუდ-
გინა. მერე მეორე, მესამე, ყოველი თემის წარმომადგენლნი ცალ-
ცალკე. მიიყვანდა მეფესთან, უკანიდან თემის სახელს ეტყობდნენ;
და ის კიდევ მეფეს გაუბეორებდა. მეფე ჩუმად იყო.

ბოლოს, როცა ყველანი წარუდგინეს, მეფემ გვიბრძანა, დიდი

ბედნიერი ვარ, რომ მესამე წოდების წარმომადგენელი ვნახე. და-
ლაგებით ლაპარაკობს, წყნარად; მეტად მსხვილი კაცია, ჩასუქე-
ბული, შუბლდაცემული, მსხვილტუჩა და სამკეცა ლაბაბიანი... ეს
გვითხრა და წავიდა. ჩვენც ჩვენთვის წამოვედით...

მივედი შინ, ისევ ჩემი შეჩვეული ყოველდღიური ტანისამოსი
ჩავიცვი და, უნდა მოგახსენო, ძალიან ცუდ გუნებაზე ვიყავი. ცო-
ტახანს უკან ამოვიდა ქერარი, მერე მღვდელი იაკობი. ტყუილად
დავკარგეთ მთელი დღე! მარგალიტას ძროხის ხორცი შეეწვა ნივ-
რით და თუმცა გაჯავრებულები ვიყავით, სადილს კარგა მაღიანად
შევექეცი; ზედ ცოტა რამ ვაშლის ღვინო დავატანეთ და ჩვენს
საქმეებზედ სჯა დავიწყეთ. ქერარი და სხვა კიდევ მრავალი წარ-
მომადგენელი მესამე წოდებისა იმ აზრისანი იყვნენ, რომ მეფეს
სამივე წოდება ერთად უნდა წარვდგენოდით და არა მარტო ჩვენ.
ხალხის წარმომადგენელიო! განა ცხადი არ არის, რომ სასახლე-
ში უკვე გადაუწყვეტიათ სამივე წოდების განცალკევებაო! ჩვენ
შეერთებას და შეთანხმებას ვცდილობთ და მეფე კი ერთმანეთს
გვაშორებსო! ზოგნი თუმცა ეთანხმებოდნენ ამ აზრს; ამ განცალ-
კევებას მარტო ცერემონიის გამგეს აბრალებდნენ. მე კი ვფიქრობ-
დი: ვნახავთ! თუ სასახლეში უთუოდ ნებავთ, რომ ორი წოდება
შეიერთონ ჩვენს წინააღმდეგ, მაგასაც ვნახავთ! მაგასაც გაუძლ-
ვებთ! დღეს კი ისე დაიწყეს საქმე, რომ შეიძლება აგრეც იყოს!

მეორე დღეს დილა ადრიანად დაიწყეს ზარების რეკვა და მთე-
ლი ქალაქი ფეხზე წამოაყენეს. მზიარული ხმაურობა ისმოდა ყველ-
გან, რადგან იმ დღეს სულიწმინდის ტაძარში წირვის შემდეგ სა-
ერო კრების წარმომადგენელი უნდა დაელოცნა სულიერ მამას.

ჯერ ღვთისმშობლის ეკლესიაში შევიყარენით სამივე წოდების
წარმომადგენელი და იქ მოვისმინეთ წირვა. ამისთანა მშვენიერ
გალობას მე ჩემს დღეში ვეღარსად გავიგებ, მგონი. მერმე წყობი-
სად წავედით სულიწმინდის ეკლესიისკენ. თავში ჩვენ ვიყავით,
მერე თავდაზნაურობა და ბოლოს შემოსილი სასულიერო წოდება.
ქუჩები ხალხით იყო სავსე, სახლები ძვირფასი ხალებით მორთუ-
ლი და ყველგან ერთი და იგივე ყვირილი ისმოდა ხალხისა:

— გაუმარჯოს მესამე წოდებას!

პირველად ნოხდა მგონი, რომ ხალხი თავდაზნაურთა ოქრო-
მკედით ნაკერმა ძვირფასმა ტანისამოსმა და ძვირფასი თვალებით
მოჰყვილმა იარაღმა არ გაიტაცა; მართლაცდა, ჩვენ ჩვენი უბრა-
ლო შავი ტანისამოსით ყვავენსა ვვადით იმ მორთულ-მოკაზმუ-
ლების გვერდით. სულ უკან მობრძანდებოდა მეფე-დედლოფალი
და კარისკაცი. აქეთ-იქით ყვირილი ისმოდა:

— გაუმარჯოს მეფეს! გაუმარჯოს ორღენელს! მაგრამ ისე ერთხმად არ იყო ეს ყვირილი, როგორაც ერთხმად იყო იმოდენა ხალხის გრიალი — გაუმარჯოს მესამე წოდებასაო!

ამ ხალხს თავისი მოსაზრება ჰქონია და თვალს ვერაფერ აუხვევს. იმოდენა ხალხში ერთი არ იყო, ერთი, რომ დაეყვირა — გაუმარჯოს დედოფალს, ან ეპისკოპოსებსაო. თუმცა, მერწმუნეთ, დედოფალზედ და ეპისკოპოსებზედ უმშვენიერესი იქ არაფერ იყო.

სულიწმინდის ეკლესიაში წირვა მოვისპინეთ. წირვის შემდეგ ნანსეღმა ეპისკოპოსმა დელაფარმა ქადაგება სთქვა დიდებულთა განცხრომის და ფუფუნების წინააღმდეგ, ის ქადაგება, რომელსაც ეს რამდენიმე საუკუნეა ყოველი ეპისკოპოსი ამბობს და თითონ კი უმეტეს განცხრომაში და ფუფუნებაში იმყოფება.

ოთხ საათამდე გასტანა ამ ქადაგებამ. ყველანი დავილაღენით, ყველანი ვგვრძნობდით, რომ დრო იყო ვაეთავებინა და ახლა წავსულიყავით და საზოგადო საქმეებზედაც მოგველაპარაკანა. მაგრამ საქმე ვის ახსოვდა? მეორე დღეს 5 მაისს, იმ დღეს, როდესაც საერო კრება უნდა დაწყებულიყო, კიდევ რაღაცა ცერემონია გამართეს. დასწყევლათ ღმერთმა, აქ ცერემონიების მეტი არა სცოდნიათ რა და ეს ცერემონიები ჩვენებურად, მდაბიურად რომა ვთქვათ, ცარიელი კომედიას და თვალთმაქცობას!

ღიად, 5 მაისს სამივე წოდების წარმომადგენელი შევიყარენით ჩვენს დარბაზში, რომელსაც ახლა სამივე წოდების დარბაზს უწოდებენ. აქეთ-იქით ხელოვნურად ნათალი მარმარილოს სვეტებია გაყოლებული; სინათლე ზემოდგან ჩამოდის თეთრი ატლასით დაფარულ სანათურიდგან; ბოლოში ყვითელი სუმბულით მოფენილ მალღობზედ სამეფო ტახტია ამართული.

ცერემონიის გამგემ და მარჯვენა დებრეზედ და იმისმა თანაშემწეებმა თავ-თავის ალაგას დასხეს წარმომადგენელი. სწორედ ცხრა საათზედ დაიწყეს დილით და პირველის ნახევარი იყო, რომ ძლივს გაათავეს; სულ ხვიათქი სდიოდათ, ისე ეწვალეობდნენ უბედურების დაგვიძახებდნენ. მთელს დარბაზს შემოგვატარებდნენ. ვიდრე საჩვენო ალაგს გვიპოვნიდნენ, მიგვიყვანდნენ და, ასე გასინჯეთ. იმასაც კი გვეუბნებოდნენ, აი ასე ისხედითო. იმავე დროს თავ-თავიანთ ალაგს იპერდნენ სამეფო საბჭოს წევრნი, მინისტრები, თემის უფროსნი და სხვადასხვა წარჩინებული მოხელენი. სამეფო ტახტის ქვემოთ ერთი გძელი მაგიდა იდგა მწვანე მაუღით გადაფარებული, იქ სამეფო მდივნები დასხეს; ერთ მხარეს ნეკკერი იჯდა, მეორე მხარეს იქვე ბ-ნი სინარი. დაწვრილებით რომ ავიწეროთ ყველაფერი, ჩემს დღეში ვერ გავათავებ.

სამეფო ტახტის პირდაპირ ჩვენ დაგვსხეს, მარჯვნივ სასულიერო წოდება და მარცხნივ თავადაზნაურნი. სასულიერო წოდების წარმომადგენელი იყვნენ 291, თავადაზნაურობისა — 270 და მესამე წოდებისა, ესე იგი ხალხის წარმომადგენელი — 578. გარდა ამისა ჩვენ კიდევ რამდენიმე კაცი გვაკლდა, რადგან ქ. პარიზში ამორჩევა ჯერ არ გათავებულებოდა; მაგრამ ეს არავის შეუნიშნავს.

ბოლოს, პირველ საათზე, კაცი აახლეს მეფეს და თითქმის მამინვე შემობრძანდნენ მეფე-დედოფალი და ბატონიშვილები თავიანთ ამალით. მეფე ტახტზე დაბრძანდა, დედოფალი გვერდით მოუჯდა. ბატონიშვილები და მეფის ნათესაობა სამეფო ტახტის ირგვლივ; ცოტა ქვევით დიდებულნი, კარისკაცნი და სულ ქვევით. სამეფო ტახტის საფეხურებზე, ამაღა. სასახლის ქალები, მდილად მორთულნი, თითქო სამეჯლისოდ მომზადებულანო, სამეფო ტახტის ზემოთ აივნიდან იყურებოდნენ; სხვა აივანზედ, სვეტებ შუა, პარიზელი და ვერსალელი საზოგადოება შეგროვილიყო საერო კრების დაწყების სანახავად.

მეფეს თვალ-მარგალიტით შექედილი ქუდი ეხურა და სწორედ ქათმის კვერცხის ტოლი ანდამატი უბრწყინავდა ქუდის თავზედ. ყველანი ვისხედით, ზოგი სავარძელში, ზოგი ცალკე სკამზედ, ზოგი საერთო გრძელ სკამზედ, ზოგი უბრალო ტაბურეტზედ, ყველა თავის შთამომავლობის და პირადი ღირსების და კვალად. ამას თურმე დიდი, მეტად დიდი მნიშვნელობა ჰქონია! ერის დიდება თურმე ამაზედ ყოფილა დამოკიდებული!! ჩემი თვალით რომ არ მენახა, ჩემს დღეში არ დავიჯერებდი, მაგრამ ვნახე და დავრწმუნდი, რომ აქ საქმე კი არა, სულ ყველაფერი ცერემონიისთვის ჰქონიათ მოწყობილი! მერე რა კარგად აქვთ მოწყობილი ეს ცერემონიები! ნეტავი ღვთის მადლით ჩვენი საქმეებიც ისე ლამაზად გავარჩიოთ! ასეა, თურმე! ჯერ წესისამებრ მოწყობილი ცერემონიები და მერე, თუ დრო და მოცალეობა დარჩათ, საქმე. ჩვენდა სამწუხაროდ, იმდენი დრო უნდებათ ამ ცერემონიებისათვის, რომ სახელმწიფო საქმისთვის და გაჭირვებულ ხალხისთვის ველარ მოუცლიათ.

ნეტავი აქა ყოფილიყო ჩვენი ვალენტინი, სულ მცირე ხანს მაინც, ერთი სამი-ოთხი საათით! რა კარგად შეისწავლიდა ტანისამოსის კვალად ადამიანთა გარჩევას. რა თვალსაჩინოდა ნახავდა, რომ კაბაც არის და კაბაც, ქუდიც არის და ქუდიც, საქმე ის არის, ვისა ხურავს: ჩვენსავით უბრალო მომაკვდავს, თუ დიდებულ თავადიშვილს ან სამღვდელს პირს?! მე კი ამეებისთვის ყურადღება არ მიმიქცევია და სულ იმის ლოდინში ვიყავი, კრებას როდის გახსნიან-მეთქი, ბოლოს ცერემონიის უფროსმა გამგემ გვანიშნა—სმენაო! და მეფემ

თავისი სათქმელი წაგვიკითხა. გრძელი რაღაცა წაგვიკითხა, მაგრამ მე მარტო ეს დამახსოვდა: კმაყოფილი ვარ, რომ აქა გხედავთ, ეცადეთ ერთმანეთში უთანხმოება არა მოგიხდეთ რა, ახალის ჰემოდება არაფრისა მოინდომოთ და სახელმწიფო ვალი გადაიხადოთ! დიად, ამის იმედი მქონდა მე თქვენგან და მხოლოდ იმიტომ მოგიწოდეთ; აი, სახელმწიფო ვალის რაოდენობას გაცნობებენ და დარწმუნებული ვარ, კარგ სახსარს გამოსძებნით რასმე ვალის გადასახდელად და სახელმწიფო ნდობის აღსადგენად. ეს არის. უუცხოველესი ჩემი სურვილი და ძალიანაც მიყვარს ჩემი ხალხი!

მერე გვიბრძანა: ჩემს განზრახვას მართლმსაჯულების მინისტრი მოგახსენებთო და დაბრძანდა. ერთხმად გაისმა იმოდენა დარბაზში:
— ჩვენს მეფეს გაუმარჯოს!

მაშინ წამოდგა მართლმსაჯულების მინისტრი ბ-ნი ბარანტენი და სთქვა: უპირველესი სურვილი მათის დიდებულებისა ის არის, რომ თავისი ქვეშევრდომნი სიკეთით აღავსოს. სახელმწიფოს რომ გაუჭირდება, ერმა თავის ღეთისაგან კურთხეულს, სათნოების სავსე მირონცხებულ მეფეს უნდა მიმართოს და იქ კპოვოს შვება. ჩვენმა დიდებულმა მეფემ რა ნახა თავისი ერთგული ერის გაჭირვება, გულით მოინდომა იმის შეწვევა და საერო კრებას იმიტომ მოუწოდა, რომ გაჭირვებულთ დაეხმაროს. ამიტომ მთელი ერი მადლობას უნდა სწირავდეს მისთვის თავგამოდებულ დიდებულ მეფეს და ყველაზედ უმეტეს მადლობას მესამე წოდება უნდა სწირავდეს, რადგან მეფემ კეთილ ინება და გააუქმა ყოველი დამამცირებელი და შეურაცხმყოფელი განსხვავება, რომელიც არსებობდა ჩვენი ქვეყნის დიდებულ დამმარცხებელთა დამათმიერ დამარცხებულ დამონავებულთა შორის! მესამე წოდება უმეტეს მადლობას უნდა სწირავდეს, რადგან მეფემ გაასწორა ბატონი და ყმა, პატრონი და მონა. მიუხედავად ამისა უმთავრეს წოდებად, რომელზედაც დაფუძნებულია სამეფო ტახტი, ყოველთვის თავადაზნაურობა იქნება. რადგან მთა და ბარი ღმერთსაც ვერ გაუსწორებია. სახელმწიფო წესიერებას დაუღვია ეს განსხვავება დიდთა და მცირეთა შორის; ეს ასე ყოფილა სახელმწიფოში და ასეც უნდა იყოს უკუნითი უკუნისამდე... სიტყვა იმითი გაათავა, რომ მეფესა სურს, ზვალ კვლავ შეიკრიბნეთ, საჩქაროთ შეამოწმოთ თქვენი უფლებანი და იმ დიდს საერო საქმეს შეუდგეთ. რომელიც უკვე მოგახსენეთ, ესე იგი ფულის შოვნას და ვალის გადახდასაო!

მართლმსაჯულების მინისტრის შემდეგ ადგა ბ. ნეკეერი—სახელმწიფო ხაზინის მინისტრი და ვრცლად აგვიწერა სახელმწიფო

ხაზინის მდგომარეობა. სახელმწიფოს 16 ათასი მილიონი ვალი აღევს და ამ ვალის გამო ყოველ წელს 56 მილიონი ზარალი მოსდის. ეს წაგვიკითხა, ბოლოს უმდაბლესი თხოვნით მოგვმართა. ზარალი დაჰფარეთ და ვალის გადახდა იზრუნეთო. ეგ იყო! კონსტიტუციის შედგენაზედ ხმაც არ ამოუღია. ჩვენ კი ჩვენმა ამომრჩეულებმა კონსტიტუციის შედგენა და შემოღება დაგვავალებს.

იმ საღამოს, შინისკენ რომ მივდიოდით, დიდად გავკვირდით, როცა გავიგეთ, რომ პარიზში ჯარი შემოეყვანათ: ორი რაზმი მეფის მცველთა ჯარისა და ერთი რაზმი შვეიცარიელებისა. გარდა ამისა, ამბობდნენ, სხვა რაზმებსაც მასვლიათ ბრძანება და ისინიც პარიზისკენ გამომგზავრებულანო. ამ უცნაურმა ამბავმა ძალიან შეგვაფიქრიანა, მით უფრო, რომ დედოფალი, თავადი არტუა, უბრწყინვალესი თავადი კონდე, თავადი პოლონიაკი, თავადი ენგენი და უბრწყინვალესი თავადი კონტი, დიდად ეწინააღმდეგებოდნენ საერო კრების მოწოდებას, რადგან იცოდნენ, რომ ხალხს თავის თავი გასჭირებოდა და სახელმწიფო ვალის გადახდას არ მოინდომებდა; მაგრამ რა გაეწყობოდა? რაკი საერო კრება მოიწვიეს, საჭირო იყო ვალიც გადაეხდევინებინათ და რადგან დარწმუნებულნი იყვნენ, ნებით არ გადაიხდიანო, ჯარები შემოიყვანეს პარიზში, რომ ძალა ეხმარათ და თავიანთი საწადელი ჯარის წყალობით აესრულებინათ. სხვას რომ ექნა ვისმე ეს საქმე. ყველანი იტყოდნენ, მიიტყუეს, ხაფანგში გააბესო; და რადგან ამ საქმეს სხვა კი არა, დედოფალი და უბრწყინვალესი თავადიშვილები სჩადიოდნენ, ამის თქმას ვინ გაბედავდა?! ავი მარტო მდაბიო კაცის საქციელი ყოფილა! დიდებულთა საქციელი, რაც უნდა ავი და საძრახისი იყოს, მაინც კარგი ყოფილა, რადგან დიდებული ავს არას ჩაიდნის! დიად, სხვას რომ ექნა—ხაფანგი იქნებოდა და დედოფალისაგან კი... ყველა იტყვის, სახელმწიფო განსაცდელში იყო და დედოფალმა ეს „ხერხი“ იხმარა საზოგადო სიკეთისთვისო. ჩვენდა საბედნიეროდ, მე უკვე ვნახე პარიზელები და დავრწმუნდი, რომ რაც უნდა ხერხი და ეშმაკობა იხმარონ, პარიზელები ჩვენ არ გვიღალატებენ.

შინ მოვედით, პური გაახელით და მე და ჩემი ამხანაგები იმ აზრზედ შევთანხმდით, რომ ჩვენ ჩვენი თავის გარდა სხვის იმედი არავისი უნდა გვქონდეს; ეგ პირველი. გარდა ამისა კიდევ იმაზე შევთანხმდით, რომ პარიზში ჯარების შეგროვება კარგს არას მოასწავებდა მესამე წოდებისათვის.

მხოლოდ 6 მაისს შევუდექით საქმეს; ექვსამდე კი, როგორც უკვე მოგახსენეთ, სხვადასხვა ცერემონიების მეტი არა გვინახავს რა; მიგვიყვანდნენ, დაგვალაგებდნენ, სხვადასხვა სიტყვებს გვე-

ტყონდენ და საქმით კი არა გამოდიოდა რა. ექვს მაისს ძლივს შევეუღეკით საქმეს.

ის იყო 9 საათი შესრულდა, რომ მე, ჟერარი და მამა იაკობი საერო კრების დარბაზში შევედით. კედლებიდან ხალები ჩამოეხსნათ, საქეფო ტახტი აელაგებინათ. დარბაზი თითქმის ცარიელი დაგვხვდა, მაგრამ მესამე წოდების წარმომადგენელი უკვე იკრიბებოდნენ და აქეთ-იქით ბაასიც გაისმა. მიდი-მოდიოდნენ, უცნობნი ერთმანეთს უახლოვდებოდნენ, დაუირიდებლად ლაპარაკობდნენ, თითქო წინადვე ჰგრძნობდნენ, რომ დიდი ტვირთი და საერთო გაქირვება მოელით ერთმანეთისთვის უცნობთაო. არ გასულა ოცი წუთი, თავ-თავის ალაგას ვიყავით მესამე წოდების თითქმის ყველა წარმომადგენელი. ვისხედით და თავადაზნაურთა და სასულიერო წოდების წარმომადგენელთ ველოდით, მაგრამ ერთი რა არის, ერთიც არსადა ჩანდა.

უცბად შემოვარდა ერთი ჩვენგანი და შეგვატყობინა, რომ ორივე წოდება ცალ-ცალკე შეკრებილან და კრება კიდევ გაუხსნიათო. ვერ წარმოიდგენთ, როგორ გვეწყინა და როგორ აღვშფოთდით, ეს ამბავი რომ გავიგეთ! გადავწყვიტეთ, კრება გავხსნათო და მესამე წოდების წარმომადგენელთა კრების თავმჯდომარის ალაგას დაბრძანდა ყველაზედ უფროსი, სრულიად ჰალარა მოხუცი ბ-ნი ლერუ; იქნება თქვენი სახლიკაცი იყოს, ჩემო ივანე? დაბრძანდა და ექვსი კაცი დაასახელა თავის თანაშემწედ.

დიდი ხანი ეცადა ჩვენი თავმჯდომარე, ვიდრე კრებას დაამშვიდებდა და სიჩუმეს ჩამოაგდებდა. ყველას უნდოდა თავისი აზრი ეთქვა; ყველა ხედავდა, რა საშინელ მდგომარეობაში ჩაგვაგდო ამ განცალკევებამ და საჭირო იყო საშუალება გვეხმარა რამე, რომ უფრო უარესად არ წაგვხდენოდა საქმე. ბოლოს, როგორც იყო, დაწყნარდა იქაურობა და ბ-ნი მალუმე—ამბობენ სანავოსნო მმართველობის მოხელედ იყოვო—წინადადება შემოიტანა, დეპუტაციები გავუგზავნოთ ორივე წოდებას და მოვიწვიოთ ჩვენს კრებას შემოუერთდნენ და ჩვენთან ერთად ჰქონდეთ სხდომა ამ საერო კრების დარბაზშიო. ამაზედ ერთმა ყმაწვილმა კაცმა ბ-ნმა მუნიემ უპასუხა: „ხალხის წარმომადგენელთა ღირსების დამამცირებელი იქნება მაგვარი თხოვნა და დეპუტაციების გაგზავნა; ნუ აკჩქარდებით, ძალიან მალე გავიგებთ, რას დაადგენენ თავადაზნაურნი და სასულიერო წოდება და მაშინ ჩვენც იმათი დადგენილებისამებრ მოვიქცეთ“.

მეც იმის აზრისა ვიყავი. თავმჯდომარემა სთქვა, ჯერ უფლება არა გვაქვს ჩვენს კრებას საერო კრება ვუწოდოთ, რადგან კრება

ჯერ არ შემდგარა, წარმომადგენელთა უფლებანი ჯერ არავის შემოწმებია და ამ მიზეზებისა გამო არ ინება საერო კრების სახელობაზე გამოგზავნილი წერილები გაეხსნა. და კარგიცა ქნა, რომ არ გახსნა, სიფრთხილისთანა კარგი ამისთანა საქმეში არა იქნება რა.

ბევრი კიდევ სხვა სთქვეს იმ დღეს, მაგრამ ყველანი ამ აზრებს ეთანხმებოდნენ.

ორ საათზედ ერთმა დოფინელმა დეპუტატმა ამბავი მოგვიტანა, ორივე წოდების კრებას დაუდგენიათ ცალ-ცალკე შეამოწმონ თავიანთ წევრთა უფლებანიო. დიდი ხმაური ატყდა ამ ამბავზედ. ამის შემდეგ ჩვენმა თავმჯდომარემ კრება მეორე დღემდე გადასდო.

ახლა კი ცხადი იყო ყველაფერი: მეფესაც, დედოფალსაც, კარისკაცთაც და დიდებულთა და სასულიერო წოდებასაც ჩვენ მარტო ინიტომ ვუნდოდით, რომ სახელმწიფო ვალი გადაგვეხადნა; დიად, მარტო ვალის გადასახდელად! ვალს გადაგვანდევინებდენ და მერე სულ კინწისკვრით გაგვრეკავდნენ. აღარც კონსტიტუციას მოგვცემდნენ და აღარც რამე შვებას. ან რა წარმოსადგენი იყო, ვითომ დიდებულთა თანხმობით შევადგენდით კონსტიტუციას? კონსტიტუციის ძალით სახელმწიფო საქმეებში ხალხსაც თავისი ხმა აქვს და ვინ გიჟი იქნებოდა ჩვენთვის ეს ხმა მოეცა?! ის არ ერჩივნათ თავისუფლად, ხალხის დაუკითხავად აეღოთ ვალები და, როცა გადახდა გაუქირდებოდათ, ხალხისთვის მოეწოდებინათ—აბა სახელმწიფოს დიდი ვალი ადევს და თქვენ უნდა იკისროთ იმის გადახდაო... და თუ თქვენ არ შეგიძლიანთ, თქვენს შვილებს და შვილიშვილებს უნდა დაადვით კისრად ჩვენგან შექმული ფულის გამოღებაო!

წარმოიდგინეთ, რა გუნებაზედ ვიქნებოდით! მწარე ფიქრები გვიტრიალებდა თავში და ხსნას კი არსაიდან მოველოდით.

შუალამემდის ვლაპარაკობდით მე და ჩემი ამხანაგები. ბრაზმორეულები ღირსეული სიტყვებით ვიხსენიებდით თავადაზნაურობის და სასულიერო წოდების საზიზღარ საქციელს და სასახლის უსამართლობას. ღირსეული სიტყვებით ვიხსენიებდით, მაგრამ ვგრძნობდით, რომ გაბრაზებით ვერას გავაწყობდით და უფრო წაეახდენდით საქმეს.

— ჩვენ იმისთანა ყოფაში ვართ, რომ დიდი სიმშვიდე და წინდახედულება გვმართებს; ან რა გვეჯავრებს? სიმართლე ჩვენსკენ არის! სიმართლით აღჭურვილები უნდა ვეცადნეთ ისინიც დავიყოლიოთ როგორმე და თუ ვერ დავიყოლიეთ, დაე ხალხმა განსაჯოს, ჩვენი საქციელიც და იმათიც!— ვთქვით სამივემ და დასაძინებლად დავიშალენით.

მეორე დღეს, საერო კრების დარბაზში შესვლისთანავე, დავ-
რწმუნდით, რომ სხვებიც ამავე აზრს დასდგომოდნენ და გუშინდე-
ლი არეულობის და ხმაურობის მაგივრად ყველანი ჩუმად ისხდნენ
ღრმად ჩაფიქრებულნი. თავმჯდომარე უკვე თავის ალაგას ბრძან-
დებოდა, აგრეთვე იმის თანაშემწენი და გაჩქარებული სწერდნენ.

ორი რვეული მოგვიტანეს, რომელშიაც მოხსენებული იყო
ორივე წოდების სხდომის განაჩენი. თქვენ გიგზავნით ორივეს, რომ
უფრო უკეთ გაიგოთ, რა უნდოდათ და რას ფიქრობდნენ ჩვენი მე-
ბატონეები და სასულიერო წოდება. სასულიერო წოდებას 133
ხმით დაედგინა 114-ის წინააღმდეგ — ჩვენი წარმომადგენლების უფ-
ლებანი ჩვენვე ცალკე უნდა შევამოწმოთ; ესევე დაედგინა თავად-
აზნაურობას 88 ხმით 47-ის წინააღმდეგ. მცირე უმრავლესობას
ეჯობნა, თორემ ორივე წოდებაში ყოფილიყვენ წინდახედულნი,
დარბაისელნი მამულის ერთგულნი შეილნი, რომელნიც წინააღ-
მდეგ თურმე ამტკიცებდნენ, მაგალითად, თავადი კასტელანი, უგა-
ნათლებულესი თავადი ლიანკური, მარკიზ ლანციეტი, და დოფი-
ნელი და პროვანსელი წარმომადგენელნი. ბევრი თურმე სთქვეს,
უსამართლობას სჩადიხართო, მაგრამ უმრავლესობასთან რას გაა-
წყობდნენ! დეპუტატების უფლებათა შესამოწმებლად 12 კომისია
დაენიშნათ.

იმ დღეს კიდევ განიმეორა ბ-ნმა მალუმ თავისი წინადადება,
ორივე წოდებას დეპუტაციები გაეუგზავნოთ და ვთხოვოთ, შემო-
გვიერთდნენო. ამ სიტყვებზედ მირაბო წამოდგა. მირაბოს ხსენება
შემდეგშიაც ხშირად მომიხდება; თუმცა კეთილშობილთა შთამო-
მავალია, ხალხს აურჩევია თავის წარმომადგენლად: თავადაზ-
ნაურთ გამოეცხადებინათ—ჩვენ უმამულო კეთილშობილს ჩვენს
წრეში ვერ მივიღებთო!—მაშინვე თურმე ვაქრებში ჩაეწერა და
მოქალაქეებმა ერთხმად აირჩიეს თავიანთ დეპუტატად. მირაბო
პროვანსელია, ჩასხმული, მხარბეჭიანი, დიდი გაშლილი შუბლი
აქვს, დიდრონი თვალები, მაგრამ საშინელი უსახური რამ არის.
ზაფრანასავით ყვითელია და ამასთან საშინლად ამჩნევია ნაკვავი-
ლარი. ძალიან უსიამოვნო ხმა აქვს და სიტყვის დასაწყისში ისე
აღელდება ხოლმე, რომ ენას ძლივს იგნებს; მაგრამ შემდეგში იმის-
თანა ცხარი ლექსითა ხატავს თავის აზრს, ისე ნათლად და თვალსა-
ჩინოდ, თანაც ისეთი მკერამეტყველებით, რომ 'გეგონებთ, კი არ
წესმის, თვალითა ვხედავ, რასაც ამბობთ; იმისთანა ადვილად გა-
საგები ენით ამბობს, რომ იტყვით, ამას ხომ მეცა ვფიქრობდი, ხე-
დავ როგორ მიმიხვდაო. სმენად გადაიქცევა ხოლმე მთელი კრება
და ვილას ახსოვს მაშინ ან იმის უსახურობა, ან იმისი უსიამოვნო

ხმა? ხანდახან, როცა დიდმნიშვნელოვანი უნდა სთქვას რამე, შედგება, თითქოს სუნთქვა ვერ მოუბრუნებიაო... და უცბად იმისთანა გრგვინვას მოჰყვება, თითქო ჭექა-ქუხილი ატყდაო. როგორ აფიქროთ, რამდენნაირად ეცვლება სიტყვის დროს საშინელი სახე; ყველაფერს ივიწყებს, 'როცა ლაპარაკობს და სიტყვას ისე ააყოლებს ხოლმე ხმასაც, კილოსაც, მიხვრა-მოხვრასაც და სახის გამომეტყველებასაც, რომ იმისთანა უმშვენიერესს ვერას ნახავს კაცი. თავს დაგავიწყებს, სმენადლა გაქცევს და ისე გაგიტაცებს, რომ სუნთქვას შეგიკრავს. მანამ მირაბო ჩვენსკენ იქნება, ჩვენ შიში არაფრისა გვაქვს, თუმცა აქაც დიდი სიფთხილე გვმართებს: მირაბო კეთილშობილთაგანია! გარდა ამისა ჯიბეში გროში არა აქვს და მადა კი იმისთანა მიუცია ღმერთს, რომ მილიონებიც არ ეყოფა. ანასთან დიდი ვალებიცა ჰქონია. საკმარისია ნახოთ იმის ჩამსხვილებული ცხვირი, იმისი დიდრონი ძვლიანი ყბები და უზარმაზარი მუცელი, რომ პირდაპირ სთქვათ: შენ, ჩემო ძამიავ, მაგ მუცელს მაშინ გაიძღობ, როდესაც შესაძლებლად მთელი ალზას-ლორენი გექნება, ზედ კიდევ ფრანშ-კონტე და ზედაც პირის ჩასაკოკლოზინავებლად რამდენიმე კაი გაკეთებული თავადიშვილის მამული!.. მაინცდამაინც კურთხეულ იყოს ის დღე, როდესაც თავადანაურთ თავიანთ წრიდან გამორიცხეს მირაბო და მით ჩვენ შემოგვიერთეს! ჩვენთვის დიდად საჭიროა იმის დახმარება, მეტადრე პირველ ხანებში. ამას შემდეგი ამბებიდანაც ნახავთ.

იმ დღეს 7 მაისს მირაბომ დიდი არაფერი თქვა; მარტო ის შენიშნა, რომ დეპუტაციის გასაგზავნად საჭიროა ჩვენი კრება წესისამებრ იყოს კრებად აღიარებული და ჩვენ კი არ გვინდა ჩვენი კრება კრებად ვაღიაროთ, ვიდრე სხვანიც არ შემოგვიერთდებიან. მაშასადამე, ლოდინის მეტი ჯერ ჩვენ არა შეგვიძლიან რაო.

ვექილმა მუნიემ ითხოვა: „თუ აგრეა, ეს მაინც იყოს, რომ თუ მოინდომა ვინმე ჩვენთაგანმა კერძოდ, პირად თავისი სურვილისამებრ და არა ჩვენი კრების დავალებით იმათთან მოლაპარაკება, ნება ჰქონდეს მივიდეს და სთხოვოს დიდებულთ და სასულიერო წოდებას — შემოგვიერთდნენ, რომ მეფის სურვილისა და ბრძანებისამებრ ერთ საერთო კრებად შევსდგეთ. ეს წინადადება არაფრით დაამდაბლებდა ჩვენი კრების ღირსებას და დავეთანხმეთ კადეც. მაშინ ჩვენი კრების 12 წევრი წავიდა ამბავის გასაგებადა და ცოტა ხანს უკან გვაცნობეს, რომ თავადანაურთა დარბაზში იმათ მარტო კომისიის წევრნილა დახვდნენ, რომელნიც დეპუტატთა უფლებებს ამოწმებენ; სასულიერო წოდებას კრება აქვს და ჩვენი თხოვნა რომ მოისმინეს, თავმჯდომარემ გვიპასუხა: ძალიან კარგი, კრება განი-

ხილავს თქვენს წინადადებასო. არ გასულა ერთი საათი, ჩვენს დარბაზში შემოვიდნენ მონაპელიელი და ორანჟელი ეპისკოპოსები და ოთხი სხვა სასულიერო წოდების პირნი და გვითხრეს: ჩვენ დავადგინეთ, რამდენიმე კაცი ამოვირჩიოთ და იმათ მივანდოთ თავადაზნაურთა და თქვენ მიერ ამორჩეულ კაცებთან ერთად განიხილონ— დეპუტატთა უფლებანი სამივე წოდებამ ცალ-ცალკე შევამოწმოთ, თუ ერთად?

ამ პასუხის გამო ჩვენი კრება გადადებულ იქნა 12 მაისამდე და მეც ამ ოთხი დღით ვისარგებლე, რომ პარიზი დამეთვალყვირებინა. 30 აპრილს პარიზზედ რომ გამოვიარეთ, დრო არა გვქონდა გავჩერებულყავით; სწორედ მაშინ იყო, რომ წმინდა ანტონის უბანში აღელვებულ ხალხს ძლივსღა იმაგრებდნენ ჯარები. ჩვენ რომ გამოვიარეთ, სულყველანი იმას ამბობდნენ, საცა კი ქურდი იყო ვინმე, ყველანი პარიზში შემოსულანო; იმ ორი დღის წინად რამდენიმე სახლი გაეძარცვათ. მინდოდა წმ. ანტონის უბანში მე თითონ ავსულიყავ და ჩემი თვალით მენახა აჯანყებული ხალხი და ჩემი ყურით გამეგო, რას ამბობდნენ პარიზელები ჩვენი კრების შესახებ. განა არა, ვერსალში გამოუღვეველია პარიზელები, იმათგანაც ბევრი რამ მესმის, მაგრამ ხალხის ნახვა ადგილობრივ სჯობია, ჩემი ფიქრით.

დილაადრიანად გავემგზავრენით მე და ჩემი მარგალიტა, ჟერარი და მამა იაკობი. სამი საათის შემდეგ პარიზში შევედით. ვისაც ეს მართლა და ქვეყნის თვალი ქალაქი არ უნახავს, ძნელად წარმოიდგენს იმის სივრცე-სიდიდეს, მრავალსართულიან შენობების სიმშენიერეს და ლარივით სწორი ქუჩების სიგრძეს. ამ სიგანე ქუჩები ჩემს დღეში არსად მინახავს და რას იტყვის ადამიანის ენა, რომ აქ არ მოიპოვებოდეს. მალაზიები, ყავახანები, ლუღხანები, აწინდელი დროისა და ძველებური, წარსული საუკუნოების შენობები, ბაღებით და აუზებით შემკული მოედნები! ქუჩებში ყოველთვის აუარებელი ხალხი დადის და თან ყოველ მხრიდან ძახილი ჩემის; პატარა ურმებზედ დაუდებენ მწვანილს, ხილს, ახალ ყველს, თითონვე მიაგორებენ ქუჩა-ქუჩა და თან გაპყვირიან: ახალი ყველი, ვის გნებავთ! მწვანილი! ვაშლი! ზოგს ურემიც არ აქვს და თავზედ უდგას კალათი და იმისთანა ყვირილით მოდის, იტყვიტ ქვეყნას სავაჭრო იმას აქვსო. ისეთი ყვირილია, ისეთი ატეხილი ძახილი, რომ ვისაც ყური მიჩვეული არა აქვს, ეგონება სამხეცეში ვარ და ამერიკული ფრინველები კივიანო. ამ ყვირილს და ხალხის ხმაურობას ზედ ერთვის ტლანქი ურმების და ეტლების გრიალი ქვით მოკირწყლულ ქუჩებზედ; გულის ამრევი ნაგავი და მყარალი სუნი; ეშმაკუ-

რი და თანაც მხიარული სახის გამომეტყველება უკანასკნელი მო-
დის დაკვალად მორთულ-მოკაზმულ პარიზელებისა! პარიზელის-
თანა მხიარული და ბედნიერი არავინ იქნება ქვეყანაზედ, ოღონდ
თავისუფლად შეეძლოს თავისი ფიქრები გამოსთქვას და გაზეთებ-
ში სწეროს. თუ ამის უფლება აქვს, ერთობ ბედნიერია, ერთობ მხიარულია და შეუწყვეტელი ლხინი აქვს. სიმღერა, ცეკვა, სიცილი, ზუმ-
რობა, ყავახანებში დროს გატარება და პოლიტიკური სჯა და ბაასი!
ერთი სიტყვით რომ მოგპრა, ჩემო ივანე, პარიზისთანა ქალაქი ქვე-
ყანაზედ არ არის! ჩვენსას არაფერსა ჰგავს, რომ შედარება შეიძლე-
ბოდეს. ნანსში ხომ ყოფილხარ—ნანსი სასახლეა და პარიზი უბრალო
სახლი, მაგრამ ნანსი მკვდარია და ცარიელი, პარიზში კი სიცოცხლე
დუღს და გადმოდის.

შარშანდელ შიმშილისაგან დამშეული პარიზელები ჯერაც არ
გამძღარან. მეტადრე საწყალ მუშა ხალხს გასჭირვებია, ცარიელი
ძვალი და ტყავილა არიან უბედურები; მაგრამ მაინც ისეთი მხიარუ-
ლად არიან, რომ გაგიკვირდებათ! საცა გაივლით, ყველგან სახუმარო
აფიშები დაგიხვდებათ კედლებზედ გაკრული.

ძალიან მიამა, ღვთის წინაშე, ამისთანა ხალხის ნახვა; სწორედ
საჩემო ხალხია. რამდენს დავდიოდი სოფელ-სოფელ, წელს ვი-
წყვეტდი და ჩემს წიგნებს ძლივს ვყიდდი. აი, აქ უნდა მომეტანა.
სულ დაიტაცებდნენ! იცით რა სამაგალითო მამულიშვილნი არიან
ეს ღარიბ-ღატაკნი, რა გულწრფელი პატრიოტები არიან! ხომ შიმ-
შილით იხოცებიან, ხომ ლუკმაპურის ნატრულნი არიან და უპირ-
ველეს ყოვლისა თავიანთ უფლებათა მოპოვებასა ცდილობენ. საქმე
ის არის, ჩვენც ადამიანის უფლებანი გვქონდეს და სხვა ყველა
ადვილიაო.

ჩემს მეგობარს, მამა იაკობს, აქ და ჰყოლია. მეხილეა ბულუას
ქუჩაზე, სასახლის გვერდით. იმასთან ჩამოვხტივით. რაც ხანი ქალაქ-
ში შევედი, ვიდრე ჩამოვხტებოდით, ქუჩაში ყველგან ეს სიმღერა
ისმოდა:

ვაშა, საფრანგეთის ხალხსა,
ვაშა, მის ბედს მომავალსა!
თავდასა და ეპისკოპოსს
დაამარცხებს ვით მტარვალსა.

თრთიან ჩვენი პატრონები,
ახ, საწყალი ბატონები!

ხალხის შვილი ცოდნის ჰაა,
ვინ ჩაუწვდენს მის ძირს თვალსა?

თავადსა და ეპისკოპოსს
ის გაჰქელავს ვით მტარვალსა!

თრთიან ჩვენი პატრონები,
ახ, საწყალი ბატონები!

რომ სცოდნოდათ მესამე წოდების წარმომადგენელი არიანო, ხელით გვატარებდნენ სამივეს. ჰოდა, მართლა პილწი, სულით და ხორციით წამხდარი უნდა იყოს კაცი, რომ ამათ უღალატოს! ჩვენ რომ გადაწყვეტილი არც კი გვქონოდა მომავალი ჩვენი მოქმედება, ამ საწყალი ხალხის ნახვაც დაგვარწმუნებდა, რომ სიმართლე ამათ-კენ არის. იცით რა მხიარული და თავგანწირულია ეს ყოველი სათნოებით სავსე ხალხი? მერე ამ გაჭირვებაში, როდესაც ვერც სადმე საქმე უშოვნია და არც საცხოვრებელი აქვს რამე! სულ-წაწყმედილი უნდა იყოს კაცი, რომ ამოდენა გაჭირვება ნახოს თავისი სწორი, თავისი მოძმე ხალხისა და წმინდა აღთქმა არ დაუდევს თავის თავს და ღმერთს: სიკვდილამდე ამის მსახური ვიქნები და ვეცდები ამ მონადქცეულ ხალხს თავისუფლება მოვაპოვებინო!

ოთხი დღე დავრჩით ქვრივ ლეფრანთან. მარგალიტამ და მამა იაკობმა მთელი პარიზი მოიარეს: უცხო მცენარეთა ბაღი, ღვთისმშობლის ტაძარი, სასახლე და თეატრებიც კი. მე უფრო ქუჩებში დავდიოდი, მოედნებზედ და მდინარე სენის პირას, საცა წიგნებსა და სხვადასხვა სავაჭროს ჰყიდიან. მივიდოდი, ხალხს შევეჩვეოდი, გამოველაპარაკებოდი, ვინც კი მომხედებოდა. უსინათლოს დავინახავდი სადმე მომღერალს, იქ გავჩერდებოდი, მოედანზედ სადმე კომედიის თამაშობას შევესწრებოდი, ახლა იქ გავჩერდებოდი. ეს გაწრთვნილი ძაღლებიო, ეს ჯამბაზებიო, ეს კბილის ამომღებო, რა ვიცი? მეტადრე კომედია მომწონს, ახალი ხიდის ყურზედ თამაშობენ. მერე იცით რას თამაშობენ? ტაკიმასხარადა ჰყავთ გამოყვანილი დიდებული თავადიშვილები და იმისთანა სისულელეს ალაპარაკებენ, იმისთანა მტკნარ სისულელეს, რომ სიცილით იხოცება ხალხი. ორჯერ ვიყავი და იმდენი ვიცი, რომ სულ ცრემლი მდიოდა.

პარიზელების კრებასაც დავესწარი. ჯერ ისევ ხალხის საჭიროებათა აღწერაზედ არიან. ერთი სამაგალითო რამ დაადგინა ამ კრებამ: კომისია ამორიჩია და თუმცა თვით კრება დაიშლება, თავის საქმეს რომ დაამთავრებს, ეს კომისია მაინც დარჩება და ვალდებული იქნება თვალ-ყური ადევნოს თავის წარმომადგენლებს, რომელნიც საერო კრებაზედ იქნებიან გაგზავნილნი. ეს კომისია უნდა დაეხმაროს იმათ თავის რჩევით და თუ ნახა, რომ ხალხის

წარმომადგენელი კეთილ-სინდისიერად არ ასრულებენ თავიანთ მოვალეობას, უნდა გააფრთხილოს კიდევ. როგორ მოგწონთ, ბატონო ივანე, ეს აზრი? სამწუხაროდ, სხვაგან ამგვარი არაფერი იზრუნეს და ძალიანაც შესცდნენ. დაფიქრდით — რა არის დეპუტატი, თუ კი თვალყურს არავინ ადევნებს და, მაშასადამე, ადვილად შეიძლება თავის ამომრჩეველთ უღალატოს და თავისი ხმა ხალხის მტრებს მიჰყიდოს? ვინ რას უზამს, ვინ არის პატრონი?! უღალატებს და ბევრსაც დასცინებს იმ გულუბრყვილოებს, რომელთაც ის პატიოსან კაცად იცნეს. ან რატომ არ დასცინებს? იმან სიმდიდრე მოიპოვა და იმის ამომრჩეველები კი ძველებურად ღარიბ-ღატაკად დარჩებიან! იმას ქომაგად იმისივე შემსყიდველი მართებლობა ეყოლება და იმის ამომრჩეველებს კი ცარიელი სიმართლის მეტი არა შერჩებათ-რა. და ცარიელი სიმართლე, თუ გინდა გალესე და დალიე! პარიზელთა კრების მაგალითით რომ ჩვენც ვისარგებლოთ, ძალიან კარგი იქნება და კონსტიტუციას რომ შევადგენთ, სულ თავში უნდა მოვაქციოთ, რომ „ამომრჩეველთ უფლება აქვთ გადააყენონ, უჩივლონ და დაასჯენონ ყოველი დეპუტატი, რომელიც თავის ვალდებულებას უღალატებს“. რაღა გავაგრძელო, პარიზის კრების დადგენილებამ ძალიან მასიამოვნა. ყველაზე უმეტესად პარიზში მე ის მომეწონა, რომ აქ ხალხს ძალიან კარგად შეუუგნია, რა უნდა და რას სჩადის.

საღამოობით სასახლეში მივიდოდი ხოლმე, რომელშიაც უგანათლებულესი თავადი ორღეანელი დგას და ყველას თავისუფლად შეუძლიან შესვლა. საშინელი: მოქეიფე კაცია, მაგრამ კარგი ისა სჭირს, რომ სხვებივით ფარისეველი არ არის: ღამე რომ სადმე დუქანში იქეიფოს ან უფრო უარეს ალაგას, მეორე დღეს ეკლესიისკენ არ მიეშურება და თუმნიან კელეპტარს არ ანთებს, რომ ცოდვა მოინანიოს და კვლავ საქეიფოდ გაეშუროს. ამბობენ სიესის და მირაბოსი ძალიან კარგი მეგობარიო. ამასვე ამბობენ პარიზში ქურდების შეგროვებას: საცა კი ქურდი იყო, ყველანი აქ დაიბარა და უბრძანა იქურდეთ, სძარცვეთ, რასაც მოასწრობთო. ძნელი წარმოსადგენია, რომ ეს მართალი იყოს, რადგან ამისთანა საშინელ ზამთარს და შიმშილს ქურდებიც თან ახლავან: შიანთ და ქურდობენ, სხვა საღსარი რომ არა აქვთ რა! რა დაბარება უნდა კალიას — მოდი და ყანას დაეციო?!

ასეა თუ ისე, დედოფალს და კარისკაცებს ჭირივითა სძულთ ორღეანელი და ამიტომ არის, რომ ხალხში ამდენი მეგობრები ჰყავს. მისი სასახლე ყოველთვის ღიაა და ყველას ნება აქვს ბაღში ისეირნოს. ბაღს ირგვლივ მშვენიერი მალაზიები და ყავახანები არ-

ტყია, იმისთანა მშვენიერი, რომ პარიზში უკეთესს ვერასა ნახავს კაცი. აქ, იმ ყავახანებში იკრიბება ყმაწვილკაცობა და ჟურნალ-გაზეთების თანამშრომლები და სრული თავისუფლებით სჯიან ყოველგვარ პოლიტიკურ კითხვებს; ბევრს ლაპარაკობენ, ბევრს ყაყა-ნებენ, თუმცა დიდს არაფერს არიგებენ; მთელი საღამო რომ იქ გაატაროთ, ისე შევა ყურში იმათი ნათქვამი და ისე გავა, როგორც ცხრილში წყალი და კიდევ რომ დარჩეს რამე, დიდი არაფერი დარჩება, რადგან ბზეს უფრო მეტს ასალებენ, ვიდრე ქერს. ორჯერ თუ სამჯერ დავესწარი იმათ ბაასს, სმენად ვიყავი გადაქცეული და გამოსვლისას გაკვირვებული ვეკითხებოდი ჩემს თავს: ნეტავი რა ილაპარაკეს-მეთქი? მაგრამ რაც უნდა იყოს, წმინდა წადილით არიან გატაცებულნი და, დამეთანხმებით, ესეც კარგია. გარდა ამისა, ზოგს იმათგანს ეტყობა, კარგი სიტყვა და გამჭრიახი გონება უნდა ჰქონდეს.

ბაღში დავსხედით და ერთი ბოთლი ღვინო მოვითხოვეთ. მკავე კოწმახი რაღაც მოგვიტანეს, მაგრამ იმდენი ფული გადაგვახდევინეს, რომ თავბედი ვიწყევლეთ. მეღუქნე დიდ ქირას იხდის და რა ქნას, ცდილობს მეტი გამოართვას თავის მუშტარასაო! სწორედ ბაზარი გვეგონებათ ეს სასახლე, მეტადრე ღამით, როდესაც ჩირაღდნებს აანთებენ ხოლმე. ისე ირევა ბაღში ხალხი, იტყვიან დღეობაა რამეო.

11 მაისს სადილის შემდეგ ისევ ვერსალისკენ გავემგზავრეთ. ოთხი დღის მგზავრობით სრულად კმაყოფილი ვიყავით და ამასთან დავრწმუნდით კიდევ, რომ პარიზის ხალხი მესამე წოდებისკენ იყო. ჩვენ ამის მეტი არა გვინდოდა რა.

12-ს დღის 9 საათზე ჩვენს ალაგას ვიყავით საერო კრების დარბაზში. და რადგან ჩვენგან ამორჩეულ პირთ გამოგვიცხადეს — ბევრი ვეცადეთ, მაგრამ თავადაზნაურთა და სასულიერო წოდების კრებათაგან ამორჩეულ კაცებთან ვერა გავაწყეთ რაო, — დავრწმუნდით, რომ სამარცხვინოთ გვატყუებდნენ და მარტო იმას ცდილობდნენ, რაც შეიძლება მეტი დრო გაეყვანათ. რასაკვირველია, მოვინდომეთ დაკარგული დროის სამაგიეროდ ახლა ავჩქარებულყოფით და იმავე კრებაზედ დავავალეთ ჩვენს თავმჯდომარეს და მის თანაშემწეებს დეპუტატების სია შეედგინათ. გარდა ამისა დავადგინეთ, რომ ყოველ კვირა დანიშნული იქნება კომისია, და იმას ექნება მინდობილი კრების წესიერების დაცვა, ხმების შეგროვება და დათვლა და ყოველი კითხვის შესახებ უმრავლესობის აღრიცხვა.

მეორე დღეს თავადაზნაურთაგან დეპუტაცია მოგვივიდა. შემო-

ეთვალათ. ჩვენ. თავადაზნაურთ, უკვე შევადგინეთ და გავხსენით კიდეც ჩვენი კრება, ამოვირჩიეთ თავმჯდომარე და მდივნები, და რამდენიმე დადგენილება კიდეც ჩავწერეთ განაჩენების დავთარში; სხვათა შორის ისიც დავადგინეთ, რომ ჩვენი წევრების უფლებას ჩვენი კრება შეამოწმებს სხვა წოდებათა კრებების დაუსწრებლად.

ერთი სიტყვით, ჩვენ უთქვენოდაც კარგადა ვართ, ნეტავი ვინა ყრიხართო?!

იმავე დღეს სამღვდლოებამ შეგვატყობინა: ამორჩეულ კაცებს მივანდეთ თავადაზნაურთა და მესამე წოდების კაცებთან მოელაპარაკნათ, რომ საერო კრების წევრთა უფლებანი ერთად შეგვემოწმებინა და სამი წოდებანი შეგვეერთებინათ.

დიდი კამათობა გამოიწვიეს ამ დეპუტაციებმა. ზოგნი ამტკიცებდნენ, კაცები ამოვირჩიოთ, როგორც სამღვდლოება გვითვლისო; ზოგნი გვთხოვდნენ გამოგვეცხადებინა, რომ საერო კრების კანონიერ წევრად ჩვენ მარტო იმას აღვიარებთ, რომლის უფლებანი შემოწმებულ იქნებიან სამივე წოდებათა კომისიისაგან; და ამიტომ ვთხოვთ ეკლესიის და თავადაზნაურთა წარმომადგენელთ კეთილინებონ და მობრძანდნენ საერო კრების დარბაზში, სადაც აგვრვა დღეა იმათღა ველით.

რადგან ძალიან ცხარე ბაასი ატყდა და კიდეც ბევრი თხოულობდნენ სიტყვას, მეორე დღესაც ამავე კითხვის სჯას შევუღდექით. რაბო დე სენტეტიენი, ტულუზელი დეპუტატი ვიგიე, რუენელი ვეჟილი ტურე, დოფინელი დეპუტატი ბარნავი, ლანგედოკელი ბუასი. დანგლა და ბევრი კიდეც სხვანი დიდი ნიჭით და მჭერმეტყველებით ამტკიცებდნენ, მეტადრე ბარნავი, თავ-თავის აზრებს. ზოგნი ამბობდნენ, გვეყო ამოდენა ლოდინი, დრო არის საქმეს შევუდგეთო! ზოგნი კი გვირჩევდნენ, მოიცადეთ, ცოტა დრო კიდეც მივცეთ თავადაზნაურთ და სასულიერო წოდებას, რომ სამეფოს მდგომარეობას დაუფიქრდნენო... თითქო იმოდენა ხანი არა კმაროდა, რომ საქმეს დაჰფიქრებოდნენ! ბოლოს კრების უმრავლესობამ რაბო დე სენტეტიენის წინადადება მიიღო და 16 კაცი ამოვირჩიეთ, რომ თავადაზნაურთა და სამღვდლოთაგან ამორჩეულ კაცებთან შეთანხმებულიყვნენ..

23 მაისს კრებაზედ წინადადება იქნა შემოტანილი, სარედაქციო კომისია ამოვირჩიოთ, რომელსაც მივანდოთ ასწეროს სუყველაფერი, რაც კი მოხდა საერო კრების პირველი დღიდან და რაც შემდეგში მოხდებოდა. ეს წინადადება არ მიიღო კრებამ, რადგან სიმართლით რომ აიწეროს თავადაზნაურთა და სასულიერო წოდების

თვალთმაქცობა, რომლითაც ცდილობენ ყველაფერში ხელი შეგვიშალონ, უფრო მეტად ააღელვებს ხალხს და ხალხის მოძრაობამ იქნება სულაც დაღუპოს ჩვენი განძრახვა:

22 და 23-ს ხმა დადიოდა, მეფეს სურს კრებას ერთი ახალი საშუალება წარუდგინოს, რომლითაც დიდი ვალის აღება შეიძლება. ამ ვალით ზარალსაც დაძვარავენ და ჩვენც პანდურს გვკრავენ, რადგან ჩვენ საჭირონი აღარ ვიქნებით. თანაც ხუმრობდნენ, ჩვენ რა, ჩვენს შვილებს და შვილიშვილებს დააწვევბათ კისერზედ ამ ვალის გადახდა! იმავე დროს პარიზისა და ვერსალის გარეშემო ჯარები იკრიბებოდნენ.

26 დავასრულეთ სჯა იმ წესებისა, რომლითაც უნდა ხელმძღვანელობდეს ყოველი წევრი ჩვენი კრებისა. იმავე კრებაზე გამოაცხადეს ჩვენმა ამორჩეულმა კაცებმა — თავადაზნაურთა კაცებთან შეთანხმება შეუძლებელია და, რასაკვირველია, ვერც ჩვენ შევთანხმდებოდით.

მეორე დღეს 27-ს, მირაბომ მოკლედ გამოხატა, რაც იმ დღეებში მოხდა და თავისი სიტყვა ასე დაამთავრა: „თავად-აზნაურთ არა ნებავთ შემოგვიერთდნენ, რომ ერთად შევამოწმოთ დეპუტატთა უფლებანი. ჩვენ გვინდა ერთად ვიყვნეთ სამივე წოდებანი. სასულიერო წოდება ცდილობს მოგვარიგოს როგორმე. იქნება დამეთანხმით: სამღვდელოებას ვაახლოთ დეპუტაცია, რიცხვით მრავალი და ყველასაგან პატივცემულ კაცთაგან შემდგარი დეპუტაცია, და ვთხოვთ ღვთისა და მშვიდობიანობის გულსათვის ნუ შესთრგუნავენ სიძარტლესა და საზოგადო საქმეს და ჩვენთან ერთად საერო კრების დარბაზში შეუდგნენ იმ წმინდა მონღობილების აღსრულებას, რომელიც ერმა მოგვანდო“.

უნდა იცოდეთ, რომ გარს ყოველთვის აუარებელი ხალხი გვახვევია. დარბაზი ხალხით არის გატენილი, სუყველანი სმენად არიან ვადაქცეულნი და თუ მოეწონათ ვისიმე სიტყვა, საშინელ ტაშის კერას ასტეხენ ხოლმე.

მირაბოს სიტყვა ისე მოიწონა ხალხმა და იმისთანა ტაშისკვრით დააჯილდოვა, რომ მეორე დღეს 28-ს ბრძანება გასცეს, ხალხს ნულარ მიუშვებენ კრების წევრებამდე. ჩვენ კიდევ მირაბოს სიტყვებისამებრ ამოვიჩიეთ დეპუტაცია და სამღვდელოებას ვაახლოთ.

იმავე დღეს მივიღეთ მეფის წერილი. ჩემს ცნობამდე მოაღწია, გვიბრძანებდა დიდებული მეფე, რომ სამს წოდებათა შორის რაღაც უთანხმოება მომხდარა დეპუტატების უფლებათა შემოწმების შესახებ. ძალიან ვწუხვარ და ვშიშობ კიდევ, რომ კრება, რომელსაც მე

საზოგადო სიკეთისათვის და სახელმწიფოს განახლებისთვის მოვე-
წოდე, ასეთ უსაქმურობას იჩენს.

ამ სამწუხარო გარემოებათა გამო იძულებული ვარ სამივე წოდე-
ბათაგან არჩეულ პირთ ვთხოვო კვლავ შეუდგნენ მოლაპარაკებას
მართლმსაჯულების მინისტრისა და რამდენიმე სხვა დიდებულის თა-
ნადასწრებით, რომელთაც მე თვითონ დავნიშნავ, რათა ყოველთვის
ქვეშარიტება მაცნობონ და მით გამიადვილონ სასურველი თანხმო-
ბის დამყარება.

ისე გვისაყვედურებდა დიდებული მეფე, თითქო საერო კრებას
უსაქმურობას და მთელი სამი კვირის დაკარგვას მარტოდმარტო
ჩვენ, მესამე წოდების დეპუტატებს გვაბრალებდა. გვისაყვედუ-
რებდა, თითქო ჩვენ ვიყავით ერთობის წინააღმდეგი და განზედ
ჩვენ ვიწვევდით.

ბალები თუ ვგონივართ მის დიდებულებას!

ბევრი სთქვეს მეფის წერილის წინააღმდეგ, მეტადრე კამუხსმა.
ბევრი იძახეს, ხელახლად დაწყება მოლაპარაკებისა უსარგებლო
იქნება, თავადაზნაურთ ვერას გავაგონებთო; ხალხის წარმომადგე-
ნელთ არ უნდა მიიღონ მეთვალყურედ მართლმსაჯულების მინისტ-
რი, რადგან ის ყოველთვის თავისებს მიემხრობაო! ბევრი იძახეს,
მეფისგან დანიშნულ დიდებულთა წინაშე ჩვენ ვერას გავარიგებთ,
რადგან იმათ წინაღვე გადაწყვეტილი აქვთ სამი წოდების განცალ-
კეებაო!...

კიდევ ბევრი რამა სთქვეს და ბევრნიც ვიყავით ამ აზრისა. თით-
ქმის ყველანი ვგრძნობდით, რომ მეფე თავის წერილით მახეს გვი-
გებდა, მაგრამ რას ვიზამდით? ყოველი საშუალება უნდა გვეხმარა,
რომ თანხმობა ჩამოგვეგდო სამ წოდებათა შორის, თორემ ჯერ ახ-
ლავ ყველაფერს ჩვენ გვაბრალებდნენ და მერმე ხომ უარესს გვიზამ-
დნენ; ამიტომ უმდაბლესი და უქვეშევრდომესი წერილით მადლობა
მოვახსენეთ დიდებულ მეფეს იმ ურიცხვ სიკეთისთვის, რომელსაც
იგი თავის ხალხისთვის არა ზოგავს და ვაცნობეთ, ჩვენ მიერ ამორ-
ჩეულნი მზად გახლავან კვლავ მოლაპარაკებას შეუდგნენო. მაგრამ
ორშაბათ დღეს, პირველ თიბათვეს ერთმა ჩვენ მიერ ამორჩეულთა-
განმა — რაბო დე სენტეტიენმა შეგვატყობინა, მინისტრი ნეკერი
გვირჩევს დეპუტატების უფლებათა შემოწმება სამივე წოდებამ
ცალ-ცალკე მოახდინეთ და თუ საექვო გარემოება იყოს რამე, მის
გარდასაწყვეტად მართებლობას მიმართეთო. ახლა კი დავრწმუნდ-
ებით, რომ სრულიად მართალს ამბობდა კამუხსი: თვით მეფე ეწინა-
აღმდეგება სამი წოდების შეერთებას; მეფესა ნებავეს სამად გაჰყოს
საერო კრება; თვით მეფეც თავადაზნაურთ და სასულიერო წოდებას

მიუღდა ხალხის საწინააღმდეგოდ და ჩვენ ღვთისა და ჩვენი თავის იმედითა უნდა გვექონდეს და სხვისი არავისიო!

მე ცარიელი ქვეშარიტება მოგახსენე, ჩემო ივანე, და ამედი მაქვს დამეთანხმები. ამ ამბავში სულ მეტი იქნებოდა მოხდენილი სიტყვები, რომლითაც ნაწერს ალაპაზებენ და ამშვენებენ. მე ჩვენს ამბავს მოგიტხრობ; მინდა ისე დაგიხატო ჩვენი ყოფა, რომ ჩვენებურმა სულ უკანასკნელმა გლებმაც კი გაიგოს — ვინა ყოფილა იმისი მტერი და ვინა ყოფილა იმისი მოკეთე. აქ სიტყვაკაზმული წერილი კი არა, საჭიროა სულ უბრალო, მარტივი აღწერა საქმისა. მოხდენილი სიტყვა რასაც არ აენებს აზრის სიმტკიცეს, არას არგებს.

ამაზე მარტივი განაღა იქნება რამე:

— თქვენ ცალ-ცალკე გნებავთ?

— ჩვენ ერთად ყოფნა გვინდა!

— თქვენ ჯარები შემოგვახვიეთ?

— ჩვენ კიდევ პარიზელები მოგვეშველებიან!

— თქვენ თოფ-იარაღის იმედი გაქვთ, ზარბაზნების, დაქირავებული უცხო ქვეყნელი ჯარებისა?

— ჩვენ ჩვენი უფლების მეტი არა გვაქვს რა, მაგრამ აღარ გვინდა თქვენი ყმობა და თქვენთვის შრომა! აღარ გაძლევთ ჩვენს ნაშუშევარს! ჩვენი ჩვენთვის გვინდა! თქვენ გგონიათ ჩვენზედ ღონიერნი ბრძანდებოდეთ? მაგასაც ვნახავთ!

აი, ჩვენი ისტორიის საფუძველი! მეტისმეტი მითქმა-მოთქმა რა საჭიროა, როდესაც სიმართლე აღარსად არის და უფლება ვეღარას გვშველის. იმათ უნდათ ყინულზედ გაგვაცურონ! მაგასაც ვნახავთ!

ჩაუკვირდით ჩვენს წადილს: ხარჯს ჩვენ ვიხდით... ჩვენ გვინდა ვიცოდეთ, რაში იხარჯება ჩვენი ფული? და უპირველესს ყოვლისა ჩვენ გვინდა, რაც შეიძლება, ნაკლები გადავიხადოთ.

ჩვენი შვილები ჯარში გყავთ... ჩვენ გვინდა გავიგოთ, ვინ არიან ჩვენი შვილების უფროსად? რად არიან ისინი უფროსად დანიშნულნი?

დაგიწესებიათ — თავადაზნაურნი და ხალხიო, ბატონები და ყმანიო! რად არის ეს განსხვავება? რით აღემატება ერთის შვილი მეორის შვილს? რით სჯობია ერთის შთამომავალი მეორისას? იქნება ისინი ღვთის შთამომავლობისანი იყვნენ და ჩვენ კი მხეცებისა? აი, თუ შეგიძლიანთ ეს აგვიხსენით.

და ახლა განვაგრძოთ.

თავადაზნაურთ ჯარის იმედი ჰქონდათ; უნდოდათ ძალით გაეტანათ თავისი და უარჰყვეს ყოველი ჩვენი წინადადება. 10 თიბათვეს შევიკრიბენი; და მოვისმინეთ ამორჩეულ კაცთა მოხსენება: თავად-

აზნაურობას ჩვენთან ერთად კრება არა სურსო. მირაბო იმ აზრისა იყო, რომ ხალხის წარმომადგენელთ მეტი ლოდინი აღარ შეუძლიათ: „ჩვენ ჩვენი მოვალეობა გვაქვს და დრო არის ამ მოვალეობის აღსრულებას შევუდგეთ. პარიზელთაგან დეპუტაცია მოგვივიდა, ერთი მათგანი სიტყვას ითხოვს. სურს ფრთად მნიშვნელოვანი და საყურადღებო წინადადება შემოიტანოს და კარგი იქნება, რომ კრება მოუსმენდეს“.

სიტყვას მღვდელი სიესი თხოულობდა. მ. სიესი სამხრეთ-საფრანგეთიდან არის, 40 — 45 წლისა იქნება; სუსტი ხმით ლაპარაკობს და ძალიან ცუდადაც, მაგრამ რასაც ამბობს, დიდ აზროვანს და დიდად სასარგებლოს ამბობს. ხომ განსოვთ, ამ სიესის წიგნაკები რამდენი გავასაღე; დიდი ღვაწლი დასდო ჩვენს ხალხს სიესმა ამ პატარა წიგნებით. აი, რა თქვა სიესმა, რომელსაც კრება სულგანაბული უსმენდა:

„მესამე წოდების წარმომადგენელთ მას შემდეგ, რაც საერო კრება დაიწყო, ერთ წამსაც არ დავიწყებიანთ სიმშვიდე და გულწრფელობა და რაც კი მათს ღირსებას არ დაამცირებდა. ყოველივე თავაზი და პატივისცემა გაუწიეს თავად-აზნაურთ და სასულიერო წოდებას. მერე რით გადაგვიხადეს იმათ ეს თავაზი და პატივისცემა? ფარისევლობით და დაფარული მტრობით! თუ კრებას ნებაგს თავის ამომჩვეელთაგან დავალებულს წმინდა მონდობილობას არ უღალატოს, დაუყოვნებლივ საქმეს უნდა შეუდგეს და მაშასადამე დეპუტატთა უფლებანი შეამოწმოს. თავადაზნაურნი უარს აცხადებენ? არ ნებავთ? ბრძანდებოდნენ! ერთი წოდება რომ უარს ამბობდეს წინსვლაზედ, განა სხვანიც უნდა გაჩერდნენ? სრულებითაც არა! ჩვენ ერთადერთი გზალა დაგვრჩენია: კრებამ ერთხელ კიდევ, უკანასკნელად, უნდა მოიწვიოს თავადაზნაურთა და სასულიერო წოდების წარმომადგენელნი თავის დარბაზში, რათა დეპუტატების უფლებათა შემოწმებას დაესწრნენ, დაეხმარნენ და დაემორჩილნენ; და თუ არ მობრძანდნენ, რა გაეწყობა? საერო კრება უიმათოდ უნდა შეუდგეს თავის წმინდა მოვალეობის აღსრულებას“.

კიდევ შევიკრიბებით იმავე დღეს 5-დგან 8 საათამდე. მღვდელი სიესის წინადადება მიღებულ იქმნა და გარდა ამისა დავადგინეთ: მეფეს უმდაბლესი მოხსენებით ვაცნობოთ საფუძველნი, რომელთაც გვაძულეს უკანასკნელი ჩვენი გადაწყვეტილება მიგვეღო.

პარასკევს, 12 თიბათვეს, უნდა შეგვეტყობინებინა ორთავე წოდებისთვის ჩვენი გადაწყვეტილება და მეფისთვის მოხსენება შეგვედგინა. ბ-ნ მალუმე წაგვიკითხა თავისი, წინადადეგ მომზადებული, ვაჟკაცური გრძნობით სავსე წერილი; მაგრამ იმისთანა ქებით და

დიდებით იხსენიებდა მეფეს, რომ იმ წერილის გაგზავნა შეუძლებლად დაეინახეთ. ვილნიემ მშვენიერი სიტყვა სთქვა ამგვარი ქება-დიდების და ხოტბის წინააღმდეგ. ვილნიე იერუსალიმსა ყოფილა, მთელი ეგვიპტე მოუვლია და ძალიან გამოცდილ კაცს ამბობენ. აი, რა თქვა: „ვერიდოთ დიდებულთა ქებას, რადგან იგი შედეგია სიხარბისაგან აღორძინებულის და აღზრდილის სულმდაბლობისა და პირმოთნობისა. ჩვენდა საუბედუროდ, სწორედ რომ თვალთმაქცობის და ფლიდობის ბუდეში ჩაგვაგდო ბედმა; თვით ჰაერიც კი, რომლითაც ვსუნთქავთ, გარყვნილი და გახრწნილი ჰაერია და გახრწნილებვე შეაქვს ჩვენს გულში. თვით ხალხის წარმომადგენელთაც კი შეჰპარვიათ ეს გარყვნილება და აგერ...“ ამგვარადვე განაგრძო თავისი სიტყვა და მალევე აღარა სთქვა რა.

ბოლოს დიდი კამათის შემდეგ, გადაწყვიტეთ, მეფისთვის დეპუტაციის ხელით მიგვერთმია ჩვენი მოხსენება, რომელიც ბარნავმა შეადგინა. შიგ დაწერილებით იყო აწერილი ყოველიფერი, რაც კი საერო კრების დაწყების შემდეგ მოხდა და ჩვენი უკანასკნელი გადაწყვეტილება. მაგრამ ჩვენი დეპუტატები დაბრუნდნენ და გვითხრეს, მეფე ვერა ვნახეთ, სანადიროდ წაბრძანებულაო! იმავე დროს თავადაზნაურთაგან მეორე დეპუტაცია მოგვივიდა: ჩვენი კრება თქვენს წინადადებას სინჯავს და გთხოვთ მის გადაწყვეტილებას დაელოდოთო. ამაზედ პარიზელი ხალხის დეპუტატმა ბ-ნმა ბაილიმ უბასუხა: „ბატონებო, მესამე წოდება დიდი ხანია თქვენს ლოდინში არის!“ კრებამ მეტი ლოდინი აღარ ინდომა, რადგან კარგად ხედავდა, რომ თავადაზნაურობა სულ იმის ცდაში იყო, რომ შევეფერებინეთ, რითიც კი შეიძლებოდა, და მაშინვე საქმეს შეუდგა: ბ-ნი ბაილი დროებითი თავმჯდომარედ აირჩია, მასვე მიანდო ორი მდივნის დასახელება, რომ განაჩენები ეწერათ და დაიწყო წარმომადგენლების დასახელება.

შვიდ საათზედ დავიწყეთ და ათი საათი შესრულდა, როდესაც ყოველი თემის დეპუტატები ჩამოვთვალეთ. შემდეგ ამისა ბ-ნმა თავმჯდომარემ ჩვენი კრება საერო კრებად გამოაცხადა. ჩვენს მოწინააღმდეგეთ ეგონათ მარტო მესამე წოდების კრებად გამოაცხადებენ თავიანთ კრებასაო, მაგრამ ვერ შევეუსრულეთ იმედი! ჩვენ საერო კრება შევადგინეთ და ისინი კი კერძო კრებებად ჩაერიცხეთ.

თავადაზნაურთა და წმინდა ეპისკოპოსთა ჯიუტობისა და მტრობის გამო ხუთი კვირა ტყუილად დავკარგეთ; მაგრამ შემდეგშიაც არ მოგვისვენეს და როგორც თქვენც დარწმუნდებით, ყოველი ღონისძიება იხმარეს, რომ ჩვენთვის ხელი შეეშალათ როგორმე.

რა გითხრათ იმ ცხარე კამათისა, რომელიც გამოიწვია ჩვენი

კრების სახელწოდებამ? მთელი სამი დღე ამას შევალე. მირაბო ამბობდა, ჩვენს კრებას — საფრანგეთის ხალხის წარმომადგენელნი ვუწოდოთ; მუნიე ამბობდა — კანონიერი კრებული ხალხის უმეტესი ნაწილის წარმომადგენელთაო; სიესი — საფრანგეთის ერის ცნობილთა და კანონიერად შემოწმებულ წარმომადგენელთ კრებულიო. მე რომ მკითხონ, არც აგრე თავს შევიწუხებდი ამისთვის და ძველს სახელს დავარქმევდი, ესე იგი საერო კრებას, რომელსაც ჩვენ უკვე ვხმარობდით. თავადაზნაურთ და სასულიერო წოდებას არა ნებავთ ამ კრებას დაესწონენ, ჩვენ რა? ეგ იმათი საქმეა! დაესწრებიან თუ არა, ჩვენ საერო კრებად ვართ მოწოდებულნი, რადგან საფრანგეთის ოთხმოცდა თექვსმეტი მეასედის წარმომადგენელნი შეადგენენ ჩვენს კრებას.

ბოლოს სიესმა კვლავ ითხოვა სიტყვა და თქვა, ჩვენს კრებას „საერო კრება“ ვუწოდოთო. ეს წინადადება ერთხმად მიღებული იქნა.

მაგრამ კარგი ის იყო, რომ მას შემდეგ, რაც 22 თიბათვეს ჩვენ ჩვენს გზას დავადექით, დღე არ გავიდოდა, რომ რამდენიმე მღვდელი არ მოგვმატებოდა; თავს ანებებდნენ სასულიერო წოდების კრებას, ჩვენთან მოდიოდნენ და თავიანთ უფლებათა შემოწმებასაც ჩვენა გვთხოვდნენ. 12-ს სამი პუატუელი მღვდელი შემოგვიერთდა; 14-ს კიდევ ექვსი; 15-ს ორი; 16-ს ექვსი და მერე უფრო მეტ-მეტი. წარმოიდგინეთ, რა სიხარულით მივეგებებოდით ჩვენ იმათ! გულში ჩავიკრავდით ხოლმე და ვკოცნიდით ერთმანეთს, თითქო დიდი ხნის გაყრილნი ძმანი კვლავ ერთმანეთს შეხვედრიანო. ჩვენი თავმჯდომარე კრების დროს უმეტესად იმათ ქებას და მადლობას უნდებოდა და თან სიხარულით თვალი ცრემლით ევსებოდა. პირველ ხანებში შემოერთებულ მღვდელთა შორის იყო მ. გრეგუარი; ბევრი წიგნი იმიყიდნია მე იმისთვის ს. ემბერშენილში. რომ დავინახე მომავალი, წინ გავეგებე, გულში ჩავიკარი და ვუჩუჩუღე:

— ძლივს, მამაო! ქრისტეს მაგალითს ნურვინ უღალატებს: ის არც დიდებულებთან დაიარებოდა, არც მღვდელმთავრებთან, არამედ მარტო ხალხთან.

მ. გრეგუარი იცინოდა. მეც წარმოვიდგინე, რა ცუდ გუნებაზედ უნდა ყოფილიყვნენ იქვე, მეორე დარბაზში, სასულიერო წოდების დეპუტატები და სიცილი წამსკდა. არა, სისულელე არ იქნებოდა ამ მღვდლებსაგან, რომ იმათ მისდგომოდნენ, ვისგანაც აგერ რამდენიმე საუკუნეა დამცირების და შეურაცხყოფის მეტი არა მოაგონდებათ რა? განა ხალხის გული ერთი და იგივე არ არის, ანაფორით

იქნება იგი დაფარული თუ გლენჯაკის დაგლეჯილი კონკებით? განა მღვდელი ხალხის შვილი არ არის?

17 თიბათვეს, ხუთ-ხუთ ათასზე მეტი კაცი დაგვეყურებდა, როცა საერო კრების წევრნი შევიფიცენით. დიდის გრძნობით თქვა ყველა ჩვენგანმა: „ვფიცავ, ერთგულად ავასრულო ჩემი ვალდებულებანი და რაც უნდა მომელოდეს, არ ვუღალატო ხალხის მონდობილობას“. ფიცი მივიღეთ, მერე საერო კრების თავმჯდომარედ იგივე ბაილი დავნიშნეთ და მაშინათვე, ერთხმად დავადგინეთ, რომ საერო კრება თანხმობას აცხადებს, „რომ ხალხს უკვე არსებული, თუმცა უსამართლოდ და კანონის წინააღმდეგ დაწესებული ხარჯი ერთმეგობრად მხოლოდ დროებით, ვიდრე კრება დაიშლებოდა. იმ დღიდან, როდესაც საერო კრება დაშლილი იქნება, რა მიზეზითაც უნდა იყოს იგი დაშლილი, ხარჯის გადახდაც შეწყდება მთელს საფრანგეთში“.

ამას კარგად დაუფიქრდი, ბატონო ივანე, და ეცადე ჩვენებურებასაც ყველას გააგებინო. ამოდენა ხანია ასე ვიტანჯებით და ჩვენი ტანჯვა იმის ბრალია, რომ უფიცი ვართ, მხდალნი ვართ და ქედმოხრილნი, ხმაამოუღებლად ვიხდით ხარჯს, რამდენიც კი უნდა მოგვთხოვონ! ხარჯს ვიხდით და ის ვერ გაგვიბედნია და ვერ გვითქვამს, რომ ხარჯი მარტო მაშინ არის კანონიერი, როდესაც ჩვენის წარმომადგენელთა კრებისაგან არის მიღებული. ფული სულია ომისა და ჩვენც ჩვენს ფულს ყოველთვის იმათ ვაძლევდით, ვინც კისერში თოკს გვიჭერდა. აბა ახლა გაბედონ და საერო კრება დაგვიშალონ! სულით ხორცამდე წამხდარი და დაღუპული იქნება, ვინც იმ დღიდან ხარჯს გაიღებს რასმე! ის უღალატებს ღედას, მამას, თავის ცოლ-შვილს და სამშობლოს! და ისინი, ვინც იმ დღიდან ხარჯის მოკრეფას მოინდომებენ, ფრანგებად კი არა, ისე იქნებიან მიღებულნი, როგორც კაცის მკვლელი ავაზაკები! ეს გახლავს პირველი პრინციპი, 1789 წლის საერო კრების მიერ აღიარებული.

კრება ხუთ საათზედ შევწყვიტეთ და იმავე საღამოს 7 საათზედ კვლავ შევიკრიბენით.

წარმოიდგინეთ როგორ დაიდრიჯებოდნენ მეფე-დედოფალი, უბრწყინვალესი თავადნი და კარისკაცი თავიანთ ეპისკოპოსებითურთ, როდესაც გაიგებდნენ, რომ ჩვენი გადაწყვეტილება უკვე გამოვაქვეყნეთ და მთელს საფრანგეთს ვაცნობთ! დილით კრების დროს შეატყობინეს ჩვენს თავმჯდომარეს ბ. ბაილის — სამდივნოში გიბარებენ, რომ მეფის წერილი მიიღოთო; მაგრამ კრებამ ნება არ მისცა თავის ალაგიდან დაძრულიყო. საღამოს კრებაზედ წაგვიკითხა

ბ-ნმა ბაილიმ ის წერილი: მეფე გვიბრძანებდა: არ მომწონს, რომ თავადაზნაურთ და სასულიერო წოდებას თქვენი კრება „წარჩინებულთ“ უწოდებს; რა საჭიროა მაგისთანა სიტყვები, რომელნიც ეწინააღმდეგებიან სასურველს თანხმობას სამივე წოდებისასო?...“ დიად, მეფეს სიტყვა არ მოსწონს! ის გარემოება, რომ ისინი მართლა ყველაფრით წარჩინებულნი არიან, მეფის აზრით, სრულიადაც არ ეწინააღმდეგება სასურველ თანხმობის ჩამოგდებას! მეფესა ნებავე ეს უთანასწორობაც დარჩეს და თანხმობაც ჩამოვარდეს!

აი, ჩემო ივანე, სწორედ ამას მოგახსენებდი წელანაც: სასახლეში უსამართლოება არ იციან, რადგან უსამართლოებას სამართალს უწოდებენ; იქ არც სულმდაბლობა იციან, რადგან სულმდაბლობას ქველობას უწოდებენ. რა პასუხი უნდა გვეთქვა იმ წერილზედ? მოვიმინეთ და ხმა არავის ამოუღია.

მეორე დღეს წირვას უნდა დავსწრებოდით. პარასკევს, 19 თიბათვეს, კრებამ ოთხი კომიტეტი დანიშნა. პირველს დაავალა სურსათის დამზადება; მეორეს — დეპუტატების უფლებათა შემოწმება; მესამეს — მიწერ-მოწერა და ბეჭდვა; მეოთხეს — რიგის მიცემა. ძლივს მოვაწყეთ ყველაფერი, იმედი მოგვეცა, რომ მალე მოვარაგებდით ჩვენს საქმეებს. მაგრამ სასახლეში თურმე სულ სხვა უნდოდათ, მით უფრო, რომ — სწორედ იმ საღამოს, ექვს საათზედ, გავიგეთ ეს ამბავი — ასორმოცდაცხრა წარმომადგენელს სასულიერო წოდებისას გამოეცხადებინა: უფლებათა შემოწმება მესამე წოდების დეპუტატებთან ერთად უნდა მოხდესო.

რა არ მოვიტმინეთ, რა არ ავიტანეთ, რომ ჩვენი ვალდებულება შეგვესრულებინა! გახარებულნი ვიყავით, ხმაამოუღებლივ ვითმენდით იმოდენა დამცირებას და შეურაცხყოფას! იმოდენა მედიდურ თავხედობას და ფარისევლობას! გულში მოვიკალით ბრაზი და აღშფოთება: დაე, რაც უნდა გვიყონ, ოღონდ საზოგადო საქმეს კი არა ევნოს რაო. მაგრამ რაკი ნახეს, რომ იმათმა ფლიდობამ და თინთლიბაზობამ ვერ გასჭრა, მოთმინებიდან ვერ გამოგვიყვანა და მახეში ვერსად გავება, სხვას, უფრო საზიზლარს და შემადრწუნებელ სალსარს მიმართეს.

20 თიბათვეს დაიწყეს ჩვენი დევნა.

დილიდანვე ქუჩა-ქუჩა დადიოდნენ ცხენოსანი ჯარჩები და მეფის ბრძანებას უცხადებდნენ ხალხს: მეფემ ინება საერო კრებას დაესწრას 22 თიბათვეს, ორშაბათს, და რადგან მისი დიდებულების მისაღებად სამივე დარბაზი შემკული უნდა იქმნას, სამთა წოდებათა კრებანი შეწყვეტილ არიან 22-მდე; და 22-ს კი მეფის ჯარჩები კვლავ გამოაცხადებენ, რომელ საათზე დაიწყება საერო კრება.

იმავე დროს გავიგეთ, რომ საერო კრების დარბაზი სასახლის შველ ჯარს დაეჭირა.

„ყველამ ვიგრძენით, რომ საერო კრება დიდ განსაცდელში იმყოფებოდა. ის იყო შვიდი საათი დაჰკრა და კიდევ შემოალეს კარი მ. იაკობმა და ჟერანმა. კრება დანიშნული იყო რვა საათზედ. საჩქაროდ ვისაუზმეთ და გადავწყვიტეთ, რაც შეიძლებოდა მაგრად ვოფილიყავით და გავგემაგრებინა ჩვენი თავმჯდომარე, რომელიც წარმოდგენდა ჩვენს ერთობას და, მაშასადამე, ჩვენს ძალას. სწორე ზოგახსენოთ, გულში ძალიანი შევუკურთხეთ იმათ, ვინც მთელი ერის წინააღმდეგობას ბედავდა. მეტი თავხედობაღა შეიძლება? თავისი დღენი სხვის ნამუშევართ უცხოვრიათ, და ასე ჰგონიათ საუკუნოდ ასე უნდა იყოსო. საკუთარი არც გამოცდილება აქვთ რამე, არც ნიჭი და მოხერხება, არც ადამიანური გრძნობა! თუ ჩვენზედ მეტნი არიან რითიმე, მხოლოდ იმიითი, რომ უვიცის, გულუბრყვილო ხალხის უცოდინარობით სარგებლობენ! ჩვენს ხალხს ოღონდ ოქრომკედით მორთული ლაქია დაანახვე, და ეგონება ციური არსება არისო; იმას ხომ არ იფიქრებს, რომ ეს ოქრომკედი და იმასთან ერთად ეს ძვირფასი ტანსაცმელი, ძვირფასი ეტლი და ცხენები ჩემი ოფლი და სისხლიაო! იმას ხომ არ იფიქრებს, რომ იმის უვიცობით უსარგებლიათ, ნაშრომ-ნადაგი ხელიდან გამოუცლიათ და ახლა თითონ იმასვე თვალს უყენებენ!

რაც შეეხება იმ გარემოებას, რომ საერო კრებას დარბაზის კარი დაუკეტეს, ეს იმისთანა სამარცხვინო საქციელად მიგვაჩნდა, რომ თვითონ ჩვენვე გვეცოდებოდა ამის მოქმედები.

ჩვენმა კეთილმა მეფემ ამ ამბებისა, რასაკვირველია, არა იცოდა რა. მეფის სათნოებითა და სიმშვიდით აღსავეს გული ასე როგორ დამდაბლდებოდა! ჩვენ ძველებურად ლოცვა-კურთხევით ვისხენივდით ჩვენს დიდებულს, კეთილს და თავმდაბალს მეფეს და ჩვენს მტრობას და სამარცხვინო საქციელს კარისკაცთა თავხედობას ვაბრალებდით.

რვა საათს 15 წუთიღა აკლდა, რომ გზას გავუღეკით. შორიდანვე დავინახეთ, რომ საერო კრების დარბაზის კართან ხალხის ასამდე წარმომადგენელი მოგროვილიყო, რომელთა შუა ჩვენი თავმჯდომარე ბ. ბაილი მოჩანდა. ჩვენი თავმჯდომარე აქამდე არაფრით განირჩეოდა სხვა დეპუტატთაგან და თუ თავმჯდომარედ ავირჩიეთ, მართო იმიტომ, რომ ამბობდნენ ძალიან სწავლული და პატიოსანი კაციაო. 50-55 წლისა იქნება, საკვირველი ჰკვიანი და მშვიდი სახას გამომეტყველება აქვს, აუჩქარებელი კაცია და სამაგალითო ზრდილობით ექცევა ყველას. დიდი ხანი ისმენს და უკვირდება საქმეს,

ვიდრე გადაწყვეტილებას დაადგება რასმე, მაგრამ რაკი გარდაწყვეტს, უთუოდ აასრულებს კიდევ.

აქეთ-იქიდან მესამე წოდების წარმომადგენელი მოდიოდნენ. ის იყო რვა საათი დაჰკრა და საერო კრების დარბაზსაც მივუახლოვდით; წინ ბ. ბაილი და მისი ორი მდივანი მიგვიძლოდნენ. კარებთან რამდენიმე „მეფის მცველი“ ჯარისკაცი იდგა. დაგვინახეს თუ არა, აქეთ მოდიანო, წინ ერთი უმფროსთაგანი მოგვაგებეს, რომელმაც მდაბლად სალამი მისცა ჩვენს თავმჯდომარეს. რაღაცა ცხარე ბაასი ატყდა მათ შორის, მაგრამ მე ძალიან შორს ვიყავ და ვერ გავიგე, რას ამბობდნენ. ის კი იყო, რომ გაგვაგებინეს — კარი დაკეტილიაო. ჩვენთან მოლაპარაკე ჯარის უფროსი დიდად ზრდილი იყო და ბოდიშს იმითი იხდიდა, ბრძანება მაქვს და უნდა ავასრულოო. თანდათან ბრაზი გვერეოდა. არ გასულა ოცი წუთი, რომ ყველანი მოგროვდნენ, ჩვენს კრებას აღარავინ აკლდა. და რადგან „მეფის მცველი“ ჯარის უფროსი ჩვენ დარბაზში არ გვიშვებდა, რამდენიმე დებუტატმა აღშფოთებით გამოაცხადა ამ საქციელის უკანონობა. ყველანი აღელვებულნი ვიყავით, ყველანი აღშფოთებულნი ვიყავით ამ შეურაცყოფით და ხმამაღლა გავიძახოდით ჩვენს სამღურავს; თან სასახლისკენ მივდიოდით. ზოგნი იძახდნენ, აქვე ცის ქვეშ სასახლის ფანჯრებთან გავხსნათ კრებაო! ზოგნი კიდევ უარეს გაიძახოდნენ: მეფესა ნებავს ერთმანეთს შეგვაბრძოლოს სამი წოდება, ძმათა სისხლი გვადვრევინოს, ქვეყანა დაარბიოს და დაღუპოს! მტარვალეები ჩვენს ქვეყანას სხვებიც ჰყოლია, ლუი მეთერთმეტე, რიშელიე და მაზარინი, მაგრამ ამისთანა უჯიათი და უღმერთო თავის ღღემი არავინ ჰყოლიაო!

მთელი ვერსალი ფეხზე იდგა. გარს გვეხვეოდნენ ყველანი, ქალი და კაცი და ისინი უფრო აღშფოთებულნი იყვნენ, თუმცა ხმას არ იღებდნენ.

ათ საათზედ ბ. ბაილი სადღაც წავიდა. ცოტა ხანს უკან სამი დებუტატი მოვიდა და გვითხრეს, ბაილიმ პოლიციელი მოხელეს თანადასწრებით საერო კრების დარბაზიდან ჩვენი კრების ქალაღები გამოიტანა და წმინდა ფრანსუას ქუჩაზე ერთი დიდი დარბაზი იქირავა, რომელშიაც ჩვენი კრება თავისუფლად მოთავსდება. ეს დარბაზი თითქმის ჩემი ბინის პირდაპირ არის და საბურთაოდ არის აგებული.

მაშინვე „საბურთაო“ დარბაზისკენ წავედით და იმოდენა ხალხიც თან აგვედევნა. შუაღლე იყო, როდესაც დარბაზში შევედით. ჩვენ იმისთანა შეურაცყოფა მოგვაყენეს, იმისთანა სილა გვკრეს, რომ ეტყობა თავადაზნაურთ და სასულიერო წოდებას ძველებური ბატონ-

კაცური ბრძანება გაუცია: პანლურო, მაგ...! და რაკი ეს გაბედეს, დარწმუნებული უნდა ვყოფილიყავით, რომ ამას არ გვაკმარებდნენ და ხვალ უარესს გვიზამდნენ. მაშასადამე, ყოველი ღონისძიება უნდა გვეხმარა არა მარტო ჩვენის ვალდებულების აღსასრულებლად არამედ თვით ჩვენი არსების დასაცავადაც. იმათ ხომ ძალის შეტეა არა სწამთ რა!... მართალი ის არის, ვინც გაიმარჯვებოს, არ იძაბოთი კანონი და რწმენა. ჩვენდა საბედნიეროდ, პარიზი ძალიან ახლოა და ეს აშინებთ, თორემ იქნება აქამდინაც ბოლო მოელოო ჩვენი კრებისთვის.

მაგრამ განვაგრძოთ.

საბურთაო დარბაზი — ერთი უზარმაზარი, თვალგაღუწვდენელი დარბაზია, თლილი ქვით მოკირწყალული; სინათლე პატარა ფანჯრებიდან შემოდის, ისე რომ უფრო ბნელია და არა ნათელი. ვიდრე უმთავრესს დარბაზში შევიდოდეს, კაცმა რამდენიმე რიგი ოთახი და გალერეია უნდა გაიაროს. ისე მჭიდროდ და საშვილიშვილოდ არის აგებული ეს შენობა, ისეთ გონივრულ გეგმაზედ არის მოთავსებული შიგ საბურთაო დარბაზი, რომ ერთობ ცხადია, ამ დიდი ხნის შენობას საბურთაოდ არ ააგებდა მისი პატრონი. დარბაზში, რასაკვირველია, არც სკამი მოიპოვებოდა, არც მაგიდა. იძულებული ვიყავით იქვე მეზობლებში გვეთხოვა. დარბაზის მოიჯარადრე — ერთი პაწაწკინტელა, თავგატვლეპილი კაცი, ძალიან ნასიამოვნები იყო. რომ საერო კრებამ პატივი სცა და თავისი სხდომა იმის დარბაზში დანიშნა. შუა დარბაზში მაგიდა დავდგით, გარშემო რამდენიმე სკამი შემოვურიგეთ და კრება კი ფეხზედ იდგა. გალერეია ხალხით გაივსო.

ბოლოს ბ. ბაილი სკამზედ ავიდა და მოკლედ მოაგონა კრებას, რაც კი იმ დღეებში მოხდა. მერე ცერემონიის გამგის — ბატონი დებრეზეს წერილები წაგვიკითხა, რომლითაც იგი თავხედურად უბრძანებდა ჩვენს თავმჯდომარეს — კრება შესწყვიტეთ, ვიდრე მეფის თანდასწრებითი სხდომა არ მოხდებაო. მეორე წერალიც ამასვე იმეორებდა, ოღონდ თან იმასაც დასძენდა, რომ ეს მეფის ბრძანებაა და უთუოდ უნდა ასრულებულ იქმნასო. დასასრულ ბ. ბაილიმ გვთხოვა განგვეხილა აწინდელი ჩვენი მდგომარეობა და გადაჭრით დაგვედგინა რამე.

განაღა საჭიროა, ბატონო ივანე, ავიწეროთ ჩვენი აღშფოთება? მარტო ჩვენ ხომ არა, ეს შეუარაცყოფა მთელს ერს ხვდებოდა! იმოდენა უჯიათობა არ იკმარეს და პანლურის ცემით გაგვრეკეს საერო კრების დარბაზიდან ერის წარმომადგენელი! ან ვის უნდა დარიდებოდნენ? ჩვენი მამა-პაპანი ყოველთვის დამონაგებული და დაჩაგრული ჰყოლიათ ქვეყნის მპყრობელ მეზატონეთ, რომელნიც საუ-

ქუნეთა განმავლობაში ჩვენი ჰირნახულითა ხარობდნენ და ჩვენს დამონავებასა ცდილობდნენ. გუშინ არ იყო თვით მეფემ წამოგვძახა, რომ საერო კრების მოწოდებით მან გააუქმა ყოველი განსხვავება, რომელიც არსებობდა ჩვენი ქვეყნის დიდებულ დამმარცხებელთა და მათ მიერ დამარცხებულ-დამონავებულთა შორისო! განა ცხადი არ არის, რომ არც მეფეს და არც დიდებულთ აზრადაც არ მოსვლით ამ განსხვავების გაუქმება და მარტო იმასა ცდილობენ, რომ ეშმაკობით და ფლირდობით წაგვიტყუონ და მარტო ჩვენ კი არა, ჩვენს შვილებსაც და შვილშვილებსაც კი საუკუნო მონობის დაღი დაასვან! ჰოდა, თუ კაცნი ვართ, თუ მართლად სულით ხორცამდე მონებად არ შევქნილვართ, და ცოტაც არის აღამიანური თავმოყვარეობა შეგვრჩენია, ყველაფერს გავწირავთ; და ჩვენი უფლების აღიარებას კი ვაიძულებთ ჩვენი ლაჩრობით გალადებულ მუქთახორა მებატონეებს!

იმდენ აღშფოთებულთა შორის მხოლოდ მუნიე იყო დამშვიდებული და განსაცდელიც მან აგვაცდინა თავის წინადადებით. მუნიემ ჯერ ისა სთქვა, რამდენად სამწუხაროა, რომ საერო კრების დარბაზში ჯარი იმყოფება და ჩვენ კი — საერო კრების წევრნი — სამარცხვინოდ ქუჩა-ქუჩა დავწიალებთ და მებატონეების და იმათი ლაქიების დასაცინავად გავმხდარვართო. რა გავწყობა, რათა არ შეგვეწყვიტა ჩვენი შრომა, იძულებულნი ვიყავით საბურთაო დარბაზში შევეკრებლიყავით; მაშ ნურავინ დაივიწყებს, რომ აქამდის თუ მალვით, ფარულად გემტრობდნენ ჩვენი მოწინააღმდეგენი, ახლა, ეტყობათ, აღარას გვერიდებიან და პირდაპირ გვცემენ, შიგ გულის გულში. ნურავინ დაივიწყებს, რომ ამის შემდეგ უფრო მეტს გვიზამს ჩვენი დაუცხრომელი მტერი, რომელიც არავითარ საშუალებას არ დაერიდება, ოღონდ კი ჩვენს კეთილ მეფეს ჩვენზედ გული ააყრევინოს და თავისი ერთგული ხალხის წარმომადგენელნი შეაძულოს. ამგვარ მდგომარეობაში ერის წარმომადგენელთ მხოლოდ ერთილა დარჩენიათ: ისინი უნდა შეუერთდნენ სამშობლოს კეთილდღეობას და წმინდა ფიციით უნდა შეუსისხლხორცონ თავიანთი სიცოცხლე საფრანგეთის სიცოცხლეს.

ვერ წარმოიდგენთ, რა რიგ გავგახარა ამ წინადადებათ! ხომ მოგხსენებათ, გაიძვერას ისე არაფრისა ეშინიან, როგორადაც პატიოსან კაცთა შეერთებისა.

განაჩენი ასე ჩავწერთ:

საერო კრებამ გაიხსენა რა, რომ იგი მოწოდებულია საფრანგეთის კონსტიტუციის შესადგენად და მით სამეფო წესწყობილების რიგზედ მოსაყვანად, რომლის აღსრულებას მას ვერავითარი დევნა

და შეურაცყოფა ვერ დაუშლის, რადგან დევნილი იგი იძულებული იქნება იქ იქონიოს თავისი კრება, სადაც შეკრებილ იქნებიან ერის წარმომადგენელი,

დაადგინა: საერო კრების ყველა წევრები შეიფიცებიან და წმინდა აღთქმას დასდებენ, რომ ერთმანეთს არ განშორდებიან და საერო კრებას შეადგენენ ყველგან, სადაც კი გარემოებანი ხელს შეუწყობენ იმ დრომდე, ვიდრე სამეფო კონსტიტუცია დადგენილ არ იქნება მჭიდრო და ურყეველ საფუძველზედ; გარდა ამისა, ზემომოხსენებულ აღთქმას და ფიცს ყოველი წევრი საერო კრებისა თავისი საკუთარი ხელის მოწერით შეამოწმებს.

ნეტავი იქ ყოფილიყავით, ბატონო ივანე! ნეტავი თქვენი თვალით გენახათ იმოდენი თვალგაუწვდენელი დარბაზი, შუაში დაღონებული, დაღვრემილი დეპუტატები, ირგვლივ სმენად გადაქცეული ხალხი... ვერ წარმოიდგენთ, რა სიხარულით მივეგებებით ყველანი ასე მოულოდნელს ჩვენს მხსნელს წინადადებას. თითქო იქექაო, ისე შეინძრა იქაურობა და ერთიერთმანეთს ახალა აღტაცებული ხალხი და ხალხზედ უფრო მეტად აღტაცებული დეპუტატები. ბ-ნი თავმჯდომარე კვლავ სკამზედ ავიდა და ისე წაგვიკითხა, რა სიტყვით უნდა შეგვეფიცა კრების დაუშლელიობა. სამარისებური სიჩუმით მოისმინა ხალხმა ეს ფიცი და მერე უცბად ერთხმად იგრიალა:

— ვფიცავთ, ვფიცავთ!...

მგონი რომ ჩვენი მრავალტანჯული მამა-პაპანი თავიანთ საფულავში უნდა შენძრეულიყვნენ იმ წამს. გულჩვილი არა ვარ, დემერტმან უწყის, მაგრამ ისე გამიყოლია იმ ნეტარმა აღტაცებამ, რომ ცრემლი მომერია. იმისთანას მგონი ჩემს დღეში ვერასა ვნახავ. მე ჩემს დღეში ვერ წარმოვიდგენდი, რომ ამისთანა ბედნიერი ვიქნებოდი და ამ დღეს შევესწრებოდი. მამა იაკობი ტაროდა; ვიკელი ეერარი სამარიდან ამოდებულსა ჰგავდა. ბოლოს ისე აგვიჩქროლდა ყველას გული, რომ ერთმანეთს მოვეხევიანთ და სიხარულისგან აჩქროლებული გული ისე დავიმშვიდეთ.

გარეთ მთელს ძველ ქალაქში საშინელი ყვირილი ისმოდა; მაშინ მომაგონდა სახარების სიტყვები, რომლითაც აწერილია იესოს სულის განტეგება. „დღემიწა შეინძრა და კრეტსაბმელი იგი ტაძრისა მის განიბო ორად ზეითგან ვიდრე ქვედმდე“.

როდესაც დავმშვიდდით და წესიერება ჩამოვარდა, ყველა ჩვენგანი რიგ-რიგით მივედით თავმჯდომარის მაგიდასთან, გავიმეორეთ ჩვენი ფიცი, რომელსაც მდივნები სიტყვასიტყვით სწერდნენ და ხელი მოვაწერეთ. ჩემს დღეში არსად მომიწერია ხელი ამისთანა სია-

მოვნებით. ვწერდი და თან სიხარულისაგან ცრემლი მდიოდა. ღმერთო, რა ბედნიერი დღე იყო!

მარტო ერთმა დეპუტატმა — მარტენ ღოშმა მოაწერა: წინაღმდეგი ვარო. ვალენტინი ძალიან გაიხარებს, როცა გაიგებს, რომ მარტო არა ყოფილა და საფრანგეთში ერთიც არის მაინც ამხანაგი ჰყოლია, ვალენტინივით ხალხის შვილი, რომელსაც თავის თავზედ და თავისავით საწყალ ხალხზედ უმეტესად დიდებულნი ჰყვარებოა.

რასაკვირველია, ღოშის წინააღმდეგობაც განაჩენში შეიტანეს და რადგან რამოდენიმე დეპუტატი ამბობდა, მეფეს დეპუტაცია ვაახლოთ, რათა ჩვენი გულითადი მწუხარება მოვახსენოთო და სხ. და სხ., კრება გადადებულ იქნა 22-ს ორშაბათამდე; ამასთანავე დავადგინეთ, რომ თუ მეფის თანდასწრებითი კრება საერო კრების დარბაზში მოხდა, მესამე წოდების წარმომადგენელი იქვე დარჩებიან კრების დახურვის შემდეგაც, რათა განიხილონ თავიანთო, ესე იგი ერის, საქმენი.

ექვსი საათი იყო, რომ დავიშალენით.

თ. არტუამ გაიგო თუ არა ეს ამბავი, ძალიან თურმე იუცხოვა ჩვენი მოხერხება და საბურთაო დარბაზში კრების მოხდენა და — აქაც მე უნდა გაჯობოთო — საბურთაო დარბაზი 22-ისთვის თვითონ დაიჭირავა: დროს გასატარებლად მინდა, ბურთაობა მომინდაო.

მეორე დღეს მეფის ბრძანება მოგვივიდა: კრება 22-ს კი არა 23-ს იქნებაო; ერთი სიტყვით, ყოველ ღონისძიებას ხმარობდნენ, ხავსსაც კი ეჭიდებოდნენ; თითქო ვერსალში საბურთაო დარბაზის გარდა სხვა დარბაზს ვერ ვიშოვიდით და იქ ვერ შევიკრიბებოდით. 22-ს რაკი საერო კრების და საბურთაო დარბაზის კარები ჩაკეტილი დაგვხვდა, საერო კრება ჯერ რეკოლლეს ეკლესიისკენ გაემართა, რომელმაც ვერ დაიტია ყველა წევრები და იქიდან წმ. ლუის ტაძრისკენ, სადაც მშვენივრად მოვთავსდით ყველანი.

რამდენს შემოგვიკურთხებდნენ თავადი არტუა და უბრწყინვალესი თავადები კონდე და კონტი, რომელთ ეშმაკობა ვერ გაუუოდათ? არა, ვინ წარმოიდგენდა, რომ საერო კრება იძულებული გახდებოდა წმინდა ტაძარს შეჰფარებოდა? ვინ წარმოიდგენდა, რომ სასულიერო წოდება, მიუხედავად მართებლობის დევნისა, ხალხის წარმომადგენელთ მიემხრობოდა? მე უფრო ის გამიკვირდა, რომ სასულიერო წოდება ნელ-ნელა ჩვენკენ იწევდა, თორემ დიდებულ მებატონეთაგან კარგი რამ გვჭირდეს, გიკვირდეს, აფი რა საკვირველია?! აგერ რამდენი საუკუნეა საქონელივით ქედ-მოხრილ მონებად ვყევართ და დღეს რაღა სიკეთეს დაგვაყრიან! თუმცა რომ დაუკვირდეს კაცი, მზის შუქივით ნათლად დაინახავს, რომ ჩვენი დამონაეება

ჩვენი უვიცობისა და უვარგისობისაგან იყო და დიდებულთ არას უნდა ვუსაყვედურებდეთ.

შუა ღღე იქნებოდა, როდესაც ბაილიმ გვითხრა, სასულიერო წოდების უმრავლესობა მობრძანდება ერის წარწონადგენელთა უფლებათა ჩვენთან ერთად შესამოწმებლად. სასახლეში ეს გადაწყვეტილება სასულიერო წოდებისა ჯერ ისევ 19-სა სკოლადათ და საერო კრების დარბაზი იმითმ თურმე დაგვიკეტეს, რომ ჩვენი და სასულიერო წოდების შეერთება არ მომხდარიყო. ამას ხომ არ იტყოდნენ და თავის გასამართლებლად ისა სთქვეს — მეფესა სურს სამივე წოდების საერთო კრებას დაესწრასო.

სასულიერო წოდება ჯერ გალავანში შეგროვდა, მერე ჩვენ შემოგვიერთდა თვით ეკლესიაში და აქაც ბევრს აუჩქროლდა სიხარულით გული. მღვდლებს ეპისკოპოსებიც წამოჰყოლოდნენ და სასულიერო წოდება თითქმის მთლად ჩვენთან იყო. თუმცა გვიან, მაგრამ ჰკუაზედ მოსულიყვნენ.

მარტო ერთ მღვდელს — მ. მორისს — ვენესსენელ ხარაზის შვილს თავის ღირსების დამცირებად ეცნა ხალხის წარმომადგენლებში გარევა და არ წამოჰყოლოდა უმრავლესობას. რამდენს საკვირველებას შეხვდება წუთისოფელში ადამიანი!

კრებამ მოისმინა რამდენიმე სიტყვა, რომლითაც შეერთებას ვულოცავდით ერთმანეთს: მერმე წაკითხულ იქნა უკვე დადგენილი გადაწყვეტილებანი და დაიშალა, რომ მეორე ღღეს სამშაბათს დილის 9 საათზე შეკრებილიყო საერო კრების დარბაზში.

აგერ 23-იც გათენდა, როდესაც თვით მეფე უნდა დასწრებოდა საერო კრებას.

გამომეღვიძა თუ არა, წამოვხტი და ფარდები გადავწიე; საშინელი დარი იდგა; ჯერ არა წვიმდა, მაგრამ მოქურუშებულ ცას თავბირი ჩამოსტიროდა. ქუჩები მაინც სავსე იყო ხალხით. ცოტა ხანს უკან ამოვიდა ჟერარი და მერე მამა იაკობიც, რადგან საუზმეს ჩემთან მიირთმევდნენ. საუკეთესო ტანისამოსი გვეცვა სამივეს, სწორედ ისე, როგორც იმ ღღეს ვიყავით, როდესაც მეფეს ვეახლენით. ნეტა რას უნდა მოასწავებდეს მეფის თანადასწრებითი კრება? — ვეკითხებოდით ერთმანეთს, — რა უნდა გამოგვიცხადონ? წუხელის ხმა გავარდა — მეფის მცველი და შვეიცარიელთა ჯარი სულ თოფ ქვეშ არის და მხოლოდ ბრძანებას-ლა ელისო. ამბობდნენ, ვერსალის ექვსი რაზმი კიდევ სხვა მოდისო. საუზმის დროს რამდენჯერმე აიარჩაირეს ჩვენს მიყრუებულ ქუჩაში მოდარაჯე რაზმებმა. ჟერარი იძახდა: რად უნდათ ჯარები, თუ სამეფოს ავს არას უქადიან? გარშემო ჯარებს შემოგვახვევენ და ვალის გადახდას ძალად გვაკისრე-

ბინებენ; მერმე მოგვდგებიან და პანლურის ცემით გაგვრეკავენ შინსკენაო.

მამა იაკობი სხვა აზრისა იყო: აგრე რომ მოგვექცნენ, ეგ იმის ღარი იქნება, რომ პირდაპირ გვითხრან, ან ფული გამოიღეთ, ან არა სიკვდილი ირჩიეთო! „მაგას თავის დღეში არ იკადრებს ჩვენი კეთილი მეფე, თუმცა, ღვთისა წინაშე, ძალიან პატივსა სცემს და ყოველს თხოვნას უსრულებს დედოფალს და თავად არტუას. მე ჩემს დღეში ვერ წარმოვიდგენ, რომ ჩვენმა კეთილმა მეფემ მაგისთანა მუხანათობა იკადროს...“ მეც ამავე აზრისა ვიყავი, მაგრამ რაც შეეხება იმას, თუ რა აზრით დანიშნეს მეფის თანადასწრებითი კრება, მაგისი კი არა ვინ რა ვიცოდით. განა არა, ვფიქრობდი, უნდა შეგვაშინონ-მეთქი, მაგრამ ამის თქმას ვერა ვბედავდი.

დაპკრა ცხრა საათი და გავეძგზავრენით კიდეც. ქუჩები ხალხით გაჰვდილი იყო და ამ ხალხში მიღო-მოდიოდნენ საომრად გამზადებული მოდარაჯე რაზმები. რაღაც აღელვება ეტყობოდა ყველას — მოქალაქეს, მუშას, ჯარისკაცს; ყველას რაღაცა უნდობლობა და მოუსვენრობა ეხატებოდა პირისახეზედ.

როგორც კი მივუახლოვდით საერო კრების დარბაზს, წინწყვლაც დაიწყო. ეტყობოდა, მალე შხაპუნა წვიმას დაუშვებდა. კარები ჯერ არ გაეღოთ და იქვე კარებთან შეგროვილიყვნენ მესამე წოდების წარმომადგენელი — ასზე მეტნი იქნებოდნენ; ჩვენთვის კარი დაკეტილი იყო, არ გვიშვებდნენ და სასულიერო წოდების და თავდაზნაურთა დეპუტატები კი თავისუფლად შედიოდნენ. მე რომ მივედი, სწორედ მაშინ გამოვიდა ვიღაცა ლაქია და გვითხრა: დარბაზში ქვემო ქუჩიდან შებრძანდით, რომ სივიწროვის გამო არეულობა არა მოხდესრაო.

ცერემონიის გამგე დე-ბრეზე პირველ დღეს საერო კრებისას იმდენს ეწვალა, ვიდრე ყველას თავ-თავის ალაგს დაგვისხამდა, რომ იძულებული შეიქმნა ეხლა ეს განკარგულება თავისად მოეხდინა, რათა ის წვალემა აღარ დასჭირებოდა.

ბრაზი გვერეოდა, სისხლი ყელში მოგვებჯინა, მაგრამ კოკისპარულადა წვიმდა და გავექანენით, რომ ქვემო ქუჩიდან მაინც შევსულიყავით დარბაზში; რასაკვირველია, დარწმუნებული ვიყავით, რომ კარი იქ მაინც ღია დაგვხვდებოდა. მაგრამ ჯერ თურმე ბატონს ცერემონიის გამგეს ორი წოდების წარმომადგენელი თავის გუნებისად ვერ დაებრძანებინა და ამიტომ არც ჩვენ გვიღებდა. კარი დაკეტილი დაგვიხვდა. იქვე ჩვენს მარცხნივ რაღაც ფიცრული იყო; იქ შევეფარენით და ველოდით, როდის გვადირსებენ დარბაზში შესვლას. ამ დროს კი სასულიერო წოდების და თავდაზნაურთა წარმომადგე-

ნელნი ამაყად და თავისუფლად შედიოდნენ უმთავრესი კარით. სხვა რომ ყოფილიყო ჩვენს ალაგას კიდევ ჰო, მაგრამ ჩვენ... აბა ჩვენ რას დაგვერიდებოდა მისი ბრწყინვალე ბატონი ცერემონიის გამგე? ან როსთვის ვიყავით ჩვენ მიწვეულნი? მარტო სახელისთვის — აი ხალხის წარმომადგენელნიც აქა ყოიანო, თორემ საქმით კი — ჩვენ რა სახსენებელი ვიყავით? არა, ჯერ ხალხი რა არის, რომ ხალხის წარმომადგენელნი რა უნდა ყოფილიყვნენ? რა არის მესამე წოდება? მყრალი ბრბო — ბატონის ყმად და მონად გაჩენილი!... ალბათ ასე ფიქრობდა ბატონი ცერემონიის გამგე. ჰოდა, თუ კი მე და ჩემსავით გლეხებს და უბრალო მოქალაქეთ ბრახისაგან თავი ვეღარ შეგვეკავებინა, წარმოიდგინეთ, რა ყოფაში იქნებოდა კეთილშობილი მირაბო. ჯერ ჩვენ ვერ აგვეტანა ეს შეურაცხყოფა მეფის ლაქიისაგან და მირაბო აიტანდა? თმა ყალყზე უდგა, თავით ფეხამდე თრთოდა. თან ისე წვიმდა, რომ წარღვნა გეგონებოდათ. ორჯერ მივიდა ჩვენი თავმჯდომარე და ორჯერვე უკან გამოისტუმრეს: ბატონს ცერემონიის გამგეს ჯერ თქვენზედ უკეთესებიც ბევრი ჰყავს და მათთვის შესაფერი ადგილი ვერ უპოვნიაო. ეს რომ ნახა, მირაბომ საშინელი ხმით მიმართა ბაილის:

— ბატონო თავმჯდომარე, წინ გაგვიძეხით ერის წარმომადგენელთ და მეფესთან მიგვიყვანეთ!

ბოლოს მესამედ მიუახლოვდა ბ. ბაილი კარს და დაარაკუნა. დებრეზემ იკადრა და თითონ გამობრძანდა; ეტყობოდა, უკვე გაეთავებინა თავისი ბრწყინვალე დანიშნულება. აბა სასახლის ერთგული მონა-მოსამსახურე ეს არის, აი, ჩემო ივანე! ჩვენმა თავმჯდომარემ გამოუტყხადა, რომ თუ ეხლავე კარი არ გაგვიღეთ, მესამე წოდების წარმომადგენელნი აღარ დაიცდიან და დაიშლებიანო. მაშინ კი გაგვიღეს კარი. დარბაზი ისევე მოერთოთ, როგორც პირველ დღეს იყო; თავად-აზნაურობის და სასულიერო წოდების სკამები ძვირფასი დეპუტატებით შეემკოთ; ჩვენ კი... ჩვენ წურწურით წყალი გვდიოდა. თავად-აზნაურნი და რამდენიმე ეპისკოპოსი იცინოდნენ: ეტყობოდათ სრული კმაყოფილნი იყვნენ, რომ ასე დამცირებულს გვხედავდნენ.

ძვირად დაუჯდებათ ეს დამცირება, ჩემო ივანე!

ის იყო, დაესხედით და დარბაზის მეორე მხარით მეფეც შემობრძანდა მშვენიერი ამალით, უბრწყინვალესი თავადებით და წარჩინებული სამხედრო კაცებით. ჩვენგანს ერთს არ წამოსცდენია — მეფეს გაუმარჯოსო! შემოვიდა, მოგვესალმა და ბრძანა: „მე მგონია, ჩემი ერთგული ხალხის კეთილდღეობისათვის ყოველი ღონისძიება ვიხმარე და ახლა თქვენ უნდა დაამთავროთ ჩემგან დაწყებული

საქმე: და რადგან აგერ ორი თვე სრულდება თქვენ იმის შესახებაც ვერ შეთანხმებულხართ, რაც თვით საქმეს კი არა, საქმის დასაწყისამდე უნდა გარიგებულიყო, ამიტომ მე მოვალე ვარ ეგ განყოფილება და უთანხმოება მოვსპო. ამიტომ გიცხადებთ ჩემს სურვილს...

ამის შემდეგ დაბრძანდა და ერთმა სახელმწიფო მდივანმა წაგვიკითხა მეფის სურვილი:

მუხლი 1. მეფესა სურს, რომ უწინდელი განყოფილება სამეფოსა სამსწოდებად ხელშეუხლებლად და უცვლელად დარჩეს და საერო კრებაც სამს კერძო კრებად იყოს განყოფილი. მეფე არავითარ კანონიერ მნიშვნელობას არ აძლევს მესამე წოდების კრებას ამ თვის 17-მდე და მის დადგენილებათ.

მუხლი 2. მეფეს კანონიერად მიაჩნია დეპუტატთა უფლებანი, ცალ-ცალკე იქმნებიან იგინი შემოწმებული, თუ არა; ოღონდ შედეგი ამ შემოწმებისა ცნობილ იქნეს სამივე წოდებისათვის.

მუხლი 3. მეფე უარჰყოფს და არღვევს ყოველ დადგენილებას, რომლითაც შევიწროებული იქნება დეპუტატის უფლებანი.

ხედავთ, სადა სცემს? მაშ ყოველს დეპუტატს შეუძლია, რაც უნდა, ის ჩაიდინოს! ათასობით და ათიათასობით საჩუქრები არიგოს სახელმწიფო ხაზინიდან, ხალხს ერთი-ათად გადამეტებული ხარჯი დაადვას და იმავე დროს იმავე ხალხს ყოველი უფლება მოუსპოს და სხვა და სხვა. ერთი სიტყვით, ისე იქცევოდეს, რომ ყურადღებასაც არ აქცევდეს იმ ვალდებულებას, რომელიც მას ამომრჩეველებმა მოანდეს.

მუხლი 4. თუ გაბედეს დეპუტატებმა და თავხედი ფიცი დაიდეს, ჩვენ ამომრჩეველთა მინდობილობას არ ვუღალატოთო, მეფე ნებას აძლევს — მისწერონ ამომრჩეველთ და სთხოვონ, რომ ამ ვალდებულებიდან განთავისუფლებულ იქნან; მაგრამ წასვლით კი ჯერ ვერსად წაველენ, რათა საერო კრების დადგენილება მათი თანდასწრებით უნდა მოხდეს და მით მნიშვნელობა გაუძლიერდეს.

მუხლი 5. მისი დიდებულება მეფე აცხადებს, რომ ამის შემდეგ საერო კრებაში აღარავის ექნება უფლება „სავალდებულო მინდობილობა“ მიიღოს თავის ამომრჩეველთაგან.

მაშ არა და! ეგ რომ არ აკრძალონ, ხომ საქვეყნოდ შერცხვებიან ის გაიძვერა დეპუტატები, რომელნიც კენჭით ვაჭრობენ.

შემდეგ ამისა მეფემ გვიბრძანა საქმის დაწყება ასე უნდაო: უპირველეს ყოვლისა ნუ შეეხებით სამი წოდების განსხვავებას და ურთიერთ შორის დამოკიდებულებას, რომელიც ჟამთა და საუკუნეთა განმავლობაში არსებობს და თვით ღმერთის დაწესებული არისო; ნუ შეეხებით სამეფო კონსტიტუციის შედგენას, მებატონეთა საკუთ-

რებას და თავადაზნაურთა და სასულიერო წოდების უფლებათ და სითან შეკავშირებულ უპირატესობასაო. გარდა ამისა, ამით გიცხალებთ, რომ ყოველ დადგენილებას, რომელიც კი სარწმუნოების, ესე იგი საეკლესიო და მონასტრების წესწყობილებას შეეხება, საქირაო სასულიერო წოდების თანხმობაცა ჰქონდეს, რათა კანონიერი ძალა მოლოსო.

რალა ბევრი გავაგრძელო, ჩემო ივანე, ჩვენ იქ მარტო იმიტომ ვიყავით მიწვეულნი, რომ ვალი გადაგვებადნა და დაგვედგინა, რომ „ხალხი თანახმაა სახელმწიფო ხაზინის ზარალი დაჰფაროს და ვალი გადაიხადოს“; სხვა ჩვენ არა გვეკითხებოდა-რა; სხვა სუყველაფერი კარგად იყო, და უცვლელად და ხელშეუხებლად უნდა დარჩენილიყო. ჩვენგან ფულის მეტი არა უნდოდათ რა.

ეს რომ წაიკითხა მდივანმა, ისევ მეფე წამოდგა და გვიბრძანა: სხვა მეფე თავის დღეში არავინ ყოფილა, რომ თავის ერის კეთილდღეობისათვის ჩემოდენი ეზრუნოს და ვინც თქვენგანი მხარს არ მომცემს, რომ ჩემი განზრახვა ავასრულო, ის არც ფრანგი ყოფილა და არც ერთგული მამულის შვილიო.

მერე ისევ დაბრძანდა. ახლა სხვა მდივანი წამოდგა და წაგვიკითხა მართებლობის განზრახვა ხარჯის მომატებისა და ხელახლად სახელმწიფო ვალის აღების შესახებ.

პირველიდან მარტო ის გამომდინარეობდა, რომ ხალხს ხარჯს უმატებდნენ, თუმცა ამ ხარჯს ხარჯად კი არ იხსენიებდნენ, სახელს უცვლიდნენ. დიად, ბატონო ივანე! მეფესა სურდა სახელი გამოეცვალა: უწინ რომ აბაზობით და უზალთუნობით გვეითვლიდნენ, ახლა მანეთობით დაგვითვლიან; უწინ რომ კარ-და-კარ დაიარებოდა ხარჯის ამკრეფი, ახლა თვით მამასახლისი მოაგროვებს ხარჯს და ხაზინაში წარადგენს. ხედავთ, როგორა ზრუნავენ ხალხის კეთილდღეობისათვის! განა ეს ხალხის ტვირთის შემსუბუქება არ არის?!

დიად, სხვა მეფე თავის დღეში არავინ ყოფილა, რომ თავის ერის კეთილდღეობისათვის ამოდენი ეზრუნოს!“

მეფეს ძალიან უნდოდა მწერლობის თავისუფლება, ოღონდ ცუდი მიმართულების გაზეთები და წიგნები კი არ დაბეჭდილიყო.

მეფეს ძალიან უნდოდა საერო კრების თანხმობა ახალი ვალების ასაღებად; ოღონდ იმ შემთხვევაში, თუ ომი ატყდებოდა, მეფეს ნებავდა საერო კრების თანხმობა ჰქონოდა ვალად ასი მილიონის აღებისა, საქმის დასაწყისად, „რადგან ჩვენი კეთილი მეფის ერთადერთი საზრუნავი ის არის, რომ საფრანგეთის ერის კეთილდღეობა თვით ერზედ იყოს დამოკიდებული და სხვა არავიზედ“.

მეფეს ძალიან უნდოდა ჩვენი თანხმობა გამოგვეცხადებინა აგ-

რეთვე იმ მრავალგვარ უპირატესობის შესახებ, რომელიც თავადაზნაურთ და სასულიერო წოდებასა აქვთ და რომლითაც, ჩვენსა საუბედუროდ, ასე სამარცხვინოდ სარგებლობენ.

ერთის სიტყვით, ერთი უბოლოვო დაუსრულებელი რაღაცა წაგვიკითხეს, რომელშიაც დომხალივით იყო არეული მთელი ქვეყნის საგნები და აზრები; წაგვიკითხეს და გვითხრეს: აბა, თქვენი აზრიც გაგვიზიარეთ, თუმცა ნუ დაივიწყებთ, რომ თქვენ რაც უნდა თქვათ, მეფე, თუ თქვენი არ მოიწონა, თავის სურვილისამებრ მოიქცევა და, რასაც მოისურვებს, იმას იზამსო. თქვენ მარტო ფული უნდა გამოძებნოთ და ვალი გადაიხადოთ... ამაში უპირატესობას არავინ შეგეცილებათ, რადგან ფულის გაღება თქვენს უპირატესობას შეადგენსო!

ბოლოს, ერთხელ კიდევ აბრძანდა მისი დიდებულება და გვიბრძანა:

— „ნუ დაივიწყებთ, ბატონებო, რომ არც ერთი თქვენი დადგენილება, არც ერთი თქვენი განაჩენი არ იქნება კანონიერად აღიარებული, ვიდრე მე ხელს არ მოვაწერ. ჩემი ერთგული ერის ბედ-იღბალი მარტო ჩემს ხელთ არის და თქვენი საქციელის ბუნებრივი პასუხისმგებელიც მარტო მე ვარ. იქნება სხვაგან ველარც კი შევხვდეთ სადმე იმ იშვიათ მოვლენას, რომ თვით მეფე ემუდარებოდეს თავის ქვეშევრდომთ — აბა, შეთანხმდით და ჩემი უხვი წყალობით ისარგებლეთო.

— მე გიბრძანებთ, ბატონებო, ახლავ დაუყოვნებლივ დაიშალნეთ და ხვალ დილით კვლავ შეიყარნეთ სამს კრებად. ცალ-ცალკე, სამივე წოდება თავთავიანთ დარბაზებში და განაგრძოთ თქვენი საქმენი“.

როგორც ხედავთ, ბატონო ივანე, აღარას დაგვერიდნენ და პირდაპირ გვითხრეს, თქვენგან ფულის მეტი არა გვინდა რაო. პარიზის პარლამენტს რომ არ გამოეცხადებინა, საუკუნეთა განმავლობაში რაც მართებლობამ ხალხს ხარჯი გადაახდევინა, სულ უკანონოდ გადაახდევინაო, მეფეს აზრადაც არ მოუვიდოდა საერო კრების მოწოდება. საერო კრება მოიწოდა — და დახე უბედურებას! — საერო კრება უფრო ჯიუტი და მავნე გამოდგა, ვიდრე პარლამენტი იყო. რა ქნან? ისე გვიტყვენ და გვიბრძანებენ, თითქო ამათი ლაქიები ვიყვნეთ. „მე გიბრძანებთ, ბატონებო, ეხლავ დაუყოვნებლივ დაიშალნეთ!..“

თავადაზნაურნი და ეპისკოპოსნი იმისთანა გესლიანი დაცივნით გვიყურებდნენ, თითქო დარწმუნებულნი იყვნენ, რომ მათ წინაშე თავს დავხრიდით და შერცხვენილნი გაპარვას დავაპირებდით. მაგრამ ჩვენ მით უფრო ამაყად ვისხედით ჩვენს ალაგას და გაბრაზებით შევცქეროდით ჩვენს მოწინააღმდეგეთ.

მეფეს ამის მეტი აღარა უთქვამს რა, ადგა და გაბრძანდა. თან გაჰყვა თავისი დიდებული ამაღა, თავადაზნაურთა წარმომადგენელი, თითქმის ყველა ეპისკოპოსები და რამდენიმე მღვდელი. ყველანი დარბაზის უმთავრესი კარით გავიდნენ.

ჩვენ კი დარბაზის უკანა კარით უნდა გავსულიყავით — აბა რა ღირსნი ვიყავით იქ გაგვევლო, სადაც თავადაზნაურობამ გაიარა?!. მაგრამ ადგილიდან არც ერთი არ დაძრულა. ვისხედით და გულში ბრაზს ვიგროვებდით.

ერთი თხუთმეტითღე წუთის შემდეგ მირაბო წამოდგა. ლომივით ამაყად აიღო მალა თავისი უშველებელი თავი, ცოფმორეულს თვალთაგან ნაპერწკლები სცვივოდა და თქვა:

— უნდა აღვიარო, ბატონებო, რომ რაც ეს არის ეხლა მოისმინეთ, გაჭირვებულ სამშობლოს უებარ წამლად გამოადგებოდა, მტარვალთა შიში რომ არა გექონდეს. მართლაცა და რა არის ეს ჩვენი სულთამხუთავი მართებლობა, თუ არ უსაზღვრო მტარვალობა? რა არის, რომ მთელს სამეფოში არავინ არად მოაჩნია და ყველას შემეუსვრას და შეგინებასა ბედავს? რა არის, რომ ჯარზედ და იარაღზედ დამყარებული, მთელი ერის წარმომადგენელთ ამისთანა თავგასულ ბრძანებას და შეურაცხებას გვიბედავს?..

გავშრით ყველანი, შიშით კანკალი დაგვაწყებინა. ყველანი ვხედავდით, რომ მირაბოს განწირული ჰქონდა თავი. თვითონაც კარგად ხედავდა, რა განსცდელში ჩავარდა, მაგრამ ბრაზისაგან თავი ვეღარ შეეკავებინა და სახეშეშლილი — მშვენიერი რამ იყო იმ წამს, თითქო თავს ნათელი ადგასო, რადგან ვინც თავის თავს გასწირავს და უსამართლობას გაუმკლავდება, მშვენიერი კი არა, ქვეყნად იმაზედ უმშვენიერესი სხვა არა იქნება რა! — ისე მკაფიოდ ამბობდა ყოველ სიტყვას, თითქო ბეჭედს ასვამსო:

— მერე ვინ არის ჩვენი მბრძანებელი? ვინ გვიწერს ამისთანა სამარცხვინო კანონებს? ის, ვინც ჩვენგან უნდა იყოს ამორჩეული! ის, ვინც ჩვენგან უნდა მიიღებდეს ბრძანებას, ბატონებო, რადგან მართო ჩვენა ვართ ერის უწმინდესი, ყველასაგან ხელზე უხებელი ნდობით და უფლებით აღჭურვილი წარმომადგენელი! დიაღ, ჩვენგან, რადგან მართო ჩვენგან მოელის 25 მილიონი ადამიანი შვებას და რაც უნდა სთქვან და ჰქმნან სამშობლოს მტრებმა, ხალხს შვება უნდა მიეცეს და მართო ჩვენგან უნდა მიეცეს!

ზარბაზნის ყუმბარასავით ხვდებოდა ყოველი სიტყვა დაფუტუ-

როებულ ტახტს, რომელზედაც განუსაზღვრელი უფლებებით აღ-
ქურვილი მეფე ბრძანდება!

„ვერა ხელავთ, რას სჩადიან? საერო კრების თავისუფლების
შეზღუდვას გვიქადიან! — გრგვინავდა კვლავ მირაბო. — საერო კრე-
ბას გარს ჯარები შემოარტყეს! — ჯარები?! მე რე ვის წინააღმდეგ?
იქნება სამშობლოს მტრები ვგონივართ?! ბატონებო, არ დაივიწყოთ,
რომ თქვენ ერისაგან მონიჭებული გაქვთ კანონმდებლობითი ძალა,
რომლითაც საჭიროებისადაგვარად უნდა ისარგებლოთ, თუ მოწადი-
ნებული ბრძანდებით — არ უმტყუვნოთ თქვენს ღირსებას და არ
უღალატოთ იმ წმინდა მოვალეობას, რომელიც ერმა მოგანდოთ.
არ დაივიწყოთ თქვენი ფიცი, ბატონებო, და არ დაიშალნეთ, ვიდრე
კონსტიტუცია არ შეადგინოთ“.

ვიდრე მირაბო თავის სიტყვას გაათავებდა, ცერემონიის გამგე,
რომელიც მეფეს გაჰყვა, უკანვე შემობრუნებულყო და ნელ-ნელა
გვიანლოვდებოდა. გაათავა თუ არა მირაბომ, იმან რაღაცა სთქვა,
სულ რამდენიმე სიტყვა, მაგრამ ისე ჩუმად, რომ ბევრმა ვერა გაა-
გო რა და აქეთ-იქიდან გაბრაზებით ყვირილი დაუწყეს:

— მაღლა! არა ისმის რა!

და იმანაც, როცა სიჩუმე ჩამოვარდა, მაღალი ხმით წარმოსთქვა:
— ბატონებო, მეფის ბრძანება ხომ გაიგონეთ?

მირაბო ჯერ ისევ ფეხზედ იდგა. ბრაზისა და ზიზღისაგან ტუჩე-
ბი უთრთოდა.

— დიად, ბატონებო, — მიუგო მირაბომ წყნარო კილოთი, სწო-
რედ ისე, როგორც დიდებულს შეშვენის, როდესაც ზემოდან თავის
შინაყმებს უბრძანებს რასმე, — დიად, ჩვენ მოვისმინეთ ყველაფერი
რაც კი მეფისთვის უთაუგონებიათ და, რადგან თქვენ არ შეგიძლი-
ანთ საერო კრების წინაშე მეფის სახელით წარსდგეთ, რადგან თქვენ
არავითარი უფლება არა გაქვთ აქ იყოთ და ლაპარაკობდეთ, მე-
ფის სიტყვას თქვენ არ უნდა მოგვაგონებდეთ“.

მერე წელში გასწორდა, თავით ფეხამდე თვალი გადაავლო ცე-
რემონიის გამგეს და განავრძო:

— მაგრამ რათა გამოურკვეველი არა დარჩეს რა და ტყუილად
დრო არ დაიკარგოს, ამით გიცხადებთ, რომ თუ ჩვენი განდევნა
თქვენ დაგავალეს, ჯარი უნდა მოიშველიოთ, თორემ ჩვენ აქედან
ფეხსაც არ მოვიცვლით, ვიდრე ჩვენზედ ძალას და იარაღს არ
იხმარებთ!“

ისე წამოდგა მთელი კრება, თითქო ერთი კაციაო და ერთხმად
შესძახა:

— დიად! დიად! ჩვენ არსად წავალთ!

საშინელი ხმაურობა ატყდა.

ცოტა ხანს უკან, როცა კრება დაწყნარდა, ჩვენმა თავმჯდომარემ მიმართა ცერემონიის გამგეს:

— გუშინ კრებამ დაადგინა, მეფის თანდასწრებითი კრება რომ გათავდებოდა, არ დაშლილიყო და თავის საქმეთა განსჯას შესდგომოდა. მე არ შემიძლიან კრება დაეშალო, ვიდრე ამას თვით კრება არ დაადგენს და ამის დასადგენად საჭიროა კრებას სრული თავისუფლებით შეეძლოს სჯა და ბაასი.

— შემიძლიან, ბატონო, ეგ პასუხი მეფეს მოვახსენო?

— დიად, ბატონო! — მიუგო თავმჯდომარემ.

ცერემონიის გამგე გავიდა. მართალი უნდა მოვახსენოთ, ბატონო ივანე, დიდ შიშში ვიყავით ყველანი, გვეგონა კინწისკვრით დაგვირეკვენო. მაგრამ ორი საათი რომ შესრულდა, ჩვენი განმდევნელი ჯარის მაგივრად, დარბაზში ღურგლები შემოვიდნენ და თითქო იქ არავინ არის, თითქო ჩვენ ვერც კი გვხედავენო, დაუწყეს ნგრევა იმ აივნებს, რომელიც მეფის მობრძანებისათვის დაემზადებინათ. ესეც დედოფლისა და თავადი არტუას ეშმაკობა იყო: ჯარის გამოგზავნა რომ ვერ გაბედეს, ღურგლები შემოგვისიეს და საშინელი ხმაურობა აგვიტეხეს, ამითი მაინც დაეუშალოთო. ამაზე უსაძაგლესი განაღა იქნება რამე?!

ხომ დარწმუნებული ბრძანდებით, რომ იმ ხმაურობას არავითარ ყურადღებას არ მივაქცევდით და ჩვენს ბაასს განვაგრძობდით. ისინი ჩაქუჩს და ხელეჩოებს არაკუნებდნენ, ჩვენ ჩვენსას ვამბობდით; იმისთანა მშვიდად და აუღელვებლივ ვიყავით ყველანი, რომ თვით ღურგლებმაც გაიკვირვეს, ცოტა ხანს უკან მუშაობას თავი დაანებეს, გარს შემოგვეხვივნენ და სმენად გადაიქცნენ. თავად არტუას რომ ენახა, რა გულმოდგინეთ ისმენდნენ ჩვენს სიტყვებს ღურგლები, რა ტაშით აჯილდოებდნენ მოლაპარაკეს, როცა იგი ვაჟკაცურად გოწვევდა დიდებულთაგან ფეხქვეშ გათელილ სიმართლის აღსადგენად, დარწმუნდებოდა, რომ ხალხი ისე უცოდინარი არა ყოფილა, როგორც ბევრსა ჰგონია.

ილაპარაკეს კამუსმა, ბარნავმა, სიესმა. სიესმა თავისი სიტყვა ასე დაამთავრა:

— ყურადღებასაც ნურას მიაქცევთ: თქვენ დღესაც იგივე ხართ, რაც გუშინ იყავით!

ხმები შეკრიბეს და აღმოჩნდა, რომ „ს ა ე რ ო კ რ ე ბ ა მ ე რ - თ ხ მ ა დ და ა დ გ ი ნ ა .. ა ქ ა მ დ ე და დ გ ე ნ ი ლ ი გ ა ნ ა ჩ ე - ნ ე ბ ი ს ი ს რ უ ლ ე შ ი მ ო ი ყ ვ ა ნ ო ს“. მაშინ კვლავ წამოიღა

მირაპო. უკვე დამშვდებულყო და თუმცა იცოდა, რომ დღევანდელს განსაცდელს იქნება ვერც კი გადაარჩენოდა, მაინც ძალიან მშვიდი კილოთი სთქვა:

— „ბატონებო, დალოცვილ იყოს თავისუფლება, რომელმაც ჩვენს კრებაში დღევანდელისთანა ძლიერი ნაყოფი გამოიღო. ვეცადნეთ მკიდრო საფუძველზედ დავამყაროთ ჩვენი საქმე — გამოვაცხადოთ, რომ საერო კრების წარმომადგენელი ყველასაგან ხელშეუხებელი უნდა იყოს. ეს შიში კი არ გახლავთ, მარტოდმარტო სიფთხილეა და დამეთანხმეთ, მარტო ამითი შეგვიძლიან აღვირი ამოვდოთ იმ ურცხვ მრჩეველთ, რომელნიც მეფეს გარს ხევიან“.

ეს წინადადება მიღებულ იქმნა 493 ხმით 34 წინააღმდეგ.

კრებამ შემდეგი განაჩენი მიიღო:

„საერო კრებამ დაადგინა, რომ ერის წარმომადგენელი ყველასაგან ხელშეუხებელ პირად არის აღიარებული; რომ ყოველი კერძო პირი, საზოგადოება, ან სასამართლო, რომელიც გაბედავს და სდევნის, დააპატიმრებს, დააპატიმრებინებს, ან დაამწყვდევს დეპუტატს კრებაზედ წარმოთქმული რაიმე აზრის, წინადადების, მოხსენების ან სიტყვისა გამო, როგორადაც ყოველი პირი, რომლის დახმარებით დეპუტატის ხელშეუხებლობა შებლალულ იქმნება, აღიარებულ იქნება ერის მტრად და მოლაღატედ და დასჯილი იქნება ერისადმი ღალატის კვალად. საერო კრებამ დაადგინა, რომ ამგვარ შემთხვევაში იგი ყოველგვარ ღონისძიებას იხმარს, რათა იპოვოს და ღირსეულად დასაჯოს ყოველი დამნაშავე ან დამნაშავის დამრიგებელი“.

ამის შემდეგ კრება დაიშალა საღამოს ექვს საათზე.

ახლა კი შიში აღარა ჰქონდა მირაპოს და არც ჩვენ. თუ შეფეები ყველასაგან ხელშეუხებლად ირიცხებიან, ეგ იმიტომ არის. რომ თითონვე დაუდვიათ კანონად, როგორც ჩვენ მოვიქვეცით, და კანონებაში ჩაუწერიათ. გული ერთობ დამშვიდებული აქვს კაცს, როდესაც იცის, რომ ვერავინ რას გაუბედავს, რომ გაბედონ და შეეხონ ვისმე ჩვენგანს, ერთი ბეწვი რომ ამოჰგლიჯონ თავიდან, მთელ საფრანგეთს ვაცნობებთ და ფეხზედ წამოვაცენებთ. თუ მართალი ვნებავთ, ჩვენ სწორედ ამ დადგენილებით უნდა დაგვეწყოს, მაგრამ რას იზამთ, რომ კარგი აზრები ერთად არ მოუვლენ კაცსა.

მგონი მმართველობამ კარგი ქნა, რომ მეტი არა გვიმუხტლა რა, თორემ 23-ს მთელი დღე ხალხით სავსე იყო ვერსალის ქუჩები და შემსვლელ-გამსვლელნი დაწვრილებით უზიდავდნენ ხალხს ჩვენს ამბებს. ხალხმა ყველაფერი იცოდა, რაც კი საერო კრებაზედ ხდებოდა; თითქმის ყოველ 15 წუთში კრების ამბავი მისდიოდა; ჩვენს

გასარეკად რომ ჯარი გამოეგზავნათ, იმოდენა ხალხი და მასთან მთელი ერი ჩვენცენ იქნებოდა.

იმავე დროს ხმა გავარდა ნეკყერი დაუთხოვნიათ და მის ალაგას თავადი არტუა დაუნიშნავთო. გამოაცხადა თუ არა თავმჯდომარემ კრების დახურვა, იგრიალა იმოდენა ხალხმა და სასახლისაკენ გაეშურა. მეფის მცველ ჯარს ბრძანება მისცეს — თოფები ესროლეთო, მაგრამ ჯარისკაცებმა ეს ვერ გაბედეს და ხალხი თავისუფლად შევიდა ნეკყერის სახლამდე და მარტო მაშინ დათანხმდა დაშლილიყო, როდესაც თვით ნეკყერისაგან გაიგო და დარწმუნდა, რომ ეს ხმები უსაფუძვლო ჭორები იყო.

პარიზში ხომ უფრო აღშფოთებული იყო ხალხი. მე მითხრეს: როდესაც ხმა გავარდა, რომ მეფემ გააუქმა საერო კრების დაღვენილებანი, გვეგონა მიწას ცეცხლი ეკიდება და მხოლოდ ნიშანსა ველოდით, რომ მართებლობისთვის იარაღით ხელში ბრძოლა აგვეტეხაო.

სწორედ ასეც იქნებოდა, რომ ჭკუაზედ არ მოსულიყვნენ, რადგან მიუხედავად დიდებულთა რჩევისა და დაქირავებულ გერმანულ და შვეიცარიულ ჯარებისა, რომელნიც საფრანგეთის ყოველი კუთხიდან პარიზში შეაგროვეს; მიუხედავად ზარბაზნებისა, რომლებიც დედოფლის საჯინიბოში დაალაგეს, სწორედ საერო კრების დარბაზის პირდაპირ და პირი ჩვენცენ გამოაშვერინეს ეს ჩვენი ფანჯრებიდან შშვენნივრდა ჩანდა; მიუხედავად იმისა, რომ თვით მეფემ გვიბრძანა სამ კრებად იყავით ცალ-ცალკეო, მეფემ თვითონვე მისწერა ბრძანება თავადაზნაურთა წარმომადგენელთ — ხალხის წარმომადგენელთ შეუერთდით საერო კრების დარბაზშიო და 30 თიბათეეს — მაშასადამე გუშინ ჩვენთან მობრძანდნენ „ჩ ვ ე ნ ი ქ ვ ე უ ნ ი ს დ ი დ ე ბ უ ლ დ ა მ მ ა რ ც ხ ე ბ ე ლ თ ა შ თ ა მ ო მ ა ვ ა ლ ნ ი“ და გვერდით მოგვისხდნენ ჩვენ „მ ა თ მ ი ე რ დ ა მ ა რ ც ხ ე ბ უ ლ -დ ა მ ო ნ ა ვ ე ბ უ ლ თ ა“ შთამომავალთ. ახლა კი აღარ იციონოდნენ, როგორც 23 დილით, როდესაც წვიმისაგან დასველებულნი შევედით საერო კრების დარბაზში და იმათ მასხარად აგვიგდეს.

აი, ჩემო ივანე, როგორ არის ჩვენი საქმეები: პირველ — შეტაკებაში გამარჯვებულნი ჩვენ დავრჩით! და ახლა კონსტიტუცია უნდა შევადგინოთ. დიდი და მძიმე საქმეა კონსტიტუციის შედგენა, მაგრამ დროსა და მეცადინეობას არ დავზოგავთ და ვეცდებით კარგად შევასრულოთ ჩვენი მოვალეობა. გარდა ამისა ხალხის საჭიროებათა აღმწერი რვეულები აქა გვაქვს და ისიც საკმარისი იქნება, თუ ამ რვეულებში გამოთქმული აზრებით ვიხელმძღვანელებთ.

კონსტიტუციას ხალხის სიკეთე უნდა ჰქონდეს საფუძვლად დადებული: გაუქმებულ უნდა იქმნას ყოველი უპირატესობა, რომლითაც აქამდე თავადაზნაურნი ტყავს გვაძობდნენ; გაუქმებულ უნდა იქმნას ყოველი საბაჟოები; სრული თანასწორობა უნდა იქმნას დამყარებული ხარჯის გაღებაში; სრულიად თანასწორნი უნდა ვიყვნეთ ყველანი კანონის წინაშე; შემოღებულ უნდა იქმნას პირადი ხელშეუხებლობა; ყველანი თანასწორად უნდა იქმნენ მიღებული სახელმწიფო სამსახურში; სასტიკად დაცული უნდა იქმნას საიდუმლოება წერილისა; კანონმდებლობითი ძალით მხოლოდ ერის წარმომადგენელნი უნდა იყვნენ აღკუთრებულნი; მართებლობის მოხელენი თავიანთ ნაშრომდარის პასუხის მგებელნი უნდა იყვნენ; კანონები, საზომი, სარწყავი და სასწორი ზომები ერთი და იგივე უნდა იყოს მთელს სამეფოში; სწავლა-განათლება და მართლმსაჯულება უსასყიდლო უნდა იყოს; მემკვიდრეობა თანასწორად უნდა იყოს განაწილებული შვილებ შორის. შემოღებულ უნდა იქმნას თავისუფლება ვაჭრობისა, მრეწველობისა და შრომისა. ერთი სიტყვით, ყველაფერი! ყველაფერი ნათლად უნდა იყოს განმარტებული და რიგზედ დაწყობილი, ადვილად გასაგები ენით, რომ სულ უკანასკნელ გლეხკაცსაც კი შეეძლოს შეიგნოს თავისი უფლებანი და ვალდებულებანი.

მერწმუნეთ, ჩემო კეთილო მეგობრებო, კაცობრიობას დიდ ხანს აღარ დაავიწყდება 1789 წელი.

დღეს ესეც კმარა. იქნება მოახერხოთ როგორმე და მანდაური ამბები შემატყობინოთ, რაც შეიძლება ადრე. ჩვენთვის ძალიან საჭიროა სოფლის ამბები. მიშელსა სთხოვეთ ჩემ მაგიერ, დღეში ერთი საათი შემომაწიოს, მუშაობის შემდეგ, და დაწვრილებით ამიწეროს ხოლმე სულ ყველაფერი, რაც კი ჩვენს სოფელში მოხდება ან მანდვე ახლო-მახლო სოფლებში; თვის გასულს მოაგროვოს თავისი ნაწერები და გამოვიგზავნოს. ამგვარად მე და თქვენ ყოველთვის ერთმანეთთან ვიქნებით, როგორც უწინ, და ერთმანეთთან განუწყვეტელი საუბარი გვექნება.

ყველას გაკოცებთ. მარგალიტამ სიყვარულით მოგიკითხათ და გთხოვათ არ დამივიწყოთო. თქვენს წერილამდის.

თქვენი ერთგული შოველი.

მანამ მე ამ წერილს ვკითხულობდი, ნათლიაჩემი, მამა ქრისტეფორე და იმისი ძმა მატერნი განცვიფრებულნი შესცქეროდნენ ერთმანეთს. ამ რამდენიმე თვის წინად რომ გაებედნა ვისმე და მეფე-დედოფლის ან ეპისკოპოსთა შესახებ ამგვარი ეთქვა რამე, საუ-

კუნოდ გამოასალმებდნენ თავის სამშობლოს. მაგრამ უცვლელი არა ყოფილარა ამ წუთისოფელში და რაც გუშინ მომაკვდინებელ ცოლვად ითვლებოდა, დღეს ყველასაგან აღიარებულ ჰქმმარტებად ხდება.

გავათავე წერილი, მაგრამ მსმენელნი ისევ ისე განცვიფრებულნი შესტკეროდნენ ერთმანეთს და ხმა ვერავის ამოედო. ბოლოს მაინც ნათლიაჩემმა დაარღვია სიჩუმე:

— რას იტყვი, მამაო ქრისტეფორე? როგორ მოგწონს ეს ამბები? ხედავ, რა დაუბრძობლად იწერება ჩვენი შოველი!

— დიად, ძალიან დაუბრძობლად იწერება, — უპასუხა მამა ქრისტეფორემ, და ეტყობა მესამე წოდებას დიდი ძალა და იმედი ჰქონია, რომ შოველი, ჩვენი ფთხილი შოველი, მაგისტანა წიგნსა გვწერს. მღვდლების შესახებ რასაც იწერება, სრული ჰქმმარტება. ჩვენ ხალხის შვილნი ვართ და საცა ხალხი იქნება, ჩვენც იქ ვიქნებით, ჩვენ ხალხს ვერ ვუღალატებთ. იესო ქრისტე ღმერთი იყო და ისიც კი ფარეხში დაიბადა, თავისი დღენი ღარიბთათვის და ღარიბთა შორს გაატარა და ღარიბთათვის ჯვარტმულ იქნა. განა რომ ის უნდა იყოს სამღვდელოების მაგალითი!

ჩვენი საჭიროებანი რომ ავწერეთ, — განაგრძო მ. ქრისტეფორემ, — ჩვენც, როგორც მესამე წოდებამ, ის სურვილი გამოვაცხადეთ, რომ საჭიროა კონსტიტუცია იქნას შემოღებული, რომლითაც კანონმდებლობითი უფლებით ერის წამომადგენელნი იქნებიან აღკურვილნი; კანონის წინაშე ყველანი თანასწორნი ვიქნებით; დამყარებული იქნება თავისუფლება ყოველი ჩვენგანისა; სასტიკად დასჯილი იქნება ყოველი დანაშაული მართებლობის მოხელისა და თვით სასულიერო პირისაც; პირველ დაწყებითი სწავლა-განათლება ყველასათვის სავალდებულო და ამასთან უსასყიდლო იქნება; მთელს სამეფოში ერთი და იგივე კანონები იქნება შემოღებული. აი, საწყალი მღვდლების სათხოვარი. დიდებულ თავადაზნაურთ სულ სხვა სათხოვარი შეიტანეს თავიანთ რვეულებით: ნება უბოძეთ ჩვენს მანდილოსნებს — საკუთრად კეთილშობილთათვის მიღებული ლენტებით დაიმშვენონ ტანსაცმელი, რომ მით განირჩეოდნენ უბრალო დედაკაცთაგანაო! დიდებულ თავადაზნაურთ ამის მეტი არა სდომებიათ რა და ხომ იცით, ვისაც თავისი გაჭირვება ვერ დაუნახავს, სხვისასაც ვერ დაინახავს. საკუთარი საქმეებისა რომ ვერა უზრუნიათ რა, ხალხისათვის რა უნდა იზრუნონ? იმათ რვეულებში ხალხის ხსენებაც არსად არის, რადგან, იმათი აზრით, ხალხი ყმად არის გაჩენილი და ყმას ხომ არც რამე უფლება აქვს; ხალხს მარტო იმ შემთხვევაში ახსენებენ, როდესაც ხარჯის გადახდაზედ არის ბა-

ასი. ჩვენი ეპისკოპოსებიც — თითქმის ყველანი დიდებულ თავადაზნაურთა შვილები — ასევე უყურებენ საწყალ ხალხს და ხალხისკენ მარტო ჩვენა ვართ, ხალხის შვილი მღვდლები. დღეს, მაშასადამე, სამად კი არა, ორ ნაწილად არის გაყოფილი საფრანგეთის ერი: არისტოკრატია და ხალხი, ესე იგი თავადაზნაურნი და უმაღლესი სასულიერო წოდება ერთ მხრივ და ხალხი და საწყალი მღვდლები მეორე მხრივ.

შოველი ყველაფერს მართალს ამბობს, მაგრამ ძალიან თავისუფლად ლაპარაკობს მეფე-დედოფალზედ და მეფის სახლობაზედ. დიდი, წმინდა რამ არის მეფე და მეფობა და სწორედ აქა ჩანს, რომ შოველი კალვინისტია, რომელსაც ჰგონია, ახლა კი ხელთ ვიგდე იმ მეფეთა შთამომავალი, რომელთაც ჩემი წინაპარნი აწამესო. ნუ წარმოიდგენთ, ბატონო ივანე, რომ შარლ მეცხრე, ლუი მეოთხმეტე და თვით ლუი მეხუთმეტე ისეთ სასტიკ დევნას დაუწყებდნენ კალვინისტებს მარტოდმარტო სარწმუნოებისა გამო! არა, მეფეებმა ხალხში გაავრცელეს ეს ხმა, რაკი იცოდნენ, რომ ხალხის მიმხრობა კალვინისტების წინააღმდეგ მხოლოდ სარწმუნოებით შეეძლოთ, რადგან ხალხს სხვაფრივ ვერაფრით გაიტაცებდნენ. დიად. ეგ მარტო ხალხის მისამხრობად სთქვეს — სარწმუნოების მტერნი არიანო, თორემ სარწმუნოებისა გამო კი არა, კალვინისტებს იმიტომ სდევნიდნენ, რომ სარწმუნოებრივი ქადაგების საშუალებით ისინი ცდილობდნენ იმისთანავე რესპუბლიკა დაედგინათ ჩვენში, როგორც შვეიცარიაში არის. ქ. ლაროშელში დაედოთ ბუდე და იქიდან მთელს საფრანგეთში ავრცელებდნენ თავიანთ აზრებს თავო სუფლები და თანასწორობისას. ხალხი მეფეებს მიემხრო და დარწმუნებული იყო, სარწმუნოების მტრებსა ველეტავთო; ნამდვილად კი მტარვალთ შევლოდა და თავისუფლების და თანასწოების წინასწარმეტყველთ ხოცავდა. ასე იყო, ჩემო ივანე. კალვინისტები სარწმუნოების მტრები კი არა, მეფეების მტრები იყვნენ, და შოველსაც კარგად ახსოვს ეს მტრობა. მე დარწმუნებული ვარ, რომ გულის სიღრმეში შოველსაც ეგვევ წადილი აქვს დაფარული და კიდევ ეგ არის საშიში: მანამდე სრულიად თანახმანი ვიქნებით შოველი და ჩვენ, და მანდ კი, მანდ ველარ მოვრიგდებით.

— მანდაც კარგად მოვრიგდებით, შეტყვირა ნათლიაჩემმა — არა რცხვენიათ, რომ ისე დაამცირეს ჩვენი წარმომადგენელნი! მთელა ხალხის წარმომადგენელნი! დაიცადონ! ამოდენა აღმართს დაღმართიც ექნებაო, ნათქვამია! ერთხელაც იქნება ძალა ჩვენკენ იქნება და მაშინ გვიფაზილდნენ!

— ეჰ, კარგი ერთი, ჩემო ივანე! უპასუხა მამა ქრისტეფორემ.

რომ იცოდნენ. რასაც სჩადიან, ხომ აღარც მაგრე სამარცხვინოდ მოიქცევოდნენ. ამპარტავნობამ დალუბა თვით სატანა და უფსკრულში შთააგდო იგი. ამპარტავნება ისე დააბრმავებს ხოლმე ეკს, რომ თავის ცხვირს იქით ველარას ხედავს, და საცა უსამართლო და სამარცხვინო არის რამე, სწორედ იქით მიჰყავს უბედური! ჩვენს მეფეს და დიდებულთაც ამპარტავნება ღუპავს, თორემ... სწორედ დღევანდელ დღეზედ არის ნათქვამი — უკანანი წინა და წინანი უკანაო! მარტო ღმერთმა იცის, რითი გათავდება ეს ყველაფერი. ჩვენ ჩვენი ჯვარი კეთილსინდისიერად ვზიდოთ, ძმანო, ამაზედ უკეთესი არა იქნება რა.

ყველანი გაჩუმებულნი უსმენდნენ.

მამა ქრისტეფორე და იმისი ძმა დაფიქრებული გაემარონენ შინისკენ.

სამშობლოს განსაცდელი

1792

I

მე უკვე მოგახსენეთ, რა გაჭირვებაში იყო ხალხი 1789 წლამდე და რამოდენა ხარჯი და ბეგარა გვედო გლეხკაცობას; მოგახსენეთ ნეკერის ანგარიში, რომლის წყალობით მთელმა ქვეყანამ გაიგო, რომ სახელმწიფო ხაზინას აუარებელი ზარალი ჰქონდა ყოველ წლივ; პარიზის პარლამენტის დადგენილება, რომელიც ამტკიცებდა, ხარჯის გაწერა მარტო საერო კრებას შეუძლია და სხვას არავისო; კალონის და დებრიენის ეშმაკობა და ფლიდობა, რომ ფულები ეშოვნათ როგორმე; თავადაზნაურთა და სასულიერო წოდების კრებების ახირება, ჩვენ არავითარ ხარჯს არ ვიკისრებთო; და ბოლოს, როდესაც ხსნა აღარსაით იყო, რადგან ან ვალი უნდა გადაეხადნათ, ან სახელმწიფო კოტრად უნდა გამოეცხადებინათ, საერო კრების მოწოდება ვერსალში. ას სამოცდათხუთმეტის წლის შემდეგ მას აქეთ, რაც უკანასკნელი საერო კრება ყოფილა.

ისიც მოგახსენეთ, რომ ჩვენს დეპუტატებს დაგვაღლეთ ბატონყმობა გადაეგდოთ და სრული თანასწორობა ჩამოეგდოთ ყველასათვის განურჩევლად შთამომავლობისა; უნდა გაეუქმებინათ ვაჭრობის შემაფერხებელი შინაგანი საბაჟოები, მეურნეობის შემაფერხებელი ღალა-კულუხი და გაუთავებელი ბეგარა; უნდა გადაეგდოთ სასამართლოებისგან ადამიანის წამება და სხვადასხვა. სამეფო წესწყობილება მეფეების ნებაყოფლობაზედ კი არა, ერთხელ დადგენილ კონსტიტუციაზედ უნდა დაემყარებინათ და შინ ისე წამოსულიყვნენ.

მაგრამ მეფემ საერო კრება თურმე იმიტომ დანიშნა. რომ ამ კრებას სასახლისა, მებატონეებისა და ეპისკოპოსთაგან შეკმული

ფულის გადახდა ეკისრა და მუხლ-მოდრეკით მოეხსენებინა: რა სა-
თქმელია, ბატონო, ოლონდ თქვენ ისიამოვნეთ, დრო გაატარეთ
და ვალის გადახდაზე ნუ ზრუნავთ, ჩვენ გადავიხდით, ჩვენ და ჩვე-
ნი შვილებიო! მაგრამ რაკი ნახეს, რომ ხალხის წარმომადგენელი
ამგვარი პასუხის მაგივრად, თვით დიდებულთა და ეპისკოპოსთა
უპირატესობას უარპყოფდნენ და გაუქმებას ცდილობდნენ, არ
ინდომეს მესამე წოდების დეპუტატებთან შეერთება და იმდენი
შეურაცხყოფა მიაყენეს, რომ გულზედ მოვიდნენ ჩვენი წარმომად-
გენელი, წამოიწიეს, შეიფიცნენ,—არ გავიყარნეთ, არ დავიშალ-
ნეთ, ვიდრე კონსტიტუციას არ შევადგენთო და თავიანთი კრება
საერო კრებად გამოაცხადეს.

ეს ყველაფერი შოველმა შეგვატყობინა და შოველის წერილი
ხომ თქვენც წაიკითხეთ.

იმ დროს ჩვენში ჯერ ისევ შიმშილი იდგა და უმეტესი ნაწილი
ისეთ გაჭირვებაში იყო, რომ მინდვრის ბალახითა ცხოვრობდა; ბა-
ლახს მოხარშავდნენ წყალში, ცოტა მარილს წააყრიდნენ და იმითი
ივსებდნენ კუქსა. კიდევ კარგი, რომ შეშა არ გვაკლდა; პარიზის
ამბები ელვასავით მოედებოდა ხოლმე მთელს ქვეყანას და ყველგან
შიშსა და სიფრთხილეს თესავდა. ტყის მცველები შინიდან გარეთ
ვეღარ გამოდიოდნენ, ტყეში ქურდებს არ წავაწყდეთო. საშინელე-
ბაა გამოუცნობი ამბის მოლოდინი! საშინელეობა ყველასთვის და უმ-
თავრესად იმ მოხელეებისათვის, რომელნიც აქამდე შიგ კრიჭაში უდ-
გნენ ვაჭირვებულ კაცს და სისხლსა სწოვდნენ, საცა კი მოასწრებდ-
ნენ; იმას ხომ არ იძახდნენ, მეფისაგან საკმარისი ჯამაგირი გვაქვს, ეს
ვიკმართო; არა, ჯამაგირს გარდა ხალხსაც ტყავს აძრობდნენ და მე-
ფისაგან მინიჭებულ უფლებას ფულზედ ჰყიდდნენ: ვინც მეტს
მისცემდა, ისინიც იმისკენ იყვნენ. სავერნში ყველა სამეფო მოხე-
ლე, რომელთა ხარისხი ხშირად მემკვიდრეობით გადადიოდა მამისა-
გან შვილზედ და შვილისშვილზედ, ერთ უძველეს სახლში ცხოვ-
რობდნენ; მოგეხსენებათ, ყველგან არის ამისთანა დაფუტუროვე-
ბული, დამპალი ხე, რომელშიაც დაიბუდებენ ხოლმე თავები. ერ-
თი რომ შეუბეროს ადამიანმა, იმ ხესაც წააქევეს და თავის მტრებ-
საც გაჰფანტავს, მაგრამ საქმეც ის არის, რომ ეს შებერვა ვერ გა-
უბედა. დიად, სამეფო მოხელეებიც გრძნობდნენ, რომ იმათი ბუდე
დღეს-ხვალ უნდა დაქეუულიყო და ისხდნენ შეშინებულნი და
ცალი თვალით გამოიციქირებოდნენ; ისე ეშინოდათ ხვალინდელისა,
რომ თმებსაც კი ვეღარ იკულულებდნენ და საქეიფოდ ტივოლიში
ვეღარ დაბრძანდებოდნენ.

ვერსალის ამბები მთელს ქვეყანას მოედო. ყველა იძახდა, დიდი

ამბები მოხდებოდა, მაგრამ რა უნდა ყოფილიყო ეს დიდი ამბები, არავინ იცოდა; ამბობდნენ, ჩვენ დეპუტატებს ჯარები თურქე შემოარტყეს, უნდა შეაშინონ და დაიყოლიონ; თუ არა და დახოცვას უპირებენო; ჩვენს ღუქანში გამვლელი და გამომვლელი სულ ვერსალის ამბებზე ლაპარაკობდა. ნათლიაჩემს კი არა სჯეროდა ეს ხმები და შეუტევდა ხოლმე:

— ნეტავ თქვენ თითონ კი გჯერათ, აგრე ადვილად რომ ამბობთ? იქნება გგონიათ, რომ ჩვენმა კეთილმა მეფემ მაგისტანა სამარცხვინო საქმე იკადროს რამე? თქვე კაი კაცებო და, თითონ მეფემ არ დაიბარა — ხალხის წარმომადგენელნი შეიკრიბნენ და ხალხის გაჭირვება მაცნობონ, რომ ჩემი ერთგული ქვეშევრდომებისთვის ვიზრუნოვო? განა აგრე ადვილად უნდა დაიჯეროთ, რასაც გაიგონებთ სადმე!

მაგრამ მსმენელნი სულ სხვა აზრისანი იყვნენ და გაბრაზებულნი პასუხსაც არ აძლევდნენ; რომ ველარას მოახერხებდნენ, ერთმანეთს გადახედავდნენ და ღრმად ჩაფიქრებულნი მიდიოდნენ შინისკენ; ნათლიაჩემი კი თავისას გაიძახოდა:

— ღმერთმა ნუ ქნას და, დედოფალმა და თავადმა არტუამ არა გვიმუხთლონ რა, თორემ ცუდად იქნება ჩვენი საქმე. ჩვენმა წარმომადგენელებმა მგონი ისე გაუჭირეს იმათ საქმე, რომ ყველაფერს იზამენ, ოღონდ გვაჯობონ როგორმე; რასაც არ მოიგებენ, რას წააგებენ, რომ წასაგები აღარა აქვთ რა! ღმერთმა კი დაგვიფაროს და, ჩვენში რომ შეტაკება მოხდეს, იქნება გათავებას ველარც ისინი მოესწრნენ და ველარც ჩვენა!

და მართლსაც ამბობდა: იმ დროინდელს არავის ღირსებია რევოლუციის გათავებამდე სიცოცხლე, არც კეთილშობილს, არც მოქალაქეს, არც გლეხს. რევოლუცია ჯერაც არ გათავებულია და მართო მაშინ გათავდება, როდესაც ძმობა, ერთობა და თავისუფლება გამეფდება ამ წუთისოფელში.

რამოდენიმე კვირა გავიდა: აქეთ-იქით ქერსა მკიდნენ, შიმშილის შიში აღარ იყო და ცოტა არ იყოს, დამშვილდა ხალხი; მაგრამ უცბად ხმა გავარდა, პარიზში ბრძოლა არის ატეხილიო: საერო კრების დაშლა უნდოდათ, ქალაქის გამგეობა აჯანყებულა მეფის წინააღმდეგ და მოქალაქეთათვის იარაღი დაურიგებია; მთელს ქალაქში, ყველა ქუჩებში ცხარედ იბრძვიან პარიზელები და უცხოელი, დაქირავებული ჯარებით. ამასთან იმასაც ამბობდნენ, მეფის მცველი ჯარი ხალხისკენ არისო.

ამ ამბებზე ჩვენი ნიკოს წერილი მოგვაგონდა და მაშინ დარწმუნდით, რომ სრულს სიმართლეს იწერებოდა.

ვინც კი ფალსბურგიდან მოდიოდა, ყველანი ერთხმად იმასვე

გაიძახოდნენ. ქალაქში მყოფ ჯარისთვის ებრძანებინათ, მზად იყავით, თქვენს ბინას არაეინ მოშორდეთო; ქალაქის სამოურავოში ყოველ საათს ახალ-ახალი ბრძანება მოდიოდა პარიზიდან. მიიტანდა შიკრიკი ამბავს, ისევე ცხენს მოახტებოდა და ახლა აღზასის გზას გაუდგებოდა. წარმოიდგინეთ, რა ყოფაში იქნებოდა ჩვენი მიყრუებული სოფელი! ღვთის წყალობა გქონდეთ, ჩვენ დღეს აღარა გაგვიკვირდეს რა და არაფერს შევეუშინდეთ! მაშინ კი ჯერ არც რევოლუციისა ვიცოდით რამე, არც აჯანყებისა და იმისთანა შეშინებულნი ვიყავით, თითქო ქვეყანას მტერი შემოსევიყო.

იმ დღეს ახალი აღარა მომხდარა რა, მაგრამ მეორე დღეს ამბავი მოვიდა, პარიზელებმა ბასტილიის ციხე აიღესო*). და ბასტილიის აღება იმას ნიშნავდა, რომ პარიზის ბატონად ხალხი გამხდარიყო. პარიზელები დაჰპატრონებოდნენ ყველაფერს, იარაღი და თოფის წამალი ეშოვნათ, ზარბაზნები ხელთ ეგდოთ და ისე განაგებდნენ პარიზის საქმეებს, როგორც ნებავდათ. საშინელი შთაბეჭდილება იქონია ამ ამბავმა ჩვენს მთიულებზედ. საჩქაროდ შეიარაღებულნი ყვნენ, ზოგს დაჟანგებული შუბი წამოედო, ზოგს ნაჰგალი და ორთითი და დაძრულიყვნენ! რაზმებად დაწყობილიყვნენ, მოდიოდნენ ქალაქისკენ და ყვიროდნენ:

- ლიქსეიმს წავიდეთ, ლქსეიმს!
- სავერნს!
- მარმუტიეს!
- ნიუვიერს!

კალისავეით მიესიენენ მთელს არეს და სადაც კი სახელმწიფო

*) ბასტილიის ციხე ხალხმა აიღო და დაანგრია 14 ივლისს 1790 წ. „იმ დღეს რევოლუცია იერიშით მივიდა თვითმპყრობელ მართებლობაზედ. ხალხისაგან თავის დღეში არაეინ ყოფილა დაპატიმრებული ბასტილიის ციხეში: იქ მარტო მწერლებს ამწყვედევდნენ. ბასტილია აზრის საპყრობილე იყო და როგორც კი წამოიწია ხალხმა, პირველად ამ ციხეს ეცა, რომ აზრი გაენთავისუფლებინა. თავისუფლება აზრისა, უშიშრად ყოფა ადამიანის ღირსებისა, აი შედეგი ხალხის აღდგომის პირველის დღისა. ბასტილიის აღება მთელმა ქვეყანამ ასე შეხედა.“

ქვეყანა აღტაცებით შეჰყურებდა იმ ხალხს, რომელმაც უწმინდესი გრძობით გატაცებულმა აზრის შეზღუდვა საკუთარ შეურაცხყოფად მიიღო და უპირველეს ყოვლისა ჯავრი იმათზედ იყარა, ვინც აზრს გზას უკრავდა. შემდეგ ამისა აზრმა თავისუფლება მოიხვეჭა და საცა აზროვანი იყო ეინმე, ყველა გრძობდა, პარიზელი ხალხი ჩემთვის იბრძოდაო. აი ამან მოუგო რევოლუციას კაცობრიობის გული. ბასტილიის აღება მთელი ქვეყნისთვის ადამიანის აზრის განთავისუფლება იყო.

ეს ბრწყინვალე დასაწყისი ყველამ შენიშნა: პარიზელების საქმე მთელი კაცობრიობის საქმედ იქცა და საფრანგეთის რევოლუცია ქვეყნიურ რევოლუციად. მთელმა კაცობრიობამ იღლესასწაულა 14 ივლისი“...

მოხელე ეგულებოდათ, საბაჟოზედ თუ ტყის მცველნი, ყველა აიკლეს და გააძაღვურეს.

ლეტუმიე, ჰურე, კოშარი და სხვა მოხუცებულნი მოვიდნენ ნათლიაჩემთან და ეხვეწებოდნენა, ჩვენც წავიდეთ, ქვეყანა თავისას არიგებს, ჩვენ უკან რად უნდა ჩამოვრჩეთო? თუ კი მიტტელბრონი, კატრვანი და ლუტცელბურგი წავა, ვითოდა ჩვენ რაღა ვართო!

ნათლიაჩემს არ მოსწონდა ეს მღელვარება ხალხისა და შეუტია:

— თავი დამანებთ! ჩემი საქმე არ არის! საცა გენებოთ, იქ მიბრძანდით, ოლონდ მე ნურაფერში გამრევთ!

მაგრამ მთელს აღზასში იგივე მოძრაობა იყო. სოფელი არსად იყო, რომ მახლობელს მონასტერს არ დასცემოდა და იქ შენახული სიგელები — თავად-აზნაურობის და მონასტრების უფლებათა და უპირატესობათა დამამტკიცებელი საბუთები — არ დაეწვა. რასაკვირველია, უკან ჩამორჩომა არც ჩვენებურებმა ინდომეს და მთელმა სოფელმა ერთხმად შესძახა ნათლიაჩემს: წინ წავგიძედ, ლიქს-პეიმს ტირსელინის მონასტერში შენახული ჩვენი სოფლის ქალაღები გვაშოვინეო! რას იზამდა, ჩაიცვა და გზას გავუღეკით. წინ ჩვენ მივდიოდით, კოშარი, ლეტუმიე, ჰურე, ნათლიაჩემი, მე და ჩვენ კადევ მთელი სოფელი მოგვდევდა.

ბუზივით ირეოდა ჩვენს ქვეით მინდორში შეიარაღებულნი ხალხი; თან იმისთანა ყვირილი ისმოდა, თბთქო მტერზედ საომრად მიდისო. ვისაც რა შესძლებოდა, ის წამოეღო. უმეტესობა ნამგლით და ორთითით წამოსულიყო. საშინელი ხმაურობა და ყიყინა იდგა. ვაჟკაცთ არც ქაღები ჩამორჩენოდნენ და ყველაზედ წინ ისინი გარბოდნენ ნამგლებით და ყველაზედ მეტად ისინი გაჰკიოდნენ.

მიტტელბრონიში ხალხს ის სახლი გაეტეხა, სადაც ქალაღები ინახებოდა, სარდაფის ჰერი აენგრია, ქვა ქვაზედ აღარ დაეტოვებინა და რაც კი საღმე ქალაღები ენახა, ცეცხლი წაეკიდებინა. ლიქს-პეიმი ისე აეოხრებინათ, რომ ჩვენ რომ შევედით, წელამღე დოშაკ-ბალიშიდან გამონაბერტყ ბუმბულში დავდიოდით. ყველაზედ მეტად ებრაელები დაეზარალებინათ: სულ ფანჯრებიდან გაღმოეყარათ იმ უბედურების სარჩო-საბაღებელი, და რაც ვერ გაღმოეგდოთ, ცულებით დაეჩეხათ. აღელვებული ხალხისთანა საშინელი ხომ არა იქნება რა! თუ ერთი მოთმინებიდან გამოვიდა, სრულიად აღარა მოაგონდება-რა და აღარც სარწმუნოებას დაერიღებოდა. აღარც ადამიანის განკიცხვას და სიბრაღულს და მარტო იმას და ცდილობს, რომ ჯავრი იყაროს და სისხლით გაძღეს.

დაფეთიანებულები მირბოდნენ ებრაელნი, სარჩო თუ დაეკარგეთ, თავს მაინც ვუშველოთო. უკან ცოლ-შვილი მისდევდათ, და იმისთანა ტირილი და ვაება ისმოდა, რომ მტერსაც კი შეებრალებოდა. ტირსელინის მონასტერი ძველ ლიქსპეიში იყო. მონასტერში ხუთი ბერი იმყოფებოდა და იმათა ჰქონდათ ჩაბარებული რამდენიმე სოფლის და მათ შორის ჩვენი სოფლის სიგელებიც.

ყველა სოფლები იქ იყვნენ, გარს შემოხვეოდნენ მონასტერს და საშინელი ხმით შესძახოდნენ! გავვიღეთ, ჩვენი ქალაღები მოგვეციოთ! მაგრამ ბერებს შეშინებოდათ, ვაი თუ ჯერ ქალაღები წაგვართვან, მერე ჩვენც დაგვხოცონო! და კარს არ უღებდნენ.

სოფლელები კი თან და თან უფრო მატულობდნენ და ისე დაეჭირათ ყველა ქუჩები, რომ მონასტრამდის აღარავის მიესვლებოდა.

ჩვენ რომ მივედით, იქ მყოფი სოფლების მამასახლისები აუზის გვერდით იდგნენ და თათბირი ჰქონდათ: ერთი ამბობდა ცეცხლი წაუეციდოთ და სულ გადავბუგოთ აქაურობაო; მეორე ამბობდა, კარები შევამტვრიოთ და ისე დავეპატრონოთ ჩვენს დამღუპველ სიგელებსაო; ზოგნი იძახდნენ, ჯერ ქალაღები ვთხოვოთ და როცა მოგვეცემენ და საშიში აღარა გვექნება, მაშინ ვნახავთ, მონასტერს რას ვუზამთო. ბოლოს შესამე აზრი მიიღეს და რადგან ივანე ლერუ სათემო კრების დებუტატად იყო არჩეული, იმას და ორს კიდევ სხვას მიანდეს მონასტერში შესვლა და სიგელების თხოვნა. მივიდნენ, დაარაკუნეს. ბერებმა რომ ნახეს სამნი არიანო, შეიყვანეს და კარი მაგრად ჩაკეტეს.

ნათლიაჩემმა შემდეგში გვიამბო, რაც მონასტერში მოჰხდარიყო: საბრალო ბერები კურდღელივით კანკალებდნენ და იმათი წინამძღვარი, ღრმად მოხუცებული მ. მარსელი იძახდა, ის სიგელები მე მაქვს ჩაბარებული და მანამ პირში სული მიდვას, იმათ არავის მივცემ... ჯერ მე მომკალით, და მერე სიგელები წაიღეთო! მაგრამ ნათლიაჩემს ღანჯარასთან მიეყვანა მოხუცებული წინამძღვარი და მოეხსენებინა:

— გადახედეთ, წმინდა მამაო, ხელავთ, როგორ ათამაშებენ ცულებს და ნამგლებს...

საბრალოს აღარა ეთქვა რა, ერთ მიყრუებულ ოთახში შეეყვანა, რკინით შეჭედილი კარი გაეღო, ემანდა თქვენი სიგელებიო! სავსე ბურმე იყო ქალაღებით ოთახი!

იმოდენა ქალაღებს გარჩევა არ უნდოდა?! ერთ საათზე მეტი იყო, რაც ნათლიაჩემი და ორი მამასახლისი მონასტერში შევიდნენ და ქალაღებს თურმე არჩევდნენ. ჩვენ კი გვეგონა, ჩვენი კაცები

დაიჭირეს და დააპატიმრესო. და იმოდენი ხალხი კარს მიაწვა და იმის-
თანა ხმით შეუტია, რომ ზრიალი გაჰქონდა იქაურობას. მაშინ აი-
ვანზე გამოვიდა ნათლიაჩემი და გახარებულმა ქალაღები დაგვა-
ნახვა: ნუ გეშინიანთ, ხელთა გვაქვსო! ხალხმა სიამოვნების ნიშ-
ნად ისეთი ყიჟინა დასცა, რომ მთელი ქალაქი შეინძრა. ერთმანეთს
გამარჯვებან ულოცავდნენ:

— ახლა კი აღარა გვიჭირს რა! ახლა კი ხელთა გვაქვს ჩვენი
დამღუპველი ქალაღები!

ცოტა ხანს უკან ჩვენი კაცებიც გამოვიდნენ მონასტრიდან; მო-
დიოდნენ და ერთ კარგ ურემს მოაგორებდნენ, სულ ქალაღებით
გაჭიკნულს; შიგ შუა ხალხში გაატარეს ურემი და ყველას იმას ეუ-
ბნებოდნენ, ჩვენ ჩვენი მოგვეცეს, ბერებს ნურას ერჩითო. ხალხსაც
მარტო ეს სიგელები უნდოდა, თორემ მოხუცებულ ბერებს რას
ერჩოდან?

ქალაქის სამამასახლისოში შეაგორეს ურემი და იქ გაარჩიეს ქა-
ლაღები; ყველა სოფელს თავისი მისცეს. ზოგმა იქვე მოედან-
ზედ გააჩაღა ცეცხლი და თავის სოფლის შესახები ქალაღები
ცეცხლს მისცა. მაგრამ ნათლიაჩემი ცოტა სხვაფრივ სჯიდა. ჩვე-
ნი სიგელები ხელსახოცში გამოეკრა და ისე ჰქონდა შენახული.
ამიტომ არის, რომ ჩვენს სოფელს არ დაეკარგა ის მცირე მამული,
რომელიც ჩვენს მამა-პაპას შეეძინა მებატონეთაგან: ცოტა რამ
საძოვარი გვქონდა სასოფლოდ და გარდა ამისა მუხნარში ყოველ-
თვის შეგვეძლო რკო მოგვეგროვებინა. რომ დაგვეწვა ქალაღები,
ხომ ამ უფლებასაც დაკარგავდით! სხვა სოფლებმა ბევრმა ჩაი-
დინა ეს შეცდომა, საკუთარი ხელით დასწვეს თავისი უფლებანი,
და თითონაც დაკარგეს და შვილი-შვილთაც დაუკარგეს ძველთაგან
შეძენილი საკუთრება.

იმ დროის ამბებს კიდევაც ბევრს მოგახსენებდით, რადგან ბე-
ვრმა ისარგებლა მაშინ ხალხის უცოდინარობით და იმის მაგი-
ვრად, რომ დაეწვა სიგელები, მიმაღა და შემდეგში ისევ მებატო-
ნეებს და ზოგი თვით მართებლობასაც მიჰყიდა. ძალიან გამდიდრ-
დნენ მაშინ ამის ჩამდენნი და ქვეყანამ იცოდა, რომ თავიანთი სი-
მდიდრე იმათ საზოვადოებისადმი ღალატით ჰქონდათ შეძენილი.
ღიად, ბევრს კიდევ სხვას მოგახსენებდით, მაგრამ იმათ დიდი ხა-
ნია თქვენი ჭირი წაიღეს და რაც იყო, იყო; დეე, იქ ღმერთმა ჰკი-
თხოთ!

დაკეშმარიტებით შეიძლება სთქვას კაცმა, რომ ორი კვირის
განმავლობაში სულ ძირიანად გამოიცივალა საფრანგეთი. რაც კი
მონასტრებს და მებატონეებს საკუთრება ჰქონდათ რამე, დაიწვა

და კომლივით გაქრა. დღე და ღამ შეუწყვეტლივ ისმოდა საყვირის ხმა და ჩვენი ვოხვის მთა თავით ბოლომდე ცეცხლის ალში იყო. ისე იწვოდა ძველი მონასტრები და სისხლით გაუმადლარ მებატონეთა, გამაგრებული ციხე-სიმაგრეები, თითქო წმინდა სანთელიაო. ხალხმა ხელთ იგდო თავისი მტარვალეები და, ღვთის წყალობა გაქვთ, ჯავრი იყარა მარიამობისთვის ოთხამდე დელავდა ხალხი და საცა კი თავის დიდი ხნის მტერი ეგულეზობდა, ერთი არ გადაჩენია; ოთხს კი, როდესაც საერო კრებაზედ ეპისკოპოსთ და თავადაზნაურთ გამოცხადებინათ — ჩვენ უარყოფთ ყოველგვარ ქონებრივს და შთამომავლობითს უპირატესობასაო, დღეის შემდეგ ყველანი თანასწორნი ვართო, დაცხრა ხალხი. მართალია, სრულიად მეტი იყო თავადაზნაურთაგან ეს უარყოფა, რადგან უარს რაზედ ამბობდნენ, რომ აღარა ჰქონდათ რა? თავადაზნაურობა თვით ხალხმა გააუქმა და არა იმათმა უარყოფამ; მაგრამ მაინც ასე სჯობიან, რადგან იმათი შთამომავლნი თავის დღეში ვერას წაგვედავებთან.

ერთი სიტყვით, ცეცხლითა და მახვილით განთავისუფლდა ხალხი ბატონყმობიდან. ძალით—ცეცხლით და მახვილით დაედვათ მისთვის უღელი და იმანაც ძალას მიმართა, რომ მონობის უღელი მოეხსნა როგორმე.

და მას შემდეგ, რაც საერო კრებამ თავად-აზნაურობა და ნათი უპირატესობანი გააუქმა, სამეფო კონსტიტუციის შედგენას შეუდგა. ისე გახარებოდა მეფეს კონსტიტუციის შედგენა, რომ საერო კრებას დასწრებოდა და. მიელოცა:

— სცდებით, ბატონებო, რომ აგრე უნდობლად მიყურებთ. მე ჯარები იმიტომ დავიბარე, მარსის მოედანზედ ათიათას კაცს თავი იმიტომ მოვუყარე და ზარბაზნები იმიტომ შემოგარტყით, რომ თქვენს დაცვას ვფიქრობდი. მეშინოდა, საერო კრებას არავინ ავნოს მეტი. მაგრამ რადგან თქვენ აგრე უნდობლად მექცევით და ჩემი ჯარების შევლა არა გნებავთ, რა გაეწყობა, საიდანაც მოსულან, იქითვე გავისტუმრებ.

ჩვენს დებუტატებსაც, რასაკვირველია, ისე უნდა ეჩვენებინათ თავი, ვითომ ძალიან სჯერათ მეფის ნაბრძანები. მაგრამ ხალხი რომ არ ამდგარიყო და ბასტილის ციხე არ აედო, უცხოელ ჯარებს რომ ეჯობნათ ხალხისთვის, ანდა მეფის მცველი ჯარები რომ ხალხის წინააღმდეგ გამდგარიყვნენ, მაშინ ჩვენი დიდებული მეფე სულ სხვას რამეს იტყოდა: დიდი გულთმისნობა კი არ არის საჭირო, რომ კაცმა წარმოიდგინოს, როგორ დატრიალდებოდა მაშინ საქმე. დიად, ჩვენი კეთილი მეფე ლუი მეთექვსმეტე სულ სხვა რამეს იტყოდა და ავ დღეს დააყენებდა ხალხის წარმომადგენელთ!

ჩვენდა საბედნიეროდ, საქმე ისე დატრიალდა, რომ გამარჯვებული ხალხი დარჩა! პარიზის სამამსახლისომ მაშინვე თავისი საკუთარი „ერის მცველი ჯარი“ შეადგინა და ამ მაგალითმა ისე გაიტაცა ყველა სამამსახლისოები, რომ ყველგან, სულ გადაკარგულ უმცირეს სოფელშიც კი, ხალხმა საკუთარი, თავისი მომხრე ჯარები შეადგინა, იარაღი იშოვნა, და ასე გამაგრებული ემუქრებოდა ებსკოპოსთ და თავად-აზნაურთ: აი, აქ არა ვართ? მობრძანდით, თუ თავი არ მოგძულეზბიათ, და ქედს ძველი უღელი დაგვადგიოთ! საერო კრება რომ სასარგებლოს დაადგენდა რასმე, მთელი საფრანგეთი აღმოსავლეთით დასავლეთამდე იარაღს იღებდა და ერთხმად გაიძახოდა: *

— საერო კრების დადგენილება ეხლავე შევასრულოთ! რაც აღრე გარიგდება საქმე, ისა სჯობიან! აბა, ხალხო, რაღას უყურებთ!

და სისრულეში მოყავდათ ყოველი დადგენილება.

რა სიამოვნებით მაგონდება ჩვენს სოფელში მილიციის შედგენა. მილიციას იმიტომ მოგახსენებთ, რომ თავდაპირველად ერის მცველ ჯარს მილიციას უძახდნენ. ჩვენი სოფლის მილიცია 1789 წ. მარიამობისთვეში შევადგინეთ და იმ დღეს უფრო მხიარულად ვიყავით, ვიდრე მაშინ, როცა ხალხის წარმომადგენელთ ვირჩევდით. ნათლიაჩემი ჯარის წინამძღოლად აირჩიეს, ლეტუმდე იმის თანაშემწედ, გოტიე კურტუა უფროს ათის თავად და სხვა და სხვა. კაპიტანი არ გვყავდა, რადგან ჩვენმა სოფელმა საკაპიტნო რაზმის ნახევარიც ძლივს გამოიყვანა.

უნდა გენახათ, რა ამბავი იყო იმ დღეს ჩვენს სოფელში ისეთი გრიალი გაჰქონდა ხალხის ძახილს—„თავისუფალ ერს გაუმარჯოსო“, რომ მეორედ მოსვლა გეგონებოდათ. და რადგან ყოველ საქმეს დალოცვა უნდა და პატიოსანი კაცი მარტო ღვინით დაილოცება, ისეთი სმა გაჩაღდა ნათლიაჩემთან, რომ თქვენი მოწონებულის ნათლიაჩემს ეპოლეტები გაეკეთებინა, უღვაში ყურებზედ შემოეხვია და მართლაც სამაგალითო ოფიცრის შეხედულება ჰქონდა. მართალია, ძვირად დაუჯდა ეს ოფიცრობა: ორი ქოცო საუკეთესო წითელი ღვინო დახარჯა იმ დღეს, მაგრამ ეგ რა სახსენებელია? ის დღე იყო და ისა—ლეტუმდე ისე უვლიდა თავის უღვაშებს, თითქო იმაზედ უკეთესი სხვა აღარა აბადია რაო. მერე უღვაში უღვაშს მაინც ჰგვანებოდა! გაფხვერილი, გაშეშებული რაღაცა ესხა ტუჩზედ; რომ შეგეხდნათ, მელის მოგაგონებდათ. ფანე რუს ნაღარა ჩავაბარეთ და ისე კარგად უკრავდა ყოველგვარ მარშს, თითქო თავისი დღენი ჯარში დაბერებულაო. ყველამ ვიცოდით,

რომ ივანე რუ კარგი მესტიერე იყო, მაგრამ ის კი არააინ იცოდდა, რომ ნალარასაც ასე კარგად დაუქრავდა.

არსენალიდან თოფები გამოვიტანეთ. ძველისძველი თოფები იყო, დაჯანგებული და დაზიანებული, მაგრამ მაინც თოფები იყო და შუბებიც ზედა ჰქონდა. კარგია თუ ავიაო... ჩვენც კარგად შევიფერეთ ჩვენი თოფები და ისე მშვენიერად ვხმარობდით, რომ ჯარში ნამყოფ გავარჯიშებულთ არ ჩამოუყვარდებოდით. ქალაქიდან რამდენიმე კაცი ამოვიყვანეთ მოხუცებული ათისთაგები და სამხედრო სიარულს და იარაღის ხმარებას ისინი გვასწავლიდნენ კვირა დღეს, წირვა რომ გამოვიდოდა.

ნათლიაჩემს ოფიცრის ტანისამოსი შეეკვეთა ქალაქში ჯარის თერძისთვის და მეორე კვირას იმისთანა მორთულ-მოკაზმული გამოეცხადა თავის ჯარს, იმისთანად გადმოეგდო თავისი მორგავლებული მუცელი, ისე აბღვრილებდა თვალებს, რომ უკეთესს ვერას ნახავდა კაცი. მხრებზედ ეპოლეტები უთამაშებდა, ოფიცრის ქული კოხტად გვერდზედ გადაეგდო, მიწაზედ გრძელი ხმალი მოსთრევედა და ჩხარუნებდა. აუვლიდა, ჩაუვლიდა თავის ჯარს და შემოპყვირებდა:

— მამულისშვილო ვალენტინ! გასწორდი! საღ ეშმაკებში მივაქვს ეგ ოხერი თვალები!

იმისთანა მშვენიერი სანახავი იყო, რომ თვალები ზედა გვრჩებოდა. ნათლი-ჯალაბი ხომ სულ გადიოდა: ისე მორთულს რომ ხედავდა, თავის თავისა აღარა სჯეროდა, ნუთუ მართლა ეს ჩემი ქმარიაო? ვალენტინიც სულ სხვა თვალით უყურებდა: აქამდინ ნათლიაჩემი ოსტატი იყო, მაგრამ იმასავით ხელოსანი; ესლა კი პირდაპირ კეთილშობილებში ჩასწერა ჩვენმა ქარგალმა და იმისთანა მოწიწებით ექცეოდა, თითქო მარტო დღეიდან იცნობს თავის ოფიცერსო.

სამხედრო ვარჯიშობაში ნათლიაჩემი ბევრად არად ვარგოდა და სხვები გაცილებით სჯობნიდნენ; მეტადრე ჩვენი ლეტუმიე ექიშებოდა. მუცელი აგვტკივდებოდა ხოლმე, იმდენს ვიცინოდით. გარეშემო სოფლებში—ვილშებერგში, მიტელბრონში, კატრვანში, დანში, ლუტცელბურგში — ერთი სიტყვით, ყველგან სამხედრო ვარჯიშობა იყო გაჩაღებული და ყველგან ერთი და იგივე ძახილი ისმოდა. გაუმარჯოს ერს! გაუმარჯოს თავისუფალ ერს! ქვრივი ანო, ქალაქში რომ ხილით ვაჭრობდა, ახლა ისევ სოფელში ამოვიდა და ჯარის ვარჯიშობის დროს ის იქვე მაგიდას დახდგამდა, ცოტა რამ ღვინოს გამოიტანდა, ხელადას, და მზე არ მომეკიდოსო, სამფეროვან ქოლგას შეეფარებოდა ხოლმე. მაგრამ ისე ცხელო-

და, რომ ქოლვის ქვეშ კი არა, შინაც ვეღარ გაგვეძლო და აბა ჯარისკაცს რა მოუვიდოდა? წირვა გამოვიდოდა თუ არა, ჩვენც ვარჯიშობას ვიწყებდით და სამ საათზედ ძლივს ვათავებდით! რამდენს მტერს ვყლაპავდით? ღმერთო, რა კარგად მაგონდება ყველაფერი! ჩვენი ათისთავი კერუ! ერთა დაბალ-დაბალი, ჩამრგვალებული მოხუცი იყო, ბატონით თეთრი, მაგრამ ყოჩაღად გვასწავლიდა; კობტად გაგვიძღვებოდა ხოლმე და თან ნაბიჯს გვითვლიდა: ერთი! ორი! ერთი! ორი! შესდექ! მხარმარჯვნივ! იარ! მერე გვერდით მოგვიდგებოდა, გადმოგვხედავდა და, თავით ფეხამდე ოფლში გაწურულთ რომ დაგვინახავდა, გულიანად გაიხარხარებდა და შემოგვიძახებდა:

— გეყოფათ! დაისვენეთ!

გავიგებდით თუ არა, დაისვენეთო, თავგადაგლეჯილები გავრბოდით ანოსკენ და, რასაკვირველია, არც ჩვენი მოხუცებული ათისთავი დაგვაიწყებებოდა. მივოპატიეებდით, ჯერ ერთი გაუქასპინძლდებოდა, მერე მეორე, მესამე.... ისიც სვამდა, თავის დღეში უარს არავის ეტყობდა, სვამდა და თან იმედს გვაძლევდა:

— ნუ გეშინიათ, მამულისშვილნო, ნუ გეშინიათ! იმისთანა ბიჭები დადგებით, რომ გერმანელმა ჯარებმაც ვერა დაგაკლოთ-რა!

სმა ძალიან უყვარდა, მაგრამ ჩვენ რა გვენალვებოდა? ძლიან პატიოსანი კაცი იყო, ვარჯიშობაში ვერავინ სჯობდა და ამასთანავე საუკეთესო, თავგანწირული მამულიშვილი იყო. ჩვენს ჯარში ბევრნი არ იყვნენ ისე კარგები. ერთი ის იყო და ერთი-ორი კიდევ სხვა: მესამე წყობაში პატარა ტრინკე იყო გამოჩენილი. გარდა ამისა, გვყავდა ბაზიო — საკვირველი სასიამოვნო ხმა ჰქონდა და დიუშენი — ერთი უზარმაზარი, ჭადისავით მოუდრეკავი კაცი. ათისთავები ყველგან ხალხისკენ იყვნენ და ქალაქში ხშირად მინახავს, საღამოზედ სამხედრო სამსახური რომ გაუთავებიათ, სამხედრო ბინაზედ წასვლის მაგივრად, სახალხო კლუბში შეპარულან, ჩრდილში მიმალულან და სმენად ქცეულან — იქნება ჩვენც გავიგოთ რამე ქვეყნიერებისაო. მაგრამ გაიგონებდნენ სამხედრო საყვირს და გაჩქარებულნი მიდიოდნენ, რომ უფროსებს არ გაეგოთ და არ დაესაჯათ. უბედურნი მთელი 15 და ხშირად 20 წელიწადიც უნდა ყოფილიყვნენ სამხედრო სამსახურში და იმედი კი არავითარი ჰქონდათ, რომ წინ წავიდოდნენ: უნდა ეშრომნათ, დიდებული ოფიცრების მაგივრად საქმე იმათ გაეკეთებინათ, და ჯილდო კი სხვებს — ოფიცრებს უნდა მიეღოთ. შემდეგში, როცა რევოლუციას და ხალხს ოფიცრები დასჭირდა, დიდი

სამსახური გაუწიეს ამ სამხედრო სამსახურში დაბერებულმა ათის-
თავებმა და ბევრმა მათგანმა იმდენად ისახელა თავი, რომ გენერ-
ლობაც მიიღო. ამას იმ თავითვე გრძნობდნენ ათისთავეები და ამი-
ტომ იყო რევოლუციას მიემხრნენ და ხალხს გამარჯვებაში დაეხ-
მარნენ.

სალამობით, ნათლიაჩემი ფრთხილად ჩააწყობდა ყუთში თა-
ვას ქუდს და ეპოლეტებს, უფრო ფრთხილად დაკვიდებდა ხოლმე
განჯინაში თავის ოფიცრის ტანისამოსს, საშინაო ტანსაცმელს გა-
დაიცვამდა და „თეორიას“ ჩაუჯდებოდა. რამდენჯერ მომხდარა,
როცა კარგად ვახურდებოდა სამკვლელოში მუშაობა და გაჩაღებუ-
ლი რკინის ნაპერწკალი ქერსა სწვდებოდა, სწორედ იმ დროს წა-
მოუყვირნია ნათლიაჩემს: ფრთხილა!.. მხარმარცხნივ! იარა და
გაკვირვებული რომ დავრჩომილვართ, შემოუტევენია: რას მიყუ-
რებთ? მინდოდა მენახა, ხმა როგორი მაქვს!.. ვახშამს ავალაგებ-
დით და ჩვენი ლეტუმიეც შემობრძანდებოდა; დაჯდებოდა, მუხლს
იმდენად აიწვევდა, რომ ნიკაბით ზედ დაყრდნობოდა და დაიწყებ-
და „თეორიაზედ“ ბაასს; თან ისე ეშმაკურად უღიმოდა ტუჩი,
იტყოდით, ამ კაცს რაღაცა სწადიაო. ნათლიაჩემს თეორიაში იერი-
შისა და ხელდახელ, ხმალდანხმალ ბრძოლის გარდა არა სწამდა რა,
რადგან ათისთავემა კერუმ გვითხრა, ომში სროლა კი არა, უმთავ-
რესი იერიში არისო. დაიწყებდა თავისას, მტრისას და თავის ჯა-
რებს დააწყობდა, იერიშს მიიტანდა... გაცხარდებოდა, ცეცხლი
მოეკიდებოდა და ყვირილს მორთავდა:

— ბიჭო, მიშელ! საწერ-კალამი! ჩქარა!

საწერ-კალამს და ქალაღდს მივართმევდი და დაიწყებდა ხა-
ზვას. ყველანი გარს შემოვფეხვეოდით და ქალაღდს დავცქეროდით.
ნათლიაჩემი კი ხატავდა: ეს თხრილი... სამ ადღზედ ნაკლები რო-
გორ იქნება? ეს ზარბაზნებო, აქ კიდევ ჩასაფრებული ჯარი. რომ
უცბად დაეტაკოს მტერსაო... იმისთანა დაწვრილებით ავციხსნიდა
ყველაფერს, იტყოდით მხედართმთავარიო: მაგრამ ლეტუმიე შიგ
ყრიქაში უდგა და წამდაუწუმ შეაყენებდა:

— მაგას რასა ბრძანებთ, ბატონო ივანე, ეგ როგორ იქნება?...

— ვითომ და რატომო?— შეუტევდა ნათლიაჩემი. შელაპა-
რაკდებოდნენ, გაცხარდებოდნენ. გაჯავრდებოდნენ... წამოვარდე-
ბოდა ნათლიაჩემი, მაგიდას გაბრაზებით მუშტს ჩაჰკრავდა და
დაიძახებდა:

— ასე უნდა, ასე! ასე უნდა მიუსიოთ ჯარი, თორემ ამ სიმაგ-
რეს თქვენს დღეში ვერ აიღებთ! მე გეუბნებით, ვერ აიღებთ-მეთქი!
ზოგი ნათლიაჩემისკენ იყო, ზოგი ლეტუმიესკენ; ასე გასინ-

ჯეთ, ამ სამხედრო კამათში თვით ნათლი-ჯალაბიც კი მონაწილეობას იღებდა. იმისთანა ყვირილს დავიწყებლით ხოლმე, რომ საწყალი ლეტუმიე პასუხის მოცემასაც ვეღარ ახერხებდა და ჩვენ ხომ ერთმანეთისა სრულიად აღარა გვეყურებოდა რა. ათი საათი დაჰკრავდა სასოფლო საათზედ და ჩვენ კი ისევე ჩვენსას ვავიძახოდით. წამოდგებოდა ლეტუმიე, ქუდს აიღებდა, მაგრამ გარედანაც თავისას იძახდა:

— მაგას რას ბრძანებთ, ბატონო ივანე! ეგ როგორ იქნება!

და უკან გამოვეკიდებოდით, ალაყაფის კარებამდე მივდევდით და შიგ ყურში ჩავსძახოდით:

— მაშ იმ ციხეს როგორ შეუხვალთ! ასე უნდა მიუხსიოთ ჯარი, თორემ თქვენს ღღეში ვერ აიღებთ!

ჩვენი თავისა რომ არ შეგვკრცხომოდა, მივვარდებოდით და ცემას დაუწყებდით... ჩვენი აზრის დასამტკიცებლად!

ნათლიაჩემი ხომ სულ ცოფსა ჰყრიდა:

— დასწყევლა ჩემმა გამჩენმა! ცარიელი ბზითა აქვს გამოტენილი ი გოგროხა თავი, თორემ ადამიანისას როგორ ვერას გაიგებდა?

სამხედრო ვარჯიშობაში კი მაინც ლეტუმიე სჯობნიდა: ბრძანებაც უკეთესი იცოდა და გარდა ამისა თავისი ხმლით ისე მშვენიერად ანიშნებდა, საით უნდა წასულიყო ჯარი, ხან მარჯვნივ და ხან მარცხნივ, რომ ნათლიაჩემს ამაში ხმაც არ ამოეღებოდა. საცა სამართალი იყო, ნათლიაჩემისა თანაშემწე კი არა, თანასწორი უნდა ყოფილიყო, და მთელი სოფელიც ამავე აზრისა იყო, მაგრამ ნათლიაჩემს უპირატესობა იმან მისცა, რომ მკედელი და ღუქნის პატრონი იყო და, მაშასადამე, უფრო წარჩინებული. გარდა ამისა ყველაზედ ლამაზი კაცი მთელს სოფელში ის იყო და ჯარის წინამძღოლიც ის უნდა ყოფილიყო.

ერთი გარემოება ცხადად ამტკიცებს იმდროინდელი ბატონების და ეპისკოპოსების უგუნურებას და წინდაუხედაობას. ბასტილის ციხე რომ აიღო ხალხმა და დაპატიმრებულნი გაათავისუფლა, დიდებულნი იქვე კი არ დარჩნენ, საერო კრებაზედ, რომ თავისი უფლებანი დაეცვათ, თუ კი უფლება ჰქონდათ რამე. თქვენც არ მომიკვდეთ! აქაოდა ხალხმა გვაჯობაო, საჩქაროდ ჩაალაგეს მათრამებში ბარგი და საზღვარგარეთ გაემართნენ, რომ ჩვენი ქვეყნის მტრებისთვის ჩვენს საწინააღმდეგოდ ჯარები ეთხოვნათ, მიდიოდნენ გაჩქარებულნი — მებატონეები, ეპისკოპოსები, ბერები, იმათი მოსამსახურენი და შინაყმანი; მიდიოდნენ, რომ თავიანთი სამშობლოსთვის უცხოელი ჯარები შემოესიათ. ლორენელები ტრევისკენ მიემგზავრებოდნენ და აღზასელები კობლენცასკენ, ან

ბაზელისკენ და თან ხმამაღლივ გვემუქრებოდნენ:

— მოიცადეთ! დავბრუნდებით და იმისთანა საქმეს გიზამთ, რომ სამაგალითოდ დარჩეს უკუნითი უკუნისამდე!

გიუბები იყვნენ სწორედ და ჩვენც გულიანად ვიცინოდით იმათ მუქარაზედ. ამას უწოდეს გახიზვნა. თავადმა არტუამ დაიწყო, იმას უბრწყინვალესი თავადი კონდე მიჰყვა, უბრწყინვალესნი თავადნი ბურბონი, პოლონიაკი და ბროგლი. ის ბროგლი, რომელიც პარიზის ჯარების უფროსად იყო დანიშნული და ბრძანება ჰქონდა, საერო კრება დაშალეო. დიად, იმდენი უჩიჩხინეს საბრალო მეფეს, რომ გააგიუეს, დალუბეს და როდესაც ნახეს, საქმე ცუდად არის, საშიშია ჩვენი მდგომარეობაო, უმტყუნეს და გაჭირვებაში მართოდმართ დასტოვეს.

ბევრნი გაიხიზნენ მაშინ საფრანგეთიდან.

ნათლიაჩემს კიდევ უხაროდა იმათი წასვლა:

— ჯანაბამდე გზა ჰქონდეთ მაგ ქვეყნის წურბელებს, მაგათა! დეე, წავიდნენ! ძლივს თავისუფლად არ დავრჩებით ჩვენცა და ჩვენი კეთილი მეფეც! ავს მაინც აღარავინ ურჩევს, ეგენი რომ გაგვეცლებიან!

და ყველანი ასევე უყურებდნენ დიდებულთა გახიზვნას. ნეტავი ყველანი წასულიყვნენ! მაშინ იმათი ხსენებაც აღარად იქნებოდა. დიდი სიამოვნებით მივართმევდით ამ საჩუქარს გერმანელებს, ინგლისელებს და რუსებს. ჩვენდა საუბედუროდ, ძალიან ბევრნი დარჩნენ სამეფო ჯარების უფროსებად და, რასაკვირველია, სულ იმის ცდაში იქნებოდნენ, რომ ერისთვის ჯარი მიესიათ და ხალხის ჯაერი ხალხისავე ძალით ამოეყარათ. საშინელება განიზრახეს მაშინ შინ დარჩენილმა დიდებულებმა! შემდეგში ნახავთ, რა განიზრახეს სამშობლოს წინააღმდეგ და როგორ უღალატეს თავიანთ აღმზრდელ ქვეყანას. ამას ყველაფერს თავის დროზედ მოგახსენებთ. ხომ იცით, აჩქარებითა სოფელი არავის მოუქამია.

პარიზელებს ჯერ ისევ ძველებურად უყვარდათ ჩვენი მეფე და რადგან დიდი ხანი იყო, რაც მეფე ვერსალში ბრძანდებოდა, თავიანთი ცოლები და ქალები გაგზავნეს: წაღით, სთხოვეთ. პარიზში გადმოსახლდეს და დედოფალი მარიამ ანტუანეტა და ბატონიშვილი თან წამოიყვანოსო. რას იზამდა ლუი მეთექვსმეტე? დამოჩილდა და პარიზისკენ გაემგზავრა. დამშეულს ხალხს იმედი მიეცა, ახლა კი აღარა გვიჭირს რა, შიმშილისა აღარა გვეშინიაო. მეფე რომ შევიდა პარიზში, ხალხი ხმამაღლივ იძახდა:

— ველარ გვაჯობებს შიმშილი! აგერა ჩვენი ხაბაზი, თავის დე-

—დაკაცით და ზაღლით! — რაკი ხაბაზი აქ გვეყოლება, შიმშილი ველარას გვიზამს!

სამეფო ეტლის წინ ლაფაიეტი მიდიოდა თავის თეთრი რაშით. პარიზელებმა ლაფაიეტი ერის მცველი ჯარების უფროსად დანიშნეს და ბაილი პარიზის მამასახლისად. ხალხისთანა მინდობილი ხომ არა იქნება რა: ისე ადვილად ივიწყებს ყოველგვარ შეურაცხყოფას, თითქო ბავშვიანო. ოღონდ მოთმინებიდან კი ნუ გამოიყვანენ!

ამ ამბებს შოველი იწერებოდა. ამასთან იმასაც გვეწერდა, საერო კრებაც პარიზში გადავიტანეთ და სამეფო სასახლის გვერდით ვიკრიბებითო. ისე თვე არ გავიდოდა, რომ შოველის წერილი არ მოგვსვლოდა და წერილთან ერთად ახალ-ახალი გაზეთები: პარიზის რევოლუციის დღიური, საფრანგეთის რევოლუცია, პატრიოტული გაზეთი, პარიზელი პუბლიცისტი და ბევრი კიდევ სხვა გაზეთები, რომელთა სახელი ველარ მომიგონია.

ძალიანი წერილები ეწერა გაზეთებში, მეტადრე ლუსტალოს და კამილ დემულენის ნაწერები. დაწვრილებით იყო აწერილი, რა ხდებოდა მთელს საფრანგეთში, ან ვინ რას ამბობდა, ისე რომ, ყოველ გლეხკაცს შეეძლო თავის გარემოებას დაჰკვირვებოდა და მთელი საფრანგეთის ბედის ცვლისათვის თვალ-ყური ედევნებინა. ჩავიტანდით იმ გაზეთებს ფალსბურგში და იქ, დახურულ ბაზარში, წავიკითხავდით ხოლმე ხმამაღლა, რადგან ელო კოლენმა, პარიზელი იაკობელების და კორდელიერების შიხედვით, ჩვენშიც კლუბის დაარსება განიზარა და როგორც მოგახსენეთ, დახურულ ბაზარში დაუდო ბინა*). აქ შევიკრიბებოდით ხოლმე საღამოობით, როცა მალაზიები დაკეტილი იყო და ლეტუმიე იმისთანა ხმით გვიამბობდა ახალ ამბებს და ისე გარკვევით გვიკითხავდა გაზეთებს, რომ ქვემოდ მოედანხედაც კი ისმოდა იმის ხმა. ყველა მხრიდან იქ მიეშურებოდნენ ახალი ამბების მოსასმენად და ჩვენი მხრის წარჩინებულნი პირნი ლაქსპეიმში ისე არ ჩავიდოდნენ, რომ საღამოზედ კლუბში არ მისულიყვნენ და კრებას არ დასწრებოდნენ. ტრიბოლენი — აფთიაქის პატრონი. დიდუე ჰორცუ — ჰონი, რაფიელ მანგი — მედუქნე, ფიქსარი, ბარუხი, არონი, ბერნეტი, ერთი სიტყვით, ქალაქელი თუ ქალაქში დროებით მყოფი ერთი არავინ იყო, რომ კლუბის კრებას არ დასწრებოდა და სიტყვა არ ეთქვა ადამიან-

*) იაკობელების კლუბი. 1790 — 1794 წ. ნომბრამდე, დაარსდა წმ. იაკობის მონასტერში. ეს რესპუბლიკელი, ძირიანად შეცვლას უპირებდნენ საფრანგეთს.

კორდელიერების კლუბი 1790 წ. დააარსეს დანტონმა და მარატმა კორდელიერების მონასტერში; შემდეგში იაკობელების კლუბს შეუერთდა.

ნის უფლებათა შესახებ. ადამიანის უფლებათა აღრიცხვას ზედსხვადასხვა კითხვები მოჰყვებოდა ხოლმე,—თემებად დაყოფა სა-
ფრანგეთისა, კანონი მშრომელთა და უსაქმურთა შესახებ; კანონი,
რომლითაც ნება ეძლეოდათ ლუთერანებს და ებრაელთ სახელმ-
წიფო და საზოგადო სამსახურში შესულიყვნენ; ნაფიც მსაჯულთა
წესის შემოღება; მონასტრების გაუქმება; მონასტრების მამულე-
ბის საერო კუთვნილებად აღიარება; ქაღალდის ფულის შემოღე-
ბა... ერთის სიტყვით, სუყველაფერზედ, რასაც კი საერო კრება
კითხვას აღძრავდა. ღმერთო, როგორ იცვლებოდა ჩვენი ცხოვრება!

უწინ რომ ყოფილიყო, მებატონეები და ეპისკოპოსები სულ-
ყველაფერს თავიანთ სასარგებლოდ იტყოდნენ, სულყველაფერს
თავიანთ სასარგებლოდ მოაგვარებდნენ; ჩვენ არც კი მოვაგონდე-
ბოდით; მოგვდგებოდნენ და არც კრეკვას დაგვაკლებდნენ, არც
პარსვას. შემოგვისეოდნენ თავიანთ მოურავეებს, გზირებს, შინაყ-
მებს და სულ ტყავს გაგვაძრობდნენ. რას ვიზამდით? გავუძალიან-
დებოდით? ჯარს მოიშველებდნენ, ოც-ოცს კაცს ჩაგვიყენებდნენ
სახლში და ვაი ჩვენი ბრალი! რასაც გვიბრძანებდნენ, კანონიც ის
იქნებოდა. ჩვენი კეთილი მეფე, ჩვენი შემბრალებელი და ჩვენთვის
გულდამწვარი მეფე სულ ჩვენს ფიქრში და ზრუნვაში იქნებოდა
სიტყვით... და საქმით კი... ისე მოუტლელად იყო სამეფო საქმეე-
ბისა გამო — ეს მეჯლისიო, ეს წარმოდგენებით, ეს ნადირობაო, ეს
უცხოელთა გამასპინძლებაო და სხვადასხვა გარემოებისა—და გვარი
ცერემონიებით — რომ ხალხი და ხალხის გაჭირვება არც კი აგონდე-
ბოდა. იმის იმედით რომ ყოფილიყო ხალხი, — მოვიციდი, ჩემი კე-
თილი მეფე ჩემთვისაც მოიცილისო, — დღესაც მშიერ-მწყურვალი,
ტიტველი და გონებრივად გლახაკი იქნებოდა. როგორც რევოლუ-
ციამდე იყო. განა მეტი ბედნიერება კიდევ ექნება რამე, ადამიანს
თავის ცხოვრება შეეგნოს და თავისუფლად სჯა და ბაასი შეეძლოს
თავის გაჭირვების შესახებ?! განა მეტი ბედნიერება კიდევ შეიძლე-
ბა, ქვეყანაში კაცს ხმა და უფლება ჰქონდეს, თავისუფლად გამო-
სთქვას თავისი აზრი, მეგობარს ქებით დაუხვდეს და მტერს თავს-
ლაფი გადაასხას?

სიცოცხლე თავისუფლებაა! ეხლაც თვალწინ მიდგას თავისუფ-
ლების მადლით გაბრწყინვალებული ჩვენი კლუბი! ჩვენი ძველი და-
ხურული ბაზარი, ოდნავ განათებული ერთადერთი ლამპარით,
რიგზედ ჩარიგებული სკამები და ხალხი, იმდენი ხალხი, რომ ნემ-
სის წვერი ვერსად ჩავარდებოდა! დიდი, პატარა, ქალი და კაცი
სულ იქ იკრიბებოდა! სკამზედ შესდგებოდა ჩვენი კოლენი და და-
იწყებდა გაზეთის კითხვას. სმენად გადაიქცეოდა ხოლმე ყველა და

ვისაც ნაკლებად ეყურებოდა, ის უფრო გულმოდგინედ ისმენდა. გარედან ქარის გრიალი შემოდრიოდა, ქალაქის ხმაურობა, მაგრამ ჩვენ ყურადღებასაც არაფერს ვაქცევდით. და თვით ასასები და დარაჯები ისე დადგებოდნენ ქუჩაში, რომ მოლაპარაკეთა სიტყვა არ გამოჰპარვოდათ.

და თვით ისინიც კი, ვისაც პირდაპირი ვალდებულება ედგა, ჩვენი კლუბი აეკრძალათ, ჩვენ კიდეც დავეკვირეთ და, სულ ცოტა რომ ვთქვათ, ჩვენს სოფელში ავერეკეთ, თვით ის მოხელენი ისე გვექცეოდნენ, თითქო ვერასა ხედავენო. ჩვენი მამასახლისი თავისი სამფერი სარტყელით და იმისი თანაშემწენი: ბოქაული ივანე ბოკერი და კიდეც სხვანი, ვისიც ჯერ არს ყოველი უწესივრობის წინააღმდეგობა და აკრძალვა, ორი-სამი წლის წინათ ამისთანა საქციელისთვის ციხეში გვიკრავდნენ თავსა! მაშინ კი ჩუმად აგვივლიდნენ გვერდზედ, თითქო სეირნობენო და ჩვენი იქ ყოფნა და სახელმწიფო საქმეებზედ ბაასი არც კი იციანო.

ღიად, ვისაც ეს ამბები არ უნახავს, ვერც ამ ცვლილების სიტკბობას გაიგებს და იმათ მე ერთს ვურჩევ: ეცადნენ, მოხმარონ, რაც ძალ-ღონე და გონიერება აქვთ, რომ ისევ იმ დღეში არ ჩავარდნენ, რა დღეშიაც 1789 წლამდე ვიყავით. უმთავრესი ეს არის, რადგან ძალიან ბევრნი ცდილობენ ძველი წესწყობილების აღდგენას. ქვეყნის მოღალატენა ყოველთვის იქნებიან და ყოველთვის იმას ეცდებიან, თავიანთი დღენი განცხრომით და ქეაფით გაატარონ და თავის მაგივრად ხალხი ამუშაონ.

და იმ დროს, როდესაც ჩვენს ქვეყანაში ყველაფერი ასე იცვლებოდა, როდესაც მთიულნი ბარს მოედვნენ და თავადახნაურთ სახლკარი და მონასტრები და საბაჟოები არსად გადარჩათ; როდესაც დიდებულნი ისეთის სიჩქარით იხიზნებოდნენ საფრანგეთიდან ზოგი ეტლით, ზოგი ცხენით და ზოგი ფეხითაც; როდესაც გაუქმებული საბაჟოების მოხელენი იმასლა ცდილობდნენ, რომ ერის მცველ ჯარში ოფიცრებად ჩარიცხულიყვნენ; ერთი სიტყვით, როდესაც ასეთი დიდმნიშვნელოვანი ამბები ხდებოდა ჩვენს ქვეყანაში, მე უფრო საწყალი მამაჩემი დამახსოვდა: სულ იმასა შიშობდა ცხონებული, ქვეყანა აირია, ქვეყანა დაიღუპა და ჩემს კალათებს ვილა იყიდისო. დედაჩემი ხომ სრულიად დარწმუნებული იყო, რომ მეორედ მოსვლა დადგა და ვაი ჩვენი ბრალი, სულით ხორცამდე დავიღუპებითო! სწორედ იმ დროს იყო, რომ შეწუხებული შემოვიდა ერთ საღამოს ჩემი ძმა კლოდი და მწარედ ამოიოხრა: ჩვენი ბერები გახიზვნას აპირობენ, მე ჩემს ჯამაგირში გამისწორდნენ

და დამითხოვეს. ახლა რაღა მეშველება, რა შავ ქვას ვახალო თავიო.

მაშინ ოცი წლისა ვიყავი და ქვეყანა ჩემი მეგონა. მკლავი მიჭრიდა, სიცოცხლე მიხაროდა და ჩვენების შიში მიკვირდა, მარბებდა კიდეც. ისინი რომ წუწუნს დაიწყებდნენ, მე თავს ველარ შევიმაგრებდი და შვეფტევიდი:

— რა არის, არა გრცხვენიათ, რომ აგრე გეშინიათ! თუ კი იმოდენ უბედურებას და ვაი-ვაგლახს გავუძელოთ, თუ კი იმოდენი გადასახადი და ხარჯი ავითანეთ და თანაც იმოდენ მუქთახორა ხალხს ვაცხოვრებდით—ეს ბატონიო, ეს ბერიო, ეს მონოზანიო, რა ვიცი, ვისაც კი შრომა არ უნდოდა, ყველა ჩვენ გვაწვა კისერზედ;—არა, თუ კი იმოდენი ტანჯვა-წვალემა ავითანეთ, ეხლა რაღასი უნდა გვეშინოდეს, როდესაც ის მიანც ვიციოთ, რომ ჩვენს ნამუშევარს არავინ წაგვართმევს. ქვეყანაზედ საქონელი ხომ არ გაწყვეტილა და აქამდის თუ ბერების საქონელს აძოვებდა კლოდი, ცოტა მომითმინოს და ნახავთ თუ მე ჩემი საკუთარი საქონელი არ ჩავაბარო.

ძალიან თავხედურად მომივიდა, მეც ვიგრძენ, მაგრამ სიყმაწვილეს რას უზამთ? ყოველ დღეს სხვადასხვა აზრები შემოპქონდა ჩვენს სიცოცხლეში და ირათ ძალას, რასაკვირველია, მეც დავემორჩილებოდი. ბევრი რამ მწამდა მაშინ ისეთი, რომ ჩვენებთან თქმასაც ვერ გავებდავდი და სხვათა შორის ისიცა მწამდა, რომ ადამიანიშვილი ყველა ერთია, ყველა სწორია და თუ ერთს მეორე დაუმორჩილებია, იმიტომ კი არა, რომ მართლა ძლიერი ყოფილა და უჯობნია, არა, მართო იმით დაუმორჩილებია, რომ დამორჩილებულს თავისი თავი სუსტი და უძლური ჰგონებია. მე მწამდა, რომ ყოველი პატიოსანი კაცი დაჩაგრულთა განთავისუფლებას უნდა ცდილიყო.

დედაჩემი იქვე იდგა და განცვიფრებული, პირმოკუმული და თვალბდაშტერებული შემომცქეროდა; კარგა ხანი მიყურა ასე, თითქო ხმის ამოღება ვერ მოუხერხებიაო. მერე, როცა ცოტათი დამშვიდდა, მითხრა:

— აბა სწორედ მაგ ამპარტაგნებისთვის დაგამცრობს, შეილო, ღმერთის იქნება გგონია, იოსები იყო, რომ აღსდგეს შენი ძნა და შენი ძმების ძნა მის წინაშე მოიხაროს და თავმდაბლად სალამი მინცეს? იქნება გგონია, მზე და მთვარე და ვარსკვლავნი მარტო იმიტომ ანათებენ, რომ თავყანი სცენ შენს დიდებას?! დღევანდელი დღე დაიხსომე, შეილო, და როდესაც შენ ეგვიპტეში იყო და სახლთუხუცესობა მიიღო, მაშინ დედაშენს ნულარც კი მოიგონებ.

შენ თუ დაგლუპავს, ეგ ამაცი, ამპარტავანი გული დაგლუპავს და, ღმერთმა კი დაგიფაროს, შენი ბოლო სახრჩობელა იქნება!

გავათავებდით თუ არა მუშაობას, ცოტათი შევნაყრდებოდი და ქალაქისკენ მივეშურებოდი, რომ პირში შევბოდი ძველებური წესწყობილების მომხრეთ, თუ კი გაბედავდა ვინმე და ხმას ამოიღებდა. ყველა მოხელეს, რომელნიც ძველებურს ამჯობინებდნენ, ჩვენ არისტოკრატებს ვეძახდით. ერთი კი გაებედნა და ეთქვა რამე ამგვარ არისტოკრატს, ყველაზედ მალლა მე შევეუტევედი, თვალები სისხლით ამევსებოდა, უფროს-უმცროსობისას აღარას ვარჩევდი. ისე გავეჩვიე ჩვენს კლუბში, რომ სრულიად დაურიდებლივ, ჩემს ნებისად ვიყავ და რომ მომეწონებოდა ვისიმე სიტყვა, ყველაზედ უწინ მე ვუყვიროდი: „გაუმარჯოს კონსტიტუციის მომხრეს!“ არ მომეწონებოდა და—არც იმას დავმალავდი: „შორს ჩვენგან, ცრუ პატრიოტებო!“ ეს ყველამ იცოდა ჩვენს სოფელში და ძალიან პატივისცემით მიყურებდნენ. კლუბიდან ათ საათზედ წამოვიდოდი ხოლმე შინისკენ, და როცა მთვარიანი ღამე იყო და გული მხიარულადა გვქონდა, „წავა“-ს * ვმღეროდი. მამაჩემსავით ტკბილი ხმით დავძახებდი ხოლმე, სხვები ბანს მომცემდნენ და მივდიოდით. ისე გაიტაცებდა ხოლმე ჩვენი საამური სიმღერა ნათლიაჩემს, ისე მოუტკობდა გულს, რომ მოვიდოდა, მხარზედ ხელს დამკრავდა და

* როდესაც ჩრდილოეთი ამერიკის მკვიდრნი ინგლისისაგან განთავისუფლებისათვის იბრძოდნენ, ფრანკლინი პარიზში იყო და ამერიკიდან მოსულ ღუპეშას ისე არ წაიკითხავდა, რომ არ ეთქვა: „წავა, წავა, საქმე კარგად წავა“. ასევე იმედიანად შეპყურებდა რევოლუციის პარიზელი ხალხი და ამ სიტყვებზედ აგებულ სიმღერით მიდიოდა ყოველ ბრძოლაში:

წავა, წავა, კარგად წავა
და კარგადაც გათავდება,
იმდენ თავადს ჩამოვახრჩობთ,
რომ თოკიც კი გაძვირდება!

წავა, წავა, კარგად წავა
და კარგადაც გათავდება,
დღეს ჩვენ ავეშაღეთ მეფეს,
ხვალ ქვეყანა აეშლება... .

წავა, წავა, ყოველს სტრიქონში უცვლელად რჩებოდა და დანარჩენი სიტყვები კი გარემოებათა დაგვარად იცვლებოდა.

ხმაც იმდროინდელ, ყველასაგან მოწონებულ ოპერიდან შეურჩია ხალხმა თავის სიმღერას, ის ხმა, რომელიც გავიყებით უყვარდა დედოფალს მარიამ-ანტუანეტას და ყოველ დღე უკრავდა.

მეტყვოდა: ყოჩალი ბიჭი ხარ, მიშელ! შენ აგრე ყოჩალად იყავ და მე და შენ ყოველთვის ერთად ვიქნებით.

ეჰ, რა კარგი ხარ, სიყმაწვილევე! სადაც უნდა ვყოფილიყავ და რაც უნდა მეთქვა, სულ იმას ვცდილობდი, ისე მოვქცეულიყავ, როგორც ჩემს მარგალიტას მოეწონებოდა. მარგალიტას სიყვარულით ერთი-ორად პატრიოტი ვიყავ. გული სიყვარულით მქონდა სავსე, და გონება თავისუფლებით.

ისე გაქრა ის წელიწადი, არც კი შეგვიტყვია. ზამთარი თბილი იდგა და ჩვეულებისამებრ არ გაგვიჭირა საქმე; თოვლი მოდიოდა, მაგრამ იქვე დნებოდა და თებერვლის გასულს თითქმის გაზაფხულის დარი დაიჭირა.

გაზაფხულდა. 1790 წ. მარტში, აპრილში და მაისში სხვადასხვა სოფლის მილიციებმა ერთმანეთში მისვლა-მოსვლა დაიწყეს და სამაგალითო მეგობრული განწყობილება ჩამოაგდეს. ხან ერთს სოფელში შეიკრიბებოდნენ, ხან მეორეში, ერთმანეთს ძმობას და ერთობას შეჰფიცავდნენ, ბატონყმობის გადაგდებასა ხარობდნენ და თან კონსტიტუციის შემოღებას ულოცავდნენ ერთმანეთს. მოხუცებულები შესაფერ სიტყვას ამბობდნენ და ისე გაიტაცებდნენ ხოლმე მსმენელთ, რომ ცამდე აღიოდა იმათი ძახილი.

— სულ გავწყდებით და ჩვენს თავისუფლებას კი აღარ დავკარგავთ!

ქალებიც მოვიდოდნენ ხოლმე. რომ მილიციელების თავყრილობას დასწრებოდნენ და სიტყვები მოესმინათ, თუმცა თითონ არავითარ მონაწილეობას არ იღებდნენ და შორიდან გვიყურებდნენ.

ბატონყმობის გადაგდებამ ისე არ ახიამოვნა გლეხკაცობა, როგორადაც სასულიერო წოდების მამულების გაყიდვამ.

ყველა დამეთანხმება, რომ რევოლუციის დროს, როდესაც უარყვავით ყოველი ძველი გადასახადი და ხარჯი, სახელმწიფო შემოსავალს შესამჩნევად უნდა ეკლო და აგრეც მოხდა: ხაზინის ზარალი დღითი დღე მატულობდა. საერო კრება მთელს სამეფოს, მთელს საფრანგეთს წარმოადგენდა და, მაშასადამე, არ შეეძლო ჩვენი ძველი მეფეებივით გამოეცხადებინა, სამეფო ხაზინა გაკოტრდაო! საერო კრება ამას ვერ იზამდა, საერო კრება ერხ ვერ შეარცხვენდა. მაშ საიდან გადაეხადა ძველი ვალები? ჩვენი კეთილი მეფეებისაგან აღებული ვალები? სად ეშოვა იმდენი ფული? ჩვენდა საბედნიეროდ, ოტენელმა ეპისკოპოსმა ტალეირან დე პერიგორმა გამოაცხადა: საფრანგეთის ეკლესიას ოთხი მილიარდის მამული აქვს; ეს სიმდიდრე განუყოფელ საკუთრებას შეადგენს მთელა' სა-

სულიერო წოდებისას... სასულიერო წოდებას საკმარისი საშუალება დაუნიშნოთ საცხოვრებლად და მამულები წავართვათ; და რადგან მუშაყაცის ხელში მამულები უფრო მეტს ნაყოფს მოგვცემენ, თუ კარგად მოვიქცით, იმდენს ავიღებთ, რომ სასულიერო წოდებასაც თავისი ვაძლიოთ და ჩვენც დაგვრჩესო.

რევოლუცია ამ წინადადებას დაიხსნა. ბევრი იუარეს სხვა ეპისკოპოსებმა, ბევრს ეცადნენ, თავიანთი მამულები ხელიდან არ გაეშვათ, მაგრამ საერო კრებამ მაინც თავისი არ დაიშალა და კანონი გამოაცხადა, რომლითაც საეკლესიო მამულები უნდა ვაყიდულიყო და სასულიერო წოდებას მის სამაგიეროდ ჯამაგიერები უნდა დანიშნოდა.

ამან დაიხსნა საფრანგეთი გაკოტრებისაგან და 1790 წ. ოთხასი მილიონის მამულები გაუყიდეს ეკლესიას.

ღვთისწყალობა გაქვთ, მაშინ კი გამოფხიზლდნენ მოხუცებულები! თუმცა მანამდე სულ ზიზლით ახსენებდნენ რევოლუციას, მაგრამ ამ ამბის გაგონებაზედ უცბად რევოლუციის თავგამოდებული მომხრენი გახდნენ, მაშინვე თავიანთ ძველის-ძველი კოჭობები მოძებნეს და წვრილ-წვრილად, შაურობით და უხალთუნობით მოგროვილი ფული ამოიღეს. ვისაც კი ცოტა რამ გააჩნდა შავი დღისთვის მიმალული, ყველა სამამასახლისოსკენ მიეშურებოდა.

მამულები სამამასახლისოში იყიდებოდა და ვინც ყველაზე მეტს შეაძლევდა, მამულიც იმასა რჩებოდა. უმეტესი ნაწილი იმ პირობით ყიდულობდა, რომ მცირე ნაწილს მაშინვე იხდიდა და დანარჩენს კი რამდენიმე ხნის განმავლობაში; დიდძალი მამული გაიყიდა ამგვარად. ზოგმა ხუთი დღიური იყიდა, ზოგმა ათი, ოცი და ზოგმა მეტიც. ყოველი სამამასახლისო ვალდებული იყო გაყიდული მამულის ფული პარიზს გაეგზავნა, რომ იმ ფულებით გადაეხადნათ თავად-აზნაურთაგან და სასულიერო წოდებისაგან აღებული ვალი; ჩვენ ხომ ჩვენს დღეში არავინ გვკითხავდა ვალის აღებას და ფულების ხარჯვას! ოღონდ ის იყო, რომ ფულის მაგიერად ბარათებს გზავნიდნენ, ამდენი დღიური გავყიდეთ და ფული ამდენი ავიღეთ; ფულს როცა მოგვთხოვთ, ან როცა ნისიას ვადა მოუვა, მოგართმევთო. ამ ბარათებს ასიგნაცია დაარქვეს და რადგან ყოველი ასიგნაცია მამულის ფასს წარმოადგენდა, რადგან ამ ასიგნაციით ყოველთვის შეიძლებოდა კაცს მამული ეყიდნა, ამიტომ იმ ბარათებს ისე ვხმარობდით, როგორც ოქროსა და ვერცხლის ფულებს.

ვაი საწყალი კაცის ბრალი, თორემ მე რომ იმ დროს ცოტა ფული მქონოდა, იმისთანა მამულს შევიძენდი, რომ საშვილიშვი-

ლოდ მყოფნოდა. ლიქსპეიმის ტბის პირი და ტირსელენის მონასტრის საბალახო ისე მომწონდა, რომ დღე და ღამ სულ იმის ფიქრში ვიყავ, ფული სად ვიშოვო-მეთქი? მაგრამ ჯიბეში არა მიკვავოდა რა და ვიყავ ჩემთვის ყურებჩამოყრილი. მაგრამ როგორ გამიძლებდა გული? როგორც კი გავიგებდი, მამულებს ჰყიდიანო, პირველად მე ჩავიდოდი ხოლმე სამამასახლისოში, ვიდექი და შევცქნავოდი. ზოგი მიწებს ყიდულობდა, ზოგი საბალახოს, ზოგი ტყეს. მე გული მისივდებოდა! კაცი არავინ მყავდა, რომ თავდებად დამდგომოდა, თორემ განა ვადით მეკი არ მომცემდნენ! და როცა მოხუცებულ გლეხკაცს ვისმე მამული დარჩებოდა და გახარებული მიეჩქარებოდა შინისკენ, მე შურის თვალით ვუცქეროდი და გულს ვიმაგრებდი:

— იშრომე, მიშელ! იშრომე და იყარათე! ამისთანა კაი დღე შენც გავითენდება, სიბერეში მაინც, ეხლა თუ არა!

და ჩემს დღეში არ დამეიწყებია ეს რჩევა. საუბედუროდ, რაც საუკეთესო შემთხვევა იყო, ისე გამეპარა, რომ გროშისა ვერა შევიძინე რა და ეხლა მართებლობის ტყეები და არის გასასყიდი. ისიც ვინ იცის, კიდეც ექნება ხაზინას ზარალი? სახელმწიფო ხაზინას ეხლა ისე ფრთხილად და ყაირათიანად განაგებენ, რომ ზარალი ძნელი მოსალოდნელია და მამასადამე იმ ტყესაც არ გაჰყიდიან. რა გაეწყობა? რაცა კაცსა ღმერთმან მისცეს, საქმე ის არის იმის მაღლიერი იყოს და... ცდილობდეს კიდეც სხვაც შეიძინოს რამე.

რა საჭიროა, და ვერც შევძლებ ავიწეროთ, რა დაღრეჯილები შემოგვეცქეროდნენ ბერები, იმათ მამულებს რომ ვყიდდით. გვწყველიდნენ, გვლანძღავდნენ, ეკლესიიდან განდევნას გვიქაზიდნენ... შეჩვენებულ იყოს ჩვენი მამულის მყიდველი უკუნითი უკუნისამდე თითონაც და იმის შთამომავალნიცაო! აქაც დაიღუპება და სიიქოსაც ჯოჯოხეთს ვერ ასცდებო... მაგრამ გლეხკაცი და მამული! ოღონდ გლეხკაცს ცოტა რამ მამული შეაძენინეთ და არც შეჩვენებას შეუშინდება, არც წყევლას და არც ჯოჯოხეთს.. რალა გავაგრძელო, ბერების წყევლას ყურადღებაც არავინ მიაქცია, და ყველაზედ ნაკლებათ ნათლიაჩემმა. ყველაზედ დიდი მამული იმან შეიძინა — ასორმოცდაათი დღიური იყიდა პიკოლცში, სულ სანაქებო, საშვილიშვილო მამული. ფასიც ისეთი არა მიუცია რა და სიხარულით ცას დაეწია: ვერ წარმოიდგენთ, როგორ დაიბერავდა ხოლმე ლოყებს, როდესაც ამ მამულზედ ლაპარაკი ჩამოვარდებოდა. ნათლი-ჯალაბიც კმაყოფილი იყო, მაგრამ ხანდახან საიქიო მოაგონდებოდა ხოლმე და გული აუჩქროლდებოდა: 'ერ-

თიკ ვნახოთ, ღმერთმა გვიწყინოს ბერების მამულის შექენა, ვერე?.. ხომ ველარა ვცხონდიო! მოაგონდებოდა თუ არა სულის ცხონება, მაშინვე ნათლიაჩემს მივარდებოდა და უსაყვედურებდა, აქაურ სიკეთეს იქ ცხონება არ გვერჩივნაო?! ნათლიაჩემი კი თვალს მოჭუტავდა, ლოყებს უფრო დაიბერავდა, დარბაზში გაივლიდა და სიცილით უპასუხებდა:

— მაგას მართალს ამბობ, მაგრამ ერთი კარგი კელაპტარი დავუნთოთ ღვთისშობელს და სამოთხის თავში ჩვენ გამოვვჭიმავს! ნუ გეშინია, ეკატერინე, თუ ამ მამულის შექენისთვის ჩვენ ღმერთმა მოგვკითხოს რამე, აი, ეს უღვაში მომჭერის!

და ისე გულიანად გაიხარხარებდა, რომ მუცელი ფამუალს დაუწყებდა ხოლმე. ხელებს ჯიბეში ჩაიწყობდა და თვალები ისე ეშმაკურად უცინოდა, თითქო იძახის: ვინც რა უნდა სთქვასო, წისქვილმა კი ფქვასო.

ნეტავი მეც შემძლებოდა ერთი იმდენი კი არა, იმის მეთადი მაინც და ღვთის მმოსავ ბერებს რამდენიც უნდა ვეწყევლე! ნათლიაჩემსაც ბევრნი სწყევლიდნენ, და მეტადრე დედაჩემი. დედაჩემმა ველარა და ველარ აპატია ეს ცოდვა და ნათლიაჩემს ისე ვერავინ ვახსენებდით, რომ იმას წყევლა არ დაეწყო. ნათლიაჩემი კი ამ წყევლაზედ უფრო და უფრო სუქდებოდა.

— ახლა კი აღარა მიჭირს რა, — იტყოდა ხოლმე, როცა კარვ გუნებაზედ იყო, — ღმერთმა იმდენი მომცა, რომ ჩემს ხელობას რომ თავი დავანებო და სამკედლოში აღარც კი შევიხედო, მაინც გაუჭირებლივ ვიცხოვრებ, ტალეირან და პერიგორისა არ იყოს, მეც გულხელს დავიკრებ და ერთი სიტყვით ჩავაჩუმებ, ვინც ჩემს წყევლას ბედავს: გმურს და იმიტომ იწყევლები-მეთქი, ვეტყვი.

ამიტომ იყო, რომ ნათლიაჩემს სიბერე ვერ მოერია. სხვები იმის ხნისანი დაბერდნენ, დაჩაჩანაკდნენ და ის კი სამოცდათექვსმეტი წლისაც ისე მხიარული და ყოჩაღი იყო, თითქო ჯერ ორმოცდაათისაც არ არისო.

ყველაზე მეტად ნათლიაჩემს ბერი ბენედიქტე გადაეკიდა და ისე სწყევლიდა, ისე ევედრებოდა ღმერთს იმის დაღუბვას, რომ იმას რომ ერთი იოტის ოდენაც არის მადლი ჰქონოდა, ნათლიაჩემი ცოცხლივ ჯოჯოხეთის ცეცხლში დაიწვებოდა. იჯდა თავის ჯორზედ, ქვეყანა ფეხქვეშ ედო და ყველგან ნათლიაჩემს და რევოლუციას სწყევლიდა. ის იყო და ისა, რაც უნდა ეძახნა ნათლი-ჯალაბს, რაც უნდა ეძლევიან, ის ჩვენკენ არ მოიხედავდა და ჩვენსას აღარაფერს ნდომულობდა. ნათლი-ჯალაბის ძახილს რომ გაიგონებდა, შემოსძახებდა:

— მე ნაქურდალი არა მინდა რა! — და თან პირჯვარს იწერდა ნათლიაჩემი კი გულიანად იციროდა.

ნათლიაჩემი იციროდა, მაგრამ ვალენტინი კი კინაღამ გაგვექცა. ჯერ ბერების მამულების ყიდვა ვერ ეპატიებინა ნათლიაჩემისთვის და ამ სიცილს და ამგვარ პასუხებს ხომ უფრო არ მოუთმენდა. ითმენდა, ითმენდა და მერე კაი მკვახე პასუხსაც აკადრებდა ხოლმე ოსტატს. და რადგან ქარგალისაგან ამას არავინ მოითმენდა, წასვლა დააპირა და ისევ მე შევეუჩნდი და დავამშვიდე. ისიც რითი დავამშვიდე? როცა ოსტატი სამქედლოში არ იყო, პირს მოხსნიდა ხოლმე თავის გულას და იმდენი ხანი ლაპარაკობდა, ვიდრე თითონ არ დაიღლებოდა.

სასულიერო წოდების მამულები სულ ამგვარად გაიყიდა და რადგან ეს მამულები მარტომარტო გლენკაცობამ შეიძინა, უცბად წამოიწია გლენკაცობა და იმდენად წამოიწია, რომ ქალაქის მუშებს აღარაფერში დაუფარდებოდა, მით უფრო, რომ რაც საბატონო მიწები ჰქონდა, იმის გადასახადიც ძალიან შეუშსუბუქდა. ისე წამოიწია მეურნეობამ, რომ მტრის თელსაც გაახარებდა. უწინ ბერების ხელში ყველგან ჭალები, ჭაობები და ბუჩქნარი იყო. ან რისთვის უნდა შეწუხებულყვენენ, მონასტრებს მარანში და ბელეღში რამდენიმე წლის სამყოფი ჰქონდათ ყოველთვის შენახული და როდესაც სოფლის მღვდელი ცარიელ ჭადხედ იყო მიტოვებული — ხალხს რა ჰქონდა, იმისთვის რა მიეცა? — და შვილები უსწავლელი რჩებოდა, ბერებს იმდენი ჰქონდათ, რომ შექმაა ველარც კი ახერხებდნენ. ზოგი ანდერძით რჩებოდათ, ზოგი შეწირულებით, ზოგს კიდევ იმითი შოულობდნენ, რომ ქადაგებდნენ: მონანიეთ ცოდვანი თქვენნი, თორემ ჯოჯოხეთს ვერსად წაუხვალთო და მონანიება მარტო იმითი შეიძლებოდა, თუ მონასტერს შესწირავდნენ რასმე. და დღითი დღე მდიდრდებოდა მონასტერი და სარჩოსა და მამულებს იძენდა. იყვნენ თავისთვის უღარღელად, უზრუნველად და შეექცეოდნენ. ხორციელად იმათზედ უკეთესად არავინ იყო და სულიერად ხომ ისინივე არიგებდნენ სულის ცხონებას. იყვნენ ასე უსაქმურად და ამით უფრო მეტს შოულობდნენ, ვიდრე პატიოსანი შრომით შეიძენდნენ.

ჩვენი საქმე სულ სხვა არის. კაცი რომ საკუთარს ეღირსება რასმე, შრომასაც უნდა უმატოს და უნდა გენახათ, როგორ შრომობდნენ საკუთარ მამულზედ ჩვენი გლენკაცები. ახლა კი შიში აღარა ჰქონდათ, მოსავალს ბატონი წაგვართმევსო და ისე უვლიდნენ თავიანთ მიწებს, რომ იქნება ისე საკუთარ ცოლ-შვილისთვის არ მოეგლოთ. გადახნეს იმოდენი უტეხი მინდვრები, ბუჩქნარი

ამოაგდეს, ქაობები გააშრეს, სუსტ მამულს პატივი შეუმატეს და აყვავეს ქვეყანა; ჩვენს სოფლებს ჩვენც ველარა ვცნობდით. ჯერაც არ გათავებულა ეს შრომა, ჯერაც არ გაუთავებია გლუბჯაცს ქაობების დაშრობა და ხრიაკის სახნავ-მიწად გარდაქმნა: ახლა რამდენი ახალ-ახალი ხერხი და წამლობა შემოიღო, მეტადრე ვაზის მოვლაში: ეს გოგირდით წამლობაო, ეს სეტყვისაგან დაზღვევაო, ეს არხების გაყვანა და ურწყავის მორწყვაო, ეს უცხოელი უცნობი მცენარეების გაჩენაო და უცნაური მანქანების ხმარებაო. რევოლუციამ მოგვრტანა მეურნეობის გაუმჯობესება და იმის მაღლიერნი უნდა ვიყვნეთ, რომ შრომას და პატიოსნებას თავისუფლება მიანიჭა და მით ბარაქიანობა დაულოცა.

მაგრამ, საუბედუროდ, ქვეყნად სიკეთეს მოწინააღმდეგე უფრო მეტი ჰყავს, ვიდრე მომხრე და, საცა უვიცი და ბიწიერი არის ვინმე, ყველანი იმას ცდილობენ, სიკეთე არსად ვაბატონოთო. ასე იყო .1790 წელს. ახალი კანონების წინააღმდეგობა გამოაცხადა მთელმა სამხრეთ-საფრანგეთმა; სამხრეთ საფრანგეთში ბერი წმიდანად ჰყავდათ მიღებული და უვიც, უბედურ ხალხს ისე თურმე ჩააგონეს ბერებმა, რომ თუ გაბრიყვდით და ახალი კანონები მიიღეთ, სულით ხორცამდე დაიღუპებით, რადგან ეგ ღვთისა და სარწმუნოების წინააღმდეგი კანონებიაო. მონთობანში, ნიმში, მონპელიეში და ტულუზში ეპისკოპოსებს ბრძანება გაეცათ, რომ მღვდლებმა არავითარი ჯამაგირი არ უნდა აიღონ ღვთისა და ქვეყნის მტერთაგანო. ლუთერანებს სდევნიდნენ და ხოცავდნენ; იმ დროს, როდესაც გახიზნულები ცდილობდნენ მთელი ევროპა ჩვენს წინააღმდეგ აემხედრებინათ, თუ გვიხსნიდა რამე მტერთაგან, მარტო ერთობა გვიხსნიდა. სწორედ იმ დროს ჩვენში ასეთი უთანხმოება და განხეთქილება იწყებოდა. ყველანი ვხედავდით, რომ ეს განხეთქილება დაგვღუპავდა; ყველანი ვგრძნობდით, რომ ბერების სარწმუნოების სახელით მარტო იმიტომ აღელვებდნენ ხალხს, რომ თავად-აზნაურთ და სასულიერო წოდებას ჩვენთან ბრძოლის ასატენად საკმარისი ძალა არ ჰქონდა და ცდილობდა ხალხი ხალხისავე ხელით დაეხრჩო; მით უფრო, რომ საფრანგეთის მართებლობის ჯარების უფროსად სულ თავად-აზნაურნი იყვნენ. რამდენჯერ უთქვამს ნათლიაჩემს შოველისაგან გამოგზავნილი გაზეთების კითხვის დროს:

— რას გვარგებს კარგი კანონი, თუ კი ძალა მტრის ხელშია? რას გვარგებს პარიზიდან ჯარების გასტუმრება, თუ კი იქვე რამდენიმე საათის სავალზედ დგანან საომრად მომზადებულნი და ბრძანებას და ელიან, რომ ისევ პარიზში შევიდნენ? იცით მერე რა ჯა-

რებით დაეცემიან მტრები პარიზელ ხალხს? იმ ჯარებით, რომელთა უფროსები სულ უბრწყინვალესი თავადიშვილები და დიდებულის თავად-აზნაურნი არიან, ჩვენი სისხლისმსმელი მტრები! ერთი ცუნანოთ, დაიწყეს სიარული და თავი დაუტარეს პარიზელებს... საერო კრებას შემოეხვივნენ, ძალა იხმარეს და დაშალეს, გახიზნულები უკანვე დაიბარეს, ჩვენი ნაყიდი მამულები უკანვე წაგვართვეს და ყელზედ ისევ მონობის საბელი მოგვაბეს! არა, სისულელე არ არის, რომ ჯარის უფროსებად ჩვენი მტრები არიან! მერწმუნეთ, თავად-აზნაურებისთანა დაუდგრომელი მტერი ჩვენ არავინ გვეყოლება. ჩვენი ჯარის უფროსებად რომ ავსტრიელები ყოფილიყვნენ, იმათი მეტი იმედი მექნებოდა, ვიდრე დიდებული თავად-აზნაურობისა.

ვის შეუძლია ჩამოსთვალოს, რამდენ საზიზღარ ცილსა სწამებდნენ მესამე წოდებას თავად-აზნაურნი და ეპისკოპოსები თავიანთ ნაწერებში! იმათ თხზულებებში „ხ ს ნ ა ს უ ლ ი ს ა შ ე ნ ი ს ა“, „წ ა მ ე ბ ა ლ უ ი მ ე თ ე ქ ვ ს მ ე ტ ი ს ა, ე ბ რ ა ე ლ თ ა დ ა ფ რ ა ნ გ თ ა მ ე ფ ი ს ა“ და სხვებში ხალხის ლანძღვის და ცილისწამების მეტს ვერას იპოვიდა კაცი.

იმათ გაზეთებში ხომ იმოდენი სიცრუე იყო დაბეჭდილი, — იქნება ხალხს რევოლუცია შევაზიზღოთო, — რომ გული აერეოდა კაცს: არა რცხენიანთ, ამას როგორ კადრულობენ დამწერნიო?!

ყოველ მხრიდან საჩივარს იწერებოდნენ იმ სამარცხვინო გაზეთებში, საერო კრებამ ისე გარყვნა ხალხი, რომ ჯარისკაცებს თავიანთი უფროსებისა აღარც შიში აქვთ და აღარც რადიო. დიდებული გვარისშვილი ოფიცრების დასაკმაყოფილებლად საერო კრებას უნდა დაეხვრიტა ჯარისკაცები, რადგან იგინი თავიანთ უფროსებს ეურჩებოდნენ და ხალხის წინააღმდეგ იარაღის ხმარებას არა ნდომობდნენ. მეტი უგუნურება ლა იქნება? დასწყევლათ ღმერთმა, სწორეთ შემოდგომის ბუზებივით ჩაგვაცივდნენ! შემოდგომის ბუზისთანა თამამი და თავხედი ხომ არა იქნება რა, ალბათ იმიტომ, რომ დიდი ხნის სიცოცხლე აღარ დარჩენია.

მიუხედავად ამისა, რევოლუცია თავისას არ იშლიდა, რადგან ხალხის ნდობა უკვე მოეპოვებინა. ყოველი უფლება წავართვით მეფეს, თავად-აზნაურთ და მონასტრებს და ჯერ-ჯერობით ესეც დიდი რამ იყო. კვირაობით, გლეხკაცობა ქალებსა და ტყეებს მოედებოდა და თავისუფლად ნადირობდა. ვისაც თავის დღეში თოფი არ გაესროლა, დღეს სანადიროდ დალიოდა და ისე მადიანად შეექცეოდა აქამდე აკრძალული ნადირის ხორცს, რომ თითებს

ილოკავდა. ვილას ახსოვდა ტყის დაყორულება? და თუ მოავონდებოდა ვისმე, მხიარულად ჩაიცილებდა და იტყოდა:

— ნადირის ხორცი კი ნუ გგონიათ, ეს იმ მუქთახორა ბატონების ხორცია, რომელნიც ჩვენი ოფლითა ცხოვრობდნენ.

ვილას ახსოვდა ჩვენი ტივოლი? ვილას ახსოვდა ძველებური დროს გატარება და ქეიფი? ჩვენს ეზოში, ჩვენი დიდი მუხის ჩრდილში თუ ნახავდით ვისმე, მოხუცებულ ათისთავებსა ნახავდით, თორემ სხვას აღარავის. დასხდებოდნენ, თითო ჩარეკა ლეინოს მოითხოვდნენ და დაიწყებდნენ ჩუმად ბაასს — ჩვენ ჩვენი ანგარიში გვაქვს გასასწორებელი და იმას ვლაპარაკობთო. რა ვიცოდით, რა ანგარიშები ჰქონდათ? მაგრამ ისე ჩუმად ლაპარაკობდნენ, ისე გადიხრებოდნენ ხოლმე ერთმანეთისკენ, რომ ჩვენ ეჭვი შეგვეპარებოდა ხოლმე, ალბათ ძალიან საშურო საქმეები ჰქონიათ, რომ ასე მალავენო.

ჩვენს ქალაქში მდგომი ჯარის უფროსი თავადი ბუაიე, იმისი თანაშემწე აფიცრები და ჩვენებური თავად-აზნაურნიც ერთ ყავახანაში იკრიბებოდნენ სამხედრო მოედანზედ. ალბათ იმათაც ანგარიშები ჰქონდათ გასასწორებელი. ხალხისაგან მილიციის შედგენა და ჩვენი ხალხის და ჯარების დამოყვრება, ეტყობოდათ, ძალიან სწყინდათ. ისინიც რაღაცას ჩურჩულებდნენ და გაფაციცებით თვალს ადევნებდნენ იმ ჯარისკაცებს, რომელნიც გაბედავდნენ და მოქალაქეებს გამოელაპარაკებოდნენ.

ასე გავიდა ნახევარი ზაფხული. მე ყოველდღე ვწერდი, რაც კი ჩვენს მხარეში საინტერესო მოხდებოდა და თვის დამლევს კარგ მოზრდილ წერილს ვუგზავნიდი შოველს, პარიზში, ბულუას ქ. №11-ში. ისიც უპასუხოდ არ გეტოვებდა და წერილთან ერთად ქურნალ-გაზეთებსაც გვიგზავნიდა. მარგალიტა ყოველს წერილში მოკითხვას უთვლიდა მიშელს და ისე ამიღელდებოდა ხოლმე გული, თითქო ცარიელი მოკითხვა კი არა, თვით მარგალიტაც გულში მყავს ჩაკრულიო. და სადამოს, გავათავედით თუ არა მუშაობას, მე შოველიანთკენ მივემუთრებოდი და ასჯერ მაინც გადავიკითხავდი იმ ორს სტრიქონს, რომელიც მარგალიტას ხელით იყო დაწერილი. რა სიამოვნებითა ვწერდი ჩემს მარგალიტას ჩვენი სოფლისა და იმის პატარა ბაღის ამბებს? მართლაცა და ისე მქონდა მოვლილი შოველის ბაღი, რომ მარგალიტას რომ ენახა, გაუკვირდებოდა. ყველგან ყვავილები მქონდა და სამაგალითო ბოსტანი, ღობეზედ გოგრა. იმ წელს ხილსაც ძალიან ესხა და მშვენიერი სანახავი იყო ალუბლისა და ვაშლის ხეები. ნეტავი ისე შორს არა ყოფილიყო, რომ ერთი კალათი თავისი ბაღის ხილი და ახლად გაშლილი ვარდები მიმერთმია! როგორ გაეხარდებოდა, თავის ვარდებს რომ დაყნოსავდა! მაგრამ ვიცოდი, რომ

შორს იყო და გული მიკვდებოდა: ნეტავი არც ყვავილები დამეტენსა და არც ასე დამემშვენებინა აქაურობა, თუ კი მარგალიტა შორს მეყოლებოდა-მეთქი!

აი რა მაწუხებდა და რა მახარებდა იმ დროს, როდესაც ყველგან საშინელი ცვლილება ხდებოდა, ყველგან საპოლიტიკო კამათი ისმოდა და სამშობლოს განსაცდელი დღითი-დღე მატულობდა.

ერთხელ ხმა გავარდა, ავსტრიელები შემოსულან საფრანგეთში და არდენში მყოფი ჯარების უფროსი — გენერალი ბუაიე წინ გაგებებიაო.

საშინელება იყო! ჩვენი მილიცია. — 30 ათასი კაცით გავიდა მაშინ მტრის დასახვედრად. მთიულებს რომ თოფები არა ჰქონდათ, ჩვენსა ჩამოდიოდნენ და სამკედლოში დაქანგებულ შუბებს გვალესინებდნენ. ყველგან საყვირის ხმა გაისმოდა, ყველა იარაღს ეძებდა. და ის იყო შეგვეშადენით და ფალსბურგელებთან ერთად საომრად უნდა წავსულიყავით, რომ ამბავი მოგვივიდა: ჩვენმა კეთილმა მეფემ ნება მისცა ავსტრიელებს, არდენის მთები გადაიარეთ და ბელგიის რევოლუცია წაახრჩეთო.

მეფეს არავითარი უფლება არა ჰქონდა უცხოელ ჯარებისთვის ნება მიეცა, საფრანგეთზედ გაიარეთო. ამის უფლება მარტო საერო კრებასა ჰქონდა და სხვას არავის. მაშინ კი ბრძამაც დაინახა, რა სასარგებლო სამსახურს გაუწევდა ხალხს მილიცია და თვით ნათლია-ჩემიც კი ძველებური სიყვარულით აღარ იხსენიებდა „ჩვენს კეთილს მეფეს“. ბელგიის რევოლუცია ჩვენი რევოლუციის ღვიძლი შვილი იყო და ყველა აღშფოთდა, როდესაც აღმოჩნდა, რომ ჩვენი მეფე ავსტრიელ ჯარებს პელგიაში შესვლას და ბელგიელი ხალხსა დაწოკებას უადვილებდა. მინისტრებმა გამოაცხადეს, ეს იმიტომ მოხდა, რომ საფრანგეთს და ავსტრიას საიდუმლო დიპლომატიური კავშირი აქვთ შეკრულიო... საერო კრებამ არ მოინდომა ამ საქმის ძირისძირამდე გაჩხრეკა, რადგან ეშინოდა, კიდევ სხვაც არა აღმოჩნდეს რა ამაზედ უარესიო.

1790 წ. მარიამობისთვის დასაწყისი იყო, და ღიდებულთა საქმე უარესად მიდიოდა. იმისთანა სამარცხვინო მგონა თავის დღეში არა მომხდარა რა საფრანგეთში: ჯარისკაცები თავიანთ ოფიცრებს ქურდობას სწამებდნენ. მართებლობის ყველა ჯარებში ჯარისკაცები ოფიცრის სახლს დარაჯს უყენებდნენ და ანგარიშსა სთხოვდნენ.

თავად-აზნაურობა რევოლუციამ დაღუპაო! რევოლუციამ კი არა, თავისმა უსინდისობამ და უპატიოსნებამ დაღუპა. იმათ რომ ცოტა რამ პატიოსნება ჰქონოდათ, ხომ არც რევოლუცია მოხდებოდა! კპარავდნენ და ვისა კპარავდნენ? საწყალ ჯარისკაცს, რომელიც ისე

ემსახურებოდა მართებლობას, ცარიელი ლუკმა პურისთვის, რადგან ჯამაგირი არავის ეძლეოდა. და წარმოიდგინეთ ოფიცრების უღმერთობა, ამ ლუკმასაც ისე აძლევდნენ ჯარისკაცს, რომ ნახევარი თვითონ რჩებოდათ. მერე ვინა პპარავდა? დიდებული თავად-აზნაურნი, რომელთაც, ღმერთმა ხომ იცის, არა აკლდათ რა, არც სიმდიდრე, არც პატივისცემა, არც დროს გატარება და ქეიფი. განა გაბედავდა ვინმე და წარმოიდგენდა, რომ ოფიცრები ჯარის გაქურდვას იკადრებდნენ? ხომ ძნელი წარმოსადგენი იყო და მართალი კი გამოდგა: ჯარები თავის უფროსებს ანგარიშსა სთხოვდნენ და დანაკლისს, ესე იგი, მოპარულს, ართმევდნენ კიდევ. ბოსის ჯარი 940 ათასს ედავებოდა თავის ოფიცრებს, ნორმანდიის ჯარი — ორ მილიონამდე! ოფიცრებიც იძულებულნი იყვნენ თავიანთი ცოდვა ეღიარებინათ და ამასლა იძახდნენ: მოგვითმინეთ, უნდა ვიანგარიშოთო. სტრასბურგში შვიდი რაზმი აჯანყდა; ბიტუში ჯარისკაცებს კინწისკვრით გაერეკნათ თავიანთი ოფიცრები; საერო კრება ეგვდრებოდა მეფეს „ინსპექტორები დანიშნეთ და დაავალეთ, რაზმის უფროსის, რამდენიმე ოფიცრის, ყველა ათისთავების და ოთხი ჯარისკაცის თანდასწრებით გადასინჯონ უკანასკნელი ექვსი წლის ანგარიშები და თუ ჯარისკაცთა საჩივარი მართალი აღმოჩნდა, დაუყოვნებლივ დააკმაყოფილონო“. ინსპექტორები დანიშნეს, გამოძიება მოახდინეს და აღმოჩნდა, რომ ყველგან ერთი და იგივე ცოდო ტრიალებდა და ბევრმა რაზმმა დაუბრუნა მაშინ ჯარისკაცებს შექამადზედ და გაუცრელ პურზედ მოპარული ფული. საზიზღარი იყო ეს საქმე და ქვეყანა იმას გაიძახოდა, კიდევ კარგი, რომ რევოლუცია მოხდა, თორემ უარესს გვიზამდნენო.

უნდა გენახათ, რა გაბრაზებულნი იყვნენ ოფიცრები ჯარისკაცებზედ, რომელნიც ბედავდნენ და თავიანთ უფროსებს ქურდობას აბრალებდნენ და ნაქურდალს ედავებოდნენ. დიდი ძალი ოფიცრობა გაიხიზნა მაშინ საფრანგეთიდან; მიდიოდნენ და რევოლუციის წინააღმდეგ ამხედრებულ ავსტრიას უერთდებოდნენ თავიანთ ცოდნით და იარაღით. მაგრამ ისიც უნდა მოგახსენოთ, რომ ოფიცრობაში ცოტაოდენი პატიოსანი კაცებიც მოიპოვებოდნენ, რომელნიც ზიზღით უყურებდნენ დამნაშავეთ; ისე რომ, ყველანი არ გახიზნულან. ვისაც ნებაეს, ათასობით ჩამოეუთვლი გაპარულ-გახიზნულთა გვარებს, რადგან მაშინდელი გაზეთები ეხლაც შენახული მაქვს და იქ ყველანი დასახელებულნი არიან. მთელი აღზას-ლორენი აღმფოთდა. და დიდი ხანი არ გასულა მას შემდეგ, რაც ის ქურდები გაიპარნენ, — ქურდები, რადგან უმეტეს ცოდვას ვერც ერთი ქურდი ვერ ჩაიდენს. ისინი იარაღით ხელში მოუძლოდნენ საფრანგეთზედ ამხედრებულ

უცხოელ ჯარებს და საკუთარი სამშობლოს განადგურებას და დამცირებას ცდილობდნენ. განა იმას ამბობდნენ, შევეცდით და მუხლმოდრეკით გვევადრებით, გვაპატიეთ... ამას როგორ იკადრებდნენ დიდებული თავად-აზნაურნი.

15 მარიაშობისთვის ნათლიაჩემის ღუქანში სუდერი მოვიდა. სუდერი მეჭურჭლე იყო, ლინეფილის მხარეს დადიოდა და ჭურჭელსა ჰყიდდა; უფრო კი სცვლიდა: ზოგს ძველ სარეცხში, ზოგს დამტვრეულ მინაში, ზოგს ნაცარში. თავის კუდმოჭრილი ცხენი იქვე ეზოში დაება და თითონ ჩვეულებისამებრ, ერთი ჩარევა ღვინო მოეთხოვა. მოხუცებული კაცი იყო, ჰალარა; და ყვავილისაგან დამაზინჯებული. დადიოდა, ჭურჭელს ასაღებდა და თან მთელი ქვეყნის ამბებს ავრცელებდა. ჩვენს მხარეში სუდერს „ბაყაყის მკვლელს“ უძახდნენ, რადგან სუდერი და მთელი იმისი სოფელი იძულებულნი იყვნენ ღამ-ღამობით ლინდრის ტბაზედ კეტებით დაეჩუმებინათ ბაყაყები, რომ ყიყინით ბატონისთვის ძილი არ გაეფრთხოთ.

ნათლიაჩემმა ჰკითხა, ახალი ხომ არა იცა რაო, და იმასაც ამკითხვის მეტი არა უნდოდა რა: დიდი არეულობაა ნანსის მხარესაო, როგორც მოგეხსენებათ, ნანსის მხარე სამი რაზმით არის გამაგრებული და ვერ წარმოიდგენთ, რა უთანხმოება ჩამოვარდა ოფიცრებსა და ჯარისკაცთა შორისაო. — თან თვალს გვიშვრებოდა, — მეტიც ვიცი, მაგრამ...

სწორედ ამ დროს წამოდგა ნიკოლი და გარეთ გავიდა. — ჯარისკაცები იმაზედ არიან აღელვებულნი, რომ ოფიცრები ანგარიშს არ უსწორებენო. ერთმა რაზმმა აჯობა თავის უფროსებს და 150 ათასი გადაახდევინა; მეორემ 48 ათასი; ახლა მესამე რაზმის ანგარიშს ასწორებენ. მესამე რაზმი თავის უმფროსებს 229 ათასს ედავება. მაგრამ ისინიც მაგრა უდგნენ და ცემითა ჰკლავდნენ, ვინც კი გაბედავდა და ანგარიშზედ კრინტს დასძრავდა. კინაღამ ამოჰხოცეს იმოდენა ხალხი; ბოლოს ეს ამბავი მოქალაქეთ გაიგეს და, რასაკვირველია, ჯარისკაცებს მიემხრნენ; ჯერ პირდაპირი შეტაკება არ მომხდარა, მაგრამ დღე ისე არ გავა, რომ ოფიცრებმა დუელში არ გაიწვიონ მშვიდი მოქალაქენი და რამდენიმე კაცი არ მოკლან. მთელი ქალაქი ღელავს, მოქალაქეებს მილიცია მიემხრო და, ვინც იცის, რითი გათავდება ეს უბედურებაო.

სუდერი იცინოდა, მაგრამ ჩვენ კი სიცილის გუნებაზედ არ ვიყავით, რადგან საზღვარიდან სულ ერთი საათის სავალზედ ვიდექით. ამასთან ვიცოდით, რომ ვინც კი ერთგული მამულიშვილი ეგულებოდათ ჯარში, სხვადასხვა მიზეზით თავიდან იშორებდნენ და საზღვარის გასამაგრებლად მარტო მტრისა და მტერთან ერთად მომავალი

გახიზნული თავადის შვილების მომხრენი იყვნენ. რომ შემოგვევოდნენ, დაყვირებასაც ვერ მოვასწრებდით, მით უფრო რომ პრუსიის მეფე ფრიდრიხი და ავსტრიის ხელმწიფე ლეოპოლდი, ის იყო, მოარიგდნენ ერთმანეთში და გამოაცხადეს: საფრანგეთის რევოლუციის მომხრენი ჩვენი პირადი მტრები არიანო.

ბევრი კიდევ სხვა გვიამბო, ბევრი ჭურჭელი გაასალა, დანახარჯი გადაიხადა და გამოგვესალმა. აჰყვასოფელს და წამდაუწუმ ყვიროდა:

— ჭურჭელი იყიდეთ, გამოსცვალეთ ჭურჭელი!

მაგრამ ამ დროს ერთი იმისთანა ამბავი მოხდა, რომელმაც ცხადად დაგვიმტკიცა, რომ მარტო მეფე ლუი მეთექვსმეტე და გახიზნულნი კი არა, მარტო თავად-აზნაურობა და ბერები, ეპისკოპოსები და ოფიცრები კი არა, არამედ ზოგი ჩვენი დეპუტატიც იმათ მისდგომოდა და ცდილობდა რევოლუცია შეეყენებინა როგორმე და გლეხკაცობისთვის ძველი უღელი დაედგა ქედზედ.

ეს ამბავი შოველის წერილმა მოგვიტანა და ძალიან ვწუხვარ, რომ ნათლიაჩემმა ეს წერილიც ვილაცას გაუბოძა წასაკითხავად და მას აქეთ თვალითაც აღარ გვინახავს. შოველი იწერებოდა, მირაბო და რამდენიმე სხვა მესამე წოდების დეპუტატი მეფემ მოისყიდა და ახლა სულ იმას გაიძახიან, რევოლუცია ძალიან გაზვიადდა და შორს წავიდაო; ამ მოსყიდულთაგანი ერთი მინისტრობას ცდილობს, მეორეს ციხე-სიმაგრე და დიდი მამულის დაპატრონება ნებაგს, მესამეს საკუთარი სასახლე და ბატონ-კაცური ცხოვრება; ასე გასინჯვით, თვით ლაფაიეტი და ბაილიც კი როგორღაც მრუდედ იქცევიან, ლამის ამათაც გვიმტყუვნონო; ლაფაიეტი და ბაილი სულ იმას გაიძახიან, მეფეს მეტად სასტიკად მოვექეციოთ, რომ ყოველი უფლება ჩამოვართვიოთ და ხალხს დავუმორჩილებოთ; სირცხვილი არ არის, მეფეს წელიწადში 40 მილიონზე მეტს არ ვაძლევთ, როდესაც კარგად ვიცით, რომ ფულიც იმისია, მოსავალიც, მამულიც, საქონელიც და ხალხიც... ამ ფულით როგორ იცხოვროს საწყალმაო?! დიად, 40 მილიონი დავუნიშნეთ წელიწადში და ისინი კი იმას ტირიან, არ ეყოფაო.

იმავე წერილში შოველი ახალს, ჩვენთვის უცნობ კაცებზედ ლაპარაკობდა, რომელნიც კლუბებში გამოჩნდნენ თავდაპირველად და ახლა სამავალითოდ მოღვაწეობენ ხალხის სასარგებლოდო; სხვათა შორის დასახელებულნი იყვნენ: დანტონი, რობესპიერი, ლეჟანდრი, პეტიონი, ბრისსო, ლუსტალო დემულენი. მაგრამ ამათგანი ერთი არ გადარჩენილა უდროოდ სიკვდილს: ცოცხალნი იყვნენ და ღარიბ-ღატაკნი იყვნენ, რადგან ხალხს ემსახურებოდნენ და სიკვდილითაც.

შემდეგში ყველას თავები დააყრევინეს, რადგან ხალხს ემსახურებოდნენ. ხალხმა უმტყუვნა მათ და გაჭირების დროს მტერს მისცა ხელში. დიად, ხალხის ერთგული მოსამსახურენი სამარცხვინოდ იქმნენ დასჯილნი და თავად-აზნაურთა მსახურნი კი მდიდრულად დაჯილდოებულნი. ბევრნი დღესაც ცოცხალნი არიან და განცხრომითა ცხოვრობენ; თავად-აზნაურთა მსახურნი ყველანი წარჩინებული პირები გახდნენ, და ისე ცხოვრობენ, თითქო პირადი ღირსებით შეუძენიათ რაცა აქვთ, და არა სამშობლოს დალატითაო. კაცს ყოვლად სამართლიანი ღმერთის იმედი რომ არა ჰქონდეს, — აცა, ცოდოს არავის შეარჩენსო, — საშინელება იქნებოდა ამგვარი მაგალითები და სრულიად უტყინო და თავმოყვარეობას მოკლებული უნდა იყოს კაცი, რომ თავი შეაკლას ხალხს სამსახურს, როდესაც ეს ხალხი წარბსაც არ იხრის, თუნდა ჯვარს აცვან იმისმა მტრებმა იმის ერთგული შვილები, ცილი დასწამონ იმათ სახელს და ჩირქი მოსცხონ იმათ პატიოსნებას.

შოველის წერილმა ძალიან შეგვაფიქრიანა, მეტადრე ნათლიაჩემი. დაფიქრებული დადიოდა და იძახდა: ვინც ერთბაშად ბევრს მოინდომებს, მცირესაც ვერ ეღირსებაო! მე სულ სხვა აზრისა ვიყავი და მგონია, არცა ვცდებოდი; ან რას თხოულობდა იმისთანას ხალხი, რომ ბევრი ყოფილიყო? მე კარგად ვხედავდი, რომ ნათლიაჩემიც და ბევრნი სხვანიც იმიტომ იძახდნენ კმარაო, რომ იმათ უკვე შეიძინეს, კარგი ლუკმაც შეიძინეს, და ეშინოდათ, ესეც არ დაეკარგოთ. და ჩვენ კი, ჩვენ, გლეხკაცობას, ჯერ არაფერი შეგვეძინა, და ჩვენც გვინდოდა რევოლუციამი ჩვენი წილი გვრგებოდა.

წავიკითხეთ თუ არა ის წერილი, მაშინვე ლეტუმეიმ წაგვართვა, კლუბში მინდა წავიკითხოო. ხუთშაბათ საღამოს 29 მარიაშობისთვის დახურულ ბაზარში რომ ჩავედი, სამი განცხადება დავინახე შიგ შუა ალაგას გაკრული. განცხადებანი შუა ბოძზე გაეკრათ, რომელზედაც ლამპარი ენთო, მაგრამ სინათლე საკმარი არ იყო და კითხვას ვერავინ ახერხებდა. მაშინ ვიღაცა ავიდა, ლამპარი მოხსნა და განცხადებას მიანათა. ყველანი მისცივიდნენ და კითხვა დაიწყეს. ჩვენებურები სულ უკან იყვნენ და ვერას ხედავდნენ, მაგრამ ლეტუმეიმ როგორღაც გაარღვია ხალხი, განცხადებასთან გაძვრა და იმისთანა მაღალი ხმით დაიწყო კითხვა, რომ გარეთაც გაიგონებდნენ, არამც თუ იქ მყოფნი:

წერილი ლაფაიეტიხსა

მერტში და მოზელში მყოფ მილიციელებისადმი

პარიზი, 17 მარამობისთვის 1790 წ.

ბატონებო!

საერო კრებამ რა სენა საძრახისი საქციელი ნანსელი ჯარებისა და წარმოიდგინა, რა საშინელი შედეგი უნდა ჰქონდეს ამგვარ მღელვარებას, მიიღო დამნაშავეთა შესაკავებლად საშუალებანი, რომელთაც ამასთანავე გაუწყებთ, რათა შეემზადნეთ მოსალოდნელი ბრძანების საჩქაროდ ასასრულებლად.

ნება უბოძეთ, ბატონებო, თქვენს მოძმეს, რომელსაც თქვენ მიანდეთ კონსტიტუციის და საზოგადო წესწყობილებისადმი. თქვენი ერთგულება გამოეცხადებინა, ნება უბოძეთ თქვენს მოძმეს, იმედი იქონიოს, რომ ყოველს საშუალებას იხმართ, რათა გაამაგროთ თავისუფლება, რომლის საძირკველი მარტო კანონიერება არის და მით საზოგადო მშვიდობიანობა ჩამოაგდოთ.

„ლაფაიეტი“

საშინელება იყო ამის გაგონება. რამდენიმე დღის წინათ. რომ წაგვეკითხა, ქულზედ კაცი წავიდოდით დამნაშავეთა დასასჯელად, მაგრამ ნანსელთა ამბები. ვიცოდით და გარდა ამისა შოველიცა გვწერდა, ლაფაიეტი სუსტი ხასიათის და ამოებით გატაცებული კაცი. ზიზით აგვევსო გული, რომ წავიკითხეთ იმის წერილი, რომლითაც გვიბრძანებდა, წადით და იარაღით ხელში შეებრძდეთ ერთგულ მამულისშვილთ, რადგან გაბედეს და თავისი კუთვნილი მოსთხოვეს ქურდებსაო. ჩვენებურები ყვიროდნენ:

— დასწყევლა ღმერთმა! ამისთანა უსამართლობა კიდევ იქნება?! ჯარისკაცებს ამტყუვნებენ, თქვენსას რადა თხოულობთ! და ჩვენ გვიბრძანებენ ჯარისკაცები დასაჯეთო! მერე ვინ უნდა დავსაჯოთ, იმას კი აღარა გვკითხავენ? ისევ ჩვენი შვილები და ჩვენი ძმები?! ერთგულნი მამულისშვილნი, რომელთაც უკანასკნელ ლუკმას აკლიან პირიდან და თან ემუქრებიან, არა სთქვათ რა, თორემ დავსჯითო?!

და განა ერთი და ორი სჯიდა ასე, ყველანი აფიცრებს ამტყუნებდნენ და იძახდნენ, ვალს გადახდა უნდა, თუნდა ვალად კი არა, ქურდულად იყოს წადებულიო. მაგრამ ლეტუმის ჯერ კითხვა არ გაეთავებინა და ქულის ქნევა დაგვიწყო, გაჩუმდით, დანარჩენიც მო-

ისმინეთ! მამულისშვილნო, საერო კრების დადგენილებაც მოისმინეთო!

და თუმცა ბრაზი მოგვერია და გაჩუმება ძალიან გვიძინელდებოდა, ჩვენს თავს ძალა დავატანეთ და მოვისმინეთ საერო კრების დადგენილება. საერო კრება ბრძანებას აქლევდა ჩვენებურ მილიციებს დახმარებოდნენ იმ აფიცრებს, რომელთაც კეთილ ინებებდა და დანიშნავდა მისი უდიდებულესობა „აჯანყებულ ჯარისკაცთა სამაგალითოდ დასასჯელად“. ბოლოს მესამე განცხადებაში ეწერა, რომ მისმა უდიდებულესობამ კეთილ ინება დაქ. ნანსში აჯანყებულ ჯარისკაცთა დასჯა აფიცრებულს მიახლო, რომელიც ამით უბრძანებს მილიციის ყველა წინამძღვართ, რაც შეიძლება საჩქაროდ შეამზადონ თავიანთი რაზმები და სრული ცნობანი გაუგზავნონ მის შესახებ, თუ ვინ სადა დგას და რამდენი კაცი ჰყავს თოფ ქვეშ? ამ ცნობათა დაგვარად გაანაწილებს ბ. დებულე ჯარისკაცთა ჯამაგირს, ყოველ წინამძღვარს რვა დღის საგზალს ჩააბარებს თავის რაზმისათვის. ჯარს მარტო ერთი დროშა ექნება. გზაში მილიციის ჯარისკაცთ ბინა ექნებათ მკვიდრთა სახლებში, როგორც აქამდის ყოფილა. ყველა რაზმები ჩქარი სიარულით უნდა გაემართნენ ნანსისკენ, რომ დროზედ შეაყენონ აჯანყება და სხვადასხვა.

მთელი ქალაქი იქ მოგროვილიყო და ისე ჩუმად ისმენდნენ ამ თავხედურ ბრძანებას, იტყოდით, აქ არავინ არისო.

გაათავა ლეტუმიემ კითხვა თუ არა, ერთი სარკებურგელი სქელსქელი მოხელე აცოცდა დაზგაზედ და ხალხს მიმართა: ბატონებო, დრო არის, მამულიშვილობა დაამტკიცოთო! თითქმის სიტყვა სიტყვით გაიმეორა ლაფაიეტის წერილი, რომელსაც „ვამინგტონის მეგობარს და თავისუფლების მხსნელს“ უწოდებდა და გვიჩვენებდა, მართებლობას დავეხმაროთ, აჯანყებულნი დავსაჯოთო. აქეთ-იქით კიდევ გაისმა რამდენიმე ხმა „ჩვენს მეფეს გაუმარჯოს! ლაფაიეტს გაუმარჯოს! და მოხელე უკვე გამარჯვებულად სთვლიდა თავის თავს და გულში ხალხს დასცინოდა, მაგრამ ამ დროს ხალხიდან ჩვენი ელოფ კოლენის ხმა გაისმა და ყველანი სმენად იქცნენ. კოლენმა უპასუხა: „ერის მცველი ჯარი“ ხალხმა იმიტომ კი არ გამოიყვანა, რომ თავისი ძმები და შვილები აქლეტინოს, არამედ იმიტომ გამოიყვანა, რომ გაჭირვების დროს იმის იმედი ჰქონდეს და მტრის მომგერებელი ჰყავდესო. ნანსელ ჯარებს ტყუილად სწამებთ აჯანყებას, ისინი თავიანთ ხვედრსა თხოულობენ, იმ ხვედრს, რომელიც დიდებულმა აფიცრებმა მოჰპარეს. საცა სამართალია, ჯერ უნდა გაუსწორდეთ, თავიანთი ჩააბაროთ და მაშინ ნახავთ დაწმენილდებიან

თუ არაა? მიეცით, რაც ერგებათ და მაშინვე დამშვიდდებიან და დაწყნარდებიან, არც იმათი დასჯა მოგინდებათ და არც ძმათაგან ძმათა სისხლის ღვრა. უბედურებაც ის არის, რომ თქვენ სულის ცხონებასავით გენატრებათ არეულობა, სულ იმასა ცდილობთ, რომ ჯარი და ხალხი ერთმანეთს შეატაკოთ და ხელმეორედ კისერზედ დაგვასხდეთ. მაგრამ ველარ მოგართვით! დარწმუნებული ვარ, აქ მყოფნი ყველანი დამეთანხმებიან, რომ ვისაც კი ცოტაც არის გონება უჭრის, ამ საქმეში არ გაერევა და თუ გაერია, მარტო იმიტომ გაერევა, რომ ჯარისკაცებს აფიცერთაგან მოპარული დაუბრუნოს. ეს საქმე მარტო მართებლობის ჯარს და აფიცრებს შეეხება და ერი და ერის მცველი ჯარი არ უნდა გაერიოს!

საშინელი ყვირილი გაისმა ამ სიტყვის შემდეგ. ზოგნი ერთისკენ იყვნენ, ზოგნი მეორისკენ. ვისაც ბერების მამულები ეყიდნა, მაგალითებრ ნათლიაჩემი, ნიკოლოზ როში, ეგლეი მედუქნე, მელხიორ ლეონარი, უწინდელი მოხელე, ლუი მასსონი, მეფოსტე, რაფიელ მანგი, ჟერარი, და ერთობ ყველა შეძლებულნი, ლაფაიეტისკენ იყვნენ და ამასთან ბევრნი მომხრენიცა ჰყავდათ, რადგან ბევრ მოჯამაგირეს და ხელოსანს ინახავდნენ თავიანთ საქმეებში.

ამ შეძლებულთ დაედგინათ კიდევ სამამასახლისო რჩევაზედ, რომ ფალსბურგი იმის გარდა, რომ მილიციით დაენმარება აჯანყებულ ჯარის დასჯას, ფულითაც შეეწევა ამ საქმეს და ოცდახუთ თუმანს მიართმევს აფიცრ დებულეს. ეს იმ დილით დაედგინათ; და თუმცა საღამოზედ ჩვენს კლუბში კოლლენმა იმისთანა კარგი სიტყვა სთქვა, უმრავლესობამ მაინც დაადგინა: ხვალ დილა აღრიანად ერთი რაზმი მილიციისა ნანსისკენ წავა; გარდა ამისა ყოველი სოფელი დანიშნულ რიცხვს გამოიყვანს თავის მილიციას და ომნიც ნანსისკენ წავლენ, როგორც კი შემზადდებიანო. ჩვენ სოფელს 15 კაცი უნდა გამოიყვანა და ნათლიაჩემი, ლეტუმეი და მეც იმათში მოგვაქციეს, რადგან ყველაფერში წინ ჩვენ წაგვიხირავდნენ ხოლმე, საუკეთესო პატრიოტები ხართო.

ნათლიაჩემს ძალიან მოსწონდა ეს გადაწყვეტილება, ძალიან სამართლიანად მოვიქცეთო. მე კი მგონია, რომ ცოტა არ იყოს „ჯარობანა“ ეხალისებოდა: ნანსში ჩავალ, ჩემს ახალს ტანისამოს ვაჩვენებ ქვეყანასაო. ხომ ისეთი გულჩვილი და პატროსანი კაცი იყო და, ვერ წარმოიდგენთ, როგორ გაიტაცებდა ხოლმე ამგვარი ბავშვური ამოება. ლეტუმეი, ნათლიაჩემი და მე შინ ისე ავედით, რომ ამ გადაწყვეტილების სამართლიანობაზე ვერ შევთანხმდით.

ბოლოს პირობა დავდეთ, ხვალ რიყრაჟზედ ნათლიაჩემის დუქნის წინ შევიყარნეთო და გამოვეთხოვეთ ერთმანეთს.

მეორე დღეს დილაადრიანად ნათლიაჩემთან შევიყარენით, ერთ-მანეთს გზა დავულოცეთ, პური გავტეხეთ და ჯერ ექვსი საათი არ შესრულებულიყო, რომ ქალაქში ვიყავით სამხედრო მოედანზედ; სხვა სოფლიდანაც ჩამოსულიყვნენ მილიციელები და სულ ორმოც-დაათამდე ვიქნებოდით. ცოტა ხანს უკან ნალარაც დაჰკრეს, რომ დაგვიანებულათვის ეცნობებინათ, აჩქარდით, ნუ გვაგვიანებთო. ხუთი-ექვსი კაცი კიდევ მოგვემატა. მერე ჩვენმა უფროსმა ყერარმა ჩამოგვიარა, ყველანი გაგვსინჯა და უბრძანა, ტყვია-წამალი დაერიგებინათ კაცზედ ოცდახუთი სროლა.

რაკი ნახა, რომ ყველაფერი რიგზედ იყო, ყერარი ცხენს მოახტა და წასვლის წინ პატარა სიტყვა გვითხრა, რომელშიაც აგვისხნა მილიციელი მამულიშვილის ვალდებულებანი. ხმალი ამოიღო და დაჰკრეს ნალარა. მაგრამ სხვა აღარავინ მოგვემატებია. შეინძრა ჩვენი რაზმი და საფრანგეთის კარისკენ გასწია. ქუჩები ხალხით იყო სავსე და გრიალი გაჰქონდა ყვირილს: ჩვენს მეფეს გაუმარჯოს! თავისუფალ ერს გაუმარჯოს! ბავშვები ხომ უკან გამოგვედევნენ და მიტეტელბრონის გზაზე ჩამოგვაცილეს, ზოგი პტისენქანამდეც ჩამოგვეყვა. მერე კი მარტონი დავრჩით ჩვენს გზაზედ. მე ჩემს დღეში აღარსად შემხვედრია იმისთანა სიცხე, როგორიც 30 და 31 მარაამობისთვის იდგა. ცხელოდა, ცხელოდა, რომ იწვოდა იქაურობა და ამ სიცხე-პაპანაქებას ზედ ერთოდა საშინელი მტვერი. ეგეც რომ არ იყოს, იმ დღეს პირველი იყო ჩვენგან სამხედრო სიარული და, რასაკვირველია, ძალიან გაგვიჭირდებოდა. მარტო კაცი რომ მიდის, თავის ნებისად მიდის; და ჯარში კი სხვებს უნდა მიჰყვე, ყოველთვის შენს ალაგას უნდა იყვე, რაც უნდა გცხელოდეს და მტვერი გახრჩობდეს.

მიუხედავად ამისა თერთმეტ საათზე სარბურგში ჩავედით. მოქალაქენი გაკვირვებულნი გვიყურებდნენ. ცოტა ხანი შევისვენეთ, და ისევ გზას გავუდექით. შვიდ საათამდე აღარსად გავჩერებულვართ, შვიდ საათზედ კი ბლამონში ჩავედით და კარგადაც დავისვენეთ.

მედიოდით და ნათლიაჩემი სულ იმას ამბობდა, ეს რა ღმერთი გამოიწყრა, ჩემი ძვირფასი ტანისამოსი რად ჩაეიცვით? რა მრჯიდა, რა მაკობტავებდაო? ჩვენი ივანე რუ ისე დაქანცულიყო, რომ ფეხებს ძლივსლა მიათრევდა; ენა გადმოეგდო, მოკუზულიყო და ნალარა რომ არა ჰქონოდა, იქნება უკანაც ჩამოგვრჩომოდა. მე ჯერ არა მიშავდარა; მართალია, თავით ფეხამდე ოფლში ვიწურებოდი, და ცხვირპირი მტვრითა მქონდა გამოტენილი, მაგრამ

მე უფრო ადვილად ავიტანე მთელი დღის სიარული, ვიდრე სხვებმა. ერთობ კი სოფლელები გაცილებით სჯობდნენ ქალაქელებს.

ისე დაღალულები იყვნენ ქალაქელები, რომ საცა კი ურემი ნახეს ბლამონისკენ მიმავალი, ყველანი ზედ უსხდებოდნენ და ისე მოგვდევენ.

როგორც იყო ბლამონშიაც მივედით. ჩვენი უფროსი უერარი და კაპიტანი ლაფრენე მამასახლისთან დააწვინეს; ნათლიაჩემი და ლეტუმეიე ნაცვალთან; ივანე რუ, იაკობ გრიო და მე ერთ სირაჯთან, რომელმაც მეტის-მეტად კარგად მიგვიღო, კარგი ვახშამი გვაჭამა და მილიციის ამბავი გვიამბო: ჩვენი მილიცია გუშინ წავიდა ნანსისკენ... წასვლით კი წავიდა, მაგრამ ვაი ამ წასვლას! არც თოფები აქვთ, არც სხვა იარაღი. კიდევ კარგი თუ იქ მისცეს, როგორც დაჰპირდნენო.

ძალიან პატროსანი კაცი გამოდგა ჩვენი მასპინძელი და ამასთან ძალიან პატრიოტიც. ვახშამზედ მშვენიერი ღვინო დაგვალევინა და რადგან მეორე დღეს ძალიან ადრე უნდა გავდგომოდით გზას, რომ სიგრილეში გვევლო, ვახშმის შემდეგ ბევრი აღარ ვილაპარაკეთ და დასაძინებლად მოვემზადენით; იქვე ოთახში შეგვიყვანა, სადაც ორი ტახტი იყო გაშლილი. ივანე რუ და გრიო დიდ ტახტზედ დაწვნენ, მე მეორეზედ დავწექი და ისე მეძინა, რომ ფეხი არ გამინძრევია. მეორე დღეს ბევრი მუჯღლუგუნე თურმე წამკრეს, ვიდრე გონებაში ჩამადგებდნენ. ჩვენი ივანე უკვე ქუჩაში იყო და ნალარას უკრავდა: ადექით, წასვლის დრო არისო! სამი საათი იქნებოდა. ოთხი საათი არც კი იყო, რომ ბლამონიდან გავედით და კარგა მანძილიც გავიარეთ მზის ამოსვლამდე. კიდევ კარგი, რომ ასე მოგვიხდა, თორემ იმისთანა ცხარე სიცხე დაიჭირა იმ დღეს, რომ დავიხოცებოდით, მზეში რომ გვევლო.

ცხრა საათზედ ლუნევილს მივუახლოვდით. გავსწორდით, რიგზედ დავეწყენით, იარაღს და ტანისამოსს მტვერი გადავაცალეთ, წინ ნალარა გავიმძღვარეთ და ლუნევილში ისე შევედით.

იქაც ძალიან იამათ ჩვენი მისვლა. ყველანი გარედ გამოცვიდნენ და სიხარულით მოგვძახოდნენ, თავისუფალ ერს გაუმარჯოსო! ბავშვები თან მოგვდევენ, ქალები სიამოვნებით თვალს გვადევნებდნენ და გვიცინოდნენ. ისიც არის, რომ ლუნევიელები ყოველთვის ერთგული მამულიშვილნი იყვნენ და პატრიოტობით განთქმულნი.

მახსოვს ერთ პატარა, ოთხკუთხ მოედანზედ გავჩერდით. თოფები ავაყუდეთ, იქვე მოედნის კუნჭულში ერთს მშვენიერ ღუქანში შევარდით ნათლიაჩემი, ლეტუმეიე და მე, რადგან ერთად-

ერთი საათი გვექონდა დასასვენებლად და ძალიან გვეჩქარებოდა.

— მგონი არა გვიჭირს რა, პა? — წამოიძახა ნათლიაჩემმა. — ჯერ ყოჩაღადა ვართ, თუ თქვენც იტყვიით!

— ჯერ არა გვიჭირს, მაგრამ საქმე ახლა არის: ჯერ კიდევ კარგი გზა გვაქვს გასავლელი. — უპასუხა ლეტუმიემ.

— კარგი ერთი! საქმე აქამდე იყო, თორემ ეხლა რაღა გვიჭირს? ერთი ჩავიდეთ, ვნახოთ რა ამბებია!

გარეთ მოედანზედ დაქუჩებში ისე ირეოდა ხალხი, თითქოს დღეობა არისო; მოქალაქენი, ჯარისკაცნი, მუშები სულ იქ იყვნენ. გლეხკაცები სულ მოედნისკენ მოეშურებოდნენ და ჩვენა გვსინჯავდნენ. დუქანში ხომ კაცს აღარ შემოესვლებოდა. ჩვენს გვერდით მართებლობის მოხუცებული ჯარისკაცები ისხდნენ, სვამდნენ და მხიარულად ლაპარაკობდნენ; ამბობდნენ, ნანსში ჯარები და აფიცრები მორიგებულან, ჯარისკაცებს თავიანთი მიუღიათ და დამშვიდებულან; ყველაფერი ძველებურად თავის ღონეზედ დამდგარა და ბევრი-ბევრი რამდენიმე კაცი დაისაჯოს, რომელნიც სხვებს აქეზებდნენო.

ეტყობა, მართალი იყო ეს ამბები, რომ გარედან ყვირილი ისმოდა, ჩვენს მეფეს გაუმარჯოსო! ჩვენს გვერდით მსხდომი ჯარისკაცები კი იცინოდნენ, ლუდსა სვამდნენ და იძახდნენ:

კიდევ კარგი, რომ მორიგებულან, თორემ...

საერთო სიხარული ამტკიცებდა, რომ ძალიან სამწუხარო იქნებოდა ჩვენი ერთმანეთთან შებრძოლება და მილიციისაგან მართებლობის ჯარისკაცების დასჯა, როდესაც ყველანი ვგრძნობდით, რომ დასასჯელი ჯარისკაცები არ იყვნენ. ჩვენც ძალიან გაგვეხარა ეს ამბავი და იმისთანა სიამოვნებით ვკამეთ პური, რომ მეტი რაღა მოგახსენოთ.

ყერარი ლუნევილის მოურავის სანახავად წასულიყო და რადგან უფრო და უფრო დამაჯერებლობით ამბობდნენ — მორიგებულანო, ჩვენს წასვლასაც არავინ აჩქარებდა და თერთმეტ საათამდე იქ დავრჩით. თერთმეტ საათზედ, როცა წასვლის ნაღარა დაჰკრეს, მამასახლისი და ნაცვალი მოვიდნენ ჩვენს სანახავად, ყერარი ცხენზედ შეჯდა, სამხედრო სალამი მისცა და დაიძრა ჩვენი ჯარი. მივდიოდით და თან ის გვიხაროდა, სამტროდ კი არა, სამეგობროდ მივდივართო.

ოთხი საათი იქნებოდა, რომ შორს შავად რაღაცა ციხეები გამოჩნდა. გამეხარადა, მეგონა, აგერ ნანსში ჩავსულვართ-მეთქი, მაგრამ თურმე სენნიკოლა ყოფილიყო. მივდიოდით გაჩუმებულნი, თან საშინელი მტვერი გვახრჩობდა... უცბად შორიდან, მხარ

მარჯვნივ ზარბაზნის ხმა შემოგვესმა. ისე შედგა ჩვენი რაზმი, თითქო ერთი კაციყო. ვიდრე ერთი და გამტერებული ყურს ვუგდებდით. ჩვენ კი არა, ჩვენს გარშემო ბუნებაც კი გაჩუმდა. კვლავ გაისმა ზარბაზნის ხმა, მეორედ, მესამედ, მეოთხედ. ჩვენი წინამძღოლი გაკვირვებით გასცქეროდა შორს სივრცეს, საიდანაც ზარბაზნის გრიალი ისმოდა, მერე მოგვიბრუნდა და გვიბრძანა:

— ზარბაზანს ისერიან, ბიჭებო!... ომი დაწყებულია! აბა, იარეთ! და თუცა დაღლილები ვიყავით და იმ მტერში ერთმანეთს ძლივს ვხედავდით, ისევ გზას ვავუღებთ უფრო ჩქარი ნაბიჯით: გული გვიკვდებოდა, რაკი დავრწმუნდით, რომ ლუნევილის ამბები მართალი არ გამოდგა და უომრად ვერ გადავრჩებოდით. მივდიოდით გაშურებულნი და ხან ერთი ჩამოგვრჩებოდა უკან, ხან მეორე. გაგრძელდა ჩვენი რაზმი, გაიჭიმა, ნახევარმაც ვერ შესძლო სიარული და სენნიკოლას პირველ სახლებთან რომ მივედით და უკან მოვიხედეთ, უმეტესი ნაწილი ჩვენი რაზმისა უკან დარჩენილიყო და ნელ-ნელა მოიზღაზნებოდა. დავდექით და ლოდინი დავუწყეთ, რომ მოწინავენი მაინც მოგვეწოდნენ.

ვის გაუგონია ახლად შეგროვილი რაზმის ასეთი ჩქარი სიარული? ყველაფერი შეჩვევამ და ვარჯიშობამ იცის. შემდეგშიც ბევრჯელ მინახავს ჩვენი უფროსების დაუდევრობა, მეტადრე გერმანიაში: აბა, ბიჭებო, ჩქარი ნაბიჯითაო! გვეტყოდნენ და გაუღგებოდნენ გზასა. და ახლად მოყვანილი ბიჭები ყოველთვის უკან დარჩებოდათ ხოლმე. კიდევ კარგი, თუ უკან ცხენოსანი ჯარი მოგვდედა და დაცევიწულთ ისინი უპატრონებდნენ.

ბოლოს, როგორც იყო, შევგროვდით თითქმის ყველანი და ქ. სენნიკოლაში შევედით; საცა გავიხედეთ, ყველგან საფეიქრო იყო გამართული და შალები და მაულები ჰქონდათ გამოფენილი, გეგონებოდათ, ბაზრობა დღე არისო. ბევრი რამ შეიცვალა მას შემდეგ. მაშინ კი ძალიან განთქმული იყო სასწაულთმოქმედი წმინდა ნიკოლოზის ოქროს მკლავი და დიდძალი მლოცავი დიარებოდა მისი თაყვანის საცემლად. დიდი სახელი ჰქონდა ამ წმინდანს, მაგრამ რევოლუციას ფულები უჭირდა და რადგან წმინდანები ვერასა შევლოდნენ, წმ. ნიკოლოზის ოქროს მკლავი დაადნობინა და მასთან ერთად ბარძიმ-ფეშხუმი და ზარები და ფულად აქცია.

მაშ რა გვექნა? მთელი ევროპის ჯარები საფრანგეთს მოსეოდნენ და მიწის პირიდან აღგვას უპირებდნენ. ვილუპებოდით!

დიდი ქუჩა ხალხით სავსე იყო. ვაჭრები და ხელოსნები ვულგახეთქილები გამორბოდნენ გარეთ, უკან დედაკაცები და მტირალი

ბავშები მოსდევდნენ. ძველი ტაძრის მოედანზედ იმოდენა ხალხი შეგროვილიყო. ქალაქელები და სოფლელები, მუშები და მილიციელები, რომ ჩვენი რაზმისთვის ალაგი ძლივს ვიპოვეთ, ეს ამოდენი ხალხი, მეტადრე მილიციელები და მუშები, ნანსიდან გაპორეკათ, რადგან ჯარის მხარე ექირათ. საშინლად აღელვებული იყვნენ ყველანი: ჩვენ დავგვარწმუნეს, რომ შევრიგდით, საშიში და საჩხუბარი აღარა გვაქვს რაო, თავიდან მოგვიშორეს, რომ ჯარისკაცთ არ მივშველებოდით და ის იყო ქალაქიდან გამოვედით, რომ შინ წამოვსულიყავით, და კიდევ მისცვივდნენ დაქირავებული ჯარებით ერის ერთგულ ჯარისკაცებს და ხოცვა დაუწყესო... იქვე მოედანზედ ერთი ამგვარად შოტყუებული მოხუცებული კაპიტანი შეგვხვდა; მოვიდა, სალამი მისცა ჩვენს წინამძღოლს და უთხრა:

— თქვენ ნანსში მიბრძანდებით, ბატონო ჩემო? ნუ იზამთ მაგას... ქალაქის მოურავი აფიცრებს მიმხრობია და მილიციელებს ისე ექცევიან, როგორც აჯანყებულებს. იქნება არც კი შეგიშვან და თუ შეგიშვებს, ხაფანგში გაგაბამენ, ია ქვეყნის მოღალატენი! ცოფსა ჰყრიდა საწყალი მოხუცებული კაპიტანი.

— ბატონო კაპიტანო, — უპასუხა ჩვენმა წინამძღოლმა, — მე და ჩემმა რაზმმა ჩვენი ვალდებულების მეტი არა ვიცით რა.

— თქვენი ნებაა, მეკი გაგაფრთხილეთ და ახლა თქვენ იცით. რადგან ძალიან დაღლილებიც ვიყავით და არც ყველანი დაგვწოდნენ, დასვენების ნება მოგვცეს და, ღვთის წყალობა გაქვთ, ჩვენ დუქნებს მივვარდით, რომ ყელი გაგვესველებინა რითიმე.

მოქალაქენი ბანებზედ ასულიყვნენ და იქიდან დურბინდით იცქირებოდნენ ნანსისკენ. ჩამოვიდოდნენ და ხალხს ახალ ამბად აცნობებდნენ:

— ბრძოლა წმიდა პეტრეს უბანშია!

— კვამლი სტენვილის მხარეს მოჩანს!

ნახევარი საათის შემდეგ, როცა ყველანი შევიკრიბენით და ცოტაც არის შევისვენეთ, ისევ გზას გავუდექით. ცოტა ხანს უკან თოფის სროლაც შემოგვესმა, ათ საათზედ იმისთანა სროლა ისმოდა, რომ გული გვიფანცქალებდა. ზარბაზანი კი აღარსად იყო. მერე ქალაქიც გამოჩნდა. აგერ ქალაქიდან გამოქცეულთაც გაგვიარეს გვერდით. ისე მორბოდნენ უბედურები, თითქო უკან მღევარი მისდევთო. სულყველანი მუშები იყვნენ, ფეხშიშველნი და ჩაუცმელნი. მორბოდნენ და თუმცა უკან არავინ მოსდევდათ, ისინი მაინც გულგახეთქილები მიეშურებოდნენ, რომ რაც შეიძლება შორს მოჰქცეოდნენ იმ ქალაქს, სადაც ასე უსამართლოდ ხოცავდ-

ნენ ერის ერთგულ ჯარისკაცთ და ამ ჯარების მომხრე ხალხს. მორბოდნენ, ვისაც სიარული შეეძლო, და ვინც უძლურნი და დაქარილნი იყვნენ, იქვე გზის პირას ეყარნენ და მწარედა გმინავდნენ; ზოგი გულში იყო დაქარილი, ზოგი თავში, სისხლი სდიოდათ და იმისთანა თვალთ გვიყურებდნენ, რომ ქვასაც კი აატირებდნენ: თხოვნით კი არასა გვთხოვდნენ: ალბათ ქალაქისკენ მიმავალნი მტრად მივაჩნდით.

თოფის ხმა ჯერ მარტო მარჯვნივ ისმოდა, მაგრამ ცოტა ხანს უკან მთელს ქალაქში ატყდა სროლა. ეს მაშინ მოხდა თურმე, როგორც მერე გავიგეთ, როდესაც დაქირავებულს გერმანელს ჯარს ველარ გაუძლო ჩვენმა ჯარმა და ხალხმა და ზურგი უჩვენა, მაშინ თურმე დაუწყეს უღმერთოდ ხოცვა.

ნანსში შევედით; ისე დაკეტილ-გამაგრებული დავგხვდა სახლები, თითქო მტრის შემოსევას მოელოდნენო. ჩვენკენ საშინელი ღრიალით მორბოდა ხალხი, უკან ხუთი თუ ექვსი მხედარი მოსდევდა და უღვთოდა ხოცავდნენ და ცხენს ასრესინებდნენ. ცხენები ყალყზედ დგებოდნენ, ხმლებს პრიალი გაჰქონდა მზეზედ, ხალხის ბლავილი ცასა სწვდებოდა... მე იმ ბლავილისთანა საშინელი ჩემს დღეში არა გამიგონდა რა, და ღმერთმა ნურც გამაგონოს მოსაკლავად განწირულის ადამიანის სასოწარკვეთილი მხეცური ბლავილი!

სულ ხუთ-ექვს მხედარს კი გამოუბრდნენ! რომ გაჩერებულ იყვნენ და ცხენისთვის აღვირი დაეჭირათ, ხომ გადმოიღებდნენ იმ უღმერთობებს და მატლივით გასრესდნენ! მაგრამ შიში თქვით, თქვენა, შიში! შიშისაგან ისე გაშტერებულ იყო იმოდენა ხალხი, რომ ხუთ მხედარს გაუბრდა და თავს აელეტინებდა.

ჩვენის წინამძღოლის ბრძანებისამებრ კედელს ავეფარენით, რომ ლტოლვილი ხალხისთვის გზა მიგვეცა. ნათლიაჩემმა, ლეტუმემ და სხვა აფიცრებმა ხმალი ამოიღეს და გვიბრძანეს თოფები გატენეთო.

ხალხი კი მორბოდა... წინ გაგვირბინა, თითქო მგლებისაგან დაფეთებული ძროხის ფარა არისო... ჩვენ რომ დავგინახეს მხედრებმა, შეჩერდნენ. ცხენები მიაბრუნეს და იქვე სადღაც ვიწრო ქუჩაში ჩაუხვიეს. ალბათ შეეშინდათ, მილიციამ თოფი არ დავვიშინოსო.

არ გასულა რამდენიმე წამი, ქუჩაში ჩვენს მეტი აღარავინ დარჩა. გაქცეულნი სადღაც მიეფარნენ და მარტო დაქარილნი და დახოცილნიდა ეყარნენ. აქეთ-იქით ქუჩებიდან კი ისევ ის საშინელი სროლა და ხმაურობა ისმოდა და იქვე ერთი პატარა ეკლესიის სამარეკლოდან გლოვის ზარი.

ღმერთო, ღმერთო! რა მწარე ფიქრები ავგშლება ხოლმე, ნანსი რომ მომაგონდება! ღმერთი სამართლიანიო, იტყვიან, რაზედ ამო-ახოცვინა იმოდენა ხალხი და ჩვენი ჯარი? სამართლის მეტს ხომ არასა თხოულობდნენ, ის ბედშავნი!

რაკი ქუჩაში აღარავინ იყო, ჩვენ ისევე გზას გავუდგექით. ის იყო წმ. ნიკოლოზის კარს მივატანეთ, რომ უცნაურმა ყვირილმა „ვერ და“*) გვაცნობა, რომ ნანსი გერმანელი ჯარების ხელში იყო.

ბატონს დებულეს სამაგალითოდ უნდოდა აჯანყებული ჯარის-კაცების დასჯა და, რასაკვირველია, ფრანგების დასასჯელად უცხო-ელთ მოიყვანდა, რადგან დარწმუნებული იყო, რომ ფრანგს ფრან-გი ისე უღმერთოდ ვერ მოექცეოდა.

სისხლი თავში ეცა ჩვენს მოხუცებულ წინამძღოლს, ქალარა უღვაში აუკანკალდა. მარტოდ-მარტო მიუახლოვდა და უთხრა: — საფრანგეთი!... ფალსბურგის მილიცია!

ამ პასუხზედ წინ გამოგვეჭიმა გერმანელი აფიცერი და რამდენიმე ჯარისკაცი დასარწმუნებლად იმისა, რომ სამტროდ არ მივ-დიოდით. ეტყობოდა, ძალიან შიშით გვიყურებდნენ, რადგან დიდ-მა ხანმა განვლო, ვიდრე ის აფიცერი თავის უფროსს მოახსენებდა ჩვენს მისვლას და ჩვენს დანიშნულებას გვაცნობებდნენ; დაღ-ლულ-დაქანცულები, უჭმელ-უსმელნი ფეხზედ ძლივსა ვიდექით. ბოლოს, როგორც იყო, გვეღირსა და ბრძანება მოგვივიდა: წინ წა-მოდექით და წმ. ნიკოლოზის კარი გერმანელი ჯარის ნაცვლად თქვენ გამაგრეთო.

სულ თხუთმეტი კაცი იქნებოდა. ძალიან გაეხარდათ ჩვენი მისვლა, რადგან ახლა თავისუფლად შეეძლებოდათ ქალაქში სია-რული და ძარცვა-გლეჯა.

ის დამე იქ გავატარეთ წმ. ნიკოლოზის კართან. ცის ქვეშ, მიწა-ზედ, კედლის ძირას მივეყარენით და ისე გვეძინა, თითქო საკუ-თარს ლოგინში ვწევართო. კარის გასამაგრებლად ორი ზარბაზანი იდგა; გარდა ამისა რამდენიმე ურემი ჩაეჩხირათ შიგ შემოსავალ-ში. დარაჯი ყოველ საათს იცვლებოდა. მე ამის მეტი აღარა მახ-სოვს რა, რადგან ისეთი დაღლილი ვიყავ, რომ მკვდარივით მეძინა და ჩემდა საბედნიეროდ დარაჯობა მარტო მეორე დილას მერგო.

ორჯერ-სამჯერ რაღაც ყვირილმა გამომაღვიძა: ჩვენი დარაჯე-ბი იძულებულნი იყვნენ დაეჭირათ, დაემწყვდიათ, ვისაც კი მოას-წრებდნენ და დაიჭერდნენ ვიამე თუ არა. ერთი იმისთანა ყვირი-ლი ატყდებოდა, რომ ჩვენც კი ფეხზედ წამოვხტებოდით ხოლმე.

*) მანდ ვინ არის?

მოიყვანდნენ დაჭერილთ, იქვე რაღაცა სახლში შეაგდებდნენ და მარტო მაშინ მიჩუმდებოდა ხმაურობა.

მაგრამ ისე შეძინებოდა, რომ სიზმარივით მახსოვს ეს ამბები. რას იზამთ? რაკი კაცს ძილი მოერევა, აღარც რასმე გაიგონებს და აღარც დაიხსომებს. იმ ღამეს თურმე ათასობით ქლიტეს ღიღებულ გვარის შვილმა აფიცრებმა თავიანთი ჯარისკაცები, ნაქურდალს რად გვედავებითო და მათთან ერთად ხალხიც, ამათ რად ექომაგებითო. შთელი ღამე თურმე აღარ დამცხრალან დაქირავებული გერმანელი ჯარები და იმისთანა ბარბაროსულად, უღმერთოდ და დაუნდობლად თურმე ხოცეს ხალხი, თითქო ბასტილიის ციხის აღების ჯავრს აქ, ნანსში, ყრილობენო. მაგრამ ამისას დაწვრილებით ვერას მოგახსენებთ, რადგან ჩემი თვალით არ მინახავს.

და რაც მეორე ღღეს მოხდა, 1790 პირველ ენკენისთვის, იმას კი დაწვრილებით აგაწერთ.

მეორე ღღეს ძალიან ადრე გამოძღვიდა. აგერ რამდენი ზანია მას შემდეგ და ეხლაც თვალწინ მიდგას იმ დღის ამბები.

ოთხი საათი იყო, რომ ნალარა დაჰკრეს და ფეხზედ წამოგვაცენეს. ჯერ ისევ ბნელოდა, რომ წამოვდექი; ჩვენი წინამძღოლი უერარი და ერთი გერმანელი აფიცერი რაღაცას ლაპარაკობდნენ; იქვე ერთი სამოქალაქო მოხელეთაგანი იდგა თავის სამფერი *) სარტყელით. სამივენი ჩვენ შემოგვცქეროდნენ. ჩვენ კი ზღაზენით ვიცვამდით ტანისამოსს, მტვერს ვიბერტყავდით და თოფსა და გუდას ვისწორებდით.

ნალარის შემდეგ ყველანი მოგვიკითხეს; უკან ჩამორჩენილი რამდენიმე კაცი კიდევ მოსულიყო იმ ღამეს და სულ 120-130 ვიქნებოდით, იმათ გარდა, ვინც სადარაჯოდ იყვნენ დანიშნულნი და მოკითხვას ვერ დაესწრნენ.

უერარმა თვალი გადაგვაგლო და რაკი ყველანი მზად ვიყავით, გვითხრა:

— აბა, ბიჭებო, ტყვეები ქალაქის საპყრობილეში უნდა ჩაიყვანოთ!

და იმავე დროს ტყვეებიც გამოიყვანეს. ღმერთო, რამდენი დამწყვდიათ! ჯერ ჩვენ რამდენი გვყავდა და ახლა სხვებმა რამდენი მოიყვანეს! დედაკაცები, ჯარისკაცები, მუშები, მოქალაქენი... ისე გაივსო ქუჩა, რომ გავლა აღარ შეიძლებოდა. იმედმიხდილნი იყვნენ ყველანი, თავდაქინდრულნი, თითქო გრძნობენ, რომ საკლავად მიჰყავთო. ბევრი დაჭრილიც ერია, ბევრს ზედ შეშრობოდა სისხლი და რადგან სიარული არ შეეძლოთ, მხარში ამოუხსდნენ

*) საფრანგეთის დროშა სამფერია: ცისფერი, თეთრი და წითელი.

და ისე წაიყვანეს. ზოგი სულაც გულწასული გამოჰქონდათ და გარეთ პაერზედ მოასულიერებდნენ ხოლმე; თვალს აახელდნენ უბედურები, და წყალო, ამოიკვნესებდნენ. ამათთვის ურმები შეაბმევინეს.

ნახევარი საათი მეტი მოვუნდით დაჰერილები გამოყვანას და მერე გზას გავუდექით: წინ დაჰრილებით ურმები მიგვიძლოდა და ურმებს უკან წყვილ-წყვილად დაჰერილები მისდევდნენ. ირგვლივ ჩვენ ვეხვეოდით.

მას შემდეგ რამდენჯერ მომხდომია ამგვარადვე დაჰერილების და ტყვეების ნახვა. ზოგჯერ 30—40 ურემი მინახავს ზედიზედ მიყოლილი. მაგრამ ეს პირველი იყო და ისე ამიშფოთა გული, რომ საუკუნოდ შემაზიზლა ციხეცა და მეციხოვნეც. ამისთანა სანახავს აღამიანი მარტო მაშინ დაივიწყებს, როცა გულზედ მიწას დააყრიან. რამდენჯერ მინახავს შემდეგში—ბრძოლის შემდეგ დაჰრილები მიჰყავდათ ხოლმე ექიმებისკენ; ან კიდევ არისტოკრატები მიჰყავდათ გილიოტინისკენ *) თავის მოსაკვეთად, და ყოველთვის ის გრძნობა ამშლია გულში, რომელიც გულს ჩამირჩინა ნანსში გაგონილმა კენესა-გოდებამ.

სულ უბრალო ხალხი და ჯარისკაცები დაეჭირათ, რომელნიც საწამებლად მიჰყავდათ. იმას ხომ არა კმარობდნენ, რომ იმ დამეს სამი ათასი კაცი მოეკლათ და ოთხასამდე ქალი და ბავშვი; არა, ამ უბედურთა გარდა იმავე დღეს ბ. ბულიემ ოცდარვა ჯარისკაცი ჩამოახრჩობინა — თქვენს აფიცრებს ანგარიშის თხოვნა როგორ გაუბედეთო; ერთს წამება მიაყენებინა, თუმცა საერო კრების დადგენილებით წამება აკრძალული იყო; და ორმოცდაერთი კიდევ საუკუნოდ საპრობილეში ჩააყრევინა.

ჩვენ ისევ გზაში ვიყავით, რომ ეს ამბები მთელს ქვეყანას მოსდებოდა.

შემდეგში 1793 წელს გამარჯვებულმა ხალხმა უარესი უყო არისტოკრატებს და დიდი საყვედურიც დაიმსახურა ყველასაგან. მართალია, ამისთანა საქციელი ბუნების წინააღმდეგია, მაგრამ ნუ დაივიწყებთ, რომ ამ გზას პირველად დიდებულნი დაადგნენ და, მამასაღამე, სასაყვედურონიც ისინი არიან. კაცი რომ თავის მოწინააღმდეგეს ამტყუნებდეს, დამარცხებულის შებრალება არ იცისო, უნდა მოიგონოს, თითონ კი იცოდა დამარცხებულის განკითხვა და შებრალება? თუ წაქეუულს ფეხითა სრესდა და სულით-ხორცამდე ღუპავდა?

დიად, აქეთ-იქით ჩვენ მივდიოდით შუბიან თოფებით და შუაში წყვილ-წყვილად დაჰერილები მიგვეყავდა. ქუჩა მიჩუქმებული იყო და

*) თავის მოსაკვეთი მანქანა, ვინმე გილიოტინის მიერ აგებული.

სახლები დაკეტილი, გარდა იმ სახლებისა, რომელიც გერმანელ ჯარისკაცებს გაეძარცვათ. ჩვენებურებს ნათლიაჩემი მიგვიძლოდა. ასე გაძარცულს, კარებშემტვრეულ სახლს რომ დაინახავდა, მე გადმომხედავდა ხოლმე და თვალეზედ ეტყობოდა, რა საშინელებას გრძნობდა ხალხის ერთგული შვილი ხალხის ასე დამცირებაზედ. მაგრამ რას იზამდა? ბატონი და ბრძანებელი ბულიე იყო და მის ბრძანების ასრულების მეტი ჩვენ არა შეგვეძლო რა.

უბედური ჩვენი პატიმარნი ზოგი ფეხშიშველა იყო, ზოგი პერანგის ამარა, ზოგი სუბუქად დაჭრილი და თავშეხვეული. მიდიოდნენ გაჩუმებულნი, გაშტერებულნი, იმედმიხდილნი, თითქო დარწმუნებულნი არიან, რომ ეს ქვეყანა უსამართლობის საბრძანებელი არისო; მიდიოდნენ გაჩუმებულნი, და ვინ იცის, რა ფიქრები უწყალებდნენ გულს უბედურებს! ვინ იცის, რამდენი სული რჩებოდათ ობოლ-ობხრად და უნუგეზოდ: ზოგს მოხუცებული დედ-მამა, ზოგს წვრილ-შვილი და და-ძმა! ღმერთო, რა ძნელი ყოფილა სხვის განწირულების ყურება: იმ საწყლების ნახვას, ღმერთმანი, ის მერჩივნა, მე დავეკირე და ვეწამებინე.

ჩემ სიცოცხლეში სულ იმას ვნატრობდი, ნეტავი ნანსი მაჩვენა მეთქი და მაშინ აღარც ჩემი ნატვრა მაგონდებოდა და აღარც ნანსის დიდრონი ქუჩების გასინჯვა. მივდიოდი თავდალუნული და თავს მაღლა მარტო მაშინ ავიღებდი ხოლმე, როდესაც სხვა ჯარებს შეეხვდებოდით, რომელთაც ჩვენსავით დაჭერილები მიჰყავდათ. ან არა და ქუჩაში მკვდარს წავაწყდებოდით, ან სისხლის ღვარს... თრთოლა აგვიტანდა ხოლმე, მაგრამ რას ვიზამდით, უნდა გადაგვეარა. დაქერილთაგანი ზოგი ერთ წამს შედგებოდა, მკვდარს გადახედავდა, თითქო ცდილობს თავის ნათესავი ან ნაცნობი იცნოსო, და ფერმიხდილი ისევ სხვებს მიჰყვებოდა.

ერთ პატარა მოედანზედ გერმანელი ჯარისკაცები ვნახეთ. ცხენებისთვის თივა დაეყარათ და თითონაც იქვე თივაზედ მიყრილიყვნენ და ხვრინავდნენ. მკვდრებისა, სისხლისა და ამ მძინარე გერმანელების გარდა იმოდენა გზაზედ მე ვერა დავინახე რა; გარდა ამისა კარგად დამახსოვდა მშვენიერი კოხტა სამამასახლისო, მზისაგან გაბრწყინებული ფანჯრებით და კიბის მარმარილოს საფეხურებით, რომელზედაც მიდი-მოდოდნენ მოხელენი და აფიცრები. ქვეით მისავალ კართან ორი შიკრიკი იდგა წასასვლელად გამზადებული და ბრძანებას და ელოდა. სამამასახლისოს მოედანზედ ჯარი იდგა. ჯერ არ გათენებულყო; ცა ჯერ ისევ ვარსკვლავებით იყო მოჭედილი.

ის იყო მოედანზედ უნდა გაესულიყავით, რომ დაგვიყვირეს გერმანულად:

— ვინ მოდის?

საპრობილეს კართან ერთი ცხენოსანი დარაჯი იდგა და ის გვე-კითხებოდა. ჩვენთან ერთად სამოქალაქო გამგეობის მოხელე იყო და იმან უთხრა, ვინც ვიყავით. წინ წაიწიეთ და ცოტა ხანს უკან ერთ მოედანზედ გავედით, რომელზედაც სამ რიგად ხეები იყო ჩარიგებული. ურმები საავადმყოფოს წინ დაეაყენეთ და როდესაც ალყაფის კარები გავიარეთ და დარაჯები დავინახე, მაშინვე ვიცანი ამ რაზმის ტანისამოსი, რომელშიაც ჩემი ძმა ნიკო ემსახურებოდა.

ვერ წარმოიდგენთ, როგორი ფანცქალი დამეწყო გულმა, როცა ვნახე, რომ ჩვენი ნიკო ნანსში უნდა ყოფილიყო. მომაგონდა იმის წერილი და ვიფიქრე, აქაც ხომ ისე დახოცავდა ხალხს, როგორც პარიზში; დისციპლინას, რასაკვირველია, აქაც ვერ უღალატებდა და, როგორ დავმალო, — ნეტავი არსად შემხვდეს-მეთქი, ვიფიქრე. მაგრამ იმ დროს დაჭრილები გადაჰყავდათ ურმიდან და როდესაც წარმოვიდგინე, რომ შეიძლება ჩემი ძმა ნიკოც დაჭრილია-მეთქი, გული მომიღბა, ჩემი თავი შევარცხვინე, — რაც უნდა იყოს, შენი ძმა არის და ბავშვობაში ძალიან გექმამაგებოდა-მეთქი; ეგეც რომ არა ყოფილიყო, ჩვენებს რომ გავეგოთ, რომ ისე ახლო ვიყავით ერთმანეთზედ ძმანი და ერთმანეთის ნახვას კი არ ვეცადენით, ეწყინებოდათ და თავის დღეში აღარ მაპატიებდნენ ამ უგულობას.

— თუ შეიძლება, მიბრძანეთ, სად ვნახო ნიკოლოზ ბასტიენი? ათისთავი გახლავთ თქვენს რაზმში. — ვკითხე ერთ ჯარისკაცს.

და რომ გაიგო, რომ მე ნიკოს ძმა ვიყავი, დიდად იამა, — თქვენს ძმას ძალიან კარგად ვიცნობო, მითხრა, და ემაგ ქუჩას რომ გაჰყვით ახალ კარამდე, იქ, ვისაც ჰკითხავთ, ყველა მიგასწავლითო.

ნათლიაჩემს არაფრად ეჭაშნიკა, რომ მე ნიკოს სანახავად მივდიოდი.

— რა უბედურება მოგვივიდა, მიშელ, რომ ამ საქმეში გავვირინეთ? რა გვრჯიდა, აუტყვიარი თავი რაზედ ავიტკივეთ? ქვეყანაში ხმა გაგვივარდება, ფალსბურგელი მილიცია გერმანელებს მიემხრო და პატრიოტებსა ხოცავდაო. გაზეთებშიაც ჩაგვწერენს ღმერთო, რა უბედურება მოგვივიდა!

ნიკოს სანახავად წასვლა კი არ დაუშლია ღვთის წინაშე; ის კი მიბრძანა, დაჩქარდი, რადგან რაც ხანი ვიყავით ამ დაწყევლილ ქალაქში, ისიც კმარა და დრო არის შინისკენ გავემგზავროთო.

თოფი მხარზედ გავიდე და პატარა ქუჩას ჩავყვევი. რა გითხრათ? კიდევ რომ აგოწროთ, რა ყოფაში ვნახე ის უბანი, როგორი აოხრებული და განადგურებული იყო ყველა სახლი, დარწმუნებული ვარ, არ დამიჯერებთ. იმოდენი ხალხი ეყარა დახოცილი, რომ იტყოდით,

შეუძლებელია ადამიანიშვილს ეგენი ჩაედინოსო. მხეცი არ იზამდა იმას, რაც მე იქა ვნახე! ხალხიც ძალიან მაგრად უნდა დახვედროდა გერმანელებს, თორემ ისე რად ააოხრებდნენ იქაურობას: სახლს ვერსად ნახავდით, რომ კარი და ფანჯარა შემტვრეული არა ჰქონოდა.

ქუჩაში ყველგან დანგრეული სახლების აგური და კრამიტი ეყარა. თითქო ქალაქს ცეცხლი წაჰკიდებიაო. აქა-იქ დაჭრილი, მომაკვდავი ცხენები ეყარა. ორჯერ თუ სამჯერ დანგრეულ სახლებიდან კენესა შემომესმა; ვისაც მოესწრო, დამალულიყო, მაგრამ ბ. ბულიეს ბრძანება გაეცა, სასლოები გაჩხრიკეთ და დამალულები არავინ დაინდოთო! და დარეოდნენ გერმანელები, საცა დამალულს ვერ იპოვიდნენ, სახლს ხომ გაძარცვავდნენ.

ღმერთმა ჰკითხოს, ვინც მაშინ იმოდენი სისხლი ღვარა! ღმერთმა ჰკითხოს! დაწყევლილ იყოს უკუნითი უკუნიამდე იმ წამებისთვის, რომელიც მან სრულიად უდანაშაულოდ მიაყენა ხალხს! *).

მივდიოდი და თან ღვთის სახელსა ვგმობდი და უსამართლობას ვემღუროდი.

ბოლოს ახალ კართანაც ჩავედი. კარი ტყვიით იყო დახვრეტილი. იქვე ურმები ჩაემწკრივებინათ და ზედ მკვდრებს უდებდნენ: ისე ისროდნენ უბედურთ — კაცებს, ქალებს და — სიმართლეს დამალვა არ უნდა — უსუსურ ბავშვებს, თითქო საყსაბოდან ღორებს ეზიდებინათ. კარისთვის გასამაგრებლად მთავრით მიეყარათ ქვები და ახლა მუშები დაეყენებინათ, რომ გზა გაეხსნათ იმ ურმებისთვის, რომელთაც მკვდრები უნდა წაესვენებინათ. მუშებს თავს გერმანელი ჯარისკაცები ადგნენ; იქვე დედაკაცები ირეოდნენ, მკვდრებში თავიანთებს ეძებდნენ და ღმერთმა ნუ გავაგონოთ ისეთი ქვითინი, რომელიც იმათ წასკდებოდათ ხოლმე, როდესაც ახლობელს პოულობდნენ ვისმე. ცხელოდა და მეურმეებს აშურებდნენ, ჩქარა დაუდეთ და გზას გაუდგეითო! აქეთ-იქით ფანჯრებიდან გამარჯვებული ჯარისკაცები იყურებოდნენ იმ რაზმისა, რომელშიც ნიკო ემსახურებოდა, ზოგი ქვემოდ იყო და მუქარით გასცქეროდა მუშებს — აბა გაბედეთ და ხმა ამოიღეთ, ცემითაც გაგხეთქავთ... დაგეხვევით და ცოცხალი ველარავინ გადაგვრჩებაო!

*) ის რაზმი, რომელიც ასე უღმერთოდ ამოკლტეს ნანსში, „დიდად საყვარელი უნდა ყოფილიყო საფრანგეთისთვის: 14 მკათათვეს 1789 ეს რაზმი პარიზში იყო, მარსის მოედანზედ იდგა, და როდესაც პარიზელი ხალხი იარაღის საწყობს დაეცა. მთელმა რაზმმა გამოაცხადა. ჩვენ ხალხის წინააღმდეგ ჩვენს დღეში ვერ ეიხმართ იარაღსაო“. ხალხმა იარაღის საწყობი აიღო. შეიარაღდა და ბასტილის ციხე მიწასთან გაასწორა. მართებლობამ ნანსში იყარა ამ რაზმის ჯავრი.

ერთი მოსუცებული დედაკაცი გაეკავებინათ მეზობლებს და შინ მიჰყავდათ. ის კი მწარედ მოსთქვამდა:

— რატომ მე კი არ მომკლავენ ეგ უღმერთონი? ჩემ ბიჭთან ერთად რატომ მე კი არ მომკლავენ?.. ოჰ, თქვე ავაზაკებო, თქვე იუდეებო, თქვენა!!

გული გადმომიბრუნდა. ბევრი ვინანე, ნეტავი არ ჩამოვსულიყავი-მეთქი. ასე გასინჯეთ, გამობრუნებას ვაპირებდი, მაგრამ ამ დროს ურემთან ჩვენი ძველი ნაცნობი კატრვანელი იერემია დავინახე. ისევე ისე უფროს ათისთავად ემსახურებოდა, იცინოდა და ჩიბუხს ეწეოდა. აბა იერემიას როგორ რასმე ვკითხავდი? იქვე სხვანიც ბევრნაიყვნენ ნიკოს რაზმისანი და იმათ ვკითხე, ათისთავი ბასტიენი სად ვნახო-მეთქი? პირდაპირ ქუჩის მეორე მხარეს ერთი დუქანი დამანახვეს, ა იქ მოძებნეო. და ჯერ შიგ არც კი შევესულიყავე, რომ გარედანვე ვიცანი ჩემი ძმა. ისიც ჩიბუხს ეწეოდა და გულგროლად შეჰყურებდა იმოდენ უბედურებას. ნიკოს დანახვაზედ ყველაფერი გადამავიწყდა და გული საამურად ამიჩქროლდა. რას იზამთ? ბუნებრივი გრძნობა ერთი ასად უფრო ძლიერი ყოფილა, ვიდრე აზრებისა და მიმართულების განსხვავება: ძალიან კარგად ვიცოდი, რომ მე და ის ჩვენს დღეში ვერ შევთანხმდებოდით, მაგრამ...

ფანჯარასთან მივედი და დაუქმახე: — ნიკო!

ერთი ჩამოიხედა და, დამინახა თუ არა, ჩიტივით გადმოფრინდა, და თან ყვიროდა:

— მიშელ?! შენც აქა ხარ, ბიჭო?!. მაშ ფალსბურგელებიც ჩამოსულხართ?.. თქვენ გიშველათ ღმერთმა!... აი, ეგ მიამა!

მიყურებდა, მსინჯავდა: ეტყობოდა ჩემი ნახვა მართლა იამა. წელზედ ხელი მომხვია და დუქნის ზემო სართულში ამიყვანა; ზემო სართულში ერთ დიდ დარბაზში შემიყვანა, სადაც ხუთი-ექვსი ჯარისკაცი სუფრას შემოსხდომოდა და რამდენიმე კიდეც ფანჯრიდან იყურებოდა. შემიყვანა და სიხარულით შესძახა:

— ერთი ამას უყურეთ და, ბიჭებო? როგორ მოგწონთ ამის მხარ-ბეჭი? გთხოვთ იცნობდეთ, ჩემი ძმა არის.

მერე მომვარდა, ორივე ხელით დამეჭიდა და უნდოდა შევენძრე როგორმე. იმის ამხანაგები იცინოდნენ. მეც ძალიან კმაყოფილი ვიყავი, ღვთის წინაშე; გული ლალად მქონდა იმ დროს და ვისაც ვხედავდი, ყველა კარგ კაცად მიმაჩნდა. ღვინო შემომთავაზეს.

— ახ, ნეტავი გუშინ მოსულიყავით და! იძახდა გახარებული ნიკო — ნეტავი გუშინ მოსულიყავით, რომ სეირი გენახათ! იმდენი თუშანი მომცეს ღმერთმა, რამდენიც მე გუშინ თავი გავაპე—და ჩემზედ მდიდარი აღარავინ იქნება!

ყურში მითხრა, ჩვენი უფროსი ათისთავი გუშინ მოკლეს და კაპიტანი დამპირდა, იმის ალაგას შენს მეტი არავინ მინდა, რადგან სამაგალითო ვაჟკაცობა გამოიჩინეო.

წარმოიდგინეთ, როგორ საწყენად დამრჩებოდა ნიკოს ლაპარაკი იმ საზიზღარი სურათების შემდეგ. რაც მე ნანსში ვნახე! მაგრამ იმის ამხანაგებისა მერიდებოდა და გაჩუმებული ვიყავი.

ცოტა ხანს უკან საყვირის ხმა გაისმა. ყველანი წამოდგნენ, იარაღი აჩხეს, ქუდები დაიხურეს და წასვლა დააპირეს. ნიკოც წამოდგა, მაგრამ ერთმა ამხანაგმა უთხრა: დარჩი, აფიცერს მე შევატყობინებ შენი ძმის მოსვლას და შენ საქმესაც მე გავაკეთებო. ნიკო დარჩა და როდესაც ყველანი წავიდნენ, მაშინ მოაგონდა ჩვენები და მკითხა:

— ჩვენი ბებრები ხომ კარგად არიან?

ყველანი კარგად არიან-მეთქი. ვუთხარი, დედაც, მამაც, კლოდიც, მატურინიც და პატარა სტეფანეც:

— ახლა აღარა გვიჭირს-რა, მე ცოტა ჯამაგირი მომიმატა ნათლიაჩემმა და ღვთის მადლით ერთი ლუქმა პური ჩვენცა გვაქვს და სათხოვარი აღარა გვჭირს რა.

ძალიან იამა. ხელი ჩამომართვა და მითხრა:

— ყოჩაღი ბიჭი ხარ, მიშელ! შვილი ყოველთვის ვალდებულია თავის ბებერ მშობლებს დაეხმაროს. განა არა, დიდი ხანია მინდა მოვიდე და ვნახო ის საწყლები... დიალ, დიდი ხანია მინდა მოვიდე... მაგრამ რომ მომაგონდება ხოლმე ჭადი და ლობიოს შეჭამადი, რომ მომაგონდება ხოლმე ჩვენი მიწური, რომელშიაც იმოდენი ტანჯვა გამოვიარეთ, მაშინვე აზრი შემეცვლება. ჯარისკაცმა თავის დღეში არსად უნდა შეარცხვინოს თავისი დროშა. მაგრამ საქმე ჯამაგირი კი არა, საქმე ხმალია და მეფის სამსახური... კაცი რომ მეფის სამსახურში იყოს, თავის თავის პატივისცემაც უნდა იცოდეს... მოდი შენა და თავმომწონე ათისთავი სადღაც სოროში შეიყვანე და ათქმევინე: ეს დაბრანძული ბებრები ჩემი დედ-მამა არისო... ხომ დაეთანხმები, მიშელ, რომ ათისთავი ასე არსად უნდა იმდაბლებდეს თავსა!

— მაგას რა თქმა უნდა, — ვუპასუხე მე, — ოღონდ ეს კია, რომ ამჟამად ჩვენი მშობლები ისე დაბრანძულები აღარ არიან, როგორც შენ დროს იყვენენ; რობენის ვალი დიდი ხანია გადავწყვიტე, ისე რომ. მამაჩემს ველარავინ შეაწუხებს; დედაჩემს ეხლა ოთხი თხა ჰყავს და რძე და ყველი უღეველი გვაქვს სახლში; იმდენი ქათმები გავიჩინეთ, რომ თუნდა მთელ შენს რაზმს დაეუხვდებოთ; მატურინი დღიურად მუშაობს ნათლიაჩემთან და ძალიან ყაირათიანი გოგოც არის; პატარა სტეფანემ წიგნი ისწავლა, მე თითონ ვასწავლიდი სა-

ლამობით; ჩვენი სახლი რომ ნახო, ვეღარც კი იცნობ: მიწურს მშვენიერი ჩალა დავხურეთ და ყავარში ასასვლელი კიბე ახალი დავდგით. იატაკიც დავავეთ; ცოტა რამ ლოგინი გავიკეთეთ, ჯერ ორი ხელი გვაქვს, მაგრამ, ღმერთი მოწყალეა, მერმე მეტი გვექნება. ისეთი რბილი ჩაღუნა-ბალახით გავტენეთ დოშაკები, რომ ყურთუკი გეგონება. ფალსტურგელი მეშუშე ამოვიყვანეთ და შუშები იმან ჩაგვისვა ფანჯარაში; კალატოზმა კრომერმა კიდეც საკომური შეაკეთა და ვართ ჩვენთვის.

— მით უკეთესი, — შესძახა ნიკომ, — მით უკეთესი! რაკი სახლი შეგიკეთებიათ და საქმელ-სასმელიც გქონიათ, მაშ იქნება გავებდო და ამოვიდე... დიად, იქნება ამოვიდე.. ვერ წარმოიდგენ, როგორ მინდა ი ბებრების ნახვა... დიად, ერთი კვირით დავეთხოვები და ამოვალ როდისმე... აგრე უთხარი, მიშელ...

ეჰ, რას იზამთ! გული კეთილი ჰქონდა საწყალ ბიჭს და თავი კი... თავში ქარები უქროდნენ. იმის საზრუნავი მარტო ეპოლეტები იყო, ხმალი და ხანჯალი, სისხლის ღვრა და კაცის კვლა. ჩვენდა საბედნიეროდ, ღღეს იშვიათად თუ შეხვდებით ვისმე ისე უაზროს, რადგან განათლებამ ხალხს ყველგან თავისი სხივი მოჰფინა; მაშინ კი უმრავლესობა ჯარისა ჩემი ძმა ნიკოსავით გონებაგაუხსნელი იყო უსწავლელობისა გამო... ძველი და ახალი დრო იმით გაირჩევა, რომ ძველს დროში ბატონები და ბერები სულ იმასა ცდილობდნენ, ხალხმა არა ისწავლოს რა, რომ უცოდინარი გლეხი ჩვენ ნებისადა ვპარსოთო; და ღღეს კი იმასა ცდილობს ყველა, რომ ხალხში განათლება მოჰფინოს.

მერმე ნანსის ამბებზე ჩამოვარდა ლაპარაკი. მე ჩემს ნახულს ვუამბობდი. ნიკო იდაყვდაყრდნობილი იჯდა და ჩიბუხს ეწეოდა. ცოტა ხანი კი ისმინა ჩემი, მერმე მაგიდას მუშტი დაჰკრა და დაიყვირა:

— ერიჰა! შენ მაგისი რა გაგეგება, მიშელ? ეგ პოლიტიკის საქმეა, პოლიტიკისა! აბა რა იცით თქვენ პოლიტიკისა? სად თქვენნი გადაყრუებული სოფელი და სად პოლიტიკა?!

— იქნება პოლიტიკაც იყოს, მაგრამ ძნელი გასაგები კი არაა ფერია: ჯარისკაცები თავიანთსას დავობენ...

— თავიანთსას დავობენ?! — შეჰყვირა ნიკომ და მხრები აიჩეჩა. — კარგი, თუ გიყვარვარ და! ორი კიდეც სხვა რაზმი თხოულობდა თავისას. იმათ კარგად გაუსწორდნენ! იმათ კარგად გაუსწორეს ანგარიში!.. გროში არავის დააკლეს! მაშ რატომ ამათ კი არ მისცეს? იმიტომ არ მისცეს, რომ უსინდისონი, წუპაკები იყვნენ! მაშ არადა? იქნება გგონია, ფული ენანებოდათ და იმიტომ ამოყლიტეს! ეგ არის, დიად! იმიტომ ამოყლიტეს, რომ ხალხის მხარი ეჭირათ, პატრიოტები

იყვნენ! პარიზში ხალხი რომ ბასტილიის ციხეს იღებდა, მაშინ ეგ რაზმი იქ იყო და როცა უბრძანეს, ხალხს დაერიეთო, უარი გამოაცხადეს, ჩვენ ხალხზედ იარაღს ვერ ვიხმართო... ახლა ხომ გაიგე, მიშელ?

ისე მოულოდნელი იყო ჩემთვის ეს ამბავი, რომ განცვიფრებული ხმის ამოღებას ვერ ვახერხებდი. ნიკომ განაგრძო:

— ჯერ სად არის? ეს მარტო დასაწყისია! საქმე ის არის, ძველი წესწყობილება დავამყაროთ და მეფეს თავისი უფლებანი დავუბრუნოთ... საქმე ის არის, ქვეყნის ამრევი საერო კრების ყბელი წევრები ხელთ ვიგდოთ როგორმე! მაგრამ, ნუ გეშინია! გენერალ ბუილეს იმისთანა დაწყობილობა აქვს, რომ საერო კრებისა იქნება ერთიც არ გადარჩეს... დღეს არ იქნება, ხვალ იქნება, პარიზს დავეცემით და ვაი იმის ბრალი, ვინც არ მოგვერიდება!

და გულიანად იცინოდა, გეგონებოდათ, თვალებს აბრიალებს მხეცი, რომელსაც ხორცი დაანახვეს და იმასლა ცდილობს, რომ ისკუპოს და კლანჭი გაჰკრასო. იმისთანა სიხარული და ნეტარება ეხატებოდა, თითქო საერო კრება და მთელი საფრანგეთის ხალხი თავის ბრჭყალებში უჭირავსო.

მე კი თავებდს ვიწყევლიდი: რა ღმერთი გამიწყრა, რომ ამ მხეცის სანახავად ჩამოვედი-მეთქი, ვფიქრობდი. ნუ თუ ეს სისხლით გაუმძღარი ველური ჩემი ძმა არის? მაგრამ რას ვეტყოდი, რას გავაგებინებდი? ბევრიც რომ მეთქვა, იმის გონებადახშულ ტვინს ვერაფერს შევავნებინებდი, იქნება გამჯავრებოდა კიდევ. და ამიტომ ისევ წასვლა ვამჯობინე.

— აბა, ნიკო, ახლა კი დროა! მე ძალიან მინდოდა შენთან ყოფნა, მაგრამ ცხრის ნახევარზედ ფალსბურგისაკენ მივდივართ და ვაი თუ დამიგვიანდეს.

— მიდიხარ, მიშელ?

— დიად, მშვიდობით.

— ბიჭო! მე კი მეგონა პურს ჩვენთან სჭამდი... ჩემი ამხანაგებიც ეხლავ მოვლენ! ფული მაქვს, ნუ გეშინია! გენერალმა ბუილემ გუშინდელი დღის ჯილდოდ თითო თუმანი დაგვირიგა!

და ჯიბეზედ ხელი დაიკრა.

— ეგ შეუძლებელია, ჩემო ნიკო, ხომ იცი, უპირველეს ყოვლისა სამსახური უნდა ახსოვდეს ჯარისკაცს. მოკითხვის დროს რომ იქ არ ვიყო, ძალიან დამსჯიან.

ეს საბუთი ძალიან მოეწონა ჩემს ძამიას და აღარა მითხრა რა. მე ჩემი თოფი ავიღე. ქუდი დავიხურე და ქუჩაში ჩავედით.

— მაშ მშვიდობით, მიშელ! ღმერთმა მშვიდობის მგზავრობა მოგცეს!

ერთმანეთს მოგვხვდებიან.

— არ დაგავიწყდეს, ბებრებს უთხარი, რომ ამ ცოტა ხანში უფროს ათისთაობას მაძლევენ.

— ვეტყვი, ვიტყვი.

— უთხარი, ახალი ეპოლეტებით რომ დავიშვენებ მხარს, იქნება ამოვიღე თქვენ სანახავადა-თქო.

— ძალიან კარგი!.. ყველაფერს ვეტყვი.

გამოვეთხოვე და გზას გავუღდე. მივიდიოდი და სულ ნიკოს ამბავს ვფიქრობდი: ავი გულისა არ იყო ის საწყალი ისა, და რომ ებრძანებინათ, თავის ხმლით ქვეყანას აკუწუვდა: დისციპლინაა, რასაც მიბრძანებენ, მეც იმას ჩავდივარო.

ის იყო წმ. ნიკოლოზის კართან მივედი და ნაღარაც დაჰკრეს.

— ნახე შენი ძმა, მიშელ? — მკითხა ნათლიაჩემმა.

— დიად, ბატონო, ვნახე.

ალბათ სახეზე მეტყობოდა, რასაც ვფიქრობდი ნიკოსად, რომ ნათლიაჩემმა აღარა მკითხა რა და მას შემდეგ თავის ღღეში აღარ გაუხსენებია ჩემი ძმის სახელი.

ძლივსლა მოვასწარი იქვე ზაბაზთან ერთი პური მეყიდნა და ღუქანში ერთი ძეხვი. მშიერი ვიყავი. დაიძრა ჩვენი რაზმი.

ამ მგზავრობამ უფრო დაგვალონა, რადგან საცა კი ფეხი ვადავ-დგით, ყველგან იმ ლაჩარს და უნამუსოებს შევხვდით, რომელთა-თვის მართალი გამარჯვებულია, და საცა ძალოვანსა ნახავენ ვისმე, ისინიც იმას მიემხრობიან, ფიანდაზად ეგებიან, და ქება-დიდებას უკმევენ; დროზედ და უდროვოდ ყველგან იმათ ქებაში არიან და ცამდე აჰყავთ იმათი გონება, წინდახედულობა, სამართლიანობა და ქველობა. რომ დაუკვირდეს კაცი, შეეზიზღება ეს უსინდისონი, რადგან ყოველ იმათ სიტყვაში ცხადად გამოიხატება იმათი გულის პასუხი: ჩვენ შენთანა ვართ, რადგან ძლიერი ხარ, და სუსტი რომ ყოფილიყავი, პირველად ჩვენ გაგთელავდით ფეხის ქუსლითაო.

მივდიოდით შინისკენ და ყველგან ამ ლაჩრებს ვხვდავდით; ღიბი ვადმოეგდოთ, სამფერი სარტყელი შემოეკრათ და დაულალავად გაიძახოდნენ ზრინწიანი ხნით: ჩვენს მეფეს გაუმარჯოს! გენერალ ბუილეს გაუმარჯოს!

ერთ სოფელში უნდოდათ, ჩვენთვისაც მოელოცათ გამარჯვება, მაგრამ დაინახა თუ არა ჩვენმა უერარმა, მამასახლისი ჩვენსკენ მოდისო, შორიდანვე ისე შეუტია, რომ სულ დავთრები აუშალა:

— გზა გვიყავით, მამა გიცხონდებათ! რა დროს ეგენია!?

გზა მოგვცეს და ისე გავიარეთ, რომ ერთ წამს არ გავჩერებულვართ. მამასახლისი და მისი ამაღა სალამს გვაძლევდა და ჩვენ კი

ზიზლით შეეცურებდით; უბედურებაც ის არის, რომ ამისთანა ღმერთგამწყრალებს ასე სასტიკად არ ვექცევით და არ ვაგრძობინებთ ჩვენს ზიზლს! მაშინ ამდენს როდილა გაბედავდნენ, რაკი ეცოდინებოდათ, რომ თითონ თუ არავითარ პატივს არა სცემენ თავიანთ თავს, სხვის მწუხარებას მაინც პატივისცემით უნდა მოეპყრან.

ორი საათი სრულდებოდა, ლუნევილში რომ მივედით. ლუნევილი მილიცია ჯერ არ დაბრუნებულყო და ადვილად წარმოსადგენია, რამოდენა ხალხი შემოგვეხვეოდა, მეტადრე მილიციელების დები და დედები და რა კითხვას დაგვიწყებდნენ. მოედნამდე ძლივს გავახწიეთ; იქ კი იმოდენი ხალხი შემოგვეხვია, რომ იძულებული ვიყავით გავჩერებულიყავით. რომელი ერთისთვის გაგვეცა პასუხი? ამ დროს ხალხიდან ვიღამაც დაიყვირა:

— ბიჭო! ეს ხომ ბატონი ივანეა და მიშელ ბასტიენი! ბარაკელებს გაუმარჯოთ!

გიორგი მუტონი იყო. გეხსომებათ. იმის მამას ფალსბურგის მოედანზედ ღუქანი ჰქონდა. გიორგი კარგი წარმოსადეგი, მოხდენილი, მხიარული გულის ბიჭი იყო და კარგადაც წაიყვანა, ღვთის წინაშე, თავისი საქმეები. პურს ყოველთვის იმის მამის ღუქანში ვყიდულობდით და ღვინის სასყიდლადაც ყოველთვის ერთად დადიოდნენ ისა და ნათლიაჩემი. როგორც ხედავთ, ძველი მეგობრები ვიყავით და ძალიანაც გაგვეხარდა, გიორგი რომ დაეინახეთ. ჯერ გამარჯვება არ ეთქვა, რომ შორიდანეე იმას გვიძახდა — პური ერთად უნდა გვამოთ, ჩემი წვეული ბრძანდებოდეთო.

— აქ რას აკეთებ, ბიჭო? — ჰკითხა ნათლიაჩემმა.

— საწვრილმანოსა ვყიდი, ბატონო, ეს შაქარი. ეს მიხაკ-ღარიჩინო. ჯერ სხვას ვემსახურები და, თუ ღმერთი შემეწია, იქნება საკუთრადაც დავიწყო ვაჭრობა.

— ღმერთი მოწყალეა, ნუ გეშინია! მერწმუნე, მაგაზედ უკეთესს ვერა ხელობას ვერ აირჩევდი. ვითომ წაგიხდეს რამე? ან გაუყიდავი დაგჩჩეს? შენც არ მომიკვდე! რა წაახდენს პილპილს, ან სანთელს და ზეთს, ოღონდ კი კარგი საქონელი იყიდოს კაცმა და პირიანად გაჰყიდოს?

ბევრი არ გვატარა გიორგიმ და ერთ პატარა ღუქანში შეგვიყვანა. ხალხით სავსე იყო იქაურობა; შემოვიდოდნენ, იქვე დაზგაზედ საჩქაროდ გადაჰკრავდნენ ზოგი ღვინოს, ზოგი ლუდს და ისევ გადიოდნენ. ძალიან გავვიმასპინძლდა გიორგი: ერბო-კვერცხი გააკეთებინა, ტულის ღვინო მოატანინა და ისე შევექვეცით დაღლილები, რომ კინაღამ თითები დავილოკეთ. მავრამ ფული კი ნათლია-

ჩემმა გადაიხადა: აბა, თავიზედ უმცროსს ფულს როგორ მიაცვ-
ზინებდა? ასე გასინჯეთ, სადილს უკან ყავაც კი მოატანინა.

შევექცეოდით და თან ნანსის საქმეებზედ ვლაპარაკობდით.

— ნეტავი მეც იქ ვყოფილიყავ: რომ ჩემი თვალით მენახა
ყველაფერი, — შეჰყვირა გიორგიმ. — ჩვენი დუქნის პატრონი
მილოციაში აფიცრად არის და ასე ეგონა, დიდ სახელს მოვიხვექვავო,
დუქანი მე შემომახვია კისერზედ და თითონ კი ნანსში წაბრძანდა.
ნეტავი ვაჟკაცი მაინც იყოს, ვიტყოდი, კაცია და კაცურად მოიქცე-
ვა-მეთქი; მაგრამ საქმეც ის არის, რომ სხვებს წააქეზებს — აბა,
ბიჭებო, მომყევითო! და თითონ კი სხვებს ზურგს უკან ამოუდ-
გება!

— ნეტავი შენა, რომ იქ არ იყავი! დიდებულების უსინდისო-
ბის მეტს ვერას ნახავდი.

— მეც ეგ მინდოდა, და! განა არა, ჭირივითა მძულან ის ამო-
სავარდნები! დასწყევლათ ღმერთმა, დაბადებითვე წინ აგვეტუზე-
ბიან ხოლმე და რაც უნდა ნიჭიერნი და მცოდნენი ვიყვნეთ, პირ-
ველი ალაგი ყოველთვინ იმათა რჩებათ! ჩვენ კი იძულებულნი
ვართ მეწვრილმანეს შევეკედლოთ საღმე და ჩვენი მომავალი იქ
ვეძიოთ. ნეტავ იქ ვყოფილიყავი, რომ იქაც მენახა იმათი უვარ-
გისობა და გული მომეფხანა.

— რაღა გული მოგეფხანა, დღეს ნანსელები ამოწყვიტეს,
ხვალ სხვებს უარესს უზამენ და იქნება უფრო მეტადაც დაგვიმო-
ნონ, ვიდრე აქამდე ვიყავით.

— მაგისი კი ნუ გეშინიათ, ბატონო ივანე! ეგ უკანასკნელი
ფართხალი და გახლავთ სულთმობრძავი არისტოკრატებისა. რომ არ
აჩქარებულყვენენ, ჯერ კიდევ დიდ ხანს იფარფაშებდნენ და, სულ
ნაკლები რომ ვსთქვათ, ერთი 15 — 20 წელიწადი მაინცა სკამდენ
სახელმწიფო ხაზინას, როგორც აქამდე უქამიათ. ესლა კი ისე გა-
მწვავდა საქმე ხალხსა და დიდებულთა შორის და მეტადრე ჯარსა
და აფიცრებს შორის, რომ სხვა გზა აღარა არის რა, ერთმანეთს
უნდა შეებრძოლონ და მომავალი იმისია, ვინც დღეს გაიმარჯვებს.
თქვენ ხომ დარწმუნებული ბრძანდებით, რომ ხალხი გაიმარჯვებს.
მერწმუნეთ, რაც აღრე გაგვითენდება ეგ დღე, ის ემჯობინება, რად-
გან, რა ვქნა, როგორ არა ვთქვა, მთელი ქვეყნის სასწოროსა და სა-
წვრილმანოს მე ერთი კარგი თოფი მირჩევნია!

ნათლიაჩემს სიცილი წასკდა:

— ერიჰა, მაგ ოცნებას თუ გაჰყე, ჩემო გიორგი, საკუთარ დუ-
ქანს სიზმარშიაც ვერა ნახავ. და რაც შეეხება შენს აზრს, რომ არის-
ტოკრატები გზაზედ გვიდგანანო, მაგაში კი სრულიად გეთანხმები.

დღეს ასეთი დრო დაგვიდგა, რომ, ვისაც კი ვასჯა შეუძლია და მკლავი უჭრის, ძალიან შორს წავა, თუ ღმერთი შეეწია... მაგრამ საქმე დასაწყისი იყო და, რაკი დასაწყისმა კარგად ჩაუარა, დებულუ პირდაპირ პარიზისკენ წაიყვანს თავის ჯარებს და...

— ნეტავი აგრე! შეჰყვირა გიორგიმ, მაგაზედ უდიდეს სამსახურს ის ჩვენ სხვას ვერას გაგვიწევს.

ამ დროს მოედანზედ ნალარა დაჰკრეს და ჩვენც ავიშალენით. გიორგიმ ცოტა რამ მანძილი გაგეაცოლა, მერე გამოგვეთხოვა, ფალს-ბურგელ ნაცნობებთან მოკითხვა დაგვაბარა და იქვე მოედანზედ თავის დუქანში შევიდა. რას წარმოვიდგენდით მაშინ, რომ ერთ დღეს ჩვენი გიორგი, მეწვრილმანის ნოქარი გიორგი, ლაფაიეტის ალაგს დაიჭერდა და მთელი პარიზის მილიციის უფროსად გახდებოდა!

ჰე, სოფელო, რა შიგან ხარ?.. მეტადრე რევოლუციის დროს! ძველებურად რომ დარჩენილიყო ჩვენი ცხოვრება, ჩვენი გიორგი ან სირაჯი უნდა გამოსულიყო, ან მეწვრილმანე, ან ბევრი-ბევრი უფროსი ათისთავი! მაგრამ ახალი დრო დადგა და სულ უბრალო გიორგი მუტონები ზოგი საფრანგეთის მარშლად ხდება, ზოგი სვედების მეფედ და საფრანგეთის იმპერატორად! და სწორედ ისინი, ვინც უწინ შთამომავლობით იყვნენ დიდებულნი და ქვეყნად თავიანთ მეტი არავინ არად მიაჩნდათ, სწორედ ეს დიდებულნი გარს ეხვევოდნენ ამ ახალ მარშლებს და ფიანდაზად ეგებოდნენ ფეხქვეშ, რომ წყალობა მიეღოთ რამე.

იმ საღამოს ბლამონში ვიყავით და მეორე დღეს შინ ისე ავედიოთ, რომ გზაში საიმისო აღარა მომხდარა რა.

მაგრამ ცუდი ამბები უფრო ჩქარა თურმე დაიარებთან, ვიდრე ჯარი — და ნანსის ამბები წინ გვხვდებოდა, საცა მივიდოდით. ქვეყანა ღელავდა, ყველა დარწმუნებული იყო, რომ ლორენს ავსტრიელები შემოესევინათ. ყველაზე ცუდი ის იყო, რომ ყველა მალავდა თავის შიშს. ან როგორ ეთქვათ? თუ ავსტრიელები შემოგვესევოდნენ, მეფის წყალობით შემოგვესევოდნენ და მეფე ხომ... თავის ხალხის მტრობას არ ინდომებდა? მეფე მარტო თავის ხალხის კეთილდღეობაზე ზრუნავდა და ის დეპუტატები, რომელნიც მეფეს მისდგომოდნენ, დიდს მადლობას უთვლიდნენ გენერალ ბულოეს ნანსის საქმის გამო. ჩვენდა საბედნიეროდ თავადი არტუა და იმისი მტრები ჯერ იქ არა ბრძანდებოდნენ, საცა ნებადართ. კარგა ხანი გავიდა და ბევრმა წყალმა ჩაიარა, ვიდრე ისინი პარიზში დაბრუნდებოდნენ და თავად-აზნაურობის ძველად კუთვნილ უპირატესობის ხელახლა შემოღებას ეცდებოდნენ. მაგრამ გვიანლა იყო და ტყუილადლა ცდილობდნენ, რადგან რევოლუციამ იმისთანა ძირი გაიკეთა საფრან-

გეთის ნიადაგზედ და იმისთანა ფესვები გაიდგა, რომ მთელი ქვეყნის არისტოკრატები და ბერები რომ დაარეოდნენ, იმას ველარას დააკლებდნენ.

III

ჩვენი დაბრუნების შემდეგ დღითი დღე მატულობდა ხალხის მღელვარება და ნათლიაჩემი, ლეტუმიე, კლოდ ჰურე და ერთობ ყველა, ვისაც კი სასულიერო წოდების მამული ჰქონდა შეეწინილი. სულ იმის შიშში იყვნენ — ჩვენც ნანსელი ჯარისავეთ არ ამოგვეყვიტონ და მამული უკან არ წაგვართვანო. ამიტომ იყო, რომ ეს ბუნებით ფრთხილი და დარბაისელი კაცები რევოლუციის უმთავრეს მომხრედ და ბურჯად იქცნენ. და რადგან სახელმწიფოს სასარგებლოდ მამულისას, მოძრავი ქონებისას ან რაიმე ვაჭრობის გადასახადს იხდიდნენ არა ნაკლებ სამი მუშის ფასისა, იმათ „ხმოსანი მამულიშვილები“ უწოდეს. ხმოსან მამულიშვილთა რიცხვში მარტო ოჯახის პატრონი და შეძლებული კაცები მოჰყვნენ და მარტო იმათ ჰქონდათ უფლება ამოერჩიათ დეპუტატები, მამასახლისი, სოფლის სხვა მოხელენი, მსაჯულები, მღვდელი და თვით ეპისკოპოსიც.

ჩვენ კი, რომელთაც ჩვენი მარჯვენისა და ჩვენი სისხლის მეტი არა გვებადა რა, რომ სამშობლოსთვის შეგვეწირა, ჩვენ „უხმონი“ ვიყავით და არავითარი უფლება არა გვქონდა. იმის მაგივრად, რომ მამულისშვილნი შეეერთებინათ სიმართლისა და თანასწორობის დაკვალად, საერო კრება, ჩვენი ძველი მეფეებისა არ იყოს, საფრანგეთის შვილთ სხვადასხვა ხარისხად ჰყოფდა, თითქო იმას ცდილობს, რომ ერთმანეთს გადაჰკიდოს და ყველას მონობის უღელი დაადოსო. რაც კი მას შემდეგ ამ 60 წლის განმავლობაში ჩვენს ქვეყანას უბედურება ეწვია, ყველა ამ განყოფილების ბრალი იყო. მაგრამ მაშინ რას წარმოვიდგენდით, რომ ეს გარჩევა ხმოსან და უხმო მამულიშვილად ამდენს უბედურებას გვწევდა და დიდი და პატარა. მდიდარი და ღარიბი, ყველანი ერთად ვიყავით და ერთად ვიბრძოდით: ვისაც შეეძინა — ხომ შეიძინა და ვისაც არა, იმედი ჰქონდა, თუ ვიშრომე და ვიყაირათე, მეც შევიძინ რასმე და წართმევას ვერავინ გამიბედავსო.

აბა, მაშინ უნდა გენახათ, რა ტკბილად გვიღიმოდნენ ხმოსანი მამულიშვილნი ჩვენ უხმოთ! უნდა გენახათ, როგორ დამკრავდა ხოლმე ნათლიაჩემი მხარზედ ხელს და რა სახელებს მიწოდებდა: თავისუფლების ბურჯიც მე ვიყავი, სამშობლოს იმედიც... და ვისაც უწინ სალამსაც კი არ აღირსებდნენ, ვინც უწინ სიღარიბის გამო

ყველასაგან ათვალწუნებული იყო, დღეს ისე იყო მიღებული სასულიერო წოდების მამულების მყიდველთაგან, თითქო ამთხედ უსაყვარლესი აღარავინ ჰყავთო. საცა კი ღარიბს დაინახავდნენ ვისმე, გადაეგებებოდნენ, ხელს ჩამოართმევდნენ და დაწვრილებით მოიკითხავდნენ, თან კი თავისას გაიძახოდნენ:

— ჩვენ ყველანი ერთადა ვართ და ერთადაც უნდა ვიყვნეთ! მხარი მივცეთ ერთმანეთს! დიდებულთ და სასულიერო წოდებას განუზრახავთ, ისევ ბატონყმობა შემოვიღოთ და ხალხს ბეგარა დავადლოთ... მაგრამ გვიფრთხილდნენ! ძმურად გავალთ ყველანი, დიდი და პატარა, და სულ ლუქმა-ლუქმა რიამ აგვკუწონ, ძველებურად აღარავის ვაბატონებთ! და...

ჩვენს ღუქანში ყოველ საღამოს ამას გაიძახოდნენ. ნათლიაჩემი ყველას მეგობრულად ეკიდებოდა, და რაც უნდა გაფუჭებული და უიმედო კაცი ყოფილიყო, ნისიას ველარ უჭერდა, თუმც კარგად იცოდა, რომ იმისგან გროშსაც ველარ მიიღებდა. აი, რა არის ცუდი კანონი და რამდენ ავს ჩაადენინებს იგი ხალხს. ნათლიაჩემიც და სხვანიც ფრიალ პატიოსანი კაცები იყვნენ, მაგრამ ავს ჩადიოდნენ, რომ ქომაგები ეშოვათ. კიდევ კარგი, რომ ხალხი თავისით გაასწორებს ხოლმე კანონმდებლების შეცდომას: რამდენჯერ ყოფილა, რომ ჯარის წინამძღოლს შეცდომა მოსვლია, პირდაპირ დასალუპავად გაურეკია თავისი რაზმები და უბრალო ჯარისკაცთ გაუსწორებიათ უფროსის შეცდომა და ბრძოლა მოუგიათ.

ნათლიაჩემი რომ დაიწყებდა და ძმობას და ერთობას გაიძახოდა, ბევრნი სრულიად მოურიდებლივ ეტყოდნენ ხოლმე თავის აზრს:

— ვიცით, ვიცით, ბატონო ივანე! ძმობა და ერთობა იმათთვის არის, ვისაც დასაკარგავი აქვს რამე და ეშინია არ წამართვანო! ჩვენ კი... აბა რა გვაქვს, რა გვაბადია, რომ იმის დაკარგვა გვაწუხებდეს? ჩვენ არაფერი ვართ, არაფერი გვაქვს, ხმაც კი არა გვაქვს, რომ იმ საქმეებში მაინც მივიღოთ მონაწილეობა, რომელიც ჩვენ შეგვეხება. ქვეყანა და ქვეყნის გამგეობა თქვენ დაგრჩათ... ჰო და, ყველამ თავის თავს უპატრონოს! ყველა თავისთვის იყოს!...

ზოგნი კი ნათლიაჩემს ამართლებდნენ:

— როგორ თუ ყველა თავისთვისაო!? მაშ ერთი ქვეყნის შვილები არა ვყოფილვართ?! მაშ ძმანი არა ვყოფილვართ?! ვაიმე, ვაიმე! აგრე რომ იყოს, ხვალვე უღელს დაგვადებენ!..: ერთი ჩარეკა კიდევ, მასპინძლო!... პატრიოტების სადღეგრძელოდ!

უარს როგორ ეტყოდნენ! მეტადრე იმ დროში, როდესაც ლაფაიეტს ისე მოეგვარებინა საქმე, რომ საერო კრება მაღლობას უცხადებდა გენერალ ბულიეს ნანსში გამოჩენილ ვაჟკაცობისათვის;

და როდესაც მეფის მომხრენი დაურიდებლად იძახდნენ: მის დიდებულება მეფე ლუი მეთექვსმეტე მთელი სამეფოს დავლას აპირებს, რომ ყველგან ისევ ძველი წესწყობილება შემოიღოსო! რა თქმა უნდა, რომ ბერებსაც იმედი მიეცემოდათ და მართლაც თავისუფლად დადიოდნენ სოფელ-სოფელ და ქადაგებდნენ, რევოლუციის მომხრეთ სწყევლიდნენ და ეკლესიიდან განდევნით აშინებდნენ ხალხს. მეტადრე დედაკაცებზედ ცდილობდნენ ექონიათ გავლენა და როგორც კი ვაჟი-კაცი გაიგულებდნენ, ისინი მაშინვე იქ გაჩნდებოდნენ და ქადაგებას იწყებდნენ: რად იღუპებით სულით ხორცამდე, რად ანრისხებით ღმერთს, რად ეწინააღმდეგებით ღვთისაგან დადგენილ წესწყობილებას და ღვთისაგან კურთხეულ მეფესო?! დიაღ, ღვთისაგან იყო ალბათ განწყობილი, რომ თითო მონასტერს თითო სამეფოს ოდენა მამული უნდა ჰქონდესო და ამ მამულის შესაძენად არავითარ საღსარს არ ერიდებოდნენ ღვთისმოსავი ბერები და, ასე გასინჯეთ, ცოლ-ქმარში უსიამოვნებას და უთანხმოებასაც კი სთესდნენ.

მე ჩვენებს არ ვუთხარი, რომ ნანსში ყოფნისას ნიკო ვნახე. ეს რომ მეთქვა, ყველაფერი დაწვრილებით უნდა მეამბნა, უნდა ამეწერა ჩვენი ნიკოს საქციელი ნანსელი ხალხის ელექტის დროს, იმის სიყვარული დისციპლინისა და დიდებულთადმი და სხვა. ამით მამაჩემს ძალიან შევაწუხებდი. დედაჩემი კი ნიკოს გაამართლებდა. ეს კარგად ვიცოდი, რადგან უკანასკნელ დროში ისე არას მტყოდა, რომ ამრიგად არ დაველოცე:

— შენა? შენ ნათლიაშენის გულისთვის იქნება ჯოჯოხეთისაც არ შეგეშინდეს! იმას რომ ნაპარევი მამულს ართმევდნენ, შენ რა, შე სულელო, შენა, რომ აგრე თავგამოდებული ბრძანდები? მამულსაც წაართმევენ და თავსაც გააგდებინებენ იმ ღვთისა და ქვეყნის მტერს. იმასა! და შენა და ეკატერინესაც ზედ მიგაღევენებენ, შე უბედურო, იმიტომ რომ შენ უარპყავ შენი სარწმუნოება და ეშმაკს მიუღექი!

— კარგი, კარგი! — ეტყოდა ხოლმე ტკბილად მამაჩემი. რა არის, რომ აგრე არ დაიყვირო? დედაჩემი კი უფრო უმატებდა ყვირილს. ერთხელ რომ გაგეგონათ იმისი მოთქმა, მაშინვე იტყოდით, ბერი ბენედიქტეს სიტყვებს იმეორებსო.

შინ ხომ დედაჩემი არ მასვენებდა და სამკედლოში ვალენტინი უარესს მიშვრებოდა. ნათლიაჩემთან ხომ ვერ გაბედავდა და ვერ გამოუტყხადებდა თავის აზრებს და, რაკი ნათლიაჩემი გავილოდა, ვაი ჩემი ბრალი:

— არა, ძალიან კი გადაუხადეს ხალხს ჩვენმა ბატონებმა ბასტი-

ლიის აღება, ჰა? ადრე იქნებოდა თუ გვიან ასე უნდა მომხდარიყო, რადგან სიმართლე სიმართლეა და უფლება უფლებაა. ჰოდა, ჩვენი დიდებული ბატონების შთამომავალი თავის დღეში არ უნდა დაამციროთ ისე, რომ ჩვენისთანა გლეხკაცის შვილებს გაუთანასწოროთ! ეს ჩემგან იცოდე, მიშელ, და ამ ცოტა ხანში სულ პანდურის კერით გაისტუმრებენ საერო კრებას; მის დიდებულება მეფე საერო კრების ყოველ დადგენილებას დაარღვევს და ყველას დანაშაულის კვალად დასჯის. რაც შეეხება ბატონს ივანეს, იმან ქრისტიანობა მაგლუარს და პეტრე ტურნაშონს კი არა, მთელი ქვეყნის ლოთებსაც რომ ნისიად ასვას თავისი ღვინო, თავის სასჯელს მაინც ვერ გადარჩება და როცა მეფის ერთგული ჯარი დაგვერევა, ისე აღგვის ყველა პატრიოტებს, რომ ბ. ივანესი ხსენებაც აღარსად იყოს. წმინდა ეკლესიას უკლებლივ დაუბრუნდება თავისი მამულები და არამც თუ ის, რაც წაართვეს, არამედ წამართმევთა საკუთარი მამულიც საეკლესიოდ დაიდება და თვით ისინიც სამაგალითოდ დაისჯებიან. სასტიკად დაისჯება ყველა და ნეტავი იმდენი წყალობა მაინც მოიღონ ჩვენზედ, რომ მუშაობა არ აგვიკრძალონ, რადგან განუსამძღვრეულ არიან შეცოდებანი ჩვენი და ბიწიერებანი ჩვენი. ნეტავი იმდენი წყალობა მაინც მიიღონ ჩვენზედ, რომ წარსულში ჩხრეკა არ დაიწყონ, თორემ სახრჩობელას ვერავინ გადარჩება იმ შეცდომისთვის, რომელიც ღვთისა და მეფის მოწინააღმდეგე დეპუტატების არჩევნებით ჩავიდინეთ!

აი, რა სიტყვებით მიწყალებდა გულს ის რეგენი, ისა! ისე უტვინო რომ არა ყოფილიყო, ღმერთმა იცის, ამდენს არ მოვუთმენდი და შიგ ყანყარატოში ვწვდებოდი, მაგრამ ვიცოდი, რომ თავში არაფერი ჰქონდა და ისე ვისმენდი, როგორც ვირის ყროყინს. განა ვირისაგან წიხლი ეწყინება ვისმე?

მაგრამ ჩვენი უბედურებაც ის იყო, რომ დედიჩემის და ვალენტინის მოაზრენი თითქმის ყველა ოჯახში მოაპოვებოდნენ და ყველგან იგივე უთანხმოება და უსიამოვნება ტრიალებდა. რაც ნანსში მოახდინა ბულიემ, ის რომ პარიზში მოეხერხებინა, რევოლუცია დაიღუპებოდა, რადგან ხალხი ნანსის საქმითაც დაშინებული იყო და ბერები ერთიათასად მეტსა ბედავდნენ და ქვეყანასა რევდნენ.

ღიად, ღიდი შიში ტრიალებდა ხალხში, მაგრამ პარიზელები ასე ადვილად არას დასთმობდნენ და იმისთანა გულმაგრად და თავგანწირულად იბრძოდნენ, რომ არამც თუ მეფეს, თვით საერო კრების დადგენილებათაც კი ეწინააღმდეგებოდნენ, როცა ეს დადგენილებანი ხალხისთვის და მის თავისუფლებისთვის მავნედ მიაჩნდათ.

ნათლიაჩემმა მიბრძანა, დაჯექი და რაც ნანსში ნახე, დაწვრილე-

ბით მისწერე შოველსაო. და რადგან შოველისთვის მე დღითიდღე ვწერდი, რაც კი საინტერესო მოხდებოდა რამე, ეს საქმეც ადვილი იყო ჩემთვის და იმავე საღამოს, მუშაობა შევწყვიტეთ თუ არა, შოველის ოთახში შევედი, რომელშიაც წიგნები ჰქონდა შენახული, და კარგად, დალაგებით მივწერე ნანსის ამბები. წერილს შოველთან ყოველთვის იქ ვწერდი, შოველის ოთახში და როცა საწერი აღარა მქონდა და შინასკენ არ მიმეჩქარებოდა, ერთ-ორ საათს წიგნებსა ვკითხულობდი. კარგა ღამე გადავიდოდა, რომ შინისკენ წავიდოდი ჩაფიქრებული. გადაეხედავდი ჩვენს ლატაკს ქოხებს და ქვეყნის უთანასწორობა თვალწინ წარმომიდგებოდა: საშინელი სიღარიბე ხალხისა და აუარებელი სიმდიდრე თავადაზნაურობისა; საშინელხედ უარესი უცოდინარობა ხალხისა და დიდი ცოდნა და მეცნიერება რჩეულ მსწავლულთა.

როცა კი დრო მქონდა თავისუფალი, მაშინვე ენციკლოპედიური ლექსიკონის კითხვას დავიწყებდი. ყველაფერს ვკითხულობდი, რადგან ყველა საგანი საუცხოვოდ იყო განმარტული, მეტადრე დიდროს ნაწერები. უწინდელივით გონებადასშული აღარ ვიყავ — ცხოვრებისა და ბუნებისა ოდნავი შეგნება მაინცა მქონდა; მცენარეს გადავხედავდი, თუ ცაზედ ვარსკვლავს, ვიცოდი მათი არსება და, თუ მაწუხებდა რამე, სამწუხაროდ ისა მქონდა, რომ ანგარიში არ ვიცოდი და არც არავინა მყავდა, რომ ცოტა რამ მაინც ესწავლებინა.

ერთი სიტყვით, ენციკლოპედია ხელთა მქონდა და ვცდილობდი მესწავლა რამე, რომ მარგალიტას ღირსი გავმხდარიყავ. მაგრამ ხანდახან ისე გამიტაცებდნენ ხოლმე ფიქრები ჩვენს გაჭირებულ ცხოვრებაზედ და იმ ბრძოლაზედ, რომელშიაც იმოდენა თავგანწირული მამულიშვილი იღუპებოდა თავისუფლების მოსაპოვებლად, რომ კითხვას ვეღარ შევძლებდი და გულნაკლული მივიზღაზნებოდი შინისკენ.

ასე მიმდინარეობდა ჩემი სიცოცხლე. კვირაობით დღითივე შოველიანთსა ჩავიდოდი ხოლმე და კითხვას ვიწყებდი. ძალიან კმაყოფილიც ვიყავი ჩემი ცხოვრებისა: ბავშვობაში იმოდენა სიღარიბე და ტანჯვა გამოვიარე, იმთავითვე ისე მენატრებოდა სწავლა, რომ ახლა მართლა კმაყოფილი უნდა ვყოფილიყავ ჩემის ბედისა და უნდა ვცდილიყავ, რაც შემეძლებოდა მეტსა ვცდილიყავ, რომ მეტი მესწავლა და მეტი შემეძინა.

ნათლიაჩემმა რომ მიბრძანა, შოველს ნანსის ამბავი მისწერეო, წინაღვე დაწყებული წერილი თითქმის თავდებოდა და უკანასკნელი რამდენიმე ფურცელი ნანსელი ხალხის ამოკლეტის აღწერით გავავსე.

ენკენისთვის დამდეგი იყო; გავათავე წერილი და ფანჯრიდან ბაღში გადავიხედე. მშვენიერი მთვარიანი ღამე იყო. ხილს მშვენივრად ესხა, რენეტის ვაშლი უკვე მოსაკრეფი იყო. რა ძალიან იამებათ მარგალიტას და იმის მამას, თავიანთ პატარა ბალის ვაშლი რომ მიუვიდეთ-მეთქი, ვიფიქრე. ჯერ თავისთავად მომივიდა ეს ფიქრი, მე ყურადღებაც არ მივაქციე. მერე კი ისე გამიჯდა თავში, ისე დამიმონავა, რომ სულ იმის ზრუნვაში ვიყავი, მარგალიტას ხილი როგორ გავუგზავნო-მეთქი.

— რა არის აქ შეუძლებელი? საუკეთესო ვაშლს მოვკრეფ, კარგად შევახვევ ფოთლებში, კალათაში ჩავალაგებ წყობისად და დილიყანსს გავატან. მართალია, ორი კვირა იქნება დილიყანსი გზაში, მაგრამ რენეტის ვაშლი ორ თვესაც არ წახდება.

მთელი ღამე აღარ მომასვენა ამ ფიქრმა. მეორე დღეს დილით ნათლიაჩემს შოველთან მიწერილი წიგნი რომ წავუკითხე, ისიც ვუთხარ, მინდა მარგალიტას ხილი გავუგზავნო-მეთქი.

— ვითომ და რატომო! — გაიხარა ნათლიაჩემმა. თავის მიწაწყალს და საკუთარ კერას მოშორებულს ისე არ ასიამოვნებს რა, როგორაც შინიდან მიღებული ძღვენი, თუნდა გროშაც არა ღირდეს იგი. მე რომ ჩემს ქარგლობისას საფრანგეთი შემოვიარე*), ერთხელ, მგონი 1760 იყო, მეზიერის მხარეს ერთი ალზასელი შემხვდა, ქარგალი ქრისტიანე ვებერი. ის იყო ალზასიდან მოსულიყო და ჩვენებური კომლში გამოსული ძეხვი წამოეღო გუდით. იმისთანა გემრიელად, აგერა, დავბერდი კაცი, ჩემს დღეში არა მიჭამია რა. ძეხვი ხომ ძეხვი იყო და მთელი ჩვენი სოფელიც თან წამოჰყოლოდა — ჩვენი ფიჭვნარი ტყეები, ჩვენი ამწვანებული მთები, ჩვენი კამკამა წყაროები. ამხანაგებისა რომ არ შემრცხომოდა, რომელნიც გაჩქარებულნი ილუკებოდნენ და რალასაზეც იცინოდნენ, მე ტირილს დავიწყებდი. ჰოდა, ხვალ ხომ კვირაა, ადექი, და ისე მოარჩიე ვაშლი, რომ სულ საუკეთესოები დაკრიფე. ხეზედ ადი, თორემ თუ ცოტაც არის დაიქევა, ერთ კვირასაც არ გასძლებს და სხვასაც წახადენს. შენ ერთი კარგი მოზრდილი კალათი გამოართვი მამაშენს; ვაშლის გარდა, ერთი კარგი ლორი გავუგზავნოთ, ერთი ხუთი-ექვსი ძეხვი, ერთი-ორი ბოთლი სანაქებო ალზასური თეთრი და ორი ბოთლიც ლორენური წითელი. ბოთლებითა მაქვს შენახული მარანში, აგერ, რამდენი ხანაა და ძალიან კარგიც უნდა იყოს. მართლა, თხილი არ დაგავიწყდეს; გახსოვს, რა ძალიან უყვარდა შოველს ჩემი მსხვი-

*) ქარგალი ქალაქიდან ქალაქში გადადიოდა და ყველგან თავის ხელობითა და შრომითა ცხოვრობდა, რომ თავის საქმეში უკეთ გავარჯიშებულიყო.

ლი თხილი... ერთი-ორი მუქა თხილი ჩაეყაროთ კალათში. შენ კარგი კალათი ჩამოიტანე, დანარჩენი მე ვიცი.

ისე უხაროდა ნათლიაჩემს, ისე უხაროდა, თითქო ამაზედ დიდად ვერას ასიამოვნებდა შოველს და მარგალიტას.

მეც ძალიან მიხაროდა, რომ ნათლიაჩემმა განზრახვა არ დამიწუნა და ასე ხელი მომიმართა.

ისეთი ბედნიერი დღე ბევრი არ მახსოვს ჩემს სიცოცხლეში, როგორც ის კვირა დღე იყო.

დილა ადრიაანად წამოვდექი, ერთი კარგად მოზრდილი კალათი ავარჩიე და დუქანში ჩავიტანე. მერე ბაღში ჩავედი და ვაშლის კრეფა დავიწყე. მარგალიტას სიყვარულით ვაშლს ვეალერსებოდი და ისე ვალაგებდი პატარა კალათში.

მერე დუქანის უკან თხილი დავაყრევი. ჰაი თუ იამება-მეთქი შოველს, ვიცინოდი ჩემს გულში, ჰაი თუ მაშინვე პირში იკრავს!

მართლა გაგიყებით უყვარდა თხილი და ჯიბითაც კი დაქკონდა. როგორ შემაქებდა, კალათს რომ გახსნიდა? ყოჩაღი ბიჭი ყოფილხარ, მიშელ, რომ მეც მასიამოვნეო!

— დიად, ბატონო შოველ, მიშელი სულ იმასა ცდილობს, რომ თქვენ გასიამოვნოთ რამე, რადგან თქვენი დიდი პატივისმცემელი და მოსიყვარულეა. სიცოცხლეს არ დაზოგავს თქვენთვის! მარგალიტა თავის დღეში არავის ეყვარება ისე, როგორც მიშელს უყვარს და ბედნიერიც ისე არავისთან იქნება, როგორც მიშელთან!

სულ ამ ფიქრებში ვიყავ და თვალთ ცრემლი მერეოდა.

კალათი მართლა თვით ნათლიაჩემმა ჩაალაგა. ძირში ბოთლები, ლორი და ძეხვები ჩააყოლა; მერე თხილი, მერე ვაშლი. ზემოდან ტილო გადააკრა, რომელზედაც მისამართი დავაწერეთ: ბ ა ტ ო ნ ს შ ო ვ ე ლ ს, დ ე პ უ ტ ა ტ ს ს ა ე რ ო კ რ ე ბ ი ს ა ს. ბ უ - ლ უ ა ს ქ უ ჩ ა № 11. პ ა რ ი ზ შ ი.

კალათს დიდ დარბაზში ალაგებდა. ნათლი-ჯალაბი, ნიკოლი და მე პირმოკუმულნი შევცქეროდით.

სოფელში გაეგოთ, შოველს ხილს უგზავნიანო და მოგლეჯილიყვენ! ზოგს ლორი მოქკონდა — ეს ჩემგან გაუგზავნეთო, ზოგს უცეცხლო თაფლი, ზოგს მსხალი და ვაშლი, ზოგს თავი არაყი. მაგრამ რა? კალათი უკვე გატენილი იყო და პირმოკრული, ისე რომ დიდი მადლობა გადაუხზადეთ ყველას და ისე გავისტუმრეთ. უიმი-სოდაც კარგად მძიმე გამოვიდა ჩვენი ამანათი, მაგრამ დილიყანსში ექვსი ცხენი ება და ათი იმოდენა სხვა ბარგი მიქკონდა პარიზისკენ.

დილიყანსი ორშაბათ საღამოს გავისტუმრეთ და იმ დღიდან მოუთმენლად ველოდით პარიზიდან წერილს, მაგრამ ენკენისთვის გა-

სულამდე ამბავი არა მოგვესვლია რა. ეგრე წარმოიდგენთ რამდენი სჯა და ბაასი გვექონდა ამ ხნის განმავლობაში.

სწორედ იმ დროს იყო, რომ ჩვენს სოფელში პირველად მივიღეთ საერო კრების ბრძანებით დაბეჭდილი „წითელი წიგნი“*). რიგოს ტულში შორეული ნათესავი მოუკვდა და ცოტა რამ მემკვიდრეობა დარჩა; ნანდერძევის ამოსატანად ჩავიდა ტულში და იქიდან ამოიტანა წითელი წიგნი; ყოველ საღამოს იმის კითხვასა და სჯაში ვატარებდით. სამარცხვინო და ჩვენი დამლუპველი ამბები მაშინ გავიგეთ! ჯარისკაცებს ხომ აფიცრები ჰპარავდნენ და საცა გირვანქა ხორცი უნდა მიეცათ დღეში თითო კაცზედ, იქ თურმე ზოგჯერ ნახევარ გირვანქასაც არ აძლევდნენ! ეგ ხომ უკვე ვიცოდით და ახლა ისიც გავიგეთ, რომ იმავ თავითვე თურმე წურბელასავით გვასხდნენ და სისხლსა გვწოდნენ ეგრეთწოდებული კარისკაცები. აი თურმე როგორ ახერხებდნენ თავიანთ თვალთმაქცურ ქურდობას: ყოველთვის, როცა კი სახელმწიფო ზარალის გამო მინისტრი იძულებული იყო ახალი ვალები აეღო, ადგებოდა და თავის მეგობრებს, მეფედედოფლის, ბატონიშვილების, თავად არტუას და სხვათა მეგობრებს, ნათესავეებს, შინა ყმათ და სულ უკანასკნელ მოახლეებსაც კი კვიტანციებს აძლევდა — შენგან ამდენი ისესხა სახელმწიფო ხაზინამაო, შენგან ამდენი და შენგან ამდენიო. ამ კვიტანციებს კუპონებს უწოდებდნენ და ვინც მეტს თინთლიბაზობას და პირმოთნეობას გაუწევდა და მეტს სულმდაბლობას გამოიჩენდა დიდებულთა სამსახურში, იმას უფრო მეტი კუპონი ეძლეოდა. ამგვარად სახელმწიფო ხაზინას ყველა დიდებული კარისკაცის ფული ემართა, თუმცა იმათგან თავის დღეში გროშიც არსად ენახა. მაგრამ ვალი ვალია და ამ ვალსაც გადახდა უნდოდა. ვინ იყო მერე გადამხდელი? ისევ ჩვენი გლეხკაცობა და გვაწერდნენ ახალ-ახალ ხარჯს და ახალ-ახალ ბეგარას, რომ იმ უღმერთოებისთვის იმ ფულის სარგებელი ეძლიათ, რომელიც თავის დღეში თვალითაც არავის ენახა. სად არის იმისთანა მეცნიერი, რომ გვიანგარიშოს, რამდენი მილიონი მოგვპარეს ასე ჩვენმა პატიოსნებით აღსავსე ბატონებმა?!

კამილ დემულენი სწერდა თავის გაზეთში, თითო კარისკაცი ოცდაოთხ მილიონჯერ უნდა ჩამოახრჩოს ხალხმა, რადგან საფრანგეთის ხალხს, 24 მილიონ სულს, ისე სძარცვავდნენ და ჰქურდავენ, თითქო საკუთარ ჯიბეში ედოთ ხელიო! მით უფრო ჩამოსარჩობნი არიან ეს ბრწყინვალე ქურდები, რომ ქვეყანას პატიოსან

* წითელ წიგნი დაბეჭდილი იყო მეფე ლუი XV და XVI-ს დროინდელი საიდუმლო ხარჯი სასახლისა.

პირებად მიაჩნდათ, ქვეყნის ბედ-იღბალი იმათა ჰქონდათ მინდობილი და ასე სამარცხვინოდ არ უნდა მოქცეულიყვნენო!

„წითელი წიგნი“ ეხლაც შენახული მაქვს; მინდა დაწვრილებით გაცნობოთ, რა საზიზღრად იქცეოდნენ მაშინდელი დიდებულები, მაგრამ ეგ ძალიან შორს წაგვიყვანს. ან რა საჭიროა? უსინათლოს მზე რომ დაუტრიალო ცხვირწინ, მაინც ვერას დაინახავს. გონებადასშულს თავის სიკეთე ბევრიც რომ აუხსნა და ანგარიშით დაუმტკიცო, მაინც ვერას შთააგონებ.

ენკენისთვეშივე 1790 წ. გაისტუმრა ლუი XVI-მ ნეკერი. ბულიეს გამარჯვებამ ნანსში მეფის ოცნებას ფრთები შეასხა და ასე ეგონა, ნეკერი აღარ დამჭირდებაო. თვით საზოგადოებაშიც სხვადასხვა აზრი ტრიალებდა ნეკერის შესახებ: ზოგნი ამბობდნენ, ნეკერი უარესია, თავის მეგობრები გაამდიდრა... წითელი წიგნი ძალის ძალად გამოაქვეყნებინესო; სხვები კი და მათ შორის ნათლიაჩემიც იმას ამბობდნენ, ადამიანი კარგსაც იზამს, ავსაცაო... ვისაც ადამიანის საქციელის განსჯა უნდა, ავი და კარგი უნდა ერთმანეთს შეუწონოს და მსჯავრი ისე დასდოსო... ისიცა კმარა, რომ სახელმწიფო ხაზინაში ხელეზს ურევდა და შეძენით კი არაფერი შეიძინა. უწინდელ მინისტრს დებრიენს კი არა ჰგავს, რომელმაც ისე დაიტენა ჯიბეები, რომ ერთს სამეფოს იყიდოს, იმოდენი ფული აქვსო... ნეკერს რომ 1778 წ. სახელმწიფო ხაზინის ანგარიში არ გამოექვეყნებინა, არც რევოლუცია მოხდებოდა... ნეკერი ხალხის მომხრეა და საცა პატოსანი კაცია, ნეკერის მხარე უნდა ევიროსო.

მე მგონია, რომ ნათლიაჩემი მართალს ამბობდა: ეს კია რომ ნეკერის დათხოვნის შემდეგ მეფე ლუი XVI-მ მარტო ისინი დაიხლოვა და რჩევასაც იმათ უსმენდა, ვინც რევოლუციის მოსისხლე მტრები იყვნენ; თავიანთი რჩევით იმისთანა მოლიპულ გზაზედ დააცურეს მეფე, რომ ორი წლის შემდეგ თვალჩაუწვდენელ უფსკრულის პირს მიიყვანეს.

მაგრამ ამას თავის დროზედ მოგახსენებთ, უდროოდ თქმას არა თქმა სჯობს.

ბოლო! ენკენისთვის გასულს პარიზიდან გაზეთები მოგვივიდა და გაზეთებთან მარგალიტას წერილიც. აი, თვით წერილს გადავიწერთ სიტყვისიტყვით და გარდა იმისა, რომ წარსულ სიყმაწვილეს გავიხსენებ, თქვენც უფრო დაწვრილებით გაიგებთ, როგორ ცხოვრობდნენ იმ დროს პარიზში, რას ფიქრობდნენ მეფეზედ, ბულიეზედ, გახიზნულებზედ, კლუბებზედ და საერო კრებაზედ. მე მარგალიტასავით კარგად ვერ განემარტავდი ამ საგნებს.

„ჩემო კარგო მიშელ,

„შენი წერილი მივიღეთ და მასთან ერთად კალათიც ხილით, ძეხვით და ღვინით. ორივემ ძალიან გვასიამოვნა და თუმცა შენს წერილში სამწუხარო უფრო მეტი იყო, ვიდრე საამო, მაინც გული არ გაიტეხოთ მაგ ამბების მნახველებმა! შაგისთანა საქციელი არისტოკრატებისა კიდევ უნდა გიხაროდეთ, რადგან, რაც მეტს ჩაიდენენ მაგისთანა სამარცხვინო საქმეს. მით უფრო მალე მოვიშორებთ თავიდან მაგ ქვეყნის მტრებს! ხალხი გონებაზედ მოდის, ხალხი თვალს ახელს და ისე არაფერი შევლას ერის გამოფხიზლებას, როგორც ნანსში მომხდარი უმაგალითო სისსლის ღერა. ხალხი თვალს ახელს და როცა მოინდომებს, ყოველს კირსა და ბოროტებას გადიყრის გულიდან.

მამაჩემს იმდენი საქმეები აქვს საერო კრებაში და იაკობელების კლუბში, რომ მადლობის მოწერა მე დამავალა. დიდ მადლობას მოვახსენებთ ბატონს ივანეს, ქალბატონ ეკატერინეს, შენა და ერთობ ყველას, ვისაც კი ჩვენთვის გამოგზავნა უნდოდა რისიმე. ძალიან დაგვაავალეთ, რადგან მინდოდა მეტხოვნა და სწორედ გულისწადილს მიმიხვდით, რომ ჩვენებური მოსაკითხით მოგვიგონეთ. ღღეს მამაჩემის მაგივრად მე გწერთ. ბ. ივანეს, ლეტუმიეს და ყველა მანდაურ პატრიოტებს, რასაკვირველია, მამაჩემის წერილი ურჩევნიათ, რადგან სულ საქმეზედ იწერება და სხვას არაფერს; ქალბატონ ეკატერინეს, ნიკოლს და თვით შენც კი, მე დარწმუნებული ვარ, ჩემი წერილი უფრო მოგეწონებათ, რადგან მე დაწვრილებით ავიწერთ ჩვენს ცხოვრებას, ჩვენს სახლს და ამასთან საზოგადო საქმის მდგომარეობასაც.

მე მინდა ისე დაგიხატოთ ყველაფერი, რომ თვალწინ გედგათ აქ ურობა, თითქო თქვენც აქ. პარიზში ბრძანდებითო, და მით უფრო ცხადად დაინახოთ, რამოდენი განსხვავება არის ჩვენს სოფელსა და პარიზს შუა. კარგა ხანი მოვუნდები ამ წერილს, მაგრამ ჩემს ჯილდოდ ისიცა კმარა, რომ, ვიცო, ყველანი სიამოვნებით წაიკითხაეთ და მეტადრე შენ, ჩემო მიშელ.

ერთ მალლად აწოწილს, ფალსბურგის სამრეკლოზედ უფრო მაღალ სახლში გვიჭირავს მეექვსე სართულში სამი ოთახი და თუმცა ძნელი წარმოსადგენია, რომ ჩვენს ზევით კიდევ იყოს ვინმე, ისე გაკირებულია პარიზელი ხალხი, რომ ჩვენს ზევით, ბალახანაში, რომელსაც სინათლე ქერში დატანებულ ფანჯრებიდან ჩასდის, ერთი წვრილშვილი ხარაზი ღვას. ისეა გამოტენილი მდგმურებით მთელა

სახლი პირველი სართულიდან უკანასკნელამდე, რომ ვისაც მოინდომებთ, აქა ნახავთ: ფეიქარი, თერძი, მემუსიკე, კერძო ვეჭილი და სხვ. და სხვ. ერთი ვიწრო, ბნელი, ხვეული კიბე აღის ძირიდან უკანასკნელ სართულამდე და თუმცა ყველანი ამ კიბეზედ დაიარებიან და ყოველდღე ხედავენ ერთმანეთს, ერთმანეთს არ იცნობენ, არავითარ ყურადღებას არ აქცევენ და ასე გასინჯეთ უბრალო სალამი რა არის, სალამსაც კი არ აძლევენ. და განა მარტო ჩვენ. ყველგან ასეა. ძირის სართულში მაღაზიები და ღუქნებია მოთავსებული. ქარხნები და ყავახანები თავიანთი ზედწარწერით; გაიხედავ ქუჩაში და, საცა კი თვალს გაუწვდენ, ყველგან ამ ზედწარწერებს დაინახავ: ეს ხარაზიო, ეს მეწვრილმანეო, ეს მეხილეო, ეს დერციკიო...

ქუჩაში იმოდენი ხალხი და ეტლები ირევია, რომ გზას ძლივს აუქცევს კაცი. მთელი დღე და მთელი ღამე არ შესწყდება ეტლების გრიალი, მოსეირნე ხალხის ხმაური და მეტადრე სხვადასხვა ვაჭრების ყვირილი, რომელნიც ქუჩა-ქუჩა დაიარებიან, გაფაციცებით შესცქერიან აქეთ-იქით ფანჯრებს, ხომ არავინ გვეძახისო და თან მაღალი ხმით გაიძახიან: „ცივი-ცივი წყალი!.. ძველი ტანისამოსი ვისა აქვს გასაყიდი?.. ახალი ლობიო, მწვანე ლობიო!...“ სავაჭროს პატარა-პატარა ურმებით ატარებენ, რომელსაც ცალი ხელით მიაგორებენ ქუჩა-ქუჩა. რას იტყვის ადამიანიშვილი, რომ აქ არ დაჰქონდეთ გასაყიდად. აქ ყველაფერი გასაყიდა და ყველაფერი დასაყვირია. ჯერ ისევ სველ-სველი გაზეთები დააქვთ ქუჩებში ბიჭებს, სახლებში შედიან და ყავახანებში და მაღალი ხმით ყვირიან: ახალი ამბები წაიკითხეთ. ახალი ამბები! ქუჩაში ისე ვერ გაივლით, რომ ყველა კუნჭულში ბიჭებმა არ შეგაჩერონ და ახალი გაზეთები არ შემოგთავაზონ.

ვერ წარმოიდგენთ, რა ხმაურობა არის პარიზში მთელი დღე და თითქმის მთელი ღამე! ღამის ორ საათზედ თუ დაცხრება გრიალი; — თითო-ოროლა ეტლიდა გაივლის სადმე და ისიც ექიმი იქნება ავადმყოფთან მიმავალი, ან ღამის დარაჯი; — მაგრამ ტყუილად გექნებათ იმის იმედი, რომ მამალი გამაღვიძებსო: ჯერ სამი საათიც არ არის ხოლმე, რომ პარიზში მომავალი სოფლელების ხმა გაისმის და იმათი შოლტის ტყლაშუნი. მოდიან, მოიმღერიან და ზოგს ურმით მოაქვს თავის ნაწარმოები გასაყიდად, ზოგს ცხენით, ზოგს სახედრით. ამასთან ისიც უნდა იცოდეთ, რომ ამათ საქონელს — სახედარს, ცხენს, ხარს, ყველას ზარი აბია კისერზედ და ისეთი წკარაწყური ატყდება ხოლმე დილის სისხამზედ, რომ შეუჩვეველ კაცს მეორედ მოსვლა ეგონება. სოფლელები აქვე ახლო-მანლო სოფლებიდან მოდიან, კაცები ურმით ან ცხენით და დედაკაცები სახედრე-

ბით; ზოგს კვერცხი მოაქვს, ზოგს მწვანელი, ზოგს ერბო და ყველა; ჯერ ისევ ბნელა, ქალაქსა სძინავს და გარედან კი ხმაურობა ისმის: ზოგი საქონელს ერეკება, ზოგი ნამძინარევი ხრინწიანი ხმით იგინება... ცოტა ხანს უკან ამ ხმაურობას პარიზელების გრიალიც მიემატება და მეორე დილამდე აღარ შესწყდება.

ამ ხმაურობასთან ერთად უნდა წარმოიდგინოთ საშინელი მოძრაობა პარიზელებისა. სულ ცოტა რომ ვსთქვათ, ქალაქში შეიდასი ათასი სული მაინც იქნება სულ უკანასკნელ ღარიბ-ღატაკისაგან დაწყებული მილიონების პატრონ მდიდრამდე. გარდა პარიზელებისა ასი ათასი კაცი მეტი ჩამოდის სოფლებიდან და ერთობ მთელი საფრანგეთიდან, რომ აქ სამუშაო იშოვონ რამე. ამიტომ არის, რომ საფრანგეთი ჯერ პარიზში დაიმშვეა ხოლმე; ერთი-ორი დღე რომ გზები შეიკრას და სოფლებიდან სანოვაგე არა შემოვიდეს რა, პარიზი შიმშილით ამოწყდება, შიმშილობისას აქ იმისთანა საშინელება ტრიალებს, რომ ჩვენში, ჩვენ გადაკარგულ გაყინულ სოფელში სიზმრადაც არსად გვინახავს: შენ შენთვის დამშვიდებული ბრძანდები შენს სადგომში და შენს ზევით მცხოვრებნი კი სიცივით და შიმშილით იხოცებიან, დედ-მამაც და შვილებიც! შიმშილით იხოცებიან, უპატრონოდ, განუკითხავად! შენც იქვე ხარ, იმათი მეზობელი ხარ და ვერას უშველი, რადგან შენ იმათი არა იცი რა და იმათ შენი; ამ დიდ ქალაქში მეზობლობისა არ სწამთ რა და ვინც უფრო ღარიბია, ხშირად ის უფრო ამპარტავანია.

მაგრამ ამ საშინელებას თავი დავანებოთ, ჩემო მიშელ, რადგან სიღარიბესა, ტანჯვასა და შრომას ჩვენც კარგად ვიცნობთ. სამწუხარო ის არის, რომ ამ უბედურ ქალაქში კიდევ რომ გინდოდეს გაჭირებულის შველა, ვერას უშველი, რადგან არც კი იცი, ინდომებს შენს დახმარებას, თუ არა.

ახლა ხომ წარმოდგენილი გაქვს, რა უნდა იყოს პარიზისთანა დიდი ქალაქი. რამდენიმე საათი რომ სულ ერთსა და იმავე გზაზედ იარო, მაინც ბოლოში ვერ გახვალ: ყველგან იგივე ლურჯი სახლები, ტალახიანი ქუჩები, ხან უფრო განიერი, ხან უფრო ვიწრო; ყველგან იგივე დუქნები, მაღაზიები თავიანთი ზედწარწერებით, იგივე ეტლები და იგივე მოსეირნე, მხიარულად მოლაპარაკე ხალხი. ბევრი-ბევრი აქა-იქ ხეებით დაჩრდილულ და აუზით შემკულ მოედანზედ გახვიდე, რომელსაც მერწყულენი და კოკებით ქალები ეხვევიან; ან არა და აქა-იქ უშველებელ შენობას შეხედები რასმე, როგორც სავერნში კარდინალი როანელის სასახლე გინახავს; ან კიდევ ხიდს ნახავ, ან დახურულ ბაზარს, თეატრს, მაგრამ სუყველაფერს რაღაცა ულაზათოს და ულაშაზოს. ზამთარში იმისთანა ტალახი იცის

ქუჩებში, რომ მუხლამდე ლაფში ტოპავენ; წვიმს თუ თოვლი დნება. იქვე ქუჩებში რჩება და მზის მეტი იმას პატრონი არაინა ჰყავს; ამას ზედ ერთვის საშინელი ბურუსი და ისე ჩამობნელდება ხოლმე ყველაფერი, რომ მხიარული ბუხარიც კი ველარ ახარებს დაღონებულ გულს. ჩვენებური სპეტაკი თოვლი კი ნუ გგონია. თეთრი ხალივით რომ მოეფინება ხოლმე ტყეს და ისე ბრწყინავს მზეზედ, თითქო აღმასი დაუბნევია ვისმეო; აქაურს თოვლსაც კი თოვლობა აკლია და არც გულს ახარებს, არც სულსა. ზამთარში ბურუსი ჰკლავს აქ კაცსა, და ზაფხულში მტვერი და საშინელი სუნი.

გაზვიადებული კი არა გეგონოს რა! რაცა ვთქვი, სრული ჭეშმარიტება ვთქვი: იმისთანა მძიმე ტვირთი უნდა აწვეს კაცს, როგორც ხალხის უფლებანი და კონსტიტუციის შედგენა და დამყარებაა, რომ ამისთანა ალაგას ერთ თვეზედ მეტი დარჩეს. მამაჩემი ისეა გართული თავის საქმეებში, რომ ყურადღებასაც არას აქცევს და საერო კრებისა, იმის განაჩენების და კლუბების და გაზეთების გარდა არა აგონდება რა. იმისთვის სულ ერთია, აქ იდგება თუ სხვაგან; თოვლ-ქყაბი იქნება თუ კარგი დარი; გრილი დღე თუ სიცხე-ჰაპანაქება; ოღონდ კი საერო კრებაზედ და იაკობელების კლუბში საქმე კარგად იყოს და იმის მეტი არა ენადვლება რა. ამიტომ არის, რომ, რაც პარიზში ვართ, ოჯახის საქმეებს მარტო მე განვაგებ: ფული მე მბაბრია, სავაჭროდ მე დავიარები და როცა გამიჭირდება რამე და მამაჩემს დავეკითხები, ცივად გამომისტუმრებს ხოლმე:

— კარგი! კარგი! როგორც გენებოს, ისე უყავ! მაგებებისთვის სადა მცალიან?... მერე მითხარი, როცა უფრო მოცილილი ვიყო... ამ საღამოს კრებას უნდა დავესწრო. ჯერ გაზეთებიც არ წამიკითხავს. საერო კრებას ეხლა ქალაღლის ფულზედ აქვს სჯა და მე კი ჯერ არც კი დავფიქრებივარ...

და პირდაპირ ეტყობა, რომ ჩემთვის არა სცალია და მეტი ჩაცივება მეტი ახირება იქნება, მეტადრე როცა საერო კრების საქმე საქმარისად კარგად არ მიდის; მაშინ ისე ჯავრობს ხოლმე, რომ მეშინია, ავად არ გახდეს.

მაგრამ კარგი დღეებიც ბევრი გვაქვს: როდესაც საერო კრება კარგს დაადგენს რასმე და მამაჩემი კმაყოფილია, ჩემთვისაც მოიცლის ხოლმე და ხან თეატრში მივდივართ, ხან იაკობელების კლუბში, ხან საერო კრებაზედ. ჩემდა უნებურად უნდა მოვიართო-მოვიკაზმო, რომ იმოდენა ხალხში თითით საჩვენებელი არ გავხდე. მკლავში ხელს გავუყრი ხოლმე მამაჩემს და ისე დავსვირნობთ. თუ ამხანაგი შეხვდა ვინმე. მაშინვე გამაცნობს: აი ჩემი ქალიო, ეტყვის ხოლმე. ყველა პატრიოტები გავიცანი: ბ. ბ. დანტონი, კამილ დემულენა. ფრე-

რონი, რობესპიერი, ანტუანი (ქ. მეციდანი), ყველანი!... მაგრამ ამას თავის დროზე მოგწერ და ახლა კი მინდა ჩემი დიასახლისობა ავიწყო, რადგან ვიცი ქალბატონი ეკატერინე და ნიკოლი ამ საგანს ერთი ათასად მეტს ფასს დასდებენ, ვიდრე პატრიოტების გაცნობას. ვეცდები არა გამოვავლო რა ჩემს ამბავს.

როგორც მოგახსენე, სამი პატარა ოთახი გვიჭირავს თავისი სამზარეულოთი. სასადილო და მამაჩემის ოთახი ქუჩის მხრივ არის; ჩემი ოთახი და სამზარეულო ეზოსკენ არის მოქცეული, იმისთანა ვიწრო და ბნელ ეზოსკენ, რომ უფრო მყარალ ორმოსა გავს, ვიდრე ეზოს; იმისთანა შავი და მყარალი მართლა ჩვენი ეზო, რომ შიშით ფანჯარიდანაც ვერ ჩამიხედა, შიგ არ ჩავევარდე-მეთქი. იცით რას ვაძლევთ სახლის ქირას? ოცდაოთხ მანეთს თვეში. ჩვენი სახლი რომ ქირით მიგვეცა ჩვენს სოფელში, იქნება ამ ფულის მეათედიც ვერ აგველო. წარმოდგენილი მაქვს, როგორი განცვიფრებულნი დარჩებიან ქალბატონი ეკატერინე და ნიკოლი! ტუჩზედ თითს მიიღებენ და იტყვიან: უი, დამიდგა თვალი, განა სახლის ქირას მაგდენს მისცემენო?! მაგრამ რას იზამთ, რომ ასეა. მამაჩემი რომ დეპუტატი არ ყოფილიყო, შეიძლებოდა უფრო პატარა და იაფი სახლი დაგვეჭირა, ბალახანაში, მეშვიდე სართულში, თვეში ექვს-შვიდ მანეთად, მაგრამ დეპუტატის სანახავად დიდი ხალხი დაიარება და მაშასადამე ღირსეულადაც უნდა დახვდეს: ან რას ეგვანება, კაცს ხალხისაგან ფული ეძლეოდეს — შენ იცი და შენმა სინიღისმა, როგორი წარმომადგენელიც იქნები ჩვენიო, — და ის კი ყაირათობდეს, სადღაც უხერხულ სახლში დამდგარიყოს და ხალხს არცხვენდეს. დეპუტატობა სამსახური კი არ არის, — დეპუტატობა ხალხის მინდობილობა არის და ნამდვილი ხალხის შვილი — დეპუტატი — თავის გამდიდრებას კი არა, ხალხის სამსახურს უნდა ცდილობდეს.

ოცდაოთხი მანეთი სახლის ქირა. ახლა სხვა რამდენი ხარჯი გვაქვს!

ყოველთვის ექვს საათზედ ვდგები, რადგან მამაჩემი რვა საათზედ და, თუ დაიგვიანა, ცხრის ნახევარზედ უთუოდ მიდის საერო კრებაზედ და საუზმე მზად უნდა ჰქონდეს. ხელს წამოვავლებ ჩემს პატარა კალათს და სავაჭროდ მივდივარ ბაზარში ჩვენი ქუჩის ბოლოში. უწინ აქ სასაფლაო ყოფილა, ახლა ბაზარადა აქვთ დადებული. დიასახლისები რომ ჩამოვლენ ხოლმე სავაჭროდ რვიდან ცხრა საათამდე, ერთმანეთისა აღარა ეყუარებათ რა, რადგან სოფლელებს ამ დროს გასაყიდი თითქმის აღარა აქვთ რა. იმ დროს სოფლელები უკვე იზარგებიან და ვაჭრობა ბაზრის დედაკაცებს რჩებათ. რომელთაც ბაზრის გარშემო ფიცრული დუქნები აქვთ დაქირავებული და

გლებჯაცეპისაგან იათად ნაყიდს, ისინი ერთიათად ძვირად ჰყიდიან პარიზელებზედ. ისე ირევა ხოლმე ამ დროს ხალხი, რომ საბრალო სოფლელი, თუ გასაყიდი დარჩა რამე. იძულებულია თითქმის უფასოდ დაუთმოს ბაზრის დედაკაცებს და თითონ, რაც შეიძლება, მალე გაეცალოს იქაურობას.

მე კი ძალიან ადრე ჩავალ ხოლმე, იმ დროს, როდესაც ბაზრის დედაკაცებს ნება არა აქვთ იქ იყიდონ ან გაჰყიდონ რამე და ერთი შეჩვეული მოხუცებული დედაკაცი მყავს, ყოველთვის იმისგან ვყიდულობ, რაც მინდა. ისიც მიცნობს, მეღის და ჩემთვის შენახული აქვს ხოლმე კომბოსტო, ერთი კონა სტაფილო და სხვ. მწვანილეულობა. მივალ და შემომღიმებს: ოჰ, პატრიოტს ვახლავარო. მაგრამ მწვანილეულობის გარდა სხვაც ბევრი რამ გვინდა: ხორცი, თევზი, ქათამი, ერბო, კვერცხი... რომ იცოდე. რამდენი ფული მიღის ამ დაწყველილ პარიზში და რამდენი სიფრთხილე მართებს ადამიანს, რომ მეტი არსად დახარჯოს. მაგალითად, შარტრის ერბო ექვსი შაურია, ლონჟუმოსი — ცხრა შაური, იზინისა — სამი აბაზი და სამივე კი ისე ჰგვანან ერთმანეთს, რომ თუ არ დაუკვირდა, ძნელად თუ გაარჩევს ვინმე. ამიშენდება ოჯახი, თუ იზინის ერბოს მაგივრად შარტრისა შემომპარეს! მეც იმდენი ვეცადე, იმდენი ვეწვალე, რომ განსხვავება ვისწავლე და მგონი რომ ველარ მომატყუონ. ისე მაქვს გაზეპირებული ყველაფერის ფასი, თითქო ჩემს დღეში ამის მეტი საქმე არა მქონია რა: რის ფასი გნებავთ, რომ მე არ ვიცოდე: ყველისა, კვერცხისა, რომელიც მორტანიდან და პიკარდიიდან ჩამოაქვთ და ამისდა კვალად სხვადასხვა ფასადაც იყიდება; ზეთისა, ლორისა, საპონისა... ერთი სიტყვით, ყველაფრის ფასები ვიცო და მგონი ველარეგინ მომატყუებს.

რომ უფრო კარგად წარმოგიდგინოთ აქაური სიძვირე, ისიცა კმარა მოგახსენოთ, რომ შეშა და ხისა და ქვის ნახშირი აქ გირვანქობით იყიდება. წვრილმანი ვაჭრობა უფრო ოვერნელების ხელშია, რომელნიც ყველაფერს კადრულობენ, რომ ლუკმაპური იშოვონ როგორმე; ყველაფერს ისინი ჰყიდიან და, ასე გასინჯეთ, ზურგით წყალსაც კი ისინი ეზიდებიან მეხუთე და მეექვსე სართულში. ცეცხლის ასანთები ნაფოტი რა არის, ისიც კი საყიდელია და მეშინიან თავი არ შეგაწყინოთ, თორემ ყველაფრის ფასებს გაცნობებდით. გარდა ამისა ისე გაეშმაკებულია აქ ხალხი, რომ ყველა იმასა ცდილობს, რომ მუშტარი მოატყუოს როგორმე და, ნაფოტი რა არის, ნაფოტშიაც კი ცუდლუტობენ და ყალბობენ.

ახლა რძე, ხორცი, სანთელი, საპონი, შაქარი! სადილს გაათავებ და ახლა მეწვრილმანესთან უნდა გაიქცე, მერე სარეცხის მრეცხავ-

თან. ხარაზთან, თერძთან და ყველგან ფული, ფული და ფული! რასაც მამაჩემი იღებს, სულ ასე იხარჯება და, თუ რჩება რამე თითო-ოროლა გროში, იმისას წიგნებსა ყიდულობს, გაზეთებს და გაჭირებულ პატრიოტებსა შველის.

მაგრამ საქმე კარგად მიდის და უმთავრესიც ხომ ეს არის; მიუხედავად იმისა, რომ საერო კრების წევრნი ბევრნი მიუდგნენ მეფეს, ხალხს უღალატეს და კიდევაც ლალატობენ, გამარჯვებული მაინც ხალხი დარჩება, უფლებებს შეიძენს, და ღირსეული შრომითა და გაჭირებითაც შეიძენს, მერწმუნე! ეს კია რომ ხალხის ნამდვილ წარმომადგენელთ და პატრიოტებს რომ არ აელაგმათ მეფისაგან შესყიდული თავიანთი ამხანაგები, იცოდე ეხლა საერო კრების ხსენებაც აღარსად იქნებოდა და ხალხს ისევ ძველებური და უფრო მძიმე ტვირთიც ექნებოდა საზიდი. ძველებურად დაგვიმონავებდნენ, გვამუშავებდნენ, გვაწვალებდნენ და ჩვენი ოფლით თვითონ გაიხარებდნენ, როგორც საერო კრების უწინ იყო. კიდევ კარგი, რომ ამ მოღალატეებს შიგ კრიჭაში ჩაუდგნენ კლუბები და ყველაზედ უწინ იაკობელების მონასტერში რომ იკრიბება, რომელშიაც მამაჩემი დაიარება. ყოველ საღამოს იქ შეიკრიბებიან ხოლმე საუკეთესო მამულიშვილნი, ერთს დიდ დარბაზში, რომელშიაც ბერებს ბიბლიოთეკა ჰქონიათ, ვიდრე გაიხიზნებოდნენ. მთელს პარიზში იაკობელების გარდა ერთი კიდევ კორდელიერის კლუბია განთქმული.

თავდაპირველად კლუბებში. მარტო ხალხის წარმომადგენელნი დაიარებოდნენ, მაგრამ აგერ რამდენიმე თვეა, იმათ პატრიოტებიც მიემატნენ, რომელნიც საერო კრებაში არ ურევიათ. და რაც ხანი გადის, უფრო მეტს გავლენას იძენენ პარიზში და მთელს საფრანგეთშიაც. ბ. ბ. დანტონი, ლეჟანდრი, ფრერონი, პეტიონი, ბრისსო, კამილ დემულენი და სხვ. ყოველთვის იქ არიან. როდესაც არისტოკრატები ძალიან თავს გავლენ და საერო კრებაზედ დაურიდებლივ ლანძღავენ ხალხსა და ხალხის წარმომადგენლებს, მაგ: „წავიდეთ, თქვენო ბრწყინვალეზავ, ნუ თუ არ მოგწყინდათ ამ რეგენების ყბედობა?“ ან არა და: „რას ყროყინებენ, დასწყევლათ ღმერთმა! უნდა მივარდეს ამათ კაცი და ნაკუწ-ნაკუწად აქციოს!“ და ეს ხომ ჩვეულებადა აქვთ თავადაზნაურთ და თითქმის ყოველ დღე ამისთანა „გმირობას“ ჩაღიან, — დიად, როდესაც არისტოკრატები ძალიან თავს გავლენ, იაკობელები და კორდელიერები მაშინვე შეიყრებიან ხოლმე: ყველგან ზარსა რეკავენ; პატრიოტები — ქალი და კაცი — საერო კრებისკენ მიეშურებიან და თან ზოგს ქვაბი მიაქვს, ზოგს ტაფა, ზოგს ავანგდასტა და იმისთანა ხმაურობით და ყვირილით მიდიან: ჩამოახრჩეთ, ჩამოახრჩეთ არისტოკრატებიო, რომ მეორედ მოსვლა ეგო-

ნება კაცსა. თან ქვაბებს და ტაფებს უყრავენ, და „წავა, წავა“-სა მღერიან. შეეშინდებათ ხოლმე არისტოკრატებს და საჩქაროდ მიიმალებიან. რამდენს იცინებენ ბატონი ივანე და ლეტუმე, ეს ამბავი რომ ნახონ!... ამას მანიფესტაციას ეძახიან. არისტოკრატები კი ამტიციებენ, ეგ აჯანყება არისო. როგორც კი დაიძვრის ხალხი და ლაფაიტიც თავის თეთრ ცხენს მოახტება, გამოიყვანს მილიციას და ხალხის დამშვიდებას ცდილობს. მეორე ღღეს სასაცილოდ არა ჰყოფნის ხალხს ეს ამბავი: „ჰე, ვერ შევაშინეთ არისტოკრატები!.. — ეუბნებიან ერთმანეთს მუშები, — ერთი-ორი კვირა ველარას გაბედავენ და მერე კი... გაბედავენ რასმე და ჩვენც მზად დავხვდებით!“

პარიზში ყველგან ლაფაიეტსა ნახავ; მილიციის საქმეებს ოს განაგებს, მეფე-დედოფალს ის ახლავს, ხალხს ის ამშვიდებს. მაგრამ ხანდახან პატრიოტების დაპატიმრებასაც არ უკადრისობს, და რევოლუციას რომ დედაკაცები არ მიმხრობოდნენ და თავიანთ ქმარ-შვილისთვის ლაფაიეტის ყოველი ბრძანების ასრულება არ აეკრძალათ, დიდი ხანია ცუდ საქმეს იზამდა.

ამას იმიტომა გწერ, ჩემო კარგო მიშელ, რომ უფრო კარგად დაგიხატო, რამოდენი გაჭირება უნდა აიტანოს პარიზელმა ხალხმა, რომ აურიცხველ მტერს აჯობოს. იქნება გგონიათ, რაკი მილიცია შემოვიღეთ და ხარჯი შევიმსუბუქეთ, ახლა კი აღარა გვიჭირს რაო! სცდებით: პარიზელი ხალხი რომ შიგ კრიჭაში არ უდგეს ამოდენ თავადაზნაურობას და ეპისკოპოსთ, რევოლუციას აქამდე ათჯერ შეაყენებდნენ და ჩვენც ჩვენსას გვიზამდნენ. ხალხის ერთგულ მარტს არც ერთი შეთქმულება არ გამოეპარება და დაურიღებლივ აბეზლებს ხალხის წინაშე მეფესაც, დედოფალსაც, თავადაზნაურობასაც, სასულიერო წოდებასაც, უწინდელ პარლამენტებსაც, ქალაქის გამგეობასაც. ერთი სიტყვით, საცა კი რევოლუციის წინააღმდეგ კრინტს დასძრავს ვინმე, უნდა დარწმუნებული იყოს, რომ მარატი უთუოდ გამოაქვეყნებს.

ხანდახან მეტისმეტიც მოსდის და მამაჩემი ამაში კი არ ეთანხმება: „როგორ იქნება, რომ ჩვენს მოწინააღმდეგეთა შორის პატიოსანი არავინ ერიოსო, — ამბობს: — იმავე თაობითვე, დაბადებიდანვე იმას ჩასჩიჩინებდნენ საწყლებს, რომ ისინი ბატონად არიან დაბადებულნი, და ჩვენ მონებად; რომ იმათ სულ სხვა სისხლი უდგათ და ჩვენ სხვა; რომ ქვეყანა იმათია და ჩვენ მარტო იმათ სასიამოვნოდა ვართ გაჩენილნი; იმავე თაობითვე ამას ჩასჩიჩინებდნენ და, რადგან არც სწავლა აქვთ და არც გონების გამჭრიახობა, ღვთაებრივ დადგენილებასავითა სწამთ რაც გაუგონიათ და ჩვენი განთავისუფლებილს წაღილი იმათ ბუნებრივი კანონების დარღვევად და ღვთის გმობად

მიჩნიათ. სცდებიან, რადგან ჭეშმარიტება არ იციან, და არა იმიტომ, რომ უპატიოსნონი არიან. და განა ჩვენ კი ყველანი წმინდა წყლისანი ვართ? რამდენსაც გნებავთ დაგისახელებთ ცრუ პატრიოტებს, რომელთაც სულის ცხოვებასავით ენატრებათ ბატონობა, და რომ შეიძლებოდეს დღესვე უარს იტყოდნენ თავიანთ დედ-მამაზედ, გულს მეფის ნაწყალობევე ორდენებით დაიმშვენებდნენ, ჯიბეში მეფის ნაწყალობევე პენსიას ჩაიჩხრიალებდნენ, თავის მოძმე გლეხკაცს ბატონკაცურად შესტუქსავდნენ და სულთ ხორციანად თავს გაიყიდინდნენ, რომ ღირდნენ რათმე და ფასის მძლეველი ჰყავდეთ ვინმე, მეფე კი არა, თუნდა ეშმაკი იყოს იგი. არ ვარგა, რომ სულ ხალხს ქებაში ვართ, თითქო ხალხი სათნოებით სავსე იყოს და ავი არა სჭირდეს რა; იმდენი ღმერთმა წყალობა მომცეს, რამდენიც ხალხში და მოქალაქეთა შორის გაიძვერა კაცი იყოს და, ღმერთი მოწყალეა, ამასაც მალე ვნახავთ: როგორც კი გათავდება რევოლუცია, და საბრძოლველი აღარავისთან არ გვექნება, მაშინვე თავს წამოჰყოფენ ეს გაიძვერები და უფრო თავხედურად და ამჟამად მოექცევიან ხალხს, ვიდრე ნამდვილი თავადიშვილები; და ეს მით უფრო სამწუხარო იქნება, რომ ამ ახალი ცრუ ბატონების სიძუნწეს, რეგვენობას და თავხედობას საზღვარი არ ექნება; მაშინ მოგვაგონდება, რომ ამ ვაე-ბატონებმა უარჰყვეს საკუთარი დედ-მამა და ნათესავობა, რომ სხვის აღაგას აცოცებულყვენ და ყოველი ღონისძიება იხმარეს, რომ არავის წაეძახნა: „რა ძალიან თავი მოგაქვს, განა არ ვიცი ვინცა ხარ: დედაშენი პურის მცხოვრად დადიოდა და მამაშენი მეჯინიბედლო!“ ნუ თუ მართალია მამაჩემი, ჩემო კარგო მიშელ? და გათავდება თუ არა დიდებულებთან ბრძოლა, თავს წამოჰყოფენ ჩვენივე ძმანი და ახლა ისინი მოგვინდომებენ გაბატონებას? ღმერთმა ნუ ქნას, რადგან ჩვენც შევრცხვებით და იმ წმინდა საქმესაც შევარცხვენთ, რომლისთვისაც ჯერ კიდევ ბევრი სისხლი დაიღვრება!

ასე გაჯავრებული ხშირად არის ხოლმე მამაჩემი, მაგრამ დამ-შვიდებაც მალე იცის და თავის თავს თითონვე ანუგეშებს: „ეგ არა-ფერი. უმთავრესი ის არის, იმისთანა კანონმდებლობა შემოვიღოთ, რომ არც ერთ გაიძვერას არ შეეძლოს, ხალხის შვილი იქნება, მოქალაქე თუ თავადაზნაურთაგანი, წამოიწიოს, პატიოსან ხალხს ეშმაკობით და ფლიდობით კისერზედ დააჯდეს, თავის ნებისად კრიჭოს და პარსოს იგი და თითონ კი ხელგაუნძრევლად, უზრუნველად, განცხრობით ცხოვრობდეს. საქმე ის არის, რაც შეიძლება მეტი გვეყავდეს იმისთანა კაცები, როგორებიც დანტონი, რობესპიერი, გრეგუარი, დემულენი და სხვანი არიან, რომ ხალხი გაანათლონ და შთა-აგონონ, რომ მომავალი ერთობაზედ და თანხმობაზედ არის დამო-

კიდებული. საფრანგეთს ეს კაცები იხსნიან განსაცდელისაგან. მარტო ესენი ალაგმავენ მეფისა და დიდებულთა შესყიდულ მომხრეებს და თუ დმერთი შეგვეწია, რამდენსამე თვეში იმათი ხაენებაც აღარსად იქნება. რას იზამენ? ერთადერთი იარაღი გააჩნიათ იმათ ჩვენ წინაღმდეგ — ცილისწამება, მაგრამ სიმართლე ყოველთვის იპოვის თავის გზას და როდესაც ხალხს ძალიან გაუჭირდება, თავის შეცდომას თითონვე იგრძნობს და თითონვე აწამებს ცილისმწამებლებს.

რაც ხანი ერთად ვიდექით ჩვენა და მამა იაკობი, იაკობელების კლუბიდან ერთს არავის გაუჭაქანებია ჩვენსა; მამაჩემი ვერავის იპატიებდა, რადგან იცოდა, რომ ბევრი იმისთანა კითხვა აღიძვრებოდა, რომლის შესახებ მამა იაკობი და ისინი თავის დღეში ვერ მორიგდებოდნენ და იქნება უსიამოვნობაც მოსვლოდათ. მაგრამ რაჟი მ. იაკობი ჩვენთან აღარ არის, ძალიან ბევრნი დიარებიან ჩვენსა, რომ წინაღვე შეთანხმდნენ სხვადასხვა წინადადებათა და გარდაწყვეტილებათა შესახებ და ვერ წარმოიდგენ რა თავმდაბალნი და გულკეთილნი არიან ყველანი. რამდენადაც ხალხის მოწინააღმდეგენი თინთლიბაზობენ — სულ სხვასა ფიქრობენ და სხვას ამბობენ, იმდენად გულმართალნი არიან პატრიოტები და რაც გულში უღევთ, არავის არ უმაღავენ.

ოთხშაბათს, 14 მკათათვეს, სამშობლოს ერთობა * რომ იღლე-

* რაც ხანი საერო კრება კონსტიტუციის შედგენაზედ შრომობდა, საფრანგეთის ყოველი კუთხე სულ იმის ცდაში იყო, რომ უწინდელი თემებად განყოფილება და მით ერთისა და იმავე ერის სხვადასხვა ნაწილებად განცალკევება მოესპო და ერთობა დაემყარებინა. სოფელი სოფელს უერთდებოდა, ქალაქი ქალაქს. ყველგან კრებები იმართებოდა, რომელზედაც სულ იმას ქადაგებდნენ, საფრანგეთი ერთია და უწინდელი განაწილება მარტო ჩვენი ქვეყნის მტრობით იყო შემოღებული; ახლა კი დროა გონს მოვიდეთ, შევეერთდეთ და ჩვენზედ ამხედრებულს მტრებს ერთსულად და ერთგულად დავხვედეთ. ყველა კრება ფიცითა თავდებოდა: ან თავისუფალნი ვიყენეთ, ან დავიხოცნეთო. ჰფიცავდა ხალხი. იქვე კრებაზედ „სამშობლოს საკურთხეველს“ ავებდნენ, ბავშვები მიჰყავდათ და მათთან ერთად მუხის ფოთლის გვირგვინით ან პურის თავთავით დაგვირგვინებული გათერთებული მოხუცებულები და ფიცს იმათ წინაშე სდებდნენ. ეს კრებები ცის ქვეშ იყო ხოლმე, მინდორში.

და რადგან დღითი დღე იზრდებოდა ეს მოძრაობა, დაადგინეს — ბასტილიის ციხის აღების დღეს, წლის თავზედ, მთელი საფრანგეთის წარმომადგენელნი შეიკრიბებინა პარიზში და ერთმანეთს ერთობას შეჰფიცავენ. დიდი ხნის წინად დაიწყო ხალხმა მარსის მოედნის შემზადება სტუმრების მისაღებად: ქალი, კაცი, ბავშვი ყველანი შეელოდნენ მუშებს და თან „წავა, წავა“-ს მღეროდნენ. 14 ივლისის დიდი ხალხი მოგროვდა. „სამშობლოს საკურთხეველის“ წინაშე ეპისკოპოსმა ტალიერანმა და იმასთან ერთად ასმა მღვდელმა პარაკლისი გადაიხადეს. შემდეგ ამისა ერთგულება შეჰფიცეს კონსტიტუციას, საერო კრების თავმჯდო-

სასწაულა საფრანგეთმა, დანტონი მილიციის რაზმს მიუძღვოდა, დამინახა ხალხში, წინ გამიყვანა და „სამშობლოს საკურთხეველის“ გვერდით დამაყენა. ცოტა ხანს უკან მოვიდა, ხელი გამომიწოდა და თავის მეუღლეს გამაცნო: დაბრძანდით, მე დარწმუნებული ვარ, კმაყოფილნი დარჩებით ერთმანეთისაო. ძალიან ლამაზი ცოლი ჰყოლია, და ამასთან ისეთი მიმზიდველი, რომ ახალი გაცნობილნი აქველაპარაკობდით, თითქო ერთად შეზრდილნი ვყოფილიყავით. საშინლად წვიმდა, ქოლგა ძლივს იმაგრებდა წვიმას, მაგრამ იმას ისე უხაროდა ეს დღესასწაული, რომ წვიმა არცკი ახსოვდა. როცა დღესასწაული გათავდა და ისა და დანტონი ეტლში სხდებოდნენ შინ წასასვლელად, სიტყვა ჩამომართვა, რომ ჩვენს ნაცნობობას ამით არ შეეწყვეტთ და შინაცა ვნახავ. ბ. კამილ დემულენს მარსის მოედანზე ენახა მამაჩემი და რომ დაგვინახა, ჩვენს ეტლში ჩაჯდა; გაჯავრებული იყო, მეფემ იმით ისარგებლა, რომ წვიმს და იმის მაგივრად, რომ მოსულიყო და სამშობლოს ერთობას დასწრებოდა, ის შინ დაიმალა — წვიმს და გარედ ვერ გამოვალო! ძალიან გაჯავრებული იყო, მაგრამ მთელი პარიზის ხალხი იქ ტრიალებდა, ცამდე აღიოდა ხალხის გრიალი: თავისუფალ ერს გაუმარჯოსო! და დემულენმაც მალე მოიბრუნა გული და: „სულ ერთია, — შოველ, — უთხრა მამაჩემს, მეფემ რაც უნდა ქნას, ხალხი ჩვენკენ არის! თითქო ერთადერთი გული უცემდეს ამოდენა ხალხს, ისეა იგი გატაცებული სამშობლოს სიყვარულით, სიმართლით და თავისუფლებით!“ თვალები უბრწყინავდა: მე ისე ამიჩქროლდა გული, რომ კინაღამ ცრემლი მომერია. ხალხი კი ისევ ისე მხიარულად გრიალებდა: თავისუფალ ერს გაუმარჯოსო! თან ხელში მწვანე ცაცხვის ტოტებს ათამაშებდა, ქულებს ზევით ისროდა... მთელს ქალაქში ზარსა რეკდნენ.

ამ დროს მზემაც გამოაშუქა.

ხუთი საათი იყო, როდესაც სასახლესთან მივედით. კამილ დემულენმა ხელი მომცა და ერთს საუკეთესო ყავახანაში შევედით, რომელიც სავსე იყო პატრიოტებით და იმათი ცოლშვილით; ყველგან მხიარული ჟრიამული ისმოდა. ცოტა ხანი იქ დავყავით და მერე კი გამოგვეთხოვა, რედაქციაში უნდა წავიდე და ჩემს გაზეთს მივხედოვო. ხომ ხედავ, ჩემო მიშელ, რა თავმდაბალნი არიან ეს საქვეყნო მოღვაწენი. სულ უკანასკნელი მოხელე რა არის, ისიც კი ისე მედი-

მარემ, პარიზის მამასახლისმა და მილიციის წინამძღოლმა. ამ ფიცს სამოცი ათასი საფრანგეთის ყოველი მხრიდან გამოგზავნილი წარმომადგენელი დაესწრო და ოთხასი ათასი მაყურებელი. მიუხედავად იმისა, რომ მთელი დღე წვიმდა, სადამოხედ ჩირალდნებით გაანათეს ბასტილიის ციხის ნანგრევები და ზედ დიდრონი ასოებით დააწერეს: „ლხინი და დროს გატარება“.

დურად იქცევა ჩვენში. თითქო ზრდილობა და თავის შერცხვენა ერთი იყოს. ძალიან სამწუხაროა, მაგრამ რას იზამ, კემშარიტებაა: ვინც თითონ არაფერია და თუ ცოტა რამ მნიშვნელობა აქვს, იმ ალაგის წყალობითა აქვთ, რომელიც შემწეობით და ქრთამით უშოვნია, ყველა ასე იქცევა; მაგისტანა აქაც ბევრია, და აქ არის თუ სადმე სოფელში, ყველგან ადვილი საცნობია ინდოურივით გაფზორილი არარაობით, რომელიც სასაცილო იქნებოდა, სამწუხარო რომ არ იყოს.

კამილ დემულენს დიდი ხანია ვიცნობთ; მამაჩემს იგი საუკეთესო პატრიოტად მიაჩნია და ძალიან ბევრს ეცადა, რომ იმისი გაზეთი ყველგან გაევრცელებინა. სამაგიეროდ დემულენმა გამოგვიგზავნა ბილეტები სხვადასხვა თეატრში წასასვლელად. ვერ წარმოიდგენ, რა ძალიან ვისიამოვნე თეატრში, მეტადრე „კალეს ალება“ და „პატრიოტული მუხა“ რომ ვნახე. ისე წარმოადგინეს ყველაფერი, ისე ცოცხლად და ნამდვილად გამოხატეს ხალხის მწუხარება, აღდგომა და გამარჯვება, რომ მე სრულიად გადამავიწყეს, რომ თეატრში ვიყავი და ისე გამიტაცეს თავიანთ თამაშით, რომ იმათთან ერთად ხან ვტიროდი და ხან ვხარობდი; ეს საერო თეატრში. სამეფო თეატრში „ესოპე“ ვნახე და „ორი გლეხკაცი“. ხავერდის ტანისამოსი ჩაეცკიათ ამ გლეხკაცებისთვის, იმათ დედაკაცებისთვის — აბრეშუმის კაბები და ძალიანაც მომეწონენ; მაგრამ მამაჩემს დროს დაკარგვა არ უყვარს და სულ ამთქნარებდა. ერთ საღამოს მითხრა:

— „ხედავ, მარგალიტა! ჩვენს მეფეს ჩვენი გლეხკაცი მარტო მანდ უნახავს, თეატრში და მანდ გაუცვნია. რა უჭირს თეატრში ჩვენს გლეხკაცს? ლამაზად ჩასუქებულა, წითლად დაჟღავნი გაუდის, სულ ინდოურებს შეექცევა და დიბა-ატლასი აცვია ჯარისკაცებს იტყვი და ისინიც სულ იმას გაიძახიან. — თეატრში გეუბნები, წარმოდგენაზედ, — ჩვენი სიცოცხლე ჩვენი მეფისაა, გაფწყდებით, დავიხოცებით და შინ წასვლას კი ნუ გავგაგონებთო. მოდი და ნუ გაიკვირვებს ჩვენი დიდებული მეფე, როდესაც ეტყვიან, ხალხი შიმშილით იხოცებაო! პარიზელებსაც კი უნდა უკვირდეთ. უკმაყოფილებას რად აცხადებს ეს ხალხი? ხომ ყველაფერი ბევრი აქვს და რაღა უნდაო? პარიზელებს ხალხი თეატრში უნახავთ და დარწმუნებულნი არიან, გლეხკაცს ბედელი ჰურით სავსე აქვს, ძარში სიმინდი ვედარ ეტევა, გუთნეული ხარ-კამეჩი ჰყავს, ერბოსა და ყველს ქვევრებით ინახავს და მარანში ხომ იმოდენი ღვინო აქვს, რომ წყალივით რომა სვას, მაინც არ დააკლდება. ზის მამაცხონებული გლეხკაცი და ქეიფს ეწევა: წითელ ღვინოს გადაჰკრავს. სიმღერას დასძახებს, თავისავით ბედნიერ ქალებს შეჰყრის და ცეკვას მორთავს!.. ხანდახან

ისიც მოხდება ხოლმე, რომ ვინმე ყმაწვილი კაცი, დიდებული გვარის თავადიშვილი ქალს მოსტაცებს გლეხკაცს, მაგრამ თავის დღეში არ მომხდარა, რომ ჯვარი არ დაეწეროს. აი, როგორ არის დახატული თეატრში გლეხკაცი! მე ჩემს დღეშიც ვერ წარმოვიდგენდი, რომ ასეთი ბედნიერები ვყოფილვართ. და თუ გლეხკაცი ასეთ ნეტარებაში ჰყოლიათ, თვით მებატონეები და მეფე როგორი ხალხის ერთგულნი და მოსიყვარულე მზრუნავნი უნდა იყვნენ? ხომ ნახე, რა ქება-დიდებათ და სიყვარულით იხსენიებდა გლეხკაცი თავის ბატონს! ხომ ნახე რას მღეროდა პატარა გოგო ბატებს რომ ამოვებდა? გახსოვეს „კალეს აღებაში“ ჯარისკაცები მუხლამდე ტალახში იბრძვიან დამშეულნი; აგერ რამდენი ხანია, არაფერი ჩასვლიათ პირში და მაინც სულ ხუმრობენ და „ჩვენს მეფეს გაუმარჯოსო!“ იძახიან. თუ ეს მართალია, ის ბედნიერი, დიბა-ატლასით მორთული გლეხკაციც მართალი იქნება ან კიდევ პარნასი რომ წარმოადგინეს, რომელზედაც ღმერთნი შევერცხლილ კარტონის ქუდებით რაღაცა სულელობას გაიძახოდნენ! ვინც ჩვენს გლეხკაცს ასე დახატავს, განა იმას გლეხკაცი თვალთ უნახავს სადმე? ვინც პარნასის ღმერთებს ასე გამოიყვანს, განა იმან ისტორიისა იცის რამე? საცქერად იქნება კარგიც იყოს ეგ ყველაფერი, მაგრამ გონების საზრდოს კი სრულიად არაფერს იძლევა და მაშასადამე კაცს ტყუილუბრალოდ დროს აკარგვინებს“.

როგორ არ დავეთანხმებოდით, როდესაც ვგრძნობდი, რომ სრულს სიმართლეს მეუბნებოდა და მას აქეთია, თეატრში სიარულს შინ ყოფნას და დასაკერებელი სარეცხის და წასაქსოვი წინდების რიგზედ მოყვანას ვამჯობინებ.

მაგრამ მგონი ძალიან გაგრძელდა ეს წერილი, ჩემო მიშელ! დასასრულ მინდა ერთი ამბავი გაცნობო, რომელიც ძალიან გასიამოვნებს შენცა და ყველა ჩვენებურ მამულიშვილსაც. უკანასკნელი შენი წერილი რომ მოგვივიდა, აქ სულ ნანსის საქმეებზედ ლაპარაკობდნენ და ნამდვილად კი არავინ არაფერი არ იცოდა. თვით ლაფაიეტისაც კი არა სწამდათ რა, მით უფრო რომ ლაფაიეტი ძალიან ცდილობდა, რომ თავისი ბიძაშვილი გენერალი ბულიე დაეჯილდოვებინათ. ცდილობდა და მოახერხა კიდევ: საერო კრებამ ცამდე აამალლა იგი და მეფემ მილიციას მიჰმართა, გენერალ ბულიეს მადლობა გამოუტყხადეთო. შენი წერილი რომ წაიკითხა მამაჩემმა, ცას დაეწია: აი ჰეშმარიტება აქ სწერიაო, დაიძახა; ძალიან ბიჭი დადგა ჩვენი მიშელი და ისე კარგად ხატავს, რაც საკუთარი თვალთ უნახავს, რომ ეჭვის შეტანა შეუძლებელი არის... ეს თეატრი კი არა, კომედია კი არა, ნამდვილი, მტკნარი ჰეშმარიტებაა... ძალიან განვი-

თარებულა ჩვენი მიშელი... ეტყოდა ბევრი უშრომნა... ბევრს კითხულობს და სარგებლობს კიდევ წაკითხულთ. მით უკეთესი!..

ხომ იცი, როგორ მიაამებოდა შენი ქება! წერილი რომ წაიკითხა, ჯიბეში ჩაიდო: გუშინ კლუბში დეპუტატმა რენიომ სიტყვა ითხოვა ნანსის საქმეებზე და ამტკიცებდა, ისეთი თავგანწირვით იბრძოდა მერტის მილიცია, რომ მადლობის ღირსია და რაღა გამოძიება გვინდა, პირდაპირ მადლობა გამოვუცხადოთო. ეხლა მე ჩავალ და ამ წერილს წავიკითხავ; ვნახოთ რა პასუხს მოგვცემს რენიო?

კლუბში რამდენჯერმე ვიყავი. იმ დღესაც, რაკი მამაჩემმა სთქვა, ეს წერილი უნდა წავიკითხოვო, ვთხოვე, მეც თან წამიყვანე-მეთქი და, რასაკვირველია, აღმითქვა.

— ოღონდ აჩქარდი, მალე ჩაიცვი, რომ არ დაგვიგვიანდეს.

საჩქაროდ მივალაგე ქურჭელი. და ის იყო კაბა გადავიცვი, რომ მამაჩემმა შემომძახა: — მივდივართ, მარგალიტა? მკლავი მომაწოდა და წავედით. რვის ნახევარი იყო.

იაკობელების კლუბი აქვეა ჩვენს ახლო ძველს იაკობელების მონასტერში. მშვენიერი ძველებური ალაყაფის კარები აქვს, დიდი ცაცხვის ხეებით დაჩრდილული ეზო გიაშება, ისეთი კოხტა და ამასთან დიადი რამ არის. კლუბი ეზოში მარჯვენა მხარეს იმყოფება. კლუბის კარი ყოველთვის ღია არის, რომ დაგვიანებულთ გარედან მაინც მოისმინონ მოლაპარაკენი და მარტო მაშინა ხურავენ კარებს, როდესაც წვიმს და გარედ მსმენელი არავინა ჰყავთ.

ჩვენ რომ მივედით, თითქმის სავსე იყო დარბაზი. თავმჯდომარე ბ. რობესპიერი — სულ ახალგაზრდა კაცია, გამხდარი, უფერული, — ზარს აწკარუნებდა, რომ კრების დაწყება ეცნობებინა. მე მაშინვე ქალებისკენ წავედი. რადგან ქალებისთვის ცალკეა მოთავსებული ზემოთ ადგილები, საიდანაც თავს დავცქერით მთელს დარბაზს. უკან ბ. ბ. პრიორი და დანტონი მოგვდევდნენ და მამაჩემი რომ დაინახეს, წამოეწივნენ და ხელი ჩამოართვეს. მოხუცებული ლაფონტენი წუხანდელი კრების განაჩენს კითხულობდა. იმან რომ გაათავა, მამაჩემი წამოდგა და თქვა:

— თუ ნებას მიბოძებთ, მინდა დეპუტატ რენიოს პასუხი გავცე წუხანდელს სიტყვაზედ, რომლითაც იგი ამტკიცებდა, მერტის მილიციას და გენერალ ბულიეს მადლობა უნდა გამოვუცხადოთო. მე მინდა ერთი წერილი წავიკითხოთ, რომელიც დღეს მივიღე შინიდან, ერთი მილიციელისაგან; რასაც იწერება, საკუთარი თვალით უნახავს და, თუ სიმართლე გნებავთ, ამ წერილში ჰპოვებთ, მით უფრო რომ იმ მილიციელს მე ისე ვენდობი, როგორც ჩემს თავს.

— სიტყვა თქვენ გეკუთვნით, — უთხრა თავმჯდომარემ.

ყოველთვის ასეა ბარიზმი: თავმჯდომარის დაუკითხავად ხმას ვერავენ ამოიღებს და ერთსა და იმავე დროს ორის ან სამის ერთად ლაპარაკი, ან ყვირილი, — დაეუკვირებ და მოპირდაპირეს ჩავაჩუქებო, — შეუძლებელია. ყველა თავის რიგზედა ლაპარაკობს და ყველა მადლიერია.

ყველანი გაჩუმდნენ, მამაჩემმა რომ 'მენი წერილი გახსნა და კითხვა დაიწყო. რალა ჩემი თქმა გინდა, ისეც კარგა წარმოიდგენ, როგორ ამიძგერდებოდა გული. კითხვა იმ ადგილიდან დაიწყო, როდესაც ზარბაზნის ხმა შემოგესმათ და მერე უკლებლივ წაიკითხა თქვენი გაჩქარებული სიარული, ქალაქში შესვლა და ხუთი-ექვსი გერმანელი მხედრისაგან ხალხის ქლეთა. იმისთანა სიჩუმე ჩამოვარდა, რომ იმოდენა ხალხის გულის ცემას გაიგონებდა ადამიანი; ისე გაჩუმებულნი ისმენდნენ და სახეზედ კი საშინელი აღშფოთება ეხატებოდათ... ვერ წარმოიდგენ, როგორ იჭექა იმოდენა ხალხმა, როდესაც გაიგეს, რომ ერის ერთგული მილიცია თავიდან მოეშორებინათ, რომ ხალხს არ მიმხრობოდნენ და დაქირავებულ გერმანელებისთვის ხალხის ხოცვა და მოქალაქეთა ძარცვა არ დაეშალათ! არა, ვისაც ხალხის გრგვინვა თავის თვალთ არ უნახავს, ვერ წარმოიდგენს მის საშინელებას, რაც უნდა ხელოვნურად აუწერონ. უცბად წამოიწია ამოდენა ხალხმა, უცბად გაისმა გაბრაზებული ხალხის დრტვინვა და თუმცა რობესპიერი რაც ძალი და ღონე ჰქონდა ზარს აწკარუნებდა, იმისი აღარავის რა ესმოდა. ბოლოს ერთი ათი წუთის შემდეგ ნელ-ნელა დაშვიდდა ხალხი და მამაჩემი ისევ წერილის კითხვას შეუდგა, მაგრამ არც მაშინ გაათავებინეს, რადგან იქ რომ ჩავიდა, სადაც შენ ახალ კართან ნახულ სურათებს ხატავ და იმ უბედურ დედაკაცს, შვილი რომ მოუკლეს და ეხვეწებოდა, მეც მომკალითო, ისევ ისე ბრაზი მოერია ხალხს და კვლავ საშინელი ხმაურობა ატყდა. თავმჯდომარე ზარს აწკარუნებდა. მამაჩემს აკლდამიდან ამოღებულის ფერი ეღო. წერილი აღარ გაათავა და სამაგიეროდ ეს სიტყვები სთქვა:

„— რა საჭიროა ბოლომდე წაგიკითხოთ და თავი მოგაწყინოთ? რაც უნდა გცოდნოდათ, უკვე იცით! ნანსის საქმე თვალწინ გიდგათ და კარგად ხედავთ, რომ ლორენის მილიცია შეურაცხყოფად მიიღებს იმ მადლობას, რომლითაც თავი მოაქვს გენერალ ბულიეს. თქვენ კარგად ხედავთ, რომ ჩვენებურ მამულიშვილთ ხალხის სისხლში ხელი არ გაუსვრიათ! მე უამისოდაც დარწმუნებული ვიყავი, რომ ეს ასე იქნებოდა; ვიცოდი, რომ ნანსში მოკლულთ იტირებდნენ და იგლოვდნენ ჩვენებურები! და აქ კი ცილსა სწამებდნენ, ისინიც გერმანელ ჯარებთან ერთად ხალხს ებრძოდნენო! კინალამ მადლობაც

გამოუცხადეს. — გმადლობთ, რომ თქვენი ძმანი არ დაგინდვიათო! კმარა! დიდებული მეფის მადლობით სავეს ფიალა გენერალ ბულიეს მიაართვან და მარტო იმას დააცლევინონ! ჩვენ მაგისტანა სასმელი გულს აგვირეკს!“

გათავა და დაჯდა. იმისთანა ხმაურობა ატყდა, რომ ერთმანეთისა აღარა ეყურებოდათ რა, მაგრამ იმოდენა ხალხის ხმა დანტონის ყვირილმა დაჰფარა და ცოტათი მიაჩუმა. დანტონი მადლობას უძღვნინდა მამაჩემს, რომ მან თვალი აუხილა კლუბს ამისთანა სამძიმო გარემოებაში და ჭეშმარიტება აცნობა ამ უმაგალითო ხალხის ქლექტის შესახებ. მადლობა გამოუცხადა აგრეთვე ჩვენებურ ხალხს და მილიციას, რომელნიც თავის დღეში არ უმტყუნებენ სამშობლოს და რომელთაც ვერავითარი ცილისწამება ვერ შესწიკლავს.

და წარმოიდგინე, მიშელ, თუმცა მეფისაგან შესყიდული დეპუტატების წყალობით საერო კრებამ დაადგინა გენერალ ბულიეს მადლობა გამოვუცხადოთო: თუმცა ლაფაიეტიც სულ იმის ცდაში იყო, რომ თავის ბიძაშვილს მეფის წყალობა ღირსებოდა; თუმცა მეფის მომხრე გაზეთები ყველა ღონისძიებას ხმარობდნენ, რომ ხალხისთვის თვალი აეხვიათ და ბულიე ერის ერთგულად გამოეყვანათ; მაინც ვერ აუსრულდათ წადილი და პარიზის მილიციის ოცდარვა რაზმმა უარი განაცხადა! გენერალი ბულიე მადლობის ღირსი არ არის და ჩვენ იმას მადლობას ვერ გამოვუცხადებთო! ვალდებულების მილიციამ ერთხმად დაადგინა, „გენერალი ბულიე სამშობლოს სიყვარულით გატაცებული გმირი კი არაა, სისხლით გაუმადლარი მხეცია, რომელიც ნანსში გამარჯვების გამო, თუ კი მიუდგომლად გასინჯავენ საქმეს, უნდა იყოს სამაგალითოდ დასჯილი და არა დაჯილდოვებული“.

ვიცი, ძალიან გესიამოვნება ეს ამბები. როგორც ხედავ, მარტო ჩვენ არა გყოფილვართ სიმართლით და თავისუფლებით გატაცებულნი! პარიზელებიც ჩვენთან არიან და არა თუ მარტო პარიზელები, ყველა პატიოსანი კაცი ჩვენთან არის და თავისუფლების მოსაპოვებლად იღწვის.

აგერ ქალაღი გამოილია და მე კი იმდენი მაქვს კიდევ მოსაწერი: მინდოდა საწყალი ლუსტალოს სიკვდილი მომეწერა, იმისი დასაფლავება და ქება-დიდება, რომლითაც მიცვალებულის თავგანწირული მამულიშვილობა ასწერეს; მაგრამ ისეც ძალიან ვაგრძელდა ჩემი წერილი და დრო არის გავათავო. ნახვამდის!.. მერმის, იმედი მაქვს, ერთმანეთს ვნახავთ და მაშინ დაწვრილებით მოვილაპარაკებთ ამეებზედ; ჩვენთვის ძველებურად მივიკუნჭოთ ბატონ ივანეს ბუხართან და ძველიც გავიხსენოთ და ახალიც ვიცინებოთ. სამერმისოდ კონს-

ტიტუციაც შედგენილი იქნება და ადამიანის უფლებანიც კანონიერად აღიარებული. რა ბედნიერები ვიქნებით! მაგრამ მანამდე კიდევ დიდი შრომა და მოთმინება დაგვკირდება... ჩვენს ბაღს კარგად მოუარე, მიშელ! რომ მომაგონდება, თვალწინ წარმომიდგება ყველაფერი და ისე გამიტაცებხ ოცნება, რომ ხელს წვაატან ხოლმე ვარდს მოსაგლეჯად. ჩვენი ხილი? ეხლა შემოსული იქნება; იქნება კიდევ დაკრიფე და შეინახე?! რა კარგი ხარ, ჩვენო ქვეყანავ! რა კარგი და რა ტურფა ხარ! ხომ ხშირად ჩადიხარ ჩვენსა? მე რომ შენი ვიყო, სულ ჩვენსა ვიქნები, რაც თავისუფალი დრო მექნება და პატარა სტეფანესაც თან ვიყოლიებ, რომ წიგნი ვასწავლო. მაგრამ რაღა კითხვა მინდა, ისეც ვიცი, რომ სულ ჩვენსა იჯდები წიგნებით გატაცებული. მით უკეთესო!

ახლა კი კმარა! მშვიდობით ბრძანდებოდეთ ყველანი! ყველას გაკოცებთ. ჩვენებურები მომიკითხეთ და უთხარით, ვისაც კი ჩვენთვის რისიმე გამოგზავნა უნდოდა, თქვენმა ყურადღებამაც დიდად გვასიამოვნა და დიდს მადლობას მოგახსენებთ-თქო. მშვიდობით ბრძანდებოდეთ, ბატონო ივანე, ქალბატონო ეკატერინე, ნიკოლ, მიშელ! მშვიდობით!

თქვენი მარგალიტა შოველი.

პარიზი, 24 ენკენისთვის 1790

IV

დიდად გვასიამოვნა მარგალიტას წერილმა და გულიც დაგვიამა. სულ მცირე რომ ვსთქვა, ძსჯერ მაინც წამიკითხავს თავით-ბოლომდე, რადგან ჩვენებურები ხომ იყვნენ და იყვნენ, და უცხოელნი უარესს მიშვრებოდნენ: ყოველი გამვლელ-გამომვლელი, ვინც კი ჩვენს დუქანში ჩამოხტებოდა, ერთი კი მოგვესალმებოდა და მაშინვე იმ წერილს მოიკითხავდა:

— მართლა, ბატონო ივანე, პარიზიდან თურმე ამბები მოგსვლიათ. რა სიკეთეს დაგვდებთ, რომ ჩვენც გაგვაგონოთ... ერთი ჩარეკი წითელი ღვინო ჩამოასხი, ბიჭო!

და ნათლიაჩემიც მაშინვე მე მომიბრუნდებოდა:

— გაიქე, მიშელ, წერილი ჩამოარბენიე. ხომ იცი, ხატებს უკანა ღვეს.

დამსვამდნენ და თავით ბოლომდე, სულ უკანასკნელ სიტყვამდე წამაკითხებდნენ. გარს იმოდენა ხალხი შემომეხვევოდა, რომ ჰაერს მიხშობდნენ და სუნთქვას მიკრავდნენ. გულმოდგინედ ისმენდნენ ყოველ სიტყვას, ზოგჯერ ერთსა და იმასვე სამჯერ-ოთხჯერ მათქმე-

ვინებდნენ, ჰკვირობდნენ და თან გაუგებარ სიტყვებისას გვეკითხებოდნენ. კიდევ კარგი, რომ ნათლიაჩემი იქ იყო და ის მიხსნიდა ხოლმე გაჭირებიდან: ისე ახსნიდა და განმარტავდა ყოველ საგანს, თუნდა თავის დღეშიც არსად ჰქონოდა ნახული, მაგალითად, კლუბებს, თეატრს და სხვას, თითქო პარიზში დაბადებულა და იქ აღზრდილაო.

ბოლოს, როდესაც კითხვას გავათავებდი და განცვიფრებული მსმენელნი თავთავიანთსას იტყოდნენ, წამოიშლებოდნენ, თავიანთ საქმეებს მიხედვადნენ და თან კი იმედიანად გაიძახოდნენ:

— საქმე პარიზია! ოლონდ კი პარიზელი პატრიოტები გამაგრდნენ და ჩვენ ვერავინ გაგვტეხავს!

დიდად გაამხნევა ქვეყანა მარგალიტას წერილმა და საჭიროც იყო, ღვთის წინაშე, ჩვენი გამხნევება: რაკი დარწმუნდნენ დიდებულნი თავადაზნაურნი და ეპისკოპოსები, რომ საერო კრებაში ვერას გახდებოდნენ, რადგან მესამე წოდების წარმომადგენელნი შიგ კრიჭაში უდგნენ, ძალით განიზრახეს ბატონყმობის შემოღება. მაგრამ საყუთარი ძალით კი არა! თითონ ვერა ბედავდნენ ბრძოლას — საშიშიაო!... ჩვენში უთანხმოებას და სიძულვილსა სთესდნენ, რომ ჩვენვე ამოგვეყლიტა ერთმანეთი. და თუ ესეც არ იკმარებდა, გერმანელებს მოიშველიებდნენ. ნანსში უკვე სცადეს ეს ხერხი და ერის მცველ ჯარს, მილიციას ხალხი აულეტინეს. ეს პირველი ცდა იყო და ახლა ეპისკოპოსები მეორეს გვიმზადებდნენ, უფრო საშინელს, რადგან შულლსა და სიძულვილს სთესდნენ პატრიოტებსა და ღვთის მმოსავ ხალხს შორის; ჩვენი სარწმუნოება იმას გვიბრძანებს, საუკუნო განსვენებას საიქიოს ვიმზადებდეთ და... დახეთ პატრიოტებს! იმათ სააქაო ურჩევნიათ საიქიოსაო! რად გინდათ სულით ხორცამდე დაღუპვა და საუკუნო სასჯელი?! ვისაც საეკლესიო მამულები გიყიდნიათ, ისევე ეკლესიას დაუბრუნეთ, რათა მოგეტევენ შეცოდებანი თქვენნიო...

— აი, რა ნიადაგზედ აღორძინდა ჩვენი ისტორია. მაგრამ ამას თქვენ უკეთა ნახავთ.

გიორგობისთვის გასულს 1790 წ., კალიასავით შემოგვესივნენ ბერები. გვიკვირდა, რადგან დარწმუნებულნი ვიყავით გაიხიზნენო და ისინი კი ძველებურად ნავარდობდნენ სოფელ-სოფელ. ფალსბურგელი მამა გასპარი, ბერ-მონოზანი როოსი და სხვ. და სხვ., რომელნიც აგერ ექვსი თვე სრულდებოდა ჩვენ საზღვარგარეთ გვეგონნენ. იმავე დროს ძველი წესწყობილების მომხრე მღვდლებმაც თავი წამოყვეს და გახარებული მიდი-მოდოდნენ მთელს ჩვენს მხარეში. ნეუვილლერში, ანრიდორფში, სავერნში და ბევრგან სხვაგან კრებები ჰქონდათ. ვხედავდით, რომ რალაცას გვიპირებდნენ, რალასაც

გვემუქრებოდნენ, მაგრამ რას, როგორ? არავინ არაფერი არ იცოდა. ჩვენც, რასაკვირველია, ფრთხილად ვიყავით, მეტადრე ისინი, ვისაც საეკლესიო მამული ჰქონდა ნაყიდი.

— ხომ გაიხიზნენ, და... რაღად დაბრუნდებოდნენ, თუ ავი არა სწადიათ რა! — გაიძახოდა ხალხი და გულის ფანქვალით ელოდა ხვალინდელ დღეს.

უცბად ხმა გავარდა, საერო კრებას დიდი ბრძოლის შემდეგ დაუდგენია, რომ მღვდლებმა ერთგულება უნდა შეჰფიცონ კონსტიტუციას, თუ არა და გადადგნენო.

აი, რამ გამოიწვია ეს გადაწყვეტილება:

რაკი დარწმუნდნენ ეპისკოპოსები, რომ საეკლესიო მამულებს ხელთ ვეღარ იგდებდნენ, რადგან რომ ეთქვათ რამე, ყველა ეტყოდა: დალოცვილებო, სულ საიქიოს გაიძახით და სააქაოს კი შავი მიწის გულისთვის ლამის სისხლი ჰღვარათო! — ადგნენ და სხვაფრივ მოაგვარეს საქმე: წინადადება შეიტანეს, რომლითაც ითხოვდნენ, საერო კრებამ კათოლიკეთა სარწმუნოება საფრანგეთის საერო სარწმუნოებად აღიაროსო. საერო კრება რომ ამ მანეში გაბმულიყო, მაშინ ორი მეფე გვეყოლებოდა: ხორციელი პარიზში და სულიერი რომში. მაგრამ კრებამ უარპყო, რადგან „აღამიანს სულიერ მეფედ ღმერთიც ეყოფა, რომელიც ყველაფერს ხედავს, ყველაფერსა სჯის და არ ჰსაჭიროებს თავის სამაგიეროდ სხვა დააყენოს ვინმე სულიერ მეფედ“.

ამ პასუხზედ იმისთანა ბრიყვული ლანძღვა-გინება და მუქარა თურმე შექნეს ეპისკოპოსებმა, რომ საერო კრებამ დაადგინა: დღეიდან ეპისკოპოსებსა და მღვდლებს თვით ხალხი ირჩევდეს, როგორც ქრისტიანობის პირველ ხანებში ყოფილაო.

წარმოიდგინეთ, რა გაბრაზებულნი იქნებოდნენ ეპისკოპოსები! კარდინალი როანელი, არხიეპისკოპოსი ტრეველი და მრავალნი სხვანი წარჩინებულნი პირნი ეკლესიისა წინ აღუდგნენ ამ დადგენილებას და დასწყევლეს მის დამდგენელნიც და აღმსრულებელნიც. მღვდლებს ისევ თითონვე ნიშნავდნენ და სწორედ იმ დროსვე დაბრუნდნენ საზღვარგარეთ გაპარულნი ფალსბურგელი მ. გასპარი, აგენოელი მ. ბარნაბე, მოლსეიმელი მ. ჟანვიე, შლესტატელი მ. ტიბერი, ბერმონოზანი როოსი, ანდელოელი მ. ოლცერი და ბევრნი სხვანი. შემოესივნენ ისევ საფრანგეთს და იმოდენი წვრილ-წვრილი წიგნაკები მოჰფინეს ხალხში, რომ იმოდენი ფოთოლი არ დასცივია შემოდგომას ჩვენს ტყეს. ეს აპოკალიპსიო, ეს საერო გულთამხილავიო, ეს წამებალუი XVI-საო, ეს ფიქრები ბ. ბურკისა რევოლუციის შესა-

ხებაო! ხალხში ასობით და ათასობით ავრცელებდნენ ამ პატარა წიგნაკებს, რომლებშიაც სულ იმასა სწერდნენ, რომ საერო კრებამ ქვეყანა დაღუბა, ხარჯს ნულარ მისცემთ, რადგან სამეფო ბედ-იღბალს ურიები და პროტესტანტებილა განაგებენო! განა არ გვირჩევნია ერთს მეფეს ვემსახურებოდეთ, თუნდა ჰკუთახელიც იყოს იგი, ვიდრე თორმეტჯერ ასს ყაჩაღსაო? განა ცხადი არ არის, რომ ადამიანის უფლებათა აღიარება მტკნარი თვალთმაქცობა არისო? ასიგნაციები ისე დაეცემიან ფასში, რომ აღარ ღირდნენ არცა ჩალადაო და სხვ. და სხვ. ერთი სიტყვით, ყოველგვარი ცილისწამებით სარგებლობდნენ, რომ ქვეყანაში სასოწარკვეთილება და მით შუღლი ჩამოეგდოთ.

იმავე დროს სამხრეთ საფრანგეთში კვლავ დაიწყეს ხალხის ელეტა და საერო კრებაც დარწმუნდა, რომ თუ საღსარს არას იღონებდა, საუკუნოდ აირევოდა საფრანგეთის ეროვნება; და ამიტომ დაადგინა, მღვდლები და ეპისკოპოსები კონსტიტუციას ერთგულებას შეჰფიცავენ... ამით მაინც ვაიძულებთ მღვდლებს უთანხმოების მაგივრად საზოგადო სიყვარულს ქადაგებდნენო.

მაგრამ უნდა გენახათ, რა ამბავი ჰქონდათ ქალებს! აბა მაშინ დარწმუნდებოდით, რომ ქვეყნის წარმატება ქალების ხელში ყოფილა! გათენდებოდა და ბერი ბენედიქტეც გამოჩნდებოდა თავისი ჯორით. მოდიოდა, თან გულში ხელს იცემდა და მოსთქვამდა:

— დიად, ახლა კი ცხადად ჩანს, რა უფსკრულში ჩავარდა ჩვენი წმინდა ქვეყანა! სულს აქეთ აღარა შეგვარჩინეს რა, წავგართვეს, რაც კი მონასტერში მობარებული გვქონდა რამე. მერე ვისი მობარებული? საწყალი, ღარიბ-ღატაკი ხალხის მობარებული — თქვენ უკეთ შეგვინახავთ წმ. მონასტერშიო! წავგართვეს, დაგვლუპეს, მაგრამ რა გვეთქმოდა? ვიყავით ჩვენთვის გაჩუმებულნი!... ალბად ღვთის ნებააო, ვიძახდით და პირჯვარს ვიწერდით! მაგრამ ესეც არ იქმარეს იმ ღვთისა და ქვეყნის მტრებმა! მამულები ხომ წავგართვეს და გავვიციდეს და ახლა მოგვდგომიან, სულიც უნდა წავიწყმიდოთო!

და თან ქვითინებდა, მღუღარე ცრემლს იწმენდა და გულამოსკენილი მოსთქვამდა:

— უნდა წავწყმიდოთ ქვეყანა! უნდა წავწყმიდოთო!

ნათლი-ჯალაბი ეკატერინე, ლეტუმიეს ცოლი და ერთობ ყველა ქალები გაიგონებდნენ თუ არა იმის მოთქმას, გავარდებოდნენ, გარს შემოეხვევოდნენ, ხელს ცისკენ აღაპყრობდნენ და რალაცას მოსთქვამდნენ ბერის სანუგეშოდ.

სწორედ იმავე დღეს გამოიარეს ჩვენს სოფელში მ. ჟანვიემ და

სხვა ბერებმა და ყველანი ბერი ბენედიქტესავით მოსთქვამდნენ და პირს იხოკდნენ. ვალენტინი ძალიან შეწუხდა: იღვა შუა სამკვდლოში და იძახდა: მეფე თავის დღეში არ ინებებს, რომ სულიერი მამანი საერო კრებას დაუმორჩილოს!.. მეორედ მოსვლაა რაღა!... მაგრამ მოიცადონ! ციდან ანგელოზთა გუნდი ჩამოვა და ვაი იმ მღვდლის ბრალი, რომელიც გაბედავს და საერო კრებას ერთგულებას შეჭვიცავსო! ახლო-მახლო სოფლები — მიტტელბრონი, კატრვანი, ბიშელბერგი და სხვანი ვალენტინისა და ჩვენი ქალების თვალთ უყურებდნენ საქმეს, რადგან საკუთარი მსჯელობა ჯერ არც კი გაპლვიძებოდათ და სულ ყველაფერს ისე სჯიდნენ, როგორც ბერები ჩასძახოდნენ.

თითონ ნათლიაჩემიც კი ცუდ გუნებაზედ იყო. სადილს უკან, როდესაც თვალკრემლიანი ნათლი-ჯალაბი გარედ გავიდა, ნათლიაჩემი ჩემკენ წამოვიდა, კარგა ხანი მიყურა და მერე მკითხა:

— შენა, მიშელ, შენ რაღას იტყვი?

— მე იმას მოგახსენებთ, ნათლიაჩემო, რომ თქვენს შეშინებასა ცდილობენ ბერები — უნდათ შეაშინონ. ვისაც კი საეკლესიო მამულები უყიდნია და ისევ ხელთ იგდონ. განა არა ხედავთ, რომ ეს ბერები ჭეშმარიტი სულიერი მამანი არ არიან და მართო თავიანთ საქმეებს ირიგებენ? ჭეშმარიტი სულიერი მამანი მართო სოფლის მღვდლები არიან, რადგან ჭეშმარიტად ეკლესიასაც და ხალხსაც მართო ისინი ემსახურებიან; იმათ არც სიცხის დარიღება აქვან. არც სიცვიის და უგზოობისა და სულ ფეხით დადიან ჩვენს მთებში, რომ უნუგეშოდ არ დასტოვონ ის უბედურნი, რომელთაც თავისი დღენი ბატონთათვის უმუშავნიათ და თითონ კი შიმშილის მეტი არა უნახავთ რა. ვინ განიკითხავს ყველასაგან ჩაგრულს ჩვენს ხალხს, თუ არა სოფლის მღვდელი? და სწორედ იმ დროს, როდესაც ეკლესიისა და ხალხის ერთგული მსახური სოფლის მღვდელი ცარიელი ჰადითაც კი ძლივს იძობს კუქს, ჩვენი უქნარა ბერები სულ ქეიფსა და დროს ტარებას უნდებოან. აღარც ღვთისა რცხვენიათ, აღარც ერისა და დაურიდებლად ლოთობენ და მრუშობენ. თითქო ბერად იმისთვის შემდგარან. რომ უფრო ხარბად და დაურცხვენელად დასწაფებოდნენ ყოველ მიწიერ სიტკბოებას. ახლა კი, რადგან იმათ მამულები გაუყიდეს და სოფლის მღვდლებს ჯამაგირი დაუნიშნეს, გიყები იქნებიან სოფლის მღვდლები, რომ საერო კრებას უმტყუნონ და თავი გასწირონ ბერებისთვის და იმ ეპისკოპოსებისთვის, რომელთაგან შეურაცხყოფის და დაჩაგვრის მეტი არა მოაგონდებოდათ რა. როცა მოხდებოდა ხოლმე და ვინმე მღვდელს ეპისკოპოსობა ეღირსებოდა, სხვა ეპისკოპოსები მასხარად იგდებ-

დნენ და უკადრისობდნენ — ჩვენ ჩვენს ყმას გვერდზედ არ მოვისვამთო! მე დარწმუნებული ვახლავართ, რომ ყოველი მღვდელი, მღვდელი, რომელმაც საკუთარი თავი და თავმოყვარეობა აქვს, კონსტიტუციას ერთგულებას შეჰფიცავს და, თუ გამოჩნდა ვინმე და უარი განაცხადა, ეგ დაუნდობელი ეპისკოპოსის შიშით მოუვა და არა იმ რწმენით, რომ მღვდელი ეპისკოპოსს ემსახურება და არა ხალხსაო.

დიდი სიამოვნებით მისმენდა ნათლიაჩემი. მხარზე ხელი დამადლო რომ გავათავე და მითხრა:

— იცი, მიშელ, მართალი თქვი, რაცა თქვი! ჩვენდა საუბედუროდ, ხალხი და მეტადრე ქალები უსწავლელი და განუვითარებელი არიან. ჩვენ მარტო ის-ღა შეგვიძლია, რომ პატრიოტებს მივემხროთ და, თუ ღმერთი გაუწყრათ ბერებს და კონსტიტუციის წინააღმდეგ გაბედეს რამე, ჩვენც მაგრად დავდგეთ და ღირსეული პასუხი გავცეთ.

სწორედ ამ დროს შემოვიდა ნათლი-ჯალაბი და ახლა იმას მიმართა ნათლიაჩემმა:

— იცი, ეკატერინე, თუ კიდევ დაგინახე აგრე დაღვრემილი და დაღრეჯილი, წავალ და რაც პიკოლცში მამული ვიყიდე, ისეც მონასტერს შევწირავ. ერთი კალთა ფული ჩავყარე იმ ოხერში, დეე ფულიც დაიკარგოს და მამულიც! მართალია, სრულიად გავლატაკდებით და ბერი ბენედიქტეს სასაცილო გავხდებით, მაგრამ შენ მაინც აღარა განახავ აგრე დაღრეჯილს.

ძალიან გაჯავრებით უთხრა და ნათლი-ჯალაბიც მაშინვე სამზარეულოში გავიდა, რადგან კარგად იცოდა, რომ პასუხად სამართლიანს ვერას ეტყოდა.

განა იმისთანა ოჯახსა ნახავდით სადმე, რომ იგივე უთანხმოება და უსიამოვნება არა ყოფილიყო აღძრული, რაც ნათლიაჩემის სახლში იყო? ჩვენსა უარესი იყო. საღამოზე შინისკენ რომ გავწევდი, წინადვე ვიცოდი, რას მეტყოდა დედაჩემი, როგორ გამიმეორებდა ბერების ნაქადაგევს. დედაჩემს იმათი მხარე ეჭირა. ვინც ასე უღვთოდ ეკიდებოდა გლეხკაცს. სულ იმას მიძახდა, რომ უკუნითი უკუნისამდე გეენაში იქნები შთანთქმული, რადგან არ გინდა აღიარო, რომ საერო კრება მარტო ურიათაგან და მწვალებელთაგან შესდგება, რომელთ წადილი ღვთისა და სარწმუნოების უარყოფა არისო. მწყევლიდა, მლანძღავდა. მაგრამ რას ვეტყოდი? დიდი ხანი იყო, რაც გადავწყვიტე; დედაჩემისაგან ყოველიაფერი მომეთმინა, და ხმას არ ვიღებდი. მამაჩემიც თავჩაქინდრული მუშაობდა და ხმის ამოდებას ვერა ბედავდა. საბრალო მამაჩემი!

გავიდა რამდენიმე დღე. საერო კრებამ დაადგინა: მღვდლები, ეპისკოპოსები და არხიეპისკოპოსები ამ დადგენილების გამოცხადების დღიდან პირველსავე კვირა დღეს წირვის შემდეგ დაიფიცავენ, რომ „ერთგულად ემსახურებიან ერს, კანონს და მეფეს; დაუზარებლად აღასრულებენ თავიანთ მოვალეობას სამწყსოსადმი და ყოველი ღონისძიებით ეცდებიან კონსტიტუციის დამყარებას“. დაიფიცავენ ეპისკოპოსები და უმაღლესი პირნი სეპისკოპოსო ტაძრებში და მღვდლები თავთავიანთ ეკლესიაში, მამასახლისის, ნაცვალის და სოფლის სხვა მოხელეთა და სამწყსოს წინაშე; ყოველი მღვდელი ორი დღის წინად გამოუცხადებს მამასახლისს და სამწყსოს, რომ კონსტიტუციისადმი ფიცს დასდებს თავის ეკლესიაში; ვინც დანიშნულ ვადაზედ ფიცს არ დასდებს, გადაყენებულ იქნება და მის ნაცვლად თანახმად კონსტიტუციისა ამორჩეულ იქნება სხვა.

მოუთმენლად ველოდით მომავალ კვირას, რომ გვენახა, ჩვენი მღვდლებთაგანი ვინ დაიფიცადა. და ვინ არა. და მანამ კი ბერები უფრო და უფრო გაფაციცებულნი დაძვრებოდნენ და ყველგან არეულობას და მომავლის შიშსა სთესდნენ. მაგრამ ყველანი ხედავდნენ, რომ დიდებულთ და სასულიერო წოდებას უკანასკნელი ღონისძიებისათვის მიემართათ, რომ დაკარგული დიდება და ქონება კვლავ მოეპოვათ და რადგან იმათი გამარჯვება არავის უნდოდა, უფრო და უფრო ერთდებოდნენ მოქალაქენი, მუშები, ჯარისკაცი და გლეხკაცი. ვისაც კი თავისი ქვეყანა უყვარდა და სამშობლოდ საფრანგეთი მიაჩნდა და არა დიდებულთა და ეპისკოპოსთა ბატონობა, ყველა ერთად იყო და თავისუფლების მოსაპოვებლად ემზადებოდა.

ნათლიაჩემმა მიბრძანა, ლუტცელებურგს მოგვიხდება წასვლა, მინდა მამა ქრისტეფორე ვნახო... აქამდე ჩვენი აზრისა იყო მცონარე ბერების შესახებ და მგონი ახლაც არ გვიმტყუნოსო.

ამას იმიტომ ამბობდა, რომ ხმა გავარდა, მღვდელს ერთს ვერ იპოვიან, ერთს, რომ სულზედ ხელი აიღოს და კონსტიტუციას ერთგულება შეჰფიცოსო. ჩვენც ეჭვი შეგვეპარა. მაგრამ მამა ქრისტეფორე პატიოსანი, ჭკვიანი კაცი იყო და უპირველეს ყოვლისა თავისი ვალდებულება გააჩნდა. ხუთშაბათს, 3 იანვარს 1791 როდესაც გარეთ საშინელი თოვლი მოდიოდა და ჩვენ გაჩქარებულნი ვმუშაობდით სამჭედლოში, უცბად კარი შემოაღო მამა ქრისტეფორემ თავისი ძველი ანაფორით და უშველებელი ქოლგით. შემოაღო კარი და შემოგვძახა:

— გამარჯვებით თქვენი! რა თოვლია ეს დალოცვილი, ესა! თუ არ გადაიღო, ამაღამ ერთ ადღზედ მეტს დასდებს.

— მობრძანდი, მამაო! — შესძახა ნათლიაჩემმა და ჩაქუჩი იქით გადასდო.

— რაღა დროსია, შე კაი კაცო, აგერ საცაა შებინდდება. ქალაქს ვიყავი, გამოვაცხადე, კვირას დავიფიცავ-მეთქი და არ მინდოდა ისე გამევილო, რომ შენთვისაც არ შემეტყუობინებინა. იქნება მოახერხოთ და ამოიაროთ შენ და მიშელმა; ძალიან მასიამოვნებთ.

— მაშ დავიფიცავ, მამაო?

— დიად, კვირას, წირვა რომ გამოვა. ღამე მშვიდობისათ, გარედ სტეფანე მელის. კვირასა ვთქვათ დანარჩენი.

ნათლიაჩემიც თან გაჰყვა და მე კი ვალენტინს გადავხედე, რომელიც ისე იდგა, თითქო უცბად მეხი დაეცა და პირის მოკუშაც კი ველარ მოასწორო: სახე გაგრძელებოდა, თვალები დამრგვალებოდა და გაშტერებული რაღასაც გასცქეროდა. ჩემს კმაყოფილებას კი საზღვარი არა ჰქონდა. გარედაც სიამოვნებით ბაასობდნენ. მ. ქრისტეფორე, ნათლიაჩემი და სტეფანე. ბოლოს ერთმანეთს ხელი ჩამოართვეს, და ის იყო უნდა გზას გასდგომოდნენ, რომ მ. ქრისტეფორემ შემომძახა:

— უთუოდ უნდა ამოხვიდე, მიშელ, შენი იმედი მექნება.

— აკი არავინ დავიფიცავსო? — შემოგვძახა ნათლიაჩემმა. — მე კი იმ თავითვე დარწმუნებული ვიყავი, რომ ჯერ ღვთის მადლით მრავლად მოიპოვებინა საფრანგეთში იმისთანა კაცები, რომელთაც თავში ტვინი აქვთ და არა ბზე და, მაშასადამე, ჩვენკენ იქნებიან და არა იმ მუქთახორა მცონარეებისკენ, რომელთაც დაუყინიათ: ჩვენ ბატონები ვართ, ქვეყანა და დიდება ღმერთს ჩვენთვის მოუნიჭებია და გლუხჯაცი და სხვა საქონელი კიდევ იმიტომ გაუჩენია, რომ ჩვენთვის იმუშავონო! იმას ხომ აღარ ამბობენ, რომ ყველანი ადამის შთამომავალნი ვართ და, მაშასადამე, თანასწორად დიდებულინი.

როდესაც კარგ გუნებაზე იყო ნათლიაჩემი, აღარას დაინდობდა და იქამდე მიადწევდა ხოლმე, რომ სულელსა და რეგვენს უწოდებდა, ვინც რაიმე აზრში იმას არ ეთანხმებოდა. მე კი გავზვიადებული ყველა მეჯავრებოდა, მეტადრე ჩვენი ძველი ქარგალის გამო. რომელიც ხმას არ იღებდა, მაგრამ გულში კი ძალიან ბრაზობდა. აშკარად ჩანდა, რომ მოთმინება ელეოდა და მეტს ველარ აიტანდა. ვიცოდი, რომ დაუნდობელი ნათლიაჩემი ერთხელ იქნებოდა ძალიან აწყენინებდა, ისიც ველარ მოითმენდა, პასუხს გასცემდა ოსტატს და აირეოდა იქაურობა.

იმ საღამოს ამგვარი არა მომხდარა რა, რადგან ნიკოლი დროზედ მოვიდა და ვახშმად წაგვიყვანა; ჩავიცვით და ჩვეულებისა-

მებრ გამოვეთხოვეთ ერთმანეთს. მეორე ღღეს გავიგეთ, ფალსბურგელ მღვდლებს იოტს და იმეღს ჯერაც არ გამოუცხადებიათ დაფიცვაო; ფალსბურგში მღგომ რაზმის მღვდელს კი გამოეცხადებინა, კონსტიტუციას ერთგულებას შევეფიცავო. სალაპარაკოდ ეს-ღა გექონდა. კვირას დილაადრიანად გავსწიეთ ლუტცელბურგისკენ ნათლიაჩემმა, მე, ლეტუმიემ, კოშარმა და ბევრმა კიდევ სხვა პატრიოტებმა.

ალარ თოვდა. პატარა ეკლესია სავსე იყო ხალხით, რომელიც მთიდან ჩამოსულიყო, რომ ფიცისთვის ეყურებინა. ამბობდნენ, ბერებს შეუგულიანებიათ ხალხი და ვაი აუ ავი ჩაიღინონ რამეო, მაგრამ მთელი ქვეყნის ბერებიც რომ შესდგომოდნენ, ეს მთიულები თავიანთ საყვარელ მამა ქრისტეფორეს არ უღალატებდნენ, რადგან ყველასაგან დიდად პატივცემული კაცი იყო. ესეც რომ არა ყოფილიყო, მამა ქრისტეფორეს მამა მატერნი და რამდენიმე კიდევ სხვა იმის ნათესავი ჩამოსულიყო დაგსბურგიდან და სულ იმისთანა მოსხვეპილი ბიჭები იყვნენ, რომ იმათი შიშით ვერავინ რას გაბედავდა. დიაკვანთან იდგნენ და გალობდნენ ყველანი. ყველაფერი რიგიანად იყო. მამა ქრისტეფორემ წირვა გამოიყვანა და შემდეგ ცოტათი წინ წამოდგა, ხელი ცისკენ აღაპყრო და მაღალი ხმით თქვა, რომ ყველას ჰსმენოდა:

— ვფიცავ, ერთგულად ვემსახურო ჩემს სამწყსოს და კეთილსინდისიერად მიეუძღოდე მას სიმაართლის გზაზედ. ვფიცავ, ერთგულად ვემსახურო ერს, კანონს და მეფეს. ვფიცავ, ყოველი ღონისძიება ვიხმარო კონსტიტუციის დასამყარებლად და სახელღობრი იმ მუხლისა, რომელიც სამღვდლოებას შეეხება.

ხალხი დაიშალა და ეკლესიაში ჩვენ და მამა ქრისტეფორეს ნათესავებიღა დავრჩით. გარედ წესიერება არავის დაურღვევა. ცოტა ხანს უკან ჩვენც გამოვედით ეკლესიიდან და ყველანი მამა ქრისტეფორემ მიგვიწვია.

— აი, რა რიგიანად გათავდა ყველაფერი, — უთხრა გზაში ნათლიაჩემმა. — გვიანდაა, ახლა ბერები ველარას გააწყობენ.

მამა ქრისტეფორე ჩაფიქრებული იყო.

— ჯერ კიდევ იქნება დიდ განსაცდელში ჩავევარდეთ, ვინ იცის? საქმე ის არის, რომ ჩვენ ჩვენს მოვალეობას არ ვუმტყუნოთ.

მამა ქრისტეფორემ აკურთხა სუფრა. დავსხედით და სადილი ისე გავათავეთ, რომ ხმა არავის ამოულია: მამა ქრისტეფორეს დედა ნამტირალევი იყო და ჩვენც დაედონდით. სადილი რომ გავათავეთ, ის გარეთ გავიდა და მამა ქრისტეფორემ გვითხრა:

— ხედავთ! აი, უბედურების დასაწყისი, აი, დედა-შვილთ შო-

რის უთანხმოების და სიძულვილის ჩამოგდება. დღეს აქ არის, ზვალ მთელ ქვეყანას მოედება და ოჯახს ველარა ნახავთ, რომ იგივე უთანხმოება არ უთხრიდეს ძირს! საწყალი დედაჩემი! ტირის, რად დაიფიცო. უბედურება არ არის? ბერებს უფრო მეტი გავლენა ჰქონიათ დედაჩემზედ, ვიდრე მე. და მე დაღუპული, სულით ხორცამდე წაწყმენდილი ვგონივარ. რა ვქნა? რა ვუთხრა?

— ეჰ, კარგი ერთი! — შეჰყვირა იმედიანად ნათლიაჩემმა. — ჩემი დედაკაცი უარეს დღეს მაყენებს. რა ვუყოთ? ცოტა ხანი კიდეც და მაგასაც ბოლო მოელება. ბერებს იქითვე გავისტუმრებთ, საიდანაც მობრძანებულან და ჩვენი ქალებიც თვალს აახელენ და ქეშმარიტებას დაინახვენ.

მაშინ მამა ქრისტეფორემ იმისთანა სიტყვა თქვა, რომ ჩემს ღღეში აღარ დამავიწყდება:

— არც აგრე ადვილად, როგორც შენ ამბობ, ჩემო ივანე, რადგან ჩვენი ბერები და ეპისკოპოსები ქვეყანას დაღუპავენ და თავიანთ საკუთრებას და უპირატესობას კი არაფერს შეაწევენ. გვიკრძალავენ, კონსტიტუციას ერთგულებას ნუ შეჰფიცავთო, რადგან კონსტიტუციამ იმათ სწორედ ის წაართვა, რაც მათ სარწმუნოებაზედაც კი უფრო ზევით აყენებდა. განა კონსტიტუცია ეწინააღმდეგება რაშიმე წმინდა სახარებას? არა! და თითონაც კარგად იციან, რომ კონსტიტუცია ყველაფერში ეთანხმება ჩვენს სარწმუნოებას. აგერ თვრამეტი საუკუნე სრულდება მას შემდეგ, რაც იესომ დაადგინა სამღვთო და უწმინდეს კანონებად ის, რასაც დღეს კონსტიტუციამ „აღამიანის უფლებათა აღიარება“ უწოდა. იესომ ბრძანა: გიყვარდეთ ერთმანეთი, რადგან ძმანი ხართო... გაჰყიდეთ, რაც რამ გაბადიათ, ფული გლახაკთ დაურიგეთ და მე შემოპიდექითო. ჩვენი ბერები კი გაყიდვის და ღარიგების ნაცვლად, სულ მეტიცა და მეტიც სიმდიდრის მოხვეჭას ცდილობენ. იმის მაგივრად რომ კაცთა შორის თანასწორობის შემოღებას ცდილიყვნენ, ისინი სულ მეტიცა და მეტიც უპირატესობის შექმნას ცდილობდნენ. იმის ნაცვლად, რომ ცდილიყვნენ და დაემყარებინათ ნება ღვთისა ქვეყანასა ზედა, ვითა: „ცა ცათა შინა, სულ იმის ცდაში იყვნენ რომ თავიანთი მოძმენი დაემცირებინათ და დაეჩაგრათ სულითაც და ხორციითაც. იმათ ისა სწყყინთ, რომ კონსტიტუცია სახარების განმეორებაა. ისინი ცოცხალნი იყვნენ და მღვდლებსა და ეპისკოპოსებს ხალხი ირჩევდეს?! ხალხი, რომელიც სათნოებით არის სავსე და თავის მოძღვრადაც მართო პატიოსანს და გაურყვნელს მუშაკს აირჩევს, როგორადაც ქრისტიანობის პირველ ხანებში იყო ხოლმე?! ის არ ურჩევნიათ პომპაღურისა და იმისთანავე უნამუსო ქალებისაგან მიიღონ ადგილები, რომელთათვისაც

მარტო მაშინ არის ღირსეული, როდესაც ლაშაზია, კოხტა, კარგი გვარის შვილი, კარგი მოლაპარაკე და კარგი არშიყი. უნამუსო ქალებს წყალობით არის ნაკურთხი კარდინალი როანელი და მრავალნი სხვანი, რომელნიც არცხვენენ და საუკუნოდ ჩირქად შერჩებიან ჩვენს ეკლესიას. განა იმათ ხალხი აირჩევდა? აირჩევდა კი არა, პანღურის ცემით გახეთქავდა, რადგან გული აერეოდა ყოველს პატიოსან კაცს იმათ დანახვაზე. მაშ რა თვალთ შეხედავენ როანელები კონსტიტუციას, რომელიც ამტკიცებს ღღეს შემდეგ დევნილ იქნებიან უღირსნი და უნამუსონიო?! რა თვალთ შეხედავენ როანელები კონსტიტუციას, რომელიც ამტკიცებს ხალხის ბედი ხალხის ხელთ იყოს და როგორც ენებოს, ისე განაგოს თავისი საქმენიო?! გრძნობენ, რომ იმათ ბატონობას ბოლო მოეღო, რომ იმათ თავისი გაათავეს, და ახლა სამართალი და კანონილა განაგებს ქვეყანას. თუ ღმერთმა ინება და მღვდლები, უბრალო სოფლის მღვდლები, რომელნიც ბერებს მასხარად ჰყავდათ აგდებული, კონსტიტუციას მიუდგნენ და თავ-თავიანთ სამწყსოში ქადაგებით შეაგნებინეს ხალხს ახალი წესწყობილების ნამდვილი აზრი და მნიშვნელობა, მაშინ აღარა გვიჭირს რა და კონსტიტუცია ურყეველ საფუძველზე იქნება გამაგრებული. ამით აასრულებს მღვდელი თავის დანიშნულებას, ამით ემსახურება იგი ამ ქვეყნად ქრისტეს მცნების დამყარებას და ყველასაგან პატივემულიც ამით იქნება. აბა მაშინ გაბედონ ქვეყნის დამღუპველმა ბერებმა და ის ჩაიდინონ, რასაც ღღეს ჩადიან! მაშინ თვით მღვდელი შეებრძოლება მათ და მღვდელთან ერთად მთელი ერიც! აბა მაშინ შემოვა ჩვენში ის ცვლილება, ის დიდებული რევოლუცია, რომელიც თვით იესომ დაიწყო ჯვარცმულმა. რად ინდომებენ ამას ბერები? იმათი სანატრელი ესლა ისლა არის, რომ ჩვენში უთანხმოება ჩამოაგდონ და ერთმანეთს წაგვიკიდონ. და სწორედ იმ დროს, როდესაც ძმა ძმაზე გაღესავს იარაღს და აირევა ქვეყანა, სწორედ იმ დროს შემოგვესევინ საზღვარგარეთიდან განიზნულები და თან უცხოელ ჯარებს შემოგვისევენ — პრუსიელებს, ავსტრიელებს, რუსებს, რომ იმათი დანხარებით დასთრგუნონ სახარების სიტყვაც და აღამიანის უფლებანიც, დაიბრუნონ დაკარგული უპირატესობა და დიდება და ისევ უღელში შეგვბან! იმათ ამის მეტი არა უნდათ რა! ასე თვალთმაქცურად სამშობლოს მტრობას ისინი პოლიტიკას ეძახიან. ისიც ვინა? ის სულიერი მეუფენი, რომელნიც გაიძახიან: ქრისტეს მოადგილენი ვართ ამ ქვეყნად! განა ქრისტემ პოლიტიკა იცოდა?! იმას რომ პოლიტიკა სცოდნოდა, განა ხალხს მიუდგებოდა და წამებული და ჯვარცმული იქნებოდა? განა ისიც, მეფე დავითის შთამომავალი, მეფეებს და დიდებულთ არ

მიუღებოდა ხალხის წინააღმდეგ?! განა ისე გაისტუმრებდა სატანას ამპარტავენებისას, რომელიც ეუბნებოდა: გადახედე ამ ქვეყანას... სულ შენი იქნება ეს სოფლები, ეს მთები, ეს მდინარენი, თუ მუხლს მოიდრეკ ჩემს წინაშე! სად იყო მაშინ როანელი? მუხლს მოიყრიდა კი არა, სულ ფოფხით მივიდოდა სატანასთან და ფეხებს გაულოკავდა. ჩვენთვის ტანჯულს კი არავითარი პოლიტიკა არა ჰქონდა და მეც, ერთი უბრალო სოფლის მღვდელი, იმის მცნებას და მაგალითს მივდექ და არა დიდებულ ეპისკოპოსების მაგალითს, რომელნიც ისე ცხოვრობენ და იმისთანა საქმეებს სჩადიან, რომ ქრისტიანი კი არა, ურჯულოც არ იზამს. დიად, მე ხომ ერთი უბრალო მღვდელი ვარ და ჩემს დღეში სახარებას არსად ვუმტყუნებ და ჩემი ქვეყნის მტრებს არ შევევედრებ: მოდიოთ, ჩემი სამშობლო ააოხრეთ-მეთქი!

თავით-ფეხამდე თრთოდა ამას რომ ამბობდა, ფერი წაუვიდა და სულს ძლივსდა იბრუნებდა. რომ გაჩუმდა, მატერნი მიუახლოვდა, ხელი ჩამოართვა და უთხრა:

— მართალი ხარ, ქრისტეფორე, და დარწმუნებული იყავი, რომ ჩვენც ყოველთვის იესოსკენ ვიქნებით და არა როანელისკენ. ამას წინადა ვნახე... ისა და თავისი ცოლი... სხვისი ცოლი... სხვისთვის წაურთმევია ცოლი! რა საშინელება!

და ყველამ პირჯვარი დაიწერა.

— თქვენ როანელის ცოლი გაგკვირებიათ! — შესძახა ნათლია-ჩემმა. — იცით რამდენი უნამუსობა გვინახავს სულიერ მამათაგან? განა ადამიანის ენა მოსთვლის მათ საქციელს?! საკვირველი ის არის, იმათ მაყურებელ ხალხს როგორ შერჩა სარწმუნოება და ღვთის შიში? კარგი ის არის, რომ ხალხი ბრმა ჰგონიათ და დარწმუნებულნი არიან, რასაც ვუბრძანებთ, აასრულებს, ჩვენი ყურმოჭრილი ყმა არისო.

— მართალია, — სთქვა მამა ქრისტეფორემ, ხალხის თვალში იმათ ყოველი ღირსება დაკარგეს! მართალია იმათ ხალხი პატივს აღარა სცემს, მაგრამ ესეც იცოდეთ, რომ ბევრ ცილს დაგვწამებენ სოფლის მღვდლებს, რომლებმაც სამშობლოს და მის ახალ კანონებს ერთგულება შეეფიცეთ. ქვეყნის წინაშე სარწმუნოების მოღალატეებად გამოგვიყვანენ და მით მეგობარს და ნათესავს შეგვაძლებენ... ბევრს ტანჯვას მოგვაყენებენ! მაგრამ სუყველა რომ მე მამტყუნებდეს, სულ რომ გამშორდნენ დედაც, მამაც, ძმებიც და მეგობრებიც, ოღონდ სინიდისი დამშვიდებული მქონდეს და ღმერთთან არას ვტყუოდდე, მე არავისი რა მენადვლება! და თუ ვინატრებ რასმე, მარტო იმას ვინატრებ, რომ იმათ თავიანთი შუღლის და უთანხმოების მთესველი პოლიტიკით, რომლითაც ცდილობენ ერთმანეთს

შეგვაკლან, მეფე არ დალუპონ და მეფესთან ერთად ჩვენი უბედური დედოფალი და მათი მახლობელნი. ჯერ ძნელად დაიძვრის ხალხი, მაგრამ თუ დაიძრა, ზღვასავეით მოედება ქვეყანას და თუ აღარავინ დაინდო და ბევრი სისხლი დაღვარა, იმათი ბრალი იქნება, იმ პოლიტიკოსებისა ან რა უფლებით გვიკრძალავენ სოფლის მღვდლებს, ნუ დაიფიცავთო? განა არ იციან, რომ იმ მღვდელს, რომელიც ერის ერთგულებას არ დაიფიცავს, ხალხი ეპვის თვალით დაუწყებს ცქერას? განა მით სამწყსოსა და მოძღვარს შორის უნდობლობას არ აჩენენ? განა მით იმ რწმენას არ უნერგავენ ყოველ პატიოსან კაცს, რომ სარწმუნოება მოსისხლე მტერი ყოფილა ძმობის, თავისუფლების, თანასწორობის და ერთობ ყველა იმ რწმენისა, რომლისთვის წამებულ იქნა იესო და რომლის განხორციელებას ცდილობს რევოლუცია? მართო ერთმა ღმერთმა უწყის, რამდენი არეულობა დატრიალდება ჩვენს ქვეყანაში!

ეს თქვა მამა ქრისტეფორემ და ორი წლის შემდეგ 1793 წელს, როდესაც გილიოტინისკენ დასახოცად ხალხს გაატარებდნენ ხოლმე — ქალებს, მოხუცებულებს, მღვდლებს, მოქალაქეებს, მუშებს, გლეხკაცებს, — მაშინვე მამა ქრისტეფორეს სიტყვა მომაგონდებოდა და წამოვიძახებდი:

— აი, განიზნულთა და ეპისკოპოსთა პოლიტიკის შედეგი!

კარდინალი როანელი, თავადი არტუა და იმათი მეგობრები რეინის გაღმა იყვნენ, საზღვარგარეთ და ჩვენი ეპისკოპოსები უცხოეთში ევედრებოდნენ ღმერთს ჩვენი ქვეყნის დალუპვას. დასავლეთ საფრანგეთში და ვანდეში მღვდლებმა არ ინდომეს ფიცის დადება, ხალხი ააჯანყეს და იარაღით წინ აულდგნენ საერო კრების გარდაწყვეტილებას. დიდებული ეპისკოპოსები იმათ შორიდან აქეზებდნენ და თითონ კი სეირს უცქერდნენ. გულში კიდევ დაგვიცინებდნენ: რა სულელი ყოფილა ჯერ ისევ ხალხი, რომ ჩვენისთანა უღმერთობისთვის ერთმანეთსა ელეტავენო! მართლაცდა, ვანდელი გლეხკაცები რომ დაჰფიქრებოდნენ თავიანთ საქციელს, თავიანთ დროწაზედ სამ სიტყვას გამოხატავდნენ: „მონობა, უსწავლელობა, სილატაკე!“, რადგან ისინი ძველებური მონობისა და სილატაკის დასაცავად იბრძოდნენ.

ორჯეულ თუ სამჯერ გამოაცხადებინა თავადმა არტუამ: მოვდივარ, რომ ვანდლებს წინ წარვუძღვე ბრძოლაშიო; კიდევ მოუახლოვდა ინგლისელი გემით ჩვენს ნაპირს, მაგრამ როცა რესპუბლიკელების ზარბაზნის ხმა შეესმა, უკანვე გაეშურა და აჯანყებული ვანდლები ღვთის ანაბარად მიატოვა. ამას შემდეგში ნახავთ. ამისთანა სიმხალღე მგონი ბევრს არავის ჩაედინოს!

კიდევ კარგა ხანი დავრჩით იმ დღეს მამა ქრისტეფორესთან; საერო საქმეებზედ და ფიცზე ვილაპარაკეთ და ორი საათი რომ დაჰქარა, წამოვიშალენით, რადგან სახლამდე დიდი გზა ჰქონდათ გასავლელი და ეშურებოდნენ. მოძებნეს თავიანთი ჯოხები, ხელი ჩამოგვართვეს და გასწიეს მთისკენ; ჩვენც გამოვეთხოვეთ და ქვევით წამოვედით.

საშინელი სიცივე იყო. გაჩქარებული მიდიოდა ნათლიაჩემი და თან მელაპარაკებოდა:

— ღვთის მადლით, ძალიან კარგად გაიარა დღევანდელმა დღემ, მიშელ. ერთხელ კიდევ შერცხვენენ ბერები და, მერწმუნე, ჩემი პიკოლცის მამულის ფასი ერთითად გახდა გუშინწინდელს აქეთ.

მე კი მამა ქრისტეფორეს სიტყვა მიტრიალებდა თავში: მაგონდებოდა იმისი განმარტება დიდებულთა და ეპისკოპოსთა პოლიტიკისა და მომავლისაგან კარგს არას მოველოდი.

V

იმ დროს დიდი ცვლილება მოხდა ჩვენს სამკვედლოში და მინდა დაწვრილებით ვიამბოთ ყველაფერი. რადგან იმ დღიდან იწყება ჩემი ბედნიერება, თუმცა პირველ ხანებში ძალიან გულწაყენად ვიყავი.

ვალენტინი პურს იქვე ჩვენს მეზობელ რიგოსთანა სჭამდა და ბინაც იქვე ჰქონდა. მოხუცებული რიგო და იმისი ცოლი დიდ პატივსა სცემდნენ მით უფრო, რომ უშვილონი იყვნენ, და სულ ბატონობით იხსენიებდნენ. იმასაც ძალიან მოსწონდა ეს პატუვისცემა, რადგან სრულიად ეთანხმებოდა მის აზრებს, რომ როგორც მთასა და ბარს ვერა გაასწორებს რა, ისე ადამიანთა შორის ყოველთვის იქნება დიდი და პატარა, ღარიბი და მდიდარიო. სადამოზედ საქმეს რომ გაათავებდა, ავიდოდა რიგოსთან, სავარძელში გამოიჭიმებოდა და სუფრას მიუჯდებოდა. რიგოს ცოლი არასაზოგავდა, ღვთის წინაშე, და ხორცი რომ არა ჰქონოდა, ერბოკვერცხს მაინც მიაართმევდა. იჯდა ჩვენი ვალენტინი და შეექცეოდა! თანაც წითელ ღვინოს მიირთმევდა! საბრალო მოხუცებულები კი, თუმცა იქვე ისხდნენ, თავიანთვის ლობიოშეჭამადს ან კარტოფილს გაიკეთებდნენ და იმაზედ გადაივლიდნენ. ვალენტინის აზრით, აქ სამძახისი არა იყო რა, ის დახელოვნებული ქარგალი იყო და ისინი კი გადაყრუებული ბებრები.

— მე სულ სხვა ვარ და ისინი სხვა, — იძახდა ვალენტინი. —

დიდი რამ მოხდება, თუ იმათაც ჩემსავით ხორცი არ მიირთვეს! იმათ სუნიც ეყოფათ!

როდესაც კი რიგოს ცოლი პურის ცხობას დააპირებდა, ვალენტინი ორ პატარა ქადას გამოაცხობინებდა და მეც მიმიპატიჟებდა: წამოდი, პირი ჩავიკოკლოზინავოთო. მარანში ცოტა რაჲ ღვინო ჰქონდა ბოთლებით და ქადას ერთ ბოთლ ლორენულ თეთრ ღვინოსაც დაყოლებდა ხოლმე; რიგოც იქვე იყო ყოველთვის და არ მახსოვს, ერთი ყლაპი მიეწოდებინოს მოხუცისთვის. აბა ყელში როგორ ჩამივიდოდა რამე, იქვე ისხდნენ საბრალო ცოლ-ქმარი და პირში შემოგვეცქეროდნენ! მაგრამ ვალენტინს კი ვერას ვუფუნებოდი, რადგან ვიცოდი, ჩვენი ღირსების ასეთი დამცირებისათვის ძალიან გამიწყრებოდა და იქნება ერთმანეთსაც შეეძულებოდი.

ხანდახან ჩემს პატარა ძმასაც მიიწვევდა ხოლმე. ქადას სუნზედ პატარა სტეფანეს ნერწყვი უშრებოდა პირში და სუფრას რომ შემოგუხსნებოდი, ისე გამოიტენდა ორივე ყბას, რომ სიცილით ვიხოცებოდი. ვალენტინს ძალიან უყვარდა სტეფანე და კვირაობით სულ თანა ჰყავდა ჩიტებზედ რომ დადიოდა; თანაც ასწავლიდა, რომელი ფრინველი როგორ უნდა დაიჭიროს და გამოიყენოს კაცმა. ჩიტებზედ იყო გადარეული, როგორც მოგახსენეთ, და ბევრიცა ჰყავდა გალიებში; საკმელ ფრინველს კარგა ლამაზად შეექცევოდა და მგალობელს საკვირველი მოხერხებით უვლიდა, რადგან გაგიეებით უყვარდა ჩიტების გალობა. მკათათვის გასულს რომ იმის ოთახში ასულიყავით, რიგოს სახლის მეორე სართულში, გაგიკვირდებოდათ, იმოდენა ფრინველი ჰყავდა გალიებში. ეს კია, რომ მგალობლებს ზამთარში არ ინახავდა: სად ვუშოვო ბუზი და მატლიო? შემოდგომაზედ გაუშვებდა ხოლმე რაც ბუზი და მატლები ჰყავდა და მარტო იმათ შეინახავდა, რომელნიც მარცვალსა კენკავენ. ეხლაც მიკვირს, როგორა სძლებდა იმოდენა გალიებში, ჩიტებში და ფეტვში. დაიღუპებოდა, ფეტვი რომ ეყიდნა და თითონვე სთესდა ჩვენი სოფლის ბოლოში ერთ პატარა მიწაზე.

ზამთარში, როცა კი დრო ჰქონდა, იჯდა და ჩიტის მახეებს აკეთებდა. სალაპარაკოდ ჩიტების მეტი არა ჰქონდა-რა და ცხენს ისე ვერავინ გაატარებდა, რომ ძუა არ დაეძრო.

რევოლუციამდე იმის სალაპარაკო მარტო ჩიტები იყო და არ მახსოვს, რომ ერთხელაც არის სხვა საგანს შეხებოდეს რასმე; მაგრამ საერო კრების შემდეგ ვალენტინი სულ რაღასაც ფიქრობდა და ისე დაღონდა, თითქო ქვეყნის ცოდვას ვერ ერევაო. როცა კი მარტონი დავრჩებოდი, ის მაშინვე ნათლია-

ჩემის სამღერავს და საყვედურს მოჰყვებოდა და სულ იმას იძახდა, ამაყი და წინდაუხედავი კაციო.

— ამ უკანასკნელ ხანს სულ გამოტვინდა ჩვენი ოსტატი, — იძახდა ვალენტინი, — იმის სანატრელი ეხლა ის-ღა არის, რომ ტურტლიანი გლეხები თავადიშვილებს გაუთანასწოროს და ვიღაცა ივანე მჭედელი დეპუტატად ბრძანდებოდეს. მაგის ჯურის პატრიოტისთვის ხომ შეუძლებელი არა არის რა! ასე ჰგონია, ქვეყანა კიდევ გადააბრუნა და წმინდა კარდინალის პალატებს და მამულებს დაეპატრონა! რაკი ერთი წარმოიდგენს, ასე უნდა იყოსო, გაჯიქდება და აღარც სულიერ მეუფეთა წყევლა-კრულვისა ერიდება, აღარც ღვთისაგან კურთხეული მეფისა და იმის ჯარისა! იმას ხომ არა ფიქრობს, რომ ცაში ღმერთი და ქვეყნად მეფე წმინდა უნდა იყოს ყველასთვის და ვაი იმის ბრალი, ვინც მათ გაუპატიურებას მოიწადინებს! მთელი ქრისტიანობა ამხედრდება და მიწასთან გაასწორებენ უბედურს.

თან მწარედ იცანოდა. სამჭედლოში, რასაკვირველია, ვერა ბედავდა ამაზნდ ლაპარაკის ჩამოგდებას, მაგრამ ხანდახან დიდი ლანძღვით მოიხსენიებდა საერო კრებას, მილიციას და საერო კრების ყველა მომხრეს; ნათლიაჩემიც იძულებული იყო ყური მოეყრუებინა. რას იზამდა, ყელში ხომ არა სწვდებოდა? ისიც ძალიან ეჯავრებოდა, რომ თავის სახლში, თავის სამჭედლოში არ შეეძლო თავისუფლად ელანძღა დიდებულნი და ეპისკოპოსნი: ვალენტინისა დიდი პატივისცემა ჰქონდა და რაც შეიძლებოდა თავს იმაგრებდა... ვიდრე ცუდს ამბავს გაიგებდა რასმე. მაშინ კი მოერეოდა ბრაზი, გაჩუმებული იყო დიდი ხანი, თითქო ალს გულში იტრიალებსო, მაგრამ ვეღარ გასძლედა და წამოიყვირებდა:

— ის უსინდისონი, ის ღვთისა და სამშობლოს მტერნი, ისა!.. იმას კი არ იტყოდა, ვისა ლანძღავდა.

ვალენტინმა კარგად იცოდა, რომ ოსტატი დიდებულებზედ და ეპისკოპოსებზედ ლაპარაკობდა და ახლა ის უპასუხებდა, თუმცა არც ის დაასახელებდა, ვისზედ ამბობდა:

— რას იზამთ? ეს ქვეყანა რომ უსინდისოთ და ღვთისა და სამშობლოს მტერთ არ დარჩენოდით, ხომ არც ასე აირეოდა ჩვენი ცხოვრება.

გადახედავდა ნათლიაჩემი და შეუტევდა:

— ქვეყანას რეგვენები ღუპავენ, რომელნიც თავიანთ ცხვირს იქით ვერას ხედავენ!

— ჭეშმარიტია. მეტადრე ის რეგვენები, რომელთაც თავის თავი სოლომონ ბრძენის სწორად მიაჩნიათ!

და შეპყვებოდნენ. გაბრაზდებოდა ნათლიაჩემი, სისხლი თავში აუვარდებოდა. ვალენტინი ფერმიხდილი იდგა ხოლმე ჩაქუჩზედ დაყრდნობილი. მე კი გული მეღვევოდა შიშით,—ვაი თუ ერთმანეთს მისწვდნენ-მეთქი.

მაგრამ მამა ქრისტეფორეს დაფიცებამდე ლაპარაკი ლაპარაკად რჩებოდა და ავად თუ კარგად მაინც რიგდებოდნენ. მას შემდეგ კი, მეტადრე 1791 იანვრიდან, ისე დღე არ გავიდოდა, რომ ახალი ამბავი არა მოგვევლოდა რა და ყოველ ახალ ამბავს ცხარე კამათი მოსდევდა; ხან იმას იტყოდნენ, რომ ამა და ამ სოფლის მღვდელმა დაიფიცაო; ხან იმას, რომ საერო კრების წევრ მღვდლებს ხელმეორედ დაუფიცნიათო; ხან რასა და ხან რასა.

ნათლიაჩემი ამ ამბებზედ სულ ცას დაეწევოდა ხოლმე. გაიგებდა რასმე სასიამოვნოს და მაშინვე „წავა, წავა“-ს დასძახებდა. ვალენტინს კი ფერი მისდიოდა. ერთ დილას ხმა გავარდა, რომ ოტუნელ ეპისკოპოსს ტალეირან-პერიგოს, მიუხედავად პაპის განკარგულებისა, განუძრახავს თავისი ლოცვა-კურთხევა უძღვნას იმ მღვდლებს, რომელთაც კონსტიტუციას ერთგულება შეჰფიცესო.

ნათლიაჩემს ისე გაუხარდა, რომ ყვირილს მოჰყვა: სწორედ ქრისტეს მოციქულია ტალეირან-პერიგო; საეკლესიო მამულები იმის წინადადებით გაიყიდა; სამშობლოს საკურთხეველი იმან აკურთხა და ახლა თუ ნაფიც მღვდლებს თავისი ლოცვა-კურთხევა არ მოაკლო, სწორედ რომ წმინდათა შორის ჩასარიცხავი გახდებო. ...ვისაც ცოტაც არის პატიოსნება შერჩენია, თავი უნდა მოიხაროს მის წინაშე... ვირები ყოფილან ის ეპისკოპოსები, რომელთაც არ დაიფიცესო!

ვალენტინი თავის საჭმეზედ იყო, რაღაცას სჭედდა და ხმას არ იღებდა. მაგრამ უცბად, სრულიად მოულოდნელად მივარდა ნათლიაჩემს, ცხვირწინ აეტუზა და შეპყვირა:

— მაგას მე მაგონებთ განა? ჰე მაგონებთ განა? ჰოდა, თუ აგრეა, თქვენი ტალეირან-პერიგო იუდაა, მოღალატე! და უარესი იუდეები არიან, ვინც იმას აქებენ!

ნათლიაჩემმა უკან დაიწია. ისე უცბად მოხდა ყველაფერი, რომ ჯერ გონზედ ვერ მოსულიყო.

ვალენტინი კი თავისას იძახდა:

— ვირებიო! ჩვენი ეპისკოპოსები ვირებად გახადა!.. ვირა შენა ხარ, შე დიდყურავ, ამპარტავნებით და ამაოებით სავსე ვირო!

ამ სიტყვებზედ ნათლიაჩემი ცოფიანივით მივარდა, მაგრამ ვალენტინმა ასწია ჩაქუჩი და დაუყვირა:

— აბა, მობრძანდი!

საშინელი სანახავი იყო ჩვენი ქარგალი. მე რომ შუაში არ ჩავ-
ვარდნოდი ერთი უბედურება დატრიალდებოდა:

— ღვთის გულისთვის, ნათლიაჩემო! რას შერებით? ვალენტინ,
არა გრცხვენია?

თითქო გონებაზედ მოვიდნენ და შერცხვათ ერთმანეთისაო,
ორივემ ხელები დაუშვეს. ფერმიხდილნი იდგნენ ორივენი და ერ-
თმანეთს თვალს არ აშორებდნენ. ნათლიაჩემს უნდოდა რაღაც
ეთქვა, მაგრამ ხმის ამოღება ვერ მოახერხა. ვალენტინმა კუნჭულ-
ში მიაგდო თავისი ჩაქუჩი და დაიყვირა:

— ახლა კი კმარა! კიდევაც ბევრი მოვითმინე და! რაც მე ამ
ორ წელიწადში ავიტანე, სხვა უჩემო... ჩემს მაგივრად სხვა ქარ-
გალი ეძებეთ, მე აქ აღარ დავდგები!

— ჯანაბამდე გზა გქონდეს! — შეჰყვირა ნათლიაჩემმა. ძლივს
არ მოვიშორებ ამ წუჰაკ არისტოკრატს!

— ანგარიში გამისწორეთ!.. და მოწმობაც მომეცით, რომ
სრული თხუთმეტი წელიწადი ვიმუშავე თქვენთან! გეყურებათ?
კარგი იქნება თუ ავი, მოწმობა უთუოდ უნდა მომცეთ! ვნახოთ
ერთი როგორ მოწმობას მისცემს თქვენისთანა პატიოსანი პატრი-
ოტი ჩემისთანა წუჰაკ არისტოკრატს!

და კარი გაირახუნა.

ნათლიაჩემი მძიმედა ქშინავდა, მაგრამ მალე დაშვიდდა და
მითხრა:

— ნაბე, რა მიყო იმ მხეცმა, იმანა?!

— გაბრაზებული კაცი ყველაფერს იზამს, ნათლიაჩემო. უფრო-
სი ბრძანდები, უნდა აპატივო. არ იცნობდე—კიდევ ჰო, მაგრამ
ხომ იცნობ, რა პატიოსანი კაცია და გამოცდილი ხელოსანი. რასაც
თქვენ იმასა ლანძღავდით... იმას თუ იმის მომხრეებს, ეგ სულ ერ-
თია, კიდევაც ბევრი მოითმინა და!

— როგორ?! მაშ სულ ჩემი ბრალი ყოფილა! მაშ მტყუანი მე
ვყოფილვარ?!

— დიად, ძალიან გალანძღეთ, და... ისიც კაცია! განა არ იცით
რა ძალიან უყვარხართ, რა ერთგულად გემსახურებათ... ლამის
ერთი სიტყვის გულისთვის დაჰკარგოთ კაცი!

ჯერ იუცხოვა, ეს როგორ გამიბედაო, და გაშტერებული შე-
მომკეპროდა. მერე გაიარ-გამოიარა და მითხრა:

— მე ოსტატი ვარ!.. ოსტატი არა ვყოფილიყავ; მე ვუჩვენებ-
დი სეირსა!.. მაგრამ მაგას თავი დავანებოთ. იცი, მიშელ, ეგ ძა-
ლიან კარგი, რომ პირდაპირ მითხარი, რასაც ფიქრობდი. ძალიან

ვნანობ, რომ თავი არ შევიკავე: დიად, ძალიან ვნანობ... ეხლა რა-
ლა ეშველება!.. არა, რა მომავონებდა, რომ ისე ეწყინებოდა იმ
ტყის ნადირს, იპასა!

რაკი ვნახე, რომ ნანობდა, ავიღე ქუდი და საჩქაროდ რიგოსას
ავვარდი; მინდოდა ვალენტინი მენახა და შემერიგებინა როგორმე:
ისე მიყვარდა ჩვენი ქარგალი, რომ მეგონა, ეს რომ წავიდეს, და-
იღუპება ჩვენი სამკედლო-მეთქი. ნათლიაჩემი კარგად მიხვდა, რა-
საც ვაპირებდი, მაგრამ არა მითხრა რა.

ვალენტინი იჯდა და მოხუცებულებს უამბობდა, ჩხუბი მო-
გვივიდაო. ისე შეშინებულყვენენ ორივე ცოლ-ქმარი, თითქო ვა-
ლენტინს კი არა, იმათ შემთხვევოდათ ეს უსიამოვნება.

— რა მოხდა იმისთანა, ვალენტინ, რომ თავი დაგვანებო? თუ
ოსტატი გაცხარდა, შენცა არა დააკელი რა. ცოტა რამ მეტი ჰკად-
რეთ ერთმანეთს... განა მაგისტვის უნდა გაგვექცე! დაივიწყე ყვე-
ლაფერი, ვითომც არა მომხდარა რა. ნათლიაჩემიც ყველაფერს
დაივიწყებს... იქნება გგონია ჯავრი ჩაიყოლოს შენი! ვაიმე, ვაიმე!
მაშ არა გცნობია! განა არ იცი, რა პატივისმცემელია შენი!

— პატივისმცემელი და ეგრე!—დამემოწმა რიგო.

— რას ვუყურებ იმის პატივისცემას?! საერო კრებამდე მეც ძა-
ლიან მიყვარდა ჩვენი ოსტატი, მაგრამ მას შემდეგ, რაც იმან
ჟამთა უბედურებით ისარგებლა და საეკლესიო მამულები დაისა-
კუთრა, აღარც იმისი პატივისცემა მინდა და აღარც სიყვარული.
გარდა მაგისა, მე ისა მწყინს, რომ დაუქინია—კაცნი თანასწორნი
უნდა იყვნენო. რაც ღმერთს დიდად და პატარად გაუჩენია, მაგან
უნდა ვაასწოროს, მაგ უღმერთომ, მაგანა?! დღევანდელი დღე და-
იხსომეთ და პირში ჩამაფურთხეთ, პირში, თუ ამ სიხარბემ არ
დაღუპოს! და ახიც მოუვა!.. შენ კი, ჩემო მიშელ, შენი საქმე სულ
სხვაა: შენი ცხოვრება ისე დატრიალებულა, რომ მკვდელი ივანეს
და შოველის ხელში ჩავარდნილხარ, შენი რა ბრალია! დღეს რომ
უწინდელივით მიმდინარეობდეს ჩვენი ცხოვრება, ერთი ოთხი-
ხუთი წლის შემდეგ შენც ოსტატად დაგლოცავდნენ; თუ ფულს
ვერ მოახერხებდი, მე დაგეხმარებოდი; ფალსბურგში ნოტარიუს
ბუალოსთან ცოტა რამ ფული მაქვს შენახული. მერე ცოლს შეი-
რთავდი, დავიწყებდით ერთად მუშაობას და საკუთარი შვილები
თუ არ მეყოლებოდა, შენს შვილებზედ მაინც გავიხარებდი.

გული ამოუჯდა, თვალთ ცრემლი მოეჩია. მე კი ჩემსას გავი-
ძახობდი:

— ნუ, ჩემო ვალენტინ, ნუ წახვალ! ხომ იცი, უშენობა რა ძნე-
ლი იქნება...

უცხად წამობტა, თვალეზზე ხელი მოისვა და გადაწყვეტით დაიძახა:

— დღეს ხუთშაბათია... ზეგ, შაბათ დილით მივდივარ. კაცმა თავისი მოვალეობა უნდა იცოდეს და აასრულოს კიდეც. აქ დავრჩე, ამ ცოდვილთა და ღვთის მტერთა ბუდეში, რომ სული წავიწყმინდო და საუკუნოდ დავიღუპო?! აქამდისაც ძალიან შეეცდი, რომ არ გავეჩქეც აქაურობას! მაგრამ რა მექნა, რომ ჩვეულება და ხასიათის სისუსტე ვერ დამეძლია! ახლა კი ველარა დამიპყერს რა, ყველა კავშირი გაწყვეტილია! ძალიან კმაყოფილიცა ვარ, რომ ძლივს თავს დავაღწევ ამ ჯოჯოხეთს! ოსტატს უთხარი, რომ ხვალ საღამოსთვის ყველაფერი მზადა ჰქონდეს, გესმის? მე იმასთან ლაპარაკი აღარა მსურს... ეგონება ჩემს აზრზე დავიყოლიებო!

ადგა და თავის ოთახში ავიდა. მე კი დაღონებული გამოვედი გარეთ, თოვლით სავსე ქუჩა გადავიარე და ნათლიაჩემის დარბაზში შევედი. ნიკოლი სუფრასა შლიდა; ნათლი-ჯალაბიც იმას ეხმარებოდა; ეტყობოდა ოსტატს ყველაფერი ეამბნა, რომ ასე დაღონებული იყო. თითონ ნათლიაჩემს გულხელი დაეკრიფა და ბოლთასა სცემდა დარბაზში.

— რაო, მიშელ?

— რაო, ნათლიაჩემო, და ისაო, რომ ზეგ დილით ადრე აპირებს წასვლას და გთხოვთ, ხვალ საღამოსთვის ყველაფერი შეუმზადოთ.

— ძალიან კარგი, იმის ჯამაგირი მზადა მაქვს და მოწმობაც ამალავე დავუწეროთ, თუ კი არ იშლის და თავს გვანებებს. მაგრამ, მოდი, მიშელ, ერთხელ კიდეგ გადირბინე და უთხარი, წასვლის წინ ისე მომექცეს, ვითომც არა მომხდარა რა ჩვენ შორის... ჩემს მაგივრად სთხოვე სადილად გადმოვიდეს და პირობა მიეცი, რომ არც დიდებულთ ვახსენებ, არც ბერებს, და არც პატრიოტებს. აგრე უთხარი... განა ისეთი რა მოხდა, რომ წასვლის წინ ერთი ჩარეჭი ღვინით გზა არ დამალოცვინო და ხელი არ ჩამომართვა-თქო! პოლიტიკა პოლიტიკად-თქო, უთხარი, და კაცის დაქარგვა კი არ ვარგა-თქო.

ძალიან მოღბა საწყალი ნათლიაჩემი, ბოდიშს იხდიდა რაღა თავის ქარგალის წინაშე. მაგრამ როგორ ვეტყობდი, გვიანდაა, იმას შენთან ლაპარაკიც აღარ უნდა-მეთქი.

სწორედ იმ დროს გამოვიდა სახლიდან ვალენტინი და ჩვენ ფანჯრებ წინ გაიარა, ეტყობოდა ქალაქს აპირობდა ჩასვლას ფულის გამოსატანად ნოტარიუსისაგან. ნათლიაჩემმა საჩქაროდ ფანჯარა გააღო და დაუყვირა:

— ვალენტინ! ჰაი, ვალენტინ!

ვალენტინმა ისე ჩაიარა. ვითომც არც კი გაუგონია. ნათლიაჩემს კი ისევ ბრაზი მოერია და შეჰყვირა:

— ვერა ხედავთ იმ რეგვენს, რომ ხმასაც აღარა მცემს! ხედავთ, რა გესლიანი გული ჰქონია! არა, დავაშავე. ვაწყენინე, ვგრძნობდი, რომ მტყუანი მე ვიყავი და ძალიანაც ვნანობდი, რად ავჩქარდი მეთქი... მაგრამ ეხლა აღარ ვნანობ! ეხლა კმაყოფილიც ვარ, რომ ასე მოხდა. ხედავთ იმ წუპაკს, იმას, იმ არისტოკრატს, იმას, რომ ჩემთან ლაპარაკსაც აღარ კადრულობს!

განჯინა გააღო, საწერ-კალამი გადმოიღო და მითხრა:

— დაჯე, მიშელ, ერთი მოწმობაც დაეუწეროთ იმ ბრიყვსა!..

გაბრაზებულია მეთქი, ვიფიქრე, კარგს არას დამაწერიანებს:

— სადილს უკან არ ემჯობინება, ნათლიაჩემო... თქვენც უფრო დამშვიდებული იქნებით.

— არა, არა! — შემომიტია გაბრაზებით, — დავწეროთ და გავათავოთ, რომ თავიდან მოვიშორო ის მხეციც და იმის მოწმობაც!

ხომ ისე გაჯავრებული იყო და იმისთანა მშვენიერი მოწმობა დამაწერინა, იმისთანა სამაგალითო ხელოსნად და კაცად გამოიყვანა თავისი ქარგალი, რომ რამდენჯერმე დავეკითხებოდი ხოლმე სანამ დავწერდი. სამაგალითო, გამოცდილი ხელოსანიც ის იყო, პატიოსანი კაციც ის იყო, ერთგული და პატრონისთვისაც თავდადებულიც ის იყო... ძალიან ვნანობ, რომ თავს მანებებს, მაგრამ კერძო გარემოებათა გამო უნდა დავმორებოდით ერთმანეთს და ყველა ქარხნის პატრონს ვურჩევ ქარგლად აიყვანოს, რადგან უკეთესს ვერავის იშოვისო.

დაწერილი ერთხელ კიდევ გადამაკითხვინა, მოიწონა და ხელი მოაწერა.

— მორჩა და მოისვენა! აი, ეს იმის ჯამაგირი და ესეც მოწმობა. ან ამალამ გადაუტანე ან ხვალ დილით. ფულის მიღებისა ბარათი ჩამოართვი. თუ ვითხრას, გამაცილეო, ხომ იცი ხელოსნებში ჩვეულებადა აქვთ ერთმანეთის გაცილება. შაბათს სრულიად თავისუფალი ხარ, მთელი დღე, და გაჰყევი სადამდინაც უნდოდეს... აბა, ახლა კი დაესხდეთ.

წენიანი უკვე სუფრაზედ იდგა და დავსხედით.

იმ დღეს საამისო აღარა მომხდარა რა. ვალენტინი აღარ ამოვიდა და ფული და მოწმობა მეორე დღეს მივეუტანე. რომ შევედი, ის თავის გალიებსა და მახეებს ალაგებდა. მოწმობა მივეცი, ფული მივეუთვალე. მოწმობისა არა თქვა რა და პირდაპირ ჯიბეში ჩაიღო. ფულისა ბარათი მომცა.

— ახლა კი ყველაფერი რიგზედ არის! ოღონდ იცი, მიშელ, ეს

გალები. ეს ფრინველები და მარცვალი სულ შენთვის და პატარა სტეფანესთვის მიჩუქებია. იქნება გამოიყენოთ.

დიდი მადლობა გადავუხადე.

— ხვალ უნდა გამაცილო; სავერნის მხარემდე ჩამოყე და იქ გამოვეთხოვოთ ერთმანეთს. ოსტატი ამის უარს ვერ გეტყვის.

— არა, არ მეტყვის. ნათლიაჩემმა ხვალ მთელი დღით დამითხოვა.

— დაგიტხოვდა, მაშ არა?! ჩვეულება სჯულზე უმტკიცესიაო, ნათქვამია... მაშ აგრე, ხვალ დილის რვა საათზე მივდივარო.

მეორე დღეს რვა საათზედ გზას გავუდექით. ვალენტინის გულად მე ავიკიდე და თითონ უკან მოდიოდა, ჩემს კვალზედ, რადგან სამინელი თოვლი იდო. მოდიოდა, მაგრამ, ძალიან უჭირდა სიარული, რადგან მთელი თავისი ძალ-ღონე მკლავებში ჰქონდა და ფეხით ძალიან სუსტი რამ იყო.

მშვენიერი სუსხიანი დღე იყო. ზემოდან თოვლით მოფენილი ალ-ზასი მოჩანდა თავის ტყეებით და სოფლებით; შორს, შორს რეინი მიიკლავებოდა. მშვენიერი იყო იმ ზამთრის დღეს ჩვენი მხარე და მით უფრო სამწუხარო უნდა ყოფილიყო ვალენტინისთვის შორს სადღაც გადაკარგვა. ცხრა საათი იქნებოდა, როდესაც ერთ დუქანში მივედი. ისე ვიარეთ მთელი საათი, რომ ხმა არ ამოუღია.

სხვა დროს სავსე იქნებოდა მეურმეებით ეს დუქანი, მაგრამ იანვარში მთაში სიარულს ვერაფერ ბედავდა და დუქანში არავინ იყო.

თოვლში დამარხულსა ჰგავდა პატარა დუქანი. ერთი ვიწრო ბილიკი რომ არ ყოფილიყო გაჭრილი, და კვამლი არ დაგვენახა ამომავალი, იქნება უღაბური გვეგონებოდა და არც კი შევსულიყავით...

ბუნხართან ერთი დედაბერი იჯდა და სთვლემდა; იქვე გვერდით ჯარა ედგა. დედაკაცის გარდა თურმე ფინიაც ყოფილიყო დაზგის ქვეშ, მაგრამ ყფა მაშინ დაგვიწყო, როდესაც მასპინძელი გავადვიქეთ. ჩვენი ფეხის ხმა რომ გაეგო, შეშინებოდა და დაზგის ქვეშ შემაღულიყო.

მოხუცებული მარტო იყო, ქმარი სავერნს წასვლიყო სავაჭროდ. ერთი ხელადა ღვინო მოგვიტანა და ყველი და პური. ვალენტინმა თავისი ბოხჩა სკამზედ დასდო და გულხელდაკრეფილი იქვე ჩამოჯდა, მე იმის პირდაპირ დავიჭირე ალაგი. მოხუცებულს ისევ ჩასთვლიდა.

— აქ კი გამოვეთხოვოთ ერთმანეთს, — მითხრა ვალენტინმა. — ღმერთმა გაცოცხლოს, ჩემო მიშელ!

— ღმერთმა გაცოცხლოს, ვალენტინ! ღმერთმა მშვიდობის გზა მოგცეს!

— გამადლობ! ხომ ძნელაა ჩემი ყოფა და ვერ წარმოიდგენ, რა

კმაყოფილი ვარ ჩემი გადაწყვეტილებისა და რა დამშვიდებული გულით გავუღებები ჩემს გზას. ძლივს არ დავახწიე თავი იმ მაცდურთა ბუდეს! წავალ აქედან, აქაურს მტვერსაც კი არ გავიყოლებ ფეხსაცმელზედ და ცოდვილ სულისთვის ვიზრუნებ რასმე. განა აქამდის კი არ უნდა წავსულიყავ? განა მოსაკლავი არა ვარ, რომ ამოდენი ხანი იმ ბაბილონში ვიყავ! მოსაკლავი ვარ, მოსაკლავი, განა მე არ ვიცი! მინდოდა წავსულიყავ, განა არ მინდოდა! მაგრამ შეჩვეული ვიქნა, ხომ გაგიგონია... სუსტია ადამიანი, სუსტი და გაუბედავი.

იჯდა და მოსთქვამდა. მაშინვე თვალწინ წარმომიდგა დედაჩემი, მეტადრე როდესაც რომელიმე დაუფიცავი მღვდლის ქადაგებას მოისმენდა და შინ დაბრუნდებოდა. დედაჩემი კი არა, ბერი ბენედიქტე ლაპარაკობდა. ბოლოს თვალეები ცაჲ ალაპყრო, ხელეები გაშალა და დაიძახა:

— დადგა დრო სინანულისა!.. ყოველ შეცოდებას სინანული უნდა მოსდევდეს. მართალია, მე ძალიან გვიან დავადექე გზასა სინანულისასა, მაგრამ იქნება შემინდოს დავვიანება ღმერთმა, შემიბრალოს და მაცხონოს.

— რა ვქნა, სად მიხვალ, ვალენტინ?

ღმაცქერდა, თითქო მსინჯავს, ღირსია ნდობისა თუ არაო.

— შენ გეტყვი, მარტო შენ გეტყვი, სადაც მივალ. შენ გეტყვი, რადგან შენდა შეუმჩნეველად გულით ჩვენკენ ხარ; დიად, მანვე გვალენა, თორემ აქამდე შენც ჩვენთან იქნებოდი. ეს კია, მიშელ, რასაც გეტყვი, საიდუმლოდ უნდა დარჩეს! ის კი არ იფიქრო, რომ გავცე, საქმე წაუხდებათო. საქმის წახდენა განა ჩვენ ხელთ არის? ღვთის განგებას ვერავინ შესცვლის... დადგა უკვე აღსასრული ბაბილონისა! ჯერ ეს თოვლი ისევ აქ იდება, რომ ყველას თავის საქციელისამებრ მიერწყვის... შენ აგცდება სასჯელი... დიად, შენ აგცდება სასჯელი, მაგრამ... მაგ ხეებსა ხედავ, მიშელ... გაზაფხულზედ მაგ ხეებზედ იმდენი ფოთოლი არ იქნება, რამდენსაც ზედ პატრიოტს ჩამოვახჩობთ! ძალიან დამადონა ღვთის წინაშე ამ სიტყვამ.

— რატომ, ვალენტინ, შესაძლებელია, რომ აგრეც მოხდეს, ძალიან ადვილად... მაგრამ მანამ ხომ უნდა იყო სადმე?

— მანამ მაინცში ვიქნები, — სთქვა საიდუმლო კილოთი ვალენტინმა და მძინარე მოხუცს გადახედა. — მანამ მინდა მეც იქ შევფარო თავი, სადაც ჩვენი დიდებულები ბრძანდებიან და, სხვათა შორის, ღვთისაგან კურთხეული თავადი არტუა. ის-ღაა ჩვენი იმედი მაინციდან შემოვალთ საფრანგეთში, ლიონს დავიმორჩილებთ და სამეფოს დედაქალაქად გავზდით, რადგან პარიზი უკვე გახრწნილია და ისე უნდა აღიგავოს მიწის პირისაგან, რომ კვალიც აღარსად დარჩეს.

გენერალმა ბენდერმა ძალიან ჰკუთას ასწავლა ჰოლანდიელ პატრიოტებს! ახლა საფრანგეთის პატრიოტების რიგია. ნახავ, მიშელ, რა ავიღლე დაადგებათ! ქვეყნის ჯარები მოადგებიან საფრანგეთს; ერთი რიგი საფიციდან შემოესევა, მეორე ბელგიიდან, მესამე შვეიცარიიდან, ისპანიიდან, ინგლისიდან. ამ ჯარებს წინ ჩვენი გახიზნული დიდებულნი წამოუძღვებიან, რათა გაანთავისუფლონ უღმერთოთაგან უღმერთოდ წამებული საფრანგეთი. მაშინ დადგება ღლე სასჯელი-სა და შენდობისა! შევეუნდობთ ყველას, ვინც კი შეინანებს და თავს მოიხრის... და ვაი იმათ, ვინც მაცდურს აპყოლია! ვაი ანტიქრისტეს, რომელმაც ეკლესიას მამულები გამოსწირა! ვაი ღვთისა და მეფის მოწინააღმდეგეთ, რადგან უღმობელი იქნება მათთვის მახვილი გამარჯვებულთა! ვაი ივანე ლერუს, ლეტუმის, ელოფ კოლნეს და მათ მიმდევართ! იმათთვის უკვე დაგრეხილია ყელსახვევი კანაფისა! შენ კი ნუ გეშინია! შენ კეთილი გულის პატრონი ხარ, ღლე-მამის პატივისმცემელი და მანუგეშებელი. ყველას თავის საქციელისამებრ მიერწყვის, ჩემო მიშელ. ოღონდ ეს კი იცოდე, როდესაც ჩვენი დიდებულნი ალზასში შემოვლენ, შენ სხვებს ნუ აპყვება და იარაღს ნუ აიღებ მათ საწინააღმდეგოდ. მერწმუნე, ერთი ვერ გადაჩება, ერთი იმათგანი, ვინც რევოლუციას მიუდგება! ისე კარგად მოაწყო ყველაფერი თავადმა არტუამ, რომ ვერავინ გადაჩება! შენ არ დაიძრა, ღლე ლეტუმზე წავიდეს, კოშარი, ჩვენი ოსტატი! მაშინ ჯარებაც ჩვენ მოგვემხრობიან, ჩვენა და ჩვენს ბატონებს. დიად, დაიწყებენ სიარულს და პირდაპირ პარიზისკენ გასწევენ, რომ ღლედაბუდიანად ამოსწყვიტონ პატრიოტები!

მოსთქვამდა ჩვენი ვალენტინის მე კი დაღონებული შეცვქეროდი და ვფიქრობდი: ვაიმე, ვაიმე! ჰკუთაზე შეშლილა ეს უბედური-მეთქი!

— ეგ ძალიან კარგი, ვალენტინ, რომ შენც გახიზვნას აპირობ და მაინც მიღიხარ. მაგრამ შენ იქ რა გინდა? ჯარისკაცად გამოადგე, კიდეც ჰო! მერე შენს ხანში...

— ეეჰ, ჩემო მიშელ, კაცი იყოს თორემ სასარგებლო საქმეს ყოველთვის იშოვის. ჩემთვისაც გამოჩნდება საქმე: ცხენოსან ჯარში დამნიშნავენ სადმე ნალბანდად და ამით მაინც დავეხმარები ჩემი სამშობლოს განთავისუფლებას.

ალარა ვუთხარი რა და რადგან ხელადა ცარიელი იყო, მინდოდა ერთი მეც მომეთხოვა, მაგრამ ალარ ინდომა:

— კმარა, მიშელ, კმარა! ხომ იცი ღვინო... ერთი ჯამი აცხონებს და ორი კი წაწყმედავს კაცსა.

ღვინის ფასი გადიხადა, გუდა წამოიკიდა და გარეთ გავედით. გზაზედ რომ გავედით, შედგა, მომეხვია და ხმის ამოუღებლივ სენ-

ქანდეშუსკენ დაეშვა. კარგა ხანი ვუყურე, მაგრამ უკან აღარ მოუხედია, წელში გაჭიმული მიდიოდა, და თუმცა ქაპრამდე თოვლში იფლობოდა, მაინც ისე ამაყად მიაბიჯებდა, თითქო ოცის წლის ბიჭიო.

მეც შინისკენ გავეშურე. ვალენტინის ნათქვამი მე გიჟის ნაროში მეგონა, რადგან ჯერ არ ვიცოდი, რომ საფრანგეთიდან გახიზნული დიდებულნი და ევროპიელი მეფენი დაკავშირდებოდნენ და ამხედრდებოდნენ ჩვენი ქვეყნის გასანადგურებლად. მაშინ ჯერ არ ვიცოდი, რომ გახიზნულები არც ფრანგები იყვნენ, არც გერმანელები, არც რუსები, არამედ დიდებულნი და ერთმანეთს შველოდნენ და ეხმარებოდნენ, რომ ხალხი უღელში ჰყოლოდათ შებმული.

ვალენტინის მუქარა მე იმისთანა საშინელებად მიმაჩნდა, რომ, აჟი ვამბობ, გიჟია და როშავს-მეთქი, ვიძახდი.

შუადღე იყო ნათლიაჩემისას რომ მივედი.

— სიდერსა ჰყვარებიხარ, მიშელ! — დაიძახა ნათლიაჩემმა. — ისა? წავიდა?

— დიაღ, წავიდა.

— საით?

მაგრამ პასუხი აღარც კი მათქმევინა და განაგრძო:

— მაინცისკენ წავიდოდა ის სულელი! წავა და გახიზნულებს მოსძებნის... აბა დასხედით და იმის ხსენებაც ნულარ იყოს ამ სახლში!

ძალიან მზიარულად იყო სუფრაზედ.

— ახლა კი მარტონი დავრჩით, ჩემო მიშელ! ახლა კი აღარავის დავერადებით და, რაც გვინდა, იმას ვიმღერებთ! გარდა ამისა, ცოტა რამ ცვლილება უნდა მოხდეს ჩვენს სამკედლოში. ძალიან კმაყოფილი ვარ შენი, მიშელ; ყოველთვის ერთგული იყავ ჩემი ოჯახისა და იმედი მაქვს შემდეგშიაც... მართალია, ვალენტინის ოდენა არ შეგიძლია, რადგან მართალი უნდა სთქვას კაცმა, ძაან-ძაან დახელოვნებული მკედელი იყო ის მამაცხონებული; მაგრამ გონებით შენ ათასი ხარ და ის არც ერთი! გონება და საქმის სიყვარული ჰქონდეს კაცს, თორემ ისე დახელოვნდება, რომ სასწაულმოქმედი გახდება.

სადილი გავათავეთ. ის იყო წამოვიწიე, მაგრამ მხარზედ ხელი დამადლო და მითხრა:

— მოითმინე, ცოტა რამ სალაპარაკო გვაქვს მე და შენ... ისე შენს მტერს დაეცალოს ოჯახი, როგორც ეს ხელადა არის, ჩემო ეკატერინე.

ნათლი-ჯალაბი ღვინის ამოსატანად გავიდა. მე კი გაკვირვებულნი შევეყურებდი ნათლიაჩემს და ვფიქრობდი, ნეტავი რა უნდა მითხრას,

340

რომ ასეთი ნასიამოვნები არის-მეთქი? ცოტა ხანს უკან ნათლი-
ჯალაბმა ღვინო მოგვეიტანა და თითონ სამზარეულოში გავიდა ქურ-
ქლის გასარეცხად. დიდ დარბაზში მარტონი დავრჩით მე და ნათ-
ლიაჩემი.

— აქ არავინ შეგვაწუხებს, — მითხრა ნათლიაჩემმა და ღვინო
დამისხა. — იმისთანა თოვლი დევს, რომ ეხლა მგზავრი არავინ მო-
ვა... ხომ იცი, მიშელ, რა ძვირფასი მამულია ჩემი პიკოლციის მიწე-
ბი. ლიქსპეიმის ახლო მიდამოში იმისი დარი მიწები არსად მოიპოვე-
ბა. მართალია, ცოტა რამ ქვიშა და კირი ურევია, მაგრამ მით უკე-
თესი, უფრო ფიცხი იქნება. რას დასთესს კაცი, რომ ზღვად არ
იქცეს?! მერე რა დასვენებული მიწებია! მე შენ გითხრა, ხვნით
შეაწუხებდნენ ბერები! მაგრამ რა! არცა ხმარობდნენ და არც უვ-
ლიდნენ ის უბედურები! ქვემოთა ნაწილში წყალი შეუგდიათ, დაუ-
გუბებიათ შიგ და ის მშვენიერი საბალახე ჭაობად უქცევიათ.
იმისთანა უფარგისი ბალახი მოდის, რომ საქონელი ახლოც არ ეკა-
რება. შენ უპატრონობა სთქვი, თორემ ბოლოში რომ რუ გაეჭრათ
და წყლისთვის გზა მიეცათ, ეხლა ძვირფასი მამული იქნებოდა. რას
შეიწუხებდნენ თავს ბერები? რა გაჭირვება იმათ ადგათ, რომ მამუ-
ლის ყადრი სცოდნოდათ! დილით-საღამომდე ქეიფს ეწევოდნენ და
მანც უღვეელი ჰქონდათ სარჩო-საბადებელი. რომ ველარა სკამ-
დნენ, ლორები ულპებოდათ! დიად, იმას მოგახსენებდი... ზემო ნა-
წილში კიდევ იმისთანა უზარმაზარი კაკლები და პანტები დგას, ისე
აქვთ ფესვი გამდგარი, რომ თუ ცულმა არ უშველა, იქ გუთანნი
ვერას გახდება. ფიჩხი ჩამოვა, ფიჩხი, რომ სამ წელიწადს ვერ დავ-
წვავთ! ერთი სიტყვით, მოვლა უნდა, თორემ ოქროს მადანია ის
დალოცვილი. აი, ჩემო მიშელ, რამდენს ავნებს ქვეყანას ბერების
სიზარმაცე და დაუდევრობა! მე რომ შარშან გუთანნი შემეტანა, ეხ-
ლა ბედელი სავესე მექნებოდა პურიო. შარშან თუ ვერ მოვახერხე
წლეულს უთუოდ უნდა მოვეუარო საქმეს. დავიწყე კიდევ! სახლი
ინგროდა და შეგაკეთებინე: ახალი ჭერი დაეხურე და ბოსლის შე-
ნება დავიწყე. საქმე ის არის, რომ ქვემო ნაწილში, რაკი გავაშრობ,
ძალიან პატივი დამჭირდება და ხომ იცი, ვისაც პატივი უნდა, საქო-
ნელი უნდა გაიჩინოს. გავიჩენ კიდევ. ეკატერინეს მზითვეი ფლეის-
პეიმში ხელუხლებლად მაქვს და ძალიანაც ვასარგებლე: ამ დუქან-
საც კარგი სარგებლობა მოაქვს; ისე რომ მოვახერხებთ როგორმე,
საქონელსაც გავიჩენთ და მამულსაც მოვუვლით. ეს კია, რომ მე
აქაურობას თაფქმის ველარას გამოვადგები: ხომ იცი გლუხკაცისა
უმთავრესი ის არის, რომ მიწასაც თითონ ჩაჰყურებდეს, მოჯა-
მაგირებესაც თვითონ ამუშავებდეს, საქონელსაც თვითონ უვლიდეს,

გუთანიც თვითონ გაჰქონდეს; ყველაფერს თვითონ უნდა აკეთებდეს, თორემ ათასიც რომ დახარჯოს, ვერას გაარიგებს. მთელს გაზაფხულს და შემოდგომას იქ ვიქნები; კვირაში ერთხელ-ორჯელ დაგხედავთ. ეკატერინე უჩემოდაც კარგად გაუძღვება დუქანს; მაგრამ სამკვედლოსთვის კი მინდა ვინმე, რომ საქმეს გაუძღვეს და ეგ მინდა შენ დაგაეალო, ჩემო მიშელ; ჩემს მაგივრად შენ უნდა იყოს სამკვედლოში. ქარგალიც შენვე უნდა იპოვნო ვინმე შენი გუნებისა, რადგან პასუხისმგებელი შენ იქნები და, მაშასადამე, არჩევანიც შენზედ უნდა იყოს დამოკიდებული. დღეიდან თუშმანი გექნება თვეში, ექვსი მანეთის მაგივრად. ეს იცოდე, ჩემო მიშელ, რომ თუ კაცი საქმეზედ მუყაითად არის, მარტო თავის თავს შესძენს, რასაც პატრონს შესძენს. მგონი შენც იცი, როგორ მიყვარხარ, რადგან ჩემი გაზრდილი ხარ და ყოჩალი ბიჭიცა ხარ. ჩემი ნათლული ხარ... მე კიდევ ღმერთმა შვილი არ მაღირსა... ეცადე, შვილო, და... ხომ გესმის!..

ტირილი მომივიდა და ძლივსღა წავილულულუდე:

— ნეტავი ღმერთმა იმდენი შემაძლებინოს, ნათლიაჩემო, რომ თქვენი სიკეთე გადამახდევინოს. არა ვიყავი რა და კაცი გამხადეთ. ნეტავი კი შემეძლოს დაგიმტკიცოთ რითიმე ჩემი სიყვარული!..

— კარგად მოიქეც, ჩემო მიშელ, და მე მეტი დამტკიცება არ მინდა. — მერე მოვიდა, ხელი ჩამომართვა და მითხრა:

— იზრომე, გიყვარდეს შენი ოჯახი და ღმერთიც დაგიმადლებს და კაციც. მე რომ შვილი მყოლოდა, ვინატრებდი, შენ დაგვანებოდა... აგრე! გაზაფხულამდე კიდევ ერთად ვიმუშაოთ; თუ გაკლია რამე იმასაც გასწავლი და მერე კი შენ დაგილოცავ სამკვედლოს. შენ მანამ ქარგალი მოძებნე ვინმე.

ღიად, ადამიანის სიცოცხლე დიდი ტანჯვა-წვალებაა, მაგრამ ხანდახან ნეტარი დღეებიც გამოერევიან ხოლმე; ნათლიაჩემმა რომ მიბრძანა, სამკვედლო შენთვის ჩამიბარებიაო, ასე მეგონა, ერთი პატარა სამკვედლო კი არა, მთელი სამეფო ჩამიბარეს-მეთქი და ამაყად წამოვიწიე: მეც კაცი ვყოფილვარ, მეც შემძლებია ჩემად საქმის გაძღოლა-მეთქი. მომაგონდა ჩემი მარგალიტა, თვალწინ წარმომიდგა იმისი აღტაცება, ამ სასიამოვნო ამბავს რომ გაიგებდა. მაგრამ უფრო იმიტომ მიხაროდა, რომ ჩემი ჯამაგირით ადვილად შემეძლო პატარა სტეფანე ლუტცელბურგში მიმებარებინა ვისთვისმე, რომ მამა ქრისტეფორესთან სასწავლებლად ეარა; სულ იმის ოცნებაში ვიყავი, რომ ჩემი სტეფანე სოფლის მასწავლებლად უნდა გამოვიყვანო მეთქი. რომ არ მესწავლებინა, ის თავის თავს ვერ აცხოვრებდა, სოფლის საკვები გახდებოდა და ამას რომ წარმოვიდგენდი, ისე

შემრცხვებოდა ჩემი თავისა, თითქო ჩემს ძმას უკვე ვუღალატე, შე-
მეძლო და იმის სწავლისათვის ფული დავიშურე... ახლა მამაჩემი
როგორ გაიხარებდა!

ველარ გავუძელ ამ ფიქრებს და ნათლიაჩემს ვთხოვე, თუ საქმე
არა გაქვთ რა, ცოტა ხანი დამითხოვეთ, შინ ავირბენ-მეთქი.

— გაიქეცი და გაახარე თქვენები, — დასტური დამცა ოსტატმა.
თვალის დახამხამების უმალ ავედი ჩვენსა. მამაჩემი, სტეფანე
და მატურიანი კალათებს სწნავდნენ და ძალიანაც გაუკვირდათ ჩემი
ისე უდროოდ მასვლა. დედაჩემი ბუხართან ჭურჭელსა რეცხდა; ერ-
თი კი გადმომხედა და ისევე თავის საქმეს შეუდგა.

— რა მოხდა, მიშელ? — მკითხა შეშინებულმა მამამ.

— ნათლიაჩემმა თვეში თუშანი დამინიშნა, მამაჩემო! — შევ-
ყვირე გახარებულმა. იცით, ვალენტინი წავიდა. სამჭედლოს მე უნდა
გავუძღვე და თვეში თუშანი მექნება. ნათლიამ თქვა: გაზაფხულზე
პიკოლცში მივდივარ მამულის მოსაველეად და ჩემს ალაგას შენ
უნდა იყო და ქარგალიც შენვე უნდა დაიჭიროო!

მამინ მამაჩემმა ხელება ცისკენ ალაპყრო და შესძახა:

— ღმერთო, ღმერთო! ნუ თუ წყალობის თვალთ გადმოხედე
ჩემ წვრილშვილს, შე მაღლიანო?!. ძლივს, შვილო, ძლივს! ვინც
შენ გიცნობს, ყველა იტყვის, რომ ღირსეულად დაუჯილდოებინარ.
ნათლიაშენს სამაგალითო შრომისა და ერთგულებისათვის.

წამოდგა და გულში ჩამიკრა.

— სტეფანეს უნდა უხაროდეს, მამაჩემო, სტეფანეს! რამდენი
ხანია მინდოდა მამა ქრისტეფორესთან გამეგზავნა სასწავლებლად
და ფული არა მქონდა.

დედაჩემმა არც კი გამათავებინა სიტყვა. წამოხტა და შეჰყვირა:

— სტეფანე არსად წავა! მე არ მინდა რომ ეგეც ღვთის მგმო-
ბელი გამოვიდეს! არ მინდა, არა!

ამ სიტყვებზედ მამაჩემს ფერი ეცვალა. უცბად შემოტრიალდა,
დედისკენ მიიწია და გაბრაზებით უთხრა, ხრინწიანი ხმით, თითქო
აღზობენო:

— შენ არ გინდა?! მე მინდა! გეყურება? მე! მე! ვინ არის აქ
სახლის პატრონი და უფროსი? შენ არ გინდა? მე მინდა! შენს საუკე-
თესო შვილს ის უხარია, ჩემს ძმას ვასწავლო, კაცად გამოვიყვანო და
შენ კი მაღლობასაც არ უხდი! შენ შენი ნიკო და ლიზა გირჩევნია,
განა?! რომელთაც აღარც კი ვახსოვართ, რომელთაც ვეთაკილებით
და ვეზიზღებით! შენ ისინი გირჩევნია განა?! ლუკმას არ მოგვაწოდებ-
ენ, შიმშილით რომ ვწყდებოდეთ! შენ ისინი გირჩევნიან, განა!..

ისე გაჯავრდა, რომ ყველანი კანკალმა აგვიტანა. დედაჩემი ბუხართან ატუზულიყო და ხმის ამოდებას ველარა ბედავდა. ნელი ნაბიჯით მიუახლოვდა მამა, თვალი გაუშტერა და უთხრა:

— შე უღმერთო, შენა! ერთი სიტყვა რა არის, ერთი სიტყვაც კი გშურს შენი შვილისთვის, რომელიც შენც გაცხოვრებს და ამოდენა ოჯახსაც.

მაშინ კი დედაჩემმაც გულში ჩამიკრა და დაიწყო:

— განა არ ვიცი, რომ კარგი შვილი მყავს!.. გულკეთილი და ოჯახის ერთგული...

ხომ იმოდენა უსიამოვნება მახსოვდა დედიჩემისაგან და ვგრძნობდი, რომ მაინც ვუყვარდი. ბავშვები ტიროდნენ. მამაჩემი კი იდგა ისევ ისე აღშფოთებული, ფერმიხდილი და საშინელი თვალით დასცქეროდა დედას. ბოლოს მოვიდა, ხელი მტაცა და თავისკენ გამოტაცა:

— მოდი, ერთხელ კიდევ გაკოცო, ჩემო იმედო! ვისაც შენისთანა შვილი ჰყავს, იმას საშიშია და საწუხარი აღარა აქვს რა.

და ქვითინი დაიწყო. დედაჩემი ბუხართან იჯდა და რალსაც მოსთქვამდა, ისე რომ სიხარულის ნაცვლად ჩვენს სახლში ტირილი-ღა გაისმოდა.

ბოლოს როგორც აყო დამშვიდნენ ყველანი. მამაჩემმა პირი დაიბანა, საკვირაო ტანისამოსი ჩააცვა და მიტხრა:

— დღეს აღარ ვიმუშავებ. მოდი, მიშელ, ნათლიაშენთან ჩავიდეთ. მინდა მადლობა გადავუხადო ჩემს მეგობარს და კეთილისმყოფელს. რა კარგი ვქენ, რომ იმას მოვანათლვინე ჩემი ბიჭი! სწორედ ღვთის განგება იყო, ღვთისა!

გზაზედ თოვლი მოყინულიყო და მამაჩემი ძლივს მოდიოდა, თუმცა ხელი ჩემს მხარზედ ედო და თავს ისე ამაგრებდა. თვალები უბრწყინავდა. სულ იმას გაიძახოდა: დიდი ბედნიერება მომივიდა, რომ ივანე ავირჩიე შენს ნათლიადაო. დაინახა თუ არა ნათლიაჩემი, შორიდანვე დაუყვირა:

— ივანე! მადლობის გადასახდელად გიახლები!

ნათლიაჩემი წინ გამოეგება და ძალიანაც ესიამოვნა ჩვენი მისვლა. მივუსხედით გაჩაღებულ ბუხარს და საღამომდე მხიარულად ვლაპარაკობდით ჩვენს საქმეებზედ, მოსავალზე, ნათლიაჩემის ახალ მამულებზე და საერო კრებაზედ. ვახშმადაც აღარ გაგვიშვეს. კარგადამე გასულიყო და ჩვენებს ყველას ეძინათ შინ რომ მივედით.

დადგა 1791 წ. სტეფანეს ლუტცელბურგში გერტრუდა არნოლდთან ვუშოვე ბინა, რომ სასწავლებლად მამა ქრისტეფორესთან ეარა და მართლაც ისე მშვენიერად სწავლობდა, რაც ხანი იქ იყო, რომ უკეთესი აღარ შეიძლება.

ნათლიაჩემმა ამ იანერის განმავლობაში უფრო გარკვევით გამაგებინა თავის სურვილი: გარდა ამისა, რომ სამშველდოს უნდა გავძლოლოდი, მევე უნდა ჩამეწერა დუქნის დავთარში, რასაც ვიყიდლით, ან გავყიდლით, რადგან ნათლი-ჯალაბმა წიგნი არ იცოდა. მევე მობარებდა სხვა ანგარიშებსაც, ისე რომ ერთი თვალი რომ გადაეელო, ყოველთვის ცხადად დაინახავდა თავის საქმეების მდგომარეობას.

დელაჩემს ჯერაც უკვირდა: როგორ გაბედა ჩემმა კაცმა, რომ ისე შემომიტიო? მაგრამ შეშინებული ველარას ბედავდა და ერთსლა გაიძახოდა:

— ეეჰ, მადლობა ღმერთს! თუ ერთი მატურიანიც დაეაყენეთ სადმე კარგ ალაგას, მერე კი აღარა გვიჭირს რა!

ამაზედ მეცა ვფიქრობდი, მაგრამ იმისთანა არეულობის დრო იდგა, რომ ვისაც შეძლება ჰქონდა რამე, უცნობ მოსამსახურეს ისე ერიდებოდა. როგორც მეგლს; ეგეც რომ არა ყოფილიყო, ვალენტინის წასვლის შემდეგ ძალიან ამაყად ვიყავ და როგორღაც მეჯავრებოდა, რომ ჩემი და სადმე მოახლედ მდგარიყო.

ჩენს ბედნიერებას აღარა აკლდა რა..

მაგრამ უბედურება სულ სხვა მხრიდან გვეპარებოდა. იმ წელს იანვარში და თებერვალში იმოდენა ხალხი გაიხიზნა, რომ გვეგონა, საფრანგეთში დიდებული აღარავინ დარჩებაო. „წითელი წიგნი“ მთელს ქვეყანას მოჰფინეს და იქ ჩანდა რა უღვთოდ ეფლანგათ ფული სახელმწიფო ხაზინიდან, რა სამარცხვინოდ ეძლიათ დიდებულთათვის პენსიები და საჩუქრები — 50 მილიონი წელიწადში, როდესაც უბედური ხალხი სახელმწიფო ხარჯს ველარ ასდიოდა და შიმშილითა წყდებოდა. მთელი ერი ზიზლით შესცქეროდა დიდებულთ და ისინიც იძულებულნი იყვნენ გახიზნულიყვნენ; გზას ველარ აუქცევდით, ისე იყო გაბმული იმათი ეტლები ყველა გზაზედ; დამე რომ ქალაქის კარს მიადგებოდნენ და დაკეტილი დახვდებოდათ, გარშემო უვლიდნენ, ტყუილად დრო არ დაეკარგოთ, ვიდრე მეკარე კარს გაგვიღებსო. იმდენნი გადიოდნენ საზღვარგარეთ, რომ ბოლოს პატრიოტებიც შეაფიქრიანა ამ გარემოებამ.

საერო კრებაზედ პასპორტის შესახებ ატყდა ბაასი. მირაბო ამტკიცებდა, სირცხვილია კაცს ან წასვლა დაეუშალოთ ან მოსვლაო;

მაგრამ პასპორტების გაუქმება მაინც ვერ მოახერხეს და ხალხს ერთგული მილიცია ყველა მიმავალს ეკითხებოდა, რად მიხვალთ ქაღალდს? ან ტურინსაო? და როდესაც მიმავალნი გაჯიუტდებოდნენ და პასუხის მიცემას არ ინებებდნენ, დარაჯები დაემუქრებოდნენ: გვიპასუხეთ, თორემ ამ ქალებს დავაპატიმრებთ და ვნახოთ მართებლობის განკარგულება რას იტყვისო. უნდა გენახათ რა უეცრად შეიცვლებოდა ხოლმე დიდებულთა სახის გამომეტყველება: ერთ წამს წინად განრისხებული და მუქარის მფრქვევი თვალები უცბად მოკრძალებით და ვედრებითა გამოიყურებოდნენ; დიდებულნი, რომელნიც წინად სალამსაც არ აღირსებდნენ ამ ხალხის შვილთ, დღეს ხელს ართმევდნენ, „ჩემო კეთილო მეგობაროო“, უძახდნენ და იქვე პატარა ღუქანში ხალხის სადღეგრძელოსა და გამარჯვებას სვამდნენ. სიცილად არა ჰყოფნიდათ მილიციელებს ეს თინთლიბაზობა, მაგრამ ბოლოს თავს დაანებებდნენ ხოლმე და გზას დაულოცავდნენ:

— ღმერთმა კეთილი მგზავრობა მოგცეთ, ბატონებო!

რას იზამთ? ფრანგებს ყოველთვის გვიყვარდა ხუმრობა და, რაც უნდა გაჭირვებაში ჩავარდეთ, ჩვენ მაინც გულს არ ვიტეხავთ და ვხუმრობთ.

ბერებიც თავისას არ იშლიდნენ, რასაკვირველია, და ყველგან იმასა ქადაგებდნენ, ვინც დაიფიცა, ღვთისა და ერის მტერია ყოფილაო. ალზასში 1500-მდე კაცი მოგროვილიყო, დაეძახნათ — ჩვენა ვართ ნამდვილი კათოლიკენი... ვინც კაცია გაბედავს და იმ მღვდელს გადააყენებს, რომელმაც არ დაიფიცაო! დადიოდნენ და ყვიროდნენ:

— თავად არტუას გაუმარჯოს!

საერო კრებამ თავისი გამომძიებელი გამოგზავნა — გაიგე, რა უნდათო? ისინი კი უფრო გათამამდნენ და ყვირილი დაიწყეს:

— ჩამოვახჩოთ გამომძიებელიო!

მოთავედ თავადიშვილები ჰყავდათ. რაკი ნახეს სტრასბურგელმა პატრიოტებმა, ძალიან თავს გავიდნენო, ხალხი წაიყვანეს და ისე გაჰვანტეს, რომ მათი ხსენებაც აღარ დარჩენილა.

მეთვის მომხრე გაზეთები უცხოელი ჯარების შემოსევას გვემუქრებოდნენ.

სარგემინისკენ მიმავალი ცხენოსანი რაზმი ფალსბურგში რომ შევიდა, ხალხში ხმა გავარდა, ეს რაზმი ერის წინააღმდეგია და ბრძოლა ატყდება თუ არა, მაშინვე მტერს მიუდგებაო. ფალსბურგში მყოფთ ჯარისკაცთ რამდენიმე ცხენოსანისთვის აღვირი დაეჭირათ და ეთხოვნათ, დაიძახეთ: „თავისუფალ ერს გაუმარჯოსო!“ მაგრამ ცხენოსანთა რაზმს ხმალი ეშიშვლა და ცხენებისათვის გაეტანებინა ფალსბურგელები. საავადმყოფოში დაჭრილები და დაშავებულები ვეღარ

ეტოდნენ. ცხენოსანთ იმით ესარგებლათ, რომ ფალსბურგელები უიარაღოდ ყოფილიყვნენ და არავინ დაენდოთ. მიუხედავად ამისა მეფე ლუი XVI არამც თუ გაამტყუნა, მაღლობაც გადაუხადა ცხენოსანთ, რომელნიც შემდეგში, როდესაც მეფემ გაპარვა განიზრახა, თან ახლდნენ ავსტრიისაკენ მიმავალ მეფეს—ფალსბურგელ რაზმს კი დიდი საყვედური გამოუცხადეს; დასასჯელად სადღაც გადაიყვანეს და იმათ მაგივრად ის რაზმი ჩაგვიყენეს, რომელიც თავგამოდებული იყო მეფისა და დიდებულთათვის.

ძნელი წარმოსადგენია, რა აღშფოთებულნი იყვნენ პატრიოტები. რაც ხანი ჩვენში იდგა ის რაზმი, არც ერთს პატიოსან კაცს სალამი არ უღირსებია იმათ უფროსებისათვის. ჩვენი კერუ, რომელიც მილიციის სამხედრო ვარჯიშობაში გვშველოდა და იმასთან ერთად სხვა ათისთავეები თავის რაზმს გაჰყვნენ და დაერჩით ცარიელები. მიმავალნი სარბურგამდის მივაცილეთ და იქ ძმობა შეგვიცეთ ერთმანეთს.

სწორედ ამ დროს გაიპარნენ მეფის მამიდები და თან თორმეტი მილიონის ოქრო წაიღეს და სამი მილიონიც ვალები დასტოვეს: რა უშავს, სახელმწიფო ხაზინიდან გადაიხდიანო. მაგრამ გაპარვა ვერ მოახერხეს და ბურგონში რომ დაიჭირეს გაპარულები, შეშინებულებმა საერო კრებას წერილით გამოუცხადეს თავიანთი ერთგულება:

„ჩვენ საერო კრების და კანონის წინააღმდეგნი არ გახლავართ. ერთგულ მამულიშვილად გვიგულეთ თქვენი პატივისცემელნი და უმორჩილესი მოახლენი...“

საერო კრებამ ნება მისცა, საცა გენებოთ, იქ მიბრძანდითო. და თუმცა ნათლიაჩემი ძალიან ჯავრობდა, რატომ ხელშეკრულები არ მიიყვანეს პარიზშიო, მე ყოველთვის იმ აზრისა ვიყავი, რომ საერო კრებას საფრანგეთის ყველა კარები ღია უნდა ჰქონოდა მიმავალთათვის, ოღონდ კი ყველასათვის ეცნობებინა, რომ ვინც გაიხიზნება, სამშობლოში თავის დღეში ვეღარ დაბრუნდებაო.

მაგრამ ყველას თავისი აზრი ჰქონდა. დარწმუნებული ვარ, ლუი XVI რომ საზღვარგარეთ გასულიყო და გერმანიას შეჰკედლებოდა, ან ინგლისს, სწორედ იმდენს ყურადღებას მიაქცევდნენ, რაც უგანათლებულეს თავად არტუას. დარწმუნებული ვარ, რომ ის დიდებულნი, რომელნიც საფრანგეთიდან გაიხიზნენ, ძალიან ნანობდნენ და სულ იმას ნატრობდნენ, ნეტავი შეიძლებოდეს ჩვენი მიწა-წყალი ერთხელ კიდევ ვნახოთო! მეტადრე როდესაც დარწმუნდნენ, რომ წასვლა ადვილი იყო და დაბრუნება კი შეუძლებელი გაუხდათ.

საერო კრების ნებართვით ისარგებლეს მეფის მამიდებმა და

რომს წაბრძანდნენ. ის იყო და ის მას შემდეგ იმათი აღარავის რა გაუგონია.

დიდი არეულობა იყო პარიზში. ამას გაზეთებში ვკითხულობდით, რომლებიც შოველისაგან მოგვედიოდა. ხალხი ექვის თვალით უყურებდა დიდებულთ და ბერებს და სულ იმის შიშში იყო, ხაფანგში გაგვაბავენო. კამილ დემულენი, ბრისსო, ფერრონი და სხვანი, რომელთაც თავი განწირული ჰქონდათ და აღარაფრისა ეშინოდათ, ყველგან და ყოველთვის სიფრთხილეს ურჩევდნენ ხალხს:

— გაფრთხილდით! უცბად არ მოგვეპაროს მტერი! უმრავლესობა თქვენის დეპუტატებისა მტერს მიუდგა. ლეოპოლდი და ვალჰელმი შერიგებულან, რომ უფრო მეტი ჯარი შემოგვესიონ. ფთხილად იყავით! მზად იყავით! ეცადეთ, არ მოგატყუონ მტრებმა და არ მიგაძინონ!

ერთ დღეს წმინდა ანტონის უბნელებმა პარიზში მოინდომეს ვინსენის ციხის დანგრევა. ლაფაიეტი წინ გადაუდგა და იმდენი ეხვეწა, რომ ხალხი დამშვიდდა და დაიშალა. იმავე დღეს მეფის სასახლეში საიდანდაც ხუთასი შეიარაღებული დიდებული შეიპარა და როდესაც ჰკითხეს, რა გინდათო? უპასუხეს:

— მეფის უერთგულესი ქვეშევრდომნი ჩვენა ვართ და გვინდა გაჭივრებაში თან ვახლდეთო.

სასახლიდან მაშინვე გამოჩვეს და მეფე ლუი XVI გამოაცხადა, მე მეფის მცველ ჯარად მილიციის მეტი არავინ მინდაო. მიუხედავად ამისა ხალხი მაინც უნდობლად უყურებდა მეფეს და თვალს არ აშორებდა: არა გვიეშმაკოს რაო. ცოტახანს უკან ხმა გავარდა, მეფე შეუძლოდა ბრძანდება და ექიმს ურჩევნია, ჰაერი უნდა იცვალოს, სენკლუსს ჰაერი ძალიან მოგიხდებათო. მაგრამ შეიყარნენ ბაზრის დედაკაცები — ზოგი ხილითა ვაჭრობს, ზოგი თევზით, ზოგი ძველი ტანისამოსით — და შეევედრნენ: ნურსად წახვალ, თავს ნუ დაგვანებებო! ნეტავი ის მაინც ეფიქრათ იმ საწყლებს, თუ რას არგებდა იმათ მეფე, პარიზში იქნებოდა, თუ სენკლუსში? ასე ეგონათ, მეფე რომ წავიდეს, ქვეყანა დაილუპებო. იმას ხომ არა ფიქრობდნენ, რომ ხალხი კი ყოველთვის იშოვის მეფეს და მეფე თავის დღეში ვერ იშოვის ხალხს, თუ თავისი დაჰკარგა. მაგრამ რა? ყველაფერს ერთად ვერ მიხვდება კაცი.

მარტის გასულს ნათლიაჩემი თავის მამულში წავიდა პიკოლცში და სამჭედლოში მე და ახალი ქარგალი სვიმონ ბენროტილა დავრჩით. თითქმის ყოველ დღე წვიმდა; წვრილმანი საქმე არაფერი გვექონდა, რადგან ჯერ გზები არ ვარგოდა და მგზავრებიც ბევრი არავინ იყო; ვიდრე და ფალსბურგის ეკლესიის მოაჯირს ვაკეთებ-

დით; დღესაც ნახავთ ჩვენს გაკეთებულს მოაჯირს, აივანზედ რომ ახვიდეთ. რაკი გავათავეთ, მე ყოველ დღე ფალსბურგს ჩავდიოდი მოაჯირის გასამართავად და სვიმონი შინა მუშაობდა.

სწორედ იმ დროს მოუვიდა ბრძანება ჩვენგან შექმლებულ რაზმს, რომელიც ფალსბურგს იდგა, ისევ ქ. მეცს უნდა გადახვიდეთო. ამბობდნენ, გენერალი ბულიე რაღაცას აპირებს და უნდა მეფის ერთგული ჯარები სუყველანი თავისთანა ჰყავდესო. იმ რაზმის მაგივრად ჩვენს ქალაქში ოვერნელი რაზმი გადმოიყვანეს, რომელიც ერის ერთგულად ითვლებოდა და ყველასაგან პატივცემული იყო. ამერიკის განთავისუფლების დროს დიდად ისახელა თავი ოვერნელმა რაზმმა და ნანსში რომ არეულობა მოხდა, პირდაპირ გამოაცხადა: ჩვენ ჩვენების წინააღმდეგ ვერ წავალთო! კლუბში დიდი ქებით მოახსენია ოვერნელი რაზმი ელოფ კოლენმა; გვიამბო, რამდენი გამარჯვებით უსახელებია მას თავი და შემოვიდნენ თუ არა ფალსბურგში, ხალხი წინ გაეგება და ჯარისკაცებმა და ხალხმა ერთმანეთს ძმობა შეჰფიცეს.

მაგრამ ოვერნელებსაც ჰქონდათ თავიანთ უფროსებთან გასასწორებელი ანგარიშები და არ გასულა დიდი ხანი, იმისთანა ამბავი მოხდა, რომ დიდებულნი, თუ კი ტვინი ჰქონდათ და ფიქრი შეეძლოთ, ძალიან უნდა ჩაფიქრებულიყვნენ. საქმე იმაში იყო, რომ უფროსები, სულ დიდებული გვარიშვილი ყმაწვილი კაცები, უღმერთოდა სცემდნენ ჯარისკაცებს.

აპრილის დამდეგი იყო. ეკლესიაში ვიყავით მე და ორი დღიური მუშა, როდესაც უცბად ნალარის ხმა შემოგვესმა და ჯარის ფეხის ხმა. მაშინვე გარეთ გავედი. ოვერნელი რაზმი წყობისად ჩამოვიდა მოედანზედ, იქვე ეკლესიასთან გაჩერდა და გასწორდა. გადავხედე და ჩემს განცვიფრებას საზღვარი არ ჰქონდა: მთელს რაზმში უფროსთაგანი ერთი არავინ იყო. ისინი თურმე იქვე ყავახანაში ბრძანდებოდნენ და ქალაქსა თამაშობდნენ. ნალარის ხმაზე ისინიც გარეთ გამოცვივდნენ, ზოგი უქუდოდ, ზოგი უიარაოდ: წინამძღოლი, მარჯვ დეკურბონი, გაბრაზებული მივარდა თავის ჯარისკაცებს და — ეს რა ამბავიაო? — ეკითხებოდა. მაგრამ ნალარას ისევ ისე სცემდნენ და პასუხი არავინ აღირსა. რაზმიდან სამი მოხუცებული ათისთავი გამოჴოდა და რაზმის წინ დადგნენ. სამივე სულ მთლად გათეთრებული, მაგრამ ჯერ ისევ მაგარი კაცები იყვნენ და ისე ყოჩაღად ეჭირათ თავი, იტყოდით, ოცი წლის ბავშვები არიანო. მოედანზედ ხალხი იკრიბებოდა. ფანჯრებიდან ქალები იყურებოდნენ.

ნალარა დააყენეს. მაშინ ერთმა სამთაგანმა ჯიბიდან რაღაცა ქალღი ამოიღო, გაშალა და დაიყვირა:

— ათისთავო რავეტ, წინ წამოდექი!

რავეტი გამოვიდა და წინ გამოექიმა.

— ათისთავო რავეტ, ოვერნელმა რაზმმა შენ აგორჩია თავის წინამძღოლად.

იქვე ხეზედ მიაყუდა ახალმა წინამძღოლმა თავისი თოფი, ხმალი ამოიღო... ხელმეორედ დაჰკრეს ნალარა და რაზმმა თოფებით და მედროშემ თავისი ღროშით სამხედრო სალაში მისცა ახალ წინამძღოლს.

იმისთანა ჩემს დღეში არა მინახავს რა. რაზმის უფროსებს რომ გაებედნათ და ხმა ამოეღოთ, მთელი რაზმი მივარდებოდა და ცოცხალი აღარავინ გადურჩებოდათ. ეს რომ წარმოვიდგინე, თრთოლვამ ამიტანა. თავის-და საბედნიეროდ, უფროსები კარგად ხედავდნენ, რომ საქმე უკვე წაგებულ იქონდათ და ხმა ამოუღებელივ ისევ ყავახანაში შევიდნენ.

წინამძღოლის შემდეგ, რაზმმა წინამძღოლის ნაცვალი აირჩია, მერე მაიორები, კაპიტნები და ბოლოს ათისთავები. სამი საათი იყო, რომ ყველაფერი გათავდა და რაზმი ბინაზედ წასასვლელად ემზადებოდა. სწორედ იმ დროს გამოცვივდნენ ყავახანიდან რაზმის უფროსები და რაღაცის თქმას აპირობდნენ, მაგრამ ახალმა წინამძღოლმა დაასწრო.

— ბატონებო, ექვსი საათის შემდეგ აქ თქვენგანი აღარავინ იქნება!

მერე რაზმს მიუბრუნდა:

— ჩქარი ნაბიჯით მარცხნივ... იარეთ!

მეორე დღეს რაზმის დიდებული უფროსთაგანი ერთი აღარ იყო ქალაქში.

სამი კვირის შემდეგ, 24 აპრილს, საერო კრებამ წერილი მიიღო სამხედრო მინისტრისაგან, რომელშიაც აწერილი იყო, „აჯანყება ოვერნელი რაზმისა, რომელმაც განდევნა თავისი კანონიერი უფროსები, კერძო ამხანაგობად აღიარა თავისი თავი და თავის ამორჩეულთა გარდა უფროსად და მბრძანებლად აღარავინ მიიჩნია“. მე ესა და მრავალი სხვა სიცრუე იმ დროინდელ გაზეთებში წავიკითხე. ვისაც მართალი ნებავს, მართალიც ეს არის, რომ ოვერნელი რაზმის ჯარისკაცი ხალხისკენ იყვნენ; მოსწყენოდათ თავხედური ქცევა თაყიანთ უფროსებისა, რომელთაგან უდიერი ცემა-ტყეპის მეტი არა ახსოვდათ რა; გარდა ამისა, რად გვინდა იმისთანა უფროსები, რომ ბრძოლის ველზე გვიღალატონ და მტერს მიუდგენონ, — იძახდნენ. მიუხედავად იმისა, რომ სამხედრო მინისტრი ისე უჯავრდებოდა ოვერნელის რაზმს, ბევრმა სხვა რაზმმა ჩაიღინა იგივე და მთელ

ჩვენს ჯარს რომ ოვერნელებსთვის მიეხაძნა, მაშინ აღარც იმისთანა გენერლები გვეყოლებოდა, რომელნიც ცდილობდნენ თავიანთი ჯარი საერო კრების წინააღმდეგ წაეყვანათ, ან ბრძოლის დროს მტერს მისდგომოდნენ.

რამდენიმე დღის შემდეგ, ერთ კვირა დღეს ნათლიაჩემიც მოვიდა. ყველაფერი რიგზედ დახვდა და ძალიან კმაყოფილი იყო. ლიქს-ჭეიმიდან გაზეთები მოიტანა და იქიდან გავიგეთ, რომ მირაბოს თქვენი ჭირი წაელო; რომ მეფე-დედოფალი და კარისკაცი ძალიან სწუხდნენ მის გარდაცვალებას; რომ საერო კრებამ მის გარდაცვალებისა გამო დაადგინა: ახლადაგებულ წმ. ენევიევის ტაძარში დაკრძალულ იქნენ სამშობლოს მასახელებელი შვილნი. კანონმდებელი კრება გადასწყვეტს, ვინ იქნება ღირსი ამ დიდებისა... ჰონორე მირაბო კრებამ ღირსადა სცნა ამ დიდებისა. ეს რომ წავიკითხეთ, შოველის მოწერილი მოგვაგონდა მირაბოს შესახებ და გაკვირვებულნი დავჩით.

იმავე გაზეთებში ეწერა, რომ ლუი XVI ძალიან მოწადინებული იყო სენკლუში გაეტარებინა რამდენიმე ხანი; მაგრამ რაკი მილიცია და ხალხი ეწინააღმდეგებოდა მის წასვლას, მეფე საერო კრების სხდომას დასწრებოდა და საყვედური ებრძანებინა: რად მიყურებთ აგრე უნდობლად? რა ნდობა უნდა ჰქონოდა ხალხს მეფისა, როდესაც სასახლე ყოველთვის გატენილი იყო დიდებულებით და ბერებით და პატრიოტი იქ ერთი არავინ შესულა თავის დღეში; მეფის მომხრე გაზეთებს გადასინჯავდით და სულ იმას ჩიოდნენ, ჯარში დისციპლინა აღარ არის, საერო კრება ქვეყანას ღუპავს, ხალხი და მოქალაქენი თავზედ დაგვახსნდნენო; წიგნებს იტყვიოთ და, ქვიშაზედ უმრავლესად მოჰფინეს პატარ-პატარა წიგნები საერო კრების და რევოლუციის საძაგებლად და საგინებლად, და იქამდის უსინდისონი იყვნენ, რომ ზოგს კამილ დემულენის თხზულებად ასაღებდნენ, ზოგს მარატისად, ზოგს მამა დიუშენისად, რომ უფრო მალე გაეცრცელებანათ და პატიოსანი კაცისთვის ჩირქი მოეცხოთ. ამოდენა სულმდაბლობის, ლაჩრობის, სიცრუის და ცილისწამების მნახველ ხალხს, გიჟი იქნებოდა, რომ რაიმე ნდობა შერჩენოდა მეფისა.

განა ვალენტინის სიტყვა და ბერების ქადაგება არა ემაროდა, რომ ბრმასაც კი თვალი აეხილა და დაენახა, ვინ უნდა ყოფილიყო ქვეყნის მოღალატე! არა, ერთს აღარა ჰქონდა მეფის ნდობა, ერთს! და ეს ჩვენი ბრალი კი არა, თავისი ბრალი იყო, თვით მეფისა და იმის დამღუპველ მრჩეველებისა. ვისაც ხალხის ნდობა უნდა, აშკარად და პატიოსნად უნდა მოქმედებდეს; წინ ქვეყნის მატყუარა თინთლიბაზები არ უნდა გაისტუმროს თავის მაგივრად. თუ ერთხელაც არის

სიკრუე შეამჩნია ვისმე ხალხმა, ნდობის ალაგას უნდობლობა ჩნდებოდა და თან სიძულელიც.

რაკი ნახა ნათლიაჩემმა, რომ ყველაფერი რიგზედ იყო, მწოროდ დღეს ისევ თავის მამულში წავიდა. რამდენიმე დღის შემდეგ პაპმა პიი მეექვსემ საქვეყნოდ დასწყევლა ის მღვდლები, რომელთაც საფრანგეთის კონსტიტუციას ერთგულება შეჰფიცეს. იმათ არაფერი დააკლდათ ამით, მაგრამ საერო კრების მოწინააღმდეგენი კი უფრო გათამამდნენ. კორსის კუნძული ააჯანყეს; პარიზში კლუბის ფანჯრები ჩამტვრიეს. სამაგიეროდ პატრიოტებმა სახალხოდ დასწვეს პაპის ბრძანება, რომლითაც მღვდლებსა სწყევლიდა; ვოლტერის ნაშთი წმ. ენევიევის ტაძარში დაასაფლავეს; ეკლესიების ზარები გადაადნეს და ფული მოაპრევიენეს; უგანათლებულეს თავად კონდეს შეატყობინეს, დაბრუნდი თორემ აღარც რამე უფლება შეგჩება, აღარც მამულიო.

მაგრამ დამშვიდების მაგიერად უარესად გამძვინვარდნენ. ბრიკონტ-რობერში იმათი მომხრე ჯარისკაცები ღამე სახლში უცვივდებოდნენ პატრიოტებს და კაცსა და ქალს შეურაცხყოფას აყენებდნენ. ხალხი დეღავდა. ცხადი იყო, აუცილებლად უნდა შევბრძოლებოდით ერთმანეთს და ეს მით უფრო გვემძიმებოდა, რომ საიმედო წელიწადი იდგა და მოსავალს ძალიან კარგი პირი უჩანდა: ყვავოდა ჩვენი სოფელი, ყვავოდა ჩემი მარგალიტას ბაღი.

ერთსლა ვნატრობდით:

— რა ბედნიერები ვიქნებოდით, რომ დამშვიდებული ყოფილიყო ჩვენი ქვეყანა! განა ის არა კმარა ჩვენისთანა უბედურთათვის, რომ სიცივეც ჩვენ გვაწუხებს და შიმშილიც. როდესაც ღმერთი ჩვენზედ მოიცილას ხოლმე და განრისხდება! წლეულს მაინც თავი დაგვანებონ, ძლივს ღმერთმა წყალობის თვალით გადმოგვხედა! ნუ თუ წლეულსაც ვერას გავხდებით და ჩვენს მოსავალს პრუსიელებს და ავსტრიელებს გაათელინებენ ჩვენი მოღალატე ძმები?!

ერთ დილას ხმა გავარდა, მეფე გაიპარაო: მთელი შამპანი და მესხენი მილაციელებით გაივსო; ყველა გზაზედ და ბალიკზე დარაჯები დგანან და გაუსინჯავად არავისა სტოვებენ; ყველგან ზარსა რეკენ და ნაღარას უკრავენ, რომ ხალხს აცნობონ მეფის გაპარვა... ვინც იმის კვალს იპოვის, საშვილიშვილოდ გაკეთდებაო. ეს ამბავი ჩვენში სამმა აღზასელმა მოიტანა, რომელნიც სარბურგიდან მოდიოდნენ. შორიდანვე ყვირილი დაიწყეს იმათმა ცოლებმა:

— შენ იყავ ჩვენი შემწე, წმინდაო ღმერთო!.. დავიღუპენით, დავიღუპენით, ხალხო!

კაცები კი, რაც შეეძლოთ, ცხენებს ჰოერეკებოდნენ.

— რა მოხდა, მდეგარი ხომ არ მოგდევთ?

— ქაჯს ჯაჭვი დაუწყვეტია! — დამიყვრა სიცილით ერთმა, ჩომელიც, ეტყობოდა, ნასვამი იყო... ბოლოს ქალმა დამიძახა სასოწარკვეთილებით სავსე კილოთა:

— მეფე გაპარულა!

ცოტა ხნის უკან ორმოცამდე კაცმა გაირბინა ჩვენი ღუქნის წინ; ქალაქში ყოფილიყვნენ ბაზარში და ახლა თავიანთ სოფლებსაკენ გარბოდნენ, რომ მეფის გაპარვა ეცნობებინათ. იმათგან გავიგეთ, რომ დედოფალი და ბატონიშვილიც თანა ჰყავსო.

მაშინ კი მეც გავბრაზდი მეფეზედ. მანამდე, რაც უნდა გამეგონა, ან წამეკითხა, არა მჯეროდა და სულ იმას ვიძახდი, — შეუძლებელია, ფიცს როგორ გასტეხს-მეთქი? თრთოლამ ამიტანა, ჩაქუჩი კედელსა ვტყორცნე და დავიძახე:

— მოგვატყუა! მოგვატყუა იმ შერცხვენილმა, იმან!

მაგრამ მალე დავმშვიდდი და რადგან ღუქნის წინ დიდძალი ხალხი მოგროვილიყო, მეც იმათთან გავედი და ვუთხარი:

— მეფე იმითომ გააპარა, რომ კობლენცს გავიდეს და ჩვენი მტრები მოსძებნოს. გერმანელი ჯარი მზად არის და ჩვენს მეფესღა ელის, რომ საფრანგეთს შემოესიოს; ვილჰელმმა და ლეოპოლდმა უიმისოდ შემოსევა ვერ გაბედეს, რადგან ეშინოდათ, ხალხმა მეფეზედ არ იყაროს ჩვენი ჯავრიო და ახლა, რასაკვირველია, აღარას დაერიდება.

ნათლიაჩემი რომ იქ ყოფილიყო. მაშინვე ნაღარას დააკრევი-ნებდა და მილიციას გაიყვანდა გზის შესაკრავად, მაგრამ არც ის იყო შინ, არც ლეტუმიე და არც სხვანი: სულ მინდორში იყვნენ. მე ეს უფრო მაწუხებდა... ეხლა რომ მომაგონდება ხოლმე, სიცილი წამსკდება; მაშინ კი ასე მეგონა ჩვენს მეტი გზაზედ არავინ გავა-მეთქი. იმას ხომ არა ვფაქრობდი, რომ ათასობით იყო გასული ხალხი და მილიცია გზების შესაკრავად; გარდა ამისა, რალა სტრასბურგზედ წამოვიდოდა მეფე, როდესაც ბელგიისკენ ან ქ. მეცისკენ უფრო მოკლე გზა არის და სამზღვარს უფრო მალე მიაღწევდა? რას იზამთ, რომ საყმაწვილე აჩქარებულა!

ყველანი ხედავდნენ, რომ მეფე წასული იყო ჩვენი მტრების შემოსაყვანად და ჩვენი ქვეყნის ასაოხრებლად. მტერიც აღარ დაიგვიანებდა, რაკი მზად იყო და შემოგვესეოდა. ეს იმისთანა რწმენად გახდომოდა დიდსაც და პატარასაც, რომ თვით საერო კრებასაც კი უეჭველ ჰეშმარტებდა სწამდა და მეორე დღეს დილით, 25 თიბათვეს ყველგან — ეკლესიების და სამამასახლასოების კარებზედ და, ასე

გასინჯეთ, დუქნებშიაც კი გაკრული იყო დადგენილება საერო კრებისა, რომ ყველას წაეკითხა და მზად ყოფილიყო სადარაჯოდ. ჩვენსა ეს დადგენილება თვით ნათლიაჩემმა მოიტანა პიკოლციდან, თითონვე გააკრა დუქანში და თან საშინელი სიტყვითა ლანძღავდა მეფესა და დედოფალს.

21 თიბათე 1791.

„ს ა ე რ ო კ რ ე ბ ა მ დ ა ა დ გ ი ნ ა :“

მუხლი 1. ერის მცველი ჯარი მთელს სამეფოში იარაღქვეშ იყოს და ბრძანებას ელოდეს.

მუხლი 2. თემები: ნორი, პადეკალე, ყურა, ზემო და ქვემო რეინი და გერმანიის მოსაზღვრე მხარე ქულზედ კაცს გამოიყვანენ, თუ საჭიროებამ მოითხოვა.

მუხლი 3. სხვა თემები 2-3 ათასს კაცს გამოიყვანენ.

მუხლი 4. ყოველი მამულიშვილი, თუ ისურვებს სამშობლოს დახმარებას, მილიციაში ჩაეწერება.

მუხლი 5. მილიციის ჯარისკაცები რაზმებად იქნებიან განაწილებულნი; რაზმში ათი წყობა იქნება, წყობაში ორმოცდაათი კაცი.

მუხლი 6. წყობის უმფროსად იქნებიან კაპიტანი და ორი იმისი ნაცვალი.

მუხლი 7. რაზმის უმფროსად იქნებიან წინამძღოლი და ორი იმისი ნაცვალი.

მუხლი 8. უმფროსს და იმის ნაცვლებს თითონვე ამოირჩევენ რაზმი და წყობა.

მუხლი 9. ჯამაგირი მიეცემათ მილიციელს ღდემი ერთი წილი — ერთი აბაზი; ნადარის დამკვრელს — ერთნახევარი; სურსათის გამგეს — ორი; კაპიტანის ნაცვალს — სამი; კაპიტანს — ოთხი; რაზმის წინამძღოლის ნაცვალს — ექვსი; წინამძღოლს — შვიდი.

მუხლი 10. როდესაც მილიციელების სამსახური საჭირო აღარ იქნება, ჯამაგირი აღარ მიეცემათ და დაუყოვნებლივ დათხოვნილ იქნებიან.

მუხლი 11. დაუყოვნებლივ შედგენილი იქნება სახელმძღვანელო წესდება ჯარისთვის.

სიტყვასიტყვით გადმოგიწერეთ ეს დადგენილება, რადგან მამინ პირველი იყო ქულზედ კაცის გაყვანა და რაც შემდეგში რესპუბლიკა გამოჩენილმა გენერლებმა ასახელეს, სულ ამ დროს დაეწყოთ სამსახური, დაუსვენებლივ ებრძოლათ მტერთან და ათჯერ და ოცჯერ კი არა, ურიცხვოდ მრავალჯერ დაემარცხებინათ გამოჩენილი მხედართმთავარნი ფრიდრიხისა, ფრანსუასი, პავლესი, ვილჰელმისა.

და ალექსანდრესი. სულ კი უბრალო გლეხკაცის შვილები იყვნენ! დამარცხებულნი სულ დიდი გვარიშვილნი იყვნენ, დიდებულ წინაპართა დიდებული შთამომავალნი და გამარჯვებულნი კი გლეხკაცები, გლეხკაცის შვილები, რომელნიც მარტო საერო კრებამ აღიარა აღამიანად. როგორ იცვლება ყველაფერი წუთისოფელში!

ეს დადგენილება ცხადად გაჩვენებთ, რა ნდობის თვალით უყურებდა საერო კრება ჩვენს მეფეს, რადგან ხალხი მტრის წინააღმდეგ კი არა, მეფის დასაჭერად გაჰყავდა, არ გაგვეპაროს და მტრებს არ შემოუძღვესო! რაკი მეფე საზღვარს გასცდებოდა, მერე შიში აღარაფრისა ჰქონდა და იმისთანა ლაშქარს წამოასხამდა, რომ საუკუნო მონებად გაგვხდიდა ჩვენცა და ჩვენს შთამომავალთაც. მაგრამ ღმერთი სამართლიანია! ღმერთი ხალხისა და კონსტიტუციისაკენ იყო და არა ბერებისა და სასახლისაკენ და საქმე სულ სხვაფრივ დატრიალდა. ღმერთი, იმისმა მადლმა, თორემ რაც იმათ ეშმაკობა ჩაიდინეს, რაც იმათ მახეები გვიგეს და ორმო გვითხარეს, განა ჩვენ იმათ ვაჯობებდით! იმისთანა სიფთხილით გაეპარებინათ მეფე, ისე მოემზადებინათ ყველა, რომ უთუოდ უნდა გაგვეპაროდა, ღვთის განგება რომ არ ჩარეულიყო საქმეში. ერთმა საწყალმა ფოსტის მოხელემ, პატრიოტმა დრუემ კი გააკავა დიდებული მეფე და ისევ პარიზისკენ დააბრუნა. საზღვარიდან ერთი საათის სავალზედ დიოქირეს, სოფელ ვარანში. გენერალ ბულიეს მეფის გასაყვანად ცხენოსანი ჯარი გამოეგზავნა. დრუემ რომ ნახა, ძვირფას პატიმარს წამართმევინო, ბოგირზედ ურემი ჩახირა და მით შეაჩერა მომავალი ცხენოსნები. დიად, ღვთის განგებამ სხვაფრივ განსაჯა ეს საქმე.

მეფის გაქცევაც და დაჭერაც დაწვრილებით იყო აწერილი გაზეთებში. ჩვენი დუქანი ხალხით გაივსო, რომ გაიგეს, დაუჭერიათო. შინ რომ ვეღარ ეტეოდნენ, გარეთ იდგნენ ფანჯრებთან, კარებთან და ეზოში. ქუჩაც კი სავსე იყო ხალხით. ნათლიაჩემმა მიბრძანა, დაზგაზედ აღიო, და მეც ვიდეგი და მაღალი ხმით გკითხულობდი გაზეთებს. რომ წავიკითხე, დრუეს დაუჭერია-მეთქი, ერთხმევ შეპყვირა იმოდენა ხალხმა:

— თავისუფალ ერს გაუმარჯოს!

მაგრამ მეფის გაპარვამ ისე ააღელვა ხალხი, როგორც გენერალი ბულიეს წერილმა, რომელიც საერო კრებისათვის გაეგზავნა, როდესაც მეფე საღსალამათი პარიზში მიებრძანებინათ. წერილი და რა წერილი! საერო კრებას და მთელს ერს ემუქრებოდა ის თავხედი, დაგვენბდით, თორემ მთელს ევროპას შემოგისევთო. აი თქვენი თვალითა ნახეთ! მთელი წერილი რა საჭიროა და იმ ადგილებს კი ამოვწერ, სადაც ცხადადა ჩანს ღალატი:

„ლუქსემბურგი 25 თიბათვის 1791. დიდებულ მეფეს უქმად ჩაუარა ამ ცდამ. უნდოდა ბორკილი დაემტვრია, მაგრამ ბრმა ბედმა, რომელიც განაგებს სახელმწიფოთა ცხოვრებას, უმუხ-თლა და კვლავ თქვენს ხელში ჩააგდო“...

ხედავთ, რა ლექსით იწყებს? დაუჟვირდით ამ სიტყვებს: „ბრმა ბედმა, რომელიც განაგებს სახელმწიფოთა ცხოვრებასაო“. ვაშ ყვე-ლაფერი ბედზედა ყოფილა! მაშ ღმერთი არა ყოფილა!? განა ცხა-დი არ არის, რომ დიდებულთ ღმერთი არა სწამებიათ! განა ცხადი არ არის, რომ უღმერთონი უღმერთოდ მოგვექცეოდნენ, ქრისტიანებს მონებად ვაგვხდიდნენ და სასაცილოდ გახდიდნენ მაცხოვარის მცნებას, რომლითაც ჩვენ ყველანი ძმანი ვართ და თანასწორნი... „გიყვარდეს მოკვასი შენი...“ დიად, ძალიან ვუყვარდით!

მაგრამ მაგას თავი დავანებოთ და ვნახოთ, რას გვეუქრება. ჯერ იწერება, მეფემ წასვლა ჩემი რჩევისამებრ გაბედა, რადგან გვინდოდა მონმედში გაგვეყვანა, სადაც მისი ერთგული ყმანი არიან შეკრებილნი; რაკი თავს დაგახწევდათ, ბრძანებას გასცემდა, რომ-ლითაც საერო კრება დაშლილად ჩაითვლებოდა; მის მაგიერ ახალ კრებას მოუწოდებდა თავის გუნებისად და იმ ახალი კრების დად-გენილებით დაგვიბრუნებდა დიდებულთ ყოველ უპირატესობას, რაც კი როდისმე გვქონია...

წერილს ასე ათავებს:

„დამიჯერეთ, თქვენგან შობილი გველი არა მარტო ჩვენს ჰეფეს, მთელი ქვეყნის მეფეებს ემუქრება. ისინიც ძალიან კარგად ხედავენ ამ მუქარას და უკვე ემზადებიან. რომ ყვე-ლანი ერთად და ერთ ღროს შემოესივნენ ჩვენს ქვეყანას. მე კარგად ვიცნობ ჩვენს სამხედრო ძალ-ღონეს; ჩვენს მდგომარეობაში მარტო გიყვარდითა რაიმე იმედი იქონიოს. შემოვ-ლენ უცხოელი ჯარები და ისე დაგსჯიან, რომ თქვენი სასჯე-ლი საშაგალითოდ დარჩეს მომავალთათვის. აქამდე მებრალე-ბოდით, მაგრამ თქვენ ისე იქცევით, რომ მე მარტო ამგვარადლა შემიძლიან თქვენთან ლაპარაკი. მე ფე-დე-დო-ფა-ლი თქვენს ხელთ არიან, მაგრამ იცოდეთ, მთე-ლი ქვეყნის ხელმწიფენი თქვენ გაზღვე-ვინებენ, თუ მათ ავნეთ რამე. პარიზში ქვა-ქვაზედ აღარ დარჩება, თუ გაგიბედნიათ და მე ფე-დე-დო-ფლისთვის ერთი ბეწვი დაგი-კლიათ თმიდან. მე გზები კარგად ვიცი, უცხო-ელ ჯარებს მე შემოუძღვები. ეს წერილი წინა-მორბედია ევროპის ხელმწიფეთა მანიფესტისა. ისინი უფრო

გარკვევით გაგაგებინებენ, რომ თავიდან ვერ აიცილებთ ომს, რომელმაც ბოლო უნდა მოუღოს ჩვენი ქვეყნის წარყვანას. ნახვამდის, ბატონებო!”

ამაზედ მეტი რაღა გნებაეთ? მეფე-დედოფალს რომ დამართო-დათ რაჲმე, ჩვენ უნდა გვეზლო მთელ ქვეყნის მეფეებისთვის. ბუ-ლიემ კარგად იცოდა ჩვენი სამხედრო ძალ-ღონე, კარგად იცოდა გზები და თვითონ შემოუძღვებოდა მტერს თავის სამშობლოში და პარიზში ქვას ქვაზედ აღარ დასტოვებდა!

სალამოზედ მამაჩემს წავუყითხე ეს წერილი და კინაღამ თავისი დაემართა, ისე ეწყინა. თავში ხელი შეჰოიკრა და შეჭყვირა:

— ღმერთო, ღმერთო! ნუ თუ შენი გაჩენილია ის სამშობლოს მოღალატე! ჩემმა ნიკომაც კარგად იცის გზები... რომ იკაღროს და მტერს შემოუძღვეს... არა, ღმერთმა მაგ დღეს ნუ მომასწროს!

— ეჰ, მამაჩემო! შენ გეზიზღება ეგ საქციელი... შენ ხომ დიდებუ-ლი არა ხარ! აბა შენც მეფისაგან დანიშნული გენერალი იყო; დიდი პენსიები გქონდეს და წარჩინებული, სახელოვანი კაცი იყო! ერთი საწყალი გლეხკაცი ხარ, რომელსაც ტანჯვის მეტი არა გახ-სოვს რა. რა არის შენთვის სამშობლო? რის მაქნისია, რის მარგე-ბელი? შენ სამშობლოსაგან მზის შუქის მეტი არა მიგიღია რა და შენთვის ესეცა კმარა, რომ თავდავიწყებით გიყვარდეს იგი. შენ ვერც კი წარმოგიდგენია, რომ შეიძლება კაცმა თავის სამშობლოს უღალატოს! იმიტომ რომ გლეხკაცი ხარ! დიდებულთათვის კი სამ-შობლო იქ არის, სადაც მრავალი ყმა ეყოლებათ ყურმოჭრილი სა-ქონელივით დამონავეებული და თანაც მწყალობელი მეფე, რომ არც ჯილდოს აკლებდეს და არც პატივისცემას. ისინიც რომ იძულე-ბულნი იყვნენ ჩვენსავით ხნან და სთესონ ან მთელი დღე სადმე სამ-ქედლოში იაუშაონ და მეფე თავიანთი ნამუშევრით შეინახონ, მერ-წმუნე აღარც მეფის მომხრენი იქნებიან.

და მართალსაც ვამბობდი: მეფე რომ უკანვე მიიყვანეს და თავის სასახლეში შეაბრძანეს, ყველა დარწმუნდა, რომ იმის ბატონო-ბა უკვე გათავებული იყო და ძველებურად ველარ გაუბოძებდა აქეთ-იქით ძვირფასს საჩუქრებს; უნდა გენახათ, რამდენმა ერთგულმა დიდებულმა უმტყუნა მამინ მეფეს! უნდა გენახათ, რამდენნი გაე-პარნენ! დუნკერკში მდგომი რაზმის ყველა უფროსი ერთ ღამეს ავ-სტრიელებთან გადავიდა, ლილში მდგომ რაზმის უფროსებმა მოინ-დომეს ღამე მტრის ჯარისთვის კარი გაეღოთ, მაგრამ ჯარისკა-ცებმა და მოქალაქეებმა გაუგეს. საშინელ მდგომარეობაში ვიყავით; სულ იმას ვშიშობდით ამაღამ თავადი კონდე და მეფე ლეოპოლდი

შემოგვესევიან ასი ათასი კაცითაო. მთელი საფრანგეთი გაიძახოდა, ლუი XVI მეფობის ღირსი აღარ არისო, რადგან ფიცი გასტეხა და სამშობლოს მტერს მიუდგა... თუ ჩვენ მტერი გვყავს ვინმე, ყველაზედ უარესი მტერი თვით მეფე არის, რადგან ჩვენდა საწინააღმდეგოდ აპირებს მოხმარებას იმ ძალისას, რომელიც ჩვენ სამშობლოს დასაცველად მივანიჭეთო. ყველანი ვგრძნობდით, რომ მეფე საშინელ, მომაკვდინებელ მუწუჟად გადაგვექცეოდა და მუწუჟს მოკრა უნდოდა.

პარიზელი გაზეთებიდან ჩანდა, რომ იქაური პატრიოტებიც ამ აზრისანი იყვნენ. მაგრამ ვინ დაგვესვა ლუი XVI ალაგას? ზოგნი ამბობდნენ, მეფე გადავაყენოთ, იმის ალაგას ბატონიშვილი დაესვათო, და რადგან ჯერ პატარაა, თანახმად კონსტიტუციისა რეგენტი დაეუნიშნოთო; ზოგნი ამბობდნენ, მეფე არ გვინდა, ერთი კაცი ამოვირჩიოთ და კანონების ასრულება იმას მივანდოთო; სხვანი ამბობდნენ, რესპუბლიკა გვინდაო. მაგრამ იაკობელების კლუბში რობესპიერი ცეცხლს აფრქვევდა რესპუბლიკის წინააღმდეგ: საქმე საქმეა და არა სახელიო! თითონ უნდა ვარგოდეს, თორემ სახელი ვერ გააკეთებსო, იძახდა; განა არ შეიძლება ხელმწიფე გვყავდეს და დიდად ბედნიერნი და თავისუფალნი ვიყვნეთ? როგორადაც შეიძლება იმისთანა რესპუბლიკა დაამყაროთ, რომ მონობის დაღი დაგვასვათ ყველასაო! ფრერონი მარტო ლუი XVI გადაყენებას თხოულობდა: როგორც ჰკუზაზედ შეშლილი ჰკარგავს ყოველ უფლებას, ისე მეფე ლუის აღარავითარი უფლება არა აქვს ტახტზედ ბრძანდებოდესო. პეტიონიც რობესპიერის აზრისა იყო; ბრისსო, კონდორსე და თავადი ორლეანელი რესპუბლიკისკენ იყვნენ. მე კი მგონია, რომ იმ დროს რომ შესძლებოდა ვისმე და ლუი XVI ალაგას უგანათლებულესი თავადი ორლეანელი დაესვა, რესპუბლიკასაც დაიციწყებდა, თავის რესპუბლიკურ აზრებსაც და... სამშობლოს სამსახურისთვის მეფობასაც იკისრებდა; ოღონდ უნდა დაერწმუნებინათ კი, რომ ყველაზედ ძლიერი ის იქნებოდა, რადგან ჰკვიანი კაცი იყო და ძალიან კარგად ხედავდა, რომ მარატის, კამილ დემულენის და ფრერონის გადამკიდეს სამეფო ტახტზედაც კი არ ექნებოდა მოსვენება. მაგრამ ორლეანელი არავის მოჰგონებია: ჯერ რევოლუციურ საქმეებში გამოუცდელნი ვიყავით და უმთავრეს ყურადღებას იმას ვაქცევდით, რომ ხელსახოცივით ვცვლიდით ჩვენს მართებლობას: დღეს მეფე, ხვალ რესპუბლიკა, ზეგ სახელმწიფო შემდეგში დავრწმუნდით, რომ უმთავრესი გამოცვლა კი არა, მართებლობის შერჩენა ყოფილა.

აგერ სამი კვირა სრულდებოდა და საერო კრება ამ საგნის სჯავს

არ ათავებდა. ერთმა ნაწილმა საერო კრებისამ — ეპისკოპოსებმა და დიდებულებმა, რომელთაც მ ა რ ჯ ე ე ნ ა მხარეს ეძახდნენ, იუკადრისა მეფისა და დედოფლის ლანძღვა და გამოაცხადა: კრებაზედ ვივლით, მაგრამ აღარც რაიმე მონაწილეობას მივიღებთ და არც კანონიერად ჩავთვლით თქვენს დადგენილებასაო. ამ განცხადებამ თავისი გავლენა იქონია. მაგრამ რა? ბარნავი, ლამეთი და დიუპორი, რომელთაც „კრელებს“ ეძახოდნენ, რადგან ჩუმად სასახლეში დაიარებოდნენ და მეფეს ნუგეშსა სცემდნენ, წამდაუწუმ სიტყვას თხოულობდნენ, ლაპარაკობდნენ, ლაპარაკობდნენ და გარკვეულს კი არას ამბობდნენ. დრო გადიოდა... ბოლოს ხალხი მოთმინებიდან გამოვიდა და საერო კრებასა სთხოვა, მეფე გადააყენეთო. რამდენჯერმე მიმართა ხალხმა საერო კრებას ამ თხოვნით; მაგრამ ყურადღებაც არ მიაქციეს მათს სურვილს. აღელვებული ხალხი მარსის მინდორზედ მოგროვდა, რომ იქ, სამშობლოს საკურთხეველზედ ახალი თხოვნა დაეწერა, უფრო სასტიკი და მძლავრი; პარიზის მამასახლისმა ბ. ბაილიმ გზაში შეავიანა ისინი, ვისაც ეს თხოვნა კრებაში უნდა მიეტანა: ისინი რომ საერო კრების დარბაზში შევიდნენ, იქ უკვე დაედგინათ, რომ შეუძლებელია ვეფე სასჯელში იქნას მიცემული. რადგან იგი ღვთისაგან კუროხეული და, მაშასადამე, ხელშეუხებელი არისო. ეს ი მ ა ს ნ ი შ ნ ა ე დ ა, რ ო მ მ ე ფ ე ს შ ე ე ძ ლ ო ს ა ფ რ ა ნ გ ე თ შ ი პ რ უ ს ი ე ლ ე ბ ი და ა ვ ს ტ რ ი ე ლ ე ბ ი შ ე მ ო ე ყ ვ ა ნ ა. ქ ვ ე ყ ა ნ ა გა ე ნ ა დ გ უ რ ე ბ ი ნ ა და თ ი თ ო ნ კ ი ა რ ა ფ რ ი ს ა და ა რ ა ვ ი ს შ ი შ ი ჰ ქ ო ნ ო დ ა.

მაშინ დარწმუნდა ხალხი. რომ საერო კრება, მამა გრეგუარის, შოველის, რობესპიერის და სხვათა გარდა, სრულიადაც არ ასრულებდა იმ საქმეს, რომელიც მას ხალხმა მიანდო. ზღვასავით დღლავდა საფრანგეთი. კლუბებში ჭეჭა-ჭუხილი ასტეხეს ორატორებმა. ფერრონმა გამოაცხადა კორდელიერების კლუბში, რომ რევოლუციას დამატება უნდა, თორემ სრული არ არისო. პატრიოტებმა პირობა შეკრეს, მარსის მინდორზედ შეკრებულყვენ, ახალი თხოვნა შეედგინათ და რამდენიმე ათასი კაცისთვის მოეწეონებინათ ხელი.

საერო კრებას ძალიან ეჯავრა ეს გარდაწყვეტილება. რადგან ხედავდა, რომ ამის შემდეგ ან ის-ლა უნდა ყოფილიყო, ან ხალხი. ლაფაიეტმა და ბაილიმ ბრძანება მიიღეს: სასტიკად აღასრულეთ კანონი, რომლითაც ჯარის უმფროსმა სამჯერ უნდა სთხოვოს შეგროვილ ხალხს—დაიშაღენითო—და თუ სამჯერ თხოვნის შემდეგ არ დამორჩილდნენ, იარაღი უნდა იხმაროს და ისე დაფანტოს ხალ-

ხი. ამ ბრძანების ასასრულებლად დიდი ძალი ჯარი შეაგროვეს პარიზში.

მეორე დღეს დილაადრიანად გაეშურა ხალხი მარსის პოედნის-აკენ. სამშობლოს საკურთხეველში, სწორედ იქ, საიდანაც ორატორებს უნდა ელაპარაკნათ, ხალხმა ორი ჯამში იპოვნა დამალული. ორივეს თავები გააყრვეინეს, შუბზედ ააგეს და მთელი პარიზი შემოატარეს. ორ საათზედ ლაფაიეტი და ბაილი მოვიდნენ ჯარებით და სასტიკად ასრულეს საერო კრების ბრძანება; ზოგი ამტკიცებს ერთხელაც არ უთქვამთ ხალხისათვის დაიშალენითო; ზოგნი ამბობენ კანონისამებრ სამჯერ უთხრესო. უთხრეს თუ არ უთხრეს ეგ სულ ერთია, საქმე ის არის რომ დაერივნენ უიარაღო ხალხს და არც ქალი დაინდეს, არც ბავშვი, არც მოხუცა! ბევრი დახოცეს, ბევრი დააშავეს და დაასახიჩრეს. რა მადლობას ეტყოდნენ საერო კრებას მეფე-დედოფალი და გახიზნულნი! დიდებულნი და ბერები!

საერო კრების ბრძანებით იყო, რომ ჯარმა ხალხზედ პირველად იხმარა იარაღი. საერო კრების ბრძანებით იყო, რომ ხალხი ორად გაიყო და შემძლებელმა ნაწილმა მდაბიო ხალხს ბრძოლა აუტეხა. ამაზედ მეტი უბედურება განაღა იქნება რამე? ეს ბრძოლა ჯერაც არ გათავებულა და ამ დაუსრულებელი ბრძოლის ბრალია იმოდენა ომები და ბოლოს მტარვალის გამეფება.

ბაილიმ და ლაფაიეტმა ბრძანება გასცეს — კამილ დემულენი და ფრერონი დაიჭირეთო; ორივენი გაიქცნენ, მაგრამ მალე უკანვე დაბრუნდნენ; დაბრუნდნენ აგრეთვე მარატიც და დახოცილთა ნათესავები. საშინელება ყოფილა ძმათა შორის ბრძოლა! და კიდევ ეს ბრძოლა შეგვიძინა მეფე ლუი XVI გაპარვამ. ეს დასაწყისი იყო და დანარჩენიც თავის დროზედ მოჰყვა.

საერო კრებამ, რომელიც ისე ერთგულად ემსახურებოდა ხალხის განთავისუფლებას; კრებამ, რომელმაც ძმობა, თანასწორობა და თავისუფლება აღიარა; კრებამ, რომელმაც იმოდენი მოწინააღმდეგენი დაამარცხა; საერო კრებამ თავი შეიპოვებინა, როდესაც საქმე მეფეს შეეხო და ისიც რითი? მეფე ღვთისაგან კურთხეულია და მაშასადამე ხელშეუხებელია, რაც უნდა დამნაშავე იყოსო. სწორედ იმ აზრს დაადგა, რომელიც ეწინააღმდეგება გონებასაც, სამართალსაც და თვით საერო კრებისგანვე დადგენილ კონსტიტუციასაც. რომ დავუფიქრდები ხოლმე ამ გარდაწყვეტილებას საერო კრებისას, მაშინვე გონებრივი ძალის სისუსტე წარმომიდგება, მეტადრე როდესაც მას დიდი ჯამაგირი ეძლევა და ამ ჯამაგირისა გამო იძულებულია ხან შავი გაათეთროს, ხან თეთრი გააშავოს. ჩვენ-

და საბედნიეროდ, ამ წამხდარს, დაღალულს და შესყიდულს კრებას დიდი დღე აღარა ჰქონდა: კონსტიტუცია თითქმის მზადა ჰქონდათ და ახალი ამორჩევები უნდა მომხდარიყო.

VII

ძნელი წარმოსადგენია, რა გახარებულნი იყვნენ რევოლუციის მოწინააღმდეგენი, როდესაც გაიგეს, მარსია მინდორზედ ხალხი უხოციათო. იმათ სიხარულს საზღვარი არა ჰქონდა. ჩვენი კლუბის თავმჯდომარე დიდად პატივცემული მოქალაქე რაფიელ მანკი ამ ამბავზედ ისე შეშინდა, რომ სწორედ სამკლოვიარო სიტყვა სთქვა: „მარატის, ფრერონის, დემულენის და იმათთანვე თავზედ ხელაღებულ მეგაზეთეების ბრალია, რომ ხალხის სისხლი დაიქცაო... მაშ რას იზამდნენ, მეგაზეთეებს ყველანი ქვეყნის მოღალატედ გამოკყავდათ; ლათაიტს, ვაშინგტონის მეგობარს, სამშობლოს მტრობა დასწამეს, და ბაილის, საერო კრების თავმჯდომარეს უარესი უყვეს: სულ იმას დააბრალებს, რაც მოხდა, უცილობას და სისულელეს უკიჟინებდნენ... ღმერთმა დასწყევლოს მეგაზეთეები! შიგ ყურში ჩაბზუიან კაცს და აღარ მოასვენებენ, მანამ სულ არ გამოატყინებენ და ცხვირს არ წააკვრევიანებენ საღმეო“!

აი, როგორ ახსნა ჩვენმა თავმჯდომარემ ხალხის ხოცვა. ჩვენი გლეხები უფრო შორსა ხედავდნენ და თავიანთი სიხარულით ცხადად ამტკიცებდნენ, რომ აქ მეგაზეთეებისაგან კი არა, სულ სხვა მხრიდან მომდინარეობდა ყველაფერი.

იმავე დროს სოფლებში არჩევნები დაიწყო კანონმდებელ საერო კრების წევრების ასარჩევად. ხმოსან მამულიშვილთა სია გაციული იყო სამამასახლისოს კარებზედ; ჩვენ კი, ვინც დადებულ ხარჯს — სამი მუშის ფასს — არ ვიხდიდით, ჩვენ უხმონი ვიყავით, როგორც 1789 წ. და არჩევნების უფლება არა გვქონდა. განა ჩვენ კი არას ვიხდიდით? ღვინოს, არაყს, ლუღს, თამბაქოს რომ ხარჯი ედო, განა იმ ხარჯს ჩვენ კი არ ვიხდიდით? მშვიკრები ხომ არ დაწვხოცებოდით? მაგრამ ვინ იყო ჩვენი გამკითხავი? საცა სამართალია, სმაც ჩვენ უნდა გვქონოდა და ყოველი უფლებაც, რადგან მუშაობითაც და ნამუშევარის ხარჯვითაც ჩვენ უფრო მეტს სარგებლობას ვაძლევდით ჩვენს ქვეყანას. ვიღრე ის ძუნწები, რომელნიც არცა სჭამენ, არცა სვამენ და, აქაო და შეძლება აქვთო, ხმასა და მოქალაქობრივ უფლებასაც იმათ აძლევენ.

ერთი სიტყვით დიდი უსამართლობა იყო საფრანგეთის შვილთა ასე განაწილება — ეს ხმოსანი და ეს უხმონიო! ნათლიაჩემიც კი შეძრწუნდა, ეს რომ გაიგო:

— რას სჩადიან ჩვენი დეპუტატები! ისე იქცევიან, თითქო საქმის წახედნასა ცდილობენ! შეეცდითო, იტყვიან! მერმე ამოდენა პატრიოტებს რაღა პასუხს მისცემენ, რომ ყოველი უფლება მოაკლეს თუ თანასწორობას გაიძახოდნენ, არჩევანშიაც თანასწორობა უნდა შემოეღოთ.

არჩევნები მაინც და მაინც მოხდა და სულ მდიდარი, შემძლებელი კაცები აირჩიეს, რომელნიც დიდ ხარჯს იხდიდნენ ნაღდ ფულად. ყველაფერი ფულზედ იყო დამოკიდებული; სწავლა-განათლება, კვუა და პატიოსნება ფულს. უკან ჩამორჩენოდნენ; ფული ყოფილიყო, თორემ პატიოსნებას ვინა კითხულობდა?

ცოტა ხანს უკან, ის იყო ყანები გაიჭრა, შოველისაგან ამბავი მივიღეთ: კონსტიტუცია შევადგინეთ, მეფემ უკვე მიიღო იგი და პარიზში, ბევრი ბევრი, ერთი კვირა კიდეც დავრჩეო. დანიშნულ დღეს დილაადრიანად ჩავედით მე და ნათლიაჩემი ფალსბურგში. დილიჯანსი რვა საათზედ მოვიდა. მივეგებენით, სიხარულით და სიყვარულით გადავკოცნეთ შოველი და მარგალიტა. მაგრამ თქვენ უკეთ წარმოიდგინეთ, როგორ მიამებოდა მარგალიტას მოსვლა, მე არას ვიტყვი. ღმერთო, როგორ გაზრდილიყო? პატარა კი აღარ იყო! იმისთანა წარმოსადეგი, მშვენიერი რამ გამზდარიყო, იმისთანა კოხტა და მოხდენილი, რომ თვალი ზედ დაგრჩებოდათ. იგივე მარგალიტა იყო, შოველის მარგალიტა, მაგრამ ისე გამოცვლილიყო, რომ დილიჯანსიდან რომ გადმოხტა და შემომძახა: მიშელ! ვერკ კი ვბედავდი ჩემი ტლანქი ხელები მომეხვია და გულში ჩამეკრა. შოველი კი სრულიადაც არ გამოცვლილიყო, იტყოდით, აღზასში ან ლორენში ყოფილა, წიგნები გაუყიდნია და ახლა შინ მოსულაო. ძალიან მხიარულად იყო და სულ იცინოდა:

— დაებრუნდით, ჩემო ივანე, დაებრუნდით! საქმეც კარგად არის, ნუ გეშინიათ. ძალიან კმაყოფილი ვარ შენი, მიშელ: შენი წერილები ძალიან მასიამოვნებდნენ ხოლმე.

განა რომ გამეხარდებოდა იმათი ნახვა? მე ის მიკვირს, რატომ არ გავგიჟდი სიხარულით! წამოვიკიდე მარგალიტას მაფრაშა და გავწიეთ ჩვენი სოფლისაკენ; წინ უფროსები, უკან ჩვენ, მე და მარგალიტა.

მაფრაშა ნათლიაჩემის დარბაზში გამახსნევინეს, რადგან მარგალიტას პარიზიდან საჩუქრები მოეტანა და უნდოდა, მაშინვე გაეხარებინა ყველანი. ნათლი-ჯალაბისთვის ერთი კარგი თავშალი, ნიკოლისთვის სანემსე და ფოლადის ნემსები; ჩვენს სოფელში პირველად ვხედავდით მაშინ ფოლადის ნემსებს, მანამდე სულ ხის ნემსსა ვხმარობდით; მიშელისთვის ერთი კარგი უბის საათი, რომელიც

ეხლაც შენახული მაქვს და, თუმცა თითქმის არათერაპიული ღირს, ქვეყნის სიმდიდრეს მირჩევნია; აგერ აქა მაქვს ზანდუქში... დაძველებულია, მოშლილი, თავის დროზედაც ბევრს არას მისცემდა მარგალიტა... ან რად მინდოდა, ძვირფასი ნივთი რომ მოეტანა რამე? მარგალიტამ კარგად იცოდა, რომ იმისგან მოცემული, რაც უნდა ყოფილიყო, მე ძვირფას განძად მეჩვენებოდა, ჰოდა, ხომ მოშლილი და წამხდარია ჩემი ძველი საათი და, კარგი კაცი უნდა იყოს, რომ მე ის წამართვას; სისხლს შეევანთებ, სისხლს!.. იცით, რა არის სატრფოს პირველი საჩუქარი? მარგალიტა თერამეტი წლისა იყო; მე ოცდაერთისა... ერთმანეთი გვიყვარდა... სხვა რაღა მოგახსენოთ?

ეგ კი არა და; იმ საღამოს რომ შოველმა სიტყვა თქვა ჩვენს კლუბში, იმას კი დაწვრილებით მოგახსენებთ. დაღალული იყო, რადგან მთელი ექვსი დღე ევლო დილიქანსით და ნათლიაჩემი ეუბნებოდა, გადასდე, მერე იყოსო:

— სად შეგიძლია, შოველ! შენგან არ მიკვირს? რა არის, რომ დღეს არ იყოს? განა ხვალ არ შეიძლება, ან ხვალზევით?

მაგრამ შოველი არ დათანხმდა და სულ იმას გაიძახოდა, მინდა მოგახსენოთ ჩემი მონდობილობა როგორ ავასრულებო. საღამოზედ ჩვენს კლუბში იმოდენი ხალხი შეიკრიბა, რომ ტევა აღარ იყო; სოფლელებიც ძალიან ბევრნი ჩამოსულიყვნენ. აი, თვით შოველის სიტყვაც. დაწვრილი შევინახე, რადგან ვგრძნობდი, რომ დიდად ღირდა და შემდეგშიაც მასიამოვნებდა:

„ბატონებო, თქვენ დამავალეთ კონსტიტუციის შედგენა და მე ძალიან მიხარია, რომ შემიძლია გახაროთ, კონსტიტუცია შემდგარი და გათავებული გახლავთ-მეთქი. მეფემ უკვე მიიღო იგი და დაიფიცა, არ ვუღალატებო. მაშახაღამე, ჩვენი მმართველობა ახლა ჩვენი კონსტიტუცია იქნება; ეს არის პირველი კანონი ჩვენი ქვეყნისა. მე ყოველი ღონისძიება ვიხმარე, რომ კონსტიტუცია კარგი ყოფილიყო, რაც კი შემეძლო თქვენს ინტერესებს ვიცავდი და ახლა მინდა მოგახსენოთ, რა მიმართულებას ვადექი საერო კრებაში; ეს ჩემი მოვალეობა გახლავთ; მე ერთ წამსაც არსად დამევიწყებია, რომ პასუხისმგებელი ვარ თქვენს წინაშე. რომ თქვენ მე საქმე დამავალეთ და მე იგი კეთილსინდისიერად უნდა ამესრულებინა.“

„თუ პასუხისგება არ იქნება, არც რამე გარიგდება. ვინც თავის საქმეებს მოგვანდობს, უფლება აქვს თავის საქმის ვითარებაც გამოგვეითხოს. მეც მინდა თქვენი საქმის ვითარება მოგახსენოთ. თუ კმაყოფილნი დამრჩით, თქვენს პარტივისციემას არ მომაკლებთ; თუ ნახავთ, რომ მე თქვენ მომიტყუებინა“

ხართ, ზიზღით და ლანძღვით გამისტუმრებთ და ღირსეულად დამსჯით“.

რამდენიმე კაცმა დაიყვირა: ჩვენს დეპუტატს გაუმარჯოს! შოველს გაუმარჯოსო! მაგრამ შოველს ეტყობოდა, არაფრად მოეწონა, რომ სიტყვა შეაწყვეტინეს და ხელით გვანიშნა, კმარა, რადროს ეგ არისო? როდესაც სიჩუმე ჩამოვარდა, განაგრძო:

„მოერიდებით დაუფიქრებელ აღტაცებას, რომელიც ისე აგიბამთ თვალებს, რომ მტერსა და მოყვარეს ველარ სცნობდეთ. თქვენ რომ დაუფიქრებლად ყველას ტაშს უკრავდეთ, მე მაგ ჯილდოს აღარც კი ვინდომებ. სად წავა, რომ მეც ტაში დამიკრათ, კარგად გვემსახუროს, და იმასაც, ვინც ფეხქვეშ ორმოს გითხრით?“

და იმის მაგივრად რომ ეს გონიერი სიტყვა შეეგნოთ, ერთხმად შესძახეს: — შოველს გაუმარჯოსო! და საშინელი ტაშისკვრა ასტეხეს. რას იზამდა? უნდა გაჩუმებულყო და ელოდნა, ვიდრე დამშვიდდებოდნენ.

„ახლა კი კმაყოფილნი უნდა ბრძანდებოდეთ: თქვენ, ბატონებო, არ იცოდით და უკვე მოიწონეთ ჩემი მოქმედება და სამსახური. რომ დაწვრილებით გიამბოთ ყველაფერი და აღარ მომიწონოთ... ნეტავი მაშინ რაღას მეტყვიოთ?“

და განაგრძო:

„მე რომ თქვენ გამოვეთხოვეთ 13 აპრილს 1789, საფრანგეთი სამ ნაწილად იყო გაყოფილი: დიდებულნი, სასულიერო წოდება და ხალხი, ანუ მესამე წოდება. დიდებულთ და სასულიერო წოდებას ეკუთვნოდათ ყველაფერი—სულიერი და ნივთიერი ყველაფერი იმათი იყო; ჩვენ კი, თუმცა ასჯერ მეტნი ვიყავით, ვიდრე დიდებულნი, ჩვენ გვეკუთვნოდა შრომა, ხარჯის გაღება და უბედურება.“

„თქვენგანს ვის არ ეხსომება, რა ჯოჯოხეთის აღში ვიწოდით იმ დროს! გვქონდა რამე, სახელმწიფო ხარჯს ვერ ასდიოდა, არა გვქონდა და შიმშილით ვკვდებოდით. იმოდენა ხარჯს ზედ კიდევ გვალვა და შიმშილი ერთვოდა და, ეს თქვენც კარგად მოგეხსენებათ, ქვეყანა იღუპებოდა.“

„აბა ვნახოთ, რა შესძინა საერო კრებამ ქვეყანას იმოდენა უბედურების მაგივრად? ვნახოთ, რას უნდა მოველოდეთ კონსტიტუციისაგან და რა დაგვრჩა, ან რა მიზეზით დაგვრჩა, შეუცვლელი.“

„ამ ოცდარვა თვის განმავლობაში ორიათას ხუთასამდე განაჩენი დავადგინეთ და, რასაკვირველია, შეუძლებელი იქ-

ნება დაწვრილებით, თავიდან ბოლომდე, გადმოგცეთ ყველაფერი; მაგრამ უმთავრესი კი ყველამ უნდა იცოდეს და მეც ვეცდები შეძლების დაგვარად მოგახსენოთ რაც რევოლუციამ შეგვძინა. უპირველეს ყოვლისა ის მინდა გახართ, რომ საფრანგეთში სხვადასხვა წოდება გაუქმებულია; ეს გახლავთ პირველი მუხლი კონსტიტუციისა: „ადამიანი თავისუფლად იბადება და თავისუფლად და სხვათა თანასწორად რჩება სიკვდილამდე. საერო კრებამ, რა განიზრახა საფრანგეთის კონსტიტუციის დამყარება ადამიანის უფლებათა ზედა, გააუქმა ყოველი უთანასწორობა კაცთა შორის. დღეიდან აღარ არსებობენ აღარც დიდებულნი, აღარც მემკვიდრეობითი უპირატესობანი, აღარც ბატონყმობა, აღარც რაიმე წოდება, აღარც რაიმე უპირატესობა მოხელე პირთა“. დღეიდან აღარ არსებობს აღარც ყიდვითი და აღარც მემკვიდრეობითი შეძენა რაიმე მოხელეობისა. კონსტიტუციისამებრ აკრძალულია ბერად ან მონაზვნად შედგომა, რადგან ბერობა ეწინააღმდეგება ბუნებრივ კანონებს ადამიანის სიცოცხლისას. კონსტიტუციის ძალით ყოველ ფრანგს ეძლევა უფლება სახელმწიფო და საერო სამსახურში ალაგი რამ დაიჭიროს, ოღონდ ნიჭი შესწევდეს და შრომა უყვარდეს. ახალი კანონისამებრ ყოველი სახელმწიფო ხარჯი და გარდასახადი განაწილებული უნდა იყოს განურჩევლად ყველა ფრანგთა შორის მათ შეძლების დაგვარად, და ერთი და იგივე დანაშაული ერთი და იმავე სასჯელით იქნება დასჯილი მიუხედავად დამნაშავეის შთამომავლობის და საზოგადოებრივი მდგომარეობისა.

„აი, რა დავადგინეთ კონსტიტუციის დასაწყისშივე და უნდა მოგახსენოთ, რომ მეც სრული თანხმობა გამოვაცხადე ამ ცვლილებებისა, რადგან ჩემი აზრით. საცა სამართალია, იქ თანასწორობაც უნდა იყოს. დამეთანხმებით, ბატონებო, რომ ამ მხრივ მეტს ვერას ისურვებდით. ეს ერთი.

„მეორე მუხლი თავისუფლებას შეეხება. სხვადასხვა უფლება ადამიანისა ჯაჭვებით არის გადაბმული და დამყარებული ერთიერთმანეთზე. თუ მამულიშვილს თავისუფლება არა აქვს, რომ სთქვას, დასწეროს, დაბეჭდოს და გაავრცელოს თავისი აზრები, მაშინ სულ ერთია, აქვს რამე უფლება, თუ არა, რადგან ძალიან უსამართლოდაც რომ მოექცნენ, არავითარი საშუალება არა აქვს, ხალხს მიმართოს თავის საჩივრით, დაათრგუნვინოს თავის უფლების შემლახველნი და ძირიანად ამოაგდებინოს ყოველი უსამართლობა. სადაც თავისუფლება

არ არის, იქ კანონი ცარიელი სიტყვაა, სადაც თავისუფლება არ არის, იქ მართალი ყოველთვის ის არის, ვინც უფრო მძლავრია: პირზედ ხელს მიაფარებს და ისე გასძარცვავს და ყელს გამოლადრის თავისზედ სუსტს, სადაც კი მოასწრებს. ამიტომ კონსტიტუციამ ყოველი მამულიშვილის ბუნებრივ და ხელშეუხებელ უფლებად აღიარა თავისუფლება სიტყვისა, წერისა, აზრისა, ბეჭდვისა და ყველა ამის ხალხში ყოველ საშუალებით გავრცელებისა.

„ამის მოსდევს თავისუფლება მოძრაობისა, რომლითაც ადამიანს შეუძლია, როდესაც და სადაც უნდა, წავიდეს, ოღონდ კანონის წინააღმდეგი არა ჩაიდინოს რა; შემდეგ თავისუფლება სარწმუნოებისა, რომლითაც ადამიანს უფლება აქვს თავისნებად აირჩიოს, რომელიც ნებავეს სარწმუნოება; თავისუფლება უმაღლეს მთავრობისადმი საჩივრის და თხოვნის მირთმევისა; თავისუფლება კრებისა, რომლითაც აღარავის აეკრძალება ხალხის შეკრება და საერო საქმეზედ და სხვა რამეზედ სჯა და ბაასი; ერთი სიტყვით ადამიანს თავისუფლება ეძლევა, რაც უნდა მოიმოქმედოს და როგორც უნდა იცხოვროს, ოღონდ სხვას ნურას ავნებს.

„საცა სამართალია, იქ თანასწორობაც არის-მეთქი, მოგახსენეთ. სამართალი არსად არის თუ სრულ თავისუფლებაზედ არ არის დამყარებული. თავისუფლებას მოსდევს ძმობა. კონსტიტუციის ძალით დაფუძნებულ უნდა იყოს დაწესებულება, რომელიც უნდა ეხმარებოდეს ღარიბთ, უძლურთ, და უსაქმურად და, მაშასადამე, ულუქმაპუროდ დარჩენილ მუშათ. მოწყალებას კი არ გაიღებს ეს დაწესებულება: მოწყალება ამცირებს ადამიანს, პირად ღირსებას აკლებს და თავისივე თანასწორის წინაშე ამდაბლებს და შეურაცყოფს მას; მოწყალება სულმდაბლად ჰქმნის ადამიანს; კონსტიტუციას ის კი არ უნდა, გაკირებული დაამდაბლოს, ადამიანებრივი ღირსება დაუმციროს და მით ჰირზედ ჰირი დაუროს; ეს არც შეეფერება და ავნებს კიდევ ძლიერებას ერისას. კონსტიტუციის ძალით ქველმოქმედება კერძო პირის გულკეთილობად კი არა, საზოგადოებრივ ვალდებულებად არის აღიარებული. მაგრამ ესეც არ იკმარა კონსტიტუციამ და უფრო შორს გასწია საზოგადოებად მცხოვრებ ადამიანთა ძმობა; მან შემოიღო ხალხის განათლება: იქნება გახსოვდეთ მაცხოვრის სიტყვები: არა პურითა ხოლო სცხონდების კაცი, არამედ ყოველითა სიტყვითა, რომელი გამოვალს პირისაგან ღმრთისა.

„კონსტიტუციამ კარგად შეიგნო ამ ძლიერი სიტყვის მნიშვნელობა და მის განსახორციელებლად შემოიღო საერთო სწავლა-განათლება ყველა მამულიშვილთათვის. რაც კი ყოველმან მამულიშვილმა უნდა აუცილებლად იცოდეს — წერა-კითხვა, ანგარიში, სამღვთო რჯული და სამშობლოს ისტორია, ეს აუცილებლად საქირო ცოდნა უსასყიდლოდ იქნება სახალხო სკოლებში, რომლითაც მოფენილი უნდა იქმნას მთელი ჩვენი ქვეყანა.

„ამგვარად, ბატონებო, პირველი ნაწილი კონსტიტუციისა შეიძლება სამი სიტყვით გამოვხატოთ: თანასწორობა, თავისუფლება, ძმობა! აი, ადამიანის უფლებანი. ხომ გახსოვთ, როგორი დაჩაგრული იყო უწინ საწყალი კაცი: ვინც ღარიბი იყო და ერთი ხელის გულისოდენა ტალახი ჰქონდა, იმას იმდენ ხარჯს ადებდნენ, რომ ვერც კი ასდიოდა; და ვინც მდიდარი იყო და ათას-ათასი დღიურები ჰქონდა გადაჭიმული, იმას არც ხარჯს ადებდნენ და არც გადასახადს. კონსტიტუციამ გააუქმა ყოველი განსხვავება: ხარჯი და გადასახადი ყველამ უნდა გადაიხადოს მამულის რაოდენობისამებრ.

„დღეის შემდეგ ყოველი შენობა და მამული, რომელიც საზოგადოებრივ მოთხოვნილებათა დასაკმაყოფილებლად არის აგებული ან დადებული, მეფის საკუთრებად კი არა, საერო საკუთრებად იქნება ჩარიცხული. ციხე-სიმაგრეები, გზები, სასეირო ადგილები, ძეგლები და სხვ. და სხვ. გარდა ამისა, რაც აქამდე სასულიერო წოდების კუთვნილებად ითვლებოდა, ყველა საეკლესიო მამულები და მონასტრების სხვადასხვა საკუთრება, საერო საკუთრებად არის დადებული და რადგან სახელმწიფო ხაზინას დიდი ვალი ადევს, ეს მამულები იყიდება, რომ ვალი გადაწყდეს; როგორც ხედავთ სახელმწიფო ვალიც კი აღარ უნდა გვაშინებდეს. საერო კრებამ დაადგინა, რომ ამ ცოტა ხანში შედგენილი უნდა იქნას მოქალაქეებრივ კანონების ტრაქტატი, რომლითაც განმარტებული იქნება ურთიერთ შორის განწყობილება კაცთა და მათი უძრავ-მოძრავი საკუთრებისა. ამ ტრაქტატმა უნდა ამოაგდოს ძველთაგან დაჩინილი რომაელთა კანონები და ადათები, რომელნიც, როგორც მოგეხსენებათ, სხვადასხვა სოფელში სულ სხვადასხვანაირად იხმარებიან და მით რევენ და ხელს უშლიან მართლმსაჯულებას.

„მე დღეს არაფერს მოგახსენებთ შესახებ იმისა, თუ როგორ და რამდენ ნაწილად არის გაყოფილი ჩვენი ქვეყანა; რა წესით და როდის უნდა იქმნას ხოლმე ამომრჩეველი კრებები ერის წარმომადგენელთა ამოსარჩევად: რა საფუძველზე და რა კანონებით არის შეზღუდული მეფის ძალა; ვინ და რა უფლებით

იქნება აღჭურვილი მეფის მოადგილედ, როდესაც მეფე მცირეწლოვანია; რა უფლება ექნებათ მინისტრებს; რა განწყობილება აქვთ ურთიერთ შორის მეფეს და კანონმდებელ კრებას; ვინ იქნებიან აღჭურვილნი აღმასრულებელი ძალით; რა საფუძველზედ იქნება დამყარებული საფრანგეთის განწყობილება სხვადასხვა სახელმწიფოებთან; ამისას დღეს არაფერს მოგახსენებთ, რადგან ეს ყველაფერი დაწერილებით არის განწესებული კონსტიტუციაში. მაგრამ ერთი საგანია, რომელიც პირდაპირ შეეხება ჩვენს კეთილდღეობას და შეეხება არა ორ წელიწადში ერთხელ, არამედ ყოველ წამს და ამიტომ მინდა ცოტა რამ ამ საგნის შესახებ მოგახსენოთ. ეს საგანი გახლავთ ფული. ამიტომ რაც ხანი საერო კრებაში გახლდით, სულ ყოველთვის იმის ზრუნვაში ვიყავი, რომ გამეგო და ხალხისთვისაც გამეგებინებინა, ვინ გვართმევს ჩვენ, ხარჯის მძლეველთ, ფულს, საღ მიაქვს ის ფული, ვის აბარებს და ვინ ან რაზე ხარჯავს ჩვენს ნაპირნახულევს, ჩვენის ოფლით დამბალ ფულს. ისე ფინანსიური კომისია არ ამოურჩევიათ, რომ მეც შიგ არ მოვეყოლოდი, რომ უკეთ გამეცნო ეს საგანი და თქვენც მესიამოვნებინეთ, რადგან ხარჯის გაღება მამინ უფრო გაუადვილდება კაცს, როდესაც იცის, რომ მისი ფული საზოგადო საქმეს მოხმარდება და არა მუქთახორა დიდებულთა ქეიფს“.

თუმცა ყველას კარგად ახსოვდა შოველის თხოვნა, ტაშს ნუ დამიკრავთო, მაგრამ ეს სიტყვები ისე მოეწონა ყველას რომ იმოდენა ხალხმა ტაშისკვრა დაუწყო. თითონ შოველიც მხიარულად იღიმებოდა, რადგან ხედავდა, რომ შიგ გულში მოხვდა სიტყვა ყაირათიან გლეხკაცს და მუშას.

ყველაზედ კმაყოფილი ნათლიაჩემი იყო. ტაშს უკრავდა და იძახდა:

— მართალი არ არის თუ? რა კარგად გვიცნობს ეგ კურთხეულიშვილი, ეგა.

ბოლოს ხალხი დაწყნარდა და შოველმა განაგრძო:

„აქამდე მთელი საფრანგეთი მეფის სურვილზედ იყო დამყარებული; მეფე იყო ჩვენი უმაღლესი ბატონი და პატრონი, იმას უნდა დაემორჩილებოდით ყველაფერში, და რაც უნდა უსამართლოდ მოგვეკეოდა თავის ქვეშევრდომთ, პირუტყვივით გაჩუმებულნი უნდა ვყოფილიყავით, რადგან სულით ხორცამდე იმის საკუთრებად ვიყავით; ჩვენ ჩვენი არა გვექონდა რა, არც მამული, არც საქონელი: მამულიც, საქონელიც და პირად ჩვენც მეფისა ვიყავით. ფული დასჭირდებოდა, სათემო კრებას უბრძანებდა და ისიც ხალხს შეაწერდა და მიაართმევდა, იქნება კიდევ დაღრუ-

ჯილიყენენ კრების წევრნი, მაგრამ უარს ვინ გაუბედავდა, რადგან იცოდნენ, რომ დაუვლიდნენ ხარჯის მკრეფნი და დააწიოკებდნენ ქვეყანას. ხალხს რა შეეძლო? თუ ჰქონდა აძლევა; თუ არა და, ან უკანასკნელ ძროხას წაუჭკევდნენ, ან უკანასკნელ ერთხელ ქვეშაგებს გაუყიდდნენ და მეფეს კი არას დააკლებდნენ. შეექცეოდა სახელმწიფოც იმისი იყო, სახელმწიფო ხაზინაც და მამასადამე ანგარიშსაც არავის მისცემდა. ასე იყო და დღეს კი ძირიანად შეცვლილია ეს ყველაფერი. კონსტიტუციამ დაადგინა, რომ ხარჯს მთელს საფრანგეთში კანონმდებელი კრება გააწერს ყოველ წელს; მამასადამე თქვენ თითონვე გაიწეროთ, ბატონებო, რა ხარჯის გადახდაც გენებებათ, თქვენ, ესე იგი თქვენგან ამორჩეული წარმომადგენელნი, რომელნიც თქვენი ნდობით იქნებიან აღჭურვილნი. თუ გლუხკაცები აირჩიეთ თქვენს წარმომადგენლებად, დარწმუნებული ბრძანდებოდეთ, რომ იმათ აღვილად ვერავინ დაიყოლიებს და იმაზედ მეტს ხარჯს ვერ აკისრებინებს, რაც მართლა საჭიროა სახელმწიფოსთვის; და თუ სხვანი აირჩიეთ... ეგ თქვენი საქმეა. პატიოსანი კაცი ყველა წოდებაში მოიპოვება, მაგრამ უნდა პატიოსნად იცნობდეთ და ისე აირჩიოთ.

„კანონმდებელი კრება ყოველ ორ წელიწადში უნდა იცვლებოდეს და თუ კრებამ ხარჯი არ გააწერა, თქვენ შეგიძლიათ აღარა გაიღოთ რა; მაშინ გროშსაც ვერავინ მოგთხოვთ. აი, რით არის ძლიერი ჩვენი კონსტიტუცია: კანონმდებელი კრება ხარჯს არ გააწერს და მით აიძულებს მეფეს დამორჩილდეს კონსტიტუციას.

„გარდა ამისა, რადგან შეიძლება თქვენმა დებუტატებმა გილატონ, — რაც სასახლიდანა სთხოვონ, სულ ყველაფერზედ დათანხმდნენ — და უფრო მეტი შემოგაწერონ, ვიდრე საჭიროება მოითხოვს, კონსტიტუციის ძალით ყოველმა კანონმდებელმა კრებამ უნდა დაბეჭდოს და ხალხში გაავრცელოს სრული ანგარიში სახელმწიფო შემოსავალ-გასავლისა. ამგვარად, ვინც კი მოისურვებს საერო საქმეების მდგომარეობის გაგებას, ამ ანგარიშს გადასინჯავს და ნახავს, სად და რაზედ იხარჯება იმისი ფული. ამ ანგარიშითვე ნახავს, როგორ ემსახურება იმას თავისი წარმომადგენელი; უფთხილდებთ თავის ამომრჩეველთა ჯიბეს, თუ თვალდახუჭული სჩადის, რასაც ჩასძახებენ. ერთი სიტყვით, ყოველ თქვენგანს თვალწინ ექნება სახელმწიფოს საქმე და ისევე ეცოდინება იგი, როგორც თავისი კერძო საქმეები.

„ამაზედ უკეთესს კონტროლს, მგონი, რომ თქვენც არ მოელო-

დით. კონსტიტუციის ძალით სახელმწიფო ვალები გადახდილ უნდა იქმნას და გარდა ამისა მეფეს და იმის მახლობელთ ძველებურად უნდა ეძლეოდეთ იმდენი, რამდენიც აქამდე ჰქონიათ; და საქმე ახლა ის არის, მოგეწონებათ და დაეთანხმებით ამ ხარჯს, თუ არა? სახელმწიფო ხაზინის ვალი მთელი ერის ვალია და მეც, რასაკვირველია, თანხმობა გამოვაცხადე — ვალს გადახდა უნდა-მეთქი; ჩვენს-თანა ძლიერ ერს არ შეუძლია თავის თავი გაკოტრებულად გამოაცხადოს; პირიქით მისი შოვალეები დარწმუნებულნი უნდა იყვნენ, რომ სხვას უფრო საიმედოს ვერავის ასესხებენ თავიანთ ფულს; თავს გაიყიდის ყოველი ჩვენგანი და იმას კი ვერ იზამს, რომ სამშობლოს გაკოტრების ხმა გაუვარდეს.

„გავსინჯოთ ახლა მეფისა და იმის მახლობელთათვის გადადებული ფულები. სახელმწიფოს ბევრნაირი ხარჯი აქვს და მე ჯერაც ვერ გამიგია, ყველაზედ წინ მეფე რად უნდა დავაყენოთ და უპირატესობა იმას რად უნდა მივცეთ? განა ჩვენი მსაჯულნი, გამგებელნი, ჯარისკაცები და სხვა მოხელენი კი დარწმუნებულნი არ უნდა იყვნენ, რომ ჯამაგირს სრულად და დანიშნულ ღრობედ მიიღებენ? ერის სიცოცხლე ამ მოხელეებზედ არის დამოკიდებული და რად უნდა იჩაგრებოდნენ ისინი მეფისაგან და ჯამაგირს მარტო მაშინ იღებდნენ, როდესაც მეფემ თავისი უკვე შეისრულა? მე ეს ვერ გამიგია! ამიტომ საერო კრებაში მე ამ ხარჯის წინააღმდეგობა გამოვაცხადე. მე იქაც წინააღმდეგი გახლდით და ღღესაც ვიძახი, რომ თუ ჩვენს კონსტიტუციას წუნი აქვს რამე, უმთავრესი წუნი ეს ხარჯი არის. მაგრამ ამაზედ ნუ შევჩერდებით, უცოდველი მარტო ღმერთიაო, ნათქვამია. გარდა ამისა კონსტიტუციის ძალით კანონმდებელმა კრებამ უნდა გადასწყვიტოს, რამდენს დაუნიშნავს ყოველ ახალ მეფეს და იქნება ამითი მაინც ეშველოს საქმეს; იქნება იმისთანა დროც დადგეს, რომ კანონმდებელმა კრებამ დაინახოს, რა სამარცხვინოა მილიონების ხარჯვა ერთ კაცზედ, რომელსაც ათასობით მოსაპსახურენი და მოახლენი ახვევიან! იქნება კრებამ დაინახოს, რა ცოდვია მუშაკაცის გაღატაკება და მით უსაქმურის და უქნარის ამპარტავენის გაზვიადება.

„დიად, ჩვენ თუ არ მოვესწარით, ჩვენი შეილები ხომ პოესწრებიან იმ დროს, როდესაც სამართალი დამყარდება ქვეყანაზედ და ყველგან თავის შუქს მოჰფენს. მანამდე კონსტიტუციისაც დიდი მადლიერი უნდა იყოს ჩვენი ხალხი. რაც ჩვენ ტანჯვა-წვალება გამოგვივლია, ეს კი არა, ნაკლებიც რომ ყოფილიყო, მაინც მადლობას შეგწირავდით უფალს. მცირე კი არ გეგონოთ ჩვენი გამარჯვება! რასაც ჩვენი უბედური წინაპარნი თვალცრემლიანნი შესთხოვე-

ნენ ღმერთს საუკუნეთა განმავლობაში, დღეს უკვე შევიძინეთ და იმედია ველარავინ წაგვართმევს: დღეს ჩვენი გვაქვს მქიდრო საფუძველზედ დამყარებული უფლებანი და საკმარი ძალ-ღონე, რომ ჩვენი უფლება აღარავის შევალახვინოთ. აქამდე ქედმოხრილი საქონელი ვიყავით, დღეს თავისუფალი აღამიანი გავხდით.

„მიუხედავად ურიცხვი ლანძღვა-გინებისა და ცილისწამებისა, რომლითაც ჩვენი უწინდელი ბატონები გვაპყობდნენ; მიუხედავად ათასგვარი ეშმაკობისა და ფლიდობისა, რომლითაც ცდილობდნენ ჩვენში უთანხმოება ჩამოეგდოთ, გამარჯვება მანაც ჩვენ დაგვრჩა, ბატონებო! მაგრამ ეს გამარჯვება მოსვენებას და განცხრომას კი არა, უფრო მეტს სიფთხილეს მოითხოვს თქვენგან ახლა, როდესაც „დიდებულნი მამულისშვილნი“ ათასობით გადიან გერმანიაში, ინგლისში და რუსეთში, რომ ცისა და ქვეყნის რისხვა აღძრან თავიანთ სამშობლოზე; ეხლა, როდესაც ჩვენშიაც მრავალნი დარჩენილნი დიდებულნი მარტო იმ განძრახვით, რომ ვითომდა ღვთისა და სარწმუნოების დასაცველად კონსტიტუციის წინააღმდეგ დასაყლეთ საფრანგეთში გაუნათლებელი ხალხი ააჯანყონ; ახლა, როდესაც დიდებულნი შიგნიდან ხალხის აჯანყებას გვიპირებენ და გარედან მთელი ევროპის შემოსევას, რომ დაკარგული დიდება და უპირატესობანი მოიპოვიან; ეხლა გვმართებს სიფთხილე და ერთობა, ბატონებო! სამშობლო რომ განსაცდელში იმყოფებოდეს, განაღდა ჩვენ ჩვენი უთანხმოება და უსიამოვნება უნდა გვახსოვდეს! შევერთდეთ, ძმანო, და ჩვენს შორის ხსენებაც ნუ იყოს ხმოსან და უხმო მამულიშვილთა გარჩევაზედ. სამშობლომ ეს გარჩევა არ იცის, იმისთვის ყველა შვილი შვილია და ჩვენს კონსტიტუციაში ეს არის ერთადერთი უვარგისი და საპარცხვინო მუხლი და ისიც — ღმერთმა ჰკითხოს იმ უმრავლესობას, რომელმაც მარტო რიცხვით ისარგებლა და ჯიბრით დაადგინა ეგ უსამართლობა! არც დიდი ხანი დარჩება ჩვენში ეს განსხვავება: ძალიან მალე დარწმუნდებიან შემძლებელნი, რომ მარტონი ვერას გახდებიან, არისტოკრატიას და სასულიერო წოდებას ვერ გაუმკლავდებიან და, თუ ნებავთ საერთო გამარჯვებით ისარგებლონ და საერთო გამარჯვების ნაყოფით დასტკბნენ, ხალხს უნდა დაუთავშირდნენ და საკუთარი ხელით წაშალონ ეს იმათივე შემარცხვენელი და დამლუპველი განცალკევება.

„ერთი სიტყვა კიდევ.

„კონსტიტუციამ, როგორც მოგახსენეთ, ბევრი რამ შეგვძინა. მაგრამ შეძინილს შენახვაც უნდა. და თუ გნებავთ ის სიკეთე შეინარჩუნოთ, ბატონებო, რომელიც რევოლუციამ შემოგძღ-

ნათ. ეცადენით ყველას შეაგნებინოთ, რომ ბატონი თითონ არის, გეყურებათ, ბატონი თითონ არის ყველა ჩვენგანი. ეცადენით ყველას შეაგნებინოთ, რომ ყოველი მოხელე, სულ უმაღლესიდან დაწყებული უკანასკნელამდე. მეფიდან დაწყებული სულ უბრალო მეველემდე, იმისთვის კი არ არის დაწესებული, რომ ცხოვრება და ბატონობა ნებავთ, ხშირად მემკვიდრეობითი ბატონობაც, არამედ მარტო იმისთვის, რომ ჩვენ გვემსახურონ, ჩვენ, რადგან საქმეზედაც და თანამდებობაზედაც ჩვენ ვაყენებთ და ჯამაგირსაც ჩვენ ვაძლევთ. ჩვენ კი არა ვართ იმათთვის, ისინი არიან ჩვენთვის და, ვისაც ჯამაგირს მივცემთ, ჩვენი მოსამსახურე იქნება. აი, ბატონებო, ეს შეიგნოს კარგად ჩვენმა ხალხმა; ეს შთააგონოს თავის შვილებს და შვილიშვილებს! ჩვენი ერის დიდება და ძლიერება მარტო ამაზედ არის დამოკიდებული. მეფე ჩვენი მოხელე უნდა იყოს და არა ჩვენი ბატონი. რაკი ამას შეიგნებს ხალხი, მაშინ სამშობლოს დიდებასაც ეცდება და მაშინ განახორციელებს ძველთაგან თქმულს: კაცი ხალხისთვის და ხალხი კაცისთვისაო! ნურავის შეალახვინებთ კერძო პირის უფლებას; გაიგოთ თუ არა მისი ყვირილი, მაშინვე მიეშველენით ყველანი და თქვენი ძალა აგრძნობინეთ თავხედს! ნუ მოითმენთ, რომ ვინმე დიდებული მოხელე, თუნდა იოტის ოდნადაც იყოს, თქვენს უფლებას შეეხოს; წამოდექით ყველანი, საყვირი დაჰკარით, ქვეყანა შეჰყარეთ და საუკუნოდ გადააჩვიეთ თქვენს შევიწროვებას.

„პირდაპირ მოგახსენებთ, ვინც თავის უფლებას ცოტაც არის შეალახვინებს ვისმე, ლაჩარია, თავზედ ქუდი არა ხურავს! ის კაცი კი არა, პირუტყვზედ უარესია! და ვინც თავის მოძმეს დაჩაგრულსა ხედავს და იმის, და მაშასადამე, თავის უფლებათა აღსადგენად არ მიეშველება, ის კიდევ უარესი ლაჩარია და თავის ქვეყნის და ერის მოღალატე! ჩვენი ცხოვრება საუკუნოთა განმავლობაში ცარიელი ტანჯვაწვალება იყო, რადგან ჩვენი ბედილბალი უსამართლობაზედ და მეფეების სურვილზედ იყო დამოკიდებული. ახლა კი დროა ჩვენი ცხოვრების საფუძვლად მაგარი და ურყეველი რამ ვიქონიოთ, დედაბოძად კონსტიტუცია გავიხადოთ და ჩვენს მოსისხლე მტრად ვიგულოთ ყველა, ვინც კონსტიტუციის გაუქმებას მოიწადინებს. მაშინ შეგვეძლება ვთქვათ, ბედნიერნი ვართო და მთელი ევროპაც რომ შემოგვესიოს, მით ჩვენ არავისი შეგვეშინდება, რადგან ერი, რომელიც სიმართლეზედ დამყარებულს თავის უფლებას იცავს, თავის დღეში არ დამარცხდება“.

დიდი შთაბეჭდილება მოახდინა ამ სიტყვამ და ძნელი ასაწე-

რია, რა ალტაცებულნი იყვნენ ყველანი. თავმჯდომარემ რაფიელმა მადლობა გამოუცხადა შოველს და პატრიოტებმა ერთხმად კლუბის წევრად აირჩიეს. ათა საათი იყო, რომ შინისკენ გავემგზავრებით.

VIII

1791 წ. ოქტომბერში კანონმდებელი კრების დაწყების დროს შოველი ფალსბურგში გადასახლდა; სამი კვირა არ დარჩენილა ჩვენს სოფელში: თავისი სახლი ლეტუმიეს მიჰყიდა, რომელიც თავის ქალს — ქრისტინეს — ათხოვებდა. თითონ კი ფალსბურგში ბაზრის პირდაპირ მოხუცებული ბარუხ არონის სახლის ძირის სართული დაიჭირა ქირით, ქუჩის პირ ოთახში წიგნებისთვის და გაზეთებისთვის ყაფაზები გამართა და სავაჭროდ გაშალა წიგნები, რომელიც დიდროვან ცალობით მოსდიოდა პარიზიდან. თვითონ და მარგალიტა ადგილობრივ ვაჭრობდნენ და აღზასსა და ლორენში წიგნების გასასყიდად ორი მოჯამაგირე დაიჭირა — ტუბა და მარკოზ დივე. იმისთანა ვაჭრობა გააჩადა, რომ უკეთესი არ შეიძლებოდა.

შოველმავე მოიტანა ჩვენში პატარა სამფერი წამოსასხამი ქალისა, რომელზედაც დაბეჭდილი იყო ადამიანისა და მამულიშვილის უფლებანი. დაინახეს ჩვენებურმა ქალებმა და ყველამ ის წამოისხა. მაგრამ არც რევოლუციის მოწინააღმდეგე ქალები ჩამორჩენ უკან და თავიანთ წამოსასხამზე სხედასხვა ლოცვები დაებეჭდვინებინათ და გარდა ამისა, შემდეგი სიტყვები: „თუ საეკლესიო მამულების შემსყიდველნი კმაყოფილნი არ არიან, თავიანთ ფულს უკანვე მიიღებენ, როდესაც ერი ასიგნაციებს გაანადღებს“.

შოველის დუქანში ყოველნაირი წიგნი იყიდებოდა, როგორც პოლიტიკური, რევოლუციური, აგრეთვე კატეხიზმოსი და რევოლუციის მოწინააღმდეგე ბერების ნაწერები; როგორც გახიზნულთა გაზეთები, აგრეთვე ჩვენი „ხალხის მეგობარი“ და პატრიოტული წერილები მ. დიუშენისა“. ერთხელ ნათლიაჩემმა უსაყვედურა, მაგ მავნე მიმართულების გაზეთებს რადა ჰყიდო?

შოველმა უპასუხა:

— რატომ არა, ჩემო ივანე? იქნება გგონია, ამით გვაზარალოვან რამე? შენც არ მომიკვდე! პირიქით დიდ სამსახურს გვიწივენ, რომ თავიანთსას არას მალავენ; დეე, ბეჭდონ თავიანთი აზრები და ხალხს იმად ეჩვენონ, რაც მართლა ბრძანდებიან. ჩვენც ეგ არ გვინდა? ჩვენს საქმეს ისინი უკეთ არიგებენ, ვიდრე ჩვენ.

იმავე დროს შოველმა მონინდომა პატრიოტებისთვის გაზეთების კითხვა გაეადვილებინა და ამ მიზნით მეორე ოთახში ერთი უშველებელი მაგიდა დასდგა, გარს სკამები შემოუწყყო და ზედ დაალაგა, რაც კი გაზეთები მოსდიოდა. თავისუფლად შედიოდა ყველა და ერთ კაპეიკად ქვეყნის გაზეთებს კითხულობდა.

კარგი აზრი არ იყო თუ?! პარიზში თურმე ძალიან ხშირი იყო ამგვარი სამკითხველოები და ჩვენში კი აზრადაც არავის მოსდიოდა ამ სასარგებლო დაწესებულების შემოღება.

ის კი არ იფიქროთ, სამკითხველოს და წიგნების ვაჭრობას მოუწოდებოდა და საზოგადო საქმისას ველარას გაარიგებდაო. ერთიცა და მეორეც შოველმა მარტო იმიტომ დაიწყო, რომ საზოგადო საქმეს დახმარებოდა. ჩვენს კლუბში რაფიელ მანკის მაგიერად თავმჯდომარედ ის ავირჩიეთ და კვირაში სამჯერ შვიდი საათის შემდეგ ისე აივსებოდა ხოლმე დახურული ბაზარი, რომ ტევა აღარ იყო.

სწორედ შვიდ საათზედ შემოვიდოდა შოველიც. თავს დაუკრავდა ხალხს, თავის სავარძელში დაჯდებოდა, ბურნუთის კოლოფს და ცხვირსახოცს მარჯვნივ დაიდებდა და დაიძახებდა:

— ბატონებო, კრება გახსნილია.

გაშლიდა „მოამბეს“*) და ხმა მალლა წაგვიკითხავდა კანონმდებელ კრებაზედ აღძრულ საკითხებს და ორატორთაგან წარმოთქმულ სიტყვებს. ხანდახან იაკობელების კლუბში ნათქვამს წაგვიკითხავდა „მოკამათე ყურნალში“. როცა შეხვდებოდა რასმე იმისთანას, რომ უმრავლესობა ვერ გაიგებდა, დაწვრილებით აგვიხსნიდა. ბოლოს, როდესაც წასაკითხავი აღარა ექნებოდა რა, გვეტყოდა:

— აი, ბატონებო, როგორ მომდინარეობენ ჩვენი საქმეები. იქნება სიტყვა სურდეს ვისმე?

ხან ერთსა ჰქონდა რამ სათქმელი, ხან მეორეს. მოვისმენდით, პასუხს მივცემდით. დახურული ბაზარი გატენილი იყო ხოლმე ხალხით. მარტო მუშები და მოქალაქენი კი არა, მოხელეები, და თვით ბ. ბაზლერიც კი, საერო კრების მიერ ათისთავ რავეტის მაგიერად ოვერენელი რაზმის წინამძღოლად დანიშნული, არც ერთს კრებას არ დააკლდებოდნენ. ყველას მოეპოვებოდა რამე სათქმელი ან საკითხავი; სხვანი გაჩუმებულნი ისმენდნენ. დაჰკრავდა თუ არა ათ საათს, შოველიც წამოიწევდა და კმაყოფილი კილოთი შემოგვძახებდა:

*) „Moniteur“.

— საზოგადო საქმეები გავისტუმრეთ. ორშაბათამდის, ბატონებო!

კრებები ორშაბათობით, ოთხშაბათობით და შაბათობით გვქონდა.

ამას იმიტომ მოგახსენებთ, რომ ჩვენი დროისა ყველაფერი დაწვრილებით აგიწეროთ, თორემ იმ დროს მე კლუბი კი არა, სულ სხვა რამ მედო თავში. ეს იმ დროს გახლდათ, როდესაც ყოველ კვირას მოკმაზულ-მოპრანჭული მივეშურებოდი მარგალიტასკენ და იმის ცქერით ველარა ვძლებოდი. უწინდელი ჩაჩულია მიშელი კი აღარ გახლდით! იმისთანა კობტა ბიჭი ვიყავ, რომ... თვეში ერთხელ წვერსაც კი ვიპარსავდი.

ან როგორღა შეიძლებოდა ძველებურად უშნოდ მევლო, როდესაც საკუთარი თვალითა ვხედავდი, რომ ჩემი ტოლი ბიჭები და ბევრნი ჩემხედ შემძლებელნიც თვალს აღარ აშორებდნენ მარგალიტას და, საცა კი შეიძლებოდა, გარს ევლებოდნენ. ნეტავი მართო მუშები და გლეხები ყოფილიყვნენ, კიდევ აიტანდა კაცი. მაგრამ არა! ოვერნელი რაზმის უფროსები და დიდი გვარიშვილი ყმაწვილი კაცებიც კი დაიარებოდნენ შოველთან, — ვითომ წიგნების საყილად—იცინოდნენ, ლაზღანდარობდნენ და თვალი კი მარგალიტაზედ რჩებოდათ. მე მაშინვე შევნიშნე, რომ საქმე ცუდად იყო. ჰოდა, უნდა გენახათ, როგორ ვიხეხდი პირისახეს! ნეტავი ტყავი რატომ არა მძვრებოდა? კვირა დილით მოვუჯღღებოდი ხოლმე ჩემს პატარა სარკეს და ვიყავი ერთ ვაივაგლახში: ჩავიცვამდი, არ მომეწონებოდა... ასჯერ მაინც მოვისევამდი ყელზედ ხელს, ყელსახვევი ხომ არ დამავიწყდა-მეთქი. სულ ოფლში ვიწურებოდი! ცხრა საათის შემდეგ, როდესაც დედაჩემი თოვლიან გზას გაუდგებოდა, რომ ანრიდორფში კონსტიტუციის მოწინააღმდეგე მღვდლის წირვა და ქადაგება მოესმინა, მამაჩემი ნელი ნაბიჯით ამოცოცდებოდა კიბეზედ, თავს შემოჰყოფდა ბალახანაში და შემომძახებდა:

— დედაშენი წავიდა, მიშელ! გინდა, მოგეხმარო?

იმდენს ვეწვალებოდი, იმდენს, რომ როგორც იქნებოდა ჩავიცვამდი. მამაჩემი კი შემომხმაროდა:

— იცი, მიშელ! იმიტომ კი არა, რომ ჩემი შვილი ხარ, არა, ღვერთმა იცის! მაგრამ ჩვენს მხარეში შენისთანა წარმოსადგევი, მგონი, ბევრი არ მოიპოვებოდეს.

სევდიან გულს მალამოდ მოხვდებოდა ხოლმე ეს სიტყვები; ვიტყვოდი, მოდი გამოვუტყდები და ჩემს სიყვარულს გავუშყდავნებ-მეთქი, მაგრამ ვერა ვბედავდი: დიდი პატივისცემა მქონდა მამაჩემისა. თუ არა და, დარწმუნებული ვარ, უჩემოდაც ძალიან კარგად

იცოდა, რომ გაგიჟებული ვიყავ ნარგალიტასთვის. დედაჩემსაც უნდა შეპარვოდა ექვი და ჩუმაღ იმიტომ იყო, რომ საბრძოლველად ემზადებოდა; სულ იმის შიშში ვიყავით ორივენი, ან ეხლა შემოგვიტევეს, ან ეხლაო, და თან გულს ვიმაგრებდით: ვიცოდით რომ საშინელი უსიამოვნება და განხეთქილება ატყდებოდა მას შემდეგ ჩვენს ოჯახში და ამიტომ გადაწყვეტილი გვქონდა: რაც უნდა მომხდარიყო, ჩვენ მაინც ჩვენსას არ დავიშლიდით.

მომავალზედ ვოცნებობდით, მაგრამ ოცნების სიტკბოება ეს ფიქრი გვიმწარებდა. ბოლოს, როდესაც ლამაზად გამოვეწყობოდი ჩემს საკვირაო ტანისამოსში, ადგებოდა მამაჩემი, ხან აქეთ მომივლიდა, ხან იქით, ამხედავდა, დამხედავდა და გაბრწყინვალებული ხახით მეტყოდა:

— შენი ჭირიმე, ბიჭო! ეხლა საცა გინდა, წადი! წადი, შვილო, ისიამოვნე!

საწყალი მამაჩემი! თავისი დღენი ისე დაელია, რომ სიამოვნება მარტო სხვისა ენახა. და იმ სიბერეშიაც, როდესაც დედაჩემი სახლს უპატრონოდ სტოვებდა და შორს საღმე სოფელში ჩვენი განთავისუფლების მოწინააღმდეგე მღვდელის ქადაგების მოსასმენად გარბოდა, უნდა ამდგარიყო იმ ხნის კაცი და სახლი დაეგავა და კარტოფილი გაეფტკენა. კიდევ კარგი, რომ გულკეთილი კაცი იყო, მაგრამ არც ისეთი მომთენი ვარგა, როგორიც უბედური მამაჩემი იყო.

მეც საჩქაროდ გამოვეთხოვებოდი და ფალსბურგისკენ მივეშურებოდი. გამოვიდოდა გარეთ საწყალი მამაჩემი, იღგა და მიყურებდა, ვიდრე ქვევით ჩავიდოდი და მივეფარებოდი რასმე.

ჩავიდოდი ნათლიაჩემთან, საჩქაროდ ვისადილებდი და გავიპარებოდი... დიაღ, ბაღზედ გადავივლიდი, არავინ დამინახოს და ვისიმე მგზავრის საქონელი არ დამაჭედინონ-მეთქი.

ერთი თხუთმეტი წუთის შემდეგ ქალაქშიაც ჩავიდოდი. მივდიოდი, მაგრამ ვერასა ვხედავდი. საწყალი ტრიბოლენი თავის აფთიაქიდან სალამს მაძლევდა; მე კი ისე ვიყავ ჩემი ფიქრებით გართული, რომ ყურადღებასაც არ ვაქცევდი. აგერ შოველის დუქანიც, თავისი წიგნებით და გაზეთებით. ხალხით სავსეა იქაურობა. ვინ გინდათ, რომ იქ არა ნახოთ: პატრიოტები, ჯარისკაცები, მოქალაქენი, და ასე გასინჯეთ, ჩვენი ძველი ბატონებიც კი. აგერ ჩემი მარგალიტაც; დგას დაზვის უკან და ზოგს გაზეთებს აწვდის, ზოგს წიგმს:

— აი, ბატონო, ინებეთ „პარიზის რევოლიუცია“, ექვსი შაური გახლავთ. რა გნებავთ, ბატონო? „სასახლის უწყებანი“, აღარ გახლავთ, სულ გაიყიდა.

ახლაც მიკვირს, როგორ ასდიოდა იმოდენა მუშტარს. მაგრამ

რაც უნდა გართული ყოფილიყო საქმეში, დამინახავდა თუ არა, პირს ღიმილი მოუვიდოდა და მხიარულად შემომძახებდა:

— ბიბლიოთეკაში გადი, მიშელ! მამაჩემი მანდ არის. მეც ახლავე გამოვალ. ხელს ჩამოვართმევდი და მეორე ოთახისაკენ გავწევდი. მარგალიტა კი გულს მიკეთებდა:

— გაზეთები გადასინჯე, მიშელ, სალაპარაკოდ არა მცალია.

როცა კი უნდა მივსულიყავ, შოველი თავის ოთახში იჯდა და სულ რაღასაც წერდა. დამინახავდა, გამიღიმებდა და მეტყოდა:

— ოჰ, შენა ხარ, მიშელ? დაბრძანდი... უკაცრავად, ერთი ეს წერილი გავათავო.

• თანა სწერდა, თან ჩვენი სოფლის და ჩვენებურების ამბავს მეკითხებოდა. წერილი კი აღარ თავდებოდა. ბოლოს წამოვდგებოდი და ბიბლიოთეკაში გავიდოდი.

— ჰო, ჰო, მიშელ, შენ გაზეთები გადაათვალიერე. მანამ მეც გავათავებ ამ წერილს.

ბიბლიოთეკა ყოველთვის საესე იყო ხალხით, მეტადრე იმ დღეს, როდესაც დილით ფოსტა მოდიოდა და ახალი გაზეთები მოჰქონდა. იქ უნდა შესულიყავით, თუ ნახვა გინდოდათ ვისიმე; სულ იქ იყვნენ: თევენო—ქალაქის გაიგეობის წევრი; დიდიე ჰორცუ—მეჭულე, სამხედრო მოედანზედა ჰქონდა ღუქანი; ექიმი სტეინერი, რომელიც შემდეგში ოცი წლის განმავლობაში მამასახლისად გვყავდა; როტენბურგი, ლაფრენე, დაპრეო და სხვანი; სულ იქ იყვნენ და ღრმად ჩაფიქრებულნი ჩასცქეროდნენ ხოლმე გაზეთებს. ზოგი იქვე წერდა წერილებს; მეც გაზეთს ავიფარებდი, ვითომ ვკითხულობდი, და თვალი კი მარგალიტაზედ მქონდა. ვიჯექი და შევცქეროდი! ისიც ერთ წამს არ მოისვენებდა თავის დაზვის უკან: მიდი-მოდიოდა, დაცქრალებდა და წამდაუწუმ გადმომხედავდა. ხანდახან შემოვიდოდა, ახალ რასმე გაზეთს მომცემდა და მიჩურჩულებდა:

— ეს წაიკითხე, მიშელ, ძალიან გესიამოვნება!

დიდი ხანი ვიჯექი ხოლმე ისე გაზეთ აფარებული, თუმცა რომ მკითხოთ, რას კითხულობდიო, ღვთის წინაშე ველარას მოგახსენებთ. ვკითხულობდი კი არა, მარგალიტას შევხაროდი, მარგალიტას შევყურებდი, რადგან ვიცოდი, რომ კვირამდე იმის ნახვას ველარ ვეღარსებოდი. და მთელი ქვეყანა რომ მომდგომოდა ჩემის ბედის სამღურავს ვერავინ მათქმევინებდა.

რომ დამინახავდა შოველი ისე მორთულს და წვერმოპარსულს, უშმაკურად ჩაიცინებდა და მუქარით თითს დამიქნევდა; მეც შემრცხვებოდა, გავწითლდებოდი... ის კი ბურჩუთის კოლოფს გახსნიდა და შემომთავაზებდა:

— ბურნუთს არ ინებებთ, მამულიშვილო?

ეგ არის, დიად! ახლა ეგ შემაყრევინე ცხვირში? რა უნდა თქვას მარგალიტამ? — ფეიქრობდი ჩემს გულში და მადლობას ვუხდიდი შოველს:

— არა, ბატონო, გმადლობთ, თავს ამატკივებს!

— კარგი ერთი! საყელოს გასვრა გეჯავრება, განა, შე არისტოკრატო შენა! — დამცინოდა შოველი. მაგრამ რაც უნდა დაეცინა, მე მაინც ვგრძნობდი, რომ დიდი პატივისცემით და სიყვარულით მეკიდებოდა. ძალიან კარგად იცოდა, რომ მთელი ხუთი-ექვსი საათი მარტო გაზეთების წასაკითხად მე იქ არ დავრჩებოდი და, თუ ვრჩებოდი, ალბათ გაზეთების და პოლიტიკის გარდა იქ სხვაც იყო რამე ჩემი მიმზიდველი. ჰკვირავს კაცი იყო, გამოცდილი და იმისთანა თვალი არა ჰქონდა, რომ ჩვენი საქციელი არ შეემჩნია. და რადგან არას გვიშლიდა, მაშასადამე მოსწონდა ჩვენი განზრახვა და თავის დროზე სრულს თანხმობასაც გამოგვიცხადებდა. ეს კი იყო, რომ ყოველთვის, როდესაც კი შეიძლებოდა, სულ იმას მეუბნებოდა, რაც შეგიძლიან მეტი ისწავლე და კარგი წიგნები წაიკითხეო. შოველის ბიბლიოთეკა ჩემს ხელთ იყო და რა წაგნიც უნდა მომწონებოდა, გადმომიღებდა და მომცემდა, შინ წაიღეო.

სამწუხაროდ შოველის სახლი უკვე გაყიდული იყო და წიგნის კითხვა იქ აღარ შეიძლებოდა. შინ ვკითხულობდი, დამე ჩემს ბალახანაში და ახლა ამან გამოიწვია ერთი ვაი-ვაგლახი მე და დედ-ჩემს შორის: დამე სანათი ნუ გინთია, ძვირია, ფული იხარჯებაო! მე რომ ყოველ დილით ზანდუქში არ ჩამეკეტა ჩემი წიგნები, დარწმუნებული ვარ, ჩემს მოსვლამდე ერთი აღარ დამხვდებოდა: ნაკუწ-ნაკუწად დაჰხრეწდა დედაჩემი. იმავე თავიდანვე სულ იმას გაიძახოდნენ ბერები, წიგნის ცოდნა სულის წამწყმედი, ვითარცა ხე კეთილისა და ბოროტისა, რომელსა ზედან მაცდურმა ადამის ვაშლი მოგლიჯა ჩვენდა დასაღუპადაო, და სხვ. საქმე ის იყო, რომ ყველა წიგნზედ მეტად ბერები დაბადების და სახარების კითხვას გვიშლიდნენ: ეშინოდათ, წაიკითხავენ და დარწმუნდებიან, რომ ჩვენ სხვ-ფრივ ვცხოვრობთ, ვიდრე სამღვთო წერილი გვიწერავსო. აქედან ადვილად წარმოიდგენთ რა გაუნათლებელი იქნებოდა ჩვენი ხალხი 1789-მდე. კლუბში შოველი სულ იმას გვეუბნებოდა, წიგნები იკითხეთო; და მართალიც იყო, რადგან სიღარიბე ხომ საშინელებაა და გაუნათლებლობა კიდევ უარესი.

ჩვენში რომ ისე იყო, სხვაგან რა იქნებოდა, რადგან აღზას-ლორენი ბევრით სჯობდა ზოგიერთ სხვა თემებს. მახსოვს, მთელი ჩვენი კლუბი განცვიფრებული დარჩა, შოველმა რომ ქანსონეს წერილი

წაგვიკითხა. კანონმდებელ კრებას ვანდეში და ოროვე სევერში გაეგზავნა ბ. ჟანსონე სარწმუნოებრივი არეულობის მიზეზების გამოსაკვლევად. ვერ წარმოიდგენთ, რა დაუჯერებელ ამბებს იწერებოდა იგი იქაურების გაუნათლებლობაზე და — პირდაპირ ვიტყვი სიბრიაყეზე. მაშინ დავრწმუნდით, რომ ჩვენ არა გვიშავდა რა და სამშობლოს ვანდელების გაუნათლებლობისა უფრო უნდა ჰქონებოდა, ვიდრე გარედან მომავალი მტრის ჯარებისა.

აი, რას იწერებოდა ბ. ჟანსონე თავის მოხსენებაში: აქაური გლეხ-კაცობა კონსტიტუციის მომხრე მღვდლებს სდევნის და დღე კეტს არ აკლებს და ღამე თოფის ტყვიას; კონსტიტუციის მოწინააღმდეგე მღვდლები ძველებურად სწირავენ, ოღონდ ეკლესიებში კი არა. თავიანთ სახლებში. ხალხი იმდენად განუვითარებელია, რომ ღვთის მაგივრად ბერებსლა ლოცულობენ და ძალიან ძნელია. თითქმას შეუძლებელია, კონსტიტუციის მნიშვნელობა შევაგნებინოთ; ეპისკოპოსს ბორეგარს საიდუმლო ბრძანება გაუცია, არც ერთმა ვანდელმა მღვდელმა ეკლესიაში აღარა სწიროს, რადგან ეკლესიაში სიარულით შეიძლება ხალხმა კონსტიტუციის ერთგული მღვდლებისა გაიგონოს რამეო. ყველა მღვდელმა სადმე მიყრუებულ ალაგას შეაგროვოს თავისი სამწყსო, სადმე გამოქვაბულში, ან ტყეში, ან საბძელში, იქა სწიროს და ისე გააგონოს სიტყვა ღვთისა; მართალია მწირველს ხელთ არა ექნება რა, მაგრამ სწორედ ამით უნდა ისარგებლოს და ჩააგონოს ხალხს, რომ იგი იძულებულია ასე ფარულად სწიროს, რადგან სარწმუნოება და მისი კეთილი მსახურნი ღვენილ არიან კონსტიტუციის მიერ; ამიტომ არის ასე ფარულად ჩვენი წირვა-ლოცვა და თუ გაგვიგეს, შეიძლება წამებაც მოგვაყენონ, როგორადაც ქრისტიანობის პირველ ხანებში იყოო...

მაშინ კი ყველა დავრწმუნდით რა საშიში იყო ვანდელების აჯანყება. შოველი ამტკიცებდა, კონსტიტუციის მოწინააღმდეგე მღვდლებს ბრძანება აქვთ — ჩვენში ხალხი ააჯანყონ, რომ მით უფრო ადვილად შემოუძღვენ გახიზნული დიდებულნი გერმანელების ჯარსაო. და რადგან ჩვენი მტრები ჩვენში განხეთქილების ჩამოგდებას ცდილობენ, ჩვენ უნდა ვეცადნეთ და ყველგან ერთობას და ძმობას ვქადაგებდეთ, რომ ღირსეულად დაფუხვდეთ სამშობლოს მოღალატეებსაო.

საზღვარგარეთიდან მომავალი ვაჭრები გვეუბნებოდნენ, ვორმში, მაინცში და კობლენცში თხუთმეტიათასი თავადაზნაურია შეგროვილი და გერმანელ ჯარებსლა ელიან, რომ წინ წამოუძღვენ და თავიანთ სამშობლოში შემოიყვანონ; ლეოპოლდი და ვილჰელმი კარგს შემთხვევასლა ელიან, რომ თავიანთი ჯარები ლორენში შეი-

ყვანონო. და ჩვენ, რასაკვირველია, უნდა ვცდელიყავით, ყველაფრით მზად დავხვედროდით. საერო კრებამ დაადგინა 9 ნოემბერს 1791 წ. — რეინის გაღმა მყოფ ფრანგებს ამბოხება ბრალდებით და, თუ პირველ იანვრამდე არ დაიშლებიან, დასჯილ იქნებიან სიკვდილით და მათი მამულები საერო საკუთრებად იქნება ჩარიცხულიო.

წინააღმდეგი ვარო, — ბრძანა მეფემ.

მაშინ უცბად აჯანყდნენ ბრეტანი, პუატუ, ჟევოდანი; ყველგან ბერები დადიოდნენ და, საცა კი გაჯვარედინებულ გზასა ნახავდნენ, მაშინვე ჯვარცმას ამართავდნენ; გამვლელსა და გამომვლელს ნაკურთხ კრილოსნებს, ხატებსა და შენდობას *) ურიგებდნენ; ყველგან იმას გაიძახოდნენ, რომ კონსტიტუციის მომხრე მღვდლებისას არც ნათლობასა აქვს მალღი, არც ჯვარისწერასაო; კონსტიტუციის მომხრეები ყველანი დასწყევლეს და შეაჩვენეს და თანაც ბრძანება გასცეს: ვისაც ჭეშმარიტად სწამს ღმერთი და სულის წაწყმედა არ უნდა, ისე ერიდოს კონსტიტუციის მომხრეს, როგორც უწმინდურს და აღარც ემეზობლოს და აღარც იმეზობლოს.

საქმე იქამდე მივიდა, რომ ცოლ-ქმარნი იყრებოდნენ, მამა-შვილნი საუკუნოდ შორდებოდნენ ერთმანეთს. ზემოდ მოხსენებულ თემებში მილიციისთვის ბიჭებს არ იძლეოდნენ. ამ არეულობამ დაჰბადა ივანე შუანი და შინდერჰანი, რომელნიც ისე დათარეშობდნენ, თითქო მტრის ქვეყანაში არიანო და, საცა კი მოასწრებდნენ ვისმე, გაუძარცვავს არ გაუშვებდნენ. დიდი სახელი გაითქვეს მაშინ ამ ყაჩაღებმა, მეტადრე ივან შუანმა, რომელმაც მებატონეებისა და სამღვდელოების სიტყვით, დიდი სამსახური გაუწია მეფეს და სარწმუნობას. შუანს იმისთანა სახელი ჰქონდა, რომ ვანდელები თავდაპირველად იმის წინამძღოლობით და იმის სახელით აჯანყდნენ.

კანონმდებელ კრებას უნდოდა დასაწყისშივე შეეყენებინა აჯანყება და დაადგინა 29 გიორგობისთვის, რომ ის მღვდლები, რომელნიც კონსტიტუციას ერთგულებას არ შეჰფიცავენ, პენსიას აღარ მიიღებენო, იმავე დადგენილების ძალით ამ მღვდლებს აეკრძალათ წირვა, არამც თუ ეკლესიაში, კერძო სახლებშიაც კი; ბოლოს გამოცხადებული იყო, რომ ვინც კი გაბედავს და სარწმუნობისა გამო უთანხმოების ჩამოგდებას ეცდება, განდევნილი იქნება სამშობლოდანო.

*) შენდობას ბერები ჰყიდნენ და არ იყო იმისთანა ცოდვა, რომ ფულით შენდობა არ ეყიდა შემცოდეს. შეიძლებოდა მომავალი ცოდვების შენდობაც ეყიდა კაცს და ხშირად მოხდებოდა, რომ ხვალინდელი ცოდვის შენდობას ყიდულობდა ვინმე ბერისაგან და მეორე დღეს იმავე ბერსა სძარცვავდა.

მაგრამ ამ დადგენილებაზედაც იგივე ბრძანა მეფემ— წინააღმდეგი ვარო. ერთი სიტყვით, რასაც კი ჩვენი დაღუპვა შეეძლო, მაშინვე ხელს მოაწერდა, რაც ჩვენი სასარგებლო იყო, უარსა ჰყოფდა — წინააღმდეგი ვარო. შემდეგში წერილები იპოვეს, რომლებიც ჩვენს მეფეს პრუსიის მეფისათვის მიეწერა იმ დროს. ყველა წერილებში ერთი და იგივე ვედრება იყო: დაჩქარდი, მომეშველე, თორემ დავიღუპეო! მაშინ კი დავრწმუნდით, რომ ჩვენი მეფე შველას ჩვენს მტრებსა სთხოვდა და ქვეყანას დასაღუპავად აღწევდა, ოღონდ თითონ და დიდებულთ არა დაჰკლებოდათ რა. დიდი უბედურება დაატყდა საფრანგეთს, მაგრამ ვინ იტყვის მეფე მართალი იყო, სულ ხალხის ბრალია? როდემდის უნდა ვყოფილიყავით ცხვარივით გაჩუმებულნი? როდემდის უნდა ებტყვნათ და ეკრიჭათ საწყალი გლეხკაცი დიდებულთ, რომელთა დიდებულება მარტო ის იყო, რომ მუქთახორად ეყარნენ და სხვის ნაჭირნახულევს შეექცეოდნენ!

იშვიათად მოხდებოდა, რომ კანონმდებელი კრება შეთანხმებულიყო რაზედმე: ბრისსო, ვერნიო, გაღე, მათე დიუმა, ბაზირი, მერლინი და სხვანი სულ სხვადასხვა მხრივ უყურებდნენ საგანს და სხვადასხვას გაიძახოდნენ; მაგრამ იმაზედ კი ყველანი თანახმანი იყვნენ, რომ მეფე ლუი XVI ღირსი არ იყო ჩვენის ნდობისა და დედოფალი მარიამ-ანტუანეტა ხომ არა და არა. ამავე აზრს. ადგა მთელი ერი. მთელი ერი ერთსა და იმავე ფიქრს მოეცეა და იმ საშინელ ზამთარში 1791 — 1792 წ. სულ იმას ჩიოდნენ, დავიღუპებით, გაზაფხულდება და ომიანობაც ატყდებაო.

— თესლსაც ველარ ავიღებთ, თესლსა! გაზაფხულდება თუ არა და გაშრება გზები, მაშინვე ომი ატყდება. ნეტავი აგრე! ამისთანა სიცოცხლეს სიკვდილი არა სჯობიან? რაც მალე იქნება, ის უკეთესი ეს სამოცდაათი წელიწადაა სულ იმას გაიძახიან, — საბრალო მეფე-დედოფალი, დიდებული თავადაზნაურნი და ეპისკოპოსნი! რამოდენი ტანჯვა-წვალება აიტანეს, რა უბრალოდ ეწამნენო! აბა ერთი ჩვენს მთაში მობრძანებულიყვნენ ეს გულჩვილი ცრემლთმფრქვეველნი და ჩვენი ცხოვრება ენახათ! აბა ენახათ, რამოდენა ხალხი იყო დამშეული, — სხვას ნულარას იტყვით — კარტოფილიც კი არა ჰქონდათ, რომ იმით მაინც გაეძლოთ კუჭი. მაშინ დარწმუნდებოდნენ, რომ ვინც ძველებურად ქვეყნის ბატონობას და პატრონობას ცდალობდა, თუმცა ამისი არც უფლება ჰქონდა და არც შეძლება; ვინც ჩვენ შორის უთანხმოების ჩამოგდებას ცდილობდა და ამ მიზნის მისაღწევად საერო და კანონმდებელ კრების დადგენი-

ლებათ ეწინააღმდეგებოდა და თან ყოველგვარ სიცრუეს და ცილისწამებას კადრულობდა, რომ ხალხის თვალში პატრიოტებისთვის ჩირქი მოეცხო; ვინც თავისივე მზგავსი ადამიანის პირუტყვივით დამონავებასა ცდილობდა და, თუმცა მაცხოვარი იმიტომ აწამეს, რომ სწორედ ამ დამონავებულთა განთავისუფლებას ქადაგებდა, მაინც ღვთის განგებით და სამღვთო წერილით იმართლებდა თავს: მე რა ვქნა, ღვთის განწესებულს მე ხომ არ შევეცვლიო! კარგად უნდა სცოდნოდათ, ვინც ამას ჩადიოდა, რომ ღმერთი არავის რას აპატიებს და, თვით იმათ თუ არა, იმათ შვილებს და შვილიშვილებს დასჯის საშინელო სასჯელით.

როდესაც ჯარის ბინაზედ, ან სოფელში, ან მეტადრე ბაზრობა დღეს სახლში რამე ცუდი ხმა გავარდებოდა, ისე აღელდებოდა: ხოლმე დიდი და პატარა, რომ ყრუც კი გაიგებდა ბრაზმორეული ხალხის გრგვინვას. პატრიოტები ერთს წამს გაჩუმებულნი, ფერმიხდილნი შესცქეროდნენ ხოლმე ერთმანეთს, ერთ წამს მართო: მაშინვე თვალწინ წარმოგვიდგებოდა კაინის ცოდვა და გულში ვიმარხავდით ყოველგვარ უსიამოვნებას. გული უიმისოდაც სავსე გვქონდა ნალველით და ერთი წვეთი რომ კიდევ მომატებოდა, რა უშავდა. ზღვაში ვერ ჩავა იმდენი წყალი, რამდენი ვარამიც საწყალი კაცის გულში დაეტევა. სავსე იყო გული ნალველით! სავსე იყო და ემატებოდა და ემატებოდა! არ გადმოვიდეს, თორემ ქვეყანას წალეკავსო, ვიძახდით, და ვცდილობდით არ გადმოგვეშვა.

მაგრამ ერთი სასიამოვნო ამბავიც მოხდა სწორედ იმ დროს: ლეტუმის ქალის ქრისტიანისი და კლოდ ბონომის ქორწინება, 1792 იანვარში, ჩვენს სოფელში ეს პირველი კონსტიტუციური ქორწინება იყო. მას შემდეგ, რაც ლეტუმის საეკლესიო მამულები შეიძინა, ძალიან წამოიწია და ჩვენს ახლო-მახლო ისეთი სახელი გაუვარდა ჰიმლიდრისა, რომ გვარისწილ „მდიდარს“ უწოდებდნენ. საქორწინოდ ლეტუმის თავისი მესსენელი ნათესავეები დაეპატიუნა და, თუმცა ყველანი არ ეწვივნენ, მაგრამ უმთავრესნი კი მოუვიდნენ: მორის ბრიუნე — კურსელის კლუბის თავმჯდომარე და ერთი ყმაწვილი ქალი — სუსანა შასენი.

სამამასახლისო სავსე იყო ხალხით: შოველი, ნათლიაჩემი თავის მილიციის რაზმის უფროსის ტანისამოსით, კოშარი, ჰიურე, ჩვენი უწინდელი თავმჯდომარე რაფიელ მანკი და ბევრი სხვა პატრიოტები. როდესაც იოსებ ბუალომ სამფერი სარტყელი შემოირტყა და კონსტიტუციის სიტყვები წარმოსთქვა: „კანონი გაერთებთ თქვენ“, იგრილა იმოდენა ხალხმა და ერთხმად შესძახა:

— თავისუფალ ერს გაუმარჯოს! კონსტიტუციას გაუმარჯოს! ძველებური ურიგობა კი აღარ იყო, რომ მოვიდოდნენ მეფედედოფალი და... მღვდელი ჭუჭყიან ქალაღდის ნაფხრეწებს მოსძებნიდა საღმე და იმაზედ დასწერდა — ვინ და როდის დაქორწინდნენ; იმ ქალღდებს მიაგღებდა საღმე და... ჩვენს დროში დარწმუნებით არავინ იცოდა ან როდის იყო დაბადებული, ან როდის იყო მონათლული, რადგან საეკლესიო დავთარი შემღდგში შემოიღღეს და დღი შრომა დასჭირდათ, რომ ცოცხალნი მაინც ჩაეწერათ შივ, თორემ მიცვალებულებს ვიღა ჩიოდა!

ამ ახალგვარმა ჯვრისწერამ ძალიან ასიამოვნა ყველანი და იმისთანა სიმღერით და ცეკვით წავეღით შინისკენ, რომ მეტი აღარ შეიძლებოდა.

წინ ნალარა მიგვიძლოდა. ხომ საშანელი სიცივე იყო, და ისე შევხურღით, რომ თოვლი და ყინვა აღარავის ახსოვდა. მე მარგალიტა მიმყავდა ხელიხელ გაყრილი, ჩვენ წინ ქრისტინე და კლოდ ბონოში მიდიოდნენ და ეტყობოდა, ქრისტინეს აღარც კი აგონღებოდა თავისი წინანღელი მოწონებული და სრულიად კმაყოფილი იყო თავისი ქმრისა. ჩვენს უკან უფროსნი მოდიოდნენ და დარბაისლურად ბაასობღნენ საქმეებზედ. ყველანი მხიარულად იყვნენ, თვით შოველიც კი, ლეტუმის ცალი ხელით ქუღი ეჭირა, ქარმა არ მომტაცოსო — და ყვიროდა:

— არ დღივიწყოთ, ხალხო, დღეს იანერის სამია და რავინღ ზამთარი ჰყინავღეს...

ეგ ხომ ეგრე, მაგრამ შინ რომ მივეღით, ძალიან შეცივნულები ვიყავით. ქორწილი ნათლიაჩემის დუქანში გადაიხადღეს, შინ ვერ დავტევთ ამოღენა სტუმრებსაო. წარმოიღღინეთ, რა სიამოვნებას ვიგრძნობღით ნამცივნი ხალხი, გაშლილ სუფრას რომ დავინახავღით. ძაან, ძაან დრო გავატარეთ! იმოღენი ძეხვი, ლორი და დოქები ელაგა სუფრაზედ, რომ მაგღდა იზნიქებოდა. ლეტუმის ცოლს სიხარულით ცრეძლი სღიოდა, ჩვენ კი ვისხედით და ვიღმურძლებოღით! შოველმა კარგი, თქვენი მოწონებული სიტყვა სთქვა: ძველებურ, პირვანღელ დროთაგან დარჩენილ ჩვენს სხვადასხვა გვარ დროსგატარების ნაცვლად, დრო არის უფრო აზროვანი და ხალხის გამანათლებელი რამ შემოვიღღოთო. ბევრი საღღეგრძელო გიახელით, ბევრი ვიხუმრეთ; მეტადრე უფროსებმა გადააქარბეს: იმისთანები თქვეს, რომ საწყალი ქალები კინაღამ სუფრიღან წამოიშალღნენ. აღარ არის, აღარ, ძველებური სიმხიარული! წავიღა ჩვენი დრო და მხიარული გულიც თან გაიყოლა! ყველაზედ მხიარულად, რასაკვირველია, მე ვიქნებოღდი: მარგალიტა გვერღით მყავდა და ჩემს ნეტარებას საზ-

ღვარი არა ჰქონდა. ვიცინოდით, ვხუმრობდით, თვალში ჩავცქეროდით და ვეკითხებოდით:

— კომპოსტო ხომ არ გნებავს, მარგალიტა? ღვინო? ერთი ნაჭერი ლორი?

მეფე-დედოფალზედ უბედნიერესნი ჩვენ ვიყავით. ისე ვისხედით სუფრაზედ, თითქო ქვეყანაზედ აღარა გვახსოვს რაო და სულ ერთმანეთის ალერსში ვიყავით; კიდევ კარგი, რომ ჩვენი არავის სცხელოდა და ყურადღებას არავინ გვაქცევდა.

ბოლოს, საღამოზედ, როდესაც ცეკვა გაიმართა და ჩვენი სოფლის ყმაწვილი ბიჭები და ქალები ყველანა შეგროვდნენ, მეც გავედი საცეკვაოდ და, რასაკვირველია, მაშინვე მარგალიტას მივმართე:

— მოდი, ერთი ჩვენც ავყვეთ ამ ტალღას, მარგალიტა!

მარგალიტა განცვიფრებული შემომყურებს. ბოლოს მკითხავს:

— რა ტალღას, მიშელ, რას ამბობ?

— აი, მცეკვავთა ტალღას.

— მე რომ ცეკვა არ ვიცი?

— კარგი ერთი! ყმაწვილი ქალი და ცეკვა არ იცოდეს! რა სათქმელია?!

გულს ძლივსლა ვიმაგრებდი: გულში ჩავიკრავ ჩემს მარგალიტას და გავიტაცებ-მეთქი! მაგრამ წარმოდგინეთ ახლა ჩემი განცვიფრება: მარგალიტას მართლა არა სცოდნოდა ცეკვა, სრულიად არა სცოდნოდა! ფეხები ერეოდა, კაბას ედებოდა. მე კი ჩემსას არ ვიშლიდი, არა მჯეროდა, რომ გასათხოვარ ქალს ცეკვა არა სცოდნოდა:

— მოდი, ერთხელ კიდევ ვცადოთ. შენ ფეხი ააყოლე სტეირს. ამაზედ ადვილი რა იქნება?

კუთხეში მივიყვანე და იქა ვცადეთ, მაგრამ ვერ მოახერხა. მე კი ისე მინდოდა მარგალიტასთან ცეკვა!.. გარს ხალხი შემოგვეხვია. ვილაყამ გაიცინა. მარგალიტას ეწყინა და ცოტა არ იყოს გაჯაერებით მიიხრა:

— არ ვიცი, არა! ხომ ხედავ, რომ არ ვიცი! თუ აგრე გინდა, განა უჩემოდ კი ვერ ითამაშებ. მე მასპინძელს მოვეხმარები.

აბა რაღა მიამებოდა უიმისოდ? ბევრმა ლამაზმა ქალმა მანიშნა:

— მოდი, მიშელ, ჩვენ ცეკვაც ვიცით და სიამოვნებითაც გამოგყვებითო. მაგრამ მე და სხვასთან ვისთანმე მეთამაშნა! ქვეყნის დაქცევას დავიჯერებდი და ამას კი ვერ წარმოვიდგენდი. ავდექი და სამზარეულოსკენ წავედი. სამზარეულო სამსე იყო ქალებით: ლეტუმის ცოლიო, ნიკოლიო, ნათლი-ჯალაბი, ეკატერინეო, სუსანა შასენიო და კიდევ ბევრნი სხვანი. საშინელი აღშფოთებულნი იყვნენ ყველანი და ერთიერთმანეთს აღარ აცლიდნენ:

— სირცხვილია, სხვა რომ არა იყოს რა! არა, პირიდან როგორ ამოსდით მაგვარი სიმღერა?!. განა დედოფალს აგრე უნდა ახსენებდნენ?.. კაცებისთანა დაუნდობელი ხომ არა იქნება რა! საუკეთესო რომ საძაგელია, სხვანი რა იქნებიან?

მეორე ოთახიდან პატრიოტების მხიარული ხარხარი ისმოდა და თანაც რალაცა ახალი სიმღერა. ამ სიმღერას მორისი მღეროდა, ზოგნი ბანს აძლეოდნენ.

მეც მაშინვე იმათკენ გავწიე. კარი შევალე და უცნაური სანახაობა დამხვდა. მორისს დაემკლავებინა, ქუდი გვერდზედ გადაეგდო, საკინძე გაეხსნა, ღონიჯი შემოეყარა და იმისთანას ცეკვავდა, რომ პირლია შეჰყურებდნენ ყველანი. იმისთანა ცქვიტად და მარდად ცქრიალებდა, თვალს ვერ მოასწრებდა კაცი. ხტოდა და თან რალასაც მღეროდა. პარიზელებს მეფის გასაჯავრებლად შეეთხზათ ეს სიმღერა და იმისთანა საშინელება ჩაერთოთ დედოფლის შესახებ, რომ უბრალო, ქუჩა-ქუჩა მაწანწალა დიაცს არაუინ აკადრებს იმას. მორისი თამაშობდა და მღეროდა; გარს პატრიოტები ეხვეოდნენ და იმისთანად ხარხარებდნენ, რომ ზოგი თავს ველარ იმაგრებდა, იქვე სადმე მიეგდებოდა ყურთამდე პირლია და თვალცრემლიანი. მორისი კი, რაც ძალი და ღონე ჰქონდა, ფეხებს აფშლატუნებდა და იმ დაუბოლოვებელ სიმღერას ამბობდა.

ამ სიმღერაში აწერილი იყო სუყველაფერი, რაც კი დედოფალს ჩაედინა რამე, კარდინალის სამკაულებიდან დაწყებული; იმისთანა ლანძღვით და უწმაწური სიტყვით იყო მოხსენებული დედოფალი, რომ მეც კი შემრცხვა, ისინი რომ გავიგონე. სხვანი კი დიდი სიამოვნებით ისმენდნენ დედოფლის მასხარად აგდებას და, რომ გეკითხათ, ეგეც ცოტააო! გეტყოდნენ. მეფე-დედოფალმა იმდენი სისხლი სწოვეს საწყალ ხალხს, რომ ახია იმათზე! ნეტავი უფრო უვარესი შეთხზანო.

სიმღერამ ისე გაიტაცა ყველანი, რომ ბოლოს თვით მოხუცებულმა ლეტუმიემ, ნათლიაჩემმა და ჩვენმა უწინდელმა თავმჯდომარემ რაფიელმაც კი მოინდომეს მორისთან ხტომა და ფეხების ქნევა.

რა არის წუთისოფელი ერთ ღროს ნათლიაჩემის დუქანში მარტო დიდებულნი და ჯარის უფროსნი ქეიფობდნენ და სიმღერასაც მეფე-დედოფლის საქებას მღეროდნენ. გააცივებდნენ ღვინოებს, თან მოყვანილ ქალებს სულ ვარდის თაიგულებში ჩასვამდნენ და — ქვეყანა ჩვენიაო, გაიძახოდნენ. დღეს კი იმავე დუქანში სულ სხვაგვარი სიმღერა ისმოდა. სიმღერა მეფე-დედოფლის მლანძღავი და შემარცხენელი. ამ სიმღერას დიდად უნდა დაეფიქრებინა დიდებულნი, რადგან ეს იმისთანა უტყუარი ნიშანი იყო ახალი ღროისა, რომ ვი-

საც კი შეგნება ჰქონდა რამე, დიდი შედეგები უნდა გამოეყვანა ამ ლექსიდან.

მართლა საშინელი, სამარცხვინო ლექსი იყო. გარეთ ქალები ჯავრობდნენ, მაგრამ პატრიოტებს იმათი არ ესმოდათ რა და გიჟებით ხარხარებდნენ.

შოველი არ აპყვა მოთამაშეთ. კუთხეში იჯდა, ცალი თვალი მოექუტა და კმაყოფილებისაგან გამხიარულებული სახით შესცქეროდა იმათ ხტომას. თან ცალი ხელით იმათი ცეკვის ზომაზედ დანას იქნევდა და ხანდახან გადასძახებდა:

— პა, ყოჩაღ, ლეტუმე! აი აგრე, ეგ კი კარგად მოგივიდა! რას გაჩერდი, ივანე? რა მალე ისწავლა ჩვენმა თავმჯდომარემ!

იმ კილოთი აქეზებდა მოთამაშეთ, რომ ცოტა არ იყოს დაცინვაც იყო, მაგრამ ვის რა ესმოდა?

და ახლა, თუ გნებავთ გაიგოთ. რა სიმღერა იყო ის საშინელი სიმღერა, რომელიც ჩვენში პირველად მორისმა სთქვა, ამასაც მოგახსენებთ: ეს გახლდათ ყველასაგან ცნობილი „კარმანიოლი“, რომლის სახელი მას შემდეგ მთელმა ქვეყანამ გაიგო. ეს ის სიმღერა გახლდათ, რომელიც იმღერეს პარიზელებმა, როდესაც მტრის ზარბაზნების ასაღებად მიდიოდნენ:

აბა, ძმანო, კარმანიოლი!
ქვეყნისთვის თავს ვინ დაზოგავს?
გაუმარჯოს ტკბილს, საამურს,
გულის წარმტაცს ზარბაზნის ხმას!

მთელი რევოლუცია გალექსეს ამ კარმანიოლში. ახალი მოხდებოდა რამე და იმასაც გალექსავდნენ და კარმანიოლს მიუმატებდნენ. წინანდელი აღარც კი გვახსოვდა, რომ ახალზედ სიცილით ვახოცებოდით.

ბოლოს, როდესაც პატრიოტებმა მეტი ვეღარ შეძლეს და დაქანცულნი სულის მოსაბრუნებლად ღვინოს მისცვივდნენ, შოველი წამოდგა და თქვა:

— მამულიშვილნო, ღეთის წინაშე კარგად იმღერეთ, კარგადაც ითამაშეთ და ყველანი გაგვამხიარულებთ, მაგრამ, მგონი, ახლა წასვლის დროც იყოს, თორემ ზვალ საქმისთვის ვეღარ გამოვდგებით.

— ნეტავი შენ! — შესძახა ნათლიაჩემმა. — რა დროს შინ წასვლაა? ქორწილია!

— მე კი მეტი აღარ შემიძლია და! — თქვა შოველმა და ქუდი აიღო.

ქალაქელები ყველანი გაემზადნენ წასასვლელად.

— თითო ყანწი კიდევ! — იძახდა ნათლიაჩემი. — გზა მაინც დაგვალოცვინეთ, დალოცვილებო!

— კმარა, კმარა, თორემ შინ ველარ ჩავალთ, — უპასუხა შოველმა და ლეტუმისთან მივიდა გამოსათხოვებლად.

მე კი მარგალიტასთან მივედი, წამოსასხამში შევახვიე და ვუთხარ:

— კარგად გაეხვიე, თორემ საშინელი ყინვაა.

მარგალიტა ჩაფიქრებული იყო. შოველი კი მხიარულად უყურებდა ყველას და აჩქარებდა თავის ქალს:

— აბა, მარგალიტა, ჩქარა მივდივართ?

ჩემი თქმა რა საჭიროა, თქვენც კარგად იცით, რომ მე მარგალიტას კარგა მანძილზედ ჩავაცილებდი. ქუდი ყურებზედ ჩამოვიციე, მკლავი მკლავში გავუყარე და გავწიეთ ქალაქისკენ. დანარჩენი საზოგადოება უკან მოგვდევდა. მთვარიანი ღამე იყო, ცა ვარსკვლავებით მოჭედილი; ბუნებას თოვლის ზეწარი გადაჰფენოდა და იმისთანა სინათლე იყო, ისე კაშკაშებდა ჩვენი მთა და ჩვენ ქვევით თვალგადაუწვდენელი მინდორი თავისი ტყეებით, სოფლებით და მაღალი სამრეკლოებით, თითქო დღე არისო. ყინავდა, ჩვენ ფეხქვეშ მინასავით იფხვნებოდა თოვლი.

რა მშვენიერია მოწმენდილი, ათასფერად მოციმციმე, ვარსკვლავებით მოჭედილი ცა! მშვენიერია მის თვალუწვდენი სივრცე, რომელშიც, რაც მეტს დააცქერდები, უფრო მეტსა და მეტს ვარსკვლავს იპოვი და უფრო მეტად იგრძნობ ადამიანის გონების სისუსტეს და ბუნების ძლიერებას და სიდიადეს. და თუ მაშინ სატრფოც გვერდთა გყავს, ხელს მისი ხელი გითბობს, გულს მისი გულის ძგერა გვხვდება და გრძნობ, რომ ისიც შენსავით ტრფობით არის გატაცებული, სიყვარულის ალს ველარ გაუძლებ, გულში ნეტარებას ველარ დაიტევ და შენდა უნებურად დიდებას შესძლენი ყოვლად წმინდას... დიად, ნამდვილი საყდარი, ნამდვილი საკურთხეველი ღვთისა ზამთრის მოკაშკაშებული მთვარიანი ღამე ყოფილა.

ჩვენს უკან ლაპარაკით მოდიოდნენ შოველი, რაფიელი, კოლენი და სხვანი, ვინც კი ქალაქში ცხოვრობდნენ. ის იყო დაღმართთან მივედით და ჩემდა უნებურად ერთი ძველებური გლეხკაცური სიმღერა დავიძახე, ბავშობაში გაგონილი. ზამთრის მიძინებულ, მიყუჩებულ არეს თავისუფლად მოედო და შორს, შორს მთამდე გაისმა ჩემი ხმა. მეც არ ვიცოდი, რას ვმღეროდი. მე კი არა, გული მღეროდა სიყვარულს. მარგალიტა უფრო ალერსით მეკვროდა და ყურში ჩამჩურჩულებდა:

— რა კარგი ხმა გქონია, მიშელ, რა საამური ხმა გქონია.

უკან კი ყველანი გაჩუმებულიყვნენ და ყურს მიგდებდნენ. დაღმართი რომ ჩავიარეთ, მარგალიტამ შემაყენა, — დავუცადოთ, ისინიც მოვიდნენო.

გაეჩერდით. წინ შოველი მოდიოდა და შორიდანვე დამიძახა:

— როდი ვიცოდი, მიშელ, რომ აგრე კარგი სიმღერა გცოდნია. აქამდე შენი ხმა არსად გამეგონა. სწორედ მამაშენის ხმა გაქვს, ოღონდ შენი ხმა უფრო მძლავრია და თანაც ტკბილი. როცა „ადამიანის უფლებათა“ შესახებ სიმღერას გამოსთქვამენ, ჩვენს კლუბში შენ უნდა სთქვა პირველად ის სიმღერა.

— ნეტავი ერთი „კარმანიოლი“ გამაგონა მაგისგან ნამღერი! — თქვა რაფიელმა.

— ეჰ, ჩემო რაფიელ, — უპასუხა შოველმა, — კარმანიოლი ხუმრობაა. კარმანიოლი კარგია პატრიოტთა გასამხიარულებლად და სასაცილოდ, ერთი-ორი ხელადის შემდეგ. ჩვენ სულ სხვა გვინდა... ხალხსავით ძლიერი იყოს ღ: იმედიანი.

ერთმანეთს გამოვეთხოვეთ. ჩვენ ერთ პატარა ბილიქს ავყევით და შინისკენ წამოვედით, ისინი ქალაქისკენ დაეშენენ. ზემოდ რომ ავედით, შეეჩერდი, მარგალიტას გავაყოლე თვალი და თვალს გულიც თან გაჰყვა. უკან ჩამორჩომილიყო ჩემი მარგალიტა. როდესაც გზას უნდა მიჰფარებოდა, ერთხელ იმანაც გამოიხედა ჩემკენ.

ასე გაიარა იმ დღემ და იმ მშვენიერმა ღამემ. დღევანდლამდე ისე არიან აღბეჭდილნი ჩემს გულში, რომ ვერ მოვითმინე და დაწვრილებით გიამბეთ ძველი ამბავი.

IX

საერო საქმეები კი ისე დატრიალდნენ იმ დროს, რომ ცხადი იყო, უომრად ველარ გადავრჩებოდით; ჩვენი მტრებიც ძალიან დაურიდებლად და თავხედურად გვექცევოდნენ. კონსტიტუციის მოწინააღმდეგე მღვდლებმა ვანდეში ხალხი ააჯანყეს; ტრეველი და მაინსელი ეპისკოპოსები და მეტადრე კარდინალი როანელი უარესს გვიშვრებოდნენ: საზღვარგარეთ ბრძანდებოდნენ, და იქვე საფრანგეთის საზღვართან აგროვებდნენ. საცა მაწანწალა, უბინაო და ავაზაკი იყო საღმე, ჯამაგირს აძლევდნენ და ჩვენს ასაკლებად გზავნიდნენ. სოფელ-სოფელ დადიოდნენ იმათგან გამოგზავნილი კაცები — უწინდელი, აწ კონსტიტუციის მიერ სამსახურიდან დათხოვნილი მოხელენი — და საცა გარყვნილს, თავზედ ხელაღებულს ნახავდნენ ვისმე, ცოტა ფულს აძლევდნენ და მეტსა პირდებოდნენ, რევოლუციის და კონსტიტუციის წინააღმდეგი იყავით. ის კი არ იფიქროთ, ამას

ფარულად ჩადიოდნენო: არ მოგიკვდეთ ჩემი თავი! ისე იქცეოდნენ, თითქო ჩვენ მათი ყურადღების ღირსნიც არ ვიყავით. მაგრამ ჩვენებიც ფრთხილად იყვნენ და დასაწყისშივე შეაყენეს ამგვარი ხალხის გარყვნა. შოველმა დაიწყო, მას ლიქსპეიმელი ლალემანი მიჰყვა, მას შემდეგ იაკობელების ყველა მომხრე კლუბები და მთელს საფრანგეთში გაისმო ამ საძრახისი საქციელის წინააღმდეგობა. თუმცა მეფის ერთგული მოსამსახურე მინისტრები გაჩუმებულნი ბრძანდებოდნენ, თითქო გახიზნულთა საქციელის საძრახისს ვერას ამჩნევენო, კამილ დემულენმა, ფრერონმა, და ბრისსომ იმისთანა ამბები დააწიეს გაზეთებში ცალკე და კლუბში ცალკე, რომ იგივე მინისტრები იძულებულნი გახდნენ ბოლო მოეღოთ ამ გარყვნილებისათვის.

ერთი ამგვარი მომსყიდველთაგანი, ვილაც გახიზნულის ყმა, ლიქსპეიმში იდგა „დიდ-ირმის“ სასტუმროში. ქვეყანამ იცოდა. რომ დადიოდა და ჯარისკაცების შესყიდვას ცდილობდა: რევოლუციას გადუღებდათ და ფულით აგავსებთო. მაშ რა ექნათ დიდებულ ბატონებს? თითონ ხომ არ აიღებდნენ თოფს! ატარებდნენ თავიანთ მოსამსახურეებს და ფულით ცდილობდნენ შეესყიდათ საწყალი კაცი და სამშობლო ქვეყნის მტრად ექციათ. საკუთარი საქმის და ინტერესების დასაცველადაც კი მაინც გლეხკაცი უნდა ჰყოლოდათ, რადგან თითონ ღვთისა და მეფის წყალობით სულ გენერლებად იზადებიან და ჯარში ხელქვეითი უნდა ჰყავდეთ, რომ უთხრან: მოდი, შენი ძმა დამიმორჩილე, რომ შენზედ თავისუფლად ვიბატონო.

ერთ დილას, ის იყო იმის ოთახში რამდენიმე ყმაწვილი ბიჭი შევიდა, — კონსტიტუციის მოწინააღმდეგე მღვდელს გამოეგზავნა სოფლიდან: წადით, ნახეთ, ფულს მოგცემთო — დიად, ის იყო შევიდნენ ის ბიჭები და ჟანდარმებიც ზედ მიადგნენ და კარი დაურაკუნეს. გადაიხედა ფანჯრიდან, ქვევითაც ჟანდარმები დაინახა. ადგა და ზევით აძერა, ყავარში; მაგრამ ამაველი დაინახეს და ჟანდარმებიც თან დაედევნენ; ყავარში თივის მეტი ველარა იპოვნეს რა. იძრო ხმალი ერთმა ჟანდარმმა და ხან აქ ჩასცა თივას, ხან იქ! დააპერდა რაც ძალი და ღონე ჰქონდა და თან ყვიროდა:

— რა შექნა, ის ქვეყნის მტერი, ისა? არც აქ არის! არც აქ! აი, დალაზერა ღმერთმა!

ბოლოს მაინც მიაგნო ხმალმა და მწარედაც დააყვირა.

გამოათრიეს უბედური. ხმალს თირკმლებში გაეარა და საღამომდე ძლივსლა იცოცხლა. კიდევაც კარგი, რომ მოკვდა, თორემ იმის ოთახში იმისთანა წერილები იპოვეს გახიზნულთაგან მოწერილი, რომ ჩააქვავებდნენ. ფული რამდენიც გინდა მოგვთხოვე, — სწერ-

დნენ საზღვარგარეთიდან ბერები, — ოღონდ მანდ, საფრანგეთში, ხალხში არეულობა ატეხე და ერთმანეთს შეაბრძოლო.

დამარხეს და ახლა სხვებს დაუწყეს დევნა. კარგა ბლომდაც დაატუსაღეს. სულ კი იმისთანა ხალხი იყო, რომ ამ ქვეყნად წმინდა არა გააჩნდათ რა და, ვინც მეტს მისცემდა, იმას ემსახურებოდნენ. მამა ელეონორე სადღაც მიიმალა; დედაჩემი ისე შეაწუხა ამ ამბავმა, რომ სულ იმას-ღა წუწუნებდა — ახლა რა ვქნა, წირვა-ლოცვა სადღა მოვისმინო? ის მიიმალა, მაგრამ სხვანი კი ბევრნი დაიჭირეს და ღეთის წინაშე, ახიცი იყო, რომ შიგ საპატიმროშივე ამოხოცეს დამწყვედეულები, რადგან სულ იმისთანა კაცები იყვნენ დაჭერილები. რომელნიც ფულზედ სამშობლოს კი არა, საკუთარ სულსაც გაპყიდდნენ.

რეინს გაღმა, საზღვარგარეთ, სამს ალაგას იყვნენ შეყრილნი გახიზნულები: ეტენჭინგში, ვორმში თავად კოდესთან და კობლენცში უბრწყინვალეს თავად არტუასა და პროვანსელთან.

უბრწყინვალეს თავადთაგანი მარტო ერთიღა დარჩა საფრანგეთში, თავადი ორლენელი, რომელსაც შემდეგში „ფილიპე-თანასწორობა“ დაარქვეს; იმისი შვილი ცხენოსან რაზმის წინამძღოლად იყო ჩრდილოეთის ჯარში.

წარმოიდგინეთ, რა ყოფაში იქნებოდა ხალხი. რომ მოენდომებინათ, ერთი ღამის სავალზედ მეტი კი არა ჰქონდათ ჩვენამდე! შემოგვესეოდნენ და ატყდებოდა ომი და სისხლისღვრა. იმას კი ნუ იფიქრებთ, ხალხს დამარცხებისა ეშინოდაო; მარტონი რომ ყოფილიყვნენ, სიცილად არ გვეყოფოდა იმათი მუქარა; მაგრამ მაგარიც ის იყო, რომ მარტონი არ იყვნენ და! გახიზნულებს თან მოჰყავდათ პრუსიელი და ავსტრიელი ჯარები. გარდა ამისა ჩვენს ჯარს უცბად იმოდენა აფიცერი მოაკლდა, რომ დიდ და ძნელ შესავსებელ ნაკლად დააჩნდა დიდებულთა გაქცევა. თუმცა სიკეთეც დაგვდო ამ დრომ: დარწმუნდა მაინც ხალხი, რომ დიდებულთ სამშობლო არა სცოდნიათ და, მამასა-დამე, დიდი სისულელე მოგვდიოდა, რომ იმოდენა საუკუნეების განმავლობაში ჩვენი შრომით ვინახავდით და სამშობლოს მცველად მიგვაჩნდნენ.

მახსოვს ექვს ქრისტიშობისთვის ჩვენს კლუბში დიდი სიცილი გამოიწვია გახიზნულთა შესახებ ბაასმა. იოსებ გოსსარი — ტულელი სირაჯი გახლდათ — კობლენცში ყოფილიყო და თავის მგზავრობის ამბებს გვიამბობდა. დიდძალი ხალხი ვნახე კობლენცში, სულ ჩვენი ბატონები, საზღვარგარეთ გახიზნულები — ვინ გნებავთ რომ აქ არა ყოფილიყო? თავადაზნაურნი, ბერები, მონოზნები, და ურიცხვი მოსამსახურეები და მოახლეები, რათა ზოგმა თავი დავარცხნოს ბა-

ჯონს, ზოგმა პირი დაბანოს, ზოგმა ტანთ ჩააცვას, ზოგმა წვერი მოპარსოს, ზოგმა ფრჩხილები მოსჭრას, ზოგმა გახადოს, ზოგმა დააწვინოს, ზოგმა ფეხის გული დაფხანოს და ტკბილი ნანინათი დააძინოსო.

უცნაური ზუმარა კაცი იყო გოსსარი, ნამდვილი ლორენელი და იმისთანა სასაცილოდ გვიამბობდა გერმანელთა შორის ჩვენი ბატონების ყოფას, რომ სიცილით დაეიხოცენით. გერმანელებმა ჩვენი ენისა არა იციან რა და გახიზნულებმა გერმანულისა. ერთი მოხუცებული, დიდებული მარკიზის ქვრივი წარმოგვიდგინა: პატარა ოთახი უჭირავს ვორმში; ჯერ კიდევ ცოტაოდენი ფული ჰქონდა და ხან რას უბრძანებდა ღუქნის მოახლეს, ხან რას: ის კი გაშტერებული შესცქეროდა:

— ვას? ვას? *

— ვას! ვას! შეჰკვივლებდა მოხუცებული, — ლოგინი გამისწორე, თორემ ვასს მოგცემ მე შენ!

და ისე მშვენიერად აჯავრებდა მოხუცებულისა გაბრაზებას და კვივლს, რომ სიცილით იხოცებოდა მთელი ჩვენი კლუბი. მერე გახიზნული თავადაზნაურნი წარმოგვიდგინა, რომელნიც იქაც არ იშლიან ძველებურ დროს გატარებას: ხედავთ, რა მხიარულადა ვართ, საფრანგეთის ბატონობა ხვალ ისევ ჩვენიაო! წარმოგვიდგინა ყმაწვილი ქალები, რომელნიც თავიანთ ქმრებს დაეძებენ; ბერები, რომელნიც რაზმად შემდგარან, ეგრეთ წოდებულ წითელ რაზმად, და საფრანგეთის აკლებას აპირებენ; წარმოგვიდგინა, რა მოუთმენლად ელიან გახიზნულები საფრანგეთიდან მიმავალ ფოსტას — მოურავი ფულს გამოგვიგზავნიდაო, და როგორ მოიწყენენ ხოლმე და იღრაჯებიან, როდესაც ფულის მაგიერ ცარიელი წერილი მისდით, რომელშიაც სწერია — თქვენი ბრწყინვალეების სახლ-კარი და მამულ-დედული მართებლობამ ერის საკუთრებად დასდოო.

მართლა საცინელი სანახავი უნდა ყოფილიყო დიდებული თავადიშვილი, რომელიც დაჩვეული იყო, ყველაფერი მზამზარეულად, უზრუნველად მირთმევოდა, და ახლა კი... ჯიბეცარიელი და თანაც ღუქნის ვალი, და ის დასაღუპავი უზრდელი მეღუქნე, რომელიც ისე ღლე არ გათენდება, რომ თავი არ დაუკრას მის ბრწყინვალეებს და ფულის თხოვნა არ დაუწყოს!

ყველაზედ სასაცილოდ გენერალ ბინდერს არდგენდა, რომელიც უნდა მოსულიყო და ჰკუაზედ მოეყვანა გაგიჟებული საფრანგეთი: „მე რომ ბელგიაში შევედი რევოლუციის მოსასპობლად, — იკვებდა თურმე გენერალი, — „იმდენი პატრიოტი დავახერტინე და და-

* რაო? რაო?

გახრობინე, რომ ეხლა ბელგიისთანა დამშვიდებული ქვეყანა ერთი აღარსად იქნებაო“. ყველაზედ უკეთესი ის იყო, რომ გახიზნულნი თურმე ისე დაბინავდნენ ვორმის თავადის სასახლეში, როგორც საკუთარ სახლში და აზრადაც არ მოუვიდათ, ზრდილობის გულისთვის მაინც დავეკათხოთ პატრონსაო. ყველაზედ ძალიან ეს ამბავი გვიამა, მეტადრე შოველს და ნათლიაჩემს.

გოსსარი ბევრს მოგზაურობდა და, საცა კლუბის კრებას დასწრებოდა, ყველგან უამბობდა გახიზნულების ამბავს. ეს რომ იცოდნენ, იმისთანა აღტაცებით მიიღებდნენ ხოლმე ყველგან, თითქო თვით მარტი ეწვიათო. იმოდენი ხალხი მიაწყდებოდა ხოლმე კლუბს იმის სანახავად, რომ ფასით რომ ყოფილიყო, ფულით აივსებოდა. მაგრამ გოსსარი კარგი პატიოსანი პატრიოტი იყო და მარტო იმასა ცდილობდა, პატრიოტები ესიამოვნებინა და თავისი ღვინოები გაესაღებინა.

ეს იმიტომ გვიამბეთ, რომ უკეთა ნახოთ, ვის აქმევდა 1789 წლამდე გლეხკაცი თავის ნაშრომს დასამტკიცებლად იმისა, რომ დიდებული მართლა უღირსნი იყვნენ დიდებისა, იმის პასუხს მოვიყვან, რომელიც შემდეგში მეფე ლუი XVIII-ედ იქნა წოდებული: კანონმდებელი კრება სწერდა მას — დაბრუნდი, თორემ ყოველ უფლებას აგხდითო. აი, რა უპასუხა:

„ხალხო, საერო კრებად წოდებულო! გონება მოიკრიბეთ და დღეიდან ორი თვის შემდეგ ძველებურ წესწყობილებას დაუბრუნდით. თუ არა და, თუ ეს ვადა გაიყვანეთ და გონს არ მოხვედით, გიებად ჩაგრიცხავთ და საგიუეთში დაგამწყვდევთ!“

აი, რას იწერებოდა მეფე ლუი XVI-ეს ძმა, რომელიც ხალხს მეფის მოადგილედ უნდოდა, თუ მეფე თქვენს ჭირს წაიღებდა. აი, ამისთანა ჭკუისკოლოფის სასიამოვნოდ სტანჯავდნენ ხალხს, სულ ახალ-ახალ გარდასახადს ადებდნენ და მეფისა და სასახლის ხარჯს კი მაინც ვერ ასდიოდა იმოდენი ფული; მეფობა რომ გადაეარდა, ათასი მილიონი მეტი ვალი დარჩა, რომელიც ისევ ხალხმა გადაიხადა. ხომ ამოდენი კაცი ვარ და ეხლაც ვერ გამიგია: რად ასულელებს სიმდიდრე ადამიანს? ისეთი გამოტვინებული, როგორიც ამ პასუხის მომცემი უნდა ყოფილიყო, ჩვენს სოფელში სულ უჩინასკენელი გლეხკაციც არ იქნებოდა.

სულ ერთადაც რომ შეგროვილიყვნენ გახიზნულები, ლუკმად არ ეყოფოდნენ საფრანგეთს; მაგრამ ევროპელ ხელმწიფეებს ძალიან ეშინოდათ: ფრანგებს ჩვენმა ქვეშევრდომებმაც არ მიბაძონო, — და მიწის პირიდან აღგვას გვემუქრებოდნენ. ყველგან ომზედლა ლაპარაკობდნენ. იაკობელების კლუბში დიდი კამათი ატყდა ომის შე-

სახებ ბრისსოსა და რობესპიერის შორის. ბრისსო იძახდა, დღესვე უნდა შევეისხათ იარაღი და გახიზნულთ და იმათთან ერთად პრუსიის მეფეს და ავსტრიის იმპერატორს ომი გამოვუცხადოთო. რობესპიერი კი იმ აზრისა იყო, რომ გარეგან მტერზედ ერთიათასად უფრო საშიში შინაური მტერი არის და, — რომ ციხე შიგნიდან არ გაგვიტყდეს, — ჯერ მოლაღატენი უნდა ამოვხოცოთ, რომელნიც სამშობლოს არ ინდობენო. ეს იყო დედააზრი ორივეს სიტყვებისა; ეს სიტყვები დაბეჭდილი იყო და ათასობით ჰყიდდა შოველი; მოქალაქე, ჯარისკაცი, ხელოსანი, გლეხკაცი ყველა იმასა კითხულობდა, შოველის დუქანში ხალხი ბუზავით ირევოდა და მარგალიტა ძლივს-ღა ასწრებდა მუშტრის გასტუმრებას.

კლუბში კი თანდათან მატულობდა ეს უთანხმოება აზრებისა და ბოლოს განხეთქილებაც გამოიწვია. დანტონი, დემულენი, კარრა, ბიო დევარანი და სხვანი რობესპიერისკენ იყვნენ; ისინი ამტკიცებდნენ, მეფეს, დედოფალს და გახიზნულთ ხსნა აღარა აქვთ, ან ქედი უნდა მოიხარონ ხალხის წინაშე, ან არა და ომით ეცადნენ დაკარგული დიდების აღდგენას; მაშასადამე, თუ კი მეფეს და მის მომხრეებს ომის მეტი აღარა დარჩენიათ რა, ჩვენც ფთხილად უნდა ვიყვნეთ, დაუსვენებლივ ვემზადებოდეთ და აღვილად არავის დავუთმოთ სისხლით შეძენილი უფლებანიო. ბრისსო კი თავისას გაიძახოდა. ბრისსო კანონმდებელი კრების წევრი იყო, რომელიც იაკობელების კლუბით ორ ნაწილად იყო გაყოფილი: ერთ მხარეს „ჟირონდელები“ იყვნენ და მეორეს — „მთიულები“. მთიულებს უნდოდათ ჯერ შინაური, შინმყოფი მტერი დაემორჩილებინათ და მერე გარეთ გაეტანათ ომი; ჟირონდელები კი იძახდნენ: ჯერ გარეთ მყოფ მტერს ავუტეხოთ ბრძოლა და მერე შინ დავბრუნდეთო.

ლუი XVI ჟირონდელებისკენ იყო, რადგან ამით არაფერს წააგებდა: ომს დავიწყებდით; თუ გამარჯვება ჩვენ დაგვრჩებოდა, ეს გამარჯვება საეკლარისს ძალას შესძენდა მეფეს, რომ რევოლუციას შეეყენებინა, რადგან ჯარი ყოველთვის იმისკენ არის, ვინც გაიმარჯვა და გამარჯვებული ჯარი დააჯილდოვა; დავმარცხდებოდით და პრუსიის მეფე და ავსტრიის ხელმწიფე უნდა მობრძანებულიყვნენ. ჩვენში ძველი წესწყობილება აღედგინათ და ყველაფერი ისე მოეწყოთ, როგორც საერო კრებამდე იყო. დედოფალს დიდი იმედი ჰქონდა, საფრანგეთი დამარცხდება და გამარჯვება მე დამრჩებაო; დიად, დედოფალს ნებავდა საფრანგეთის ტახტზედ ჩვენი მტრების წყალობით აბრძანებულიყო.

ჟირონდელები — ბრისსო, ვერნიო, ვადე, ჟანსონე და სხვანი მეფე-დედოფლის საქმეს არიგებდნენ. მთიულები — რობესპიერი,

დანტონი, გუთონი, ბიო დევარანი, დემულენი, მერლინი (ტუან-ვილელ) და სხვანი ერის საქმეს არიგებდნენ. მე მათ შესახებ ამის მეტს აღარას მოგახსენებთ.

რაც ხანი გადიოდა, იმდენი უფრო ვრწმუნდებოდით, რომ უომრად ვერ გათავდებოდა ჩვენი საქმე და უფრო და უფრო უნდობლად ვუყურებდით მეფეს, დედოფალს, მინისტრებს და იმათ გენერლუს. საშინლად დელავდა ხალხი. ყველა ხედავდა, რომ მინისტრებს და გენერლებს სულ სხვა მუცლის ტკივილი ჰქონდათ და ერი და მისი მომავალი არც კი აგონდებოდათ. სწორედ ამ დროს ამოირჩია ლუი XVI მინისტრებად სულ ყირონდელები. ამით საბოლოოდ წაიხდინეს ყირონდლებმა საქმე და საბოლოოდ დაკარგეს ყოველი ნდობა ხალხისა.

მაგრამ მაგას ისტორიაშიც წაიკითხავთ. მე მინდა ჩვენი ქვეყნის ამბები მოგახსენოთ.

1792 წ. იანვრიდან დაწყებული მარტამდე დღითი დღე მატულობდა რწმენა, რომ მტერი დღეს თუ არა, ხვალ უთუოდ შემოესევა ჩვენს მხარესაო. ფალსბურგს ამაგრებდნენ: სიმაგრეზედ ზარბაზნებს აწყობდნენ; ძველ ციხეებს აკეთებდნენ და სათოფურებს უმატებდნენ. სამხედრო მინისტრი ბ. ნარბონი საზღვრებზედ აგებულ სიმაგრეებს სინჯავდა და ცდილობდა, ისე მოეწყო, რომ მტრის შემაგრება შესძლებოდათ. სამშობლოს განსაცდელი ადგა.

შინ კი ჩვენი მტრები ისე გაგულისდნენ, რომ აღარავის ერიდებოდნენ. ვითომ სარწმუნოების დასაცავად, მაგრამ ნამდვილად კი გახიზნულების დასამარებლად შემდგარი რაზმი კათოლიკეთა ერთი-ათად იქცა; კონსტიტუციის ერთგულ მღვდლებს სდევნიდნენ, საცა კი მოასწრებდნენ, მოუყვლედი არ გადარჩებოდათ; სახლში უვარდებოდნენ, აიკლებდნენ იქაურობას და, ასე გასინჯეთ, ბაღსაც კი უჩეხავდნენ. სტრასბურგელი დეპუტატი ხმამაღლა ჩიოდა იაკობელების კლუბში, ქვემო რეინზედ დღე არ გავა, რომ კაცის კვლა და ვისიმე სახლის აკლება არ მოხდეს, და მართებლობა ყურსაც არ იბერტყავსო. მართლაც ორმოცდაათი მღვდელი მოეკლათ ამგვარად და, თუ გაბედავდა ვინმე და ამ ამბების შესახებ იტყოდა რასმე, იმასაც აპატიმრებდნენ. მეტადრე ქვემო ალზასში იყო გახშირებული ამგვარი „შემთხვევანი“, რომლების გამო ასსიგნაციებმა ფასში იკლეს — ასი ოთხმოცდაათადღა გადიოდა. არისტოკრატებსაც ეს უნდოდათ.

წარმოიდგინეთ, რა გაცოფებული იქნებოდა ხალხი? ამის შეძლეგ განაღა საკვირველია, რომ შემდეგში სტრასბურგელმა ეპისკოპოსმა შნეიდერმა კონსტიტუციის მოწინააღმდეგე მღვდლების ჯავრი იყა-

რა და დუქინობით გზავნა გილიოტინაზედ — თავები დააყრევინებო! საშინელებაა ჯალათის ხელობა, მაგრამ უარესი საშინელება კიდევ ის არის, რომ კაცმა ცხვარით კისერი წაუშვიროს — აჰა, ყელი გამომჭვრითო. აგრე რომ იყოს და არაფრის შიში არა ჰქონდეთ სისხლით გაუმაძღარო, დაიღუპებოდა ქვეყანა; კიდევ კარგი, რომ ახსოვთ ბუნების კანონი — ვინც მოჰკლავს, მოკლულ იქნება.

ერთი სატყვიოთ; საცა კი მოასწრებდნენ პატრიოტებს, ცოცხალს აღარ გაუშვებდნენ. იმავე დროს კალიასავით მოედვნენ ჩვენს ქვეყანას უცხოელი ჯაშუშები და სხვადასხვა ცრუ ამბავს და ყალბ ასიგნაციებს ავრცელებდნენ; ყალბ ასიგნაციებს გახიზნულები აქვთებდნენ. ცუდი დრო დაგვიდგა: ადამიანის ნდობა აღარსად იყო, მეტადრე უცხოელისა და კლუბშიც კი ისე გულახდილად ვეღარას ვამბობდით და ხალხსაც განურჩევლად ყველას აღარ ვუშვებდით: ვისაც უნდოდა, წინაღვე უნდა ჩაწერილიყო.

ჩვენი სამჭედლო მშვენივრად მუშაობდა. ნათლიაჩემი იძახდა, გაზაფხულზე ისევე პიკპოლცში გადავალო; სულ ორი თვე, და კიდევ უნდა წასულიყო, რადგან მარტში ჩვენში ჯეჯილი ამოდის. მაგრამ მოაგონდებოდა, რომ შეიძლება ომი ატყდესო და კვნესას დაიწყებდა: შემოგვესევინან გახიზნულები პრუსიელებით და ავსტრიელებით, ახალ საბძელს დამიწვავენ და ყანებს დამითელენო; ან არა და დამიჭერენ და აქვე ჩემს მუხის ტოტზედ ჩამომახრჩობენო! მოუვიდოდა ბრაზი! მიდი-მოდიოდა ბრაზმორეული და სულ არისტოკრატების ლანძღვასა და წყევლაში იყო. არა, რა საჭიროა, რომ ვსხედვართ და მტრის შემოსევას ველით? ის არა სჯობია, რეინზედ მიეუხტეთ, გახიზნულები გაეფანტოთ და მიწასთან გავასწოროთ ის თავხედი, რომელმაც იმათ ბინა და თავშესაფარი მისცა! ჩვენი სახლ-კარის გადაბუგვას და ჩვენი მამულების აოხრებას, იმათი სახლ-კარი დაიწვას, ის არა სჯობია? ან ვინ აუვა იმოდენა ჯარს? თუ აქ იქნება ომი, პურიც ჩვენ უნდა ვაჭამოთ და ღვინოც ჩვენ უნდა ვასვათ! ჰოდა, იქ მიეუხტეთ, არა სჯობია? იმათი პური ვჭამოთ და იმათი ღვინო ვსვათ, არ გვირჩევენია?!

ამ მხრივ ისიც უარონდებდებიყენ იყო და ამტკიცებდა, ოღონდ ომი გამოცხადდეს, და სულ თავის ნებით წავლენ ჯარში პატრიოტებიო. თუ გაჭირდა, მე თათონ გავუძღვება ჩვენებურს მილიციას და სარრის მინდვრამდე ისე ჩავალ, რომ სულ გადავქელამ, რაც წინ დამიხვდებაო.

აღზასელი და ლორენელი გლენჯაკები დიდი სიამოვნებით ისმენდნენ ნათლიაჩემის სიტყვებს; სახეზედ კმაყოფილება ეტყობოდათ, მაგიდას მუშტსა სცემდნენ და... ბიჭო, ღვინო!.. თან „წავა, წავასა“ მღეროდნენ.

ერთი ნაპერწკალი და იფეთქებდა კიდეც!

ძალიან წვიმები დაიჭირა თებერვალში. ამბობდნენ, თესლი ლებ-ბა და კიდეც შიმშილი ჩამოვარდებოა. საშინელი სიძვირე იყო. დასავლეთ საფრანგეთში კონსტიტუციის მოწინააღმდეგე მღვდლებს ხმ: დაეგდოთ — მეორედ მოსვლაა, ვერა ხედავთ, აღარც ღმერთი უნდათ და აღარც მეფეო! და ამით არეულობას გვიშზადებდნენ.

ჩვენი კლუბი ომის წინააღმდეგი იყო; შოველი ამტკიცებდა, დავილუპებით, თუ ომი ატყდაო: კეთილ აზრს დრო უნდა მისცეთ, რომ ფესვი გაიდგას და გაიმაგროსო; ომი რომ ატყდეს, ჩვენს ძალ-ღონეს სულ ავსტრიელებს შევალევთ და შინ კი ველარას გავხდებით; ჩვენ ეხლა ყველაფერს თავი უნდა დავანებოთ და ისე გავწმინდოთ ჩვენი ყანა, ისე გავმარგლოთ, რომ კეთილის თესლის აღმოცენებას და ზრდას არა უშლიდეს რაო! სულ თანხმობას და ერთობას გვიქადაგებდა, რადგან კარგად ხედავდა, რომ ჩვენი მტრები სწორედ ამ გზით გვიპირებდნენ დაჯაბნას — ჩვენს განცალკავებასა ცდილობდნენ, თუმცა თითონ საკვირველი თანხმობით მოქმედებდნენ.

— ამ გაჭირვებიდან ერთობა გვიცხნის, იძახდა შოველი. ამას ნუ დაივიწყებთ. ვიდრემდის პატრიოტები, — ხელოსნები, მოქალაქენი და გლეხკაცობა ერთად იქნებიან, — შიში არაფრისა ექნებათ. და თუ უთანხმოება მოუვიდათ რამე, მაშინ კი დავილუპებით. თვით ქრისტე ღმერთიც ველარას გვიშველის! ისევ ისე ბატონყმობას შემოიღებენ და ზოგისთვის სამოთხე იქნება სიცოცხლე და ზოგისთვის კი ჯოჯოხეთი.

სრულს ქეშმარიტებას გვეუბნევოდა და დრომ დაამტკიცა, რომ ეს სიტყვები უნაყოფოდ არ დარჩნენ, რადგან პატრიოტები ერთსულ და ერთხორც იბრძოდნენ არა მარტო საფრანგეთის თავისუფლებისთვის. არამედ მთელი კაცობრიობის განთავისუფლებისთვის.

ლაფაიეტის და იმის მეგობრების — ბაილის, დიუპორის და ორძმა ლამეტის — ხსენებაც აღარსად იყო; ხმა დადიოდა, მეფისაგან შესყიდულნი არიან და ხალხს საქმეს უტარავენო. როდესაც მეფემ კონსტიტუცია მიიღო. ლაფაიეტმა მილიციის წინამძღოლობა აღარ ინდომა და სამსახურს თავი დაანება. უნდოდა პარიზის მამასახლისად ყოფილიყო არჩეული, მაგრამ პარიზელებმა პეტრონი აირჩიეს და გაჯავრებული ოვერნში წავიდა.

„შ ი კ რ ი კ ი, ხ ა ლ ხ ი ს მ ო ს ა რ ჩ ლ ე, ი ა კ ო ბ ე ლ ე ბ ი ს კ ა მ ა თ ი“ და სხვა გაზეთები, რომლებიც შოველს მოსდიოდა, ყურადღებასაც არ აქცევდნენ მის წასვლას. სწორედ იმ დროს იყო, რომ კანონმდებელმა კრებამ ბრძანება მისცა დრეველ და მანცელ თავადებს, მანდ შემოხიზნული ფრანგები დაითხოვეთო.

იმათ უპასუხეს, ჩვენ საფრანგეთისაგან არავითარ ბრძანებას არ მივიღებთ: ჩვენი ქვეყანა და მასთან ერთად ალზას-ლორენიც ყოველთვის გერმანიისა ყოფილა და ეხლაც გერმანიისა უნდა იყოსო. ხელმწიფე ლეოპოლდმა გამოაცხადა, თუ გაბედა საფრანგეთმა და გრეველ და მაინცელ თავადებზედ ძალით მივიდა, პასუხს ჩემგან მიიღებსო. ამაზედ კრებამ ხელმეორედ შეუთვალა, თუ 15 იანვრამდე გახიზნულნი არ დაფანტულან, იძულებული ვიქნები ძალით აგასრულებინოთ ჩემი სურვილიო. კანონმდებელმა კრებამ სამშობლოს მოღალატედ აღიარა გახიზნულნი — მეფის ძმები, უგანათლებულესი თავადი კონდე, მირაბოს უნცროსი ძმა და სხვანი. იმავე დროს ჯარის ზრუნვას შეუდგნენ და ას ორმოცდაათი ათასი კაცი გაიყვანეს სამ რაზმად; ერთას წინამძღოლობა ლუქნერს მიანდეს, მეორისა ლაფაიეტს და მესამისა როშამბოს.

დღითი დღე ველოდით ომის გამოცხადებას, მაგრამ მარტამდე არა მომხდარა რა, გარდა იმისა რომ მეფის მომხრენი ცოფს აყრიდნენ იაკობელების კლუბს და თავიანთ გაზეთებში იაკობელების ლანძღვის მეტს აღარას ბეჭდავდნენ. მაგრამ იმათ ვინ ჩივის? იაკობელებს აღარც ჟირონდელები ინდობდნენ, მაგალითად, ბარნავი, ანდრე შენიე და სხვანი. იაკობელები კი პასუხსაც არავის აძლევდნენ, რადგან ღირსად არა სთვლიდნენ მათთან კამათს. ნამდვილი ბრძოლა იყო ატეხილი მთიულების და ჟირონდელების შუა; 1792 თებერვალში დაიწყო და იმისთანა ცხარი იყო ეს ბრძოლა, რომ მარტო მაშინ გათავდა, როდესაც ერთი პარტიათაგანი სრულიად ამოწყვიტა მოწინააღმდეგემ.

მას შემდეგ, რაც ქვეყანა არსებობს, იქნება სხვა დროს არაოდეს არ ექოთ ისე ომი, როგორც იმ დროს იყო. ვისაც კი ქუდი ეხურა, იძულებული იყო თავისი აზრი გამოეთქვა, ომი მიინდა ან არაო, რადგან ამაზედ იყო დამოკიდებული ჩვენი სიცოცხლე, ჩვენი უფლებანი, მამულ-დედული და ოჯახის და სამშობლოს ბედ-იღბალი.

პარიზელებს და მათთან ერთად მთელს საფრანგეთს გადაწყვეტილი ჰქონდათ, ძირიანად ამოეგდოთ და გაენადგურებინათ ყველა. რაც კი ხელს უშლიდა და ემუქრებოდა მათ; გადაწყვეტილი ჰქონდათ, სისხლით შეძენილი საკუთრება და უფლებანი ცოცხალი თავით არავისთვის დაეთმოთ და იმისთანადა სძულდათ თავიანთი მოწინააღმდეგენი, რომელნიც ემშაკობით და ფლიდობით მათს მოტყუებას და დაჯაბნას ცდილობდნენ, რომ ადვილად შეიძლებოდა, თავს დასცემოდნენ და ერთ დღეს ყველა დიდებული და კონსტიტუციის მოწინააღმდეგე ბერი და მღვდელი გაეწყვიტათ მთელს საფრანგეთში. მაგრამ სწორედ ამ დროს მოკვდა ავსტრიის

ხელმწიფე ლეოპოლდი და ხალხის გონება ცოტა ხნით მაინც იმახ მიიპყრო; ლეოპოლდს 40 ათასი კაცი ბელგიისკენ გაეგზავნა, 20 ათასი რეინისკენ, მაგრამ აღარ დასცლოდა: ქეიფისგან მისუსტებულს რაღაც საწამლავი მიეღო, მომასულიერებსო და თქვენი ჭირი კი წაეღო.

ბევრს მოეცა მაშინ იმედი: მისი შვილი და მემკვიდრე ფრანსუა, უნგრეთის მეფე, უფრო ჭკვიანი და წინდახედული კაცია და შეიძლება, ვიდრე გერმანიის ტახტზედ აბრძანდებოდეს, ჩვენი საზღვრებიდან ჯარები უკან გააბრუნოს, რადგან ჩვენი საქმეები იმას სრულიადაც არ შეეხებო. მაგრამ ეს იმედიც გაუტყუვდათ: ჯერ არც კი ასულიყო ტახტზედ, რომ თავისი არისტოკრატების და ბერების რჩევით კანონმდებელ კრებას შემოუთვალა: ალხასი მე უნდა დამითმოდ, საფრანგეთში ძველებურად სამი წოდება გასაახლოთ და ეკლესიას თავისი მამული დაუბრუნოთო.

ეს კი მეტისმეტი იყო! იქნება თავისი საკუთარი ქვეშევრდომნი ვეგონეთ, რომ ერთი კი ვსთქვა, და ჩემს ბრძანებას წინ რა უდგასო? როდესაც ეს თავხედური მოწერილობა გავიგეთ, მთელი ერი აღშფოთდა და პირად შეურაცყოფად მიიღო საერო კრების შეურაცყოფა. ბრაზი მოგვერია, სისხლი გვიდღულდა და თუმცა შოველი თავიას გვეჩინებოდა, — ფთხილად იყავით, ომი საუკუნოდ დაგვლუპავსო, ომით მარტო მეფეები ისარგებლებენ და ხალხი კი არაოდეს, რადგან ვაჯობებთ თუ გვაჯობებენ, სულ ერთია, შუაში ხალხი გაისრისებო! — ჩვენ იმისი აღარა გვესმოდა რა და 23 აპრილს ჩვენს კლუბში ერთხმად ვიძახდით, ბრძოლა, ბრძოლა მაჰა-პაპურიო! ნათლიაჩემს უნდოდა იმ საღამოს კლუბისთვის წინადადება მიეცა — კანონმდებელ კრებას ვთხოვთ, ომი გამოუცხადოს ხელმწიფე ფრანსუასაო; თვით შოველის წინააღმდეგ ვილაპარაკებო, — იძახდა, — და ვუსაყვედურებ, რომ ქვეყნის კეთილდღეობით გატაცებული ქვეყნის დიდებას აღარად ავდებს და ერისთვის კი უმთავრესი და უძვირფასესი განძი სახელი და დიდება არისო.

მე კი ხან ბრაზი მომერევოდა და ნათლიაჩემისკენ ვიყავ, ხან დაუუფიქრებლობი ჩვენს ყოფას და შოველს ვამართლებდი.

იმ დღეს დილიდან საღამომდე იწვიმა. მოქურთმებული ცა გულს უფრო გვიღონებდა; საქმეზე გული ვეღარ დაგვემყარებინა; დავდიოდით და ლანძღვას და მუქარას ვუთვლიდით იმაო, ვინც ასე ამცირებდა ჩვენს ქვეყანას. ბოლოს რვის ნახევარზედ ავდექით და ფალსბურგის გზას გავუდექით. მუხლამდე ტლაპოში ვტოკეთ; თავს კოკისპირული წვიმა დაგვდიოდა, მაგრამ მაინც არ დავიშა-

ლეთ; წინ ნათლიაჩემი მიდიოდა თავის წითელი ქოლგით, მერე ლეტუმე და სხვა პატრიოტები.

ფალსბურგში რომ ჩავედი, დავრწმუნდით, რომ იქაც ისევე ღელავდა ხალხი, როგორც ჩვენში. ყველანი ფეხზედ იყვნენ, გაფაციცებულნი დადიოდნენ და ათრთოლებული ხმით მოკლედ უჭრიდნენ ერთმანეთს სიტყვას. გვეგონა, ამაღამინდელ კლუბის სხდომის გამოა ეს ამბავიო, მაგრამ რაკი მოედანზედ გავედით, სულ სხვა ვნახეთ: შოველის დუქანი ღია იყო და შიგ იმოდენი ხალხი შეგროვილიყო, რომ ქუჩაშიაც კი ძნელად თუ გაივლიდა ვინმე; მარგალიტა სკამზედ იდგა და რაღაცა გაზეთს აფრიალებდა.

მათუსალას ოდენი რომ ვიცხოვრო, მაინც თვალწინ მეყოლება ჩემი მარგალიტა ისე, როგორც მაშინ ვნახე. შავგვრემან ჰარისახეს იქვე ჭერზედ ჩამოკიდებული ლამპარი უნათებდა, თვალეი ელვასავით უბრწყინავდა. გაზეთს თურმე უკითხავდა ხალხს, როდესაც ტალახში ამოსვრილები მივედით და ვცდილობდით ნიდაყვით გაგვეგნო გზა დუქანში შესასვლელად; ჩვენს მისვლაზედ და მეტადრე ნიდაყვის ცემაზედ ხალხში ხმაურობა ატყდა. მარგალიტა ჩვენკენ მობრუნდა და დაგვიძახა:

— მოისმინეთ! აი, საერო კრების განცხადება, ამას თვით საფრანგეთი ბრძანებს! — და კითხვა დაიწყო:

„კანონმდებელ საერო კრების განცხადება.

„რადგან ავსტრიის მართებლობამ, მიუხედავად საერთაშორისო კანონმდებლობის და ხელშეკრულებისა, ბინა მისცა და ხელი შეუწყო საფრანგეთის მტრებს: რადგან იგი კავშირით შეეკრა ევროპელ ხელმწიფეთ, რომ საერთო ძალით საფრანგეთის ერის თავისუფლება შეაფიწროვონ; რადგან ფრანსუა I-ს, სეფეს უნგრეთისას, მიუხედავად ჩვენი თხოვნისა, არა სურს ის კავშირი დაარღვიოს; რადგან მიუხედავად ხელშეკრულებისა, რომლითაც საზღვარზედ არც იმან და არც ჩვენ მეტი ჯარი არ უნდა ვიყოლიოთ, ვიდრე მშვიდობიანობისა დროს არის ხოლმე — ის უფრო და უფრო უმატებდა თავის სამხედრო ძალას; რადგან მან გაბედა და საფრანგეთის ერის თვითმართებლობას უკვე შეეხო, მოწერილობით, რომლითაც გვითვლიდა — ალზას-ლორენი გერმანელებისა და არა საფრანგეთისაო, თუმცა ალზას-ლორენის სამაგიეროს დიდი ხანია იხდის ჩვენი ერი; რადგან იგი ყოველ ღონისძიებას ხმარობს, რომ საფრანგეთის შვილთა შორის და აგრეთვე ჯარშიც მტრობა ჩამოაგდოს და ერთიერთმანეთს შეაბრძოლოს, რაისა გამო ჩვენი ქვეყნიდან განიზნულთ ჩვენს მტრებს თავის შეწევნას და დახმარებას არ

აკლებს, რადგან საფრანგეთის მეფის დეპეშებზედ იგი არავითარს პასუხს არ იძლევა და, მაშასადამე, მშვიდობიანი სჯითა და მოლაპარაკებით ორ ერთა შორის უთანხმოების აცილებას შეუძლებელ ხდის, რაიცა ეთანასწორება ომის გამოცხადებას.

საერო კრებამ დაადგინა“...

სისხლი თავში ამივარდა და შეეძახე:

— საერო კრებას გაუმარჯოს:

და იმოდენა ხალხმა ერთხმად გაიმეორა ჩემი ძახილი. მარგალიტა ჩემკენ მობრუნდა და გახარებული ღიმილით გადმომხედა; მერე ხელი დაუქნია ხალხს და დაუძახა:

— მოისმინეთ, ჯერ არ გამითავებია!

„საერო კრებამ დაადგინა: საფრანგეთის ერი, ერთგული აღმასრულებელი თავის კონსტიტუციის საფუძვლად დადებულ პრინციპებისა, რომლითაც იგი არ იკადრებს ომი აუტეხოს ვისმე იმ მიზნით, რომ მიწა წაართვას რამე ან თავისუფლება; საფრანგეთის ერი, თუ იარაღს აიღებს, მარტო იმ მიზნით, რომ საკუთარი თავისუფლება და დამოუკიდებლობა დაიცვას; საფრანგეთის ერი თავისდა უნებურად იძულებულია ომი გამოუცხადოს არა ავსტრიელ ერს, არამედ ავსტრიის ხელმწიფეს, რომელმან განიზრახა თავისუფალი საფრანგეთის შეურაცყოფა; საფრანგეთს კარგად სცოდნია და კიდევაც კარგად იცის მტრის და მოყვრის გარჩევა და ამიტომ ყოველ ღონისძიებას იხმარს, რომ თავის მოკეთეს ომის შედეგები შეუშლუბუქოს და ცეცხლი და მახვილი და ყოველივე საშინელება ომისა იმათ სახლსა და მამულში შეიტანოს, ვინც თავისუფლების მოსაწყვეტად ამხედრებულან; საფრანგეთის ერი ძმურად მიიღებს ყოველ უცხო ქვეყნელს, ვინც კი მის ღრმას ამოუდგება და შეძლებისდაგვარად თავისუფალი ერის თავისუფლების დაცვას ემსახურება; იგი ყოველ საშუალებით ეცდება ეს უანგარო თანაშემწენი თავის ერთგულ შვილთა შორის დაასახელოს და მით ცხოვრება გაუადვილოს.

საერო კრება ამით ომს უცხადებს ფრანსუა პირველს, მეფეს უნგრეთისას“.

— თავისუფალ ერს გაუმარჯოს! გაისმა ყოველი მხრიდან; ჩვენი ქუჩიდან მოედანზედ გავიდა ეს ძახილი, მერე ჯარის ზინაზედ და იმ წამსვე ფანჯრები გააღეს ჯარისკაცებმა. გადმოდგნენ და ცხვირსახოცის ქნევა დაიწყეს; ძირს დარაჯებს ქუდები თოფებ-

ზედ წამოეცვათ და ისე ათამაშებდნენ. გამვლელ-გამომვლელნი ერთმანეთს აჩერებდნენ და ულოცავდნენ:

— გაიგეთ? ომი გამოცხადებულია!

ციოდა, წვიმდა და ჩვენ კი ყველანი ვიწოდით. მარგალიტა ჩამოსულიყო სკამიდან და მეც იმისკენ გავეშურე. დამინახა თუ არა, შორიდანვე ჩემკენ წამოვიდა, ხელი ჩამომართვა და ჯერ ისევ წვლანდებური, ათრთოლებული ხმით შემომძახა:

— მაშ უნდა ვიომოთ რაღა, მიშელ?

— მით უკეთესი. მეც მანაშენივით წინააღმდეგი ვიყავი ომისა, მაგრამ რაკი ბრძოლა სხვამ აგვიტება, ჩვენც ვეჭაკუტრად დავუხვდებით და ჩვენს უფლებას უკანასკნელ სისხლის წვეთამდე არავის შევლახავინებთ.

მისი ხელი ჯერ ისევ ხელში მეჭირა და გაკვირვებით შევეყურებდი, რადგან ასე მშვენიერი და გულწარმტაცი ჯერ არსად მენახა. ამ დროს შოველიც შემოვიდა; თავშიშველი იყო, წურწურით წყალი სდიოდა; თან ხუთი თუ ექვსი საუკეთესო პატრიოტი შემოჰყვა.

— ბიჭო, თქვენც ჩამოსულხართ! — შემოგძახა, ჩვენ რომ დავგინახა; — მე მეგონა წვიმას შეუშინდებოდი. მით უკეთესი! უფრო კარგად და დალაგებით დავუკვირდებით ჩვენს მდგომარეობას.

— მაშ აგრე რაღა? — შეჰყვირა ნათლიაჩემმა. — უომრად მაინც ვერ გადავრჩით?

— დიად. — უპასუხა გაჯავრებული კილოთი შოველმა. — ხომ იცით, მე წინააღმდეგი ვიყავი ომისა, მაგრამ რაკი გვაიძულებენ და ძალად გვაომებენ, ვეცდებით ისე დავუხვდეთ, რომ მეორედ აღარავინ გაზედოს ეს თავხედობა. აბა, მობრძანდით.

და ჩვენს კლუბში შევედით, იქვე დახურულ ბაზარში. ხალხით სავსე იყო იქაურობა. შოველი თავმჯდომარის ალაგას ავიდა; ჩვეულებადა ჰქონდა, იჯდა და ისე განაგებდა კლუბის კამათს; იმ საღამოს კი არ დამჯდარა; ათრთოლებული ხმით, რომელიც მოედნის ბოლომდე ისმოდა, დაიწყო თავისი სიტყვა:

„ხომ მოგეხსენებათ, მე ომი არ მინდოდა, რადგან თავისუფლების შემდეგ ადამიანს კეთილდღეობას ისე არაფერი შესძენს, როგორც მშვიდობიანობა; მაგრამ ამ ყამად ომი უკვე გამოცხადებულია და ყველა მამულიშვილი სამშობლოს გამარჯვებასღა უნდა ზრუნავდეს; შერცხვენილი იყოს. ვინც დღეს სხვას ზრუნავს რასმე, ვინც განსაცდელში მყოფ სამშობლოს არ შესწირავს თავის ქონებას და თვით სიცოცხლესაც!

„სხვა დროსაც ბევრი გვქონია ომი, მაგრამ ამგვარი ჯერ ის-

ტორიაში არა მომხდარა რა: ამ ომზედ არის დამოკიდებული, თავისუფალი უნდა იყოს ადამიანი, თუ მონა; სამართალი უნდა განაგებდეს ქვეყანას, თუ უსამართლობა; ძველებურად დიდებული და ძლიერი უნდა იყოს ჩვენი სამშობლო, თუ დამცირებული და შერაცხვენილი. ნუ წარმოიდგენთ, რომ ერთი ბრძოლით გათავდეს ყველაფერი; არა, რაც ძალ-ღონე გაქვთ, ეხლავ მოიკრიბეთ, რადგან შეიძლება რამდენიმე წელიწადი გავატაროთ ზრძოლაში; ევროპის მტარვალები განაგებენ და, რასაკვირველია, ეცდებიან ჩვენს დამარცხებას, რომ იმათ ქვეშევრდომებმაც ჩვენ არ მოგვბაძონ“.

„მართალია, ვინც თავისუფლების დასაცველად აიღებს იარაღს, თუნდა ნიაღვარივით დაღვაროს ადამიანის სისხლი, და მართალი არ არის, ვინც იარაღს სხვის უფლების შესალახავად აიღებს. სიმართლე ჩვენსკენ არის და მაშასადამე გამარჯვებაც ჩვენკენ უნდა იყოს“.

შემდეგ ამისა ისიც გვითხრა, რომ ამ ომში ჩვენს მხრივ მარტო ჯარები არ უნდა იბრძოდნენ: თუ გამარჯვება გვინდა, ჯართან ერთად მამულიშვილნიც უნდა შეებრძოლონ ჩვენს მტრებს, ზარბაზნებით და ხანჯლებით კი არა, შთაგონებით, კეთილი გულით და სიყვარულით; უნდა მივიდეთ და კარგიც შევთავაზოთ, აკიც; რაც უნდა გაუნათლებლნი და უვიცნი იყვნენ, მაინც დარწმუნდებიან, რომ ჩვენ ტყუილად გვებრძოდნენ. რომ ჩვენ იმათ მონადმქნელ ჯაჭვების დამსხვრევა გვინდა! მაშინ კურთხევას დაგვიწყებენ, ჩვენ შემოგვიერთდებიან, და ყოველი ადამიანის უფლება ღვთიურ სამართალზედ იქნება დამყარებული. ეს ომი კი არა, კონსტიტუციის და ძმობის, ერთობის, თავისუფლების ქადაგება იქნება. ჩვენ უნდა ვეცადნეთ, რომ ჩვენს ჯარს წინ კარგი წიგნი და კარგი სიტყვა მიუძღოდეს, რომ ბრძოლის წინ კავშირი და ერთობა მოვიპოვოთ დაჩაგრულ ხალხის გულშიო.

ბოლოს იმ მოღალატეებს შეეხო, რომელნიც შინ იყვნენ და უკანდან გვითხრიდნენ ორმოს. იმათ მოგონებაზედ ფერი წაუვიდა: აი, სად არის ამ ომის საშინელებაო, დაიძახა შოველმა; თუ თავიანთი საზიზღარი საქციელი არ მოიშალეს, პატრიოტები იძულებულნი ვიქნებით, ისე მოვექცეთ, როგორც ცოფიანს ძაღლს. თუ არა და სამშობლოს განსაცდელისაგან ვერა იხსნის რაო.

ჩემი თვალით რომ არ მენახა, ჩემს ღღეში არ დავიჯერებდი, რომ შოველს ტირილი შეეძლებოდა; მაგრამ ჩემი თვალთ ვნახე: გული აუჩქროლდა, ხმა აუთრთოლდა და უკანასკნელი სიტყვები იმისთანა ხმით წარმოსთქვა, რომ ქრუანტელმა დავგვიარა ტანში:

„მამ სისხლი სწყურიათ რაღა, იმ უბედურებს! ასჯერ მეტ-
ჯერ შევთავაზებთ მეგობრული განწყობილება. და მშვიდობიანობა. აი, დღესაც, დღესაც კი ხელი იმათკენა გვაქვს გაშვებული და ვეხვეწებით: ძმანო, რა გვაქვს საჩხუბარი? მოდიოთ თანასწორნი ვიყვნეთ ყველანი! დაევიწყოთ ძველი უსამართლობა. ძველს ნულარ გავიხსენებთ, ოღონდ ახალს ნულარ ჩაიდინეთ! უარპყავით თქვენი უპირატესობანი, რადგან ბუნების წინააღმდეგია ადამიანის ადამიანზედვე გაბატონება!“ მერე ისინი რას გვიპასუხებენ: „არა! თქვენა ხართ ჩვენი აჯანყებული მონები! ღმერთმა თქვენ იმიტომ გაგაჩინათ, რომ ჩვენს წინაშე მუხლის თავებზედ ცოცავდეთ და თქვენი შრომით ჩვენ გვინახავდეთ; ჩვენ ჩვენსას გავიტანთ! ყველას ვიზამთ, ყველას ვიკადრებთ და ჩვენსას კი გავიტანთ! სამშობლოს მტრებს შევუერთდებით, თქვენში უთანხმოებას ჩამოვადგებთ, ზოგს ფულით გავარიგებთ, ზოგს ღალატით და თქვენ კი ისევ უღელს დაგადგამთ!“ ჰოდა თუ კი ისინი ყველა საშუალებას ხმარობენ, რომ ისევ ძველებურად დაგვიმონონ, ჩვენ რაღად უნდა გვამტყუნებდნენ, რომ ჩვენც უკანასკნელ სისხლის წვეთამდე ვიბრძოლოთ და ჩვენი თავისუფლება კი არავის შევაიწროვებინოთ?! გავთავე, მამულიშვილნო! ყველამ თავისი მოვალეობა იცოდეს! ყველა მზად იყოს და დაეუძახოთ თუ არა, მაშინვე გავიდეს სამშობლოს სამსახურისთვის. ერთად ვიყვნეთ და ერთხმად შევძახოთ მტერს: „სიცოცხლე თავისუფალი, ან სიკვდილი სახელოვანი!“

. გაათავა და ჭეჭა-ქუხილივით გაისმა ხალხის თანაგრძნობა. ვისაც ამისთანა არა უნახავს რა, ვერ წარმოიდგენს, როგორ ღელავდა ხალხი. ერთიერთმანეთს ეხვეოდნენ და ჰკოცნიდნენ; ხელოსანი, პოქალაქე, გლეხკაცი ერთმანეთს ძმობას უფიცავდნენ; მთელს საურაანგეთს ორ ნაწილადღა ჰყოფდნენ — პატრიოტებად და არისტოკრატებად, რომ პირველნი ჰყვარებოდათ და მეორენი ზიზღით და მუქარით ეხსენებინათ. საშინელი ყოფილა სამშობლოსთვის ატირებული ვაჟკაცი!

შოველის შემდეგ სხვებმა ილაპარაკეს; ჩვენმა მამასახლისმა ბუალომ, პერნეტმა, კოლენმა და სხვ. მაგრამ იმოდენი შთაბეჭდილება ხალხზედ ველარავინ მოახდინა.

იმ ღამეს ძალიან გვიან ავედით შინ. ისევ ისე წვიმდა. გაჩუმებულინი მიეტოპავდით და მომავალ ომზედ ფეიქრობდით. მარტო ნათლიაჩემი ღაპარაკობდა, ისიც ხანდახან, თითქო მოაგონდა რაჟე და ეშინია, არ დაავიწყდესო: უმთავრესი ის არის, რომ გენერლები ნამ-

დვილი პატრიოტები იყვნენ და არ გვიღალატონო და მართლსაყ ამბობდა, რადგან გენერლები მეფეს უნდა დაენიშნა და, წარმოი-დგინეთ, რა ნდობა უნდა გექონოდა ჩვენ მეფისა და იმის წყალობის მოსურნე გენერლებისა? მივდიოდით გაჩუმებულნი და თახ გული გვიწუხებდებოდა: ხომ გაგვყიდეს, ხომ დაგვლუპეს, იმათ როგორ უნ-და მივენდოთო? განა შოველი მართალს არ ამბობდა, ჩვენ თუ და-გვამარცხებს, ღალატი დაგვამარცხებსო. ათასი ამნაირი სხვა ფიქრი მიტრიალებდა იმ დროს თავში და გარდა ამ საზოგადო ფიქრებისა ჩემი საქმეც საკმარისად მაფიქრებდა: ვხედავდი, რომ ჩემი ცხოვ-რება უნდა შეცვლილიყო; რომ მეც უქველად ჯარში წამიყვანდ-ნენ და ჩვენი ღარიბი ქოხის და მარგალიტას გვერდით ჩემს გულ-ში დიდებული სამშობლოს სიყვარული იჭერდა ადგილს.

ამ ფიქრებით მოცული ავედი სახლში. შოველის სიტყვები მახ-სოვდა — რამდენიმე წელიწადი გასტანს ეს ომიო, მაგრამ ვერც მე და ვერც ნათლიაჩემი და ლეტუმიე ვერ წარმოვიდგენდით, რომ ოცდასამს წელიწადს გასტანდა ომი, შიგ ევროპის ყველა ხალხები ჩაეროდნენ თავიანთი მეფეებით და ხელმწიფეებით, და ყველანი ჩვენს წინააღმდეგ ამხედრდებოდნენ, რადგან ჩვენ გვინდოდა ჩვენ-თან ერთად ყველანი განთავისუფლებულიყვნენ; რას წარმოვიდ-გენდით, რომ მთელი ევროპა ჩვენს წინააღმდეგ ადგებოდა მარტო იმიტომ, რომ ჩვენ გავბედეთ და ადამიანის უფლებანი მის ბუნებ-რივ კუთვნილებად ვაღიარეთ. ხომ დამეთანხმებით, რომ ამისთანა უგუნურება წინააღმდეგია ბუნებისა და ძნელი დასაჯერებელია, მაშინაც კი, როცა საკუთარი თვალით გინახავს იგი.

X

უნდა მოგახსენოთ, რომ ძალიან ბევრნი ჩაეწერნენ თავიანთ სურვი-ლით ჯარში და პირდაპირ საზღვრისკენ გაემგზავრნენ; სულ ნასწავ-ლი, სამსახურში მყოფი ყმაწვილი ბიჭები იყვნენ, სხვათა შორის რო-ტენბურგი, ლევენგრი, დიუპლენი და სხვა. უმეტესი ნაწილი, იქვე დარჩა ბრძოლის ველზედ და ვინც გადაარჩა, წარჩინებულ მხე-დართმთავრად ირიცხებოდნენ შემდეგში და ძალიანაც ასახელეს სამშობლო. ვისაც ჯარში წასვლა უნდოდა, სამამასახლისოში უნდა გამოეცხადებინა; სამგზავროდ და ტანისამოსისთვის ცოტა რამ ფულს მიიღებდა და ერთ-ერთ ჯარისკენ გაემგზავრებოდა. თუ განსოვთ, რომამბოს ჯარი მობეგში იდგა, ლაფაიეტისა მეცში და ლიუენერისა იქვე ჩვენს ახლო, ბიშისა და ბელფორის შუა. სიმღერით და სიცილით გავაცილებდით ხოლმე მიმავალთ და გულში კი გვე-შინოდა:

— თავისუფლების ბურჯნი ესენი არიან და ესენიც რომ აეს-

ტრიელებმა ამოგვიხოცონ, ვიღას გამოვიყვანთ ამათ სამაგიეროდ?

წარმოიდგინეთ, როგორ გვეწყინებოდა, როდესაც ხმა გავარდა 29 აპრილს, — თავის ნებით გასულნი ავსტრიელებს ისე გამოჰქცევინან, რომ იარაღი არც კი უხმარიათ, და იმათ კიდევ თან დასდევნებთან ომში დაბერებული ჯარისკაცებბო. იმისთანა უცნაური და ძნელი დასაჯერებელი იყო ეს ამბავი, რომ ყველანი იძახდნენ, ეგ კონსტიტუციის მოწინააღმდეგე ბერების მოგონილიათ!

ჩვენდა საუბედუროდ, იმ საღამოს პარიზიდან მოსულმა ფოსტამ ყოველი იმედი გაგვიცრუა: ვალანსიენიდან სამ რაზმად წასულიყვნენ ჩვენი ჯარები, რომ ერთი ფლერუსში ჩასულიყო და იქაურ პატრიოტებს შეერთებოდა, მეორე ტურნეში და მესამე მონსში. მაგრამ გენერალ რომამბოს, რომელსაც ის იყო მეჟემ მარშლობა უბოძა, ავსტრიელ გენერლისთვის ჩუმად წერილი გაეგზავნა, შენზედ მოვდივარ, მზად იყავით; ჩვენი ჯარები დაამედებულენი მიდიოდნენ, მტერს მოულოდნელად მიეუცვივდებით და დავიმორჩილებთო და მტერს კი ლამაზად გაემარებინა გზები, ზარბაზნები დაელაგებინა, რიცხვითაც ერთისამად უმრავლესი ყოფილიყო ვიდრე ჩვენი ჯარები და დიდძალი ცხენოსანი ჯარი ჰყოლოდა.

ამას თვით რომამბო წერს თავის დღიურში, 20 აპრილს, რესპუბლიკის მასახელებელს გენერლებს — ბონაპარტს, ჰომს, მასკენას, კლუბერს და სხვ. რომ წინაღვე შეეთვალათ მტრისთვის, მოვდივართო, არა მგონია, გამარჯვებული ყოფილიყვნენ როდისმე.

იმავე გაზეთებში ეწერა, რაკი ნახეს ჩვენმა ჯარებმა, რომ ავსტრიელები ასე მომზადებულნი და ჩასაფრებულნი დაუხვდნენ, უკან გამობრუნდნენ და ყვიროდნენ:

— გვიღალატეს! გაგვიიდესო!

და მარტო ჯარისკაცები კი არა, ქვეყანა იმას გაიძახოდა, გვიღალატესო. მართლაც და ჯარში იმდენი დიდებული გვარიშვილი იყვნენ, სულ უფროსებად და წინამძღოლებად, რომ საკვირველიც იქნებოდა, რომ არ ეღალატნათ. კლუბებში დალატხედლა ლაპარაკობდნენ. 1792 წ. 3 მაისის „მოამბეში“ ეწერა:

„კორდელიერების კლუბისაგან წარმოგზავნილი შევიდნენ საერო კრების დარბაზში და კანონმდებელ კრებას მოახსენეს: საფრანგეთს სამასი კაცი უკვე მოაკლდა; სამასმავე თავი შესწირა სამშობლოს, როგორც თერმოპილეში სამასმა სპარტელმა. საზოგადოებრივი აზრი მათს სიკვდილს დალატს აბრალებს...“

სიტყვა გააწყვეტინეს. ასი კაცი ერთად უყვიროდა:

— გარეკეთ! გარეკეთ ეგ უსინდისონი!

ისეთი ღრიალი ასტეხეს, რომ კორდელიერების წარმომადგენ-

ლები იძულებულნი გახადეს ხმამოუღებელივ უკან გაბრუნებული-
ყვნენ. რამდენიმე „მთიულმაც“ ითხოვა სიტყვა, მაგრამ კრებამ არც
იმათ მოუსმინა და მორიგი საქმეების განხილვას შეუდგა“.

კანონმდებელი საერო კრების უმეტესი ნაწილი ხმოსანთაგან,
ესე იგი შემძლებელთაგან, იყო ამორჩეული და თანასწორობას
უარყოფდა; ამ უმეტესობას ღმერთივით სწამდა ბატონი მარკიზ დე-
ლაფაიეტი და ლაფაიეტს კი ინგლისის მიხედვით საფრანგეთის
გამგედ ორი კრებული ნებავდა: ერთში დიდებულნი და ეპისკო-
პოსნი უნდა ბრძანებულიყვნენ და მეორეში ხალხის წარმომადგე-
ნელნი. ხალხის წარმომადგენელთ რომ დიდებულთათვის საზარალო
ან უსიამოვნო დაედგინათ რამე, დიდებულთა კრებას უფლება უნდა
ჰქონოდა თავის უთანხმოება გამოეცხადებინა და დადგენილების
აღსრულება შეეყენებინა. ეს ხომ საერო კრებისაგან უკვე გაუქმე-
ბული სამივე წოდების აღდგენა იქნებოდა! ჩვენდა საბედნიეროდ,
მეფე ლუი XVI და დედოფალი მარიამ-ანტუანეტა იქვის თვალით
უყურებდნენ ლაფაიეტს.

საცა გაიხედავდით, ყველგან ლალატმა იჩინა თავი: ვანდემი,
ბრეტანში, საზღვრებზედ, და თვით საერო კრებაშიც კი. ყველ მ-
წანწალა კონსტიტუციის ვაუქმებას გაიძახოდა, მეფის მომხრე მღვ-
დლები ხალხს ღვთის რისხვით და სულიერი წაწყმედით ემუქრებოდ-
ნენ, გახიზნულნი ჩვენს მილიციას „მეჯღანეების ჯარს“ ეძახდნენ
და სწორედ ამ დროს, — ორი კვირა არ გასულა მას შემდეგ, რაც
გენერალი რომაშობო ისე სამარცხვინოდ დამარცხდა, — სწორედ ამ
დროს 10 მაისს, მოვიდა ამბავი, რომ წუხელ ღამის 11 საათზედ
საქსის რაზმი მტერს მიუდგაო. ეს ის ცხენოსანი რაზმი იყო, რო-
მელმაც ფალსბურგში გავლის დროს იმოღენი უიარალო ჯარის-
კაცები ამოხოცა მარტო იმიტომ, რომ იმათ ერთი ცხენოსანი შე-
ყენეს და უთხრეს: დაიყვირე, თავისუფალ ერს გაუმარჯოსო! დი-
დად დაუმაღლა მაშინ მეფემ ამ ცხენოსანთ ერის ერთგულთა ზო-
ცვა. დღეს კი მთელი ეს რაზმი მტერს მისდგომოდა და ამ ლალატის
ჯილდოდ ყოველ მათგანს ექვსი მანეთი ფული მიეღო. იმავე დღეს
სენტავოლში მდგომი რაზმიც აბარგებულებო და, ვითომ სასიეროდ
მივდივართო, საზღვარს გადასულიყო თავისი ბარგივით და ცხენებით
და მტერს მისდგომოდა. ჩემი ძმა ნიკოლოზი ამ რაზმში იყო.

აი, რით გვებრძოდნენ ჩვენი პატიოსანი მოწინააღმდეგენი:
ჩრდილოეთში გენერალი გვალატობდა, დასავლეთისკენ ჯარები
და ჩვენს უკან კიდევ—ვანდემი და ბრეტონში—ხალხი.

დიდი ხანია მე ამეებს მოველოდი. დიად, მას აქეთ, რაც ჩემ ძმა
ნიკოლოზს შევხვდი, მას აქეთ, რაც ნანსში ხალხის ყლეტა ვნახე,

დავრწმუნდი, რომ გაუნათლებელ მხეც ჯარისკაცს, რომელსაც თავისი უფროსის ღიმილი მთელს ქვეყანას ურჩევნია და ერთი უბრალო ჯვარი სულის ცხონებას, სასახლოდაც ექნება სწორედ იმ ხალხზედ იმპაროს იარაღი, რომელმაც იგი გამოზარდა და აწლაც პურს აჭმევს. მამაჩემს არას ვეუბნებოდი ჩემი ფიქრებისას და ძალიან ცუდსაც ვშვებოდი, რადგან წინაღვე რომ აზრადაც არის მოსვლოდა თავისი ნიკოს გაპარვა, ახლა ისე ძალიან აღარ შეწუხდებოდა. სოფელში ესლა ჰქონდათ სალაპარაკოდ; ისე აღელვებული ხშირად არ მინახავს მე ხალხი. შეიძლებოდა ჩვენსაც შემოსულიყო ვინმე მეზობელი და მეზობლური ჯიბრით ისიც წანოეყვედრებინა მამაჩემისთვის, რომ შენი შეილი სამშობლოს მოღალატეაო.

მაშინვე მივანებე საქმეს თავი და თითქმის ჩაუტყველი გავეწურე შინისკენ, რომ რაც შეიძლებოდა ფრთხილად შემეტყობინებინა ჩვენებისთვის ეს უბედურება. მამაჩემი გარედა მუშაობდა ჩვენს კარებთან და დამინახა თუ არა, ტკბილად შემომცინა. იმის დანახვა და ჩემი აღელვება ერთი იყო; ისე ავირიე, რომ აღარ ვიცოდი, რას ჩავდიოდი. სიფთხილევ დამავიწყდა, წინაღვე მოფიქრებული სიტყვებიც და, რაკი მამაჩემს დავუახლოვდი, შევტირე:

— რა ცუდი ამბავი მომაქვს, რომ იცოდე, მამაჩემო! ჩვენი ნიკოლოზი მტერს მისდგომია!

ნეტავი ღმერთი გამწყრომოდა და ხმა არ ამომელო: ერთი კი შეჰყვირა საწყალმა მოხუცებულმა, საზარლად შეჰყვირა, თითქო აღამიანი კი არა, სხვა რაღაც ღრიალებსო, და იქვე დაეშვა გულწასული. დღეს კაი ხნის კაცი ვარ, მაგრამ ახლაც ყურში მიდგას ის ყვირილი; საშინელი რამ იყო, საშინელი და ახლაც ფერი მეცვლება ხოლმე, იმ დღეს რომ მოვიგონებ.

მეც კი ვეღარ ვიდექი ფეხზედ; იქვე კედელს მივყუდებოდი და მეზობლები რომ არ მომშველებოდნენ, მეც იქვე წავიქცევოდი.

შინიდან დედაჩემი გამოვიდა ყვირილით: რა ამბავია? რა მოხდაო?

რუჟროს უკვე აეწია მამაჩემი და შინისკენ მიჰყავდა ჯერ ისევ გულწასული. პასუხიც იმან მისცა:

— რა მოხდა და ლამის მშობელი მამა ინაცვალოს თქვენმა ნიკომ! გაპარულა და მტერს მისდგომია!

მამაჩემი თავის ლოგინზედ დავასვენეთ. მეც ფეხითთ წივუჯექი და იმისთანა კანკალმა ამიტანა, რომ გაციებულსაც არ მიძაგძაგნია ისე. თან მწარედ ვტიროდი.

მაგრამ უბედურებასაც ჰქონია თავისი სიკეთე. მანამ უბედურება არ ეწვევა, ძნელია დარწმუნებითა სთქვას კაცმა — მეგობრება

მყავსო. უბედურებაში კი ყველა ერთად გამოჩნდება ხოლმე. იმის-
თანა სანუგეშო არა არის რა პატიოსანი კაცისთვის, როგორადაც
გრძნობა, რომ უბედურებაში მყოფს ერთობ თანაუგრძნობენ ნაც-
ნობი და უცნობი, ნათესავი და უცხო. მთელი სოფელი შეიძრა;
ქალი და კაცი თვალცრემლიანნი მოდიოდნენ მამაჩემის სანახავად;
ჩვენი პატარა ქოხი სავსე იყო ხალხით, მაგრამ ისე იყვნენ გაჩუმე-
ბულნი, ისე იყვნენ სულგანაბულნი, თითქო სახლში ცხელარიაო.
მარტო მოხუცებულნი გაბედავდნენ ხოლმე და თავის ქნევით იტ-
ყოდნენ:

— ეჰ, საწყალი ბასტიენი! მოდი შენა და დღეის შემდეგ შეი-
ლი ინატრე! აჰა, შვილისაგან არ არის მკვდარი ეს უბედური!

მე კი ვიჯექი და ვუსაყვედურებდი ჩემს თავს; კარგად ვხედავ-
დი, რომ სხვა, ვინც უნდა ყოფილიყო, უფრო ფრთხილად და და-
რიღებით ეტყოდა მამაჩემს ამ ამბავს, ვიდრე მე.

ცოტა ხანს უკან ნათლიაჩემიც შემოვიდა. გარედანვე შემომეს-
მა იმისი ხმა: — „ეჰ, ჩემო საბრალო ბასტიენ, ჩემო ძველო მეგობ-
არო!.. და მეც თავში წავიშინე და ქვითინი დავიწყე, მამაჩემი მე
მოვკალ-მეთქი.

ამას იმიტომ მოგახსენებთ, რომ სასახელოდ მიმაჩნია მამაჩემის
პატიოსნება. ის რომ მართლა პატიოსანი კაცი არა ყოფილიყო, არც
ისე დანანდებოდა ყველას. ხომ ისეთი ღარიბ-ღატაკი იყო და იმ
დღეს ცხადად გამოჩნდა, რომ ის უფრო უყვარდა ჩვენს სოფელს,
ვიდრე ბევრი სხვა უფრო შემძლებლები. ბევრს სიმდიდრის გამო
სცემენ პატივს; ჩვენგან კი რის იმედი უნდა ჰქონოდათ? უმეტესი
ნაწილი იმ ხალხისა, რომელნიც მამაჩემის სანახავად მოდიოდნენ,
ერთი ასად უფრო მდიდრები იყვნენ, ვიდრე ჩვენ. აი, ეს იყო სა-
ნუგეშო და, კიდევ მოგახსენებთ, მე თავი მომწონს, რომ ასეთი
ყველასაგან პატივცემული და საყვარელი მამა მყავდა.

როგორც იყო, მოვასულიერეთ საწყალი მამაჩემი. მარგალიტას
გაეგო თუ არა ჩვენი უბედურება. მაშინვე გამოეგზავნა ექიმი შტე-
ინზრენერი და ისე კარგად უწამლა, რომ სიკვდილს გადაარჩინა. მო-
სულიერდა, მაგრამ სულ იმასა ჩიოდა, გვერდი მტკივაო; სუნთქვა
უძნელდებოდა. მის სანახავად მოსულებს უცინოდა და იმედიანად
ეუბნებოდა:

— არა მიშავს რა, გმადლობთ!

დღეაჩემი კი იჯდა გაჯავრებული და ეტყობოდა, ძალიან ეჯავ-
რებოდა იმოდენი ხალხის თანაგრძნობა. რომ შესძლებოდა, სახლი-
დან გარეკავდა ყველას; ხალხის თანაგრძნობა ნიკოლოზის დაწყევ-

ლა იყო და დედაჩემი კი ნიკოლოზისავენ იყო და იმის მზესა ჰფიცავდა.

დედაჩემი ჯერ ისე იყო, თითქო საიმისო არა მომხდარა რაო; მაგრამ როდესაც ერთმა ჩვენმა მეზობელმა მირალმა უთხრა, თქვენს ნიკოლოზს თავის დღეში აღარ შეეძლება საფრანგეთში დაბრუნება, რაღვან, თუ დაბრუნდა, დაიქერენ, სამხედრო სასჯელში მისცემენ და დახვრეტავენო, მაშინ კი შეიგნო, რა უბედურება გვწვევოდა და ფერი ეცვალა. მირალი ძველი ჯარისკაცი იყო და სამხედრო კანონები კარგად იცოდა. იქნება სცდებოდესო, დედამ ნათლიაჩემსა ჰკითხა, განა ეს მართალიაო? და რაკი იმისგანაც იგივე პასუხი მიიღო, — საფრანგეთი მოღალატეებს ტყვიით უხვდება და დაუსჯელი არავინ გადარჩებაო, — თავი ველარ შეიმაგრა, ცრემლი წასკდა და გარედ გაეარდა სატირლად.

რამდენიმე დღის შემდეგ მამამ მუშაობაც შესძლო, მაგრამ ხელი სულ მარცხენა გვერდზე ეჭირა, თითქო გული მისდისო. ერთხელ მარტონი ვიყავით და ვკითხე:

— ხომ არა გტკივა რა, მამა, რომ აგრე ძნელადა სუნთქავ?

აქეთ-იქით მიიხედა, ხომ არავინ არისო, და მითხრა:

— პო, შვილო, ისე მაწუხებს მარცხენა ძუძუს თავი, თითქო ხანჯალი დამცესო.

მოიგონა ნიკოლოზის წერილი; ჯერ ძალა დაატანა თავის თავს და სიცილი დაიწყო, მაგრამ უცბად ცრემლი წასკდა, ხელები ცისკენ აღაპყრო და სთქვა:

— ღმერთო, შეუწდე უბედურს შეცოდებანი თვისნი! არ იცის უბედურმა, რას სჩადის, თორემ მაგას როგორ იზამდა.

თავის სატივიარის შესახებ ამის მეტი არა უთქვამს რა, თუმცა მას შემდეგ კარგად თავის დღეში აღარსადა ყოფილა. მაღავდა საწყალი, არავის რას ეუბნებოდა და მარტო ღამე, როდესაც ყველანი ღრმა ძილში ეგულებოდა, დაემორჩილებოდა ხოლმე ტკივილს და მწარედ ამოიკვნესებდა.

მეც, რაც შემეძლო, ვცდილობდი გამერთო რითიმე. საღამოზედ, შინ მივიდოდი თუ არა, გვერდით მივუჯდებოდი და პატარა სტეფანეს ვუქებდი — კარგადა სწავლობს, მამა ქრისტიფორე ძალიან კმაყოფილი არის-მეთქი. ყოველ კვირა ჩამომყავდა ხოლმე სტეფანე და შინ მყავდა მთელი დღე. მამაჩემიც გამხიარულდებოდა, მოილხენდა, თავისი სევდა გადაავიწყდებოდა და წამოიძახებდა ხოლმე:

— გმადლობ, შენ ღმერთო! ოღონდ ამ ბედნიერებას ნუ მომიშლი და მეტს აღარასა გთხოვ.

მე მარტო კვირაობით იცოდა, და ისე დღე კი, მთელი ექვსი

დღე თავდაღუნული უნდა ყოფილიყო თავის კალათზე და სრული თავისუფლება მიეცა მწარე ფიქრებისთვის. ვინ იცის რას არა ფიქრობდა დილის ხუთი საათიდან საღამოს ცხრა საათამდე? მარტო ჩემს მისვლაზედ გამოერკვეოდა ხოლმე, როდესაც შორიდან ჩემს სტვენას გაიგებდა. ეს ჩვეულებაც დარღმა შემძინა: მინდოდა დაქმალა ჩემი გულისწუხილი და ვუსტვენდი — ნახეთ რა მხიარულადა ვარ-მეთქი. გაიგებდა ჩემს ხმას, მომეგებებოდა და შორიდანვე შემომძახებდა:

— შენა ხარ, მიშელ! რასა იქ? ბევრი საქმე გქონდათ დღეს?

— არა უშავდა რა, მამა!

— მით უკეთესი! დაჯე, შვილო, დაისვენე, მანამ მე ამ კალათს გავათავებ.

დღეაჩემიც ძალიან შეწუხებული იყო, საწყალი. იჯდა თავის-თავის ჩრდილში, კუნჭულში, გულზელდაკრეფილი, პირმოკუმპული და თავის ნიკოზედ ფიქრობდა.

ქალაქიდან ყოველთვის ამომქონდა გაზეთები, რომელსაც მარგალიტა მაძლევდა და საღამოობით მამაჩემს წაუფუკითხავდი ხოლმე. ძალიან მოსწონდა ვერნიოსი და ერთობ ყირონდელების სიტყვები. უკვირდა, ასეთა გაბედვით რომ არიან, განა თავი განწირული აქვთო? და თანდათან რწმუნდებოდა, რომ ხალხის ბედ-იღბალი ხალხისავე ხელში უნდა იყოს და ხალხის ბატონი თვით ხალხა უნდა იყოს და არა სხვა. ძალიან ძნელად კი ითვისებდა ამ ახალ აზრს, რადგან ძველ დროში იყო აღზრდილი და დაბერებული, იმ დროში, როდესაც უბატონობას სიზმრადაც ვერავინ წარმოიდგენდა. მოაგონდებოდა ხოლმე თავისი დრო და ვერ წარმოედგინა, რომ დღეს ყველანი სრულიად თანასწორნი არიან და ადამიანთა შორის დღეს არავითარი განსხვავება აღარ არსებობს, გარდა პირადი ჭკუის და ნიქისა. ძველი, შეჩვეული აზრების ამოგდება ძალიან ძნელი რამ არის და მამაჩემი რომ დაბადებითვე გულკეთილი და სიმართლის მოყვარე არა ყოფილიყო, ახალი ცხოვრებისას ვერას გაიგებდა. ტყუილად კი არ არის ნათქვამი, შეჩვეული ჭირი მირჩევნია შეუჩვეველ ღზინსაო.

ადვილი წარმოსადგენია, რომ ორ-ორი რაზმის გაპარვის შემდეგ, მარშალი რომამბო თავის ალაგას ველარ დარჩებოდა და თითონვე ითხოვა, სამსახურში ყოფნა აღარ შემიძლიაო. მაშინ საზღვარზედ მდგომი მთელი ჯარი ორადღა გაჰყვეს: ერთი ჩრდილოეთისა, ლაფაიეტის წინამძღოლობით და მეორე აღმოსავლეთისა, რომლის წინამძღოლად ლიუკნერი იყო, ძველად გერმანელ ცხენო-

სანთა ჯარისკაცად ნამყოფი, რომელიც ფრანგულს ძლივს ამტკრევდა.

ავსტრიელები იმის მაგივრად, რომ წინ წამოსულიყვნენ, პრუსიის მეფეს გილიომს ელოდებოდნენ; იმანაც მიუხედავად გახიზნულთა ხვეწნა-მუდარისა დიდი ხანი ალოდინა საზღვართან მდგარი, შემოსასევად დამზადებული ჯარები. იმათი ლოდინით დიდად ისარგებლა ჩვენმა ერმა, რადგან განსაცდელი, ყველანი ვხედავდით, კარზედ გვადგა და მომზადება გვინდოდა; თოფი საკმარი არა გვქონდა, და მტერს რომ გაებედნა და დაუყოვნებლივ შემოსულიყო, უიარაღო ჯარებს დავახვედრებდით. რა ვუყოთ, რომ ქულზე კაცი იწევდა საომრად? არსენალი კი ცარიელი იყო და! რაც ძველისძველი, მეფე ლუი XV დროის თოფები გვქონდა, მილიციას დავუთმეთ, თუმცა ამ თოფებს ჩახმახი ერთობ წამხდარი ჰქონდათ. ზარბაზნებს იტყვიოთ, და ისე იყვნენ უანგისაგან შექმული, რომ სასროლად სრულიად აღარ ვარგოდნენ და გარდა ამისა ყუმბარაც თუმცა ბევრი გვქონდა, გამოსადეგი არ იყო, რადგან ზოგი სულ არ შედიოდა ლულაში და ზოგი ისე დაგორავდა შიგ, თითქო პატარა კენჭი შეუგორებიათო. მარტო თოფის წამალი გვქონდა საკმარი კარგად შენახული, რადგან თოფის წამალს ფალსბურგში სიპ კლდეში გამოქვაბულ სახლში ინახავდნენ და ამიტომ საუკეთესო თოფის წამალი ყოველთვის ფალსბურგელებს ჰქონიათ.

ასე იყო ჩვენი საქმე. ამას ყველა ხედავდა და, რასაკვირველია, რომ მთიულებმა შუბს მიმართეს, რაკი თოფი არა ჰქონდათ. რაც ჩვენ 1792 წ. მაისში საქმე გვქონდა, იმოდენა ჩემს დღეში აღარსად მიმუშავნია: მთელი ერთი თვე სულ შუბები ვაკეთეთ. ნიმუშად ერთი პარიზში გაკეთებული მოგვიტანეს და სულ იმისთანებს გვაკეთებინებდნენ.

რამდენი შუბი გამოვქედე მე იმ დროს! ვაკეთებდი და თან სულ იმასა ვნატრობდი, ნეტავი იმ დღეს შევესწრო, რომ ვინც მამაჩემს უკანასკნელი დღეები გაუშწარა, საკმარისად დასჯილი ვნახო-მეთქი. გამიტაცებდა ხოლმე ეს ფიქრი და ადიოდა და დადიოდა ჩაჭუჩი გაცეცხლებულ რკინაზე! ცოფიანივით გავხდებოდი ხოლმე ამ ფიქრებისაგან. მერე ვის სიკვდილს ვნატრობდი? ჩემი ძმისას, ჩემი დეიძლი ძმისას. აი, რა საშინელი რამ არის ომი, რომელიც ერთმანეთის მოსისხლე მტრადა ჰქმნის არა მარტო ერთის ქვეყნის შვილებს, არამედ ერთის დედის შვილებსაც.

ორი თვის განმავლობაში ათას ხუთასამდე შუბი გავაკეთეთ; საქმე იმდენი გვქონდა რომ ორი ქარგალი კიდევ სხვა დავიჭირე და

თვით ოსტატიც, რაკი ხედავდა რომ საქმე ძალიან ბევრი იყო, კვირაში ერთხელდა გადადიოდა თავის პიკპოლცის მამულში.

რომ გახურდებოდა მუშაობა და დაგვეცხებოდა, საკინძეს გავიხსნიდით და დამკლავებულნი მივევარდებოდით ცეცხლივით გაჩაღებულ რკინას, მგზავრებიც კი შესდგებოდნენ ხოლმე ჩვენს სანახავად. სამკვდლოში რომ ვეღარ ვეტეოდით, გარეთა ვმუშაობდით: რკინას შიგნით ვახურებდით და მუშაობით კი გარეთ ვიყავით. ერთი ქარგალი რკინის გახურებას და გამოტანას უნდებოდა. ვაჩქარდებოდნენ ხოლმე მგზავრები და გვიყურებდნენ! ნათლიაჩემი ძალიან კარგ გუნებაზე იყო, ჩვენთან ერთად მუშაობდა და როდესაც ნახავდა, რომ დავილაღენით და ჩაქუჩს ისე მაგრა ვეღარავცემდით, საშინელი ხმით შემოგვეძახებდა:

„დაჰკათ!.. წავა! წავა!“

და ჩვენც უფრო მხიარულად შევიქნევდით ჩაქუჩს.

დიდძალი საქმე გავაკეთეთ იმ ცოტა ხანში. გაზაფხულდა, ამწვანდა ბუნება, მშვენიერი დარები იდგა, მაგრამ სადამო ხანზედ იმოდენა მუშაობით ისე მოქანცულები ვიყავით ყველანი, რომ აღარც სეირნობა გვაგონდებოდა, აღარც კლუბში ჩასვლა. მკვდარივით მივეგდებოდით ხოლმე, როგორც კი ვახშამს ავალაგებდით. კლუბში მარტო შაბათობითლა დავიარებოდით, რადგან ვიცოდით, რომ ხვალინდელი დღე ჩვენი იყო და ძილს არავინ დაგვიშლიდა.

ორჯერ თუ სამჯერ შემხვდა მთაში ჩემი გაკეთებული შუბი და ისიც რა მთაში? მივარდნილ, მიყრუებულ ტყეში, საათის ან ბუხრის გვერდით აყუდებული. ავიღებდი დაქანგებულ შუბს, დავუწყებდი სინჯვას, ხან თავს ვუსინჯავდი, ხან ბოლოს... მომაგონდებოდა ძველი პატრიოტული აღტაცება და ვიტყოდით ხოლმე ჩემს ვულში:

— ქვეყანა მოგივლია, ჩემო ძველო მეგობარო, აღზასი, ლორენი, შამპანი! რაძდენი გერმანელის ხმალი ავიცდენია, რამდენი გამარჯვების მოწამე ყოფილხარ და თვით ბრაუნშვეიგის ზარბაზნებსაც კი ვერ შეუშინებიათ შენით გამხნევებული შენი პატრონი!

თვალწინ წამომიდგებოდა სიყმაწვილე და გაჭირებულ საქმობლოსათვის თავგანწირული ბრძოლა; მომაგონდებოდა ხალხის ძახილი: „თავისუფალ ერს გაუმარჯოს!.. ან გავწყდეთ ან გავიმარჯოთო!“ და მწარედ დავლონდებოდი, როდესაც შევადარებდი ეხლანდელ ქონღრისკაცებს და ჩემი ღროის გმირებს.

ჩვენში რომ ეს ამბები იყო, პარიზში უფრო და უფრო მატულობდა უთანხმოება. „ქრელები“ პატრიოტებს აბრალებდნენ საფრანკეთის აწეწას; უირონდელები იძახდნენ „მთიულები“ ანარქის-

ტები არიანო; მთიულები ყირონდლებს ამტყუნებდნენ, არც ომი უნდა გამოგეცხადებინათ და არც აგრე დამარცხებით დაგეწყოთო... ლამის ღპერთად გაიხადოთ ლაფაიეტი! ის ლაფაიეტი, რომელმაც მარსის მოედანზე ხალხი ჟლიტა და საერო კრებას სთხოკდა, ჭება შეასხით გენერალ ბუილეს, რომელმაც ნანსში იმოდენა ხალხი ამოხოცაო! „მთიულები“ ლაფაიეტის უვარგისობას აბრალებდნენ ყველაფერს და ყირონდლებს ეუბნებოდნენ: მინისტრები ხომ სულ თქვენი მომხრენი არიან, ლაფაიეტი გადააყენებინეთ! ლაფაიეტს არ უნდა მიეღო ეს თანამდებობა, რადგან კონსტიტუციის ძალით საერო კრების წევრს აკრძალული აქვს მეფისაგან რაიმე თანამდებობა მიიღოს. გადააყენებინეთ ლაფაიეტი, ეს თქვენი პირდაპირი ვალდებულება არისო!“

მარატი ჯარისკაცთ უყვიროდა: დახვრიტეთ თქვენი მოღალატე გენერლებიო! რუაიუ სულ იმას გაიძახოდა თავის გაზეთში, რომ რევოლუციის აღსასრული უკვე დადგაო! ვანდეში ერთი თავადი-შვილი მეფის სახელით აგროვებდა ხარჯს და სურსათის მზადებაში იყო: დიდებულნი, რომელთაც გაპარვა და მტერთან შეერთება უნდოდათ, მოგონილი გვართ და სახელით ეწერებოდნენ მილიციაში, და რაკი შვეიცარიას ან ბელგიას მიატანდნენ, გაიპარებოდნენ და მტრის ჯარს უერთდებოდნენ. მაგრამ ყველაზე უარესი მანც კონსტიტუციის მოწინააღმდეგე მღვდლების ქადაგება იყო, რომელნიც ყველგან პატრიოტების ლანძღვაში იყვნენ და სულ იმას გაიძახოდნენ, რომ კონსტიტუციის მომხრენი ღვთისა და ქვეყნის მტრები არიან და მეფე უნდა აწამონო; თანაც, საცა კი მორწმუნე ყმაწვილკაცს ნახავდნენ, ურჩევდნენ კათოლიკეთა ჯარში ჩაეწერე, რათა ჭეშმარიტი სარწმუნოება და ღვთისაგან კურთხეული მეფე დაიცვა შეგინებისაგანო; საწყალ ხალხს სულ ბრწყინვალე თავადიშვილების ცოლების და ქალების ნაზი თითებით ნაკერ ღენტებს ურიგებდნენ სხვადასხვა წარწერით და ჯვარცმულის სახით, რომ ქუდებზედ გაეკეთებინათ.

ერთი სიტყვით, უბრძოლველად არაფერს გვითმობდნენ და იმისთანა გამშაგებულნი იყვნენ, რომ სასიკვდილოდ განწირულს შეუძლია მარტო ისეთი თავის თავისა და მტრის დაუნდობლობა. მეტადრე ბზობის შემდეგ გამძვინვარდნენ. რევოლუციამდე მთელი ჩვენი მხარე ბზობა დღეს ქალაქისკენ მიეშურებოდა; დიდი და პატარა სულ იქ იყო და ყველას ბზის ტოტი ეკირა ხელში: აკურთხებინებდნენ და მერე ნაკურთხი ბზით და ანთებული წმინდა სანთლით შემოივლიდნენ ხოლმე ყველა ქუჩას; საცა კი ისინი გაივლიდნენ, დაკეტილი უნდა ყოფილიყო ღუქნები, თუნდა ეს ღუქ-

ნები პროტესტანტისა ან ებრაელისა ყოფილიყო; ყველა სახლი ხალებით და ყვავილებით უნდა ყოფილიყო მორთული, თუნდა ეს სახლები ებრაელებისა ყოფილიყო. 1792 წ. კი ბევრმა პატრიოტმა და თვით შოველმაც მოახსენეს ქალაქის მამასახლისს, ეს ჩვეულება ჩვენი სარწმუნოებრივი თავისუფლების შელახვა არისო. სამამასახლისომ დაადგინა: „რადგან კონსტიტუციამ ყველა სარწმუნოებას .სრული თავისუფლება მიანიჭა, დღეის შემდეგ აღარავინ იქნება იძულებული ბზობას თავისი სახლი ხალებით და ყვავილებით მორთოს; აღარავის ექნება ნება თავის სარწმუნოებრივ დღესასწაულს მილიცია დაისწროს; აღარავის შეეძლება სხვა სარწმუნოების მიმდევართ ძალით დუქნები დააკეტიოს“.

ამ ბრძანებამ უფრო არია საქმე. ბზობა დღეს მთელი მილიცია შეიარაღებული გავიდა და რაც ჩვენს მხარეში ვალენტინები და ბერი ბენედიქტები იყვნენ, ისინიც სულ იქ შეიკრიბნენ, რომ ახალი კანონის წინააღმდეგ აეშალათ ხალხი. მაგრამ, როგორც მოგახსენეთ, მილიციაც იქვე დაუხვდათ და, რომ დაინახეს — აღარ ხუმრობენ და თოფებს სტენენო, ველარა გაბედეს რა და ბზით და სანთლებით მარტო გალავანიდა შემოიარეს.

საუბედუროდ, სულ სხვაფრივ დატრიალდა საქმე სამხრეთში. გაზეთებში ეწერა, რომ თვით პარიზშიც კი საშინელი შეურაცხყოფა მიეყენებინათ იმ მოქალაქეთათვის, რომელთაც ქუდი არ მოეხადნათ ანთებული სანთლით მოსიარულე ბერებისთვის: საწყლები ტალახში ჩაეყარათ და ზედ ევლოთ.

ბზობის შემდეგ არია ყველაფერი. დღე არ გავიდოდა, რომ კონსტიტუციის მომხრე მღვდლისთვის ან სახლი არ გადაეწვათ, ან ვენახი არ გადაეჩეხათ და ან თითონაც არ მოეკლათ. მეტადრე ზემო რეინისკენ გათამამებულიყვნენ ბერები!

მაისის გასულს, ერთს დილას, როდესაც გაჩქარებულნი ვმუშაობდით ჩვენი სამჭედლოს კარზედ, მამა ქრისტეფორე დავინახეთ ჩვენკენ მომავალი; წინ ორი მათხოვარივით დაბრანძული ბიჭი მოუდიოდა; თავშიშველნი იყვნენ ორივენი და ხელები უკანა კქონდათ ახლართული. ერთიერთმანეთზე იყვნენ გადამბულნი და ისე მოდიოდნენ თავდაღუნულნი; უკან მამა ქრისტეფორე მოსდევდა თავისი ყავარჯენით და სამი კიდევ იმისი ერთგული სოფელი. სამჭედლოსთან ხალხი იდგა, მთიულები და გვიყურებდნენ — აბა შუბებს როგორ აკეთებენო. მამა ქრისტეფორე რომ დაინახეს, ყველანი იმისკენ მიბრუნდნენ და განცვიფრებულნი შეჰყურებდნენ. ნათლიაჩემმა დაუყვირა:

— რა ამბავია, მამაო! ეგ ტყვეები სად გიმოვინია?!

— შენ ხუმრობ და მართლა ტყვეები კი არიან. წარმოიდგინე, წუხელის სპატსბროდის და ლუტცელბურგის შუა — ჩემი ძმის იერემიას სანახავად გახლდი, — გზის პირას ჩამსაფრებოდნენ ესენი და სამი კიდეც ამათსავით ავაზაკი, უტბად მომვარდნენ ცულებით და დანებით:

— მოკლათ ეს მოღალატეო!

ღვთის წყალობა გაქვთ, მეც კარგად დავუხვდი ჩემი ყავარჯენით! სამი გამექცა და ეს ორი კი წავაქციე; მე თითონ წამოვყენე, ჩვენს სოფელში ავიყვანე და ჩვენებურებს ჩავაბარე. წუხელისა იქ ბრძანდებოდნენ და ახლა ქალაქს მიმყავს, რომ ერთი კარგად გააპგებინონ, რას მემართლებიან, რას მერჩიან, რომ მოსაკლავად აღარ მინდობენ?! პირველი რომ ყოფილიყოს ეს შემთხვევა, მე თითონაც დავსჯიდი ჩემი ყავარჯენით და ვაკმარებდი. მაგრამ პირველი კი არა, ეს მესამედ მისაფრდებთან ასე. პირველად კომბლებით დამეცნენ, ამათ კი ცულებიც წამოუღიათ, უყურე, ივანე, რამდენ ალაგას დამჭრეს ამ წუწკებმა.

ანაფორა გაღიხადა და სისხლით მოსვრილი გული დაგვანახვა. კრილობა შეხვეული ჰქონდა.

— ეს ხომ ასე, მხარიც დაშავებული მაქვს... ფერდებიც.

ეს რომ დავინახეთ, გავბრაზდით და თვით მამა ქრისტიფორეს რომ არ დავეჭირეთ, დავხოცდით ავაზაკებს. მაგრამ მამა ქრისტიფორემ არ მაგვიშვა, წინ გაირეკა და ჩვენ კი ამ სატყვებით გვამშვიდებდა:

— მე რომ ამათი მოკვლა მდომოდა, აქ კი არ ჩამოგირეკდით. ამათი დასჯა კანონის საქმეა და არა ჩვენი. გამოირკვევა მაინც, ვინ არის ამათი წამქეზებელი.

ჩვენც შევედქეთ, რადგან ვგრძნობდით, რომ მართალს გვეუბნებოდა, თუმცა ძალიან ვლანძღვთ ავაზაკები. მამა ქრისტიფორე კი გვამშვიდებდა:

— ამ საღამომდე, ხალხო! საღამოზედ ამოვივლი და ყველაფერს გიამბობთ.

მთელი ღღე ამაზედ ვლაპარაკობდით. გაივლ-გამოივლიდა ნათლიაჩემი და იტყოდა:

— ბედნიერია, ვისთვისაც ღმერთს ძალ-ღონე მიუცია. მამა ქრისტიფორეს ალაგას რომ სხვა ყოფილიყო, ცოცხალი ვეღარ გადაჩრებოდა! მაგრამ იმას და იმის ძმა იერემიას ხუთი კაცი კი არა, ოცდახუთიც ვერას დააკლებდა; თუ ერთი დაეჭიდნენ რასმე, გუთნეული რომ მოჰკიდოთ, ძვრას ვერ უზამთ. მთის ჯიშისაა, მთისა, ის დალოცვილი ძველებური კირკიტი ჯიშისა.

და უცბად სიცილი წასკდა, ისეთი სიცილი, რომ სულს ძღაეს-
ლა იბრუნებდა.

— მწარედ არ მოძურწავდნენ ის სამნი, ყავარჯენი რომ
მოხვდებოდათ თავში! შენი გამჩენის ჳირიმე შენი, მამაო ჳრის-
ტეფორე!

და იმისთანა გულიანად ხარხარებდა, რომ ჩვენც მოგვერია სი-
ცილი. ვიციოდით და თან გაკვირვებულნი ვეკითხებოდით ერთმა-
ნეთს, ისე როგორ წახდნენ უბედურები, რომ ხუთი კაცი ერთ
მღვდელს შეუშინდაო!

მაგრამ მოგვაგონდა რომ საბრალო მამა ჳრისტეფორეს რამდე-
ნიმე ჳრილობა ჳქონდა და კვლავ ბრაზი მოგვერია: აბა სწორედ
მაგვეარ ავაზაკებზედ უნდა ვცადოთ ახალი მანქანა, რომელიც ყვე-
ლა გაზეთებში იყო მაშინ აწერილი და რომელიც საშინელი სისწ-
რაფით თურმე აგდებინებდა თავს სიკვდილით დასასჯელს; აგერ
ორი კვირა იყო პარიზში გამოსცადეს ეს მანქანა და ძალიან კარგიც
გამოდგა. საშინელი, შემადრწუნებელი რამ უნდა ყოფილიყო ეს
ახალი გამოგონილი იარაღი კაცის საკვლელად და გაზეთებში კი
დიდი ჳებით იყო აწერილი ეს „ახალი საბუთი კაცობრიობის წინ-
მსვლელობის და განვითარებისაო“... მართალია, ეს გამოგონებაც
აღაშიანას გონებრივ განვითარებას ამტკიცებს, მაგრამ ამგვარი
გამოგონება ყოველთვის ავის მომასწავებელია და სრულიად მარ-
თალნი იყვნენ ბერები, რომ გაიძახოდნენ, ცუდი დრო დაგვიდგაო!
შემდეგში აღმოჩნდა, რომ იმათი წინასწარმეტყველება უფრო მარ-
თალი გამოდგა, ვიდრე თითონ ეგონათ.

სალამოზედ მამა ჳრისტეფორემ, შინ რომ მიდიოდა, დაპირები-
სამებრ ჩვენკენ ამოიარა: ორივე ტუსალი ციხეში ჩაამწყვდიეს;
ბ. მსაჯულმა დაწერილებით გამოჳკითხა ყოველი გარემოება, გა-
ნაჩენი შეუდგინა და ახლა ნანსში უნდა გაგზავნოსო.

აი, როგორი გესლი მოედო ჩვენს ჳვეყანას ბერების წყალობით;
ამის მიზეზი იმ ბერების ჳადაგება იყო, რომელნიც იმავ თავითვე
ეურჩნენ კონსტიტუციას და ცხადლივ თუ ფარულად თავიანთ
მტრობას არ აკლებდნენ. ჩვენში რომ ასე იყო, აბა ვანდეში რა
იქნებოდა? კონსტიტუციის მომხრე მღვდლების ზოცვა და აოხრე-
ბა ალბათ ძალიან ხშირი იყო და საერო კრებასაც ხშირად მისდიო-
და ეს ამბავი, რომ ორი დღის შემდეგ, რაც მამა ჳრისტეფორემ
გვნახა, შემდეგი დადგენილება გააკრეს ყველგან სკოლებზედ, სა-
მამასახლისოებზედ და ეკლესიებზედ:

„საერო კრებამ, მოისმინა რა მოხსენება კონსტიტუ-
ციის მოწინააღმდეგე მღვდლების და ბერების მოქმედება-

ზედ, რომელნიც ხალხში არეულობის და შფოთვის ჩამოვდებ-
ბას ცდილობენ, დაადგინა: საქმე დაუყოვნებლივ უნდა
გადასწყდეს, რათა ბოლო მოეღოს მათს საქციელს.

„საერო კრებამ, რა დარწმუნდა, რომ დაუფიცავი
მღვდლები იმისთანა საზიზღარ საშუალებას ხმარობენ კონს-
ტიტუციის გასაუქმებლად, რომელიც ცხადად ამტკიცებს,
რომ მათ საზოგადო საქმეც და სამშობლოს კეთილდღეო-
ბაც სრულიად არაფრად მიაჩნიათ; რა დარწმუნდა, რომ სა-
ზოგადოებრივი წესწყობილების და თავისუფლების მოსისხ-
ლე მტრები თავის დღეში არ შეურიგდებიან კონსტიტუციას
და, მამასადამე, მათი მეგობრად მიჩნევა თავისუფლების
ღალატი იქნება; რა დარწმუნდა, რომ სამართალი და კანონ-
მდებლობა ვერას გახდება იქ, სადაც მავნე პირნი ხალხის
წარყვნას და გაბრიყვებას ცდილობენ და, მამასადამე, ყო-
ველთვის მალულად მოქმედებენ, რომ დაუსჯელად დარჩ-
ნენ, დაადგინა:

„მუხლი პირველი: საზოგადოებრივი მშვიდობიანობის
და კეთილდღეობის დასაცველად, ყოველი სასულიერო პირი,
რომელიც ქვემოლ მოყვანილ დანაშაულთაგანს ჩაიდენს რას-
მე, გაგზავნილ იქნება მთამადნებში სამუშაოდ“.

შემდეგ ამისა აღრიცხული იყო ათამდე დანაშაული, რომელთა-
გან უმთავრესი შემდეგი იყო: „როდესაც ოცი ხმოსანი მამული-
შვილი ითხოვენ რომელიმე დაუფიცავი სასულიერო პირის მთა-
მადნებში გაგზავნას, თემის უფროსმა თავის კრებულთურთ უნდა
დაუყოვნებლივ დააკმაყოფილოს მათი თხოვნა, თუ თითონაც
თანახმა ამ განაჩენისა“.

საშინელება იყო ეს კანონი, მაგრამ სხვა გზა აღარა გვქონდა:
ან უნდა დავდუპულიყავით, ან უნდა დავგვეღუპა! რაში ვტყუოდი?
განა არ ვეხვეწეთ, მაგას ნუ გვიშვრებითო! განა წინაღვე არ შევა-
ტყობინეთ, მაგ საქციელს სასჯელიც თან დაჰყვებაო! განა ასჯერ
და ათასჯერ არ მივმართეთ ხვეწნით და მუდარით, მოდით, ძმუ-
რად, მშვიდობიანად ვიცხოვროთო! რა პასუხი გაგვეცეს ამ მუ-
დარაზედ? რამდენსაც ვეხვეწებოდით, იმდენი უფრო მტრულად
გვეპყრობოდნენ; სამოქალაქო ომი აგვიტეხეს და უცხოელი ჯარე-
ბი მოიწვიეს თავიანთ სამშობლოს საწინააღმდეგოდ. ჩვენც იდა-
მიანები ვართ! გიყები ვიქნებით, სულმდაბალი ლაჩრები ვიქნებით,
რომ მტერს მტრულად არ მოვექცეთ და ასე თუ ისე თავიდან არ
მოვიშოროთ. არც მაშინ დარწმუნდებიან, რომ ძალა ჩვენს ხელთ
არის? ჩვენ ისინი აღამიანადა და ჩვენი ქვეყნის შვილებად კი არა,

ქვეყნის მოლაპატრედ უნდა მივიღოთ და ისე დავსაჯოთ. აბა იმათ გაემარჯვება? აბა ხალხი დამარცხებულიყო? იცით, როგორ აწამებდნენ პატრიოტებს? ამის პასუხს ამ ცოტა ხანში დიდებულთა და დაუფიცავ მღვდელთა მფარველი ბრაუნშვეიგი გეტყვით თავის პროკლამაციით.

მაშასადამე, აუცილებლად საჭირო იყო ამ კანონის დადგენა. ჰოდა, მეფე ლუი XVI აქაც არ დაიშალა თავისი: წინააღმდეგი ვარო, მოაწერა.

ხმა დადიოდა, გახიზნულები დაბრუნებულან და ათასობით შედიან პარიზშიო. საიღუმლო კრებები და სჯა აქვთ და დიდი უბედურება დატრიალდება ამ ცოტა ხანშიო.

საერო კრებამ კარგად იცოდა პარიზში დიდებულთა ყოფნა და ოცი ათასი კაცი დააბანაკა იქვე პარიზის მიდამოში, რომ დიდებულთ არა გაებედნათ რა. მაგრამ ლუი XVI ამაზედაც, წინააღმდეგი ვარო, ბრძანა. იმავე დროს პრუსიელებს დიუპანის პირით შეუთვალა: „აჩქარდით და, საფრანგეთში რომ შემოხვიდეთ, პროკლამაციით გამოუცხადეთ ხალხს, რომ ერს არას ერჩიო, არამედ იმათ წინააღმდეგ ხართ ამხედრებული, რომელთაც ღვთისაგან დაწესებული წესწყობილება გადაავდეს. გამოუცხადეთ, რომ თქვენი წადილი ომი კი არა, ანარქისტებისაგან გადაგდებული მეფის და ქვეშაირიტი სარწმუნოების აღდგენა არის“.

აი, პატიოსნებაც ამასა ჰქვია! პატიოსნება მეფისა, რომელიც თავის ხალხის წინააღმდეგ უცხოელებს ეხვეწება, აჩქარდითო! მოდით და შეიბრალებთ ამის შემდეგ! იმას უნდოდა კისერზედ ისევ უღელი დაედგა ჩვენთვის, და თავისი რომ აესრულებინა, დღეს მონასტრის და ბატონის ყურმოჭრილი ყმანი ვიქნებოდით მეცა და თქვენც, ჩემო მკითხველო! მთელი ქვეყნის ხარჯი ჩვენ გვედებოდა; ჩვენს შვილებს არც სამხედრო და არც სახელმწიფო სამსახურში გზა არსად ექნებოდათ და ბევრი-ბევრი მზარეულად და ლაქიად ეყოლებოდათ დიდებულ ბატონებს! ერთი სიტყვით, ისეთივე ყოვლისფრით უბედურნი ვიქნებოდით, როგორც რევოლუციამდე ვიყავით და მუქთახორა ბატონები და ეპისკოპოსები, ფლიდი, ქლესა შინაყმანი მეფის და დედოფლისა ძველებურად განცხრომაში და ფუფუნებაში იქნებოდნენ! მაგრამ ვერა, ვერ აუსრულდა წადილი საწყალ მეფეს! პატრიოტებმა აჯობეს მთელი ევროპის მეფეებს და მართლმსაჯულება დაამყარეს ბატონყმობის მაგივრად. საწყალი მეფე! საწყალი დედოფალი! გულკეთილი და ხალხის მოსიყვარულე დედოფალი მარიამ ანტუა-

ნეტა, რომელიც სულ იმას იძახდა ყოველ დღე, რომ პრუსიელები და იმისი ძმისწული — ავსტრიის მეფე და გერმანელების იმპერატორი — უნდა მოვიდნენ, საფრანგეთის ჯარი, — ორასი ათასი კაცი, — ამოხოცონ და ისე გამათავისუფლონ ამ ტყვეობიდანაო!

მაშინ კი იგრძნეს უირონდელებმა, რომ სასახლემ თვალი აუბა უბედურთ და გადასწყვიტეს, მეფეს ძალა დაეატანოთ, რომ თავისი საქციელი აგვიხსნასო. მინისტრმა როლანმა წიგნი მისწერა მეფეს და სთხოვდა, იმდენი გამბედაობა როგორ არ ზუნდა გქონდეთ, რომ პირდაპირ გამოაცხადოთ — ერისკენა ბრძანდებით, თუ ერის წინააღმდეგაო? თუ ერისკენა ბრძანდებით, ორივე დადგენილება საერო კრებისა კანონად უნდა აქციოთ თქვენი თანხმობით; და რუ წინააღმდეგი ბრძანდებით, არსად უნდა უმტყვევნოთ თქვენს ჩვეულს „წინააღმდეგობას“ და მაშინ ხალხს ეცოდინება, რომ ლუი XVI საფრანგეთის მტრებს მისდგომიაო.

პატიოსანი კაცი ყოველთვის პატიოსნად მოიქცევა! როლანი დაურიდებლივ წერდა:

„თქვენს დიდებულებას დიდი უფლებანი ჰქონდა, რომელნიც მეფის ღირსების კუთვნილებად მიგაჩნდათ. ბავშობიდანვე ის რწმენა შეუთვისებიათ თქვენთვის თქვენს აღმზრდელებს, რომ წმინდად და ხელშეუხებლად უნდა დაგეფაჩათ ის უფლებანი და, რასაკვირველია, სასიამოვნო არ უნდა ყოფილიყო თქვენთვის მათი დაკარგვა; სრულიად სამართლიანად უნდა აღგძროდათ სურვილი დაკარგულ უფლებათა ხელახლა მოპოვებისა და, მაშასადამე, რევოლუციის გაუქმებისა. ესევე სურვილი უნდა აღძროდათ ყველა თქვენს მომხრეებს, რომელნიც თქვენგან წყალობას მოელიან რასმე ან აწმყოში ან ახლო მომავალში. თქვენი და თქვენი პომხრეების სურვილი არც ერს უნდა გამოჰპარვოდა და, რასაკვირველია, სიფრთხილით და უნდობლად უნდა ყოფილიყო თქვენდამი. ამგვარად თქვენი დიდებულება ორ ცეცხლ შუა იმყოფებოდა მთელი ეს ხანი: ან თქვენს კერძო სურვილს უნდა მიჰყოლოდით, ან არა და გარემოებათ დამორჩილებოდით. მაშასადამე, ან ერის მოწინააღმდეგეთ უნდა მისდგომოდით და ქვეყნის არევა გერჩივათ, ან ერს მისდგომოდით და მშვიდობიანობა დაგემყარებინათ... უსაზღვრო არა არის რა და ჩვენს მოთმინებასაც საზღვარი უნდა ჰქონდეს. ჩვენ უნდა ვიცოდეთ, რა არის თქვენი წადილი.

„ადამიანის უფლებათა აღიარება პოლიტიკურ სახარებად იქცა, და საფრანგეთის კონსტიტუცია სარწმუნოებად,

რომლისთვის ხალხი სიცოცხლეს არ დაინდობს... ყოველი გრძნობა მღელვარებად ქცეულა. ხალხი ძრწის და ღღეს იქნება თუ ხვალ საშინელი ძალით იფეთქებს, თუ თქვენმა დიდებულებამ არ მიმართა ერს და პირადი ნდობით არ დაამშვიდა იგი. თქვენდამი ნდობა ხალხისა დამყარებული უნდა იყოს საქმეზედ და არა სიტყვაზედ. სიტყვამ თავისი დრო მოჰამა, ახლა თქვენგანაც კი საქმეს თხოულობს ხალხი... უკან დაწევა შეუძლებელია! აგრეთვე დაყოვნება ხანისა, რადგან რევოლუცია უკვე დაწყებულია ყოველი თქვენი ქვეშევრდომის გონებაში და საშინელი სისხლის ღვრით დამთავრდება იგი, თუ ჩვენ თქვენც არ დაგვეხმარეთ და არ ავიცდინეთ ის უბედურებანი, რომელთა აცილება ღღეს კიდევ შესაძლებელია... დაყოვნება შეუძლებელია, რადგან ცოტა ხანი კიდევ და ხალხი დარწმუნდება — საფრანგეთის მეფე საფრანგეთის მტრების მეგობარი ყოფილაო“!

ამის პასუხად მეფემ გადააყენა ჟირონდელი მინისტრები. მაგრამ საერო კრებამ დაადგინა: სამშობლო დიდი მწუხარებით ეთხოვება ამ მინისტრებს და გარდა ამისა როლანის წერილი დაიბეჭდება და 83 თემში გაიგზავნებაო.

შემდეგ ამისა მეფემ დიუმურიე დანიშნა სამხედრო მინისტრად. ძალიან ფლიდი კაცი იყო ეს გენერალი და რაკი ნახა, რომ მიუხედავად იმის რჩევისა, მეფემ არ ინება საერო კრების ორი დადგენილება მიეღო, მინისტრობაზედ უარი განაცხადა და ისევ ჯარში წავიდა. მეფე ძალიან შეწუხებული იყო, რადგან ისეთი კაცი ვეღარ ებოვა, რომელიც ერის მოსამსახურეც ყოფილიყო და ერის მოწინააღმდეგე მეფისაც. დედოფალი კი ამხნევებდა:

— პრუსიელები მალე მოვლენ! ცოტა ხანი კიდევ გაუძლოთ! განა აგრე ადვილად უნდა დაჰკარგო იმედი? სასულიერო წოდება ჩვენკენ არის და კარგადაც ირჯება. ვანდემიცი კარგად არის საქმე.

ეს ამბები გამოაქვეყნა მარიამ-ანტუანეტას ერთმა მოახლემ და მგონი მართალი უნდა იყოს. სწორედ ისეთივე იყო ეს ცოლისაგან ქმრის გამხნევება, როგორც ჩვენს ქოხში, დედაჩემი რომ ეტყოდა ხოლმე სასოწარკვეთილ მამაჩემს:

— ღმერთი მოწყალეა, კაცო! აი, წამოგვეზრდებიან ბიჭები და ჯარში გავგზავნოთ სხვის მაგივრად. ნიკო, კლოდი, მიშელ... სამში ერთი როგორ არ გადარჩება, რომ სხვის მაგივრად წავიდეს? კაი ფულს ავიღებთ მაშინ, ვალს გადავიხდით, ერთ ძროხას, ან ორ თხას ვიყიდით და ცოტათი მაინც მოვისვენებთ.

იგივე და ისევეა, ოღონდ ნიკოს, კლოდის ან მიშელის გაყიდვის

მაგივრად, დედოფალი ალზასს დაუთმობდა პრუსიელებს. დიად, მთელს საფრანგეთს ეშინოდა ამისი, ყველას გულზე ლოდვიით გვაწვა ეს ფიქრი, რადგან ყველა ჩვენგანს, სულ უკანასკნელ მაწან-წალასაც კი უფრო მეტად უყვარდა სამშობლო, ვიდრე მეფე-დედოფალს. ნამდვილი პატრიოტიზმი, ჭეშმარიტი სიყვარული სამშობლო ქვეყნისა ხალხშია; ხალხს უყვარს მიწა, რომელსაც იგი ყოველწლივად დამოაბრუნებს და რომლითაც იგი ცოცხლობს. სხვებს კი შემოსაელიანი ადგილები უყვართ, რომ საქმე არაფერი ქონდეთ, წარჩინებულინი მოხელენი შეიქნენ და ღიდი პენსია დაიმსახურონ... ჩემს დროს კი ესე იყო და!

ჩვენს კლუბში, დაიწყებოდა თუ არა სხდომა, მაშინვე იმას დაიძახებდნენ: სიკვდილი მოდალატეებსაო! მაგრამ შოველი იქ იყო და ის გვამშვიდებდა:

— დამშვიდდით, მამულიშვილნო, დამშვიდდით! გაბრაზებით საქმე არ გარიგდება. პირიქით, კიდევაც წახდება! იქნება დამეთანხმოთ, რომ მეფის წინააღმდეგობა საერო კრების დადგენილებათზედ ჩვენთვის სასარგებლოც არის, რადგან ახლა პირისპირ მაინცა ვხედავთ მტერს. აქამდე მარტო ექვი გვქონდა; ახლა კი ექვი აღარაისა აქვს და ყველანი კარგადა ვხედავთ, რომ თვით მეფე ცდილობს ხალხი არიოს და ერთმანეთს შეახლოს... იგივე სურვილი, რაც ყოველ ჩვენს მტერსა აქვს... ხედავთ, რა თანხმობით მოქმედებენ ღიდი და პატარა, მეფიდან დაწყებული სულ უკანასკნელ მელავითნემდე? ჩვენც სწორედ იმათ მაგალითით უნდა ვისარგებლოთ და ყოველთვის თანახმად და აუჩქარებლად ვუძღოდეთ ჩვენს საქმეებს. ყველა ჩვენგანი მზად იყოს ჯარში წასასვლელად, და ვინც შინ დარჩება, ეცადოს გადასდოს რამე ჯარის სახარჯოდ. შეძლებისდა კვალად ყველა დაეხმაროს საზოგადო საქმეს! სიფრთხილე და ერთობა მამულიშვილნო, და გამარჯვება ჩვენი!

შოველის სიტყვის შემდეგ იაკობელების კლუბში წარმოთქმულ სიტყვებს ვკითხულობდით: ბაზირისას, შაბოსას, რობესპიერისას, დანტონისას და ვმხნევედობოდით, რადგან ვხედავდით, რომ იმ კაცებს შიში არაფრისა ჰქონდათ და წინ სვლა ენატრებოდათ. ჟირონდელი მინისტრების დათხოვნა იმათაც საზოგადო უბედურებად მიაჩნდათ, რადგან ის მაინც ცხადი იყო, რომ, რაც უნდა ყოფილიყო, მტერს არ მოუდგებოდნენ! მართალია, ისინი ომის მომხრენი იყვნენ, მაგრამ ომი იმიტომ ინდომეს, რომ რევოლუცია დაემთავრებინათ და არა იმიტომ, რომ სამშობლო გაეყიდნათ.

ჩვენს მხარეში საუკეთესოდ ჩვენი კლუბი ითვლებოდა შოველის წყალობით, რადგან ჭკვიანი, ფრთხილი კაცი იყო და ამასთან

უანგარო მუშაკი სამშობლოს კეთილდღეობისა. ჩვენს გადაწყვეტილებას პარიზელ იაკობელების კლუბს ვაცნობებდით და როდესაც კრებას ჩვენი დადგენილებაც მოხსენებოდა, ამას გაზეთებიც მოიხსენებდნენ ხოლმე.

მაგრამ იმ დროს ლაფაიეტმა ნილაბი ჩამოიხსნა და ყველანი დარწმუნდნენ, რომ ლაფაიეტი, რომელსაც მთელი ქვეყანა ნამდვილ პატრიოტად იცნობდა და ნათლიაჩემი და ჟირონდელები მიუხედავად „მთიულების“ აზრისა, უსაზღვრო პატივსა სცემდნენ, მეფისკენ იყო და ხალხს მასხარად იგდებდა. რაც დღემდე კარგი ჩაედინა რამე, ამაოებით ჩაედინა და ახლა უძღვები შვილი თავის მამას ურიგდებოდა: ხომ მოგეხსენებათ, ლაფაიეტი დიდებული მარკიზი და საშიში მარკიზიც ბრძანდებოდა, რადგან მთელი ჯარი იმას ებარა და თუ გაჭირდებოდა, ეცდებოდა თავისი ჯარი საერო კრების წინააღმდეგ წაეყვანა.

მაშინ პირველად იყო ამისთანა განსაცდელში ჩვენი საქმე. მას შემდეგ იმდენმა გენერალმა მოინდომა ჩვენი ლალატი, რომ აღარც კი მახსოვს; საქმე პირველი ყოფილა. ჩვენდა საბედნიეროდ, ლაფაიეტს დიდად არსად გაუმარჯვია მტერზედ. მართალია, მობეგის ახლოს რომ ავსტრიელების მცირე რაზმი დაამარცხა, თქვა: ჩემი ჯარი მე მომყვებაო! მაგრამ ეს დარწმუნებით არ იცოდა და საერო კრებას თავხედური წერილი მოსწერა, რომლითაც უცხადებდა: ყოველი უწესოების მიზეზი იაკობელები არიან, ჟირონდელები ქორიკანაობის მეტს არას აკეთებენო... დასკვნა ამ წერილისა ის იყო, რომ რჩევას აძლევდა საერო კრებას: ყველა კლუბები დაშალეთ და თქვენი დადგენილება დაუფიცავი მღვდლების მთამდნებში გაგზავნისა და პარიზთან 20 ათასი კაცის დაბანაკების შესახებ გააუქმეთო.

წადი შენა და ენდე ბატონს მარკიზს, დიდ ვაშინგტონის მეგობარს! მეტი თავხედობაღა იქნება, ჯარისკაცი, რომელსაც ჯერ გამარჯვებაც კი არ უნახავს, საერო კრებას ბრძანებას აძლევდეს! ამის შემდეგ ყველამ ვიცანით ბ. მარკიზ ლაფაიეტი — ხან ვაშინგტონის მეგობარი, ხან მეფე-დედოფლის უმთავრესი ქომაგი! ლაფაიეტისა აღარც მეფეს სწამდა რამე, აღარც პატრიოტებს: მეფისთვის ძალიან რესპუბლიკელი იყო და ჩვენთვის ძალიან მარკიზი.

ასე მოუვა ყველას, ვინც ღმერთსაც ემსახურება, სატანასაც და სულ იმ ფიქრში იქნება, რომ ორივეზედ ჰკვიანი მე ვარ და ჩემს ფლიდობას ვერც ერთი ხედავს, ვერც მეორეო. პარიზელი მილიცია, რაკი ლაფაიეტი პარიზიდან გავიდა, ხალხს მიუდგა; მოქალაქენი და მუშა ხალხი ერთად იყვნენ, როგორადაც 1789; პარიზის

მამასახლისმა პეტიონმა მოარიგა და შეაერთა ისინი. პარიზელმა ხალხმა ლაფაიეტის თავხედური წერილი რომ სცნა, დაადგინა — საბურთაო დარბაზში კრების წლის თავი ვიღღესასწაულოთო. ეს დღესასწაული 20 თიბათვეს უნდა ყოფილიყო. შოველმა ერთი კვირის წინ აგვიხსნა ამ დღის მნიშვნელობა.

— ამბზე დიდი დღესასწაული ჩვენს ერს არც ერთი არა აქვს, — იძახდა თავის პატარა ოთახში ბუხრის თავზედ დაყრდნობილი შოველი. — საბურთაო დარბაზში რომ ერის წარმომადგენელნი შეიფიცნენ, იმ დღიდან და ბასტილიის ციხის აღებიდან მომდინარეობს რევოლუცია და ჩვენს კალენდარშიც სწორედ ეს ორი დღესასწაული უნდა იყოს პირველ ალაგას მოხსენებული, როგორც ებრაელთ კალენდარში წითელ ზღვაზედ გავლა და სინაის მთასთან მისვლა უწერიათ.

თან ბურნუთს სწევდა და ღიმილით გადმოგვეყურებდა. 19 თიბათვეს, ჯერ ლაფაიეტის წერილისა არა ვიცოდით-რა, რადგან ჩვენში 24-ს მოიტანეს იგი გაზეთებმა, შოველმა გვითხრა:

— ხვალინდელ დღესასწაულს ჩვენ ფალსბურგში ვერ მოვახერხებთ, რადგან ქალაქი ადგილია და მინისტრის ნებართვა დაგვეკირდება. მე არ მითხოვნია, და არც მინდოდა თხოვნა. ეგ არაფერი: ხვალ სადილის შემდეგ თითო ჰიქა ღვინით მოიგონეთ ეს დიდებული დღე და ეგეც საკმარისი იქნება. მარტო ჩვენ კი არა, მთელი საფრანგეთი მოიგონებს ხვალ თავისუფლების დასაწყისს!

ისეთი კილოთი ამბობდა, რომ დავრწმუნდით, ხვალ რაღაცა მოხდებო. ვხედავდით, რომ იცოდა, მაგრამ სიფრთხილისა გამო ვერ გვეუბნებოდა.

დღეს ყველამ იცის, რომ 20 თიბათვეს 1792 წ. პარიზელი ხალხი ძალიან ადრე ადგა და მეღუდღე სანტერის, ყასაბი ლეჟანდრის და ოქრომჭედელი როსსინიოლის და სხვა პატრიოტთა წინამძღოლობით საერო კრებისკენ გაემართა — ქალი, კაცი, ბავშვი, თოფებით და შუბებით. სამფერი ბაირალებით და ორთითზედ ჩამოკიდებული შარვლებით; მიდიოდა იმოდენა ხალხი და თან საშინელი ხმითა ყვიროდა; აღარ გვინდა ერის წინააღმდეგი მეფე! გაუმარჯოს უირონდელ მინისტრებს!.. თან „წავა-წავა“-ს მღეროდნენ.

საერო კრებამ დარბაზის კარი გაუღო. სამი საათის განმავლობაში საერო კრების წინ 25 — 30 ათასმა კაცმა გაიარა. იქიდან მეფის სანახავად მივიდნენ. მერე დედოფლისა და მინისტრის სანახავად.

მილიციას ლაფაიეტი აღარა ჰყავდა უფროსად და იმის მაგიერ

რომ ხალხისათვის დაეშალა ეს შანიფესტაცია, მილიციელებიც ხალხში ჩაერივნენ და სასახლეში ერთად ავიდნენ.

ჩაწყალ ხალხს თავის დღეში სიღარიბის მეტი არა ენახა რა და ახლა სასახლეში რომ შევიდნენ ესე უცბად და იმოდენი თვალმარგალიტი და საგანგებო ხალები დაინახეს და თანაც ძვირფასი მხატვრობა, საკრავები და ოქრო-ვერცხლის ჭურჭელი, განცვიფრებულნი დარჩნენ. ბოლოს თვით მეფეც ნახეს: ერთ ფანჯარაში ატუზულიყო და გარშემო მოსამსახურეები ეხვეოდნენ. ყასაბმა ლეჟანდრმა მოახსენა, კმარა რაც გვეწინააღმდეგეთ, საერო კრების ორივე დადგენილებას ხელი უნდა მოაწეროთო... თქვენ ჩვენ პირუტყვ საქონელსავით გვექცევით და მოგვეწყინდა ამოდენი პირუტყვობა! ხალხი ძალიან კარგად ხედავს თქვენს წადილს და არა, აღარ მოტყუვდებო!

ყასაბისაგან ესეც კარგი სიტყვაა, თუ დამეთანხმებით.

მეფემ ამის პასუხად აღუთქვა, კონსტიტუციას არაფერში ვუმტყუნებო. მერე მაგიდაზედ ავიდა, წითელი ქუდი დაიხურა და ერთი ჭიქა წითელი ღვინო მიირთვა ერის სადღეგრძელოდ.

საშინელი ხმაურობა იყო. მაგრამ სწორედ დროზედ მივიდა პარიზის მამასახლისი პეტიონი და იმოდენი ხალხი რომ დაინახა, რომელნიც სასახლეს სინჯავდნენ, უთხრა: ბევრს ხანს ნუ შესდგებით აქ, მამულიშვილნო, რადგან თქვენი აქ ყოფნით შეიძლება ისარგებლონ სამშობლოს მტრებმა და იმათი საზიზღარი საქციელი თქვენ დაგბრალდეთ! თქვენ სწორედ ისე მოქცეულხართ, როგორც შეშვენის თავისუფალი მამულიშვილის ღირსებას და ბატონი მეფე, როდესაც დამშვიდდება, უფრო კარგად ჩაუკვირდება თქვენს თხოვნას...

მამასახლისი მართალს ეუბნებოდა და დაუჯერეს კიდევ. საღამომდის იდინა ხალხმა სასახლეზედ და თან მოწიწებით საღამის აძლედა დედოფალს და სხვა ქალებს ბატონიშვილითურთ. შემდეგში მომაკვდინებელ შეცოდებად ჩაუთვალეს სასახლეში შესვლა და მეფე-დედოფლის ნახვა. მე კი რაც მეტსა ვფიქრობ იმ დღეზედ, მით უფრო მეტად ვრწმუნდები, რომ ამაზედ უბრალო და უცოდველი მგონი არა იყოს რა: რა საძრახისია, მართლა, რომ ხალხს გაჭირება ადგეს, მეფესთან მივიდეს და შეველა სთხოვოს? მართალია, ბევრი არაფერი სასიამოვნოა იმოდენი ხალხის შეეკარდნა სახლში, მაგრამ მეფე ზომ მამა უნდა იყოს თავის ხალხისა. ლუი XVI სულ იმას არ გაიძახოდა:

— მე მამა ვარ ჩემი ქვეშევრდომებისაო!

.. ჰოდა, თუ ეს მართალი იყო, თუ ამას მართლა გრძნობდა, არც

სასახლეში ხალხის შესვლა უნდა სწყენოდა: მამა და შვილი? ვინ დაუშლის შვილს მამის სანახავად მისვლას? უნდა წინ გამოჰკებებოდა და ეკითხა, რისთვის გასჯილხართ, შვილებო, ხომ არა გაგკირებიათ რაო? მაგრამ სიმართლეს არა სჯობია რა და მე მგონია, რომ იმ სიტყვებს ისე ამბობდა რაღა, სიტყვას მასალად, და ამიტომ ძალიანაც ეჯავრა იმოდენი ურიცხვი შვილების მისვლა, მით უფრო რომ ძალიან დაურიდებლად იქცეოდნენ იმისი შვილები. და რადგან ვალენტინები მაშინაც ბევრნი იყვნენ, ერთი ვაივაგლახი ასტეხეს: ხედავთ რა შეურაცხყოფა მიაყენეს მეფესაო!

პატრიოტები კი იმედოვნებდნენ, მეფე ლუი XVI ამოდენა ხალხს რომ დაინახავს, დაფიქრდება და საერო კრების დადგენილებას ხელს მოაწერსო. შოველსაც ჰქონდა ეს იმედი. მაგრამ მეფე თავისას გაიძახოდა, წინააღმდეგი ვარო, და ამგვარად იმედი გაგვიტრუვდა და ხალხის სასახლეში მისვლით ჩვენ კი არა, ჩვენმა მტრებმა ისარგებლეს.

ასეც უნდა ყოფილიყო. „ქრელების“ მთელი პარტია და მათთან ერთად ეგრეთ წოდებული კონსტიტუციის მფარველნი — ბარნავი, მანიე, ლალი ტოლენდალი, ორი ძმა ლამეტი და სხვა, რომელნიც ხალხს ყოველთვის იმას ეუბნებოდნენ, კონსტიტუციის მორჩილნი უნდა იყვნეთო და მეფეს კი ჩუმად გზას ასწავლიდნენ—კონსტიტუცია ამ გზით დაარღვიეო; ყველა ესენი, მილიციის ნახევარი და 76 თემი ისე აყაყანდნენ, თითქო ქვეყანა დაღუპულიყოს მით, რომ პარიზელმა ხალხმა გაბედა და სასახლეში ნახა თავისი მეფე. ამაზედ მეტი რაღა გინდათ, თვით მეფესაც აღარ ინდობენო! სანტერი, როსინიოლი და ლეჟანდრი სასჯელში უნდა იქმნენ მიცემულნი და მათთან ერთად ხალხის ბელადნი და თვით პეტიონიც, რადგან ხალხს ზარბაზანი არ დაუშინა და სასახლემდე მიუშვა... არა ჰგვანებია ბაილის, მარსის მინდორზედ რომ ხალხი ახოცვინაო! ამათ ყაყანს ზედ დაემატა ლაფაიეტის დაბრუნება პარიზში. იმის მაგივრად, რომ თავის ჯართან ყოფილიყო და პრუსიელების და ავსტრიელების ჯარებისთვის ეგდო ყური, რომელნიც კობლენცში მოგროვილიყვნენ და დღეს-ხვალ ჩვენ საზღვარს გადმოივლიდნენ, ლაფაიეტმა თავი დაანება ყველაფერს და პარიზში მივიდა — მთელი ჩემი ჯარის სახელით უნდა ვითხოვო, რომ 20 თიბათვეს აჯანყებულნი სამაგალითოდ იქმნან დასჯილნიო.

საერო კრებამ დიდი პატივისცემით მიიღო იგი. მაგრამ ერთმა ეირონდელმა, გადემ, ამით მაინც თავისი არ დაიშალა და სთქვა:

„რომ მითხრეს, ბ. ლაფაიეტი პარიზშიაო, გამიხარდა, ღვთის წინაშე, ალბად მტერნი აღარავინა გვყავს, ალბად ავსტრიელე-

ბი დაგვიმარცხებია, რომ ლაფაიეტი დაბრუნებულა-მეთქი. მაგრამ დიდი ხანი არ გასტანა ამ ნეტარმა ოცნებამ: ჩვენი მტრები ისევ საზღვარზედ დგანან! ჩვენი გარეგანი მდგომარეობა არაფრით არ შეცვლილა და ბ. ლაფაიეტი კი პარიზში ბრძანდება?! რა საბუთი უნდა ჰქონოდა, რომ თავის ჯარს თავი დაანება? ჩვენი შინაური არეულობა? იქნება უიქრობს, რომ საერო კრება საკმარისად ძლიერი არ არის, რომ შინაგან საქმეებს გაუძღვეს? თავის თავს მთელი ჯარის და პატიოსან მამულიშვილთა წარმომადგენელად ხდის... ვინ ბრძანდებიან და სად არიან ეს პატიოსანი მამულიშვილნი? ან როგორ მოახერხა ჯარმა ამ საგნის განსჯა და თავის განაჩენის დადგენა? მგონი არ შევცდე, რომ მოგახსენოთ. ბ. ლაფაიეტს თავის მახლობელთა აზრი მთელი ჯარის სურვილად სჩვენებია და... ბ. ლაფაიეტმა მინისტრის დაუკითხავად თავი დაანება თავის სამსახურს, ამით კონსტიტუცია დაარღვია და“...

დასკვნა ცხადი იყო!

ლაფაიეტის მაგალითს მერე სხვა გენერლებიც მიჰყვნენ: თავიანთ ჯარს უპატრონოდ სტოვებდნენ და თითონ პარიზისკენ მიეშურებოდნენ, ვითომ ქვეყნის დასახსნელადო, მაგრამ ნამდვილად კი მარტო იმ განზრახვით, რომ მართებლობა ხელთ ეგდოთ როგორმე.

რასაკვირველია, უნდა დაეჭირათ და სამხედრო კანონისამებრ დაესაჯათ. იმისთვის რომ ერთი ათი წლით ციხე გადაეწყვიტათ, როგორც უბრალო ჯარისკაცისთვის, სხვებიც ველარ გაბედავდნენ და ქვეყნის სამსახურს არ უღალატებდნენ.

საერო კრების წინაშე იაკობელები დააბეზლა; მერმე წავიდა და მეფე-დედოფალსა სთხოვა, ოლონდ მომენდეთ და კომპიენში გაგიყვანთ! იქიდან ბრძანება გაეცით, რომ კონსტიტუცია ხელახლად იქმნას გადასინჯული, მეფის ყოველი უფლებანი და დიდებულთა ყოველი უპირატესობანი ხელახლად იქმნენ აღდგენილნი თქვენი დიდებულების ყოველი ბრძანების აღსრულებაში მოყვანას მე, ლაფაიეტი, ვიკისრებ და თუ პარიზმა წინააღმდეგობა გაზედა, ისე მოვეპყრობი, როგორც აჯანყებულს ქალაქსაო. ეს ყველაფერი შემდეგში გავიგეთ, კობლენცის წერილებიდან. მეფე-დედოფალმა არ მიიღო ლაფაიეტის რჩევა.

დედოფალს უნდოდა, რომ პრუსიელებისაგან ყოფილიყო განთავისუფლებული, და არა იმ ლაფაიეტისაგან, რომელმაც ვერსალიდან პარიზს გადაიყვანა მთელი სასახლე და ხალხს მეფის და დედოფლის დაცინვის ნება მისცა: აგერ ხაბაზი თავის ჯალაბითაო!

დედოფალს ჯერაც არ დავიწყებოდა ის დღე და სრულიადაც არ უნდოდა, რომ თავის მხსნელად ლაფაიეტი ჰყოლოდა. დედოფალს არავითარი კონსტიტუცია არა ნებავდა: საფრანგეთში სრულმპყრობელი მეფე უნდა ბრძანებულებით, როგორადაც პრუსიაში და ავსტრიაში.

მაშინ კი დარწმუნდა ლაფაიეტი, რომ თავის თეთრი რაშით ის ველარავის გაიტაცებდა და მაინც არ დაიშალა და მილიციელები შეჰკრიბა, რომ იაკობელების კლუბი აეკლო; მაგრამ მამასახლისმა პეტრონმა ბრძანება გასცა: მილიციელების მბრძანებელი ლაფაიეტი კი არა, თავიანთი კანონიერი უფროსები არიანო, და რაკი ნახა ლაფაიეტმა, რომ ერთი კაციც არ გამოცხადდა მის ძახილზედ, ადგა გულდაწყვეტილი და გაეშურა თავის ჯარისკენ, რომელნიც სედანთან იდგა.

ქვეყანა ხედავდა ლაფაიეტის დალატს. საერო კრებას ყოველი მხრიდან თხოვნა მოსდიოდა, დასაჯეთ ქვეყნის მოლალატენი და მეტადრე ლაფაიეტიო.

სწორედ მაშინ 1782 წელს მკათათვის დამდეგს იხუვლა ყმაწვილკაცობამ და, მიუხედავად იმისა, რომ მეფე წინააღმდეგი ბრძანდებოდა საერო კრების დადგენილებისა, პარიზს მიდიოდნენ და ჯარისკაცად ეწერებოდნენ, რომ პარიზის ახლო საერო კრების დადგენილებისამებრ 20 ათასი კაცი მდგარიყო ყოველი შემთხვევისთვის გამზადებული. შეიყრებოდნენ ხუთი-ექვსი ბიჭი, ერთ ხელსარეცხს გამოიკრავდნენ ხელსახოცში და დაიძახებდნენ:

— წავიდეთ პარიზს! ვინ მოდის პარიზს?

რომ გეკითხათ, სად მიდიხართო, გეტყოდნენ:

— პარიზს მივდივართ თავისუფლების დასაცავად და მტარვალთა და მოლალატეთა დასასჯელად!

შევაყენებდით ხოლმე, თითო ჯამ ღვინოს გავუტანდით. ყელს გაისველებდნენ და ისევ გზას გაუდგებოდნენ.

— გამაღობთ! ნახვამდის! ჩვენს ამბავს მალე გაიგებთ!

ნეტავი მეც შემძლებოდა, თან გავყოლოდი! ნეტავი! მაგრამ მამაჩემი? პატარა მატურინი და სტეფანე? უჩემოდ შიმშილით ამოიხოცებოდნენ! ახ, ნეტავი მეც შემძლებოდა იმათთან წასვლა!

მაშინ მინისტრმა ტერიემ მისწერა ყველა მამასახლისს — პოლიციელნი და ქანდარმები წაიყვანეთ, წინ დაუხვდით და ყოველი ღონისძიება იხმარეთ, რომ პარიზისკენ მომავალნი განუანტოთ; გარდა ამისა სასტიკად აკრძალეთ, რომ პარიზისკენ წამოსვლა არავინ გაბედოსო. მაგრამ ამ წერილს ყურადღებაც არავინ მიაქცია; პარიზის ყველა კლუბებმა ხმამაღლივ განკიცხეს მეფის მინისტრის

ამგვარი განკარგულება და შოველმა ხომ პირდაპირ გამოაცხადა — ნამდვილი ღალატი ეს არისო: პრუსიელებს და ავსტრიელებს ჩვენს ასაოხრებლად ეპატიყდებიან და გზას უჩვენებენ, და ჩვენ კი საშინელი სასჯელით გვემუქრებიან, — არ გაბედოთ და სამშობლოს დახმარება არ იფიქროთ, რადგან მეფე წინააღმდეგია მაგისო!

მეფის მოსამსახურენი მილიციელებად ირთვებოდნენ, გადიოდნენ ხალხში და ყველგან „გაფიცულთა“ ლანძღვა-გინებას გაიძახდნენ. გაფიცულნი იმათ დაარქვეს, რომელნიც თავის ნებით გავიდნენ საერო კრების დადგენილებისამებრ პარიზის მიდამოში ჯარის შესადგენად. დადიოდნენ ეს ვითომ მილიციელნი და ილანძღებოდნენ: გაფიცულთ „უნიფხობებს“ ეძახდნენ, თითქო სიღარიბე საძრახისი იყოს და უფრო ხშირად იმას არ ამტკიცებდეს, რომ კაცს სინიდისი და კეთილი გული ჰქონია და ღარიბადაც იმიტომ ღარჩენილა! თუ არა და დიდი რამ შრომა კი არ უნდა მოსამსახურედ წასვლას! თქვენ ადამიანის დამცრობა და პირადი ღირსების უქონლობა სთქვით, თორემ, ათასიც რომა თქვან „უნიფხონიო“, მე ერთი ღარიბ-ღატაკი ხელოსნის გამხმარი ლუკმა მძრჩვენია, იმათ დამამცირებელ სიმდიდრეს.

რომ ბოლო მოეღო ამოდენა ფლიდობისთვის, საერო კრებამ დაადგინა: მამულიშვილნი, რომელნიც სამშობლოს სამსახურს იყისრებენ და თავიანთ ნებით გავლენ მალიციიაში, საზღვარზედ ჯარში ჩასაწერად, ან პარიზის ახლო დაბანაკებულთა შესავსებლად, სამამსახლისოში გამოაცხადებენ თავიანთ სურვილს და იქვე ჩარიცხულ იქნებიან სიაში; 12 მკათათვეს სამშობლოს ერთობის დღესასწაულს დაესწრებიან; სამი დღის საგზალი და ბინა ექნებათ და მას შემდეგ სამამასახლისოდან მიიღებენ ბრძანებას, საით უნდა გამგზავრდნენ, რომ თავიანთ რაზმებს შეუერთდნენ და კანონიერი ჯამაგირი მიიღონ“.

ამ ბრძანებამ დაიხსნა ჩვენი ქვეყანა გასაჭირიდან. შიკრიკებით გაგზავნეს იგი ყოველი თემისკენ და მაშინ დარწმუნდნენ მეფედლოფალი და კარისკაცი თავიანთი მინისტრებითურთ, რომ საქმარისი არ იყო მეფეს რაიმე დადგენილებაზედ, „წინააღმდეგობის ვარო“, — მოეწერა. მაშინ დარწმუნდნენ, რომ თუმცა მეფის ბრძანებისამებრ გენერალი ლუკნერი გამოექცა ავსტრიელებს; თუმცა კობლენცთან 35 ათასი პრუსიელი და ავსტრიელი იდგა და იმათთან ერთად ოცი ათასი გახიზნული დიდებულთაგანი სრულიად გაიზადებულნი საფრანგეთში შემოსასვლელად; თუმცა გენერალი ბულიე ისევ ისე გვემუქრებოდა, მტრის ჯარს მე შემოვუძღვები და გზებს მე ვასწავლიო; თუმცა ამ მუქარის ასასრულებლად ის

ვილქელმის, ფრანსუა II და ბრაუნშვეიგის უპირველეს მრჩეველად განხორციელო და მტრებს ჰპირდებოდა ჯერ ლონგვის აღებას, მერე სედანისას, ვერდენისას, მერე რეტელზედ და რეიმსზედ პურიტა და ღვინით სავსე შამპანზედ გავლას და პარიზის აოხრებას; თუმცა დაუფიცავი მღვდლები თავისას არ იშლიდნენ და ვანდე და ბრეტანი სრულიად ჩამოაცალეს კონსტიტუციას და ქვემოლანდოკშიც ხალხი ააჯანყეს თავადი საიანის წინამძღოლობით; თუმცა სასახლემ და დიდებულთა არაფერი დაზოგეს და იუდასავით გვალატობდნენ, რომ ძველებურად მეფის სურვილზე დაემყარებინათ ქვეყნის ბედობალი, — მაინც ვერას გახდნენ და საშობლომ იმათი არა ინდობა რა. დიად, ცოტაც არის ტვინი რომ ჰქონოდათ თავში, უნდა დარწმუნებულიყვნენ, რომ „მეჯღანეებს“, როგორც ისინი გვახსენიებდნენ, სრულიად არ ეშინოდათ არც პრუსიელი გრენადერებისა, არც ავსტრიელი ულანებისა და არც ძღვევამოსილ წინაპართა დიდებულ შთამომავლებისა.

თუ არა და განა ერთი და იგივეა კაცი თავისთვის იბრძვის, თუ დიდებული მეფისთვის, რომელიც, რაკი ომი გათავდება, ზედაც აღარ შეხედავს იმისთვის თავგანწირულ მუომართ? ალბად ეს კარგად ჰქონდა შეგნებული ლუი XVI-საც, რადგან შემდეგში იმის რკინის ყუთში წერილები იპოვეს, რომლებშიც გულახდილად ჩაეწერა ყოველი თავისი სევდა და მწუხარება და სხვათა შორის იმასაც ჩიოდა, რომ „მეჯღანეები და ხარაზები“ ერთად არიან და მეკის მერჩივნა, რომ ერთმანეთს შებრძოლებოდნენო.

ჩემს დღეში არ დამავიწყდება, რა სიხარულით მივეგებებოდით და გავაცილებდით ხოლმე პარიზისკენ მიმავალ გაფიცულთ. ჩემს დღეში არ დამავიწყდება ის აღტაცება, რომლითაც მკათათვის დამდეგს მთელმა საფრანგეთმა ჟირონდელი ვერნიოს სიტყვა მიიღო. ეს სიტყვა მრავლად იყო დაბეჭდილი და მთელს საფრანგეთში მოჰფინეს; და ღირსიც იყო ამისი, რადგან ქვეყნის გულის თქმა და წუხილი იყო გამოთქმული. ამ სიტყვამ დაგვარწმუნა, რომ ჩვენი შიში, მფევე გვალატობსო, საერო კრებასაც ჰქონდა. ვერნიოს სიტყვა თვით შოველმა წაგვიკითხა კლუბში.

„მეფის სახელით ამხედრდა ჩვენს წინააღმდეგ მთელი ევროპა, მეფის საშველად; მეფის დასახსნელად! მეფის სახელით შეითქვენ ჩვენი დიდებულნი და ევროპიელი მეფენი! მეფის სახელით დაკავშირდნენ პილნიცში და ავსტრიამ და პრუსიამ ჯარებიც გამოგზავნეს. წამებას გვემუქრებიან, დიდით პატარამდე ამოყლეთას, ჩვენი ქვეყნის მიწის პირიდან აღგვას და სულ იმავე მეფისა გამო და იმავე მეფის დასახმარებლად!“

მერე მოხსენებული იყო ის გარემოება, რომ კონსტიტუციამ პარტო მეფეს მიანდო მტერთაგან სამშობლოს დაცვა. როგორ ასრულა მეფემ თავისი ვალდებულება?

„მეფე ბრძანებდა, კანონების ერთგული მოსამსახურე და მფარველი ვიქნებო, რომ ძალა ხელთ ეგდო და მით უფრო ადვილად დაერღვია ეს კანონები. მეფე ბრძანებდა, მე კონსტიტუციას არ ვუღალატებო, რომ სამეფო ტახტი არ წაერთმიათ და მით უფრო ადვილად დაერღვია კონსტიტუცია. მეფე ბრძანებდა, ერი მიყვარს და მეყვარებაო, რომ უფრო თავისუფლად გაება ღალატის ქსელი და ერი დაეღუპა. იქნება ჰგონია, ჩემს ფარისევლობას ერი ვერა ხედავსო? იქნება ჰგონია, ვერა ვხედავდეთ, რომ მტრის ჯარის გამარჯვება უფრო უნდა, ვიდრე ჩვენი ჯარისა? ასრე რომ არ იყოს, განა ათასის წინააღმდეგ ათს გაგზავნიდა? ამით ნებავეს სამშობლოს დაცვა?! იქნება ჰგონია, ერი ვერა ხედავს, რომ მეფე ყოველთვის წინააღმდეგი იყო საზღვრების გამაგრებისა და ყოველგვარი საომარი სამზადისისა! ამით ნებავეს სამშობლოს დაცვა? იქნებ ჰგონია, ერი ვერა ხედავს, რომ მეფე მადლობას უძღვნის კონსტიტუციის დამრღვევ გენერალს და ბორკილს ადებს ყველას, ვინც კონსტიტუციის ერთგულებას იჩენს? არა, მეფემ არ ასრულა ერისადმი თავისი მოვალეობა! მეფემ უღალატა კონსტიტუციას! მაგრამ კიდევ რომ შეარყიოს მან კონსტიტუცია, კიდევ რომ გადაადგოს იგი, მით თითონ ვერას ისარგებლებს!.. რას არ სჩადიან მეფის სახელით თავისუფლების და სამშობლოს წინააღმდეგ? ერთხელაც არის ებრძანებინა: ჩემი სახელით ჩემს უნებურად სარგებლობენო. მაგრამ არა, როგორ ბრძანებდა ამას, როდესაც მისი ნებაყოფლობით მოქმედებდნენ ჩვენი მტრები? გამარჯვება ხომ ხალხს უნდა დარჩეს, მაგრამ კიდევ რომ გაიმარჯვოს მეფემ, მაინც ამ გამარჯვებით თითონ ვერას ისარგებლებს. მეფე აღარაფერია კონსტიტუციისთვის, რომელსაც იგი ასე სამარცხვინოდ ღალატობს! მეფე არაფერია ერისთვის, რომელსაც იგი სამარეს უთხრის!“

იმისთანა ყვირილი ატყდა კლუბში და გარეთ მოედანზედ, რომ ჰეორედ მოსვლა გეგონებოდათ. ყველანი ვეთანხმებოდით ამა დასკვნას, რადგან ვერნიოს ჩვენს გულში ამოეკითხა თავისი სიტყვა და ისე დაეწერა. როდესაც მეფის კეთილდღეობისთვის ერის დაღუპვა ხდება აუცილებელ საჭიროებად, მაშინ მეფის განწირვა აუცილებელია. და ხალხიც ამას გაიძახდა:

— პანდური და პანჩური მაგისტანა მეფეს! კმარა, რაც მეფე-
ებისაგან ჭირი გვჭირს! ხალხი უმეფოდაც კარგად მოუვლის თავის
თავს!

მეორე დღეს მეფე ლუი XVI ყველა მინისტრებმა საკუთარი
პირით გამოაცხადეს საერო კრებაზე, — ჩვენი ხაზინა, ჩვენი ჯარი
და ჩვენი სამხედრო ხომალდები იმისთანა უკიდურეს მდგომარეო-
ბაში არიან, რომ ჩვენ იძულებულნი ვართ სამსახურს თავი დავანე-
ბოთო. მგონი ესეცა კმარა დასაწმენებლად იმისა, რომ მეფე ერს
უსინდისოდ ღალატობდა. ეს თქვეს მინისტრებმა და მოჰყურ-
ცხლეს! ისე გაეარდნენ დარბაზიდან, რომ აღარც კი მოითმინეს გაე-
გონათ, რას ეუბნებოდნენ პასუხად; სწორედ ისე როგორც გაკოტ-
რებული სოვდაგრები მოიქცევიან ხოლმე, როდესაც ვალის გადახ-
დის მაგივრად ინგლისში ან ამერიკაში ამოჰყოფენ თავს და ბევრ
პატიოსან კაცს და იმათ ოჯახს ულუკმაპუროდ სტოვებენ. აი, რას
ნიშნავდა მინისტრებისაგან თანამდებობის თავის დანებება: ჩვენ
თქვენის ნდობით ვისარგებლეთ და იმის მაგივრად რომ საფრანგე-
თი გაგვემაგრებინა და მტერთან საბრძოლველად შეგვემზადებინა,
რაც შეიძლება მტერს შემოსევა გავუადვილეთ. ეხლა ჩვენი ქომა-
გი — პრუსიელები და ავსტრიელები მზად არიან, აგერ კიდევ მო-
დიან და... ვნახოთ როგორ გადარჩებით ამ განსაცდელსაო“?..

XI

მაგრამ ამ განსაცდელსაც გადავრჩით!

მეორე დღეს 11 მკათათვეს საერო კრებამ დაიდგინა — სამშობ-
ლო განსაცდელში არისო — და მთელი საფრანგეთი წამოაყენა.

აი, რას ნიშნავდა ეს სიტყვა „სამშობლო განსაცდელში არისო“:

„განსაცდელში არის თქვენი ყანა, თქვენი ვენახი, თქვენი
სახლ-კარი, თქვენი დედ-მამა, თქვენი სოფელი, ყოველი თქვე-
ნი უფლებანი და თავისუფლება, რომელიც სისხლის ღვრით
შეიძინეთ დიდებულთა და ეპისკოპოსთაგან. გახიზნულნი მო-
უძღვიან პრუსიელ და ავსტრიელ ჯარებს, რომ ავიკლონ და
წარგტყვევნონ, დაგბოცონ და თქვენი ხატიც კი აღარ დაინ-
დონ! გახიზნულნი მოუძღვიან პრუსიელ და ავსტრიელ ჯა-
რებს, რომ კვლავ ბატონყმობა შემოიღონ, ძველებური უღე-
ლი დაგვადგან ქედზე და თქვენცა და თქვენს შვილთა და შვი-
ლიშვილთაც მონობის დაღი დაასვან... აღსდებით და ვაჟკა-
ცურად დაუხვდით მტერს, ან არა და ქედი მოიხარეთ და პირ-
უტყვივით ოფლი იწურეთ თქვენი ბატონისა და მონასტრი-
სათვის!“

აი, რას ნიშნავდა ეს სიტყვა! ამიტომ იყო, რომ დიდით პატარამ-

დე ყველამ იარაღი შევიხბით; ამიტომ იყო, რომ საშინელი ძალით შევებრძოლეთ მტერს: ჩვენს კერას ვიცავდით, ჩვენს უფლებებს და თავისუფლებას, რომელნიც რევოლუციამ მოგვანიჭა.

საერო კრების დადგენილება ყველა სოფლებს აცნობეს. მთელს საფრანგეთში ზარბაზნის სროლა ასტეხეს, სამრეკლოებზედ შეუწყვეტივ ზარსა რეკდნენ და მინდვრად გასულს გაშტერებულ ხალხს რომ ეუბნებოდნენ—მტერი კარს გვადგია და აოხრებას გვემუქრებაო, ნამგალს იქვე ბუჩქში მალავდნენ და შინისკენ გარბოდნენ თოფ-იარაღის მოსაძებნად; იმიტომ რომ მინდორი მერმისაც მოგვცემს მოსავალს, ათის წლის შემდეგაც, ასის წლის შემდეგაც! საქმე ის არის თვით მინდორი არავინ წაგვართვას. ყანა შეიძლება ცეცხლს მისცენ, ან პრუსიელების ცხენებს მოაძოვინონ; ეგ არაფერი ოღონდ თვით მიწა არავინ წაგვართვას და პურსაც ბევრს მოვიყვანთ და სიმინდსაც ჩვენი შვილებისთვის და შვილიშვილებისთვის.

ჩვენს სოფელში, როდესაც აწოწილი ელოფ კოლენი მაგიაზზედ ავიდა და საერო კრების დადგენილება წაგვიკითხა, ისე იყო გაჩუმებული ხალხი, გეგონებოდათ აღარა სუნთქავენო. მაგრამ როდესაც წამოიძახა: „მამულიშვილნო, სამშობლო განსაცდელშია! სამშობლო თქვენგან მოელის ხსნასაო!“ ყველაზედ წინ იმ კაცების შვილები წადგნენ, რომელთაც საეკლესიო მამულები ეყიდნათ და გამოაცხადეს, — ჩავწერეთ, ჯარში წავალთ ჩვენი ნებიითაო. აღბად იცოდნენ, რომ თუ გაიმარჯვებდა მტერი და გახიზნულები დაბრუნდებოდნენ, იმათ მამებს ყველას ჩამოახრჩობდნენ. ჭუთხუთი მიდიოდნენ თავმჯდომარისკენ და ეწერებოდნენ.

მე ჯერ არაფერი მეზადა, მაგრამ შეძენის იმედი მქონდა; სულ ხომ ისე სხვების მუშად არ ვივლიდი ჩემნი დღენი! გარდა ამისა მე ჩემი და ჩემი ქვეყნის თავისუფლება სიცოცხლეზედ მეტად მიმაჩნდა და... აი, ახლაც ხომ მოხუცებული, ღრმად მოხუცებული ვარ, და ამ მოგონებაზედ ისე მიდულს სისხლი, თითქო აგერ, მტერი კარს მადგას და ჩემს საკუთრებას და თავისუფლებას შელახვას უპირებსო.

ბევრი ყოყმანი რა საჭირო იყო, ჩემს თავს ხომ არ ვუმტყუნებდი? გაათავეს თუ არა დადგენილების კითხვა, მეც წინ წავდექი და ვთხოვე ჩამწერეთ-მეთქი. ჩვენს სიაში მე მესამე ვიყავი: პირველი ქსენტრაილი ჩაეწერა, მეორე ლატურ-ლუსსაკი და მესამე მიშელი ბასტიენი ს. ბარაკიდან.

რომ მოგახსენოთ, სიამოვნებით ჩავეწერეო, მტკნარი სიცრუე იქნება. რა სიამოვნება უნდა მეგრძნო, როდესაც კარგად ვიცოდი, რომ მოხუცებული მამაჩემი და მთელი ჩემი ოჯახი ისევ ჰველებურად ულუკმაპუროდ რჩებოდა და ნათლიაჩემიც ძალიან შესწუხდე-

ბოდა მე რომ აღარ ვეყოლებოდი სამკვდლოში, მაგრამ რა მექნა ვგრძნობდი, რომ მტერს მოგერიება უნდოდა და მის მოსაგერიებლად თუ ჩვენც არ გავიდილოდით, მაშ დიდებულებს ხომ არ მივანდობდით. ჩვენს ბედ-იბბალს? რა მექნა, ვგრძნობდი, რომ იარაღით უნდა მოგვეგერიებინა მტერი, ან არა და სახლიც იმისთვის დამეთმო, კარიც, მამულ-დედუღიც და სუყველაფერიც.

ჩამწერეს, ბილეთი მომცეს. ბილეთი ქუდში ჩავიკრე და გამოვედი. იქვე კიბეზედ მამაჩემი დამხვდა, გადამეხვია, გულში ჩამიკრა და ცხარე კოცნა დამიწყო. ნიკაპი უკანკალებდა, ცრემლი სდიოდა და ქვითქვითებდა:

— აგრე, შვილო, აგრე! მე ვიცოდი, რომ შენ თქმა არ გინდოდა!... ნიკოსაგან დაჭრილი გული შენ გამიმთელე, შვილო! მე ეხლა აღარა მტკივა რა.

საწყალი მამაჩემი! პატიოსანი მამულიშვილი იყო და ისე არა უწყალებდა რა მის სამშობლოს სიყვარულით სავსე გულს, როგორც ნიკოს საქციელი: ვერ აეტანა, რომ მისი სისხლი და ხორცი, მისი შვილი სამშობლოს უღალატებდა.

ნათლიაჩემიც ძალიან კმაყოფილი დამხვდა და იმანაც გადაკოცნა; ალბად უხაროდა, რომ იმის მამულებს, მეტადრე პიკჰოლცის მამულებს, მფარველი უჩნდებოდა. არც სტყუედებოდა: ღმერთსა ფიცავ, დედას აეუტირებდი ყველას, ვინც გაბედავდა და ნათლიაჩემს ხელს ახლებდა.

ერთი სიტყვით, აბა რაღა თავი შეგაწყინოთ, აღტაცება მაშინ არის ხანგრძლივი, როდესაც სიმართლეზედ არის დამყარებული, უფლებაზედ და გონებაზედ.

როგორ აგიწეროთ, რა ურიაშული ატყდა ხალხში, რა ხვევნაკოცნა და ფიცი, — გავწყდეთ და კი ნუ დავეჯაბინებითო! — ამას თქვენც კარგად წარმოიდგენთ. პირადი საქმეების გასარიგებლადაც ბევრჯერ აუღელვებიათ გაიძვერებს შესყიდული გაზეთებით ხალხი და ომში მონაწილეობა მიუღებინებიათ, როდესაც საფრანგეთს ამ ომისაგან ზარალის მეტი არაფრის იმედი ჰქონია. მაგრამ მაშინ თვით ხალხი ხედავდა თავის გაჭირებას და სხვის თქმა აღარ უნდოდა. ხალხი ხედავდა, რომ სახლკარის და თავისუფლების წართმევას ემუქრებოდნენ და საბრძოლველად ემზადებოდა. მგონი, კაცი თავის თავისუფლებისთვის მოკვდეს, ისა სჯობია, ვიდრე მეფის ან იმპერატორის დიდებისთვის.

განაღა დამავიწყდება როდისმე ის უანგარო სიყვარული სამშობლოსი, რომელიც მაშინ ჩვენმა ხალხმა გამოიჩინა! ქალი და კაცი, ყმაწვილი და წელში მოხრილი მოხუცებული, მისდედნენ ხოლ-

მე თავის ნებით ჯარში წამსვლელ ბიჭებს, თან ცრემლი სდიოდათ და თან „თავისუფალ ერს გაუმარჯოსო“, ყვიროდნენ. უმეტესი ნაწილი ამ ბიჭების მონაგებით და ნამუშევართ ცხოვრობდა და სხვა, ცარიელი ქოხის და კონკების მეტი არა ებადათ რა საწყალ მთიულ გლეხკაცებს. მაგრამ წარსული სიმწარე ჯერ ისევ ღრმად აჭონდათ გულში, აწმყოს სიტკბობას გრძნობდნენ და სიცოცხლეზედ უმეტეს განძად სთვლიდნენ თავისუფლების და მართლშესაჯულების დამდგენ სამშობლოს. შეძლებულებიც არასა ზოგავდნენ და გულუბვად სწირავდნენ ჯარში წასულთა ღარიბ მშობლებისთვის ცხოვრების წყაროს ასაჩენად, დაჭრილთა მოსავლელად, იარაღის სასყიდლად და სხვ. ვისაც კი რა ებადა, მოჰჭონდა და სამშობლოს ტრაპეზზედ სტოვებდა! ბავშვები ტიროდნენ, რატომ დიდრონი არა ვართ, რომ ჩვენც ჯარში წავიდეთო! დიად, აღარავინ არაფერს არ ზოგავდა, ოღონდ სამშობლოს შველოდა რამე. ყველა მტკიცედ ასრულებდა თავის ეროვნულ მოვალეობას.

იმ დღეს სადილად შოველთან ჩავედით ნათლიაჩემი, ლეტუმეი, მამაჩემი და მე. რა კარგად მახსოვს ყველაფერი; მახსოვს კი არა, აგერ თვალწინ მიდგანან ყველანი, თითქო გააცოცხლა ჩემმა ხსოვნამ და თვალწინ დამიყენაო. ცხელოდა. მარგალიტა წამდაუწუმ მალაზიში გადიოდა მუშტრის დასახვედრად. გავიდოდა და გაისტუმრებდა თუ არა, უკანვე მოეჩქარებოდა. თვალს მარიდებდა ჩემი მარგალიტა... კარგი სუფრა იყო გაშლილი, კარგ ღვინოს გიახლებოდით, მაგრამ ვერა, სხვებივით გამზიარულება და სიცილი ვერ მომეხერხებინა. სულ იმის ფიქრში ვიყავ, რომ მე ვისემბურგს უნდა წავსულიყავ ჩვენს ჯარში ჩასარიცხავად და მარგალიტა კი... ამ დროს შოველმა ერთ ძველისძველ ბოთლს ახსნა თავი და დაიძახა:

— აბა, ჩემო მეგობრებო, ჩენი მიშელი ამ ღვინით უნდა ვაღდეგრძელოთ. ჯერ ეგ ჭიქები დაცალეთ!

ბოთლი სუფრაზედ დასდგა, დამაცქერდა და მითხრა:

— აი, რა გითხრა, ჩემო მიშელ! შენც კარგად იცი, დიდი ხანა შვილივით მიყვარდი, მაგრამ დღევანდელმა შენმა გარდაწყვეტილებამ დამარწმუნა, რომ არ ვტყუვდებოდი შენში და მართლა სიყვარულის და პატივისცემის ღირსი ყოფილხარ. დღევანდელმა შენმა გადაწყვეტილებამ დამარწმუნა, რომ შენ ვაჟკაცი ყოფილხარ. შენისთანა ბევრი და მძიმე დამაბრკოლებელი მიზეზი იქნება ბევრს არავის ჰჭონდეს, მაგრამ მიუხედავად ამისა შენ მაინც არ დაივიწყე შენი სამშობლოსადმი მოვალეობა. ყოჩაღ, ბიჭო! წადი და ძვირად დაუსვი მტერს თავისი თავხედური წადილი! ჩვენ რომ სხვა მოვალეობა არ გვედვას, ჩვენც შენთან ვიქნებოდით ბრძოლის ველზედ!

მარამ ჩვენ აქაც ბევრი საქმე გვექნება. დღეს-ხვალ წასვლა მოგი-
ხდება... მოდი, მართალი სთქვი, ნუ თუ აქ არავინ დაგნახდება? ნუ
თუ გულმხიარული წახვალ? ნუ თუ სათხოვარი არა გაქვს რა ჩვენ-
თან? იქნება გეთხოვო რამე იმისთანა, რასაც მარტო ღირსეულ
ვაყაყას და მამულიშვილს აძლევენ, რომელიც საყვარელი და პა-
ტივსაცემია?

გულის გულში ჩამიტარა თვალი და ისე გავწითლდი, როგორც
გასათხოვარი გოგო. ჩემდა უნებურად მარგალიტას გადავხედე.
ისიც ფერმიხდელი იყო, თვალმდინარე. ხმის ამოღება ვერ გაძე-
ბდნა. ყველანი გაჩუმებულნი იყვნენ. ბოლოს შოველი მამაჩემს
მიუბრუნდა და უთხრა:

— რას იტყვი, პეტრე? ამ ყმაწვილებს მგონი ერთმანეთი უყვართ!

— ჰაი, ჰაი, რომ უყვართ. — მიუგო მამაჩემმა. — და კაი ხანიც
არის მას აქეთ.

— რას იტყვი, პეტრე? მოდი, ნიშნობა გავაჩალოთ!

— ნეტავი აგრე და საუკუნოდ ბედნიერებას მომანიჭებ, ჩემო
შოველ.

ისინი რომ ამას ლაპარაკობდნენ, მე და მარგალიტა წამოვხტით
და ისე დავრჩით გაშეშებულნი, ერთმანეთთან მისვლაც ვერ მოვა-
ხერხეთ. შოველი კი იცინოდა:

— აბა, მიშელ, შენს დანიშნულს აკოცე! ღმერთმა გაგაბედნიე-
როთ, შვილო!

ჯერ არც კი გაეთავებინა სიტყვა, რომ ერთმანეთს მოვეხვიენით.
მარგალიტა მორცხვად თავს მალავდა ჩემს გულზედ... ახლა კი ჩემი
იყო, შიში აღარაფრისა მქონდა. იცით, რა ნეტარებაა, კაცმა თავის-
უფლად გადაჰკოცნოს თავისი სატრფო და რიდი აღარავისი ჰქონ-
დეს, აღარც ნაცნობებისა და აღარც ნათესავებისა. თქვენ სიცო-
ცხლისა არა იცით რა, თუ ეს ნეტარება არ იცით. კაცი მარტო მაშინ
ხდება კაცად, გულითაც და სულითაც მარტო მაშინ არის ძლიერი
და უძლეველი.

ნათლიაჩემი იცინოდა. შოველმა სკამი ჩვენკენ მოიბრუნა და
გვიტხრა:

— დღეის შემდეგ დანიშნულები ხართ. სამი წლის შემდეგ და-
ბრუნდები, მიშელ, და ჯვარს დაიწერ. ხომ დაუცდი, მარგალიტა?

— უკუნითი უკუნისამდე!

და ხელი მომიჭირა ხელზედ. ცრემლი წაჰსკდა. ვტიროდი და
თან ვამბობდი:

— მე შენს მეტი არავინ მყვარებია... და არც მეყვარება... მე
თქვენთვის მივდივარ ჯარში, იმიტომ რომ მიყვარხართ და...

მარგალიტა მაშინვე გარეთ გავარდა.

შოველმა კი ჭიქები აავსო და დაიძახა:

— აი, ბედნიერი დღე ამასა ჰქვიათ ღმერთმა აცოცხლოს ჩემი შვილი მიშელი!

მამაჩემმა უპასუხა:

— ღმერთმა აცოცხლოს და ადღეგრძელოს ჩემი ქალი მარგალიტა! მერე სხვა თქვეს: გაუმარჯოს სამშობლოსაო! გაუმარჯოს თავისუფლებასაო!

იმ დღეს ფალსბურგში 163 კაცი ჩაეწერა თავის ნებით ჯარში წასასვლელად. ვინც შინ რჩებოდნენ, უკან ჩამორჩენა არც იმათ უნდოდათ, და ყველანი იარაღის მზადებაში იყვნენ. მინდვრად აღარავინ იყო. გარეთ ქუჩებში და მოედანზედ ერთიდა ისმოდა: თავისუფალ ერს გაუმარჯოს! „წავა, წავა“-ს მღეროდნენ. ამ ხმაურობას ზედ ერთოდა ზარის რეკვა ყველა ეკლესიებში და ყოველ საათს ზარბაზნის სროლა. ჩვენ კი ისევ სუფრას ვუსხედით და ვლაპარაკობდით. ხანდახან ნაცნობი ვინმე შეჩერდებოდა და ფანჯრიდან შემოგვეძახებდა:

— ამდენი კაცი კიდევ ჩაეწერაო.

შინ შევიყვანდით და სამშობლოს სადღეგრძელოდ ერთ ჭიქა დვინოს დავაცლევინებდით. შოველი სიამოვნების ნიშნად ბურნუთსა სწევდა და თვალმოჭუტული გაიძახოდა:

— წავა ძალიან კარგად წავა საქმე!

იქსადა ამბობდა, პარიზში დიდ მზადებაში არიან, დიდი ამბები მოხდებაო, მაგრამ გამოცხადებით კი არას გვეუბნებოდა.

ნათლიაჩემს პიკოლცში თავის მამულის მოურავად ჩემი ძმა კლოდი ჰყავდა; ერთი გულუბრყვილო, უემშაკო და ამასთან დაუღალავი მუშაკაცი იყო კლოდი და ხმის ამოუღებლივ აკეთებდა, რასაც უბრძანებდნენ; თავისთავად კი საქმის გაძლოლა ვერ მოეხერხებინა. ნათლიაჩემსაც სხვას ის ერჩივნა, მით უფრო რომ ძალიან უყვარდა ბრძანება და განკარგულების გაცემა. სადილზედ ვიყავით ჯერ ისევ, რომ მამაჩემს უთხრა, შენი მატურიინიც კლოდთან უნდა გაგზავნო პიკოლცში, რადგან იქ ბიჭებს ერთი კარგი გულშემოტკივარი და ყაირათიანი დიასახლისი ძალიან გამოადგებათო. მე კი ისევ შინ დავრჩები და სამუქედლოში დავტრიალდები ვიდრე მიშელი დაბრუნდებაო.

მამაჩემს ჯერ კიდევ შეეძლო მუშაობა და ცოტა რასმე შოულობდა, ვალი აღარა გვექონდა რა, შინ ორი კარგი თხა გვყავდა. ახლა კლოდი და მატურიინიც დაეხმარებოდნენ ოჯახს და იცხოვრებდნენ, როგორც იქნებოდა. მით უფრო რომ შოველი გვეპირდებოდა პატარა სტეფანეს ქალაქში ალაგს ვუშოვნი რასმეო.

ხუთი საათი იქნებოდა, როდესაც ქალაქის მდივანმა ფრელიგმა გამოიარა და გვითხრა, ჯარში ჩაწერილნი ხვალ დილის რვა საათზედ წავლენ ვისსელებურგისკენ; ჩვენი მაზრის ბიჭები ყველანი გრაუფტალში შეიკრიბებიან და იქიდან ერთად გაემგზავრებიანო. ამ ამბავმა ცოტა არ იყოს დაგვადონა, მაგრამ ძალიან ცოტა ხნით: ისევ მალე გავმხიარულდით, რამდენიმე სადღეგრძელო კიდევ გიახვლით და რაკი დაღამდა, შინისკენ გავწიეთ. შოველმა დუქანი დაკეტა. მარგალიტამ ხელი მომცა და გავედით ქუჩაში. ქალაქში პირველი იყო ჩვენი ერთად სიარული და რომ დაგვინახეს, ყველამ სიყვარულით მოგვილოცა. ხიღამდე გამოგვაცილეს. იქ კი ერთხელ კიდევ გადავკოცნე ჩემი მარგალიტა და გამოვეთხოვეთ ერთმანეთს. მხიარულად გავუდექით გზას, სიცილით და სიმღერით, რადგან ბედნიერნი ვიყავით და... ღმერთო ჩემო, რა არის აქ საძრახისი? ცოტაოდნად შექეიფიანებულიც... მეტად კარგი ღვინო იყო ის დალოცვილი და განა მარტო ჩვენ? ვისაც შევხვდით, ყველა ჩვენსავით იყო; ცოტა რამ გადაეკრათ სამშობლოს სადღეგრძელოდ; მიდიოდნენ ხელიხელგადახვეულები და ყვიროდნენ: თავისუფლებას გაუმარჯოს! სიკვდილი მოღალატეთაო!

ცხრა საათი იყო, როდესაც ნათლიაჩემის დუქანთან მივედით და ნათლიაჩემს და ლეტუმიეს გამოვეთხოვეთ. შინ მივედით და ვაი იმ მისვლას! ისე ჩაგვშხამდა იმ დღის სიამოვნება მე და მამაჩემს... ამას იმიტომ მოგახსენებთ, რომ ჩემი ისტორიის ბოლოციოდეთ. რას იზამთ. წუთისოფელში კარგი და ავი განუყრელნი არიან. ამას დაგიმტკიცებთ, რომ თუმცა პატრიოტებმა გაიმარჯვეს, ძვირად დაუჯდათ ეს გამარჯვება, რადგან ყველა ჩვენგანს შინა ვეყავდა, საკუთარ ოჯახში, ჩვენ წინააღმდეგ აჯანყებული ვინმე მახლობელი.

იმას მოგახსენებდით. ნელი ნაბიჯით ავიარეთ მე და მამაჩემმა ჩვენი ქუჩა და თან გულს ვიმაგრებდით, რადგან ვიცოდით, რომ დედას არაფრად იამებოდა ჩემი ჯარში წასვლა და მეტადრე ჩემი დანიშნა, ისიც ვიზედ? ურჯულოზედ. ამ ფიქრში გართული მივუახლოვდით ჩვენს ქოხს და შორიდანვე დავინახეთ დედაჩემი; იქვე კარებში იჯდა, თმაგაწეწილი და ისე აბღღვრიალებდა თვალებს, რომ ეტყობოდა, ყველაფერი გაეგო.

იმისთანა ჩემს დღეში არა მიგრძენია რა. ერთ წამს შევდექი კიდევ, მინდოდა უკან დაგებრუნებულყავ, მაგრამ მამაჩემმა არ გამოშვა.

— შინ მივიდეთ, შვილო!

მამაჩემი სრულიად უშიშრად მიიწევდა შინისკენ.

ის იყო მივედით და წამოხტა კიდევ დედაჩემი. წამოხტა, საში-

ნელი ხმით შეჰყვირა... ღმერთო შეგცოდე და ისე ადამიანს კი არა, მარტო მხეცს შეუძლია დაიყვიროს... შეჰყვირა და ჩემკენ წამოვიდა. ორივე ხელით ყელში მომეპარდა და დამახრჩობდა, ხელი რომ არ დამეჭირა. რაკი ხელებით ველარა გააწყო რა, ფეხი მკრა მუცელში და დამიყვირა:

— წადი, შენი ძმა მოკალი! წადი, ნიკო მოკალი, შე ურჯულო, შენა!

თან კბენას მიპირობდა, ყვიროდა, ფეხებითა მცემდა. იმისთანადა ყვიროდა, რომ მთელი სოფელი თავს დაგვახვია.

მამაჩემი უკან ეწეოდა, იქნება გავაშვებინო როგორმეო. ეს რომ ნახა, დედამ უცბად თავი დამანება და იმას მივარდა; გიჟვით მივარდა, — ჰაი, შე იაკობელო, შენაო! — მენახშირე ჰანოვრი და რამდენიმე სხვა მეზობელი რომ არ მოგვევლებოდნენ, დაახრჩობდა საწყალ კაცს, ან თვალებს ამოსთხრიდა.

ბოლოს, როგორც იყო, მოერივნენ და ჩვენი ქონისკენ წაიყვანეს. მაგრამ თავისას არ იშლიდა, იწყევლებოდა და ილანძლებოდა:

— კარგ შვილს დამიხედეთ, მშობლების მოსიყვარულეს! ერთი ურჯულო გომბიოს გულისთვის დედაც უნდა დაივიწყოს, მამაც, ღმერთიც და რჯულიც! მაგრამ არა, შენ იმას ვერ შეიერთავ! სულ ნაკუწ-ნაკუწად დაგჭრის ჩემი ნიკო! საწირავს მივართმევ მღვდელს, რომ ჩემმა ნიკომ მოგკლას, შე დაწყევლილო, შენა! დაწყევლილი იყავ უკუნითი უკუნისამდე!

შინ შეაგდეს, კარი გამოუკეტეს და იმისი ყვირილი კი მაინც მთელს სოფელში იდგა.

მე და მამაჩემი კი ვიდექით შუა ქუჩაში ვაყვითლებულვები.

— გიჟია, შვილო, გიჟი! — მითხრა საწყალმა მოხუცმა. — წავიდეთ სადმე, შინ ნუ შევალთ, თორემ უბედურებას აგვიტეხს რ:სმე! რა უბედური ვარ, ღმერთო! ნეტა რა დავაშავე, რომ ასე მსჯი, შე დალოცვილო, შენა?!

ისევ ნათლიაჩემისაკენ გავწიეთ. ღუქანში ჯერ ისევ სინათლე იყო. ნათლიაჩემი თავის სავარძელში ბრძანდებოდა გამოკვირული და ნათლი-ჯალაბს და ნიკოლს იმ დღის ამბავს უამბობდა. ჩვენ რომ შევედით, — მე თურმე სისხლი მდიოდა და მამაჩემს სულ დაგლეჯილი ჰქონდა ტანისამოსი—სახტად დარჩა კაცი, და როდესაც ვუამბეთ ჩვენი უბედურება, შეჰყვირა:

— ღმერთმანი, პეტრე, შენი დიდი პატივისცემა, თორემ ეხლავე ციხეში ვუკრამდი თავს! ღმერთო! განა აგრე გამძლავრება შეიძლება დედაკაცისა! სულ დაუფიცავი მღვდლების ბრალია! თუ ჩვენ იმათ ბოლო არ მოუვლეთ, ცუდ საქმეს დაგვმართებენ!

მერე დაუმატა:

— თუ კი აგრეა, თავი დაანებეთ, სულ მარტო ბრძანდებოდეს სახლში. მამაჩემს უთხრა, მუშაობით ჩემს სამკვდლოში იმუშავე და ღამეც ღუქანში გეძინოსო. მაგრამ ეს არ ივარგებდა, რადგან მამაჩემს თავის ქონში უნდოდა ცხოვრება, თავის მეუღლესთან ერთად. ჩვეულება ცალკე მოქმედებდა, სირცხვილი კიდეც ცალკე: რას იტყვიან, ამ სიბერის დროს რომ ცალკ-ცალკე ვიყვნეთო! რაც უნდა უბედურება იყოს, გაყრას მაინც ერთად ყოფნა სჯობია! გაყრილ ცოლ-ქმართ ქვეყანაც დასძრახავს და შვილებსაც საუკუნოდ გააუბედურებენ.

იმ ღამეს ღუქანში გვეძინა. მეორე დღეს დილაადრიაანად შინ წავიდა მამაჩემი ჩემი ბარგის ჩამოსატანად. ცოტა ხანს უკან ჩამოვიდა, ბარგიც ჩამოიტანა, თოფი და სამხედრო გულაც, მაგრამ დედაჩემს კურთხევა კი არა.—შენი ნახვა არ უნდაო,—მითხრა თვალ-ცრემლიანმა.

ღიად, დედიჩემის უნახავად წავედი, მისგან დაწყევლილი. ღმერთმა ხომ იცის, მე არაფრით გამომიწვევია. ეს წყევლა, მაგრამ გული მაინც მიწუხდა და მიკვდებოდა.

შემდეგში ნათლიაჩემმა მითხრა, დედაშენს არ უყვარდი, რადგან იმის დედამთილს, ურსულსა ჰგეგვარო, დედამთილს თურქე ჰირივითა სძულდა. ქალს რომ დედამთილი სძულდეს, ეგ არაფერი: მაგრამ დედას რომ შვილი სძულდეს — ჩემს დედამთილს რადა ჰგეგვარო, ეგ კი მეტისმეტი უბედურებაა!

XII

— მშვიდობით, ჩემო აღმზრდელო სოფელო! მშვიდობით დიდი ხნის მეზობლებო და მეგობრებო! იქნება აღარც კი მეღირსოს თქვენი ნახვა!..

მეორე დღეს ჯერ ათი საათი არც კი იყო, რომ გრაფტალში მივედი. ჩვენი მაზრიდან ყველანი აქ უნდა შეკრებილიყვნენ, ვინც ჯარში მიდიოდა, იქიდან ვისემბურგში უნდა წავსულიყავით და იქიდან კიდეც ვინ იცის საით გვიკრავდა თავს მუხთალი წუთისოფელი!

რაკი სიცხისა გვეშინოდა, დილით ვიარეთ, სიგრილოზედ. მარგალიტა, შოველი, ნათლიაჩემი, მამაჩემი და ბევრნი კიდეც სხვანი წამოვიდნენ ჩვენს გასაცილებლად. ჩავედით და რადგან სხვებისთვის უნდა გველოდნა, იქვე გზის პირას ავაყუდეთ თოფები და მუხის ჩრდილს შევეფარენით. ჩვენს ქვემოთ თვალგაუწვდენელი მინდორი იყო დაცემული დაკლაკინილი მდინარით და ზედ გაფანტული სოფლებით.

რამდენჯერმე გავჩერებულვარ ამ ორმოცდაათი წლის განმავლობაში იმ ძუხვის ქვეშ, წარსული მომგონეიია, ისე ცხადად წარძომიდგენია, თითქო ხელახლად იწყება ჯარიანობაო და გონებაზედ რომ მოვსულვარ, წაშომიძახხნია:

— უკანასკნელად აი, აქ ვაკოცე ჩემს მარგალიტას! აქ გამოვეთხოვეთ ერთმანეთს... საწყალი იაკობი! მდულაოე ცოეძლი ადიოდა იმის მამას და ის კი ანუგეშებდა: ნუ ტირი, მამაჩემო, მერმის აქ ვარო! ველარ ეღირსა უიედღურს შინ დაბრუნება!

აი, იმ ბილიკზედ ჩამოიარეს სენიანდემუელებმა და ავერ აიმაზედ მიტტელბრონელებმა... ისე მოდიოდა შორიდან იმათი ხალაოის ხმა, თითქო ტყეს მთელი ჯარი დარევიოაო. თანდათან გვიახლოვდებოდა ნაღარა, უცბად გამოვიდნენ ტყიდან, და მხიარულად შემოგვძახეს: თავისუფალ ერს გაუმარჯოსო!

მიღის დრო და სიყმაწვილეც თან მიაქვს! ისევ ის არის ეს ქვეყანა, ის არის ჩვენი მთა, ჩვენი მინდორი და ჩვენ კი ის ალარა ვართ, ან არა და სულაც ალარა ვართ! სადღა არიან ის სიყმაწვილით და ტკბილი იმედებით აღვსილი ბიჭები, აქ რომ გაიძახოდნენ, თავისუფლებას გაუმარჯოსო? სადღა არიან აქ რომ ეთხოვებოდნენ თავიანთ მახლობელთ და ჰპირდებოდნენ, მერმის აქა ვართო? რომ მომაგონდება ჩემი ამხანაგები, რომელნიც მოხელის და რეინის პირად დარჩნენ ან არგონის ჭალებში, მიკვირს, მე როგორღა გადავჩიი ცოცხალი, და ღმერთს მადლობას ვწირავ.

მარგალიტას და სხვა ქალებს პატარა კალათებით ცოტა რამ საკმელ-სასმელი მოეტანათ, რადგან გრაუფეტალში დუქანი არსად იყო. მაგრამ ვის აგონდებოდა საკმელი? მე და მარგალიტა იქვე ბუჩქს ამოვეფარენით და დაბალი ხმით ვლაპარაკობდით. შოველი, მამაჩემი. ნათლიაჩემი და კიდევ სხვანი კი მოშორებით იღვნენ, გზის ქვევით, მუხების ჩრდილში და, ალბათ გრძნობდნენ, რომ ბევრი რამ გვექნებოდა ერთმანეთისთვის სათქმელი, ვითომ ყურადღებასაც არ გვაქცევდნენ. მარგალიტა მთხოვდა, ხშირად მოიწერე ხოლმეო... სიყვარულით შემომყურებდა, თუმცა სხვებივით არა ტიროდა. გულმაგარი იყო და კარგად იცოდა, რომ ამისთანა დროში კაცს გამხნეება უნდა.

— მე სულ შენს ფიქრში ვიქნები, სულ შენთან ვიქნები... მამიშენისა ნურა გეფიქრება რა, მამაშენი მამაჩემია, შენზედ არანაკლებ მე მეყვარება და, ნუ გეშინია, არას გავუჭირებ.

მე კი გამტერებული შევცქეროდი და იმის მიხედვით აული მიმაგრდებოდა. დარწმუნებული ვიყავი, რომ უვნებელი დაებრუნდებოდი და ერთ წამს არ დამიკარგავს ეს რწმენა, გაცხარებულ ბრძო-

ლაშაიკ კი. სხვები ჩემს გვერდით უიმედობით დაუძღვრებულნი, ზოგი სიცივიტ კვდებოდა, ზოგი შიმშილით, ზოგი სულ უბრალო ავადმყოფობით და მე კი ისე მწყუროდა ჩემი მარგალიტას ნახვა, ისე მაგრა ჩავეჭიდე სიცოცხლეს, რომ სიკვდილმა ვერა დამაკლო რა.

ჩვენთან ერთად მოხუცებული გუენი იჯდა თავის ცოლით და ქალებით და ყველანი ცხარე ცრემლითა ტიროდნენ. უნდა დამკითხებოდნენ, — იძახდა გუენი... — ორივე ერთად როგორ გავიმეტო?! ჩემი ხნის კაცს მოსვენება უნდა, სადღა შემიძლია ოჯახის გაძლოლაო?! გუენის შეილება არა ტიროდნენ, მაგრამ ვინ იცის, რა ჯოჯოხეთი უტრიალებდათ საწყალებს გულში!

სხვა მოხუცებულები უფრო გულმაგრად იყვნენ და იმისთანა იმედინად და ვაჟკაცურად ლაპარაკობდნენ — სამშობლო თავისას თხოულობს და შერცხვენილი უნდა იყოს ის კაცი, რომ სიკვდილს შეუშინდესო, — რომ მხდალსაც კი ამაგრებდნენ.

მამა ქრისტეფორეს მოსვლაზედ იმისთანა ყვირილი გაისმა ყოველის მხრიდან — თავისუფალ ერს გაუმარჯოსო! — რომ იტყოდით მთა შეინძრა და ერთმანეთს სტყორცნა დაბერებული ბრგე მუხებიო.

მამა ქრისტეფორემ ლუტცელბურგელები ჩამოიყვანა და თითონ იმიტომ ჩამოვიდა, რომ პარაკლისი გადაეხადა და ჩვენი დროშები ეკურთხებინა. ჯერ ისევ შორს მომავალს მოვკარ თვალი, როდესაც ბიშელბერგის დაღმართს ჩამოდიოდა. ჩემი ძმა სტეფანეც თანა ჰყავდა: მე დრო არა მქონდა, რომ ავსულეყავ, გამოვთხოვებოდი და მამა ქრისტეფორეს თან წამოეყვანა.

საშინელი სიცხე იყო. თორმეტი საათი იქნებოდა. ზინზელის ხილზედ მივეგებე ჩემს ძმას და ცხარედ გადავკოცნე. მამა ქრისტეფორეს წურწურით სდიოდა ოფლი. მოვიდა, ხელი ჩამომართვა და მითხრა:

— ძალიან კმაყოფილი ვარ შენი, მიშელ! გავიგე შენი ბედნიერება და ისიც ვიცი, რომ ღირსი ხარ მაგ ბედნიერებისა.

პატარა სტეფანე მარგალიტასკენ გაიქცა კოჭლობით. შოველო და ნათლიაჩემი მამა ქრისტეფორეს მიეგებნენ.

ექვსასამდე ბიჭი ვიქნებოდით შეკრებილი და ზემომთიელნიდა გვაკლდნენ. ის იყო შევიყარენით, რიგზედ დავმწყრივდით და იმათი ნალარაც გაისმა ტყეში.

ზემომთიელთ თავიანთ წინამძღოლად კლოდ ულენი აგჩიათ, რომელმაც 1814 წ. თავი ისახელა თავის მამაცობით. იმათშივე ერია მეწვრილმანე მარკოზ დივე; ფეხშიშველა იყო, მთელი თავისი

ავლადიდება ერთ ხელსახოცში ჰქონდა გამოკრული. არც სხვები იყვნენ იმაზედ უკეთ გამოწყობილნი, მაგრამ იმისთანა მხიარული სიმღერით მოდიოდნენ, იმისთანა ხუმრობით და სიცილით, თითქო გაკირება სხვისაც არსად უნახავთო. რომ უფრო მოკლედ მოეპრათ, წყალში გამოტოპეს და ერთი ჟივილ-ხივილი აუღდათ, რადგან წელამდე სწვდებოდათ წყალი.

რაკი ზემო მთიელნიც ჩამოვიდნენ და მოლოდინი აღარავასი გვექონდა, ჩვენმა ივანემ და ორმა ძმამ, ლეყემ, ნალარა დაჰკრეს და ყველანი ფეხზედ წამოგვაყენეს. ახლა კი უნდა გავმორებოდით ერთმანეთს!

ვინც ფალსბურგიდან პეტიბიერისკენ ყოფილა, უთუოდ ნახავდა, ზედ გზაზედ, ვაკეზედ, შიგ შუა მინდორში ერთ უზარმაზარ კლდის ნატეხს. ჯერაც არავინ იცის, ვის უნდა შესძლებოდა იმოდენა მთისოდენი კლდის დაძვრა და ბარად ჩამოტანა? ცხადია მთიდან ჩამოცურებულა, მაგრამ როდის, ვინ იცის? იქნება იაშინ იყო ეს ამბავი, როდესაც ჯერ ადამიანი არც კი არსებობდა. სწორედ ამ კლდეზე ავიდა მამა ქრისტეფორე. გარს ჯარისკაცები შემოვეხვივნით, მერე ჩვენი ნათესავეები და ნაცნობები და აქეთ-იქიდან სეირის საყურებლად მოსული ხალხი. ყველანი გაჩუმდნენ. მამა ქრისტეფორემ პარაკლისი გადაგვიხადა, მერე დრომები გვიკურთხა და დასასრულ მოკლე სიტყვით მოგვმართა და მოგვაკონა. რა არის ქრისტიანი მხედარი.

მას შემდეგ შოველი ავიდა კლდეზე, როგორც მოხელე და თავმჯდომარე ჩვენი კლუბისა. სთხოვა, წინ წამოიღეთ რაზმის სამფერი ბაირალიო, რომლის ტარზედ გლეხკაცის უბრალო ნაბდის ქუდი დაეხურათ და დალოცა:

„გლეხკაცის ძველო ქუდო, ნაწვაგ-ნადაგო და მრავალტანჯულო! ქუდო, ჩვენ წინაპართა ოფლით გაყდენთილო! ქუდო მონისაჲ, ყურმოჭრილ ყმისაჲ, რომელსაც ფეხქვეშ სთელავდნენ ათასის წლის განმავლობაში ჩვენი ბატონები! აბა ამალღი და წინ გაუძელ შენთვის მებრძოლოთ! ამალღი, ყველგან თვალწინ უდგე მეომართ და მონები გაათავისუფლებინე! ამალღი, გამაგრდი და მზე დაუბნელე იმათ, ვისაც გლეხკაცი ადამიანადაც კი არ მიიჩნია! გამაგრდი, რომ შენს დანახვაზედ თრთოდნენ შენი მტრები! გამაგრდი და გაძლიერდი, რომ შენ შვილთა სიმამაცით და ქველობით დიდებული შეიქმნე!“

მერე ჩვენ მოგვიბრუნდა და ათრთოლებული ხმით გვითხრა:

— ხალხის შვილნო, დაიფიცეთ, რომ სიცოცხლეს არ და-

ინდობთ ამ ბაირადისათვის. თქვენი სამშობლო და თქვენა თავისუფლება არის ეს ბაირალი. ეს ბაირალი მოკაგონებთ თქვენს წარსულ ტანჯვას და მომავალ შვებას. დაიფიცეთ, რომ სიცოცხლეს არ დაიშურებთ...

და ერთხმად შევიძახეთ იმოდენა ხალხმა: ვფიცავთ! ვფიცავთ!

— ნუ დაივიწყებთ, — სთქვა შოველმა. — თქვენ სამშობლოს შეპფიცეთ და ეგ ფიცი გაიძლოლეთ წინ, როდესაც ბრძოლაში იყვნეთ.

ისე ამბობდა ყოველ სიტყვას, რომ შიგ გულში გვიქდევდა.

შოველი ჩამოვიდა კლდიდან. ვინც საყურებლად მოსულიყვნენ, მაშინვე შინისკენ წავიდნენ, რადგან პეტიბიერის მხრივ შავი ღრუბელი წამოვიდა და მზეს მოეფარა. იმისთანა სიცხე იყო, ისე იკბინებოდა მზე, რომ ცხადი იყო, ძალიან გაავდრდებოდა.

ჯარისკაცები შოველის და სხვა მოხელეთა გარეშემო ვიდექით. შოველმა გამოგვიცხადა, თქვენი უფროსების არჩევა კანონისამებრ თქვენი საქმეა და როდესაც ბინაზედ მიხვალთ, ვისაც გინდათ, აირჩევთო; მანამდე კი ერთი კაცი გინდათ წინამძღოლად, რომ გზაში წესიერება დაიცვას, თქვენი ბინა და საქმელი იზრუნოს და აგრეთვე დასვენების დრო მოგცეთო.

ამის გაგონებაზედ იგრიალეს ზემომთიელებმა და ერთხმად ულენი დაასახელეს.

იმის წინააღმდეგი ჩვენც არა გვემონდა რა და ამ გვარად რიქპეიმამდე ულენი უნდა ყოფილიყო ჩვენი წინამძღოლი. იმის საქმე ის იყო, რომ გზაში ავეჩქარებინეთ და სოფლებში მამასახლისებისთვის საჭირო საჭმელ-სასმელი და ბინა ეთხოვა ჩვენთვის.

მაგრამ ახლა რომ ჩვენი გამოთხოვება გიამბოთ, ის ემჯობინება. შუადღისას უფრო და უფრო მოიდრუბლა ცა. ტყე ხმაურობდა. ხომ იცით რა საიდუმლოდ ხმაურობს ტყე აედრის წინ? როგორ კანკალებს ფოთოლი, როგორ ირხევა ტოტი. თუმცა ქარი არსად არის? ტყე წინაღვე იგრძნობს ხოლმე აედრისა და ქარიშხლის მოახლოვებას და ულენიც ტყის შვილი იყო. წინ გავიდა, ნალარა დააკრეფინა, და დაიძრა კიდევ ჩვენი რაზმი. მამასახლისებო, შოველი, მამა ქრისტეფორე, მამაჩემი და სხვანი გზიდან ჩამოკვეცილნენ. მე კი ერთხელ კიდევ გადავხედე მარგალიტას, თითქო მინდოდა გულში ჩამებეჭდა მისი სახე და ამ სამი წლის განმავლობაში თანა მყოლოდა. იმანაც ისე ჩამჭიდა ხელი, თითქო გაშვება აღარ შეუძლიანო.

— მშვიდობით, მარგალიტა!

გულში ჩაეკიკარი, მაგრამ რა? მკვდარივით იყო, ფერი მისდლო-

და. წამოვიკიდე ჩემი გუდა, შოველს და მამაჩემს მოვეხვიე, რაც ფული მქონდა მამას მივეცი, რომ სტეფანეს სწავლის გაგრძელება შესძლებოდა.

მერე ნათლიაჩემთან მივედი, მოვეხვიეთ ერთმანეთს და ოდნავ შევნიშნე, რომ უბის ჯიბეში ორი ოქრო ჩამიღო. ღმერთმა უშველოს, დიდი სიკეთე დამღო შემდეგში ამ ფულმა.

უნდა წავსულიყავით, თორემ მეც ცრეხლი წამსკდებოდა. ავიღე ჩემი თოფი და შევქახე:

— მშვიდობით! მშვიდობით!

მაგრამ მარგალიტამ იმისთანა ხმით დამიძახა: „მიშელ“-ო, რომ გული მომიკლა. მარგალიტა ტიროდა. მივედი, ვითომ მინდოდა იმედი მიმეცა რამე:

— კმარა, მარგალიტა, რა გატირებს? ეგ იმედი მქონდა შენგან? გული მიმდიოდა. ჩვენს გარშემო ყველგან ტირილი ისმოდა: დედაკაცისთანა საშინელი ხომ არა იქნება რა!

ძალ-ღონე მოიკრიბა მარგალიტამ, ერთხელ კიდევ მომეხვია და მითხრა:

— ნახვამდის, მიშელ, ნახვამდის!

ყველანი მზად ვიყავით. გადავიწერეთ პირჯვარი, ვახსენეთ ღმერთი და გზას გავუღექით.

უკვე წვიმდა. გახურებულ დედამიწას ოხშივარი ასლიოდა. ის იყო პეტბიერისკენ შევუხვიეთ და დაუშვა კიდევც, კოკისპირულად დაუშვა. რაც არ გაგვაგრილა, არა უვნია რა წვიმას და უფრო კარგადაც ვიარეთ, რადგან მტვერი აღარ გვაწუხებდა.

იმ დღეს სამ საათზედ პეტბიერში გავიარეთ, მაგრამ არ გავჩერებულვართ. იმის იქით ერთი საათნახევარი კიდევ ვიარეთ და მაშინ კი შევდექით ერთ ტყის პირას, მინის ქარხნის გვერდით.

მთელი გზა ფიქრებში ვიყავ გართული; ისე მივდიოდი, რომ ჩემს ამხანაგებსაც კი ვერ ვამჩნევდი. ტყის პირას კი, როდესაც ცეცხლი გავაჩინეთ და იქვე მოსახლეებმა ზოგმა პური შემოგვთავაზა, ზოგმა ლუდი, მარკოზ დივემ ხელი დამადო მხარზედ და მითხრა:

— რას მოგიწყენია, მიშელ?

გადავხედე და მამა, ღვთის წინაშე, ნაცნობი კაცი რომა ვნახე; პასუხი კი არ გავეცი: რა დროს ლაპარაკი იყო? ცოტათი მოვწყურდით, ცარიელ პურს ლუდი დავატანეთ, თავქვეშ ქუდები ამოვიღეთ და იქვე მივეყარენით.

სიყმაწვილეს რომ ასე ადვილად ძილი არ შეეძლოს, ხომ სიყმაწვილეც აღარ იქნებოდა. მეტი სიკეთე განაღა იქნება, კაცმა ერთ წამს მაინც ყოველი სევდა და ვარამი დაივიწყოს და მოსვენებას

მისცეს თავი. სწორედ ეს წამიერი მოსვენება აკლია სიბერეს.

ის იყო ინათა და ულენმა ყვირილი მორთო:

— აბა, ბიჭებო! ჩქარათ!

საჩქაროდ წამოვცვივდით და მოვემზადენით. წინწკლავდა. ვინც უფრო გამოცდილი იყო, ჩახმანს ხელსახოცს ახვევდა, წვიმამ არ დამისველოსო.

ის იყო უნდა დავძრულიყავით, რომ მარჯვნივ, ქვემო რეინელი ცხენოსანი, ჩვენსავით თავის ნებით გამოსული, ჯარი გამოჩნდა. ამ ცხენოსანთ იმ დროს დრაგონებს უწოდებდნენ. ერთობ შეძლებული ოჯახის შვილები იყვნენ. სამის თუ ოთხის ძველი ჯარისკაცის გარდა, რომელთაც თავიანთი სამხედრო ტანისამოსი ეცვათ, დანარჩენები თავთავის ჩვეულებრივ ტანისამოსით იყვნენ და ერთი შეხედვით იცნობდით, ვინ იყო იმათგანი გლეხკაცი, ვინ ყასაბი და ვინ ხაბაზი. დრაგონობას დეზებზედ და ტლანქ გრძელ ხმალზე შეატყობდით, რომელიც ყველას გაეკეთებინა. სულ რჩეული წარმოსადეგი ბიჭები იყვნენ და იმისთანა მხიარულად მოდიოდნენ, რომ საგანგებო სანახავი იყვნენ.

ჩვენ რომ დაგვინახეს, წინამძღოლის ბრძანებით ხმალი ამოიღეს და ერთი სიმღერა დაიძახეს, რომელიც ჯერ ჩვენგანს არავის გაეგონა. შემდეგში, ღვთის წყალობა გაქვთ, ჩვენ ის გავიხვიპირეთ:

აღსდექით, მამულიშვილნო,
დრო დაღვა გამარჯვებისა!..

იმისთანა ხმითა მღეროდნენ, რომ თრთოლა დაგვაწყებინა. გაუმარჯოთ! დრაგონებს გაუმარჯოთ! თავისუფალ ერს გაუმარჯოს! — იძახდა მთლად ჩვენი ჯარი. მინის ქარხნიდან პატრონი გამოვიდა თავის ცოლ-შვილით და სთხოვა, თუ შეიძლება ცოტა ხანი შეჩერდითო. ჩვენც გარს შემოვეხვიეთ, ცხენებს აღვირი დავუჭირეთ და ვეხვეწებოდით, მოითმინეთო:

— უნდა გაჩერდეთ, აღზასელნო! ნუ თუ ისე წახვალთ, რომ ერთობას არ შევფიცავთ ერთმანეთს? ჩამოხტით!

მაგრამ იმათმა წინამძღოლმა, — ვეშაპის ოდენი იჯდა ის კურთხეულიშვილი ცხენზედ — დაგვარწმუნა: ბრძანება მაქვს, დანიშნულ ვადაზედ, ამ საღამოს, უთუოდ სარებრუბში უნდა მივიდეთ, და ჩვენც ძალა აღარ დავატანეთ.

დრაგონები ისევ იმ სიმღერით გაუდგნენ გზას და ჩვენ კი... შეუძლებელია ავიწეროთ რა შთაბეჭდილება იქონია ჩვენზე იმ სიმღერამ. სიმღერა კი არა, გაჭირვებული სამშობლოს ძახილი იყო,

თავის შვილების მოწოდება, მოდით, დამიფარეთო! იმისთანა იმე-
ლით აგვევსო გული, რომ მღვდლები გვეგონა ჩვენი თავი და ჩვენი
უძლეველი ამ ქვეყნად არა გვეგულებოდა-რა.

— ღმერთი მოწყალეა, — ვიძახდი ჩემს გულში, ამ სიმღერით
თუნდა ჯოჯოხეთში ჩავალ. რა მალე აუსრულდა შოველს ნატვრა:
კარმანიოლის მაგიერად, სხვა სიმღერა გვინდა, რომ ხალხისათა
ძლიერი იყოს და იმედიაწიო.

საცა კი გავიარეთ, ყველგან ზარსა რეკდნენ, ყველგან ჩვენ-
სავით თავის ნებით გასული რაზმები მიდიოდნენ საზღვრისაკენ.
მიდიოდნენ და თან იმედიაწად გაიძახოდნენ:

— ამოვწყდეთ და კი ნუ დავეჯაბნინებით!

ზოგან, ვაწრო ხეობაში, იძენი რაზმები მოგროვდებოდა ხოლ-
მე, ისე გაიბმოდა ლარივით, რომ აღარც თავი უჩანდა, აღარც ბო-
ლო. მთელი ქვეყანა ფეხზედ იყო! რომ გეცოდნოდა, საჭირო ვარ-
თო, ქულზე კაცი გამოვიდოდა. ასეა და! უძლეველია ხალხი, რო-
დესაც თავის თავს იცავს.

ქ. ბიშიში იმოდენა ჯარი შეგროვილიყო, რომ გავლა აღარ
შეიძლებოდა. შიგ რომ ვერ შევედით, ქალაქგარეთ დავდექით,
ბინდორში. ჩვენთან ერთად ბევრი სხვა რაზმებიც იყვნენ. ქალაქში
ჩვენგანი მარტო ულენი შევიდა, რომ მამასახლისი ენახა და საქ-
მელი მოეთხოვა.

ბიში ერთი პატარა ძველებური ქალაქია, ნახევრად ფრანგული,
ნახევრად გერმანული; სავერსს ძალიანა ჰგავს. კარგი მაგარი ციხე-
ები აქვს და ცოტა რამ ჯარიცა დგას შიგ. აქ მდგომი ჯარა შეიფი-
ცა, დავიხოცნეთ და მტერს კი ნუ დავენებდებითო! და სწორედ
ასეც ქნა: ყველანი დაიხოცნენ და ქალაქში კი მტერი არ შეუშვეს,
ის მტერი, რომელსაც გენერალი ბულიე მოუძლოდა.

ვეორე დღეს ისევ გზას გავუდექით. ვისემბურგამდე რაზმე-
ნიმე დღე ვიარეთ დაუსვენებლივ და სულ ცხარე მზის ქვეშ, რად-
გან ტყე აღარსად იყო და ჩრდილი ძნელი საპოვნელი. ჩვენს წინ,
ჩვენს უკან, მარჯვნივ და მარცხნივ, ყველა გზაზედ ჯარები მი-
დიოდნენ.

ჯარებს ურამები მისდევდნენ სურსათით, ღვინით, იარაღით, და
იმისთანა მტვერი იდგა, იმისთანა საშინელი მტვერი იდგა, რომ
ღმერთს ერთსდა ვევედრებოდით, ერთი კარგი წვიმა კიდევ და
მერმე აღარას გთხოვთო!

სალამოს ცხრა საათი იყო, რიქსპეიმში რომ მივედით. ქალაქ-
გარეთ დაბანაკებული ჯარები ძალიან მხიარულად დაგვიხვდნენ;
იმ დილას ჩვენს ცხენოსან ჯარს შეტაკება ჰქონოდა მტერთან და

ჯექეტია კიდეც: ჩვენს დრაგონებს მტრის ჰუსარები და დრაგონები დაემარცხებიანთ, რომელთაც თურმე გახიზნული ფრანგები მოუძლოდნენ. კარგი ცხარე ბრძოლა იყო, რადგან ძალიან ცდილობდნენ ლანდაუს გზა შეეკრათ ჩვენთვის და მით სურსათის ზიდვა შეეწყვიტათ. ჩვენს ჯარს კუსტინი წინამძღოლობდა.

შიგ რიქსჰეიმში კი დიდი და პატარა ერთ უბედურ და თავგანწირულ ბავშვსა ტიროდა: ამ პატარას დაენახა მომავალი მტერი და ნაღარა დაეკრა, — სწორედ ის ნიშანი, რომლითაც მთელი ჯარი იარაღით ხელში საბრძოლველად უნდა გავიდეს. წამოსწეოდა ერთი გერმანელი ჰუსარი და მარჯვენა ხელი მოეჭრა: მაგრამ პატარას მაინც არ დაეშალა და ცალი ხელით თურმე უკრავდა ნაღარას, ვიდრე მტრის ჯარი ზედ არ შედგა და ცხენებმა არ გასრისეს.

აი, რა ნობათით შემოვიდა ჩვენში ომი!

მაგრამ მგონი დროა, ცოტათი შევისვენო. გარდა ამისა მინდა წავიდე, ორი ძველი მეგობარი ენახო, რომელნიც მაღლა მთაში დგანან და ბევრ რასმე მომაგონებენ. მაშ დღეს ამაზედ შევდგეთ; ცოტა რამ კი არ გეგონოთ პირველი ომი რესპუბლიკისა? ამის აწერას კარგი დაფიქრება უნდა. მარტო ომი ყოფილიყოს, კიდეც ჰო, მაგრამ იმდენი რამ მოხდა იმავე დროს, რომ სანამ ძველ ქალაქებს არ გადავსინჯავ და რიგზედ არ მოვიყვან, სანამ არ დავრწმუნდები, რომ ჩემი ამბავი მარტოდმარტო ჭეშმარიტებაა, მანამ კალამს ხელს არ მოვკიდებ.

თუ ღმერთმა დამაცალა და ჯანი მთელი შემარჩინა და გულ მხიარული, ეგეც ადვილია.

წელიწადი პირველი რესპუბლიკისა

1792

I

სადღაა ჩვენი სოფელი? შორს დარჩა და ახლა აღარც ჩვენებზედ მოგახსენებთ რასმე, აღარც ნათლიაჩემის სამკედლოზედ, აღარც მოხუცებულ მამაჩემზედ. აქედან იწყობა ბრძოლა, ბრძოლა და კიდევ ბრძოლა.

სარბურგელები, ვინც ვიყავით ჩვენი ნებით გამოსულნი, მკათათვის დამღევამდე რულცქეიმში დავრჩით; ზემომთიელთ იქ მიიღეს თოფი და ტყვია-წამალი, თორემ მანამ კომბლების და ცულების მეტი სხვა იარაღი არა ჰქონდათ რა. დღე ისე არ გავიდოდა, რომ კიდევ არ მოგვმატებოდნენ ბიჭები. დილიდან საღამომდე სამხედრო ვარჯიშობაში ვიყავით და ვისსემბურგის და ლანდაუს შუა ნაღარისა და საყვირის ხმის მეტი აღარა ისმოდა რა. გეცოდინებათ, რომ ნაღარა ქვეითა ჯარების კუთვნილებაა და საყვირი ცხენოსნებისა.

ჩვენს უკან კელლერმანის და ბირონის ბანაკებს შუა სიმაგრეები იყო გავლებული ერთი საათის სავალ მანძილზედ მაინც ჰდ. ლოტერის პირას.

მაშინ რკინიგზისა არა ვიცოდით რა და რადგან სურსათის მოსატანად გლეხკაცის საქონელი უნდა გაეყვანათ, საჭმელ-სასმელი ხშირად გვაკლდა ხოლმე.

მე, მარკოზ დივე და ჩვენი მენალარე ივანე ერთ ქვრივთან დაგვაყენეს, რომელიც დილიდან საღამომდე ტიროდა. საწყალი დედაკაცი რაცა ჰქონდა, არა შურდა რა ჩვენთვის, არც ქერის პური და არც ლობიო და კარტოფილი. მე და მარკოზი ძალიან კმაყოფილნი ვიყავით, მაგრამ ჩვენი მენალარე კი ცუდ გუნებაზედ იყო; ხორცი ნებავდა!

როცა სურსათი დროზედ არ მოგვივიდოდა, გავიდოდით და საცხარას მოვახელებდით, იმითი შეენაყრდებოდით. შიმშილით ხომ არ დავიხოცებოდით? ავიკელით აქაურობა. საწყალი ხალხისთვის ამხედ უმეტესი უბედურება მგონი შეუძლებელი იყო.

მაშინ ასსიგნაციებს ვხმარობდით და იმათაც გასაყალი არა ჰქონდათ. ჩვენი ბანაკი საესე იყო პატარ-პატარა გერმანულ გაზეთებით, რომელშიაც იწერებოდნენ „მეჯღანეების ჯარის“ ათასგვარ ვაი-ვაგლახს, ამ ჯარის უფროსების უვიცობას და სისულელეს. გახიზნულებს დაერწმუნებინათ — სულ თრთიან ჩვენი შიმშით და თუ ერთი დავენახვეთ, მაშინვე გავაქცევთო... ჩვენც სწორედ ასე გვხატავდნენ: გაქცეულთ უკან მდევარი მოგვდევდა — ერთი საშინელი, უზარმაზარი გერმანელი ჯარისკაცი, ყურზედ სამკეცად შემოხვეული უღვაშით და ამოღებული ხმლით. საწყლები! ოცის წლის განმავლობაში, მიუხედავად ყურზედ სამკეცად შემოხვეული უღვაშისა, ბევრჯერ ვანანეთ ეს მხატვრობა!

ღიად, მეგაზეთებიც კი შესყიდული ჰყავდათ, რომ იმათგან გარიყვებულნი ხალხი უფრო უკეთ ეკრიჭათ და ეპარსათ. იმ გაზეთებისთვის რომ დაგვეჯერებინა, ჩვენი ჯარება შიმშილით იხოცებოდნენ და ჩვენი მტრებისა კი სულ ლეინოში ბანაობდნენ; ჩვენ არც იარაღი გვქონდა, არც ტანისამოსი, არც სურსათი; ისინი კი იარაღითაც მდიდარნი იყვნენ, სურსათითაც, ტანისამოსითაც. ქვეყანას ველარ დაეტია იმათი ზარბაზნები და მთელი რეინის პირას ხომ ისე ჰქონდათ ჩაყოლებული სურსათის საწყობი მალაზიები, რომ თუნდა ერთ საუკუნეს ეყოფოდათ. ჩვენც ეგ გვინდოდა და სულ იმას ვნატრობდით: ნეტავი ერთი რეინის პირას გავიდეთ, რომ ის მალაზიები დავათვალიეროთო. კარგი ის იყო, რომ დარწმუნებული ვიყავით ამ მალაზიებსა ვნახავთ და ვორმში და მაინცშიაც გავალთო.

საუბედუროთ, ისეთი სუსტი იყო რიცხვით ჩვენი ჯარი, რომ ამ ნატურის განხორციელება სრულიად შეუძლებელი იყო. 21 ათასი კაცი ქვეითა ჯარში ირიცხებოდა, 17 ათასი მოსურნენი — ჩვენი ნებით გამოსულნი ვიყავით, 6 ათასი ცხენოსანი და 1700 კაციც არტილერიაში ირიცხებოდა; სულ 46 ათასი კაცი, რომელთაგან 24 ათასი ციხე-სიმაგრეებში იყო, ხოლო დანარჩენი უნდა გასულიყო საბრძოლველად.

პრუსიელები და ავსტრიელები ერთად 200 ათას კაცზედ მეტნი იყვნენ. ჩვენი გახიზნულები სულ იმას ჩასჩიჩინებდნენ „მიდიო! რაღას ელითო!“ რადგან ბულიემ კარგად იცოდა, რა საშინელ მდგომარეობაში იყო მაშინ ჩვენი ქვეყანა! მეფე ლუი XVI მინისტრები, მანამ უჯობდათ, სულ იმას ბრძანებდნენ საერო კრებაზედ, რომ

ჩვენს სამხედრო სამზადისს მთელი ევროპაც ვერას დააკლებს; ჯარში თავის ნებით წამსვლელთ რომ ასე ურიგოდ არ ურავებდნენ იარაღს, აქამდე მთელი ჯარი სრულიად შეიარაღებული გვეყოლებოდა; ჩვენი არსენალი იარაღით სავსეა და ჩვენს ჯარს არაფერი უშავს, თუნდა ათი წელიწადი გასტანოს ომმაო. მეფემ კარგად იცოდა, რომ მინისტრები ტყუოდნენ; კარგად იცოდა, რომ არც ხეირიანი წინამძღოლები ჰყავდა ჩვენს ჯარს და არც ინჟინერები, რადგან დიდი გვარიშვილები ყველანი გაიხიზნენ; მეფემ კარგად იცოდა, რომ ჩვენი არსენალი ცარიელი იყო და, როცა საჭირო იყო, ურმებს, საქონელს, ცხენებს და მიწის სათხრელ იარაღსაც კი გლუხკაცს ართმევდნენ. ისიც კარგად იცოდა მეფემ, რომ უმეტეს ნაწილს ჩვენგან ერთი ხელი ტანისამოსის და ერთა დაეანგებულებული თოფის მეტი არა ჰქონდარა და ისიც, ათში ერთი თუ გავარდებოდა. მეფემ კარგად იცოდა, რომ გულები რა არის, გულებიც კი ვერ მოგვიხერხეს და ჩვენვე დაგვაძალეს: გულები უნდა იშოვოთ, საცა გენებოთ, და ჯარში ისე გამოხვიდეთო! მეფემ ეს ყველაფერი კარგად იცოდა, რადგან მინისტრები, სასახლე და გახიზნულები ყოველთვის ერთად იყვნენ და ერთად მოქმედებდნენ.

ჩვენი ჯარის წინამძღოლი გენერალი კუსტენი ბრძანდებოდა. ტიონვილის და მეციას წინ მდებარე სიმაგრე ლანდაუ ისე მშვენივრად იყო გამაგრებული, რომ კუსტენი ცხენით შევიდა დანგრეულ ციხეში თან რამდენიმე ცხენოსანი ახლდა. ლანდაუ რომ ასე იყო, სხვა, საზღვარს მოშორებული სიმაგრეები, რა ყოფაში იქნებოდნენ? რამდენჯერ მითქვამს ჩემს გულში:

— დაგვლუპეს, დაგვანლეს იმ მუხანათებმა! ერთად რომ შემოგვისიოს მტერმა ორასი ათასი კაცი, ერთ ღღესაც ვერ გავუმაგრდებით. ისე ამოგვწყვეტენ, მგონი ერთიც არავინ გადარჩეს! ან ვილა ინდომებს გადარჩენას?.. ხედავთ, როგორ გვიმუხთლეს! სამშობლო მტერს შეარცხვენინეს, რომ თავიანთი უპარატესობანი არ დაეკარგათ და ხალხი ძველებურად მონად ჰყოლოდათ! იუდასავით მოგვექცნენ მეფეც და იმისი მინისტრებიც, რომელნიც ნარბონის პირით საერო კრებას და მასთან ერთად მთელს საფრანგეთს ატყუებდნენ: „საზღვრები დავიარე, ციხე-სიმაგრეები გავსინჯე და შიში არაფრისა გვაქვს, მთელი ევროპაც ვერას გვიზამსო“.

ჩვენდა საბედნიეროდ პრუსიელები და ავსტრიელები ჯერ წინსვლას არა ფიქრობდნენ; იმათ იმისთანა გამოჩენილი და ფთხილი გენერლები ჰყავდათ, რომ ასჯერ და ათასჯერ გაზომავდნენ, ვიღრე მოსჭრიდნენ; მეფეები, უბრწყინვალესი თავადები და სწავლულნი ჯერ ისევ იმის სჯაში იყვნენ, საფრანგეთი როგორ გავინაწილოთ.

იმათ რომ ჩვენი პოშის და კლებერისავით ხალხის შვილები ჰყოლოდათ წინამძღოლად, დავიღუპებოდით. ერთი სიტყვით, მთელი სამი კვირა იდგნენ საზღვარზედ და ზანტი კამეჩივით იცოხნებოდნენ.

ბოლოს ჩვენმა ბატალიონმა, რომელსაც მთიელთა პირველი ბატალიონი ეწოდებოდა, ბრძანება მიიღო, აფიცრები აირჩიეთ, რადგან ლანდაუს უნდა წახვიდეთო.

იმავე დღეს, 1792 წ. მკათათვის უკანასკნელ დღეს, ყველა თავის ნებით გამოსულმა რაზმებმა ამოირჩიეს თავიანთი აფიცრები, რომელთა წინამძღოლად არჩეულ იქმნა ივანე მენიე, ერთი ყმაწვილი ხუროთმოძღვარი, რომელიც თუნდა ასჯერ მაინც მენახა ჩვენს სოფელში, როდესაც ჩვენს მაზრაში ციხე-სიმაგრეებს აკეთებინებდა. ჩვენი ივანე თავისი ნალარით რაზმის თავში იდგა და ათისთავის ოდენ ჯამაგირს იღებდა.

მეორე დღეს ლანდაუს გზას გავუდექით. ტანისამოსი ჯერ ისევ საკუთარი გვეცვა და ისე იყო აჭრელებული ჩვენი რაზმი, რომ, თოფები რომ არა გექონოდა, იტყოდით, ეს ჯარი კი არა, სოფლელები არიან და სამუშაოდ მიდიან სადმეო. მშვენიერა დღე იყო. ქვემო შარანტელების მეორე ბატალიონიც ჩვენს გზას ადგა. უმეტესი ნაწილი ფეხშიშველნი იყვნენ, მაგრამ იმისთანა მხიარულად მიდიოდნენ, თითქო ქორწილში მიბრძანდებიანო. ახლა კი ყველამ ზეპირად ვიცოდით „მარსელურა“ და მთელი გზა იმასა ვმღეროდით.

ქვემო შარანტელები იმპფლინგენში გაჩერდნენ; ჩვენ კი ლინდაუში მივედით, სადილს უკან სამს საათზედ. ციხის კარში დარაჯად ბრეტანელი რაზმი იდგა თავისი თეთრი ტანისამოსით. ვინ არისო? დაგვიძახეს. მენიემ უპასუხა: მთიელთა პირველი ბატალიონი. ეს რომ გაიგეს, გამოგვეგებნენ და დიდი სიხარულით მიგვიღეს.

— თავისუფალ ერს გაუმარჯოს! — შესძახეს ერთმხრად ბრეტანელებმა.

ამის პასუხად ჩვენ მარსელური დავძახეთ და ისე შევედით ქალაქში.

ლინდაუ ძალიან ჰგავს ფალსბურგს, მაგრამ უფრო გერმანული იერი აქვს, ვიდრე ფრანგული. ქალაქის სიმაგრეებს გარშემო მდ. კეიში უვლის. ქვემო ნაწილში კეიში დაგუბებულია და ქაობში იკარგება. ქალაქში დღე და ღამ შეუწყვეტლივ ბაყაყის საშინელი ყიყინი გაისმის. ციხეები და გალანები ნახევარზედ მეტი დანგრეული დაგვხვდა, მაგრამ ყველგან გარნიზონის ჯარისკაცები იდგნენ და დანგრეულ კედლებს აშენებდნენ.

დიად! აი, რით იყო ძლიერი მეფე ლუი XVI. მამა-პაპათაგან აშენებული ციხე-სიმაგრეები ოხრად ეყარა და ინგრეოდა და ის კი სა-

ხელმწიფო შემოსავალს თავის ქეიფებზედ და დროს ტარებაზედ ხარჯავდა და ღიღებულ კარისკაცებს ურიგებდა. მეფეს ესიაშოვნა, თორემ საფრანგეთი რა სახსენებელა იყო? ,

ლინდაუში გარნიზონად შვიდი ათას ექვსასი კაცი ვიდექით.

მივედით თუ არა, ჩვენც მაშინვე სამუშაოდ გავვიყვანეს. მენიემ კარგად იცოდა, რომ დროს დაკარგვა ძვირად დაგვიჯდებოდა, და მაშინვე საქმეს შეუდგა. მთელი ღღე ჩვენთან იყო და ყველაფერს თითონ გვაკეთებინებდა. უსაქმურად არავინ იყო: ყველა თავ-თავის ხელობაზედ მუშაობდა და მე და ექვსი კიდევ სხვა მჭედელი წამხდარი ცულების და ხელეჩოების კეთებას ვუნდებოდით.

ბრაუნშვეიგის მანიფესტი საფრანგეთის ხალხისადმი ჩვენ ლინდაუში მივიღეთ და ვერ წარმოიდგენთ, როგორ აღშფოთდა მთელი გარნიზონი. კუსტენის ბრძანებით, იმის მაგივრად, რომ დაემალათ, დილით, ვიდრე საქმეს შევუდგებოდით, ხმამაღლა წაგვიკითხეს ამ ფელდმარშალის განცხადება, რომლითაც გვაცნობებდა: ევროპის ხელმწიფენი მობრძანდებიან, რომ აღზას-ლორენი ისევ გერმანელთა დაუბრუნონ; ევროპის ხელმწიფენი ხალხს არას ერჩიან, არც რასმე წაართმევენ, ოღონდ საფრანგეთის მეფეს დაეხმარებიან, რომ ძველებურათ შეეძლოს თავის ქვეშევრდომთა კეთილდღეობა და ბედნიერება იზარუნოს. არც ქალაქს და არც სოფელს არას ავნებენ, თუ იგინი თავის ნებით დამორჩილდნენ პრუსიელ და ავსტრიელ ჯარებს; მაგრამ სასტიკად დასჯიან ყველას, ვინც გაბედავს და მათ უმადლესობის ჯარებს წინააღმდეგობას გაუწევს რასმე: სამხედრო კანონმდებლობის დაკვალად დახვრეტილ იქნება ყველა, ვინც პრუსიელ და ავსტრიელ ჯარებზედ იარაღს იხმარს მინდორში იქნება თუ სოფელში, გარეთ თუ სახლში; საფრანგეთში ჯარებს ამით ვაფრთხილებთ, რომ გონზედ მოვიდნენ და, მინამ დრო აქვთ, ისევ ძველებური ერთგულება გამოუცხადონ მეფეს და ღიღებულთ; მილაციელებს ვურჩევთ, ჩვენს მოსვლამდე სოფლები შეიმაგრონ და ჩვენი წინააღმდეგობა დაუშალონ; რაც შეეხება პარიზელებს, მივგალობთ თუ არა, მაშინვე დაგვმორჩილდნენ და პარიზის კარი გაგვიღონ, თორემ ცოცხალი აღარავინ გადაგვრჩება! თუ ჩვენს მოსვლამდე შეურაცხყოფა მიუყენებიათ რამე მეფე ლუი XVI-სთვის, დედოფალ მარიამ-ანტუანეტასთვის ან მეფის ოჯახის სხვა წევრთათვის, ქალაქს ავიღებთ და ისე დავანგრევთ, რომ ნასახლარიც აღარსად ეტყობოდეს. მაგრამ თუ დაგვმორჩილდნენ და ქალაქი უომრად დაგვანებეს, ჩვენ, მეფე პრუსიისა და ხელმწიფე ავსტრიისა, ამით ვპირდებით: მეფე ლუი XVI ვთხოვთ, რომ აპატიოს პარიზელ ხალხს ცოდვანი მისნი.

მანიფესტის კითხვა ჯერ არც კი გაეთაყვებინათ, რომ იგრილა ამოდენა ჯარმა და ერთხმევ შესძახა: — სიკვდილი სამშობლოს პტერსაო!

ჩვენ ყვირილზედ მილიციელები გამოცვივდნენ, მერე ლინდაუს მკვიდრნი და უცბად გაივსო მოედანი. ყველანი აღშფოთებულნი იყვნენ ამ თავხედური მანიფესტით და სულ იმას იძახდნენ — გავწყდეთ და მტერს კი ნუ გავახარებთო თან „მარსელურსა“ და „წავას“ — მღეროდნენ. იმისთანა ხმაურობა ატყდა მოედანზედ, რომ გენერალ კუსტენს აჯანყება ჰგონებოდა და ცხენით ჩამოიჭრა ჩვენს დასამშვიდებლად. ახლაც თვალწინ მიდგას კუსტენი თავისი ამალით. უნდოდა დაემშვიდებინა როგორმე ხალხი, მაგრამ იმისი ბრძანება არავის ესმოდა.

არც მე ვიყავ სხვაზედ ნაკლებ აღელვებული, ვილაცა პრუსიელი თავადი ამისთანა შეურაცყოფას აყენებდა ჩემს სამშობლოს და არა მწყენოდა?!..

უცბად საყვირის ხმა გაისმა ციხიდან. ყველას გვეგონა, მტერი მოდისო, და თავ-თავის ალაგისაკენ გავიქეციით. მაგრამ მტერა არსად იყო. თურმე გენერალს გაეცა ბრძანება: საყვირის ხმას რომ გაიგებენ, იქნება მაშინ მაინც დამშვიდნენ და თავ-თავიანთ საქმეს შეუდგნენო.

სწორედ ასეც მოხდა... იმ დღიდან მოყოლებული უფრო და უფრო მატულობდა ხალხისა და ჯარის სიძულვილი მეფე ლუი XVI-სადმი და იმასთან ერთად პრუსიელების და ბრაუნშვეიგისადმი. ჯაოისკაცი, მილიციელები და თავის ნებით გამოსულნი ყოველ საღამოს იკრიბებოდნენ ლულხანებში, საზოგადო საქმეებსა სჯიდნენ და ხშირად საერო კრებას თხოვნას უგზავნიდნენ, სამშობლოს მოღალატენი და გამყიდველნი დასაჯეთ და მეფე გადააყენეთო.

ცოტა ხანმა კიდევ გაიარა. ვალავანი უკვე შევაკეთეთ, ზედ ზარბაზნები გავაწყეთ. ვისეგმბურგის და ლინდაუს შუა ავსტრიელი რაზმები დანავარდობდნენ. პურსა და სხვა საგზალს ან იარაღს რომ გვიგზავნიდნენ, თან დიდ ჯარს გამოატანდნენ, მტერმა არ წავგავრავასო! უფრო კი დრაგონები მოსდევდნენ ხოლმე. იმპფლინგენის და ოფენბახის შუა ჩვენს დრაგონებს მტრის ჯართან პატარა შეტაკებაც ჰქონოდათ და ლინდაუშიც მალე მოველოდით მათს მოსვლას.

მაგრამ ვიდრე ისინი ჩვენამდე მოაღწევდნენ, პარიზში დიდი ამბები მოხდა. რომ გაეგოთ პარიზელებს ბრაუნშვეიგის მანიფესტი, ჯავრი მეფეზედ ეყარათ: სასახლე აეღოთ, მეფის მცველი შვეიცარიელები დაეხოცათ და მეფე ლუი XVI, დედოფალი მარიამ-ანტუანე-

ტა და მთელი სამეფო ოჯახი დაემწყვდიათ, ჯერ ლუქსემბურგში, შემდეგ ტამპლში.

ჩვენ ეს ამბები გაზეთში წავიკითხეთ 15 მარამობისთვის და იმისთანა იმედი მოგვეცა მთელს გარნიზონს, რომ ერთზედ ასე რომ მოსულიყვნენ, ვერას დაგვაკლებდნენ. მეფის გადაყენებამ გაგვიორკეცა ვაჟკაცობა და ერთმანეთს ვულოცავდით მოღალატესაგან განთავისუფლებას.

თან ვიცინოდით და თან სიხარულის ცრემლი გვდიოდა. იმისთანა კმაყოფილნი ვიყავით, თითქო ამაზე ყოფილიყოს დამოკიდებული ჩვენი პირადი ბედნიერება.

აი, როგორ აედო ხალხს სასახლე. მე იქ არა ვყოფილვარ, მაგრამ ისე მოგითხრობთ, როგორც მაშინდელ გაზეთებში ეწერა. ვერ წარმოიდგენთ, რა გასაეალი ჰქონდათ მაშინ გაზეთებს, ერთი კი დაიძახებდა ვინმე, ახალი გაზეთო! და მაშინვე გარს შემოეხვეოდა ხალხი. ავიდოდა მაგიდაზედ და დაიწყებდა ხმამალა კითხვას. გაზეთებს კი არა, პარიზიდან მიღებულ წერილსაც წაუკითხავდნენ ხოლმე ხალხს, როცა შიგ საზოგადო საქმეებისა ეწერა რამე ან იაკობელების კლუბის სხდომა და იქ წარმოთქმული სიტყვები იყო მოყვანილი. ერთი სიტყვით, უპურობა ისე ვერ შეაწუხებდა ქვეყანას, როგორც უგაზეთობა. მაშინ დამალული აღარა იყო რა.

მე უკვე მოგახსენეთ, რომ თიბათვის 20-დან დაწყებული ძალიან უნდობლად შესცქეროდა ხალხი მეფეს, რადგან მეფე ეწინააღმდეგებოდა საერო კრების დადგენილებას მაგნე მღვდლების განდევნის შესახებ. მეფისაგან არჩეულ მინისტრებს მას შემდეგ არაფერი უზრუნიათ, რომ მტრის დასახვედრად მოვემზადებანეთ; პირიქით, რომ წავიდნენ, ჯარისთვის პურის შესანახად აგებული მაღაზიები ცარიელი დაგვიტოვეს, და ციხე-სიმაგრენი დანგრეული; ახლად დანიშნულ აფიცრებს არ აცნობებდნენ მათს დანიშვნას, რომ დროზედ მისულიყვნენ თავ-თავიანთ ალაგებზედ და საერო კრებაზედ სამარცხვინოდა სტყუოდნენ, ყველაფერი მზადა გვაქვს, დაე მობრძანდნენო! იმდენი ხანი იძახეს, ყველაფერი მზადა გვაქვსო, ვიდრე მტერი კარს მოგვადგა და მაშინ კი სამსახურს თავი დაანებეს და საერო კრება იძულებული გახადეს გამოეცხადებინა, სამშობლო განსაცდელში არისო.

მიუხედავად ამისა ბევრს გულწრფელად სჯეროდა — ცილსასწამებენ, „ჩვენი კეთილი მეფე“ სამშობლოს ვერ უღალატებსო! მაგრამ ბრაუნშვეიგის მანიფესტმა ამ ურწმუნოთაც თვალი აუხილა და დაარწმუნა, რომ მეფე გვღალატობდა. მანიფესტი პირდაპირ აცხადებდა, პრუსიელები და ავსტრიელები იმიტომ მოვდივართ,

რომ მეფეს მეფობა და დიდებულთ ყოველი უპირატესობა დაეუბრუნოთ და აჯანყებული ყმანი დაეუმონავოთო. ამ სამარცხვინო, თავის თავხედობით საზარელმა, მანიფესტმა ცხადად დაუმტკიცა ყველას, რომ მეფენი და დიდებულნი ერთად იყენენ განურჩევლად ეროვნების და სარწმუნოებისა და სულ იმის ცდაში იყენენ, რომ ხალხი დამონავეებული ჰყოლოდათ. მაშინ კი თვალი გაახილა ყველამ და საერო კრებას ათასობით მისდიოდა თხოვნა, მეფე გადააყენეთო. საუკეთესო დეპუტატები იმ დროს აქეთ-იქით იყენენ წასულნი, რომ ხალხისთვის ჭეშმარიტება ეცნობინებინათ და ჯარში მოსურნენი გაეყვანათ; და ვინც პარიზში დარჩენილიყვნენ, ყურს არ უგდებდნენ ხალხის სამართლიან სურვილს; იმავე დროს, — ეს შემდეგში გავიგეთ, — ჟირონდელების მოთავეთ ჩუმიად მოლაპარაკება ჰქონდათ მეფესთან, რომელიც მინისტრების ალაგს იმათ ჰპირდებოდა.

რაკი ნახეს პარიზელებმა, რომ ჩვენი დეპუტატები სამშობლოს სახსნელად არას ზრუნავდნენ, დაადგინეს: „ხუთშაბათამდე, აგვისტოს 9, საღამოს 11 საათამდე კიდევ მოვუთმენთ საერო კრებას, რომ მეფე გადააყენოს; მაგრამ თუ მანამდეც არ შეიწყნარა კრებამ ხალხის თხოვნა და მეფე არ გადააყენა, იმავე დამეს, შუალამისას აიშლება ხალხი და თავის წადილს თითონვე განახორციელებს“. მოკლედ და ვაჟაკურად იყო გამოთქმული ხალხის მუქარა.

პასუხის მაგივრად საერო კრებამ ბრძანება მისცა სამხედრო მინისტრს, რაც კი პარიზში შეფიცულნი იმყოფებიან, ეხლავე სუასონის ბანაკში გაისტუმრეთო. იმავე დღეს საერო კრებამ 406 ხმით 224 წინააღმდეგ დაადგინა, ლაფაიეტს იმისთანა არა დაუშავებია-რა, რომ სამართალში იქმნას მიცემულიო.

მაშინ დანტონმა, კამილ დემულენმა, მარსელელ შეფიცულთა წინამძღოლმა ბარბარუმ, პანიმ, სერჟანმა, ტიონვილელმა მერლენმა, სანტერმა, ვესტერმანმა და სხვ. და სხვ. პატრიოტებმა, რომელნიც სიცოცხლესაც არ დაზოგავდნენ თავისუფლებისათვის, აშალეს ხალხი. დამე, 9 აგვისტოს შეიყარა ხალხი უბან-უბან და სამ-სამი კაცი ამოირჩია, რომელიც აღჭურვილი იქმნენ ყოველი უფლებით „საზოგადო საქმის“, ესე იგი რესპუბლიკის დასაცავად. შემდეგ ამისა დანტონმა აჯანყების ნიშნად ზარის რეკვა უბრძანა ყველა ეკლესიაში.

სასახლე სახვე იყო შევიცარიელებით და დიდებულებით და ძნელი ასაღები იყო. მეფე ლუი XVI კარგად იცოდა რომ ხალხს ველარ გაუმაგრდებოდა, რაკი სასახლეს აიღებდა, აღარავის დაინდობდა. ამიტომ მეფე სასახლეში ერთ წამსაც აღარ დარჩენილა და დედოფლით და ბატონიშვილით საჩქაროდ საერო კრებისკენ გაეშურა და თანაც

დაამუნათა: ჩემი მადლობელი უნდა იყვნეთ, რომ ხალხმა დღეს ღვთისაგან კურთხეულის სისხლში ხელი არ გაისვარაო.

ჩვენ უბრალო მომაკვდავნი ჩვენს დღეში არ ვიკადრებდით, განსაცდელში თავი დაგვევენებდინა ჩვენთვის თავგანწირულებისთვის და სამარცხენოდ გავპარულიყავით. მაგრამ რა!.. მეფე რის მეფეა, თუ კი ყველაფერი არ ეპატიება?

ის იყო მეფე გავიდა სასახლიდან და ხალხიც მივიდა და გარს შემოეხვია. წინ ვესტერმანი მიუძღვოდა. წასახლის ყოველ ფანჯარაში შევიცარიელები იყვნენ ჩასაფრებულნი და თოფს ესროდნენ ხალხს. ხალხმა ჯერ უკან დაიწია, მაგრამ მერე უფრო გაშმაგებული წამოვიდა და ეზოში შევიცარიელების ბინას ცეცხლი წაუქიდა. იქიდან სასახლეშიაც შეცვივდნენ და ცოცხალი არავინ გადარჩენიათ, საცა კი მოსამსახურე ან დიდებული შეხვდათ ვინმე. უბედურ შევიცარიელებს ფანჯრებიდან ისროდნენ, იქვე ეზოში, ბაღში და ქუჩაში ხოცავდნენ. 220 მარსელელი და ასი ბრეტანელი, შეფიცული ხუთასი შევიცარიელი, ათასი მილიციელი და ბევრი დიდებული და ხალხის შვილნი ეყარნენ მკვდრები გზებზედ, კიბეებზედ და თვით პალატებშიაც. მისი დიდებულება კი, იმის მაგივრად რომ თავის ერთგულ მოსამსახურეთ მიშველებოდა, იყო თავისთვის მიმალული საერო კრების დარბაზში იმ დროინდელ გაზეთებში ეწერა, ძალიან მადიანად მიიერთვა პურიო; მაგრამ არა მგონია, ეს მართალი იყოს; ნუ თუ შეიძლება ჩვენისთანა ყოველი ღირსებით აღსავსე ერს, ამისთანა საზიზღარი მეფე ჰყავდეს?

მანამ სასახლეში ეს ამბები იყო, პატრიოტები საერო კრებაში შეფის გადაყენებას ითხოვდნენ. მაგრამ ჩვენს დეპუტატებს, ვიდრე ამის პასუხს იტყოდნენ რასმე, ნებავდათ გაეგოთ, ვინ აჯობებდა: ხალხი თუ მილიციელები? ასე უფრო მშვიდობით გადარჩებოდნენ, რასაკვირველია.

ბოლოს შუადღის შემდეგ ხალხმა მიწასთან გაასწორა სასახლე და საერო კრებისკენ გაემართა. მაშინ კი დამორჩილდა ხალხის სურვილს საერო კრება და ეროვნულმა ვერნიომ — თავმჯდომარემ კრებისამ, გამოაცხადა, მეფე ღროებით გადაყენებულა არის, ჭადრე ახალი საერო კრება — კონვენტი — შეიყრებაო. შემდეგ ამისა კრებამ დაადგინა, — ახალი არჩევნები მოხდება მთელს საფრანგეთში, რომ 20 ენკენისთვის პარიზში ახალი საერო კრება — კონვენტი — გაიხსნასო.

ხსენებაც აღარ იყო ხმოსანის და უხმო მამულიშვილისა: ყოველ ფრანგს უფლება ჰქონდა აერჩია და არჩეულ ყოფილიყო მიუხედავად შეძლებისა. შოველი ყველასაგან ცნობილი იყო როგორადაც

თავგამოდებული მამულიშვილი და თავმჯდომარე ჩვენის კლუბისა. წავიკითხე თუ არა საერო კრების დადგენილება, მაშინვე ვიფიქრე, კონვენტის წევრად ჩვენებურები სწორედ შოველს აირჩევენ-მეთქი. მაგრამ მარიამობისთვის 10-დან ენკენისთვის 20-მდე მთელი ორმოცი დღე იყო და ამ ხნის განმავლობაში, როდესაც ყოველი მხრიდან მტერი გვემუქრებოდა, საფრანგეთის ბედი პარიზელი ხალხისაგან ამორჩეულ კამისართა ხელში იყო, რომელთაც „საზოგადო საქმისთვის“ პატრონობა უნდა გაეწიათ. სამშობლო საშინელ განსაცდელში იმყოფებოდა.

კიდევ კარგი, რომ შოველისაგან და მარგალიტასაგან ვიცოდი, რა კაცები იყვნენ რობესპიერი, ბაზირი, მერლენი, სერჟანი, სანტერი და სხვა სახელგანთქმული პატრიოტები და რაკი გაზეთში ამათი სახელები წავიკითხე ხალხის წინამძღოლთა შორის, გული დავიმშვიდე, რადგან ვიცოდი, რომ იმათ ხელში არც სამშობლოს უშავდა რაჲ და არც თავისუფლებას, ვიცოდი, რომ ჯერ ისინი და იმათთან ერთად ჩვენ უნდა ამოვებოცნეთ მტერს და მერმე საფრანგეთისთვის დაეკლო რაჲ.

II

ხალხის გამარჯვების შემდეგ საერო კრებამ, იმავე ხალხის სურვილისამებრ, უარპყო ბერ-მონოზანთა განსაკუთრებული ტანისამოხი: შემოიღო ცოლ-ქმართ გაყრა; ახალ წესსზედ გააწყო ერის მცველი ჯარი და დაადგინა ყოველი ფრანგის საველდებულო სამსახური მილიციაში; დაადგინა წვრილ-წვრილად, ფასის განაწილებით გაყიდვა საეკლესიო მამულებთან ერთად გახიზნულების მამულებისა, რომ გლეხკაცისთვის გაეადვილებინა მათი ყიდვა და ფასის ნელ-ნელა გადახდა. სასტიკი ბრძანება მისცა კონსტიტუციის მოწინააღმდეგე მღვდლებს და ბერებს: დღეიდან თხუთმეტი დღის განმავლობაში გადით საფრანგეთიდან, თორემ გვიანაში გაგისტუმრებთო. გარდა ამისა დაადგინა გახიზნულთა დედ-მამის მძევლად ყოლა ომის გათავებამდე და სამართალში მიცემა ყველასი, ვინც ხალხზედ იარაღი იხმარა ან იხმარებდა. წარმოიდგინეთ, როგორ გაახარებდნენ ეს კანონები პატრიოტებს. აღფრთოვანებული ვიყავით ახალ-ახალი იმედებით და მხიარულად გავიძახოდით: რევოლუციამ გაიმარჯვა! ჯობა ქვეყნის მოღალატეებსაო!

იმავე დროს ხმა გავარდა, ლათაიეტი, არდენში მყოფი ჯარების წინამძღოლი, უარყოფს 10 მარიამობისთვის საერო კრების დადგენილებასო. ჩრდილოეთით უკვე შემოგვესია მტერი; ვანდელები, დო-

დებულების და ბერების წინამძღოლობით, პრუსიელებსდა ელიან, რომ აჯანყდნენ და უქანიდან დაგვეცნენო... სიხარული და მწუხარება ხომ განუყრელნი ყოფილან ყოველთვის!

შემოდგომა ახლო იყო. რეინზედ საშინელი ბურუსი იდგა. კერძის ჭაობი ხომ სულ ღრუბლით იყო მოცული. ყოველ დღე პატარა-პატარა რაზმები გადიოდნენ მტრის დასაზვერავად. გლეხკაცები ამბობდნენ ხოლმე ბაზრობა დღეს, პრუსიელები და ავსტრიელები ტონვილისკენ მიეშურებიან და ერთი რაზმი კი ქალაქს გარს უვლის, რომ ლორენში გადავიდესო. ისიც ვიცოდით, რომ საერო კრებისაგან გამოგზავნილი კაცები ათვალეიერებდნენ ვისსემბურგის სიმაგრეებს და ერთი მათგანი ინჟენერი კარნო, ახალ ციხეებს აშენებინებდა.

ეს რომ გაიგეს, დარაჯიც მეტი გაიყვანეს. ზარბაზნები შეამზადეს. დღე და დამ მტრის გზას გავცქეროდით, თუმცა ბურუსის გამო ბევრი არა ჩანდა რა. ხანდახან მტრის ულანები გამოჩნდებოდნენ შორს, შორს, თითქო ავსტრიელების ჯარების მოახლოვებას გვაცნობებდნენ: აი, მოვდივართ! დღეს-ხვალ მანდ ვიქნებითო!

ჩვენც ველოდით.

ერთ დილას დარაჯად ვიყავი ციხის კართან. ის იყო დასაზვერავად გასულმა რაზმმა საქონელი მორეკა და კარი ჯერ ღია გვქონდა. იმ ორი დღის წინათ სამხედრო ტანისამოსი დაგვირიაგეს. თუმცა თბილი ტანისამოსა გვეცვა, მაინც ძალიან გვეცივოდა: ამხანაგები იქვე ცეცხლს შემოსხდომოდნენ და თბებოდნენ. ზოგი ჩიბუხის წვეით ბოლთას სცემდა რაღაც ფიქრებით გატაცებული. ვისაც არ უნახავს, ვერც კი წარმოიდგენს, რა საშინელებაა გარნიზონად ყოფნა სადმე ციხეში, მაგრამ ჩვენდა საბედნიეროდ დიდი ხანი აღარ ვყოფილვართ ლინდაუში. ჩვენდა საბედნიეროდ, რადგან ხუთი-ექვსი წლის შემდეგ აღამიანის ნასახიცი აღარ შერჩება ხოლმე კაცს გარნიზონულ ცხოვრებისაგან.

ცხრა საათი იქნებოდა, როდესაც იმპტლინგენის მხრივ უცბად ზარბაზნის ხმა გაისმა. ჯერ ერთი გავარდა, მერე მეორე და მიჰყვა ისე — დიდი ხანი აღარ შეწყვეტილა. ყველანი გარეთ გამოვარდნენ. სულგანაბულნი ვიყურებოდით საზღვრისაკენ, გვეგონა საცაა მტერი გამოჩნდებაო, — მაგრამ ერთმა მოხუცებულმა, ჯარში დაბერებულმა და სამხედრო საქმეში გამოცდილმა ჯარისკაცმა ივანე სომმა აგვიხსნა, მტერი ნუ გგონიათ, ემაგრე ჩვენი ჯარები ისვრიან ზარბაზანს: ალბათ მარშალი ან მეფის გვარისა მისულა ვინმე ჯარში და პატივისცემის ნიშნად ზარბაზნით დახვედრიანო. არცა სცდებოდა ჩვენი მოხუცებული ამხანაგი; ოღონდ ზარბაზნის სროლით, რო-

გორც ცოტა ხანს უკან გავიგეთ, ჩვენი ჯარი საერო კრებისაგან ჯარების დასათვალისწინებლად გამოგზავნილ კამისრებს დაუხვდა, რომელთაც თან ახლდათ გენერალი კუსტენი.

შუადღისას ჩვენს ალაგას დარაჯად სხვა დააყენეს. ჩვენც სიხარულით გავეშურეთ ქალაქისაკენ, რომ კამისრები გვენახა. ჩვენ რომ მივედით, ისინი სამამასახლისოში იყვნენ და ჩვენი ჯარის ყველა უფროსები მხედრულად მორთულ-მოკაზმულები იქ მისულიყვნენ მათსანახავად.

ცული ამბები მოეტანა იმ დღეს დეპეშას: ლაფაიეტს უნდოდა პარიზზე წასულიყო, რომ იაკობელები ამოეჟლიტა და მეფე ისევ თავის ტახტზედ აებრძანებინა; „მთიულთა“ წინადადებით გატაცებულს საერო კრებას დაედგინა — ლაფაიეტი სამშობლოს მოღალატეაო და ისიც ბელგიაში გაქცეულიყო. ჩრდილოეთის ჯარს იმის ალაგას დიუმურიე წინამძღოლობდა. მეორე ჯარის წინამძღოლობა კელლერმანს უნდა მიეღო და შალონის ჯარისა — ლიუკენერს. მტერი უკვე დაძრულიყო და საზღვარს გადმოსულიყო. სირკში ბევრი პატრიოტები დაეხვრიტა და ახლა ლონგვის მისდგომოდა; ვანდელეები აჯანყებულიყვნენ... ერთი სიტყვით, სულ ყველას ჩვენზედ მოეცალა: გარედან მტერს და შინ ღალატს და სამოქალაქო ბრძოლას.

ადვილი წარმოსადგენია, რა ყოფაში ჩავგავადებდა ეს ამბები. როგორც ხედავთ, ტყუილად არ გვემუქრებოდნენ თავადი არტუა, გენერალი ბულიე და ეპისკოპოსები. ჩვენს დასაღუპავად აღარას ზოგავდნენ და ჩვენც ერთილა დაგვრჩენოდა: გამარჯვება ან სიკვდილი!

გული მაინც არ გაგვიტეხია. მეტადრე კამისრებმა გავგამხნევეს. თავიანთი მიუდგომლობით. ყველა აფიცრები დააფიცეს და რადგან ორმა რაზმის უფროსმა — თავადმა ბროლიმ და ბატონმა ვილანტრუამ ფიცი არ ინებეს, მაშინვე წაართვეს თანამდებობა და მათ მაგივრად ჰუმარა და კუსტარი ჩააყენეს; ამათ კი ყველა იცნობდა როგორც გულწრფელ პატრიოტებს და თავგანწირულ მამულიშვილებს. ეს ყველაფერი მთელი რაზმის თვალწინ მოხდა და ესეცა კმაროდა, რომ ყველას გვეგრძნო ძლიერება იმ ერისა, რომლის სახელით სამი კამისარი — სამივე უბრალო ხალხის შვილი, ასე სასტიკად სჯადა თავის ორგულთ. უნდა გენახათ აფიცრების სახის გამომეცყველება, რომ დამშვიდებით გეტყვათ: ახლა კი დარწმუნდნენ, რომ ძლიერება მართო ხალხის ხელთ არის და ყველანი ალტაცებით შეჰფიცვენ ერთგულებასაო! აფიცრების შემდეგ ათისთავეები და ჯარისკაცები დაგვაფიცეს და ჩემი თქმა რა საჭიროა, თქვენ უკეთ იცით რა სიხარულით დავიფიცავდით ყველანი.

ორ საათზედ მოედანზედ გაგვიყვანეს, რადგან კამისრებს ჯარების დათვალიერება უნდოდათ. იმისთანა სიხარულით ვიძახდით: თავისუფალ ერს გაუმარჯოს კამისრებს გაუმარჯოთ! პარიზელ ხალხს გაუმარჯოს რომ ჩვენს პატრონს სამშობლოს შიში არაფრისა უნდა ჰქონოდა.

ეხლაც თვალწინ მიდგას დიდი თვალგადაუწვდენელი მოედანი და ზედ ყველგან ჯარები და ჯარები. ზედ შუაზედ კარნო და პრიორი ინჟენერების ოფიცრის ტანისამოსით და რიტტერი უშველებელი ხმლით და სამფერი სარტყელით — ხალხის შვილნი, ხალხისაგან არჩეულნი, რომელთაც რაზმის უფროსნი და გენერლები ასეთი პატივისცემით ექცეოდნენ.

ისინი კი ყურადღებასაც არ აქცევდნენ ამ მოწიწებითი პატივისცემას. იმათ მარტო ის უნდოდათ გაეგოთ, უბრალო ჯარისკაცს ხომ არა შიან, ხომ არა უჭირს რაო? გულმოდგინედ უსმენდნენ ყოველ ჯარისკაცს და ყველა საჩივარს წიგნში ინიშნავდნენ.

ყველაზედ ძლიერი შთაბეჭდილება ჩემზედ კარნომ მოახდინა, როდესაც ბატალიონის წინ შედგა და მაღალი ხმით დაგვიძახა:

— დაიფიცეთ, რომ ერთგულად ემსახურებით თავისუფლებას და თანასწორობას! დაიფიცეთ, რომ ერთიანად გაწყდებით და მტერს კი არ გაახარებთ!

— ვფიცავთ! — შევძახეთ. ყველამ და ცრემლი წაგვსკდა. მომაკვდავივით ფერი წაგვსლოდა, ისე გვიცემდა გული.

ვიცოდით რასაც ვფიცავდით! ვიცოდით, რომ ჩვენი და ჩვენს მახლობელთა სიცოცხლე და ბედნიერება ჩვენს გამარჯვებაზედ იყო დამოკიდებული. ვიცოდით, რომ სამშობლოს თავისუფლება და დიდება ჩვენზედ იყო დამოკიდებული.

მაგრამ აქ უნდა ერთი რამ გიამბოთ, რაც მარტო მე შემეხება და რაც ცხადად დაგანახებთ, რა განწყობილება იყო მაშინ ხალხისა და მის წარმომადგენელთა შორის.

რვა საათზედ გათავდა ჯარის სინჯვა და ბინისკენ გავემართეთ; თან ვყვიროდით: თავისუფლებას გაუმარჯოს! შორს ჩვენგან, მოღალატე დიდებულნი მთელი ქალაქი გარეთ იყო და ყველგან ამგვარი ყვირილი და სიმღერა ისმოდა. მივედით თუ არა ბინაზედ, ვახშამი გიახელით და იმ აფიცრებზედ გავაბით ლაპარაკი, რომელთაც ერისაღმე ერთგულების ფიცია არ ინდომეს და ასე სამართლიანად დასჯილ იქმნენ კამისრებისაგან. იმ ლაპარაკში რომ ვიყავით, შემოვიდა ათისთავი და თქვა, საერო კრების კამისარს მიშელ ბასტიენის ნახვა უნდაო. მე, რასაკვირველია, ხუმრობად მივიღე; ამხანაგებს საცალად არ ეყოთ ეს ამბავი. მაგრამ ათისთავი მაინც თავისას იძახ-

და და მარწმუნებდა, კამისრისაგან შენს წასაყვანად გამოგზავნილ ჰუსარი კარებში დგას და გელისო. რა გაეწყობოდა, ხმალი შემოვიკარ, ქუდი დავიხურე და გავწვიე.

დარწმუნებული ვიყავი, რომ სცდებოდნენ და კამისარი სხვა ვისმე ბასტიენს იბარებდა. სად არ არიან ბასტიენები გაფანტულნი? მაგრამ გარეთ მართლა ჰუსარა დამხვდა ცხენით და ბრძანება მაჩვენა, რომელშიაც ჩემი თვალით წავეკითხე: მიშელ ბასტიენი, თავის ნებით გასული, მთიელთა პირველი ბატალიონის ჯარისკაციო. წავედით. ის ცხენით — ცალი თვალი ჩემკენა ჰქონდა; ალბად ეშინოდა — დააშავებდა რასმე და ვაი თუ გამეპაროსო. მე კიდევ ფეხით მივდევი ჩქარი ნაბიჯით.

ჯერ გონებაზედ ვერ მოვსულიყავ. აგერ, ეზოში შევედით, რომელიც სავეს იყო ჰუსარებით; აგერ, სახლში შემიყვანეს, მშვენივრად გაჩაღებულ სახლში და მე კი ისევ გაშტერებული ვიყავი.

მორიგმა ოფიცერმა წაიკითხა ბრძანება და მიბრძანა, პირველ სართულში ადიო. ერთ უშველებელ ტალანში შევედი, სადაც ბუზივით ირეოდნენ მოსამსახურენი პურით, ღვინით და ხორციით: გენერალ კუსტენს დაპატიჟებული ჰყავდა კამისრები და მათთან ერთად ყველა აფიცრებიც. ჩვენს ჯარში კუსტენისთანად არავის უყვარდა დროს ტარება: დიდი გვარიშვილი იყო და ძალიან იცოდა მოლხენა.

ერთმა მოსამსახურემ იუცხოვა ჩემი იქ ყოფნა და, — აქ რას აკეთებო? — მომვარდა. რომ ვუთხარი, კამისარმა დამიბარა-მეთქი, მხარმარცხნივ ერთი მშვენიერი ოთახის კარი გამიღო და მიმიპატიჟა:

— მიბრძანდით!

ერთ კარგად მოზრდილ ოთახში შევედი. შუა ოთახში მრგვალი მაგიდა იდგა, ზედ ანთებული ლამპარი. მარჯვნივ კარი ღია იყო და მეორე ოთახიდან მხიარული ხმაურობა გამოდიოდა და დანა-ჩანგლის წყარუნნი. არ გასულა ერთი წუთი, მეორე ოთახიდან გამოვადაკამისარი კარნო თავისი სამფერი სარტყელით და ტკბილად მკითხა:

— თქვენა ბრძანდებით მიშელ ბასტიენი, შოველის სასაძო?

— დიად, ბატონო, — ვუპასუხე შემკრთალი ხმით.

— ნუ გაიკვირვებთ, — მითხრა კარნომ, — შოველი და მე მეგობრები ვართ. რამდენჯერ ვყოფილვარ იმასთან სადილად ბულუას ქუჩაზე. თქვენს დანიშნულსაც კარგად ვიცნობ და კარგი ქალიც არის. აი, ეს გამომატანა თქვენთან.

ჯიბიდან წერილი ამოიღო და მომცა. ისეთი აღელვებული ვიყავი, რომ მაღლობაც კი ველარ გადავუხადე. ისიც გაჩუმებული მიყურებდა და მერე მკითხა:

— უბრალო ჯარისკაცი ყოფილხართ. შოველმა კი დამარწმუნ-

ნა, არც განათლება აქლია და არც ცოდნაო. რატომ ათისთავად არ დაგნიშნეს?

ცეცხლივით ავენთე და მოვახსენე:

— რომ მომენდომებინა, ჩვენებურები ათისთავად მე ამირჩევენ. მაგრამ ჩემზედ უფროსნი — ძველი ჯარისკაცნიც — ბევრნი გახლდნენ. ისინი უფრო გამოცდილები გახლავან და ბრძოლაში უფრო კარგად გავვიძლევიან, ვიდრე ჩემისთანა გამოუცდელი.

— მაშ უარი განაცხადეთ?

— დიად. მე ჯარში ყოფნას არ ვაპირებ და თუ ჯარში გახლავართ, მარტო იმიტომ რომ გაჭირვებულ ქვეყანას დაეხმარებოდი. გათავდება თუ არა ომი, მეც შინ გიახლებით და ისევ ჩემს ხელობას დავიწყობ... მკედელი გახლავართ.

დამაცქერდა და ღიმილით მითხრა:

— ყოჩაღ ბიჭო! შოველი ძალიან გაქებთ და არცა სცდება. როგორცა ვხედავ. აქედან ჩვენ ისევ ფალსბურგზედ უნდა გავიაროთ. მოვიკითხავ თქვენ მაგიერ და ჩვენ საუბარსაც ვუამბობ. მაგრამ, მგონი როგორ გეჩქარებათ თქვენი დანიშნულის წერილის წაკითხვა და მე კი ლაპარაკი გავიბით! ნახვამდის!

ხელი ჩამომართვა და გავიდა. ჩემს სიხარულს, ჩემს აღტაცებას საზღვარი აღარა ჰქონდა. მივდიოდი და ვფიქრობდი:

— ნეტავი კი შემთხვევა მომცეს ბედმა, რომ კარნოს სამსახური გავუწიო! თუნდა ტყვედ ჩავარდეს, მაგალითად, და მე კიდევ იმის დასახსნელად შევევარდე მტრის ბანაკში! მაინც გამოვიტაცებდი, თუნდა სულ ნაკუწ-ნაკუწად ვექციე!

ბევრი კიდევ სხვა ამისთანა სისულელე მიტრიალებდა თავში. ხომ მოგეხსენებათ, სიყმაწვილის ქარები! ამ ოცნებით გართული ავედი ჩვენს ოთახში. ჩემს ამხანაგებს ყველას ეძინათ. თუმცა სანათის ანთება აკრძალული იყო, მაინც ავანთე სანთელი და ჩემი მარგალიტას წერილს კითხვა დავიწყე. ათისთავს ეძინა და მაშასადამე ვერავინ დამინახავდა.

ბევრმა წყალმა ჩაიარა მას შემდეგ, ბევრი რამ შეიცვალა. ყმაწვილი ვიყავ, ძალღონით და სიყვარულით აღსავსე ვიყავ და ბავშვივით ავტირდი, როდესაც მარგალიტას წერილი წავიკითხე და გავიგე, როგორ აწუხებდა ჩვენი დაშორება. ეს 1792 წ. იყო, აგვისტოს დამლევს. და დღეს კი... დღესაც ხომ მიყვარს ჩემი მარგალიტა, მაგრამ ის სიყვარული აღარ არის; თითქო სიზმარი იყოო, ისე გაჰქრა ის დღოცვილი, ალბად სიყმაწვილეს გაჰყვა თან. დიად, ხომ დიდი ხანია მას შემდეგ და თუ გნებავთ ზეპირად მოგახსენებთ იმ წერილს. ღმერთო, რამდენჯერ გადამიკითხავს ჩემს ჯარიანობაში! ბოლოს და

პოლოს ისე დაიგლიჯა, რომ ნაკუწ-ნაკუწად იქცა და მე კი მაინც გავშლიდი ხოლმე, საცა კი მოვახელებდი, წყობისად დავალაგებდი და კითხვას დავიწყებდი. ზეპირად ვიცოდა, მაგრამ ისე როგორ წავიკითხავდი, რომ ახალი, ჯერ შეუმჩნეველი, სიტყობოება არა მუპოვა რა.

მაგრამ სიყვარულის ალერსიანი სიტყვები იმისთანა რამ არის, რომ ყველა გულის გულში იმაღავს, სხვამ არავინ გამიგონოსო... მაინაჩემის ამბავსა მწერდა, ყოველ კვირა ჩვენსა არის სადილადაო და პატარა სტეფანესას იწერებოდა — წიგნის მალაზიაში გვინდა მიეცეთ შეგირდადო. სასოფლო და საპაზრო კრებები უკვე იყო და ჩვენს მაზრაში ყველაზედ მეტი ხმა შოველს მისცეს, ასე რომ კონვენტის წევრად უთუოდ შოველი იქნება და რადგან მე პარიზს ღარ გავყვები და ჩვენს საქმეს — წიგნის მალაზიას და ბიბლიოთეკას — მარტოკა ვერ გავუძღვები, პატარა სტეფანე ძალიან გამომადგება, რადგან ძალიან კარგი ბიჭია, გონებაგახსნილია, სწავლის მოსურნე და ამით ძალიან შემაყვარა თავიო.

შემდეგ იწერებოდა, რა კარგად მიიღეს ფალსბურგელებმა კამისრები. ჯარები რომ დაათვალიერეს, მერე ჩვენს კლუბში ბრძანდებოდნენ, რომ თავისუფლების და თანასწორობის მომხრენი გავცნოთ. მთელი ქალაქი აღტაცებული იყო 10 მარიაამობისთვის საქმით; ფალსბურგის სამამასახლისოდან 300 მანეთი ერთხელ გაუგზავნეს საერო კრებას ომის ხარჯად და 400 კიდევ მერე. კამისრებმა სახალხოდ მადლობა გამოუცხადეს შოველს კეთილი მიმართულებისთვის, რომელზედაც მან დაამყარა არა მარტო ჩვენი კლუბი, არამედ მთელი ჩვენი მაზრაც.

აა, რაებს იწერებოდა ჩემი მარგალიტა. წერილის ბოლოში შოველს მოეწერა მოკითხვა და დარიგება: შენ შენი საქმე და ვალდებულება კეთალსინდისიერად ასრულე და დანარჩენისა... ღმერთი მოწყალეა, ეს ომი ბევრა-ბევრი ექვს თვეზედ გათავდება, რადგან მტერი ვერ გაგვიძღვებს და შერცხვენილი გაემართება, საიდანაც მობრძანებულაო. ამასა მწერდა შოველი და ის კი ავიწყდებოდა, რომ კლუბში სულ სხვას გვიმტკიცებდა: ხანგრძლივი იქნება ეს ომი და რამდენიმე წელიწადი გასტანსო. არა, ავიწყდებოდა კი არა, ალბად იმიტომ მწერდა ამას, რომ გავემხნევიდინე. მაგრამ შე გამხნევება არ მინდოდა: ძალიან კარგად ვიცოდი, რომ ომი მაშინ გათავდებოდა, როდესაც ან ერთი მხარის ჯარი ამოწყდებოდა, ან შეორისა.

მეორე დღეს დღით კამისრები ბელფორასკენ გაემგზავრნენ, ელზასში.

ყველგან მტრის პატარ-პატარა რაზმები დადიოდნენ გზებისა და ჩვენი ჯარების დასაზვერად. დადიოდნენ და ისე იქცეოდნენ, თითქო ჯარი კი არა, ყაჩაღები არიანო: ვისაც მოერეოდნენ სძარცვავდნენ და ჰკლავდნენ, სოფლებს იკლებდნენ. ხანდახან ისე მოგვიახლოვდებოდნენ, რომ ადვილად ვარჩევდათ იმათ წითელ წამოსასხამს და ტყავის ქუდს; მოგვიახლოვდებოდნენ, დამბაჩას დაგვახლიდნენ და საშინელი ყაჟინით უკანვე მიაქროლებდნენ ცხენებს.

ეს გახლდათ ავსტრიელი თითქმის ველურა ჯარი, რომელთაც „მხეცები“ ვუწოდეთ; ჭუჭყიანები, ტურტლიანები, სასხლით გაუმადლარნი ოღონდ კი ხალხი ეხოცნათ, და იმათთვის სულ ერთი იყო, ქალი და კაცი, მოხუცი და უსუსური ბავშვი.

ლინდაუს გარშემო იდგნენ „მხეცები“ და თვალყურს გვადევნებდნენ. ხანდახან ზარბაზნის ხმა მოისმოდა, მაგრამ მტრის ჯარი კი არსადა ჩანდა.

მტრის უმთავრესი ჯარების გზა ძალიან შორს იყო ჩვენგან. ამბავი მოგვდიოდა, ლორენისკენ შეუწყვეტლივა დის მტრის ჯარი თავის ზარბაზნებით და სურსათითაო.

ჩვენ კი ვისხედით ჩვენს სიმაგრეებში და სევდით გვევსებოდა გული. რისი მაქინისნი ვიყავით, თუ კი სადღაც მიყრუებულ ციხეში დაგვაბანდებდნენ და ბრძოლას არ გვაღირებდნენ!

ღარი მაინც ყოფილიყო, ცოტათი მოაღებდა გული. მოღრუბლული, მოქურუშებული იყო ცა და თავბედს გვაწყველინებდა. წვიმდა და ჩვენს თავს ნუგეშსა ვცემდით, ჰაი თუ დასველდებიან პრუსიელებიო! ორჯერ თუ სამჯერ მოსალაპარაკებლად კაცი მოგვიგზავნეს — ერთი აფიცერი და ერთიც ჯარისკაცი, რომელიც შორადანვე საყვირით გვატყობანებდა, სამტროდ არ მოვდივარო. ჩვენებიც ეგებებოდნენ, აფიცერს თვალებს აუხვევდნენ და ციხის უფროსთან მიიყვანდნენ. ნეტავი, რა ჰქონდათ სათხოვარი, ან მოსალაპარაკებელი? ამისი ციხის უფროსის და საბჭოს გარდა არავინ რა იცოდა.

ერთ დილას, ენკენისთვე იყო, ხმა გავარდა, ალბერტსვეილერის ციხესთან მიუჭენებია ცხენი ერთ „მხეცს“ და დაუყვირია:

— ლონგვი ავიღეთ!.. ვერდენი დაგვნებდა!.. მთელი გარნიზონი ამაზედ ლაპარაკობდა.

კუსტენმა ცოტა რამ ჰუსარები გაიყოლა და ციხიდან გავიდა, რომ ვისემბურგის სიმაგრეები დაეთვალიერებინა. ჰუსარები ისევ მალე დაბრუნდნენ და ამბავი მოიტანეს, რვა რაზმი გაისტუმრეს საჩქაროდ ქ. მეცისკენო. საშინლად შევწუხდათ ყველანი: ალბად ძალიან დავმარცხებულვართ, რომ გარნიზონიდან ჯარები გაჰყავთ

და იმოდენა ქალაქს ღვთის ანაბარად სტოვებენო. მიუხედავად ამ გარემოებისა პატრიოტი მოქალაქენი ძალიან გულმაგრად იყვნენ, ალზასს შიში არაფრისა აქვს! ალზასი ისე არ წახდება, რომ ლოტერბურგის ხეობა ვერ გაამაგროსო... გერმანელებმა ან ფიშბახის და დაქნის მინდორი უნდა გაიარონ, ან არა და ბინვალდის ტყეში შევიდნენ... ნეტავ არ იქნება გაბედონ და ტყეში შევიდნენ! ისე ამოსწყვეტენ ჩვენი ჯარები, რომ ამბის წამლებიც არ გადაჩქეთ! ალშტატის გზაზე წამოვლენ და იქ იმისთანა ციხე დახვდებით, რომ 50 ათასიც რომ იყვნენ, ვერას დააკლდებიან!

აი, რას ლაპარაკობდნენ ლინდაუს ლუდხანებში. ისე იყვნენ მოქალაქენი და ჯარისკაცნი, როგორც ძმანი. მაგრამ რა თუმცა გულს ვიმაგრებდით, ჩვენი საფიქრებელი სულ ის იყო, ვაი თუ მტერმა პარიზისკენ გზა გაიგნოს და, ჩვენ ტყუილუბრალოდ ველოდნეთ ლინდაუში ღვთისა და ქვეყნის უსარგებლოდაო ღმერთო, რა საშინელი სურათი წარმომიდგებოდა ხოლმე მე, როცა ეს ფიქრი გამიტაცებდა!

ჩვენ ოთახში მარტო ჩვენი მოხუცებული ამხანაგი იყო გულდამშვიდებული და ჩვენც სულ იმას ჩაგვიჩინებდა, ტყუილად სწუხართ, მტერი ვერას დაგვაკლებსო. ერთხელ ძალიან ჩაფიქრებული რომ ნახა ამხანაგები და ველარა გააწყო რა, შეუტია:

— შემოვიდნენ, ვეჟო, თქვენ რა გაწუხებთ? ნეტავი ღმერთი გაუწყრეთ და სულ ერთიანად გადმოვიდნენ ჩვენს საზღვრებს. ნეტავი! უკანდან დავეცნეთ და, ცალი უღვაში მამპარსეთ, თუ ერთად ერთიც არის გადაგვიჩრჩეს ცოცხალი!

დიად, ვიყავით ისე და სულ იმასა ვნატრობდით, ნეტავი ბრძოლა გვაჩვენაო. ერთ დილას ხმა გავარდა, მტრის ჯარის სვლა შეწყდაო.. საფრანგეთში უკვე 180 ათასი პრუსიელი და ავსტრიელი იყო. ჩვენს გარშემოც აღარავინა ჩანდა, თვით „მხეცებიც“ კი უმთავრესს ჯარს დასდევნებოდნენ. იმ დღეს დიდძალი გლეხკაცობა მოუახლოვდა სიმაგრეებს, კაცი თუ ქალი; ზოგს რა წამოელო გასასყიდად და ზოგს რა კარი გაუღეს და ქალაქში შემოიყვანეს. იმათ გვიამბეს, თავადი ჰონენლოე კირშბერგში მამასახლისთან იდგა; თავისი ჯარები ახლა ტიონვილს შემოარტყა და ზარბაზანი დაუშინა; ტიონვილელი გარნაზონი ხშირად გამოდის და ებრძვის ავსტრიელებს. აქ რომ იყვნენ, ავსტრიელებმა ძალად გაგვატანინეს ურმები და იმოდენა ჯარის ბარგი და სურსათი ტიონვალამდე გვაზიდვინეს. ეს ამბები იქ გავიგეთ და იმის იქით რა ხდება, რა მოგახსენოთო.

მაშ ლოდინი, ჯერ ისევ ლოდინი!

ვიყავით ისე გულხელდაკრეფილნი და ჩვენს რიგს ველოდით,

იქნება ღმერთმა მოგვხედოს და ჩვენც გაგვიყვანონ საბრძოლველად. 25 ენკენისთვის სტრასბურგიდან და ნანსიდან ფოსტა მოვიდა და მთელი ქალაქი გაზეთებით და წერილებით გაივსო. მაშინ დაწერილებით გავიგეთ, რაც კი იმ სამი კვირის განმავლობაში მომხდარიყო: ლონგვი ისე დაენებებინათ მტრისთვის მცხოვრებთ, რომ თოფიც არ დაეცალათ, თუმცა იქ მყოფ ჯარებს ძალიან თურმე უნდოდოდათ ბრძოლა; ვერდენიც მცხოვრებთა სურვილისამებრ დანებებოდა მტერს, რადგან ვერდენელი ქალ-რძალი თაიგულებით გაგებებოდა პრუსიის მეფეს; ვერდენელ ჯარის უფროსს ბორეპერს თავი მოეკლა, რომ სამარცხვინო ოქმზედ ხელი არ მოეწერა; გაზეთებიდანვე გავიგეთ დიუმურიესაგან არგონის ხეობის გამაგრება და დაკევა; კელლერმანისაგან შალონისკენ წასვლა მტრის დასახვედრად; პარიზელი ხალხის აშლა, როდესაც გაეგოთ მოღალატეთაგან უბრძოლველად დანებება ქალაქებისა და ბრაუნ შვეიციის მუქარა: პატრიოტები უნდა ამოეწყვიტოვო. გაზეთებიდანვე გავიგეთ ციხეებში დიდებულების და კონსტიტუციის მოწინააღმდეგე მღვდლებისა და ბერების ამოხოცვა; ვალმის ბრძოლა; პრუსიელების დამარცხება და კონვენტის პირველი კრება, რომელმაც საფრანგეთი ერთხმად რესპუბლიკად აღიარა 23 ენკენისთვის*).

დიდი ამბები ხდებოდა საფრანგეთში და ჩვენ კი ვისხედით საღ-

*) 21 ენკენისთვის 1792 წ. დაიწყო კონვენტმა მოქმედება და მესამე დღეს 23 ენკენისთვის საფრანგეთი „ერთ და განუყოფელ რესპუბლიკად“ გამოაცხადა. კონვენტის წევრნი პირველშივე სამ ნაწილად გაიყვნენ. მარჯვენა გაიდანენ ეირონდელები — ვერნიო, ფილოსოფოსი კონდორსე, გაღე და სხვ. მარცხნივ მთიულნი: დანტონი, რობესპიერი, მარატი, კამილ დემულენი, ბაზირი, ლეჟანდრი, მერლენ ტიონვილელი, კარნო და სხვ. ამ ორ პარტიის შუა იმყოფებოდა „ეკაე“. რომელიც თავისთავად არას წარმოადგენდა და ორში იმას მიემხრობოდა. რომელიც მეტ ძალას გამოიჩინდა. როგორც ეირონდელებს, ისე მთიულთ გაგიყებით უყვარდათ სამშობლო და ერთადერთი მათი წადილი, რომლისთვისაც სიცოცხლესაც კი არა ზოგავდნენ, სამშობლოს კეთილდღეობა იყო. მაგრამ სიძულვილით დაბრმავებულთ, ერთმანეთისა აღარა სწამდათ რა და ყოველგვარს ცილსა სწამებდნენ. მთიულნი ეირონდელებს ფედერალისტობას აბრალებდნენ: თქვენ ვინდათ საფრანგეთი ოთხმოცდასამ პატარ-პატარა რესპუბლიკად გაყოთო. ეირონდელები რობესპიერს. დანტონს და მარატს დიქტატორობის სურვილსა სწამებდნენ: თქვენ ვინდათ მთელი საფრანგეთის ცხოვრებას თქვენ განაგებდეთ ეგ სამი კაციო. „მოვეყდები და სამძაბისს კი არას ვიზამო“, — იძახდა ეირონდელი ვერნიო: — „ყველა ვიზამ და სამშობლოს ვიხსნი... დიდი რამ მენალეუბა, თუ ქვეყნისაგან გამობილი იქნება ჩემი სახელიო“ — იძახდა დანტონი.

10 მარიაპოლისთვის არჩეული პარიზელი ხალხის კამისრები, რომელთაც დავალებოლი ჰქონდათ ყოველი ღონისძიება ეხმარათ „საზოგადო საქმის“, ესე იგი რესპუბლიკის დასაცველად. ჯერ კიდევ არსებობდა (კომუნა) და ხშირად მეტ

დაც ლინდაუში და მტერი კი არსად ჩანდა, რომ იმას მაინც შეებრძოლებოდით და ჯავრი ამოგვეყარა. ბრაზი გვერეოდა, უსაქმურობა გვეკლავდა და ხმამალა ვჩიოდით:

— ნეტავი რისთვის ვყევართ აქ? იქნება უნდათ ხავსი მოგვეკიდონი ხომ დამარცხებულან პრუსიელები და რაღას უყურებენ? რატომ გზის შესაკრავად არ გავვიყვანენ?

ზოგნი კიდეც იმ აზრისანი იყვნენ, რომ მანამ დრო გვაქვს და რეინის პირას მტრის მალაზიები — სურსათით და იარაღით სავსე მა-

გვლენა ჰქონდა, ვიდრე თვით კონვენტს. პარიზელი ხალხის აჩრეულნი კომუნის წევრნი ზშირად ერეოდნენ კონვენტის საქმეების სჯაში და თავისებურ მიმართულებას აძლევდნენ მის დადგენილებას. ეროვნულეუბი ჯერ კონვენტის გახსნამდე წინააღმდეგნი იყვნენ პარიზელი ხალხისა, რომელმაც თავის წარმომადგენლად სულ მთიულნი აიარჩია — რობესპიერი, დანტონი, კამილ დემულენი, მარატი, რობესპიერი უმცროსი, სერჟანი და სხვანი და არც ერთი ეროვნულეუი. გარდა ამისა 10 აგვისტოს ხალხის აშლა, სასახლის აღება და მეფის დაპატიმრება ეროვნულეუბის შეხედულებით მომავკედინებელი ცოდვა იყო, რომლის სასჯელი ერთნაირად უნდა ეზიდნათ როგორც ხალხის მოთავეთ — დანტონს, მარატს და სხვათ, ისე თვით პარიზელ ხალხსაც, რომელსაც იმდენად უნდობლად უყურებდნენ ეროვნულეუბი. რომ საეროდ გამოაცხადეს: რადგან შეიძლება ერთ მშვენიერ დილას პარიზელმა ხალხმა სულ ერთიანად დაგვხოცოს ეროვნულეუბი და მართებლობა თვითონ დაინარჩუნოს, საქირაა ესლავე მოვიწყვიოთ კონვენტის წევრთა კანდიდატები და ჩვენს სამაგეროდ მზად ვიყოლიოთ. საფრანგეთის ყველა უბედურება იგინი დანტონს, რობესპიერს და მარატს აბრალებდნენ და მათთან ერთად პარიზელ ხალხს.

დანტონი ბევრს ეცადა, ეროვნულეუბი და თავისი პარტია მოერიგებინა როგორმე, მაგრამ ცდამ ტყუილად ჩაუარა და კონვენტის გახსნა და ეროვნულეუბისაგან მისი ლანძღვა ერთი იყო. დანტონმა ამის პასუხად სამშობლოს გაქირვება და თანხმობა მოაგონა. რობესპიერმაც თავის მხრივ, როდესაც უსაყვედურეს 10 აგვისტოს სისხლის ღვრა შენი ბრალიაო, დაამტკიცა, რომ ეს უბედურება სასოწარკვეთილებამდე მისული ხალხის ბრალი იყო და არა კერძო პირისა. მაგრამ პარიზელი ხალხის წინამძღოლი და მის სულის ჩამდგმელი მარატი კონვენტშიც დაურიდებლივ ამბობდა თავისას: საფრანგეთს თუ იხსნის, დიქტატორი იხსნის, რომლის დანიშნულება მარტო ის იქნება, რომ თავები გააყრვინოს, ვისაც კი ექვის თვალთ დაინახავსო! ეროვნულეუბი მთელ თავიანთ ძალღონეს მარატთან ბრძოლას ანდომებდნენ და მით უფრო აძლიერებდნენ მის სახელს ხალხში: აღბად ძლიერი და უძლეველი ყოფილა, რომ ერთს კაცს ნახვეარი კონვენტი ვერას აყლებსო! დანტონი მაინც იმედს არა ჰკარგავდა და ცდილობდა თანხმობა ჩამოეგდო კონვენტში. მაგრამ პირადი სიძულელით დაბრძმებულთ საზოგადო საქმე დაიწყებულეივითა ჰქონდათ და ერთიერთმანეთის განადგურებასლა უნდებოდნენ. დანტონს ქურდობაც კი დააბრალებს; მინისტრად რომ იყო, სახელმწიფო ფული მოიპარაო. *) თავის დაუცხრომელ მტერს, ვადეს, ერთი ამგვარი ცილისწამებუს პასუხად დანტონმა შემდეგი უთხრა: „კაცი ის არის, ვინც პირადს სიძულელს მსხვერპლად შესწირავს სამშობლოს: შენ, ვადე, ეგ არ შეგძლება და სწორედ ეგ დავლუპავს შენი!“

ლაზიები — უპატრონოდ არიან, ჩავიდეთ და ავიკლოთ, სულ 10—12 საათის სავალია აქედან! გავიმარჯვებთ კიდევ და არც ხელცარიელი დავბრუნდებით!

ერთი სიტყვით, რაზმები სულ ამ უსაქმურობას ჩიოდნენ და საქმე იქამდე მივიდა, რომ წინამძღოლებს ლალატსა სწამებდნენ: ალბად გვალატობენ, თორემ ამისთანა კარგი შემთხვევით არ უნდა ესარგებლათ? ცოტა კიდევ და აჯანყება მოხდებოდა ჯარისა, მაგრამ მოგვხედა ღმერთმა და 29 ენკენისთვეს სალამოს გენერალი კუსტენი დაბრუნდა თავისი ამალით. კოკისპირულადა წვიმდა, მაგრამ წვიმას ყური არ უგდო და ბრძანება გასცა, წასასვლელად მზად იყავითო. ერთს წამხედ შევემზადდით ყველანი და გავედით ლინდაუდან; ზოგნი მერმე რპეიმისკენ წაიყვანეს და ზოგნი ვეინგარტენისკენ. არც ახლა ხარ კმაყოფილი? ჩავძახოდი ჩემს თავს, და მივტოპავდი თავით ფეხამდე დასველებული. ვგრძნობდი, რომ ვისაც უნდა ნტერს მოულოდნელად თავს დაეცეს, ამახედ უკეთესს დროს ვერ შეარჩევდა. ჯაშუშები, თუ კი ლინდაუში ჯაშუშები იყვნენ, ვერც კი მოასწრებდნენ ჩასულიყვნენ და შეეტყობინებინათ მტრისთვის, რომ მალაზიები დაეცალათ ან გაემაგრებინათ; ვერ მოასწრებდნენ, რადგან ჩვენზედ ჩქარა ვერც ისინი ივლიდნენ.

დიღი ძალიან კარგად იყო ყველაფერი მოფიქრებული, საშინელი წვიმა რომ არა ყოფილიყო. დაგვირიგეს ტყვია-წამალი და გავწიეთ! მივდიოდით და ერთ ნახტომზედ ვერასა ვხედავდით, ისე ბნელოდა. მივდიოდით კი არა, ტლაპოში მივტოპავდით! მივდიოდით გაჩუმებულნი და ღამის წყვდიადში ჩვენვე გვეხამუშებოდა ჩვენი ფეხის ხმა, ცხენების ფრუტუნის და ზარბაზნების გრიალი. მივდიოდით შეცივებულნი, წვიმით დასველებულნი და ბევრად აღარ გვასიამოვნებდა პრუსიელების მალაზიების აღება.

იმისთანა წვიმა და ქარიშხალი იყო, რომ ჩიბუხსაც კი ვერაინი მოუკიდა. წამოგვეწეოდა რომელიმე ცხენოსანი რაზმი და შემოგვძახებდა:

— აბა. ბიჭებო! აჩქარდით! გათენებამდე იქ უნდა ვიყვნეთ! შუალამეა! დაიძახებდა ვინმე ამხანაგი.

პირველი საათია!.. ორი საათია!.. ლაპარაკიც კი გვეზარებოდა. ჩვენს მაგივრად მინდორში წვიმა ლაპარაკობდა გაბრაზებულნი.

სოფელში რომ შევდიოდით საღმე, ჯერ დაგვეყვდა მყეთარი,

*) ეირონდლებისაგან წარმოთქმული დანტონის ქურდობა შემდეგში ლეი ბლანმაყ განიმეორა, საფრანგეთის დიდი რევოლიუციის ისტორიაში მაგრამ აღფრედ ბუეარმა და რობინემ დაამტკიცეს, რომ ეს უბრალო პარტიული ცილისწამება იყო.

მაგრამ იმოდენ ხალხს რომ დაინახავდა, მიიმალეობდა და ისე გავივლიდით, თითქო ამომწყდარა აქაურობაო. ერთგან კი, მახსოვს, პურს აცხობდნენ; ფანჯრები ღია ჰქონდათ, და იმისთანა საამური სუნი გამოდიოდა, ცხელი პურის სუნი, რომ პირში ნერწყვი მოგვივიდა.

ხეტავი ერთი კუტი მაინც მოეწოდებინათ!

მომავონდა ნათლიაჩემის სამკვედლო, ღუქანი და სამზარეულო; მომავონდა გაჩაღებული ბუხარი, ზედ ქოთნით შექამადი და კაი გამოსული ლორი. ბევრი რამ მომავონა ცხელმა პურმა! გაქირვებულ სამშობლოსთვის რა პასუხი მეთქვა, თორემ ღმერთი, რჯული ახლა იქ უფრო მერჩივნა-მეთქი, ვფიქრობდი ჩემს გულში. ვიქნებოდი ჩემთვის ცეცხლაპირას წამოწოლილი და არც ფეხი მექნებოდა სველი და არც ტანი! შემდეგშიც ხშირად მომსვლია ეს აზრები და დარწმუნებული ვარ, ჩემი ამხანაგებიც სწორედ ამნაირი ფიქრებით იქნებოდნენ იმ დროს გატაცებულნი. ან როგორ იქნება უამისობა: ტლახი, წვიმა, სიცივე, ბნელი ღამე და უძილობა!.. მოდი და ნუ მოგავონდება კარგი ვახშამი და თბილი ლოგინი!

კარგა ხანი ვიარეთ. ოთხი საათი იქნებოდა, როდესაც ინათა. ისე მოველოდი ამ წამს, როგორც სულის ცხონებას და ძალიანაც გაგვამხნევა. გვერდით მოხუცებული ივანე მყავდა და ისე მიაბიჯებდა, მიუხედავად ჰალარა თმისა და ზორბად დატვირთული გულისა, რომ ბევრ ყმაწვილკაცსაც შეშურდებოდა. ცაზედ რომ სინათლე შენიშნა, იმედი მომცა:

— ძალიან ახლო ვართ, მიშელ! კი არ გავგივონ, იმ საძაგლებმა, და არ დაცალონ მაღაზიები!

ინათა. შორს, შორს, მინდვრის ბოლოში რეინი გამოჩნდა. ჯერ მზე არ ამოსულიყო, მაგრამ ახლა კი გარკვევით ვამჩნევდი თავით ფეხამდე დასველებულს და ლაფში ამოზინზლულ ჩემს ამხანაგებს, ჩვენს აფიცრებს თავიანთ ცხენებით, ჩვენს უკან ზარბაზნებს თავიანთ სათოფისწამლე ყუთებით და დრაგონებს თეთრი წამოსასხამით. გაჩქარებული მივდიოდით რაც კი შეგვეძლო. მაგრამ ჯერ გასავლელიც კარგი გვქონდა. ექვსი ათას კაცამდე ვიქნებოდით და ისე ეჩანდით იმ ტრიალ მინდორზედ, თითქო ექვსასიც არ არისო.

შვიდი საათი იქნებოდა, როდესაც ერთ დიდ სოფელთან შევჩერდით პურის საკმელად. გზაზედ მარტო ზარბაზნები და ბარგი დარჩა; სხვა ჯარები სოფელს შემოეხვივნენ.

დავლაგდით თუ არა, მე და ივანე სომი მაშინვე სოფლისკენ წავედით, რომ საკმელი გვეშოვნა რამე. პირველად მაშინ ვნახე, რა არის ჯარისაგან სოფლელების შეწუხება; შეწუხება კი არა, აკლება

საწყალი გლეხკაცისა! შეშა, პური, ხორცი, ღვინო და სხვ. და სხვ. ყველაფერი სოფლელებს წავართვით. პირველად იქა ვნახე, რა საცოდავია ჩვენი გლეხკაცი: ქვეყნად ყოვლად უმწეოს ზეცისკენდა აღუპყრია ხელები, როდესაც იმისი ხარი ან ძროხა დასაკლავად გამოჰყავთ ჯარისკაცებს. იქვე ეზოში წააქცევენ, ყელს გამოლადრიან, უცბად გაატყავებენ, ასო-ასო დასჭრიან და დაარჩებენ... გამოვიყვანდით საქონელს, წავაქცევდით... ქრისტეს ტირილი ატყდა სოფელში. გარს შემოხვეოდნენ კუსტენს იმოდენი გლეხკაცობა და თვალცრემლიანნი უსაყვედურებდნენ.

— რა ვქნა, ხალხო, ომია, ომი! — იძახდა კუსტენი. — თქვენმა ბეფემ და დიდებულებმა მოიყვანეს თქვენზედ მტერი და სამღურავიც იმათ უნდა უთხრათ, ჩვენ კი არა!

ერთ კარგ მსხვილ კეტზედ ჩამოვკიდეთ ხორცი, მხარზედ გავიდეთ მე და ივანემ და ჩვენს ბატალიონისკენ გავეშურენით.

ყველგან ცეცხლი ენთო; მხიარული ჟრიაშული იდგა მთელს ბანაკში. არ გასულა ერთი საათი, ყველაფერი მოხარშული და უკვე შექმული გახლდათ. შევნაყრდით, წამოვიშალენით და ისევ გზას გავუდექით. გლეხკაცები კი დაღვრემილები შემოგვცქეროდნენ! ერთი ოცი წელიწადი მაინც მოუნდებათ საწყლებს, რომ იმავე ღონეზედ დააყენონ თავიანთი ოჯახი, როგორც ჩვენს მისვლამდე ჰქონდათ. ხუმრობა კი არ არის ერთი სოფლისგან ექვსი ათასი კაცის და იმათი ცხენების დახვედრა.

ჩვენი გზის მარცხენა მხარეს ბუჩქნარი მთები ამართულიყო. ერთ მთაზედ ძველებური ციხე მოჩანდა და მარჯოზ დივემ თქვა: ებნეუშტატის ციხე არისო. მარჯოზი და იმისი მამა საზღვარგარეთოდან ჩუმად საქონელს ეზიდებოდნენ ხოლმე ფორბახის და მაინცის შუა და, რასაკვირველია, კარგად ეცოდინებოდა ეს მხარე.

შარაგზას გადავუხვიეთ და წვრილ ბილიკებს გავყვეით. ცხენები რომ ვეღარ ერეოდნენ ზარბაზნებს, ჩვენ ვეშველებოდით. ხოლმე. ისე უგზო-უკვლოდ ვიარეთ თერთმეტ საათამდე.

თერთმეტ საათზედ ჩვენს მარჯვნივ რეინზედ დიდი ჯარი გამოჩნდა; ცხენოსანი ჯარი უფრო მეტი იყო, ვიდრე ქვეითა. გვეგონა მტრის ჯარიო, მაგრამ გავიგეთ, რომ ვეინგარტენელი და გერმელს-ჰეიმელი მილიციელები ყოფილიყვნენ და ჩვენს დასახმარებლად წამოსულიყვნენ.

ჯერ ისევ ამ ჯარს ვსინჯავდით, რომ ჩემმა ამხანაგებმა შორს, რეინის პირას, სამრეკლოები და გუმბათები დაინახეს. დაინახეს თუ არა, შედგნენ და სიხარულით დაიძახეს:

— აგერ, მალაზიები, ბიჭებო! აგერ!

ვილას ახსოვდა მთელი ღამის უძილობა, ან წვიმა და დაღლილობა?! ისე შევისროლეთ ქუდები, თითქო ქორწილში ეყოფილიყავით. მთელი ჯარი უცბად შეჯგუფდა; თვით ცხენებიც კი თითქო გრძნობდნენ, რომ საფრთხეს მიუახლოვდნენ, როგორაც ჩვენკენ იწეოდნენ, იქნება იმიტომ, რომ იმ დროს უფრო ცხარედ ხვდებოდათ მათრახი.

მეორე ჯარის წინამძღოლი ნეუვინგერი იყო; ნეუვინგერი უწინ ოფიცერი ყოფილიყო და ახლა, სამშობლოს გაქირვების დროს, თავის ნებით ჩაწერილიყო ჯარში უბრალო ჯარისკაცად, მაგრამ რესპუბლიკას იგი მაშინვე მარშლად დაენიშნა. დიდ გზაზედ, რომელიც ქ. სპირისკენ მიდის, თითქმის ერთად გავედით ორივე ჯარი. სულ ათას ორას ნაბიჯზედღა იქნებოდა ჩვენგან პატარა სპირი, თავისი ეკლესიებით და მალაზიებით.

რაკი ვნახეთ, რომ ასე ახლო ვიყავით, უცბად შევდექით ორივე ჯარი და „მარსელური“ დაეძახეთ. ან ამაზედ უკეთესს ალაგს სად ვიტყოდით მარსელურს? აქ პირველი იყო ჩვენგან ბრძოლის ველზე გასვლა და წინ იმისთანა გამოჩენილი კაცები მიგვიძლოდნენ, სულ ჩვენებურები და ყველასაგან ცნობილი კაცები, როგორც ნეუვინგერი, ჰუმარი და კუსტენი. ნეუვინგერი ფალსბურგელი იყო და დაგვინახა თუ არა, მაშინვე ჩვენსკენ წამოვიდა, ხელი ჩამოართვა ივანე მენიეს, მერე წინ გაგვიარა თავისი კონტა ცხენით და შემოგეძახა:

— აბა ფალსბურგელებო! იქნებ, თავი ისახელოთ!

— რესპუბლიკას გაუმარჯოს! თავისუფლებას გაუმარჯოს! — შეეძახეთ ერთხმად. იმავე წამს ბრძანება მივიღეთ, გზიდან გადაუხვიეთ და პირდაპირ ქალაქზე მიდითო. ქალაქის მარჯვნივ ბაღები იყო და ღობეებს უკან მტრის ჯარი მოჩანდა თავისი თეთრი ტანი-სამოსით. მაშინ მკლავთან ერთად თვალიც კარგად მიჭრიდა და კარგად შევნიშნე, რომ ავსტრიელებს მიწა აეგროვებინათ და უკან ზარბაზნები დაემალათ. ქალაქის მისაველში, სწორედ იმ გზაზედ, რომელზედაც ჩვენ ვიდექით, გამოსულიყვნენ ქალი და კაცი, მოხუცი და ბავშვი, მაგრამ ჩვენს დანახვაზედ დიდი ხანი აღარ გაჩერებულან და ისევე ქალაქში შეიმაღლნენ.

ორი საათი იქნებოდა. გამოიღარა, მზე ამოვიდა. საბრძოლველად დაწყობილნი მივიწვედით ქალაქისკენ. ყოველ ბატალიონს ორი ზარბაზანი მიუძღოდა წინ. შუაზედ ქვეითა ჯარი იყო, აქეთ-იქით ცხენოსნები. რეინი აღიდებული იყო და ვენახებსა და ბაღებში გადმოვარდნილიყო. ჩქარი ნაბიჯით მივიწვედით წინ. თოფგაშვერილნი და გაფაციცებით ვეძებდით მტერს. უცბად კვამლი გამოვარდა

საიდანღაც; იმავე დროს ყუმბარამ გადაგვიარა თავზედ საშინელი შრიალით და ორი წამის შემდეგ ხმაც გაისმა ზარბაზნისა. საზარელი იყო ეს ხმა! მე ჩემს ღღეში არა გამიგონია რა იმისთანა საშინელი.

აფიცრებმა გვერდთ აგვიარეს და ბრძანება მოგვცეს, გაჩერდით, მოემზადებითო.

ერთი ქვეითი რაზმი და ერთიც დრაგონებისა მარჯვნივ წავიდნენ, რომ უკანიდან მოევლოთ მტრისთვის; იმ სიგანედ მიიკლავნებოდა ამ მხარეს რეინი, რომ კაი ხანი მოუნდებოდნენ სიარულს.

ავსტრიელები ზარბაზანს გვესროდნენ. მინდოდა დამენახა, საიდან ისერიან-მეთქი, წამოვიწიე... ზედ შუა გზაზედ კუსტენი იდგა თავის ამალით და განკარგულებას აძლევდა ოფიცრებს, რომლებიც საჩქაროდ მოდიოდნენ თავიანთ რაზმებისკენ გენერლის ბრძანების ასასრულებლად.

— ზარბაზნები წამოაყენეთ წინ! — გაისმა ბრძანება.

უკანიდან მოსავლელად წასული ჯარი კარგად შორს წასულიყო. თვალის დახამხამების უმალ დავალაგეთ ჩვენი პატარა ზარბაზნები ფერდობზედ და სროლა დავიწყეთ. მაგრამ არ გასულა ოცი წუთი, ბრძანება მოგვცეს: იერიშით, ბიკებო, იერიშითაო! და შეიძრა იქაურობა: დაჰკრეს ნალარა, გაისმა საყვირის ხმა და ზედ იმოდენა ჯარმაც მარსელური შემოსძახა. ცამდი ააღწია ჩვენმა სიმღერამ...

მაგრამ ტყუილად ჩაგვიარა ამოდენა ცდამ: ჩვენ ქალაქისკენ მივიწვედით და მტერი კი გარბოდა; ჩვენ რომ ბორცვზედ ავედით, იქ მტრის ჯარისა აღარავინ დაგვხვდა და შორს ქალაქის შესავალშილა მოჩანდნენ გაქცეულნი. უკანიდან მოსავლელად წასულ ცხენოსან რაზმს ოთხასი ტყვე ეშოვა.

გაქცეული მტრის ჯარი ქალაქში შეიმალა და ახლა ციხეებიდან დაგვიწყო სროლა.

აქამდე კარგად იყო ჩვენი საქმე, რადგან მტრის ყუმბარები თითქმის ვერაფერს აკლებდნენ ჩვენს ჯარს; საქმე ახლა იწყებოდა, როდესაც თვით ქალაქზედ მივდიოდით.

ბრეტანელებისა და ჩვენი რაზმი პირდაპირ ვუდექით ციხეს. ციხის წინ კარგა განიერი თხრილი იყო ამოდებული, და ზედ ხიდი იყო გადმოგდებული. რაკი ნახეს, ციხისკენ მოდიანო, ავსტრიელები დაექიდნენ ჯაჭვებს, რომ ხიდი აეწივნათ როგორმე, მაგრამ ეტყობოდა ისე ჩაეხანგებულებოდა ჯაჭვები, რომ ძვრაც ვერ უყვეს. ისინი რაც ძალი და ღონე ჰქონდათ ხიდის აწევას ცდილობდნენ და ჩვენ პირდაპირ იმათ ვუმინებდით. მაშინ იმათაც დაგვიწყეს სროლა და

რამდენიმე ბიჭი დაგვიჭრეს. ამ დროს წინ წამოგვიარა ნეუჟინგერმა, ხმალი იშიშვლა და გიჟივით შემოგვეყვირა:

— მომყევით, ჩემო მთიელნო! მომყევით!

მიაქენებდა თავის ცხენს ნეუჟინგერი და მივრბოდით მთიელნი! ხიდი უკვე დაეძრათ, მაგრამ ვერ აეწიათ და საშინელი ხრილით ჩამოვარდა ძირს. ხიდის დაცემა და მთელი ჩვენი რაზმის ზედ აქრა ერთი იყო. წინ ივანე მენიე მიგვიძღვოდა. ხიდს გავედით, მაგრამ ციხის კარს წავაწყდით, ძველებურ მუხბის კარს, მსხვილი რკინის საღებრებით მოჭედდებოდა. ავსტრიელები ყოველი მხრიდან გვესროდნენ. წინ ჩვენ ვიყავით. ციხის ძირში და თითქმის ვერას გვავენებდნენ; მაგრამ ჩვენს უკან ბრეტანელებს ძალიან ხოცავდნენ და ისინიც გვაწვებოდნენ და დაჭრილი დათვივით დაგვღრიალებდნენ: შადით, ეი! მიდი! რაღას უღვებხართ?! გვაწვებოდნენ და როვორ გვაწვებოდნენ! მეგონა, ეს არის ჩვენი აღსასრულის დღე-მეთქი. მით უფრო, რომ კარებში ნახვრეტები ყოფილიყო და ახლა იქიდანაც დაგვიწყეს სროლა. -

საშინელი იყო ჩვენი მდგომარეობა: წინ აწოწილი ციხე; ზემოდან, გვერდებიდან და ციხის კარიდან ზუზუნით ტყვია; აქეთ-იქეთ კენესა და გულშესაზარი ძახილი დაჭრილთა, რომელთაც უღმერთოდა ვთვლდით ფეხქვეშ, და თან ყვირილი:

— ზარბაზანი ციხეს, ზარბაზანი!..

ბოლოს ბრეტანელებმა ვეღარ გაუძლეს მტრის ტყვიას, იქვე დატოვეს თავიანთი დაჭრილები და დახოცილები და უკან გაბრუნდნენ.

დავრჩით ჩვენ. კიდევ რომ მოგვენდომებინა, უკან ვერ დავიწვედით, რადგან ცოცხალი ვერავინ გადარჩებოდა მტრის ტყვიას.

— ახლა კი დავილუპენით! — ვთქვი ჩემს გულში, მაგრამ სწორედ ამ დროს მოცვივდნენ ჩვენი ბრეტანელები. წინ ისევ ნეუჟინგერი მოუძღვოდა. მოდიოდნენ და საშინელი ხმით გაიძახოდნენ:

— გზა!.. გზა!..

ბუზივით ირეოდა ტყვია.

ბრეტანელებს ცულები წამოეღოთ და უნდა გენახათ რა გამმაგებულნი მისცვივდნენ კარებს. დაუშინეს ცული... ისე აირია იქაურობა, რომ აღარა ჩანდა რა, აღარა ისმოდა რა. ერთი გასისხლიანებული ცული მეც წავართვი დაჭრილს და დავკარ და დავკარ! დავკარ და დავიძახე:

— გამარჯვება ან სიკვდილი!

ვცემდით, რაც ძალი და ღონე გვქონდა. აქეთ-იქიდან კი ტყვია მოდიოდა და ხან ერთ ამხანაგს გვაკლებდა, ხან მეორეს. წაიქცეო-

და ვინმე, და ჩვენ ფერმიხდილნი უფრო გაბრაზებულნი ვაწევბოდით კარებს. ღვთის წყალობა გაქვთ, ისა ჭრიალებდა! ამოდენა ხანსაც ვერ გავვიძლებდა, რკინის სალტეებით რომ არ ყოფილიყო შეჭედილი. ჭრიალებდა, მაგრამ ჯერ ისევ მაგრა იყო. ბოლოს სრულიად მოულოდნელად შეიმტვრა კარი და რამდენიმე კაცი შევარდა ციხეში. შევიდნენ მაგრამ ციხე ცარიელი დახვდათ. ავსტრიელები გაქცეულიყვნენ.

გვეგონა, რაკი ციხეში შევედით და კარი გავუღეთ ჩვენს ჯარებს, საქმე გათავებულაო. მაგრამ, წარმოიდგინეთ ჩვენი განცდილობა, როდესაც ას ნაბიჯზედ მეორე ციხე დავინახეთ, თავის თხრილით და ხილით. საქმე ის იყო, ახლა ეს მეორეც აგველო, თორემ პირველის აღებაც უნაყოფოდ ჩაგვივლიდა. ყოველი მხრიდან სროლა დაგვიწყეს და ერთიანად ამოგვხოცავდნენ ყველას, კუსტენი რომ არ მოგვშველებოდა ზარბაზნებით.

ხუთი წუთის შემდეგ მეორე ციხის კარიც შევამტვრიეთ და ჩვენი ბატალიონი პირველი შევიდა ქ. სპირში. შევიდა, მაგრამ ვაი იმ შესვლას! ყველა სახლში ავსტრიელები იყვნენ ჩასაფრებულნი და ფანჯრებიდან გვესროდნენ. ისეთი კვამლი იდგა ფანჯრებში, რომ აღარა ჩანდა რა. მაშინ მენიემ გვიბრძანა, გამორეკეთ სახლებიდანო! და დავერიეთ! ყველა სახლში, ყველა ოთახში ხელჩართულა ბრძოლა ატყდა და, ღვთის წყალობა გაქვთ, ჩვენ ისინი ვხოცეთ! ბალახანამდე ავყვებოდით ხოლმე ზოგ-ზოგს და ბევრიც რომ ეყვირა: ნუ მომკლავ, ადამიანი არა ხარო! ისე ვიყავით გამხეცებულნი, რომ დანდობა აღარავისი გვქონდა. ცალ-ცალკე ავიღეთ ყოველი სახლი და ისე გავატარეთ ჩვენი ჯარი დიდ ქუჩაზედ. წინ ზარბაზნები მოუძლოდა, უკან ჯარი მოსდევდა.

ცოტა ხანს უკან ქალაქი ჩვენ ხელთ იყო და ჩვენი ჯართი გაივსო. სამი ათასი ხუთასი ავსტრიელი და იმათი წინამძღოლი ვინკელმანი ტყვედ დავიჭირეთ. ოთხასი კაცი რეინში დაიღუპა. მალაზიები ჩვენს ხელთ იყო, მტერს ნაღდი ფულის მეტი ვერაფრის წაღება ვერ მოესწრო.

განაღდა შეიძლება კაცმა სიტყვით გამოსთქვას პირველი გამარჯვების ნეტარება! განაღდა შეიძლება კაცმა სიტყვით გამოსთქვას თავისი სიხარული, ბრძოლა მორჩა და მე კი ღმერთმა მიბრალა და ცოცხალი გადავჩრჩიო! ახლა მამაჩემისა და მარგალიტას სიხარული ჩემი ამბავი რომ მიუვათ. ღმერთო, რა ბედნიერი ვიყავი იმ ბრძოლის შემდეგ!

დიდ მოედანზედ დაგვაყენეს იმოდენა ჯარი. ზედ შუაზედ იდგა კუსტენი და მალალი ხმით აქებდა ჯარის მხნეობას და მამაცობას.

მაგრამ შორს ვიდექით და ვერაფერი გავიგეთ, რადგან საშინელო ხმაურობა იყო ქალაქში. მისი სიტყვა რაზმის წინამძღოლებმა გაგვიმორეს და სხვათა შორის ისიც მოგვილოცეს, რომ, თუმცა ქალაქი ბრძოლით ავიღეთ, ჩვენგანს ერთსაც არავის რა აუღია და დაუსაკუთრებიაო. ამ სიტყვამ, ღვთის წინაშე ვნება უფრო მოგვიტანა, ვიდრე სარგებლობა, რადგან აქამდე ესეც არ ვიცოდით და ახლა კი გავიგეთ, რომ დარბევა შეიძლებოდა. შეიძლებოდაო? ბევრმა ინანა მაშინ, ნეტავი მომგონებოდა, რომ მეშოვა რამეო.

ერთი სიტყვით, სპირის ბრძოლა პირველი იყო ჩვენთვის და იმიტომ აგიწერეთ ასე დაწვრილებით. ორმოცდამეორე კაცი დააკლდა ჩვენს ბატალიონს. ახლა სხვა რამ მინდა მოგახსენოთ.

მართებლობა ეპისკოპოსებს და ერთობ სამღვდელო პირთ ართმევდა, რის წართმევაც კი შეიძლებოდა, რომ ხალხისთვის ომის ტვირთის ზიდვა შეემსუბუქებინა. ხალხი და მოქალაქენი ერთად იყვნენ და ძმურად ირჯებოდნენ ყველა საზოგადო საქმეში. სპირის აღების შემდეგ ხმა გავარდა ჩვენს ჯარში, ახლა თვით ვორმში ჩავიდეთ, იქ უფრო ღიდრონ მალაზიებს დავისაკუთრებთო, მაგრამ ეს აღარ დაგვცალდა.

შორე დღეს დილის ექვს საათზედ, როდესაც ქალაქის დასათვალიერებლად დავდიოდი, უცბად ნალარის ხმა შემომესმა. მაშინვე ის ვიფიქრე, მტერი დაბრუნებულა-მეთქი. გავიქეცი ჩვენი ბინისკენ, მაგრამ ჩვენი ბატალიონი უკვე აყრილიყო. საჩქაროდ ავიტაცე ჩემი გულა და თოფი და უკან გამოვედევნე. მივრბოდი და ვხედავდი, რომ სახლებიდან და ეკლესიებიდან ჩვენი ჯარისკაცები გამოვრბოდნენ ნაქურდალით და უკან სპირელები მოსძახოდნენ ყვირილით: ქურდო! ქურდო!

ჩვენი ჯარი ღიდ მოედანზედ შეყრილიყო და ნალარასა და საყვირის უკრავდა. ერთ პატარა ქუჩაში დუქნის წინ ურემი იდგა. ურემზე ერთი გამხდარი ღედაკაცი იდგა და გაჩქარებით ალაგებდა სხვადასხვა საქონელს. რომელსაც დუქნიდან ერთი ჯარისკაცი აწვდიდა. ისე ჩქარობდნენ ორივენი, რომ ერთი რომ შეგვხედნათ, მაშინვე იტყოდით, წმინდა წყლისანი არ უნდა იყვნენ, ვილაცანი არიანო! იქვე შორიახლო დარაჯის ქოხი იყო, მაგრამ თვით დარაჯი არსად ჩანდა, ალბად ისიც საშოვრად იყო წასული.

სისხლი თავში ამივარდა ეს რომ დავინახე. ჩვენ იმოდენა სისხლი დავღვარეთ. ხელი არას ვახლეთ და ვილაც მაწანწალები კი უნდა სძარცვადნენ ქალაქს? და ამათი საძაგლობა მერე ჩვენ უნდა დავგებრალდეს?! მივევარდი ღედაკაცს და... იცით ვინ ვიციანი? ჩემი და ლიზა! ჩემი და ლიზა, რომელიც 1785 წ. შემდეგ აღარ მენახა.

— შენ აქ რა გინდა?

გაწითლებული თვალები სიამოვნებით უბრწყინავდა. მობრუნდა და რომ მიცნო, შემომცინა:

— ბიჭო! შენა ხარ, მიშელ? შენც ჯარში ხარ, განა?

— დიაღ, ვარ. მაგრამ შენ აქ რა გინდა, შე უბედურო, შენა?

— არაფერი, რა უნდა მინდოდეს?

ამ დროს ღუქნიდან ჯარისკაციც გამოვიდა და კარი გამოიხურა. ჩემი შეეშინდა და ვითომ აქ არაფერიაო, ლიზას უთხრა:

— კიდევ კარგი, რომ ეს მაინც გადავარჩინეთ, თორემ ერთანად აიკლებდნენ. ეს მაინც წავილოთ ბანაკში.

ეტყობოდა სამხრელი იყო: შავგვრემანი ბიჭი იყო, გიშერივით წვერ-ულვაში ჰქონდა და შავი თვალები. ლიზას სიცილი წასკდა და უთხრა:

— ჩემი ძმაა, კაცო, ჩემი ძმა.

— ჩემი ცოლის ძმა ხართ თქვენ?! — მომვარდა და გადამეხვია. — ხელი, ცოლის ძმავ, ხელი!

სიცილითა და ხარხარით წაიღეს ურემი და თან აქეთ-იქით იყურებოდნენ, არავინ მოგვასწროსო.

ლიზა საქონელს მიერეკებოდა. ჩემი სიძე-ბატონი კი გვერდით მისდევდა და თავისთვის გაიძახოდა:

— თუ კი გენერალი მოაგროვებს სოფელში ჯარისთვის სურსათს, რატომ მე კი არ უნდა მოვაგროვო?!

ძალიან მეწყინა ეს რომ ვნახე, მაგრამ რა მექნა? ბევრიც რომ მეთქვა, მე იმათ ვერას გავაგებინებდი, რადგან, ხომ მოგეხსენებთ, მგლის თავზე სახარებას არ წაიკითხავენ. მეც გავჩუმდი. ისინი რეინისკენ გაეშურნენ და რადგან ჩემი გზა სულ სხვა იყო, გამოვეთხოვე. ლიზამ დამიყვირა:

— რა კარგს იზამ, რომ გვნახო! პარიზელ შეთქმულთა მეაჰე ბატალიონის ბინაზედ გვიკითხე.

თქვენ წარმოიდგინეთ, რა ფიქრები ამეშლებოდა, როდესაც მოვდანიზედ მივედი და ჩვენი გენერალი დავინახე თავისი ამალით. კუნერალი ისე იყო გაბრაზებული, რომ ცეცხლს აფრქვევდა. იმის ბრძანებით ერთი კაპიტანი, ორი ათისათავი და თორმეტი ჯარისკაცი დაექირათ და ასამართლებდნენ.

დაჭერილები იქვე იყვნენ, ეპოლეტჩამოგლეჯილები, ესე იგი ღირსებააყრილნი. ეკლესიის კარებში შეყრილიყო სამხედრო სასამართლო და დამნაშავეთა ბედსა სჯიდა. გენერალი კი საშინლად ბრაზობდა.

არ გასულა ათი წუთი, სასამართლომ თავისი გაათავა და გენერლისკენ წამოვიდა მსჯავრის გამოსაცხადებლად. გადაწყვეტილება

გამოუცხადეს, დამნაშავეებს დარაჯები შემოეხვივნენ და ქალაქგარეთ წაიყვანეს. თვალი გავადევნეთ საბრალოებს და თრთორლამ აგვიტანა, რადგან ცხადი იყო, რომ დასახვრეტად მიჰყავდათ. ცოტა ხანს შემდეგ რამდენიმე თოფიც გავარდა იმ მხარეს.

— ჯარისკაცმა თავის ღღეში არ უნდა დაივიწყოს თავისი ღირსება, — სთქვა გენერალმა.

ჯარი ისევ თავისთვის ბინაზედ გაისტუმრეს, მაგრამ მას შემდეგ ძარცვა აღარავის გაუბედნია.

მე კი ქვასავით მაწვა გულზედ ის ფიქრი, რომ ჩემი და სპირში იმყოფებოდა და იმისთანა საძაგელსა ჰყავდა ცოლად! მაგრამ რას ვიზამდი? ავი იყო თუ კარგი, ჩემი და იყო და იმ საღამოს მის სანახავად წავედი. აგერ შვიდი წელიწადი იყო მას შემდეგ, რაც პატარა ღიზა, თავისი პატარა ბოხჩით ვასსელონში წავიდა ტუხსენთან მოახლედ დასადგომად. ეხლა პატარა ღიზა კი არა, კარგი წარმოსადეგი, თუმცა გამხდარი, დედაკაცი იყო, დედაჩემივით გამბედავი და მკვირცხლი თვალებით.

III

პარიზელების მესამე ბატალიონი წყლის პირას იდგა. ნავთსადგურთან დიდი ალაგი იყო შემოღობილი საქონლის საწყობად და სწორედ ამ საწყობში მიეცათ ბინა პარიზელ შეთქმულთათვის. ისინიც ისე მშვენივრად მოწყობილიყვნენ, თითქო უკეთესს ვერას ინატრებდნენო: ტახტები შეეკრათ, ზედ თივა გაეშალათ და იყვნენ განცხრომაში სვამდნენ, მღეროდნენ, ქალაღდს თამაშობდნენ. ერთი სიტყვით, ქეიფში ისინი იყვნენ და სიმხიარულეში ერთიერთმანეთს ეჯობებოდნენ ყმაწვილები და მოხუცებულები. მე ჯერ პარიზელები არ მენახა და ვნახე თუ არა, მაშინადვე დაერწმუნდი, რომ სრულს ქეშმარიტებას იწერებოდა შოველი: პარიზელი ხალხი, სადაც უნდა იყოს, ისე ცხოვრობს, როგორც პარიზის ქუჩებში არის ჩვეულები: მხიარულად, უდარდელად და უზრუნველად. მომცრო ტანიანი არიან, ხმელ-ხმელნი, უფერულნი და ამასთან საშინელი მოძრავნი, გამბედავნი და დაურიდებელნი. მე რომ მკითხოთ, არ შეიძლება პარიზელი კარგი ჯარისკაცი იყოს, რადგან მეტის მეტად უყვარს სჯა. გარდა ამისა ქვეყნად იმისთანა არა არის რა, რომ იმან მასხარად არ აიგდოს; მეტადრე თავისი უფროსები. ჩვენი ბედი რომ მარტო პარიზელ შეთქმულთა ბატალიონზედ ყოფილიყო დამოკიდებული, ბევრს ვერას გავარიგებდით, რადგან მეტისმეტი თავისნება და თავნათეკამი ხალხია. ერთმანეთში არც დიდი გააჩნიათ, არც პატარა, არც უფროსი, არც უმცროსი და ყველას შენობით ელაპარაკებიან.

შევდი თუ არა, ერთ პატარა კაცს წავაწყდი, იმისთანა პატარას და გაყვითლებულს, რომ შემებერა, გადავაქცევდი. განზედ გადა და მამალივით ყვილი დაიწყო ჩემს დასაცინად. მეც პირდაპირ იმისკენ გავწიე, ვითომ ვერც კი ვხედავდი, რომ მასხარად მივლებდა და ვკითხე:

— არ შეიძლება მიბრძანოთ, სადა სდგას პარიზელ შეთქმულთა მესამე ბატალიონის მელუქნე ელისაბედი?

— მერე რად გინდა შენ ელისაბედ ქალი? — შემომიტირა უზარმაზარი წვერ-ულვაშით შემკულმა ჯარისკაცმა, რომელიც იქვე ქალაქს თამაშობდა და ჩიბუხს ეწეოდა.

— ნახვა მინდა. ჩემი დაა.

ამის გაგონებაზე ქალაქის მოთამაშებმა ყველამ მე დამიწყეს სინჯვა.

— აგერ, კარი დააკაუნე, — მითხრა იმავე ჯარისკაცმა უფრო დაყვავებით და იქვე კუნჭულში ჩამოფარებულ ფარდაზე მიმითითა.

ფარდაგი დაგლეჯილი იყო და სინათლე გამოდიოდა; მივედი, ფარდაგი გადავწიე და იმისთანა მშვენიერი ცეცხლი გუგუნებდა, რომ ახალწლის დამე გეგონებოდათ. ცეცხლთან ოცდაათამდე კაცი ტრიალებდა და ბატალიონს ვანშამს უმზადებდა; ზოგი ხორცსა ჰკეპავდა. ზოგი სალათს არჩევდა, ზოგი კიდევ ქათმებსა პტყვნიდა. კუნჭულში ჩემს დას ელისაბედს ბოთლები გაემწკრივებინა და ღვინოს ასხავდა. ძალიან მხიარულად იყო, ეტყობოდა. იქვე ერთ ზანდუქზე გამოჭიმულიყო ათისთავი მარესკო, ჩემი სიძე-ბატონი, და უდარდელად ჩიბუხს შეექცეოდა, თითქოს ის მარტო განცხრომისათვის გაეჩინოს ღმერთს.

ლიზამ შორიდანვე დამინახა და შეჰკვილა:

— ჩემი მიშელ, კაცო! ჩემი მიშელ!.. აქეთ, მიშელ, აქეთ! რა კარგ დროს მოდიხარ... ისეთი დრო უნდა გავატაროთ ამაღამ, რომ მტერს თვალი დაუწყენოთ.

მე კარგად ვიცოდი, როგორა ჰქონდა ჩემს დას შეძენილი ეს ყველაფერი. მაგრამ ვიდრე ხმას ამოვიღებდი, მომვარდა, მომეზვია და ისე ჩამიკრა გულში, რომ ამას კი არა, მეტსაც დამავიწყებდა. თან ჩვენების ამბავსა მკითხავდა და თვალს ცრემლი უბრწყინავდა. ბოლოს გული რომ შეიჯერა, ქუდი და ხმალი ჩამომართვა და ზანდუქზედ დააწყო. ამ დროს სიძეც მოვიდა ჩემთან, ხელი ჩამომართვა და სიცილით თვალი მიყო. იქნება გენახოთ ბებერი მელა, რომ ძაღლისა კი არა, მგლისაც აღარ ეშინია; სწორედ მელასა ჰგავდა ჩემი სიძე-ბატონი.

— როგორ გიკითხო, ცოლის ძმა! ძაან მასიამოვნე, რომ მოხვედი, ძაან! — სხვებიც შემომცინოდნენ, მხარზედ ხელს მცემდნენ და ზოგი ცოლის ძმას მეძახდა, ზოგი მამულიშვილ მიშელს, ზოგი მთიელ პატრიოტს, ზოგი კიდევ ჩვენებურს, თითქო ეს არის ეხლა კი არა, რამდენიმე წელიწადია რაც ერთმანეთს ვიცნობთო.

ცეცხლზედ დიდრონ-დიდრონი ქვაბები იდგა და იმისთანა სურნელება ამოსდიოდათ, რომ მაძღარსაც კი მადას მოჰკვრიდა. და ერთი საათის შემდეგ სუფრას რომ შემოვუსხედით, ისე ვიყავით დამშეულები, რომ სულ კბილები გვიკაწკაწებდა. ღვთის წყალობა გაქვთ, კარგი სუფრა ის იყო! ნამდვილი დიდკაცური სუფრა იყო. რა გინდა სულო და გულო, რომ ჩვენს სუფრაზედ არა ყოფილიყო! მეტადრე ლორები და ძეხვები; მაინცში ვიყავით და! ღვინო ხომ იმისთანა საუტხოვო რამა ვსვით, რომ თუნდ დავიფიცავ, ეპისკოპოსის მარნიდან უნდა ყოფილიყო გამოტანილი. განა არა მაგონდებოდა, რა სამარცხვინო საქციელზედ მივასწარ მე ჩემს დას და სიძეს, მაგრამ პარიზელი შეთქმულები ისე გამხიარულდნენ, რომ მეც გამიტაცეს და გულიდან გადამიყარეს ეს ფიქრი. ვსვამდი და თან სინდისს ვიმშვიდებდი:

— საბჭელი რომ გეწვოდეს, ხელი მოითბეო! ეს ღვინო მაინც ისმის და მაინც. ის არა სჯობიან, მეც გავისველო ყელი!

იმ დამესა ვნახე, რა ეშმაკები ყოფილან პარიზელები. იმისთანად ზუმრობდნენ და ოხუნჯობდნენ, იმისთანად დასცინოდნენ მეფეებს, დიდებულთ და ეპისკოპოსებს, რომ განცვიფრებული დავრჩი. ახლა იმათი სიმღერები! ისეთს სიმღერებს ამბობდნენ, რომ მე გავგონებოდა ვწითლდებოდი. ერთი საშინელი საზიზღარი ჯარისკაცი იყო, ცალი თვალით ბრმა; წამოდგა და საარშიყო სიმღერა დაიწყო; თანაც: ჭიანურს უკრავდა. ხმა სულ აღარა ჰქონდა და, რაც ჰქონდა, ისიც ხრინწიანი, მაგრამ იმისთანა გრძნობით და ოხვრით ამბობდა. იმისთანად უიმედოდ აღაპყრობდა ხოლმე თავის ცალ თვალს ცისკენ, რომ ჟრუანტელი მივლიდა ტანში. კარგად მღეროდა და ამასთან ლექსსაც კარგს ამბობდა: შეურაცყოფილი სამშობლო, დაშორებული ცოლშვილი, მოხუცებული დედ-მამა... მომაგონდა ჩემი მარგალიტა, ველარ გავუძელ აღელვებულ გულს და გარეთ გავვარდი, რომ ცრემლი დამემალა. ცოტა ხანს უკან რომ შევედი ველარ ვიცანი იქაურობა: ჩემი ბრმა ასკინკილას უვლიდა და თან იმისთანადა მასხარაობდა. რომ სიცილით დაგვხოცა ყველანი. მერე დაიყინა: ჩემი ცხვირი სტვირია, რასაც მინდა, იმას დაუვკრამო. — აი, როგორები არიან პარიზელები!

ლოხას დიდი პატივისცემით ექცეოდნენ შეთქმულები. როცა

ლიზა ლაპარაკობდა, ყველანი გაჩუმდებოდნენ და რაც უნდა სისულელე ეთქვა, ისინი გულიანად იცინოდნენ და თან ყვიროდნენ:

— ვაშა! ვაშა, ელისაბედ-ქალო!

მართლა და, ვაშა, ელისაბედ-ქალო! იმისთანა წარმოსადგეი და ლამაზი რამ იყო, დაურიდებელი და თანაც მედიდური შეხედულობისა, რომ მტერიც კი შექნატრებდა. თუ გაუჭირდებოდა, იარაღსაც კარგად იხმარებდა. დედაჩემს ძალიან ჰგავდა, ოღონდ უფრო ტანიანი და მძლავრი სახისა იყო. რომ ვხედავდი, რა პატივისცემით ექცევოდნენ შეთქმულეზი. ვფიქრობდი:

— აბა ჩვენს სოფელში გენახათ, ფეხშიშველა რომ მისდევდა ხოლმე ზამთარში მგზავრებს და ხელგაწვდილი შესტიროდა.

— გამიკითხეთ, ღვთის გულისთვის! მოწყალება მოიღეთ!

ვინ დაიჯერებდა, რომ ეს ის ლიზა იყო.

ასეა თუ ისე, ჩემს დას ლიზას ძალიან კარგად მოეწყო თავისი საქმეები და უმთავრესიც ეს არის. საქმე ბოლოა და ოღონდ ბოლო კარგი იყოს, დასაწყისს შეიძლება კაცმა თვალიც აარიდოს.

ამ პარიზელებს დიდად სწამდათ მარატის გაზეთი „ხალხის მეგობარი“ და თვით მარატს ხომ აღმერთებდნენ. დანტონი, რომეს-პიერი, დემულენი, კოლოდერბუა, კუთონი და ლეჟანდრი თვალსაჩინო მამულიშვილნი იყვნენ, მაგრამ მარატის ოდენი კი არ შეეძლოთ. ცალთვალა არშიყს ამათგანი არავინ მოსწონდა და ერთისას იძახდა გამჭრიახობა აკლიაო, მეორისას — უაზრო არისო, მესამისას — ვეჟაკობა არა აქვსო... სახელმწიფო კაცის შორსმხედველობა მარატის მეტს არავისა აქვს; მარატი რომ არის ყველაფრით სრულია და ჩვენ სწორედ მარატისთანა კაცი გვინდაო.

— ვიდრე მარატი გვეყოლება, — იძახდნენ პარიზელები, რევოლუციაც კარგად წავა. მარატი რომ მოკვდეს, საზოგადო საქმე უპატრონოდ დარჩება, რადგან სხვები სულ აქეთ-იქით გაიპარებიან. ან არა და ისე აერევათ დავთარი, რომ ქვეყნის ბედს ჟირონდელებს ჩაუვდებენ ხელში.

პარიზელები ძალიან გაჯავრებულნი იყვნენ კუსტენზედ, დაულაზედ დაჭერილი კაცები რად დახვრიტაო. ეგ რომ დიდებულთაგანი არ იყოს, მაგას იზამდაო? ცალთვალა ჯარისკაცს ერთი აწოწილი, თავის სიმაღლე ქუდი დაეხურა, რაღაცა უცნაური კოკარდით და — კაცი არ ვიყო. თუ მარატს არ ვაცნობო ეს ამბავი, რომ „ხალხის მეგობარში“ ჩასწეროს ეს შემადრწუნებელი კაცისკვლაო, — იძახდა გაბრაზებული. სხვანიც კვერს უკრავდნენ და ამ შეძთხევით სარგებლობდნენ. რომ თავისი უნდობლობა გამოეცხადებინათ ყველა დიდებულ გენერალისთვის.

ბოლოს ყველამ ცეკვა დაიწყო. მე და მორესკოლა შევრჩით სუფრას და მაშინ მიაგებო თავისი ქორწინების ამბავი. ლიზა პირველად თავად დანბახთან ვნახე, ალზასელების რაზმის მაიორთან; ვნახე თუ არა, მაშინვე გულში ჩამივარდა, რადგან მეტად ცქრილა რამ იყო და ამასთან სუფთა, ყაირათიანი და დაულალავი მშრომელი. ერთი წლის შემდეგ სამსახური გავათავე, ჯვარი დავიწერე და პარიზში დავსახლდი; ერთი პატარა ღუქანი გავალე, მაგრამ ვაპრობა არა გვქონდა რა და ომი გამოცხადდა თუ არა, ღუქანი გავყიდეთ და ახლა პარიზელ შეთქმულთა მესამე ბატალიონთან ერთად დავდივართ, თან პატარა ღუქანი დაგვაქვს და, ღვთის მადლით, არა გვიჭირს რა, საქმე კარგად მიდისო.

— ენკენისთვეში პარიზში ხომ არ იყავ, ხალხი რომ აიშალა-მეთქი? — ვკითხე და იმანაც დაწვრილებით მიაგებო, რაც იმ დღეებში პარიზში მომხდარიყო. ხალხის არეულობა 2 ენკენისთვეს დაიწყო. სამი საათი იქნებოდა სადილს უკან; დოფინის ქუჩაში ჯარისკაცებს პატიმრები მოჰყავდათ; ერთმა პატიმარმა ჯარისკაცს დაჰკრა; ხალხი მივარდა, ჯარისკაცებს წაართვა პატიმრები და დახოცა. მერე ორ ნაწილად გაიყო ხალხი: ერთი ნაწილი, უმთავრესად დასავლეთით მოსული შეთქმულნი, ლუქსემბურგის ციხისკენ გაემართა, რომელშიაც დამწყვედულნი იყვნენ კონსტიტუციის მოწინააღმდეგე ეპისკოპოსები, რომელთაც ქვეყნის მტრობა და ლალატი ბრალდებოდათ. მეორე ნაწილი — ერთიათად მეტი, ვიდრე პირველი, აზბეის ციხეს მივარდა, კარები შეამტვრია და რაც კი იქ პატიმრები იყვნენ — დიდებულნი — სულ ერთიანად დახოცეს.

ხუთ საათზედ პარიზელ ხალხისაგან ამორჩეულმა კაცებმა — კომუნის წარმომადგენლებმა — ბრძანება გასცეს: ხალხმა მსაჯულები დანიშნოს, რათა მათ გაასამართლონ ყოველი პატიმარი. ამით შესწყვიტეს სისხლის ღვრა. ხალხს მსაჯულებად თორმეტი პატიოსანი, ყველასაგან პატივცემული, მამულიშვილი აერჩია და თავმჯდომარედ მიაჩრა; გარდა მსაჯულებისა ხალხმა ორმოცდაერთი ჯალათი აირჩია, რომელთაც მსაჯულების გადაწყვეტილება უნდა აესრულებინათ. მსაჯულები იქვე ციხის შესავალში დაბრძანდნენ, პატიმართა დავთარი თავმჯდომარეს გადაუშალეს, მაშხალე-ბით განათებულ ეზოში ჯალათები დააყენეს და ღამის ათ საათზედ დაიწყო პატიმრების ხოცვა. თავმჯდომარე ციხის დავთარში ამოიკითხავდა პატიმრის გვარს და მიზეზს, რისთვისაც იგი დაპატიმრებული იყო. შეთქმულნი მოიყვანდნენ და წინ დაუყენებდნენ უბედურს. დაუწყებდნენ კითხვას. ისიც, რასაკვირველია, ცდილობდა თავი ემართლა რითიმე. თუ გაამართლებდნენ, სამი შეთქმული გა-

იყვანდა გარეთ და ხალხს შესძახებდა: ქული მოიხადეთ, ხალხო, უბრალოა! ხალხიც ალერსით აიტაცებდა უდანაშაულოს და კაცებს გააყოლებდა წინამდე. და თუ გაამტყუნებდნენ, თავმჯდომარე იტყოდა: ციხეში დაამწყვდიეთ! უხაროდა პატიმარს, სიკვდილს გადავრჩი, რომ ისევ ციხეში მამწყვდევენო. მივარდებოდნენ შეთქმულნი და ყვირილით — დაამწყვდიეთ! დაამწყვდიეთ! — ჯალათებისკენ გააქანებდნენ. როგორც კი შეაგდებდნენ ეზოში, მისცივდებოდნენ ჯალათები — ზოგი ხმლით, ზოგი შუბით და — სულს გაანთხევინებდნენ.

ზოგი გაუძალიანდებოდა ხოლმე, მაგრამ რას გახდებოდა? ზოგი — ნუ მომკლავთო, — ევედრებოდა; ზოგი კიდევ თავდადუნული, ხელებდასისხლიანებული გაექცეოდა ჯალათებს და გარბოდა საზარელი ღრიალით — მიშველეთ, ქრისტიანები არა ხართო მირბოდა და მისდევდნენ თან ჯალათები!.. სადმე კუნძულში დაეწეოდნენ და მოჰკლავდნენ: იმდენსა სცემდნენ, ვიდრე მოძრაობას შეწყვეტდა; მაშინ კი თავს დაანებებდნენ; „თავისუფალ ერს გაუმარჯოსო!“ — დაიძახებდნენ და ისევ კარებისკენ მიეშურებოდნენ, რომ ახლა სხვა მსხვერპლისთვის ელოდნათ. ყელს ღვინით ისველებდნენ და როდესაც ვისმე საკმელს მოუტანდნენ შინიდან, ხმალს ამხანაგს მისცემდა — აჰა, სისხლი არ შეაშრეს, მანამ მე პურსა ვჭამო.

სწორედ ასევე ხოცა ხალხმა პატიმრები ყველა ციხეებში, გარდა იმ ციხეებისა, რომელშიც დაჭერილები იყვნენ უნამუსო ქალები და შვეიცარიელი ჯარის უფროსები; ესენი ხალხმა ისე დახოცა, რომ გასამართლებაც კი არ აღირსა. აგრეთვე გაუსამართლებლად დახოცეს შეთქმულებმა ლუქსემბურგის ციხეში დამწყვდეული ეპისკოპოსები — „წმიდა ბართლომეს ღამე გახსოვდეთო!“ ერთ ციხეში პატიმრები გამაგრებულიყვნენ და ხალხმა ზარბაზანი დაუშინა და ისე აიღო ციხე.

ამ საშინელებას ისე მიამბობდა მარესკო, თითქო აქ არაფერიაო; თან ჩიბუხს ეწეოდა და იცინოდა. ხალხმა სამი დღე ხოცა პატიმრები და სწორედ ასეც უნდა ექნაო, იძახდა. მე კი, ზომ იმისთანა მშვენიერი ღვინო ვსვი, და ამ ამბავზედ სულ კანკალი დამაწყებინა. ვეღარ მოვითმინე და შევეყვირე:

— საშინელებაა, ჩემო სიძე, საშინელება! როგორ! მთელი სამი დღე დიოდა ქრისტიანთა სისხლი, და კაცი არავინ გამოჩნდა, რომ შეეყენებინა?! ბევრიც რომ თქვათ, ასამართლებდნენ და ისე ხოცავდნენო, იქ არც გასამართლება ყოფილა და არც არაფერი, რადგან სადაც არც მოწმეებია, არც ვეჭილი, და ადამიანს მართო იმიტომ ჰკლავენ, რომ ციხის დავთარში შენზედ ესა სწერიაო, დაჰე-

თანხმეთ, აქ სამართალი არ არის. საშინელებაა! მერე პარიზელი ხალხის ამორჩეულნი სად იყვნენ? ან ერის მცველი ჯარი? ან მინისტრები და კანონმდებელი კრება?

ამ სიტყვებზედ მარესკომ თვალები გაკვირვებით დამაჭყიტა, კარგა ხანი მიყურა ხმაამოუღებლივ, თითქო გონზედ ვერ მოსულაო და ბოლოს მითხრა:

— რა უნდა ექნათ? იყვნენ თავისთვის გაჩუმებულნი: რაც გინდათ, ქენითო! ქვეყანამ იცოდა, რომ ეს უნდა მომხდარიყო; მარატმა წინაღვე სთქვა თავის გაზეთში, საქმე ასე გათავდებოა; და ვინ შეიძლება ხალხის წინააღმდეგობას? ერთ ციხეში ჰებერი იყო მსაჯულთა თავმჯდომარედ; აბზეის ციხეში — ბილიო დე ვარენი, რომელმაც სამშობლოს სახელით მადლობა გადაუხადა ჯალათებს. კომუნის წევრებმა წინაღვე გადასინჯეს პატიმრების სიები და ყველანი გაანთავისუფლეს გარდა პოლიტიკური მიზეზით დაქერილებისა; კომუნამ დიდი ჯილდო მისცა ჯალათებს. ერის მცველ ჯარს ხელი არ გაუნძრევია; ან რას იზამდა? რამდენგან ვნახე — ციხეში ჯალათები პატიმრებს ხოცდნენ და ციხის კარებში დარაჯებად ერის მცველი ჯარისკაცნი იდგნენ, თითქო აქ არაფერი ხდებოა. საერო კრებამ 2 ენკენისთვის აბზეის ციხეში სამი კაცი გაგზავნა და ხალხს შეუთვალა: სამართალზედ დაამყარეთ ყოველი თქვენი საქციელიო. ხალხმა მოუსმინა, გაისტუმრა მოციქულები და ისევ სისხლისღვრას შეუდგა; მას შემდეგ საერო კრებისა სახელიც აღარავის გაუგონია. დანტონი რომ არა ყოფილიყო, საერო კრების ყველა წევრნი, რომელნიც დღეს ასე გულმაგარად ბრძანდებიან, გაიპარებოდნენ თავიანთი მინისტრებით ერთად და პარიზს ბრაუნშვეიგს დაუტოვებდნენ. ყველგან ღალატი იყო; მართალია, საერო კრების უმრავლესობა დასთანხმდა ათს მარიამობისთვის მომხდარ ამბებს, მაგრამ დასთანხმდა, რადგან წინააღმდეგობა არ შეეძლო და მას შემდეგ სულ იმის ცდაში იყო, რომ 10 მარიამობისთვის შეძენილი ხელიდან გამოეცალა ხალხისთვის; სამშობლოს მოღალატეების დასასჯელად შედგენილი სასამართლო ყველას ამართლებდა და ათავისუფლებდა; შამპანის მხარე გახიზნულებით, პრუსიელებით და ავსტრიელებით გაივსო; თან დიდძალი ყალბი ფული შემოეტანათ და მით ჩვენს ფულს ფასს აკლებდნენ; იკლებდნენ ქვეყანას და, ვინც გაბედავდა და თავის ოჯახის და სამშობლოს დაცვას მოინდომებდა, აკაევდნენ და ხვრეტდნენ; ერთმა სამშობლოს მოღალატემ ლავერნმა ლონგვი დაუთმო მტერს უბრძოლველად; სხვანი კიდევ ემზადებოდნენ უბრძოლველად დაეთმოთ ვერდენი; და რაკი ამ ქალაქს აიღებდნენ, ხომ პარიზამდე ველარაფრით

შევიმაგრებდით. ეს კარგად იცოდნენ ციხეებში დამწყვდეულმა დიდებულებმა; იყვნენ თავისთვის განცხრომაში და ქეიფში და სულ იმას იძახდნენ: მოითმინეთ!.. ჩვენი რიგიც მალე მოვა... ერთი ბრაუნშვეიგი შემოვიდესო! ისე დღე არ გავიდოდა, რომ შესყიდულ კაცებს არ დაეწიოკებინათ ხალხი ყვირილით: „ღუქნები დაკეტეთ! პრუსიელები ქალაქში შემოვიდნენო!“ ან არა და: „არიქათ, ბრეტონელები ქალაქს იკლებნო!“ დღე და დამ ზარის რეკვა ისმოდა: არიქა, ხალხო, მტერი კარს გადგასო! მაშ ბოლო არ უნდა მოგველო ამოდენ მოუსვენრობისათვის?! არ უნდა ამოგვეგდო ღალატი? არ უნდა დაგვემტკიცებინა მტრისთვის, რომ თუ ისინი ყველაფერს იზამენ სამშობლოს დასაღუბად, ჩვენც ყველას ვიზამთ სამშობლოს სახსნელად! მაშ არ შეგვეშინებინა? ღმერთო ჩემო! იმას არ დავიფიცავ, რომ დამნაშავეებთან ერთად უდანაშაულონიც არ მოჰყოლოდნენ. მაგრამ, აბა ვალმის ბრძოლაში გამარჯვება პრუსიელებს დარჩენოდათ და გახიზნულების წადილისამებრ პარიზში შესულიყვნენ! სწორედ იმის გამოძიებას გამოუდგებოდნენ, ვინ არის დამნაშავე და ვინ უდანაშაულო! მიჰყვებოდნენ და საცა პატრიოტს დაიჭერდნენ, მაშინვე დახვრეტდნენ! ტყუილად კი არ იწერებოდა ბრაუნშვეიგი თავის პროკლამაციაში, ქვა ქვაზედ აღარსად დარჩებაო. ისე აწილედნენ დიდსა და პატარას, ქალსა და კაცს, რომ ჩვენი ენკენისთვის ამბები იმასთან სახსენებელიც არა ყოფილიყო. მაშ რა დაგვიშავებია? რასაც პრუსიელები და გახიზნულები მთელს ერს უპირებდნენ, რომ მით ძველი წესრიგი შემოეღოთ და დაკარგული უპირატესობანი კვლავ ხელთ ეგდოთ, ერმა სწორედ ის უყო ათასს თუ ათასორას მოღალატეს, რომ ამოდენი წვა-დაგვიტ შეძენილი თავისუფლება და ადამიანური უფლებანი არ დაეკარგა. ამაზედ ცხადი განაღა იქნება რამე, მაგრამ რას იზამ, რომ კაცი ძალად ხუჭავს თვალს და იძახის — ბნელაო?

ღმერთია მოწამე, რომ მე თვალს არაზედ ვხუჭავდი, მაგრამ ამოდენა სისხლის ღვრა კი გულს მიწყალებდა. ხომ ისე კარგად ამიხსნა ყველა გარემოება, ხომ დამიმტკიცა, რომ იძულებული ვიყავით ასე მოვქცეულიყავით, და მე კი მაინც მიკენესდა გული და მე მრცხვენოდა ჩვენი რესპუბლიკის მაგივრად. ჯალათი ყოველთვის ჯალათია, გვირგვინი ედგმის თავს, ეპისკოპოსის სკუფია, თუ მუშაკაცის ქუდი.

ერთი სიტყვით, ჩემი სიძე სულ მოწინააღმდეგეებს სდებდა ბრალს: მეფის მომხრეებს რომ უცხოელი ჯარები არ შემოეყვანათ, არც ამოდენი სისხლის ღვრა მოხდებოდაო. — „განა არ შეიძლებოდა ჩვენი უთანხმოება ჩვენშივე მოგვესპო როგორმე და გარეთ არ

გაგვეტანა? განა ლონგვის და ვერდენს მტერი შეუვიდოდა, ლალატი რომ არა ყოფილიყო? მაშ ლალატს დასჯა არ უნდა? პარიზელმა ხალხმა კი არა, გახიზნულებმა და ბრაუნშვეიგმა დაანთხიეს უბრალოთა და უდანაშაულოთა სიძახლი, როდესაც პარიზს მიწის პირიდან ადგვას დაემუქრნენ და პარიზელ პატრიოტებს დახოცვას. აი. სიმართლე, თუ მართლა სიმართლე გნებავთ“.

იმ დამეს ძალიან გვიან მივედი ჩვენს ბინაზედ.

მეორე დღეს, როდესაც მანჰეიმის კარებში დარაჯად ვიდექ, ოთხ საათზედ სადილის შემდეგ, რამდენიმე ბატალიონი. ქვეითა ჯარი გავიდა ქალაქიდან, ერთი ბატალიონი ცხენოსანი ჯარი და ხვედრი არტილერია. ხმა გავარდა, ავსტრიელი გენერალი ერბახი მოდის ვორმის და მაინცის საშველად და თან თორმეტი ათასი კაცი ჰყავსო; ეს ის ერბახი გახლდათ, რომელმაც სპირის მალაზიები ოთხი ათასი კაცის ანაბარად დასტოვა. ერბახი გაჩქარებული მოდიოდა მაინცისკენ, მაგრამ ტყუილად ჩაუარა ცდამ: მეორე დღეს გავიგეთ, რომ ჩვენი ჯარები უბრძოლველად შესულიყვნენ ვორმში: ვორმელები წინ გამოჰგებებოდნენ ყვირილით, თავისუფალ ერს გაუმარჯოსო! და ქალაქის წარმომადგენელთ საფრანგეთის სამფერი კოკრდა ჰქონოდათ ქუდებზედ.

მიუხედავად ამისა საერო კრების კომისარმა პეტრე ბლანშარმა ათას ორასი ოქრო გადაახდევინა ვორმელებს: ნახევარი მოქალაქეთ, რომელნიც ამას წინად გახიზნულთ გაეგებნენ თეთრი კოკარდებით, „მეფეს გაუმარჯოსო!“ და ნახევარი უმალღესს სასულიერო წოდებებს, რომელიც სულ იმას შესთხოვდა ღმერთს, ჯოჯოხეთში მოაქციე ყველა პატრიოტიო. ოთხას ორმოცდაათი ათასი ოქრო სპირმა მოგვცა; ას ოცდაათი ათასი იქაურმა სასულიერო წოდებამ, რომელიც აგერ ათი წელიწადი იყო ყალბ ფულსა სჭრიდა და ჩვენში ასაღებდა. გარდა ამისა აუარებელი ხორაგი, იარალი და ტანსაცმელი ვიშოვეთ სპირის მალაზიებში. ჩვენც მთელი მაზრა მოვიარეთ და საცა კი ურემი და საქონელი იყო რამე, ყველა სპირში ჩავრეკეთ და დავიწყეთ იმოდენა სურსათის და იარალის ზიდვა; ლინდაუს გზაზედ ქარავანივით გავაბით ურმები, თან პატარ-პატარა რაზმები გავაყოლოთ დარაჯად და საფრანგეთისკენ გავისტუმრეთ. ვზიდავდით და მალაზიები კი ისევ სავსეები იყო, არც კი ეტყობოდათ დანაკლისი. სრულს ქვემარტებებს იწერებოდნენ გერმანული გაზეთები: ისეა სავსე ჩვენი მალაზიები, რომ თუნდა ათს წელიწადს გასტანოს ომმა, ჩვენ არა დაგვაკლდება რაო. დიად, სრულს ქვემარტებებს სწერდნენ! რაც მართალია, მართალია!

რეინზედ მდგომმა ჯარებმა სპირში შევისრულეთ, რაც კი იარა-

ლი და ტანსაცმელი გვაკლდა. ყველგან სამხედრო კომისრები იყვნენ და სუყველაფერს თვალყურს ადევნებდნენ. სპირშივე მივიღეთ კარვები, თითოში თექვსმეტი კაცი უნდა მოთავსებულიყო. მე ჯარისკაცებზედ მოგახსენებთ, თორემ უფროსებს პატარ-პატარა კარვები ჰქონდათ, თითო ყველა აფიცერს. თექვსმეტ კაცს ერთი კარავი ჰქონდა, ორი ქვაბი, ორი ბადია, ორი დიდი ალთაფა, ორი წერაქვი, ორი ბარი, ორი ცული. მთელი ევროპა შემოვიარეთ, საშინელ ომებს დავესწარიით და ამის მეტი ჩვენ არა გვქონია რა. ცხენოსან ჯარს რვა კაცზედ თითო კარავი მისცეს.

ამ იარაღის მიღება მით უფრო გვახარებდა, რომ ჩვენივე შეძენილი იყო და რესპუბლიკას გროში არ ჰქონდა დახარჯული. კიდევ კარგი, რომ კუსტენმა არ ააკლებინა ქალაქი და სამხედრო მალაზიები: რამდენიმე გაიძვერა გამდიდრდებოდა და თავისუფლებისთვის მებრძოლნი კი უარარაოდ დარჩებოდნენ. ჩვენდა საუბედუროდ შემდეგში კუსტენის მაგალითს არავინ მისდევდა, და ამიტომ იყო, რომ ჯარისკაცი — და თავისნებით გასული შეთქმული — ხშირად შიმშილით და სიცივიტ კვდებოდა და რამდენიმე ქურდბაცაცა კი იმოდენს იძენდა, რომ არამც თუ თითონ, მისი შვილები და შვილოშვილებიც კი ვერცხლითა კოჭაობდნენ. რას იზამთ, ასე ყოფილა ყოველთვის: ერთი ძმა რომ თავგანწირვით იბრძოდეს სამშობლოს კეთილდღეობისთვის, მეორე ქურდობის და გამდიდრების მეტს არასა ცდილობს და უკანასკნელ ლუკმასა ჰპარავს თავის ძმას, რომელიც, იმას რომ ჰკითხოთ, სულელია, თორემ ასე პატიოსანი და საზოგადო საქმისთვის თავგამოდებული არ იქნებოდაო.

IV

ძალიან საქმე გვიყვეს სპირისა და ვორმის მალაზიებმა: ახლა კი სულ ყველაფერი გვქონდა, რაც კი ჯარისკაცის კუთვნილია და ისე ვიყავით გამზადებული, რომ აღარაფრისა გვეშინოდა. ვინ არ ინატრებდა ჩვენს ადგილზე ყოფნას! პრუსიელებისას არას მოგახსენებთ, რადგან შამპანიის ჰაერმა ძალიან დააზიანა უბედურები: იმოდენი ყურძენი ეჭამათ, რომ ყვანა შეჰყროდა ყველას, თავი დაენებებინათ ზარბაზნებისთვის და ბარგისთვის და ისე მიეშურებოდნენ შინისკენ, რომ უკან არც კი იხედებოდნენ. მტარვალთა ჯარი უკან მიდიოდა.

ულმერთოდა ხოცავდნენ საწყლებს ჩვენი გლეხკაცები: ჩაუსაფრდებოდნენ სადმე ღობის ძირას, ან ბუჩქნარში, ან ტყეში და ხოცავდნენ და ხოცავდნენ. დედაკაცები უარესნი იყვნენ. მარათის აზრით კი ესეც არა კმაროდა. დიუმურიეს უსაყვედურებდა, გაქვეულ

მტერს არ სდევნი და გზას არ უკრავო. მე მგონია, მარატი მაშინ მოისვენებდა, როდესაც ავსტრიის ხელმწიფე და ბრაუნშვეიგი ხელში ეყოლებოდა, რომ ჩამოეხრჩო და მით დაემტკიცებინა ქვეყნისთვის, რომ საფრანგეთში მტრულად შესული სიკეთეს ვერ ნახავს. და მართალიც იყო, რადგან შემდეგში გამოცხადდა, რომ დიუმურიეს თურმე საიდუმლოდ პირობა ჰქონდა პრუსიის მეფესთან და ამიტომ თავაზიანად ექცევოდა მის ჯარებს.

ჯერ კარგად იყო ჩვენი საქმე: პრუსიელნი თავგადაგლეჯილნი მიეშურებოდნენ უკან; ქალაქ ლილის ასაღებად მოსული გახიზნულები და ავსტრიელები უკან მიდიოდნენ: ჩვენი ჯარები გენერალი ანსელმის წინამძღოლობით ნიცაში შევიდნენ; აჯანყებული ვანდელები დროებით მაინც დავემშვიდეთ. ერთი სიტყვით, ყველაფერი კარგად იყო. სასიამოვნო ამბები ყოველ დღე „კონვენტის დღიურს“ მოჰქონდა, რომელსაც ჯარებს ურიგებდნენ. კარნომ და პრიორმა დასდეს წესად ჩვენს ჯარში „კონვენტის დღიურის“ დარიგება და რამდენიმე თვის შემდეგ 1793 წ. თიბათვეში რესპუბლიკამ დაადგინა მთელი საფრანგეთის ჯარისთვის ეცნობებინა გაზეთით საერო კრების დადგენილებანი.

ამგვარად ყოველმა ჯარისკაცმა იცოდა მიზეზი ომისა; იცოდა, რა ამბები ხდებოდა პარიზში, ან რას ამბობდნენ კლუბები და საერო კრება. ამის მადლობელი უნდა ვიყოთ, რომ შეგნებით ვიბრძოდით სამშობლოსათვის, და არა ისე, როგორც ეხლანდელი ჯარისკაცი სჩადის: მიჰყავთ საწყალი, ყველაფრის უვიცი, და უსულო მანქანასავით ათამაშებენ ხან აქეთ და ხან იქით; დღეს რომ ეშმაკზედ წაიყვანონ და ხეალ ღმერთზედ, ის ვერას გაიგებს და ორივეს ერთნაირად შეებრძოლება. განა არ შეიძლება დღეს მაინც გაიხსენონ ეს დავიწყებული ჩვეულება და ხელახლად შემოიღონ ჯარში სამხედრო გაზეთის დარიგება. დიდად ასარგებლებს ეს დღიური ჯარში მყოფ ჩვენს შვილებს. სხვა რომ არა იყოს რა, იმას მაინც გაიგებენ, ვის ან რად ებრძვიან და თავს რას აკლავენ უბედურები.

რამდენიმე დღის შემდეგ 17 ღვინობისთვის 1792 წ. წასვლის ბრძანება მივიღეთ. უცბად შევეშხადენით, — თოფი და გულა, სხვა კი არა გვაწუხებდა რა — და ვორმისკენ წავედით. სპირის მიდამოში რაც ჯარები იყო, ისინიც ჩვენ მოგვდევდნენ. აღარ წვიმდა, მაგრამ საშინელი ბურუსი იდგა რეინზედ და აბნელებდა ქვეყანას.

გავცილდით თუ არა ქალაქს, მარცხნივ გადავუხვიეთ და მთელი ექვსი საათი სულ ტყეში ვიარეთ. მშვენიერი მუხის ტყე იყო, დაბურული ტყე და იმ ბურუსიან დღეში ისე ბნელოდა, რომ დამეგვგონებოდათ.

აქა-იქ ძველი ციხეების და კოშკების ნანგრევები გვხვდებოდა, — დახავსებული, ჩაშავებული ნაშთები ძველის ძლიერებისა. ჩემს გვერდით მიმავალი მოხუცი სომი ამბობდა:

— ამ ასის წლის წინად მეფე ლუი XIV ტიტურანი გამოგზავნა აქ დიდი ჯარით; ერთ ღამეში ოთხასი სოფელი გადააწვევინა და იმოდენივე ციხე-სიმაგრე დაანგრევინა. მეფე იყო და თავის ქვეყანაში რა გაუჭირდებოდა?!

ტყეს გავცდით და გაშლილ მინდორზედ დანგრეული ციხეების გარდა კეთროვანებისთვის აგებული რამდენიმე შენობა ვნახეთ. მაგრამ უკეთესი იქნება, შენობა კი არა, სასაფლაო ვთქვა, რადგან ავადმყოფებს არავითარი მოვლა არა ჰქონდათ და მარტო იმიტომ იყვნენ იქ, რომ მალე მომკვდარიყვნენ. გერმანელები რომ სიმართლის მიმდევარნი იყვნენ, იმასაც აღიარებენ, რომ ჩვენ გავათავისუფლეთ ისინი ბატონყმობისაგან; ჩვენ გავათავისუფლეთ ისინი კეთროვანთა საავადმყოფოებისაგან და ჩვენ გადავაგდეთ იმათში ადამიანის წამება. იმათ კი ისე მოსწონდათ ბატონყმობაც და წამებაც, — შეჩვეული ჰყრიდნენ გვირგვინსა შეუჩვეველ ლხინსაო, — რომ იძულებული გავხდით ერთი ასჯერ მაინც დაგვემარცხებინა, ვიდრე გონებაზედ მოვიყვანდით. გვიკვირდა ასეთი კერპობა! იტყოდით, მათხოვარია, რომელსაც უჭუჭყოდ და უმატლოდ ცხოვრება შეუძლებლად მიაჩნია და განცვიფრებული შეჰყურებს, ვინც მას სუფთა სარეცხს აჩუქებსო.

მაგრამ ჩვენს გზას მიყვებთ.

მინდორი გავიარეთ და მთის ფერდობს მივადექით. მთელი ფერდობი ვენახებით იყო გაშენებული და, მართალი უნდა მოგახსენოთ, ისე კარგად მოვლილი ვაზი მე ჩემს დღეში არსად მინახავს. მთისთვის რომ შეგეხებნათ, იტყოდით, კიბე მიუდგამთ ზედ და ამ კიბის ყოველ საფეხურზედ ვაზი დაურგავთო. ვიცი, ძალიან მშრომელია გერმანელი, ისიც ვიცი, რომ ძალიან უყვართ კარგი ღვინო, მაგრამ იმას კი ვერ წარმოვიდგენდი, რომ ზურგით აიტანდა იმ სიმაღლე მთაზედ პატივს და მიწას და ციცაბო კლდეზედ სამაგალითო ვენახს გააშენებდა. გაკვირვებულნი ვიყავით ყველანი. საუცხოო სურნელოვანი ღვინო გაიხელით — თეთრი და ვარდისფერი; მაგრამ იმისთანა მაგარი რამ იყო, რომ ძალიან კარგი მსმელი უნდა ყოფილიყო, რომ ორი ბოთლისთვის გაეძლო და იქვე სუფრაზედ არ გადაგორებულყო.

ჩვენ რომ მივედით, რთველი ჰქონდათ, თითქო ომი და ჯარების სვლა იმათ სრულიადაც არ შეეხებათო. ჰკრეფდნენ გაფაციცებულნი და მოსაკიდებით ეზიდებოდნენ ყურძენს. ხანდახან შედგებოდნენ და მალლიდან, დაბლად გასხლულ ვაზებიდან გადმოგვხედავდნენ. გაუ-

მარჯოს რესპუბლიკას! შევეძახოდით ძირიდან და ისინიც მზიარულად ქედს გვიხდიდნენ და ქალები ცხვირსახოცს გვიფრიალებდნენ. ეპ, რა კარგი იქნება, რომ სხვადასხვა ერს ერთმანეთში შეთანხმება შეეძლოს! რა კარგი იქნება, რომ თავიდან მოიშორონ ის ქვეყნის მტერი მეფენი, რომელნიც კაცობრიობას ძალად ხალხებად ჰყოფენ და მით ღიდებას იხვევენ. სამოთხე საიქიოს კი არა, სააქაოს გვექნებოდა.

ორ საათზედ ერთ კარგ სოფელში გაჩერდა ჯარი პურის საკმელად.

სამ საათზედ ისევ გზას გავუდექით და ცხრა საათზედ იმ საღამოსვე პატარა ქალაქ ალზიეში შევედით, მაინცის ახლოს. დიდი მანძილი გავიარეთ იმ დღეს და ისე დავიღალენით, რომ ბევრს ჩვენგანს მეტი სიარული აღარც კი შეეძლო.

ჩემს დღეში არ დამაფიწყდება ალზიე. ისე იყო ჯარებით სავსე ქალაქი, რომ გავლა აღარ შეიძლებოდა, ჩვენ რომ შევედით. მე, ივანე სომი, ჩვენი მენალარე ივანე და მარკოზ დივე ერთად დაგვაყენეს იმ დამეს ერთს ფოსტის მოხელესთან. ჩვენი ოთახი ზემო სართულში იყო, რომლის ფანჯრიდან ფოსტის ეტლებით სავსე ეზო ჩანდა. ვახშმად მასპინძელმა თავისთან მიგვიპატიჟა.

იმისთანა დიდი და მშვენიერი სამზარეულო ჰქონდა, რომ ნათლიაჩემის სამზარეულო იმასთან სახსენებელიც არ არის. ალბად ძალიან შემძლებელი კაცი იყო ჩვენი მასპინძელი, რომ ბუზივით ირეოდნენ მოსამსახურეები, მოახლეები, ფოსტალიონები და შიკრიკები. უნდა გენახათ, რა ამბავი ატყდა ეზოში, როდესაც დაიძახეს — საფრანგეთის დროშები შემოიტანეს ქალაქშიო! იხუტეს იმოდენა მოსამსახურეებმა, გაცვივდნენ ეზოში და ყველას უნდოდა თავლიდან ცხენი გამოეყვანა და ცხენით დახვედროდა უმთავრესს ჩვენს ჯარს.

გამოვიცვალეთ თუ არა ფეხსაცმელი, მაშინვე სამზარეულოში ჩავედით, რომ გავმთბარიყავით. შევედით და მოახლეებიც თან დაგვედგნენ; იდგნენ შორიახლოს და ისე გვსინჯავდნენ, თითქო რესპუბლიკელი სულ სხვანაირი ადამიანი უნდა იყოსო. გვიყურებდნენ გაშტერებული, მაგრამ როგორც კი მივიხედავდით იმათკენ, დამფრთხალი მტრედებივით აიშლებოდნენ.

ცოტა ხანს უკან მასპინძელიც მოვიდა. მაღალ-მაღალი კაცი იყო, გამხდარი, შავგვრემანი, შავთვალწარბა.

— გამარჯვება თქვენი, მამულიშვილნო! — მოგვესალმა ფრანგულად. — მობრძანდით, სუფრა გაშლილი გახლავთ.

იმისთანა მშვენიერად იყო მორთული სასადილო ოთახი, თითქო უბრალო ჯარისკაცებს, და ისიც ძალად ჩაყენებულს კი არა, გული-

თან მეგობრებს ელოდებოდა სახლისპატრონო. სუფრა მართლა გაშლილი დაგვხვდა, მაგრამ ჩვენი მასპინძელის ცოლი და ქალები კი იქ არ იყვნენ.

დავსხედით და პირჯვარი გადავიწერეთ. ხან მოსამსახურე შემოვიდოდა, ხან ფოსტალიონი და ისიც განკარგულებას აძლევდა და თან ზოგს საჭმელსა გეთავაზობდა, ზოგს ღვინოს გვისხამდა, თითქო ჩვენზედ უკეთეს სტუმარს ის ნატვრითაც ვერ ინატრებდა. ბასი, რასაკვირველია, ჩვენს ომს შეეხო და რევოლუციას. ჩვენი მასპინძელი ყველაფერზე დალაგებით, დარბაისლურად ლაპარაკობდა და მით უფრო გაკვირვებულნი ვისმენდით იმის სიტყვას, რომ მშვენიერ ფრანგულს ლაპარაკობდა, ძველს, წმინდა ფრანგულს.

ამ ლაპარაკში ისე გავერთენით, რომ თერთმეტი საათი დაჰკრა და ჩვენ კი ისევ სუფრაზედ ვისხედით. ქალაქს უკვე ეძინა; ეძინა ქალაქის მიდამოსაც და ჯარის დარაჯების დროგამოშვებით ძახილი რომ არა ყოფილიყო, სრული მდუმარება იქნებოდა ჩვენს გარშემო. ივანე სომმა ჩიბუხს მოუკიდა. მასპინძელმა ერთხელ კიდევ დაგვისხა ღვინო. ველარ მოვითმინე და ვკითხე:

— ეს მიბრძანეთ, თუ შეიძლება, მამულიშვილო... თქვენ ისეთ წმინდა ფრანგულს ლაპარაკობთ, რომ არც კი გამიკვირდება, რომ ფრანგი ბრძანდებოდეთ.

— მართალსა ბრძანებთ, — მიპასუხა მასპინძელმა, — მე ფრანგის შთამომავალი გახლავართ. ერთის იმ უბედურთაგანის შთამომავალი, რომელიც თავიანთ სარწმუნოებისა გამო განდევნილ იქმნენ სამშობლოდან.

ესა თქვა და ჩაფიქრდა. მეც გულაჩქოროლებული შევყურებდი ასე მოულოდნელად ნაპოვნს ჩემი ქვეყნის შვილს. ჩემსავით ფრანგს, ჩემს ძმას და ბრაზი მომდიოდა იმ სისულელეზედ, რომელიც სარწმუნოების სახელით ძმას ძმაზედ ამხედრებდა და სამშობლოდან სდევნიდა. მაშინ სულ სხვა თვალით შევხედე ჩემს მასპინძელს, დაწვრილებით ვუამბე შოველის ამბავი და ისიც ვუთხარ, რომ შოველის ქალი და მე დანიშნულები ვართ-მეთქი.

— ბედნიერებაც ის არის, რომ კაცმა პატიოსან ოჯახიდან გამოიყვანოს თავისი საცოლუ, — მითხრა ამაზედ სახლის პატრონმა.

მერე კი თითონაც გვიამბო თავისი ამბავი. მისი პაპა იაკობ მერლინი სერკინის ახლოს მდგარიყო და კარგი შეძლებული ოჯახიცა ჰქონოდა — სახლით, კარით, საქონლით და მამულით; კალვინისტი თურმე იყო და, ღმერთმა ხომ იცის, სიკეთის მეტს არავის რას უშვრებოდაო. სწორედ იმ დროს მოინდომა დიდებულმა მეფემ ლუი XIV თავის ცოდვათა მონანიება: მოგვხსენებათ, მეფე ლუი XIV

საშინელი გარყვნილი კაცი იყო, და თუმცა დედოფალი ცოცხალი ჰყავდა, ისე იცვლიდა ცოლებს, როგორც ცხვირსახოცებს. დიად, მეფემ მოინდომა ცოდვათა მონანიება, რათა საიქიოსაც არ დაჰქარგოდა მეუფება და ღვთის გვერდით ისიც ტახტზედ ყოფილიყო გამოჭიმული უკუნითი უკუნისამდე.

ბერებმა კარგად ისარგებლეს ამით და გამოტყინებულს მეფეს მოახსენეს: შენ იმისთანა ცოდვილი ბრძანდები, რომ თუ გინდა საუკუნო სასუფეველი დაიმსახურო, ერთიანად უნდა ამოჟლიტო კალვინისტიები დიდი პატარამდე, რათა განიწმინდოს შენი სამფლობელო უწმინდურებისაგანაო. ამაზედ უკეთესი რა იქნება: სიყმაწვილეში, მანამ ჯანი და გული მოგდევს, სცოდე და იმრუშე, რამდენიც გენებოს; და სიბერეში, როდესაც ცალი ფეხი საფლავში გედგას, ბერებს მიმართე და ისინი გასწავლიან ცოდვათა მონანიებას. მეფე ლუი XIV ასწავლეს ბერებმა. და იმანაც ბრძანება გასცა: მოსანანიებლად ცოდვათა ჩემთა, საცა საფრანგეთში კალვინისტი იყოს, კათოლიკური სარწმუნოება მიაღებინეთ და ამისთვის ყოველი ღონისძიება იხმარეთ! და იცით, რა ღონისძიებას ხმარობდნენ ჩვენს წინააღმდეგ? დედას შვილს სტაცებდნენ; ოჯახის მაცხოვრებელ მამას მთამადნებში სამუშაოდ გზავნიდნენ შებორკილს; ყოველ საკუთრებას გვართმევდნენ სახელმწიფოს სასარგებლოდ; და რასაც ვერ წაიღებდნენ, სწვაებდნენ, ანგრევდნენ, წყალს აძლევდნენ. გაუძალიანდებოდა ვინმე და წამებას მიაყენებდნენ. გიჟები უნდა ყოფილიყვნენ, რომ ის სარწმუნოება მიეღოთ, რომლის სახელით მათ აწამებდნენ და რომელსაც ეკუთვნოდა ღვთისა და ქვეყნის მტერი მათი მტანჯველი მეფე. აიყარა მაშინ საფრანგეთი და თუმცა ყველა საზღვრები შეკრული იყო და ვისაც მოასწრებდნენ, ძალღებსავით ხოცავდნენ, დიდძალი ხალხი გაიპარა საზღვარგარეთ. მიდიოდნენ საწყალები და თან თავიანთი წვრილშვილი და მოხუცებულები მიჰყავდათ, სხვას ყველაფერს თავს ანებებდნენ. რამდენიმე ასი ათასი ოჯახი გაიხიზნა მაშინ სამშობლოდან და, რადგან ყოველი ცოდნა და ხელოვნება კალვინისტებში მოიპოვებოდა და ამასთან პატიოსნებას მათ მტერიც კი ვერ უძრახავს, საცა მივიდნენ უცხოეთში, იქ გააჩადეს ფრანგული ვაჭრობა და მრეწველობა. გერმანიამ, ინგლისმა, ჰოლანდიამ და თვით ამერიკამაც უცბად წამოიწიეს მაშინ მრეწველობით და საფრანგეთმა კი უკან დაიწია. რითიც კი განთქმული იყო საფრანგეთი, შალეები, ტყავი, ჭურჭელი და სხვ. და სხვ., ერთი სიტყვით, სუყველაფერი, რაც კი შეადგენს ერის სიმდიდრეს, უცხოეთში უკეთესი მზადდებოდა, ვიდრე თვით საფრანგეთში. მეფე კი თავისას არ იშლიდა და ფულს ისე აბნევდა, თითქო მტკვრია და

აწუხებსო; ამასთან შეუწყვეტელი ომი ჰქონდა თავის მეზობლებთან. ხარჯი დღითიდღე მატულობდა და საუკეთესო მუშაკნი კი უკვე განდევნილნი იყვნენ სამეფოდან, რომ თავიანთი ნამუშევარი საზღვარგარეთ გაეზიდათ და სამეფოში ფული შემოეტანათ. ქვეყანა გაღარიბდა, გაღატაკდა. მეფე ლუი კი თავისას არ იშლიდა და, როდესაც ისე დაუძლურდა, რომ ვეღარას იმაგრებდა, ეგდო თავის სობინძურეში და ღმერთსა ჰგმობდა:

— ღმერთო, ღმერთო! განა ასე დამიფასე, რაც მე შენთვის ხალხი ვტანჯეო?!

— მარტო ეს სიტყვებიცა კმარა, რომ წარმოიდგინოთ, რა უგუნური უნდა ყოფილიყო მისი დიდებულება! დარწმუნებული იყო უბედური, რომ ყოვლად შემძლებელი ღმერთი, ღმერთი ცისა და ქვეყნის მპყრობელი, მე თუ არ დავებმარე, საქმეს ვერ გაირიგებსო! ბოლოს, როგორც იყო, თქვენი ჭირი წაიღო და დიდი ვალი უანდერძა სამეფოს. ამ ვალმა მეფე ლუი XV დროს უფრო და უფრო იმატა, რადგან საფრანგეთში აღარც რამე წარმოება იყო, აღარც მრეწველობა და ყველაფერი საზღვარგარეთიდან შეჰქონდათ. საქმე იქამდის მივიდა, რომ მეფე ლუი XVI, რაკი ველარა მოუხერხა რა ამ ვალს, იძულებული იყო დიდებულნი მოეწოდებინა და მერე თვით საერო კრებაც, რომელსაც მოჰყვა რევოლუცია, ადამიანის უფლებათა აღიარება, წარჩინებულ წოდებათა უპირატესობაჲთა გაუქმება, ერთი სიტყვით, იმისთანა წესწყობილება, რომ მუშაკაცმა თავის ნაშრომზედ გაიხაროს და მუქთახორა სხვისას აღარა სჭამდეს.

აი, რა გვიამბო ძველმა ფრანგმა.

მერე პირად თავის ოჯახის ისტორიას შეეხო; გვიამბო, როგორ მიუვარდნენ მის პაპას ერთ საღამოს დრაგონები ბრძანებით, ეხლავე კათოლიკური სარწმუნოება მიიღეთო. დაერივნენ ჯარისკაცები იპაურობას. გაგვძარცვეს, სუყველაფერი წაგვართვეს, რაც კი ღირდა რადმე; გვცემდნენ ხმლის ყუით და მათრახებით; მაწოვარს ნებას არ აძლევდნენ ბავშვისთვის ძუძუ მიეცა. გეტანჯავდნენ, გვაწამებდნენ, რომ ჩვენი ღმერთისთვის გვეღალატნა. ბოლოს ისე შეგვაწუხეს, რომ ერთ ღამეს სუყველაფერს თავი დავანებეთ, — წინაპართა საფლავებსაც, სახლ-კარს და საკუთარი ოფლით მორწყულ მამულებსაც — და გამოვეპარენით ჩვენს მტარვალებს. გამოვედით უცხოეთში და არც ფული იყო ჩვენთვის, არც პური, არც ბინა, არც მეგობარი და ნაცნობი. შინ კეთილ ცხოვრებას ჩვეულნი, ახლა დღიურ მუშად უნდა გავსულიყავით, რომ ლუქმაპური გვეშოვნა როგორმე. ჩვენი ცოლები და ქალები მოჯამაგირებდად, მოახლეებდად უნდა დამდგარიყვნენ და ვინ იცის, რამდენი შეურაცყოფა და დამცირება

აეტანათ. ჩვენი მოხუცებულები, რომლებსაც თავისი წილი უკვე ეშრომნათ და ახლა მოსვენებადა უნდოდათ, წელში მოხრილნი, ათრთოლებული ხელებით მაინც საქმეს ეძებდნენ, რომ შიმშილით არ დახოცილიყვნენ. ღმერთო, ღმერთო! მერე რისთვის გვტანჯეს ამოდნა? მარტო იმისთვის, რომ ვიღაცა გარყვნილს და გიჟს ეგონა ამით მოვიპოვებ სასუფეველსა ღვთისასაო!

— საფრანგეთში ჩვენი სახლ-კარი და მამულები მართებლობას და ჯაშუშებს დარჩათ. — განაგრძო სახლის პატრონმა. — დიდი ხანი ეწვალნენ პაპაჩემი და მის სახლობა, დიდი ხანი იტანჯნენ და შვილებს დიდი განძი დაუტოვეს სამკვიდროდ: შრომის სიყვარული და ყიარათი. მას შემდეგ მოღის ჩვენი ოჯახი და ღვთით, შრომით და ყიარათით ისევ ფეხზედ წამოვაყენეთ ძველი, ყველასგან პატივცემული გვარი.

გაჩუმდა. ეტყობოდა მწარე ფიქრებმა გაიტაცეს. მაშინ ვკითხე:

— ნუ თუ თქვენს დღეში არ დაგნანებიათ თქვენი სამშობლო? ნუ თუ ჩვენც გვემდურით რასმე? ჩვენ ხომ თქვენთვის არაფერი დაგვიშავებია? თქვენ მეფისაგან გპირთ, რაცა გპირთ; ხალხს თქვენთვის არაფერი დაუშავებია. მეტადრე იმ დროს: იმისთანა გაუნათლებელი რამ იყო ხალხი, რომ ავიც რომ ექნა რამე, სიბრალულის ღირსი უფრო იქნებოდა, ვიდრე სიძულვილისა.

— რაც ხანი ბურბონები მეფობდნენ საფრანგეთში, — მიპასუხა მასპინძელმა, — ჩვენგანს ერთსაც არავის უნანია დაკარგული სამშობლო. მაგრამ მას შემდეგ, რაც ხალხი აიშალა, ადამიანის უფლებანი აღიარა და მათ დასამტკიცებლად იარაღით წინააღმდეგ მთელი ქვეყნის მტარვალებს, ჩვენმა ძველმა ფრანგულმა გულმაც კვლავ ფეთქვა დაიწყო და ყველა ჩვენგანმა ამაყად წამოიძახა, მეც ფრანგი ვარო!

და ეს რომ თქვა, ფერი წაუვიდა და, არ შემნიშნონო, წამოდგა და სიარული დაიწყო. ივანე სომი ნიდაყვებზედ დაყრდნობილი გაჩუმებული ყურს უკვებდა მის ლაპარაკს. მერე ჩიბუხი გამობერტყა და თქვა:

— დამიწყებენ, ენკენისთვის ამბებიო! განა ეგ უარესი არ არის? მაშინაც ხომ განსაცდელში არ იყო სამშობლო, რომ ასე აწამებდნენ ამ საწყლებს! მაშინაც ხომ ომი არ იყო, რომ მოღალატე გენერლებს უომრად დაეთმოთ მტრისთვის ჩვენი ციხე-ქალაქები? მაშინ ხომ პრუსიელები შამპანში არ იყვნენ! რა დააშავეს მერე კალვინისტებმა? ქვეყნის ღალატს აპირებდნენ, თუ რა? ცხოვრობდნენ თავიანთთვის და სულ იმის ნატვრამი იყვნენ, რომ თავისებურად ელოცათ ღმერთი!... რა გვიან ყოფილა! უჟა დამეა, ბიჭებო! ხვალ აღრე დაიდურის ჩვენი რაზმი.

ყველანი ავდექით. მასპინძელმა სანთელი აანთო, კიბემდის მიგვაცილა, და ღამე მშვიდობისა გვისურვა.

რა კარგად მახსოვს ეს ამბავი. მგონი მაშინვე მარგალიტას მივწერე დაწვრილებით. ალბათ დაიკარგა წერილი. მაგრამ წერილი რა საჭიროა, მე უიმისოდაც მშვენივრად მახსოვს ალზეელი ფრანგის სიტყვები. თუ არიან საღმე იმის შვილიშვილები, იქნება ხელთ ჩაუვარდეთ ჩემი ისტორია და გაიგონ, რა აზრისა იყო მათი პაპა მეფე ლუი XIV-ზედ.

V

მეორე დღეს დილაადრიანად მაინციის გზას გავუდექით. უკანასკნელი ორი კვირის განმავლობაში იმისთანა ბურუსი იდგა მთელს იმ მხარეში, რომ ათს ნაბიჯზედ კაცს ვერ გაარჩევდით; ბურუსს წვიმაც მოჰყვა და ჯერ შუადღე არ იყო, რომ თავით ფეხებამდე გაწუწულები მივტოპავდით ტლაპოში. საღამომდის იწვიმა. ჩვენდა საუბედუროდ იმისთანა ქუდები გვეხურა, რომ ღრუბელივით გაიფლინებოდა ხოლმე და კარგა ხანი გაივლიდა, ვიდრე სრულებით გაშრებოდა.

ძალიან სასიამოვნო ამბავი გვითხრეს გზაში: ვორმიდან წასულს ჩვენს ჯარს რეინის პირას ჩაველო და ოპენჰეიმის ხიდი უკვე ხელთა ჰქონდა. მაინციის მისავალში, რაც სიმაღლეები არის, ჩვენს ჯარებს დაეჭირათ; მაინცი იქვე იყო ჩვენს თვალწინ თავისი ვენახებით, რომლებიც ტყეს უერთდებოდა.

იმ საღამოს ჩვენი რაზმი ტყის პირას დააყენეს ქალაქის პირდაპირ. კარვები დავდგით, დარაჯები დავაყენეთ და საჰმელის მოსატანად გავგზავნეთ ბიჭები; ჩვენ კიდევ ცეცხლის ანთებას ვცდილობდით, მაგრამ მოდი შენა და ნედლ შეშას, ისიც წვიმიან დღეში, ცეცხლი მოუკიდე. ჩვენი ბატალიონი წისქვილის ახლოს იდგა და ვერ წარმოიდგენთ, რა სახით გვსინჯავდნენ მეწისქვილე და მისი ოჯახის შვილნი. სწორედ იმ წისქვილში ჩამოხტა გენერალი კუსტენი თავის ამალით და, რასაკვირველია, იმ ღამეს მეწისქვილესთვის არავის არაფერი არ წაუერთმევია, თორემ ისე გავანადგურებდით იქაურობას, რომ მეორე დღეს აღარც პური ჰქონოდა, აღარც ღვინო და აღარც თივა. რას იზამთ? ომის შედეგი ეს გახლავთ და როცა კუჭი შიმშილით გეწვის და თანაც იცი, რომ მტერი გარს გახვევია, საკუთარი სიცოცხლის მეტი აღარა გეზოგება რა.

იმ ღამეს წისქვილს ჰუსარები შემოერტყნენ და მეწისქვილემ იქნება ვერც კი გაიგო, რა ბედნიერი იყო, რომ გენერალს გაუმასპინძლდა და არა მთელ ჯარს.

ცეცხლი ავანთეთ, როგორც იყო. ხორცი დაგვირიგეს. საშინელი ბნელი ღამე იყო. მშვენიერი სანახავი იყო ცეცხლით გაჩაღებული, ტყით დაჩრდილული ჩვენი ბანაკი, რომელზედაც ხეებიდან წვიმის წვეთი ცვივოდა, მაგრამ ჩვენ ისე დაღლილები ვიყავით, რომ მოსვენების მეტი აღარა გვაგონდებოდა რა. პური გიახელით და იქვე მივეყარებით სველ მიწაზედ...

ისე ტკბილად ჩემს ღღეში არსად არ მძინებია.

მეორე დღეს, 19 ღვინობისთვეს 1792 წ. მაინცის ერთ-ერთი კარი უნდა შეგვემტერია; ყველა ხედავდა, რომ აქ ისე ადვილად ვერ გავიმარჯვებდით, როგორც სპირში, რადგან ქალაქი სამაგალითოდ იყო გამაგრებული. მაგრამ დიდი რამ ყოფილა გამარჯვება: თუ ერთი გაიმარჯვა კაცმა, მერე აღარავის დაერიდება, თუნდა ასზედ მიდიოდეს მარტოდმარტო. გარდა ამისა ისიც ვიცოდით, რომ დღეს გენერალი წინ იმ რაზმებს გაგზავნიდა, რომელნიც ჯერ ბრძოლაში არა ყოფილიყვნენ. წინ გაგზავნიდა და კარგად იცოდა, ძალიანაც რომ გასჭირებოდათ, ზურგს არ უბრუნებდნენ მტერს. ღვთის მადლით, მაინცის მოურავი არაფრით ჰგავდა ქ. სპირისას: მაინცის მოურავი წარჩინებული კარისკაცი იყო, ერთი იმათგანი, რომელნიც გენერლობას ლამაზი ქალის წყალობით გაიკრავენ ხოლმე. კუსტენს მაშინვე აცნობეს რესპუბლიკის მომხრე გერმანელებმა ეს გარემოება და იმასაც იმედი მიეცა, იქნება ისე მოვახერხოთ საქმე, რომ ბარონმა გიმნოხმა თავისთავად გაგვიღოს ქალაქის კარი და ბრძოლა აიციდინოსო. ამისთვის საჭირო იყო ბარონისთვის ეგრძნობინებინა, რა განსაცდელში ჩააგდებდა იგი თავის თავს და მთელს ქალაქს, თუ ფრანგების ჯარს გაუძალიანდებოდა. იმისთანა ეშმაკურად გააბა კუსტენმა მახეში მისი ბრწყინვალე ბატონი ბარონი, რომ სიცილით იხსოვებოდა მთელი ჩვენი ჯარი.

უნდა მოგახსენოთ, რომ მაინცში, სულ ცოტა რომ ვსთქვათ, ექვსი ათასი კაცი მაინც იქნებოდა შეიარაღებული, — გარნიზონი: ავსტრიელები, დიდებულების მონადირეები და მოსამსახურეები, და, ასე გასინჯეთ, თვით სტუდენტებიც კი რაზმად შემდგარიყვნენ და იარაღით გვიპირებდნენ დახვედრას. სპირში ავსტრიელები სამი ათასიც არ იქნებოდნენ; გარდა ამისა მაინცს ისეთი სიმაგრეები ერტყა, რომ მისი აღება ძალიან გაგვიჭირდებოდა.

19 ღვინობისთვეს კუსტენი თითონ გავიდა მაინცის ციხეების დასათვალიერებლად; თან მერიე და ორი-სამი აფიცერი სხვა ახლდა. ბანაკიდან მშვენიერად ვხედავდით შორს მტრის სიმაგრეებთან მისულს ჩვენს უფროსებს და მართლაც ისე ახლო მისულიყვნენ, რომ ციხიდან სროლა დაუწყეს. ჩვენი ბანაკიდანაც ზარბაზანი დაცალეს.

ატყდა საშინელი სროლა. იმავე დროს მაინცის ციხიდან ცხენოსანი რაზმი გამოვიდა და ჩვენებს დაედევნა. კუსტენმა ცხენი გამოაბრუნა ისიც კმაროდა, რაც ნახა: დარწმუნდა, რომ მაინცის აღება შეუძლებელი იყო, თუ მთელი თავისი ჯარით ერთ რომელსამე ციხეს არ მიადგებოდა და არ შეანგრევდა.

საუბედუროდ, შამპანში დამარცხებულ პრუსიელებს მღვეარი არ მოსდევდა, რადგან გენერალ დიუმურიეს იმის მაგივრად, რომ ერთიანად ამოეწყვიტა, გზა მშვიდობისა დაელოცა მათთვის. შეძლებოდა უკანიდან მოევლოთ ჩვენთვის; შეიძლებოდა ისე მოეგვარებინათ საქმე, რომ წინ მაინცის სიმაგრეები ყოფილიყო, უკან ისინი და შუაში ჩვენ შეგემწყვდიეთ. ამიტომ დაჩქარება იყო საჭირო: ან ქალაქი უნდა აგველო, ან უკან გავბრუნებულიყავით.

დარწმუნებული ვიყავით, იერიშით მივალთ და ქალაქს ავიღებთო.

მთელი დღე მზადებაში გავატარეთ. მეორე დღეს რაზმის უფროსი ჰუმარი მაინცს წავიდა მოსალაპარაკებლად. დიდი ხანი იყო ქალაქში და სადილს უკან პირველ საათზედ დაბრუნდა. ბრძოლა აუცილებელიაო, ვიძახდით და ბრძანებასლა ველოდით. მაგრამ ბრძანება არსად იყო და ახლა სხვანი მიდიოდნენ მოსალაპარაკებლად. საღამოს 6 საათზედ კუსტენმა თავის ამალით მთელი ჯარი დაათვალიერა. ამბობდნენ, ქვემოშარანტელებმა შეჰყვირეს: იერიშით! და იმანაც უპასუხა: ძალიან კარგი მზად იყავით... ყველაზედ წინ თქვენ იქნებითო!

— რესპუბლიკას გაუმარჯოს! — შესძახა ჯარმა თავის საყვარელ გენერალს, როდესაც ერთი კაცი კიდევ გამოვიდა ქალაქიდან და მოსალაპარაკებლად წამოვიდა. კუსტენი წინ მიეგება და თითონვე შემოიყვანა ბანაკში, ისე რომ თვალები არც კი აუხვია. ჯარი კი თავისას გაიძახოდა:

— იერიშით მივიდეთ! იერიშით!

დაღამდა. ვფიქრობდით, ხვალ დილით ხელჩართული ბრძოლა მოგვიხდება მტერთან, რადგან ციხის სანგრევი დიდრონი ზარბაზნები ერთიც არა გვაქვსო.

მაგრამ გათენდა 21 ღვინობისთვე და ბრძოლის ნიშანი კი არსად იყო. საშინლად ღელავდა მთელი ჯარი. ცხრა საათზედ ქვემო შარანტელებმა ბრძანება მიიღეს — რეინის შესავალი დაიჭირეთო. სულგანაბულნი შეეცქეროდით მიმავალ რაზმს; დარწმუნებული ვიყავით, რომ ერთიც ვერ გადაჩებოდა მტრის ტყვიას; მაგრამ ისე მივიდნენ რეინის პირას, რომ თოფიც არ გავარდნილა; მერე ვენახებს შეეფარნენ. და უცბად ხმა გავარდა, მაინცი დაგვნებდაო. შარანტელები იმი-

ტომ გაგზავნეს, რომ დარაჯად იყვნენ რეინის შესავალთან, ვიდრე მოურავი ქალაქის ხაზინას გაიტანსო.

ჩვენს სიხარულს საზღვარი არა ჰქონდა. მართალია, ვყვიროდით იერიშით მივიდეთო, მაგრამ თვალეები ყველას გვექონდა და კარგად ვხედავდით, რომ ციხეებიდან უზარმაზარი ზარბაზნები გადმოიქცირებოდნენ ჩვენკენ. თვალეები ყველას გვექონდა და ისიც ყველამ ვიცოდით, რომ ოთხში ერთი რომ გადარჩენილიყო, ისიც საკვირველი იქნებოდა.

მეორე დღეს მაინცში შევიდა ჩვენი ჯარი. მთელი ქალაქი წინ გამოგვეგება.

იქნება იუცხოვრით და, მართალს კი მოგახსენებთ; მაინცელებმა დიდი სიყვარულით მიგვიღეს. მოქალაქენი, სტუდენტები და ჯარები წინ მოგვეგებნენ თავიანთი ბაირალებით და მუსიკით; სალამს გვაძლევდნენ, და როდესაც სამხედრო მოედანზედ ავსტრიელი დარაჯების ალაგას ჩვენები დააყენეს და ჩვენ კიდევ ბინის ბარათები დაგვირიგეს, მოგვეცივდნენ მოქალაქენი, ხელიხელ გადახვეული წაგვიყვანეს თავიანთსა და ისე გაგვიმასპინძლდნენ, რომ უკეთესი აღარ შეიძლება. შეგვიყვანდნენ სახლში, გაგვიშლიდნენ კარგ სუფრას და— აბა რეეოლუციის ამბავი გვიამბეთო — გვეხვეწებოდნენ და დიდი პატარამდე ყურს გვიგდებდნენ.

იმისთანა მშვენიერი ლუდი, როგორც იმ საღამოს მაინცის ლუდხანებში ვსვით, მე ჩემს დღეში აღარსად შემხვედრია. მთელი ქალაქი გარეთ იყო, ქუჩებში და ლუდხანებში, და ყველგან მხიარული სიმღერა ისმოდა. მეტადრე ლუდხანებში; მთელი ქვეყნის პატრიოტების სადღეგრძელო სვეს იმ დამეს! გადაჰკრავდნენ ერთ-ორ სადღეგრძელოს, მერე წამოიშლებოდნენ — უბრალო მუშები, ან გლეხაკები — და ცეკვას დაიწყებდნენ, თანაც სახუმარო ლექსებს ამბობდნენ. მეტადრე ერთი მოხუცებული მუშა მომეწონა: იმისთანა მშვენივრად აჯავრებდა ჩვენი რაზმის უფროსს ჰუმარს, რომელიც მაინცში მოურავთან მოსალაპარაკებლად მისულოყო; იმისთანა მშვენივრად აჯავრებდა შეშინებულ ქალაქის მოურავს, რომ სიცილით დაგვზოცა ყველანი; ბარონი ბრაზობდა, ყვიროდა; ჰუმარი უმტკიცებდა, ჩვენს ზარბაზნებს ერთ დღესაც ვერ გაუძლებს ქალაქიო... ბარონი ხან ცისკენ აღაპყრობდა ხელებს და ხან სასოწარკვეთილი ეფიცებოდა: რა ექნა, ბრძანება მაქვს და ისე უნდა მოვიქცეო.

მაგრამ, მგონი, ამას ისა სჯობდეს, რომ კუსტენის წერილი და მაზედ ბარონ გიმნიხის პასუხი გადმოგიწეროთ, რომ თქვენი კეთილი თვალითა ნახოთ, რა მახეში გააბა კუსტენმა მაინცის მოურავი. აი სიტყვისიტყვით ეს წერილები:

მარიენბორნის ბანაკი 20 ლეინობისთვე 1792 წელს.
წელიწადი პირველი საფრანგეთის რესპუბლიკისა.

ბ ა ტ ო ნ ო მ ო უ რ ა ე ო ,

მე იმდენად მოწინააღმდეგე გახლავართ უბრალოდ სისხლის ღვრისა, რომ სიამოვნებით ავასრულებდი თქვენს თხოვნას და ხვალამდე კიდევ დავუცდიდი პასუხს; მაგრამ რა ვქნა, ბატონო, რომ ჩემი ჯარები ველარ შემოიკავებია. მოუთმენლად ელიან თავისუფლების მტრებთან შებრძოლებას, რომ რესპუბლიკის დროშას დიდება მოჰქვინონ და თითონ ნადავლი შეიძინონ, რადგან, არ დაგიმალავთ, ბრძოლა ხელდახელ მოგვიხდება და გამარჯვებულთა ღირსეული ჯილდო იქმნება, რასაც თავიანთ სისხლით აღებულ ქალაქში იშოვიან. მერწმუნეთ, თქვენზედ არა ნაკლებ ვიცნობ მე მაინცის სიმამრებს: ისიც კარგად ვიცი, რაოდენი ჯარი დგას შიგ გარნიზონად. თქვენზედ გახლავთ დამოკიდებული ამოდენი ხალხის სიკვდილ-სიცოცხლე. თუ ინებებთ, არც ქალაქს დაღუპავთ და არც უბრალოთა სისხლს დააქცევთ. ჩვენი სიცოცხლე არაფერია, ბატონო! ჩვენ ჯარისკაცნი გახლავართ და ისე შევჩვევივართ ბრძოლას, რომ სიკვდილი არაფრად მიგვაჩნია. მე ერთგული მოსამსახურე გახლავართ, ბატონო, რესპუბლიკის და მის დიდებისა და ნება არა მაქვს რესპუბლიკის მტერთა დევნა დავუშალო ჩემს ჯარებს. ნება არა მაქვს ჩემს ჯარებს თავისუფლების შეურაცხმყოფელთა დევნა ავუკრძალო, როდესაც ისინი თითქმის უომრად გაურბიან ჩვენს ძლევამოსილ დროშას. პ ა ს უ ხ ი. ბ ა ტ ო ნ ო , პ ა ს უ ხ ი!

საფრანგეთის მამულიშვილი
გენერალი კუსტენი“.

„მაინცის მოურავისაგან საფრანგეთის რესპუბლიკის
გენერალ კუსტენს. ქ. მაინცის დამოობის შესახებ.

ქ. მაინცი 20 ლეინობისთვეს 1792 წ.

ბ ა ტ ო ნ ო გ ე ნ ე რ ა ლ ო ,

ღარწმუნებული გახლავართ, ცოტა მეტად რომ გცნობოდით, მუქარით არ მომმართავდით. რადგან მე ჯარისკაცი გახლავართ და სრულიად არ მეშინია სიკვდილისა, თუ კი ჩემს მოვალეობას არ ვუმტყუნებ. მუქარით, ბატონო, გენერალო, მე ვერა-

ვინ მაიძულებს უბრძოლველად დავუთმო ქალაქი, მუქართ არ მიმმართავდით, რადგან მე ჯარისკაცი განსაჯარო, ბატონო, ყოველი გაჭირვება და განსაცდელი ავაცდინო მოქალაქეთ და ამიტომ, მარტო იმ ზარალის ასაცდენად, რომელიც მოსდევს ბრძოლას, შემიძლია, რადგან ამისთვის სრული უფლება მაქვს მონიჭებული ჩემი მეფისაგან, ქალაქი დავითმით შემდეგი პირობებით:

1. ქ. მაინციის გარნიზონს და მის მოსარჩლე ჯარებს ნება ექნებათ თავისუფლად გავიდნენ ქალაქიდან თავისი სამხედრო ხაზინით, ზარბაზნებით და ბარგით.

2. მინისტრს და ყოველს მოხელეს, მის დიდებულების, ჩემი მეფისას და აგრეთვე სასულიერო წოდებას ნება ექნებათ თავისუფლად გავიდნენ ქალაქიდან ყოველი თავისი ქონებით. მაინციის ყოველ მკვიდრს, ქალაქში მყოფს თუ სხვაგან წასულს, ექნება იგივე უფლება და ხელშეუხებელი დარჩება ყოველი მკვიდრის საკუთრება.

3. რადგან მის დიდებულებას, ჩემს მეფეს, საფრანგეთისთვის ომი არ გამოუტყხადებია, იგი შემდეგშიაც არავითარ მონაწილეობას არ მიიღებს ბრძოლაში, იმ პირობით, რომ მისი სამეფო ხელშეუხებელი დარჩეს მებრძოლთაგან.

4. ამ პირობათაზედან ხელის მოწერისთანავე შეწყდება ყოველი მტრობა და დანიშნულ იქნებიან კომისრები, რომ გაარიგონ ქალაქის ჩაბარება და გარნიზონის გასვლა.

დავრჩები, ბატონო გენერალო, თქვენი უმორჩილესი მონა მოურავი ქ. მაინციისა

ბარონ ვიმნიხი“.

„საფრანგეთის რესპუბლიკის გენერალი კუსტენი ამით პატიოსან სიტყვას ართმევს მაინციში გარნიზონად მდგომ ჯარებს, რომ დღეიდან ერთი წლის განმავლობაში არავითარ მონაწილეობას არ მიიღებენ რესპუბლიკის წინააღმდეგ ბრძოლაში. საფრანგეთთან მაინციის დამოკიდებულების შესახებ იგი რესპუბლიკის მმართველობისაგან მიიღებს ბრძანებას. რაც შეეხება მკვიდრთა საკუთრებას, იგი ხელშეუხებელი იქნება საფრანგეთის ჯარებისაგან, რადგან კონსტიტუციის დედაბოძად ის პრინციპია დადებული, რომ ადამიანის პიროვნება და საკუთრება ხელშეუხებელი უნდა იყოს ყველასაგან. ხვალ დილის ცხრა საათზედ რესპუბლიკის ორ ბატალიონს ჩაბარდება რეინის შესავალი კარი და ამ პირობით შეწყვეტილ იქმნება ყოველი მტრობა და სხვადასხვა.

აი, როგორ დავინარჩუნეთ თხუთმეტი დღის განმავლობაში ის მდიდარი მალაზიები, რომლის ქებით სავსე იყო გერმანული გაზეთები. მალაზიების გარდა სამი ქალაქი ავიღეთ და ერთი უძლიერესი სიმაგრე, რომლითაც მაგრობდნენ გერმანელები. ჩვენი ჯარის გამარჯვება მთელს საფრანგეთს აკვირებდა და ახარებდა. რესპუბლიკა ყველგან გამარჯვებული რჩებოდა და ჩვენი მოწინააღმდეგენი უკვე რწმუნდებოდნენ, რომ თავისუფლებისთვის მებრძოლ ხალხს მთელი ქვეყნის მტარვალებიც ვერას დააკლებენ.

VI

რაკი მაინცი დაგვნებდა, ვფიქრობდით, ცოტა ხანს დავისვენებთ და მოქალაქეებს დავუახლოვდებითო. თითქმის მთლად ჩვენი ჯარი ქალაქში მოათავსეს; ქალაქგარეთ მარტო რამდენიმე რაზმი დააბინავეს; ჩვენი სამხედრო კომისრები მაინციის მალაზიებს ათვალეირებდნენ და ნუსხავდნენ, რასაც კი გამოსადეგს ნახავდნენ. მაგრამ ამბავი მოგვივიდა, პრუსიელები სულ რამდენიმე საათის სავალზედ არიან და ქ. კობლენციც აუღიათო. მთელი ჯარი აღშფოცდა. გამოქცეული პრუსიელების დევნა დიუმურიეს კელლერმანისთვის მიენდო და ის კი ისე მშვენივრად დასდევნებოდა გაქცეულთ, რომ მათ კობლენციც აეღოთ. ამ გამარჯვებას მტრისას კუსტენი კელლერმანს აბრალებდა და საერო კრებასაც აცნობა ყოველი გარემოება კობლენციის აღებისა. კუსტენი იმ აზრისა იყო, რომ ჯარის უფროსი თუ შესცდა რაშიმე, სამხედრო წესით უნდა დაისაჯოსო.

არ ვიცი, მართალი იყო კუსტენი თუ არა, მაგრამ ის კი კარგად ვიცი, რომ დასვენების მაგივრად ბარი და წერაქვი მოგვცეს ხელში და სიმაგრეების ასაგებად გავვრეკეს. მერე რეინის ნაპირს ხომ არ დაგვაჯერეს, გაღმა მხარშიც გავვიყვანეს და იქ ერთი პატარა ქალაქი, კასელი, გაგვამარებინეს. საშინელი ავდარი იღვა, გაჩქარებული მუშაობა გვქონდა, და ისე ილანძლებოდნენ პარიზელი შეთქმულნი, თითქო სულ კუსტენის ბრალი ყოფილიყოს იმათი შეწყუბება: ჩვენ საბრძოლველად წამოვედით, და არა მიწის სათხრელად! მათ და გასამართლებლად ისიც უნდა მოგახსენოთ, რომ ომში იმათთანა გულადი არავინ იყო და მუშაობაში კი ისე გვეხოცებოდნენ, როგორც შემოდგომაზედ ბუზი; შეთქმულთა სამს ბატალიონში ათას რვაასი კაცი იყო და წლის თავზედ სულ ორას ორმოცდაათი დაარჩა; იქნება ეს იმის ბრალიც იყოს, რომ პარიზელები დახშულ ჰაერში სცხოვრობენ, სუყველაფერს სჭამენ და სულ ლხინისა და ღროს გატარების ფიქრში არიან.

კარგი ის იყო, რომ ჩემი და ლიზაც პარიზელებზე არანაკლებ ემღეროდა კუსტენს და ისე იქცეოდა, თითქო თავადიშვილის ოჯახში ყოფილიყოს აღზრდილი და შრომისა არა სცოდნოლეს რა. ამასთან ეტყობოდა, ეთაკილებოდა ჩვენი ღარიბი ოჯახი და ცრუბოდა: მამაჩემისა მოსამსახურეებსაც არ ვაკეთებინებდით, რასაც ჩვენ კუსტენი გვაკეთებინებსო. ეს რომ გავიგონე, ბრაზი მომერია და ველარ მოვითმინე:

— მე კი მაგაზედ უარესიც მახსოვს, ელისაბედ ქალო! გუშინ არ იყო, ბატონყმობა გადავარდა და მანამ კი იმდენს გვამუშავებდნენ, რომ... ნეტავი ამისთანა ნიჩბები გექონოდა მაშინაც და ღმერთს მალლობას შევწირავდით!

მინდოდა ისიც მომეგონებინა, როგორ დარბოდა თოვლში ფეხშიშველი და ხელგაწვდილი, მოწყალეობა მოიღეთო! მაგრამ მომეარდა გააფთრებული და შემომიტია:

— გაჩუმდი! გასწი, გაეთრიე!

ჩემმა სიძე-ბატონმა მარესკომაც კვერი დაუკრა: ჩვენ თავისუფალი მამულიშვილნი ვართ, სამშობლოსთვის თავგანწირულნი და არა დანაშაულისთვის მთამადნებში გაგზავნილი პატიმრები, რომ ასე უღმერთოდ გვამუშაონო! აი, როგორა ჩნდება და ვინ არის ქვეყნის დამლუპველი არისტოკრატია: გუშინდელი ხელგაწვდილი მათხოვარი, რომელიც დღეს მუშაობას აღარც კი კადრულობს! მაგრამ კმარა! უჩემოდაც ყველა დასძრახავს, ვისაც კი გულწრფელად უყვარს სამშობლო.

იმ დღეს ჩვენი ბატალიონი კასსელის ახლოს მუშაობდა და ისე ვიყავით დაღალული და ტალახში ამოსვრილი, რომ აღარც ჩემი და მაგონდებოდა, აღარც დილანდელი ჩხუბი. სადამოზედ, შინ რომ წამოვედით, ზედ ხიდზედ შეგვხვდა მიმავალი ჯარი, და, სხვათა შორის, პარიზელი შეთქმულებიც. მხიარულად მილიოდნენ შეთქმულები, ხუმრობდნენ, იცინოდნენ, მღეროდნენ და თან, რაც ძალი და ღონე ჰქონდათ, ყვიროდნენ:

— გასწით, ბიჭებო! გასწით!

ზედ ხიდის ყურზედ ლიზაც გამოჩნდა თავის ურმით. რომ დამინახა ტლაპოში ამოვლებული, მხარზედ გადაგდებული წერაქვით, ნიშნის მოგებით შემომყვირა:

— ახია შენზედ, შე სულელო, შენა! არც ახლა დარწმუნდები, რომ კაცი ყოველთვის გაირიგებს საქმეს, ოღონდ ხმა ამოილოს! თქვენ რომ დილიდან სადამომდე მიწის თხრაში იქნებით, ჩვენ რეინის პირას ჩავისეირებთ და ჯარისთვის სურსათს ვიზრუნებთ.

ის იყო პასუხი უნდა მეთქვა, მაგრამ ამ დროს მარესკო მოვიდა

და პირდაპირ თავის ცოლს მიმართა, ისე რომ მე არც კი დავუ-
ნახივარ:

— ცარიელი ყუთები სულ უნდა გადავყაროთ, თორემ სხვა ვე-
ლარა დაედება რა. ტყუილად ალაგი უჭირავთ. ვიშოვოთ რამე, თო-
რემ უყუთოდაც კარგად ჩავალაგებთ.

ცხადი იყო, ძარცვისა და გლეჯის მეტს ისინი არასა ზრუნა-
დნენ. ლიზამ ცხენს მათრახი გადაჰკრა და თავის გზას გაუდგა. მეც
ჩვენი რაზმის ბინისკენ გავეშურე, რომ გავმშრალიყავ.

იმ საღამოს, 23 ღვინობისთვის 1792 წ. ჰუშარი თავის დრაგო-
ნებით წყალს გავიდა კასსელში და ფრანკფორტისაკენ წავიდა.
ფრანკფორტისკენ წასულიყო აგრეთვე ნეუვინგერი, ოლონდ წყალ-
გამოღმა, ისე რომ ჩვენი ჯარები ორი მხრიდან უნდა დასცემოდნენ
ამ ქალაქს. ეს ყველაფერი მეორე დღეს, 24-ს გავიგეთ.

მე ეხლაც ვერ გამიგია, რისთვის გავედით გლმა? გერმანიასთან
ჩვენ ომი არა გვქონდა. ომი გვქონდა მარტო პრუსიასთან და ავსტრი-
ასთან. ჩვენ კი, მიუხედავად სიმართლისა, შევესივენით გერმანიას,
რომელსაც ჩვენთვის არაფერი დაეშავებინა, და დიდძალ ხარჯს
ვართმევდით მცხოვრებთ. გარდა ამისა საშიშიც იყო ჩვენი გაბედუ-
ლება, რადგან აქამდე თუ პრუსია გვეომებოდა, შეიძლებოდა, ჩვენი
ქცევით შეურაცყოფილი გერმანიაც მისდგომოდა პრუსიას და ომი
გამოეცხადებინა ჩვენთვის. მაგრამ მაგას განაღა ფიქრობდა ვინმე?
უცხოეთში ვიყავით, ქალაქები უომრად გვნებდებოდნენ და... გიყები
ვიქნებით, რომ ამით არ ვისარგებლოთ და ჯიბეები არ გავიფსო-
თო, — ფიქრობდნენ სხვის სარჩო-საბადებლის მოსიყვარულენი და
ძარცვა-გლეჯის მეტი აღარა ახსოვდათ რა.

ფრანკფორტის კარებთან პირველად ჰუშარი მისულიყო და გაქ-
ვირგებულ მოქალაქეთ კაცი გაეგზავნათ, რა გნებაეთ, რისთვის მობრ-
ძანებულხართო? ჰუშარს ეპასუხნა: ისე, გამოვისიერიეთო. მაგრამ ცო-
ტა ხანს უკან გაღმით ნეუვინგერი მისდგომოდა ქალაქს, ზარბაზნები
დაელაგებინა და შეეთვალა: ქალაქი დაგვანებეთ, თორემ ავი დღე
დაგადგებათო. ქალაქი მდიდარი ბანკირებით არის სავსე და იმათაც,
რასაკვირველია, უომრად დანებება ერჩივნათ ბრძოლას და სისხლის
ღვრას. დიდი ამბით შესულიყვნენ ჩვენი ჯარები ქალაქში. ნეუვინ-
გერი და ჰუშარი მაშინვე ქალაქის სამამასახლისოში აბრძანებულიყ-
ვნენ და გენერალი კუსტენის სახელით ფრანკფორტის მკვიდრთა-
თვის და მეტადრე მდიდრებისთვის ორი მილიონის გადახდა დაეკუ-
ლებინათ.

გულს ლახვარივით გვეცა ეს ამბავი: ისე კი არ ვიქცეოდით, რო-
გორც შეშვენის თავისუფლებისათვის და ადამიანურ უფლებათა-

თვის მებრძოლ ერს; არა, ჩვენ ისე ვიქცეოდით, როგორც ჩვეულებრივ მტარვალნი ექცევიან დამარცხებულ ხალხს, რომელსაც გასძარცვენ, გაატყავებენ და თავიანთ მონად იხდიან. ერმა იგრძნო ეს, წთელმა ერმა. მას შემდეგ სულ ეჭვის თვლით უყურებდნენ კუსტენს, და თუმცა ხშირად იმარჯვებდა მტერზე, სულ იმას გაიძახოდნენ, გერმანია გადაგვიდაო... ქვეყანაში ქურდების და ავაზაკებას სახელი დაგვიყარაო... და მართალაც ამბობდნენ! გუშინ რამდენიმე კაცი დახვრიტა, აღებულ ქალაქში დავლა როგორ გაბედეთო! და დღეს კი, თითონვე უარესს სჩადის და მით სულ სხვა ძაგალითს აჩვენებს თავის ჯარებს! კუსტენს ამ შეცდომამ ძალიან ამოჰკრა ცხვირში.

მაშინ პრუსიელები კობლენცში გამოვიდნენ რეინს და იქვე ფრანკფორტის ახლოს გამაგრდნენ. რომ გაებდნათ და წამოსულიყვნენ, ჩვენს ჯარებს ორად გაჰყოფდნენ, ერთი ნაწილი მაინცში დარჩებოდა, მეორე ფრანკფორტში. ყველა ხედავდა მათს განზრახვას. რადგან რუკა ყველასა გვექონდა და კარგად ვიცოდით ჩვენი და მტრის ჯარების მდგომარეობა. არამც თუ აფიცრები, უბრალო ჯარისკაცებიც კი ამასვე გაიძახოდნენ:

— ასე ჩამოვივლიან და ორად გაჰყოფენ ჩვენს ძალას!..

კუსტენმა ქ. ფრანკფორტის მცველად ერთი პოლანდიელი დანიშნა, მაიორი ვანპოლდენი და ათას რეაასი კაცი დაუტოვა. ჰუმარი და ნეუვინგერი კი უკან დაბრუნდნენ თავიანთი ჯარებით; ხარჯად შეწერილი ოქრო ვერ წამოიღეს, რადგან ფრანკფორტელებს საერთო კრებისთვის კაცი გაეგზავნათ და ეთხოვნათ: არაფერი დაგვიშავებია და ასე უღმერთოდ რადა გვსჯით, ამოდენ ხარჯს რად გვაღებთო?!

რესპუბლიკას ჩვენთან, გერმანიის სახელმწიფოსთან, საომარი არა აქვს რაო, — მიეწერათ ფრანკფორტელებს საერო კრებისთვის; — რესპუბლიკა ეომება მეფეს ბოჰემიისას, ავსტრიისას, ჰესისის და პრუსიისას. ფრანკფორტი გერმანიის სახელმწიფოს თავისუფალი ქალაქია და არავითარ მონაწილეობას არ იღებს თქვენს ბრძოლაში. რესპუბლიკას უჩვენოდაც ბევრი მტერი ჰყავს და ნეტავი რად გინდათ, რომ მთელი გერმანიაც მტრად გადაიქციოთ და ისიც ფულის გულისათვისაო?!

ერთი სიტყვით, საშინელი სიბრყვე მოგვივიდა. ჩვენდა საუბედუროდ, იმისთანა უეციანი ვიყავით, რომ ათასში ერთმა არ იცოდა ჩვენი მეზობლების პოლიტიკური ყოფა-ცხოვრება. ჩვენთვის ყველა გერმანელი — პრუსიელი, ავსტრიელი, ჰესელი, ბავარიელი, საქსონელი, ტიროლელი და თვით ჰუნგრებიც კი — გერმანელი და, მაშა-

სადამე, ჩვენი მტერი იყო. განსხვავებას თუ ვხედავდით რასმე მათში, ისეც ტანისამოსში ვხედავდით, რადგან ზოგს ცისფერი ტანისამოსი ეცვა, ზოგს თეთრი; ან კიდევ ბაირალში: ზოგს ყვითელი ბაირალი ჰქონდა ორთავიანი არწივით და ზოგს ალისფერი, ცალთვალა შავი არწივით. ეხლაც კვენასას დამიწყებს ხოლმე გული, მაშინდელი ჩვენი უტოდინარობა რომ მომაგონდება.

გიორგობისთვის შუა რიცხვებში ჰუმარი და მენიე სრულიად მოულოდნელად ჩაუხტნენ ერთ საღამოს პრუსიელებს ლიმბურგში და ძალიანაც დაამარცხეს. დიდძალი ტყვე და ზარბაზნები ემოვათ მაშინ ჩვენებს.

მაშინ ბრაუნშვეიგმა უკან დაიწია. მენიე უკან გაჰყვა ოთხასი კაცი, რომ თვალყური ედევნა მტრისთვის. სწორედ იმ დროს დაიჭირა ყინვები; ყველგან თოვლი იდო. პრუსიელები უფრო უკან წავიდნენ და ქალაქებს შეეფარნენ. გვეგონა, გაზაფხულამდე ჩვენ იმათ ველარა ვნახავთო.

სწორედ იმ დროს მოვიდა ამბავი, რომ ჩვენი ჯარი დიუმურის წინამძღოლობით ბელგიაში შესულა, აულია მონი, ტურნეი, ბრიუსელი, განდი, ანგერი... ერთი სიტყვით, მთელი სამეფო დაეჭირა.

იმ დროს ჩვენი ბატალიონი ერთ ძველისძველ შენობაში იდგა, შენობაში კი არა, შენობის ნანგრევებში, რომელსაც მონასტერს უწოდებდნენ. შუაზედ დიდი ეზო იყო და გარშემო წვრილ-წვრილი სულ ერთნაირი ოთახები; ორი კიდევ დიდი საწოლი ოთახი გვექონდა, ერთი სასადილო, ერთი მშვენივრად მოწყობილი სამზარეულო, ტალანები და სამრეკლო. სამ-სამს გვეძინა თითო პატარა ოთახში და რაც ხანი იქ ვიყავით, ამ მონასტერში ვიდექით. ტალანში რომ ნაღარას დაპკრამდნენ, ისეთ ზანზარს დაიწყებდნენ ხოლმე კედლები, იტყოდით, აგერ დაიქცა მთელი მონასტერიო. დღესაც სიამოვნებით მომაგონდება ხოლმე ჩვენი იქ ყოფნა და ბნელს ტალანებში ჩვენი სიმღერა. სადაც წმინდა გალობის მეტი არა გაისმოდა რა საუკუნეთა განმავლობაში, ჩვენ იმისთანა „წავა-წავას“ და მარსელურს დავძახებდით ხოლმე, რომ ფანჯრებს ზრიალი გაჰქონდა.

საღამოზედ მივიდოდით დაღლილები და შეცივებულები ჩვენს მონასტერში, შევიყრებოდით სამზარეულოში, დავაგუგუნებდით ცეცხლს, — თავსაყრელი გვექონდა შეშა და იმისთანა ბუხარი იყო, რომ შიგ თუნდა ს-ჰ ხარს შესწვამდით ერთად — მივუსხნებოდით გარშემო და დავიწყებდით ლაპარაკს. ვხუმრობდით, ვოცნებობდით და ნახულს და გაგონილს ვუთამბობდით ერთმანეთს.

კონვენტის ამბებსაც იქ ვტყობილობდით. როგორც კი მოგვივიდოდა გაზეთები, ახტებოდა ვინმე მაგიდაზედ და დავკვიძახებდა:

— სმენა, ბიჭებო! სმენა!

დაიწყებდა ხმამაღლა კითხვას; გაათავებდა ერთ ამბავს, შეჩერდებოდა, თავის აზრს იტყოდა, ზოგი დაეთანხმებოდა, ზოგი არა; გაიმართებოდა კამათი. ბოლოს ჩვენვე შევუტევედით:

— გაზეთები წავიკითხოთ, ბიჭებო! რა დროს ბაასია ყველას თავისი აზრი ჰქონდეს!

უნდა მოგახსენოთ, რომ კონვენტი, რაკი საფრანგეთი რესპუბლიკად გამოაცხადა, სამ ნაწილად გაიყო: ერთ მხარეს „მთიულები“ გვიდნენ, მეორეს — ჟირონდელები და შუაში — ვაკელები.

მთიულებს უნდოდათ რესპუბლიკა ერთი და განუყოფელი ყოფილიყო; ყველანი თანასწორნი ვყოფილიყავით უფლებებით; გაუქმებულყო ყოველივე, რაც კი ძველის წესწყობილებისა და დიდებულთა უპირატესობისა რჩებოდა რამე. ყველანი თანასწორნი უნდა ვიყვნეთო, იძახდნენ, და, რასაკვირველია, ხალხიც მათკენ იქნებოდა, რადგან ხალხისთვის თანასწორობა არა ნაკლებ დიდი განძი არის, ვიდრე თავისუფლება. ხალხმა კარგად იცოდა, რომ ამოდენ საუკუნეთა განმავლობაში ყოველი მისი ტანჯვა, უფლებათა უთანასწორობისაგან გამომდინარეობდა; ხალხმა კარგად იცოდა, რომ თვით სიმაართლეა თანასწორობა.

ჟირონდელები — მე იმ ჟირონდელებზედ მოგახსენებთ, რომელნიც გულწრფელად იყვნენ რესპუბლიკის მომხრენი, რადგან ჟირონდელებში ბევრი მეფის მომხრეც ერიო: დროებით რესპუბლიკას მისდგომოდნენ, რომ უფრო კარგად ელაღატნათ მისთვის და კვლავ მეფობა დაემყარებინათ. დიად, ქეშმარიტი ჟირონდელები ყველაზედ უმაღლესად თავისუფლებას სთვლიდნენ. ჟირონდელები იყვნენ წარმომადგენლნი მდიდარი მოქალაქეებისა, დიდრონი სოფდაგრებისა და ვაჭრებისა; ერთი სიტყვით, ყოველგვარი სიმდიდრისა და იმისთანა რესპუბლიკა ნებადნათ, რომ ქვეყნის ბედი მდიდრების ხელთ ყოფილიყო. და რადგან პარიზელი ხალხი ხელს უშლიდა, რადგან პარიზელი ხალხი სულ კრიჭაში უდგა და რამდენჯერაც კი საერო კრებამ უკან დაწევა განიზრახა, იმდენჯერ მისდა უნებურად წინ წასწია ოგი ხალხმა, ჟირონდელებმა მოინდომეს კონვენტი პარიზიდან პროვინციაში გადაეტანათ, ბურჟუაზი ან სხვაგან სადმე, ოღონდ კი თავი დაეღწიათ როგორმე პარიზელ ხალხისთვის, რომელსაც მთიულთა მხარე ეჭირა. რაკი საერო კრება იმისთანა ალაგას იქნებოდა, რომ წევრთ პარიზელი ხალხის შიში არ ექნებოდათ, ჟირონდელები თავისას იზამდნენ და უმრავლესობას კონვენტისას იმისთანა კანონებს დაადგენინებდნენ, რომელიც თითონ უნდოდათ.

ვაკელები, სამას-ოთხასამდე კაცი, ერთობ პატიოსანი რესპუბ-

ლიკელები იყვნენ, მაგრამ ქირონდელების ურიცხვი გაზეთებით ისე იყვნენ შეშინებულნი, რომ მთიულებს ახლოც არ უდგებოდნენ. ქირონდელები თავიანთ გაზეთებში სულ იმის ცდაში იყვნენ, რომ საფრანგეთისთვის პარიზი შეეძქლებინათ და პარიზელებს ისე ხატავდნენ, თითქო დიდით-პატარამდე სულ ყაჩაღები არიანო და მთიულები კიდევ მათი ბელადებო. ამასთან, ისიც უნდა მოგახსენოთ, რომ ენკენისთვეში ხალხის აშლამ და ციხეებში პატიმრების ხოცვამ ყველანი ააშფოთა და ყველაზედ მეტად მშვიდი ვაკელი დეპუტატები. ქირონდელებს ვერ მისდგომოდნენ, რადგან მათში ბევრს მეფის მომხრეს ხედავდნენ და მთიულებისა კი ეშინოდათ. როცა საქმე კენჭამდე მივიდოდა, შიში დასძლევდათ ხოლმე და მთიულების შიშით ისინიც ქირონდელებისკენ გადადიოდნენ.

რასაკვირველია, რომ ასე განსხვავებული აზრების მიმდევარი მთიულები და ქირონდელები ვერ მორიგებულიყვნენ; მით უფრო რომ მაშინ ეს განსხვავება ასე ცხადი არ იყო, როგორც ახლა მე ვიამბობთ. საქმე ისე იყო დახლართული, რომ სოლომონ ბრძენიც ვერ იტყოდა, არ შევცდებო. ისე ვიყავით დაშინებული ღალატით. რომ ყველგან ღალატი გველანდებოდა. დაიწყებდნენ რამეზე ბაასს და სჯაას... საგანს გადაუხვევდნენ და დაიწყებდნენ ერთმანეთის ლანძღვა-გინებას. ქირონდელები უსაყვედურებდნენ მთიულებს, ენკენისთვეში დაღვრილი სისხლი თქვენი საქმეაო; თქვენ გინდათ ქვეყნის გამგეობა ხელთ იგდოთ და დიქტატორები გახდეთო; რევოლუცია უკიდურესობამდე გინდათ მიიყვანოთ, რომ ხალხს შეაზიზლოთ და სამეფო ტახტზედ ფილაზე ააბრძანოთო. მთიულნი უსაყვედურებდნენ ქირონდელებს, თქვენ გინდათ საფრანგეთი ურიცხვ წვრილ რესპუბლიკად დაანაწილოთ; საფრანგეთი პარიზელ ხალხს გადაკიდოთ და მეფის მომხრეებთან ერთად ცდილობთ ძველი მეფური წესწყობილება შემოიღოთო. და როგორც ყოველთვის მოხდება ხოლმე, როდესაც ერთიერთმანეთზედ გადაკიდებულნი უნდობლობას და ჯიბრს აპყვებიან, უფრო მეტს სწამებდნენ ერთმანეთს. ვიდრე ღირსნი იყვნენ.

ათასში ერთი არ იყო დასაჯერებელი, იმისთანა უცნაურ ხმებს ავრცელებდნენ ერთმანეთზედ; მაგრამ შურით და სიძულვილით ისე ვიყავით თვალახვეულნი, რომ ყოველივე გვეჯეროდა, რაც უნდა გაგვეგონა, ან გაზეთებში წაგვეკითხა. წავიკითხავდით რასმე და ვეცემოდით ერთმანეთს! ქვეყანას შევძრავდით! და იმას კი არა ვფიქრობდით, მართალი იყო ის ამბები, თუ ჭორი და ცილისწამება.

აქამდე ჩვენისთანა გამარჯვებული ჯარი არც ერთი არა ჰყავდ: რესპუბლიკას; სპირი ჩვენ ავიღეთ, ვორმსი, მაინცი, ფრანკფორტი

და გაზეთებში რომ წავიკითხავდით ხოლმე ჩვენს ქებას, — „ჩვენი ძლევამოსილი, მაინცის ამღები ჯარით“, სრულიად ღირსეულად მიგვაჩნდა ეს ქება-დიდება, რადგან ჩვენი თავი დევგმირად მიგვაჩნდა, რომელსაც ქვეყანაზე ვერა გაუმაგრდება რა. მაგრამ ბელგიაში მყოფი ჩვენი ჯარები იმისთანა გამარჯვებით მიიწვედნენ წინ, რომ ჩვენც კი გაგვიკვირდა. გაზეთები სავსე იყო ბელგიაში მყოფი ჯარის ქებით; სუყველანი მის მამაცობას გაიძახოდნენ; ყველანი მათ გამარჯვებაზედ ლაპარაკობდნენ, და ალებულ ქალაქებს და ზარბაზნებს ანგარიშობდნენ. ბელგიის ჯარის ქება სწორედ იმ დროს დაიწყეს, როდესაც ჩვენ სრულიად უსაქმოდ ვისხედით სამშვიდობოში, თუმცა პრუსიელები იქვე ახლო გვყვავდნენ. გული გვისივდებოდა, ბრაზი გვახრჩობდა; სულ იმას ენატრობდით, ერთი მიგვიშვან პრუსიელებზედ, რომ პირველობა ბელგიელ ჯარს ჩვენ წაერთვათო. მაგრამ ვინ იყო გამგონი! გამოცდილი, მოხუცებული ჯარისკაცები ხომ სულ თავსა და ბედს იწყევლიდნენ, რომ ჩვენს ჯარში მოჰყვნენ; — „ლამის ხავსი მოგვეკიდოსო“ ჩიოდნენ. ზოგნი იმასაც ამტკიცებდნენ, რომ ბელგიელ ჯარის უფროსმა დიუმურეიმ პრუსიელები და ავსტრიელები ჩვენ დაგვილოცა და თითონ კი ბელგიაში შევიდა, სადაც მის ჯარს ხალხი ყველგან უბრძოლველად დაუხვდებო! ვითომ და რატომ?! თითონ დიდებას და სახელს მოიხვეჭს, რესპუბლიკის პირველ გენერალად ჩაირიცხება და სხვისა რა ენალვლება?! არისტოკრატია, გველადუა და ძვირად დაგვიჯდება მისი გამარჯვებაო.

ჩვენი დაუდევრობა, თორემ შამპანიდან გერმანელებს გამოგუშვებდით! იმის მაგივრად, რომ დავდევნებოდით და მთლად გაგვენადგურებინა, სრული თავისუფლება მივეცით, მიბრძანდით, საითაც გნებავთო. ისინიც წამოვიდნენ და იქვე ჩვენს ახლოს დაბანაკდნენ; რეინის პირას ორმოცდაათი ათასი კაცი მოგროვდა შამპანიდან გამოსული. რა ენალვლებოდა დიუმურეის? მტრების ერთი ნაწილს დასამარცხებლად მეორე ნაწილი ჩვენ მოგვახვია თავზედ; სახელი თითონ მოიხვეჭა და მტერთან შებრძოლება ჩვენ დაგვიტმო. და სწორედ იმ დროს, როდესაც ავსტრიელებზედ გამარჯვებული იმისი ჯარები განცხრობით ბრძანდებოდნენ ბელგიაში, ჩვენ ხელახლად უნდა დაგვეწყო ომი და საშიში ომიც, რადგან ჩვენი ჯარების სიმცირის გამო, შეიძლებოდა ფრანკფორტი წაერთმიათ და მაშინ ხომ მაინცში მოვემწყვდებოდით.

გიორგობისთვის გასულს დაიძრა ჩვენი ჯარი მაინციდან და რეინს გავიდა. ჩვენი ბატალიონი ერთ ტყის პირას დაბანაკდა. ფრანკფორტი იქვე ჩანდა ჩვენს ქვევით მხარმარჯვნივ თავისი ბალებით, მალლად აშლილ ტირიფის ხეივანებით, წითლად შეღებულ სახლებით,

მშვენიერ ეკლესიებით და განიერ ქუჩებით. ქალაქს გარს წყალით
სავე თხრილი ერტყა; შუა ქალაქში განიერი მდინარე დიოდა ნავე-
ბით სავე და წყალგაღმა იგივე წითელი სახლები, განიერი ქუჩები
და ბალები. ყველგან მოედნები მოჩანდა და ზედ აუზები. ყველგან
ხალხი ირეოდა, ლუკმაპურის საშოვნელად სწრაფად სადღაც მიმავა-
ლი, გაშურებული და გაფაციცებული. ყურადღებასაც არავის აქცე-
დნენ, იყვნენ თავისთვის და მუშაობდნენ; არც ომი უნდოდათ, არც
წყენა ვისიმე და გაჯავრება. მაგრამ იმათ ვინა ჰკითხავდა? როგორც
მუშა-ფუტკარს სკაში მონავარი შეუვარდება ხოლმე და თავს შე-
უქამს და ააოხრებს დიდი ხნის ნაწვავ-ნადაგ ფუტკრის სარჩოს, ისე
მუშაკაცს შეესევა ხოლმე ჯარი და ერთს წამში აიკლებს და მიწას-
თან გაასწორებს, რაც ქალაქს რამდენიმე საუკუნის განმავლობაში შე-
უძენია. მაგრამ კუსტენი ყურადღებასაც არ აქცევდა ამ გარემოებას.

ჩვენ, როგორც მოგახსენეთ, ტყის პირას ვიდექით მთაზე და, კარ-
გად მახსოვს, ჩვენი მენალარე სულ იმას იძახდა, აქ დგომას ის არა
სჯობიან ფრანკფორტში შევიდეთ და რაც მოგვეწონოს, ჩვენებუ-
რად მოვუაროთ!

ამბობდნენ, გერმანელები საბრძოლველად ემზადებიანო, და
ჩვენც ჩვენსას ვცდილობდით. ტყე გავჩეხეთ, რომ სიმაგრეები ავე-
გო. ყველაზე წინ, სხვათა შორის, ჩვენი ბატალიონი იღვა და მოწი-
ნავე რაზმებს არც ცულის ხმარება დასჭირებიათ, არც წერაქვისა:
თვალყური უნდა გვედევნებინა მტრისთვის და შევამჩნევდით რასმე
თუ არა, მაშინვე ჩვენი ჯარებისთვის გვეცნობებინა; ჩვენვე უნდა
შევბრძოლებოდით მტერს, ვიდრე უკანიდან ჩვენები მოგვეშეუ-
ბოდნენ. ჩვენ უკან კი, ჩვენგან სამი-ოთხი ვერსის მანძილზედ, ჩვენი
ჯარები გაჩქარებითა სჩეხდნენ ტყეებს და გარშემო თხრილებს იკე-
თებდნენ; უსაქმურად არავინ იყო, ყველას წერაქვი ან ნიჩაბი ეჭირა
ხელში და თვით აფიცრებიც კი მთელი დღე თავს ადგნენ ჯარისკა-
ცებს და ამხნევებდნენ დალაღულებს. შორს ვიყავით ჩვენი უმთავრე-
სი ბანაკიდან, მაგრამ მშვენივრად გვესმოდა იქაური დაუცხრომელი
ხმაურობა და ჟრიამული.

მთელი ცხრა დღე მოუენდით ბანაკის გამაგრებას.

პრუსიელებივით კი არ მოვიქეციით, რომლებიც საომრად გამო-
სულნი ქალაქებში და სოფლებში დგებოდნენ. აღარც კი ვიცოდით,
ჭერი რა იყო; რაც ომი დაიწყო, სულ კარავებში ვიყავით და კარგა-
დაც ვიყავით, მერწმუნეთ. კაცი რომ საომრად გავა, უნდა გაიჭირვოს
კიდევ: ვინც ბრძოლის ველზედაც ნებივრობას მოინდომებს, ჩაეძი-
ნება კიდევ და სწორედ მაშინ მიასწრებს მტერი. ისა სჯობიან, ჯა-
რისკაცს სციოდეს და ფხიზლად კი იყოს.

ასე იყო ჩვენი საქმე. 29 გიორგობისთვის დილით, როდესაც ჩვენი ბიჭები შეკვამადას ხარშავდნენ, შორს, ქვევით, მხარმარჯვნივ ლურჯად ჩაცმული ჯარები გამოჩნდნენ და ფრანკფორტისკენ წამოვიდნენ. ჯერ ძალიან შორს იყვნენ, ისე რომ თვალი ვერას არჩევდა, მაგრამ ვინც კი მოხუცებული ჯარისკაცი იყო ჩვენს ბატალიონში, წამოცვივდნენ და დაიძახეს:

— აგერა მტრის ჯარი!

ბევრი იმასაც იძახდა, ადვილი გასარჩევია მტერიო და ხელგაწვდილი გვანიშნებდა, აგერა ქვევითა ჯარი და აგერა ცხენოსანიო! ხედავთ როგორ მოდიან, როგორ მოეჩქარებიანო! მაგრამ ჩვენ ვერას ვარჩევდით და სიჩქარის ნაცვლად იმას ვხედავდით, რომ მტერი ძალიან ნელა იძროდა. სადილს უკან ორი საათი იქნებოდა, როდესაც იმდენად მოგვიახლოვდნენ, რომ მთელი ჯარი გამოჩნდა. ერთი ორმოცი, ორმოცდაათი ათასი კაცი იქნებოდა ჩვენი ანგარიშით, მაგრამ ის კი არავინ ვიცოდით, რომ ამ ჯარს თვით პრუსიის მეფე და ბრაუნშვეიგი მოუძღოდნენ. დიად, ძალიან საქმე გვიყო დიუმურიემ: ჩემთან ბრძოლას იქ არ გირჩევნიათო! და ჩვენ გამოგვისია იმოდენა ჯარი, რომ ბელგიაში დამარცხებულთ ჩვენზედ ამოეყარათ ჯავრი.

მეფისა და ბრაუნშვეიგის იქ ყოფნა ჩვენ შემდეგში გავიგეთ.

კუსტენი იმ დროს მაინცში იყო. ჩვენს ბანაკში ჰუშარი ბრძანებლობდა. არც მენიე იყო ჩვენთან და კაპიტანმა ყორდიმ მაშინვე კაცი აფრინა და შეატყობინა ჰუშარს მტრის გამოჩენა. უნდა გენახათ, როგორ მოაჭენებდნენ ცხენებს ჰუშარი და მისი ამალა! ამოვიდნენ ჩვენს ბანაკთან, ქედზედ ავიდნენ, სადაც უკვე მოგროვლიყვნენ ჩვენი ბატალიონის მოხუცი ჯარისკაცები და მტრის მოძრაობას თვალს ადევნებდნენ. გაჩუმებულნი დასცქეროდნენ მტერს ჰუშარი და სხვანი. ბოლოს ერთმა ყმაწვილმა აფიცერმა თქვა:

— მტერი ბერგენში იკრიბება.

ჰუშარმა უპასუხა:

— დიად, ბრძოლა ხვალ გვექნება.

მერე ყორდის მოუბრუნდა და უთხრა:

— თვალყურს ადევნებთ, კაპიტანო, მტერს და ყოველ საათს მაცნობებთ მის მოძრაობას.

და ისე საჩქაროდ გაექანა ბანაკისკენ, როგორც მოვიდა.

იმ დღეს შესანიშნავი აღარა მომხდარა რა. ისე იყო იმ დამეს ბერგენის მიდამო განათებული, რომ დღე გეგონებოდათ. მტრის ბანაკში არავითარი მოძრაობა არა ჩანდა: დაღლილი ჯარი მოსვენებას ცდილობდა ბრძოლის წინ. მაგრამ უცნაური ამბავი ხდებოდა ფრანკფორტში: ისეთი მოძრაობა იყო ქალაქში, ისე დააქანებდნენ აქეთ-

იქით სანათს ბაღებში და წყლის პირას, რომ ცხადი იყო, რაღაცა გვიპირებდნენ. სამი საათი იქნებოდა ღამისა. დარაჯად ვიდექ და გაკვირვებული გავცქეროდი ამ საეჭვო მოძრაობას; თან საშინელო ფიქრები მიტრიალებდა თავში: ცხადია ფრანკფორტელებიც მტრისკენ არიან და ჩვენს წინააღმდეგ ემზადებიან-მეთქი. მართალია, ქალაქი ჩვენს ხელთ იყო, შიგ ორი ათასი კაცი გარნიზონად გვედგა და საჭირო ალაგას ჩვენი დარაჯები გვეყენა, მაგრამ რას იზამდა ორი ათასი კაცი იმოდენა ქალაქში? როგორ გაამაგრებდა იმ სიგრძე გალავანს? მეტადრე თუ მოქალაქენიც მტერს მიუდგნენ? ჩვენი ჯარი ბევრი, ბევრი ოცი ათასი კაცი ყოფილიყო და როგორ შეეგებოდნენ ორმოცდაათი ათას კაცს? რას გავხდებოდით, თუ სხვა ჯარებს არ მოგვაშველებდნენ!..

ის დამე მშვიდობიანად გაგვითენდა და ნაღარის ხმა მარტო დილით გაისმა, ასე ცხრა საათზედ, ფრანკფორტის მხრიდან; იმავე დროს ქუჩებში თოფის სროლა ატყდა და მთელი ქალაქი აიშალა. პრუსიელებიც ამას-ღა ელოდნენ და სწორედ იმ დროს მიადგნენ ქალაქს, როდესაც მოქალაქენი ჩვენს გარნიზონს ებრძოდნენ, რადგან დარწმუნებულნი იყვნენ, რომ კარი ღია დახვდებოდათ. ბარემ გვინდოდა მივშველებოდით ჩვენს ამხანაგებს, მაგრამ ჩვენდა საუბედუროდ, იძულებულნი ვიყავით უძრავად ვმდგარიყავით ჩვენს ალაგას. თოფის სროლა ქალაქში უფრო და უფრო ხშირდებოდა; რაც კი ქალაქში ხელოსანი და მუშაკაცი იყო, მოქალაქეთაგან წაქეზებული, იარაღით ხელში ებრძოდა ჩვენს გარნიზონს. მოქალაქეები კი თავთავიანთსა მიმალულიყვნენ და მაგრა ჩაეკეტათ კარი და ფანჯრები.

შუაღლე იყო, როდესაც ზარბაზნის ხმა გაისმა. პრუსიელები უკვე შესულიყვნენ ქალაქის გარეუბანში და ჩვენი გარნიზონი ძლივს-ღა იმაგრებდა მტერს. ან რა უნდა გაეწყო მთელ ქალაქთან და იმოდენა ჯართან ორი ათას კაცს? რა შეეძლო ჩვენს გარნიზონს ქალაქში, სადაც დიდი პატარამდე ყველა წინააღმდეგი იყო ჩვენი?

ეს რომ შემდეგში ყოფილიყო, ადგებოდნენ და ცეცხლს წაუკიდებდნენ ქალაქს, რომ ჰკუთხედ მოეყვანათ მოქალაქენი; მაშინ კი ამგვარ საშუალებას ვერა ხმარობდნენ, რადგან ადამიანის ღირსების დამამცირებლად მიაჩნდათ იგი. ერთმა ჩვენი ჯარის წინამძღოლთაგანმა ბელგიაში ერთი სულ უბრალო სოფელი დასწვა და ქვეყნის სალაპარაკოდ გახადეს. უბედური!

კარგა ხანი ვიღუქით ასე და გულხელდაკრებილები შევცქეროდით შორეულ ბრძოლას; ნამდვილად აღარც კი ვიციოდით, ფრანკფორტი ჩვენებს ჰქონდათ ისევ. თუ პრუსიელ ჯარებს აეღოთ.

ბოლოს ორ საათზედ ჩვენთვისაც მოიცალეს მტრებმა და ბერგე-

ნიდან ჩვენსკენაც გამოგზავნეს ჯარი. წყობისად, იერიშის მოსატანად გამზადებული მოდიოდნენ პრუსიელები და ჩვენც შევემზადენით სტუმრების დასახვედრად.

კაპიტანმა უორდიმ ბრძანება გასცა, ცოტა უკან დაიწიეთ, ქედს ამოეთარენით, რომ უფრო უკეთ დაუმიზნოთ თოფიო. სამ წყობად დაალაგა ჩვენი პატარა რაზმი, აქა-იქ ზარბაზნები დააწყო და სულგანაბული ელოდებოდა პრუსიელების მოახლოვებას: უნდოდა მოეტყუებინა და მერე უტბად თოფი დაეშინა. ისინიც მოდიოდნენ, თითქო დავიწყებიათ ჩვენი იქ ყოფნაო და ამაყად მოათრიალებდნენ თავიანთ დროშებს. ის იყო ნიშანსლა ველოდით თოფის სროლისას, რომ უმთავრეს ბანაკიდან ბრძანება მოგვივიდა, უკან დაიწიეთო.

ძალიან გვეწყინა, პრუსიელებს ზურგი როგორ უნდა ვუბრუნოთო, მაგრამ რას ვიზამდით? ბრძანებას ასრულება უნდოდა და ჩვენც დაუყოვნებლივ გზას გავუღდექით. ნეტავი ერთხელ მაინც დაგვეცალა ზარბაზნები.

მთა ჩავიარეთ და ჩვენი ბანაკიდან გავემართენით, მაგრამ ამით ისარგებლა პრუსიელების ერთმა რაზმმა და ჩვენგან დატოვებული მთა დაიჭირა, რომ ფრანკფორტში მყოფ ჩვენი გარნიზონისთვის ყოველი გზა შეეკრა. ის იყო ავიდნენ პრუსიელები მთაზედ და ჩვენ ბრძანება მოგვივიდა, დაბრუნდით, ისევ თქვენი ალაგი დაიჭირეთ მთაზედ და პრუსიელები გარეკეთო. ბრაზი მოგვერია ამის გაგონებაზედ, მაგრამ გაგვეხარდა კიდევ, რომ უბრძოლველად არ გავექვეცით მტერს, მით უფრო, რომ ორი ბატალიონი სხვა გამოგზავნეს ჩვენ საშველად.

პრუსიელები სრულიადაც არ მოელოდნენ ჩვენს დაბრუნებას იმისთანა სისწრაფით ავირბინეთ მთა, იმისთანა ხმით ვყვიროდით, რესპუბლიკას გაუმარჯოსო! რომ ვეღარ გაგვიმაგრდნენ, გაგვექცნენ და ისე მიგორავდნენ უგზო-უყვლოდ, რომ ოთხასზედ მეტი მოკვალით. მერე ზარბაზნები გავამწყრივეთ და ის იყო ქვევით ჩავიდნენ და ფიქრობდნენ სამშვიდობოს ვართო, რომ ახლა ზარბაზანი დავუშინეთ და ისე გავუხადეთ საქმე, რომ სულ თითო-თითოდ შეიმალნენ ბალებში და ვეღარც მკვდრებს უპატრონეს, ვეღარც დაჭრილებს.

სწორედ ამ დროს მიეშველა ჩვენს გარნიზონს ნეუჟინგერი ცხრა ათასი კაციოთ. ქალაქს იმ დროს მიადგა, რომ პრუსიელები სულ მთლად ჩვენს გარნიზონს მისჩერებოდნენ და ორ ცეცხლშუა მოიმიწყვდია. აი, კიდევ იმისი საბუთი, რომ ომში ყველაფერი შემთხვევაზედ არის დამოკიდებული: პირველი ბრძანება, უკან დაიწიეთო, ჩვენ ჰუმარისაგან მოგვივიდა; მაგრამ კუსტენი დაბრუნებულიყო

მაინციდან და ახლა იმისი ბრძანება მოგვივიდა — ისევე მთა დაჰქირეთო. ჩვენ რომ მთიდან არ დავძრულიყავით, ვერც პრუსიელები გაბედავდნენ მთაზედ ასვლას და ვერც ჩვენ დავუხსოცავდით, იმოდენა ხალხს. ამ შემთხვევის ბრალი იყო, რომ ათას ორასი კაცი დააკლათ იმ დღეს უბედურებს.

ჩვენდა სამწუხაროდ, ნეუვინგერი ძალიან გვიან მივიდა და ამიტომ გარნიზონს ველარა უშველა რა. ფრანკფორტელებს ყველა კარები გაეღოთ მტრისთვის; ორი ჩვენი ბატალიონთაგანი უომრად დანებებოდა მტერს, რადგან აურაცხელი ხალხი და ჯარი შემოხვეოდა გარშემო; ორ ბატალიონს კი მაიორი ვანჰელდენის წინამძღოლობით გაერღვია მტრის ჯარები და სამშვიდობოს გამოსულიყო. ეს ორი ბატალიონი ნეუვინგერის ჯარს შეუერთდა და ნელ-ნელა უკან დაიწია. იმათთან ერთად ჩვენც ავიყარენით და უმთავრეს ბანაკისკენ წავედით.

ჩვენს წასაყვანად თვით ჰუმარი მოვიდა. ძალიან გულადი და მარჯვე კაცი იყო ცხონებული, მავრამ ერთი ნაკლი სჭირდა: ომში მარტო იმასა ზრუნავდა, რასაც ხედავდა, და რასაც ვერ დაინახავდა, ისე აღარ მოაგონდებოდა, როგორც შარშანდელი თივლი. ეს ნაკლი სჭირდა და ეს იყო უმთავრესი მიზეზი ყოველი მის უბედურებისა.

რაკი ჩვენმა ჯარებმა უკან დაიწიეს და ფრანკფორტი მტერს დარჩა, ჩვენგან აგებული ყოველი სიმაგრე ჩვენს წინააღმდეგ გამოადგებოდათ, რასაკვირველია. სხვა გზა აღარა იყო რა, უნდა ავჩქარებულიყავით და თავი დაგვენებებინა იქაურობისთვის.

ხუთი საათი იქნებოდა, როდესაც გაჩერდა ჯარი. უკანა რაზმი გაჩქარებით ისროდა, რადგან პრუსიელები შორიახლო მოგვედუნენ იმ იმედით, რომ იქნებ მაინცამდე დავეწივნეთ როგორმეო. მაგრამ დავდექით თუ არა, ზარბაზნები დავუშინეთ და, ღვთის წყალობა გაქვთ, იმათ ჩვენ აღარ შეგვუწუხებიათ.

იმ ღამეს იქ ვიდექით და სახვალიოდ საბრძოლველად ვემზადებოდით. კუსტენი, ბირონი, ბოარნე და ჰუმარი ერთს კარავში იყვნენ მთელი ღამე და ისე გაათენეს, რომ თვალი არ მოუხუჭავთ. მაგრამ გათენდა და მტერი კი არსად იყო. ჩვენი ჯარიც დაიძრა და მშვიდობიანად მიიღწია მაინცს.

იმ ორ ბატალიონში, რომელმაც თავი დაახწია ფრანკფორტელებს, იყვნენ აგრეთვე ჩემი და ელისაბედი და ჩემი სიძე მარესკოცხენიც იქ დარჩენოდით, ურემიც, მთელი თავიანთი ქონებაც, მაგრამ „ურემს ვილა ჩივის, კადევ კარგი, რომ ცოცხალნი გადავრჩით იმ საშინელებასაო“, იძახდა ლიზა.

საშინელი ხასიათის კაცი იყო კუსტენი: თუ გავიმარჯვებდით

საღმე, გამარჯვება ჩემიაო; და თუ ცოტა რამ მარცხი მოგვივიდოდა, მაშინვე სხვას დასდებდა ბრალს. აქაც ესევე მოიქცა და ფრანკფორტის გარნიზონის უფროსი ვანჰელდენი სამხედრო სამართალში მისცა და მიუხედავად იმისა, რომ ლომივით იბრძოდა საწყალი კაცი, ყოველივე ღირსება აჰყარა.

აი, რითი გათავდა ფრანკფორტის აღება. და ახლა სხვა ვთქვათ, უფრო საინტერესო.

VII

მიანში რომ შევედით, თოვდა. მთელი ჩვენი ჯარი მშვიდობით დაბრუნდა თავთავის ბინაზედ, გარდა მენიესი, რომელიც ოთხასი კაცით ერთად პრუსიელებმა შეიმწყვდიეს კონიგშტეინში. 1792 წ. ძალიან ცუდად თავდებოდა ჩვენთვის.

დავიწყეთ ისევ სიმაგრეების შეკეთება, მერე იმ სიცივეში! დიდ ხანს არ ვიტყვი და სულ ერთი თვე რომ ყოფილიყვნენ ჩვენი დიდებული ბატონები ჩვენს ალაგას, ერთიც ვერ გაუძლებდა ჩვენს ტანჯვას, და ჩვენ კი... ჩვენ რა? ჩვენ სულ უბრალო გლეხკაცები ვიყავით, ტანჯვისთვის და შრომისთვის გაჩენილნი! ჩვენ რა სახსენებელნი ვიყავით?!

იანვრის დამდეგს კონვენტმა სამი თავისი წარმომადგენელი გამოგზავნა ჩვენთან, რებელი, პაუსმანი და მერლენ ტიონვილელი; ეს სამი წევრი საერო კრებისა ყოველთვის ჩვენთან იყვნენ, ყველა ჩვენს საქმეში, და ჩვენს გამხნევებას ცდილობდნენ. არც სიცივეს ვრიდებოდნენ, არც ქარიშხალს, მიდი-მოდოდნენ თავიანთი სამფუარი სარტყელით და იმედიანად გვიძახდნენ:

— გამხნევდით, მამულიშვილნო! მომავალი ჩვენია!

და თუმცა ყინვისაგან ცრემლი გვდიოდა და გათოშილები ძლივს და ვიბრძოდით, მხიარულად შევძახებდით ხოლმე:

— რესპუბლიკას გაუმარჯოს!

გერმანელები კი ომშიაც არ იშლიდნენ განცხრომას და ნებიერობას... იმისთანა თოვლი იდო, და ზედაც იმისთანა ყინვები დაიჭირა, რომ ძალღს არ გააგდებდა კაცი გარეთ, როდესაც კონვენტის წევრებმა პრუსიელების ნახვა მოინდომეს. რვა ბატალიონი წაიყვანეს თან და ისე შეუვიდნენ მტერს, რომ ის ჯერ გონებაზედაც ვერ მოსულიყო. ბევრი ტყვე იშოვეს და დიდძალი საქონელი.

ძალიან ნელა გადიოდა ზამთარი. დღე გაჩქარებულნი ვმუშაობდით და საღამოზე მივუსხდებოდით ცეცხლს, თან დასველებულ ტანისამოსს ვიშრობდით და თან კონვენტის ამბებს ვკითხულობდით

გაზეთებში. მთიულების და ჟირონდელების შუა შუღლი დღითიდღე მატულობდა. იმავე დროს ხმა გავარდა, სასახლის ერთს კედელში ჩამალული ყუთი უპოვნიათ რკინისა საიდუმლო ქაღალდებით საესეო. ყველამ იცოდა, რომ მეფეს ძალიან უყვარდა ზეინკლობა და როდესაც დრო ჰქონდა, სულ რკინეულობას აცოდვილებდა. ერთი ზეინკალი, სახელად გამენი, მოხმარებოდა მეფეს ამ რკინის ყუთის გაყვებაში. შემდეგში ეს კაცი ავად გამხდარაყო და ეფიქრა: ალბად მეოემ საწამლავე შემომპაპრა, რომ მოგვედე და მისი საიდუმლო არავის გავანდოო. ამდგარიყო და მინისტრისთვის, სახელდობრ როლანისთვის, ეამბნა ეს ამბავი.

პარიზელების ბატალიონი წმინდა ეგნატეს მონასტრის გალავანში იდგა და ხშირად მივდიოდი ხოლმე ელისაბედის და მარესკოს სანახავად. უცნაური ხალხი ყოფილა ეს პარიზელები. როგორც კი მიიღებდნენ გაზეთებს და წაიკითხავდნენ რასმე, აიშლებოდნენ ყველანი, სამ-სამი და ოთხ-ოთხი ერთად აღიოდნენ მაგიდაზედ და მოჰყვებოდნენ როლანის ლანძღვას: რაც რკინის ყუთში საიდუმლო ქაღალდები იყო, 'სულ როლანმა დასწვა, რადგან ჟირონდელებს ძალიან შეარცხვენდა იმ ქაღალდების გამოქვეყნებაო, — იძახდნენ. ისიც მოხდებოდა ხოლმე, რომ სასიამოვნოს წაიკითხავდნენ რასმე და დაიწყებდნენ ცეკვას და კარმანიოლის სიმღერას. ხანდახან იმათ სხვებიც შეუერთდებოდნენ და იმისთანა მხიარული ჟრიაშული ატყუდებოდა ქალაქში, თითქო პრუსიელების ჯარისა ხსენებაც აღარსად არისო.

ვერ წარმოიდგენთ, რა სიხარულით მიეგებნენ პარიზელები გაზეთების ამბავს, — მეფე ლუი XVI გასამართლებული უნდა იყოს, რადგან სამშობლოს ღალატი ბრალდებოა: განა არა, დიდი ხანა ხმა დადიოდა, მეფე უნდა გაასამართლონო; საფრანგეთის ყოველ მხრიდან თხოვნა მისდიოდა საერო კრებას ათასი და ათი ათასი კაცის ხელმოწერილი, მეფე სამართალში უნდა იქნას მიცემულიო; მაგრამ ვინ წარმოიდგენდა, რომ ჩვენს მეფეს მართლა ბრალდებულთა სკამზედ დასვამდნენ.

ბევრჯელ დავსწრებივარ გამოჩენილი ავაზაკების და ყაჩაღების გასამართლებას და ყოველთვის განცვიფრებული დავრჩენილვარ ჩვენი ხალხის ხასიათით: ოღონდ კი გაავონე რამე ამგვარი, ოღონდ დაანახვე გამოჩენილი კაცისმკვლელი და თუნდა პურსაც ნუ აქმევ! პოდა, ერთი უბრალო ყაჩაღი რომ ასე გაიტაცებს ხოლმე ჩვენს ხალხს, წარმოიდგინეთ, როგორ აიშლებოდა მთელი საფრანგეთი, როდესაც ხმა გავარდა, მეფეს ასამართლებენო. მაგრამ მეფეს მეფედ ხომ აღარ ახსენებდნენ: ლუი XVI ახლა ლუი კაპეტს უწო-

დებდნენ, რადგან საფრანგეთის მეფენი კაპეტის გვარისანი არიან. ყავახანებში, ლუდხანებში, ბაზარში, ჯარის ბინაზედ, საცა კი ორი კაცი შეხვდებოდა ერთმანეთს, სულ ამაზედლა ლაპარაკობდნენ; ზოგნი ამბობდნენ, მეფეს რაღა გასამართლება უნდა, აიღონ და დახვრიტონ, რადგან მოსისხლე მტერია რესპუბლიკისა და კაცობრიობისაო! ზოგნი ამტკიცებდნენ, ეგ მეტისმეტი იქნება და ისიცა კმარა, რომ საფრანგეთიდან განვდევნოთ ისა და მთელი იმისი გვარიო! ზოგნი კიდევ იმ აზრისა იყვნენ, რომ გილიოტინით თავი გავაგდებინოთ, რადგან სამშობლოს უღალატაო! ყველა თავისას გაიძახოდა, ყველგან უსიამოვნება და განხეთქილება იყო; მთელი საფრანგეთი და მასთან ერთად მთელი ჯარიც სამ ნაწილად იყო დამდგარი. ზოგნი მთიულებისკენ იყვნენ, ზოგნი ყირონდულებისკენ და ზოგნი კიდევ ვაკელებისკენ. ამ განხეთქილებას ზედ დაურთეთ გახიზნულ დიდებულთა ნათესაეების და კონსტიტუციის მოწინააღმდეგე ბერების ოინება და ცხადად წარმოგიდგებათ, რა საშინელ ყოფაში უნდა ყოფილიყო იმ დროს ჩვენი ქვეყანა.

ყველაზედ უსაშინელესი განხეთქილება კი საერო კრებაში იყო. ყირონდულებმა ყოველი ღონისძიება იხმარეს, რომ მეფისთვის გასამართლება აეცდინათ, მაგრამ რაკი ნახეს, რომ ვერა გააწყყეს რა, ყოველ დღე ახალ-ახალ ხრიკს უღებდნენ თავიანთ მოწინააღმდეგეებს, რომ საქმე შეეგვიანებინათ. ჯერ ის თქვეს, რომ 1791 წ. დადგენილი კონსტიტუციის ძალით მეფე ხელშეუხებელი უნდა იყოსო. მაგრამ სიტყვა მოკლედ მოუჭრეს მთიულებმა: ეგ კონსტიტუცია თვით მეფემ დაარღვიაო. მეორე დღეს სხვა მოიგონეს და ხმა-მადლივ ძახილი დაიწყეს, საერო კრება სხვაა და სასამართლო სხვა... რა უფლება აქვს საერო კრებას ვინმე გაასამართლოსო? ამითაც ვერა გააწყყეს რა და დაიძახეს, ხალხს მივმართოთ, ხალხს დავეკითხოთ, დაე ხალხმა გადასჭრას მეფის ბედისო. იმავე დროს იმისთანა ხმებს ავრცელებდნენ, რომ ხალხი უთუოდ უნდა შეშინებულიყო და მეფის მხარე დაეჭირა: თუ ღმერთი გაგვიწყრა და მეფე ლუი XVI დაუშავდა რამე, შეიკრიბებიან მთელი ქვეყნის ხელმწიფენი, სუყველანი ერთად საფრანგეთს მოაწყდებიან და ქვას ქვაზედ აღარ დასტოვებენო! მთიულებიც ყოველთვის მედგრად ეწინააღმდეგებოდნენ და პირში ბურთისა სჩრიდნენ: ხშირად ისე გაბრაზდებოდნენ ხოლმე ორივენი, რომ წამოცვივდებოდნენ რაც კი ყირონდულები იყვნენ და მუშტმოდერებული მისცვივდებოდნენ მთიულებს. შუაში რომ დინჯი და აუჩქარებელი ვაკელები არა ჰყოლოდათ, ერთმანეთს ამოხოცავდნენ.

მეფემ ნამდვილად უღალატა თავის ერს. ამას ნამდვილად მოწმობდნენ ის ქალაქდები, რომლებიც რკინის ყუთში იპოვეს სა-

სახლის კედელში ჩაღესილი. მთელ თავის ქონებას თურმე იმაზედ ხარჯავდა მეფე, რომ მოესყიდა საერო კრების წარმომადგენელი და დახმარებოდა გახიზნულ დიდებულებს, რომელნიც საზღვარგარეთ საფრანგეთში შემოსასევად ჯარებს აგროვებდნენ; მეფევე შევედრებოდა პრუსიელებს და ავსტრიელებს, მოდით, საფრანგეთი ააოხრეთ, ხალხი ძველებურად დაგვიმონავეთ და მე და ჩემს მემკვიდრეებს და ჩვენთან ერთად დიდებულებს და სასულიერო წოდებას ძველებური მეუფება მოგვანიჭეთო! ეს რომ ერთ საწყალ კაცს ექმნა ვისმე, ეს კი არა, თუნდ ამის მესამედიც, ერთ წამს არ აცოცხლებდნენ; და რადგან სამშობლოს მოღალატე ერთი საწყალი კაცი კი არა, თვით დიდებული მეფე ბრძანდებოდა, ჟირონდელები არავითარ საშუალებას აღარ უკადრისობდნენ, რომ მეფე გადაეჩინათ როგორმე. ხომ იძახდნენ, ჩვენ რესპუბლიკის მომხრე ვართო, — და ეს ვითომ-რესპუბლიკელები სულ იმის ცდაში იყვნენ, რომ საფრანგეთის შვილნი ერთიერთმანეთისთვის შეებრძოლებინათ და მით მაინც აესრულებინათ თავიანთი წადილი. მაშ რას მოასწავებდა მათი დაჟინება, მეფის ბედი ხალხს მივანდოთო? კარგად უნდა სცოდნოდათ, რომ ხალხში იმისთანა განხეთქილებას გამოიწვევდა ეს კითხვა, რომ უიარაღოდ და უსისხლოდ მისი გადაწყვეტა შეუძლებელი იქნებოდა.

ხალხს თავისი დარდიც ეყოფოდა. იმისთანა შიმშილი იყო მთელს საფრანგეთში, რომ ქრისტეს ტირილი იღვა ყველგან. პური თავის წონა ვერცხლის ფასად იყიდებოდა. მუშაკაცს ჯამაგირს ასსიგნაციებით აძლევდნენ და ამ ასსიგნაციებს კი თავისი მეოთხედი ფასიც აღარა ჰქონდა; მელუქნეები აღარც კი იღებდნენ ამ ქალაქებს; ვისაც პურის ყიდვა უნდოდა, რამდენიმე საათი უნდა მდგარიყო ხაბაზის დუქნის წინ, რომ ერთი გირვანქა პური ღირსებოდა როგორმე. ერთი სიტყვით, ხალხი შიმშილით იხოცებოდა და ხალხის შვილები კი გერმანიაში და ბელგიაში იბრძოდნენ ჟირონდელების წყალობით, რომლებსაც ეგონათ, ომს გამოვუცხადებთ მტერს, და მთაულებსაც ამით ვაჯობებთო. ხალხი შიმშილით იხოცებოდა და, სხვა საშუალება რომ აღარა ჰქონდა რა, საერო კრებას შესთხოვდა შველას: პურზედ და სხვა — უპირველეს საჭიროებათა დასაკმაყოფილებელ სანოვაგეზედ — გადაქრილი ფასი დასდეთ, რომ იმაზედ ძვირად არ იყიდებოდესო. მაგრამ ჟირონდელები ხალხის გოდებას ყურადღებასაც არ აქცევდნენ. რა დროს ხალხი იყო, მეფე ელუპებოდათ!

ეს ქრისტიანობის დამლევეს და იანვრის დამდეგს იყო.

იმ ცოტა ხნის წინად ხმა გავარდა, რომ კელლერმანის ალაგას დანიშნული გენერალი ბერნონვილი თავის ჯარით ჩვენკენ მოეშუ-

რება, რომ ჩვენთან ერთად შეებრძოლოს მტერსაო; მაგრამ პრუსიელები წინ დახვედროდნენ და ისე შეეკრათ ვიწრო ხეობები, რომ ეს შეერთება ვერ მოგვიხერხდა. დიდი ბრძოლა ჰქონდათ მაშინ ჩვენ ჯარებს, დიდი ვაჟკაცობა გამოეჩინათ ჩვენებს, მაგრამ გზა მაინც ვერ გამოეკვლიათ.

მარგალიტას წიგნი მიეწერე; დაწვრილებით ვუამბე ჩვენი ყოფაცხოვრება და ტალახში და თოვლში დაუსვენებლივ მუშაობა. კარგა ხანი გავიდა მას შემდეგ; მე იმედიც კი გადავწყვიტე — ალბად ჩემი წერილი პრუსიელებს ჩაუვარდათ ხელში, თორემ მარგალიტა უპასუხოდ არ დამტოვებდამეთქი. მართლდა, დღე არ გავილოდა, რომ ამგვარი ამბავი არა გაგვეგო რა. ერთ დილას, ის იყო ჩემს ალაგას სხვა დააყენეს დარაჯად და მეც გაჩქარებული დავბრუნდი ჩვენს ბანახედ, რომ კიბეზედ ერთ გლეხკაცს შევეფეთე. იმავე დროს ივანე სომის ხმაც შემომესმა ზემოდან:

— შენა გკითხულობენ, მიშელ!

შევხედე, ჩვენი კენტენი იყო, ფალსბურგიდან ფოსტა რომ მოჰქონდა ხოლმე ჩვენკენ. ვერ წარმოიდგენთ, როგორ მიამა ჩვენებურის ნახვა რომ არ შემრცხვენოდა, მივარდებოდი და ისე ჩავიკრავდი გულში, თითქო ჩემი მარგალიტა იყოსო.

— თქვენა ბრძანდებით, ბატონო კენტენ? რისთვის გარჯილხართ ამ სიშორეზედ? ნუ თუ შინიდან მოდიხართ?

— შინიდან რომ არ მოვდიოდე, ხომ შენც არაფერს მოგიტანდი. არა, აქ კი არა მაქვს, დუქანში დავტოვე; ან სად შემეძლო იმოდენა კალათის თრევა? კარგი არ იქნებოდა, მომეტანა და შენ კი აქ არ დამხვედროდი!

— მარგალიტა როგორ გახლავთ?

— ძალიან კარგად. დღეს სწორედ ერთი კვირაა, რაც ვნახე; შენი პატარა ძმაც იქ იყო. იმოდენა მეხვეწა, რომ უარი ვეღარ ვუთხარ და ჯაგლაგს შენი კალათიც ზედ დავურთე. მოითმინე, მგონი, ქალაქიც გამომატანა შენთან.

უბეში ხელი ჩაიყო და მარგალიტას წერილი მომცა. გულს ძლივსდა ვიმარებდდი თავის ბუდეში. მინდოდა იქვე გამეხსნა, მაგრამ ამხანაგებისა შემრცხვა და, თუმცა გული სულ სხვას მეუბნებოდა, წიგნი გვიბეში ჩავიდე და მადლობა გადავუხადე:

— გმადლობ, ბატონო კენტენ!.. თუ გნებავთ, ახლავე გიახლებით კალათის წამოსაღებად.

მაშინვე წავედით და გზაში, რაკი მარტონი დავრჩით, ხან მარგალიტას ამბავსა ვკითხავდი, ხან ნათლიაჩემისას, ხან მამაჩემისას;

მაგრამ, რაც უნდა მეკითხა, მაინც ისევ მარგალიტას ამბავს ვეკითხებოდი; საქმე გავუჭირე საწყალ კენტენს.

— კარგად არის, კარგად! — მეუბნებოდა დაღლილ-დაქანცულ—თურაშაული ვაშლივით გააქვს დაჟღავნით. ისეთი მხიარულად არიან ორივენი, რომ მეტი აღარ შეიძლება!

— ოჰ, რა მადლობელი ვარ თქვენი, ბატონო კენტენ! — შეეძახოდი გახარებული და თვალწინ მიდგა ჩემი მარგალიტა, შოველი, წიგნის მალაზია... ისე ცხადად მელანდებოდა ჩვენი სოფელი, რომ თვალეზზე ხელს ვისვამდი, ხომ არ მძინავს-მეთქი. გახარებული გადაყურებდი ქვეყანას და იმისთანა გუნებაზედ ვიყავ, რომ მოხუცებული კენტენის კომბოსტოსავით ჩამრგვალებული ცხვირი და ძირს დაშვებული ლაშიც კი მშვენიერებად მეჩვენებოდა!

ერთ ვიწრო ქუჩაში შევეუხებეთ; ამბობენ, სტამბის გამომგონი ამ ვიწრო ქუჩაში იდგა და წიგნის ბეჭდვაც აქ გამოიგონაო. სავსე იყო ქუჩა ჩვენებური გლეხკაცებით და ურმებით; ისეთი ყვირილი იდგა, ისეთი ჟრიაშული, რომ გეგონებოდათ, ბაზრობა არის და მთიდანაც დაძრულა ხალხიო. სარბურგელები, სავერნელები, კატრვანელები, მიტტელბრონელები, სულ იქ იყვნენ.

— თქვენ მარტო არა ყოფილხართ მაინცში, ბატონო კენტენ?

— მარტო რად ვიქნები, ას ორმოცდაათი ურემი ჩამოვიტანეთ წუხელი. დაგვიარეს გზარებმა და სულ კინწისკვრით გამოგვრეკეს, ჯარს ტყვია-წამალი უნდა ჩაუტანოთო. ჩემს ალაგას ბაპტისტი ჩავაყენე, ჩემი ბიჭი; ფოსტას ახლა ის ზიდავს და მე კიდევ ურემზედ წამოვედი, ძან ცუდად ყოფილა, ბიჭო, თქვენი საქმე; ამბობენ, მაინცში მოემწყვდევთან ჩვენი ჯარებიო!

— ჩვენი ფიქრი ნუ გაქვთ. თქვენ ეს მითხარით, ისე როგორ მოაღწიეთ აქამდე, რომ მტერი არსად შეგხვდათ?

სიცალი დაიწყო და მიპასუხა:

— ფალსბურგიდან დაწყებული სულ მილიცია მოგვდევდა; და საცა ცოტაც არის შიში იყო, იქ ორასი კაცი კიდევ ცხენოსანი მოგვიძღვოდა წინ. სამი დღე მშვიდობიანად ვიარეთ, მაგრამ მეოთხე დღეს კი ღვთის წყალობა გვაქვს, ჩვენ ისინი დავიფრინეთ. ერთ ვიწრო ხეობაში მიიკლაკნებოდა არხეინად ჩვენი ქარავანი, რომ უცბად ხმა გაისმა: არიქათ პრუსიელებიო! ვიდრე ჩვენ გონებაზედ მოვიდოდით და შევემზადებოდით რითიმე, თავზედ კი წამოგვადგნენ თავთანთა გრძელი შუბებით:

— მერე არ შეგეშინდათ, ბატონო კენტენ!

— დამცინი თუ, მიშელ? რისა უნდა შემშინებოდა? ისე დაუხვდნენ ჩვენი ბიჭები, როგორც რკინა! იმათთან რომ ვერა გააწყეს რა,

ადგენ და ურმებისკენ გამოგზავნეს ათიოდე ცხენოსანი. გამრაქრო-
ლეს ცხენები და თანაც რაღასაც გვემუქრებოდნენ. მეექვსე ურემბ
ჩემი იყო. წინა ურმისა რა მოგახსენო და მე კი, ერთი თვალის და-
ხამხამებაზედ მომვარდა პრუსიელი, თოფის ლულა გულში მომცა
და — გამოუშვიო! შემომიტიო.

— აგრე კი არ უნდა-მეთქი, — შეეძახე, გავუხტი განზედ, გა-
დავაწანი შოლტი და ისე მშვენივრად გავკარ შიგ ყურის ძირში,
რომ თავი შუაზედ გავუბე. საზარლად შექლოილა უბედურმა და
თითქო სიმწარისაგან თავბედისა აღარა გაეგება რაო, აღვირი ხელი-
დან გააგდო და უზანგიდან ფეხები გამოყარა. მაგრამ სხვებმა და-
გვინახეს, იმისმა ამხანაგებმა, და ორი ცხენოსანი კიდევ სხვა წამოვი-
და ჩემსკენ. რა მექნა, თოფი მე არა მქონდა და ხმალი? ავდექი და
ურმებს ამოვეფარე. ჩემი ჯავრი საწყალ მაკრიზედ იყარეს, იმ უწ-
მინდურებმა! იმისთანა ძალათ ჩაპკრა ერთმა პრუსიელმა თავისი
შუბი, რომ მიწამდე დაიყვანა. მაკრის ნიკოლოზ ფინკი მიეშველა,
მაგრამ იმანაც ვერა გააწყო რა, ტყუილუბრალოდ დაიქრა კაცი და
კინალამ თავიც შეაკლა. მე კი ძან-ძან გადავრჩი, რადგან ჩვენებს
კიდევ გაექცათ მტერი და ახლა ჩვენკენ მოეშურებოდნენ. თხუთ-
მეტოდე კაცი მოვუქალით და ბევრი კარგი ცხენიც ვიშოვეთ იმ
დღეს, ჩემო მიშელ.

ნეტავი გენახათ, რა გულაანად იცინოდა მოხუცებული კენტენი,
ამას რომ მიამბობდა.

— ლუი XVI გასამართლებაზედ რაღას ამბობენ ჩვენებურები?

— კაპეტის გასამართლებაზედ? ჰო და ქალებს მაგის მეტი აღარა
აგონდებათ რა. ჩემს დედაკაცს უნდოდა კელაპტარი აენტო და კაპეტ
შეევედრებანა ღმერთისთვის, მაგრამ იმისთანა დღე დავაწიე, რომ კა-
პეტიც დავავიწყე და კაპეტის პაპაც! იცი რას გაიძახიან ის უსინიდისო
ბერები? კაპეტს ნუ შეეხებათ, თორემ ციდან ანგელოზები ჩამოვლენ
და ისინი მიეშველებიანო! სულ ისინი რევენ ქვეყანასა და! ნეტავი კი
იმათი დაქერა შეიძლებოდეს და! მაგრამ მოდი შენა და დაიჭირე ის
ღვთისა და ქვეყნის მტრები! სამრეკლოზედ დარაჯად დაყენებული
კაცი ჰყავთ და დაინახავს თუ არა ჟანდარმებს, მაშინვე ზარს ჩამოჰ-
კრავს. წადი შენა და სდიე! სულ ბერებისაგანა გვჭირს, რაცა გვჭირს,
ჩემო მიშელ, და ღმერთი რომ სამართლიანი ყოფილიყო, ბატონსა და
ბერს არ გააჩენდა. წარსულ კვირას დედაშენა ვნახე. ისე გაუტაცნია
ვიდაცა ბერის ქადაგებას, რომ თოვლივით გათეთრებულა საწყალი
დედაკაცი: დედოფლის ცოდვით მომივიდაო, იძახის, და ის კი არ
იცის, რომ დედოფალს არც კი ახსოვს, გდია სადმე დედაშენი თუ
არა!

— სულ ტყუილაა, ჩემო მიშელ, ჩვენ თუ გვიშველის ვინმე. ისეე კამბონი გვიშველის. გახიზნულების მამულს კამბონი წვრილ-წვრილადა ჰყიდის და ცდილობს ისე მოაგვაროს საქმე, რომ გლეხკაცობამ შეიძინოს. მამულს ნისიად გვაძლევს, დიდი ხნის ვადით. აი, კაცი იმისთანა უნდა და დიდი პატივისმცემელიც ვარ მისი, ღვთის წინაშე. მე მამული ვიყიდო, ფული მივცე და მერე არისტოკრატი მოვიდეს ვინმე და მითხრას, ჩემიაო აბა გაბედოს! აბა გაბედოს და ხმა ამოიღოს! მთელი საფრანგეთის გლეხკაცობა წამოიშლება! ერთი ვერ გადარჩება ცოცხალი, ერთი, თუ ხმა ამოუღიათ იმ მუქთახორა ბატონებს! ქვეყანა გლეხკაცია, მუშაკაცი და არა ბატონები და ბერები. ბატონები და ბერები ქვეყანას ღუბავენ და გლეხკაცი კი აშენებს ქვეყანას. დიად, კამბონის წყალობით არის, რომ დღეს ჩვენში უამულო გლეხკაცი თათქმის აღარავინ არის. ეეჰ, მცოდნოდა! ისე მოვერიდებოდი ღუქანს და ღუღხანას, როგორც თათარი! რაც მე ჩემს სიცოცხლეში სასმელზედ ფული წამიხდენია, რომ მომეგროვებინა, დღეს ერთ კარგ აზნაურის მამულს ვიყიდდი. გვიანდაა სინანული, ჩემო მიშელ, გვიანდაა! მაგრამ მე თუ აღარ გამომადგება, შენ მაინც გამოიყენე! ეს იცოდე ჩემგან, წასულია, რასაც დაღვე, შენ ის აღარას გამოგადგება!

— რაც შეეხება ლუი კაპეტს, სულ ერთია ჩემთვის: თუ უნდათ, თავი მოსჭრან, თუ არა აქეთ-იქით ჟანდარმები ამოუყენონ და ხელშეკრული განდევნონ საზღვარგარეთ. ვინ მე, ვინ ლუი კაპეტი? თავში ქვა უხლია და მუტელში სამართებელი, ოღონდ ჩემი ცოლი ფულს ნუ მომპარავს და ვიღაცა წვერცამეტა ბერს პარაკლისს ნუ ახდევინებს, ღმერთო, შენ გააძლიერე მწყალობელი ჩვენი მეფეო! ასე, ჩემო მიშელ! იქნება ჰგონიათ არისტოკრატებს, რომ ძველებურად პირუტყვია გლეხკაცი და თავისი სიკეთის შეგნება არა აქვს! სცდებიან, ძალიან გულით სცდებიან! ისიც ეყოფათ, რაც ხანი იბატონეს! აგერთ საუკუნეზედ მეტია, სულ იმას გაიძახდნენ, — მიწიერი მეუფება ჩვენაო და სასუფეველი ცისა თქვენაო. რიგით არ უნდა იყოს ყველაფერი? ახლა ჩვენი რიგია: მიწიერი მეუფება ჩვენი იყოს და სასუფეველი ცისა დაე არისტოკრატებმა დაიმკვიდრონ. ოღონდ აქ ნურას შეგვეცილობიან და თუ იქ ჩვენ შევეცილოთ რასმე, პირში ჩაგვაფურთხონ.

ის იყო ღუქანის ეზოშიც შევედით და რაკი დაინახა, რომ მივედით, მხიარულად შემომძახა:

— მივედით, მიშელ, მივედით! მომითმინე, გომში ჩავიდე. შენ კალათი იქა მაქვს შენახული.

ცოტა ხანს უკან ერთი საკმაოდ მოზრდილი კალათი ამომიტანა,

ამაჩემის ხელით დაწნული კალათი, სწორედ იმისთანა, როგორც ამ ორის წლის წინათ მარგალიტას გაუფუგზავნე, პარიზში რომ იყო; მომაგონდა ჩვენი სოფელი, ჩემი მარგალიტა და გულმა კენესა დამიწყო.

— რა უნდა მოგართვათ, ბატონო კენტენ?

— რა უნდა მომართვა? ერთი კარგი ხელადა წითელი ღვინო! სხვა რა უნდა მომართვა, შენგან არ მიკვირს?

იქვე ღუშქანში შევედი და ერთი ჩარეკა ღვინო ჩამოვასხმევი. ხალხით სავსე იყო იქაურობა. შევედი და თუ არა, მაშინვე ვიცან ნიკოლოზ ფინკი: ბუხართან მიმჯდარიყო საწყალი და თვალდახუჭული, სისხლიანი მჩვრებით თავახვეული საშინელი სანახავი იყო.

მე და კენტენი განცალკევებით დავსხედით. ღვინო დავუსხი, ბოლოში მოვიხადე და მარგალიტას წერილის კითხვა დავიწყო.

განა აღამიანი იქნება, რომ სიყვარულის სიტკბოება არ ეგემოს! მაგრამ მგონი ყველამ არ იცოდეს, რა ნეტარებაა ჰკვიანი ქალის სიყვარული. სხვებივით მარტო იმას კი არ მიმეორებდა ურიცხვად ჩემი მარგალიტა, რომ მიყვარხარ და მიყვარხარო; არა, ჩემს ყოფა-ცხოვრებას მკითხავდა, გაჭირვებაში გამაგრებას მირჩევდა და თანაც იმისთანა იმედიანად მოელოდა ჩვენს შეყრას, რომ მეც იმედით ამივსო გული. კაცი ცოლით უნდა ამაყოფდეს და, იქნება დამეთანხმოდ, ოცი ათასი თუმნის მოგებას კარგი ცოლის შერთვა სჯობია.

სამი ახალი პერანგი იყო კალათში, კარგი ლამაზი მატყლის წინდები, რომ ფეხი არ გამცივებოდა, ერთი წყვილი წალა; ერთის სიტყვით, ყველაფერს მიგზავნიდა, რაც კი საჭიროა ჯარისკაცისთვის, რომელიც თოვლში და ტალახში აღამებს თავის ღლებს და ძილითაც უფრო ხშირად ცის ქვეშ რჩება, ვიდრე ჰერ ქვეშ. ჩემთვის რომ ეკითხათ, მე ვერ ავუნუსხავდი ისე ყველაფერს, როგორც იმას მოჰგონებოდა ყოველი წერილმანი. ზედაც ერთი კარგი ლორი ჩაედო და ერთი ხელადაც ჩვენებური არაყი. ისე ჩემს ღლეში არ მწყურებია სიცოცხლე, როგორადაც მაშინ და ჩემს თავს ფიცს ვუღებდი, ქვეყნისა და სამშობლოს წინაშე მე ჩემს მოვალეობას არ ვუღალატებ, მაგრამ თუ ცოცხალი გადავრჩი... მაგრამ უჩემოდაც ყველა მიხედება მაშინდელ ჩემს გულის დარდებს.

მარგალიტას წერილთან შოველისაც იყო; ძალაან ვწუხვარ, რომ სადღაც დამეკარგა და არ შემიძლია სიტყვასიტყვით მოვიყვანო, რადგან ზედმიწევნით განმარტავდა მაშინდელს ჩვენს საქმეებს და წინასწარმეტყველებით ასწერდა, რაც შემდეგში უნდა მომხდარიყო და მოხდა კიდევ.

წიგნი ნათლიაჩემთან იყო მიწერილი და თუ არა ვცდები, თარიღი 1 ქრისტეშობისთვე 1792 წ. ჰქონდა. ამ წერილში შოველი სამაგალითოდ ახსაათებდა მთიულების წინამძღოლთ და მეტადრე დანტონს, რომელსაც ყველაზედ ძლიერად თვლიდა გამბედაობით, ბუნებრივი მჭერმეტყველებით, კეთილი გულით და შორსმჭკრეტი გონებით. რაც უნდა ცხარე შეტაკება მოუხდეს ჟირონდელებთან, ის მაინც ყოველთვის შერიგებას და თანხმობის ჩამოგდებას ცდილობს და სულ იმას ევედრება: სამშობლოს გულისთვის მაინც დავივიწყოთ ამოდენა შუღლი და ქიშპობა, შევერთდეთ და შეერთებული ძალით ვემსახუროთ რესპუბლიკის გაძლიერებასო. მაგრამ ტყუილად ცდილობს ჟირონდელებთან შეთანხმებას; მართალია, მათ შორის ძალიან ბევრნი არიან სამაგალითო ორატორები, მაგრამ მათი სულის ჩამდგმელი როლანის ცოლია, და როლანის ცოლს ისე სძულს დანტონი და ისე უყვარს დიდება, რომ მთიულებს თავის დღეში არ შეურიგდებაო.

თუ კვლავაც ასე მოგვექცნენ და ყოველი ჩვენი წადილი თავიანთი კერპობით და ჯიბრით ჩაგვიშალეს, სამშობლოს დაღუპვის მიზეზი ჟირონდელები იქნებიან და სამშობლოს დაღუპვას, ისა სჯობია, თითონ ისინი დავლუპოთ; თუ არ დაიშალეს, ადრე იქნება თუ გვიან, ჩვენ და ჟირონდელები შევეტაკებით ერთმანეთს და, ღმერთმა კი ნუ ქნას, საშინელი იქნება ჩვენი შეტაკება! ჯერ ახლაც რა ამბავია საფრანგეთში, და მაშინ ხომ სულ აიწეწება ჩვენი საქმეები: სამხრეთი ჩვენკენ იქნება, ვანდე კონსტიტუციის მოწინააღმდეგე ბერებისკენ; სხვა თემები ჟირონდელებისკენ. და თუ კი ჩვენ ერთმანეთის წახრჩობას მოვუნდებით, ვილა გაუძალიანდება გარედან მოსულ მტერს? ჟირონდელებისა გამო სამშობლო განსაცდელშია და უპირველეს ყოვლისა ჟირონდელები უნდა დავიმორჩილოთო.

შოველი გულითა სწუხდა ასეთს გაჭირვებას თავისი პარტიისას და თუმცა გაჭირვებული მზად იყო ყოველი ღონისძიება ეხმარა თავისი მიზნის მისაღწევად, მაგრამ ეტყობოდა, ძალიან სწყინდა, რომ მთელი პარტია და მეტადრე იმისთანა განათლებული კაცები, როგორც, მაგალითად, ვერნიო, ერთს ქალს დამორჩილებოდნენ, ჟირონდელების მარიამ-ანტუანეტას. წერილს იმით ათავებდა, რომ ამ ცოტა ხანში გვინდა გავათავოთ მეფის გასამართლების საქმე, რომ ამით მაინც ჩამოვხსნათ ჟირონდელებს ნილაბი და იქნება უთანხმოებაც ჩამოვაგდოთ მათ შორის: მაშინ გამოჩნდება, ვინ ბრძანდებიან ბატონი ჟირონდელები — ხელმწიფის მომხრენი თუ რესპუბლიკელები? ეგ იმაზე იქნება დამოკიდებული, წაეჭომაგებიან მეფეს თუ მის დასჯას მოითხოვენო.

და მართლსაუც იწერებოდა: დაიწყო თუ არა ლუი კაპეტის საქმე, მაშინვე გამოჩნდა, ვინ იყო რესპუბლიკის მომხრე და ვინ — მტერი.

ისე გამიტაცეს ამ წერილებმა, რომ კენტენი აღარც კი მომგონებია. მე რომ კითხვა გავათავე, იმას ხელადა გაეთაყვებინა და ბარიბარს გამოვედით. დახლიდარს გავუსწორდი, ყველასთან მოკითხვა დავაბარე, მარგალიტასთან კოცნა, და გახარებული გავეჩქარე ჩვენი ბინისკენ.

მეორე დღეს, 22 იანვარს, შიკრიკმა ამბავი მოიტანა, მეფეს სიკვდილით დასჯა გადაუწყვეტესო და ორი თუ სამი დღის შემდეგ ხომ თავიც მოაგდებინეს. ბევრს ეცადნენ ჟირონდელები, ბევრი იძახეს, ნუ აჩქარდებითო, მაგრამ ველარა გააწყეს რა და როდესაც კენტენის ყრაზედ მიდგა საქმე, იმათაც, თითქმის ყველამ, სიკვდილით დასჯა გადაუწყვეტეს.

ჯარი ძალიან კმაყოფილი იყო ამ გადაწყვეტილებისა.

ყველანი ვხედავდით, რომ სამართალი მართლა და ერთი იყო დიდისთვის და პატარასთვის, მეფისთვის და გლეხკაცისთვის. ყველანი ვხედავდით, რომ სამშობლო უფრო ძლიერი და წმინდა ყოფილა, ვიდრე მეფე; ვხედავდით, რომ ფიცის გატეხა და სამშობლო ქვეყნისადმი ლალატი თვით მეფესაც აღარ ეპატიებდა. მაგრამ იმავე დროს იმასაც კარგად ვხედავდით, რომ ევროპიელ მეფეებს არაფრად ეჭაშინიებოდათ ხალხის ასეთი გაძლიერება და მეფის დამცირება; ყველაფერი მაგალითით და მიბაძვით არისო, იტყოდნენ, და ჩვენმა ქვეშევრდომებმაც რომ მოინდომონ ჩვენი გასამართლებაო? ცხადი იყო, მეფეები და ხელმწიფეები თავის დღეში არ გვაპატიებდნენ ჩვენ, პირუტყვივით დამუნჯებულ ყმებს, ღვთისაგან კურთხეულის და ღვთის სწორის მეფის მოკვლას; არ გვაპატიებდნენ იმ აზრის მოფენას, რომ მეფე ღმერთი კი არა, უბრალო ადამიანია და თუ დააშავა რამე, იმასაც ისევე მოსჭრიან თავს, როგორც ყველა სხვა ავაზაკს. დიად, კარგად ვხედავდით, რომ მეფის მოკვლით რესპუბლიკამ მოსისხლე მტრებად გადაიკიდა ყველა მეფეები და ხელმწიფეები და ახლა საქმე ის იყო, რომ ამ ბრძოლიდან ცოცხალი საფრანგეთი გამოსულიყო.

ამას ყველანი კარგადა ვგრძნობდით, მაგრამ შიშს არ ვიკარებდით და იმედინად შევეყურებდით მომავალს. რომ გაიგეს, მეფეს თავი გააგდებინესო, მთელი ორი კვირის განმავლობაში ათასობით და ათი ათასობით უგზავნიდნენ საერო კრებას საფრანგეთის ყოველი მხრიდან აღრესებს და მადლობას მოღალატის ღირსეულად დასჯისთვის.

მოდით და მოდიოდა ურემი ურემზედ — პური, ქერი, თევ, ტყვი-წამალი და იარაღი; წისქვილები ფქვას ველარ ასწრებდნენ და ჩვენ კიდევ ჩალაგებას. ეტყობოდა, მტერი მაინცში გვიპირებდა შემწყვდევას.

თებერვლის დამდეგს ყირონდელმა ბრისსონმა წინადადება შეიტანა საერო კრებაში, ინგლისს და პოლანდიას ომი გამოუტყხადოთ, რადგან იქაური ხალხი ომის გამოცხადებასლა ელის, რომ აიშალოს, მებატონეთაგან განთავისუფლდეს და რესპუბლიკა დაადგინოს; ეს ამბავი მე ლონდონიდან მომივიდა და თავს მოვიჭრი, თუ მართალი არ იყოსო.

მართალი ის იყო, რომ ინგლისელ მინისტრ პიტს ლონდონელი ვითომ და რესპუბლიკელები დაერიგებინა, საფრანგეთში ემაგრე მიწერეთ, რომ იქნება ომი გამოგვიცხადონო. პიტს ძალიან უნდოდა საფრანგეთთან ომი, რომ ძირიანად ამოეფხვრა რესპუბლიკური აზრები, რომელნიც ინგლისში ღლითიღლე მეტად და მეტად ვრცელდებოდნენ; პიტს უნდოდა დაემცილებინა რესპუბლიკა და კვლავ აღემაღლებინა არისტოკრატია. დიდი ხანია თითონვე აგვიტეხდა ომს, მაგრამ იცოდა, რომ ინგლისელი ხალხი არ მოუწონებდა ამ პოლიტიკას და ცდილობდა, ბრისსონი მოეტყუებინა, და ომი ჩვენვე გამოგვეცხადებინა; მაშინ ვინლა რას დაემდურებოდა პიტს? ინგლისელ ხალხს საფრანგეთს შეაბრძოლებდა და თვითონაც გმირის სახელს მოახვეჭდა.

დასწყევლოს ღმერთმა! ისე ბრისსონს არ ვახსენებ, რომ გული ნაღვლით არ ამევსოს! იმდენი იყვირა საერო კრებაზედ; იმდენი ლანძღა რობესპიერი, რომელიც ომის წინააღმდეგი იყო, იმდენა იცუღლუტა თავისი ამხანაგებით და გაზეთებით, რომ ჩვენლა უნებურად ომი გამოუტყხადეთ პრუსიას, როდესაც საომრად სრულიადაც არ ვიყავით მომზადებულნი. ამ ომის წყალობით მოგვივიდა, რომ შამპანი პრუსიელმა ჯარებმა გადათელეს და პარიზში კიდევ ენკენისთვეში იმოდენა ხალხი დაიხოცა. მართალია, მას შემდეგ გამარჯვება სულ ჩვენკენ იყო, მაგრამ იცით, რა ძვირად დაგვიჯდა ეს გამარჯვება? სამშობლოს განსაცდელი ადგიაო, გამოვაცხადეთ; ასი ათასი მეტი კაცი მოვაცდინეთ თავიანთ სახლ-კარს და ჯარში გავგზავნეთ; ჯარის შესანახად და შესაიარაღებლად მილიონები გვეხარჯებოდა და ეს მილიონები ტვირთად აწვებოდა უიმისოდაც გაჭირებულ ხალხს. ახლა სხვა ზარალი ბრძანეთ! ომის გამოცხადება და ყოველი წარმოების შეჩერება ერთია: ვაჭრობაც შედგება ხოლმე, მრეწველობაც, ყოველი წარმოებაც, მეურნეობაც, რადგან აღარც

საქირო მუშაა საშოვარი და აღარც ფული. ჩვენც სწორედ ასე მოგვივიდა. ფულის შოვნა აღარ იყო. გახიზნულების მამულების ყიდვას ველარავინ ახერხებდა. თუმცა ასიგნაციების განაღდება ყოველთვის შეიძლებოდა, რადგან მართებლობა გახიზნულების მამულებით ჰპირდებოდა პასუხის გებას ასიგნაციების პატრონს, მაგრამ ფასი არც ამით ემატებოდათ; ყველგან გაჭირვება და სიღატაკე სუფევდა.

თვალი რომ გაეხილათ, ღმერთთა მოწამე, ამ გაჭირვებას კარგად დანახავდნენ ჩვენი წარმომადგენელნი და ახლა ინგლისს და ჰოლანდიას არ გადაიკიდებდნენ; მაგრამ საერო კრება ისე გაიტაცა ბრისონმა და ჩვენი ჯარების გერმანიაში და ბელგიაში გამარჯვებამ, რომ ინგლისს და ჰოლანდიას ომი გამოუტყადა. საერო კრებამ კარგად იცოდა, რომ პიტი ჩვენ კეთილს არ დაგვაყრიდა, რადგან ინგლისის და ამერიკელ შეერთებულ შტატებ შუა ომში საფრანგეთი ამერიკელებს მიემხრო; ამიტომ საერო კრებამ სამასი ათასი კაცი კიდევ სხვა გაიყვანა ჯარში. ყველა ჯარები რვა ნაწილად გაჰყო, და საზღვრებისკენ გაგზავნა.

მარტის დამდევს დაბრუნდა ჩვენი წინამძღოლი მენიე თავისი პატარა რაზმით კენიგშტეინიდან. ისეთები მოვიდნენ საწყლები, რომ ძლივს დალასლასებდნენ; მთის მწვერვალზედ ამართულ ციხეში იყვნენ მთელი სამი თვე და გარს მტრის ჯარები ერტყათ. ჩამომხმაროვნენ, ჩაყვითლებულიყვნენ, მაგრამ ისე უბრწყინავდათ თვალეზი, თითქო ქორწილიდან მოდიანო. მოდიოდნენ და ამაყად მოაფრიალებდნენ მტრის ტყვიისაგან ცხრილსავით დაჩრეტებულ ბაირალს.

წინ გავეგებებით და მხიარულად შევეყვირეთ:

— გაუმარჯოს მენიეს! გაუმარჯოთ კენიგშტეინის გმირებს! ისინიც მოდიოდნენ გამარჯვებულნი და გახარებულნი, თითქო გუშინდელი გაჭირვებისა აღარც კი ახსოვთ რაო.

არ გასულა ორი კვირა; მენიემ გენერლობა მიიღო და საერო კრებამ გამოაცხადა: კენიგშტეინის მცველმა ჯარმა დიდი ღვაწლი დასდო სამშობლოსო.

იმ დროს 40 — 45 ათასი კაცი ჩვენს ჯარში ირიცხებოდა და სამი მაგდენი მტრისაში. მტრის ჯარი სამად იყო გაყოფილი და სამი მხრიდან გვემუქებოდა დაცემას. ეტყობოდათ, ისე უნდოდათ მოეწყოთ საქმე, რომ უკანიდან მოეარნათ, გზა შეეკრათ, მაინცში მოვემწყვდიეთ და სხვაფრივ თუ არა, შიმშილათ მაინც დავემარცხებინეთ. მაგრამ მენიე თორმეტი ათასი კაცით სპირში იღვა და თვალყურს აღევნებდა მათს მოძრაობას.

ერთ დილას ხმა გავარდა, პრუსიელები დასცემიან ჩვენი ჯარის

მარცხენა მხარეს, და... მზად იყავით საომრად! მთელმა ჯარმა ერთხმად შესძახა — რესპუბლიკას გაუმარჯოსო!

საომრად გასულ ჯარში ჩვენი ბატალიონიც მოჰყვა. წინ ჩვენი ახალი წინამძღოლი ნიკოლოზ ჟორდი მიგვიძღვოდა და გვაძინებდა:

— თქვენ იცით, როგორც მასახელებთ, ჩემო მთიელნო!
სიცილითა და სიმღერით მივდიოდით.

ორ საათზედ შორიდან ზარბაზნის ხმა შემოგვესმა. მშვენიერი დღე იყო და შორს, შორს ძლივს მოჩანდა კვამლი. ფეხი ავაჩქარეთ, თითქმის სირბილით მივდიოდით; მაგრამ უცბად ბრძანება მოგვივიდა, უკანვე დაბრუნდითო: ჰუშარი და ნეუვინგერი შებრძოლებოდნენ მტერს, მაგრამ გაეგოთ, რომ უკანიდან პრუსიელები ეპარებიან და უკან გამობრუნებულიყვნენ.

დიდი ხნის დაღამებული იყო, როდესაც ბინაზე მივედით ლაფში ამოსვრილები და დაღონებულები, რომ ტყუილუბრალოდ ჩაგვიარა ამოდენა სირბილმა.

მეორე დღეს ურმებით მოიტანეს დაჭრილები.

ყოველი მხრიდან მტრის ჯარი გვაწვებოდა; ნეუვინგერი ტყვედ ჩაუვარდათ, რადგან მიუხედავად კუსტენის ბრძანებისა, უნდოდა პრუსიელები შეეყენებინა. იძულებული ვიყავით მაინცში გავმაგრებულიყავით. იმისთანა ხალხის სიმრავლე მე ჩემს დღეში აღარსად მინახავს; დიდრონი სახლები ჯარების ბინად გადავაქციეთ; ეკლესიებში, სემინარიაში, თორაში და თვით სასახლეში ბზესა და თივას ვინახავდით. რა გვექნა მამ? ქალაქში ერთიასად მეტი ხალხი იყო, ვიდრე დაიტევდა.

საერო კრებას ახლა სხვა კომისრები გამოეგზავნა: ფლიგერი, რიტტერი და ლუი: ამათ კლუბელებს ვეძახდით. ისინი და მაინცელი ექიმი ჰოფმანი ცდილობდნენ ხალხში რესპუბლიკური აზრები გაეკრელებინათ; მაგრამ ქალაქში იმდენი ბერი იმალებოდა, რომ საერო კრების წარმომადგენელთ ყოველთვის შეიარაღებული კაცები დასდევდნენ თან, რესპუბლიკის მოწინააღმდეგეებმა არა აუტეხონ რაო.

ერთხელ კიდევ ვცადეთ ბედი, გვინდოდა გაგვერღვია მტრის ჯარები და სამშვიდობოს გავსულიყავით, მაგრამ სადაც არ მოველოდით, იქ უფრო მეტი პრუსიელები დაგვხვდნენ და უკან დაგვაბრუნეს. მეტი რა ღონე იყო? უნდა ვყოფილიყავით მაინცში და ქალაქი გაგვემაგრებინა.

იმისთანა სასტიკად გვექცევოდნენ ჩვენი უფროსები, რომ მეტი აღარ შეიძლება. სამამასახლისოში თითქმის ყოველ დღე მიჰყავდით

ორი, სამი კაცი და სამხედრო წესით ასამართლებდნენ. ერთი კი წამოეყრანტალა ვისმე, აგერა ამ კაცმა მომპარა რამეო, და დაიქერდნენ მაშინვე უბედურს, საჩქაროდ გაასამართლებდნენ და იქვე გალავენში დახვერეტდნენ... სხვათა სამაგალითოდ, იტყოდნენ ხოლმე აფიცრები. ყოველი მხრიდან ცუდი ამბები მოდიოდა: დამარცხებული ჩვენი ჯარები უკან იწევდნენ; ვანდეში მთელი ხალხი აჯანყებულიყო რესპუბლიკის წინააღმდეგ — ერი, ბერი და მებატონენი; დიუმურიე დამარცხებულიყო; მთელი ევროპა ჩვენს წინააღმდეგ ამხედრებულიყო; რომში ხალხს ფრანგები დაეხოცა... დანტონი საზარელის ხმით იწვევდა მამულაშვილთ რესპუბლიკის დასახმარებლად; რევოლუციური სასამართლო დავაწესოთ, რომ სამშობლოს მოღალატენი დასაჯოსო; ფულის მოსაპოვებლად მდიდრებს ხარჯი დავადოთო. ჟირონდელები კი თავისას არ იშლიდნენ და საკვირველი მკერმეტყველებით ამტკიცებდნენ, მთელს ქვეყანას ომი გამოვუცხადოთო საუკეთესო ყმაწვილკაცობას ასი ათასობით გზავნიდნენ ბრძოლის ველზედ დასახოცად და, როდესაც საქმე ფულზედ მივარდებოდა და მდიდრებზედ ხარჯის დადებაზედ, იმავე მკერმეტყველებით ეწინააღმდეგებოდნენ დანტონს.

ამოდენა უბედურების გაძლებას დიდი მხნეობა უნდოდა, მით უფრო რომ სწორედ ხუთნი მოდიოდნენ ერთზედ და ჯავრის ამოყრა ვერ მოგვეხერხებინა.

მტრის ჯარი 6 აპრილს მოუახლოვდა ქალაქს. ბაზარში დიდძალი გლეხკაცობა შემოსულიყო ახლომახლო სოფლებიდან და, რომ გაიგეს ჯარი მოდისო, ისეთი ალიაქოთი ასტეხეს და თავში ცემა, რომ იმაზედ სასაცილოს ძნელად თუ კაცი კიდევ წარმოიდგენს რასმე. სწორედ იმ დროს დარაჯად ვიდექი, ისინი რომ გარბოდნენ და ბევრი შევნატრე, ღვთის წინაშე: ნეტავი თქვენ, რომ თავისუფლად შეგიძლიათ მინდვრად სიარული და ჩემსავით ციხეში არა ხართ დამწყვდეულა-მეთქი.

იერიშის მოტანას ვერ გვიბედავდნენ, მაგრამ შეუწყვეტივ გვესროდნენ შორიდან და ბევრს არას გვაკლებდნენ. უნდა გენახათ, რა კენესით და გოდებით მიასვენებდნენ მოქალაქენი დაქრილებს! დედაკაცების ტირილი ცასა სწვდებოდა.

ხანდახან ჩვენც გავიდოდით ხოლმე ქალაქიდან და ახლო სოფლებში საქონლის შოვნას ვცდილობდით, მაგრამ ტყუილად ვირჯებოდით: გლეხკაცობას უდაბურ ტყეში გაერევა საქონელი და ხელცარიელი მივდიოდით ისევ ქალაქისკენ. ეგეც კუსტენის შეცდომა: ტყვია-წამალი, პური, ღვინო, არაყი, თივა და ბზე თავსაყრელი გვქონდა და საქონელი ძალიან ცოტა. ცოტა ხანს უკან სასტიკი

ბრძანება გამოვიდა, ქალაქგარეთ არავინ გავიდეს, თორემ დაეხვრეტათ. დარაჯებს უბრძანეს, თუ გაპარვა მოინდომოს ვინმემ, ესროლეთ.

ასე ვიყავით აპრილის გასულამდე. პარიზიდან გაზეთები აღარ მოგვდიოდა, საერო კრებასა აღარა ვიცოდით რა; სამაგიეროდ ასობით მოგვდიოდა პრუსიელებისგან დაბეჭდილი გაზეთები, რომელშიაც ისე იყო აწერილი საფრანგეთი, როგორც მტერს ენატრებოდა: ჩვენი ჯარები ყველგან დამარცხებულნი გაურბოდნენ პრუსიელებს, პარიზში შეუწყვეტილ მოქმედებდა რამდენიმე გილიოტინა და საუკეთესო პატრიოტებს თავებს აყრევიანებდა; სახელებიც იქვე იყო მოხსენებული ამ პატრიოტებისა; სამხრეთის ჯარი აუჯანყდა მართებლობას და ვანდელებმა ხომ დიდი ხანია სრულიად გაანადგურეს რესპუბლიკელი ჯარები; მეფედ მცირეწლოვანი ლუი XVII დასვეს და მის გაზრდამდე მეფის მოადგილედ დედა მისი დედოფალი მარიამ-ანტუანეტა იქნებოდა... ვინ იცის, კიდე რაებს იწერებოდნენ! განა არა, სულ იმას გვეუბნებოდნენ ჩვენი აფიცრები, მაგ გაზეთებს პრუსიელები ბეჭდავენ და ჩუმად შემოაქვთ, რომ გული გაგვიტეხონო. მაგრამ ყალბი ამბები მით თავის გავლენას არა ჰკარგავდნენ და ღლითი ღლე უიმედობა გვერევოდა. ჯარი იმ აზრისა იყო, რომ თუ მოვინდომეთ, ყოველთვის გავარდევით მტრის ჯარს და სამშვიდობოს გავალთო. ბოლოს იქამდე მივიდა ჯარის დრტვივა, რომ უფროსებმა ბრძანება გამოაცხადეს: მაინცი უმთავრესი სიმაგრეა რესპუბლიკისა და ეგეც რომ მტერს დაეუტოვოთ, ცოცხალი რაღად გვინდა თავი? რაც უნდა ეცადოს, ჩვენ მტერი ვერას დაგვაკლებს და, თუ გაბედა ვინმემ და ქალაქის დათმობა მოიწადინა, დახვრეტილ იქნება, როგორადაც სამშობლოს მოღალატეო!

ერთხელ კიდევ გავედით ქალაქიდან. ბნელ ღამე იყო და გვინდოდა იქ დავცემოდით მტრის ბანაკს, სადაც თვით მეფე გვეგულუბოდა პრუსიისა. წინა დარაჯები დაეხოცეთ და თითქმის მივედით მეფის კარავამდე, მაგრამ იმოდენი ჯარი მოგვაწყდა აქეთ-იქიდან, რომ გამოვბრუნდით და ძლივს შევასწარიტ ქალაქში შესვლა.

მეორე ღღეს ყოველი მხრიდან ზარბაზნები დაუშინეს ქალაქს: ეტყობა ძალიან შეშინებოდა მეფეს, რომ ასე დაგვიჩქარა სამაგიეროს გადახდა. რასაკვირველია, არც ჩვენ ჩამოვრჩებოდით უკან. მაგრამ იმავე დროს ამბავი მოვიდა, მარცხენა სიმაგრეზედ იერიშით მოდიანო და ჩვენც იქით გავეშურენით. უკვე თხრილზედა ბრძანდებოდნენ, ჩვენ რომ ჩაეუვარდით. წინ ჟორდი მიგვიძლოდა და გვაბხნევებდა:

— ხიშტით, მამულიშვილნო, ხიშტით!

რალა ბევრი გავაგრძელო, თხრილებზედ შეეხვდით ერთმანეთს. ერთი კი მივახალეთ თოფი და მერე ვიღასა ჰქონდა დრო იმის გატენისა? გადავერიეთ ხიშტიო. ეხლაც ყურში მიდგას მაშინდელი, სწორედ რომ მხეცური ღრიალი პრუსიელი და ჩვენი ჯარისკაცებისა, საშინელი გულსაკლავი კენესა დაჭრილებისა და მომაკვდავებისა. განალა ვხედავდით რასმე, ან ვარჩევდით რასმე! თვალები სისხლით აგვევსო, სისხლა მოგვერია, ყველაფერი სისხლის ფერად გვეჩვენებოდა და ვიწვევდით წინ გამხეცებულნი. რალაცა რბილს ჩაუვლიდა ჩვენი ხიშტი, რალაცა დაეცემოდა და ჩვენ კი კბილების ღრქილით ვატრიალებდით შიგ ხიშტს და კვლავ წინ მივიწვევდით.

მაგრამ დიდხანს არ გასტანა ამ საშინელებამ.

პრუსიელებმა უკან დაიწიეს. იმავე დროს ერთი რაზმი კიდევ ჩამოგვეშველა და სროლა დაუწყო გაქცეულთ. ისეთი კვამლი იდგა, რომ ერთ ნახტომზედ აღარა ჩანდა რა; მარტო თოფის სროლა ისმოდა და ცხენოსანი ჯარის გრიალი.

და უცბად შესწყდა სროლა, მიჩუმდა ყველა.

ბატალიონი შეგროვდა და ბიჭები ერთიერთმანეთს კითხულობდნენ:

— აქა ხარ, ბიჭო? პეტრე სადღაა?

პეტრე აღარსად იყო.

მეც ყვირილა დავიწყე: ივანე! მარკოზ!

და მოხუცებულმა სომმა მაშინვე ხმა მომცა:

— ხომ კარგადა ხარ, მიშელ?

— არა მიშავს რა, თქვენა?

— ტყავი გამიკაწრა ტყვიამ, მაგრამ არა მიშავს რა.

იქვე მარკოზ დივეს ხმა შემომესმა; გარს ჯარისკაცები ეხვია და ის კი ყვიროდა:

— აი, თუ კაცები არიან, დღევანდელი გამარჯვება ჩაბეჭდონ თავიანთ გაზეთებში!

შეიკრიბა ჩვენი ბატალიონი. შეიკრიბა ჩვენი ჯარი. მიჩუმდა ყველა და მარტო დაჭრილთა კენესალა ისმოდა ბრძოლის ველიდან.

მას შემდეგ ისე დღე არ დადამდებოდა, რომ ყოველი მხრიდან ზარბაზნის სროლა არ დაეწყათ. ჩვენც ხშირად გავეჭვებოდით ხოლმე და სწორედ იქ მიუვარდებოდით, სადაც სრულიადაც არ მოგველოდნენ, მაგრამ რას გავაწყობდით იმოდენა ჯარებთან. ერთ ამგვარ შეტაკებაში პარიზიდან მოსული გენერალი მოგვიცლეს. დასაფლავების დღეს ჩვენი თხოვნისამებრ პრუსიელებმა ბრძოლა შესწყვიტეს და როდესაც ცხედარს მივასვენებდით ქალაქგარეთ თვით მიცვალებულისაგან აგებულს სიმაგრეში დასამარხავად, ჩვენ-

თან ერთად პრუსიელებმაც უძღვნეს მიცვალებულს უკანასკნელი მხედრული საღამო და წესისამებრ ზარბაზნები დასცალეს. გულკეთილობით განთქმული არ იყო პრუსიის მეფე, მაგრამ ის კი ცხადად დაამტკიცა, რომ ნიჭისა და ვაჟკაცობის პატივისცემა კარგად სცოდნოდა.

ეს 13 თიბათვეს მოხდა.

მას შემდეგ უფრო და უფრო შეგვავიწროვეს პრუსიელებმა და ისე დღე არ გავიდოდა, რომ ფიცხელი ომი არა გვექონოდა ხან აქ და ხან იქ. პრუსიელები მით უფრო გაშმაგებით იბრძოდნენ, რომ მაღლობზე დურბინდით აღჭურვილი თავიანთი მეფე ეგულებოდათ და ხომ მოგეხსენებათ, როგორი სიამოვნებით კვდება ჯარისკაცი, როდესაც იცის, რომ მის სიკვდილს დიდებული მეფე დაჰყურებს, შორიდან, რასაკვირველია, თავისი ბრწყინვალე თვალით! დიად, გაშმაგებულნი იბრძოდნენ პრუსიელები, მაგრამ მაინც ჩვენა ვჯობნდით. რეინი სისხლის ფრად მიდიოდა; წყლის პირს ურიცხვი ლეში ეყარა და ზედ ყორანი არეოდა. თბილოდა, ჰაერი საშინელი სიმყრალით იყო მოწამლული. გადავხედავდი ხოლმე დაუძარხავ მკვდრებს და ყრუანტელი დამივილიდა თავით ფეხამდე:

— ამაღამაც ვაპირებთ ქალაქიდან გასვლას... იქნება ხვალ მეც ისე ვეგდო გულგაპობილი და ყორანი მწიწკნიდეს!

განა შეიძლებოდა უამისობა? სულ მკვდრებშიც რომ იყოს ადამიანი და თავისი დღენი სიკვდილის მეტი არა ენახოს რა, მაინც ვერ შეეჩვევა საზარელს სიკვდილს!

საშინელი მაშინ იყო ჩვენი ყოფა, როდესაც ღამე დაგვიშენდნენ ზარბაზანს. სადღა იყო მაშინ მოსვენება და ძილი? წამოვიდოდა გაცეცხლებული ყუმბარა, დაჰკრავდა სახლის ბანს. ჩაივლიდა სარდაფამდე და მუსრს ავლებდა ყველაფერს. ხშირად სპირტი დახვდებოდა სარდაფში, იფეთქებდა და მთელს უბანს ცეცხლი მოედებოდა. ატყდებოდა ყვირილი:

— არიქათ, ვიწვით! გვიშველეთ!

გამოვარდებოდით ყველანი ქუჩაში და ვცდილობდით ცეცხლი ჩაგვექრო და ხალხი დაგვემშვიდებინა.

გათენდებოდა და მიეზიდებოდნენ საკაცურებით დაჭრილებს!

დაჭრილების გმინვა, საბრალო ხალხის ტანჯვა და ვაება, ულუქმაპუროდ და ყოვლად უმწეოდ დარჩენილი ბებერი დედაკაცების მუდარა, დაობლებული ბავშვების ტირილი... სიყმაწვილე და ყმაწვილური დაუდევრობა, თორემ იმოდენ საშინელებას როგორ გავუძლებდით? ახლაც თმა ამეშლება ხოლმე თავზედ, იმდენ უბედურე-

ბას რომ მოვიგონებ. აღარც კი მჯერა ჩემი თავისა და, სიზმარი ხომ არ იყო-მეთქი, ვფიქრობ.

ჩვენდა საუბედუროდ, იძულებული ვარ აღვთქვამ, რომ სხვა უფრო მეტი საშინელებაც ბევრი მინახავს ადაჰინანსა.

პრუსიელი მეფე თავის საკუთარ ქვეშევრდომთ ესროდა ზარბაზნს. თავის საკუთარ ქალაქს ანგრევდა და სწევდა. თითონ ბრძოლის ველიდან ძალიან შორს ბრძანდებოდა: იქ, სადაც ზარბაზნის ხმაც კი ძლივს მიაღწევდა; მშვენიერი კარავი ედგა, თან უთვალავი ამაღლა ახლდა, გარს უთვალავი მსახურები ეხვია, და შეექცეოდა, თითქო ომში კი არა, შინა ბრძანდება, თავის სასახლეშიო. თან ლამაზი ქალები წამოეყვანა, შამპანის ღვინო უღეველი ჰქონდა და იმისთანა ქეიფი და ლხინი ჰქონდა, რომ ღმერთმა მეცა და თქვენც ნუ მოგვიშალოს! შეექცეოდა პრუსიის მეფე და ჩვენ კი ბუზებივით ვიხოცებოდით! ახ, ნეტავი იმისთანა შორსმსროლი ზარბაზანი გვქონოდა, რომ იმათ ლხინის სუფრამდე მიეღწია ყუმბარასა რა სიამოვნებით ამოვკლედით იმ წურბელებს, იმათ! ავერ ორთვენახევარი ვიყავით მომწყვდეული ქალაქში და ხსნა კი არსაიდან ჩანდა. ამასთან მტრის ყუმბარამ იმოღენა გვაზარალა, იმოღენა პურით სავეს ბედელი დაგვიწვა, რომ ცოტა არ იყოს საკმელი გაძვირდა. დამშეული და იმედმიხდილი მაინცელი ხალხი დილით საღამომდე გენერლის სახლთან იდგა და მხოლოდ იმასღა შესთხოვდა, ნება გვიბოძეთ ქალაქიდან გავიდეთო. ქუჩა გატენილი იყო ხალხით. დარჩავენი ველარ იმაგრებდნენ, და უბედურები პირდაპირ სახლში უცვიოდნენ გენერალს — ღვთის გულისთვის, გაგვიშვით ქალაქიდან! ჩვენ თუ არა, ჩვენი ცოლ-შვილი მაინც გაუშვით! შიმშილით რად გვიხოცათო?!

გენერალი ამის ნებას არ აძლევდა, რადგან არ უნდოდა, რომ პრუსიელებს გაეგოთ ჩვენი გაჭირვება. მაგრამ 24 თიბათვეს ისე აღელდა ხალხი, რომ ველარა გააწყო რა და ნება მისცა გასვლინა. რეინის მხრივ გაულეს საწყლებს კარი და დილის ცხრა საათიდან მოკიდებული შუადღემდე იდინა ხალხმა; ბევრმა შეძლებულმა კაცმა დაანება თავი მამა-პაპეულ სახლ-კარს და ცოლ-შვილიანად საუკუნოდ გამოეთხოვა მაინცს. ხალხი რომ გავიდა, კარი მიკვეტეთ. ცოტა ხანს უკან, როდესაც ხალხი პრუსიელებს მიუახლოვდა, იქიდან ზარბაზანი დაუშინეს და — ღმერთმა ჩემს მტერსაც ნუ აჩვენოს, რაც მე იმ დღეს საშინელება ვნახე!

ზარბაზანი რომ გავარდა, ისე შეჰბღავლა იმოღენა ხალხმა, რომ ცას ასწვდებოდა მისი ხმა. შიში მოერია ყველას! ზოგი გაქვავებულებით გაჩერდა შუა გზაში; ზოგი, მეტადრე ქალები, ხან აქეთ ეცე-

მოდნენ გიჟებივით, ხან იქით, თმებს იწეწდნენ, გარბოდნენ და ისეკ უკან მოიწევდნენ; ფეთიანივით ეცემოდნენ ერთმანეთს და შეუბრალებლად სრესდნენ, ვინც უფრო სუსტი იყო. ზარბაზანი კი შეუწყვეტილვ ქუხდა და მუსრს აღენდა საწყალ ხალხს. რეინის პირას მთასავით იდო მკვდარი ხალხი; წყალს იმოდენი ცხედარი მიჰქონდა, რომ ხუთას ნაბიჯზედ ყველა წისქვილები შეაყენა. მეორე დღეს კავებით აცლიდნენ მკვდრებს, რომ ჩარხი დაეტრიალებინათ.

და ახლა, თუ ნებავთ, კიდევ დაიკვებონ გერმანელებმა, გულკეთილი მეფენი გვყვანან, რომელნიც მამაშვილურად გვექცევიან თავიანთ ქვეშევრდომთაო!

გულკეთილი ადამიანი იქნება და არა სისხლით გაუმადლარი მხეცი! განა ადამიანიშვილი იზამდა, რაც მაშინ პრუსიის მეფემ ჩაიდინა! განა ამას იზამდა ვინმე, იოტის ოდენიც არის, რომ ადამიანური გრძნობა ჰქონოდა? ბევრიც რომ იძახონ, მამაშვილურად ვუყვარვართ ჩვენს მეფეებსაო, მე მაინც ჩემსას არ დავიშლი და ყოველთვის ვიტყვი, რომ მეფეს ლამაზი ქალების და კეთილი ცხოვრების მეტი არა უყვარს რა!

ჩვენ გვემდურებოდნენ, პარიზში ენკენისთვეში იმოდენა ხალხი დახოცესო!

ჩვენ რომ დავხოცეთ, ქვეყნის მოღალატენი დავხოცეთ, სამშობლოს მტერნი და გამცემნი! ჩვენ რომ დავხოცეთ, ჯაშუშები დავხოცეთ და ქვეყნის ამრევი ბერები! რა დაუშავა პრუსიის მეფეს საწყალმა ხალხმა, რომ ისე უღმერთოდ და განუკითხავად ამოხოცა? რა დაუშავეს პრუსიის მეფეს ქალებმა და უსუსურმა ბავშვებმა, რომ იმისთანა საშინელი დღე მიაყენა?

ის დაუშავეს, რომ დამშეულები იყვნენ და პურის სათზონელად მიდიოდნენ თავიანთ მეფისაკენ! სხვა არაფერი!

ვისაც ამგვარი მხეცი უზის მეფედ და მის წინააღმდეგობის მაგიერ მის დღესა ჰფიცავს — ღვთისაგან არის კურთხეული, რათა სათნოება და კაცთმოყვარეობა გვასწავლოსო, — ვისაც ამგვარი მხეცი მეფედა სწამს, ადამიანი კი არა, პირუტყვია და ახიც არის იმაზედ, რომ თავისი დღენი პირქვე ეგდოს მიწაზედ განართხული და ზელს ულოკავდეს თავის მეფეს — დამკარ, შენი ჭირიმე, მე მათრახის მეტი არა მინდა რაო.

შეიძლება მკითხონ გერმანელებმა:

— მაშ რა ექნათ ჩვენს მეფეებს? თქვენ ხომ არ დაგიტობდნენ ქალაქ მაინცსაო?

აი, რას მოვახსენებ ამაზე:

— გერმანელ მეფეებს ის უნდა ექნათ, რომ ბრძანებულოყვნენ

თავიანთთვის და ჩვენს საქმეში არ გარეულიყვნენ. ჩვენ ძალიან-ძალიანი საბუთები გვქონდა, და გვინდოდა გავთავისუფლებულიყავით ბატონებისა და ბერებისაგან, რომელნიც ტყავს გვაძრობდნენ და სისხლსა გეწოვდნენ საუკუნეთა განმავლობაში. ჩვენ იმათ არასა ვთხოვდით! მაშ რად ჩაერივნენ ჩვენს საქმეში? რად შემოვიდნენ თავიანთი ჯარებით ჩვენს ქვეყანაში? იმიტომ რომ დიდებულებს დახმარებოდნენ და კვლავ გაებატონებინათ? და ჩვენ კიდევ ძველს მონობის უღელში შევებით? მონას როდი აკმაყოფილებს თავისი მონობა! არა, იმისი სანატრელი ის არის, რომ სხვებსაც მონებად ხედავდეს! მოკვდება, თუ ნახა, რომ სხვანი, იმაზედ უფრო ამაყნი და გამბედავნი, მონობის ჯაჭვს ამტვრევენ და თავისუფლების მოპოვებას ცდილობენ!

ესეცა კმარა და ახლა ჩვენს ამბავს მივუბრუნდეთ.

სასტიკი ბრძანება გვქონდა — უკან აღარავინ შემოუშვათო, მაგრამ იმისთანა საშინელ ყოფაში ვხედავდით უბედურ ხალხს, რომ გულმა ვეღარ გაგვიძლო და ვინც მოახერხა და უკან გამობრუნება იფიქრა. ყველას გაუღღეთ კარი. ან ვინ იქნებოდა, ქვის გული ჰქონოდა და შიმშილით მომაკვდავ ადამიანისთვის კარი მიეკეტა? ვინ იქნებოდა, დაჭრილი ბავშვი არ შებრალებოდა. ჯარისკაცები ჩუმად უღებდნენ კარებს და იმ უბედურთ რომ ხედავდნენ, თითონაც ტიროდნენ. დიად, ცრემლი სცვიოდათ ჩვენს მოხუცებულ, ბრძოლის ველზედ დაბერებულ მეომრებს და თავიანთ წილ პურს და არაყს იმათ აძლევდნენ. აფიცრებიც იქვე ტრიალებდნენ, მაგრამ თვალს არიდებდნენ, ვითომც ვერასა ვხედავთო; კარგად იცოდნენ. რომ ამგვარ საქმეში ფრანგს თავის გულის მეტი არც უფროსი სწამს და არც დისციპლინა. ეგეც რომ არ ყოფილიყო, თვით აფიცრებსაც ისე შეებრაღათ უკანდაბრუნებულები, რომ გენერალს სთხოვეს და კარი გააღებინეს ყველასთვის, ვინც კი გადარჩენოდა სიკვდილს.

ათასხუთასი კაცი მოკვდა იმ დღეს მაინცელი და შიმშილი კი მაინც მატულობდა. საქონელს რაღაცა ჭირი დაერია, მგონია უქმელობით, და საშინლად იხოცებოდა. მაინც იხოცება და მაინცაო, ერთიორად მეტს გვაძლევდნენ ხორცს და პური კი შეგვიძირეს. საუბედუროდ იგივე ავადმყოფობა საქონლისაგან ჩვენც შეგვეყარა და მაშინ კი მოსპეს ჭირიანი საკლავის ჭამა. თიბათვის მიწურულში ვიყავით. სხვა რომ აღარა იშოვებოდა რა, თევზის ქონსა ვხმარობდით ერბოს მაგივრად. მაგრამ ისეთი საძაგელი რამ იყო, რომ ყველა-ნი ავად გახადა. მე კი ვერა დამაკლო რა, ღვთის მადლით! კაცი რომ იმავე ბავშვობიდანვე დაჩვეული არ იქნება ნებივრობას, თევზის ქონს კი არა, მოხარშულ ქვასაც კარგად მონიელებს. დედაჩემის

ოსპის შეჭამადს, მაინც და მაინც ის თევზის ქონი სჯობდა, მერ-
წმუნეთ.

როცა კი თავისუფალი ვიყავ, მაშინვე წმ. ეგნატეს მონასტრისა-
კენ მივეშურებოდი ჩემი და ლიზას სანახავად. ისე იყო ზარბაზნე-
ბისაგან დანგრეული მონასტერი, რომ ფამფალი გაჰქონდა; წვიმა
ისე ჩადიოდა, თითქო ჭერი არც კი ხურავსო. გალავანში ყველგან
პარიზელ შეთქმულთა კარვები იდგა; ეკლესიის ნანგრევებში თეატ-
რი გაემართათ: საკურთხეველის ალაგას სცენა იყო და მხარმარჯვნივ,
მგალობლების ალაგას პატარა დუქანი მოეწყობოდა და სასმელები დაე-
ლაგებინათ; იქვე ქვაბით რაღაცა დუღდა და საკმელის ნაცვლად სულ
სხვა კვამლი ტრიალებდა ძველ მონასტერში.

პარიზელები მთელს დღეს იქ ატარებდნენ. ზოგი ქალაღს თა-
მაშობდა, ზოგი პოლიტიკაზე ლაპარაკობდა, ზოგი „წავას“ და „კარ-
მანიოლს“ მღეროდა. დაიხოცა საქონელი, ხორცის გემოც აღარავის
ახსოვდა და ამ პარიზელებს კი ყოველთვის გამოუღეველი ჰქონდათ
ხორციც და სხვა საკმელ-სასმელიც. სანადიროდ იქვე ქალაქში და-
დიოდნენ და საცა ძალღს მოასწრებდნენ, ან კატას და ასე გასინჯეთ,
თაგვიც კი, ცოცხალი ვერსად წაუვიდოდათ. ამასთან ისეთი მხიარ-
ულნი იყვნენ ყოველთვის, თითქო თაგვს კი არა, ჯეირანს შეეჭ-
ევიანო.

საღამოზედ, როდესაც დარაჯად ან ქალაქგარეთ მტერთან საომ-
რად გასულნი არ იყვნენ, წარმოდგენას მართავდნენ თავიანთ თეატ-
რში. გაღაბრუნებდნენ ტანისამოსს... ზოგი ქალად მოიკაზმებოდა.
ჯერ ერთი გამობტებოდა და რაღასაც იღრიჯებოდა და იღმანქე-
ბოდა: ეს პანტომიმა გახლავთო. მერე მეორე გამოვიდოდა და უთავ-
ბოღოს რაღასაც სჩმახავდა, უზაროს და უშინაარსოს, მაგრამ იმის-
თანა საცინელს, რომ ფერდები აგვეტკივდებოდა ხოღმე სიცილით;
ვიღას ახსოვდა ან გაჭირვება, ან შიმშილი? ჯარისკაცისთვის იმის-
თანა განძია მხიარული გული, რომ მეტი არ შეიძლება. ომში გასუ-
ლი კაცი რომ თავს არ იმხიარულებდეს, მტერი კი არა, სევედა დაა-
მარცხებს.

თეატრისთვის პიესებსაც თითონვე თხზავდნენ და, რასაკვირვე-
ლია, უფრო ხშირად ჩვენს მღგომარეობას ხატავდნენ. ერთხანად
კუსტენის წარმოდგენა დაიჟინეს: კუსტენი მაინცისკენ წამოსვლას
ემზადება, რომ მოგვეშვეღოს; სულყვეღაფერი მზად აქვს; აგერ
უნდა შეჯღღეს ცხენზედ, მაგრამ... ტყვია-წამალი დაევიწყებია! აგერ
ტყვია-წამალიც მზადა აქვს, უნდა წამოვიღღეს, მაგრამ თავისი გრძე-
ლი ხმღის გაღღესვა დაევიწყებია!.. ხან რა ავიწყდება კუსტენს, ხან
რა და ჩვენ კი აქ შიმშილით და ავადმყოფობით ვინოცებთ.

ამ წარმოდგენაზედ ყველაზედ წინ ჩემი და ბრძანდებოდა გამოკიმული. თუ დაუწუნებდა რასმე, იქვე წარმოდგენის ღროს შეუტევედა მოთამაშეებს; სცენიდანაც ღირსეულ პასუხს მისცემდნენ; ატყდებოდა ერთი კამათი და ვილას ახსოვდა პიესა? პარიზელებს ეს მკვირცხლი სიტყვა-პასუხი უფრო მოსწონდათ, ვიდრე თვით წარმოდგენა.

რადგან ელისაბედი-ქალი ორსულად ბრძანდებოდა და სამშობლოსთვის დღე-დღეზედ მამულიშვილი უნდა შეემატა, პარიზელები წინაღვე ურჩევდნენ სახელს და ზოგი იძახდა ბრუტი* დავარქვათო, ზოგი კასსიუსიო** და თუ ქალი იქნება კორნელიაო***; ელისაბედი-ქალი კი ისე იყო გართული მრავალგვარ სამზარეულო მოსაზრებით, რომ ყურადღებასაც არ აქცევდა ამ გმირულ სახელებს. მივიდოდი თუ არა, მაშინვე სუფრას გამიშლიდა და იმისთანა მადით შევექცევოდი; რაც უნდა მოეტანათ. თითქო ფიქრადაც არ მომდის, რომ კატის ან თაგვის ძვლებს ვაკნატუნებო.

ჩემი სიძე-ბატონის სიხარულს საზღვარი აღარა ჰქონდა და რაზედაც უნდა ჩამოვარდნილიყო ბაასი, ის მაინც თავისას გაიძახოდა: ჩემი შვილი რეკლამული ურად უნდა მოვნათლო!

28 თიბათვეს, სალამოს 8 საათზედ, ჩვენი ჯარები ქალაქგარეთ უნდა გასულიყვნენ, როდესაც კვლავ დაგვიწყვეს ზარბაზნის სროლა. თითქო მარტო დიდ საკრებულო ტაძარს უმიზნებენო. სულ გუმბათზედ ცვიოდა ყუმბარა; ცოტა ხანს უკან ეკლესიას ცეცხლიც წაეკიდა.

ერთი მხრით კიდევ გვიამა ეს ამბავი, რადგან ეპკვი არ იყო, პრუსიელები ამ ცეცხლს დაუწყებდნენ ცქერას და ცხვირწინ ველარას დაინახავდნენ. სწორედ ბედი გეწყალობსო, — ვიფიქრეთ და იმედიანად გავუდექით გზას: ისე მივეპარებით, რომ ვერას გაგვიგებენო. ჩვენდა საუბედუროდ, გზის მაჩვენებელმა გზა დაკარგა და ერთ დიდ სოფელში შეგვიყვანა, სადაც პრუსიელების უმთავრესი ბანაკი იყო. ჯარებით სავსე იყო იქაურობა და გავარდა თუ არა

* ბრუტუს (ლიუციუს-იუნიუს) — რომიდან მეფე ტარკვინი-ამაყი განდევნა (510 წ. ქ. შობამდე) და თავისი ორი შვილი მოაკვლევინა, რადგან რომში კვლავ მეფობის დამყარებასა ცდილობდნენ. ბრუტუს (მარკუს-იუნიუს) — მკვლელი რომში ძალად გამეფებულის იულიოს კეისრისა. (44 წ. ქ. შ.).

** მეორე მკვლელი იულიოს კეისარისა.

*** კორნელია — დედა კაი და ტიბერი გრაკებისა. ორივე ხალხის წინამძღოლნი იყვნენ დიდებულთა წინააღმდეგ. ტიბერი 133 წ. იქნა მოკლული ქ. შ. და კაი 121 წ.

თოფი, ისე მოგვაწყდნენ ყოველი მხრიდან, რომ აღარ ვიცოდით, რომელი ერთი მოგვეგერებინა. ჟორდი კინალამ ტყვედ წაიყვანეს, ჩვენს კაპიტანს დამბაჩა მოხვდა და იქვე დარჩა საწყალი. კიდეც კარგი, რომ ეკლესიის ალი ცასა სწვდებოდა, თორემ, უკან გზას ვეღარ გამოვიკვლევდით.

მოვდიოდით და ფეხდაფეხ მოგვდევდნენ პრუსიელები. ისეთი გაცხარებული ვიბრძოდით, რომ მანამ სამშვიდობოში არ გავედით, ვერც კი შევნიშნე, რომ ორგან ვიყავი დაჭრილი: შუბით მხარში და ხმლით ზურგში. არა ვთქვი რა, როგორც იყო ბინამდე მივედი; მაგრამ იქ კი ვეღარ გავუძეღ ტკივილს, თოფი ივანე სომს მივეცი და ვუთხარ, დაჭრილი ვარ და საავადმყოფოში მივდივარ-მეთქი. ზარბაზანი კი ისევ ქუხდა; ცა გახურებულსა ჰგავდა, ისე იყო განათებული. ტაძარი უკვე დამწვარიყო და ახლა მის გვერდით მდგომი სახლები იწოდა. საშინელი ხმაურობა იდგა მთელს ქალაქში. ის იყო უნდა წავსულიყავ საავადმყოფოსკენ, რომ ხმა გაისმა:

— არიქა! პარიზელები იწვიან!

გავიხედე მარჯვნივ და თქვენს მტერს, მე რომ ელდა მეცა: წმ. ეგნატეს მონასტერს ცეცხლი გასჩენოდა და ალი ასლიოდა. საავადმყოფოც დამაიწვდა, ჭრილობაც და ჩემს დისკენ გავეშურე; სირბილით ჩავიარე სემინარიის ქუჩა; მანამ მე მოედანზედ გავიდოდი, ხუთ-ექვს სახლს კიდევ სხვას წაჰკიდებოდა ცეცხლი. პარიზელები იქვე მოედანზედ იდგნენ ჯგუფ-ჯგუფად და გულარხეინად შესცქეროდნენ თავიანთი ბინის გადაწვას. რაც მოესწროთ, გამოეტანათ და იქვე ეყარა — ტახტის ფიცრები, კარვები, ყუთები; ერთს აფიცრების ცხენები ეჭირა; ზოგს კიდევ მოსწყენოდა ცეცხლის მზერა, იქვე კედლის ძირას მიგდებულებოდა და ხვრინავდა, რაც ძალი ჰქონდა. გამიკვირდა, ღვთის წინაშე. ჩვენ თავბედისა აღარა გაგვეგებოდა რა და პარიზელები კი ისეთი გულდამშვიდებით შესცქეროდნენ ყველაფერს, თითქო სასეირნოდ მოსულანო. ზოგი თავს ივარცხნიდა, ზოგი ტანისამოსს იკერებდა, ხუმრობდნენ, ოხუნჯობდნენ და გულიანად ხარხარებდნენ. წაეკიდებოდა სახლს ცეცხლი, გადმოჰყრიდნენ უბედური პატრონები, რასაც მოასწრებდნენ. და მერე თვითონაც გამოცვივდებოდნენ გულგახეთქილები. უბინაოდ რჩებოდნენ საბრალონი — ქალი, კაცი, ბავშვი და მოხუცი! პარიზელები კი ყურადღებასაც არას აქცევდნენ და ძველებურად სიცილით შესცქეროდნენ ყოველ უბედურებას.

მე ჩემი დის მეტი არა მაწუხებდა რა და დავინახე თუ არა იმისი ურემი მოედნის ბოლოში, სადაც არც ყუმბარის შიში იყო და არც ცეცხლისა, მაშინვე იქით გავეშურე. დაღლილი ვიყავ, სულს

ძლივსლა ვიბრუნებდი. ჩემს სიძე-ბატონს და იმის ამხანაგებს ფერხული დაებათ და ისეთი გატაცებით უვლიდნენ ურმის გარშემო, რომ გაგიჟებულან-მეთქი, ვიფიქრე. ველარ მოვითმინე და შორიდანვე დავუყვირე:

— რას შერებით? გიჟები ხომ არა ხართ!

მარესკო ჩემკენ მობრუნდა და სიცილით მიპასუხა:

— ბიჭი გვყავს, მიშელ, ბიჭი! ნახე რა ზორბა არის!

ხელი მტაცა, ურმისკენ გამაქანა და თითონ მაინც არ იშლიდა და იმისთანადა ბუქნავდა, რომ სხვას ყველიერშიც გაუჭირდება. არა, არა! ამათთანა უზრუნველ ხალხს მე ფიქრადაც ვერ წარმოვიდგენდი. ცა და ქვეყანა თავზედ გვენგრეოდა და ის ფერხულს უვლიდა — ბიჭი მყავსო!

გადავწიე ჩარდახი. ღიზა მშვენიერ ლოგინში იწვა, თავით კარგი ლამაზი ბალიში ედო და გვერდით ბალლი ეწვა.

— შენა ხარ, მიშელ? — შემომცინა ღიზამ, — შეხედე რა ლამაზი ბიჭია.

მართლა ლამაზი ბიჭი იყო; იმისთანად იყო ჩასუქებული, თითქო მის დედას არც დადლილობისა სცოდნოდეს რამე, არც გაჭირებისა. იყო თავისთვის გაჩუმებული, დამშვიდებული; იმას არც ზარბაზანი აწუხებდა, არც ქალაქის დაწვა, არც შიმშილი და არც რისიმე შიში. იყო თავისთვის დამშვიდებული და ისე ლამაზად მოეკუმა პირი, რომ ანგელოზი გეგონებოდათ. ფრთხილად ვაკოცე და გადავაწოდე ღიზას.

— რა დაგმართვია, მიშელ! — შეჰკივლა ჩემმა დამ.

— არაფერი, ნუ გეშინია! ეს არის ეხლა დაებრუნდი; ქალაქგარეთ ვიყავით და, მგონი, ოდნავ დაჭრილი ვარ.

მაგრამ ტყუილადლა ვამშვიდებდი; იმას ჩემი აღარა ესმოდა რა და საშინელი ხმით გაჰკიოდა:

— მარესკო, მარესკო! ჩქარა ამოიყვანე მაიორი! ჩემი მიშელი დაჭრილი ყოფილა!

მაშინ გამოაჩნდა ღიზას ჩემი სიყვარული.

მომცვიდნენ პარიზელები, გარს შემომხევივნენ და საყვედურით მომმართეს:

— აქამდე რატომ არას გვეუბნებოდი, მამულიშვილო!

ზოგი მხარში ამომიდგა, დასუსტებული არ იყოს და არ წაიქცესო; ზოგმა წყალი მომაწოდა; ზოგი ტანისამოსს მხდიდა. ბოლოს მაიორი ბონპარიც ამოვიდა და სინჯვა დამიწყო. ბედნიერი ყოფილხარო, — მითხრა, — ერთი ბეწვა რომ კიდევ ღრმად ჩასუ-

ლიყო შუბი, შენ ახლა აქ აღარ იქნებოდით. ჭრილობა დამბანა და კარგა მაგრად შემიხვია. პარიზელები გაჩუმებულები გვიყურებდნენ. რაკი შემიხვია, ვიგრძენ, რომ კარგად ვიყავ და მინდოდა იქვე დავრჩენილიყავ, მაგრამ მაიორმა მიბრძანა, საავადმყოფოში უნდა წახვიდეო, და მეც გამოვეთხოვე ჩვენებს

მარესკო, მისი ამხანაგები და ლიზა თავის ურმიდან ერთხმად მიძახდნენ, ეხლავე საავადმყოფოში წადიო. უნდოდათ კიდევ თან გამომყოლოდნენ, მაგრამ დეარწმუნე, მარტოკაც კარგად წაელმეთქი და გზას გავუდექ. გავცდი კი იქაურობას და მერმე საავადმყოფოს მაგივრად ჩვენს ბინისაკენ გავუხვიე. ან რა მიმიყვანდა საავადმყოფოში? დიდი და პატარა იმას იძახდა, მოუვლელი ხალხი ლპებაო! და ეგეც რომ არა ყოფილიყო, ბევრი არათერი ნდობა მქონდა ჩვენი დალაქებისა, რომელთაც გაჭირვების ღროს ექიმის წოდება მისცეს და რომელთაც სისხლის გამოშვების და კბილის გლეჯის მეტი არა იცოდნენ რა.

მივედი და ივანე სომის გვერდით მივწექი. იმ ღამეს მკვლარით მეძინა და მეორე დღეს, რადგან ვიცოდი, რომ ჩემი დისწული უნდა მოენათლათ, ავდექი და წმ. ეგნატეს მოედნისკენ გავწიე. ცოტა არ იყოს მეწვოდა მხარი, მაგრამ საავადმყოფოში წასვლას სიკვდილი მერჩივნა და ვმალავდი ტკივილს.

ლიზას ძალიან ეამა ჩემი ნახვა და ძალიანაც გაუკვირდა; მაგრამ, რადგან დარიგების მოსმენის გუნებაზედ არ ვიყავ, მოკლედ მოვუქერ სიტყვა და შევფიცე, არა მტკივა რა-მეთქი.

ბავშვი პარიზელ შეთქმულთა მესამე ბატალიონის სიაში ჩასწერეს ვითა „კასსიუს მარესკო“, შვილო ფრანსუა მარესკოსი და მის კანონიერ მეუღლის ელისაბედ ბასტიენისა, რომელი იშვა 28 ივნისს 1793 წ. ეს გახლდათ რესპუბლიკური ნათლობა.

ნათლობას პატრიოტული ღვინო მოჰყვა იქვე მოედანზედ და იმისთანა ღამაში და ყველაფრით შემკული სუფრა გავშალეთ, რომ უკეთესი არ იქნება. ცხენის ხორცი გნებავთ, თაგვისა, კატისა, სულ თავსაყრელი გვქონდა, აგრეთვე ღვინო და არაყი. მართალია პური გვაკლდა, რადგან პრუსიელები სწორედ იქ უმიხნებდნენ ზარბაზნებს. სადაც ჩვენ პურს ვინახავდით. განა არა, აღგოლი ვუცვალეთ ბელელს, მაგრამ ეტყობა ჯამუშები ჰყავდათ ქალაქში და მაშინვე გაიგებდნენ ხოლმე, საით უნდა ესროლათ ყუზბარა, რომ ჩვენში შიმშილი ჩამოეგდოთ. წისქვილები ხომ ისე დაგვინგრიეს, რომ ხელსაფქვავეთლა იფქვოდა პური და, რასაკვირველია, ჯარის მეთაურსაც არ ჰყოფნიდა.

მაგრამ უპუროდაც კარგად შევექცეოთ! პატრიოტულად ვილ-
ხინეთ იმ დღეს, მხიარულად გავატარეთ დრო და საღამოზედ შინ
რომ წავედი, ერთი კარგი ბარკალი წავუღე ივანე სომს; ძაღლისა
იყო, თუ კატისა არ ვეცი და ის კი ვიცი, რომ სულ თითები ილოკა
ჩვენმა ივანემ, ისე მოეწონა ის ბარკალი.

IX

ისე შეგვაწუხა შიმშილმა, რომ რეინიდან დიდი ხნის დამხ-
რჩვალნი ცხენები გამოგვექონდა და იმას ვკვამდით. შიმშილით და
იმოდენა ტანჯვით მისუსტებულთ დამპალი ხორცილა გვაკლდა!
დაგვერია რალაც ავადმყოფობა და ნახევარი ჯარი ძირს დასცა.
ვისაც კი შეხვდა. ცოცხალი ვერ გადარჩა. საავადმყოფოში ალაგი
ალარ იყო; დაჭრილები ქუჩებში დაიარებოდნენ და როგორც შე-
ეძლოთ, ისე სწამლობდნენ თავიანთ ჭრილობას: საავადმყოფოში
ქირით სიკვდილს, მოუვლელობა და უწამლობა გვირჩევენიაო.

მეც ასევე ვფიქრობდი და ბატალიონში დავრჩი; ხელი შეხვეუ-
ლი მქონდა, მაგრამ სამსახურს მაინც ვეწეოდი და თუ გაჭირდე-
ბოდა, იარაღს ცალი ხელითაც კარგად ვიხმარებდი.

პრუსიელები კი სთხრიდნენ და სთხრიდნენ მიწას. მათი თხრი-
ლი თითქმის უერთდებოდა ჩვენსას. ნახევარი ჯარი დღე და ღამე
გარეთ იყო, ზარბაზნებთან და მოკიდებული პატრუქი ყოველ
წამს მზადა ჰქონდა. ისე ირეოდა ერთმანეთში გერმანული „ვერ-
და“ და ჩვენი „ვინა ხარ?“ თითქო ერთმანეთში არეულან მოპირ-
დაპირე ჯარებთა; სულ ორმოცდაათი ნაბიჯით ვიყავით ერთიერ-
მანეთზედ დაშორებულნი, ისე რომ პრუსიელები ჩვენსა იყვნენ
და ჩვენ იმათსა.

რეინის კუნძულებზედ სიმაგრეებში ჩვენი ჯარები იდგნენ და
იმათაც კი არ მოუსვენეს პრუსიელებმა. განა არა, ხმა დადიოდა,
პრუსიის მეფეს პოლანდიელი ღურგლები ჰყავს და აქვე, ჩვენს
ზევით, რეინის პირას ხომალდებს აკეთებინებს, რომ კუნძულები
წაგვართვასო. იმდენი იძახეს, ხვალ გამოჩნდებიან ხომალდებო,
რომ ბოლოს ყურადღებასაც ალარ ვაქცევდით ამ ხმებს და უსა-
ფუძვლო ჭორად მიგვაჩნდა. და წარმოიდგინეთ ჩვენი განცვიუ-
რება, როდესაც ერთს დილას რეინმა მშვენიერად მოწყობილი ხო-
მალდები ჩამოატარა თავისი ჯარით და ზარბაზნებით; ხომალდები
კი არა, მცურავი ციხეები, რადგან ისე იყო ყველა დაფარული,
რომ ზარბაზნის პირის გარდა ზედ არაფერი ჩანდა.

მშვენიერი დღე იყო. ზღვასავით გაშლილ რეინზედ დინჯად

შიცურავდნენ ხომალდები, მაგრამ ისე შორს, რომ ვერ მიეუწყებოდათ, კიდევ რომ გვესროლა. სროლა მაშინ ატყდა, როდესაც ხომალდები კუნძულებს დაუახლოვდნენ. თითქო კაკალს ხალა დაჭკრესო, ისე ცვიოდა წყალში ყუმბარა. აღელდა მდორე რეინი, გაშმაგდა და მთასავით ტალღებს ისროდა. ჩაჭკრავდა სადმე ყუმბარა და საფოტოვით შეათამაშებდა ხომალდებს. ხომალდები კი ნელნელა მიიწვედნენ და როდესაც კუნძულებს დაუპირდაპირდნენ, მყურაო ალაგი იპოვეს, და იქ გაჩერდნენ. გაჩერდნენ. მაგრამ იქიდანაც არ შესწყვიტეს სროლა. უბედურება ის იყო, რომ მათი ზარბაზანი სწორედ მიზანში სცემდა და უფრო შორსაც, და ჩვენსას კი იმოდენა ძალა არა ჰქონდა, რომ ხომალდამდე მიეწია თავისი ყუმბარა. მაშინ გვეცა ელდა: თუ ამ ხომალდებს არა მოვუხერხებთ რა, ხვალ ყველა კუნძულებს წაგვართმევენო, ვიფიქრეთ.

ისე ვიყავით დაღონებული იმ დღეს გენერლიდან დაწყებული სულ უკანასკნელ ჯარისკაცამდე, თითქო ბრძოლა უკვე წაგვეგოს. და ან როგორ არ დავღონებულყავით: თუ კი კუნძულებს წაგვართმევენ და ახლა იქიდან დაგვიშენდნენ ზარბაზნებს, სულ დაგვიტყვევდნენ სიმაგრეებს და მაშინ ღმერთიც ველარას გვიშველიდა.

იმ დამეს ბინაზედ რომ დავბრუნდით, სასიამოვნო ამბავი გავიგეთ: ხომალდების დაღუპვა უკვე გადაწყვეტილია და ამ სამიზმო საქმის აღსასრულებლად თავის ნებით წასულნი უკვე გაუდგნენ კასელის გზას, რომ იქიდან ჩამოეპარნენ როგორმეო. ჩვენი ბატალიონიდან თორმეტნი წასულიყვნენ და იმათში მოხუცებული ივანე სომი და ლაფლეშიც ჩასულიყვნენ. თუმცა არავინ იცოდა, რა გეგმა ჰქონდათ შედგენილი უფროსებს, მაგრამ ეს კი ყველამ ვიცოდით, რომ სწორედ სასწაული მოხდებოდა, თუ ჩვენები ხომალდებს დაიმორჩილებდნენ და შინ მშვიდობით დაბრუნდებოდნენ. კიდევ კარგი, რომ მთვარე მიწურული იყო და, თუმცა ცა ვარსკვლავებით იყო მოჭედილი, მაინც საკმარისად ბნელოდა.

დამის ორ საათამდე დამშვიდებული იყო ყველაფერი; უძიანოდ, დაღამდებოდა თუ არა, მაშინვე ზარბაზანს დაგვიშენდა ხოლმე მტერი და იმ დამეს კი, არ ვიცო, რა მოუვიდა, იყო თავისთვის გაჩუმებული, თითქო ჩვენს მიძინებას ცდილობსო. მაგრამ ორ საათზე იმისთანა გრიალი გაისმა ზარბაზნის და თოფისა, რომ ყველანი ფეხზედ წამოვხტით, — აგერ, იერიშით მივიდნენ ჩვენებო! რომ იცოდეთ, როგორა ვწუხდი, რომ დაჭრილი ვიყავ და მეც იქ არ ვიყავ ჩემი მოხუცი სომის გვერდით. წამოვეჯექი ჩემს ლოგინზე და გულდაწყვეტით ვფიქრობდი:

— ეჰ, ჩემო მოხუცო! იქნება სწორედ შენთვის გავარდა ეს თოფი და ხვალ ველარ გნახო!

გადავხედე ჩვენს ტახტებს და ნახევარზედ მეტი ცარიელი დამხედა; ზოგი აღარ იყო, ზოგი საავადმყოფოში იწვა, ზოგი საომრად იყო წასული. გამიტაცეს მწარე ფიქრებმა და იმისთანა უბედურად ჩემს დღეში არ მიგრძენია ჩემი თავი, როგორადაც იმ დამეს ვიყავ. მხარიც ძალიან მაწუხებდა; ხან ისე შემამცივნებდა, რომ სულ კანკალს დამაწყებინებდა და ხან კიდევ დამცხებოდა ლაოფლს მასხავდა. ხან აქეთ ვეცემოდი გიჟივით, ხან იქით. ბოლოს ისე დავიღალე, რომ უგრძნობლად მივეგდე ჩემს ლოგინზედ და, როგორც იყო, ჩამძინებოდა. კარგა ხანი მძინებოდა, რადგან მზე კარგად მალდა იყო, როდესაც მხიარულმა ყიყინამ და მარსელურმა სიმღერამ გამაღვიძა. ჩვენი ბიჭები მიჰპარვოდნენ ერთს ხომალდს, შუაზე გადაეკრათ ბაგირი, რომლითაც დაბმული ყოფილიყო, და რეინისთვის მიენდოთ მისი ბედ-იღბალი; წყალსაც ეტარებინა, ეტარებინა და ერთ უდაბურში გაერიყნა სრულიად დამტვრეული; რაც ხალხი ზედ ყოფილიყო, ტყვედ წამოეყვანათ.

ძალიან მეამა ივანე სომის ნახვა, წინ მივეგებე და ძმურად გადავხვიე. ისე დასველებულიყო საწყალი მოხუცი, რომ ერთი რუმბი წყალი გამოიწურებოდა მის ტანსაცმელიდან; ის კი ყურადღებასაც არას აქცევდა და გულიანად ხარხარებდა. წყალში პირველი ის შესულიყო, თუმცა ფუტკარივით თურმე ირეოდა ტყვია, და ბაგირისთვისაც პირველად იმას მიეგნო.

გადიოდა დრო და მტერიც ნელ-ნელა უფრო და უფრო გვაახლოვდებოდა. ერთი წისქვილი აღარ მოიპოვებოდა მთელს ქალაქში; სამამასახლისო სრულიად დანგრეული იყო.

14 მკათათვეს ზავი ჩამოვარდა, რადგან პრუსიელებს ამბავი მისვლოდათ, კონდე ავიღეთო; სიხარულით ზარბაზნის ისროდნენ; ჩვენ კიდევ ბასტილიის ციხის აღებას ვუქმობდით. სამხედრო მოედანზედ წარმოდგენა გავმართეთ; გვინდოდა მოედანი და მეტადრე. სამშობლოს საკურთხეველი მწვანე ბალახით და ტოტებით შეგვემკო, მაგრამ მთელს ქალაქში მცენარე აღარსად მოიპოვებოდა.

სამშობლოს საკურთხეველთან შევიკრიბებით ყველანი და მერლენ ტიონვილელმა ძალიან მჭერმეტყველურად დაგვიხატა ჩვენი ღვაწლი სამშობლოს წინაშე. ამ სიტყვამ და გალობამ ისევ ტკბილი იმედით ამივსო გული და ისე გამიქარვა შავი ფიქრები, რომ ჩემი ქრილობაც კი დამავიწყა.

მეორე დღეს იმისთანა დაჟინებით დაუშინეს ჩვენს ბინას ზარბაზნი, რომ მაშინვე ვთქვით, ჩვენ აქ აღარ გვედგომებაო. საჩქა-

როდ გავიტანეთ ჩვენი ბარგი-ბარხანა და გარედ გამოვცვივდით. ის იყო, ქუჩაში გავედით, როდესაც ათხედ მეტი ყუმბარა გასკლა ჩვენი ძველი მონასტრის ეზოში და სულ მიანგრია იქაურობა.

ჩვენი ბატალიონი უკვე დანგრეულ საკრებულო ტაძართან ჩიყვანეს და იქ ნანგრევებზე დააბანაკეს.

ბოლო დროს ისე დაიმშა ჯარი, რომ ქალაქიდან გარეთ მტერთან საბრძოლველად კი არა, საკმელის საშოვნელად უფრო გავდიოდით. როდესაც მტრის ჯარში ბრძოლის დროს პურს დაუვნახავდით ვისმე, უბედური ცოცხალი ველარ გადაგვრჩებოდა. ექვსნი-შვიდნი მივესევოდით ხოლმე, თითქო მეზაირაღე იყოსო, და რაც უნდა ბევრნი ყოფილიყვნენ მის გარშემო პრუსიელები, ჩვენ მაინც ჩვენსას ვიზამდით, ყველას ამოვხოცდით და პურს მოვიტაცებდით. წამოვაგებდით თოფის ხიშტზედ და ისე შევათამაშებდით, თითქო მტრისთვის ბაირალი წაგვერთმიოს. გერმანელებმა იქნება დღემდინაც არ იცოდნენ, რად მივცვივდებოდით ხოლმე ზოგ-ზოგს იმათგანს ცოფიანი მგლებივით. დავდედით და ვებრძოდით, მანამ ანდერძს არ ავუგებდით; იმიტომ მივცვივდებოდით ხოლმე, რომ პური ჰქონდათ, პური, და არა იმიტომ რომ უბედურ ვარსკვლავზედ ყოფილიყვნენ დაბადებული, ან იმათი ცხვირ-პირი არ მოგეწონებოდა.

კიდევ კარგი, რომ საერო კრების წარმომადგენელი მერლენ ტიონვილელი ჩვენთან იყო და გვამხნევებდა. ერთხელ ცხენოსანი ჯარი გაიყვანა ქალაქიდან, პრუსიელების რაზმები უნდა გავარღვიოო. გარღვევით ვერ გაარღვია, რადგან შეუძლებელს ქრისტე-ღმერთიც ვერ შესძლებს და ჩვენ კი დიდი იმედი შთაგვებრა თავისი გამბედაობით და დაუღალაობით. ერთ ციხეს ტიონვილელის სახელი ვუწოდეთ, და როდესაც მტერმა წაგვართვა იგი, ორმოცდაათი კაცი წაიყვანა და მტერს მიუხტა, ჩემი ციხიდან უნდა გვარეკოო. იმედი აღარავისა გექონდა, რომ ცოცხალი დაბრუნდებოდა, მაგრამ მაშინაც მშვიდობიანად გადაარჩა და ეს უკანასკნელი ნუგეშიც არ დაგვაკლდა. ამიტომ უყვარდათ კიდევ ჯარებს და დიდ პატივსა სცემდნენ; ჯარზედ რომ ყოფილიყო დამოკიდებული, გენერლად იმას დანიშნავდნენ. რაც შეეხება საერო კრებას მეორე წარმომადგენელს რევებელს, იჯდა თავისთვის, და მთელი დღე ქალაღდებსა სინჯავდა და ანგარიშებს ასწორებდა; არც ისე უყვარდა იგი ჯარს... თუმცა მართალი რომ სთქვას კაცმა. რესპუბლიკას ყოველგვარი მოსამსახურე უნდა ჰყავდეს და უმთავრესი ის არის, ჩვენი შოველისა არ იყოს, რომ ანგარიშები რიგზედ იყოს მოყვანილი.

ამ გაჭირებაში რომ ვიყავით, ერთს საღამოს შორიდან ზარბაზნის ხმა შემოგვესმა; ცა ნაკვერჩხალივით აწითლებულიყო და საშინელი სროლის ხმა მოდიოდა. აგერ კუსტენი მოდისო. შესძახა ერთხმად ჯარმა და სიხარულით ერთიერთმანეთს ხვეენა დაეუწყეთ. თვალი არავის მოუხუჭავს, მთელი ღამე თოფ-იარაღით ხელში საომრად გამზადებულნი მოუთმენლად ველოდით კუსტენის მოახლოვებას, რომ შიგნიდან ჩვენ შეგვეტია პრუსიელებისთვის. მაგრამ გათენდა, ამოვიდა მზე და კუსტენი კი არსად იყო; სამრეკლოს გუმბათიდან აფიცრები გადმოიყურებოდნენ დურბინდებით და, საცა კი თვალი მისწვდებოდა, ყველგან მტრის რაზმებს ხედავდნენ და სხვას არაფერს... მგონი ავდარი იყო იმ მხარეს, ჭექა და ჭუხდა, და ჩვენ კი კუსტენის ზარბაზნები გვეგონა. მშიერ ქათამს სიზმარში ფეტვი ელანდებოა, ხომ მოგესხენებოთ.

ისე გადაგვიწყდა გული იმდენი ლოდინით, რომ ერთსღა ვნატრობდით: ნეტავ მალე მოვიდნენ ქალაქზედ პრუსიელები, რომ იმათი სისხლით გაეძღეთო! ოღონდ ჯაერი კი ამოვიყაროთ და თუნდა ას ნაკუწად გვაქციონო! და ამ ფიქრებში რომ ვიყავით, უეცრად ხმა გავარდა, სამხედრო საბჭოს ქალაქის დანებება დაუდგენიაო. თავდაპირველად ეს ამბავი არავისა სჯეროდა. მაგრამ როდესაც თვით ჩვენმა აფიცრებმა გამოგვიცხადეს, მაშინ კი ყველგან ღრტვინვა გაისმა ჯარისა.

მეორე დღეს, 24 მკათათვეს, 1793, ბრძოლა აღარ ატეხილა. გარნიზონი სამხედრო მოედანზედ გაიყვანეს. ვინც უფრო უკმაყოფილონი იყვნენ ქალაქის დანებებისა და მათ შორის ჩვენი ივანე სომი, თოფები გასტენეს და ისე წავიდნენ მოედანზედ. ჯარი დალაგდა. ათ საათზედ თვით გენერალიც გამოჩნდა თავისი ამალით; მასთან ერთად იყვნენ კომისრები რეგბელი და ტიონვილელი. აქეთ-იქიდან ხმა გაისმა: სიკვდილი სამშობლოს გამყიდველთ!... ისინი კი მშვიდად, დარბაისლურად შემოვიდნენ შუა მოედანზედ, გაჩერდნენ ჯარის წინ, მოითმინეს, ვიდრე ეს ყვირილი შესწყდებოდა და მაშინ ყველა რაზმს თავისმა წინამძღოლმა წაუკითხა პირობები ქალაქის დანებებისა. რომლის ძალით საფრანგეთის ჯარები პრუსიის მეფეს უთმობდნენ ქალაქ მაინცს, კასელით და ყოველი სიმაგრეებით; საფრანგეთის ჯარები სრულიად თავისუფლად და მთლად თავის ბარგით და დაჭრილებით გაემგზავრებოდნენ შინისაკენ, ოღონდ აღთქმას სდებდნენ. რომ ერთის წლის განმავლობაში გერმანელებთან ომში არავითარ მონაწილეობას არ მიიღებდნენ.

დაწვრილებით იყო მოხსენებული ყოველივე — ფულის გაცვლა, ავადმყოფების და დაჭრილების წაყვანა ჩვენს საზღვრებამდე, ჩვენგან მიტოვებული ციხეების დაჭერა, მეტი იარაღის და ტყვია-წამლის ჩაბარება და სხვა და სხვა.

ნახევარი საათი გასტანა ამ პირობების კითხვამ; საქმე ისე იყო მოგვარებული, რომ ჩვენს მხედრულ ღირსებას არა აკლდებოდა რა. მივდიოდით, მაგრამ ჩვენი ღროშებიც თან მიგვქონდა, იარაღიც, ბარგიც; ამ სიამოვნებას ზედ ერთოდა ტკბილი რწმენა, რომ ახლა კი აგვისრულდება დიდი ხნის ნატვრა და შინ დავბრუნდებითო.

— მორჩა, გათავდა ამოდენი ტანჯვა, — ვიძახდით ჩვენს გულში. — ალბად, ღირსეულად დაგვიღწევია თავი, რომ ასე კმაყოფილნი არიან ჩვენი უფროსები. როგორც არა გვქონდა რა, როცა მოვედით, ისე წასვლისას არა მიგვაქვს რა. საწყალი მაინცელები, თორემ ჩვენ რა გვიჭირს! სახლი იმათ აღარ შერჩათ დაუნგრეველი და ეკლესია! ჩვენ ხვალ-ზეგ ისევ სამშობლოში ვიქნებით, მშობლიური ენით და მშობლიური სიმღერებით დავტკებებით და რესპუბლიკის ამბებს გავიგებთ. მეტი რა უნდა გვინდოდეს?

ასე გახარებული ვიყავით ყველანი, მაგრამ ორი დღის შემდეგ, როდესაც უკან დაგვრჩა ძველი, გადამწვარი და დანგრეული ქალაქი, რომელშიაც იმოდენი ტანჯვა-წვალება გამოვიარეთ უკანასკნელ ოთხი თვის განმავლობაში, ისე აგვიჩქროლდა გული, თითქო სამშობლოს ვეთხოვებითო. და ვეთხოვებოდით კიდევ, საუკუნოდ ვეთხოვებოდით ჩვენს ამხანაგებს, რომელნიც მაინცში იყვნენ დამარხულნი. დიად, 25 მკათათვეს 1793 წ., როდესაც ნალარის ხმა შესწყდა სამხედრო მოედანზედ და წინამძღოლების ბრძანება გაისმა: ჩქარი ნაბიჯით... მარჯვნივ... იარეთ! და დაიძრა ჩვენი ჯარი, ბევრს ჩვენგანს გადმოსცივვდა ცრემლი. მაინცელები დიდიან-პატარიანად გარეთ იყვნენ, დამშეულები, დაგლეჯილ-დაფლეთილები. ქალები ტიროდნენ; ვაჟაკები გაჩუმებულნი შემოგვცქეროდნენ და ვინ იცის, როგორ გვწყევლიდნენ და გვაგინებდნენ თავიანთ გულში; მაგრამ ყველაზე შეწუხებული დოქტორი ჰოფმანის კლუბის მიმდევრები იყვნენ, რომელნიც კარგადა გრძნობდნენ, რომ გერმანელი მართებლობა იათად არ დაუსვამდა საფრანგეთის და მეტადრე რესპუბლიკის მხარის დაჭერას.

წინ პრუსიელი დრაგონები მიგვიძლოდნენ და მერე ჩვენ მივდიოდით ყველა თემელი შეთქმულები. ნასახიც აღარ გვეტყობოდა ჯარისა — ტანისამოსის ნაცვლად ტურტლიანი კონკებილა შეგვრჩენოდა, ფეხსაცმელი მჩვრებით გვქონდა შეკრული, ექვსი თვის

მოუპარსავი წვერი დაგვეშვა... მაგრამ იმისთანა ამაყად მივათამა-
შებდით თოფს, თითქო უკეთესად გაწყობილი ჯარი ქვეყნად
ალარსად იქნებოდაო.

მართალია, ტანსაცმელით ერთიერთმანეთს აღარა ვგავდით,
მაგრამ სამაგიეროდ ყველანი ერთნაირად ვიყავით დაფლეთილე-
ბი და გამხდრები. უკან სენტონეელი მსროლელები მოგვდევენდნენ,
მერე ლანგდოკელი ცხენოსნები და სხვანი. შევედით თუ არა პრუ-
სიელების ბანაკში, მსროლელების მუსიკამ მარსელური დაუკრა.
და იმოდენა ჯარმა, ჩვენი ბატალიონიდან დაწყებული სულ ბო-
ლოს რაზმამდე, ერთხმად შესძახა თავისი გამამხნეველებელი სიმლე-
რა. აქეთ-იქიდან ხალხი მოსულიყო ჩვენი სირცხვილის სანახა-
ვად, — მოქალაქენი, გლეხკაცობა, სამღვდლოება და საფრანგე-
თიდან განიზნული დიდებულნი; ყველას პრუსიული კოკარდა გაე-
კეთებინათ ქულზედ, თან ეტლებით ქალები წამოეყვანა და საფ-
რანგეთის რესპუბლიკის დამცირების ნახვა ნებავდათ; მაგრამ
ღვთის წყალობა გაქვთ, იმათ ფერი ეცვალათ, ჩვენი მეღგარი მარ-
სელური რომ გაიგეს. ისეთი სახით შემოგვეყურებდნენ, თითქო
ფიქრობენ: — გმადლობთ, შენ ღმერთო, რომ ამათი პირობები მი-
ვიღეთ და თავიდან მოვიშორეთ, თორემ ამათთან ბრძოლა ხუმრო-
ბა არ უნდა ყოფილიყო.

ასე და ამგვარად გამოვედით მაინციდან. დამარცხებულნი და
შერცხვენილნი კი არ წამოვედით, არა! იმიტომ წამოვედით, რომ
ქალაქის დანებებით უფრო მეტს ვიძენდით, ვიდრე ბრძოლით;
ამასთან ისიც კარგად ვიცოდით, რომ, დღეს იქნებოდა თუ ხვალ,
გამარჯვება ჩვენი იქნებოდა და მაშასადამე მოცდა სჯობდა. ისე
მოეწყო სხვადასხვა გარემოება, რომ ბრძოლის მაგიერად ორივე
მხარემ მოლაპარაკება ირჩია; ჩვენ ჩვენთვის უმჯობესი ვითხოვეთ
და, რადგან ყველაფერზედ დაგვეთანხმდნენ, გიჟები ვიქნებოდით,
შემთხვევით არ გვესარგებლა.

გავცდით ბანაკს, გავედით სიმაგრეებს და თხრილებს, გავცდით
დანგრეულ და აოხრებულ სოფლებს. შევერიეთ მწვანე მინდორს,
შეჭრელებულ ყურძენს, დაბურულ ტყეს და თავისუფლადაც ამო-
ვისუნთქეთ. უფროსებმაც ნება მოგვცეს, იარაღი თქვენს ნებაზე
ატარეთო!

პირი სამშობლოსკენ გვქონდა, განა მეტი ბედნიერება კიდეც
იყო რამე ჩვენთვის! ვიღას ახსოვდა გაჭირვება, შიმშილი, სიცოცხ-
ლე და განსაცდელი! შინ მივიდიოდით, შინ! საფრანგეთს კიდეც ვნა-
ხავდით! გვაგონდებოდა მაინცში დახოცილი ამხანაგები და
ღმერთს მადლობასა ვწირავდით:

— ღვთის განგება, თორემ ჩვენ კი გადავოჩნებოდით?!

მივდიოდით და ჩვენვე გვეცინებოდა ჩვენი თავისა: ჰაი, თუ გაიკვირებენ, ამ ყოფაში რომ გვნახავენ! რამდენ ქებასა და დღეებს შემოგვძღვნიან!

გახარებულნი მივეშურებოდით შინისკენ. დარწმუნებულნი, რომ ყველგან აღტაცებით მიგვიღებდნენ და გულუხვად გაგვიმასპინძლდებოდნენ:

— გაუმარჯოთ მაინცელ გმირებსაო!

ორი დღის სავალს ერთ დღეში გავდიოდით, რომ შინ უფრო ჩქარა მივსულიყავით. პრუსიელები ჯერ ისევ წინ მიგვიძლოდნენ, თითქო ტუსაღები ვყოფილიყავით, და ეს უფრო გვაჩქარებდა, — ჩქარა მივატანოთ საფრანგეთს, რომ მოგვეშორდნენ წუწკებიო. ისე ვიარეთ, რომ ოთხ დღეზედ სარბრიუკს დაეუახლოვდით.

ჩვენგან დამარცხებულ ქვეყანაში ვიყავით ჯერ ისევ და საზაგეიროს იმითი გვიხდიდნენ ომისაგან გაღატაკებული გერმანელები, რომ თავის წონა ოქროდ აფასებდნენ ყველაფერს. პური, ხორცი, ყველი მამასისხლად ფასობდა; ან რა ექნათ, რომ გასასყიდოც აღარა ჰქონდათ რა. მანამ ძალა ხელთა გვექონდა, საწყალ ხალხს ჩვენვე შევუქამეთ, რაც რამ ებადათ და ახლა ჩვენვე ვემღუროდით, ასე ძვირად რად გვიფასებენო. გულს იმითი ვიმშვიდებდით. რომ საცაა საფრანგეთში შევალთ და იქ სულ სხვა იქნებაო.

საცა კი გაგჩერდებოდით, ხალხი შემოგვეხვეოდა და აქა-იქ გაგონილი საფრანგეთის ამბები კარგს არაჲ გვიქაღდნენ: ერთს ჰატარა ქალაქში გავიგეთ, ვანდელები აჯანყდნენო. ცოტა ხნის შემდეგ სთქვეს, მარატი მოკლა ერთმა ქალმაო. ჰომბურგში თქვეს, ჟირონდელები გაიქცნენ პარიზიდანო. ელვასავით მოედებოდა ზოლმე ეს ამბები მთელს ჯარს და გვალონებდა ყველას, მაგრამ ისე არაფერს დაუფლონებვიართ, როგორადაც დიუმურიეს ლალატმა დაგვალონა. ჩვენ მარტო მაშინ გავიგეთ, რომ დიუმურიეს იმ სამი თვის წინათ სამშობლოსთვის ეღალატნა და მტერს მისდგომოდა.

დაეუახლოვდით სარბრიუკს და მეც გულმა კვნესა დამიწყო: ასე ახლო იყოს კაცი ფალსბურგზედ, და შინ კი არ მივიღეს? ისე გაიაროს, რომ არც გულის საყვარელი ნახოს, არც დედ-მამა და მეგობრები? ჩვენებურები სულ ყველანი შინისკენ მიიწევდნენ, მაგრამ ჩვენმა უფროსმა ჟორდიმ შოველისაგან იცოდა, რომ მარგალიტას საქმრო ვიყავ და ძალიან წყალობის თვალთ მიყურებდა. მეოთხე დღეს, შესასვენებლად რომ დავდექით, მივედი და, 48 საათით დამითხოვეთ-მეთქი, ვთხოვე. ჯერ ისევ ცხენზედ იჯ-

და... ჩაფიქრებული დამცქეროდა ზემოდან, რადგან იმასაც ენატრებოდა შინ შებრუნება და თავისიანების ნახვა. კარგა ხანი მიყურა, სახე დაეღვრიმა... შემეშინდა, უარი არ მითხრას-მეთქი. მაგრამ უცბად გამიღიმა და მკითხა:

— მარგალიტას ნახვა გინდა, განა?

— დიად, ბატონო, მარგალიტასი და მამა-ჩემისა.

— ძალიან კარგი, — მიბრძანა უორდიმ და თან აქეთ-იქით მიიხედა, ყურს ხომ არავინ გვიგდებსო. — გეყურება, სარბრიუკში შევალთ თუ არა, ჩემთან მოხვალ და დათხოვნის ქალაღს მიიღებ. ოღონდ, ეს კი იცოდე, ხმა არ ამოიღო შენს ამხანაგებთან, თორემ ვაი შენი ბრალი! ღამე წადი, რომ არავინ გაგიგოს. თუ გაიგეს, ერთი დაითხოვაო, ყველანი მოინდომებენ შინ წასვლას და თოკითაც ველარავის დავიმაგრებთ. წადი და არა სთქვა რა.

რალა თქმა მინდოდა, მე თითონაც კარგად ვიცოდი, რომ ჩვენებურებს ყველას უნდოდა შინ მისვლა და სანას ოცდახუთი კაციდან ერთიც აღარ დარჩებოდა ბატალიონში, რაკი გაიგებდა, რომ ზოგი დაითხოვეს და ზოგი კი არა. განა არა, ვგრძნობდი, რომ უსამართლოდ ექცეოდა ჩემს ამხანაგებს ჩვენი უფროსი, მაგრამ ისე მწყუროდა ჩვენების ნახვა, რომ ყველაფერს ვიზამდი. ოღონდ შინ მისვლა მღირსებოდა.

სალამოზედ „დიდი ირემის“ სასტუმროში ვეახელ და დათხოვნის ბარათი იქ მომცა. ჩემს გარდა ას ორმოცდაათ კაცს სხვას ეთხოვა, მაგრამ ყველასთვის უარი ეთქვა. სარბრიუკი უკანასკნელი ქალაქი იყო გერმანელებისა; წყალგალმა უკვე საფრანგეთი იწყობოდა და იმავე საღამოს, ცხრა საათზედ, ივანე სომს კი წავჩურჩულე — შინ მივდივარ-მეთქი — და გზას გაუღდექ.

თოფი და გულა-ნაბადი ბარგში დავტოვე. მართალია, ოთხი დღის სიარულით ძალიან დაღლილი ვიყავ, მაგრამ რაკი შინისკენ მივიბრუნე პირი, ისე მივექროდი, თითქო ფრთები შემასხესო. რა კარგი რამ არის სიყმაწვილე! რომელი ფრთები შეედრება ოც წელს და შეყვარებულ გულს! მივრბოდი, მივექროდი და სულ იმას ვნანობდი, რომ ერთი ნახტომით არ შემეძლო იმოდენა მანძილის გადავლა! სიცოცხლე ნეტარებად მიმაჩნდა, გული სიყვარულით მქონდა აღსავსე და თავი მომავალის ტკბილი იმედებით. და ახლაც, რომ მომავლდება მაშინდელი ჩემი სირბილი, იგივე ხალისი მომივლის სიქაბუკისა და ასე მგონია; ისევე გზაში ვარ და მარგალიტასკენ მივეშურები-მეთქი. თვალწინ მიდგას მარგალიტა, მოხუცებული მამაჩემი, ნათლიაჩემი... არა, ფრთები არა მქონდა, მაგრამ ჩიტივით კი მივეფრინავდი.

მერე კარგი დარიც დამიდგა! მშვენიერი ღამე იყო, ზაფხულის, მთვარით გაკაშკაშებული, ღამე! დამშვიდებული იყო ყველაფერი, თითქო ბუნებასაც ჩასძინებიაო და მარტო ჩემი ფეხის ხმა არღვევდა ღამის მყუდროებას და შორიდან მდინარე სარის შხუილი მოისმოდა.

აგერ ირიჟრაჟა. მზემ თავისი სხივები სტუორცნა დილის ნავით შეცივულ ბუნებას. მინდვრიდან, გზის აქეთ-იქიდან მუშების ხმაურობა გაისმა. უკვე წყლის პირას ვიყავ. ორი თვე მეტი იქნებოდა, რაც საცვლები არ გამომეცვალა და ადვილი წარმოსადგენია, რა ჭუჭყიანი ვიქნებოდი. ამაზედ კარგი შემთხვევა სადღა მექნება, ჩავალ და ვიბანებ-მეთქი, ვიფიქრე. ბილიკზედ ჩავიარე, ტანთ გავიხადე და თქვენს მტერს, რაც მე მაშინ ჭუჭყი გავიბანე! მერე მშვენიერი, ნელთბილი წყალიც იყო! გადავწვებოდი ხან ერთ გვერდზედ, ხან მეორეზედ და, რა კარგი ყოფილა კეთილი ცხოვრებამეთქი, ვიძახდი.

ნახევარი საათი მეტი ვიყავ წყალში და როცა გამოვედი, მზე უკვე ამოსულიყო და კარგა ღამაზედ შეეცხელებინა ქვა და ქვიშა. მაღლიდან ტოროლას გალობა ისმოდა და შორს, ჩვენი მთები მოჩანდა, ჩვენი ვოზგის მთები.

საქმე ის იყო, რაც შეიძლებოდა კარგად გამოწყობილი ვჩვენებოდი მარგალიტას. ჩემს სავარცხელს სამი კბილიღა შერჩენოდა, მაგრამ უარარაობაში ისიც კარგი იყო და თმა და წვერი, როგორც იყო, დავივარცხნე. ტანისამოსისათვის რაღა მეშველა? შარვალის გაბერტყვა მინდოდა, მაგრამ, როგორ გამებერტყა, რომ ერთი დაქნევით იქნება სულ მტვრად ქცეულიყო. ერთი მტკაველის ოდენა ალაგი არ იპოვებოდა ზედ დაუგლეჯელი. ვუყურე და თავი დავანებე: ომიანობამ ასე იცის-მეთქი. კიდევ კარგი, რომ პერანგს არა უქირდა რა და გასარეცხად ჯერ ისევ ვარგოდა.

დაფლეთილი წადები როგორც იყო ბაწარით შევიკარ... დიად, ის კობტა მიშელი აღარ გახლდით, კვირაობით მარგალიტას სანახავად რომ ვკობტობდი ხოლმე პატარა სარკის წინ! დიად, ის მიშელი აღარ გახლდით, მაგრამ გული შითქვამდა, რომ მარგალიტა ასეც არ დამიწუნებდა და უფრო გულიანად გადამკოცნიდა. უმთავრესი კი ის იყო, რომ მარგალიტას არ დავეწუნე.

ისევ გზას გაუღდექი. საცა კი სოფელში გავიარე, იმისთანა გაჭირვება ვნახე ყველგან, რომ ახლაც ყურში მიდგას დამშეული ხალხის კენესა. ოჯახის ბურჯი, ოჯახის მაცხოვრებელი, ვისაც შრომა შეეძლო, ყველა ჯარში გაიყვანეს და შინ მარტო გაჭირვება დასტოვეს და შიმშილი. სიღარიბისაგან უდროოდ წელში მოხრილი და

მოხუცებული სოფლელები რომ დამინახავდნენ მიმავალს, შორი-დანვე სინჯვას დამიწყებდნენ ხოლმე და ყველას თავისი შვილი ან ძმა ელანდებოდა: იქნება ჩვენი ბიჭი მოდისო!

მეუახლოვდებოდი და გავუცრუებდი წამიერ იმედს.

— გამარჯობათ, ხალხო!

— გაგიმარჯოს, — მიპასუხებდნენ ნაღვლიანი ხმით და შინისკენ მიეშურებოდნენ.

დილის შვიდ საათზე ერთ პატარა ქალაქში შევედი თუ არა, მაშინვე მაინცელი ჯარის უკადრისად ხსენება მეცა გულში. გავბრაზდი, მინდოდა ღირსეული პასუხი მიმეცა თავხედისთვის, მაგრამ იმისთანა სუსტი რამ იყო ჩემი მოპირდაპირე, რომ ხმაც აღარ გავეცი: დუქანში ვიჯექ და გაჩქარებული ვილუკმებოდი; ცივად მონარმული ხორცი მომიტანეს ძროხისა და შინაური თეთრი ღვინო. იმ დროს დალაქიც შემოვიდა; მედუქნე, ერთი მოხუცებული, ჭალა-რა კაცი, იქვე შუა დუქანში გამოიჭიმა სკამზედ და დალაქმა პარსვა დაუწყო; თან ხან აქეთურს ამბობდა, ხან იქითურს... აქეთური მიიკიბა, იქითური და მერე ჩვენს ჯარსაცა სწვდა: მაინცელმა ჯარმა სამშობლოს უღალატა, თორემ განა იმ სიმაგრეებს მტერი შეუვიდოდა?.. სწორედ საჭიროა, რომ „ქვეყნის მფარველმა“ კომიტეტმა განიხილოს მათი ღალატი და დამნაშავეებს გილიოტინით თავები დააყრევინოსო.

გადავხედე უბედურს, სიცოცხლე ხომ არ მოსჭარბებია-მეთქი! მაგრამ რა? ერთი ბეწვა ქონდრის კაცი იყო, მისუსტებული და დაღეული. ის ენაც რომ არ ჰქონოდა, თავგები ჩაითრევდნენ სოროში. გადავხედე თუ არა, მაშინვე დავმშვიდდი.

გავათავე ჩემი სადილი და ბებერ მედუქნეს ნათლიაჩემისაგან გამოტანებული ოქრო გადავუგორე. ოქროს დანახვანედ ისე განცვიფრდა, თითქო სასწაული ნახა რამეო: გაშტერებული უყურებდა კარგა ხანს, მერე მივარდა, აიტაცა და ფანჯარასთან მიარბენინა, რომ სინათლეზედ უფრო კარგად გაესინჯა. დიდი ხანია ოქრო აღარ გვინახავსო, — თქვა, და ბოლოს, რაკი დარწმუნდა, რომ მართლა ოქრო იყო და არა ყალბი ფული, დახლიდან ხურდა გადმო-მითვალა ასიგნაციებით და შავი ფულით. ახლა მე დავრჩი განცვიფრებული: ერთ ოქროში ოთხის ფასი მომცა. მაშინ დავრწმუნდი, რომ ჩვენს ასიგნაციებს თითქმის სრულიად დაჰკარგოდათ ფასი და თავის მეოთხედადაც ძლივსა გადიოდნენ. რა გაჭირვებაში უნდა ყოფილიყო საწყალი ხალხი იმ ფულის სიძვირეში?! კიდევ კარგი, რომ ამ ასიგნაციებით გახიზნული დიდებულების და მონასტრების მამულის ყიდვა შეიძლებოდა, თორემ იმათ აღარავინ აიღებდა და რევოლუცია დაიღუპებოდა.

ისევ გზას გავედქ და ყველგან დიდად აღელვებული მეჩვენებოდა ხალხი. მაინცის დანებების ამბავი უკვე მისულიყო და მთელი ალზას-ლორენი აღშფოთებული იყო. ყველანი შეწუხებულნი იყვნენ, რადგან ჯარში გასულების გარდა, ბევრი კარგი დარბაისელი კაცი წასულიყო გერმანიაში რესპუბლიკური აზრების საქადაგებლად და არავინ იცოდა, სად იყვნენ და რა მოუვიდათ, რომ აღარც ცოცხალი ჩანდნენ და აღარც მკვდარი; ყველას მწუხარება ეტყობოდა. მე კი ისე მივეშურებოდი, რომ ყურადღებასაც არას ვაქცევდი; ან რა იყო იქ საყურადღებო? მაინცში ყოფნის დროს იმოდენი უბედურება ვნახე ადამიანისა, იმოდენა სისხლისღვრა და კაცისკვლა, რომ ხალხის წუხილი აღარად მიმაჩნდა.

ერთ სოფელში სამამასახლისოს კარებზე აუარებელი ხალხი შეგროვილიყო; შუაში ეანდარმები იდგნენ და ჯარში გასაყვან ბიჭების სიას ადგენდნენ. ის იყო ხიღზე შევედქ და შემაყენა კიდევ წესიერების მცველმა: დათხოვნის ბარათი მაჩვენეო. მაშინვე ამოვიღე და გადავუშალე. იმოდენა ხალხი ჩვენ შემოგვჩერებოდა. წაიკითხა ბარათი, მომცა და ჩუმად მითხრა:

— გეტყობა ცუდ დღეში ყოფილხარ, რომ აგრე ჩამომდნარხარ, ძმობილო. ვიცი, დიდი გაჭირვება გამოიარეთ, მაგრამ ნურავის ეტყვი, რომ მაინციდან მოდიხარ, თორემ აქ უარესს დღეში ჩავარდებიო.

სალამი მივეცი და ხმის ამოუღებელივ ჩემს გზას გავედქ გულდაწყვეტილი. ან როგორ არ მწყენოდა ეს დარიგება, — ნურავის ეტყვი, რომ მაინციდან მოდიხარ, თორემ აქ უფრო ავი დღე დავადგებაო. მერმე რა დავაშავეთ, რას გვემდუროდნენ? ან ვინ გვემდუროდა? ვინადა, ნაცარქექია დევგმირები, რომელნიც შინ ბრძანდებოდნენ დამშვიდებულნი, მაძღრისად სჭამდნენ, ნებისად სვამდნენ, თბილად ეძინათ, დიდებულების მამულებს ყიდულობდნენ და ჩვენ კი სამშობლოს დალატსა გეწამებდნენ! ჩვენ თავგანწირულნი ვიბრძოდით მტერთან, სიცოცხლეს არა ვზოგავდით, იმდენი ხანი მშიერ-მწყურვალნი და ტიტველნი ვეყარებით, და უსინდისობეჲ ესეც არ გვაკმარეს და ახლა ჩვენი პატიოსნების შელახვა მოინდომეს და დალატი დაგეწამეს! გულს მიწამლავდა ხალხის უსამართლობა და სისულელე. მაშინ კი არა, რადგან ძალიან აღშფოთებული ვიყავ, და შემდეგში კი ხშირად მომსვლია აზრად, რომ რევოლუციის მტრები იმიტომ ავრცელებდნენ ხალხში ამ ხმებს, რომ ხალხისა და მაინცელ ჯარების შუა სიძულვილი ჩამოეგდოთ. მეგონი, რომ ეს უნდა ყოფილიყო იმათი წადილი.

აგერ შორიდან ფალსბურგიც გამოჩნდა. თითქმის შინ ვიყავ;

კოტა ხანი კიდეც და ჩემს მარგალიტასაც ვნახავდი, მამაჩემსაც, პატარა სტეფანესაც... მაგრამ არა, არ მიხაროდა. გული მომიკლა ჟანდარმის დარიგებამ და სულ იმის ფიქრში ვიყავ, რომ ხალხისთანა უმადური არა იქნება რა-მეთქი.

შუადღე იყო, ფალსბურგში რომ შევედი. იქვე ქალაქის პირში საბაჟოს კარებში, სწორედ ჯარის ბინის პირდაპირ, გამოჩნდა ჩვენი ძველი ნაცნობი პულე, რომელიც ხელმწიფის დროს ხელმწიფის ჯაშუში იყო და ეხლა, რესპუბლიკის დროსაც, არ დაეტოვებინა თავისი ხელობა: ახლაც იგივე ჯაშუში და მამბეზლარი იყო და სხვის უბედურებით ცხოვრობდა. ეტყობოდა, ძალიან ტკბილად შერგებოდა ასე ნაშოვნი ლუკმა, რადგან ერთისამად გასუქებულიყო და იმისთანა ფაშიე ვადმოეგდო, რომ ძლივსლა იძვროდა. ხელში ყველი და პური ეჭირა და ისე ილუკმებოდა, იტყოდით, დიდი ხნის დამშეული მხეცია და არა ადამიანიო. ქულზედ რესპუბლიკური კოკარდა გაეკეთებინა, სიცხისაგან შეწუხებულს საკინძი ჩამოეხსნა და ისე გულგადაღელილი მობაჯბაჯებდა. რომ დამინახა, გამხდარი და დაფლეთილ ტანსაცმელში გახვეული, სიცილი დაიწყო და იქვე გზის პირად ჯარისკაცებს გასძახა:

— თქვენ ეი! ჩუმაღ იყავით! გასწორდით! სამხედრო სალამი მიშელ ბასტიენს, მაინცელი ჯარის წარმომადგენელს, რომელმაც ისე გამირულად დაანება მტერს ქალაქი, რომ თოფიც არ დაუცლია! ყვიროდა რამდენადაც კი შეეძლო და თან ხან ჯარისკაცებს გადახედავდა, ხან მე. იმდენი ხალხი მე შემომყურებდა. ბრაზი მომერია, ფერი მეცვალა. ხმის ამოუღებლად მივდიოდი ჩემს გზაზედ და, პულეს რომ დავუპირდაპირდი, იმისთანა სილა ვტკიცე, რომ სამჯერ გადაკოტრიალდა იმსიმსხო კაცი. მიგორავდა და თან ღრიალებდა:

— დაიჭირეთ! დაიჭირეთ, ეგ კაცის მკვლელი! მიშველეთ, ხალხო, ვერა ხედავთ, რომ მოკვლას მიპირებს!

წამოდგა, როგორც იყო, და მაინც ჩემს დაჭერას შესძახოდა ხალხს:

— გამოუდექით, დაიჭირეთ! განა ჩემისთანა პატრიოტს ასე უნდა ახოცვინებდეთ?!

მე კი მივდიოდი, არც ფეხი ამიჩქარებია, არც უკან მიმიხედნია. ჯარისკაცები გაკვირვებულნი შემომძკეროდნენ.

გზის პირას მოხუცებული ათისთავი იღგა; სიცილი წასკდა და დამძახა:

— ყოჩაღ, ბიჭო! საცა თავისი სთქვას, შენსასაც ნუ დაივიწყებს. ეგ წუპაკი, ეგა! ეს მითხარ, მაინციდან მოღიხარ?

— მაინციდან გაახლები.

— აგრე რამ ჩამოგადნო, შე კაი კაცო?

— გაჭირვებამ, ბატონო.

ათისთავი ჯარისკაცებს მიუბრუნდა და უთხრა სიცილით:

— იცით, ბიჭებო, იქნება კიდევ გვიღალატეს ამათმა გენერლებმა, მაგრამ ეს კი ცხადია, რომ ამ საწყლებს არაფერი რგებიათ.

ამ დროს პულეც მოგვიახლოვდა ყვირილით:

— დაიჭირეთ! შეჰკარით, ეგ ქვეყნის მოღალატე! შეჰკარით კანონის ძალით, იმიტომ რომ ეგ არისტოკრატია და ხალხის მტერი!

— იარე, ძმობილო, და ღმერთმა მშვიდობის გზა მოგცეს. — მითხრა ათისთავმა.

ძალიან კარგ გუნებაზე ვიყავი, ქალაქში რომ შევედი; ჩემი ჯვარი პულეზე ვიყარე და ისე მომეშვა გულიდან ყოველი დარდი, თითქო სუყველაფერი იმ სილას გაჰყვაო. მივიდიოდი და მარგალიტას გახარებული, გაბრწყინვალებული სახე მიდგა თვალწინ. აქეთ-იქიდან ნაცნობი ხმები ისმოდა:

— მიშელს გაუმარჯოს, მიშელს!.. ხომ კარგად ხარ, მიშელ?

მაგრამ ისე მივეჩქარებოდი, რომ მარტო თავს ვუკრავდი ხმის ამოუღებლივ.

ფუკსის ქუჩაში შორიდანვე თვალში მეცა შოველის წიგნის მაღაზია ფანჯარაში გამოწყობილი წიგნებით და გაზეთებით და ისე ამიძგერდა გული, რომ ერთს წამს გავჩერდი სულის მოსაბრუნებლად. ცალკე ნეტარებასა ვგრძნობდი, რომ ისევე შინ ვიყავ და გულის საყვარლებსა ვნახავდი, და ცალკე შიში მკლავდა: ვაი თუ ან ავად იყოს ვინმე, ან ცოცხალი აღარ დამხვდეს-მეთქი. ბოლოს მაღაზიასთან მივედი. შევედი, არავინ დამხვდა. შევიხედე მეორე ოთახში. მარგალიტა და ჩემი ძმა სუფრას მისხდომოდნენ და სადილსა სჭამდნენ. დამინახეს და გაკვირვებული შემომტკეპროდნენ, რადგან ვერა მცნობდენ. ძნელი საცნობიც ვიყავ, ღვთის წინაშე; დაფლეთილი ტანისამოსი, გრძელი წვერი, ჩამომხმარი და ჩაშავებული პირისახე, მგონი მათხოვარს უფრო ვგავდი, ვიდრე ჯარისკაცს მაგრამ ხმა ამოვიღე თუ არა — რა ვქნა, ვერა მცნობთ-მეთქი? — მაშინვე ფეხზედ წამოცვივდნენ ორივენი და ხვევნა დამიწყეს. მარგალიტა გულში ჩამეკრა, სტეფანე კისერზედ ჩამომეკიდა და ტირილით და სლოკინით მიაღერებდნენ:

— მიშელ! ვიღასა ჰქონდა შენი ნახვის იმედი!? მადლობა ღმერთს, მადლობა ღმერთს, რომ კიდევ გნახეთ ცოცხალი! — თან იცინოდნენ და თან ტიროდნენ.

— როგორ გაუხარდება შენი ნახვა საწყალ მამას! — იძახდა სტეფანე.

ერთმა გულდა მომხადა, მეორემ ქუდი ჩამომართვა და ხელახლა ხვევნა და კოცნა დამიწყეს. მარგალიტა ძალიან ფერმიხდილად მეჩვენა, გამხდარიყო კიდეც.

— ავად ხომ არ იყავ, მარგალიტა?

— არა, მადლობა ღმერთს, კარგადა ვარ. ოღონდ შენი ამბავი არა ვიცოდი რა... ახლა სამშობლოს გაქირვება და... დაბრძანდი.

სუფრა იქვე ფანჯარასთან გაეშალათ. ერთი ნაპერი ლორი ჰქონდათ, მოხარშული კომბოსტო და ერთი სურა წყაროს წყალი.

— გაიქე, სტეფანე, დახლიდან გროშები ამოიღე და ცოტა ლორი კიდევ იყიდე. მე სარდაფში ჩავალ ღვინის ამოსატანად. გაგვიჭირდა, ჩემო მიშელ! წყალსა ვსვამთ, რომ ამით მაინც გადავარჩინოთ რამე.

იცინოდა, მაგრამ ვაი იმ სიცილს! მეც შეყვარებულის თვალეზით ვუტყერდი, და ოღონდ არ მომშორებოდა, არც ღვინო მინდოდა და არც თაფლი. მაგრამ ხელიდან გამისხლტა და სარდაფში ჩავიდა. დაერჩი მარტო პატარა, წიგნებით გატენილ ოთახში და ჩემს თავს ვეკითხებოდი: ნუ თუ აქა ვარ? ნუ თუ აქა ვარ და მარგალიტას ვხედავ-მეთქი?

მაგრამ მომაგონდა, რომ დიდი ხანი ვერ დავრჩებოდი და ცრემლით ამევსო თვალი. ცოტა ხანს უკან სტეფანე დაბრუნდა; მერე მარგალიტა ღვინით და სუფრაზე დაესხედით. უნდა გენახათ, როგორ დადონდნენ, როდესაც გაიგეს, რომ სულ 48 საათით ვიყავ დათხოვნილი და ხვალ საღამოს უნდა წავსულიყავ. რა გაეწყობოდა? მარგალიტასი არ იყოს, კაცმა უპირველეს ყოვლისა თავისი ვალდებულება უნდა შეასრულოს; ჯერ რესპუბლიკა და თავისუფლება და მერმე დასვენება და განცხრომა.

იმისთანა რწმენით მითხრა ეს სიტყვები, რომ თვალწინ შოველი წარმომიდგა. იგივე რიხი, იგივე ხმა, იგივე თვალები, და ჩემდა უნებურად ფიქრები ამეშალა:

— ჯვარს დაიწერ, ჩემო მიშელ, და მართალი ყოველთვის მარგალიტა იქნება. საითაც მოინდომებს, იქით გიკრავს თავს, — წადი, შენი ვალდებულება აასრულო! — და შენც იძულებული იქნებრ დამემორჩილო, რადგან მსჯელობითაც და ცოდნითაც ის ასია და შენ ერთიც არა... ეჰ, ნეტავი ჯვარდაწერილები ვიყენეთ და დემ აგრე იყოს. დეე, აგრე იყოს, ოღონდ მასთან ყოფნა მელირსოს!

ხანდახან, როცა წიგნის საყიდლად შემოვიდოდა ვინმე, სტეფანე გავიდოდა მუშტართან. მე და მარგალიტა კი სუფრაზედ ვისხედით და ვლაპარაკობდით. ჯერ ყველანი მოვიკითხე: შოველი, მამაჩემი, ნათლიაჩემი და სხვანი და რაკი ყველას ამბავი გავიგე, მერე

საერო საქმეებზედ ჩამოვაგდე ლაპარაკი. მარგალიტას, როგორადაც შოველს, უმთავრესად საზოგადო საქმეები აწუხებდნენ. როდესაც ვუთხარი, რომ მაინცში, ოთხი თვის განმავლობაში, აღარც ვაზეთი მიგვიღია, აღარც წერილი ან სხვა რამ ამბავი და სრულიად მოწყვეტილი ვიყავით ქვეყნიერებისაგან; როდესაც გაიგო, რომ საფრანგეთის ამბებისა აპრილის ექვსიდან მოყოლებული მე სრულიად არა ვიცოდი რა, ადგა და დაწვრილებით მიაბზო, რაც მას შემდეგ მომხდარიყო და იმ ერთ დღეს უფრო მეტი რამ გავიგე, ვიდრე ჯარში ყოფნის დროს.

აი, რა მიაბზო მარგალიტამ:

— ნერვინდენში რომ დამარცხდა, დიუმურიემ ლათაიეტის მიბაძვით მოინდომა თავისი ჯარი პარიზის ასაკლებად წამოეყვანა, რომ კონვენტის, ესე იგი საერო კრების, წევრები დაეხოცა, რესპუბლიკა გაუქმებინა და საფრანგეთში კვლავ მეფობა აღედგინა. დიუმურიეს ავსტრიელ ჯარის სპასალარ კობურგთან ისე ჰქონდა პირობა შეკრული, რომ ჯერ კონდე უნდა დაეთმო მტრისთვის და მერე პარიზზე წასულიყო. საერო კრებამ დროზე გაუგო ეს განზრახვა და პასუხის საგებლად დაიბარა; რაკი ნახა დიუმურიემ, რომ ლალატი გაუგეს და ჯარიც არა თუ არ მიჰყვა, აუჯანყდა კიდეც. საერო კრების წარმომადგენელნი, რომელნიც მის ჯარში იმყოფებოდნენ, მტერს მისცა და თითონ თავისი ამაღლის ერთი ნაწილით და უბრწყინვალესი თ. ორლეანელის შვილით ავსტრიელებს მიეკელა. ამაზედ ჟირონდელებმა დანტონს ცილი დასწამეს: შენც დიუმურიეს და თ. ორლეანელის ამხანაგი ხარო. მაგრამ დანტონმა მოკლედ მოუჭრა სიტყვა:

— მეფობის აღდგენას და სამშობლოს მოღალატეთა მეგობრობას იმათ უნდა სწამებდეთ, ვინც მეფე ლუი XVI-ს ექომავებოდა!.. და მეფეს თქვენზედ მეტი ქომავი ხომ არავინ ჰყოლიაო!

აქეთ-იქიდან ლალატით ისე გაუჭირეს საქმე რესპუბლიკას, რომ იძულებული გახადეს მტრების საწინააღმდეგოდ ყოველი საშუალება ეხმარა. სწორედ ამ მიზნით დააარსა საერო კრებამ ქვეყნის მფარველი და ქვეყნის მზრუნველი კომიტეტი, რომლებსთვის ყოველ კვირა დაწვრილებით მოხსენება უნდა მიერთმიათ საფრანგეთის ყველა თემებს და ჯარში მყოფ საერო კრების წევრებს*. გარდა ამისა დაარსებული იქნა რევოლუციური

* პირდაპირი ბრძოლით რომ ვეღარა გააწყეს რა, რევოლუციის მოწინააღმდეგეებმა მალული ბრძოლა აუტენეს რესპუბლიკას: საცა კი კრება იყო ხალხისა, ისინი ჩაეროდნენ ხოლმე და, ვითომ რევოლუციის მომხრენი ვართო, ყველ-

სასამართლო, რომელსაც სრული უფლება ჰქონდა მინიჭებული დაეჭირა და დაესაჯა ყველა მტერი და მოწინააღმდეგე რევოლუციისა. რევოლუციურმა სასამართლომ იმისთანა სამსახური გაუწია რესპუბლიკას, რომ მთელს საფრანგეთში, ყველა ქალაქებში ამისთანა სასამართლოები დააარსა თვით ხალხმა*. რევოლუციის

გან არეულობა და მართებლობისადმი უნდობლობა შექონდათ. ყოველ ღონისძიებას ხმარობდნენ, რომ მართებლობაში მონაწილეობა მიეღოთ და სხვადასხვა მოხელედ შემძქრალიყვნენ შიგ; საძრახისი და უკადრისი იმათთვის აღარა იყო რა და ურცხვი საქციელით ისე გაუჭირეს ხალხს საქმე, რომ იძულებული გახადეს დაეარსებინა ქვეყნის მფარველი და ქვეყნის მზრუნველი კომიტეტები. კომიტეტი შესდგებოდა ცხრა წევრისაგან: მის სხდომას ვერაინ დაესწრებოდა; კვირაში ერთხელ ანგარიში უნდა წარედგინა თავისი მოღვაწეობისა საერო კრებისთვის; წევრნი კომიტეტისა ყოველ თვე იცულებოდნენ; კომიტეტს თელუური უნდა სკეროდა მინისტრებზედ და ჯარში მყოფ საერო კრების წარმომადგენლებზედ; უფლება ჰქონდა ყოველი საშუალება ეხმარა სამშობლოს გაჭირვებიდან დასახსნელად. 10 მკათათვემდე ყოველ თვე იცულებოდნენ წევრნი კომიტეტისა. მაგრამ 10 მკათათვეს ამორჩეულნი:— რიბესპიერი, კუთონი, სენ-ჟიუსტი, რობერ ლინდე, პრიორ დე ლა კოტდორი, კარნო, ბარრერი, ბილიოვარანი და კოლო დერბუა, — უცვლელად დარჩნენ და რადგან ამ კომიტეტს შეუერთეს ქვეყნის მზრუნველი კომიტეტი, იმისთანა, სრულიად უსამძღვრო, ძალა შეიძინა, რომ საფრანგეთის ბედს, საერო კრების ნაცვლად, ის განაგებდა.

* მარტის დამდეგს, როდესაც პარიზში ხმა გაეარდა, აუსტრიელებმა ჩვენი ჯარები დაამარცხეს და ლიევი წაგვართვესო, საომრად გამოადებულმა ჯარებმა გამოაცხადეს: ჩვენ საზღვრებისაკენ არ წავალთ, მანამ რევოლუციური სასამართლოს არ დააარსებთო. საერო კრებამ 10 მარტს დაადგინა რევოლუციური სასამართლოს დაარსება: საერო კრება დანიშნავს ცხრა მსაჯულს, რომელნიც გაასამართლებენ ყველას, ვინც კი სამშობლოს წინააღმდეგ იზამს ან განიზრახავს რასმე; ეს მსაჯულნი სრულიად თავისუფალნი იქნებიან. როგორც ენებოთ, ისე შეუდგენენ საქმის გამოძიებას; რევოლუციურ სასამართლოში არ დაესწრებიან ნაფიცი ექილნი; მსაჯულთ ნება აქვთ ყოველი საშუალება იხმარონ თავიანთი მსჯელობის დასადგენად; რევოლუციურ სასამართლოსაგან დასჯილ იქნებიან არა მარტო დალატში შემჩნეულნი, არამედ იგიინიც, ვინც თავის ვალდებულებას გაურბის ან კეთილსინდისიერად არ ასრულებს; დასჯილ იქნება ყველა, ვინც საქმით, სიტყვით ან ნაწერით ხალხის გაბრყვებას ან არევის ეცდება; დასჯილ იქნება ყველა, ვინც მეფობის და ბატონყმობის ქებას გაბედავს... რომ ნატამალიც კი აღარსად დარჩენილიყო საზარელი წარსულისა, ახალი სიტყვები შემოიღეს ძველების მაგივრად: ძველებური „ბატონო“ და „ქალბატონო“ აღარსად იყო, არამედ „მამულიშვილო!“ ერთმანეთს ყველანი შენობით ელაპარაკებოდნენ. სათამაშო ქალაქებში მეფის წილ ნიჭიერებას ხატავდნენ და დედოფლის წილ თავისუფლებას. შესცვალეს სახელები თვეებისა და თვით წელთაღრიცხვაც კი, რომელიც დაიწყეს თავისუფლების მოპოვების დღიდან, ისე რომ 1792 წ. უწოდეს „წელიწადი პირველი“.

მოწინააღმდეგენი გამოცხადებულ იქმნენ კანონის გარეშე მყოფად, ისე რომ რაც უნდა მოსვლოდათ, იმათ კანონი აღარავითარ მფარველობას არ გაუწევდა. გამოცხადებულ იქმნა კანონი, რომლის ძალით მართებლობას ნება ეძლეოდა ყოველი საეკვეო პირის სახლები გაეჩხრაკა, როდესაც კი მოისურვებდა. სახლის კარებზედ დაწერილი უნდა ყოფილიყო სახელი და გვარი ყოველი მდგმურისა; სადაც კი უნდა ყოფილიყო კაცი, ყოველთვის თან უნდა ჰქონოდა თავის ვინაობის მოწმობა; და ბოლოს საშინელი განცხადება, რომელიც სიკვდილით დასჯას უქადდა ყველას, ვინც, საფრანგეთიდან განდევნილი, უკან დაბრუნებას განიზრახავდა.

აკი მოგახსენებთ, ისე გაუჭირეს საქმე მართებლობას, რომ იმულებული გახადეს ამ საშინელ და საზარელ საშუალებათათვის მიემართათ; მაგრამ ჟირონდელებმა სულ სხვა თვალთ შეხედეს ყოველ ამ კანონებს და დიდი წინააღმდეგობა გაუწიეს. ან როგორ იქნებოდა წინააღმდეგობა არ ვაეწიათ, როდესაც ერთი მეფის გულისთვის ცხარე ცრემლს აფრქვევდნენ და იმდენი ხალხის უზომო გაჭირვებას კი თითქოს არც კი ამჩნევდნენ. სწორედ დაბრმავებულნი იყვნენ, თორემ როგორ არ უნდა შებრალებოდათ უბედურები, რომელნიც მთელ დღეს — დილიდან საღამომდე — ხაბაზის კარზედ აღამებდნენ, იქნება ჩვენთვისაც იპოვებოდეს ლუკმაპურიო; როგორ არ უნდა შებრალებოდათ საწყალი მუშები, რომელნიც თავიანთი ოფლის ფასს ასიგნაციებად იღებდნენ და ბაზარში კი გასავალი აღარ ჰქონდა ამ ასიგნაციებს! როგორ არ უნდა შებრალებოდათ იმათ წყალობით უღრთოდ დაობლებული ათასი და ათი ათასი ოჯახი, რომელთაც ლუკმა ენატრებოდათ, რადგან მათი მაცხოვრებელი მუშაკაცები საზღვრებისკენ იყვნენ წასულნი ძალად გადაკიდებულ მტერთან საომრად! მაგრამ რას იზამთ, რომ ჟირონდელებს მეფის და მდიდრების გარდა აღამიანად არავინ მიაჩნდათ! განა ისინი ისე დაიმდაბლებდნენ თავს, რომ ხალხის გაჭირვება შეენიშნათ? ხალხიც კარგადა სცნობდა თავის მტერს და მოყვარეს და საერო კრებას ყოველის მხრიდან თხოვნას უგზავნიდა, ჟირონდელები კანონის გარეშე მყოფად გამოაცხადეთ, რომ ჩვენი თავი გავაცნოთო. ჟირონდელებმა — სულ მარატივს ბრალთა, რომ ხალხი ასეთი სიძულვილით გვეპყრობაო... ადგნენ და რევოლუციურ სასამართლოსთან დაბეზლეს მარატი. სასამართლომ მათი დაბეზლება უსაფუძვლოდ აღიარა და მარატი გაამართლა ყოველი ღირსეული პატრიოტის სასიხარულოდ.

მე ეს ამბავი პირველად მესმოდა.

მარგალიტამევი მიამბო ჩრდილოეთში ჩვენი ჯარის დამარცხე-

ბა; ინგლისელები და ჰოლანდიელები მიშველებოდნენ კობურს და რიცხვით ერთიორად მეტნი შებრძოლებოდნენ ჩვენს ჯარებს და ვალანსინამდე ელდევნათ ბრძოლით. ვანდლები — დიდებულნი, სასულიერო წოდება და ხალხი — შეფიცულიყვნენ რევოლუციის წინააღმდეგ და მთელი ვანდეს ხალხი აჯანყებულიყო; აჯანყებულებს წინამძღოლობდნენ კათელინო, სტოფლე, სისუ, სუშიე და სხვანი, სულ უბრალო გლეხკაცი და არა ბრწყინვალე თავადიშვილები; ზოგი მეურმე იყო, ზოგი ტყის დარაჯი, ზოგი ხაბაზი და ზოგი გუთნიდელა. დაენებებიათ თავი თავიანთ ცოლშვილისთვის და ხალხის შვილნი ხალხსვე ებრძოდნენ: ბატონყმობა რად გადააგდეთო? განთავისუფლებულნი თავიანთ გამათავისუფლებელთ ებრძოდნენ: ჩვენ ისევ ყმობა გვინდა და ბატონის სამსახურიო! რასაკვირველია, რომ ამისი ჩამდენი ხალხი გაუნათლებელი და რეგენი უნდა ყოფილიყო, მაგრამ ამ გაუნათლებლობასთან ერთად იმისთანა ველურნი და საზარელნი იყვნენ, რომ ადამიანს კი არა, ცოფიან მგელს უფრო გავდნენ. დედაკაცები უარესები იყვნენ: ტყვეებს და დაჭრილებს ძალღებვიით ხოცავდნენ და თან იესო ქრისტეს სახელს გაიძახოდნენ.

ამოდენა უბედურებას ყირონდელები მთიულებს აბრალებდნენ და მთიულები ყირონდელებს. მათ შორის სიძულვილი დღითი დღე მატულობდა. თუმცა ყირონდელები ამის წინააღმდეგი იყვნენ, მაგრამ საერო კრებამ მაინც გამოაცხადა კანონი, რომლის ძალით პურს დანიშნულ ფასზედ ძვირად ვერავინ გაჰყიდდა; და რადგან იმოდენა ომებს ფულიც უნდოდა, საერო კრებამ მდიდრებს სესხად გამოართვა ათას მილიონამდე ფული. მარგალიტამ შოველის წერილი წამიკითხა, რომელშიაც იწერებოდა: ამ სესხის შესახებ რომ სჯა ჰქონდა საერო კრებას, ყირონდელები და მთიულები მუშტით მივიდოდნენ ერთმანეთზედ, გამშველებლად ვაკელები რომ არა ჰყოლოდათო. ყირონდელებს ნებავდათ მართებლობა გაეუქმებინათ და საერო კრება ბურჟუაზი გადაეტანათ. ბურჟუაზი თავიანთი მომხრენი ეგულებოდათ და, რასაკვირველია, ერთიანად ამოსწყვეტდნენ მთიულებს. ყირონდელები, ერთობ მეფის მომხრენი, თუმცა პირდაპირ, გაეკაცურად შებრძოლებას ვერ უბედავდნენ რესპუბლიკას, მაგრამ მაინც სულ იმის ცდაში იყვნენ, რომ რევოლუციის შეეყენებით და თავიანთ სასარგებლოდ გაეხადათ; იმდენი ქნეს, იმდენი, რომ საერო კრებას რაღაცა კომისია დაანიშნინეს და კომისიაში თორმეტივე წევრი თავიანთი მომხრე აირჩიეს. დაარსდა თუ არა ეს კომისია, მაშინვე ის გამოაცხადა, რომ რევოლუციური სასამართლო დღეიდან გაგვიუქმებია და თუ არ დამ-

შვილდა პარიზელი ხალხი, მისგან ამორჩეულ, კომუნად წოდებულ, რჩევასაც გავაუქმებთო.

რალა თავი შეგაწყინოთ, ყირონდელების კომისია იმას ცდილობდა, რომ დიდებულნი და მდიდრები დაემშვიდებინა: ნუ გეშინიათ. თქვენ ვერავინ რას გაგიბედავთო; ოღონდ თქვენ არხეინად ბრძანდებოდეთ და თუნდა სულ შიმშილით ამოწყდეს თქვენი უსიამოვნო ხალხიო! და წყდებოდა კიდევ, შიმშილითაც და ომითაც. იქნება იმის იმედი ჰქონდათ, რომ ხალხი გაწყდება და საფრანგეთზე ყოველი მხრიდან მომავალს მტერს გზას ველარავინ შეუკრავსო! იქნება იმის იმედი ჰქონდათ, რომ უპატრონოდ დატოვებულს საფრანგეთს მტერი დაიქერს, მტერს უკან მოჰყვებიან გახიზნული დიდებულნი, ბერები და ეპისკოპოსები და ბატონყმობასაც შემოიღებენ, მეფობასაც და ხალხსაც ერთითათსად მძიმე უღელს დაადებენ, ვიდრე წინად იყო. ბატონები თავისას მიიღებდნენ, ბერები თავისას, და არც იმათგან მოყვანილი მტერი დარჩებოდა დაუჯილდოვებელი: დიუნკირხენი — ინგლისელებს; ვალანსიენი და კონდე — ავსტრიელებს; მაინცი და ლანდაუ — პრუსიელებს; ალზასი და ლორენი — გერმანელ მეფეებს. მართალია, კარგი თემები დააკლდებოდა საფრანგეთს, მაგრამ ეგ რა სათქმელია: პატარა იყოს და რიგიანი, — ესე იგი მეფითა და ბატონყმობით შეზავებულნი, — ვიდრე დიდი და ურიგო!

პატარადა დარჩება საფრანგეთის სამეფო, მაგრამ მეფეც ეყოლება. ბატონებიც, ბერებიც და ამათ შესანახად და მაცხოვრებლად ყურმოჭრილი ყმებიც, როგორც 1789 წლამდე იყო. ეს კი მეტისმეტრ იყო! ეს კი ველარ აიტანა პარიზელმა ხალხმა, აჯანყდა და დანტონის წინამძღოლობით ერთხელ კიდევ დაუმტკიცა ქვეყანას, რომ სამშობლოს ბედი იმას უფრო აწუხებდა, ვიდრე საერო კრების ბევრს წარმომადგენელს.

ეს ამბები თურმე ორი თვის წინათ მომხდარიყო. ერთს ყირონდელს ეთქვა და ძალიან თავხედურადაც მოსვლოდა: თუ გაბედეს და ჩვენგანს ვისმე ხელი ახლეს, მთელი საფრანგეთი ჩვენ გამოგვესარჩლება და ისე აღგვის მიწის პირიდან პარიზს, რომ მისი ნაადგილევის პოვნაც კი შეუძლებელი გახდესო. მაგრამ ამ მუქარამ ვერავინ შეაშინა. მარატმა შეადგინა სია იმ ყირონდელებისა, რომელნიც უფრო მავნებლად მიაჩნდა და კაცები გაგზავნა მათ დასაპატიმრებლად; უმეტესი ნაწილი დაიჭირეს; მაგრამ პეტიონი, გადე, ბიუზო, ბარბარუ და სხვანი გაიპარნენ; დაერივნენ საფრანგეთს და ვინ მოსთვლის, რასაც ისინი უწყესობას და არეულობას ახდენდნენ: ჯარებს ჰკრებდნენ, რომ პარიზელებზე წამოეყვანათ და პარიზი მიწის პირიდან აეგავათ; საცა კი მოახელეს, მამასახლისები გადააყენეს; საქალაქო თან-

ხეზი ხელთ იგდეს და თავისებურად გააწყეს ყველაფერი, ესე იგი მთიულების საწინააღმდეგოდ; საცა კი მოახერხეს, თავიანთი სასამართლო დააწესეს მთიულების მიმდევართა დასასჯელად; იმათი ჯარის წინამძღოლად გენერალი ვიმპტენი ბრძანდებოდა — დიდებული, მეფისა და მეფობის მომხრე!.. ბევრი მტერი და მოღალატე ჰყოლია ჩვენს ჭეყანას; ხშირად ჩვენივე დიდებულნი ამხედრებულან ჩვენზე და თავიანთ საშველად უცხოელი ჯარები შემოუყვანიათ, მაგრამ ისე საძაგლად კი არავინ მოგვეტყვია, როგორც ყირონდლებმა გვიყვეს: დაერივნენ საწყალ ხალხს და — ჩვენც თავისუფლებისა და რესპუბლიკის მომხრენი ვართო — ძმას ძმას აძულებდნენ და მამას შვილს.

— აი, როგორ არის ჩვენი საქმეები, — სთქვა მარგალიტამ: — ორმოცდაათი თემი აჯანყებულია რესპუბლიკის წინააღმდეგ. ლიონი. მეორე ქალაქი საფრანგეთისა, წინააღმდეგია საერო კრებისა; მეფის მომხრეებს იარაღით აუღიათ ლიონის სამამასახლისო, დაუჭერიათ. ვითომ გაუსამართლებიათ, წარჩინებული პატრიოტები და ყველასათვის თავები დაუყრევინებიათ, მარსელი და ბორდოც აჯანყებულია. ვალანსიენში ხვალ მტერი შევა. ნორმანდიაში ყირონდლები დაძრწიან და ხალხსა ჰკრებენ, რომ პარიზის ასახრებლად წაიყვანონ. ვანდეში და ბრეტონში უკვე ებრძვიან ჩვენს ჯარებს. ინგლისელები გზაში იჭერენ ჩვენკენ მომავალ პურით დატვირთულ ხომალდებს; იმათმა მინისტრმა პიტმა გამოაცხადა, საფრანგეთის ყველა ნავთსადგურებს შეეკრავო; პიტი ფულით ეხმარება პრუსიელებს. ავსტრიელებს, სარდინელებს და ესპანელებს; გერმანელები მაინცის აღებასლა ელოდნენ და ახლა ყოველი მხრიდან შემოგვესევინან. რესპუბლიკას ჩვენლა შევრჩით — ელზასი, ლორენი, ფრანშკონტე, შამპანი, პიკარი და პარიზი. წარმოიდგინე, ოვერნელებიც აჯანყებულან და ვანდლებისკენ მიიწევენ საშველად. კორსიკის კუნძულს ნებავეს ინგლისს მიეცეს... ერთი სიტყვით, ყველა ჩვენი წინააღმდეგია... ასე უცბად დაგვაწვა ამოდენა უბედურება.

— მაშ დაღუპული ყოფილა ჩვენი საქმე! რილას იმედი უნდა გვექონდეს, მარგალიტა?

— დაღუპულიო! — შემომიტია მარგალიტამ. — დაღუპული მაშინ იქნებოდა, რომ ყირონდლები საერო კრებაში დაეტოვებიათ და ძველებურად ეპარპაშებინათ. ვერ მიაბრუნეს! ის დრო წავიდა, როდესაც კარგ მეტყველ საქმეს არ უსინჯავდნენ; ეხლა საქმე საქმეა და არა სიტყვა. საერო კრების მოთავედ ახლა დანტონი არის, რობესპიერი, ბილიო-ვარანი, კოლო დერბუა, კარნო, პრიორი, ლინდე. კუთონი, ტრეილარი, ბონსენტანდრე, გიტონ-მორვო, კამბონი და სხვანი; სულ იქ არიან მამიჩემის ყველა მეგობრები: რვა დღის გან-

მავლობაში უკვე შეადგინეს კონსტიტუცია, რომელიც უირონდე-
ლებმა რვა თვე ათრიეს და წინ ვერ წასწიეს*. რომ იცოდე, რა მარ-
ტივია ახალი კონსტიტუცია, რა ცხადი და სამართლიანი; ნამდვილი
რესპუბლიკური კონსტიტუცია არის და სწორედ ამიტომ იძახიან, არ
გვინდაო. საქმე აქამდის კი არა, საქმე ახლაა, როდესაც საფრანგეთი
იღუპება და ხსნას ჩვენგან მოელის! შენ უყურე, რა ამბები მოხდება
ხვალ! აქამდის ჩვენი ვთროლოდით, ახლა ჩვენი შიშით ათროლოდებიან
ჩვენი მტრები! მეფის მომხრე გენერლები ხომ გადავაყენეთ! წავიდ-
ნენ და ახლა შემოუძღვნენ მტრის ჯარს და ახლად ააოხრებინონ
სამშობლო! წავიდნენ და ეხლად შეატყობინონ პრუსიელებს ჩვენი
ჯარების მოძრაობა! წავიდნენ და ახლა მიემხრნენ მეფეს, როდესაც
ალარც მეფეა და ალარც მეფობა ეხლად დაანებონ მტრის ჯარებს
ჩვენი ქალაქები! ეხლად ააჯანყონ ჩვენი ჯარები ხალხის წინააღ-
მდეგ! აღარ გვინდა იმათი გენერლობა! ჩვენი ჯარების წინამძღოლად
სულ ხალხის შვილნი იქნებიან, სულ უბრალო ხალხის შვილნი, სულ
ჩვენი სისხლი და ხორცი! ქვეყნის მფარველი კომიტეტი ახლა კუს-
ტენს მისწვდა და ვაი იმის ბრალი! იქნება ჰგონია აპატიონ, მინცში

* მიზანი საზოგადოებრივი ცხოვრებისა არის სა-
ყოველთაო ბედნიერება, ამბობს ეს კონსტიტუცია. ყოველი ფრანგი
21 წლისა, მიუხედავად ხარისხის და სიმდიდრისა, არის მამულიშვილი და სამშობ-
ლოს ბედის გამგებ-ბატონი; ამ უფლებებით იგი იქ სარგებლობს, სადაც უცხოვრია
უკანასკნელი ექვსი თვე. ყოველი უცხო ქვეყნელი 21 წლისა, რომელიც სრული
წელიწადია საფრანგეთში ცხოვრობს თავის შრომით, ან მამული შეუძენია, ან
ფრანგის ქალი შეურთავს, ან ბავშვი აუყვანია შეილად, ან მოხუცებულს აცხოვ-
რებს, ერთი სიტყვით, ყოველი უცხო ქვეყნელი, რომელსაც კანონმდებელი კრება
კაცობრიობის ღირსეულ შვილად აცნობს, მიღებულ იქნება საფრანგეთის ყოველ
უფლებით აღჭურვილ მამულიშვილად. ამგვარად კონსტიტუციის ძალით ყვე-
ლას ეძლევა მოქალაქებრივი უფლებანი და არა მარტო
შეძლებულთ. კანონმდებელი კრება ერთადერთი იყო (ესლა ორია — პალატა დე-
პუტატებისა და სენატი) ერთის წლის ვადით არჩეული. 40 ათასს სულზედ თითო
დებუტატს ირჩევდნენ. კანონიერ დადგენილებათა სისრულეში მოყვანა დავაღუ-
ბული ჰქონდა 24 კაცს, რომელთაც საერო კრება ირჩევდა. ეს 24 კაცი ირჩევდა
და ნიშნავდა გენერლებს, მინისტრებს და ყოველ სხვა მოხელეებს. კონსტიტუციის
განმარტებით, აღამიანს საკუთრებად მარტო საკუთარი
შრომის ნაყოფი ეკუთვნის. ამ პრინციპს შემდეგში პრედლონი
უფრო განავითარებს და დაადგება იმ დასკვნას, რომ ესაკუთრება ნა-
ქურდალიაო. ერთ მუხლში ეწერა: გაჰირვებულთა დახმარება საზოგადო-
ების წმინდა მოვალეობა; საზოგადოება უბედურ მამულიშვილთ საქმეს უნდა
აძლედეს, და საცხოვრებელს იმათ, ვისაც შრომა აღარ შეუძლია. ეს კონსტიტუ-
ცია ხალხს წარუდგინეს დასამტკიცებლად და მიღებულ იქნა 1.801.918 ხმით
11.910-ის წინააღმდეგ, რომელთაც არ ინდომეს მისი დაწესება. ეს კონსტიტუცია
შეადგინა მთიულთა მომხრემ ერო დე სეშელმა.

მყოფი ჯარები რომ შიმშილით ამოხოსცა იქნებ ჰგონია აპატიონ, რომ ღვთის ანაბარად მიგატოვათ და არც სურსათი გამოგიგზავნათ, არც ჯარები მოგაშველათ? რევოლუციური სასამართლო უკვე ადგენს მის ბრალმდებელ ოქმს... უყურე, რა კარგად წავიდეს ახლა ჩვენი საქმე! თუ აუცილებლად საჭიროა ჩვენი დაღუპვა, ჩვენზედ წინ მრავალნი სხვანი დაიღუპებიან! და თუ გვაჯობეს და ძველებური მეფობა შემოიღეს და დიდებულების და ბერების ბატონობა, იცოდე, ძვირად, ძალიან ძვირად დაეფასვამთ ამ გამარჯვებას!

ამ სიტყვებმა კვლავ გამიცხოველა იმედი და ჩემს თავს ვანუგეშებდი:

— სიცოცხლე ბრძოლაა, ჩემო მიშელ, და ბრძოლა კიდევ მაშინ არის ღვთისა და კაცისაგან კურთხეული, როდესაც თავისუფლების მოსაპოვებლად არის. დღეს ისეა ჩვენი საქმე, რომ ან უნდა გავიმარჯვოთ, ან დავიხოცნეთ. გამარჯვება, ან სიკვდილი წმინდა საქმისათვის! ამაზედ უკეთესი რა გინდა? თუ გვაჯობეს, შენსიკვდილს ველარ გადაურჩები, ჩემო მიშელ! ვერც შენა და ვერც მარგალიტა, შოველი და სხვანი! ისე დაგაყრევიანებენ თავებს, რომ იქნება ზიარებაც აღარ გაღირსონ! ლიონში ხომ ხოცავენ პატრიოტებს მეფის მომხრენი; აქ უარესს იზამენ. ჰოდა თუ კი მორიგება შეუძლებელი გამხდარა და ან ჩვენ უნდა ვიყვნეთ, ან ისინი, ისინი ამოწყდნენ, ის არა სჯობს!

მალაზიაში შეუწყვეტილი ირევოდა ხალხი, მაგრამ დაღვრემილნი იყვნენ ყველანი; ეტყობოდა, ყველას იგივე ფიქრი აწუხებდა, რაც მე. ყველა ხედავდა, რომ ერის სიცოცხლე და სიკვდილი ამ ბრძოლაზედ იყო დამოკიდებული. მაგრამ სანუგეშოც იყო ეს დაღვრემილო ხალხი: მალაზიაში სულ უბრალო ხალხი შემოდიოდა — მუშები, გლეხკაცები, ჯარისკაცები, — რომელნიც ამ გაჭირვების და შიმშილის დროს უკანასკნელ ლუკმაპურს იკლებდნენ და გაზეთებს კი ყიდულობდნენ, რომ ქვეყნის ამბავი გაეგოთ. რაკი ხალხი ასეთი თავგანწირულებით შეუდგება თავისუფლების მოპოვებას, დიდებულნი და ბერები კი არა, მთელი ქვეყანაც ველარას დააკლებს! მართალია, იქნება ნახევარიც არ გადარჩეს ცოცხალი, მაგრამ უმსხვერპლოდ არა ეძლევა რა ადამიანს და, დეე ჩვენ დავიხოცნეთ, ოღონდ ჩვენმა შვილებმა და შვილიშვილებმა იხარონ თავისუფლებით.

მამ ბრძოლა ნებავთ რაღა! რა გაეწყობა, ჩვენც ხელი უნდა გამოვიდოთ! ძნელი ის არის, რომ ბევრი ჩვენგანი ქათამს ვერ დაჰკლავს, ისე ეზარება სისხლის დანახვა, და ახლა იძულებულია თავის ქმებს შეებრძოლოს. რა გაეწყობა? მგლის დანდობა ცხვრის გაწყვეტაო, ნათქვამია. ძნელი ის არის, რომ ადამიანი გამგელდება, თორემ მგელს ყველგან დევნა და ხოცვა უნდა.

მგონი ყოველივე მოგახსენეთ, რაც მარგალიტამ შიამბო ქვეყნის საქმეების შესახებ. ნათლიაჩემისა მითხრა, პარიზში 10 აგვისტოს დღესასწაულია დანიშნული და ჩვენებურებმა ის გაგზავნეს იქ დასასწრებლად. რაც შეეხება ახალს კონსტიტუციას, ხალხმა დიდი უმრავლესობით მიიღო იგი და მით უკვე დააქანონაო.

ბინდღებოდა და რადგან ძალიან მინდოდა იმ ღამესვე მენახა მამაჩემი, ავდექი და ჩვენი სოფლისკენ გავეშურე.

როგორ აგიწეროთ, რა ნეტარება ვიგრძენ, როდესაც ჩვენი სოფლის პატარა ქუჩაში შევედი და ჩვენებური კვამლისა და სასუქის სუნი მეცა? როგორ აგიწეროთ, როგორ მიცემდა გული, როდესაც ნათლიაჩემის დუქანს მივუახლოვდი და ჯერ ისევ გაჩაღებულ სამკედლოს გავუარე? როგორ აგიწეროთ მამაჩემის სიხარული? ერთიორად დაბერებულიყო, წელში მოხრილიყო, კანკალებდა. ველარ მოიბრუნა საწყალმა გული, მეხვეოდა, მკოცნიდა და თან დაპაღუბით ცრემლი სდიოდა. ამას ვერც ავწერ და არც საჭიროა: ვისაც გულის ნაცვლად ლოდი არ უძევს და ყოველი გრძნობა არ დახშობია, თვითონაც კარგად წარმოიდგენს ჩვენს ყოფას.

: მაგრამ ჩემდა უნებურად არ შემიძლია არ გიამბოთ, როგორ მიმიღო დედაჩემმა, რადგან თქვენ, რასაკვირველია, სულ სხვაფრთვ წარმოიდგენთ დიდი ხნის უნახავი დედა-შვილის შეყარას. როდესაც გული იღალა მამაჩემმა ჩემი კოცნით და ხელი გამიშვა, ხელგაწვდილი გავეშურე დედაჩემისკენ, რომელიც იქვე კერასთან იჯდა. დედა — შეეძახე ძველებური უსუსური ბავშვური ალერსით, მაგრამ დედაჩემი წამოდგა, ზურგი მიბრუნა და კიბეზედ ავიდა. სულ ზევით, ზემო საფეხურზედ გაჩერდა, გიჟივით გადმომხედა აღზნებული თვალებით და კარი მიიხურა. იყო იქ და მანამ მე შინ ვიყავ, აღარ ჩამოსულა. ძალიან მეწყინა დედაჩემისაგან ჩემი ასეთი აძულეზა, მით უფრო მეწყინა, რომ ჩამაშხამა იმოდენა სიამოვნება; მშობელი დედისაგან განა ამას მოველოდი? მამაჩემი მანუგეშებდა, რამდენიც შეეძლო, და ის ღამე ისე გავათენეთ, რომ თვალი აღარ მოგვიხუჭავს. ვისხედით ცეცხლის პირას და ვლაპარაკობდით; თან კართოფილსა ვწვავდით, ჩიბუხს ვეწევიდით და ერთმანეთს ვეალერსებოდით.

ძალიან ემადლიერებოდა თავის სარძლოს: ყოველ კვირა მარგალიტასთან ვარ ხოლმე სადილად და ჩემ პატარა სტეფანესაც იქა ვხედავო. იმისთანა პატივისმცემელია ჩემი შენი საცოლო, იმისთანა, რომ რაც ჩემს ხანგრძლივ სიცოცხლეში ვაება მინახავს, სულ იმან დამავიწყა, ამ სიბერის დროსაო. ეტყობოდა დარწმუნებულიყო, რომ მარგალიტას ჩვენს ოჯახში ბედნიერება შემოპქონდა და ძალიანაც შეჰყვარებოდა. სტეფანესაც ძალიან ემადლიერებოდა: ყოჩადი ბიჭი

დადგა, მუშა და მუყაითი, თავისთვისაც კარგი და შოველისთვისაც სასარგებლო. მატურიანი და კლოდი ისევ ნათლია შენთან არიან პაკოლცის მამულში და საკმარისს ჯამაგირს იღებენ... ისე რომ ღვთის მადლით ყველანი კარგად მყვანან და მეც ჩემი შვილების ბედნიერებითა ვცოცხლობ და სხვით არაფრითაო.

მე კიდევ ჩვენი ღიზას ამბავი ვუამბე; ავუწერე მარესკო, პატარა კასსიუსის დაბადება და ნათლობა და ჩვენი ყოფა-ცხოვრება. აკი მოგახსენეთ, მთელი ღამე ისე გავათენეთ, რომ თვალი არ მოგვიხუჭავს.

რაკი ვათენდა, მამაჩემმა საგარეო ტანისამოსი ჩაიცვა და ქალაქისკენ ერთად წავედიო. ჩვენებურები ის იყო დგებოდნენ და, ვინც კი დამინახა, ყველა სიყვარულით მომესალმა. ფალსბურგშიც ყველა ნაცნობი და მეგობარი სიამოვნებით მილოცავდა შინ მისვლას და თუმცა უკვე გაეცრელებინათ ხმა — მაინცელმა ჯარმა სამშობლოს უღალატაო — ჩემი და ჩემისთანა უბრალო ჯარისკაცების ღალატი არავის სჯეროდა და ყველანი მეგობრულად მექცევოდნენ. მტრობა ბრძანეთ თქვენ, თორემ ვინც მე დამინახავდა, განა ღალატს დამწამებდა? განა ცხადი არ იყო ყველასათვის, რომ ჩვენ კი არ ვუღალატეთ სამშობლოს, გარემოებამ უმტყუნა, რომლის დამორჩილება ადამიანის ხელთ არ არის?

მინდოდა ათ საათზედ გამოვთხოვებოდი ჩვენებს, მაგრამ მარგალიტას სხვაფრივ მოეწყო საქმე: ხუთ საათზე მიმავალ დილიჯანსში ჩემთვის ალაგი აელო და ამგვარად მთელი დღე შინ ვრჩებოდი და ნანსშიც უფრო ადრე ჩავიდოდი და დაუღალავადაც. მე რომ მამაჩემთან ვიყავი, მარგალიტასაც არ სძინებოდა მთელი ღამე და ისე დაერეცხა და დაეკერებინა ჩემი ტანისამოსი, რომ უკეთესი არ შეიძლება. ჩვენ რომ ჩავედით, ჯერ ისევ ნემსი ეჭირა და პერანგს ღუმებს ასხამდა.

რაკი გავგოთ ჩემი მისვლა, პატრიოტები მაშინვე მალაზიისკენ წამოსულიყვენენ ჩემ სანახავად და ვინ გნებავთ, რომ იმ დღეს არ მენახა: ელოფ კოლენი, რაფიელ მანკი და სხვანი და სხვანი. ზოგი რას მკითხავდა, ზოგი რას ჩვენი ომებისას და მაინცურ გაჭირვებისას. დაწვრილებით მათქმევიენეს ყოველი ჩვენი ბრძოლა, მოკლულების სახელი და გვარი, შიშშილი, და ავადმყოფობა. გაჩუმებულნი ისმენდნენ ჩემს სიტყვებს, და ბოლოს თავს იქნევდნენ და მწარე ღიმილით ამბობდნენ:

— იქნება კიდევ გვიღალატეს გენერლებმა, მაგრამ ჯარს კი პირნათლად აუსრულებია თავისი მოვალეობა.

პულეს დავებულებინე — ჯარიდან გამოპარულია და იმალეზაო.

მაგრამ მადლობისა და ჯილდოს მაგიერ საყვედური მიეღო, რადგან ყველამ იცოდა, რომ ვისიც ჯერ არს მისგან ვიყავ დათხოვნილი და კანონიერი დათხოვნის ბარათიც მედო ჯიბეში.

ხუთ საათზედ პატარა შევნაყრდით და გავემზადე კიდეც წასავლელად. მარგალიტას კიდეც ჩაელაგებინა ჩემი გულა და შიგ ერთი წყვილი ახალი წაღები ჩაედო, ორი სრულიად ახალთახალი პერანგი შოველისა, ნემსი, ძაფი, საკერებელი... ერთი სიტყვით, ისე მოვემზადებინე, რომ დიდი ხანი აღარა გამიჭირდებოდა რა. შორიდან დილიჯანის ხმა მოისმა; წინ გავეგებენით ყველანი და იქ, მოედანზედ გამოვეთხოვე მარგალიტას და ჩვენებს... რამდენადაც ნახვა იყო ტკბილი, იმდენად განშორება იყო მწარე და, თუ კი ასე ჩამშხამდებოდა, ნეტავი არც კი მოვსულიყავ-მეთქი, ვფიქრობდი. მკოცნიდნენ, გულში მიკრავდნენ, ჩემს სიცოცხლესა და დღეგრძელობას შესთხოვდნენ ღმერთს და თან სულ იმას მარიგებდნენ, — გაფრთხილდი და, რაც კი ადამიანის ხელთ არის, ყოველი განსაცდელი აიცილნეო.

სუყველაფერი წამიერი ყოფილა ჩვენს ცხოვრებაში! თითქო ტკბილს სიზმარში ვნახე ჩვენები და უცხად გამომეღვიძაო, ისე ვიყავ სწორედ. დილიჯანის მიტეტულბრონისკენ მიჰქროდა, თანდათან უფრო და უფრო მაშორებდა ჩვენებს და, ვინ იცის, კიდეც მელირსებოდა როდისმე იმათი ნახვა თუ არა? ის იმისთანა დრო იყო, რომ ათში ერთი თუ გადარჩებოდა ხოლმე სიკვდილს და ისიც ქუღბედიანის მერე ვინ იცის, მე ვიქნებოდი. ის ბედნიერი?

დილიჯანსში რომ ავედი, მეგონა კუნჭულში სადმე მივიკუჭებო და კარგა ლამაზად გამოვიძინებ-მეთქი; ჯერ ფეხით სიარული ბრძანეთ თქვენ, — სარბრიუკიდან ფალსბურგამდე ისე ავედი, რომ მუხლი არსად მომიდრეკია, — მერე უძილობა, მამაჩემთან რომ ვიყავი, ახლა იმდენი მღელვარება და — ისე ვიყავ დაქანცული, რომ ძილი ზიარებასავით შემერგებოდა. მაგრამ ჩემდა საუბედუროდ, ისე იყო დილიჯანსი გამოქედილი, რომ დასაჯდომადაც არსად იყო ადგილი. არამც თუ დასაძინებლად; სხვათა შორის, ხუთი-ექვსი ვაჭარი იჯდა შიგ და, თუმცა იძახდნენ, ნანსში მივდივართ თამბაქოს სასყიდლადაო, მაგრამ ეტყობოდათ, იმ ვაჭართაგანი იყვნენ, რომელთაც ღვთის წყალობად მიაჩნიათ ხალხის გაჭირვება და ქვეყნის უბედურებით სარგებლობენ, რომ ჯიბეები დაიტენონ. მთელი გზა სულ თავიანთ საქმეებზედ ლაპარაკობდნენ და ხან ასიგნაციების ფასს შეეხებოდნენ, ხან მონასტრებისა და გაზიზნული დიდებულების მამულების იაფად ყიდვას და მოგებით გაყიდვას, ხან მეფე ლუი XVI სურათიანი ქალაქის ფულების დაწვას, ხან რას და ხან რას. მე ყურა-

დღეობასაც არ მაქცევდნენ: ერთი უბრალო, უვიცი ჯარისკაცია, ჩვენ-
სას ვერას გაიგებსო; მაგრამ ღვთის წყალობა გაქვთ, კარგად მეყურე-
ბოდა, რომ ნანსში თამბაქოს სასყიდლად კი არა, იმიტომ მიდიოდნენ,
რომ რაც პური იშოვებოდა, თითონ ეყიდათ და მერე თავისებური
ფასით გაეყიდათ. მეყურებოდა კი, მეყურებოდა, მაგრამ რას ვიზამ-
დი? მერე ისე ვიყავ დაღლილი, რომ სულის ცხონებას მერჩინა
ძილი. სხვა მგზავრები გაჩუმებულნი ისხდნენ. ჩემს გვერდით ერთი
მოხუცებული დედაბერი იჯდა, ტანისამოსზე ეტყობოდა, რომ ჩვე-
ნებური უნდა ყოფილიყო; გაშტერებული შესტკეროდა ერთ კუნ-
ჭულს და რაღასაც ბუტბუტებდა, თითქო ლოცულობსო.

ისე სოფელში არ შევიდოდით, რომ მაშინვე არ გავეჩერებინეთ და
ჟანდარმებს პასპორტები არ მოეთხოვათ. მცირეოდენი ექვი და, მა-
შინვე გააკავებდნენ, ვინც უნდა ყოფილიყო. აქა-იქ, სადმე საბძელში
ან ბაქში, დამწყვდეულები მოჩანდნენ თავიანთი დარაჯებით. მთელი
ქვეყანა ფეხზე იდგა; ვერც შიმშილს შეეყენებინა ხალხის მოძრაობა,
ვერც გაჭირვებას და განსაცდელს. პირიქით, ეტყობა, რაც მეტია გა-
ჭირვება, მით უფრო მედგრად იბრძვის ხალხი თავისუფლებისათვის.
და მაშინდელზედ მეტი გაჭირვება წარმოსადგენდაც კი ძნელია:
სოფლიდან სოფლამდე მოსდევდნენ ჩვენს დილიჯანს ტიტველი დე-
დაკაცები და გულსაკლავად შემოგვეტიროდნენ: გაგვიკითხეთ!.. რეს-
პუბლიკის და თავისუფლების გულისთვის! ლუქმა პური მოგვაწო-
დეთო!

ყველგან „წავა-წავას“ მღეროდნენ. აქა-იქ დაჭერილ არისტოკრა-
ტებით სავსე დილიჯანს შევხვდებოდით ხოლმე, რომელსაც წინ
და უკან ჟანდარმები მიუძღოდნენ.

მახსოვს, ჰემინგის ახლო ახლად გაჩეხილ ტყეში მუშები ბო-
ბებსა სდგამდნენ და ზედ რაღაცა მავთულსა სჭიმავდნენ. ერთმა
ჩვენმა თანამოგზაურმა დაგვანახა ეს ბოძები და გვითხრა:

— აგერ, ტელეგრაფი!

ყველანი გაკვირვებულნი შევეტყუროდით ამ გაჭიმულ მავთულებს
და ყველაზე მეტად მე, რადგან ჯერ ტელეგრაფისა არა გამეგონა რა
და არც კი ვიცოდი, საჭმელი იყო, თუ სასმელი. ჩვენმა თანამგზავრ-
მა აგვიხსნა, ტელეგრაფი ერთმა გამოჩენილმა კაცმა, სახელდობრ,
შაპმა, გამოიგონა და მით არის კარგი, რომ თვალის დახამხამებაზე,
თუნდა ერთი თვის სავალზე შეგიძლიან აცნობო შენი ამბავი ვისაც
გინდაო; აღარც შიკრიკი და მთელი თვის ლოდინი, აღარც უამბობა
და მით გამოწვეული წუხილიო... ამ ორი-სამი წლის წინათ რომ გა-
მოეგონა ტელეგრაფი, დიდ ფულს იშოვიდა, მაგრამ დღეს კი სახე-
ლისა და დიდების მეტს ვერას შეიძენსო.

ჩვენი მგზავრი ვაჟრები ლუნევილში ჩამოხტნენ და დილიანს-ში სამნილა დავრჩით: მოხუცებული მგზავრი, ჩვენებური დედაბერი და მე.

მივადგებოდით სადმე დაღმართს და გააჩერებდა დილიანსს ბაპტისტი: გადახტებოდა და ერთ თვალს ისე გაამაგრებდა, რომ აღარ დატრიალებულიყო; ჩავიდოდით დაღმართს და კვლავ დააყენებდა ცხენებს, გადახტებოდა და ახლა ნახევარ საათს გამაგრებული თვალის გახსნას მოანდომებდა; სწორედ 14 საათი მოვანდომეთ ფალს-ბურგიდან ნანსამდე მისვლას.

ტკბილ ძილში ვიყავ, როდესაც თვალში რალაც სინათლე მეცა და თანაც დამშეული დედაკაცების თხოვნა შემომესმა. სადღაც სოფელში ვიყავით; დილის ორი საათი იქნებოდა. მოხუცებულს ჩვენს თანამოგზაურს, რომელმაც ტელეგრაფის დანიშნულება აგვიხსნა, დასძინებოდა და გულიანადა ხვრინავდა; კუნჭულში ჩვენებური დედაბერი მიმჯდარიყო და ცხარი ცრემლითა ტიროდა; ისე სლოკინებდა უბედური, რომ ქვასაც კი შეებრალებოდა. ცდილობდა, რაც კი შეეძლო, ჩვენთვის არ გაეგონებინა თავისი ქვითინი, და მწარი კენესით შესთხოვდა — ღმერთო, შენ იყავ ჩემი შემწეო!

ძალიან შემებრალა საწყალი. გაჩუმებული შევცქეროდი და მიკვირდა, ნეტავ რა აწუხებს, რომ ასე ტირის ეს უბედური-მეთქი.

ბოლოს ველარ გამიძლო გულმა და გერმანულად ვკითხე, რადგან მარტო გერმანულს ლაპარაკობდა:

— რა გატირებს, დედავ? ავად ხომ არა ხარ?

შეშინდა და ხმა არ გამცა.

— ნუ გეშინია, ჩემო დედავ, თუ იმას ტირი, რომ შინ გულის საყვარლები დასტოვე და შენ შორს სადღაც მიდიხარ, ეგ რა სატირელია. გუშინ საღამოს გამოვეთხოვე მოხუცებულ მამაჩემს, და ჩემს საყვარელ საცოლოს... მე ჯარისკაცი ვარ და ხომ იცი, იქნება ისე მოვეკდე, რომ იმათ ნახვას ველარ ველირსო... მაგრამ აი, როგორც ხედავ, არა ვტირი. მოდი, მიაბზე შენი დარდი და, ჯარისკაცს თუმცა ბევრი არაფერი შემიძლია, სიტყვით მაინც დაგეხმარები და ნუგეშსა გცემ. კაცი კაცის წამალიაო, ხომ გაგიგონია.

მაშინვე დამშვიდდა საწყალი დედაბერი, ცრემლი მოიწმინდა და მიაბზო, პარიზს მივდივარ, ქვეყნის მფარველ კომიტეტის სანახავად, თუმცა არც კი ვიცი, რა არის ეს კომიტეტიო!.. მის შვილს სტრას-ბუგელ ხაბაზს ასიგნაცია არ აეღო და ამისთვის დაეჭირათ და ციხეში ჩაეგდოთ; ერთ მეზობელს ერჩია, პარიზს წადი, ქვეყნის მფარველი კომიტეტი ნახე და გაათავისუფლებენო... ჩემი შვილის უბედურების მიზეზი ჩვენი მღვდელი არისო, თქვა: ხალხს იცნობს და,

ვისაც კი ცოტა რამ შეძლება გააჩნია, ყველას ციხეში აჭერინებდნენ.

და ისევ ცრემლი წასკდა. მე კი მაშინვე ჩვენი პულე მომაგონდა; ვიფიქრე, ალბად ამათი მღვდელიც ჩვენი პულესავით სხვების უბედურებაზედ აშენებს თავის კეთილდღეობას და პატიოსან ხალხს აბზღებებს და აჭერინებს, რომ ამ ჯამშუშობით ჯილდო აიღოს და ჯიბეები გაიტენოს-მეთქი. მით უფრო შემებრალა საწყალი დედაბერი, რომ პარიზში არავის იცნობდა, ფრანგული სიტყვა არ იცოდა და თავისი საქმე ქალაღლის პატარა ნავლეჯით უნდა გაერიგებინა, რომელზედაც „ქვეყნის მფარველი კომიტეტი“ ეწერა. უსაზღვროდ უნდა უყვარდეს დედას შვილი, რომ არც ენის უცოდინარობას შეუშინდეს, არც ქვეყნისას და სამოცდაათი წლის დედაკაცი იმ სიშორე გზას გაუდგეს, იქნებ ჩემს შვილს ვუშველო რამეო.

თენდებოდა, მარჯვნივ უკვე მოჩანდა ნანსის წმ. ნიკოლოზის გუმბათი და მის დანახვაზედ უცბად მომაგონდა, რაც იმ ორი წლის წინათ ნანსში სისხლისღვრა ვნახე. ორი წელიწადი არც კი გასულიყო მას შემდეგ და რამდენი ცვლილება მოხდა ამ ცოტა ხანში! სადღა იყვნენ მაშინ განთქმულნი ბულიე, ლაფაიეტი, მეფე ლუი XVI, დედოფალი, თავადი არტუა, ჟირონდელეები?.. მომაგონდა მაშინდელი ჩვენი ჩასვლა ნანსში, პატარ-პატარა, სისხლით სავსე ქუჩები; დაჭრილი და დაპატიმრებული ხალხი, რომლებსაც ბუზივით ჟლეტდნენ გამარჯვებული ბულიე და მისი მომხრენი; მკვდრებით დატვირთული ურმები ახალ ხიდზედ; შეშინებული, იმედმიხილი ხალხი, მოქალაქენი, ხელოსნები, ჯარისკაცები, ქალები და ბავშვები; ჩემი ძმის ნიკოლოზის საშინელი სისულელე და გულჭკაობა... დედაბოძიანად გამოიცვალა ჩვენი ქვეყანა: ახლა ხალხის ხელთ იყო ძალა და დიდებულების ღალატი და მტრობა უფრო ამაგრებდა მის გულში თავისუფლების სიყვარულს.

ხომ ორი წლის საქმე იყო და ისე მაგონდებოდა ეს ყველაფერი, თითქო დიდი ხნის ამბები ყოფილიყოს. გამიტაცეს ფიქრებმა, სრულიად გადამავიწყდა დედაბერი. ის კი ისევ მწარედ ქვითინებდა — ღმერთო, შენ იყავ ჩემი შემწეო!

შვიდი საათი იყო, როდესაც ნანსში შევედით და ერთ ღუქანში ჩამოვხტით. დედაბერს ვუთხარი, თან გამომყოლოდა. ღუქანი სავსე იყო ხალხით — მეურმეებით, მოქალაქეებით, ვაჭრებით; სვამდნენ, სჭამდნენ, ჩიბუხს ეწეოდნენ და ხმამაღლა ლაპარაკობდნენ თავ-თავიანთ საქმეებზედ. პური და ყველი მოუბატანინე, ცოტა ღვინო და საწერ-კალამი. დედაბერს ვუთხარ, დაბრძანდი და შენაყრდი, გულს ნუ გაიტეხ, იქნება კარგად გათავდეს შენი საქმე-მეთქი; და მანამ ის პურს ვიახლებოდათ, მე პატარა წერილი მივწერე შოველს,

რომელშიაც მოკლედ ავუწერე მაინცის გარშემორტყმა პრუსიელ-ბისაგან, ქალაქის დანებება, ჩვენი ჯარების გამოსვლა, ჩემი ფალს-ბურგს ასვლა და მამაჩემის და მარგალიტას ნახვა; ბოლოს საწყალო დედაბერის ამბავი ავუწერე და ვთხოვე, თქვენებურად გულკეთილად მიიღეთ ეს უბედური და, რაც კი შეგეძლოთ, საქმით თუ რჩევით, ყოველივე ღონისძიება იხმარეთ, რომ უშველოთ რამე-მეთქი.

გავათავე წერილი, დავკეცე, დავბეჭდე და მისამართი დაწავერი: „ბულუას ქუჩა, № 11“. დავარიგე, მიხვიდე თუ არა პარიზს, მაშინვე შოველი მოსძებნე და ეს წერილი მიუტანე; ისიც იცოდე, რომ შოველი ძალიან კარგად მიგიღებს და, რადგან გერმანულს ისე ლაპარაკობს, როგორც ფრანგულს, დაწვრილებით უამბობ შენს უბედურებას და ის უთუოდ დაგეხმარება და გიშველის რასმე. იმისთანა მადლობა გადამიხადა საბრალომ, თითქო უკვე გამეთავისუფლებინოს ციხიდან მისი შვილი.

დანახარჯი გადავიხადე, გამოვეთხოვე დედაბერს და ჩვენი ბატალიონისაკენ წავედი. ქალაქი სავსე იყო ჯარებით და რადგან ჯარების ბინაზე ველარ ვეტეოდით, მოქალაქეებთან დაეყენებით ჯარისკაცები. მართალი უნდა მოგახსენოთ, ეტყობოდათ, არაფრად მოსწონდათ ჩვენი სტუმრობა. ჯარში მყოფ კომისრებს საერო კრებთს წინაშე დაებზღებინათ მდ. მოზელზედ მდგომი ჯარების გენერლები და კონვენტის ბრძანებით უკვე დაეპატიმრებინათ ორი მათგანი. გაზეთებში მარტო მაინცის დანებებას და ჩვენი ჯარის ვითომდა სამარცხვინო სიმხდალესლა სწერდნენ. ხმა დადიოდა, უფროსებს გამოუცვლიან და ვანდელებთან საბრძოლველად გაგზავნიანო.

აი, რა ამბები დამხვდა, ბინაზედ რომ მივედი. ყველანი შეწუხებულნი და დაღვრემილნი დამიხვდნენ. ან რა გექონდა სამხიარულო? განა მეტიდა უბედურება იქნება, კაცს სიმხდალეს და სამშობლოს ღალატსა სწამებდნენ! ისე იყვნენ შეწუხებულნი ივანე სომი, მარკოზ დივე და თვით ჩვენი მენაღარე, რომ წვეთი სისხლი არ გამოუვიდოდათ, ყელი რომ გამოგეჭრათ.

საწყენი ის კი არ იყო, რომ ცილსა გვწამებდნენ, საწყენი და გულსაკლავი ის იყო, რომ ღალატს სწორედ ის ხალხი გვებრალებდა, რომლის გულისთვისაც ისეთი თავგანწირულებით ვიბრძოდით. პარიზელი შეთქმულები ჩვენთან ერთად იდგნენ და სულ მარატის მოკვლაზე ლაპარაკობდნენ*. კრებას კრებაზედ მართავდნენ

* კუსტენის შემდეგ დედოფალი მარიამ-ანტუანეტა მოკლეს გილიოტინით, მერე 21 ყირონდელი დეპუტატი და მათ შორის ბრისსო და ვერნიო. ყველანი

და კონვენტს სთხოვდნენ, ყველა ჟირონდელებს თავები დააყრევინეთ, რადგან მარატის მკვლელი შარლოტ კორდე ჟირონდელები-საგან იყო გამოგზავნილი დანტონის, რობესპიერის და „ხალხის ერთგულის“, ესე იგი, მარატის მოსაკლავად. ჩემი და ელისაბედი და მარესკო სულ სისხლისძიებას გაიძახოდნენ. ჯარში საშინელი მღელვარება იყო და სწორედ ამ საშინელ დროს მოვიდა პარიზიდან ჩვენი კომისარი მერლენ ტიონვილელი და სასიხარულო ამბავი მოგვიტანა: კონვენტს დაწვრილებით აეუწერე მაინციის საქმე და დავარწმუნე, რომ ჩვენი ჯარი და გენერლები მოღალატენი კი არა, საუკეთესო და თავგანწირული მამულიშვილნი არიან; დაქერილი ჩვენი გენერლები უკვე გაათავისუფლეს და მაინცელ ჯარს მადლობა გამოუტყბადეს სამშობლოსადმი ერთგული სამსახურისათვისო. ისე გაგვიტაცა ამ ამბავმა, რომ ყველაფერი დაგვავიწყდა და მთელი ჯარი ერთხმად იძახდა: კონვენტს გაუმარჯოს! თავისუფალ ერს გაუმარჯოს! რაკი გაიგეს მოქალაქეებმა ჩვენი გამართლება, ძველებურად ძმურად მიგვიღეს თავიანთ ოჯახში და ისე გაგვიმასპინძლდნენ, რომ უკეთესი აღარ შეიძლება.

დადგა 10 მარიაშობისთვე, დღესასწაული საფრანგეთის რეს-

ვაკაცურად, მარსელურის სიმღერით, მიეგებნენ სიკვდილს. ერთმა მათგანმა, ვალიზემ, თვით სამსჯავროში მოიკლა ხანჯლით თავი, როდესაც მსაჯულებმა სიკვდილით დასჯა გამოუტყბადეს. ერთი კვირის შემდეგ როლანის ცოლს მოსპრეს თავი. ამბობენ, ვიდრე თავს შეუშვერდა ჯალათს, იქვე ვილიოტინის ახლოს ამართულ თავისუფლების ძეგლს გადახედა და თქვა: „ოჰ, თავისუფლება! რამდენ უსამართლობას ჩადიან შენი სახელით!“ იმ დროს როლანი გაქცეული იყო და გზაში, თავისი ცოლის მოკვლა რომ გაიგო, თითონაც თავი მოიკლა. მერე სხვა ჟირონდელები ხოცეს და სხვათა შორის ბაილი, ბარნაეი, რაბო დესენტეტიენი და თვით მეფის ძმა ფილიპე, თანასწორად წოდებული. მართალია მეფე ლუი XVI რომ ასამართლებდნენ, ხმამაღლა გამოაცხადა საერო კრებაზედ „სიკვდილით იქმნას დასჯილიო მართალია, თავის კარებზედ განცხადება გააკრევიან: ვინც ბატონიშვილობით, ან უდიდებულესობით მახსენებს, ჯარიმას გადაეხადევიანებ ღარიბთა სისარგებლოდო; მაგრამ დიუმურისე ღალატში ისიც გარის და მის შვილის საზღვარგარეთ გაქცევის შემდეგ, ისიც დაიჭირეს და მოკლეს.

ვინც მოასწრო, გაიქცა. დაერივნენ პარიზიდან გაქცეული ჟირონდელები საფრანგეთს და პარიზისა და მთიულების წინააღმდეგ დაიწყეს ჯარების შეკრება და ხალხის აშლა; მაგრამ ყველგან დამარცხდნენ და მით უფრო სასტიკად იქნენ დასჯილი. ცოცხალი აღარაინი გადარჩენილა. თითქმის ყველანი დაიჭირეს, ვინც მიიშალა, შიმშილით მოკვდა; პეტრიონი მგლებისაგან შექმული იპოვეს.

აზოდენა. უბედურება და სისხლის ღვრა უფრო მარატს ბრალდებოდა და სწორედ მარატის მოკვლა განიზრახა ერთმა ყმაწვილმა ქალმა შარლოტ კორდემ. კორდე ჟირონდელების მომხრე იყო და ჟირონდელების ხოცვას და საფრანგეთის ყოველ უბედურებას მარატს აბრალებდა, რომელიც მთიულთა მოთავედ მიაჩნდა. საფრანგეთს მოსვენება უჭირსო, იძახდა; ერთის სიკვდილზედ არის

პუბლიკისა. სამხედრო მოედანზე სამშობლოს საკურთხეველი ააგეს, მშვენივრად მორთეს მწვანით და ომში ნაშოვნნი ღროშებით და იარაღით და ზედ შუაზე გონების ღმერთი ამართეს. ისეთი ღიღებული სანახავი იყო, რომ ჩემს დღეში იმის დარი არა მინახავს რა. ბევრი კარგი სიტყვა გაისმა მაშინ სამშობლოს საკურთხეველიდან ძმობის, ერთობის და თავისუფლების სიკეთეზედ. მერმე, რაც კი ჩვენს ჯარში შემუსიკენი იყვნენ, ერთხმად დააგრიალეს მარსელური და დაიძრა პროცესია; წინ მოზარდი თაობა მიგვიძლოდა, მამულის ბურჯი და იმედი; მერე ხალხი, მერე ჯარი; მთელი ქალაქი შემოვიარეთ სიმღერით და სიხარულით, და ბოლოს ისევ სამხედრო მოედანზედ გავედით. იქ მოქალაქეებს უკვე გაეშალათ სუფრა მიწვეული ჯარისთვის და, ღვთის წყალობა გაქვთ, იმათ ინანეს, იმ დღეს რომ ჭორებს აპყვნენ და სამშობლოს ღალატი დაგვწამეს. იმისთანა ბედნიერი დღე ორი არ გაუთენდება ადამიანს და ისე ჩამრჩა გულში მაშინდელი მხიარულება, თითქო სამ დღეს არ გაუვლია მას აქეთაო.

უწინ თუ ღმერთსა ვლოცულობდით, რომელიც საიქიოს გაცხრომას გვპირდებოდა და სააქაოს კი ჯოჯოხეთური ტანჯვით გვა-

დამოკიდებული მრავალთა სიცოცხლეო. დედა არა ჰყავდა; მის მამას თავის წიგნების გარდა არა აგონდებოდა რა და რადგან მეორე ცოლი შეერთო, შარლოტ კორდე მამიდასთან ცხოვრობდა და მთელს თავის დროს ფილოსოფოსების თხზულებათა კითხვას ანდომებდა. ერთხელ თვალცრემლიანი ნახა მამიდამ და რომ ჰკითხა: რას სტირიო? უპასუხა: „საფრანგეთს ვტირი... ვერავინ იტყვის ხვალაც ცოცხალი ვიქნებო, ვიდრე მარატი ცოცხალია“.

თავისი წიგნები ნაცნობებს დაუბრუნა, გარდა პლუტარხისა, რომელიც თან წაიღო პარიზს. მარატი ავად იყო და საერო კრებას არ ესწრებოდა. 13 ივლისს, საღამოს მარატთან სახლში მივიდა და კარი დაარაკუნა. მარატი პატარა ოთახში იწვა, ის იყო ებნანა და ზეწარში იყო გახვეული. უბრძანა შემოიყვანეთო. — ამას წინადა გწერდით, — უთხრა ქალმა, რომ ნორმანდიის ამბებს მოგახსენებდით, აი, აქ გახლავართ და, თუ მოისმენთ... — დამისახელებთ, ვინ არიან იქ ერონდელეები — ჰკითხა მარატმა — ქალი უსახელებდა, მარატი სწერდა. როდესაც ყველანი ჩაწერა, უთხრა: — ძალიან კარგი, დღეისწორს ყველანი გილიოტი-ნაზედ ავლენ!

ამ სიტყვებით აღშფოთებულმა ქალმა იძრო დანა და შიგ გულში ჩაურჭო მარატს. ერთი კი დაიყვირა და სული დალია.

შარლოტ კორდეს თავი ვაგდებინეს. სიკვდილის წინ მამას წიგნი მისწერა და, სხვათა შორის, გამოჩენილი კორნელის ლექსი განუშეორა: „კაცს საქციელი შეარცხვენ და არა სახარხო ბელაო“.

მარატი 16 ივლისს დასაფლავდა კორდელიერების კვლების ბაღში. მის ძეგლზედ ეწერა: „აქ განისვენებს მარატი, ხალხის ერთგული, მოკლული ხალხის მტერთაგან 13 ივლისს 1793“. გამოჩენილმა მხატვარმა დავიდმა დიდი სურათი დახატა „მოკვლა ხალხის ერთგულისა“, რომლის ქვეშ შემდეგი სიტყვები ეწერა: „მ ო ჰ კ ლ ე ს, რ ა დ გ ა ნ ვ ე რ გ ა რ ყ ვ ნ ე ს“

წამებდა, ახლა სამშობლოს საკურთხეველზედ მის ალაგას ადამიანის გონებალა იყო აღმართული და მას ვაქებლით და ვადიდებლით; სისხლით გაუმადლარ ღვთის წილ ეხლა ძმობას ვუგალობლით, ერთმანეთის სიყვარულს, სიმართლეს და თავისუფლებას. ბერები და ეპისკოპოსები ისე ცდილობდნენ ხალხის გონების დაჩლუნგებას და დამონაგებას, — ღმერთს ასე უნდაო, — რომ განთავისუფლებულმა ხალხმა ღვთის ნაცვლად გამარჯვებული გონება ამართა; ოღონდ სალოცავად კი არა, თავის სადიდებლად. გონების ღმერთის აქეთ-იქით ვოლტერის და ჟან-ჟაკ რუსოს სურათები იყო დასვენებული სამშობლოს საკურთხეველზედ და, თუნდა ჩამაქვაოთ, მაინც არ დავიშლი ჩემსას, მე ვოლტერი და ჟან-ჟაკი მირჩენია ვილაყა წმინდა ტიმოთეს და თეოკტისტეს. ვიცი, ბევრნი იუკადრისებენ ჩემს სიტყვას, ბევრნი დამემღურებიან, მაგრამ რა გაეწყობა, ძალიან ვწუხვარ... იმათ სამღურავს კი არა, ძალიან ვწუხვარ, რომ ეს ვერ შეუგნიათ და ყოველ თავიანთ უბედურებას ღმერთს აბრალევენ, — ალბად ღვთის განგება არისო. ღვთის განგება ხალხის მატყუარა ბერების მოგონილია: მაშ რით დემონავებიან ხალხი, თუ არა საიქიოს დაპირებით? ვინც აქ მეტს იტანჯება ჩვენს სასიამოვნოდ, იქ დაიმკვიდრებს სასუფეველსა ღვთისასაო. რატომ არა ფიქრობენ ჩემი მოკამათენი, რომ მართლა რომ სწამდეთ, ბერები თითონაც მოინდომებენ სასუფეველსა ღვთისასა და ამ ქვეყანას განცხრომისა და ქეიფის ნაცვლად ტანჯვითა და წვალებით გავლიან! მაგრამ ხომ მოგეხსენებათ, კაცია და გუნებაო; ეს უთანხმოება არას დაგვიშლის და როგორც ძმები ვყოფილვართ, ისევე ძმები ვიქნებით შემდეგშიაც. ჭეშმარიტებას ძალად ვერავის შეაგნებინებთ.

სამი დღე გასტანა რესპუბლიკის დღესასწაულმა და მას შემდეგ, როდესაც ორლენისკენ გავემგზავრენით, დიდი და პატარა ქალაქგარეთ გამოვიდა ჩვენს გასაცილებლად, ნამდვილი ძმობა დამყარებულიყო ხალხსა და ჯარს შორის და ისე გვეთხოვებოდნენ ქალები და ბავშვები, თითქო ღვიძლ შვილებს ან ძმებს ისტუმრებენ საომრადო. პატარა ბიჭები წინ მიუძღოდნენ ჩვენს ბატალიონს და, ვისაც შეეძლო, ჩვენი თოფები მიჰქონდათ.

ბარგის საზიდავად სოფლიდან სოფლამდე ურმები გამოჰყავდათ და, რასაკვირველია, დიდხანს მოვუნდებოდით სიარულს. ჯარი ფეხით მიდიოდა და მარტო აფიცრებს ჰქონდათ ეტლები. მშვენიერი დარები იდგა. გახშირებული მკა იყო, რადგან დამშეული იყო ქვეყანა და ყველა ეშურებოდა მკას და ლეწვას. ამ გზისა მარტო ის მახსოვს, რომ საცა კი ინგლისელს მოასწრებდნენ, მაშინვე დაიჭერ-

დნენ და ბარგსა და ბინას გაუჩხრეკდნენ, პიტისაგან გამოგზავნილი ჯაშუში იქნებო.

საკვირველი ის იყო, რომ რაც უფრო და უფრო შევერით საფრანგეთს, მით უფრო ავი თვალთ გვიყურებდა ხალხი. სამშობლოს სიყვარული ლორენში იყო, საზღვარზედ, და ჩვენი ქვეყნის შუაგულისკენ კი მეტად და მეტად კლებულობდა. შევიდოდი სადმე სოფელში და სწორედ ჯვარს გვაცვამდნენ, მანამ პურსა და რამე საქმელს მოგვიტანდნენ. ჩვენდა საუბედუროდ, ჯამაგირი არ გვეძლეოდა და ყიდვა არაფრისა შეგვეძლო. ჩვენი წინამძღოლი ჟორდი რომ არა ყოფილიყო, რომელიც გვამშვიდებდა და გვამხნეებდა, — ნუ, ბიჭებო, ნუ გაბრაზდებით! მთელი ქვეყანა თქვენ შემოგტყუროს! ხომ იცით, თქვენზე არის დამოკიდებული სამშობლოს თავისუფლებაო! — სწორედ რომ ცემას დაუწყებდით იმ უმსგავსოებს! ჩვენ იმათთვის სიცოცხლესაც არა ვზოგავდით და ისინი კი, შეშარა არის, შეშას არ გვაძლევდნენ! კალოზედ არ მიგვიშვებდნენ ხოლმე დასაძინებლად! რომ გავჩუმებულიყავით, საღორეში შეგვრეკავდნენ და პურის ნაცვლად ქატოს მოგვიზელდნენ.

და წარმოიდგინეთ, როგორ გვესიამოვნებოდა, როდესაც ორლენს რომ მივედით, წინ გამოგვეგება ორლენელი მამასახლისი თავისი ნაცვლებით და ხალხით. გვეგონა, ჩვენს ქვეყანაში ფრანგი ადარსად არისო და სრულიად მოულოდნელად საუკეთესო პატრიოტები და რესპუბლიკელები ვპოვეთ შიგ შუაგულ საფრანგეთში. დიდი ამბით შევედით ქალაქში. ქალებს, ლამაზ, კეკლუც ქალებს, ყვავილები და თაიგულები გამოეტანათ და ფეხქვეშ გვიფენდნენ. დაგვეხვივნენ მოქალაქენი — ქალი და კაცი — და ისე დაგვიტაცეს, ორ-ორი და სამ-სამი, თითქო უბრალო ჯარისკაცები კი არა, ნობათი ვყოფილიყავით რამე.

— დიდება თქვენდა, ორლენელნო! — იძახდა ჟორდი. — დიდი ზანია საფრანგეთში ვართ, მაგრამ თქვენებრ პატრიოტულად არავინ დაგვხვედრია!

ჟორდომ მშვენიერი, გრძნობით სავსე, სიტყვით გადაუხადა მადლობა.

— ორლენელებს გაუმარჯოს! — შესძახა ჯარმა.

— მაინცელ ჯარს გაუმარჯოს! — გვიპასუხა ხალხმა.

მართალია, ნანსელებიც კარგად მოგვეტყვნენ, როდესაც პარიზიდან ტიონვილელი დაბრუნდა და ჩვენი გამართლების ამბავი მოიტანა; მაგრამ ორლენელებმა მეტისმეტი სიყვარულით მივიღეს და ნანსიც დაგვაფიწყეს და ნანსელებიც.

კარგა ხანი დავრჩით ორლენაში, რადგან ბრძანება მივიღეთ: შე-

ჩერდით და ჯარი ჯარის კვალობაზედ გააწყეთო. ჩვენი ბატალიონი და პარიზელი შეთქმულები ერთ ბრიგადაში მოგვაქციეს. კარგა ხანი იყო, რაც ათისთავობა მომცეს და ახლა მე, მარკოზ დივეს და ჩვენს ივანე სომს ზარბაზნები ჩაგვაბარეს. მაინცის სიმაგრეებში ისე შევეჩვიეთ ზარბაზნის სროლას და ხმარებას, რომ აღარა გავგიჟირდებოდა რა და მით უფრო სიამოვნებით შევუდექით ახალ თანამდებობას, რომ სამივენი ერთად ვრჩებოდით. გარდა ამისა ჩემი და ლიზაც ჩვენს ბრიგადაში იქნებოდა და ყოველ დღე შემეძლებოდა პატარა კასიუსის ნახვა და ალერსი. უნდა გენახათ, რა კარგი, ბუთბუზა ბიჭი იყო. დამინახავდა თუ არა, მაშინვე სიცილს დამიწყებდა და ხელების ქნევას. მთელი ბატალიონის საყვარელი და ნებიერი იყო და ისე უაღერსებდნენ ყველანი, თითქო მარესკოს შვილი კი არა, ყველას შვილი ყოფილიყოს. ლიზაც ძალიან კმაყოფილი იყო, რომ ერთად ვრჩებოდით.

ეს ამბები მარიამობისთვეში იყო.

ჯერ ისევ ორლენაში ვიყავით, რომ კუსტენის სიკვდილი გავიგეთ; კონვენტს დამნაშავედ ეცნა გენერალი კუსტენი, რომელსაც პრუსიელებთან და ჟირონდელებთან საიდუმლო მიწერ-მოწერა პბრალდებოდა; გარდა ამისა კუსტენს იმაშიც ამტყუნებდნენ, რომ მიუხედავად საერო კრების ბრძანებისა, მან სრულიად უმწეოდ მიატოვა მაინცელი ჯარები და მტერს ვალანსიენი ააღებინა. დიად, კონვენტს დამნაშავედ ეცნა გენერალი კუსტენი და სიკვდილით დასჯა მიესაჯა. მის ნაცვლად გენერალად ჩვენი ძველი ნაცნობი ჰუმარი დაენიშნა.

დიდი შთაბეჭდილება მოახდინა ამ ამბავმა ყველაზედ და მეტადრე აფიცრებზე; მაშინ დარწმუნდნენ ჩვენი წინამძღოლები, რომ ქვეყნის მფარველი კომიტეტი აღარ ხუმრობდა და თვით გამოჩენილ გენერლებსაც კი თავსა ჰკვეთდა. კიდევ ბევრი ამბავი გავიგეთ ორლენაში: ტულონელებს ინგლისელებისათვის დაუნებებიათ თავიანთი ქალაქი არსენალით და ხომალდებითო; მინისტრს კამბონს ბრძანება გაუცია, რომ ანუსხულ იქმნას და დაბეჭდილი რესპუბლიკის ყველა ვალებიო; კონვენტი, მიუხედავად საშინელი მდგომარეობისა, რომელშიც საფრანგეთი იმყოფება, ახალი კანონების შექმნას შეუდგა, რომ განწყობულ იქნან ფრანგთა პიროვნული და ქონებრივი უფლებანი და ვალდებულებანი ურთიერთ შორისაო... უკანასკნელმა ძალიან გვასიამოვნა, რადგან ყველანი ვგრძნობდით, რომ ეს რესპუბლიკური კანონმდებლობა საუკუნოდ დარჩებოდა კონვენტის უადრეს და დიდებულ სახსოვრად.

რამდენიმე დღის შემდეგ გზას გავუდექით გენერალ კლებერის

წინამძღოლობით. სიცხე, მტვერი, დაგლეჯილი ტანისამოსი და ფეხსაცმელი; უმრავლესობა სულაც ფეხშიშველი... კლებერი რომ არა ყოფილიყო, იქნებ აჯანყებულები იყვნენ. საშინელი სასტიკი კაცი იყო და სასტიკად გვეპყრობოდა ყველას, მაგრამ ამასთან საკვირველი მართალი კაცი იყო და სულ იმის ზრუნვაში იყო, რომ ჯარისკაცი მშვიდი და მწყურვალი არ დარჩენოდა. ისე გვივლიდა ყველას, რომ სხვა თავის შვილებს არ მოუვლის. რაკი შეატყობდა, რომ რომელიმე მამასახლისი კარგად არ ირჯება და საკმარისი ხორავი არ მოაქვს ჯარისთვის, ისე შეუტევედა ხოლმე თავისი რიხიანი ხმით, რომ სულ მწყურებს დაუფრთხობდა; ხშირად დაყვირებაც არ დასჭირდებოდა: ერთი კი გადაეხედა და მაშინვე აგრძნობინებდა, რომ გაუჩინელს გააჩენინებდა და ჯარს კი არ დაამშვენიებდა. ტანისამოსი რომ გვექონოდა, სხვა აღარა გვიჭირდა რა კლებერის ხელში. სადაც კი გავჩერდებოდით ღამე ბანაკად, იმისთანა მხიარული სიმღერა და ხუმრობა ისმოდა, თითქო სასიეროდ წამოსულა ჯარიო. მაგრამ როგორც კი დაიძროდა ჯარი, სრულიად გამოიცვლებოდა კლებერი და ისე სასტიკად გვექცეოდა ყველას, რომ ჩვენი სამსახურის გარდა აღარას ვფიქრობდით და სულ იმის შიშში ვიყავით, არსად მოგვასწროს, თორემ ძვირად დაგვისვამს სულ უბრალო შეცდომასაო. ნამდვილი გენერალი იყო: სამსახურში სასტიკი და მრისხანე, სამსახურის გარეშე — კეთილი და ტკბილი, ომში მარჯვე და გამბედავი.

ჯარები სომურში შეიკრიბნენ. იქვე იმყოფებოდნენ ხუთი კომისარი, გარდა ტიონვილელისა, მრავალი ოფიცერი და გენერალი, რომელიც პარიზიდან „უნიფორმებს“ * მოჰყოლოდნენ. უნიფორმების ძაგება არ მინდა, ღმერთმა ხომ იცის, მაგრამ მართალი როგორ არა ვთქვა? პარიზმა იმოდენი ხალხი მოგვაშველა ყველა მებრძოლ ჯარებს, რომ ხეირიანი აღარავინ დარჩა; ვანდელებთან საბრძოლველად მოსულები კი მარტო ფულის გულისთვის ჩაწერილიყვნენ ჯარში; ფული აედოთ, იქვე შეეჭამათ და ახლა ჩვენთან მყოფთ ჩვენი აღარა მოსწონდათ რა და, გავარდებოდა თუ არა ბრძოლის ველზედ თოფი, იარაღს ჰყრიდნენ და გარბოდნენ:

— არიქათ, გვიღალატესო!

პარიზელები ჩვენც გვერივნენ, შეთქმულები, მაგრამ გაქცევას თავის დღეში არ იკადრებდნენ. რაც უნდა ცხარე ბრძოლა ყოფი-

* 1793 წ. მდიდრები რევოლუციის მომზარებებს „უნიფორმებს“ ეძახდნენ. ბოდიშს ვიხდით მკითხველთან, რომ ამ სიტყვას ვხმარობთ, მაგრამ ისტორიულ სიმართლე მოითხოვს ამას და თვით სიტყვაც Sans-Culotte ა, რომელიც უნიფორმის ნიშნავს.

ლიყო, ვაჟკაცურად იბრძოდნენ და უკანასკნელ სისხლის წვეთამდე ეკვეთებოდნენ მტერს. ეს ახალი მოსულები კი ყვირილისა და ლაპარაკის მეტს არას არიგებდნენ; ამასთან საშინელი ზარმაცები და უსაქმურები იყვნენ და მთელ დღეს უფროსების ლანძღვაში და განკიცხვაში ატარებდნენ.

სომური კარგი გამაგრებული ქალაქია. ჩვენ რომ მივედით, ყველა ბინები სავსე იყო ჯარებით და ჩვენ მოქალაქეებთან დაგვბინავეს. მივედით და აირია ყველაფერი: არც ის ვიცოდით, საით გაგვგზავნიდნენ იქიდან, არც ის ვიცოდით, ვინ იქნებოდა ჩვენი წინამძღოლი. ზოგი ამბობდა, გენერალი კანკლო იქნება, რომელმაც ამ ხუთი თვის წინათ უკვე დაამარცხა ვანდლები; ზოგი ამბობდა, როსინიოლიო, პარიზელი მესაათე, რომლისთვისაც გენერლობა მიეცათ. კანკლო და როსინიოლი უფროსი გენერლები იყვნენ და ჩვენი გენერლები, თვით კლებერიც კი, უმცროსნი. ზოგი კიდევ იმას ამბობდა, რომ ჩვენი გენერალი პარიზელი მელუდე სანტერი იქნებოდა, და წარმოიდგინეთ, როგორ აღაშფოთებდა ჩვენს ჯარს ეს ხმები.

ბოლოს, რამდენიმე დღის შემდეგ გამოგვიცხადეს, რომ მაინცელი ჯარების წინამძღოლად გენერალი კანკლო იქმნა დანიშნული. კლებერი მის თანაშემწედ დანიშნეს და აიყარა კიდევ ჩვენი ჯარი. იმისთანა სიხარული იდგა, თითქო ერთიანად მეტ მტერზედ გავიმარჯვეთო. ან როგორ არ გაგვხარებოდა, რომ წინამძღოლად ნამდვილი გენერალი დაგვინიშნეს და არა ვიღაც მელუდე და მესაათე. საუბედუროდ, კანკლო უწინდელი, მეფე ლუის დროინდელი, გენერალი იყო, ძველებური ჩვეულებებით გატაცებული და თუმცა არ უღალატნია, მაგრამ ისე მოიყვანა საქმე, რომ... მაგრამ ნუ აჩქარდებით: აჩქარებას შეცდომის და უბედურობის მეტი არა მოაქვს რა. ეხლა მარტო იმას მოგახსენებთ, რომ კარგი მხედართმთავარი თავის დღეში არ დააქუცმაცებს თავის ჯარს და მით თავის ძალას არ შეასუსტებს.

მივდიოდით და თან ათასი ფიქრი გვერეოდა; გვაგონდებოდა შიდა საფრანგეთის ხალხის შეუფენებლობა, მრავლის მრავალი ღალატი, ჩვენი ჯარების დამარცხება, ყოველი მხრიდან მტრის მოახლოება და გულს გვიტეხდა. კიდევ კარგი, რომ ჩვენსავით გულს არ იტეხდნენ მთიულნი და ტალი კლდესავით ებრძოდნენ ამოდენა უბედურებას.

ანჟერში წავიკითხეთ საერო კრების ბრძანება, რომლითაც ქუდზედ კაცი უნდა გასულიყო მტრების გასანადგურებლად. ამ ბრძანებას თავიდან ბოლომდე ამოგიწერთ, რომ უფრო კარგად წარმოიდგინოთ ჩვენი აღტაცება. მერწმუნეთ, ვერც ერთი ერის ისტორიაში ვერ

ნახავთ ისე მდგარად და მკაფიოდ გამოთქმულს სიყვარულს თავისუფლებისას, როგორც ეს იყო ამ ბრძანებაში. წაიკითხეთ იგი და დარწმუნდით, რომ მისი გამოთქმა მარტო თავისუფალს, სამარადისო უძლეველი სიმართლით აღჭურვილს ხალხს შეეძლო. მეფეს კი არა, მეფეთ მეფესაც არ შეუძლია ამგვარი ბრძანება და მარტო რესპუბლიკას, ერის თვითმბრძანებლობას და თვითმართებლობას შეშვენიას მისი აღმაფართოვანებელი რიხიანი სიტყვა.

ბრძანება ანჟერში წაგვიკითხეს დიდებულ ეკლესიის მოედანზე. ხალხით სავსე იყო იქაურობა და როდესაც გაათავა გენერალმა ფლავინიმ მის კითხვა, ერთად იგრიალა ჯარმა და ხალხმა: რესპუბლიკას გაუმარჯოს!... გამარჯვება ან სიკვდილი!... იმისთანა ალტაცებული იყო ხალხი, რომ ჩვენ აღარც კი გვაცდიდა და თითონ მიიწვედა საბრძოლველად. ზოგს დაქანგებული ხმალი გამოჰქონდა, ზოგს ჩაქმხმომტვრეული თოფი და ზოგს ცული და ხელეჩო. გარშემო სოფლებიდან ხალხი ჩამოსულიყო და ისე ათამაშებდნენ ნამგლებს, თითქო მამითაღში მიემზადებიანო.

აი, თვით ბრძანებაც:

„იმ დრომდე, ვიდრე მტერი განდევნილ იქნება საფრანგეთიდან, ყოველი ფრანგი, ქუდზედ კაცო, ჯარში მყოფად და მოსამსახურედ იქნება ჩარიცხული. ყმაწვილკაცობა მტერთან საბრძოლველად გავა; ცოლშვილიანნი იარაღის და სურსათის მზადებას და ბარგის ზიდვას შეუდგებიან; ქალები — საკერავს და ავადმყოფების მოვლას; ბავშვები — დაქირალთათვის ტილოს ძენძვას და მოხუცებულნი — მოედანზედ და ეკლესიებში ხალხის ჩაგონებას, მეომართა გამხნეებას, რესპუბლიკის სიყვარულის და მეფეთა სიძულვილის დამყარებას. ყოველი საერო შენობა ჯარის ბინად იქნება დადებული და მოედნები — იარაღის საწყობად და საკეთებლად.

თოფი მარტოდ-მარტო მტერზედ გასულთ მიეცემათ; შინ მყოფთ — პოლიციელთ და ქანდარმებს — სანადირო თოფებილა ექნებათ. საჯდომი ცხენები ცხენოსან ჯარათათვის იქნება გაყვანილი; მუშა ცხენები — ზარბაზნებისთვის. ქვეყნის მფარველმა კომიტეტმა კისრად იღვა მტერთან საბრძოლველად გასულ საფრანგეთის შვილთათვის საჭირო იარაღის დაუყოვნებლივ შემზადება და დარიგება; განსახორციელებლად ამისა ქვეყნის მფარველ კომიტეტს უფლება ეძლევა დააარსოს ყოველგვარი ქარხანა და ამუშავოს ყოველი ფრანგი, რომელმაც საჭირო ხელობა იცის; იარაღის შესამზადებლად სამხედრო მინისტრს ნება ეძლევა 80 მილიონი დახარჯოს იმ 498 მილიონ-

დან, რომელიც განსაცდელისთვის ჰქონდა გადადებული სამ-
შობლოს.

უმთავრესი ქარხანა იარაღის მზადებისა საფრანგეთის დედაქა-
ლაში, პარიზში, იქნება გამართული. კონვენტი საფრანგეთის ყველა
თემებში ამ ბრძანების აღსასრულებლად თავის წარმომადგენლებს
გაგზავნის უსაზღვრო ძალით და უფლებით აღჭურვილთ. ყველა თი-
თონვე შეასრულებს თავის მოვალეობას: სხვის გაგზავნა ჯარში ან
ქარხანაში თავის მაგივრად არავის შეეძლება. თავ-თავიანთ ალაგას
მარტო მოხელენი დარჩებიან; სხვანი კი ყველანი, — ქუღზედ კაცი
გაუა სამშობლოს დასახმარებლად, უცოლონი და უშვილო ქერიენი
18-დან 25 წლამდე პირველნი გავლენ მებრძოლ ჯარში; დაუყო-
ნებლიე ჩავლენ თავთავიანთ მაზრის ქალაქში, ჩარიცხულ იქნებიან
სიებში და სამხედრო ვარჯიშობას დაიწყებენ, ვიდრე ბრძოლის
ველზე წასვლის ბრძანებას მიიღებენ. ერის წარმომადგენელი, რო-
მელთაც მინდობილი ექნებათ ამ ბრძანების ასრულება, ისე განაწე-
სებენ ჯარების მოძრაობას და დანიშნულ ალაგებში შეკრებას, რომ
ყველგან საკმარისი სამზადისი დაახვედრონ საქმელ-სასმელისა, იარა-
ღის და ტანსაცმლისა. ჯარების შესაკრებად ადგილების დანიშვნა
მინდობილი ექნებათ ერის წარმომადგენელთ — გენერლებს და
ქვეყნის მფარველ კომიტეტის წევრებს. ყოველი ბატალიონი, რომე-
ლიც ამის შემდეგ შედგება, მიიღებს დროშას წარწერით: „მ ტ ა რ-
გ ა ლ თ ა ს ა წ ი ნ ა ა ღ მ დ ე გ ო ღ ა შ ლ ი ლ ი . თ ა ვ ი ს უ ფ ა-
ლი ე რ ი“.

იმავე დღეს ისევ გზას გაუდგა ჩვენი ჯარი და ნ ე ნ კ ე ნ ის თ ვ ე ს
ქ. ნ ა ნ ტ შ ი მივედით. ქალაქი დიდი მდინარის პირსა მდებარეობს და
ისე ირევიან შიგ ხომალდები და ნავები, რომ ჩემს განცვიფრებას
საზღვარი აღარ ჰქონდა. მთაში აღზრდილს ჩემს დღეში არა მენახა რა
ასეთი და პირლია შევეცქეროდი ზღვასავით გადაშლილ წყალს და
შიგ მცურავ ხომალდებს. პირველად მაშინა ვნახე მოვაპრე ქალაქის
აუარებელი სიმდიდრე და გამორჩინა: მთელი ქვეყნის სავაჭრო აქეთ
მოდის ზღვით და აქედან კიდევ სხვადასხვა საქონელი გადის. ამო-
დენა აღებ-მიცემას, რასაკვირველია, ძირსაც ბევრი დარჩება.

ქალაქში ჩვენს გარდა ბევრი სხვა ჯარები იყვნენ, მაგრამ მაინც
ძალიან კარგად დაგვიხვდნენ მოქალაქენი და პატრიოტული ღზინი
გავემართეს. ამ მოქალაქეებს უკვე ენახათ ვანდელების სუსხი —
ამ ხუთისთვის წინათ, გენერალი კანკლო რომ არა ყოფილიყო, დე-
დამიწის პირიდან აღგვიდნენ ნანტს ვანდელები — და დიდი და პა-
ტარა, მდიდარი და ღარიბი, ყველანი კმაყოფილნი და გახარებულნი
მოგვეგებნენ. ჩვენმა დაგლეჯილმა ტანისამოსმა ხომ აღტაცებაში

მოიყვანა მოქალაქენი და, რადგან სამხედრო მალაზიები ნანტში იმყოფებოდა, ლხინის შემდეგ თითო წყვილი სრულიად ახალი ჩექმები დაგვირიგეს.

მეორე დღეს, 9 ენკენისთვის, ვანდელებთან საბრძოლველად გავიყვანეს.

ქ. სომურიდან დაწყებული ჩვენი ჯარი უკვე ვანდეში იმყოფებოდა, — თვალგადუწვდენელ ბუჩქნარ-ვაკეში, რომელშიაც არც სადმე ადამიანი ჩანდა, არც შენობა, არც ვენახი. აქა-იქ ბუჩქებიდან ამონავალ კვამლით თუ შეატყობდით ადამიანის ბინას, თორემ სხვაფრივ სრულიად უდაბურსა ჰგავდა ის მხარე. ეტყობოდა ღვთის ანაბარად იყო იქ ყველაფერი მიტოვებული და, რასაც ღმერთი მისცემდა, იმით ცხოვრობდა იქაური ხალხი, თვითონ თავს არაფრისთვის იწუხებდა.

ეს იყო ვანდე — დაბურული, ველური, ადამიანისაგან ხელშეუხებელი ტყე და ბუჩქნარი; შიგ სრულიად გაუხნათლებელი, ნადირობით მცხოვრები ბატონები ცხოვრობდნენ და უფრო გაუხნათლებელი ყმები, რომელნიც თავისთავს გლეხკაცს კი არა, ბატონის ყმას უწოდებდნენ. მოკლედ მოგვკრი, რომ თავი არ შეგაწყინოთ: როგორც ბუნება იყო ადამიანისაგან ხელშეუხლებელი, ისე ადამიანი იყო გაუხნათლებელი და ველური.

გზა არსად იყო; იმისთანა ვიწრო ბილიკები იყო გაყვანილი, რომ უღელი ხარი ვერ გაივლიდა. მივდიოდით და ყოველ წამს იმის შიშში ვიყავით, ბუჩქებში ჩასაფრებული მტერი თოფს გვესვრის და ისევ მიიმალებათ. მივდიოდით და თვალწინ გვედგა, რაც სხვისაგან გაგვეგონა: როგორა ხოცავდნენ ვანდელები პატრიოტებს, და როგორ აწამებდნენ ვანდელი დედაკაცები ტყვეებს. მივდიოდით და თან გულს ვიმაგრებდით:

— ისინი გვესვრიან, ჩვენც ვესვრით! ისინი არ დაგვინდობენ, არც ჩვენ დავინდობთ! რესპუბლიკამ გაიმარჯოს, თორემ ჩვენი სიცოცხლე რა სახსენებელია!

ნანტიდან 9 ენკენისთვის გავედით კანკლოს წინამძღოლობით. ამბობდნენ შვიდი ათასი ვანდელი გამაგრებულა ერთ ტბის პირას სოფელში, და ძალიან კარგადაც არიან შეიარაღებული. ასე გასინჯეთ, ზარბაზანიც კი აქვთო. მტერს ჩვენ უნდა შევბრძოლებოდით და დასაზმარებლად, თუ გავგიჟირდებოდა, უკან ხუთი ათასი კაცი სხვა მოგვდევდა.

მშენიერი დარი იდგა.

გენერალი კლებერი და მერლენ ტიონვილელი ერთად მიდიოდნენ ცხენებით, შიგ შუა ბატალიონში. ყველანი გაფაციცებით ვსინ-

ჯავდით ბუჩქებს, მაგრამ მტერი არსად ჩანდა. მხედრული სიარული ჯარისა შეუძლებელია იყო და ძალაუნებურად სრულიად ურიგოდ გაფანტულნი უნდა შევერედით ჭალას. კლებერმა წინ მსროლელები შეგზავნა მტრის დასახვედრად. არ გასულა დიდი ხანი, ჭალაში სროლა ატყდა. საშინელ ყოფაში ვიყავით: მტერი არსადა ჩანდა, რომ ბრძოლა აგვეტეხა და წინსვლა კი არ შეიძლებოდა, რადგან ყოველი ბუჩქი სიკვდილს გვიქადდა. რამდენიმე კაცი მოგვიკლეს, ცხენები დაგვიჭრეს, მაგრამ რას ვიზამდით? წინ მივიწვედით ნელ-ნელა და უხილავს მტერს თოფს ვესროდით.

მე და ჩემს ამხანაგებს ჯერჯერობით შიში არაფრისა გვექონდა, რადგან უკან ვიყავით და ჩვენამდე ტყვია ვერ მოაწვედა; მაგრამ ეტყობოდა იმ დღეს ბრძოლას გვიპირებდა მტერი და, მამასადამე, ჩვენი ზარბაზნებიც მალე ამღერდებოდნენ.

ერთი საათი მეტი ვიარეთ ასე და თან გაცხარებული სროლა გვექონდა. ბოლოს ტბის პირას გავედით და სოფელი დავინახეთ. დავინახეს თუ არა სოფლის მისივალში, მაშინვე ზარბაზანი გვესროლეს; იქნება უნდოდათ ენახათ, მართლა ისროდა იმათი ზარბაზანი თუ არა? ჩვენს და სოფელს შუა ტბიდან გამოსული მდინარე დიოდა და ისეთი განიერი და ღრმა იყო, რომ ფეხით გასვლა არ შეიძლებოდა, — სამასი ნაბიჯი მაინც ექნებოდა სიგანე. ნაპირი ლერწამით ჰქონდა ამწვანებული და სწორედ ამ ლერწამში ჩამალულიყვნენ ვანდელები და იქიდან გვესროდნენ თოფს.

ცუდად იყო ჩვენი საქმე, მაგრამ კლებერი იმისთანა კაცი არ იყო, რომ ასე ადვილად შეშინებულიყო: თავისი ამალით და მერლენ ტიონგილელის თანდასწრებით დაათვალიერა ჩვენი და მტრის მდებარეობა და საჭირო ბრძანება გასცა. ზარბაზნები სოფლის პირდაპირ დაგვალაგებინა და გვიბრძანა, სოფელს დაუწყეთ სროლა. ზარბაზანს ისინიც გვესროდნენ, მაგრამ ძალიან შორს უმიზნებდნენ და ჩვენს უკან ცვივოდა ყუმბარა. დაუწყეთ სროლა. ჯერ ძალიან მაგრად დაგვიდგნენ, მაგრამ რაკი სოფელს ცეცხლი წაეკიდა, ღვთის წყალობა გაქეთ, ქალებმა კივილი მორთეს და ლოგინის და სხვა ბარგის ზიდვა დაიწყეს. იმავე დროს ორი მხრიდან მიადგა ჩვენი ჯარი სოფელს და შეჰყვირა:

— თავისუფალ ერს გაუმარჯოს!

— ჩვენს მეფეს გაუმარჯოს! — შესძახეს წყალგაღმა ვანდელებმა.

საშინელი სროლა ატყდა. ისე გაშმაგდნენ ვანდელები, რომ ალაო იმალებოდნენ და წყლის პირს მდგომნი პირდაპირ გვესროდნენ. არც ჩვენები ჩამორჩნენ უკან და რამდენიმე კაცი შეცურდა წყალში, მაგ-

რამ ცოცხალი არავინ გადარჩა. მდინარე სისხლისფრად შეიღება. ბოლოს საიდანღაც გაჩნდა რამდენიმე ნავი და ხალხით გაივსო გაღმა გასასვლელად. ყველაზედ უწინ მერლენ ტიონვილელი ჩახტა ნავში და იმისთანა ხმით შესძახა: რესპუბლიკას გაუმარჯოსო, რომ იმ სროლაში ვანდლებიც კი გაიგონებდნენ. იმავე დროს ზარბაზნებაც ქვევით ჩაგვატანინეს, ზედ წყლის პირს და გვიბრძანეს: ხალხს ესროლეთო. მაგრამ სად იყო ხალხი? უმრავლესობა ლერწამში და ჩადუნაში იმალებოდა, ისე, რომ ზარბაზანს ბალახს ვუმიზნებდით. სროლითაც ახლა უფრო უკეთ გვესროდნენ და ასე გასინჯეთ, ორი ზარბაზანიც წაგვიხდინეს. ცოტა ხანი კიდევ და სულაც დაგვბოცდნენ, ვინც ზარბაზნებთან ვიყავით, მაგრამ ამ დროს ჩვენი ცხენოსნები გავიდნენ გაღმა და იერიშით მივიდნენ სასაფლაოზედ, სადაც ჩასაფრებულიყვნენ ვანდლების საუკეთესო მსროლელები. რაკი ნახეს ვანდლებმა, რომ წყალმაც ველარ შეგვაყენა, შესწყვიტეს ბრძოლა და გაიქცნენ.

გადამწვარი, აოხრებული დაგვხვდა სოფელი, მაგრამ მაინც დიდი იყო ჩვენი გამარჯვება, რადგან ამაზედ იყო თურმე დამოკიდებული ვანდლების დამორჩილება.

ის იყო ბრძანება მოგვივიდა, შესწყვიტეთ სროლაო, რომ რაღაცა მომხვდა შიგ გულში და წამაქცია; სამი-ოთხი კიდევ სხვა წაიქცა ჩემთან. ისე მოულოდნელად მოხდა ეს, რომ ჯერ ტკივილი არც კი შეგრძნო და მიკვირდა — რა ვქნა, რა მომივიდა-მეთქი? მერე უცნაოდ შემცივდა, შემაჟრიალა და ცივი ოფლი დამასხა. კიდეც კარგი: რომ გული წამივიდა და ტკივილი აღარ მიგრძენია. გონებაზედ რამდენიმე საათის შემდეგ მოვედი, როდესაც ურმით ნანტიდან ანჟერისკენ გაგვისტუმრეს მრავალი დაჭრილი: ნანტის საავადმყოფოები საესეა და ანჟერს წაიყვანეთო.

გული მიმდიოდა, სუნთქვა მეხშობოდა, პირიდან სისხლი მდიოდა. მოვსულიერდი თუ არა, მაშინვე სისხლი დავინახე და — წასულია-მეთქი ჩემი საქმე, — ვიფიქრე იმედმიხდილმა. არც ჩემი ამხანაგები იყვნენ უკეთეს ყოფაში: ზოგს თავი ჰქონდა შეხვეული, ზოგს მკლავი, ზოგს ფეხი; ყველანი სისხლით იყვნენ მოსვრილნი, ფერმიხდილნი, დაღონებულნი; ზოგნი ბოდავდნენ. მეურმე კი მიერეკებოდა საქონელს და, თითქო დაჭრილი, ტანჯული ადამიანი კი არა, უბრალო, უსულო საპალნე ედოსო, რაღაცას ღიღინებდა.

ამ მგზავრობამ უფრო დამასუსტა, მით უფრო, რომ სისხლიც გამომიშვეს თურმე, გულწასული რომ ვიყავ. თითქმის გონებამიხდილი ვეგდე ურემზე და ხან რა მელანდებოდა და ხან რა: მარგალიტა

წარმომიდგა, შოველი, რესპუბლიკა... კარგად მარტო ის მახსოვდა, რომ გულში სადღაც ყუმბარის ნაჭერი მქონდა და მაწუხებდა. სისხლი რომ გამოემვათ, მკლავი მაგრად შეეხვიათ და ასე მეგონა, მკლავიც დამსხვრეული მაქვს ყუმბარისაგან-მეთქი. ხომ მოგეხსენებათ, კაცს რომ სისხლი დააკლდება, გონებასაც ვეღარ მოიკრებს. ტყუილად კი არ ამბობენ, სისხლი სიცოცხლეაო.

X

კიდევ კარგი, რომ ანჯერის საავადმყოფოში ჩვენი ალაგი აღმოჩნდა და იქიდან სხვაგან აღარსად გაგვგზავნეს, თორემ ჩვენი დაგვემართებოდა. ერთი მოხუცებული ექიმი მოვიდოდა ხოლმე ჩვენს სანახავად ყოველ დილას და თან ყოველთვის ხუთი-ექვსი ყმაწვილი კაცი ახლდა. ისე მქონდა ჩამავებული გული, თითქო ნახშირიაო. დამიწყებდნენ სინჯვას, ხან აქეთ მიმწევდნენ, ხან იქით; ექიმი რაღაცას უხსნიდა თავის მოწათფებს და მე კი ჩემი მემართებოდა. რამდენჯერმე კიდევ გამომიშვეს სისხლი. წამლობამ და კარგმა მოვლამ, ცოტა არ იყოს, მომაკეთა, მეტადრე, როდესაც მადა გამეხსნა და ყოველ სადილ-ვახშმად ხორცსა და ღვინოს მიგზავნიდნენ. ექიმისა რა მოგახსენოთ, და მე კი იმ აზრისა გახლავართ, რომ იმისმა წამლებმა კი არა, წითელმა ღვინომ წამომაყენა ფეხზე. ზიარებასავით მიამა ღვინო და, ის იყო და ის, დღითი დღე უკეთ ვხდებოდი, ისევ რესპუბლიკის საქმეებზედ ვფიქრობდი და სულ იმის ნატვრაში ვიყავ, ნეტავ ჩქარა გამიშვან აქედან, რომ ისევ ჩემს ზარბაზანს მივხედო-მეთქი.

ჩემს გვერდით ერთი მოხუცებული ოფიცერი იწვა; მკლავში იყო ტყვიით დაჭრილი. ძალიან უყვარდა ლაპარაკი და რაკი სიარული შევიძელ და ბაღში ჩასვლის ნება მომცეს, ერთად გავიდოდით ხოლმე ყოველ დღე 9 საათიდან შუადღემდე და, რა ვიცი, რას არა ვლაპარაკობდით. მოხუცებული იყო, სრულიად ჭადარა, მაგრამ იმისთანა მხიარული კაცი იყო და ამასთან იმისთანა მკვიცი და სწორად, რომ სწორედ თოფის წამალივით იფეთქებდა ხოლმე. ვანდებების აჯანყების ამბავი დაწვრილებით იმან მიამბო, რადგან იმავე თავითვე ვანდესი ყოფილიყო და თავიდან ბოლომდე თავისი თვალთ ენახა ყოველი ბრძოლა. ძველებური წესწყობილება რომ გადავარდა, მრავალი ხალხი დარჩა ულუკმაპუროდაო, — მეუბნებოდა ჩემი მოსაუბრე, — და ვისაც კი რესპუბლიკამ წაართვა რამე, ყველანი ვანდესი მოგროვდნენ, რადგან იქ უფრო უფიცი ხალხი ეგულეობდათ და ცდილობდნენ აეჯანყებინათ როგორმე, დაემხოთ რესპუბლიკა და კვლავ დაპატრონებოდნენ თავთავიანთ ადგილებს, სა-

დაც მით უფრო მეტს ჯამაგირს იღებდნენ, რაც ნაკლებს საქმეს აკეთებდნენ. მაგრამ ვერ გააბრძვივეს ხალხი: მართალია, უვიცი და გაუნათლებელია ვანდელი, მაგრამ იმას კი მაინც კარგადა ჰგრძნობდა, რომ ვინც აჯანყებას ურჩევდა, თავის საქმეების გარიგებას ცდილობდა და არა ხალხისას.

— შენა, ძმავე, იმიტომ ყვირი, რომ მგლობასა ხარ დაჩვეული და დღეს კი სდევნიან და ხოცავენ მგლებს. დღეს ღირსეული ის არის, ვინც პატიოსანი შრომა და გარჯა იცის.

ბევრსა ცდილობდნენ ის ვაჟბატონები, ბევრს ქადაგებდნენ ბერები, მაგრამ ვერა და ვერა, ქალების მეტი ვერავინ დაიყოლიეს, და ქალები ხომ არ აუჯანყდებოდნენ რესპუბლიკას. ბევრი, ბევრი წყევლა-კრულვით ეხსენებინათ აწინდელი წესწყობილების შემომღებნი. მელებივით დაძვრებოდნენ ხალხში დიდებულნი და ეპისკოპოსები, გახშირებული მიწერ-მოწერა ჰქონდათ პრუსიელებთან, მაგრამ მაინც ვერა გააბედვინეს რა. პრუსიელები რომ შემოვიდნენ შამპანში, ერთხელც არის რომ დამარცხებულყო ჩვენი ჯარი, იქნება მთელი ვანდე აჯანყებულიყო; მაგრამ გაიგეს თუ არა, ეალმის ბრძოლა და პრუსიელების დამარცხება, უცბად ჩაყუჩდნენ და თვით ბერებმაც კი შეაყენეს თავიანთი ქადაგება. სამშობლოს უკიდურეს გაჭირებას ელოდნენ ვანდელები, რომ მით გათამამებულნი პრუსიელებთან ერთად იარაღით შებრძოლებოდნენ რესპუბლიკას.

წლეულს მარტში, როდესაც გაჭირებულმა მართებლობამ გამოაცხადა, სამასი ათასი კაცი უნდა მოგკრიბოთ მტრებთან საბრძოლველადო, ვანდელებმა ყურცი არ შეიბერტყეს, — საცა გენებოთ, იქ მოკრიბეთ ჯარისკაცები და ჩვენ კი შინ ყოფნა და გოგოებთან ლაზღანდარობა გვირჩევნია ბრძოლას და სიკვდილსო.

მართებლობამ უანდარმები გამოგზავნა, — ძალით წამოასხით, ვისაც კენჭი ერგოსო. სწორეთ ამით ისარგებლეს რევოლუციის მოწინააღმდეგებმა და აშალეს ხალხი. ღმერთმა ხომ იცის, რომ ვანდელები არც სარწმუნოების გულისათვის აჯანყებულან, არც მეფის გულისთვის, არამედ მარტო იმისთვის, რომ ჯარში გასვლა არ უნდოდოდათ.

აიშალა ხალხი და დატრიალდნენ ბერები: თოფ-იარაღი აისხით, ვანდელებო! რევოლუციამ ქრისტიანობა შეურაცხჰყო და თქვენ თუ არ დაიცავთ, დაიღუპება ჭეშმარიტი სარწმუნოებო! ტყის ნადირივით უვიც ხალხს ასე ეგონა, თუ არ ჩვენ, დაიღუპა ჭეყვანაო და აირია იქაურობა. დედაკაცებს ახლაცა სწამთ, რომ მათი ქმრები და შვილები წამებულ არიან სარწმუნოებისათვის და შინ ინახვენ მკვდრებს: სამს დღეზედ აღსდგებიანო.

აჯანყება ერთ პატარა ქალაქში დაიწყო: რესპუბლიკის მომხრე გამასახლისს ხელები მოახერხა ხალხმა და მერე თავი ჩაუქვეყნა კომბლემით; მღვდელს დედაკაცები დაეხვივნენ და ნაკუწ-ნაკუწად აქციეს; მსაჯული ცულით აკუწეს და სამასი კაცი მოქალაქე დახვრიტეს, — თქვენც რესპუბლიკის მომხრენი იქნებითო. ეს იყო ომის დასაწყისი.

და მთელს ვანდეში, ხუთას სოფელში ერთად, გაისმა საშინელი ზარის ხმა. არ გასულა სამი დღე, სამ-სამი რაზმი შესდგა ვანდელებისა და დაიძრა რესპუბლიკის საწინააღმდეგოდ; ერთს მიუძღოდა კათელინო — სამაგალითო ურმებს აკეთებდა, ვიდრე მხედართ მთავრობას იკისრებდა; მეორეს სტოფლე — ტყისმცველი; და მესამეს სისუ — უბრალო მათხოვარი. საცა კი რესპუბლიკელი მოხელე იყო, ან ხაზინა და თოფ-იარაღის საწყობი, ყველა აიკლეს, მოხელენი შეუბრალებლად ამოხოცეს, ხაზინას და თოფიარაღს თითონ დაეპატრონენ და მით უფრო მძლავრად შეგვებნენ. მთელი ჩვენი ყურადღება პრუსიელებთან ომზედ გექონდა მიქცეული, მთელი ჩვენი ჯარი საზღვარზედ იყო გასული და ეს მხარე უპატრონოდ გექონდა დატოვებული. ეგეც რომ არა ყოფილიყო, ვინ წარმოიდგენდა, რომ სწორედ ამ გაჭირვების დროს უმტყუნებდა საფრანგეთს თავისი ღვიძლი შვილი და ევროპასთან შებრძოლებულს უკანიდან დაუწყებდა ცემას. მთელს ვანდეში ათასი კაცი არ იქნებოდა ჯარი და რა საკვირველია, რომ გამარჯვება იმათკენ ყოფილიყო.

კიდევ ბევრი რამ მიაძმო ჩემმა მოსაუბრემ. იმისთანა საშინელებას ჩადიდონენ გამარჯვებული ვანდელები, რომ მარტო გაგონებაზე მე თმები ყალყზედ მიდგებოდა. დედაკაცებისას ხომ ნულარა ბრძანებთ: მრცხვენია, თორემ მოგახსენებდით, რას უშვრებოდნენ თურმე დაჭრილ ჯარისკაცებს.

რაკი ხალხი ადგა და ვილაცა მეურმეების და მათხოვრების წინაშე ძლოლობით მთელი ვანდე ხელთ იგდო, „დიდებული ბატონებიც“ მიემხრნენ და ახლა იმათ შეჰყარეს თავიანთი ყმები და მხლებლები. მართალია, სულ იმას გაიძახოდნენ: ჩვენ ჩვენთვის არა გვინდა რა, მეფისა და ეკლესიის აღდგენას ვცდილობთო, მაგრამ ვინ არ იცის, რომ მეფის აღდგენა ბატონყმობის აღდგენას ნიშნავდა. იმათ მეფის აღდგენა კი არა, ძველებური, თავიანთი ბატონყმობის მოპოვება უნდოდათ, რომ კვლავ ათასობით ყმები ჰყოლოდათ, და მათი ოფლით უზრუნველად გაეტარებინათ წუთისოფელი. ამის გაგებას რა უნდა, ცხადზედ ცხადია მგონი, და ვანდელი ხალხი კი იქამდის დაბრმავებული იყო და არის, რომ ესეც კი ვერ გაეგო.

ღვთისა და სარწმუნოებისათვის ვიბრძვითო, იძახდნენ, და ქვეყანას კი იკლებდნენ. საცა წავიდნენ, თან თავიანთი ღვდაკაცები ღადევენეს და — ქმრები რომ ხოცავდნენ, ცოლები იკლებდნენ. ამ ხუთის თვის წინათ, ქ. ნანტს რომ მიესივნენ, ათასხუთასი ღვდაკაცი ჰყავდათ თან და სუყველანი თურმე ოქრომჭედლების ქუჩაში შესვლას აპირობდნენ, იქ უფრო მეტი იქმნება საშოვარიო.

ვიცი, ღღეს ძნელი დასაჯერებელია ხალხის ასეთი სიბრიყვე, მაგრამ რასაც მოგახსენებთ, სრულ ჭეშმარიტებას მოგახსენებთ და იმედი მაქვს დამეთანხმებით, რომ ამანედ უკეთესს მაგალითს სარწმუნოებისა და ბერებისაგან ხალხის გაბრიყვეებისას სხვაგან ვერსად იპოვნით.

კონვენტი განცვიფრებული იყო ვანდელების საძაგელი ქცევით, მაგრამ ჯერ ღონისძიებას არას ხმარობდა, დიდი ხანი ვერ გასტანს ეს არეულობა და ხალხი თვითონვე დამშვიდდებაო; ბოლოს, რაკი დარწმუნდა, რომ დაყოვნება საქმეს ახდენდა, ბრძანება გასცა, ძალაზედ ძალა იხმარეთ და იარაღზედ იარაღიო. ან რა შეგვეძლო? ისინი გვხოცავდნენ, გვწვაავდნენ, გვიკლებდნენ... ჩვენც უნდა გვებოცა და გვეწვა, რომ ჭკუაზედ მოგვეყვანა და ის მაინც გვეფიქრებინა, რომ თუ წმინდანი ის არის, ვინც აღამიანის სისხლს დააქცევს, ჩვენც დავივიწყებდით აღამიანის ყოველ ღირსებას და იმათსავეთ მხეცურად მოვიქცეოდით. ვანდელები რომ აჯანყდნენ, ჩვენ მაინცში ვიყავით შემწყვდეულნი. ნერვინდენში ჩვენი ჯარი დამარცხებულიყო; დიუმურიე ავსტრიელებს მიმხრობოდა; კობურგი ვალანსიენზედ მოდიოდა; და ვანდელები იმის ცდაში თურმე იყვნენ, რომ რომელიმე ნავთსადგური ჩაეგდოთ ხელში, თავისუფლად შემოეყვანათ ინგლისელები და ძველებური ბატონყმობა შემოეღოთ, ბეგარა და წამება.

მოვიდა ჩვენი ჯარი, მაგრამ იმის მაგივრად, რომ მისულიყო აჯანყებულებზედ და საცა მიესწრო, იქ შებრძოლებოდა, ოთხად იქმნა გაყოფილი და ოთხი გენერლის წინამძღოლობით შეერია ამ ღაცემულ ჭალებს და ბუჩქნარს. გენერლები ვერ შეთანხმებულყვნენ, ცალ-ცალკე მოქმედებდნენ და... მარცხდებოდნენ კიდევ. მაინცელი ჯარები რომ მივედით, ორი გენერალიდა იყო, როსინიოლი და კანკლო, მაგრამ ესეც მეტი იყო, რადგან ომში სუყველაფერი ერთს გეგმაზედ უნდა იყოს დაწყობილი, თუნდა საჭიროებისადაგვარად ყოველ ღღე იცვლებოდეს ეს გეგმა; ომში ერთი უნდა იყოს მბრძანებელი, რომელიც ყველას რჩევას უნდა ისმენდეს, მაგრამ ბრძანებით კი მარტო საკუთარი ნებით უნდა მბრძანებლობდეს; — ჯარი მაშინ არის ძლიერი და უძლეველი, როდესაც ყველანი ერთს ბრძანებას ასრულებენ.

ხომ სულ უბრალო მესაათე იყო როსინიოლი, მაგრამ კარგადა გრძნობდა, რომ ვანდელების დამორჩილება მარტო ერთობით შეიძლებოდა და გენერალ კანკლოს თურმე სთხოვა: შევავერთოთ ჩვენი ჯარები, წინამძღოლობა შენი იყოს და ომის გეგმა ჩემიო. როსინიოლის გეგმით შეერთებულ ჩვენ ჯარებს იმდენი ხანი უნდა ედევნათ ვანდელებისთვის, ვიდრე მდ. ლუარის და ზღვის შუა შეიმწყვდევდნენ; იქ უნდა შებრძოლებოდნენ, რომ ერთი ბრძოლით მთლად დაემორჩილებინათ მთელი ის მხარე. საუბედუროდ, კანკლო არ დასთანხმდა ამ მოსაზრებას, სამხედრო საბჭოც დაიყოლია და გადასწყვიტეს, ვანდელებს ორი მხრიდან შევესიოთ — სომურიდან და ნანტიდანო.

თავდაპირველად ძალიან კარგად წავიდა საქმე. ნანტიდან ოთხ რაზმად შეესია ჩვენი ჯარი ქვემო ვანდეს და სადაც მივედით, ყველგან დავიმორჩილეთ ხალხი და კონვენტის ყოველი ბრძანება ავასრულებინეთ. საცა გაბედეს და საბრძოლველად დაგვიხვდნენ, ყველგან დავამარცხეთ, მოსავალი წაეუხდინეთ და სოფლები დავუწვიეთ. ძალიან თურმე იამათ, მაინცის დანებების პირობები რომ გაიგეს:— მაინცელი ჯარი პატიოსანი სიტყვით შეჰკვრია საფრანგეთის მტრებს, ერთი წლის განმავლობაში თქვენს წინააღმდეგ იარაღს არ ვიხმართო... და რადგან ჩვენც საფრანგეთის მტრები ვართო... დიად, ვანდელები საფრანგეთის მტრებად რაცხდნენ თავის თავს და, მაშასადამე, ავ დღეს დაგვაყენებდნენ, რომელსაც კი დაგვიჭერდნენ. ჩვენ ეს კარგად ვიცოდით და, რაკი ორში ერთი უთუოდ უნდა წამხდარიყო, ვიფიქრეთ, ჩვენს წახდენას, ვანდელები წახდნენ, ის ემჯობინებაო. ერთი სიტყვით, გენერალი კანკლოს ჯარში ჯერჯერობით ყველაფერი კარგად მიდიოდა.

გენერალი როსინიოლის ჯარიც მზად იყო წასასვლელად. როსინიოლმა ორ რაზმად გაჰყო თავისი ჯარი და გადასწყვიტა, ორი მხრიდან უნდა მივეუხტეთ ვანდელების ბრბოს, რომელიც ქ. შოლემში არის მოგროვილიო. ერთს თითონ მიუძღოდა, მეორე პარიზელ მელუდუ სანტერს ჩააბარა. მაგრამ, ვინ იცის, დაუტლიდნენ ვანდელები შოლემში ორივე რაზმის მისვლას და შეერთებას, თუ ცალ-ცალკე შეებრძოლებოდნენ და ჯერ ერთს დაამარცხებდნენ, მერმე მეორესს. სწორედ ამ დროს გამოვედი საავადმყოფოდან და ვითხოვე, ისევ ჩემს ბატალიონში გამისტუმრეთ-მეთქი. მაგრამ ჯარი უკვე წასულიყო და, რადგან კარგად იცოდნენ ვანდელების ხასიათი, რომ საცა კი ჯარისკაცს მოასწრებდნენ, მოუქველელი არ გადაჩიებოდათ, ნება

არ მომცეს მართო წავსულიყავ და ანუერის სიმაგრეების უფროსმა გენერალმა ფლავინიმ სანტერის ჯარში ჩამრიცხა.

სანტერის ჯარში ოციათას კაცამდე იქნებოდა, მაგრამ ნამდვილი, გაწვრთნილი და მხედრულს სამსახურს შეჩვეული ჯარი ძალიან ნაკლებად ჰყავდა; უმრავლესობას ახლად მოკრებილი, გაუწრთვნილი და გამოუცდელი გლეხკაცობა შეადგენდა და იმათთან ერთად პარიზიდან მოსული უნიფორნი. არც იარაღი ჰქონდა ამ უმრავლესობას, არც ტანსაცმელი; ზოგს ჯოხი ეჭირა, ზოგს კომბალი, ზოგს ცული; ზოგი ქალამნებით იყო, ზოგი სულაც ფეხშიშველი; თითო-ოროლა პური წამოეღოთ გუდით და ის იყო მათი საგძალი. საცა კი მივედით, საქმელი ვერა ვიპოვეთ რა, რადგან ხალხი განიზნულიყო და ნაცრის მეტი არა დაეტოვებინა რა.

მე ხომ ერთი უბრალო ჯარისკაცი გახლდით, და მეც კი დარწმუნებული ვიყავ, რომ ჩვენს გენერალს ლუდის ხდა უკეთ უნდა სცოდნოდა, ვიდრე სამხედრო საქმეები: იმისთანა უწესრიგოდ მიდიოდა ჩვენი ჯარი, რომ ყველა იტყოდა, ამათ უფროსი არა ჰყავთო და, მაშასადამე, უკვე დამარცხებულნი არიანო, რადგან ვანდლებს ვაყვაცობას ვერავინ უძრახავდა. ისე არეულნი მივდიოდით ქვეითა ჯარი და ცხენოსნები, მსროლელები და ზარბაზნები, რომ დამარცხებულთ და ლტოლვილთ უფრო ვგავდით, ვიდრე საომრად მიმავალთ. უცბად რომ შეგვხდომოდა წინ მტერი და ბრძოლა ატეხილიყო, ჩვენი მსროლელების ტყვია ჩვენს ცხენოსნებს მოხვედბოდათ ზურგში. მერე იმისთანა უგზო-უკვლოდ მივდიოდით, იმისთანა გაუვალ ბუჩქნარში, რომ მე სიცოცხლის იმედი აღარა მქონდა:

— მშვიდობით, ჩემო მარგალიტა! მე შენ ველარა განახავ! და ჩემს თავს ვემდურებოდი, რომ მეზარბაზნობა ვითხოვე და ახლა სრულიად უიარაღოდ, უთოფოდ, მთელი ჯარის წინ მე ვიყავ და პირველი ტყვია მე გამომასალმებდა წუთისოფელს. ჩემი ამხანაგებიც ძალიან ცუდ გუნებაზედ იყვნენ, ეტყობოდათ, მით უფრო, რომ სრულიად გამოუცდელი ყმაწვილი ბიჭები იყვნენ, და ისეთი სიფრთხილით მიიწევდნენ წინ, თითქო ყოველი ბუჩქის ძირში მტერი ეგულებათო.

სანტერი კი აგვივლიდა და ჩამოგვივლიდა თავისი თეთრი ცხენით; ძალიან კმაყოფილი იყო, რომ იმდენ ჯარს მიუძღოდა და მგონი მას შემდეგ, რაც ქვეყანა არსებობს, არავის ჰყოლია იმ სიგრძელ გაჭიმული ჯარი: იქნება არც კი დამიჯეროთ, სწორედ ერთი დღის სავალზედ იყო გაშლილი ჩვენი ჯარი.

ვიცი, რომ სანტერი საუკეთესო პატრიოტი იყო და დიდი დეაწლი

დასდო რესპუბლიკას. ოღონდ კარგი პატრიოტი პარიზში იყო, თავის შესაფერ საქმეებში და არა მხედართმთავრად. მაგრამ რას იზამთ? ხალხი რომ შეიყვარებს ვისმე, სუყველაფერს იმას მიანდობს და ხშირად მინისტრობას მიანიჭებს ხოლმე იმას, ვისაც თავისი დღენი ლუდის ხდაში გაუტარებია. ამისთანა ჭირი მრავალი სჭირს გაუნათლებლობას.

ამ გვარად არეულ-დარეულნი და გაფანტულნი მივიწევდით ნელ-ნელა წინ და, რაც ხანი გადიოდა და მეტად იღლებოდა ხალხი და საქონელი იმ უგზო-უკვლო ქვეყანაში, მით უფრო მეტი რჩებოდნენ უკან. მშვენიერი დარი იდგა. რამდენიმე სოფელი უკვე გავიარეთ და ადამიანი არსად გვინახავს. ხუთი საათი იქნებოდა, როდესაც უცბად საშინელი ყვირილი მოისმა გზის პირიდან და ყოველი მხრიდან სროლა აგვიტეხეს. ეტყობოდათ, აქვე გზის პირას იყვნენ ჩასაფრებულნი, რადგან დაცალეს თუ არა თოფი, თითონაც გამოხტნენ და მხეცე-ბივით გვეცნენ. იმისთანა ხმით შემოგვეძახეს — დაგვენბდითო! რომ თმა აგვეშალა. დამშეული მგელი არ იქნება ისე საშინელი, როგორც ისინი იყვნენ. უმთავრესი მათი ძალა მაშინვე ზარბაზნებს მიელალა და ისეთი ხელდახელი ბრძოლა გაიმართა უცბად, რომ იმისთანა საზარელი ჩემს დღეში არც რამ მინახავს და ნურც მაჩვენოს ღმერთმა. სულ ნახევარ საათის სავალ მანძილზედ არ იქნებოდა ჩვენი ქვეითა ჯარი და ვიმედოვნებდით, აგერ წამოგვეშველებიანო. ჩვენდა საუბედუროდ, ძველი, გამოცდილი ჯარისკაცები სულ უკან თურმე მოექცნენ და ჩვენს ახლო სულ ახლად გაყვანილი გამოუცდელი ბიჭები იმყოფებოდნენ, რომელთაც ჯერ თოფის წამლის სუნიც არ იცოდნენ როგორი იყო. შეიძლებოდა ცხენოსანი ჯარი მოგვეშველებოდა, მაგრამ იმ ტყიან და უგზო-უკვლო ალაგას ვერა გაეწყით რა და მარტო ჩვენ შევერჩით ვანდლეებს და გაშმაგებულნი ვებრძოდით.

ამ დროს ერთი ოფიცერი მოვიდა ცხენით და ბრძანება მოგვცა, ზარბაზნები მარჯვნივ ბორცვზედ აიტანეთო. მაგრამ საქმე ბრძანება კი არა, ასრულება იყო: ჩვენა და ვანდლეები ისე ვიყავით ერთმანეთში არეულნი, რომ მანამ იმათ არ მოვიშორებდით, ადგილიდან ვერ დავიძვროდით. ერთი ჭალარა კაცი მწვდა ყელში და იმისთანა ძალით წამიჭირა, რომ კინალამ დამახრჩო, თან რალასაც მიყვიროდა. გზის პირიდან ორი კიდევ სხვა წამოეშველა და ცხენებს სტაცეს ადვირში ხელი. ზედ ზარბაზანზე წამაწვინა ვანდლმა და ის იყო გრძნობა მენშობოდა, რომ უკანასკნელად მოვიკრიბე, რაც კიდევ ძალ-ღონე მქონდა და, რადგან ხელები თავისუფალი მქონდა, ვიძერხმალი და ტარამდე ჩაუტარე მუცელში. სწორედ მხეცივით წამოგხ-

ტი, მივეარდი მეორეს, თავი გავუბე და ერთი ნახტომით ცხენზედ შევეჯექი, დავკარ ღეზები და მარჯვნივ მივაბრუნე ბრძანების ასარულებლად. სწორედ მხეცივით-მეთქი, რომ მოგასენებთ, ცარიელი სიტყვა კი არ გეგონოთ: ნუ გამხეცდება ადამიანი, თორემ ყველა მხეცზედ უარესი გახდება. მოვაბრუნე ცხენი, ავაჭენე ბორცვისკენ და ღმერთმა უწყის, რამდენს დაჭრილს გადავუარე ზედ და წუთისოფელს გამოვასალმე. ვის ახსოვდა მაშინ დაჭრილები, რომელნიც ჰერეხივით ეყარნენ ბრძოლის ველზედ! საქმე ის იყო, ჩემი ვალდებულება ამესრულებინა და მით გავქყლეთ ვისმე თუ არა, ეგ აზრადაც არ მომდიოდა. დავკარი ცხენებს, უკანიდან ჩემი ამხანაგები მოაწვნენ ზარბაზნის თვლებს და ავაგრიალეთ ბორცვზედ. მაგრამ იქ უფრო მეტნი დავგიხვდნენ ვანდელები და, უკანიდან ცოტადენი ცხენოსნები რომ არ მოგვევლებოდნენ, სწორედ წაგვართმევდნენ ზარბაზანს და ჩვენც ამოგვხოცავდნენ.

ზარბაზანი ავიტანეთ, მაგრამ გატენა არ უნდოდა? და გატენა კი არ შეგვეძლო, რადგან ყუმბარები ქვევით დაგვრჩა ზედ გზაზედ. გადავიხედე და, თქვენს მტერს, მე ელდა მეცა! ჩვენი ზარბაზნები ვანდელებს დარჩენოდათ და სასროლად ამზადებდნენ. ამით წახალისებულნი ახლა ჩემსკენ გამოქანდნენ, რომ ჩემიც წაერთმიათ, მაგრამ ზომ მოგეხსენებათ, სადაც არა სჯობს, გაცლა სჯობსო... მეც ვახსენე ღმერთი და ისევ ჩვენი ჯარისკენ გავაქანე ცხენები. ბუზივით ზუზუნებდა ტყვია, ზედ ჩვენივე ზარბაზნების ჩვენზედ ნასროლის გრიალი დაერთო და სწორედ სასწაული იყო, რომ ცოცხალი გადავრჩი და მშვიდობიანად ჩავიტანე ჩემი ზარბაზანი. რომ დამინახა გენერალმა, თავით ფეხამდე სისხლში ამოსვრილი, ოცი ნაბიჯით მაინც წინ გამობრძანდა რაზმიდან, ხელი ჩამომართვა და მკითხა:

— შენი სახელი, მამულიშვილო?

— მიშელ ბასტიენი, ჩემო გენერალო.

ზარბაზანი სამშვიდობოში გავიტანე, და რადგან ყუმბარა არა გვქონდა და სროლა არ შეიძლებოდა, ჩამოვხტი ცხენიდან, თოფს წამოვაველე ხელი და დავიწყე სროლა. ალბათ ღვთის განგება არის, რომ ამ ჯოჯოხეთს ცოცხალი გადავრჩი-მეთქი, ვისროდი თოფს, თითქო ადამიანს კი არა, ქვეყნისთვის მავნე ცოფიან ძაღლებს ვხოცავდი და მიხაროდა მათი ამოწყვეტა. დიად, ვინც ომში არა ყოფილა და მის საშინელება არ უნახავს, ვისაც თავისი თვალით არ უყურებია თავისი ამხანაგების ხოცისთვის, თავის ღღეში ვერ წარმოიდგენს, რა ტკბილია თოფის გატენა, მტრის მიზანში ამოღება და სროლა. ტკბილი კი არა, ტკბილზედ ტკბილია და სანატრელი!

რაკი ზარბაზნის სროლა დაგვიწყეს, უკან დაწევა ვირჩიეთ, მაგრამ სროლა და ბრძოლა მაინც არ შეწყვეტილა. მისვლახედ აღამიანი ახლად იყო და ახლა, რაკი უკან დავბრუნდით, ყველგან მტერი გვიხედვოდა და ყველგან გამმაგებული გვებრძოდა.

დაღამდა და ისე უცბად გაქრნენ საღდაც, თითქო დედამიწამ ჩაყლაპაო. მთელი ერთი საათი ველოდით, კიდევ მოგვიხტებიანო, ხმალოდებული და თოფგაწვდენილი ველოდით, მაგრამ ამოდ. ახლო სოფელში საათმა რვა დაჰკრა. მოდიოდა ჩვენი ჯარი, მაგრამ ვაი იმ სვლას: ბრძოლაში მონაწილეობა მართო ძველ, გაწვრთნილ ჯარისკაცთ მიეღოთ და დანარჩენები, რომელნიც ახლად იყვნენ მოკრებილი და ჯერ ისევ კომბლებით შეიარაღებულნი, აქეთ-იქით გაფანტულიყვნენ და იმ ღამეს და მეორე დღეს ჩვენი ცხენოსნები იმათ ძებნას მოუდნდნენ; მთელი ის არე-მარე დაჭრილებით და დახოცილებით იყო სავსე; ყველგან დაჩეხილი საქონელი და ცხენები ეყარა და ღამტვრეული ურმები. იმ დღეს 18 ზარბაზანი დავკარგეთ და ათასზედ მეტი კარგი მამულიშვილი. მართალია, ბევრი დაჭრილი ვიპოვეთ და ვანდელ დედაკაცებისაგან სიკვდილს გადავარჩინეთ, მაგრამ ვინ იცის, რამდენი დარჩა ბრძოლის ველზედ სიკვდილისა და მით ტანჯვისაგან განთავისუფლების ნატრული?

ასე კი დაგვამარცხეს ვანდლებმა. მე ის გიამბეთ, რაც ჩემი თვალითა ვნახე. კიდევ ვიტყვი, იმისთანა ცუდი არა იქნება ჯა ქვეყნად, როგორადაც ის ვაჟბატონები, რომელთაც ჰგონიათ, ყველაფერი ჩვენ ვიცით, ყველაფერი ჩვენ შეგვიძლიაო და დაუფიქრებლივ იყისრებენ იმისთანა სამძიმო საქმეს, რომელსაც ვერ გაბედავენ მათზედ ერთი-ათასად მეტად გონიერნი და მამაცნი. გამოჩნდება ვინმე აწასთანა უტვინო და თავხედი, ხელთ იგდებს ძალას და უფლებას და ვაი იმათი ბრალი, ვიზედაც ბრძანება გაუვა!

ჩვენი დამარცხება არ იკმარეს ვანდლებმა და — ეს ორი დღის შემდეგ გავიგეთ — ისე უცბად იმიტომ დაგვანებეს თურმე თავი, რომ შეკრებილიყვნენ და ჩვენი ჯარის მეორე რაზმს დასცემოდნენ. და დასცემოდნენ კიდევ; იმისთანა ალაგას მოესწროთ, რომ ოთხი ათასი კაცი მოეკლათ და რაც ჯარს ბარგი ჰქონდა და ზარბაზნები, სულ მთლად წაერთმიათ. ეს ამბავი რომ გავიგეთ, მაშინვე ქ. სოპურისკენ გავბრუნდით, რადგან ვანდლების ჩვეულებისამებრ, მოსალოდნელი იყო, რომ ამ გამარჯვების შემდეგ რომელსაჲ დიდ ქალაქს მიესეოდნენ და აიკლებდნენ.

17-ს ჩვენი რაზმი დაამარცხეს, 19-ს ჩვენი ჯარის მეორე რაზმი და 20-ს სოპურისკენ გავწიეთ. რა საჭიროა, მოვახსენოთ, რა შეწუხე-

ბულნი და შერცხვენილნი ვიქნებოდით! მით უფრო შერცხვენილნი ვიყავით, რომ სულ უბრალო, ტყის ნადირმა გლახკაცებმა გვაჯობეს, რომელთაც მხედრული წესწყობილებისა არა იცოდნენ რა და მიუხედავად ამისა სამჯერ მეტი ხალხი დაგვიხოცეს, ვიდრე ჩვენ იმათ.

მივედით სომურში და წარმოიდგინეთ ჩემი განცვიფრება, მანცელი ჯარიც დაემარცხებინათ ვანდელებს და ქ. ნანტისკენ დაებრუნებინათ. ქალაქში იმის მეტს აღარას ლაპარაკობდნენ. საშინლად შეწუხებული იყვნენ ყველანი. გამარჯვებულნი აჯანყებულნი იყვნენ და ვინ იცის რას იზამდნენ ამით წათამამებულნი. მე ამ სამარცხვინო დამარცხებას ჩვენს გენერლებს ვაბრალებ. ეს კია, რომ ცული ამბების დაჯერება ყოველთვის მეძნელება ხოლმე და მაშინაც დიდი ხანი გავიდა, მანამ იმ ფიქრს შევეჩვეოდი, რომ ჩვენი სახელოვანი კლებერი დამარცხებული იყო ვანდელებისაგან.

XI

საშინელი არეულობა იყო სომურში; ჯარებისთვის ბინა არსად იყო; ეკლესიებში დაჭრილები დაეწვინათ, რადგან საავადმყოფოში ადგილი აღარსად ყოფილიყო. ქალაქს ამაგრებდნენ; გენერლები და საერო კრების წარმომადგენელი კომისრები ერთმანეთს აბრალებდნენ ჩვენს დამარცხებას. გენერალი ფელინო როსინიოლს რესპუბლიკის ღალატსა სწამებდა; როსინიოლი კანკლოსა და ფელიბოსას იძახდა — ინგლისელთაგან არიან შესყიდულნიო. თვით ჯარშიც დიდი განხეთქილება იყო და ისე იყვნენ ჯარისკაცები აღშფოთებულნი პარიზელ უნიფხოთა სამარცხვინო ქცევით, რომ ათ-ათი და მეტი ღუელი ხდებოდა ყოველ ღღე.

დაწვრილებით გვიამბეს კლებერის დამარცხება: ისიც ჩვენსავით თურმე შეიტყუეს ვანდელებმა, რამდენიმე სოფელი სრულიად უომრად დაანებეს და დააწვევინეს და, როდესაც დანიშნულ ადგილზე მიიყვანეს, უცბად დაეცნენ და სასტიკი ბრძოლა აუტეხეს. დაიწყო თუ არა ომი, კლებერი მაშინვე თურმე დაიჭრა თოფის ტყვიით, მაგრამ ბრძოლის გათავებამდე ისე განაგებდა თავისი ჯარის ყოველ მოძრაობას, თითქო თითი გაუკაწრიაო. ცხენზედ ჯდომა რომ აღარ შეეძლო, საკაცურით თურმე დაჰქონდათ ბრძოლის ველზედ ჯარისკაცებს თავიანთი საყვარელი გენერალი. ვანდელები იქაც უმთავრესად ზარბაზნების წართმევას ცდილიყვნენ და რაკი ენახა კლებერს, რომ არტილერია წაართვეს, უკან დაებრუნებინა თავისი ჯარი. გამოქცევით არ გამოქცეულან, მაგრამ დაბრუნდნენ და თან ვანდელები სდევდნენო. ასე იყო თუ ისე, ბრძოლის ველი ვანდელებს შერჩე-

ნოდთ და სრულიად სამართლიანად შეეძლოთ ნიშნი მოეგოთ ჩვენთვის.

ეს დამარცხება ხომ მაწუხებდა და ზედ კიდევ პირადი სევდა ერთვოდა: ჩემი და ლიზა, მარესკო და პატარა კასსიუსი კლებერის ჯარში იყვნენ და იმათი ამბავი არა ვიცოდი რა. ვაი თუ ჩემი დის ურემი დაიჭირეს ვანდელეებმა და ორივენი დახოცეს! იმისთანა მხეცები იყვნენ, რომ არც ქალს დაინდობდნენ და არც უსუსურ ბავშვს.

ბოლოს ნელ-ნელა ისევ რიგზედ მოვიდა ჩვენი ჯარის საქმე და მეც, როგორც იყო, მივიღე ბარათი, რომლითაც ნება შეძლეოდა ანჟერს წავსულიყავ და კვლავ ჩემს ბატალიონში შევსულიყავ. რომ არ შემრცხვეს, ოცჯერ მაინც ვითხოვე ეს ბარათი, მაგრამ ჩემთვის ვისა სცალოდა; ბოლოს აღარც კი მეგონა, რომ კიდევ ვნახავდი ივანე სომს, მარკოზ დივეს და სხვა ჩვენებურებს, რომელნიც ძმებივით მიყვარდა. ჯარისკაცისთანა უჯჯიათი სამსახური ხომ არავის ექნება: დღეს არის და შენთან არის; ამხანაგურად, მეგობრულად გექცევა და შენს მზესა ფიცავს; ხვალ კიდევ გავარდება თოფი, გაჩნდება ბრძოლა და აღარც კი იცი საწყალმა, სად გძებნოს საყვარელი მეგობარი — საერთო ორმოში, რომელშიაც ერთად დამარხეს ყველა მკვდარი, თუ სადმე ბუჩქის ქვეშ მიფარებული და მგლებსაგან გამობრული!

მივიღე თუ არა ბარათი, მაშინვე გზას გავუღდე. იქვე გზის პირას კარგი ჯოხი მოვჭერ. ძალიან კარგი დარები იღვა ჯერ ისევ, თუმცა შემოდგომის სიცივე უკვე საგრძნობელი იყო და ფოთოლი ცვიოდა. გზაში ყველგან ქანდარმები ირეოდნენ და თვალყურს ადევნებდნენ მგზავრებს. ერთ სოფელში ეკლესიის კარებზედ გაკრული აფრეხები ვნახე და ძალიანაც ვისიამოვნე, ღვთის წინაშე. ერთი კონვენტის ბრძანება იყო, რომლითაც გამოცხადებული იყო, რომ დღეის შემდეგ ჯარს მარტო ერთი მხედართმთავარიცა ეყოლებათ. მეორე მიმართული იყო თვით ჯარისადმი:

„თავისუფლების მაძიებელნი! აჯანყებული ვანდელეები დამარცხებულ უნდა იქმნან ოქტომბრის დამლევაშდე. ამაზედ არის დამოკიდებული სამშობლოს კეთილდღეობა და ამას გავალებთ თქვენ ერი და თქვენი ვაჟკაცობა“.

მესამე აფრეხა თვით ვანდელეებს შეეხებოდა: „ნუ დაუჯერებთ დიდებულთ და ბერებს, რომელნიც ვითომდა ღვთის სახელით მოქმედებენ და კაცისკვლას და სისხლისღვრას კი გიქადაგებენ. იცით, რა ნებავეთ თქვენს წამქეზებელთ: ძველებური მეფობა, პატონყმობა და ხალხის დამონაგება, რომ თითონ ნადირობის,

ქეიფის და დროს ტარების მეტი საქმე არა ჰქონდეთ რა და თქვენ კი ყურმოჭრილ ყმადა ჰყავდეთ და ძველებურად მეძებარ ძალებში სცვალონ თქვენი შვილები. აი, რა ნებავეთ ღიღებულთ და სულიერ თქვენს მოძღვრებს. ჩვენ კი იმას ვცდილობთ, რომ ყველა გავათანასწოროთ. ყველა გავათავისუფლოთ და ღვთის შექმნილ ადამიანზედ აღარავინ ვაბატონოთ“ და სხვა და სხვა. ძალიან მოგვეწონა ეს აფიშები და მეტადრე კონვენტის ბრძანება, რომლითაც თვის ბოლომდე დამორჩილებული უნდა ყოფილიყვნენ აჯანყებული ვანდლები. ასე ყოფილა და ასე იქნება ყოველთვის ადამიანის შვილი: სწორედ გაჭირებაში დაჰკარგავს ხოლმე თავის ძალის იმედს და ისე მოეშვება, როგორც ჩული; თუ მაშინ გულშემატკივარი არავინ შეხვდა და არ გაამხნევა, წასულია იმის საქმე.

3 ღვინობისთვის დილით შევედი ქ. ანჟერში. ქალაქი სავსე იყო ჯარებით, რომელნიც კონვენტის ბრძანებისამებრ მზად იყვნენ ვანდეში შესასვლელად. ერთი საათი მეტი ვიარე, მანამ ჩემს ბატალიონს ვიპოვიდი. ჩვენი ბაირალი უკვე შევნიშნე ერთ ძველ შენობაზედ, მაგრამ ჯარისკაცებს ვერა ვცნობდი და ის იყო უნდა გამოვბრუნებულიყავ, როდესაც ერთმა ახალგაზრდა აფიცერმა შემაყენა:

— შენა ხარ, ბასტიენ?! საიდან გაჩნდი, ბიჭო?! აკი იძახდნენ, მოკლესო?

— სომურიდან ვიახლებით-მეთქი, — მოვახსენე და მოკლედ ვუამბე ჩემი თავგადასავალი. გარშემო ჯარისკაცები შემომეხვივნენ და იმათში ძლივს ვიცანი ხუთი ჩემი ძველი ამხანაგი, რომელნიც გაშტერებულნი მიყურებდნენ:

— ბიჭო, მიშელ!.. მაშ ცოცხალი ხარ? — და რაკი ნახეს, რომ მართლა ცოცხალი ვიყავ, მოვიდნენ, ხელი ჩამომართვეს და თან გულიანად გადიხარხარეს. შორიდან ივანე სომი გამოჩნდა, რადგან ხმა გავარდნილიყო, მიშელ ბასტიენი მოვიდაო. მოვიდა, მომეხვია, გულში ჩამიკრა და თუმცა არა უთქვამს რა, მე მაინც დავრწმუნდი, რომ წრფელი გულით ვუყვარდი ჩემს მოხუცებულ ამხანაგს.

ბოლოს, როდესაც ყველანი დამშვიდდნენ, მაშინ ამოიღო ხმა და, თითქო სხვებთან ლაპარაკი ეზარებაო, იქვე დუქანში შემიპატიჟა:

— მოდი, მიშელ, ერთი ხელადა ღვინო ჩამოვასხმევინოთ ადამს. ადამის დუქანი იქვე ახლო იყო და ხალხიც ბლომად იყო შიგ; დავსხედით, ერთი ხელადა წითელი ღვინო მოვატანინეთ და პური გავტეხე თუ არა, მაშინვე ჩემი დისა და პატარა კასიუსის ამბავი ვკითხე. ვკითხე და თან გული ამიფანცქალდა, ვაი თუ ცოცხალნიც აღარ იყვნენ-მეთქი.

— ფიქრი ნუ გაქვს, ჩემო მიშელ! რომ გამოვბრუნდით დამარცხებულნი, შიგ შუა გულ ჯარში დავინახე ელისაბედ-ქალის ურემი. ცოტა ხანს უკან ისე დავეუახლოვდი, რომ მოვიკითხე კიდევ — პატარა კასიუსის როგორა გყავს-მეთქი. ურემში გატენილი თოფი ედო ელისაბედ-ქალს, ერთი კარგი ხმალი და მერწმუნე შიში არაფრისა ჰქონდა. ხომ იცი ბევრ კარგ ვაჟკაცს გაუჭირდება შენი დის ოღენა.

ძლივს დავიმშვიდე გული! რაკი ჩვენების კარგად ყოფნა გავიგე, დანარჩენისაც იმედი მომეცა და ვიფიქრე: თვის ბოლომდე ვანდელები დამორჩილებული უნდა იქმნენ-მეთქი.

სომმა მიაშობო, ჩვენი დამარცხების მიზეზი ნიევრელი ბატალიონი იყო; გამარჯვება ჯერჯერობით ჩვენკენ იყო, გავაქციეთ კიდევ მტერი, თან გამოვუდექით და ხოცვა დავეწყეთ. ზარბაზნებთან სადარაჯოდ ნიევრელი ბატალიონი დავტოვეთ. მაგრამ რაკი გაქცეული დანახეს მტერი, ზარბაზნები უპატრონოდ დასტოვეს და გაქცეულთ გამოეკიდნენ; ამით ისარგებლეს იქვე მიმალულმა ვანდელებმა. დაეცნენ ზარბაზნებს და სულ ამოხოცეს მეზარბაზნენი; სხვათა შორის, მარკოზ დივეც მოკლეს, კატრავანელი მათეც, მენალარე ივანეც და ბევრნი სხვანი; ცოტაოდნად მეც დამჭიკნეს, მაგრამ იმ დროს დრაგონები წამოგვეშველნენ; ვანდელები ზარბაზნებზე წაღებას ჩქარობდნენ და ამგვარად გადავრჩი, თორემ ჯერ მე მომკლავდნენ და მერე დაჭრილებს დაუწყებდნენ ძებნას და ხოცვას. დაჭრილი მკლავში ვიყავ და რადგან საავადმყოფოში სიცოცხლეს გარეთ სიკვდილი მიჩვენია, ექიმს არც ვჩვენებდითარ და ღვთის მადლით კარგადა მაქვს ხელიო.

ხელი შეხვეული ჰქონდა, მაგრამ ისე ლამაზად აქონდა პირთან ღვინო, რომ ძალიან არ უნდა სტკიებოდა.

სალამომდე იქ დავრჩით და როდესაც ბინაზედ მისვლის დრო მოვიდა, ერთად მივედით და ერთად დავექით. მეორე დღეს, 5 დღინობისთვის, ისევ გზას გავუდექით ვანდელების დასამორჩილებლად.

ჯარი ყველაფრით სრული იყო: თოფ-იარაღით, თოფისწაპლით და ბარგით, მაგრამ საუბედუროდ მეურმეები ადგილობრივი მცხოვრებნი იყვნენ და სულ იმასა ცდილობდნენ, რომ გაგვპაროდნენ როგორმე. თვალი რომ მოგვერიდებინა, ურმებს იქ დაჰყრიდნენ, გაიკრეკავდნენ საქონელს და შინ წავადოდნენ. კიდევ კარგი, რომ მტერი არსადა ჩანდა და მე და ჩემი ამხანაგები მეურმეების დარაჯად დაგვაყენეს.

აგერ, ხელმეორედ შევუდექით იმ გზას, რომელიც უკვე გავლი-

ლი გვქონდა. შევედით თუ არა ჭალაში, მაშინვე ვიცანით ნაცნობი ადგილები, მეტადრე ის ადგილი, სადაც ისე სამარცხვინოდ დამარცხდა ჩვენი ჯარი. ჩავიდოდა მზე და ისეთს ღმუილს ასტეხდნენ ხოლმე ბუჩქნარში მგლები, რომ თვალს ვერ მოვხუჭავდით; დამწოდნენ ბრძოლის ველზედ ლეშით გაუმძაღარნი და ვინ იცის, რამდენ დაქრილს შეუშოკლეს სიცოცხლე. საშინელი გძელი ღამეები იყო, გათენებას ველარ ველირსებოდით ხოლმე. მომაგონდებოდა რევოლუციის მოწინააღმდეგე ბერები, რომელნიც სულ იმის ცდაში იყვნენ, რომ ხალხი აელეღვებინათ და სისხლის ღვარი ეღინებინათ; მომაგონდებოდა შოველის სიტყვები — გაფრთხილდით, ომი სიკეთეს არას დაგვაყრისო; მომაგონდებოდა უსაზღვრო სისულელე ჩვენი ვალენტინისა, — საფრანგეთს გრაფი არტუას მეტი ერთგული კაცი არა ჰყავს და ყველა პატრიოტები ჩამოსაღრჩობნი არიანო; მომაგონდებოდა ეს ყველაფერი და განცვიფრებული ვეკითხებოდი ჩემს თავს, ნუ თუ ადამიანის დანიშნულება შეუწყვეტელი ბრძოლა და სისხლისღვრა არის-მეთქი? განა ამას გვასწავლის ჩვენი სარწმუნოება, რომ ერთმანეთის მოსისხლე მტრები ვიყვნეთ? განა იმისთვის მიიღო წამება ქრისტე-ღმერთმა, რომ იმის მოადგილე მღვდლებსა და ბერებს პირადი სიამაყისა და ანგარების გამო ქვეყანა აერიათ და ღვიძლი ძმები ერთმანეთისთვის შეებრძოლებინათ?

როგორც კი დაიძახებდა ვინმე, აგერა რესპუბლიკელი ჯარები მოდიანო, წამოიშლებოდა ხოლმე მთელი სოფელი და ისე გაიხიზნებოდა ღიღით პატარამდე, თითქო ურჯულსო ჯარისა ეშინიანთ და იმას გაურბიანო; გაირეკდნენ წინ საქონელს და გარბოდნენ. ხშირად კიდევ ვხედავდით გაქცეულებს, მაგრამ ისე ღმერთი როგორ გაგვიწყრებოდა, რომ ბერებისაგან გაბრიყვებულ საწყალ მუშა ხალხზედ ამოგვეყარა ჯავრი! შევიდოდით სოფელში. საცა კი წყალი იყო, ან ქა, ან წყარო, ლეშით ამოვსებული დაგვხდებოდა! ძირს მკვდრები და ზემოდან ღიდრონი ქვები! ხანდახან ისე შეგვაწუხებდა ხოლმე უწყლოობა, რომ ველარ მოვითმენდით და გაბრაზებულნი ცეცხლს წავუკიდებდით სოფელს; უცბად მოედებოდა ცეცხლი სოფელს, მერე გამხმარ ჩაღუნას და ბუჩქნარს და ისეთი კაშკაში გაქონდა ცას, თითქო ღამე კი არა, კარგი ლამაზი მზიანი ღღე არისო.

ირიყრაყებდა და გავჩერდებოდით, რომ შეჭამადი გაგვეკეთებინა და ცოტა რამ შეგვესვენა კიდევ. აქეთ-იქით ყველგან დარაჯებს გავამწყრივებდით, რადგან ვიცოდით, რომ კვალდაკვალ მოგვდევდა მტერი და ცხარე ბრძოლას გვიპირებდა, მაგრამ არ ვიცი, ეშინოდათ თუ თავიანთ ჯარებს ელოდნენ, ღვინობისთვის ცხრამდე ბრძოლა

ჭერ გაგვიბედეს. ისე რომ ორივე ჩვენი რაზმი შეერთდა და ისე გაუ-
ღა შატილიონის გზას.

ჯარის წინამძღოლად გენერალი შალბო იყო. სხვათა შორის
ჩვენს ჯარში იმყოფებოდა გენერალი ვესტერმანი. ვესტერმანი ჩვე-
ნებური იყო, დიდად სახელოვანი ვაჟაკი და ამასთან მთელი ვანდეს
კარგად მცნობი; ისე იცოდა ყოველი გზა და ბილიკი, თითქო აქ
შეზრდილიაო.

შატილიონში რომ მივედით, ჯარი უკვე გასულიყო და მე და ჩემს
ამხანაგებს გვიბრძანეს, — ჯარს მოჰყეთ და ფთხილად იყავით, მტე-
რი ძალიან ახლო არისო. მართლაც, ჯერ არც კი გასულიყო ქალაქი-
დან ჯარის უკანა ნაწილი, ჯერ ბარგი არც კი დაგვეძრა, რომ შო-
რიდან ზარბაზნის გრიალი მოგვესმა. აგერ, შუაღამე მოატანა, საში-
ნელი ბრძოლა ჰქონდათ ჩვენს ამხანაგებს და ჩვენ კი თავებდეს ვი-
წყევლიდით, რომ უკან ჩამოვრჩით, ბრძოლის მაგიერ იარაღის სა-
წყობში ვიყავით და მეომართ ტყვია-წამალს ვუგზავნიდით! გიჟივით
მიდი-მოდიოდა ჩვენი მოხუცებული სომი და სულ კბილებს აკრა-
ქუნებდა. დავუდებდით ურემზედ ტყვია-წამალს და გავისტუმრებ-
დით ბრძოლის ველისკენ — ეს იყო ჩვენი საქმე!.. ეხლანდელივით
მოწყობილი კი არ იყო მაშინ-ჩვენი არტილერია! სად იყო მაშინ
ლღევანდელი ვეშაპივით ცეცხლისმფრქვეველი ცხენები, საამურად
მორთული მხედრები და ყუმბარით სავსე ზარბაზნის ყუთები! ჩემს
ყმაწვილ ბიჭობაში ოცნებითაც ვერავინ წარმოიდგენდა ისეთს წესსა
და რიგს, როგორიც ღღევანდელს, მართლა და საუცხოოდ გაწყო-
ბილს, არტილერიაში სუფევს. ხარჯი რომ არ მოემატებინათ ხალხი-
სათვის, ძალიან დავუმაღლებდით, რადგან წარსულთან შედარებით
ღღევანდელი ასია და მაშინდელი ერთიც არ იყო, მაგრამ რა? იმო-
ღენი ხარჯი შეაწერეს ხალხს, რომ ლამის... ამ ისტორიას რომ არა
ვწერდე, დიდი სიამოვნებით მოგახსენებდით ჩემს ფიქრებს ხარჯის
შესახებ. მაგრამ ჯერ ჩვენი ამბავი განვაგრძოთ, იქნება ესეც მაცა-
ღოს ძლიერმა ღმერთმა.

ჩვენ რომ ასე საქმეში ვიყავით, მთელი ქალაქი გარეთ გასულიყო
და მთიდან ბრძოლის დანახვას ცდილობდნენ. დარწმუნებით არავინ
იცოდა, სად იყო ბრძოლა და ზოგი რას იძახდა, ზოგი რას. ოთხი
საათი იქნებოდა, როდესაც ჩვენი ურემები დაბრუნდნენ, და დაჭრი-
ლები მოიყვანეს. ზოგს თავი ჰქონდა შეხვეული, ზოგს ფეხი ჰქონდა
მომსხვრეული... ჩალაზე ეყარენ საწყლები, სისხლში ამოსვრილები.
მოვიდოდა ურემი, ჩამოვიყვანდით დაჭრილებს, იქვე ქუჩაში კედ-
ლის ძირას მივაწვენდით და ახლა მეორე ურემს მივვარდებოდით,

მესამეს, მეოთხეს... დაერივნენ ექიმები და დოსტაქრები და იქვე ქუჩაში დაიწყეს თავიანთი საზარელი ყასბური ხელობა. ყველგან ყვირილი და კვნესა ისმოდა, ყველგან ხალხი ირეოდა. მივიდოდა დაქრილთან ექიმი, დაიჩოქებდა, გასინჯავდა... გასიმოდა საშინელი, გულსაკლავი ძახილი უბედურისა, რომელსაც ძვალს უხერხავდნენ, ან ფეხს სჭრიდნენ და თითქო ქორმა წამოუარა ქათმებსაო, ისე შეფერთხებოდა ხალხი. მაგრამ რა დროს შიში და გულისხეთქა იყო? ექიმები ათზე ერთსაც ვერ გასინჯავდნენ, თუ არავინ დაეხმარებოდა. ვინც კი გულმაგარი იყო, მეტადრე ქალები, ყველანი დაეხმარნენ. მიდიმოდიოდნენ ურმები და საკაცურები, გაფაციცებით საქმიანობდნენ ექიმები და დაჭრილები კი მოდიოდა და მოდიოდა! ყველა სახლები ღია იყო... შევიდოდნენ სახლში და გამოალაგებდნენ, რაც კი საჭირო იყო დაჭრილთათვის — ლოგინს, სარეცხს, წაშლებს... თითონ მოქალაქეებს გამოჰქონდათ დაუნანებლივ ყველაფერი და დაჭრილებს აძლევდნენ.

თუ კი დაჭრილები ასე გვებრალებდა და ასეთი გულუხენი ვართ, ეს არა სჯობია, შევთანხმდეთ ერთმანეთში და ომის ხსენებაც კი ამოვადლოთ ამ ქვეყნად? ძნელი ომის ამოგდება კი არა, ძნელი კაცთა შეთანხმება არის, თორემ აქამდე კი არ ამოვადლებდნენ? ან როგორ შევთანხმებულებიყავით საბრალო ვანდელლებთან, რომლებმაც არც კი იცოდნენ, რომ თავიანთ სისხლს სამშობლოს მოღალატეთათვის აქცევდნენ? არც კი იცოდნენ, რომ იმათ ბატონებს გადაწყვეტილი ჰქონდათ, — მთელი ვანდე ინგლისელებს ჩავუგდოთ ხელში და რესპუბლიკელების ჯავრს კი ნუ ჩავიყოლებთო. რა გაეგებოდათ უბედურებს? ისიც კი ვერ გაეგოთ, რომ ბატონყმობის გადაგებით იმათ თავისუფლება ეძლეოდათ და თავისუფლებასთან ერთად ის უფლებანი, რომლითაც ღმერთმა დიდი ზღვარი დასდო პირტყვისა და ადამიანს შორის. ვანდელებს არაფერი გაეგებოდათ და რადგან არ გვისვენებდნენ და შეუწყვეტლივ გვეტრობდნენ, ჩვენდა უნებურად იძულებულნი შევიქენით იარაღით გაგვეცა მათთვის პასუხი: ან რესპუბლიკა უნდა დაგვემხოზინებინა, ან სულ ერთიანად ამოგვეწყვიტა.

ხუთ საათზედ გენერალი შამო მოასვენეს საკაცურით. სული გზაშივე დაელია ცხონებულს. შიგ ყურის ძირში მოხვედროდა ტყვია; ამბობდნენ, ერთი კი დაიყვარა — რესპუბლიკას გაუმარჯოსო, და დაეცა კიდევად. არა მგონია, მართალი იყოს: გენერალი ჩემი თვალითა ვნახე და იმას იმისთანა ჭრილობა ჰქონდა, რომ ხმის ამოდებასაც ველარ მოასწრებდა. ეტყობა, მისმა მეგობრებმა და პატივისმცემლებმა დაიძახეს — რესპუბლიკას გაუმარჯოსო, რადგან ემ

უნდა ყოფილიყო უკანასკნელი სიტყვები ყოველი ერთგული მამუ-
ლიშვილისა.

შებინდა და შეწყდა კიდევ ზარბაზნის სროლა. ურემბი ცარიე-
ლები დაბრუნდნენ. მოქალაქეებმა მაშხალები აანთეს და ისე გაანა-
თეს ქუჩა, რომ ექიმებს ერთს წამს არ შეუწყვეტიათ მუშაობა. მახ-
სოვს, სრულიად ჩამობნელდა, როდესაც ერთი ცხენოსანი, მოხუცე-
ბული, ძალზედ ჭადარა ჯარისკაცი მოვიდა და რადგან ხალხისაგან
გზა იყო შეკრული და ექიმებთან ველარ მიადწია, ჩვენს ახლო შეა-
ყენა ცხენი. ერთმა ჩვენმა ოფიცერთაგანმა ჰკითხა ომის ამბავი და
იმისაგან გავიგეთ, რომ ბრძოლა გათავებულყო და გამარჯვებული
ჩვენი ჯარი დარჩენილიყო:

— დიად! აგერ ორი საათი იქნება, რაც დამარცხდნენ ვანდელები
და გაიქცნენ. ვესტერმანი მისდევს გაქცეულთ და ჟღერავს!

ისეთი დაშვიდებით გველაპარაკებოდა, რომ აზრადაც არავის
მოგვსვლია, ეს კაცი დაჭრილი უნდა იყოსო. მაგრამ როდესაც ცხენი-
დან ჩამოხტომა უნდოდა, ფერი ეცვალა — თურმე შიგ მუცელში
იყო დაჭრილი საწყალი — და გული შეუღონდა. მანამ ჩვენი ოფიცე-
რი კაცს გაგზავნიდა ექიმის მოსაყვანად, მან სულიც განუტევა.

ცოტა ხანს უკან შორიდან გამარჯვებული მარსელურიც შემო-
გვესმა. რაკი ბრძოლა გათავებულყო, საერო კრების წარმოძღვე-
ნელნი შოდიო და ბელგარდი ქალაქისკენ წამოსულიყვნენ და, უნდა
გენახათ, რა სიხარულით მიეგება წინ ხალხი — რესპუბლიკას გაუ-
მარჯოსო!.. ვანდელებისთვის ჩვენს ჯარს ზარბაზნები წაერთმია და
მე და ჩემს ამხანაგებს ჩავვაბარეს. ღვთის წყალობა გაქვთ, ჩვენ ეს
გვიამა ძლივს არ ველირსენით ნამდვილ, ვაუკაცურ სამსახურს!

ჩვენდა საუბედუროდ, მკვდრებს დამარხვა უნდოდათ და სხვათა
შორის ჩვენც გავგზავნენს მკვდრების მოსაძებნად. აოხრებული იყო
მთელი არე-მარე: მცხოვრებნი გახიზნულიყვნენ, სოფლები იწოდა
და სასტიკი ბრძანება გვექონდა — კარგად გასინჯეთ, რომ ცოცხალი,
თუნდა სულთმობრძავიც იყოს, არავინ დაგვრჩეს ბრძოლის ველზე-
დაო. რა გავვეწყობოდა, ახლა ამ საქმეს შევუღდექით... ღმერთმა ჩემს
მტერს ნუ აჩვენოს ის საშინელება, რაც ჩვენ იმ დღეს ვნახეთ! ამას
კი აღარ ავიწყრთ, რადგან ასაწერადაც კი საშინელი და საზიზღარია!
ეგეც რომ არ იყოს, დაწვრილებით რომ ავწერო ყველაფერი, რაც ამ
ომში გადამხდა, ჩემს დღეში ველარ გავათავებ ამ ისტორიას... მთე-
ლი ის დღე, 10 ღვინობისთვის, დახოცილების დამარხვას მოევუნდით;
გავთხრიდით უშველებელ ორმოს, შიგ წყობისად ჩავასვენებდით
უბედურებს და მიწას მივაყრიდით.

დაჭრილები ქალაქისკენ გავგზავნეთ, დიდძალი ჯარი დაეჭებლა დაჭრილებს და მკვდრებს. მაგრამ იმისთანად იყო მოდებული ჩადუნა, რომ იქნება ერთ კვირასაც ვერ მოგვევლო იქაურობა, არამც თუ ერთ დღეს.

დაბინდდა, დაბნელდა, ის იყო დასვენებას ვაპირობდით, რომ შორიდგან საშინელი ხმაურობა შემოგვესმა და ცოტა ხანს უკან ჯარიც გამოჩნდა, ჩვენი ჯარი. ოღონდ თქვენს მტერს, რა ცუდი სანახაიცი ის იყო ერთმანეთში არეულიყვნენ ქვეითა ჯარი და ცხენოსნები და ისე მორბოდნენ, თითქო უკან გამარჯვებული მღვეარი მოსდევთ! ისე იყვნენ შეშინებულები, რომ ვერც კი ხედავდნენ, რომ არავინ მოსდევდათ. ბევრს უყვიროდნენ უფროსები, მაგრამ ვილას ესმოდა იმათი ხმა! მოცვივდნენ, სოფელი გადირბინეს და ძლივს-ძლივობით გაგვაგებინეს, რომ ვანდლელებს დიდი ჯარები შეუქრებიან და, როდესაც ჩვენ ბრძოლის შემდეგ განცხრომაში ვბრძანდებოდით, უცბად მოგვეჭრნენ და რომ არ გამოვექცეულიყავით, სულ ერთიანად ამოგვხოცდნენო! ისე წამოსულიყვნენ, რომ ბანაკი, ბარგი და ზარბაზნები ვანდლელებისთვის დაეტოვებინათ.

კიდევ კარგი, რომ ჩვენ იმათ მოსვლამდე გავათავეთ ჩვენი სადგომი, თორემ შიმშილით დავიხოცებოდით; დაერივნენ იქაურობას და რაკი ვერა იბოვეს რა, დიძახეს, ქალაქს წავიდეთო. მაგრამ ამ დროს საიდანღაც გაჩნდა გენერალი ვესტერმანი თავის ცხენოსნებით და ისეთი ხმით შეუტია, რომ შეაყენა იმოდენა ჯარი; ახლა ოფიცრები ჩაერივნენ და, როგორც იყო, ჩააგონეს, რომ ქალაქს მისვლა და მთელი ჩვენი ჯარის დაღუპვა ერთი იქნება, რადგან გაქცევას ყველანი არ იკადრებდნენ და ვინც დარჩება, უთუოდ დამარცხდება: ვაჟკაცობით თუ არა, რიცხვით გვაჯობებენ ვანდლელებიო. იმდენი უთხრეს, იმდენი შეარცხვინეს, რომ, როგორც იყო, დაამშვიდეს შეშინებული ხალხი და თავ-თავის ალაგას დააყენეს ყოველი რაზმი.

საკვირველი ის იყო, რომ მტერი არსად ჩანდა. ყველგან დარაჯები გვეყენა და ერთი ბეწვა ხმაურობა რომ მოგვესმენოდა, ყველანი ფეხზე წამოვხტებოდით; ჯარი მიწვა და კურდღლის ძილით მიიძინა; ოფიცრები ცეცხლს შემოუსხდნენ და ჩუმნი ხმით საუბრობდნენ. უცბად შუალამისას საშინელი ალი ავარდა ცაში. არიქათ, ბიჭებო, შატილიონი იწვისო! — დაიყვირა ვილაცამ და ისე აიშალა იმოდენა ჯარი, თითქო ერთი კაცი ყოფილიყოს; ავისხით იარაღი და წასასვლელად გავემზადდებით, მაგრამ ეტყობოდა, ჩვენს წინამძღოლებს არაფრად მოსწონდათ ხელახლა ბრძოლის ატეხა და ჯერჯერობით მარ-

ტო ერთი რაზმი გაგზავნეს, — წადით, ნახეთ, რა ამბავია, ან რას აღ-
დის იმოდენი ალიო? როდესაც ინათა, მაშინ გავიგეთ ქვეშარტად
ყველაფერი: ვესტერმანს ისე სწყენოდა ვანდელი გლეხებისაგან ჩე-
ნი ჯარის დამარცხება, რომ მოსვენება თურმე აღარა ჰქონდა; უკ-
ვირდა კიდევ, — რომ გვაჯობეს, რატომ არ ისარგებლეს გამარჯვე-
ბით და მღევარი არ გამოგვიყენეს, ხომ სულ ერთიანად ამოგვიწყ-
ვეტდნენ შეშინებულ ხალხსაო? ალბათ იმიტომ არ მოგვდიეს, რომ
გამარჯვებულნი ქალაქ შატილიონში შევიდნენ და საშოვარს გამოე-
კიდნენ; მგონი, ისე აიკლეს იქაურობა, რომ მარანში ღვინო აღარსად
დააყენეს და ღუქნებში საქონელიო... თან სულ ორასი რჩეული
ბიჭი თურმე წაიყვანა, შევიდა შუალამისას შატილიონში და დაიწყო
ვანდელების ხოცვა. ისე ეყარა თურმე ქუჩებში მთვრალი ხალხი,
რომ აღარავითარი გრძნობა არა ჰქონდათ; ვისაც ცოტა კიდევ შერ-
ჩენოდა გონება, თოფის სროლა თურმე დაიწყეს, მაგრამ ისე იყვნენ
ღვინით და არყით გაღეჭილები, რომ მტერსა და მოყვარეს ვეღარ
არჩევდნენ და ერთმანეთს ესროდნენ. ქალაქი იწოდა. ქუჩებში ერ-
თად დიოდა სისხლისა და ღვინის ღვარი.

აი, რა საშინელება მოსდევს ლოთობას და უგუნურებას.

ცხრა საათი იყო, როდესაც ქალაქში შევედით და ეს საზიზღარი
სურათი ვნახეთ. ჩვენმა ჯარმა ისევ ისე უვნებლად ჩაბარა თავისი
ზარბაზნები; ვანდელებს მარტო ბარგი აეშალათ და დაეტანათ,
სხვა ყველაფერი. ხელუხლებლად დაგვხვდა. გზის პირას თოფის წამ-
ლით დატვირთულ ურმები იდგა და რადგან მეურმეები გაპარუ-
ლიყვნენ, ჩვენ მოგვანდეს თოფის წამლის ზიდვა და დაარჯობა. საქ-
მე ის იყო, როგორ გაგვეტარებინა თოფის წამალი ქალაქში, როდე-
საც მთელ ქალაქს ცეცხლი ეკიდა და ყოველი ბანიდან მუგუზლები
ცვიოდა? ქალაქს გარშემოვუარეთ და კარგა დიდ მანძილზედაც, რად-
გან საშინელი ქარი ქროდა იმ დღეს და ძალიან შორს მიჰქონდა
ნაპერწყლები. მივიდიოდი და თვალწინ მიდგა ქალაქის ქუჩა და ზედ
შუაზე მთვრალი ვანდელები; სისხლის ღვარი და ცეცხლწაქიდეული
სახლები. თავით-ფეხამდე ყრუანტელი მივილიდა, მეგონა, ცოცხლე-
ბი არიან და ცეცხლი ეკიდებათ-მეთქი.

საშინელებაა ძმათა შორის ომი, და მართლა საზიზღარი ქმნი-
ლება უნდა იყოს ადამიანი, რომ ამისთანა უღიერებას ჩადიოდეს. კი-
დევ კარგი, რომ საწყალ ხალხს ყოველთვის პირადი ინტერესებით
გატაცებული და დაბრმავებული გაიძვერა გაიტაცებს და გააბრი-
ყვებს ხოლმე, თორემ, ძმათა შორის ომს რომ თვით ხალხი იწყებდეს,
სიცოცხლე საშინელ ტვირთად შეგვექნებოდა; ამ გაიძვერების წყა-

ლობითა გვეკირს აჰოდება უბედურება, თორემ თითონ ხალხი გულ-
კეთილი და მადლიანია; ცოტა რამ განათლება აკლია, რომ თვალი
აახილოს და მტერ-მოყვარე იცნას თორემ... მაშინ ვნახავთ, კიდევ
ასე ადვილად გააბრიყვებენ მას გაიძვერები!

ვესტერმანი თავისი მხედრებით იქვე დარჩა დასასვენებლად და
ჯარი კი შოლეს გზას გაუდგა; საერო კრების წარმომადგენელი
ფოიო ჩვენს რაზმთან მოდიოდა. სამწუხაროდ, ძალიან ნელა მიე-
დიოდით, რადგან გვეშინოდა ჩასაფრებული არსად ყოფილიყვნენ
ვანდელების ჯარები. ამბობდნენ, სტოფლე, დიურივო და ბოვალე
თავიანთ ჯარებით აქვე არიან და შესაფერ შემთხვევას ელიან, რომ
ბრძოლა დაგვიწყონო.

მეორე დღეს დილაადრიან ზარბაზნის ხმა მოგვესმა შორიდან.
აღბად იბრძვიანო, გვინდოდა მივშველებოდით, მაგრამ იმისთანა
უგზო-უყვლო ალაგას ვიყავით, რომ ცარიელი კაციც ძლივს გაივ-
ლიდა, არამც თუ ზარბაზნები გადაგვეტანა. მეორე დღეს გავიგეთ
მარტო იმ სროლის მიზეზი: უნიფხოთა გენერალი ლეშელი შებმოდა
ვანდელებს და ძალიანაც დაემარცხებინა. მიუუახლოვდით შალონს,
და რადგან იქ ჯერაც არ შეწყვეტილიყო სროლა, ჯარი წინ გაის-
ტუმრეს და ჩვენ კი ბარგთან დაგვეტოვეს — როგორც გენებოთ, ისე
წამობრძანდითო!

ძალიან გვეწყინა, მაგრამ რა გაეწყობოდა, უნდა დავმორჩილე-
ბოდით ჩვენს ბედისწერას. მივეარდით გაბრაზებულები და საქონელ-
ზედ ამოვიყარეთ ჯავრი: სახრეები ზედ დავამტვრიეთ, რაც კი ქვე-
ყანაზედ გინება არის და არ არის, ყველა მაშინ მოვიგონეთ და გული
კი მაინც ვერ მოვიოხეთ. იმოდენ ბარგს სულ ორასი კაცი აღარ დაუ-
ტოვეს დარაჯად და ვანდელებს რომ იქ ჯაშუშები ჰყოლოდათ და
დროზედ შეეტყოთ ეს გარემოება, ისე წავგართმევდნენ ყველაფერს
და ისე ამოგვხოცავდნენ, რომ ამბის წამლებიც არავინ გადარჩენი-
ლიყო. მაგრამ საცა ომი იყო, ყველა ვანდელებიც იქ უნდა ყოფი-
ლიყვნენ და ჩვენც სწორედ ამან გვიხსნა განსაცდელისაგან.

ბოლოს, როგორც იყო, ქალაქსაც გადავხედეთ. სროლა შეწყვე-
ტილიყო, მთელი ჩვენი ჯარი გაჩერებული იდგა ერთ ბორცვზედ და
მარტო ცხენოსნები მისდევდნენ გაქცეულ მტერს. იქვე ჩვენს გვერ-
დით, სულ სამასი ნაბიჯის მანძილზედ, მაინცელი რაზმი იდგა. ტანი-
სამოსი იგივე ეცვათ, რაც ყველა სხვა რაზმებს, მაგრამ შეეხედეთ
თუ არა, მაშინვე ვიცანით ჩვენი ძველი ამხანაგები, ჩვენს სიხარულს
საზღვარი არ ჰქონდა. ივანე სომმა დაიყვირა:

— აგერ, ჩვენები!.. აბა, ახლაც მოგვაქციონ ბოლოში!

ჩემთვის ხომ ერთიორად სასიამოვნო იყო ჩვენების პოვნა, რადგან ჩემი და ლიზა იმათში იმყოფებოდა და ეხლა მაინც გავიგებდი მარესკოს და პატარა კასსიუსის ამბავს. მთელი ჩვენი ჯარი შეერთებული იყო ამ ბრძოლაში. ჩვენი რაზმის წინამძღოლს უორდის გენერლობა მიედლო და, გვერდზედ რომ ჩამოგვიარა, სალაში მივეცით:

— გამარჯვება გენერალს! ძმობა და გამარჯვება!

იმანაც მაშინვე გვიცნო და შემოგვცინა:

— თქვენა ხართ, ჩემი ძველი ყოჩაღები?! საიდან გაჩნდით?

— ბარგთან გახლდით, ჩემო გენერალო, — მიუუგე მე, — და ახლა გვაქმარეთ ამოდენა სირცხვილი და ისევ ჩვენს რაზმში გვაყოფეთ.

— ძალიან კარგი, ძალიან კარგი, — დამპირდა უორდი და გააქროლა ცხენი. ცოტა ხანს უკან ბარგთან სხვები დააყენეს. ჯერ ხეირიანად არც კი გავსწორებულყავით, რომ მოვიდა ჩვენი უორდი და გვიბრძანა, წამომყევითო. ბორცვი ჩავგატარა, და თითქმის ქალაქამდე მივვიყვანა. ხილთან ექვსი ზარბაზანი იდგა; მეზარბაზნები თურმე აკლდათ. მეზარბაზნეთა წინამძღოლი გენერალი მარსო წინ მოგვეგება და, რომ გაიგო, მაინცელი ჯარისანი არიანო, ძალიან იამა და გვითხრა:

— გიშველათ ღმერთმა! ახლა კი გვიფთხილდეს მტერი. მგონი ერთიც აღარ ავაცდინოთ!

ესეც კმარა ჯარისკაცის ჯილდოდ! მართლაც და, კეხნაში კი ნუ ჩამომართმევთ, ისე დაუფიზნებდით ხოლმე ივანე სომი, იაკობ ჰაავი და მე, რომ არ მახსოვს, ერთხელ აგვეცდინოს. ჩემს დღეში არ დამავიწყდება ეს სიტყვები, რადგან მე იმ აზრისა გახლავართ, რომ ღირსეულს ქებაც უნდა და დაჯილდოებაც.

პარიზელი შეთქმულები იქვე ახლო იყვნენ და დაბინდდა თუ არა, მაშინვე ჩემი დის სანახავად გავეშურე. ჩვენებს არავის ვუთხარ, მივდივარ-მეთქი, მაგრამ ივანე სომი მიმხვდარიყო და უკან გამომდევნოდა. იქ რომ მივედი და დავინახე ჩემი და ლიზა თავისი ბიჭით კალთაში, კინაღამ გავგიჟდი სიხარულით. გარს პარიზელები შემოსხდომოდნენ, ჩიბუხს აბოლებდნენ და პოლიტიკურ ახალ ამბებს ლაპარაკობდნენ. გოყვიით შევვარდი და დავიყვირე:

— გამარჯვებათ თქვენის რესპუბლიკას გაუმარჯოს!

შეშლილსავით ვიყავ, ხან ვტიროდი, ხან ვიცინოდი.

— მიშელს გაუმარჯოს, მიშელს! — ყვიროდნენ პარიზელები, — სად იყავ, ვეჟო! შენი მიშელ, ელისაბედ-ქალო ადე და გადაჰკოცნე! წამოდგა ლიზა, პატარა მხარზედ გადიგდო და დამიწყო კოცნა;

თან ცხარე ცრემლით ტიროდა. მაშინ გამოაჩნდა ლიზას ჩემი სიყვარული. და და ძმა, ვიძახდი ჩემს გულში, როგორ არ ვეყვარები. მეც რომ მოვეკალით, ჩვენებური ერთიც აღარავინ ეყოლებოდა ამოდენა ჯარში!

— იცი, მიშელ, მაშინ ვიგრძენ შენი სიყვარული, როცა შენი სიკვდილი მითხრეს.

მარესკოსაც ძალიან ეამა ჩემი მისვლა. მერმე სომი მოვიდა და ახლა მას მიეგებნენ იმავე სიხარულით. ძველი მეგობრისთანა კარგი ხომ არა იქნება რა ამ ქვეყნად, რომ ჭირშიც ერთად ყოფილიყვეთ და ლხინშიც. ახლად შეძენილი კი ბევრი არაფერია!

გვინდოდა მთელი დამე ერთად გაგვეტარებინა, მაგრამ საყვირის ხმა მოისმა და წამოვიშალენით კიდევ; ხვალ სადილად ჩვენთან იყავითო, დაგვიძახეს. ის კი არ ვიცოდით, რომ ხვალ საშინელი ბრძოლა მოგველოდა; დამარცხებული ვანდელეები ბოპრეოში თურმე იკრიბებოდნენ. მაგრამ ტყუილიდა იყო იმათი ცდა, ამაოდ ჩაუვლიდათ ყველაფერი: ძლივს ისე შევიმწყვდით, როგორც ჩვენ გვინდოდა — ჩვენსა და მდინარე ლუარს შუა... ცარიელ მიწაზედ ვიწექ, თავქვეშ ცხრილივით დახვრეტილი გულდა მედო და ზედ დაგლეჯილი ფარაჯა მესურა, მაგრამ ისე მეძინა, თითქო ყუითუქში ვყოფილიყავ. გული დამშვიდებული მქონდა ლიზას ნახვით და სიზმარში სულ ხვალინდელ სუფრასა ვხედავდი: უზარმაზარი ჯამი მდგა წინ და ისე ჩამეყარა პური, რომ ჯარისკაცისვით ამართული იდგა შიგ კოვზი. საგვე ყანწი აჩქარებით უვლიდა სუფრას და ისე მოეშურებოდა, რომ უღვაშის მოწმენდას აღარ მაცლიდა.

რა ტკბილი სიზმარი იყო!

საქმე სულ სხვანაირად დატრიალდა. მთელი დამე სულ ის ამბავი მოჰქონდათ ჩვენს მზვერავებს, რომ მტერი ბოპრეოში მაგრდება და იქ გვიპირებს ლოდინსაო. გენერალ ლეშელს სჯეროდა ეს, მაგრამ კლებერი იძახდა, ეგ შეუძლებელია და სულ თავზედ ხელაღებულნი უნდა იყვნენ, რომ იქ დარჩნენ წყლის პირას და ლოდინი დაგვიწყონო. და მართლაც, ვანდელ ხალხს კარგად უნდა სცოდნოდა, რომ თუ ერთი უმუხთლა ბედმა და გამარჯვება ჩვენ დაგვრჩა, წყალს ველარსად წაუვიდოდნენ და ამიტომ ყოველი საშუალება უნდა ეხმარათ, რომ გაერღვიათ როგორმე ჩვენი ჯარები და ისევ თავიანთ ბუჩქნარში და აყრილ ჩაღუნაში დამალულიყვნენ. ლეშელს ეგონა, რაკი გლეხკაცები არიან, ამდენს ვერ მოისაზრებნენო, მაგრამ საქმე ის არის, უგუნური არ გეგონოს მტერი, თორემ ვაი შენი ბრალი. მეო-

რე დილას, გათავდა თუ არა სამხედრო ბჭობა, ბრძანება გამოვიდა, ისე დალაგდეს ჯარი, რომ ჩიტიც კი ვერ გადააფრინდესო.

იმ დღეს იყო, რომ მთელს ჯარს დაუარეს ცხენოსნებმა და ყველა რაზმს დაბეჭდილი ქაღალდები დაუბრუნეს. აი, რასა სწერდა კონვენტი ვანდემში მყოფ თავის ჯარს:

„რესპუბლიკელნო,

აჯანყებული ლიონი დაიმორჩილა რესპუბლიკამ; გამარჯვებული ჩვენი ჯარი უკვე შიგ იმყოფება და სასტიკადა სჯის ყოველს მოლაღატეს; ღირსეული სასჯელი მოელის ყველას, ვინც სიტყვით თუ საქმით ცდილა ძველი მეფობის და მტარვალობის შემოღებას, ვანდელა აკლია გაბრწყინვალებულ სამშობლოს და თქვენც უნდა გაიმარჯვოთ, ვანდემში მყოფნო! კმარა, რაც ხანი შეაწუხა ვანდელმა ხალხმა რესპუბლიკა კმარა მიდით, დაპყრობით და გაათავეთ! ჩვენი მტრები ყველანი ერთად უნდა იქმნენ დამარცხებულნი! მიდით და დაამარცხეთ, ვანდემში მყოფნო ნუ თუ ყველა ჩვენს ჯარებზედ უკან თქვენ უნდა იყვნეთ? ამოსწყვიტეთ აჯანყებულნი, დაიმსახურეთ სამშობლოსაგან დიდება და განაძლიერეთ რესპუბლიკა როდის უჯობნია პატიოსან ვაჟკაცისთვის მოლაღატეს, რომ ახლა აჯობოს? რას ელით, რას აყოვნებთ? გაიხსენეთ, რომ ეგლა აკლია სამშობლოს დიდებას, მიდით, მუსრი გაავლეთ მიგ ველურ ბრბოს და მიწის პირიდან ალგავეთ ის, რასაც დღეს ვანდეს უწოდებენ!“

იმისთანა ხმით შესძახა მთელმა ჯარმა — რესპუბლიკას გაუმარჯოსო, იმისთანა აღტაცებით მიეგება ყველა საერო კრების ბრძანებას, რომ თითქო ცხენებმაც გაიგეს რამეო, ყალყზედ აღგენ და ჰიხვინს მოჰყვენ. საკვირველი რამ ყოფილა ბრძოლის ჟინი, თურჲე საქონლის გატაცებაც კი შესძლებია. საკვირველი რამ ყოფილა, მაგრამ საშინელიც ყოფილა და ღმერთმან ინებოს, რომ ჩვენი ჯარები შემდეგშიაც იმისთანა წმინდა რასმე მსახურებდნენ, როგორც არის მტარვალობის ამოგდება და ადამიანთა გათანასწორება და იმედია, გამარჯვება ყოველთვის ჩვენსკენ იქნება.

ბოლოს, როგორც იყო, დამშვიდდა ჯარი. ხმა გავარდა, ვანდელეუბი სამ რაზმად მოდიან საბრძოლველადო. ჩვენც ეგ გვინდოდა და მზადებას შევუდექით.

ვანდელეების პირველი რაზმი შუადღის უკან გამოჩნდა, პირველ საათზედ. შორს, შორს პატარა ეკლესია მოჩანდა და მის ირგვლივ ჰიანჰველასავით ირევიდა ხალხი. ტყვეებმა გვიამბეს მეორე დღეს,

ეკლესიასთან იმიტომ დაგინახავთ ხალხი, რომ მთელი ჯარი აქ იყო და ღმერთს გამარჯვებას შესთხოვდაო; მწირველი რესპუბლიკის მოწინააღმდეგე მღვდელი მ. ბერნიე ჰყავდათ, რომელიც შემდეგში იმპერატორის უგულითადეს მეგობრად ითვლებოდა. წირვის შემდეგ ბერნიემ გამარჯვება აღუთქვა ვანდლებს და სასუფეველი ღვთისა იმათ, ვინც თავს დასდებდა ღვთისა და მეფის გულისთვის. ორმოცი ათასი კაცი იქნებოდა მეომარი და გარდა ამისა თან ჰყავდათ მოხუცებულები, ქალები და ბალები.

სამ რაზმად წამოვიდნენ ვანდლები. ჩვენი ჯარი ისე იყო გაჩუმებული, თითქო აქ აღარც კი არისო. მშვენიერი დღე იყო; შორიდან მოსულ ხმაურობაში ჯერ ვერას ვარჩევდით, მაგრამ რაკი მოგვიახლოვდნენ, დავრწმუნდით, რომ ლოცვით და გალობით მოდიოდნენ, თითქო ლიტანიას უვლიანო; აქა-იქ ცალკ-ცალკე გაისმოდა ხოლმე — ჩვენს მეფეს გაუმარჯოსო!.. მოგვიახლოვდნენ; ისე იყვნენ აღზნებულნი ეს ცრუმორწმუნენი, რომ იმისთანა საზარელი ჩემს დღეში არა მინახავს რა. გავარდა ზარბაზანი, ატყდა თოფის სროლა, გაისმა სამხედრო ძახილი და გაჩნდა ხელჩართული ბრძოლა.

მე და ჩემი ამხანაგი მეზარბაზნენი მარცხენა მხარეს ვიდექით, სულ ორი ათას ხუთასამდე კაცი და ჩვენსკენ, სულ ნაკლები რომ ვთქვა, ოცი ათასი მაინც მოდიოდა. მოდიოდა ზღვასავით ხალხი, დავუმზინებდით ზარბაზანს, ასობითა ვხოცავდით და ისინი კი სულ წინ მოიწევდნენ და თან გაშმაგებულნი — ჩვენს მეფეს გაუმარჯოსო! გაიძახდნენ.

აგერ ორმოცდაათი წელიწადი გადის მას შემდეგ და ამ ხნის განმავლობაში ბევრისაგან გამიგონია ამ ბრძოლის შესახებ სჯა; ზოგნი ამბობენ, ვანდლებმა ძალიან კარგი ქნეს, რომ რაზმებად დაეწყვენ და მხედრული წესით მიუხტნენ რესპუბლიკის ჯარებს; ეტყობა, დიდი ნიჭის პატრონი ყოფილა მათი მხედართმთავარი ბონშანიო. ზოგნი კიდევ სულ წინააღმდეგს გაიძახიან: მაგაზე მეტს სისულელეს ვერას იზამდნენ და კიდევ მაგან მოსტეხა კისერი, რომ მხედრულ წესრიგს უჩვევი ხალხი რაზმებად დააწყვეს და ისე მირეკეს ზარბაზნის ტუჩქვეშ, თითქო საყასბო საქონელი ყოფილიყოსო...

მე კიდევ ჩემსას მოგახსენებთ, რადგან ამ აზრთაგანი ერთიც მტყნარი სისულელეა და მეორეც: რა ნებავდათ ვანდლებს? თავიანთ თვალგადაუწვდენელ ბუჩქნარში დაბრუნება; ჩვენი ჯარის გარღვევა, რომ სამშვიდობოში გაეყვანათ მოხუცებულები, ქალები და ბავშვები. აი, მათი განძრახვა. და ჯარის გასარღვევად ხომ მარტო

ის არის საჭირო, რომ ერთ ალაგას მიიყენო, რაც კი ძალა გაქვს, და სულ იქით მიგზავნო, რაც ხალხი გყავს. რა გამოვიდოდა, რომ გამწვანდებოდა და ისე მოგვეგონებინა? ვერც სადმე ჩვენს ჯარს გაარღვევდნენ და ძალიანაც დააზიანებდნენ მათ ჩვენი ცხენოსნები. გზის გაკვლევა უნდოდათ, სხვა არაფერი... იმისთანა ძალით მოგვესიგნენ, რომ ცოტა არ იყოს, შეგვანძობეს კიდევ, მაგრამ სწორედ ამ დროს წამოგვეშველა მაინცელი რაზმი და, როგორც იყო, შევიმაგრეთ იმდენი ხალხი. რაკი ნახეს, რომ მარცხენა მხარეს ვერა გააწყეს რა, იხუვლეს და ყოვლად მოულოდნელად შუა მხარეს მიესიგნენ; იქაც ცუდად იყო საქმე, მაინცელები რომ არ ჩამველებოდნენ.

იმავე დროს გამოჩნდა ტყის პირიდან ვანდელების მესამე რაზმი და ღმერთია მოწამე, რომ იმაზედ საცოდავი მე ჩემს დღეში აღარა მინახავს რა. არეულად მოდიოდა იმდენი ხალხი, თოვლივით გათეთრებულ მოხუცს ბავშვი უდგა გვერდით, ზოგი იძახდა — ჩვენს მეფეს გაუმარჯოსო! ზოგი კიდევ მაღალი ხმით ლოცულობდა. რაზმი კი არა, გროვა იყო საბრალო ხალხისა, რომელიც ზღვის ტალღასავით მოდიოდა ჩვენსკენ.

იმავე დროს უკან გაგვიარეს გენერალმა მარსომ და სხვა აფიცრებმა და ყველგან ბრძანება გასცეს:

— დეე, მოგვიახლოვდნენ! ფრთხილად! ყური უგდეთ ბრძანებას! ზარბაზნები დატენილი გვქონდა, პატარუქი ანთებული და მიზანში ვილებდით ჩვენსკენ მომავალ ხალხს.

— მოდით რაღა, ვეყო! გაისმოდა ხან აქედან და ხან იქედან ვანდელების ტალღაში.

გავარდა ჩემი ზარბაზანი და, თითქო ცელი მოუქნიეს ყანასაო. ისე დაწვა ხალხი; მაგრამ თვალის დახამხამების უმაღლესე წინ წამოიწია. სულ სამას ნაბიჯზედღა იქნებოდნენ. გაესმა ბრძანება — ესროლეთო! და რვა ზარბაზანი ერთად დაეახალეთ საწყლებს. სწორეთ ქუჩა გეგონებოდათ, ისე გაევილოთ ყუმბარებს. ერთს წამს შესულგნენ უბედურები, ეტყობოდათ არ მოელოდნენ, რომ ასე დაზარალდებოდნენ; მაგრამ ჯერ ჩვენ ზარბაზნები არ დაგვეტენა, რომ კვლავ შეკრეს რაზმი და წინსვლა დაიწყეს; ისე გადმოთელეს იმოდენა მკვდრები, თითქო აღამიანზედ კი არა, უბრალო ბალახზედ დაღიანო. ორასი ნაბიჯი აღარც კი იქნებოდა ჩვენს შუა და იმისთანა სისწრაფით მოიწევდნენ წინ თოფგამოწვდილები, რომ ვიფიქრე. ახლა კი დავიღუპეთ, ჩვენ ამათ ვერ შევაყენებთ-მეთქი.

სწორედ ამ დროს წამოგვიბინეს წინ ცხენოსნებმა და იმისთანა ხელჩართული ბრძოლა გამართეს, რომ იტყოდით. მხეცები დარევიან

ერთმანეთს და სისხლით ველარ ძღებიანო. ამით ვისარგებლეთ და მსწრაფლ გავტენეთ ზარბაზნები. გავტენეთ თუ არა, მაშინვე აქეთ-იქით წავიდნენ ცხენოსნები და ჩვენ ისევ ზარბაზნები დავცალეთ. ამას კი ველარ გაუძლეს ვანდღელებმა და ისე დაიფანტნენ აქეთ-იქით, რომ აღარც მეფე აგონდებოდათ და აღარც უფროსების ბრძანება. ერთი მათი წინამძღოლი გიგივით დააქროლებდა თავის ცხენს, ხან აქეთ ეცემოდა და გაქცეულებს რაღასაც უყვიროდა, ხან იქით, მაგრამ ყურს აღარავინ უგდებდა. ჩვენ რომ მაშინვე მივყოლოდით, ადვილად მოვუღებდით ბოლოს. ვესტერმანი რომ იქ ყოფილიყო, იმან იცოდა, რასაც იზამდა, მაგრამ, სამწუხაროდ, ჯერ არ მოსულიყო და ჩვენმა გენერლებმა კი ვერა გაბედეს რა. გარბოდნენ ვანდღელები და ის საწყალი წინამძღოლი კი მაინც არ იშლიდა თავისას და შეშინებული ხალხის შეყენებას ცდილობდა.

მაშინ კი შეაერთეს ვანდღელებმა სამი რაზმი და ამ შეერთებულს ძალით წამოვიდნენ ჩვენსკენ; წინ ზარბაზნები გამოაწყვეს და დაგვიწყვეს სროლა. დაენახა თუ არა მათი მოძრაობა კლებერს, მაშინვე მიმხედარიყო მათ განზრახვას და საჩქაროდ ჩვენსკენ წამოვიდა. ჩადგა შუა რაზმში და დაგვიყვირა:

— აბა, თქვენი ჭირიმეთ, ბიჭებო! ცოტა კიდევ და სულ ლუარში ჩაეხარჩობთ მაგ ბინძურებს! რესპუბლიკას გაუმარჯოს! და ჩვენც ერთხმად შევძახეთ — რესპუბლიკას გაუმარჯოსო!

კლებერი იცინოდა, მის უკან მდგომი ოფიცრებიც იცინოდნენ, მაგრამ ვაი ამ სიცილს: ცაში ფუტკარივით ირეოდა ზუზუნა ტყვია და აქეთ-იქით პანტაპუნტით ცვიოდა ხალხი. მე რომ მკითხოთ, იმ დროს სიცილს ის მერჩივნა, რომ წინ გავსულიყავ და შევებოდი ვისმე. კლებერა კი იმისთანა მხიარულად იყო, იტყოდით ქორწილიდან მომავალი ელზასელიაო. გუშინ თურმე გენერალი მარსო ყოფილიყო მასთან მოსაკითხად და დღეს კლებერმა გადაუხადა პატივისცემა და ბრძოლის დროს მივიდა მასთან. იმისთანა მხიარული ღიმილით მიესალმნენ ერთმანეთს, რომ ყველას იმედი მოგვეცა გამარჯვებისა და გულდამშვიდებულნი ვიძახდით:

— ღმერთი მოწყალეა! ისე გავუმაგრდებით ამ ბრბოს, როგორც კაჟი და რესპუბლიკას კი არ შევარცხვენთ!

კარგმა გენერალმა ყოველთვის უნდა იცოდეს, რომ მთელი ჯარი იმას შესცქერის და, რაც უნდა დიდ მანძილზედ იყოს, მაინც კარგად ხედავს ყველაფერს. ხშირად გამარჯვება გენერლის სახის გამომეტყველებაზედ არის დამოკიდებული და კლებერმაც ძალიან კარგად იცოდა, რასაც სჩადიოდა.

ამ დროს დაიძრნენ კიდევ ვანდლები, ახლა კი ერთ რაზმად; წინ მოუძღოდნენ თავიანთი წარჩინებული მხედართმთავარი, სახელდობრ დელბე, ბონშანი, ლაროშეაკლენი, სტოფლე და ხალხს ამხნეებდნენ. თოფის ხმას გრიალი გაჰქონდა. აღარც ყვიროდნენ, აღარც ლოცულობდნენ, მოდიოდნენ ხმაგაქმენდილნი და უღმერთოდა სრესდნენ მკვდრებს და დაჭრილებს. უკანასკნელი ცდაა უნდა ყოფილიყო ეს ცდა, უკანასკნელი ცდა სასოწარკვეთილი ხალხისა. გავარდა თუ არა ჩვენი ზარბაზნები, მაშინვე გაჩერდნენ, გაცილებით უფრო შორს, ვიდრე პირველად და, თუმცა გვესროდნენ, წინ სვლას კი ველარა ბედავდნენ. ცოტა ხანი იდგნენ ასე და, რაკი წინამძღოლები საღდაც მიიმაღნენ, დაიშალნენ და ზურგი გვიჩვენეს.

გაიქცნენ და დავედევნენით გაქცეულთ! დავძახეთ მარსელური და მხიარული ძახილით და ყიყინით შევერეინით იმდენ ხალხს. ვესტერმანიც სწორედ იმ დროს მოვიდა და რადგან გაჯავრებული იყო, რომ ბრძოლას დასცდა, ჯავრი გაქცეულ ვანდლებზედ იყარა და ისე დაერია თავისი ცხენოსნებით, როგორც ქორი წიწილებს. შებინდდა. გვეგონა, გათავდა ომიო, მაგრამ სწორედ ამ დროს შემოგვიბრუნდნენ დამარცხებულნი და — ხომ ვიხოცებით და ვიხოცებით, ძვირად მაინც დაუსვათ მტერს ჩვენი სიკვდილიო! — იმისთანა მედგრად შემოგვიტიეს, რომ გაოცებულნი დავრჩით: სულ სამას-ოთხასი კაცი იქნებოდა, მაგრამ ისე შემოაპეს ჩვენი ჯარი. რომ შიგ შუაში მოექცნენ, მაგრამ ვერ გაგვიძღეს და თავი წაიხდნეს.

დიდი უბედურება და ღვთის რისხვაა ომი, მაგრამ მეტი უბედურება და ღვთის რისხვა ხალხის უგუნურებაა. ხალხის უგუნურება რომ არ ყოფილიყო, განა მამა ბერნიეს სიტყვას აპყვებოდა იმოდენი ხალხი?! რა ენაღვლებოდა ბერნიეს? განზედ გაღვა და სეირს უყურებდა, როდესაც ხალხის სისხლი ზღვასავით დიოდა! რა ენაღვლებოდა? შემდეგში რაკი ნახა, რომ რევოლუციამ გაიმარჯვა, თითონაც კანი იცვალა და ახალ მართებლობას კარღინაღლის ადგილსა სთხოვდა. მოდით თქვენ და ამის შემდეგ ანაფორას ენდეთ და მისი რჩევით თავი შესწირეთ რამეს.

იმ ღამეს გამარჯვებულნი ვანდლების ბანაკში დავრჩით. ათი ათასი კაცი ტყვე ვიშოვეთ, სულ ხნიანი, ოჯახისა და ცოლ-შვილას პატრონი კაცები. დიდი გავლენა. ჰქონდათ მამა ბერნიეს და ჩვენს მოწინააღმდეგე ბერებს და მღვდლებს უგუნურ ხალხზე; ვიცი, რომ ღღესაც დიდი გავლენა აქვთ, მაგრამ მე მაინც ვიტყვი, რომ ღმერთი სიმართლის და სამშობლოსა ყოველთვის აჯობებს ღმერთს

უგუნურებისას და დალატისას. მეტი უგუნურებადა იქნება, იმდენი ხალხი იმიტომ გვებრძოდა, რომ გვინდოდა ყელიდან საბელი აგვეხსნა და ყმობიდან გაგვეთავისუფლებინა. ან მეტი დალატი გნებავთ, საფრანგეთში პრუსიელებს და ინგლისელებს ეპატიეებოდნენ ჩვენს ამოსაწყვეტად?

ამაზედ ცხადი, მგონი, რომ არა იქნება რა, მაგრამ რას იზამთ, რომ ადამიანი თვალის გახელას არ მოინდომებს და თანაც ძალიან იუცხოვებს — აბა სად არის სინათლეო? რამდენი ხანი გავიდა მას შემდეგ და დღესაც გამოჩნდებიან ბევრნი თვალდახუკულნი, რომელთაც ვანდელები გმირებად და წამებულად გამოჰყავთ და რესპუბლიკელის ჯარები მტარვალებად. დარწმუნებული ვარ, ყველა ეს ვაჟბატონები, თუ დიდებულნი არა, დიდებულთა სამზარეულოში აღზრდილნი მაინც არიან და ბევრიც რომ იცრუნონ, ქეშმარიტებას ვერ დამალავენ და, აღრე იქნება თუ გვიან, ხალხი თითონვე გაიგებს, საით იყო სიმართლე.

ეს ბრძოლა იმიტომ აგიწერეთ, რომ დიდი ბრძოლა იყო და ძალიანაც გავიმარჯვეთ. ჩვენდა საუბედუროდ, ამით არ გათავდა ომი. უნიფხოთა გენერალს ლეშელს საერო კრებისთვის დაწვრილებით ეცნობებინა ბრძოლის ამბავი და ისე გამოეყვანა საქმე, რომ წინამძღოლობაც თავისთვის მიეწერა და გამარჯვებაც. მართალია, ბრძოლის დროს ლეშელი არავის დაუნახავს, არამც თუ წინამძღოლობა შესძლებოდეს, მაგრამ ვინ იყო პატრონი! ამ წერილის შედეგი ის იყო, რომ ლეშელი მართლა წინამძღოლად გავიხადეს და ერთი კარგი დამარცხებაც შეგვიძინა, მაგრამ მაგას თავის დროზე მოგახსენებთ. ახლა განვაგრძოთ.

მეფის მომხრეები სწერენ თავიანთ წიგნებში, გამარჯვებულმა რესპუბლიკელებმა ქ. შოლენ დასწვესო. ტყუილია! ბრძოლის წინა საღამოს ჩვენი ჯარები რომ შევიდნენ შოლენში, წესისამებრ სამხედრო მოედანზედ თავისუფლების ხე დარგეს. ეკლესიიდან თეთრი დროშა გამოიტანეს ანთებულნი სანთლებით და ისე დაიარეს მთელი ქალაქი; ვინც კი რესპუბლიკის მომხრე იყო, მაშინვე მიუღდა ჩვენს ჯარს და ძმობა შეჰფიცეს ერთმანეთს. მაგრამ ამ დროს ქალაქს ვანდელების ჯარი შეესა სტოფლეს წინამძღოლობით, საცა კი პატრიოტები ეგულებოდათ, სახლ-კარი გადაუწვეს და... თავიანთი სისაძაგლე ჩვენ დაგვაბრალეს. ეგ ჩვენი საქმე არ არის! რესპუბლიკელნი თავის დღეში არა ყოფილან ისეთი მხეცები, როგორიც ღვთისა და მეფის მიმდევარნი ბრძანდებიან. თუ დაწვეით ან დახვრიტეთ ვინმე, მარტო იმიტომ, რომ ძმათა შორის ომი გავეთავებინა როგორმე, თორემ დღესაც გაუთავებელი იქნებოდა. მამ როგორ

გვეგრძნობინებინა უბირი ხალხისთვის, რომ მათი ბარბაროსობა თითონ იმათვე უფრო ავნებს, ვიდრე სხვას?

ვესტერმანი კი მთელი ღამე სდევდა ვანდელებს და ბევრიც თურმე დახოცა. ბოპრეოში დაეწია უმთავრეს მათს ბრბოს, მაგრამ ისე თურმე იყვნენ დაღლილები, რომ ვერც კი გაიგეს მდევრის მისვლა. წინამძღოლნი გაპქეევოდნენ, ხალხი კი ზოგი ტყვედ დაეჭირა, ზოგი დაეხოცა. მეორე დღეს, 18 ღვინობისთვის 1793 წ. გავიგეთ, ვესტერმანმა ბოპრეოს ციხე აიღო და ათი ზარბაზანი იშოვა, დიდძალი თოფის წამალი, ყუმბარები, პური, ქერი და, ერთი სიტყვით, ყველაფერი, რაც კი ციხეში გამაგრებულ ჯარისთვის არის საჭირო. ძალიან კარგად იყო ჩვენი საქმე, მაგრამ ამოდენა სიარულის და ბრძოლის შემდეგ ძალიან დაიღალა ხალხი და დასვენება უნდოდა.

ბოპრეოში დავისვენეთ ერთი დღე. სწორეთ ამ ერთი დღით ისარგებლეს ვანდელებმა და ორმოცი ათასი კაცი და ქალი თურმე გავიდა იმ დღეს ლუარის გაღმა მხარს და ერთ კარგა გამაგრებულ ალაგს შეეფარა. შერეკედნენ. თურმე წყალში საქონელს, თითონ კულზე მოეჭიდებოდნენ და ისე გადიოდნენ. გავიდნენ გაღმა და სრულიად მოულოდნელად დაეცნენ ერთ პატარა სიმაგრეს, რომელშიც რესპუბლიკელი კაპიტანი იმყოფებოდა თავისი რაზმით. ისე მოულოდნელად თურმე მიუხტნენ, რომ ერთიანად ამოჟლიტეს მთელი რაზმი. ჩვენ რომ იმ დღეს სიარული შეგვძლებოდა, ვერაფერს გადაგვრჩებოდა და ომიც გათავდებოდა; ეს იმას ამტკიცებს, რომ ბრძოლაში გამარჯვებულმა, თუ უნდა გამარჯვების ნაყოფი იგემოს, არც კი უნდა იფიქროს დასვენება. ერთი დღის დასვენებამ ის შეგვიძინა, რომ მთელი ორი თვე კიდევ გავწვალე ვანდელებმა, მანამ ბოლოს მოვუღებდით.

დიდძალი ხორაგი და ზარბაზნები ვიპოვეთ წყლის პირას ვანდელებისაგან დატოვებული, მაგრამ ყველაზედ უმეტესად ტყვეების დაბრუნება გვესიამოვნა. სამი ათასზე მეტი ტყვე გამოეშვათ ვანდელებს და ისე განხარებულნი გამორბოდნენ ჩვენი ჯარისკენ, რომ სწორედ გიყები გეგონებოდათ; მით უფრო, რომ ყველანი შიშველტიტველნი იყვნენ და იმოდენა თმა და წვერი გაეშვათ, თათქო ტყის ნადირები არიანო; ცარიელი ძვალი და ტყავილა იყვნენ უბედურები.

თმები ამეშალა, როცა დავინახე ჩვენსკენ მომავალნი და ვიფიქრე, მეც ხომ ასე ვიქნებოდი, ტყვედ რომ ჩავვარდნოდა იმ მხეცებს-მეთქი. და ამ ფიქრში რომ ვიყავ, უცბად ერთი აწოწილი ვიღაც მომვარდა და — მიშელ, ველარა მცნობო? შემომძახა.

ძლივძლივობით ვიცანი ჩვენი მარკოზ დივე; ლაზარესავით ჩამომხმარი, ცარიელი ჩონჩხილა იყო, და თუმცა საზიზლრად მეჩვენა, მაგრამ ისე შეამა მისი ნახვა, რომ გადავებზევ და კოცნა დავუწყე. ის კი ტიროდა! ბავშვივით ტიროდა ჩვენი გულკაჟი მარკოზი!.. რაჟი ბანაკში მივედით, მაშინვე პარიზელ შეთქმულთა ბინა მოვძებნე და ლიზასთან მივიყვანე. ლიზა, მარესკო და პარიზელები ერთად იყვნენ. შეველ და შევძახე: აი, ჩვენი მარკოზი, მამულიშვილნი!

ყველანი განცვიფრებულნი გვიყურებდნენ. პარიზელებიც კი აღარა ხუმრობდნენ.

— ღმერთო დიდებულო! ნუ თუ მართლა! — შეჰყვირა ლიზამ. წამოხტნენ პარიზელები და საცა კი ქოთანში დანარჩენი შეკამადი ეგულებოდათ, წინ დაუდგეს მარკოზს. ძალიან დამშეული იყო საწყალი და ისე მივარდა საქმელს, როგორც გიჟი. მერე ღვიწრო მიაწოდეს. მოიწათა საღვინე და დიდი ხანი სვა; ბოლოს, როცა გული მოითანაღრა, სთქვა:

— ოჰ, თქვენ გიშველათ ღმერთმა! ძლივს ქრისტიანებში არ ჩავევარდი! იმისთანა უდიერი ხალხი ჩემს ღლეში არსად მინახავს. დაიჯერებთ, ღლეში კაცზედ ერთ გირვანქა პურს გვაძლევდნენ. რას გაგვიხდებოდა? მეტადრე მე? ერთ ლუკმად არა მყოფნიდა. ჯოხი და წიხლი და ყოველი შეურაცხყოფა კი, რამდენიც გნებავთ! ისე გვცემდნენ, რომ... ხმის ამოღების ნებას არ გვაძლევდნენ! ხმას ამოვიღებდით და, ვაი ჩვენი ბრალი! მოგვდგებოდნენ ჯოხებით და უღმერთოდ გვცემდნენ, მანამ თქვენ მოგვეშველებოდით. მეც ვიყავი გაჩუმებული: ცემას გაჩუმება არ მერჩივნა? ცემით ხომ გვცემდნენ და, ვინც გაბედავდა და უსაყვედურებდა რასმე, მაშინვე დახვრეტდნენ. ეგეც არაფერი, საშინელი ის იყო, რომ იმ რეგვენთ ჩვენი გადაბირება უნდოდათ და სულ იმას ჩაგვჩიჩინებდნენ, პოლიტიკური აზრები გამოიცვალეთო; მოვიდოდა ხოლმე იმათი მღვდელი ბერნიე და დაგვიწყებდა ქადაგებას. თან პურსა და ღვინოს მოიტანდა: ამით მაინც შევაცდენ დამშეულებსო... და ბევრიც შეაქდინა! ბევრმა დაიძახა — ჩვენს მეფეს გაუმარჯოსო! პურისა და ღვინის გულისთვის. მე კი სიკვდილი მერჩივნა რესპუბლიკის წინააღმდეგობას და კარგი ამხანაგები რომ არა მყოლოდა, იქნება ღლეს ცოცხალიც არა ვყოფილიყავი.

აი, რა გვითხრა გამხიარულებულმა მარკოზმა. ზოგი თამბაქოს სთავაზობდა, ზოგი ჩიბუხს. მაშინვე უშოვეს გულა, ტანისამოსი და იარაღი. ძნელი საშოვარი კი არ იყო, იმდენი ვეჭონდა ვანდელუბისაგან დატოვებული, რომ ზიდვა გვიჭირდებოდა. იმავე ღლესვე გა-

პოვაწყეთ დაბრუნებული ტყვეები, — გავკრიჭეთ, გავბანეთ, გავალა-
ვაზეთ და თავ-თავიანთ რაზმში ჩავაყენეთ.

ამ ტყვეების შესახებაც იცრუეს მეფის მომხრეებმა! იმიტომ გა-
მოვეუშვიტ, რომ შეგვეცოდნენო. ტყუიანი პირველი ისა, რომ და-
მარცხებულნი და ლტოლვილნი თან ველარ იყოლებდნენ სამი ათას
სულს, და მეორე კიდევ ისა, რომ თუ სულ ერთიანად არ დახოცეს,
ეგ იმიტომ, რომ შეეშინდათ, რესპუბლიკელებმაც ამით არ გადაგვი-
ხადონო. მარკოზ დივემ გვიამბო, წმ. ფლორანის ეკლესიის გალავან-
ში შეგვრეკეს ტყვეები და ზარბაზნები დაგვიმიზნეს, უნდა დავე-
ხოცნეთო. თურმე მისცვივდნენ წინამძღოლები და ძლივსძლივო-
ბით ჩააგონეს ველურ ბრბოს, რომ რესპუბლიკელებსაც ჰყავთ ტყვედ
ვანდლები და ისინიც ასევე დახოცავენ ჩვენს შვილებს და ძმებ-
სო. კიდევ კარგი, რომ იმდენ უბირ ხალხში რამდენიმე კაცი მაინც
ერია შეგნებული, თორემ მართლა სულ ამოხოცავდნენ და ჩვენც
ძალაუნებურად დაგვახოცინებდნენ ტყვეებს.

XII

ვანდლებს ძალიან ადვილად შეეძლოთ ნანტის ან ანეერის აღე-
ბა. გენერალი ლეშელი ამტკიცებდა, მდინარე ცურვით უნდა გავი-
დეთ, რადგან ნაეები არა ვგაქვს, და მტერი ამოვწყვიტოთო. საერო
კრების წარმომადგენელნი კარიე, ბურბოტი, მერლენ ტიონვილე-
ლი და ყველა ჩვენი გენერლები კი იმ აზრისანი იყვნენ, რომ ეს შე-
უძლებელი იყო. ბოლოს, რომ ველარა გააწყეს რა, მერლენ ტიონ-
ვილელმა უთხრა:

— აგრე იყოს, გავცურდეთ, ოღონდ ჯარს შენ უნდა გაუძღვე
და პირველად წყალში შენ უნდა შეცურდე!

ამის გაგონებაზედ ისე გაჩუმდა ლეშელი, როგორც თევზი და
მაშინვე დათანხმდა ჩვენი გენერლების აზრს. ჯარი სამად გაჰ-
ყვეს — ერთი ნანტის საშველად გავზავნეს, მეორე — ანეერისა და
მესამე წყალს უნდა გასულიყო როგორმე და ვანდლებს დასცი-
ვოდა.

მე ანეერისკენ მიმავალ რაზმში მოვექეცი.

ეს სწორედ იმ დროს იყო, როდესაც ჩვენს ჯარს ვატიწში ავ-
სტრიელები დაემარცხებინა. მაშინ პირველად გაისმა ივანე ქურ-
დანის სახელი, რომელიც იმ ორი წლის წინათ თავის ნებით ჩაეწერა
ჯარში უბრალო ჯარისკაცად, ცოტა ხანში გენერლობა მიიღო
და ისე დაამარცხა ავსტრიელები, რომ საფრანგეთი განსაცდელიდან
იხსნა. მართლაცდა, იცვალნენ დრონი, თორემ ვინ აღირსებდა ვილა-

ცა უურდანს, ლიმოყელ მეწვრილმანეს, გენერლობას და მხედართ-
მთავრობას?!
იმავე დროს გავიგეთ დედოფლის მარიამ-ანტუანეტას მოკვლა და

ჟირონდელების დაფანტვა; მაგრამ ისე გვიხაროდა ყველას ავსტრიე-
ლებზედ გამარჯვება, რომ ამ ამბებს ყურადღებაც არ მივაქციეთ.
გაზეთები ქვეყნის მოღალატე არისტოკრატების გვარებით იყო
სავსე და, გარდა ამისა, იმისთანა უდიერად გვექცეოდნენ ჩვენი მტრე-
ბი, როდესაც ხელთ გვიგდებდნენ, რომ, ლეთის წინაშე, არც არავის
დედოფალი შესცოდებია და არც ჟირონდელები.

ანჟერში არც კი გავჩერებულვართ, რადგან ვანდელები ლავა-
ლისკენ თურმე მიდიოდნენ და იმდენ სისხლს აქცევდნენ გზა-
დაგზა, რომ ქვეყანა თრთოდა, ვანდელების გენერალი ბოშანი
მომკვდარიყო და იმისი ალაგი ერთ ყმაწვილკაცს დელაროშეაკლენს
დაეჭირა. ერთ ქალაქში ამ ახალ გენერალს რესპუბლიკის მომხრე
მამასახლისი და მსაჯული დაეხვრიტა სრულიად უდანამაჟლოდ.
ჩვენ გვისაყვედურებენ, გილიოტინა სისხლით ველარ გააძღეს!
რატომ ის კი არ ახსოვთ, რომ სიკეთეს არც ჩვენ გვაყრიდნენ, როცა
ძალა იმათკენ იყო?

ლავალთან ჩვენი ჯარი დაემარცხებინათ, ექვსი ათასი კაცი, და
ახლომახლო ვინც კი პატრიოტი ეგულებოდათ, ყველანი დაეხვრი-
ტათ. ამ ამბებმა ძალიან შეგვაწუხა, რასაკვირველია, და ესე მივე-
შურებოდით, რომ აღარც ძილი გვახსოვდა, არც დასვენება. საში-
ნელი დარი იდგა, კოკისპირულად წვიმდა; იმისთანა ტალახები იყო,
რომ კოჭამდე იფლობოდნენ ცხენები და ძლივსლა სძრავდ-
ნენ ზარბაზნებს. ავდარი იდგა და უფრო ავ გუზნებაზედ ჩვენ ვი-
ყავით, რადგან ვგრძნობდით, რომ კარგი დღეები გაჰქრნენ და
ზამთარი გვეპარებოდა.

დანიშნულ ადგილზე რომ მივედით, ჩვენი ჯარის ორივე რაზ-
მი უკვე იქ დაგვხვდა შეკრებილი. ვესტერმანი, აგერ ორი საათი
იქნება, მტრის წინა რაზმებს ეომებოაო, თქვეს. ქუჩებში სასოწარ-
კვეთილი, იმედმიხდილი მოქალაქენი იდგნენ და ყველას ვესტერ-
მანის ამბავს ეუბნებოდნენ: დავილუპებით, თუ დამარცხდით! მაგ-
რამ არავინ რა იცოდა, რადგან კარგა წინ იყო წასული. ლამის ათ
საათზედ დაბრუნდა ვესტერმანი თავის რაზმით, მაგრამ ვაი იმ
დაბრუნებას: წაეტყუებინათ ვანდელებს ჩვენი ჯარი, ხაფანგში
გაებათ და კინაღამ სულ ერთიანად ამოეხოცათ. კიდევ კარგი, რომ
ღამე იყო და ძალიან ბნელი ღამეც, თორემ იქნება შიგ ბანაკში
შემოგვსეოდნენ.

გათენდა და დაიწყო ბრძოლა... მაგრამ რაღა თავი შეგაწყინოთ,

ლეშელის წყალობით ისე დავმარცხდით იმ დღეს, ისე, რომ ქუდა-გადაგლეჯილები მოვრბოდით ბრძოლის ველიდან. მოვრბოდით და, რაც კი შეგვეძლო, მტერს ვიგერიებდით. ბნელოდა, ერთ ადლ-ზედ არა ჩანდა რა და იმ საშინელ ხმაურობაში, იმ ჯოჯოხეთში, სადაც ზარბაზანი ჰქედა, თოფის სროლა ერთს წამს არ შეწყვეტილა და ადამიანის ყიჟინს ცხენების ჭიხვინი უერთდებოდა; იმ ჯოჯო-ხეთურ ხმაურობაში ერთი იმისთანა კივილი შემომესმა, რომ თავით-ფეხამდე ყრუანტელმა დაშიარა. ვანდლები გარს შემო-ხვეოდნენ პარიზელ შეთქმულთ, ერთზედ ასნი მიდიოდნენ და საშინელი ბრძოლა ჰქონდათ. თან ღიზას კივილი ისმოდა:

— მხდალნო! მხდალნო! ეგ არის თქვენი ვაჟკაცობა, რომ ერთ-ზედ ასნი მოდიხართ! სიკვდილი ან გამარჯვება! რესპუბლიკას გაუპარჯოს!

დავანებე ჩვენებს თავი და ღიზასკენ გავექანე. ჩემი დის ურემს გარს შემორტყმოდა ათიოდ ვანდელი. ურემის თავში ღიზა იდგა, ხელში შუბი ექირა და ისე მარდად ათამაშებდა, რომ სამაგალი-თოდ იგერიებდა მტერს. ურემის გვერდით სახლი იწოდა. იქვე ქუჩა-ში მაინცელი რაზმი იდგა და ერთ მათგანს დროშის ჰაგიერად სისხლში ამოსვრილი პერანგი აემართა ნიშნად სისხლისძიებისა. ქუჩაში მთასავით იდგა მკვდრები. ყოველი მხრიდან ვანდლები მორბოდნენ ყვირილით — ჩვენს მეფეს გაუმარჯოსო! მაგრამ მე ჩემი დის მეტი არავინ მომგონებია. მგელივით შევარღვიე იმდენი ხალხი, ერთი ნახტომით მივეარდი ურემთან და შევეყვირე:

— აქა ვარ, ღიზა, ნუ გეშინია!

მეც არ ვიცი, როგორ მომივიდა, ოთხი თუ ხუთი კაცი ისე წა-ვაქციე, რომ წვეთი სისხლი არ გამომდენია. სხვები მაშინვე გაი-ფანტნენ, ალბად ეგონათ, ამას ამხანაგებიც ეყოლებათ. მარტო მაშინ მიცნო ღიზამ.

— არიქა, მიშელ, ჩემს ბიჭს უშველე! ჩქარა, წაიყვანე აქედან! აგერ, მოდიან, ის ღვთის მტრები!

მე კი მივეარდი საქონელს და დავკარ, რაც ძალი და ღონე მქონ-და. მართალია, ფრთხებოდნენ და მკვდრებით სავსე ქუჩაში გავლა არ უნდოდათ, მაგრამ, როგორც იყო, გავატარე და შიგ შუა მაინცელ რაზმში შევიყვანე. გონებაზედ მარტო მაშინ მოვიდა საწყალი ღიზა, როდესაც ნახა, რომ შიში აღარაფრისა ჰქონდა. წამოხტა და, რაც ძალი და ღონე ჰქონდა, შესძახა:

— რესპუბლიკას გაუმარჯოს! სიკვდილი მტარვალთ!

გულში მაგრა ჰყავდა ჩაკრული თავისი პატარა კასსიუსი და მარესკო აღარც კი აგონდებოდა.

ცოტა ხანს უკან დაიძრა რაზმი და ჩვენც თან გავყევით. მარესკო თურმე იქვე შორიახლოს ყოფილიყო დაჭრილი; მოვიდა, როგორც იყო, ცალი ხელით ურემს დაებლაუჭა და თან იმისთანა მადლობას მიხდიდა, თითქო ჩემთვის სულ უტახონი ყოფილიყვნენ ჩემი და ლიზა და ჩემი დისწული.

მთელი დამე ისე ვიარეთ, რომ არავინ იცოდა სად მივდიოდით. თუ იმედი გვქონდა ვისიმე, ისევ კლებერისა: ვიცოდით, რომ ჩვენთან იყო და საქმეს არ წაახდენდა. ჩვენი რაზმის წინ სისხლით მოსვრილი პერანგი მიჰქონდათ.

გათენდა. დავდექით. მივიხედ-მოვიხედე და იქვე ჩვენს ვერდით ივანე სომი კი დავინახე. ორი ზარბაზანილა გადარჩენოდა და იმისთანა სიყვარულით სწმენდდა და ასუფთავებდა მოხუცებულ სომი ზარბაზნის ლულებს, რომ იტყოდით, — ამ კაცის ცოლიც ეს არის და შვილიცაო. თურმე მკვდარი ვეგონე და, რომ დამინახა. ძალიან გაეხარდა.

— შენა ხარ, მიშელ? მე მეგონა, თავი გაგადგებინეს იმ უღმერთობებმა-მეთქი.

გარს ჯარისკაცები შემოჰხვევოდნენ და ალერსი დაუწყეს პატარა კასსიუსს, რომელიც მხიარულად იცინოდა, — ალუო, — იძახდა და ფუნთუშა ხელებს აფათურებდა. საკვირველია, როგორ არ დაყრუვდა საწყალი ბავშვი! რაც იმან იმ დღეს ზარბაზნის ქვეაქუხილი აიტანა, სხვა რომ ყოფილიყო, იმის მეათედსაც ვერ გაუძლებდა. როგორ ავიწეროთ, რა ყოფაში იყო ჩვენი ჯარი? თითონ კლებერის სიტყვას მოვიყვან, რომ უფრო კარგად წარმოიდგინოთ ჩვენი უბედურება: თავით-ფეხამდე სველნი ვიყავით, ვინც ვიყავით, და აღარც კარავი გვქონდა, აღარც ფეხსაცმელი, აღარც ტანისამოსი, აღარც რამ ჭურჭელი, რომ შეჭამადი შეგვედგა. დროშას ოცი, ოცდაათი და, სულ ბევრი რომა ვთქვა, ორმოცდაათი კაცი თულა მისდევდა და ისინიც ისე იყვნენ დაღლილნი და დამშეულნი, რომ სასოწარკვეთილნი სულ იმას გაიძახოდნენ, — ვინც მხდალი იყო, თავს უშველა და ჩვენ კი ტყუილუმბრალოდ ვიღუპებითო!

და სწორედ ასეც იყო. რა უფლება ჰქონდა ლეშელს, რომ მხედართმთავრობა მოგვინდომა? არავითარი, გარდა იმისა რომ ურცხვი და თავხედი კაცი იყო. საცა კი იმისავით ურცხვი და უსაქმური იყო ვინმე, რომელნიც სიტყვით ქვეყანას გადააბრუნებენ და საქმით კი ყველაზედ უკან იმალებიან, რაკი თოფი გავარდება, დიად, საცა კი იმისავით კვებნია და არაქნია მამეზღარა იყო ჩვენს ჯარში, ყველა იმის მზეს ჰფიცავდა. საუბედუროდ, ამ ვაჟბატონებს დიდი გავლენა ჰქონდათ თავიანთი ყვირილით და ჯაშუშობით; მოლაპარაკე რომ გე-

ნახათ, დევგმირი გეგონებოდათ; მაგრამ ბრძოლის ველზედ კი იმის-
თანა ლაჩარნი იყვნენ, რომ ჩიტებისთვის ამართული საფთხობელისა
ეწინოდათ. მგონი ვანდელეები სულ იმასა ლოცულობდნენ, ნეტავი
სულ ასეთები იყვნენ რესპუბლიკელებით.

ერთი სიტყვით, ძალიან გადაგვიხადეს მეფის მომხრეებმა შო-
რეს დამარცხება და მით ერთხელ კიდევ დაგვიმტკიცეს, რომ გამარ-
ჯვება ჯარზედ კი არა, იმაზედ არის დამოკიდებული, ვინ ჰყავს
ჯარს წინამძღოლი—გენერალი თუ ვირი! რაკი გაიმარჯვეს, იფი-
ქრეს, ახლა კი ბოლო მოვუღეთ რესპუბლიკასო და ნორმანდიაში
გადავიდნენ, რომ იქ ინგლისელებს მიშველებოდნენ. მაგრამ ინ-
გლისელი პიტტი უბრალოდ და თავისი ერის უსარგებლოდ ხელსაც
არ გაანძრევდა; ტყუილად კი არ იძახიან ინგლისელები, ჩვენ პიტ-
ტისთანა სასარგებლო მინისტრი სხვა აღარავინ გვეყოლიაო. ის
თავისი ერის გაძლიერებას ცდილობდა და მანამ ჩვენ ერთმანეთს
ვებრძოდით, ის აქეთ-იქით ახალშენებს გვართმევდა და ინგლისელ
სავაჭრო გემებს და ინგლისურ საქონელს გზავნიდა მთელი ქვე-
ყნის ზღვებში. ნეტავი ჩვენ როდისლა გვეყოლება იმისთანა მინის-
ტრი? ვითომდა, რატომ? პიტტი დაეხმარებოდა ვანდელებს, ოღონდ
სამაგიეროდ ერთ-ერთ ჩვენს ნავსადგურს თხოულობდა ლამანშის
სრუტეში. მაგაზედ ადვილი რა არისო, თურმე შესძახეს ვანდელე-
ბა და ქ. გრანვილს შემოარტყეს ჯარები—ავილოთ და საფრანგეთის
მტრებს მივცეთო.

გრანვილელებმა, რასაკვირველია, არ ინდომეს ინგლისელების
ქვეშევრდომად ყოფნა და გაამაგრეს ქალაქი; რომ ნახეს ვანდე-
ლებმა, მოქალაქეთ ისე გაუმაგრებიან ქალაქი, რომ მის აღება შეუძ-
ლებელიაო, თავად არტუას აცნობეს,—მოდო და დაგვეხმარე, შენტვის
ვაქცევთ ამდენ სისხლსაო! მაგრამ თავადი არტუა ძალიან ფრთხი-
ლი კაცი ბძანდებოდა, ეწინოდა იმ არეულობაში არა მომხედეს რაო
და, ვანდელეები კი არა, მთელი საფრანგეთიც რომ ამომწყდარიყო
იმის გულისთვის, ის მაინც თავს არ აიტკივებდა იდგნენ და ელო-
დნენ ვანდელეები, ან ახლა გამოჩნდება, ან ახლაო! მაგრამ ამოდ, არც
სადმე თავადი არტუა მოჩანდა და არც მისგან გამოგზავნილი
ჯარი.

დიდძალი ხალხი დახოცეს გრანვილის მიდამოში და რაკი დარ-
წმუნდნენ, რომ ქალაქის აღება შეუძლებელი იყო, თავი დაანებეს
იქაურობას. მე იქ არა ვყოფილვარ, მაგრამ კარგად ვიცი ეს ამბე-
ბი, რადგან გრანვილის გარშემორტყმამ ისე აღაშფოთა მთელი
საფრანგეთი,— არა მარტო პატრიოტები, არამედ ყოველი პატიო-

სანი მამულიშვილი, რომ დიდი და პატარა ამბავდლა ლაპარაკობდა. ნეტავი რა უფრო სამარცხვინოა: უცხოელების, სამშობლოს მოსისხლე მტრების შემოყვანა, თუ, როგორც თავადმა არტუამ ინება, საწყალი ხალხის აჯანყება და მერე კი ღვთის ანაბარად მიტოვება?

ზღვის პირად რომ ეს ამბები ხდებოდა, ჩვენს ჯარში სულ სხვაგვარმა აღშფოთებამ იჩინა თავი: მთელმა ჯარმა იცოდა, რომ უკანასკნელი ჩვენი დამარცხება ლეშელის ბრალი იყო და სულ იმას გაიძახოდნენ,—არ გვინდა ლეშელი, ისევ ჩვენი ძველი გენერლები დაგვინიშნეთო! მღელვარება მაინცელ რაზმში დაიწყო პარველად, რომელიც კლებერს ნდომობდა თავის გენერლად. საერო კრების წარმომადგენლებს ისე ეშინოდათ გენერლების დალატისა, ისე კარგად ახსოვდათ ლათაიეტის და დიუმურიეს საქციელი, რომ სულ იმის ცდაში იყვნენ, რომ არც ერთს გენერალს ჯარზედ გაგლენა არ შეეძინა; ნახეს თუ არა, მაინცელი რაზმი და მასთან ერთად მთელი ჯარი კლებერის სახელს გაიძახისო, ვრცელი მოხსენება გაუგზავნეს კონვენტს. კონვენტმა ბრძანება გასცა, მაინცელი რაზმი დაიშალოს და ჯარისკაცები სხვადასხვა რაზმებში იქნან გაფანტულნაო.

ასე კი გაუქმდა ეს გმირი და სამშობლოს წინაშე დიდად დამსახურებული რაზმი. მიზეზი მის გაუქმებისა ის იყო, რომ გამარჯვებას იყო ჩვეული და სულით და გულით უყვარდა თავისი გმირი წინამძღოლები, რომელნიც ყოველთვის თავგანწირვით იბრძოდნენ სამშობლოს დიდებისთვის.

ერთმა დალატმა კიდევ იჩინა თავი იმ დროს და უფრო შეაფიქრია სერო კრებაც და ქვეყანაც; ნუარმუტიეს კუნძულზედ მყოფ ჯარის უფროსს ვილანდს ვანდელეებისათვის მიერთმია ციხის გასაღები და თავისი ხმალი... იმისთანა დრო დადგა, რომ ძმა ძმას ველარ ენდობოდა და მამა შვილს; ისე ფრთხილობდა ყველა, რომ ერთიბეწვვა, სულ მცირე, ეჭვი კმაროდა, რომ კაცისთვის გილიოტინით თავი მოეგდებინებინათ.

ჯარი ისევ აწყერისკენ გაისტუმრეს და იქ ხელახლა დაწყეს რაზმებად. მე ისევ არტილერიაში მოვექეცი ოფიცრის ნაცვლად, მაგრამ იმოდენა ტანჯვა გამოვიარე უკანასკნელ დროს, იმოდენა შიშოლი და სიცივე—არც ტანისამოსი გვექონდა, არც ჯამაგირი გვეძლეოდა და ხშირად პურიც კი გვაკლდა—რომ ხელახლად ავად გავხდი და ისევ სისხლი ვაღებინე. ის იყო აფიცრის ნაცვლობა მიბოძეს და, არ გასულა სამი თუ ოთხი დღე, სააჯადმყოფოში კი მიმიყვანეს, ძველი ჭრილობა ეხლაც თავისას მიშვრებოდა და რაც მე სისხლი

ვალბინე, მიკვირს ცოცხალი როგორღა ვიყავ. ესეც არ მაკჳარეს და სისხლი გამომიშვეს. ისე გავხდი, ისე, რომ სამარიდან ამოყვანილს დავემსგავსე და ცოცხალსა ვტიროდი ჩემს თავს:

— წასულია შენი საქმე, ჩემო მიშელ! თუ შენი ქვეყნის ნახვა კიდევ გელირსა, ერთი კარგი კვლევტარი ნუ გშურს წმინდა გიორგის ხატისთვის.

ნოემბერი იყო. საშინელი ქარი ქროდა ზღვიდან და თან იზოდენა ღრუბლებს მოერეკებოდა, რომ დღე და ღამ განუწყვეტლივ წვიმდა და, თუმცა საავადმყოფოები გატენილი იყო დაჭრილებით და ავადმყოფებით; თუმცა ჭირივით მეჯავრებოდა საკაცების დანახვა, რომლითაც მიცვალეზულს გაასვენებდნენ ხოლმე; თუმცა აქეთ-იქით ხშირად ისმოდა: — ეჰ, ესეც მოკვდა, ახლა ჩემი რიგიაო,— მაგრამ იმისთანა დარები იდგა, რომ ამას ყველაფერს ვითმენდით და ცოტა არ იყოს მადლიერებიც ვიყავით ჩვენი ბედისა. თბილად და მაძლრად მაინც ვიყავით! საწყალი ჩვენი ამხანაგებო, რომ შიშველ-ტიტველნი, მშიერი მუცლით მიდიოდნენ საბრძოლველად, თორემ ჩვენ რა გვიჭირდა? გარდა ამისა გულს გვიხარებდა აგრეთვე გრანვილელების ვაჟკაცური ქცევა; ორმოცდაათი ათასა კაცი თურმე ერთყა ქალაქს გარშემო—კაცი, ქალი და ბავშვი—და რაკი ვერ აიღეს, დაერივნენ დამშეულნი არე-მარეს და, სხვა რომ აღარა ჰქონდათ რა, პანტას და მაქალოს დაეძებდნენ ტყეში. ახლა რომ მკითხოთ, აქ სასიამოვნო არა იყო რა, მაგრამ მაშინ ვანდლეებისაგან ბოროტების მეტი არა ვიცოდი რა და მიხაროდა იმათი გაჭირება და უბედურება.

გრანვილიდან მოსულმა ჯარისკაცებმა გვიამბეს, — იმისთანა საშინელი ყვანა სჭირთ ვანდლეებს, რომ მუსრს ავლებს უბედურებსო. მიდიან და იმდენ მკვდრებს სტოვებენ გზაზედ, რომ ვისაც მათი დევნა უნდა, ვერსად დაემალებიანო. უმთავრეს მათ წინამძღოლებს, დიდებულ ბატონებს, გემები დაეზარებინათ და ინგლისს გაქცევა ნებავდათ. მაგრამ გაიგო ეს ამბავი სტოფლემ, ზღვის პირას დაუხვდა და შეუტია: თქვენგან და თქვენთვის აჯანყებულ ხალხს რაღას ეუბნევით, აგრე არხეინად რომ მიზრძანდებით? აქ ბრძანდებოდეთ, ჩვენთან, თორემ იძულებული ვიქნები სხვა ღონისძიება ვიხმარო თქვენს წინააღმდეგო! დიად, სტოფლე რომ არ ყოფილიყო, გაპარვას აპირობდნენ ბრწყინვალე თავადები—სტალმონი, ოტიშანი და სხვანი. მაგრამ რა? დღეს იქნებოდა თუ ხვალ, ბოლო მაინც ეგ უნდა ყოფილიყო.

ამ დროს ხმა გავარდა, გენერალ როსინიოლს იმისთანა ალაგს შეუშწყვდევია ვანდლეები, რომ ერთი ველარ გადაურჩებო, საუბე-

დუროდ, საქმე სულ სხვანაირად დატრიალდა: რაკი ნახეს ვანდელემა, რომ ვაჟკაცური სიკვდილის მეტი აღარა რჩებოდათ რა, იმისთანა მედგრად თურმე შემოუტიეს ჩვენს ჯარს, რომ დაამარცხეს და თითონ ანეერისკენ წამოვიდნენ. ამბობდნენ, ხვალ ქალაქს მოადგებიანო.

წარმოიდგინეთ ჩვენი ყოფა! იმისთანა ზარის რეკვა ატყდა მთელ ქალაქში, იტყოდით აღდგომა ღამეაო. ანეერში მყოფი ჯარის გენერალი დაჭრილი იყო და ჯერაც არ შეჰკროდა კრილობა. იმან და საერო კრების წარმომადგენლებმა ყოველი ღონისძიება მიიღეს, რომ ქალაქი გაემაგრებინათ. ვისაც სიარული შეგვეძლო და იარაღის ხმარება, გამოვედით საავადმყოფოდან და იარაღი ვითხოვეთ. ანეერის აღება და მთელი ჩვენი ჯარის განადგურება ერთი იქნებოდა, რადგან ვანდელეები ისევ თავიანთ ბუჩქნარში შეგვკრეკდნენ და იქ, რასაკვირველია, ვეღარას ვუზამდით.

ეს ქრისტეშობის თვის ხუთს გახლდათ. გაეგოთ თუ არა გარეუბნელებს ვანდელეების გამარჯვება, დაენებებინათ სახლ-კარისთვის თავი და რაც კი რამ ებადათ, ყველაფერს ქალაქში მოათრევდნენ: ვანდელეებმა იციან, რასაც მოერევიან, წაიღებენ, რასაც არა და ცეცხლს წაუქიდებენო. მაშინ გამოჩნდა, რა თვალთ უყურებდნენ მათ მოქალაქენი! დიდი და პატარა ჩვენა გვშველოდა ქალაქის გამაგრებას, ქალი და კაცი, მოხუცი და ბავშვი, ყველა ჩვენთან იყო და რითიც კი შეეძლოთ, გვეხმარებოდნენ. დიასახლისებს შინიდან შექამადი მოჰქონდათ ჯარისკაცებისათვის, რადგან ისე ვიყავით საქმეში გართული, რომ შიმშილიც აღარ გვაგონდებოდა. თოვლი იდო და ლუარს ყინული მოჰქონდა.

წამდაუწუმ მოდიოდა შიკრიკი და გვატყობინებდა მტერის მოახლოებას. ამასთან ისიც ვიცოდით, რომ ჩვენს მოსაშველებლად ჩვენი ჯარიც მოდიოდა. თორმეტ საათზედ მოადგნენ ქალაქს, დიდი სროლაც აგვიტეხეს, მაგრამ გაიგეს თუ არა, ჯარი მოღის ანეერელების საშველადო, აიყარნენ და თავს უშველეს.

მე კი სწორედ ამ გარემოებამ გამომაყენა: საერო კრების წარმომადგენელის ფრანკატელის ბრძანებით ყველა მეციხოვნეს ახალი წაღები და ფარაჯები დაგვირიგეს. ღმერთი გამიწყურეს, თუ ჩემს დღეში მეგრძნოს იმისთანა სითბო, როგორც მაშინ ვიგრძენ. უნდა გენახათ, რა შურის თვალთ გვიყურებდნენ სხვა ჯარისკაცნი!

ამასთან მარგალიტას წერილიც მივიღე! საავადმყოფოში მიველ ჩემი ბარგის წამოსაღებად; დიდ დარბაზში მეკარე იდგა და ყვიროდა—ამას და ამას წერილიო! მაგრამ სადღა იყვნენ უბედურე-

ბი? ოთხში ერთილა თუ იყო ცოცხალი! რომ დაიძახა — მიშელ ბასტიენ წერილიო!

— აქ გახლავარ-მეთქი, შეეძახე.

— ჯერ მოდი ჯვარი დასვი აქ! წერა იცი? მაშ ხელი მოაწერე.

ღმერთო ძლიერო! რა საშინელი დრო იყო ჩემთვის ეს სამი თვე! ისე დღე არ გათენდებოდა, რომ პარაკლისი არ გადამეხადა ჩემი თავისთვის: „ვინ იცის ამ საღამოს ცოცხალი იქნები თუ არა, ჩემო მიშელი. ვინ იცის, სად წაგაქციოს ერთმა დაკარგულმა ტყვიამ და სად დაგფლან შენმა ამხანაგებმა. ისე დაგფლავენ, რომ ცრემლს არავინ დაგაფრქვევს ოხერ-ტიელს, არც მამა და არც შენი პარგალიტა! მაგრამ იქნება აღარც კი ახსოვხარ მარგალიტას, ჩემო მიშელ! აგერ სამი თვეა წიგნი აღარა მიგიღია რა. განა რომ ახსოვდე, თავის ამბავს არ გაცნობებდა?“ დიად, ასე დაღონებულს რომ უცბად წიგნი მომცეს ხელში, კინალამ ჰკუპახედ შევეცი. გიჟივით გავვარდი გარეთ, მინდოდა მიყრუებული ალაგი მეპოვა სადმე, რომ იქ დამშვიდებით წამეკითხა წერილი. ბოლოს ბიძია ადამის ღუქანში შევედი, სადაც ხშირად დავიარებოდით მე და ივანე სომი, ფანჯარასთან დავჯექი და ბექედს სინჯვა დავუწყე. თან ცრემლი მდიოდა... ფალსბურგიდან არის, მაშ მარგალიტასია! აბა გაეხსნათ!

რომ არ მრცხვენოლდეს, სიტყვასიტყვით გაგიმეორებდით მარგალიტას მონაწერ წერილს, მაგრამ ვაი თუ მასხარად ამიგდოთ: ხედავთ ამ გადაყრუებულ ბებერს, რა კარგად ახსოვს თავისი დანიშნულის აღერსიო!

თითონ მარგალიტაც დამცინებდა, მერწმუნეთ.

მაშ თავი დავანებოთ აძაოებას სიყმაწვილისას და ისა ვთქვათ, რაც ქვეყნის საქმეს შეეხებოდა. მთელი ჩვენი სოფელი ჯარში გავიდა, — მწერდა მარგალიტა; — ნათლია შენი, ლეტუმიე, კოშარი, რაფიელ მანკი, ერთი სიტყვით, ყველა პატრიოტი შეიარაღდა და ელოფ კოლენის წინამძღოლობით წავიდნენ ჯარში. სოფლებში ქალების და ბავშვების მეტი აღარავინ დარჩა; ეს გარემოება იმან გაიოიწვია, რომ ჩვენი ჯარი დამარცხდა ამას წინათ, უკან დაიწვია და მთელი ჩვენი მხარე ერთს ბანაკსა წარმოადგენს; ბრძოლა რომ ატყდეს, ზარბაზანის ხმა ჩვენ სოფელში ავა... ვინც კი შინა ვართ, დაქრილთათვის ლოგინს და სარეცხს ვამზადებთ. ძველი გენერლები ვადაყენეს და ჯარის უფროსებად სულ ახალგაზდა, უბრალო ხალხის შვილები გამოგზავნეს, სახელდობრ გენერლები ჰეშეგრუ და ლაზარე ჰოში. დიდი აღტაცებით დაუხვდა ორივეს ხალხი. მოვიდნენ, ყველაფერი დაათვალიერეს და ერთი მათგანი აღზასს წავიდა, მეორე ლორენსაო.

ძალიან მასიამოვნა აგრეთვე იმ ამბავმაც, რომ შოველი ცოტა-ბანს ჩვენში ყოფილიყო. საერო კრებას გაეგო, სტრასბურგელა მამასახლისი და სხვა მოხელენი გერმანელებს უთმობენ ქალაქსო, და მათ დასაჭერად და ღირსეულად დასასჯელად თავისი წარმომადგენლნი გაეგზავნა—სენეიუსტ, ლეზა და შოველი. ალბად არაფრად ექაშნიკათ სტრასბურგელ მოხელეთ რესპუბლიკური წესწყობილება და თავისუფლებას დიდებული არისტოკრატების მოსამსახურედ და პირფარეშად ყოფნა ირჩიეს. ქალაქში ბევრი საბუთი აღმოჩნდა მოხელეთაგან ღალატისა. გარდა ამისა მათ სრულიად უყურადღებოდ ჰქონდათ ყველაფერი მიტოვებული—დარაჯი არსდ იდგა, დაქრილები საავადმყოფოში მოუვლელობით ლპებოდნენ და სხვა და სხვა. მამასახლისი და სხვა მოხელენი დაიჭირეს და ზოგი პარიზს გაისტუმრეს, ზოგი მეცს. მიუხედავად ამ სასტიკი სასჯელისა ჯერაც არ დამშვიდებულა ჩვენი მხარეო, იწერებოდა მარგალიტა და ყველგან რევოლუციის მოწინააღმდეგე ბერები და მღვდლები დადიან და ხალხს რევენ; მაგრამ დღეს-ხვალ ყველას ლაგამს ამოვდებთ და მშვიდობას და სათნობას დავამყარებთ ქვეყნადო.

მეტი რა მინდოდა? ჩემი მარგალიტას ამბავი მომივიდა, მამიჩემისა და სტეფანესი, რომელსაც თურმე ისა ჰკლავდა, რომ ჯარში წასვლა და მტერთან შებრძოლება არ შეეძლო. დიად, რა მინდოდა მეტი? მგონი რომ კმაყოფილი უნდა ვყოფილიყავ? მაგრამ არა! ჩვენგან ნახევარი დღის სავალზედ ასი ათასი პრუსიელი მეგულეზოდა; დარწმუნებული ვიყავ, რომ ფალსბურგს ზარბაზნის სროლით დაანგრევდნენ და დასწვავდნენ; ჩვენს სოფელს ააოხრებდნენ და ვინც კი პატივსაცემი და გულით საყვარელი მყავდა, ისე გააღატაკებდნენ, რომ ლუკმაპურის ნატრულს გახდიდნენ. ამ ამბავმა ისე ჩამაშხამა მარგალიტას წერილის სიამოვნება, რომ სულ თავებდს ვიწყევლიდი, რატომ მეც შინ არა ვარ, რომ ჩვენებურებთან ერთად შევება გერმანელებს და მათი სისხლით გავძლე-მეთქი.

დიად, ძალიან დამაღონა ამ წერილმა, მაგრამ ისე გერმანელების შემოსევა არ მეწყინა, როგორც ჩვენი ვალენტინის რეგვენობა: ვალენტინი მჭედლად ჩაწერილიყო თავად კონდეს რაზმში და, რაკი გერმანელები აღზასში შესულიყვნენ, ნათლიაჩემისთვის მიეწერა, — მზად იყავ, შენს ჩამოსახრჩობად დიდი ხანია მზადა გვაქვს თოკიო!.. აქამდის მეცოდებოდა ვალენტინი: რა ქნას, ღმერთს ასე რეგვენად გაუჩენია და იმიტომ სჩადის ამდენ სისულელეს-მეთქი! მაგრამ ამ ამბავმა კი დამარწმუნა, რომ ბუნებრივ სისულელესთან ერთად ავი და ღრძო გულის კაციც ყოფილა. ძალიან თურმე გაბრაზდა ნათ-

ლიაჩენი, და ჯარში იმიტომ უფრო ჩაეწერა, რომ თავის ძველ ქარგალს შეხვედროდა სადმე და ჭკუა ესწავლებინა.

ორი დღის შემდეგ ნანტიც წავართვით ვანდლეებს, მაგრამ იმდენი გვაწვალეს ამ ქალაქის აღებაზედ, იმდენი ხალხი დაგვიხოცეს, ისე უღიერად, უღმერთოდ გვეკიდებოდნენ, რომ იტყოდით, ამას მხეცი თუ იზამს, თორემ ომიანობის წესრიგის მიმდევარი ადამიანი როგორ იკადრებსო?

ალბათ ათრობს სისხლი ადამიანს, რომ გამხეცებული აღარც კრილობასა გრძნობს, აღარც შიმშილს, და ცოფიანი მგელივით სულ იქით მიიწევს, სადაც მეტი ხალხი გვუღება, რომ რაც შეიძლება მეტა სისხლი დაანთხიოს.

რომ მოგახსენოთ, ვინც გაქცევა ვერ მოახერხა და ქალაქში დაგვხვდა, არ დაგვიხოცია-მეთქი, დიდი სიცრუე მომივა! აგრეთვე სიცრუე მომივა, რომ მოგახსენოთ, არ დაგვიხოცია ის დედაკაცები, რომელნიც ქალაქში დაძრწოდნენ და საცა კი ჩვენს ჯარისკაცს ნახავდნენ დაჭრილს, უღმერთოდ აწვალდნენ და მერმე ხოცავდნენ. პართალია, მე და ჩემი ამხანაგები არა ვრეულვართ დედაკაცების და ბავშვების ჟლეტაში, რადგან ბრძანება გვქონდა,—ზარბაზნები მზადა გქონდეთ, შეიძლება მოგვიბრუნდეს მტერიო! მაგრამ არტილერიის გარდა მთელი ჯარი დაერია ქალაქს და, რაკი ჩვენი ჯარისკაცები დასახიჩრებული და წამებულნი ნახეს, გამხეცდნენ, ადამიანური ყოველივე დაივიწყეს და... ღმერთმა ჩემი მტერიც ნუ შეასწროს იმისთანა დღეს! რას იზამთ? ომი ომია, ესე იგი სისხლი, ცრემლი, ცეცხლი და ძარცვა! ვაი იმას, ვინც დაიწყებს ომს და მეტადრე სამშობლოს წინააღმდეგ! იმას მოეკითხება ყოველი ეს უბედურება და ის იქნება პასუხისმგებელი ღვთისა და კაცობრიობის წინაშე.

გენერლებმა საყვირი დააკვრევიენს ჯარის დასაბრუნებლად. კლებერი, მარსო და კონვენტის წარმომადგენელი პრიორი, ტიურო და ბურბოტი დაერივნენ ჯარს და ცდილობდნენ შეეყენებინათ როგორმე ხალხის ჟლეტა, მაგრამ ვიღას ესმოდა მათი სიტყვა? ასე ათასზე მეტი კაცი მოგვიკლეს ვანდლეებმა; აგერ ერთი წელიწადი სრულდებოდა, იმისთანა ტანჯვა-წვალებაში ვიყავით, რომ ჯოჯოხეთი გვენატრებოდა იმასთან შედარებით; იმ დროს, როდესაც პრუსიელები, ავსტრიელები, გერმანელები, იტალიელები, ესპანელები, ინგლისელები, პოლანდიელები, ერთი სიტყვით, როდესაც მთელი ევროპა მოსდგომოდა საფრანგეთს და მისუსტებულ სამშობლოს ჯარები ეჭირვებოდა, სწორედ იმ დროს ჩვენ ვანდლეში უნდა ვყოფილიყავით და სწორედ იმათთან გვებრძოლა, ვინც იმ გა-

ჭირებულ დროს მხარში უნდა გვედგომოდა საზოგადო მტრების ასალაგმავად; იმის მაგივრად, რომ ჩვენთან ერთად შებრძოლებოდნენ ჩვენს დასამხობად ამხედრებულ ევროპას, ვანდლები უკანდინდან ორმოს გვითხრიდნენ და თოფს გვესროდნენ... განა ამის შემდეგ უნდა გვისაყვედურებდეს ვინმე, რესპუბლიკელები ძალიან სასტიკად მოექცნენ ვანდლებსო? ქუდი დასდე და სამართალი ჰკითხეო, ნათქვამია. ჩაიხედონ თავიანთ გულში და თითონვე დაინახვენ, რომ სამართალე ჩვენკენ იყო და, მაშასადამე, კეთილსინდისიერად უნდა აგვესრულებინა ჩვენი მოვალეობა სამშობლოს წინაშე.

ამ საშინელი დამარცხების შემდეგ ორი დღე იქვე დავრჩით ჯარის დასასვენებლად. ვესტერმანი კი გაქცეულთ გაეკიდა და თუმცა დაქრილი იყო და დეკემბერმა საშინელი ყინვა დაიჭირა, ფეხდაფეხ მისდევდა და აუარებელ ხალხს უხოცავდა. ლავალში რომ მისულყვნენ, მათგანვე დახოცილი პატრიოტების ქვრივები გადასდგომოდნენ წინ და ვესტერმანის ცხენოსნებისაკენ გაებრუნებინათ. სხვაგანაც იგივე ხდებოდა. ვანდლები ყველგან უდიერად ეკიდებოდნენ თავიანთ მოწინააღმდეგეთ და ახლა, როცა დაბრუნებულნი თავის შესათარს ეძებდნენ, მათგანვე დახოცილთა ქვრივობლები უხვდებოდნენ წინ და ვესტერმანის ჯარის დახმარებით ჯავრის ამოყრას ცდილობდნენ. ბრეტონში ხომ მთლად გლუხკაცობა მიემზრო ვესტერმანის ჯარს და ყველგან კომბლებით და ორთითებით უხვდებოდა გაქცეულებს:

— აქეთ ნუ მოდიხართ, თქვე თავლაფდასხმულნო, თორემ ვაი თქვენი ბრალი! თქვენ ის არა ხართ, რომ ქრისტიან კაცს ყელსა სჭრიდით და თან მამაოჩვენოს გაიძახოდით?! გასწით აქედან, თქვე ღვთისა და კაცისაგან შეჩვენებულნო!

გაქცეულთა შორის ძალიან ბევრი იყვნენ დიდებული მებატონეები თავიანთი ცოლ-შვილით, ქალურად ჩაცმული. ვანდლების წინამძღოლები, საერო ტანსაცმელით მოკაზმული მღვდლები და ბერები. მინამ ესენი სოფელში შესვლას აპირებდნენ და სოფლელები კომბლებით იგერებდნენ, წამოეწიოდნენ ვესტერმანის ცხენოსნები და დაეროდნენ ხმალოდებულნი.

ღმერთო დიდებულო, ამისთანას და ამაზედ უარეს სასჯელს ნუ მოაკლებ იმათ, ვინც სამშობლოს დალატს განიძრახავს! შთააგონე, ღმერთო ძლიერო, რომ სამშობლოს მტერს და მოლაატეს კეთილი არა მოელის რა და გმობილია და წაწყმედილი ამიერიდან უკუნისამდე!

ხუთი დღის შემდეგ ლუარის ნაპირს რომ გავედით, ვესტერმა-

ნის ჯარს დავეწიეთ. ამ ხნის განმავლობაში სულ თურმე გაქცეულთ სდევდნენ და იმოდენა განძი ეშოვათ, რომ გულები სავსე ჰქონდათ ოქრო-ვერცხლით: ეს საყურეებიო, ეს სამაჯურებიო, ეს კოვზები და თასებიო... ვინ მოსთვლის? ბექლებს მუჭით იყოფდნენ და ცხვირსახოცს თუ არ აბრეშუმისას აღარც კი კადრულობდნენ. წარმოდგინეთ, რამდენი დიდებული უნდა დალუპულიყო წყლის ზვირთებში, რომ ამოდენა სარჩო-საბადებელი ეშოვათ ჩვენ ჯარისკაცებს?

კონვენტის წარმომადგენლებმა ბურბოტმა და ტიურომ ძალიან ბევრი ძვირფასი ნივთი გამოისყიდეს ჯარისკაცებისაგან და საერო კრებას გაუგზავნეს. თვით ჯარისკაცებმაც, რაც კი ძვირფასი ეშოვათ რამე, სრულიად უფასოდ მიაჩთვეს კონვენტს, რესპუბლიკისათვის შემოგვიწირავსო. და უჭირდა კიდევ რესპუბლიკას, რადგან ყოველი მხრიდან მტერი მოსდგომოდა და ფული კი არა ჰქონდა.

მაგრამ მგონი დრო იყოს, მეფის მომხრე დიდებული თავადი-შვილების საქციელი ავიწეროთ, იმ დიდებული თავადი-შვილებისა. რომელთაც ამაღეს საწყალი ხალხი, იმდენი სისხლი დააქცივეს და ბოლოს კი ღვთის ანაბარად მიატოვეს—ჯანაბას შენი თავიო! მერმე ვინ შეირცხვინა ასე თავი? ისეთმა დიდებულმა, ბრწყინვალე გვარის შვილმა თავადებმა, როგორც არიან ანრი ლაროშეაკელი, საბინო, ლავილბოაჟე, ლანჟერო და სხვანი და სხვანი, ბურჯნი და დედაბოძნი მეფის და სასულიერო წოდების მტარვალობისა. მართალია, ვანდელი გლეხკაცობა დამნაშავე და შემცოდე იყო როგორც საკუთარი ცოლშვილის, ისე სამშობლოს წინაშე, რომ გაბედა და იარაღით აღუდგა თავისავე ერს. ეს საქციელი არ შეშვენოდა არც პატიოსნებას ხალხისას, არც მის მამულიშვილობას! მაგრამ ვინ იქნება ხალხის სიძულელით დაბრმავებული, რომ—შენი ბრალია, მარტო შენი, და მარტო შენა ხარ შემცოდეო,—უთხრას? საუკუნეთა განმავლობაში ისე ჰყავდათ ბატონს და მღვდელს დამონავებული გლეხკაცი, რომ განათლების სხივს კი არა, ნაპერწკალსაც კი არიდებდნენ მის გონებას: თუ გაიგო რამე, ასე ყურმოპირილ ყმად აღარ გვემსახურებო. განა რომ სცოდნოდათ რამე, ვანდელები რესპუბლიკას ომს აუტეხდნენ?... თუ კი ჯვარცმულმა შეუნდო თავის მტანჯველთ, — არა უწყიან, რასა იქმნენო, განა უბედურ ვანდელებს კი არ უნდა შევეუნდოთ მათი საქციელი? შენდობის უღირსი თუ იყო ვინმე, ისინი იყვნენ, ვინც ხალხის უფიცობით ისარგებლა, გააბრიყვა და იარაღი ააღებინა; შენდობის უღირსნი სწორედ ის დიდებულნი და სულიერი მამანი იყვნენ, რომელთაც ისე ეძნელებოდათ საკუთარი უპირატესობათა დაკარგვა, რომ და-

აბრმავებს იმდენი ხალხი, კენის ცოდვა ჩაადენიეს, და თანაც არ-
წმუნებდნენ—ამას თვით ღვთის გულისთვის იზამთ და მით ღაი-
კვიდრებთ სასუფეველსა ღვთისასაო! ვანდლებს აჯანყებაში დამ-
ნაშავენი მარტო ესენი იყვნენ და სასჯელიც მარტო მათ უნდა მიე-
ღოთ, მაგრამ საქმით კი სულ სხვანაირად გამოვიდა: თითონ განზედ
გადგნენ და საწყალი ხალხი კი ბუზივით აქლექინეს ჩვენს ჯა-
რებს. ამ დიდებულთ რომ ცოტაოდენი პატიოსნება ჰქონოდათ,
უპატრონოდ კი არ მიატოვებდნენ იმდენ ხალხს, რომელშიაც უმე-
ტესი ნაწილი მოხუცებულები, ქალები და ბავშვებიდა იყვნენ. არა!
რაკი ნახეს, რომ ლუარის გასვლა შეუძლებელი იყო, რადგან საშინ-
ლად მოდიდებულიყო წვიმებისაგან და ხიდი კი აღარსად ჰქონ-
დათ, სწორედ 'ამ დიდებულთ უნდა გაეწირათ თავი, მოსულიყვნენ
საერო კრების, ესე იგი საფრანგეთის ერის წარმომადგენლებთან
და მოეხსენებინათ:

— ჩვენ ესა და ეს გახლავართ. ჩვენა ვართ დიდებული გვარის
შთამომავალი მებატონენი და არ გვინდოდა თქვენს რესპუბლიკას
დავმორჩილებოდით. ჩვენ გავიტაცეთ და ჩვენ ავშაღეთ ეს უბედუ-
რი ბრბო თქვენთან საბრძოლველად... მოვატყუეთ. დღეს თქვენა
ხართ გამარჯვებულნი! დიდსულოვანი ერის წარმომადგენლნი
ხართ და... იმედი გვაქვს არ აპყვებით გულისწყრომას და შეუნ-
დობთ ხალხს ამ დანაშაულს. თქვენც ხომ ხალხის შვილნი ხართ,
ნუ დასჯით უვიცს! ჩვენ გვიკმარეთ დასასჯელად და მით გათავ-
დეს ყველაფერი! დმერთმა კეთილად მოახმაროს საფრანგეთს თა-
ვის ახალი კანონები. ჩვენთვის კი ისიც კმარა, რომ ჩვენი სამშობლო
ყოველთვის პატივისცემით მოიხსენიებს თავის შვილებს, რომლებ-
მაც ყოველივე გასწირეს თავიანთ უპირატესობათა დასაცველად და
ბოლოს სიცოცხლეც არ დაიშურეს მათთვის მებრძოლი ჯარის გან-
საცდელიდან დასახსნელად.

განა ასე არ მოიქცეოდი, ჩემო მკითხველო? ჯარისკაცი ხარ,
ერთი საწყალი მუშა, თუ სოფლელი გლეხკაცი, სულერთია, შენც
სულის ცხონებასავით გენატრება ის ნეტარი დღე, როდესაც კანო-
ნის წინაშე ყველა გათანასწორობულ იქნება და უფრო მეტი პატიო-
სნება გაქვს და თავგანწირვა, ვიდრე დიდებულ მებატონეებს. დარ-
წმუნებული ვარ, შენც ასე მოიქცეოდი. ნეტარება სიცოცხლე კი
არა, ნეტარება საკუთარი ვალდებულების პატიოსნად აღსრულება
არის! მაშინ სიკვდილიც ტკბილია და ამ სიტკბოებას გლეხკაცი უფ-
რო მიჩვეულია, ვიდრე განცხრომით და ფუფუნებით გაღიაებუ-
ლი დიდებული. მე ხომ ძალზედ მოხუცებული ვარ,—ჩემი ხნის
კაცს ფიცი აღარ უნდა,—და ვფიცავ ყოვლად წმინდა სამებას, რომ

ერთს წამს არ შევჩერდებოდი: თავს გაეწირავდი და საწყალ ხალხს კი ვიხსნიდი.

ჰოდა, ყური დამიგდეთ! ჩვენ რომ წყლის პირს მივედით, შუა წყალში ნავი დავინახეთ, ერთადერთი ნავი, რადგან რესპუბლიკის მოხელეებს წინაღვე მიემალათ ყველა ნავები, რომ გამოქცეული ვანდელეები წყალს არ გავიდნენ და კვლავ თავიანთ ბუჩქნარში არ გაგვიმაგრდნენო. და ამ ერთადერთ ნავში ბრძანდებოდნენ გენერალისიძისი ანრი დელაროშეაკლენი, სტოფლე, საბინო, ლავილბოჟე, ვოჟირო, დელახეერი და რამდენიმე კიდევ სხვანი, რომელთაც მოეტყუებინათ ხალხი: გაღმა თქვენ საშველად გამზადებული გემები დგანან... გავალთ და გამოვიყვანთო! ამას მეკი არ მოგახსენებთ, ამას თვით მეფის მომხრე მწერალნი ამბობენ თავიანთ წიგნებში. დიად! თვით მეფას მომხრეები ამტკიცებენ, რომ ხალხის გასაყვანად საჭირო გემების საძებნელად გენერლებმა კაცი კი არ გაგზავნეს, ვინმე აფიცერი; არა, თითონვე წავიდნენ სულ ყველანი საცინელი იქნებოდა, სამარცხვინო და სამწუხარო რომ არ იყოს, ამისთანა საბუთი თავის გასამართლებლად. მით უფრო, რომ, რაკი გაღმა გავიდნენ, აღარც ხალხი მოჰგონებიათ, აღარც გემების გამოგზავნა და მარტო თავას შეელასდა ცდილობდნენ. წავიდნენ თავისთვის, უკანაც აღარ მოუხედათ და სრულიად უპატრონოდ მიატოვეს საბრალო ხალხი, ისე რომ მას შემდეგ მათი ხსენებაც კი გაწყდა.

მე იმისთანა აღვილზე ვიყავ, რომ ჩემი თვლით არ დამინახავს მიმავალი ნავი. მაგრამ მით უკეთესი, რომ ვერ დავინახე: ერთი-ათასად მეტად ამემღვრეოდა გული და სამარემდის აღარ მომასვენებდა იმ უღმერთობებისადმი ზიზღი და სიძულვილი!

გზადაბნეული ცხვარივით იდგნენ წყლისპირას უბედური ვანდელეები — ქალი, კაცი, მოხუცებული და ბავშვი; გაღმა მათს მფარველს ბუჩქნარს ხედავდნენ, და თავგანწირულნი სიკვდილსდა ელოდნენ. უკანიდან ჯარი ადგათ; წინიდან, მდინარიდან, განგებ მათ ამოსახოცავად გამოგზავნილი სამხედრო გემები!.. დაიწყო სროლა. მოეხვეოდნენ საწყლები ერთმანეთს და — მშვიდობით! ახლა კი დავიღუპეთო! — შესძახოდნენ თვალცრემლიანი.

რამდენი უბედურება ტრიალებს დედამიწაზე!

ჩავყვით იქიდან წყლის პირს და, საცა კი გაქცეულ ვანდელეებს მოვასწარი, ყველანი დავიმორჩილეთ. ტუშში, ნორში და ბლენში კარგი ომიც მოგვიხდა, რადგან გამაგრებული ჰქონდათ ციხეები. ბლენშივე ჩაბრძანდა გემში უბრწყინველესი თავადი ტალმონი და იმასთან ერთად დონისსანი, დეზესარი, პერელი, პირონი, როსტანი

და ას ორმოცდაათი აფიცერი და მრავალი დიდებული ქალბატონი და — თავს უშველეს. ტალმონი რამდენიმე დღის შემდეგ დაიპირეს და მოკლეს; გილიოტინა სწორედ მის სასახლის წინ ააგეს და თავა იქ გააგდებინეს. ბრძოლის ველზედ მარტო გლახაკებიღა დასტოვებს დიდებულებმა და ამ გლახაკებმა გაპარვას და მით თავის შერცხვენას ვაჟკაცური სიკვდილი ირჩიეს.

აგერ ორი კვირა სრულდებოდა, რაც უკან მივდევდით ვანდელებს. ვეღარ გამოვლიეთ, იმდენნი იყვნენ. ფეხსაცმელი რომ აღარავისა გვქონდა, თითქმის ფეხშიშველნი მივდიოდით გაყინულ გზაზედ, ტანისამოსი ისე შემოგვებლდვნა, რომ ჯარს კი არა, ქუჩის მაწანწალებს უფრო ვგავდით. ყველას მოსვენება გვენატრებოდა და მით უფრო გაშმაგებულნი ვლევნიდით გაქცეულთ.

ბოლოს ნანტსაც მივატანეთ. ნანტში ძალიან გამაგრებულიყო მტერი, რადგან ეს იყო იმისი უკანასკნელი თავშესაფარი; თუ აქაც დავამარცხებდით, გავირეკდით და იმისთანა ქაობში ჩაკრეკდით, რომ ცხენიან კაცსაც დაახრჩობდა. შემოვარტყით ქალაქს გარშემო ჯარი და სროლა დავუწყეთ. საშინელი სიცივე იყო; წინ ცეცხლზე ვიხუხებოდით და უკან ზურგი გვეყინებოდა.

შუალამისას გენერალმა კლებერმა დაგვხედა. თან ერთი ყმაწვილი კაცი ახლდა, აფიცერი; ჩამოგვიარა და გვკითხა:

— რამდენი სროლა გაქეთ, ბიჭებო?

— თითო ზარბაზანზედ თერამეტი, ჩემო გენერალო, — მიუგეს ჩვენებმა.

— გაუფთხილდით, გაუფთხილდით, თორემ ხიშტის ხმარება მოგვიხდება.

თან გაშტერებით გვსინჯავდა ცხენიდან. რომ გვიცნო, პირს ღიმილი მოუვიდა:

— მგონი დღესაც ისე ყინავს, როგორც შარშან მაინცში, ჰა ბიჭებო?

— დიად, ჩემო გენერალო, — მიუგო სომმა, — მაინცში ციოდა, მაგრამ საქმეში მაინც გახლდით. კასელის ციხეს რომ ვამაგრებდით, ხვითქით გვდიოდა ოფლი.

კლებერმა ხელთათმანი მოიხსნა და ხელი ჩამოართვა ივანეს:

— ცოტა კიდევ, ბიჭებო, ცოტა კიდევ მოითმინეთ! ჩვენი გამარჯვება და ადამიანის უფლებათა დამყარება ერთი იქნება!

იმისთანა მხიარული კილოთი გვითხრა ეს სიტყვები და ისეთი იმედინად გადმოგვხედა, რომ ერთად შევძახეთ ყველამ:

— რესპუბლიკას გაუმარჯოს!

ის კი წავიდა და მთელი ღამე ისე დაუსვენებლივ უვლიდა ჩვენს ჯარებს და დარაჯებს.

ჯერ ისევ ბნელოდა, რომ შეჭამადის ხარშვას შევეუდექით; ამოყო თუ არა მზემ თავი, მაშინვე სროლა ატყდა. რაღა თავი შეგაწყინოთ, დიდი ბრძოლის შემდეგ ავიღეთ ნანტი. რამდენიმე ასი კაცი დაეკარგეთ, მაგრამ, სამაგიეროდ ისე გავანადგურეთ ვანდელების ჯარები, რომ მებრძოლი აღარავინ გადაგვრჩენია. თუ გადაგვრჩა ვინმე და ჭაობებში ნაცნობ ალაგს მიიმალა, ძალიან ცოტანი გადაგვრჩნენ, სულ ორი-სამი ათასი კაცი და ისიც იმიტომ, რომ მოგვწყინდა მათი დევნა და ხოცვა. ან რაღა შიში უნდა გვქონოდა ორისამი ათასი კაცისა, როდესაც ერთიანად გავწყვიტეთ ვანდელების ჯარი. რომელშიაც, სულ ნაკლები რომ ვთქვათ, ასი ათასი მებრძოლი გაქყაცი მაინც იქნებოდა. ვინც გადარჩა, გადარჩა, ჩვენ იმათ აღარ გამოგვიღებიათ.

„დიდი ბრძოლა გავუწიეთ რესპუბლიკას,—ეტყობდნენ ეს გადარჩენილები შემდეგში თავიანთ შვილებს და შვილიშვილებს. — დიდი გაჭირება და წამება გამოვიარეთ; დედა, მამა, ცოლი, შვილი, — ვინც კი გულის საყვარელი გვყავდა, შიმშილით და სიცივით ამოგვიწყდა ჭალებში. ჩვენი თვალითა ვხედავდით მტრის ჯარებისაგან მათს უდიერად ელეტას, მაგრამ შებრალებას არა ვთხოვდით, რადგან რესპუბლიკელები-საგან შებრალებაც კი არავის გვინდოდა! ღვთის წყალობა გაქვთ, ჩვენც არ ვაკლებდით სამაგიეროს!.. დიდი ბრძოლა გავუწიეთ რესპუბლიკას! იმისთანა საშინელება ვნახეთ, რომ ზღაპრადაც კი ძნელი დასაჯერია; მაგრამ ისე არაფერმა მოგვიკლა გული,—არც სახლ-ქარის გადაწვამ, არც ცოლ-შვილის ამოჟლეტამ, არც ნაჭირნახულების აოხრებამ, როგორადაც გული მოგვიკლა და უკიდურეს სასოწარკვეთილებამდე მიგვიყვანა ჩვენი მაღალი მებატონეების სამარცხვინო საქციელმა: იმდენი ხალხი მათი რჩევით და ჩაგონებით აიშალა, იმდენი ხალხი მათი გულისთვის შეებრძოლა საფრანგეთს და მათ კი სწორედ მაშინ გვიღალატეს, როდესაც გამარჯვებული მტერი მუსრს ავლებდა ყოვლად უმწეო ჩვენს ცოლ-შვილს. მტრისაგან დამარცხებამ კი არა, ბოლო დიდებულთა ღალატმა და მღვდლების სულმდაბლობამ მოგვიღო. მამა ბერნიე საუკეთესო იყო იმათში და ისიც კი რესპუბლიკას მიემხრო და იაკობელების მომხრე ბონაპარტს ეპისკოპოსობას სთხოვდა“.

ამით გათავდა ვანდელებთან ომი.

ორი დღის შემდეგ ნანტში შევედით. იმავე დროს მოვიდა ამბა-

ვი სავენეში ჩვენი ჯარის გამარჯვებისა და ტულონიდან ინგლისელების განდევნისა; ინგლისელები კი წასულიყვნენ, მაგრამ ცეცხლი წაეკიდებინათ ქალაქისთვის და, რაც ტულონის ნავთსადგურში ხომალდები ყოფილიყო, სულ ერთიანად თან წაეყვანათ.

რალა საჭიროა აგიწეროთ, როგორი აღტაცებით მოგვეგებნენ პატრიოტები და ქალაქის მოხელენი, ნანტში რომ შევედით. წინ კლებერი, მარსო, ვესტერმანი და სხვა გენერლები მიგვიძლოდნენ და უკან კიდევ ჯარი—ფეხშიშველი, დაფხრეწილი ტანსაცმელით, დაგლეჯილი ქუდის ჩაჩებით, თავგასაკრეჭი, წვერმოუპარსავი და ქროლობათაგან დასახიჩრებული ჯარი. წინ სამხედრო მუსიკის გამარჯვებული მარსელური ისმოდა, აქეთ-იქით ხალხის ძახილი—რესპუბლიკას გაუმარჯოსო! ყველა ფანჯრებში რესპუბლიკური სამფერი დროშები გამოეფინათ, აივნებიდან ქალები გვიღიმოდნენ.

ყველა ხარობდა, ყველა სიამოვნებით და სიყვარულით შემოგვეცქეროდა; ბრძოლით ნაშოვნი ვანდელების ზარბაზნები და დროშები რომ დინახა ხალხმა, სიხარულით ჯარში ჩამოერია და კოცნა დაგვიწყო ჯარისკაცთ. სამხედრო მოედანზე კლუბის თავმჯდომარემ გრაქხუსმა და სცევილა ბირონმა შესაფერი ქება მოგვიძღვნეს. მოქალაქენი სადილად და ვახშმად გვეპატიყებოდნენ. ყველგან ლხინი და დროს ტარება იყო. მაგრამ ლხინი და დროს ტარება ყველგან და ყოველთვის ერთი და იგივეა და, ერთი-ორი თუ გინახავთ სადმე, ვითომც ყველა გენახოთ! აქ ახალი მარტო ის იყო, რომ ნანტელ პატრიოტებს უფრო უხაროდათ ჩვენი გამარჯვება, ვიდრე თითონ ჩვენ, რადგან უკანასკნელი წლის განმავლობაში ოცჯერ მაინც მისდგომიან ვანდელები ნანტს ასაღებად და ასაოხრებლად. შევიდა თუ არა ნანტში ჩვენი ჯარი, მაშინვე შესდგა ქვეყნის მფარველი კომიტეტი — გულენი, პინარი, გრანმეზონი, კარრიე და რამდენიმე სხვანი — რესპუბლიკის მოწინააღმდეგეთა დასასჯელად. ჯარსაც მაშინვე დაურიგეს ახალი ტანისამოსი და ფეხსაცმელი და მოქალაქეებთან დაუნიშნეს ბინა.

მე ერთ ჩილინგდართან დამაყენეს, ერთ მოხუცებულ პატიოსან მუშასთან, რომელიც მთელი დღე მუშაობდა და მთელი დღე „წავა-წავას“ მღეროდა. მთელი დღე მღეროდა: რაკი ნახავენ რომ „წავა-წავას“ ვმღერი, შიში აღარაფრისა მექნებაო; და იმის ქალი კი მთელი დღე მუხლმოდრეკილი ლოცულობდა. მოხუცებული იაკობელეზის კლუბში დაიარებოდა და კურდღელივით თრთოდა ყოველ ხმაურობაზედ, რადგან რობესპიერის მომხრენი დაძრწოდნენ ქალაქში და სახლებს ჩზრეკავდნენ. ნანტის გარემო ადგილებიდან ყოველ დღე მოერეკებოდნენ დაპატიმრებულ საეჭვო პირებს. ხმა დადიო-

და, მარეს კიდევ შეუჯერებია ჯარი და ბრძოლას გვიპირებსო, მაგრამ ამას ყურადღებასაც აღარავინ აქცევდა, რადგან მეფის მომხრენი უკვე დამარცხებულნი და გათახსირებულნი იყვნენ და მათი შიში აღარავის ჰქონდა.

ვანდემში მყოფი ჩვენი ჯარი აქეთ-იქით გაფანტეს რესპუბლიკის საჭიროებათა მიხედვით. ჩვენი რაზმი და პარიზელი შეთქმულები ერთად დარჩნენ, ისე რომ ყოველ დღე ვხედავდი ლიზას და მის ქმარ-შვილს. ჩემი სიძე-ბატონისთვის აფიცრობა ითხოვეს მისმა ამხანაგებმა და, რადგან ყველამ იცოდა, რომ მართლა ვაჟკაცურად იბრძოდა და არა ერთხელ დაიმსახურა ეს წარჩინება, უფროსებმაც ღირსადა სცნეს და აფიცრობა უბოძეს. მარესკოსთვის რომ გეკითხათ, არც კი უნდობდა: ვაჭრობა უფრო სასარგებლო არისო. მაგრამ ლიზა ერთს წამს აღარ ასვენებდა და დღე და დამ სულ იმას ჩასჩიჩინებდა, უარი არა თქვაო. ელისაბედ-ქალს ისე უნდოდა აფიცრის ცოლობა, რომ მეც ჩავერიე საქმეში.

— იცი, რა გითხრა, ჩემო სიძევ: თუ შენი სიკეთე გინდა, შენს ცოლს ყოველი თხოვნა აუსრულე, თორემ—ჩემ შექვედილ ხატს არ იცნობ? — ძმარს გადენს ცხვირიდან!

სიცილი დაიწყო. მაგრამ როდესაც ეპოლეტები მოუვიდა, დიდი სიხარულით დაიმშვენა მხრები. ელისაბედი ხომ კინაღამ გაგიჟდა სიხარულით და მას შემდეგ სულ იმასა მკითხავდა: ხომ მისწერე შინ, რომ აფიცრის ცოლი ვარო? მგონი, უმთავრესად ამიტომ უნდოდა მარესკოს წარჩინება. ვაჭრობაზედაც გული აღარა ჰქონდა, რადგან რაც იმ ერთი წლის განმავლობაში პარიზელებს ნადავლი ეშოვნათ რამე, სულ ლიზასთვის მიეტანათ, ზოგს არაყში და ზოგს თამბაქოში. ისე ჰქონდა გამოტენილი ზანდუკები ოქრო-ვერცხლით, რომ იმას კი არა, მეშვიდე თაობამდის ეყოფოდათ იმის შვილიშვილებს. მახსოვს, ერთხელ ხელით მანიშნა თავისი განძი და იმისთანა კილოთი მითხრა, თითქო ჩვენს ქოხში კი არა, სასახლეში ყოფილიყოს აღზრდილი:

— იცი, მიშელ, თუ კნეინები დაბრუნდნენ, მეც კნეინა ვიქნები. მე უფრო მომიხდება, ვიდრე იმათ, რადგან ჩემი ხელით და გონებით შევიძინე ყველაფერი და ისინი კი დაბადებითვე მზამზარეულად ჰპოვებდნენ დიდებას. შენ მიყურე, რა კაცი გაეზარდო ჩემი კასიუსისი ეს აფიცრობა ხომ მივიღეთ! ეხლა აღარა გამიჭირდება რა, ღმერთი მოწყალეა.

საშინელი რამ არის დედაკაცი, ხორცშესხმული ამოვება! ოღონდ ელისაბედ-ქალი კნეინად გამხდარიყო და სხვა არა ენადღებოდა რა, თითქო მარტო იმიტომ ინაცვალა რესპუბლიკამ

ეჭვსასი ათასი კაცი, რომ ვიღაცა მეღუქნის ცოლი გაებრწყინვალებინა. რომ არა მცოდნოდა ჩემი დის სისულელე, მგონი, ძალიან გავჯავრებულიყავ ამის გაგონებაზედ, მაგრამ ვიცოდი, რა ტვინის პატრონიცა ბრძანდებოდა და მხრებიღა ავიჩიჩე. ან რა უნდა მეთქვა, ვიცოდი, რომ ჩემს სიტყვას ისე იუცხოვებდა, როგორადაც ჩინურს: მგლის თავზედ სახარებას წაიკითხავენ?

ლიზას სისულელე ხომ მწყინდა და მწყინდა და ამაზედ უმეტესად საწყენი და სამწუხარო კიდევ პატიმრების დასჯა იყო. ციხეები სავსე იყო რესპუბლიკის მტრებით და დილიდან საღამომდე განუწყვეტლივ მიერეკებოდნენ დარაჯები იმ უბედურებს გილიოტინისკენ. თოვდა, და იმ საშინელ ყინვა-სიცივეში თითქმის შიშველ-ტიტველნი იყვნენ ყველანი; ხელები ზურგზედ ჰქონდათ გაკრული და რადგან ქუჩაში დიდი თოვლი იდო, ისე ჩუმად მიდიოდნენ. თითქო აჩრდილნი არიანო. როგორც კი ბორკილის ხმა მოგვესძოდა, მოხუცებული ჩლინგდარი, იმისი ქალი და მე ავეკვრებოდით ფანჯრებს და სულგაკმენდილნი შევეცქეროდით გილიოტინისკენ მიმავალთ; გაატარებდნენ საწყლებს... ქალი კვლავ ლოცვას დაიწყებდა, მოხუცებული ერთს ამოიხრებდა და ისევ თავის საქმეს შეუღებოდა. მრავალი ხალხი გაატარეს ამგვარად ხელშეკრულნი ჩვენ ფანჯრებ ქვეშ—ქალი და კაცი, მოხუცებული და ყმაწვილი, დიდებული და ბერი. გადავხედავდი თუ არა საწყლებს, მაშინვე ნანსი მომაგონდებოდა: თვალწინ თითქმის ცხადლივ წარმომიდგებოდა გენერალ ბულიესაგან ჯაროსკაცების ქლუტა,—თქვენი ხვედრი ჯამაგირები რად ითხოვეთო?—და მრავალთ-მრავალი პატიმარი, რომლებიც ზოგი დახვრიტეს, ზოგი დაახრჩეს და ზოგი ჩემს თვალწინ აწამეს ნანსში.

განსხვავება ის იყო მხოლოდ, რომ აქ, ნანტში, კარრიე საერო კრების ბრძანებას ასრულებდა, იქ კი, ბულიე მეფისას, აგერ სამოცდათორმეტი წელიწადია, მეფის მომხრენი წყევლა-კრულვით იხსენიებენ კარრიეს; მაგრამ ის კი ავიწყლებათ, რომ ვინც თითონ ბარბაროსია, სხვას არ უნდა უკიჟინებდეს ბარბაროსობას. ქვეყნის მფარველმა კომიტეტმა მხოლოდ 1793 წელს დაიწყო დამანაშავეთა აღმოჩენა და ღირსეულად დასჯა, და ერთი ალიაქოთი შექენეს ჩვენმა მოწინააღმდეგეებმა; თითონ კი მრავალ საუკუნეთა განმავლობაში სრულიად უდანაშაულოდ სტანჯავდნენ და აწამებდნენ ხალხს! ბულიე ჯაროსკაცების წამებით კანონს არღვევდა, რადგან წამება უკვე გაუქმებული იყო მაშინ; კანონს არღვევდა ბულიე და ან საქციელს მეფეც უწონებდა და დედოფალი მარიამ-ანტუანეტაც; კარრიეს კი ცოტა ხანს უკან თავი მოაგდებინეს, რადგან მეტი გუ-

ებდა, ვიდრე საერო კრებისაგან ჰქონოდა მინდობილი და ნაბრძანე-
ბი. ეგეც არაფერი: საქმე ის არის, რომ ჩვენ რომ დავმარცხებულებიყა-
ვით, მთელი საფრანგეთი სახრჩობელებით აივსებოდა და ისე
ამოგვხოცდნენ პატრიოტებს, რომ რესპუბლიკისა ხსენებაც კი ამო-
ვგდოთ. ტყუილად კი არ გვემუქრებოდა ბრაუნშვეიგი!

ამით ის მინდა მოგახსენოთ, რომ ადამიანი ადამიანია და, ვინც
რას გასცემს, სამაგიეროდაც იმას მიიღებს.

დავბინავდი თუ არა ჩილინგდართან, მაშინვე წიგნი მივწერე
მარგალიტას და ჩვენი გამარჯვება ვაცნობე. კარგა ხანი გავიდა;
მოუთმენლად ველოდი შინიდან ამბავს, და პასუხი კი არსად იყო.
ვწუხდი, გული ველარ დამემშვიდებინა, სულ იმის ფაქრში ვიყავე,
ვთუ ალზასს და ლორენს ავსტრიელი და პრუსიელი ჯარებია
შესეოდნენ და აეკლოთ... ფალსბურგს რომ მტრის ჯარი არ შემო-
რტყმოდეს, მარგალიტა წიგნს არ მომწერდა-მეთქი? ვფიქრობდი.

და ვალენტინის მუქარა მაგონდებოდა... თვალწინ მიდგა ცეცხლ-
წაქიდებული ჩვენი სოფელი... ხალხი იხიზნებოდა; ნათლიაჩემი,
ლეტუმეი, მამაჩემი და სხვა პატრიოტები ტყაყენ მიეშურებოდ-
ნენ... ერთი სიტყვით, ისე ვიყავე შეწუხებული, რომ საერო კრების
განცხადებამაც კი ვერ დამამშვიდა, რომელშიც ეწერა, გენერალმა
ჰომმა და პიშეგრუმ გაირეკეს მტრის ჯარი და უკან მისდევნო.
შოველისაგან წიგნი რომ არ მომსვლოდა, სწორედ ჰკუაზედ შევი-
შლებოდი. ბევრი ახალი ამბავი მაცნობა ამ წერილმა და სრულია-
დაც დამამშვიდა. აი ახლაც, გადავიკითხე იგი და იმისთანა დიდე-
ბული და გაბრწყინვალებული დროება მომაგონა იმ კურთხეულის
დაწერილმა, რომ ვიფიქრე, ამ წერილით გავათავებ ჩემი ისტორიის
მესამე ნაწილს-მეთქი. აი, თვით წერილიც:

„დიდი ომი გადავიხადეთ, ჩემო საყვარელო მიშელ! წელი-
წადი პირველი რესპუბლიკისა თვალსაჩინო ხანად დარჩება
კაცობრიობის ისტორიაში.

მარგალიტასთან მოწერილი შენი წერილები ყველა სია-
მოვნებით წავიკითხე და არა ერთხელ ვიფიქრე, პასუხი გავ-
ცე-მეთქი. მაგრამ იმდენი მტერი გვეხვია და იმოდენა განსაც-
დელი გვადგა გარედანაც და შიგნიდანაც, რომ მეშინოდა, ვაი
თუ გული ზოვუკლა უიმედობით ან არა და მეტისმეტა იმედი
შთავუნერგო მომავლისა-მეთქი. დღეს კი რესპუბლიკის
საქმეები კარგად მიმდინარეობენ, მტერი უკვე განდევნი-
ლია სამშობლოდან და, თუნდა კიდევ დაგვიბრუნდეს, დეე
მობრძანდეს! იმის დრო მაინც გვექნება, რომ სული მოვიბ-
რუნოთ და საბრძოლველად შევემზადნეთ.

შენ, რასაკვირველია, დარწმუნებული ხარ, რომ შეილაღ მიმაჩნისხარ და რაც უნდა მონდეს, მინდა რომ შენმა შეილება-მა, რომელნიც ჩემებიც იქნებიან, იცოდნენ როგორ დაუხვდა მათი პაპა ამ საშინელ დროს და რაგვარი იყო მისი მოღვაწეობა. ჩვენს შეილებს სამშობლოსათვის თავგანწირულის სამსახურის მაგალითი ვუჩვენოთ და, ვიცი დამეთანხმები, ამაზე უკეთესი და უძვირფასესი მემკვიდრეობა სხვა არა უნდათ რა. ჩემგან ამის მეტს ვერას მიიღებენ და, იმედი მაქვს, ამასაც იკმარებენ.

მარგალიტა გწერდა თავის უკანასკნელ წერილში, რომ სენეიუსტმა, ლებამ, რანკმა, ბერეემ და მე ფალსბურგზედ ავაარეთ; მეცში იარალის საწყობები დავათვალიერეთ და სტრასბურგისკენ მივემგზავრებოდით. ძალიან ცუდი დრო იყო, რესპუბლიკის სიცოცხლე ბეწვზედ ეკიდა. მაინცი და ვალანსიენი მტერმა წაგვართვა; ლიონი აგვიჯანყდა; ტულონ-მა გვიღალატა; ვანდელებმა რამდენჯერმე დაამარცხეს ჩვენა ჯარები; საჭმელ-სასმელი გაძვირდა, რადგან საზღვარგარეთისას ყველაფერს ინგლისელები ყიდულობდნენ, რომ ერთი-ათასად ძვირად მოეყიდნათ ჩვენთვის და შინ კი აღარა გვქონდა რა. ქვეყანა დაიშმა; კაცი აღარსად იყო, რომ გუთანი გაეტანა: ვინც იყო, ყველა ომში იყო; ასიგნაციები ისე დაეცნენ ფასში, რომ გასაავალი აღარც კი ჰქონდათ. ამოდენა უბედურებას გამო საერო კრება იძულებული შეიქნა სასტიკი ღონისძიებანი ეხმარა და მეც სრული თანხმობა გამოავაცხადე ამისი, რადგან სამართლიანად და გარემოებათა გამო საჭიროდ მიმაჩნდა იგინი; საერო კრებამ განაახლა ქვეყნის მთარველი კომიტეტი, რომელიც გარემოებათა შესაფერ გამჭრიახობას ვერ იჩენდა; დედოფალი მარიამ-ანტუანეტა და ერონდელეები სასჯელში მისცა; გამოაცხადა, ვიდრე მშვიდობიანობა ჩამოვარდება, კონსტიტუცია გაუქმებული იქნება და რევოლუციური წესწყობილება იქნება შემოდებულიო; ქულზე კაცი გაიყვანა ჯარში, 18 წლიდან 45 წლამდე; ხალხს ხარჯი ფულად კი არა, მოსავლით გამოართვა ჯარების გამოსაკვებად; ყოველ თემში და მაზრაში რევოლუციური კომიტეტები დააარსა, რომ ყური ეგდოთ რესპუბლიკის მოწინააღმდეგეთათვის და საერო კრებისათვის ეცნობებინათ ყოველი მათი საქციელი: უპირველეს საჭიროებათა დასაკმაყოფილებელ ზორაგეულობას ფასი დაადო, და მით აიძულა ვაჭრები, ამ ფასზედ ძვირად არა გაეყიდნათ რა; ასეთივე ფასი დაადო

დღიურ მუშის და ხელოსნების შრომას; სავალდებულო გახა-
და ვაჭრობაში ასიგნაციების ხმარება; საფრანგეთის ყოველ
კუთხეში კონვენტის წევრები გაგზავნა ჯარის მოსაგროვებ-
ლად და საჭირო იარაღის საშოვნელად: მათვე დაავალა,
თვალ-ყური სქეროდათ ჯარში მყოფ გენერლებზედ და მა-
გალითი ეჩვენებინათ სამშობლოსათვის თავგანწირული სამსა-
ხურისა....

მაგრამ ეს ყველაფერი არა კმაროდა!

ამით დიდი სიკეთე დასდო ჩვენს ქვეყანას კონვენტმა.
რესპუბლიკა განსაცდელიდან დაიხსნა. ჩვენი ჯარების ვატი-
ში და შოლეში გამარჯვებამ და ლიონის აღებამ დაგვარწმუ-
ნა, რომ ნამდვილად კარგს გზას ვადექით. ამავე დროს იმაშიც
დავრწმუნდით, რომ საცა კი დამარცხდა ჩვენი ჯარი, ან ლა-
ლატით დამარცხდა, ან არა და ძველი, მეფობის დროინდელი,
გენერლების უნიჭობის წყალობით. ჩვენ იმაში ვიყავით დამ-
ნაშავენი, რომ ძველი გენერლები არ დავითხოვეთ. გარდა
ამისა, ისიც ცხადად დავინახეთ, რომ საცა კი საფრანგეთში
ხალხის აჯანყება მოხდა, იმ დეპუტატების ბრალი იყო, რო-
მელნიც საერო კრებაში ან კანონმდებელ კრებაში იყვნენ
წევრებად და მერე კონვენტში კი აღარ იქნენ არჩეულნი. ეს
დეპუტატები ხალხის მტრები იყვნენ, უფიცი ხალხისაგან თა-
ვის წარმომადგენლად არჩეულნი ჟირონდელების მომხრე
როლანის მინისტრობის დროს; ან არა და მეფის დროინდე-
ლი მოხელენი, მეფისაგან უზრუნველყოფილნი მდიდრული
პენსიებით. საჭირო იყო ძველი გენერლების დათხოვნა და
მათ მაგიერ ახლების, უბრალო ხალხის შვილების, დანიშვნა;
საჭირო იყო სრული გაუქმება მეფის მომხრეთა გავლენასა,
რომელნიც — რესპუბლიკელნი ვართო — იძახდნენ, და რეს-
პუბლიკას კი ორმოს უთხრიდნენ.

ჩვენც სწორედ ამისათვის წავედით ალზასს და ლო-
რენს.

უჭირდა კიდევც ალზასს ჩვენი დანძარება: გამოვიდა თუ
არა თქვენი ჯარი მაინციდან ვანდეში წასასვლელად, ასი ათა-
სი კაცი პრუსიელი და ავსტრიელი მოადგა რეინს. ბარემ გვინ-
დოდა შეგვეერთებინა გაფანტული ჩვენი ჯარები, მაგრამ
მტრის სიმრავლესთან ველარა გავაწყვეთ რა და უკან და-
ვიწიეთ.

ჩვენ რომ ჩავედით, პრუსიელები უკვე ლორენში იყვნენ
და ავსტრიელები ალზასში. აკენო თითონვე დანებდა მტერს,

ვობანის ციხე ძალით აიღეს; მთელს ჩვენს მხარეს ბერები, რევოლუციის მოწინააღმდეგე მღვდლები და გახიზნული დიდებულები მოსდებოდნენ და ყველგან აჯანყებას ურჩევდნენ ხალხს, — იქნება აქაც ვანდელელებით გავიტაცოთ ხალხი და თავში საცემი გაუხადოთ რესპუბლიკასო. სტრასბურგელ მამასახლისს და მოხელეთ მოლაპარაკება ჰქონდათ მტრებთან. და ქალაქის დათმობას პირდებოდნენ. ხომ ხედავ, მიშელ, რა საშინელ მდგომარეობაში ვიყავით!

ქვეყნის მფარველმა კომიტეტმა მოზღვრულ მყოფი ჯარის მხედართმთავრად გენერალი ჰოში დანიშნა და რეინის ჯარის მხედართმთავრად — პიშეგრუ; დანიშნა, კი დანიშნა, მაგრამ ჯერ არავინ იცოდა, საქმეში როგორები გამოდგებოდნენ ეს ყმაწვილი გენერლები. პრუსიელები კი ნელ-ნელა წინ მოიწევდნენ და აქა-იქ ჩვენ ჯარებს ამარცხებდნენ; საქირო. იყო გვეზრუნა რამე, თორემ ხალხიც და ჯარიც თავის თავის იმედს დაჰკარგავდა და მაშინ კი ველარა გვიშველიდა რა.

სენეჟუსტმა, ლებამ და მე მაშინათვე გადავწყვიტეთ, გაძლიერებულ სენს ძლიერივე წამალი უნდაო. სენეჟუსტი და ლება საუკეთესო მეგობრები არიან რობესპიერისა; ორივე ყმაწვილი კაცები არიან, ძალიან განათლებულნი და ძალიან მშვიდნი; მშვიდნი კი არა, გულცივნი-მეთქი, რომ მეთქვა, უფრო მართალი ვიქნებოდით; ორივენი კარგად ხედავენ სამშობლოს გაჭირვებას და არავითარ საშუალებას არ იუკადრი-სებენ მისდა საშველად. იმათთან შედარებით მეც კი გულჩილი ვარ და იმათ მაყურებელს ხშირად მიფიქრია, შებრალების ღირსი უფროა ადამიანი, ვიდრე სასჯელისა-მეთქი.

შეუძლებელი წარმოსადგენია, რა ყოფაში იყვნენ სავერნისკენ მდგომი ჩვენი ჯარები. კარგად დიდი თოვლი იდო, ქარი ქროდა და ჩვენს ჯარს არც კარვები ჰქონდა, არც ფეხსაცმელი და არც თბილი ტანისამოსი. პიშეგრუ ვნახეთ და ჯარის ამგვარი ყოფის მიზეზი ვკითხეთ. საცა კი გავიარეთ მას შემდეგ, ყველგან იგივე საზარელი სურათი დაგვიხვდა; ჯარისკაცები მინდორში იყვნენ გაფანტულნი, რომ მიწიდან მაინც ამოეღოთ საჭმელად რაიმე ფესვები; სხვები კიდევ სოფელ-სოფელ დადიოდნენ, საიდანაც მკვიდრნი გახიზნულიყვნენ და დამშეულთ აღარც კი აგონდებოდათ. რომ სამხედრო კანონის ძალით, რომ მოესწრო ვისმე, სიკვდილი არ ასცდებოდათ. არტილერიის ცხენები იმ შუა ზამთარში გარეთ ეყარნენ, უთივოდ და მოუვლელად.

ამ ამბავმა მით უფრო გაგვაკვირვა, რომ ჩვენს წინააღმდეგ გაგზავნილმა კონვენტის წევრებმა, მილომ და გიარდენმა სარევოლუციო რაზმი შეადგინეს. ამგვარი სარევოლუციო რაზმი ყველგან არსებობს, სადაც კი მტრის შემოსევის შიში არის და მისი პირდაპირი მოვალეობა ის არის, რომ მებრძოლ ჯარს საჭმელ-სასმელი და ტანსაცმელი უზოვოს; სარევოლუციო რაზმს თან ახლავენ მსაჯულება განსახილველად ყოველი უთანხმოებისა, რომელიც ატყდება საქონლის პატრონის და სარევოლუციო რაზმის წარმომადგენელს შორის. აღზასელ სარევოლუციო რაზმს ძალიან ცუდად აესრულებინა თავისი მოვალეობა, და თუმცა დიდი ამბით დაგვიხვდნენ სტრასბურგელები და ყოველი მხრიდან იმას ჩაგვიჩინებდნენ, სულყველა რიგზე გახლავთო, ჩვენ მაინც კარგად ვხედავდით, რომ ხალხი დამშეული იყო. ჯარისკაცი — ტიტველი და მშიერი, და ამიტომ აღარც თავისი წინამძღოლების პატივისცემა ახსოვდა და აღარც ბრძანების ასრულება; დარაჯები აღარსად ეყენა, ციხის კარები შუალამედე ღია იყო და სხვა, არისტოკრატები კი პრუსიელების შემოსევის მოლოდინში დღე და ღამ ქეიფში ბრძანდებოდნენ და — ჩვენ ამისი საბუთები ხელთა გვქონდა — საერო და სამხედრო მოხელენიც იმათთან ერთად რესპუბლიკას ღალატობდნენ და ორმოს უთხრიდნენ.

სტრასბურგში ჯამუშობაში მოვასწართ ავსტრიელი გენერლის ძმისწულს ვურმსერს და დასასჯელად პარიზში გავგზავნეთ. მეთორმეტე რაზმის წინამძღოლი და ორი ოფიცერი, რომელთაც სახლში სამეფო კოკარდები ვუპოვეთ, იმავე დღესვე დავახვერტიინეთ მთელი ჯარის წინაშე. ყველგან სასტიკად შევამოწმეთ ანგარიშები, მეტადრე საავადმყოფოებში, სადაც ასობით და ათასობით ლპებოდნენ უბედურა დაჭრილები მოუვლელობით და უექიმობით, და ყველგან ერთა და იგივე ვნახეთ: თითქმის ყველა მოხელე მტრისკენ ყოფილიყო და კვალიც არსადა ჩანდა პატრიოტული გარჯისა და წინდახედულობისა. დასასჯელად ცხრა მილიონი ბეგარა დავადეთ სტრასბურგელ მდიდრებს ჯარის სასარგებლოდ, რადგან კონვენტის ბრძანებისამებრ მდიდრები ვალდებული არიან გამოჰკვებონ ჯარი, რომელიც მათ მტრისაგან იფარავს: „ოქრო მაინც გამოიღონ მდიდრებმა, როდესაც ხალხი სამშობლოსთვის რუებად ანთხევს თავის სისხლს“, — დაადგინა კონვენტმა.

ეს დანტონის სიტყვებია და მეც სრულიად ვეთანხმები მის აზრს.

ჯერ დიდი ყაყანი შექნეს, მაგრამ რაკი მოედანზედ გილიოტინა მზად იყო ამართული, დანიშნულ დროს ისე ჩაგვაბარეს იმოდენი ფული, რომ გროში არ დაუკლიათ. ნახევარი მილიონი იმ მოხუცებულთ დაუფრიგეთ, რომელთა შვილები ჯარში იყვნენ, შინ მზრუნველი აღარავინ დარჩენოდათ და შიმშილით იხოცებოდნენ; დანარჩენი ჯარს მოვახმარეთ.

მაგრამ ესეც არ კმაროდა.

ბრძანება გავეცით, სტრასბურგის მოქალაქეებმა მზად იქონიონ ორი ათასი ხელი ლოგინი ავადმყოფ და დაქრილ ჯარისკაცთათვის; ბრძანება გავეცით, ლოგინს გარდა ჯარისკაცს ისეთი მოვლა და პატივი ჰქონდეს, როგორც ეკუთვნის სამშობლოსათვის თავგანწირულ სათნოებას; გარდა ამისა გამოვაცხადეთ, რომ ექიმებს ცხენები მიეცემათ, რათა ცხენით დაიარონ ხოლმე ავადმყოფები სანახავად. იმავე დროს ათი ათასი წყვილი ჩექმა და იმდენივე ნაბადი შეეუკვეთეთ სავერნში გასაგზავნად ჯარისკაცებისათვის; და რადგან ყოველი ჩვენი ბრძანება, სამშობლოს გაჭირვებით გამოწვეული, მეტისმეტად გულს უღელვებდა სტრასბურგელ მოხელეთ, ყველა საექვო მოხელე დავითხოვეთ სამსახურიდან; დათხოვნილები ზოგი ქ. მეცს გავისტუმრეთ, ზოგი შალონს, და იმათ ადგილზე ხალხს ამოვარჩევინეთ, ვინც თითონ უნდოდა.

მაშინ კი უნდა დარწმუნებულიყვნენ ავსტრიელები, რომ ვერ აუსრულდებოდათ წადილი და, მიუხედავად დედოფლის მარიამ ანტუანეტას დაპირებისა: „ოღონდ მოგვეშველენით, და აღზასი თქვენი იყოსო“, — საიდანაც მობრძანდნენ, იქვე უნდა წაბრძანებულიყვნენ ხელცარიელები. კარგ დროს კი ჩავედით, ლვთის წინაშე! რამდენიმე დღე კადევ; და სტრასბურგი მტრის ხელთ იქნებოდა.

ზემოდ გწერდი, სტრასბურგელი მსაჯულები, რომელნიც რევოლუციურ რაზმთან ერთად მოქმედებენ, არამც თუ არ ასრულებდნენ პარდაპირ თავიანთს მოვალეობას, პირიქით ისე იქცევოდნენ, თითქო რესპუბლიკის მტრობა ჩადოთ გულში. ბრალმდებლად ერთი მღვდელი, ვილაც შნეიდერი, ამოერჩიათ და იმისთანა ჯარიმა გადაეხდევინებინათ მოქალაქეთათვის, იმდენი ხალხისთვის გადაეწყვიტათ სიკვდილით დასჯა, რომ შეერცხვინათ რევოლუცია და ყოველი ნდობა დაეკარგათ ხალხისა მისდამი. ის იყო ჩვენ მივედით და

„შნიდერიც მოვიდა. დიდი ამბით შემობრძანდა ქალაქში, მაგრამ შემოვიდა თუ არა, ჩვენ მაშინვე... მაგრამ, აი, თვით ჩვენი ბრძანებაც. ვიცი გაამება: შენგან გამოგზავნილი მოხუცებული დედაკაციც ამ შნიდერს უჩიოდა და, როგორც ხედავ, ღირსეულად დავსაჯეთ, რადგან იმის გარდა ასი სხვა დანაშაული ჰქონდა.

„ერას წარმომადგენელთ, კონვენტის მიერ რეინზედ და მოხელზედ მყოფ ჯარში საგანგებოდ გამოგზავნილთ, რა გააგეს, რომ რევოლუციურ მსაჯულთა ბრალმდებელი, მღვდლად ყოფილი შნიდერა, დიდი ზემით და თავხედურა დიდებით შემოვიდა დღეს ქალაქში, ხმალამოლებული მხლებლებით და ექვს ცხენიანი ეტლით, დაადგინეს: ხვალ დილის ათი საათიდან ნაშუადღევის ორ საათამდე იგი, შნიდერი, მოედანზედ, გილიოტინის ბოძზედ იქნება მიკრული, რათა ხალხს წინაშე დასჯილ იქნას იმ საქციელისათვის, რომლითაც მან წაბილწა ჯარედ ფეხაუდგმელის რესპუბლიკის ზნე-ჩვეულებანი; ნაშუადღევის ორ საათზედ იგი, შნიდერი, წარუდგება ქვეყნის მფარველ კომიტეტს. ქალაქში მყოფ ჯარის უფროსს მივანდობთ აღსრულებაში მოიყვანოს ჩვენი ბრძანება და ხვალ ნაშუადღევის სამ საათზედ მოგვახსენოს მისი დაბოლოება“.

აი რა სასტიკადა ვსჯით ჩვენს მოწინააღმდეგეებს! და სწორედ ამით აიხსნება ჩვენი გამარჯვება. ჩვენ რომ ყოყმანი დაგვეწყო, აქამდის ათჯერ გაგვეიდდენ და ხელშეკრულებს მრავიყვანდნენ მტრის ბანაკში; ხომ იცი, რაც კი ქვეყანაზედ ხელმწიფე, მეფე, დიდებული და ბერი არის, როგორც ბაზრობას ჯიბგირები, სულ ერთმანეთის ქომავნი არიან, და მიზნად მართო ისა აქვთ, რომ საწყალი ხალხი ყვლიფონ ეტყობათ, ძალიან სწყინთ ჩვენგან ასეთი გადაწყვეტილი საქციელი; მაგრამ ეგ არაფერი: თუ სწყინთ, მაშასადამე, კარგი ყოფილა ჩვენი საქცაელი.

რაკი ეს საქმეები გავარიგეთ, ახლა მტერთან ბრძოლას შევეუდექით. კარნომ მოხელის ჯარი გენერალ ჰომს ჩააბარა. ჰომმა სულ ცოტა ხანში ისე მოაწყო წინათ დამარცხებული და გულგატეხილი ჯარი, რომ პრუსიელები დაამარცხა და მით კვლავ იმედი ჩაუნერგა ჯარსაც და ხალხსაც.

მეორე მხრივ გენერალმა პიშეგრუმ ჩვენი ჯარით ავსტრიელებს შეუტია, მაგრამ ავსტრიელებს უბრწყინვალესი თავადი კონდე მიეშველა გახიზნულებით და იმოდენა ძალასთან ჩვენს ჯარს ვერა გაეწყო რა; ლორენში ჯერ ისევ მტე-

რი იღგა და მტერთან ერთად ურიცხვი გახიზნული თავდაზნაურობა და ბერები. ჰოშიმა განიზრახა ლორენში თავის ჯარის გადაყვანა პიშეგრუს მისაშველებლად, მაგრამ პრუსიელები დახვდნენ და გზა შეუკრეს; აი, მაშინ გამოიჩინა ჰოშიმა თავისი მხედართმთავრული ნიჭი: პრუსიელების წინააღმდეგ ერთი რაზმილა დატოვა და თითონ კი მთელი თავისი ჯარით დათოვლილი ვოზგის მთები გადაიარა და პიშეგრუს ჯარს შეუერთდა ლორენიდან ავსტრიელების გასარეკად.

სამაგალითო საქმე იტვირთა ჰოშიმა!

სწორედ ამ დროს მოვიდნენ კონვენტის წარმომადგენელი, ახალი უფლებებით აღჭურვილნი, ლაკოსტი და ბულო.

პიშეგრუს უნდოდა მხედართმთავარი მარტო ყოფილიყო და არავის ბრძანებას ყურადღებას არ აქცევდა. პრუსიელების წინააღმდეგ ერთი მცირე რაზმილა გვედგა. კიდევ კარგი, რომ ამისი არა იცოდა რა მტერმა, თორემ ცუდად იქნებოდა ჩვენი საქმე. ჩვენი ხსნა სიჩქარეზედლა იყო დამოკიდებული. ლაკოსტმა და ბულომ თითონ იკისრეს ყოველა პასუხისგება და ორივე ჯარის მხედართმთავრობა გენერალ ჰოშს უბოძეს.

ლორენელი ხალხის აღტაცებას საზღვარი არა ჰქონდა, ყველა სოფელში ზარს რეკდნენ, ყველა იარაღს ისხამდა. ყველას ენატრებოდა მტრების განდევნა.

წარმოიდგინე ჩემი სიხარული, როდესაც ჯარში ჩვენებურები შემხვდნენ; ორმოცდაათამდე იქნებოდნენ და მათ შორის ნათლიაშენი, ლეტუმეი, კოლენი... ფალსბურგი, ლიქსპეიმი, სარბურგი, ერთი სიტყვით, მთელი ჩვენი მხარე იქ იყო.

ჩვენს ჯარს წინ მიუძღოდა გენერალი ჰოში და მასთან ერთად კონვენტის წარმომადგენელი. ნელ-ნელა მივიწვიდით და წინ ავსტრიელ ჯარს მივერეკებოდით. დარწმუნებული ვიყავით, რომ ველარსად გაგვიმაგრდებოდა და, კდღც რომ გაგვიმაგრებოდა, გამარჯვება ჩვენი იქნებოდა. ჰოში სრულიად ყმაწვილი კაცია, სულ ოცდახუთის წლისა, მაგრამ იმისთანა ძლევამოსილი მხედართმთავარია, თითქო ომებში დაბერებულყოფს. საკვირველი წინდახედული კაცია და რომ მითხრან, წუნი მოუძებნე რამეო, იქნება ვერც კი მოვახერხო; ერთს კი ვემდური: ზშირად თავის ჯარისკაცებს ფულს დაჰპარდება ხოლმე, მტრის ზარბაზნები და დროშები მომიტანეთო. ეტყობა, სრულიადაც არა სწამს ჯარისკაცებისაგან სამ-

შობლოს სიყვარულით თავგანწირვა, რომ ფულს ჰპირდება
ჯილდოდ; ეტყობა, ამ ყმაწვილმა კაცმა უკვე იცის ყოველი
სუსტი მხარე ადამიანიშვილისა, რომ გაჭირებაში მის სიან-
გარეც კი გამოიყენა. მე კი თქვენი კლებური მირჩევნია, რო-
მელმაც კაპიტანს შუარდენს უბრძანა ტორფუმი: „ვიდრე
ჯარი სამშვიდობოში გავა, შენ შენი რაზმით აქ შეაყენებ
მტერს. ყველანი დაიხოცებით და ფეხს კი არ მოიცვლით აქე-
დან“. შარდენმაც კარგად უპასუხა: „პატონი ბრძანდები, ჩემო
გენერალო!“ ასეა თუ ისე, ჰომმა ჯერჯერობით რესპუბლიკის
ყოველი ბრძანება კეთილად ასარულა და ეს მით უფრო სა-
სიხარულოა, რომ თითონაც დიდად პატიოსანი კაცი და თავ-
განწირული რესპუბლიკელია.

მტერს 27 ქრისტეშობისთვის დავეწიეთ ვისემბურგში
გამაგრებულს. ჰომმა ის იყო დააწყო ჯარები საომრად, რომ
ტულონის აღების ამბავიც მოგვივიდა. ელვასავით მოედო ეს
სასიამოვნო ამბავი მთელს ჯარს და გაუორკეცა გამარჯვე-
ბის იმედი. უფროსების ბრძანებისთვის აღარც კი მოუცლია
ჯარს, ერთი კი შესძახა, სიკვდილი მტერსაო! და გაექანა ავ-
სტრიელებისაკენ.

შენ კარგად გეცნობება, ჩემო მაშელ, ზარბაზნის ქეჩაც,
ტყვიის ზუზუნიც, საყვირის ხმაც და გაშმაგებულ მეომართა
ძახილიც, მაგრამ არა მგონია, ამისთანა საშინელი ხმაურობა
სხვაგანაც ყოფილიყო სადმე.

ბრძოლის ველზედ ისეთი კვამლი დატრიალდა თოფის-
წამლისა, რომ აღარათფერი ჩანდა და მარტო ჩვენი ჯარის ძახი-
ლიდა ისმოდა: რესპუბლიკას გაუმარჯოსო! მე და ჩემი ამხანა-
გები ცხენებით მივდევდით ჩვენს ჯარს, მაგრამ ჩემს ცხენს
ყუმბარის ნატეხი მოხვდა, წაიქცა და მეც ლაფში ამომსვარა.
ცხენის მოკვლა არა მწყენია, ღვთის წინაშე, რადგან უნაგირს
უჩვევი ვარ და ფეხით სიარული უფრო მეხერხება. წამოვდე-
ქი განცვიფრებული, მივიხედ-მოვიხედე... საღლა იყენენ ჩემი
ამხანაგები? იქვე ჩემს ახლოს ერთი რაზმი მირბოდა მთისა-
კენ; მეც ვიშიშვლე ხმალი და ამ რაზმს შევეკრიე. ავედით აღ-
მართზე; ეტყობოდა, მტრის ზარბაზნების წასართმევად მი-
დიოდნენ მთაზედ. სულ ოცს ნაბაჯზედლა ვიქნებოდით მტრი-
საგან, როდესაც ბრძანება გაისმა — ხიშტი, ბიჭებო, ხიშტიო!
ისე დაერივნენ მართლა ჩვენი ბიჭები იმ უბედურ ავსტრიე-
ლებს, როგორც მგელი ცხვარს. დაირყეს და დიდი ხანი მის-
დიეს გაქცეულთ. თუ გაგვიმაგრდა ვინმე, ისევ უნგრელები

გავგიმაგრდნენ და თავადი კონდეს ცხენოსნები, მაგრამ საღამო ჟამს ისინიც დავდარიით და დამარცხებულთ გავუყუნეთ.

რაც კი მტრის ჯარს ბარგი ჰქონდა, სულ ჩვენ დაგვრჩა. აღზას-ლორენელების სიხარულს საზღვარი აღარა ჰქონდა და სულ თვალცრემლიანნი გვიხდიდნენ მადლობას, რომ მტრისაგან გავათავისუფლეთ. მეორე დღეს დილაადრიადად შევედით ქ. ლანდაუში. იქაც დიდი აღტაცებით მიგვიღო და დიდძალი ხორაგი დაგვახვედრა ხალხმა. ჰოვს ებრძანებინა, ჯარისათვის ყოველიფერი მზად დამახვედრეთო და, პართლაც, ისე კარგად დაგვიხვდნენ ლანდაუელი პატრიოტები, რომ სრულიად დაავიწყეს ჯარს იმოდენა ხნის შიმშილი და სიცივე.

ამ წერილს ლანდაუდან გწერ, ფოსტის ქუჩაში რომ დიდი სასტუმროა „ოქროს ვაშლისა“, იქიდან; გეცოდინება, რადგან ექვსი კვირა იდგა აქ თქვენი ჯარი. ნათლიაშენი, ლეტუმე, კოლენი და სხვა ჩვენებური პატრიოტები დამპირდნენ, სადილად შენთანა ვართო და იმათ ველი. გუშინ წელამდე თოვლქვაპში ვცურავდით, დღეს კი ლამაზად გაჩაღებულ ბუხარს ვუზივარ; მოვლენ ჩვენებურები და კარგა ლამაზადაც გადავკრავთ რესპუბლიკის სადღეგრძელოს და მარსელურსაც დავძახებთ. მართალია, რესპუბლიკა უჩვენოდაც ძალიან კარგად არის, მაგრამ, ხომ იცი, ქრისტიანი კაცი იმას ადღეგრძელებს, ვინც უყვარს, თორემ რა უჭირს რესპუბლიკას! ისე გამაგრდა ამ ბოლო დროს, რომ შიში აღარაფრისა აქვს. დიდებულებიც კი დარწმუნდნენ, რომ მეფე შარლის და ლუის მაგივრად დღეს თავისუფლება, თანასწორობა და გონება გამეფდა; ხალხი განათლდა, სახელმწიფოს გამგეთ ანგარიში მოსთხოვა. უმთავრესი ის იყო, რომ ერთმანეთში შეთანხმებულიყო ხალხი, თორემ რაკი შეთანხმდა, იმას ქვეყნად ველარა აჯობებს რა.

ამ წლის დასაწყისში მტრის ჯარით სავსე იყო ჩვენი ქვეყანა. დღეს ერთიც აღარსად მოიპოვება მთელს საფრანგეთში და, თუმცა დიდი გაჭირვებით, მაგრამ ჩვენს ქვეყანაში ჩვენა ვართ ბატონები და არა სხვანი. ფალსბურგში ჩვენს კლუბში, თუ გახსოვს, ბევრჯერ მითქვამს — საშინელი ძალით შეებრძოლება-მეთქი ხალხი დიდებულების თავხედობას და სიბრყევას; ბევრჯერ მითქვამს და მართალიც მითქვამს. როგორც ხედავ, საშინელი ძალით შეებრძოლა ხალხი თავის მტარ-

რვალეზს და გამარჯვებულს გამოვიდა ბრძოლიდან. და თუმცა მთელი ევროპა წამოიშალა ჩვენთან საბრძოლველად და, სულ ნაკლები რომ ვთქვათ, ასი ბრძოლა მაინც მოგვიხდა მტერთან, მაგრამ უშთავრესი ჩვენი მიზანი არ დავივიწყეთ და ურყეველი საძირკველი ჩაეყარეთ ჩვენი მომავალისა.

შენ, რასაკვირველია, დრო არ გექნებოდა გაზეთებისთვის თვალ-ყური გედევნა და გაგეგო, რას აკეთებდა კონვენტი აჰ საშინელს ომიანობის დროს; მაგრამ იცოდე, კონვენტს ერთ წამს არ დავიწყებია პირდაპირი თავისი მოვალეობა, ერთ წამს არ დავიწყებია, რომ მას ხალხისაგან მინდობილი ჰქონდა, კეთილ დაწესებულებათა ზედან დამყარე ერის ცხოვრება, რომ მის ბედნიერებას, მის კეთილდღეობას, მშვიდობიანობის დროს მაინც, არავისი შიში არა ჰქონდესო. შენ უჩემოდაც კარგად იცი, რამდენად გააუმჯობესა ჩვენი სამხედრო წესწყობილება კონვენტმა; ამის შესახებ სიტყვას არ გავაგრძელებ. დიუბუა-კრანსესი, კარნოსი და პრიორის მადლობელნი უნდა ვიყვნეთ, რომ მთელს ევროპას გაუძლო ჩვენმა ჯარმა, და არამც თუ გაუძლო. დაამარცხა კიდეც.

იცი, რა სიკეთე დასდო კონვენტმა ჩვენს ქვეყანას, რომ ერთი და იგივე წონა და ზომა დააწესა მთელი საფრანგეთისთვის? იცი, რამდენი მოტყუება და ქურდობა მოსპო, სხვადასხვა მაზრაში არსებული ზომა და წონა რომ გააუქმა? იცი, რა ფრთები შეასხა ამით ვაჭრობას? გარდა ამისა, კონვენტმა დაიწყო მოქალაქებრივი კანონმდებლობის შედგენა. კონვენტმა მოჰფინა მთელს საფრანგეთს ტელეგრაფის ქსელი. კონვენტმა დააარსა ლიტერატურული და ხელოვნური საკუთრება: მანამდე კი ჩვენში ასე იყო, რომ ლიტერატორი და არტისტი შიმშილით მოკვდებოდნენ, ვისმე დიდებულს რომ არ შეჰკვდებოდნენ მადლის გულისთვის; მათ ნაწარმოებს კი ვინმე გაიძვერა დაეპატრონებოდა და ჯიბეებს იტენდა; ამიტომ დაადგინა კონვენტმა, რომ ხელოვნური და ლიტერატურული ნაწარმოები ავტორის ხელშეუხებელ საკუთრებას შეადგენს და, თუ არ გაყიდა ან არ აჩუქა ვისმე, მით სხვა ვერავინ ისარგებლებს.

კონვენტმა შეადგინა და დააწესა ახალი, რესპუბლიკური კონსტიტუცია. კონვენტმა გამოაცხადა ერთობა და განუყოფლობა რესპუბლიკისა, რომელზედაც დამყარებულია დიდება

და ძლიერება ჩვენი ერისა. კონვენტმა დააწესა წვრილ-წვრილად, და ისიც ნისიად გაყიდვა გახიზნულთა მამულებისა; დახმარება იმ სოფლებისა, რომელნიც უფრო დააზარალა მტრის შემოსევამ, და დახმარება იმ ოჯახებისა, რომელთაც ბევრი წვრილშვილი ახვევიათ. კონვენტმა დაავალა ყველა სოფელს მოხუცებულების შენახვა და მათთვის შესაფერი საქმის შოვნა. კონვენტმავე შემოიღო ახალი აღრიცხვა დროისა და, ჩემი აზრით, ამაზედ უძლიერესი და ამასთან ამაზედ უძნელესი მას არაფერი გაურიგებია; ჩვენი ძველი კალენდარი ბარბაროსულის და უეცი ხალხის შექმნილი იყო; ამ კალენდრით იყო აღრიცხული თვრამეტი საუკუნის განმავლობაში მუშა ხალხის დამცირება და დამონავება მუქთახორა, უზნეო და უღმერთო დიდებულების განცხრომა და გარყვნილება; ამ კალენდრით იყო აღნიშნული თვრამეტი საუკუნის განმავლობაში სიამაყისა და ბიწიერებისაგან ნიჭის და სათნოების დევნა და დამცირება.

ნუ თუ იმავე კალენდარს უნდა აენიშნა ადამიანის უფლებათა დამყარება, ხალხის განთავისუფლება, ძმობის, ერთობის და თანასწორობის შემოღება, რომელიც მეფეების ავტოკობას და ეპისკოპოსების გარყვნილებას ისე შეჩვეულიყო, რომ დიდებულისა ყველა სათნოებად მიაჩნდა? ჩვენ ეს ვერ შევძელით; ჩვენი დრო ახალ ხანას იწყობდა ისტორიაში და ამიტომ ბრძანება გავეციით, რომ ფრანგების წელთაღრიცხვა დაიწყება 1792 წლიდან,—ესე იგი იმ წლიდან, როდესაც რესპუბლიკა იქნა დამყარებული. წელიწადი 23 ენკენისთვიდან იწყება, რადგან ამ დღეს არის მზე... მაგრამ ეს ვარსკვლავთმრიცხველების საქმე არის; ჩვენთვის ისიცა კმარა, რომ ჩვენი კალენდარი, როგორადაც სხვა ყველაფერი, შეუცდომელ მეცნიერულ საფუძველზედ არის დამყარებული და ამით არის, რომ ასე ადვილად ვჯობნით ძველებურ დამყარებულ წესწყობილებაზედ არსებულ სახელმწიფოებს.

ჩვენ სიმართლის და, მეცნიერების გარდა არა გვწამს რა. ეს არის ჩვენი ძალა და, როგორც ბუნებაა უძლეველი, ისე ჩვენი ძალა და მით ჩვენი ერი.

სულ რომ ჩამოვთვალოთ. შორს წავა კონვენტის ნაღვ-წვევი. მაგრამ არ შემიძლია არ მოვიხსენიო საერო განათლების შესახებ მისი დადგენილება. საქმე ის კი არ არის, კაცმა კარგი თესლი შეიძინოს; საქმე ის არის, ის თესლი ქვეყანას მოჰფინოს და ააღორძინოს. სწორედ ასევე მოიქცა კონვენტი და,

რადგან კეთილ მისწრაფებათა მოფენა მარტო განათლებით შეიძლებოდა, ხალხის განათლებას მიაქცია უმთავრესი ყურადღება. რად უნდა გვიკვირდეს, რომ მეფეებმა და ხელმწიფეებმა ბორკილი შეაბან და მაგრად შეჯაჭვეონ სიტყვა, აზრიც და მწერლობაც? რად უნდა გვიკვირდეს, რომ მეფეებმა და ხელმწიფეებმა ყოველი ღონისძიებით შეაფერხონ და შეაყენონ ხალხის განათლება და წინმსვლელობა? ხალხის უვიცობაზედ არის დამყარებული მათი ხელმწიფობა; სწავლა-განათლება ძირს უთხრის მათს დიდებას და მტარვალობას. სულ სხვაა რესპუბლიკა: რესპუბლიკის დიდება და ძლიერება მარტო ხალხის განათლებაზედ არის დამოკიდებული და, რაც უნდა წინააღმდეგობა გაუწიონ მას დიდებულებმა და ბერებმა თავიანთი სიცრუით და ცბიერებით, ცილისწამებით და ღალატით, მაინც ველარას გააწყობენ: ამდენი ხნის განმავლობაში დაგუბებულმა ზღვამ უკვე გადაარღვია ღობე და თავისუფალ გზას დაადგა. მისი შეყენება ამ ქვეყნად აღარავის შეუძლია. რესპუბლიკამ იმისთანა სხივი მოჰტინა ქვეყანას, რომ ბრძემბიც კი დაინახავენ.

კონვენტმა სავალდებულოდ გახადა დასაწყისი სწავლა-განათლება და ბრძანება გასცა, ყოველმა დედ-მამამ, ნათესავმა ან მზრუნველმა, ბავშვი უთუოდ უნდა ატაროს დასაწყისი სკოლაში. ეს დასაწყისია და ამას კიდევ ბევრი სხვა დადგენილება მოჰყვება, რომლითაც ღირსეულად იქნება მოწყობილი მეცნიერული, ხელოვნური, სამეურნეო, სავაჭრო და სამხედრო სწავლა-განათლება. თავისუფალმა ხალხმა უნდა იცოდეს თავის თავის დაცვა და ამისთვის ჩვენ უნდა გვეავდეს მეცნიერებით აღჭურვილი კაცები, რომ ჯარის სიმრავლისა კი არა, უფრო ცოდნის და გამოცდილების იმედი ჰქონდეთ გაჭირვების დროს. რაც მთელი ქვეყნის მეფეებმა თხუთმეტი საუკუნის განმავლობაში ვერ მოახერხეს. რესპუბლიკა თხუთმეტი წლის განმავლობაში მოახერხებს: ქვეყანას ჰემპარიტებას შეაგნებინებს და ადამიანს ადამიანად აქცევს.

დევ, აწინდელ თავისუფლებას უწინდელი მონობა ამჯობინონ ჩვენმა მტრებმა, გვლანძღონ და გვაგინონ! დევ, სისხლით გაუმადლარი მხეცები გვიწოდონ! რა ვქნათ. სამშობლოს და ადამიანის განთავისუფლებისთვის საკუთარი სიცოცხლე არ დაგვიანდვია, და არისტოკრატებს დაეინდობდით? იმდენი სთქვან, მანამ მოეწყინებათ. ჩემო მიშელ! გინება და ლანძღვა კი არა, კიდევაც რომ გაჭირდეს საქმე და დღევანდელი

კონვენტის წევრნი ერთიანად ამოგვზოცონ, მითაც აღარა წახდება რა: ჩვენს ალაგს ჩვენი შვილები დაიკვირენ და მომავალი მაინც ჩვენია!

ღმერთმა ინებოს მხოლოდ, რომ ჩვენში ერთობა არ დასუსტებულიყოს, და როგორადაც ერთად ვიყავით, როდესაც ჟირონდელებს ვაჯობეთ, ისევე ერთად ვიყვნეთ ყოველთვის. ჟირონდელებს რომ გაემარჯვათ, დღეს რესპუბლიკა აღარ იქნებოდა: ადამიანი ს უფლებათა გამოცხადებამ არა მარტო ჩვენი ხალხი გაანთავისუფლა, არამედ მთელი კაცობრიობა და ამიტომ მოეშველნენ ჩვენს მეფეს მთელი ევროპის მეფეები; ჟირონდელები ვერ გაუმაგრდებოდნენ ევროპას და ისე ამოსწყვეტდნენ პრუსიელები პატრიოტებს, რომ აზრიც კი აღარსად დარჩენილიყო თავისუფლების და თანასწორობისა; ძველი წესწყობილება უფრო მჭიდროდ დამყარდებოდა ქვეყნად თავისი დიდებული ბატონებით, ბერებით და იმათი უთვალავი უპირატესობით; საწყალი ხალხი ისევე იმ უღელში იქნებოდა შებმული, რომელშიაც 1789 წლამდე იყო და მისი დანიშნულება მარტო ისღა იქნებოდა, რომ ორასი თუ სამასი ათასი დიდებული ეცხოვრებინა განცხრომით და ქეიფით; ავსტრიელები, პრუსიელები, ინგლისელები, ესპანელები და იტალიელები თითო კარგ ნაჭერს ჩამოაჭრიდნენ საფრანგეთს თავიანთ სამხედრო ხარჯის გასანაღდებლად და ამით გათავდებოდა საქმე.

მაგრამ ერთობა გვექონდა და სწორედ ამ ერთობამ შეგვიქნა უძლეველი ძალა და გამარჯვება. კიდევაც დიდი საქმეები გვაქვს გასარიგებელი და კვლავაც იგივე ერთობა გვექნება, ღმერთია მოწყალე.

კონვენტში ორი კაცია შესანიშნავი თავიანთი ნიჭით და მოღვაწეობით: რობესპიერი და დანტონი. რობესპიერი ცდილობს ისე მოაწყოს სახელმწიფოს ცხოვრება, რომ მმართველობისაგან იყოს დამოკიდებული სუყველაფერა. დანტონს კი უნდა სუყველაფერი თავისუფლად დატოვოს და ჩვენს ქიშპობაზედ მოაგდოს ჩვენი წარმატება; მმართველობა რაც შეიძლება ნაკლებად ჩარიოს ხალხის ცხოვრებაში და სუყველაფერი ხალხის სურვილს და ამორჩევას დაუმორჩილოს, ისე რომ ხალხი თითონ იჩივედეს მსაჯულებს, დეპუტატებს, მოხელეებს და სხვ. და სხვ. როგორც ხედავ, იმისთანა მოწინააღმდეგენი არიან ერთმანეთისა ეს აზრები, რომ მათი შეთანხმება შეუძლებელია. ვნახოთ, ვის მიუდგება მომავალი. მე

კი სულ იმას ვნატრობ სამშობლოს დიდების და კეთილდღეობისთვის, რომ ეს ორი კაცი შეთანხმდნენ და მორიგდნენ ერთმანეთში და რესპუბლიკის კეთილდღეობას ანაცვალონ თავიანთი პირადობაც კი... მაგრამ აგერ მოდიან ჩვენებურები—ნათლიაშენი, ლეტუმიე და სხვანი,—იმათი სიცილი მესმის კიბიდან. ბევრს გაკოცებ, ჩემო მიშელ. ნათლიაშენი და ყველა ჩვენებური მთხოვენ, მოკითხვა მისწერეო; ნანობენ. აქ რომ ყოფილიყო ჩვენი მაშელი, უფრო კარგად გავატარებდით დროსაო. ნეტავი აგრე და აქა ყოფილიყავი! რა სიყვარულით ჩაგიკრავდი გულში!

შენი ერთგული შოკელი“

ქვევით ნათლიაჩემს მოეწერა თავისებური მსხვილი ასოებით:

„ძმობა და გამარჯვება, ჩემო მიშელ! ნეტავი შენც აქა გვეყოლოდი დღეს და ერთად გავგეტარებინა დრო მაგრამ დღეს თუ არა, ხვალ აქ იქნები, განა, მიშელ, და მე და შენ ჩვენებურად ძველებურად გავაჩაღებთ სამქედლოში ჩვენს ქურას და ავათამაშებთ ჩაქუჩებს... იმ წუწკი ვალენტინის მუქარა გაიგე, ჩამოზრჩობას რომ მიპირებდა? კონდეს რაჴმში იყო და ისე დავამარცხეთ, ისე, რომ კურდღელივით გულგახეთქილები გავაქციეთ. ბევრს გაკოცებთ. რესპუბლიკას გაუმარჯოს!“

ხელს აწერდენ ნათლიაჩემი და ერთი ოციოდე კიდევ ჩვენებური პატრიოტება.

მთელი ეს ზამთარი სხვადასხვა ძველი ქალღმერთის კითხვას მოჟუნდი. აგერ გაზაფხულდა. მინდა ცოტა ხნით მივმალო სადმე ჩემი სათვალეები, თვალეები დავასვენო და მერე დავასრულო ეს ვრძელი ისტორია.

მაშ ნახვამდის, მეგობრებო, კარგად იყავით, რადგან უმთავრესი ის არის, ჯანსაღად იყოს კაცი.

მამულიშვილი ბონაპარტი

I

ვანდელების ჯარის ნაშთი ქაობებში დაგვემალა, როგორც უკვე მოგახსენეთ. იქვე იმყოფებოდა გაქცეული მათი წინამძღოლი შარეტი და, თუმცა პირდაპირ შებრძოლებას ვერ გვიბედავდა, მაგრამ მაინც ძალიან აზარალებდა სოფლებს: დაესეოდა, რისაც წაღება არ შეეძლო, ცეცხლს წაუკიდებდა, და საქონელს კიდევ თან გაიჩეკდა. ცუდი ის იყო, რომ ამგვარად გაძარცვული გლეხჯაცობა თავის გამძარცველსავე უერთდებოდა და დღითი დღე უფრო და უფრო იზრდებოდა ვანდელების ჯარი.

ნანტის გარემოში მდგომ ჯარისაგან რამდენიმე რაზმი იქმნა გაგზავნილი შარეტის დასაჭერად; მაგრამ გაიგებდა თუ არა, ჯარი მოდისო, მაშინვე ქაობებს შეეფარებოდა და იქ კი შეუძლებელი იყო მისი დევნა: ჩაგვისაფრდებოდა სადმე და ისე ამოხოცავდა მთელს ჩვენს ჯარს, რომ ვერც კი გაგვეგო, საიდგან ვოდითა: ტყვია.

ამ გაჭირებაში ვიყავით 1794 წლის იანვარში და თებერვალში. მაგრამ ახლა კი ისე დაწვრილებით აღარ ავიწერთ ყველაფერს, როგორც აქამდე ვწერდი: ძალიან დავბერდი. ვინ იცის რას მიქადის ხვალინდელი დღე, და მე კი ჯერ რამოდენიმე წელიწადი კიდევ მაქვს ასაწერი ჩვენი რესპუბლიკის მოსპობამდე; მერე მინდა ისე მოგითხროთ ყველაფერი, რომ არაფერი დამავიწყდეს, შეტადრე რაც ჩემი თვალთ მინახავს.

შარეტის დასაჭერად გაგზავნილ რაზმში მეც მოვხვდი. საშინელი წვიმიანი დღეები იყო; არც საკმელი გვექონდა, არც კარები; ჩვენსკენ მომავალი ბარგი და საგძალი უფრო ხშირად ვანდელების ხელში ჩავარდებოდა ხოლმე და ჩვენ კი მშვიერ-მწყურვალნი ცის ქვეშ ვეყარებით სველ მიწაზედ. იმ ტანჯვა-წვალებაში მე ისევ სისხლი ამოპვიდა და დაჭრილებთან ერთად ნანტში გამგზავნეს.

ნანტში უფროსმა ექიმმა გადაწყვეტიტ მიბრძანა: ორ კვირას ველარც კი იტოცხლებო. და რადგან მთელი საავადმყოფო გატენილი იყო დაქრილებით და ადგილი აღარსად ჰქონდათ, ვთხოვე თუ არა, — ხომ უნდა მოვკვდე და ბარემ შინ გიახლებით-მეთქი, — შინვე ნება მომცეს. უფროსმა ექიმმა სიცილი ველარ შეიკავა ჩემს თხოვნაზედ და მითხრა:

— შინ წასვლა გინდა? მაგაზედ ადვილი რა არის? დაგიწერთ დათხოვნის ბარათს, ახსენე ღმერთი და ვაუდექ გზას.

არ გასულა ათი დღე, თითონვე მომიტანა დათხოვნის ბარათი, რომლითაც ავადმყოფობის გამო საუკუნოდ ვიყავ დათხოვნილი საქსახურიდან და ჩემს ლოგინში სხვა ავადმყოფი ჩააწვინა.

რამდენი ხანია მას შემდეგ! დარწმუნებული ვარ, იმ ექიმის ძელებიც კი დალბა და მე კი დღესაც ცოცხალი ვარ და ღმერთს მადლობას ვწირავ. ნუ დაივიწყებენ ამისთანა მაგალითებს ავადმყოფები და მოხუცებულები, რომელთაც ისე ადვილად გასწირავენ ხოლმე ექიმი.

ჩავიდე ჯიბეში დათხოვნის ბარათი და ორ თუმან-ნახევარი ფულა, რომელიც მარგალიტამ გამომიგზავნა, ჩემი ავადმყოფობა რომ მივწერე; პირჯვარი გადავიწერე და გავუდექ გზას. საშინელი შიმშილი იყო. ვაზაფხულს უკვე ამეწვანებინა მინდორი და აქა-აქ ხეებიც ყვაოდნენ. მშვენიერი დარი იდგა და იმისთანა პირი უჩანდა მოსავალს, რომ უკეთესი არ შეიძლება. ღმერთს მადლობას სწირავდა გლეხი-კაცი და თან იმას ევედრებოდა, — ბოლომდე მოიღე შენი წყალობა და ყინვა, სეტყვა და გვალვა ამაცლინეო.

საშინელ ყოფაში იყვნენ ლუარის პირად მდებარე სოფლები. ხალხი გახიზნულიყო და, ვინც დარჩენილიყო, ისე იყო შეშინებული, რომ გამარჯვება ღვთის რისხვად ესმოდა. ეკლესიები დაეკტილა იყო, საკვამურში კვამლი აღარსად ამოდიოდა. თუ შეხვდებოდით ვასმე, ისევ ტყვეებს, რომლებსაც ქალაქისკენ მიერეკებოდნენ ჩვენი ჯარები. ყველგან ჟანდარმები, ჯაშუშები და მსაჯულები დაძროდნენ და სახლებს ჩხრეკავდნენ. დღეში ათჯერ შემაყენებდნენ ხოლმე ჟანდარმები და ხშირად უბრალო გლეხკაცებიც და ვინაობის ქაღალდსა მთხოვდნენ.

სწორედ ამ დროს იქნენ დამარცხებული ჰებერი და იმისი მომხრენი, რომელნიც უარყოფდნენ უზენაეს არსებას. ვინც პარიზში დაიქირეს, ყველა გილიოტინით დახოცეს და, რადგან მათი მიმდევარი სხვაგანაც ბევრი ეგულებოდათ. ყველგან მათ ძებნას შეუდგნენ და, როგორც მოგახსენეთ, მართლა რომ ძროდა ქვე-

ყანა: სულ უბრალო, სრულიად დაუფუძნებელი დაბეზლება კმაროდა, რომ საუკუნოდ დაეღუპათ კაცი: ჰებერის მომხრე ხარ და, მაშასადამე, ღვთისა და სიმართლის უარმყოფელი! ყველას რობესპიერი და სათნოებალა ეკერა პირზედ და „ჰებერიანო“ რომ გეთქვათ ვისთვისმე, გინებად მიიღებდა*.

მივიდიოდი ნელა-ნელა, ჩამომხმარი და ჩაყვითლებული. ძლივს ვსუნთქავდი. ისეთი დასუსტებული ვიყავ, რომ ხშირად გავტერებულნი შემომტკეპროდნენ გზაში გამვლელნი, თითქო უკვირთ, სად მიეხეტება ეს მომაკვდავიო?

ორლენს რომ მიეუახლოვდი, ვიფიქრე, მოდი პარიზს ჩავივლი და შოველსა ვნახავ-მეთქი. ხომ მოგეხსენებათ, წყალწალღებული ზავსს ეკიდებოდაო; მეც მეგონა, პარიზელმა ექიმებმა უფრო მეტი იციან, ვიდრე ჩვენი ჯარის დალაქებმა და დარწმუნებული ვიყავ, რომ ისინი მიშველიდნენ რასმე. გარდა ამისა პარიზი აღთქმული ქვეყანა იყო ჩემთვის: იქ იყო კონვენტი, იქიდან გამოდიოდა ყო-

* ვირონდელების დამარცხების შემდეგ სამ ნაწილად გაიყო კონვენტში მთიულების პარტია: ჰებერის, დანტონის და რობესპიერის მიმდევრებად. ჰებერის პარტიის მოთავენი იყვნენ ჰებერი, შომეტე, გერმანელი ანახარზის კლოოცა, „კაცობრიობის ორატორად“ წოდებული და სხვანი. ჰებერს საკუთარი გაზეთი ჰქონდა, რომელსაც საშინელ უწმაწურ ლანძღვა-გინებით ავსებდა. ამ გაზეთის ლანძღვა-გინებამ გამოიწვია შემდეგი სიტყვები კამილ-დემულენისა: „ნუ თუ არ იცი, უბედურო, რომ ევროპის მეფენი, როდესაც უნდათ დაუმტკიცონ თავიანთ მონებს, რომ პარიზი — აქამდე განათლების ჩირალდნათ წოდებული, — დღეს ლაფშია ამოსვრილი, შენი გაზეთიდან გადაბეჭდილ ლანძღვას ხმარობენ უტყუარ საბუთად... თითქო შენი ჭუჭყი მთელი ერის ჭუჭყიანობას ამტკიცებდეს!“

ჰებერის მომხრეთ დიდი გავლენა ჰქონდათ პარიზელ ხალხში და კომუნაში. შომეტის რჩევით შემოიღო კომუნამ პარიზის საავადმყოფოებში ავადმყოფთათვის ცალ-ცალკე ლოჯინი; შომეტმავე მოასპობინა მათრახის ხმარება სკოლებში. რადგან პური აღარ იშოვებოდა, შომეტის რჩევით კომუნამ ყველა სახალხო ბუღებში ბოსტნეულობა დაათესინა ღარიბთა დასახმარებლად. ტყავი ძალიან გაძვირდაო, შომეტმა წინადადება შეიტანა კომუნაში, ტყავის ფეხსაცმელი მარტო მტერთან საომრად გასულ ჯარისკაცს მიეცეს და სხვამ ყველამ ფრანგული ხის ფლოსტებით იაროსო. რევოლუციური რაზმის შედგენა შომეტის წინადადებით მოხდა; შომეტმავე შეადგინა „საეპოე პირთა სია“; მანვე დააქტინა კომუნას ეკლესიები, მიუხედავად იმისა, რომ კონვენტის მიერ კანონად იყო გამოცხადებული სრული თავისუფლება სარწმუნოებისა.

ჰებერის მომხრეთ უნდოდათ თავიანთი მოწინააღმდეგე ყველა მოეკლათ: რაკი გავიმარჯვეთ და მტერი გავდევნეთ, ახლა შინაური მტერი გავანადგუროთო, — და სიაც კი საეპოე ეგულეობდათ ვინმე, ყველას დახოცვას უპირებდნენ. დანტონი და რობესპიერი წინააღმდეგნი იყვნენ იმდენი სისხლის ღვრისა და დაამარცხეს კიდევ ჰებერის მომხრენი. გილიოტინაზე რომ აიყვანეს, ჰებერმა დაიძახა: — დააღუპა რესპუბლიკა არი, — უპასუხა რონენმა, — რესპუბლიკა უკვდავია!

ველი ბრძანება და კანონმდებლობა, იქ იბეჭდებოდა ჩვენი საუკეთესო გაზეთები... ისე როგორ მოვკვდე, რომ პარიზი ვერა ვნახობეუქი, ვიფიქრე და... აპრილის დამდეგს შევედი კოდეც ჩვენს დედაქალაქში.

მარგალიტასავით დაწვრილებით კი არ აგიწერთ პარიზის ქუჩებს, სახლებს, აჩქარებით მიმავალ ხალხს, ეტლებს, ხმაურობას და სხვა და სხვა. რა მაგისი მცხელოდა, ძლივსლა მივათრევედი ფეხებს და ისიც აღარ მახსოვს, რომელი მხრით შევედი და რომელი მხრით გამოვედი.

მახსოვს, ერთ განიერ ქუჩას დავყე და ბოლო ვეღარ ვუპოვე, თუმცა ერთ საათზედ მეტი იქნებოდა, რაც მივდიოდი. ვისაც ვთხოვე, ბულუას ქუჩა ესწავლებინათ, ყველამ ერთი და იგივე მითხრა:

— პირდაპირ მიბრძანდი.

მეც მივდიოდი და თან იმედი მეღეოდა. ხუთი საათი იქნებოდა, როდესაც ქუჩის ბოლოში გავედი და წყალს მივადექი. წყალზედ ხიდი იყო გადაგდებული და გღმა ძველებური თლალი ქვის შენობები მოჩანდა და ძველებური გუმბათმონგრეული ეკლესია. ხილს გავედი და გაშტერებული ვიციქირებოდი აქეთ-იქით: არ ვიცოდი, საით წავსულიყავ. ამ დროს უეტრად იმისთანა შესახარ სანახავს შევეფეთე, რომ ეხლაც სისხლს მიმღვრევს მისი მოგონება.

გიყებოვით მიდი-მოდიოდნენ ქუჩის მაწანწალები; ზოგი რაღასაც მღეროდა, ზოგი ცეკვადა, ზოგი ყირამალა გადადიოდა; ერთმანეთს სცემდნენ, ეჭიდებოდნენ, ებლაძუნებოდნენ და თან რაღაცას გაუგებარს გაიძახოდნენ; ამ ხროვას უკან მოსდევდა სამი ეტლი, სიკვდილით დასასჯელ პატიმრებით სავსე, რომელთაც აქეთ-იქით ხმალ ამოღებული ცხენოსანი დარაჯები მოსდევდნენ. პირველ ეტლში პატიმრები ყველანი ისხდნენ და იმედძინდნენ გაიციქირებოდნენ შორს. მარტო ორი პატიმარი იდგა ფეხზედ, ორივე საკინძგახსნილი და ხელებგახლართული. ერთი მათგანი იმისთანა ზორბა და მშვენიერი კაცი იყო, რომ იტყოდით, ლოპია გოლიაში ჩამწყვდეულიო; თვალბში სისხლი მორეოდა, პირმოკუმული იყო და მწარე ღიმილი უთამაშებდა პირზედ. მეორეს უნდოდა რაღაცა ეთქვა, მაგრამ ბრაზი ერეოდა, პირიდგან დორბლსა ყრიდა და სიტყვა ვერ გამოეთქვა.

მგონი რომ ვკვდებოდე, მაშინაც ასე ცხადად მიდგეს თვალწინ ის საშინელება.

ნელ-ნელა მოდიოდნენ ეტლები და წინ და უკან ხალხი მოს-

დევდა საშინელი ყიყინით და ღრიალით: სიკვდილი მოლაღატეთ!... ღრიალებდა ხალხი,—სიკვდილი გარყვნილთ!.. წავა, წავა, კარგად წავა! სიკვდილი კამილ დემულენს! სიკვდილი დანტონს! გაუმარჯოს სათნოებას და რობესპიერს!.. *

გულგახეთქილი შევეცქეროდი სასიკვდილოდ განწირულს დანტონს და კამილ დემულენს. მომაგონდა, რომ შოველი მეგობარი იყო დანტონისა, და თმები ამეშალა. იქ რომ ყოფილიყო მაშინ შოველი, პატიმართ შორის, ყურადღებას აღარას მივაქცევდი, ვიძრობდი ხმალს და იმ მაწანწალებზედ მაინც ვიყრიდი ჯავრს. მაგრამ შოველი იქ არსად იყო. პატიმრებში მე მარტო ჩვენი ვპირი მხედარმთავარი, გენერალი ვესტერმანი, ვიცანი... ხელები ზურგს უკან ჰქონდა გახლართული და თავდალუნული იჯდა ეტლში.

მეორე და მესამე ეტლსაც იმავე საზარელი ყიყინით მოსდევდა ხალხი.

ვერ აათრთოლებს სიკვდილის შიში დანტონისთანა და ვესტერმანისთანა კაცებს; არა, იმათ არც კი იციან, შიში რა გრძნობაა. ისინი თუ ათრთოლდებიან, ხალხის უმადურობაზედ ათრთოლდებიან, როდესაც ნახავენ, რომ ხალხის უერთგულესთ გილიოტინისკენ მათრევენ ვიღაცა შურიანების და ჯამუშების წყალობით. სწორედ ამ უმადურმა ხალხმა—პარიზელმა ხალხმა—წარყვნა და

* დანტონი ყოველთვის წინააღმდეგი იყო იმ საშინელებისა. რომელსაც ტერორს უწოდებენ. ტერორი სიკვდილით დაშინებაა მტრისა: იმდენს ხალხს დაეხოტო, იძახდნენ ჰებერის მომხრენი, რომ ჩვენი შიშით ჩვენი წინააღმდეგობა გულშიაც ვეღარავინ გაიტაროსო. ამის წინააღმდეგი იყო დანტონი და დროებით თვით რობესპიერიც. თუ აგრეა. მე ის მირჩევენია. უბრალო მოუშა ვიყო, ვიდრე სამეფოს განვაგებდეო, ამბობდა დანტონი. და რომ ურჩევდნენ, გაფრთხილდით, უპასუხებდა: თავი მომჭრან, ის მირჩევენია, ვიდრე თავი მოეჭრა ვისმეო.

რობესპიერიც წინააღმდეგი იყო ჰებერის და მისი მომხრეებისა, მაგრამ რაკი ისინი მოიცილა თავიდან. მერე დანტონის პარტიას შეუჩინა პარიზელი უნიფორნი. დანტონს შეატყობინეს, — დაქერას გიპირებენ, თავს უშველეთ; მაგრამ არ ინდობა: რომ გავიქცე, განა სამშობლოსაც თან წავიღებო? 30 მარტს დაიჭირეს ფაბრ დეგლანტინი, რომელმაც შეადგინა რესპუბლიკური კალენდარი, დანტონი, კამილ დემულენი, ფილიპო, ბაზირი, ვესტერმანი და სხვანი. მეორე დღეს კონვენტის კრებაზე ლეანდრმა წინადადება შეიტანა: კონვენტმა თითონ მოისმინოს დაქერილების სიტყვაო, მაგრამ რობესპიერმა ამის წინააღმდეგობა გამოაცხადა: სასა მართლოსი რად ვშინიათ, თუ დამნაშავენი არ არიანო? ბრალდების ოქმი სენ-ჟუსტმა შეადგინა, რობესპიერისაგან შავად დაწერილი შენიშვნების მიხედვით. ყველას სიკვდილით დასჯა გადაუწყვიტეს. გილიოტინის კიბესთან რომ მივიდნენ, ერო დესემელმა დანტონისკენ მიიწია, უნდოდა სიკვდილის წინ ერთხელ კიდევ მოჰხვეოდა თავის მეგობარს, მაგრამ ჯალათი შუაში ჩაუდგა და არ მიუშვა. სულელო, — უთხრა დანტონმა, — გოდორში რომ ჩაცვივიან ჩვენი თავები, მაშინაც დაუშლი ერთმანეთის შეხებას?

წაბილწა რესპუბლიკა; თავისთავისას—უნიფხონი ვართო—იძახდა ეს ხალხი და პოლიციელებთან ერთად იკვებებოდა სწორედ იმ დროს, როდესაც მუშა ხალხი და გლეხკაცობა შიმშილით იხოცებოდა; პარიზს არ მოშორებიან უნიფხონი და იქაც არეულობის პეტი არა გაურჩევიდათ რა; მთელი დღე და ღამე აქეთ-იქით დაწანწალებდნენ, უსინდისოდ აბეზლებდნენ მართალს და მტყუანს, დააბეზლებელ ჯილდოს იღებდნენ და თითონვე შველოდნენ ჯალათს თავიანთი მსხვერპლის სისხლის დაქცევას; და ამას იმ დროს ჩადიოდნენ, როდესაც საფრანგეთს მიწის პირიდან აღგვას უპირებდა ევროპა და ათიათასობით იხოცებოდნენ ბრძოლის ველზედ საუკეთესო მისი შვილნი.

თქვენს მტერს, რაც მე იქ მწუხარება ვნახე! რესპუბლიკა დაღუპული იყო: ერთმანეთის ხოცვას რა შედეგიც მოჰყვებოდა, ცხადი იყო ჩემთვის და მარტო ის-ღა მიკვირდა, რომ ამოდენი სისხლით ვერ გამაძღარიყვნენ რობესპიერი და მისი მომხრენი. იქნება ეგონათ, თავებს რომ დავაყრევინებთ, ამით დარწმუნდება ხალხი, რომ მართლა დამნაშავენი იყვნენო.

ცოტა ხანს უკან შოველის სახლიც ვიპოვე. დაღამებული იყო, სრულიად ბნელოდა. ეზოში შევედი. ქვემო სართულში ერთი მოხუცებული, სათვალეზიანი დერცოკი იდგა. ვკითხე, ერის წარმომადგენელი შოველი სადა დგას-მეთქი. მან თავით-ფეხამდე გამსინჯა, მერე წამოდგა და მითხრა:

— ცოტა ხანი მოითმინე, მანულიშვილო, ეხლავ დავუძახებ.

გავიდა და ხუთი წუთის შემდეგ ერთი მოკლე, კურატივით ჩასუქებული, კაცი შემოიყვანა: ქულზედ რესპუბლიკური კოკარდა-ერა და წელზედ სამფერი სარტყელი. თან სამი უნიფხო ახლდა.

— აგერ არის! აი ეს კაცი კითხულობს შოველს.

მოკლე კაცმა გამოკითხვა დამიწყო: ვინა ხარ? საიდგან მოდიხარ? სად მიხვალ? რად გინდა შოველი? და სხვა და სხვა.

გამიკვირდა, ამას რაში ეკითხება-მეთქი და შევეუტიე:

— შოველი რადაც მინდა, თითონ გაიგებს. თქვენ რა გაწუხებთ?

— კანონის ძალით გიბრძანებ, შენი ქალაღები მაჩვენო! — და მიღრიალა მოკლე კაცმა. აბა ჩქარა! გაინძერ, თორემ!...

მისმა მხლებლებმა წინ წამოიწიეს. იმის ყვირილზედ ეზო ხალხით გაივსო, სულ ქუჩის მაწანწალა უნიფხოებით; ზემო სართულებიდან ხმაურობა მოისმა. გარს შემომეხვივნენ ყველანი და იმისთანა თვალით მიყურებდნენ ის საზიზღრები, თითქო გაგლეჯას ნაპირებენო. მეც რაღას გავაწყობდი, ამოვიღე ჩემი დათხოვნისა

და საგზაო ბარათი და თავში ვახალე მოკლე კაცს, რომელიც თურ-
მე პოლიციის მოხელე ყოფილიყო.

იმან მაშინვე აიტაცა ქალაქლები, ჯიბეში ჩაიღო და—აბა წა-
მოლო, დამიძახა. მერე თავის მხლებლებს მიუბრუნდა და უთხრა:

— ფთხილად, თქვენ ეი! თვალი არ მოაშორეთ!

უნდა გენახათ, რა კმაყოფილი იყო დერეკი; მგონი ფიქრობდა,
ძვირფასი თევზი დაეჭირე და დიდ ჯილდოსაც მივიღებო. ოჰ, რა
სიამოვნებით დავახრჩობდი, ხელში რომ მყოლოდა, ის უღმერთო,
ისა!

გავედით. იქვე ორმოცდაათი ნაბიჯის მანძილზედ სადღაც სახლ-
ში შემეყვანეს, რომლის კარებთან დარაჯი იდგა, და იქ გასინჯეს
ჩემი ქალაქლები.

როგორღა მომაგონდება, რამდენი რამ მკითხა მოკლე კაცმა
ჩემი ვინაობისა და სამსახურის შესახებ: როდის შეხვედი სამსა-
ხურში? როდის დაიჭერ? როდის დაგიტხოვეს? რად წამოხვედი ამ
გზაზედ? რად ჩამოიარე პარიზზედ? სად გაიცანი შოველი? რო-
დის? როგორ? რად გინდა იმისი ნახვა? და სხვა და სხვა. ერთი
ნახევარ საათი მაინც მალაპარაკა... ბოლოს, როცა დარწმუნდა, რომ
ჩემი ქალაქლები სრულიად კანონიერნი იყვნენ და არა ყალბი. თავი-
სი ბეჭედი დაასვა და მითხრა:

— შოველი კონვენტმა ალპის ჯარში გაგზავნა და იქ არის.

მაშინ კი მომერია ბრაზი და შევყვირე:

— მერე რატომ მაშინვე არ მითხარით, თქვე...

მაგრამ შევიკავე ენა და კარგიც ვქენი, თორემ ისე მიბღვერო-
და პოლიციის მოხელე, რომ იქნება ისე ადვილად ველარ გადავრ-
ჩენოდი იმის. გაჯავრებას.

— რატომ მაშინვე არ მოგახსენეთ, განა? ამასა ხედავთ, ამ
რეგვენს, ამას! ამ ტყის დათვის! რატომ მაშინვე არ მომახსენეთო,
გესმით?! იქნება გგონია, რომ რესპუბლიკა გამვლელსა და გამო-
ვლელს თავის საიდუმლოებას უყვირის? ერთიც ვნახოთ კობურ-
გის გამოგზავნილი ჯაშუში ყოფილიყავი! ან კიდევ პიტრისა! მე-
რე, შე ბრიყვო, შენა? მაგ უტვინო უშებლზედ ხომ არ გაწერია,
რომ ნამდვილი მამულიშვილი ხარ და არა ჯაშუში.

სულ ცოფს ანთხევდა, ისე გამიბრაზდა, ერთი რომ ენიშნებინა
თავის მხლებლებისთვის, რომელნიც ისე იყვნენ აღგზნებულნი,
რომ ნიშანსლა ელოდნენ, მომცვივდებოდნენ და იქნება ციხემდე
ცოცხალიც ველარ მივეყვანე. მაგრამ მე პასუხი აღარ გავეცი და
როგორც იყო, დამშვიდდა ცოტათი. მგონი, ჩემი სიტყვა ისე არ

ეწყინა, როგორადაც იმედის გაცრუება: იქნება იმედი ჰქონდა ჯაშუში დავიჭირეო და უბრალო ჯარისკაცი კი შერჩა ხელში.

ერთი კიდევ შემომბღვირა, კარებზედ მიმითითა და შემომძახა:

— გასწი, გაეთრიე! ეხლა თავისუფალი ხარ, მაგრამ აგრე ყვეყნი ნულარ იქნები, თორემ ცუდად იქნება შენი საქმე!

მაშინვე გარეთ გამოვვარდი. უნიფორმი კი იმისთანა თვალთ მიყურებდნენ, თითქო ენანებათ, რომ ცოცხალი გამოვედი იმათ ხელიდან.

ორა დღე დავრჩი პარიზში და სულ თავბედი ვიწყევლე, რადმერთი ვამიწყრა, რომ პირდაპირ შინ არ წაველა-მეთქი. ისე იყო ხალხი დაშინებული, რომ ყველგან ჯაშუშები ელანდებოდა. სულ უბრალო, უსაბუთო დაბეზლება კმაროდა, რომ დაექირათ პატიოსანი კაცი და საუტუნოდ დაეღუპათ. ისე მიდიოდა ხალხი ქუჩაში, რომ ერთმანეთს თვალს ვეღარ უშტერებდნენ. ვისაც კი ვისივე ჯავრი სჭირდა, მაშინ უხდიდა სამაგიეროს: — ერთი კი დაბეზლებინა, — თუნდა ცილი შეეწამა, სულ ერთი იყო, — და დაბეზლებულს სიკვდილიდან ვეღარა იხსნიდა რა. ეს კიდევ არაფერი: ისე იყო ხალხი დამშეული, რომ ლუკმაპურის გულისთვის ყველას იკადრებდა და, რადგან დამბეზლებულს ჯცდლო ეძლეოდა, ხშირად ამ ჯილდოს ასაღებადაც აბეზლებდნენ. უბედურება უბედურებას მოსდევდა და ჩვენი უბედურებაც ის იყო, რომ აქაო და ლაფაიეტმა, დიუმურიემ და სხვა გენერლებმა სამშობლოს დალატი განიზრახეს, ციხეები მტერს დაუთმეს, მტრის ჯარს საფოანგეთისა ასაონრებლად შემოუძღვნენ და გლეხკაცობა რესპუბლიკის წინააღმდეგ აგვიშალესო, პატიოსნება აღარავისი სწამდათ და ყველა მოლაღატე ეგონათ.

რაკი პოლიციას თავი დავადწვიე, ბინის ძებნა დავიწყე და ერთ იმისთანა დუქანს მივადექე, სადაც ჩემსავით ღარიბნი იკრიბებიან. იმისთანა ძველისძველი, დაფხრეწილი ტანისამოსი მეცვა, რომ მათხოვარს უფრო ვგავდი, ვიდრე ჯარისკაცს და, რასაკვირველია, სასტუმროში რომ მივსულიყავ, პანდურის ცემით გამოვადგებდნენ. შევედი დუქანში თუ არა, მაშინვე წინ მომეგება ერთი მოხუცებული დედაკაცი, თითქო იცოდა კიდევ, რისთვის მიველ, და ზემო სართულში ამიყვანა. იქ ერთ პატარა ოთახში შემიყვანა, იმ დამის ოთახის ქირა გამომართვა, სანთელი დამიტოვა და გამომეთხოვა. დადლილი ვიყავ და მაშინვე ტახტზედ მივეგდე. მაგრამ იმდენი რწყილი, ბაღლინჯო და ათასნაირი სხვა მატლები დამეხვივნენ, რომ ტახტს თავი დავანებე და ისევ იატაკზედ დავწექი. თავქვეშ ჩემი გუდა ამოვიდე და, თუმცა ქვემოდან საშინელი ყვირილი და

ლანძღვა-გინება ამოდიოდა დამთვრალი უნიფორმებისა და ქუჩიდან წამდაუწუმ დარაჯების ხმაურობა ისმოდა, როგორც იყო ჩემძინა. ჩამძინა, მაგრამ ვაი იმ ძილს! საშინელ სიზმრებში ვიყავ და მთელი ღამე დანტონის, კამილ დემულენის, ვესტერმანის და სხვა საუკეთესო მამულიშვილთა მოკვლა მელანდებოდა; ცხადდებოდა გილიოტინას, ჯალათს, დაყრვენიებულ თავებს, რომელნიც სისხლიან გოდორში ცვიოდნენ. ჭირის ოფლს მასხამდა და ფეთიანივით წამოვხტებოდი ხოლმე, მაგრამ რაკი გონზედ მოვიდოდი, ისევ მივეგდებოდი და მივიძინებდი. კიდევ კარგი, რომ შოველი ჯარში იყო, თორემ ისიც რომ გილიოტინას ემსხვერპლა, მე ჩემი დამემართებოდა.

გათენდა თუ არა, მაშინვე ქვევით ჩავედი. მინდოდა გავსწორებოდი და წავსულიყავ, მაგრამ იქ უფრო იათად გადავრჩებოდი და ამიტომ საუზმეც იქვე მოვიტხოვე. კუნჭულში მივჯექი და ღამზად შევექექე ყველსა და პურს და ნახევარ ჩარქვა ღვინოს.

არ მინდოდა საერო კრების უნაზავად წავსულიყავ პარიზიდან. სამი თვე იყო, რაც ვანდლებს დავდევი ჭაობებში და საქვეყნო საქმეებისა აღარა ვიცოდი რა. პარიზელი შეთქმულნი თითქმის ერთიანად ამოწყდნენ და ჩვენს ჯარში იმათ გარდა ყურადღებასაც არავინ აქცევდა საერო კრების საქმეებს და იაკობელებსა და კორდელიერებს შორის ბრძოლას. ბოლო დროს ხომ სამსახურის მეტი აღარა გვაგონდებოდა რა. მოკვლა დანტონისა, კამილ დემულენისა და სხვა პატიოსან მამულიშვილთა, რომელთა მოღვაწეობით დამყარდა ჩვენში რესპუბლიკა, მე საშინელებად მიმაჩნდა. ეტყობა, მეფის მომხრეებს უჯობნიათ, რომ საუკეთესო რესპუბლიკელებს ზოცავენ-მეთქი, ვფიქრობდი. რვა საათი რომ დაჰკრა. გავუსწორდი ჩემს მოხუცებულს მასპინძელს, გულაც იმასვე მივაბარე და საერო კრების და პარიზის სანახავად წავედი.

რაც კი მარგალიტასაგან ვიცოდი პარიზელ ხალხზედ, იქაურ ვაჭრების ყვირილზედ, ხაბაზთან ჩამწკრიბებულ პურის მუშტარზედ, მოქალაქეთაგან სოფლელების დაბრეყებაზედ და დაჩაგვრაზედ, — ყველაფერი ჩემი თვალთ ვნახე და, ღვთის წინაშე; უფრო მეტი და უარესი ვნახე, ვიდრე მარგალიტა მწერდა. ქუჩაში ახალ ლექსებსა მღეროდნენ, ახალ გაზეთებს ჰყიდდნენ, რომლებშიც აწერილი იყო „გარყვნილთა“, ესე იგი დანტონის. კამილ დემულენის და სხვათა სიკვდილით დასჯა.

მახსოვს, მშვენიერი ბალი ვნახე, საგანგებოდ ჩარიგებული უზარმაზარი ხეებით. თავად ორლენელისა ყოფილიყო უწინ. მე რომ ვნახე, უნიფორმებით სავსე იყო: შემოსხდომოდნენ პატარ-

პატარა მაგიდებს, ლუდს შეეჭკვეოდნენ და გაზეთებს კითხულობდნენ. იცინოდნენ, ეხუმრებოდნენ ერთმანეთს, თითქო არაფერი მომხდარიყოს საიმიასო. ცოტა იქით ერთ სახლზედ ზედწარწერა დავინახე „სამკითხველო“-ო, და მაშინვე თვალწინ წარმომიდგა შოველისაგან დაარსებული ჩვენში წიგნის მაღაზია და სამკითხველო. სადაც ყველას შეეძლო რამდენიმე გრომის საფასურით მთელი ქვეყნის გაზეთები გადაესინჯა. შევედი ამ სამკითხველოში და სხვებთან ერთად მეც გაზეთი ავიღე. ხალხით სავსე იყო იმოდენა დარბაზი, მაგრამ არც კი არავის შემოუხედნია ჩემთვის. თავიდან ბოლომდე გადავიკითხე „მოამბე“ და რაჟდენიმე სხვა გაზეთი, რომლებშიაც დაწვრილებით იყო აწერილი დანტონის და იმის მომხრეთა გასამართლება და დასჯა.

ქვეყნის მფარველ კომიტეტს დაექვერინებინა დანტონი და იმისი მომხრენი,—ხალხის მოღალატენი ხართ, გინდათ ძველებურად მეფობა შემოიღოთ, ერის წარმომადგენლობა გააუქმოთ და რესპუბლიკური წესწყობილება მოსპოთო. თავის გამართლება ბარემ შეეძლოთ, მაგრამ ხმაც არ ამოაღებინეს; არ დაიბარეს და არ მოუსმინეს იმ მოწმებს, რომლებსაც ბრალდებულნი ასახელებდნენ. და რადგან ამოდენა უსამართლობით აღშფოთებულნი თავს ვეღარ იკავებდნენ და ხალხს შესჩიოდნენ და მათთან ერთად ხალხიც აღშფოთდა, სენეჟუსტი და ბილოვიარანი, ქვეყნის მფარველი კომიტეტის წარმომადგენელნი, კონვენტისკენ გაქაზნენ და მოახსენეს, ბრალდებულნი გვეწინააღმდეგებიან, სასამართლოს და მსაჯულთ შეურაცხყოფას გვაყენებენ, ხალხს აჯანყებენ და, თუ გარეთაც გავიდა ეს მღელვარება, ცუდად იქნება ჩვენი საქმეო!

იმას ხომ არ ამბობდნენ, რომ დანტონი სამართალს თხოულობდა, მარტო სამართალს და ამიტომ უნდოდა, რომ კანონისამებრ მოწმები დაებარებინათ და ელაპარაკებინათ.

სენეჟუსტი ამტკიცებდა, ხალხის აჯანყებას კონვენტის ბრძანება თუ შეაყენებს, თორემ სხვა ვეღარაფერიო. და კონვენტი, კრებული მთელი საფრანგეთის ერის წარმომადგენელთა, შეშინებული ქვეყნის მფარველ კომიტეტისაგან, რომელშიაც რობესპიერი, სენეჟუსტი და კუტონი ბრძანებლობდნენ, კონვენტი, რომელმაც მთელი ევროპის ჯარებს გაუძლო, იძულებული იყო ბრძანება გაეცა, რომ თავმჯდომარე ქვეყნის მფარველ კომიტეტისა აღჭურვილიყო სრული უფლებით და ყოველი საშუალება ეხმარა, რათა დაემორჩილებინა ბრალდებულნი და არ დაერღვევიებინა საზოგადოებრივი სიმშვიდე, რისთვისაც, თუ კი საჭიროება მოითხოვდა, კანონის მფარველობის გარეშე გამოეცხადებინა იგინი.

რობესპიერსაც ამაზედ მეტი არა უნდოდა რა.

მეორე დღეს არც მოწმეები ალაპარაკეს, არც ბრალმდებელი, არც ბრალდებულთა დამცველნი, არც თავმჯდომარე. ან რა საჭირო იყო? მსაჯულებმა გამოაცხადეს, ჩვენ ყველაფერი ვიცით და რაც ვიცით, ისიც კმარაო. დანტონი და მისი მეგობრები დამნაშავედ აღიარეს—რესპუბლიკის დამხობა უნდოდათო—და სიკვდილით დასჯა გადაუწყვიტეს.

რა საჭიროა მოგაგონოთ დანტონის, კამილ დემულენის და სხვათა დანტონისტთა ნათქვამი. გადაშალეთ რომელიმე წიგნი, რომელშიაც ჩვენი რესპუბლიკის ამბავია დაწერილი, და იქა ნახავთ. დანტონმა სთქვა: „ჩემი სახელი ისტორიის პანთეონში“ არის ჩაწერილიო! და მართალიცა სთქვა: მისი სახელი სულ ზევითა სწერია და მისი მკვლევების სახელები კი ქვემოთ; დანტონი ჰფარავს მათ. რევოლუციას არავინა ჰყოლია დანტონისთანა ძლიერი და თავგანწირული მოღვაწე; დანტონი ადამიანი იყო გულითაც და ჰკუთითაც და მის მტერთ კი ხან ერთი აკლდათ, ხან მეორე, და უფრო ხშირად ორივე ერთად. რესპუბლიკა დანტონმა დაიხსნა განსაცდელიდან და იმათ კვლავ განსაცდელში ჩააგდეს და დაღუპეს. ვიდრემდის ქვეყნიერება არსებობს და კაცთა შორის ერთიც არის მოიძებნება პატიოსანი ადამიანი, კამილ დემულენს ყოველთვის ეყოლება თანამგრძობნი და თაყვანისმცემელნი. ვიდრემდის ვაჟკაცობა სასახლოდ იქნება, ვესტერმანს ყოველთვის ეყოლება ერთგული პატივისმცემელნი და წამბაძავნი. მაგრამ რას მოგახსენებთ? ბავშვმაც კი იცის ესენი. მგონი, სჯობია დავმშვიდდე და ჩემი ისტორია განვაგრძო.

წავაკითხე ეს ამბები და გულმოკლული გავედი გარეთ, ახლაკონვენტის ნახვა მინდოდა. ვიღაცას ვკითხე: კონვენტი საით არის?

— აგერ! მიმითითა იქვე ახლოს და ერთი მოზრდილი შენობა დამანახვა. შენობა ბაღში გადიოდა. ეტყობოდა, სინათლე ზემოდან ჰქონდა, ბანიდან. შესვლა ყველას შეეძლო, სრულიად თავისუფლად, მაგრამ ვისაც უნდოდა კარგი ადგილი ეშოვა და დაენახა ან გაეგონა რამე, ადრე უნდა მისულიყო. მე რომ ავედი, ჯერ ხალხი არ იყო და საუკეთესო ადგილი დავიჭირე. ძირს დარბაზში უკვე იკრიბებოდნენ ერის წარმომადგენელნი; დეპუტატებისათვის სკამები კიბის დაგვარად იყო აგებული, ისე რომ წინ მჯდომი სრულიადაც არა ჰფარავდა უკანისაგან არც თავმჯდომარეს და არც

* საფრანგეთის საერო ძეგლი, სადაც დაკრძალული არიან სამშობლოს მსახურებელნი მამულიშვილნი.

მოლაპარაკეს. მოლაპარაკეთათვის ცალკე იყო გამართული ტრიბუნა, რომელზედაც რამდენიმე საფეხურის კიბე იყო ასავალი. დარბაზის მოწყობილება სულ მთლად მუხისა იყო. ნელ-ნელა შემოდიოდნენ ერის წარმომადგენელი და ზოგი მარჯვნივ სკაპებისაკენ მიდიოდა, ზოგი მარცხნივ, ზოგი ზევით იწევდა, ზოგი იქვე ქვემოთ ჩჩებოდა. ერთი საათი მეტი გავიდა, მანამ შეიყრებოდნენ და თავთავიანთ ადგილს დაიჭერდნენ. ჩვენი აივანიც ივსებოდა ხალხით, სულ უბრალო ხალხით, რომელთაგანს ზოგს შუბი ჰქონდა თან. ცალკე დარბაზში ლაპარაკობდნენ ჩუმი ხმით, ცალკე ჩვენს აივანში, და ჩუმი ყრიაშული იდგა.

შემოვიდოდა ვინმე შესანიშნავი დეპუტატი და ჩემს ირგვლივ ძაბილი ატყდებოდა:

— აგერა, სქელ-სქელი რომ მობობლავს, ეგ ლეჟანრია.

— ხელავ, სკამით რომ მოასვენებენ მოსამსახურენი, ეგ კუტონია.

— აგერა ბულოო, რობერ ლინდე, გრეგუარი, ბარერრი, სენჟუსტი, და სხვანი და სხვანი.

სენჟუსტი რომ ახსენეს, წამოვიწიე, რომ უკეთ დამენახა. პატარა კაცი იყო, ქერა, ძალიან ლამაზი და მშვენივრად ჩაცმული, მაგრამ ეტყობოდა, ამაყი და დაუნდობელი ხასიათისა უნდა ყოფილიყო. მაშინვე დანტონის მოკვლა მომაგონდა და, ნეტავი შენთან ცალკე სადმე მალაპარაკა-მეთქი, ვინატრე.

ამათ „სათნოიანებს“ უწოდებდნენ, მაგრამ მე მგონი, რომ ჩვენც არა ნაკლებ სათნოიანნი ვიყავით, როდესაც მაინცის ციხეებში ვიბრძოდით, ან არა და ვანდეს ჭაობებში მშვიერ-მწყურვალნი და შიშველ-ტიტველნი დავდევიდით აჯანყებულთ. რა სულელი, რა ბრიყვი უნდა იყოს ხალხი, რომ ამათთანა კაცებს სათნოიანი უწოდოს და იმისთანა შუქი მოჰფინოს მათს შურით და გესლით აღსავსე გულს, რომ სალოცავადაც კი გაიხადოს! სათნოიანებს უწოდებდნენ იმ კაცუნებს, რომელთაც მარტო იმიტომ დააქციეს სამშობლოს გამაბრწყინვალებელ მამულიშვილთა სისხლი, რომ თავიანთზედ უძლიერესი მეგობარიც კი არ უნდოდათ ამ ქვეყნად.

სენჟუსტს ცოტა ხანს უკან რობესპიერიც მოჰყვა. ყველგან მოძრაობა შეიქნა. ყველგან ერთხმად გაიძახდნენ:

— ეს არის, ეს! ეს არის რობესპიერი სათნოიანი, გაურყვნელი და სხვა და სხვა.

მთელი ჩემი ყურადღება რობესპიერმა გაიტაცა. ნელი ნაბიჯით გამოიარა დიდი დარბაზი და მეორე მხარეს პატარა კიბეზედ ავიდა თავის ადგილზე მისასვლელად. ხელში დახვეული ჯალალდები ეჭი-

რა, თვალეზედ მომწვანო სათვალეები ჰქონდა გაკეთებული. სხვა დეპუტატებთან შედარებით, რომელთაც თითქმის ყველას უბრალო შავი სერთუები ეცვათ, რომესპიერი კეკლუცად იყო გამოწყობილი; თმები მშვენივრად დაეხუჭუჭებინა, სპეტაკი თეთრი ყელსახვევი გაეკეთებინა თეთრზედ თეთრი საყელო და საგანგებო თეთრი ქილეტი; ეტყობოდა, დიდ ყურადღებას აქცევდა თავის გარეგნობას და არა ნაკლებ იცქირებოდა სარკეში, ვიდრე ვასახოვარი ქალი. გაკვირებული დავრჩი ეს რომ ვნახე. მაგრამ როდესაც პირი ჩემკენ ქნა და დაჯდა, როდესაც თავის ქაღალდებს შლა დაუწყო იმისთანა სახით, თითქო ყურადღებასაც არას აქცევსო და თითონ კი თავის მწვანე სათვალეების ქვემოდან შეშინებული ჯაშუშივით სულ აქეთ-იქით აფაციცებდა თვალებს, მაშინვე გაიძვრა მელა წარმომიდგა თვალწინ, რომელსაც ვერც ერთი ცხოველი ვერ შეედრება ვერც სისუფთავით და ვერც ვერაგობით; მელამ იცის, მთელს ტანს გაილოკავს, სულ ბზინვას დაიწყებს და თან აქეთ-იქით აქყეტს თვალებს—იქნება მოვახელო რამე და კლანჭი გავკრაო!

დმერთმა დამიფაროს, რომ მე შენ არ გენდო-მეთქო,—ვიფიქრე რომესპიერის დანახვაზედ. — განხორციელებული სათნობაც რომ იყო, ჩემს გულს მაინც ვერ მოიგებ...

თითქო რომესპიერის დაბრძანებასლა ელოდაო, თავმჯდომარე ტალიანი, სრულიად ყმაწვილი და მშვენიერი შეხედულობის კაცი, წამოდგა და სთქვა:

— საქმეს შევუდგეთ, მამულიშვილნო!

სულყველანი ფერმიხდილნი იყენენ იმ კრებაზედ და საშინელი აღელვებით და გაჯავრებით ლაპარაკობდნენ; ყვიროდნენ, ბრაზობდნენ და ცხარე სიტყვებს ისროდნენ; მაგრამ როგორც უცბად ბრაზდებოდნენ, ისევე უცბად გაუვლიდათ ხოლმე გაჯაკრება და ისევ გაყვითლებულნი, დაღონებულნი და დაღრეჯილნი დაეშვებოდნენ თავიანთ ადგილზე. ცხადი იყო, ყველას გუშინდელი ამბავი უდგა თვალწინ და მასთან ერთად ადვილად მოსალოდნელი ხვალინდელიც: გუშინ დანტონს გააგდებინეს თავი, ხვალ იქნება მე ამათრიონ გილიოტინაზედო, ფიქრობდა ყველა იქ მყოფი.

დაიწყო თუ არა კრება, ვილაც მოქალაქემ ითხოვა ნება საერო კრების წინაშე წარდგომის და სათხოვრის მოხსენებისა; კრებამ ნება დართო და მოსამსახურებმა შემოიყვანეს ერთი დაბალ-დაბალი, სქელ-სქელი, კისერჩავარდნილი კაცი, ყასაბი, რომელიც დე-

პუტატებთან მივიდა და თავმჯდომარეს მოახსენა:—ათას ხუთასი ოქრო შემომიწირავს ერის და რესპუბლიკის სასარგებლოდ იმ პირობით, რომ ამ ფულით გილიოტინა გაიქონოს... უფრო ადვილად იმუშავენბსო. უნდოდა კიდევ რაღაც ეთქვა, მაგრამ მთელმა კრებამ, კრების უმრავლესობამ მინც, რომელიც ზიზლით შესცქეროდა ამ ყასაბს, ყვირილი დაუწყო:

— გაიყვანეთ, გაათრიეთ აქედან!

მოსამსახურებმა მართლა და გაათრიეს დარბაზიდან.

რობესპიერი კი რაღაცას სწერდა, თითქო არც კი გაუგონია, რამ გამოიწვია. ეს ყვირილიო. მაგრამ როდესაც ყასაბი კარებთან მიიყვანეს, წამოიყვირა თავისი ალაგიდან:

— ქვეყნის მფარველ კომიტეტს თვალი ექიროს მაგ კაცზე; საჭიროა გამოვიძიოთ მაგისი ყოფაცხოვრება.

იმ საღამომდის აღარა უთქვამს რა იმისთანა წყრიალა ხმა ჰქონდა, რომ იმდენი ხალხის ყვირილში ზარივით გაისმა მისი სიტყვა.

ყასაბის შემდეგ სამუსიკო სკოლის მოსწავლენი შეპოვიდნენ თავიანთ სასკოლო ტანისამოსით. სულ თხუთმეტ-თექვსმეტის წლის ყმაწვილები იყვნენ, ოცნი მაინც იქნებოდნენ, თუ მეტი არა. სრულიად დაურიდებლად მიუახლოვდნენ კრების თავმჯდომარეს და უფროსმა მათგანმა წაიკითხა წინაღვე მომზადებული თხოვნა:

— გთხოვთ დაიჭიროთ, გაასამართლოთ და გილიოტინით თავები დააყრევინოთ ყველა ჩვენს მასწავლებლებს. თუ კანკენტმა არ შეიწყნარა ჩვენი აჯა და სრული თავისუფლება არ მოგვანიჭა, სადილს შემდეგ, ესე იგი სწავლის შემდეგ, როგორც გვინდა ისე გავატაროთ ჩვენი დრო, სკოლას თავს დავანებებთ დიდიან-პატარაინადლო.

ამაზედ უფრო აღშფოთდნენ ერის წარმომადგენელნი და თავმჯდომარემ ტალიანმა კიდევ შესტუქსა: ჯერ თქვენ ღირსნი არა ხართ სამშობლოს სამსახურისა, რადგან ვერ შევიგნათ, რა ღიდი და წმინდა მოვალეობა გაწევთ რესპუბლიკისადმი... წადით, ისწავლეთ, დავაჟკაცდით გულით და გონებით, და საერო კრება თქვენი თხოვნით მაშინ შეაწუხეთო.

ამ ამბავმა გაცხარებული კამათი გამოიწვია ორ დეპუტატს შორის. ერთი ამბობდა, დაგებულთ და ქვეყანას ვაცნობოთ თავიედი ყმაწვილების თხოვნაო. მეორე ამტკიცებდა, ბავშვები არიან, თითონ თავის დღეში ვერ მოახერხებდნენ იმ თხოვნის შედგენას და, ცხადია, სხვის გაბრიყვებულნი არიან... დასასჯელი საწყალი ყმაწვილები კი არა, ის არის, ვინც მათი ცოდვა დაიდვაო.

კრება ამ უკანასკნელს დაეთანხმა და დაადგინა, მოექმნა და დაესაჯა, ვინც ბავშვები საჩივლელად წააქეზა.

მას შემდეგ წაკითხულ იქმნა წინადადება სამხედრო და საფინანსო კომიტეტებისა. ამ წინადადებათაგანი კონვენტმა მარტო ისინი მიიღო, რომელნიც ჯარის ხელახლად მოკრებას შეეხებოდა. მე ჩემს დღეში არა მენახა რა ამისთანა და, ჩემდა სასიამოვნოდ, ჩემი თვალითა ვხედავდი, რომ სულ ყველაფერი წესისა და რიგისამებრ ირჩეოდა კონვენტში.

იმავე დღეს დაადგინა კონვენტმა, დაებრუნებინა ფული იმ მოხელეთათვის, რომელთა სამსახური მოსპო რესპუბლიკამ. 1789 წლამდე ყველა ადგილი გასასყიდი იყო და ვისაც სამსახური უნდოდა, მეფისაგან ფულად უნდა ეყიდა ალაგი, და რადგან რესპუბლიკამ ზოგ-ზოგ მოხელეს სამსახური მოუსპო, იძულებული იყო დაებრუნებინა მათთვის ის ფული, რომელიც მათ მეფისთვის მიერთმიათ.

იმავე მიზეზისა გამო დაადგინა კონვენტმა საცხოვრებელი საღსარი აღმოეჩინა იმ პირთათვის, რომელნიც მეფეს ახლდნენ და ახლა, უმწეოდ დარჩენილთ, სიბერის ან ავადმყოფობის გამო, შრომა და მით. ლუკმაპურის შოვნა არ შეეძლოთ... დიად, რესპუბლიკა უფრო სამართლიანად და პატიოსნად იქცეოდა, ვიდრე დიდებული მეფეები და ხელმწიფეები. მაგრამ ასე არაფერს გაუტაცია ჩემი ყურადღება, როგორადაც მამულიშვილმა კუტონმა, რომელმაც ქვეყნის მფარველი კომიტეტის სახელით ითხოვა სიტყვა. რომ გენახათ, იტყოდით ბებერი დედაკაციაო, იმოდენი დაკუთლებული თმები ჰქონდა. თავის ადგილიდან ლაპარაკობდა, რადგან კუტი იყო და ტრიბუნაზედ ასვლა არ შეეძლო. აი, რა თქვა და დიდად დასაფიქრებელიც იყო მისი სიტყვა, რადგან იმ დროს მოწინააღმდეგე პარტიები ტერორითა ებრძოდნენ ერთმანეთს:

— გუშინ კონვენტმა ბრძანება გასცა, — თქვა კუტონმა, — რომ ყოველი დეპუტატი ვალდებული არის გამოაცხადოს რა სარწმუნოებას აღიარებდა იგი რევოლუციამდე, რა შეძლება ჰქონდა და რით შეიძლებოდა ამ შეძლების ზრდა. მე მგონია, დღეს ბევრს გაუჭირდება ამ ცნობების გამოცხადება. ამ დადგენილების განხორციელება კონვენტმა ქვეყნის მფარველ კომიტეტს მიანდო და კომიტეტიც მაშინვე შეუდგა ამ ფრიად საჭირო და საზოგადოებრივი ზნეობის აღმადგენელი კანონის სავესებით და დაწვრილებით შემუშავებას; მე მგონია, რომ ჩვენ წამხდარ და სულმდაბალ საზოგადოებისათვის ეგეც არ იკმარებს და სხვა მაგაზედ უფრო მკაცრი ზომიერებანი დაგვჭირდება ქვეყნის მტერთა და მოღალა-

ტეთა ასალაგმავად. კომიტეტი უკვე ამზადებს მოხსენებას. „რევოლუციური მართებლობის ზნეობრივი გავლენის შესახებ“ და აგრეთვე მეორე მოხსენებას, რომელშიც განმარტებული იქნება „მიზანი ევროპიელ ტირანთა წინააღმდეგ ამხედრებისა“; გარდა ამისა კომიტეტს სურს თავისი აზრები განუზიაროს კონვენტს „ჯარში გაგზავნილ კონვენტის წევრების მოქმედების შესახებ“, — რომელნიც ყველაფერში საერო კრებას უნდა ემორჩილებოდნენ და თავისუფლად, მართებლობის დაუკითხავად არას არიგებდნენ.

ბოლოს კუტონმა წინადადება შეიტანა უზენაესის არსების სადღესასწაულოდ დღეობა დავაწესოთ, რომ ათ წელიწადში ერთხელ მოდიოდეს... ამის შესახებაც დაწერილებით მოხსენებას მოამზადებს ქვეყნის მფარველი კომიტეტიო. . .

მთელი დარბაზი სმენად გარდაიქცა, ყველას აღტაცება ეტყობოდა და თვით რობესპიერიც კი, რომელიც გაუთავებელს რალასაც სწერდა, ხშირად დაიქნევდა ხოლმე თავს თანხმობის ნიშნად, თითქო ემოწმება: დიად, სწორედ აგრე უნდა იყოსო!

კუტონის სიტყვის შემდეგ კრებას მოხსენდა ჩვენი ხომალდების გამარჯვება ინგლისელებზედ და პოლანდიელებზედ და აგრეთვე სიადროშებისა და სხვადასხვა სამხედრო ნადავლისა. კრებამ რვა საათამდე გასტანა.

ლეჟანდრი კარგად ხედავდა, რომ რობესპიერს და მის მეგობრებს ჯერ კიდევ ბევრი სისხლისღვრა სწადდათ საფრანგეთის ვითომდა გასაწმენდად და, რადგან მთელს საერო კრებაში მარტო იმან ამოიღო ხმა დანტონის სასარგებლოდ, ცდილობდა თავი დაეხწია როგორმე განსაცდელისთვის: სიტყვა ითხოვა და ნასიამოვნები სახით დაუწყო კონვენტს:

— რამდენმამე სოფელმა საერო კრებას დეპუტაციები აახლა მადლობის გამოსაცხადებლად, რომ ასე სასტიკად სდევნის და სჯის იგი სამშობლოს მოღალატეთ; ეს აქამდენაც უნდა მოხსენებოდა კონვენტს, მაგრამ ეტყობა, დავიწყებით, და დიდად ბედნიერი ვარ, რომ მე მხვდა წილად ამ ნასიამოვნო ამბის მოხსენებო.

რაც ხანი ამ სიტყვას ამბობდა, სულ რობესპიერისკენ ჰქონდა თვალი, მაგრამ იმას თითქო არც კი ესმოდა ლეჟანდრის ლაპარაკი, რადასაც სწერდა და ერთხელაც არ დაუქნევია თავი თანხმობის და სიამოვნების ნიშნად. საბრალო ლეჟანდრი რა საშინელი უნდა ყოფილიყო მისთვის ის ღამე!

კრება გათავდა. ხალხი დაიშალა. მეც ხალხის ტალღას გავყე და თან კონვენტში გავგონილს და ნახულს ვფიქრობდი.

ოჰ, რა ბედნიერი ვიყავ, რომ შინ მივდიოდი! როგორ მიხაროდა, რომ მოვშორდებოდი იმ უცნაურ „სათნოიან გმირებს“, რომელნიც ყველგან ბატონობას ჩემულობენ და ყველას მონად იხდიან — ერის წარმომადგენლებსაც, გენერლებსაც, ჯარსაც, კომიტეტებსაც და კლუბებსაც! რომელნიც ყველაფერს გაგირიგებენ, ყველაფერში წესსა და რიგს შემოიღებენ და თავებს დააყრვენიებენ ყველას, ვინც გაბედავს და ადამიანისადმი სიბრალულს გამოიჩენს, ან თავისუფლებას მოინდომებს! ცხადად ვხედავდი, რა სამწუხარო ბოლო უნდა ჰქონოდა ამ ყოფას: საფრანგეთის ბატონი რობესპიერი გამხდარიყო და გილიოტინით უნდოდა ქვეყნის დამშვიდება.

II

მეორე დღეს, 7 აპრილს 1794 წ. გავედი კიდევ პარიზიდან. ისიც კმაროდა ჩემთვის, რაცა ვნახე.

ყველა რობესპიერის შიშით თრთოდა, რადგან ცარიელი სიტყვა კმაროდა მისი, რომ სრულიად უდანაშაულო, მტრედივით წმინდა კაცი გილიოტინაზედ აეყვანათ და თავი მოეჭრათ; უბედურს აღარც საბუთი გამოადგებოდა რამე, აღარც მოწმევები, აღარც ვეჭილი! თვით გასამართლებაც ტყუილუბრალოდ ინიშნებოდა, რადგან მსაჯულები რობესპიერის ყურმოჭრილი ყმანი იყვნენ და წინაღვე ჩაგონებული ჰქონდათ რა სასჯელი უნდა დაენიშნათ ვითომდა დამნაშავესთვის.

ჩემთვის ესეცა კმაროდა.

დაღონებული, დამძარბული გავუდექ გზას, მით უფრო, რომ ავად ვიყავ და საშინლად ცხელოდა.

დღეში ათჯერ მაინც შემაყენებდნენ ჟანდარმები, გამისინჯავდნენ ქალაღებს და ბეჭედს ასვამდნენ. რობესპიერს პოლიციის და ჟანდარმების მეტისა არავისი ნდობა არა ჰქონდა და ყველა მსაჯულები, ჯარში გაგზავნილი კონვენტის წევრნი და მამასახლისები სულ მისი მომხრენი იყვნენ. მთელს ჩვენს ქვეყანას კალიასავით მოედვნენ მისი ჯაშუშები და სისხლს ადენდნენ საწყალ გლეხკაცს და მუშა-ხელოსანს.

მერვე თუ მეცხრე დღე იყო, რაც მივდიოდი. ცხელოდა, წურწურით მდიოდა ოფლი და თან ყელი მიშრებოდა, რადგან საშინელი მტვერი იდგა გზაზედ. ძლივსლა მივათრევედი ფეხებს და თან მწარედ ვგმინავდი:

— ღირს კი ამოდენ ტანჯვა-წვალებად ეს წუთისოფელი? ბოლო ხომ მაინც სამარეა და მაინც! მერე ერთნაირად მაინც ვი-

ტანჯებოდეთ ყველანი! ვისაც სინდისზედ ხელი აუღია, სულ დიბა-
ატლასით დადის და ბაჯადლო ოქროებით კოჭაობს და ვინც პა-
ტიოსნად დარჩენილა, შიშველ-ტიტველი დაიარება და კუჭი ეწ-
ვის შიმშილით.

ისე დაეილაღე, რომ მეტი აღარ შემეძლო და იქვე გზის პირას
ქვებზედ ჩამოვჯექი. შორიდან სოფელი მოჩანდა. მზე ჩადიოდა.
მშიოდა და მეტადრე მწყუროდა და ჩემს თავს ვეკითხებოდი, ნუ
თუ იმოდენა კიდევ შეგიძლია, რომ აი იმ სოფლაზედ მიადწიო-
მეთქი. ასე სასოწარკვეთილი რომ ვიყავ, უცბად ურმის ხმა შემო-
მესმა და უკან მიმახედა. ცარიელ ურემში მარტო ერთი მოხუცე-
ბული, — ეტყობოდა ძალიან შეძლებული კაცი უნდა ყოფილიყო, —
მეურმე იჯდა და ცხენებივით მოერეკებოდა საგანგებოდ მოვლილ
პოზვრებს. კარგა ხანი მსინჯა შორიდანვე და როდესაც მომიახ-
ლოვდა, მითხრა;

— დაღლილი უნდა იყო, მამულიშვილო. დაჯექი ურემზე, ცო-
ტათი გზას შეიმოკლებ.

გამიკვირდა: იმ დროში ისეთი თავაზიანობა მეტად მოულოდ-
ნელი იყო.

— მინდოდა მე თითონ მეთხოვა შენთვის ეგ წყალობა, — ვუ-
პასუხე მე და ფეხზედ წამოვდექი, — ღმერთმა გიშველოს, რომ შენ-
ვე დამასწარ, თორემ მეტი აღარ შემეძლო.

— გეტყობა კიდევ. შორიდან მოხვალ?

— ვანდედან გაახლები. ავად ვარ და სამსახურიდან დათხოვ-
ნილი; სიარული მწყინს და სისხლს მალებინებს. ნეტავი ერთი შინ-
ამდე მივალწიო, რომ უპატრონოდ არსად მოვკვდე, თორემ სიკვდი-
ლისა კი არ მეშინია.

დავუჯექი ურემზედ. მოხუცებული მიერეკებოდა ხარებს და თან
ვე მიყურებდა.

— ფუი, შეგარცხვინა ღმერთმა! — შემომიტია ალერსიანად. —
ყმაწვილი კაცი ვიყო და ეგრე გული გავიტეხო ეგ ხომ ქალაჩუნას
საქმეა და არა ჯარში ნამყოფი ვაჟკაცისა! ოცი წლის ბიჭი
ვიყო და აგრე ადვილად გადავიწყვიტო იმედი! დაისწავლე ჩემი
სიტყვა, ჩემი ხნის კაცს სიზმარი დაეჯერება, შენ საიმისო არა გი-
პირს რა და დასვენების მეტი არა გინდა რა. დაისვენებ, კარგსა სჯაჲ,
კარგ წითელ ღვინოს არ დაიკლებ და ისე წამოკეთდები, თითქო შენ
დღეში ავადმყოფობა არა გცოდნოდეს.

არაფერი ვუპასუხე. ცოტა ხანს გაჩუმებული მივდიოდით და
მერე მკითხა:

— პარიზზედ ხომ არ ჩამოგივლია, მამულიშვილო?

— დიად, პარიზზედ ჩამოვიარე და ამან უფრო წელი მომწყვიტა. იმისთანა საშინელება ვნახე პარიზში, რომ კარგად მყოფსაც დამადნობდა, არამც თუ ავადმყოფს.

— რა ნახე მაგისთანა? — მკითხა მეურმემ და დამაქტერდა.

— გილიოტინა ვნახე და საუკეთესო მამულიშვილთა სიკვდილის მე ვნახე დანტონის, კამილ დემულენის, ჩემი გენერალის ვესტერმანის და მათთან ერთად ხალხის უერთგულეს მოღვაწეთა დახოცვა. მე რომ ასე ავად არ ვიყო და მოსაკლავად ვღირდე, არც ასე გაბედვით გამოვთქვამდი ჩემს გულის პასუხს. ეხლა კი რისა უნდა მეშინოდეს? მობრძანდნენ და დამიჭირონ! რას დამაკლებენ? ჩამოხრჩობასაც ვერ მოასწრებენ: მე თითონ მომაკვდავი ვარ. ოჰ, ნეტავი შემეძლოს იმ უსინდისოების დასჯა...

ბრაზმორეულს კიდევ სისხლი ამომივიდა. წასულია შენი საქმე მიშელ, ვფიქრობდი ჩემ გულში, წასულია! ერთიც ვნახოთ, ესეც რობესპიერის მომხრე იყოს! წავიდეს და დამაბეზლოს რა!

სისხლი რომ დაინახა, ფერი ეცვალა და ცოტა ხანს გაჩუმებული შემომცქეროდა; თვალები ცრემლით აევსო. მერმე დარიგება დამიწყო: არ უნდა გაჯავრდე, უნდა იცოდდე თავის შეკავება, რადვან ემაგრე ლაპარაკით თავს დაიღუპავ უღროოდო. მეც მიყვები და დაწვრილებით ვუამბე, რაც კი პარიზში მენახა. სუყველაფერი დაწვრილებით ვუამბე და ისიც კი ვუთხარ, როგორ დადიან პარიზის ქუჩებში უნიფხონი და გაპყვირიან: სიკვდილი სამშობლოს მოღალატეთ! აგერ სოფელში შევედი. პატარა სოფელი იყო, ლარიბ-ლატაკი სოფელი. ერთი ერთმანეთზედ უღარიბესნი იყვნენ ქოხები და მარტო ერთი სახლი მოჩანდა საკმარისად მოზრდილი და მოსაწონი, რომელსაც გარს ვენახი ერტყა. ჩვენი ურემი ამ სახლის კართან გაჩერდა.

ჩამოვბტი, მადლობა გადავუხადე და წამოვიკიდე ჩემი გულა, მაგრამ წასვლა კი ველარ მომიხდა.

— რაღა დროს წასვლაა, მამულიშვილო? — მითხრა მოხუცებულმა: — ამაღამ ჩემი სტუმარი იყავ.

კარი ერთმა ხნიანმა ქალმა გაგვიღო. მოხუცებული მიუბრუნდა და უთხრა:

— ამაღამ ჩვენი სტუმარია ეს ჯარისკაცი. ყელები ამომხმარი გვაქვს ორივეს და თუ თეთრი ღვინით არ ჩავისველეთ, ცუდად არის ჩვენი საქმე! ვახშმისთვის კი ნურას შესწუხდები, ყველი და პურიო, კეთილი გულიო, ნათქვამია ძველთაგან.

მე მაინც წასვლას ვაპირობდი, მაგრამ ხელი დამიჭირა და ნელ-ნელა სახლში შემეყვანა.

— კარგი ერთი, რა ხვეწნა გინდა? ურჯულო ხომ არა ვარ ამა-
ლამ სადმე გაგიშვა? მერწმუნე, ძალიან ასიამოვნებ ჩემს დედაკაცს,
ჩემს ქალსა და ჩემს დასაც. ანრიეტ, ჩამოართვი ამ ყმაწვილს უღდა
და ლოგინი გაუშალე. ერთი მოზერები დავაბინაო, მეც ეხლავე
აქა ვარ.

რალას ვიზამდი, უნდა დავმოჩჩილებოდი. და არც ძალიან მინ-
დოდა წასვლა, ღვთის წინაშე, რადგან მეტისმეტად მომწონდა ჩემი
მასპინძელი და დაღლილიც ვიყავ. მშვენიერ დიდ დარბაზში შე-
მიყვანეს; შუაზედ სასადილო მაგიდა იდგა; ზედ თეთრი, სპეტაკი
სუფრა იყო გადამლილი და სავახშმოდ მომზადებული თეფშები
და დანაჩანგალი. თეთრ ღვინოსაც შუა სუფრაზედ მოედგებინა
ყელი.

იმ ქალმა, რომელსაც ჩემმა მასპინძელმა ანრიეტე უწოდა, ჯერ
გაკვირვებით შემომხედა, მერე წინ გამიძღვა, ერთ პატარა ოთახ-
ში შემიყვანა და მითხრა:

— ინებეთ, ბატონო.

დიდი ხანი იყო მე ასეთი ზრდილობიანი სიტყვა აღარ მსმენოდა
და ძალიანაც მეამა, თუმც მეუცხოვა კიდეც. ქალი რომ წავიდა,
ამოვიღე გუდიდან რაც კი საუკეთესო მქონდა. პირი დავიბანე, ტა-
ნისამოსი გამოვიცვალე და ცოტა ხანს უკან სასადილო ოთახში გა-
ვედი. დიასახლისის გარდა ერთი კიდეც სხვა ქალი იყო ხნიანი და
ერთიც 16-17 წლის მეტად ლამაზი ქალი, რომელიც ჩემს მას-
პინძელს ელაპარაკებოდა.

აბა დაბრძანდით, გვითხრა მასპინძელმა. მეც ეხლავე გაიხლე-
ბით, ერთი ფანჯრის დარაბები მოვეკეტო.

დავსხედით, პირჯვარი გადავიწერეთ. პირველად მე შემომთა-
ვახეს იმისთანა საგანგებო წვენი, რომ მარტო ორთქლი გააძლობ-
და კაცს, ორი წელიწადი იყო მე იმისთანა აღარა მეჭამა რა. მერე
შემწვარი ხორცი მოიტანეს სალათათ, და ბოლოს თხილი; ეტყო-
ბოდა ძალიან შეძლებული ოჯახი. უნდა ყოფილიყო. და მანამ სუფ-
რაზედ ვისხედით და შევეკეტევოდით, ჩემმა მასპინძელმა ივანე ლა-
მომ უამბო ქალებს, რაც მე გზაში ვუთხარ პარიზის საქმეების და
დანტონისტების ხოცვისა. ვახშამი გათავებული გვქონდა, თხილს
გიახლებოდით, როდესაც დანტონის მოკვლაზედ დაიწყო ლაპა-
რაკი. ამის ხსენება და ერთი ქალის წამოვარდნა სუფრიდან ერთი
იყო; თვალეებზედ ცხვირსახოცი მოიფარა და ქვითინით გარეთ გა-
ვარდა. ქალებიც უკან გაედევნენ.

— ჩემს დას დიდი მეგობრობა და სიყვარული ჰქონდა დანტო-
ნის ოჯახისა, მითხრა მასპინძელმა. გათხოვილი იქ არის, სადაც

დანტონის ოჯახი ცხოვრობს. სამი დღეა რაც ჩამოვიდა. ჩვენ ყველანი კარგად ვიცნობთ დანტონს და მის ოჯახობას და ძალანაც გვიყვარს. პირად მე ხშირად მქონია საქმე დანტონთან და, რასაკვირველია, ყველას ძალიანა გვწყენს მისი მოკვლა.

შენობით აღარ მელაპარაკებოდა. თვალები ცრემლით ჰქონდა საესე.

— ოჰ, რა უბედურება მოხდა! რა საშინელი უბედურება მოხდა! დაიკენესა ჩემმა მასპინძელმა და ისიც გარეთ გავიდა. მარტოდმართო დავრჩი დარბაზში და კარგა ხანი აღარავინ შემოსულა. მეც ამემდვრა გული და, ვინ იცის, რას არა ვფიქრობდი. ბოლოს შემოვიდნენ ჩემი მასპინძლები; ყველანი ნამტირალევი იყვნენ, თვალებდაწითლებულები. მოხუცებულს ერთი ბოთლი ძველი ღვინო მოჰქონდა:

— რესპუბლიკის სადღეგრძელო უნდა დავლიოთ... და მტარვალთა დასაწყევი!

ჰიქები გაავსო, აღღეგრძელა რესპუბლიკა და დასწყევლა სისხლით გაუმძღარი მტარვალნი; ქალებიც შემოვიდნენ და თავ-თავის აღგილზე დასხდნენ. ივანე ლამის დამ, რომელსაც მანონი ერქვა, გვიამბო, ამ ერთი თვის წინათ დანტონი ჩვენს სოფელში იყო თავის დედასთანო... კარი ღია ჰქონდა და, ვისაც უნდოდა, ყველას შეეძლო მისულიყო და თავისი დარდი შეეჩვილა. იმისთვის სულ ერთი იყო, ვინც უნდა მისულიყო მასთან სანახავად და ერთნაირად ზრდილობით უხვდებოდა მუშას, მოქალაქეს და სოფლელ გლეხკაცს. ხშირად თავის ცოლ-შვილი და მეგობრებიც მოჰყავდა დანტონს, მეტადრე კამილ დემულენი და იმისი ყმაწვილი ცოლი; რამდენჯერმე თავისი სიდედრი და სიმამრიც ამოიყვანა ჩვენს სოფელში. ყველანი დანტონის დედასთან ჩამოხტებოდნენ ხოლმე, თუმცა იგი, რაკი დანტონის მამა მომკვდარიყო, ხელმეორედ გათხოვილიყო და ჩვენებური სირაჯი რეკორდენი შეერთო. მთელს ჩვენს მაზრაში იმათთანა პატიოსანი და პატივისცემი სხვა არავინ იყო.

ამ ქალის ნაამბობიდან ცხადადა ჩანდა, რომ დანტონს თითონ დაეღუპა თავის გაუფრთხილებლობით მეგობრებიც და თავისი თავიც. როგორც თითონ იყო გულმართალი, ყველა თურმე ისე ეგონა და ყველასთან გაუფრთხილებლად, მოურიდებლივ გამოსთქვამდა თავის აზრს და რწმენას. და რასაკვირველია, რომ რობესპიერს, რომელსაც ქვეყნის მფარველი კომიტეტის წევრნი თავის ჯაშუშებად გაეხადა და მთელს საფრანგეთში შეთქმულობა ელანდებოდა, თუმცა ხშირად უფრო თითონ შეხინხლავდა ხოლმე შეთქმულებას; დიადრა საკვირველია, რომ რობესპიერს სამი-ოთხი ჯაშუში ყოველთვის

ჰყოლოდა დანტონისათვის მიჩენილი? ეს ჯაშუშები სულ კვალდო-
კვალ სდევნიდნენ დანტონს და დაწვრილებით აცნობებდნენ რობეს-
პიერს ყოველ მის სიტყვას და მუქარას.

გაზეთებში წავიკითხე, დანტონმა, როდესაც ბელგიის ჯარში გა-
გზავნა საერო კრებამ, ჯიბეები დაიტენა და ისე დაბრუნდაო. ოაკი
დანტონის ასე მახლობლად მცნობი ვნახე, ვკითხე:

— როგორი შეძლების პატრონია დანტონი?

— დანტონიანი რევოლუციის წინათაც ძალიან შეძლებულნი
იყვნენ, — მიპასუხა ქალმა, — და ეხლაც არა უჭირთ რა. რაც წინათ
იყვნენ, ის ახლა არიან, არც გაკეთება ეტყობათ, არც გაღარიბება.

ღარწმუნებული ვიყავი, რომ სწორედ ასეთს პასუხს მივიღებდი.
შოველისაგან ვიცოდი, რა კაცი იყო დანტონი და შოველი იმდენად
გამოცდილი იყო, რომ ასე ადვილად ვერ შესცდებოდა. კიდევ რომ
შემეცდარიყო, ამდენი ხანი მეგობრად ვერ შერჩებოდა იმ კაცს, რო-
მელიც ფულის გულისთვის უღალატებს თავის მოვალეობას ქვეყ-
ნისადმი.

დიდი ხანი გავიდა მას შემდეგ, მაგრამ დღესაც შეურყევლად
შემრჩა რწმენა, რომ რობესპიერმა, სენეჟუსტმა, კუტონმა და იმათმა
ამხანაგებმა, რომელთა უსაზღვრო თავმოყვარეობა სხვის დამცირე-
ბით ცდილობდა თავის განდიდებას, ცილი შესწამეს ამ დიდებულს
მოდეაწეს. ამაზედ მით უფრო ადვილად დამთანხმდება ყველა, რომ
დანტონის მოკვლის შემდეგ მისი დანაშაულის დამამტკიცებელი სა-
ბუთები რომ ჰქონოდათ რაზე, მთელს საფრანგეთს აუწყებდნენ, —
ეს დააშავეს და თავს ამიტომ ვჭირითო. აგრეთვე შეურყევლად შემრ-
ჩა რწმენა, რომ გენერალ ვესტერმანს მარტო ის დანაშაული ჰქონდა,
რომ მთელს ჯარში მარტო ის ეცნა დანტონს ღირსეულად, გენერ-
ლობა მიეცა და მხედართმთავრად გაეგზავნა ვანდეში, სხვა დანაშაუ-
ლი მას არა ჰქონდა რა, გარდა იმისა, რომ პარიზელი ხალხი კარგად
იცნობდა მას, რადგან ის ყოველთვის ხალხთან იყო და წინ მიუძღო-
და, და ადვილად შეეძლო აეშალა ეს ხალხი თავის მეგობრების
მკვლელთა დასასჯელად და მართლშაჯულების დასამყარებლად.
ამისთანა კაცის სიცოცხლე სახიფათო უნდა ყოფილიყო რობესპიე-
რისთვის და ამიტომ ცილი დასწამეს და თავი გააგდებინეს. აღარც
იმისი ვაჟკაცობა მოაგონდათ, აღარც თავგანწირული ბრძოლა და
მტრის დამარცხება! ვესტერმანი უნდა მომკვდარიყო, რომ რობეს-
პიერი დამშვიდებული ბრძანებულიყო, და მოკვდა კიდევ.

მე ჩემს აზრს მოგახსენებთ. შეიძლება თქვენ სულ სხვაფრივ
უყურებდეთ საქმეს.

ჩემმა ღვთისნიერმა მასპინძელმა მეორე დღესაც არსად გამიშვა, შანამ სადილი არ მაჭამა. სადილს უკან კი ორი ცხენი შეკაზმა და კარგა მანძილი გამაცილა სამაზრო ქალაქამდე. ჩემს დღეში არსად შემხვედრია იმისთანა პატიოსანი და სტუმართმოყვარე კაცი და ჩემს შვილებს ყოველთვის იმასა ვთხოვ, არ დაივიწყონ ეს სიკეთე: იმას თუ არა, მის შვილს ან შვილიშვილს მაინც გადაუხადონ. ნამდვილი პატრიოტი იყო ის კურთხეულიშვილი. და თუ ჩემი ჯანაოზ-ეკიმის სიტყვა არ გავამართლე და საიქიოს არ გავემგზავრე, ესეც უმთავრესად ჩემი მასპინძელის წყალობით მოხდა, რადგან იმან ჩამაგონა, საიმისო არა გიჭირს რა, დასვენება და მოვლა გინდაო. იმისთანა ალერსით მეუბნებოდა ამას, იმისთანა კილოთი მამხნეებდა, თითქო სულ უცხო კი არა, მშობელი მამა ყოფილიყოს. ჩემგან კი მადლობის მეტი არა ინდომა რა და, ქალაქში რომ მივედით, ერთი ჩარეკი ღვინის ფულიც არ მიმაცემინა.

ჩარეკა რომ გამოვცალეთ, ადგა, დახლიდარს გაუსწორდა, ნათესაურად გადამკოცნა და გზა მშვიდობისა მისურვა.

იქიდან უფრო მხნედ გაუუღდეკი გზას და სასტიკად ვასრულებდი ივანე ლამის დარიგებას: ისე პური არსად ჭამო, რომ ერთი ნახევარი ჩარეკი კარგი ღვინო არ დალიო, თუნდა ძალიან ძვირადაც დაგიჯდესო. მეც საცა კი პურსა ვჭამდი, ყველგან კარგ, თავ ღვინოს ჩამოვასხმევინებდი ხოლმე და თანაც წამდაუწუმ ფულს ვანგარიშობდი, რადგან შინამდე ერთი ათი დღე კიდევ მომინდებოდა სიარული. სიკვდილი აღარც კი მაგონდებოდა. სიკვდილის შიში ტკბილ მომავლის იმედმა განდევნა და ახლა სულ მარგალიტა მიდგა თვალწინ, მამაჩემი, ნათლიაჩემი და სხვანი.

— გამხნევი, მიშელ, ხომ იცი, რა მოუთმენლად გელიან ყველანი!

ლანდივით თვალწინ მიდგა ჩვენი სოფელი. მეჩვენებოდა, რომ აგერ მივედი კიდევ; შორიდან მიმავალი დამინახეს ჩვენებმა, გარეთ გამოცვივდნენ და ყვირილი მორთეს:

— მიშელი მოდის, მიშელი! ჩვენი მიშელი!

სწორედ ფრთები შემასხა იმედმა. წელში გავსწორდი, ჯოხი მხარზე გავიდე და იმისთანა ნაბიჯს ვადგამდი, რომ ავადმყოფს კი არა, ჯანსაღსაც გაუჭირდებოდა. გზაში ყველგან იგივე წვალეზა და უსიამოვნება მხვდებოდა, რაც იმ წინა დღეებში: ქვეყანა დამშეული იყო და ყველგან ტირილი და გოდება ისმოდა. პური აღარსად იშოვებოდა: რაც ჰქონდა ხალხს, უკვე შემოხარჯოდა და სოფელ-სოფელ კი მეხარკენი დაიარებოდნენ და ჟანდარმების თანადასწრებით და

დანმარებით ხარჯს აგროვებდნენ. ვაი იმ მოგროვებას! ქრისტეს ტი-
ჩილი იდგა ყველგან!

აქაც იგივე შიში და უნდობლობა ყველგან, რაც წინაღ იყო. შე-
ვიდოდი სადმე სოფელში და ჟანდარმი მომეგებებოდა: შენი ქალა-
ლები, მამულიშვილო! დუქანში ღამეს არ გამათევინებდნენ, მანამ
ვინაობის ქალაღდს არ გამისინჯავდნენ. დიად, ყველგან წვალება და
უსიამოვნება მხვდებოდა, მაგრამ იმისთანა მხიარულად მქონდა გუ-
ლი, რომ ყურადღებას აღარას ვაქცევდი, ცოტა კიდევ და შინ მი-
ვალ-მეთქი.

ხანდახან ერთ-ორ შაურად ურემზედ დამისვამდნენ მგზავრები.
და ცოტაც არის დამასვენებდნენ. სოფელი სოფელს მისდევდა, ქა-
ლაქი ქალაქს და ბოლოს ჩვენი მთებიც გამოჩნდა. ისე გადამიბრუნ-
და გული ჩვენი ძველი მთების დანახვაზედ, თითქო ბუდიდან ამო-
ვარდნას აპირობსო. ვინ იცის, ჩვენი წინაპართაგანი რამდენი სხვა
გაჩერებულა ჩემსავით შორიდან მომავალი ამ მთების დანახვაზედ
და სიხარულით მისალმებია თავის აღმზრდელ სამშობლოს! წასულან,
დამარხულან, მათი ხსენებაც აღარსად არის, და ეს ძველი მთები კი
ძველებურად ამაყად დგანან თავთოვლიანნი! წვალთ ჩვენც, დავი-
მარხებით, და ჩვენს შემდეგ ახლა ჩვენი შვილები გაჩერდებიან შო-
რიდან მომავალნი და ნეტარებით აღსაყვ გულით სალამს მიუძღვ-
ნიან ჩვენს დიდებულ მთებს. აგერ, დატბერგის მთა, თავისი თეთრი
ნიშნით. აგერ ტყით შემოსილი შნეებერგი თავისი დათოვლილი
მწვერვალით. რაღა მიჭირდა, რაკი ჩვენ მთებს მივადწიე? შინ ვიყავ
და შინ.

სარბურგიდან დილის ოთხს საათზედ გავედი და ცხრა საათი იქ-
ნებოდა, როდესაც მიტტელბრონს გადავხედე და მასთან ერთად
მთელ ჩვენს მხარეს და ჩვენს სოფელს. ცოტა ხანს უკან ფალსბურ-
გში შევედი. ბევრიც რომ ვეცადო, მე ვერ ავიწერთ როგორ მომე-
გებნენ მარგალიტა და სტეფანე, რამდენი მკოცნეს და მიაღერსეს.
ორივემ. მარგალიტამ თავი ვეღარ შეიმაგრა და, ისეთი გამხდარი და
გაყვითლებული რომ მნახა, ტირილი დაიწყო: ფეხით როგორ გად-
მოიარე მთელი საფრანგეთი, ვერ შემატყობინებდიო? სტეფანეც ძა-
ლიან დაღონდა ჩემი ავადმყოფობით. მამაჩემი იქვე ქალაქში ყოფი-
ლიყო, კალათები ჰქონოდა გასაყიდად ჩამოტანილი, და მაშინვე
ჩვენსა მოიჭრა, ჩემი მოსვლა რომ გაიგო. საწყალი მოხუცი!

რაკი შინ მივედი, კვლავ მომერია სისუსტე და სკამზედ დავეშვი.
ხველა ამივარდა და ნახველს სისხლი ამოჰყვა. მერე დაიძრა და იმო-
დენა მალებინა, რომ გული წამივიდა. მოკვდაო, თურმე იფიქრეს.
სადამოზედ მოვსულიერდი, შოველის ლოგინში მწოლარე. ისე სუს-

ტად ვიყავი, რომ ძლივსლა ვსუნთქავდი. მარგალიტა თავით მიჯდა და ცხარი ცრემლით დამტიროდა. ხელი მოვხვიე, გულში ჩაივია რაღაცა და გუთხარ:

— კარგი ვქენ, არა, მარგალიტა, რომ შენს ნახვას დავეჩქარე?

მამაჩემს ველარ გაეძლო სევდისთვის და შინ წასულიყო. ექიმს შტეინბრენერს — ყმაწვილი კაცი იყო, მაგრამ ფრიად დახელოვნებული — ეთქვა, საშიში არა სჭირს რა, ოღონდ სრული მოსვენება უნდაო. ებრძანებინა, ავადმყოფის სანახავად არც ერთი პატრიოტი არ მიუშვათ, რადგან ახალ ამბებსა ჰკითხავენ და შეაწუხებენო.

მაშინ დამიმტკიცა ჩემმა საცოლომ თავისი სიყვარული, და მარტო მაშინ ვიგრძენი, რა ბედნიერი კაცი ვიყავ, რომ მარგალიტა ჩემად მეგულებოდა. დღე და დამ განუშორებლივ თავს მეველებოდა და მივლიდა. ჩემს მეტი აღარა ახსოვდა რა და ყოველი საქმე სტეფანესთვის მიენდო.

მეც მოვიხედე; თუმცა ნელ-ნელა, მაგრამ გამოვბრუნდი. სამი კვირის შემდეგ ექიმმა გადაწყვეტით თურმე უთხრა, ახლა კი ნულარ გეშინიათ, სასიკვდილო აღარა სჭირს რაო. მანამდე კი თურმე სულ იმის ფიქრში იყო, აი, ან ახლა განუტევებს სულს, ან ახლაო. მე კი სულ იმას მეფიცებოდა, საშიში არაფერია, იმისთანას წამოგაყენებ ფეხზედ, რომ თითონ შენც გიკვირდესო. რას იზამთ, ავადმყოფს თუ ამისთანა ტყუილებით გული არ გაუმაგრა ექიმმა, ცარიელი წამლით თავის დღეში ვერას გახდება; ავადმყოფმა რომ თავის სნეულების ქემპარტი მდგომარეობა იცოდეს, მაშინვე ფეხებსა ფშკავს. სამი კვირა უსმელ-უქმელი თურმე ვიყავ და რაკი წამოვიხედე, ცოტა საკმელის ნებაც მომცა ექიმმა. ჩვენი ნიკოლი, ნათლიაჩემის მოახლე, ყოველ დღით ჩამოვიდოდა ხოლმე ჩემს მოსაკითხად და თან ერთს პატარა კალათსაც ჩამოიტანდა. საშინელი სიძვირე იყო ყველაფრისა და ხორცი ხომ თავის წონა ვერცხლადაც არსად იშოვებოდა. ღმერთმა აცხონოს ნათლიაჩემი! ისე შეივს არ მოექცევა კაცი, როგორც მე ის მექცეოდა! როდესაც კი გამიჭირდებოდა, ყოველთვის ის გამომიწვდიდა ხელს საშველად და არაფერს ზოგავდა ჩემთვის. იმისთანა გულკეთილს და პატიოსან კაცს იშვიათად ნახავს ამ ქვეყნად აღამიანი და, თუ ნახა სადმე, თავის დღეში აღარ დაივიწყებს მის სიკეთეს. ჩამოვიდოდა ნიკოლი, მომიკითხავდა და რა გინდა სულს და გულოს, რომ ჩემს სუფრაზედ არ ყოფილიყო! მადაც გამეხსნა!.. მარგალიტაც გამხიარულდა, რაკი ნახა, რომ საშიში აღარა მჭირდა რა. ექიმმა ნება მომცა და მაშინვე ვინახულე ნათლიაჩემი, ელოფ კოლენი, ლეტშიე, რაფიელ მანკი და სხვა პატრიოტები.

სიცოცხლის ნეტარებას და წუთისოფლის სიტკბოებას კაცი მარ-

ტო დიდი ავადმყოფობის შემდეგ გრძნობს. მე ისე მიხაროდა სიცოცხლე, რომ სიხარულით ბავშვივით ვტიროდი. მზის სხივიც უფრო მშვენიერად მეჩვენებოდა, ვიდრე წინაღ, მარგალიტაც უფრო ლამაზად და ქვეყანაც უკეთესად.

ერთი თვე კიდევ გავიდა და წამოვდექი კიდეც. იმდენად კარგად ვიყავ, რომ ჩვენს სოფელში ასვლა შემეძლო, მაგრამ დედაჩემის ნახვა მეძნელებოდა, რადგან წინაღვე ვიცოდი, როგორც დამიხედებოდა. მთელმა ქალაქმა იცოდა, რომ მე მარგალიტას ვირთავდი; დედაჩემს დიდი ჩხუბი ჰქონოდა ამის გამო. თურმე მისდგა მამაჩემს და ლანძღვა დაუწყო:

— მე ურჯულო არ მინდა!

მამაჩემსაც ავსებოდა ფილა მოთმინებისა და ხმა ამოეღო:

— შენ ვინა გკითხავს, გინდა თუ არა? საქმე ის არის, რომ მე მინდა! კანონისამებრ მარტო ჩემი თანხმობაა საჭირო და მე ჩემს თანხმობასაც ვაცხადებ და ჩემს ლოცვა-კურთხევასაც ზედ დავურთავ. იმდენი იყვირე, მანამ ხმა ჩავიწყდეს! ბატონი მე ვარ, მე!

ეს ამბები მე შემდეგში გავიგე, რადგან მამაჩემი ხმას არ იღებდა ამაზედ, თითქო ლაპარაკიც არა ჰქონოდეტ.

მაგრამ ჩემი ქორწინება ავიწეროთ, ისა სჯობია. დარწმუნებული ვარ ეს უფრო გასიამოვნებთ, ვიდრე გერმანელებისაგან მაინცის აკლება და ჩვენი ჯარების ომები ვანდეში.

თიბათვის დამდეგს, როდესაც სრულიად კარგად გავხდი და გამოვეწყვე ახალ ტანისამოსში, რომელიც მარგალიტამ მიყიდა, რადგან მე ჩემი გახვრეტილი გროშიც არსადა მქონდა, — ამას არ დაგიმალოვთ, და ან რა დასამალავია? სრულიად საფუძვლიანად შეეძლო ეთქვა მარგალიტას, მიშელი თავით ფეხამდე ჩემიას, რადგან ქუდიდან დაწყებული ფეხსაცმელამდე სულ მარგალიტას ფულით იყო ნაყიდი, რაც კი ტანთ მეცვა — დიად, თიბათვის დამდეგს მე და მარგალიტამ წიგნი მივწერეთ შოველს, რომელიც ჯერ ისევ ალპის მთებში მყოფ ჯარში იყო. და ვაუწყეთ რა ჩვენი ამბავი, ნებართვა ვთხოვეთ ჯვრისწერისა. პასუხი მაშინვე მოგვივიდა: შოველი მამულიშვილურად გვლოცავდა და ძალიან ნანობდა, რომ ფალსბურგში მოსვლა არ შეეძლო და ჩვენს ქორწილს ვერ დაესწრებოდა. მაგრამ ჩემს მაგივრობას ივანე ლერუ გაგიწევთ, რომელსაც ცალკე წიგნსა ვწერ ამის შესახებო.

ივანე ლერუს გარდა ბევრისთვის სხვისთვის მიეწერა წიგნი და ქორწილში მოეპატიჟნა. საკვირველი კაცი იყო შოველი: ჯარში მყოფი, საერო საქმეებში გართული, თავის კერძო საქმეებსაც არ ივიწყებდა და შორიდანაც კი ახერხებდა ჩვენს დახმარებას და შეე-

ლას. ქორწინების დღედ 21 თიბათვე დავდეთ 1794 წ. ჯერ უმისოდაც რა გაჭირებულია ხოლმე თიბათვეში ხალხი და მაშინ ხომ, იმ შიმშილობას, ისე იყო დამშეული, რომ ბალახით და მხალითღა გამოდიოდა. ჯეჯილი ჯერ არ შემოსულიყო, გასასყიდი არა შემოპქონდათ რა, და, აქი მოგახსენებთ, მხალს გასთუთქავდნენ, ცოტა მარილს წააყრიდნენ, და ეს იყო ხალხის პურიც და ხორციც.

ცუდი ღრო იყო; ქვეყანა გერმანელებისაგან იყო წალეკილი; ყველგან შიმშილი მძვინვარებდა; გილიოტინა დაუსვენებლივ მუშაობდა და ვინც კი რობესპიერისკენ არ იყო, ყველა სასიკვდილოდ იყო განწირული.... დიად, ცუდი ღრო იყო, მაგრამ მიუხედავად ამისა ჩვენ ძალიან მხიარული ქორწილი გავაჩაღეთ და ქუდი ჰერსა ვკარით. იმისთანა სიმღერა დავძახეთ, რომ მტერსაც კი იამებოდა. ვილას ახსოვდა ან რობესპიერი, ან ტერორი? დიდხანს გასტანა ქეიფმა და ღროს გატარებამ, მანამ სულ მოიღლებოდნენ სტუმრები. ერთადერთ დღეს შეხვდება ხოლმე საწყალ კაცს შეფედ ყოფნა და მაშინაც რომ არ გამხიარულდეს, ცოცხალი დაიმარხოს, ის ურჩევნია. ღვთის წყალობა გაქვთ, იმ დღეს მე გავმხიარულდი.

ნათლიაჩემმა წამჩურჩულა, სამჰედლოში ბევრი საქმეა და როცა გენებოს, ამოდი და შენი ჩაქუჩი მონახეო; ამასთანავე ისიც მაგრძნობინა, რომ ამ ცოტა ხანში მე პიკპოლცში გადავალ მამულის მოსავლელად და სამჰედლოს შენ ჩაგაბარებო.

ამ მხრივაც დამშვიდებული ვიყავ, რადგან ვიცოდი, რომ ალაგიცა მქონდა და გადაწყვეტილი ჯამაგირიც, მაგრამ ჩემდა შოულოდნელად საქმე სულ სხვანაირად დატრიალდა. ქორწილის რამდენიმე დღის შემდეგ, როდესაც საუზმეს გიახლებოდით მე, ჩემი ცოლი და სტეფანე, მათ ნათლიაჩემის წინადადება შეეატყობინე, მეგონა ძალიან ვასიამოვნებ-მეთქი. მარგალიტა დამშვიდებული ისმენდა ჩემს სიტყვას, მაგრამ პასუხი კი ცოტა არ იყოს გაჯავრებით მომცა:

— ძალიან კარგი, ჩემო მიშელ. ნათლიაშენი პიკპოლცში წაყიდეს თავისი მამულის მოსავლელად; ეგ იმისი საქმეა. ჩვენ კი ჩვენო საქმეები გვაქვს და ჩვენთვის უნდა ვიზრუნოთ.

— ეგეც ძალიან კარგი, ჩემო მარგალიტა, მაგრამ ასე გულხელდაკრებილი ხომ არ ვიქნები აქა? განა არა კმარა, რომ თავით ფეხამდე შენი ნაყიდი მაცვია, ახლა საჰმელიც შენი უნდა ვქამო?

— რადა, რა ვქნა? სტეფანე, დუქანში ვილაც შემოვიდა, ადევ გახედე. მე და შენს ძმას მოსალაპარაკებელი გვაქვს რამე.

სტეფანე გავიდა და მარგალიტა გვერდით მომიჯდა, შოველის მაგიდასთან, და ამიხსნა თავისი განზრახვა:

— წიგნებით ხომ ვვაჭრობთ და ვვაჭრობთ, და ახლა მინდა სა-

წვრილმანო მივუმატო: ყავა, შაქარი, მარილი, პილპილი, საპონი და სხვა. ყველაფერს ქარხნის ფასად ვიყიდით სტრასბურგში სიმონისაგან და აქ მოგებით გავყიდით; მერწმუნე, საწვრილმანოზედ უფრო მოგებას ვნახავთ, ვიდრე წიგნებზედ და გაზეთებზედ, რადგან ადამიანს ჯერ ჭამა-სმა უნდა და მერმე გონების განვითარება.

— ეგ ძალიან კარგი, მართლა რომ საუცხოვო აზრი მოგსვლია, მაგრამ მაგას ფული მოუნდება.

— ფული ცოტაოდენი გვაქვს; ხომ იცი, რა ყაირათიანად ვცხოვრობთ და ცოტა რამ გადავანარჩუნე ხარჯს. მაგრამ ესეც რომ არა გვქონდეს, მიშელ, მით საქმე არ წავგიხდება: შოველის სახელი ცნობილია მთელ ალზას-ლორენში და პატივცემული, საქონელს, რამდენსაც გვინდა, წამოვიღებთ ნისიად.

ნისია რომ გავიგონე, შიშით თმები ამეშალა. მაშინვე თვალწინ წარმომიდგა ბებერი რობენი, რომელიც კარს მოურაკუნებდა მამაჩემს და ორი-სამი დღით სამუშაოდ მიჰყავდა... თანაც დედაჩემის წყევლა-კრულვა მიდგა ყურში: გენაცვალეთ, ლამის თან კი გადავეგოთ იმ ერთ თხას... თავით-ფეხამდე კანკალმა ამიტანა და ველარ დავუშალე. მარგალიტასაც შევატყობინე ჩემი შიში. ძალიან გაიკვირვა და ცდილობდა დავერწმუნებინე, რომ თხა სხვაა და სავაჭრო სხვაა; რომ საქონელს მაშინვე გავყიდლით და ვალს გავისტუმრებლით; ვალი ორი ან სამი თვის ვადით გვექნება და მანამდე ორჯელაც ვაიყიდება ნისიად მოტანილი საქონელიო... მაგრამ ტყუილად ეწვალებოდა, ჩემს თავში არა შედიოდა რა და მარტო სიტყვა „ვალი“ თავბრუს მასხავდა. ბოლოს მარგალიტაც დარწმუნდა, რომ სიტყვით ვერას გააწყობდა და სიცილით მითხრა:

— კარგი და პატიოსანი, ჩემო მიშელ, ვალი არ გინდა, უეალოდ დავიწყოთ საქმე! რაც ფული გვაქვს, იმითი ვივაჭროთ, რაც მოგვივა, და გროში ვალი არ დაგვეღება.

— წელანვე აგრე გეთქვა, შე კაი ქალო, შენა! ოღონდ ვალს ნუ გამაგონებ და თუნდაც დღესვე წავიდეთ სტრასბურგს.

— თუნდა კი არა, ახლავე მივდივართ. ფული მზადა მაქვს. უნდა ვიზრუნოთ რამე, თორემ ძალიან ცუდად არის საქმე. გაზეთები სრულიად აღარ იყიდება; დაიშა, გადატაკდა ხალხი; გაზეთები ვიღას ახსოვს, შიმშილით კუჭი ეწვით. აბა წავიდეთ.

ძალიან მხიარულად იყო ჩემი მარგალიტა, ეტყობოდა, დიდი ხნის წადილი უსრულდებოდა. მეც, რაკი გავიგე, რომ ნისიად არას წამოვიღებთ და ვალს არ დავიდებთ, ისევე გავმზიარულდი და მზადებას შევუდექი. ბაპტიისტის დილიჟანსი სწორედ შუადღისას მიდიოდა. ფულები ჯიბეში ჩავიდე, ჩავსხედით დილიჯანსში და ვახსენეთ

ღმერთი. საშინელი მტვერი იდგა. გზები სრულიად მოუვლელად, ღვთის ანაბარად იყო იმ დროში მიტოვებული და ზაფხულში მტვერი ახრჩობდა გამვლელს, ზამთარში ტალახი. მაგრამ მე და მარგალიტა იმისთანა ბედნიერნი ვიყავით, რომ არც მტვერს ვამჩნევდით და არც მკათათვის სიციხეს. სტრასბურგში ღამე მივედით. მარგალიტამ გზები იცოდა და ერთს ნაცნობ სასტუმროში მიმიყვანა. მივედით თუ არა, მაშინვე პირს წყალი შევისხით და ტანისსამოსი გავიბერტყეთ. რომ არ შემრცხვეს, თითოს თითო ჩანახი მტვერი გვედო.

მახსოვს, რვა საათი იქნებოდა, როდესაც მოახლე ამოვიდა ჩვენს პატარა ოთახში და გვკითხა: ვახშამს როგორ ინებებთ, დიდ სუფრაზედ, თუ პატარაზედო? ის იყო, მინდოდა მეპასუხა, პატარა გვიჩვენია-მეთქი, რადგან მეგონა, პატარა სუფრას მოსამსახურეთათვის გაშლიან და უფრო იაფად გადავივლით-მეთქი; დიალ, ის იყო, მინდოდა მეპასუხა, რომ მარგალიტამ უთხრა, დიდ სუფრაზედ ვივახშმებთო. მოახლე მაშინვე წავიდა და მარგალიტამ ამიხსნა: დიდი სუფრა რომ გაიშლება, ყველას შეუძლია მივიდეს და გამოიჭიმოს, სულზედ ექვსი შაურია; პატარა სუფრა ის არის, რომ ვისაც საერთო სუფრაზედ პურის ჭამა ეთაკილება და ცალკე ოთახში გააშლევინებს თავისთვის კერძოდ, ერთიათად მეტს გადაიხდისო. შენ გიმეღლა ღმერთმა, რომ ღროზედ ამოიღე ხმა, თორემ დავიღუპებოდით-მეთქი, — ვიფიქრე. ჩავედით და საზოგადო სუფრაზედ გიახელით პური. ვახშმისას არას მოგახსენებთ, რადგან ძალიან შორს წაგვიყვანს. მეორე დღეს, შვიდი საათი არ იყო, რომ მე და მარგალიტა სიმონის ღუქნისკენ წავედით, მოედანზედ, რომელზედაც მას შემდეგ სტამბის გამომგონის გუტენბერგის ძეგლი ამართეს. სიმონს მთელი აღზასი იცნობდა და ძალიან მდიდარი კაცის სახელიც ჰქონდა გავარდნილი. მეც ხშირად გამეგონა სიმონის აუარებელი სიმდიდრე და მეგონა, სულ ატლასში და თვალ-მარგალიტში იჯდება-მეთქი. მაგრამ წარმოიდგინეთ ჩემი განცვიფრება, როდესაც ქუჩას რომ შევუხვიეთ, ერთი დაბალ-დაბალი, ორმოცი წლის კაცი დავინახე, სულ უბრალო დახლიდრის ტანისამოსით, რომელიც ერთ უშველებელ კასრს დასჭიდებოდა და ცდილობდა ისე დაედგა, რომ გამვლელები არ შეეწუხებინა. სწორედ ამ კაცზედ მიმითითა მარგალიტამ და მითხრა:

— აგერა სიმონი.

ღვთის წყალობა გაქვთ, მე მაშინ აზრი მეცვალა მდიდარი ვაჭრების შესახებ! მაშინ დავრწმუნდი, რომ ანაფორა ვერ შექმნის მღვდელს, და მას შემდეგ ერთხელ არ მახსოვს, გამმტყუნებოდეს ეს აზრი.

იქვე ქუჩაში ურმები იდგნენ და საქონელს სცლიდნენ. აქეთ-იქით ყუთები ელაგა და ჩვენც დიდი სიფრთხილით შევიარეთ დუქნის კარებისკენ. შემოგვხვდა თუ არა, მაშინვე მიხვდა სიმონი, რომ სავაჭროდ ვიყავით მისულნი და თან შემოგვყვა. დუქანი ძალიან მოზრდილი იყო და ორ ქუჩაზედ გადიოდა. ერთ მხარეს მედავთრე ბრძანდებოდა თავის დავთრებით.

ღმერთო დიდებულო! რამოდენი საქონელი ელაგა იმ დუქანში! რამოდენა ფული იყო დაბანდებული იმ ტომრებში და ყუთებში! მე ჩემს ღღეში არა მენახა რა იმისთანა და, შევედით თუ არა, ისეთი სუნი მეცა, არეული, საქონლის სუნი, რომ კინალამ დავიბნიდე. ვინ იცის რომელი ქვეყნიდან მოტანილი საქონელი არ ელაგა იქ ზვინებად ატანილი. ვინ იცის, რამსიშორით იყო ნაზიდი ხომალდებით და რამდენი ფული და შრომა იყო მათზე დახარჯული ისე როგორ გაივლის ამოდენა საქონელი კაცის ხელში, რომ ჯიბეში არა ჩარჩეს რა მეთქი, ვიფიქრე; ყოჩად, ჩემო მარგალიტა! მანამ ყმაწვილნი ვართ, გავისარჯოთ, შევიძინოთ რამ და როდესაც მოვხუცდებით და უზრუნველყოფილნი და დამშვიდებულნი მივუსხდებით ბუხარს გაზეთის წასაკითხავად, იქნება მაშინ მაინც მოვიგონოთ ის საბრალო მუშები, ზანგები თუ თეთრები სულ ერთია, რომლებს ნაჭირნახულების ვაჭრობით შევიძინეთ ჩვენ სარჩო.

მართალი უნდა მოგახსენოთ, დუქანში რომ ვიყავით, მე ეს აზრები არ მომსვლია, რადგან იმოდენა საქონელი ჯერ არსად მენახა და ცოტათი შემეკრთალი შევეცქეროდი მთასავით აყვანილ შაქრის თავებს.

მარგალიტა კი ისე იყო დამშვიდებული, თითქო თავის ოთახში არისო. კალათი იქვე დაზგაზედ დასდო და სიმონს უთხრა, გვინდა ფალსბურგში საწვრილმანოთი ვაჭრობა დავიწყოთ და თქვენთან ვიახელით საქონლის სასყიდლად... ფული ცოტა გვაქვს, მაგრამ ფულის შეძენის სურვილი ძალიან დიდია. სიმონი გაჩუმებული უსმენდა. მე კი ისე გავწითლდი, თითქო ახლად გაყვანილი ჯარისკაცია თავის გენერლის წინაშეო.

— თქვენ შოველის ქალი ბრძანდებით, ხალხის წარმომადგენელი შოველისა? — ჰკითხა სიმონმა.

— დიად, მამულიშვილო, და ეს ჩემი ქმარი გახლავთ. ჩვენს დუქანს ბასტიენ-შოველის სახელი ერქმევა.

სიცილი დაიწყო და თავის ცოლს გასძახა, რომელიც იქვე დატრიალებდა:

— აქეთ მოიარე, სოფიო. აი, ამ ყმაწვილებს დუქნის გაღება უნდათ. მოდი და მიართვი, რაც კი ამათთვის საჭიროა. მე გარეთ უნდა

გავიხედო, თორემ საქონელი ზედ ქუჩაზედ ყრია და უკვე შემატყობინეს, დაჩქარდით, აალაგეთო.

დახლიდრებით და მოახლეებით სავსე იყო იქაურობა, რომელნიც ფუტკარივით ირეოდნენ.

სოფიოს რამდენიმე სიტყვა ჩუმადაც უთხრა ქმარმა და გავიდა; ის კი ჩვენთან მოვიდა, თავი დაგვიკრა და ოთახში შეგვიპატივა:

— მობრძანდით, აქ უფრო უკეთ მოვილაპარაკებთ.

ლუქნის მარჯვნივ პატარა ოთახში შევედით, რომელიც სავსე იყო დავთრებით. მაშინვე სკამები შემოგვთავაზა. მერე მარგალიტას შედგენილი სია გასინჯა ყველას თავ-თავისი ფასი მიაწერა.

— ამის მეტი არა გნებავთ-რა?

— არა, მეტი ფული არა გვაქვს, უბასუხა მარგალიტამ.

— ეს არ იქმარებს, თორემ თქვენ იცით. სულყველაფერი უნდა იქონიოთ, რომ მეტოქეებმა არ დაგჯაბნონ.

— ჩემს ქმარს ისე უნდა საქმის დაწყება, რომ სულყველაფერი ნაღდ ფულზედ ჰქონდეს ნაყიდი.

ქალმა გადმომხედა და კარგა ხანი მსინჯა. რასაკვირველია, მაშინვე მიხვდებოდა, რომ მე გლეხკაცი ვიყავ, უბრალო მუშა, ჯარისკაცი და ვაჭრობისა არა მეყურებოდა რა. მერმე სიცილი დაიწყო და ისევ მარგალიტას მიმართა:

— სულ მაგისთანები ბრძანდებიან ეს ვაჟბატონები; ჯერ სულ თრთოლა მოსდით, ისე ეშინიათ ნისიისა, და მერმე კი ისე შესტოპავენ ხოლმე, რომ თავიან-ფეხიანად დაილუბებიან, თუ ისევ ჩვენ არ შევაყენეთ. კარგი, იმედი მაქვს კმაყოფილი დამრჩებით.

ქალი გავიდა და ბრძანება გასცა. მერმე საქონლის გამოგზავნის შესახებ შევთანხმდით. რაკი ყველაფერი მოვილაპარაკეთ, ამოვიღე ქისა და დაზგაზედ დავაპირქვავე. არც კი უნდოდა ფულის აღება: საქონელს რომ მიიღებთ, მაშინ გამოგვიგზავნეთო, მაგრამ მარგალიტამ შეჰფიცა, თუ ფული არ აგილიათ, ჩემს ქმარს შიშით ძილი გაუკრთებაო, და იმანაც ფული მიითვალა და ბარათი მოგვცა. რამდენჯერ მინახავს მას შემდეგ სიმონის ცოლი; მერმე კარგად გავიცანიეთ ერთმანეთი; ისე არ მივიდოდი იმათსა სავაჭროდ, რომ მაშინდელი ჩემი შიში არ მოჰკონებოდა და დაცივნა არ დაეწყო: აჰ, ბატონო მიშელ! გახსოვთ, როგორ გეშინოდათ ვალისა? ახლა? ახლა ისე გათამამებულხართ, რომ ლამის თქვენს მეუღლეს შევატყობინო, რომ იმან მაინც გაგაფრთხილოთ... დიად, ჩავიდე ჯიბეში ბარათი და გავწიეთ შინისკენ. სიმონის მეუღლემ კარამდე გამოგვაცილა, ალერსიანად გამოგვესალმა და თანაც დაგვპირდა, ამ ერთ კვირაში უთუოდ

მოგვივით საქონელი. მერმე ახლად მოტანილ ყუთებს გადახედა, რომელსაც ბიჭები ქუჩიდან ღუქანში ეზიდებოდნენ და თავის ქმართან მივიდა. ჩვენც სასტუმროსკენ წავედით.

იმავე საღამოს ათ საათზედ ისევ შინ ვიყავით, ფალსბურგში. შიში როგორღაც გამიქრა, პირიქით, იმედინად შევეყურებდი მომავალს, უთუოდ, მოვიგებთ-მეთქი. მეორე და მესამე დღეს მარგალიტამ ამიხსნა, როგორ უნდა მეწარმოებიან დავთრები: ერთში ნისიები დასწერე, რასაც ვის მისცემო. მერმე საღამოზედ ნისიები თავ-თავის ალაგს ჩაუწერე ყველას ცალ-ცალკე; ერთში კიდევ მიღებული საქონელი აღნიშნე და მასთან ერთად გაყიდული, რომ დანარჩენი ყოველთვის იცოდე და ერთშიაც ვალები და ვადები ჩასწერე, თუ როდისმე ვალი დაგვედო.

რაკი ასე დაწვრილებით ვიამბეთ ჩვენი ღუქნის ამბავი, ბარემ იმასაც მოგახსენებთ, როგორ სახტად დავრჩი, როდესაც ნაყილი საქონელი მოგვივიდა: ერთი კალთა ფული მივეცი და სამაგიეროდ ერთი ყუთი მივიღეთ, ერთადერთი ყუთი!

— ვაიმე ჩვენო ფულეზო! შემოვიკარ თავში გულგახეთქილმა, დავუღუპივართ იმ... ეს ხომ ნახევარის ნახევარიც არ არის იმისი, რაც ჩვენ ვიყიდეთ!

მარგალიტა კი მხიარულად ალაგებდა ყუთიდან სავაჭროს — ეს ყავაო, ეს სანთელიო, ეს ნემსი და ძაფიო...

— სიზმარშიაც ველარა ვნახავთ ჩვენ იმ ფულეზს! — ვიძახდი გაჯავრებულნი.

და წარმოიდგინეთ ჩემი განცვიფრება: ყუთის ძირში ანგარიში გახლდათ გამოგზავნილი საქონლისა და ჯამი ერთი ორად მეტი იყო, ვიდრე ჩვენ ფული მივეცი: სიმონს და იმის მეუღლეს ბევრი რამ იმისთანა გამოეგზავნათ, რაც მარგალიტას არა ჰქონდა სიაში, მაგალითად, ჯავზი, ილი, კოჭა და სხვანი, ისე რომ, რაც მივეცი, თითქმის ერთი იმოდენი კიდევ ვალად დაგვდებოდა სიმონისა.

იმისთანად გავებრაზდი, რომ მინდოდა ჩამელაგებინა ყველაფერი და უკანვე გამეგზავნა; მაგრამ მარგალიტამ არა ქნა: ნუ გეშინია, ყველაფერი გაიყიდება; სიმონმა სიკეთის გულისთვის გამოგვიგზავნა, განა იმიტომ, რომ ჩვენი დაღუპვა ნდომოდაო.

რაც იმ სამს დღეში ფული დაიხარჯა, ერთ ოჯახს შეინახავდა მთელ წელიწადს — ორი სასწორი ვიყიდეთ, ღუქანში ყაფაზები და უჯრები გავაკეთებინეთ, რა ვიცი... ფული რომ აღარა გექონდა, ნისიად ვაკეთებინებდით, ისე რომ ღურგლისაც დაგვედო, ჩილინგლახისაც და, ერთი სიტყვით, ყველასი. რაც მე იმ დღეებში მღელვარება

გამოვიარე, ბრძოლის ველზედ არსად მახსოვს იმისთანა. მარგალიტას სიყვარული და ნდობა რომ არა მქონოდა და ამასთან ერთად შოველის იმედი, რომელიც გაჭირვებაში უნუგეშოდ არ დაგვეტოვებდა, სწორედ გავიბარებოდი სადმე, რადგან მე უკვე მელანდებოდა სარგებლის სარგებლით ერთიათად ქვეული ვალი, გაკოტრება და საქვეყნოდ შერცხვენა და თავლაფის დასხმა. სადღა იყო ჩემთვის ძილი! შემდეგში გავიგე, რომ ჩემზედ უარესად თურმე მამაჩემი იტანჯებოდა. წამოდგებოდა თუ არა დედაჩემი, მივარდებოდა და გულს უხეთქდა:

— ჯერ არ გაკოტრებულან? დღეს არა, ზვალ იყოს რა, ეგ არაფერი! მალე მტერი მოგიკვდეს, მალე ისინი გაკოტრდნენ! ეგლა მაკლდა, დიად, ახლა ამით შემარცხვინონ ამ სიბერის დროს!.. ვიცოდი და, რომ აგრე იქნებოდა! ურჯულოს რომ ირთავდა, რა სიკეთე უნდა დაჰყოფოდა?

და სხვანი და სხვანხ.

კინაღამ თურმე გაგიჟდა საწყალი მამაჩემი. თავის დარდისას მე არაფერს მეუბნებოდა, მაგრამ ისე ჩამოყვითლებულიყო, ისე ჩამომხმარიყო, რომ ცხადად ეტყობოდა, რომ საშინელი რაღაც აწვა გულზედ და სულს უხუთავდა.

მაგრამ გადიოდა ხანი და მეც უფრო და უფრო ვმშვიდდებოდი. მთელი ჩვენი მაზრის გლეხკაცობა ჩვენსა დიიარებოდა — ზოგი ქალაღდს ყიდულობდა, ზოგი საწერ-კალამს, ზოგი გაზეთებს და რაკი ნახეს, რომ გარდა ამისა სხვა სავაჰროც ყველა გვექონდა და არც სხვაზედ ძვირად ვყიდდით, იქვე ყიდულობდნენ, რაც კი საშინაოდ სჭირდებოდათ. დიასახლისებმაც ისწავლეს ჩვენი დუქნის გზა და ნელ-ნელა, გროშობით, გროვდებოდა ფული; როდესაც სიმონს თავისი ვალი გადავუხადეთ და მარგალიტამ დამიმტკიცა, რომ საკმარისი მოგება გვრჩებოდა, მაშინ კი სრულიად მოვისვენე და ისე ამოვისუნთქე, თითქო გულზედ ლოდი მეღო და გადავაგდე. მაშინ კი აღარა ვუთხარირა და არა თუ მარტო ის დავაბარებინე სტრასბურგიდან, რაც უკვე გაგვეყიდა და გვაკლდა, არამედ ისიც, რასაც გეტხოვდნენ და არა გვექონდა.

საწვრილმანოსთან ერთად გაზეთების და წიგნების ვაჰრობაც უკეთ წავიდა. მთელი დღე დუქანში ვიყავით საქმეში გართული და საღამოზედ, რაკი დუქანს დავეტოვდით, დავთრებს რიგზედ მოვიყვანდით და შავ ფულს მანეთ-მანეთად შევახვევდით, საზოგადო საქმისთვის მოვიცლიდით და გაზეთებს ვკითხულობდით.

მასსოვს ჩვენს საზღვრებზედ მაშინ ჟურდანის და პიშეგრუს ქებალა ისმოდა და შინ კიდევ რობესპიერისა, რომელმაც კანონი გამოაცემინა კონვენტს და მით აღიარებინა უზენაესი არსება და სულის უკვდავება. ამბობდნენ, ახლა კი ყველა დაწყნარდება და ყველგან წესი და რიგი იქნება შემოღებული, რადგან ვინც დასასჯელი იყო, უკვე დაისაჯა, გილიოტინას სამუშაო აღარ ექნება და დღეს ხვალ სათნოება გამეფდებაო. სუყველაფერში ძველი რომაელების წაბაძვას ცდილობდნენ. ამბობდნენ, იაკობელები ჰგვანან რომაელებს, მაგრამ სავსებით კი ვერაო. ასე გასინჯეთ, სახელებსაც კი იცვლიდნენ და გუშინდელი იოსები, პეტრე და ნიკოლოზი დღეს ბრუტობას, ცინცინატობას და გრაკობას იჩემებდნენ; თვით კალენდარში ხსენებაც აღარსად იყო ძველი ქრისტიანული სახელები-სა და სულ რომაული სახელებით იყო სავსე; განათლებულნი კიდევ პო, და უმრავლესობამ არც კი იცოდა, ვინ იყო ცინცინატი ან ბრუტი. პატრიოტულ დღესასწაულებზედ ღმერთების წარმომადგენელი ქალები თითქმის ტიტველნი დადიოდნენ. აი, რა სამარცხვინო და საზარელ გზას დაადგა რესპუბლიკა.

უცნაური ის იყო, რომ ათში ერთს არ გაეგონა რომაელების სახელი და ჩვენ კი გარომაელებას გვიპირებდნენ. საფრანგეთის ხალხს უბრძანებდნენ, შენი საკუთარი რჯული და ზნეჩვეულებანი დაივიწყე და ძველი რომაელების — კერპთაყვანისმცემლების — რჯული დაიპირეო. მაგრამ ვინ გაბედავდა ამის თქმას? მაშინვე დააბეზლებდნენ და რაკი დააბეზლებდნენ, წასული იყო კაცის საქმე: დაიქრდნენ, სამართალში მისცემდნენ და გილიოტინით თავს მოსჭრიდნენ. რობესპიერი ღმერთი იყო და ყოველი მისი სიტყვა ახალი აღთქმა. როდესაც კი იტყოდა რასმე, კონვენტი ერთხმად დაადგენდა მის ნათქვამის დაბეჭდვას და მთელს საფრანგეთში დარიგებას; ყველა კლუბებს, ყველა სოფლებს და სამამასახლისოებს უგზავნიდნენ ამ სიტყვებს, რომ კედლებზედ გაეკრათ ყველგან... ყველგან რობესპიერი იყო და რობესპიერის მეტი არავინ.

და უცბად, მგონი მკათათვე იყო, მოულოდნელად გაჩუმდა რობესპიერი, აღარც კონვენტში წავიდა, აღარც ქვეყნის მფარველ კომიტეტში. ღმერთო შეგცოდე და მე ყოველთვის იმ აზრისა ვიყავ, რომ მეტისმეტი, გაზვიადებული წარმოდგენა ჰქონდა თავის თავზე და დარწმუნებული იყო, უჩემოდ ცხოვრება აღარ შეუძლია საფრანგეთსაო; დარწმუნებული იყო, რაკი მე აღარ მივალ, თვით საფრანგეთი მეაზლება. მუხლმოყრილი შემევედრება ქვეყნის პატრონობას

და... აბა, მაშინ დავუდებ მეც ჩემს პირობებსო! მე ყოველთვის ამ აზრისა გახლდით და მით უფრო სარწმუნო არის იგი, რომ რობესპიერის მეგობარმა სენეჟუსტმა, რომელიც სწორედ იმ დროს დაბრუნდა პარიზს ჯარიდან, რაკი ნახა რომ ურობესპიერობა იოტის ოდენადაც არაფერს შეეტყო და ყველაფერი ძველ წესსა და რიგზედ მიდის, გამოაცხადა, — ჩვენს გაჭირებულს სამშობლოს ახლა მარტო განუსაზღვრელი უფლებებით აღჭურვილი მბრძანებელი, დიქტატორი, იხსნის და დიქტატორობა ჩვენში მარტო „სათნოიან რობესპიერს“ შეჰფერისო. სენეჟუსტმა ეს სიტყვები ქვეყნის მფარველ კომიტეტს მოახსენა, მაგრამ კომიტეტის სხვა წევრები კარგად ხედავდნენ, საით მიერეკებოდნენ ეს სათნოიანი ვაჟბატონები საფრანგეთის ხალხს და უარი უთხრეს. მაშინ სათნოიანმა და უბიწომ; ბრაზმორეულმა, რომ უარისთქმა გაუბედეს, განიძრაბა ქვეყნის მფარველი კომიტეტის წევრების მოშორება. ბევრი რამ წამიკითხავს მის შესახებ, მაგრამ ყოველთვის ერთი და იგივე დასკვნა გამომიყვანია: რობესპიერი მკაცრი კაცი იყო და ქვეყანაც ჯაშუშების და ჯალათების წყალობით დაიმორჩილა; დასასრულ, განიზრაბა ქვეყნის მფარველი კომიტეტის წევრებიც იქით გაეგზავნა, საითაც დანტონი, ესე იგი, გილიოტინისკენ.

მკათათვის გასულს ჩვენი კლუბის ყველა მოთავენი პარიზს წავიდნენ სადღესასწაულოდ. ჩვენი კლუბი ყოველთვის იაკობელების მომხრე იყო და მაშინაც პარიზელ იაკობელების მიწვევით გაემგზავრნენ ელოფ კოლენი და სხვანი; ხმა გავარდა, იმიტომ წავიდნენ, რომ რობესპიერი კიდევ რადასაც გვიპირებსო. და მართლაც, წასულები სუყველანი რობესპიერის მომხრენი იყვნენ, მეტადრე ელოფი. იმისთანა დაშინებული იყვნენ ყველანი, რომ შინაც კი აღარას ამბობდნენ, კედლებსაც ყურები ასხიაო.

გავიდა რვა თუ ათი დღე და ერთ მშვენიერ დილას ამბავი მოიტანა შიკრიკმა, რობესპიერი; სენეჟუსტი, კუტონი და ყველა მათი მეგობრები დაიჭირეს და მეორე დღეს თავები დააყრვეინესო. ვერ წარმოიდგენთ, როგორ შეინძრა ამ ამბავზედ მთელი ფალსბურგი: პარიზს წასულები ცოცხალი აღარავის გვეგონა: რაკი რობესპიერი მოკლეს, ჩვენებსაც ზედ მიადგენებდნენო. ზოგს მამა ჰყავდა სატირალი, ზოგს ძმა, ზოგს ქმარი! მაგრამ უბედურებაც ის იყო, რომ ტირილი და მწუხარება არავის შეეძლო, რადგან თითონ სენეჟუსტმა დაადგინა კონვენტს კანონად, ვინც დამნაშავეს შეიბრალებს, თითონაც საეჭვო პირად ხდება; ვინც დამნაშავეს სახლში შეიყვანს, თუნდა მისი მშობელი დედაც იყოს, სიკვდილით იქნება დასჯილიო. თქვენ მიბრძანეთ ახლა, ვინ გაბედავდა ტირილს და მწუხარებას?

პირველ მარიამობისთვის, ვახშობისას, როდესაც მე და მარგალიტა მარტონი ვიყავით ჩვენს პატარა ოთახში, ვილაცამ ფანჯარა დაგვიკაქუნა. მეგონა, სანთელი ან ზეთი დაჰკლებია ვისმე და სასყიდლად მოდის-მეთქი; მაშინვე ფანჯარა გავალე და გადავხედე. ჩემს წინ ელოფ კოლენი იდგა!

— მე ვარ, მე, მიშელ! კარი გამიღე.

მაშინვე გავვარდი კარის გასაღებად. ისე ამიფანქვალდა გული, თითქო მომაკვდინებელს ცოდვას ჩავდიოდი რასმე. და არც უსაფუძვლო იყო ჩემი შიში: რომ დაენახა ვისმე, რომ მე სახლში შევიყვანე პარიზიდან მოსული რობესპიერისტი, და დავებეზღებინე, წასული იყო ჩემი საქმე! მაგრამ რა მექნა? კოლენი შოველის მეგობარი იყო და სიფთხილე უმადურობა და ლაჩრობა იქნებოდა.

კოლენი შემოვიდა. კარები მაგრად ჩაკვეტე და თან შეეკვე. ჩვენს ოთახში რომ შევიდა, ჯერ აქეთ-იქით მიიხედა, ყური მიუგდო. — მარტოკანი ხართ? — გვკითხა ბოლოს ცოტათი დამშვიდებულმა და სკამზედ დაეშვა.

მეც იმის პირდაპირ დავიდგი სკამი. მარგალიტა იქვე იდგა და ყურს გვიგდებდა.

— დავმარცხდით, დავიღუპებით! გვაჯობეს იმ ქურდებმა და ავაზაკებმა! რესპუბლიკა ძირს დაამხეს და საუკუნოდ დაღუპეს! სწორედ სასწაულით მოხდა, რომ თავი დავახწიეთ იქაურობას.

ქული იქით მიაგდო და ხან ერთს გადმოგვხედავდა, ხან მეორეს, ნეტავი რასა ფიქრობენო.

— როგორ? როგორ მოხდა? — ჰკითხა მარგალიტამ.

კოლენმა ხმა დაიმდაბლა და თითქმის ჩურჩულით გვიამბო რობესპიერის და მისი მეგობრების დახოცვა: საფრანგეთის ყველა კლუბების მოთავეთ, — იაკობელებისას მოგახსენებთ, რაღა თქმა უნდა, — გვაცნობეს, სადღესასწაულოდ პარიზში უნდა იყვნეთ, რადგან გადაწყვეტილი გვაქვს ამით ვისარგებლოთ და ერთიანად გავწმინდოთ მთელი საფრანგეთი, რომ ცოცხალი აღარსად გადაგვრჩეს რესპუბლიკის მტერი და დუშმანიო. ჩვენც მაშინვე გავემკვზავრებით, მაგრამ პარიზში იაკობელების გარდა, სხვა ყველა გარყვნილი და გახრწნილი დაგვხვდა, ასე გასინჯეთ თვით კონვენტი და კომიტეტებიც კი. მაშინ რობესპიერმა კონვენტს წარუდგინა თავისი მოხსენება კომიტეტის წინააღმდეგ და კონვენტმაც ზოგი ჩვეულებით და ზოგიც შიშით დაადგინა იმ მოხსენების დაბეჭდვა, მაგრამ კამბონმა და ტირონმა წინადადება შეიტანეს, მაგ მოხსენებით რობესპიერი კომიტეტის წევრებს ამტყუნებს და როგორ იქნება მაგის დაბეჭდვა, ვიღრე კომიტეტის წევრებსაც არ პოუსმენთო! კონვენტმა დაადგი-

ნა, რობესპიერის მოხსენება კომიტეტს გადაეცეს განსახილველად. რობესპიერი კომიტეტის წევრებს ამტყუნებდა და კონვენტმა ამ წევრებსვე მიაწოდო თავიანთ თავის გასამართლება და მით რობესპიერის გამტყუნება. იმ საღამოს რობესპიერმა თავისი მოხსენება იაკობლევის კლუბში წაიკითხა. ყველა იქ დამსწრეთ სრული თავისი თანხმობა გამოუცხადეს; ასე გასინჯე, პარიზის ხალხის აშლასაც კი ფიქრობდნენ და პეიანი, ფლერიანი, ლესკო, პარიზის მამასახლისი, ანრიო, ერის მცველი რაზმის წინამძღოლი და ერთობ ყველა უნიფხონი იმას იხვეწებოდნენ, ნება მოგვეცით ამაღამ დავერიოთ კომიტეტს და სულ ერთიანად ამოვწყვიტოთ, საცა კი ქვეყნის მტერი გვეგულებათ.

მაგრამ რობესპიერმა, „სათნოიანმა რობესპიერმა“ არ ინდომა კონვენტის წინააღმდეგ ხალხის აშლა, რადგან კონვენტს შეეძლო კანონთა მფარველობის გარეშე მყოფად გამოეცხადებინა იგი. რობესპიერმა თავის მტრების დასამარცხებლად საერო კრების იმ ნაწილს მიმართა, რომელიც პარტიების ბრძოლაში არავითარ მონაწილეობას არ იღებდა, და რომელსაც ზოგნი ვაკეს ეძახდნენ და ზოგნი, მეტადრე თვით რობესპიერის მომხრენი — ჭაობს, დამყაყებულ ჭაობს. ვაკელებს მიმართა რობესპიერმა, სწორედ იმ ვაკელებს, რომლებსაც ხან ბაყაყს უწოდებდა, ხან ჯოჯოს და დახმარება სთხოვა. მაგრამ ვაკელები იმისთანა უხასიათონი გამოდგნენ, რომ იმავე ღამეს უღალატეს რობესპიერს და მის მოწინააღმდეგეებს მიუდგნენ; გასაკვირველიც არ იყო მათი ასეთი ქცევა, რადგან იცოდნენ, რომ რობესპიერს სიაჰქონდა შედგენილი იმ კაცებისა, რომლებსაც მოკვლას უბირებდა და ეშინოდათ, ვაი თუ ჩვენც ვიყვნეთ იმ სიაშიო. იმ ღამეს მის მოწინააღმდეგეთ მიუდგნენ ვაკელები და მეორე დღეს კონვენტში, როდესაც სენეჟუსტმა სიტყვა ითხოვა, თავმჯდომარემ ტალიანმა სიტყვა შეაწყვეტინა. მოლაპარაკეს თავის მომხრენი წაექმობაგნენ, თავმჯდომარეს კიდევ თავისები და იმისთანა არეულობა გამოიწვიეს, რომ რობესპიერსაც კი აღარა ათქმევინეს რა: როგორც წამოდგებოდა, მარჯვნიდან, მარცხნიდან, ზემოდანაც და ქვემოდანაც ერთხმად უყვიროდნენ, გაჩუმდიო. ზოგი კრომველს * ეძახდა, ზოგი მტარვალს, ტრიუმვირს **. ბოლოს რობესპიერი დამნაშავედ აღი-

* ოლივიე კრომველი დაიბადა 1599 წ. აჯანყებული ხალხით მან დაამარცხა შარლ პირველი სტუარტი (1645); აწამა და განდევნა შოტლანდიიდან შარლ მეორე. მერე ჯარის უფროსნი მიიმხრო და მარტოღმართო განაგებდა ინგლისს (1653).

** ტრიუმვირი სამი მოხელეა, რომელნიც ერთად განაგებენ რაიმე საქმეს. ამბობენ ხოლმე პომპეის, კეისარის და კრასის შესახებ, რომელთაც ხელთ იგდეს მართებლობა და თავის ნებად განაგებდნენ მთელს რომის იმპერიას.

რა კონვენტმა და მასთან ერთად მისი ძმა იოსები, კუტონი, სენჟუსტი, ლება... ყველანი გააკავეს და ციხეში ჩაყარეს.

აი, რა გვიამბო კოლენმა. წარმოდგინეთ, რა განცვიფრებული ვიქნებოდით მეცა და მარგალიტაც. გარდა ამისა გვიამბო, რომ ხალხი მოელოდა კიდევ ამ ამბავს საერო კრებისაგანო: იმ საღამოს, როდესაც ხალხმა გაიგო სათნოიანების დაპატიმრება, აიშალა და უნდოდა გაეთავისუფლებინა რობესპიერი და სხვა პატრიოტები; კომუნამ ზარის რეკა დაიწყო ნიშნად განსაცდელისა, და ქალაქის მოხელეებმა როგორღაც მოახერხეს, გამოიყვანეს ციხიდან დაქვრივები და სამამასახლისოსკენ მიჰყავდათ, მაგრამ ანრიო თავის ჩვეულებრივებზე მთვრალი ყოფილიყო, შემჯდარიყო ცხენზე და სიარული დაეწყო მთელ ქალაქში: აბა ხალხო, იარაღი აისხით, კონვენტის წევრნი ამოვხოცოთო! დაეჭირათ და ისევ დაემწყვდიათ.

ეს მოხდა საღამოს ხუთიდან შვიდ საათამდე. შვიდ საათზედ ერთხელ კიდევ უნდა შეკრებილიყო კონვენტი. რობესპიერის მომხრეებმა ეს იცოდნენ, კოფინალი ანრიოს გასათავისუფლებლად წვიდა და თან ასამდე პატრიოტი წაიყვანა, სულ შეზარბაზნენი; მიაგორეს იმ ბიჭებმა ზარბაზნები და კონვენტის კარს დაუმიზნეს: ვინც კაცია და შევაო! საუბედუროდ, ანრიო სამამასახლისოსაკენ წასულიყო რჩევის საკითხავად; რაკი ეს გაეგოთ ბიჭებს, თითონაც დაფანტულიყვნენ და დეპუტატები თავისუფლად შესულიყვნენ კონვენტის დარბაზში და, მიუხედავად ზარის რეკისა, რომლითაც კომუნა ხალხს აშლას და აჯანყებას უბრძანებდა, კანონის მფარველობის გარეშე მყოფად გამოეცხადებინათ რობესპიერი და იმისი ძმა, კუტონი, სენჟუსტი, ლება, და კომუნის და იაკობელების უმთავრესი მოღვაწენი. თავისი დადგენილება კონვენტმა მაშინვე აცნობა ქალაქის ყველა უბნებს და ჯარი მისცა კარროს დამნაშავეთა დასაჭერად.

სულ კი ანრიოს ბრალია, ჩვენი დაღუპვა, ამბობდა კოლენი; დილიდანვე მთვრალი იყო ის უბედური და ყვირილის მეტს აღარას არიგებდა. ყვიროდა, ხმალს იჭნევდა და განკარგულებას კი არ აღუევდა.

მეც მაშინვე სანტერი, ლეშელი და როსინიოლი წარმომიდგა თვალწინ. ეტყობა სულ ერთნაირი ყოფილან ეს უნიფხონი, რომ ყველას ერთი და იგივე ბოლო მოელის: ან დამარცხება, ან გილიოტინა.

ეს რომ გაიგეს უნიფხობებმა, — გვიამბობდა კოლენი, — შეეშინდათ მოთავეებთან ერთად ჩვენც კანონის მფარველობის გარეშე მყოფად არ გამოგვაცხადონო და იმის მაგივრად, რომ მისულიყვნენ და თავიანთი სათნოიანი გმირები გაჭირვებიდან დაეხსნათ, კარროს-

თან მივიდნენ ყვირილით: კონვენტს გაუშარჯოს! შუა ღამე გადასული იყო, ორი საათი იქნებოდა, როდესაც დაიძრა კარროს ჯარი და შევარდა სამამასახლისოში, სადაც მოგროვილიყვნენ ნამდვილნი და უერთგულესი წარმომადგენელნი ხალხისა; ანრიო ფანჯრიდან გადასტყორცნეს, რობესპიერს შიგ პირისახეში დამბაჩა ესროლეს, კუტონი განავალის ორმოში ჩააგდეს, ლეზამ თავი მოიკლა, და სენ-ჟუსტი, იოსებ რობესპიერი და ყველა სხვანი, რესპუბლიკის ბურჯნი და დედაბოძნი, ციხეში წაიყვანეს. თან ხალხი მისდევდა და ზოგი აგინებდა, ზოგი პანღურსა სცემდა, ზოგი სილას, ზოგი ზედ აფურთხებდა. რობესპიერი კი საკაცეზე დაედოთ და კონვენტში შეეტანათ, მაგრამ მის მკვლელებს ზედაც არ შეეხედნათ, მაგის დანახვაც კი ჩირქს მოსცებებს ადამიანსო. რაღა გავაგრძელო, მოუსვენს ხელი და, საცა კი იაკობელი ეგულებოდათ ან რობესპიერის მომხრე მოხელე, ყველა დაიჭირეს და გილიოტინისკენ უკრეს თავი. აქაც არ ჰოეშვა ხალხი და ისე აწამა სასიკვდილოდ განწირულნი, რომ ფეხზედ დგომის ძალა აღარავის შერჩენია: ქეები დაუშინა მათ ხალხმა, ლაფი და ტალახი შეასხა, ლანძღა და ხორციელად მოკვლამდე, სულიერად დაამცირა და მოჰკლა. საბრალო კუტონი ფეხქვეშ სთელეს; ევედრებოდა, ნუ მტანჯავთ, მომკალით და გაათავეთო. მაგრამ სიკვდილიც კი შურდათ მისთვის! რობესპიერის ძმა გილიოტინის გვერდით დააყენეს და საკუთარი თვალით აყურებინეს, როგორ იხოცებოდნენ მისი მეგობრები; ბოლოს, როდესაც ყველა დახოცეს და ის აიყვანეს გილიოტინაზედ, ჯალათმა თავსაფარი ახადა და ისე მოსჭრა თავი, რომ თვალთ აყურებინა, როგორ მოდიოდა ზემოდან მისი მომაკვდინებელი მახვილი.

სულ კანკალით გვიამბო კოლენმა ეს ამბავი. ის თავის მეგობრებს სწუხდა და მე კიდევ ჩემები მომაგონდა, რომელნიც სათაყვანოდ მიყვარდა — დანტონი, კამილ დემულენი, ვესტერმანი; და მიამა კიდევც, რომ ასე მალე მოიმკეს თავიანთი ნათესი. რომ გაათავა კოლენმა, ვუთხარი:

— ყური დამიგდე, მამულიშვილო. მე ის კი არ მაკვირვებს, რაც შენ მიაბე; მე ის მაკვირვებს, აქამდის რატომ არ მოხდა ეგ? გუშინ არ იყო, მთელი ევროპა ჩვენ მოგვდგომოდა და ამასთან ვანდელეზები ჩვენ გვლალატობდნენ, იძულებული ვიყავით შეგვეჩერებინა დროებით 1793 წლის კონსტიტუცია და მის მაგივრად დაგვეარსებინა ქვეყნის მფარველი კომიტეტი; ის იმისთანა დრო იყო, რომ მართლა და, ტერორით — გილიოტინის შიშით — შეიძლებოდა გონს მოგვეყენა ის არისტოკრატები და მოღალატენი, რომელნიც ფულზედ ჰყიდდნენ ჩვენს ციხეებს და წინ მოუძლოდნენ მტრის ჯარებს სამშობლოს

ასაოხრებლად. გილიოტინაც და ტერორიც მტრისთვის გვინდოდა და არა მამულის საუკეთესო მოღვაწეთათვის, ჩემო ელოფ! ჩვენ კი აგერ ჩამდენიმე თვეა, გილიოტინით საუკეთესო პატრიოტებსა ვხოცავთ! საშინელება არ არის განა, რომ იმისთანა მამულიშვილნი, როგორც იყვნენ დანტონი, დემულენი, ერო-სეშელი, ლაკრუა, ბაზირი, ფილიპო, ვესტერმანი და სხვანი, რომელნიც ყოველთვის წინ მიუძღოდნენ ხალხს გამარჯვებისა და თავისუფლების მოპოვებისაკენ, დახოცილ იქმნენ ისე, რომ გასამართლებულიც კი არა ყოფილან. მერე ვისგან? მშიშარა კაცუნებისაგან, რომელნიც თოფის ხმაზედ პურის გოდრებში იმალებოდნენ ჯამუშებისაგან, რომელთაც ობობოს ქსელივით გააბეს მთელს საფრანგეთში თავიანთი შურისძიების და ცილისწამების ხრიკები და ინაცვალეს საუკეთესო მამულიშვილნი. განა-ლა ოდესმე ეპატიება საფრანგეთს ასეთი დევნა და ქლექა თავის საუკეთესო შვილებისა? განაღა ეპატიება როდესმე საფრანგეთს დანტონის მოკვლა? განა ჩვენი მტერი მტარვალები სიცილს არ დაიწყებდნენ, დანტონის მოკვლას რომ გაიგებდნენ? განა ჩვენი მტრები მაგისტანას გვიმტრობდნენ რასმე და მაგისტანას დაგვაკლებდნენ რასმე? განა იქნება ვინმე პატიოსანი მამულიშვილი, რომ თავში ტვინი შერჩენოდეს და გულში გრძნობა, და შეძრწუნებული არ იყოს დანტონის მოკვლით?!

კოლენი გაშტერებული შემომცქეროდა.

— მაშ შენ არა გწამს რობესპიერის სათნოება?

— რობესპიერის და სენეუსტის სათნოება?! — გავიკვირვე მე და მწარედ ჩავიციენე. — განა ავაზაკი, რომელმაც დანტონი მოკლა, შეიძლება სათნოიანი იყოს? ან რისთვის მოკლა? შენ ჩემზედ დიდი და ძლიერი რადა ხარო! დიად, რადა ხარ შენ ჩემზედ უფრო დიდსულოვანი და პატიოსანიო! მოკლეს იმიტომ, რომ გილიოტინის მაგივრად მას უნდოდა თავისუფლება და ადამიანისადმი სიბრალული დაემყარებინა ქვეყანაზე! მოკლეს იმიტომ, რომ, მინამ ის ცოცხალი იყო, ბატონობას ვერავინ გაბედავდა! ან რაში გამოიჩინეს სათნოიანობა? რა ქნეს, რა გააკეთეს ისეთი, რომ სხვებზე უკეთესნი და ძლიერნი ყოფილიყვნენ? რა განსაცდელში იყვნენ სამშობლოს გამო, რომ აგრე ცაში ავიყვანოთ და სალოცავად გავიხადოთ? იქნება ისინიც ჩვენი საწყალი ჯარისკაცებივით მტერს შეებრძოდნენ მშიერ-მწყურვალნი და შიშველ-ტიტველნი? იქნებ ისინიც სველ მიწაზედ ეყარნენ, როგორც ჩვენ ვანდემში? სრულიადაც არა!.. იმათი მოღვაწეობა ლაპარაკის მეტი არა ყოფილა რა! სიტყვით იმისთანას იტყოდნენ, რომ მჭერმეტყველებით არისტოტელეს არ ჩამოუვარდებოდნენ! ბრძანდებოდნენ თავიანთვის არხეინად და ბრძანებლობდნენ!

სჯიდნენ, ხოცავდნენ ყველას, ვინც კი მათზე უკეთესი იყო და ბოლოს გაბატონებაც მოინდომეს. ჰოდა, გადაჭრით მოგახსენებ, მე არ მინდა ბატონები! მე გილიოტინას თავისუფლება მირჩევნია! ვინც ჩვენ არ გვეთანხმება, რომ ყველას თავი გვაგადებინოთ... ეგ ხომ ყველა ყაჩაღს შეუძლია. მე რომ ვიბრძოდი და სისხლს ვანთხევდი, თავისუფლებისთვის ვიბრძოდი; ვიბრძოდი იმისთვის, რომ უფლება მომეპოვებინა — თავისუფლად გამომეტქვა და დამეწერა ყოველი ჩემი ფიქრი და აზრი! ვიბრძოდი იმისთვის, რომ ჩემი შრომა ჩემად შემრჩენოდა. და ჩემი ჭირნახული აღარავისთვის დამეთმო; აღარც ღალა გამედო, აღარც კულუხი და აღარც ბეგარა; აღარც ბატონი მყოლოდა და აღარც ვისიმე ყმად ვყოფილიყავ! სახლიც ჩემი მქონოდა, მიწაც, ვენახიც, საქონელიც! ჩემი და არა ბატონისა! რა მომადფიქრებდა, რომ ძველი ბატონების მაგივრად ახლები გამიბატონდებოდნენ, ძველებზედ ერთიათასად საზიზღარნი! სირცხვილი არ არის საფრანგეთისათვის, რომ ვიღაც ქალაქუნები გაიბატონა, რომელნიც ცოფიანი მგლებივით დაძრწიან მთელს ქვეყანაში და — შენ რომაელივით უბრალო ტანსაცმელი არ გაცვიოა, — გილიოტინისკენ გზავნიან კაცს. ამაზედ მეტი მტარვალები განა ჰყოლია როდისმე ჩვენს ქვეყანას? იქნება ეგონათ იმ უგუნურთ. ცარიელი ბრძანებით და გილიოტინის შიშით შეიძლება მთელი ხალხის გადაგვარება?

ბრაზი მომერია. კოლენი განცვიფრებული შემომტკეპროდა, თითქო პასუხს მიმზადებსო; მერე წამოდგა, წამოაელო ქუდს ხელი და წავიდა. მარგალიტა გაჰყვა და კარი დაკეტა. მეგონა, მისაყვედურებს, რომ თავი ვერ შევიკავე-მეთქი, მაგრამ პირიქით დამიმადლა კიდეც:

— მართალი ხარ, მიშელ! იმ უბედურთ თავიანთ სწორი არავინ გააჩნდათ ამ ქვეყნად. სენეჟუსტი ვნახე, აქ რომ იყო; ცით მოვლენილი ეგონა თავისი თავი, ღვთის სწორი, და არც კი კადრულობდა ჩვენებთან ლაპარაკს. რა სამაგალითო კაცები იყვნენ დანტონი და დემულენი! იმისთანა თავმდაბალნი იყვნენ, რომ ვინც ახლო არ იცნობდა; ვერც კი წარმოიდგენდა, რომ რესპუბლიკას იმათზედ უკეთესი არავინა ჰყავდა. მერე რა გულკეთილნი იყვნენ და დიდსულოვანნი! ესენი კი იმისთანა ამაყი და ამპარტავანნი იყვნენ, რობესპიერიდან მოყოლებული სულ უკანასკნელ მის მომხრემდე, რომ, თუნდა დავიფიცავ, სულ სხვა სისხლის და შთამომავლობისა ეგონათ თავისი თავი! უგულონი, უსულონი, შურიანნი! ცუდი ის არის, რომ რესპუბლიკის ბედი მისმა მტრებმა ჩაიგდეს ხელში, თორემ ღმერთმა დამიფაროს, რომ მე რობესპიერი არ მენანებოდეს!

— რას ამბობ, ქალო, იქნება გგონია ხუთი თუ ექვსი კაცი განა-

გვბდეს მთელი საფრანგეთის ცხოვრებას? საქმე ხალხია, ხალხი, რომელიც თავის შრომით ინახავს ქვეყანას და თავის მკლავით იგერებს ქვეყნის მტერს. საქმე ხალხია, რომელიც შრომობს და თავის ნაშრომს აგროვებს, თავისთვის, რასაკვირველია და რაც ხალხს შეუძენია და დაუსაკუთრებია, დარწმუნებული იყავ, მთელი ქვეყნის მტარვალებიც რომ მოვიდნენ თავიანთ მონებით, მაინც ველარ წაართმევენ; ერთ მტკაველ მიწასაც ველარავინ წაგვართმევენ და თუ წაგვართვა, ჯერ ჩვენ უნდა ამოგვხოცოს ყველანი და მერმე ჩვენს საკუთრებას დაეპატრონოს! დღეს ესეც გვეყოფა; დანარჩენსაც შევიძენთ ნელ-ნელა. ვეცდებით მეტი განათლება მივალდებინოთ ჩვენს შვილებს, ვიდრე ჩვენა გვაქვს და შევავნებინოთ, რა ძვირად გვიღირს ჩვენ ჩვენი მამული. არა მგონია, ჩვენი შვილები ჩვენზედ უგუნურნი ან ლაჩრები იყვნენ, და, მაშასადამე, კიდევაც შეიძენენ, თორემ დაკლებით კი არავის რას დააკლებინებენ.

მეორე დღეს მთელს ქალაქს მოედო ელოფის ნაამბობი და უეცრად შეიცვალა ყველა: ვინც მანამდე ყელმოდერებული ბრძანდებოდა, სადღაც მიიშალა შერცხვენილი და შეშინებული; და ვინც იმალებოდნენ, ახლა დამშვიდებულნი დაიარებოდნენ ქალაქში. ტერორი კი არ გათავებულა ამით. მართალია, ნანსიდან, მეციდან და სხვა ქალაქებიდან მრავალი პატიმარი გამოეშვათ, რომელნიც რობესპიერის ბატონობის დროს დაეჭირათ და მოსაკლავად ჰყავდათ დამწყვდეული. მათგან ორმოცდაათ კაცამდე ჯერ მე ვიცნობდი და ყველანი ერთხმად გაიძახოდნენ, რობესპიერი რომ არ მოეკლათ, ჩვენ სიკვდილისაგან ვერა გვიხსნიდა რაო. მაგრამ უბედურება ის იყო, რომ ესენი უარესს ჩადიდნენ: მგონი კმაყოფილნი უნდა ყოფილიყვნენ, რომ სიკვდილს გადარჩნენ! მგონი უნდა დამშვიდებულიყვნენ! მაგრამ არა! როგორც ჩვენა გვხოცეს, ისე ახლა ჩვენ უნდა ვხოცოთ ჩვენი მოწინააღმდეგენიო, და დაუწყეს იაკობელებს დევნა და ხოცვა. იაკობელებს არა მარტო რობესპიერის მომხრეებს უწოდებდნენ, არამედ დანტონისტებსაც, ებერტიტებსაც და ერთობ ყველას, ვინც კი რესპუბლიკის მომხრე იყო. ერთგულმა მამულიშვილებმა მაშინვე გაიგეს, ვინ იყო ამის მიზეზი, და შეთანხმდნენ და შეერთდნენ. ამიტომ არის, რომ დღესაც არავისა სწყინს, იაკობელი რომ უწოდოთ, თუმცა რობესპიერის მოქმედებისა არც თავი მოსწონს და არც ბოლო. მაშინ რომ ცოცხალნი ყოფილიყვნენ დანტონი, დემულენი, ვესტერმანი და სხვანი, იქნება დაემშვიდებინათ გამარჯვებულნი და შეეყენებინათ იმოდენა სისხლის ღვრა.

მაინცდამაინც რობესპიერის სიკვდილმა შეაერთა ყველა პატრიოტი. ტალიენი, ფუჟე, ბარრა, ფრერონი, რომელთაც რობესპიე-

რი მოკლეს მარტო იმ განძრახვით, რომ თვით აღმადლებულიყვნენ და არა რესპუბლიკის გასაძლიერებლად, ყველამ განიციხა და ათვალწუნა; მათი საქციელი სწორედ რომ ქურდული იყო და ამის საბუთებსაც მოგახსენებთ შემდეგში, რადგან ჩემს ამბავს ისე ვერ მოგიხსრობთ, რომ ისიც არ აგიწეროთ, რაც ქვეყანას შეეხება. კაცი მარტო თავისთვის კი არა, ხალხისთვის ცხოვრობს და, ვისაც თავისი პირადი საქმეების გარდა არა ახსოვს რა, ღირსი არ არის განათლებული ერის შვილად იხსენიებოდეს.

IV

ისე კარგად მოაწყო მარგალიტამ ჩვენი ვაჭრობა, რომ საქმე თავის თავად მიმდინარეობდა; საქონელი იყიდებოდა, ფული შემოდოდა. როცა კაცი შინა ზის და დუქანში არა ფლანგავს ფულებს, როცა კმაყოფილდება თავისი ოჯახით და თითონვე უვლის თავის საქმეს, ყველაფერი რიგზედ აქვს და თითონაც ბედნიერია და სხვანაც კმაყოფილი ჰყავს.

ჩვენც ბედნიერნი ვიყავით, მაგრამ ხალხი კი მეტიმეტად გაჭირვებული იყო. იმისთანა გაჭირვებული თავის დღეში აღარსად მინახავს ხალხი, როგორადაც რობესპიერის მოკვლის შემდეგ იყო. გაზეთებში კი პარიზიდან სულ ახალ-ახალ დღესასწაულების და ლხინის ამბებს სწერდნენ; გახარებული პარიზი ქეიფობდა, ცეკვავდა, ახალს მოდებს მისდევდა. ხუთი თუ ექვსი გამოჩენილი გვარის ქალი ძველებურ, დიდკაცურ, ლხინის და დროს ტარების ხელახლად შემოღებას ცდილობდა და ლხინთან ერთად ძველებურ ზნე-ჩვეულების აღდგენას. ხალხი კი შიმშილით წყდებოდა, რადგან ქვეყნის მართვა იმათ ეგდოთ ხელთ, ვისაც ქვეყანა და ქვეყნის ბედი ყოველთვის ფეხზედ ეკიდათ: რაც კი პური შემოდოდა, ერთი-ორი მდიდარი ვაჭარი ყიდულობდა და მერმე საშინელ ფასად ჰყიდდა; საჭირო სანოვაგეზედ დადებული უმაღლესი ფასი, რომლის ზევით ვაჭარს არაფრის გაყიდვა არ შეეძლო, გაუქმებული იყო; ასიგნაციებს გასავალი აღარ ჰქონდა; რაკი შიში აღარავისი ჰქონდათ, ჟირონდელებიც დაბრუნდნენ და გახიზნულებიც; მათ მოჰყვნენ ბერები და მღვდლები, რომელნიც თავთავიანთ მონასტრებს და ეკლესიებს თხოულობდნენ; ვისაც კი ქვეყნის მფარველი კომიტეტისა როდისმე რაიმე ბრძანება აესრულებინა, ყველანი დასჯილ იქნენ; კლუბები ყველგან დაკეტეს... ერთი სიტყვით, გამარჯვებულნი ისევ რევოლიუციის და რესპუბლიკის მოწინააღმდეგენი იყვნენ და დაუბრუნებლად ყვიროდნენ და იმუქრობდნენ. ქვეყანა უპატრონოდ იყო და ეშმაკი ეპატ-

რონებოდა. ხალხი უპატრონოდ იყო და საქონელთან ერთად შიმშილით იხოცებოდა.

აგერ ზამთარიც დადგა. ახლაც არ ვიცი, ღმერთმანი, როგორ მოხდა, რომ ისე დაიმშა ქვეყანა. იმ ზაფხულს თითქმის მთელი საფრანგეთი გადმოვიარე ფეხით და ყველგან ხეირიანი მოსავეალი იყო. როგორ წარმოვიდგინო, რომ უცბად შეექამოს გაფრთხილებულ ხალხს მთელი წლის სარჩო და საზამთროდ არა შეენახოს რა? ამბობენ, შიმშილის მიზეზი უმაღლესი ფასის გაუქმება და რობესპიერის სიკვდილით გამოწვეული არეულობა იყო; ვითომ წინაღვე შეთანხმებულიყვნენ რობესპიერის მკვლელნი, რომელთაც მე ქურდები ვუწოდე, და მეფის მომხრენი: — ხალხი დაეაშოთ, რესპუბლიკის წინააღმდეგ ავაჯანყოთ და ძველებურად მეფე და ბატონები მოვათხოვნინოთ, რომელნიც ბერების ლოცვით და კურთხევით განაგებენ ქვეყანას და, როცა უნდათ, მზეს ამოიყვანენ, როცა არა და ავდარსაო!

ამისი რა მოგახსენოთ, და ის კი კარგად ვიცი, რომ რობესპიერის მკვლელებმა სიესის წინადადებისამებრ დაიბარეს ჟირონდელეები; ეს კიდევ არაფერი, ადგნენ და მეფის მომხრეებს დაუკავშირდნენ; აპყვნენ გარყვნილ ქალებს — თავიანთ გაზეთებში ძალიან თავიც მოჰქონდათ ამ გარყვნილებით — და იმდენი ქნეს, ისე შეარცხვინეს რესპუბლიკის სახელი, ისე შეაწუხეს შიმშილით ხალხი, რომ პარიზელი ხალხის ერთ წილს საერო კრებისთვის მეფის დასმა ეთხოვა და თანაც გამოეცხადებინა, ძალიან ვნანობთ, რომ რევოლუციას მივუდევით და მხარი მივეციითო. აი, სადამდის მიიყვანეს ქვეყნის მტრებმა გაუნათლებელი ხალხი ეშმაკობით, ქეიფებით, გარყვნილებით, სამარცხვინო უზნეო შოღებით და სხვა მრავალი სისაძაგლით, რომელსაც უგუნურნი ბრმად ბაძავენ და ის კი არ იციან, რომ ამით გზას უხსნიან იმ გაიძვერებს, რომელნიც თავიანთ ბიწიერებას სათნოებად ასაღებენ! გაბატონდებიან ეს ქურდბაცაცეები, ნამდვილ პატროსნებას მასხარად იგდებენ და ბოლოს თავიანთ საწადელსაც მიაღწევენ — ხელს ჩაურევენ საქვეყნო ხაზინაში და დაიწყებენ ქეიფს და ჩვენი ფულით ჩვენივე ქალების გარყვანას.

ბევრი საზიზლარი კაცი გამდიდრდა 94 წ. თითო აბაზად იძენდნენ ხუთმანეთიან ასიგნაციებს და ამ ასიგნაციებით მართებლობისაგან მამულებს ყიდულობდნენ; ან არა და ძველ ვალებს იხდიდნენ, რომელშიაც მათ ნაღდი ფული მიეღოთ. საუკუნოდ დაიღუპებოდა ყოველივე რესპუბლიკური, ჯარიც რომ ამ გზას დასდგომოდა და გარყვნილებას მისცემოდა. ჩვენდა საბედნიეროდ ჯარი ნამდვილად რესპუბლიკური გამოგვადგა და არ უმტყუნა თავის მოვალეობას.

მოკლეს თუ არა რობესპიერი, მისმა მომხრეებმა მაშინვე გამოცვალეს ქვეყნის მფარველი კომიტეტის წევრები და თავიანთი კაცები ჩააყენეს, მაგრამ კარნოს, პრიორს, კოტდორს, და რობერ ლინდეს კი ვერა მოუხერხეს რა, რადგან ისინი იმისთანა კაცები იყვნენ, რომ მთასავით ურყევლად დარჩებოდნენ ჯარში, რაც უნდა არეულობა და ცვლილება მომხდარიყო საფრანგეთში; საკვირველი მოსაქმენი იყვნენ და სულ არაარიდან შექმნიდნენ ხოლმე ჯარს და მის სამყოფ იარაღს და სურსათს, დღე და დამ სულ თავიანთ ვალდებულებაზედ ფიქრობდნენ და იმისთანა პატივისცემა ჰქონდა მათი ხალხსაც და ჯარსაც, რომ მათი გამოცვლა ვიღაცა კაცუნებს არ შეეძლოთ. კიდევაც ამ სამაგალითო მამულიშვილებმა იხსნეს რესპუბლიკა, თორემ ბოლოს მოუღებდნენ მტრები.

და სწორედ იმ დროს, როდესაც შინ ტალიენი, ფრერონი ბარრა და სხვანი გამეფდნენ და ყველგან და ყველაში გარყვნილება და გახრწნილება შეიტანეს, როდესაც ქუჩის ბიჭებს ნება ჰქონდათ მიცემული, საცა მოასწროთ, ხოცეთ პატრიოტებიო; როდესაც ყველგან ქეიფი და დროს ტარება იყო და თან უმაგალითო გარყვნილება, ჩვენი რესპუბლიკური ჯარები უფრო და უფრო გამარჯვებულნი მიიწევდნენ უცხოეთისკენ.

სწორედ იმ ზამთარს განდევნეს ჩვენი ქვეყნიდან უურდანმა და პიშეგრუმ გერმანელები და ინგლისელები, შევიდნენ პოლანდიაში, დაიჭირეს რეინის მთელი მარცხენა მხარე, ბაზელიდან ზღვამდე: საშინელი ზამთარი იყო, ყინავდა ისე, რომ გაყინული ყვავები ცვიოდნენ მიწაზედ და ჩვენი ჯარები კი სულ წინ მიიწევდნენ. იმისთანა ძლევამოსილნი იყვნენ, რომ შეუძლებელი აღარა გააჩნდათ რა: ერთხელ ცხენებით შედგნენ გაყინულ რეინზედ და ისე დაიმორჩილეს მტრის ხომალდები.

საშინელი ზამთარი იდგა. ოთხშაბათ-პარასკევობით, როდესაც ბაზრობას ჩამოსული ხალხი ბუზივით ირეოდა ჩვენს დუქანში და ქარს თითქმის დაზგამდე შემოჰქონდა თოვლი, მომაგონდებოდა ხოლმე ჩემი ამხანაგები, და ვიტყვოდი:

— როგორი სიცივეა! როგორა ყინავს! ჩვენი ჯარები კი ფეხშიშველნი იბრძვიან მტერთან და მაინც გამარჯვებულნი არიან!

ზოგი თამბაქოს თხოულობდა, ზოგი მარილს. მეც ვუწონიდი, ქაღალდში ვუხვევდი და გონებით კი სულ სხვაგან ვიყავ: მომაგონდებოდა მაინცი, ნანსი, სავენე. მომაგონდებოდა მაშინდელი ყინვასიცივე. მაგრამ როგორ შეედრებოდა ის სიცივე 94 წლისას: იმ წელს იმისთანა ყინვები დაიჭირა, რომ მარანში ღვინოს და, ასე გასინჯეთ, არაყსაც კი ყინავდა.

დალამდებოდა, დაკეტილი დუქანს, დარაბებს გავამაგრებდით და გულის გამამხიარულებელ ბუნხარს შემოვუსხდებოდით. მარგალიტა შავ ფულსა თვლიდა, მე მანეთ-მანეთად ვახვევდი ქალაღში და ჩემი ძმა სტეფანე ხმამალა გაზეთს კითხულობდა. ისე გვიხაროდა ჩვენი ჯარების გამარჯვება, თითქო რესპუბლიკის დღეგრძელობა მართო ჯარებზედ ყოფილიყოს დამოკიდებული და შინაური მტერი აღარავინ გვყოლოდეს. წაიკითხავდა გაზეთში აწერილს ჩვენი ჯარების გამარჯვებას, უტრახტის, არნიემის, ამსტერდამის და სხვა ქალაქების აღებას, ჩვენი ჯარისკაცების მდგარ ვაჟკაცობას და აგვემღვრევოდა გული. მოგვაგონდებოდა, რომ საწყალ ბიჭებს ფეხსაცმელის ნაცვლად ჩალაში აქვთ ფეხი გახვეული, თვალს ცრემლი მოგვერეოდა, მაგრამ მაინც იმედიანად შევყურებდით მომავალს, მეტადრე მარგალიტა:

— ბევრიც რომ იძახონ მეფის მომხრეებმა, ადამიანის უფლებანი მოსპობილ უნდა იქმნენ და ძველებურად ბატონყმობა უნდა დამყარდესო, ველარას გააწყობენ, რადგან რესპუბლიკა ყველგან გამარჯვებული რჩება და მტარვალნი გაქცევის მეტს ველარას ახერხებენ.

და სამივენი ერთხმად შევეძახებდით ხოლმე:

— რესპუბლიკას გაუმარჯოს! ერთს და განუყოფელ რესპუბლიკას!

რაც კი ფალსბურგში იაკობელები იყვნენ, თვით ელოფ კოლენიც, რომელიც მაშინვე შემირიგდა, რადგან იცოდა, რომ, რაც ვუთხარი, წრფელი გულით ვუთხარი, ყველანი ჩვენსა იკრიბებოდნენ სადამოობით, ჩვენს სამკითხველოში. ჩვენი სამკითხველოდან გავიდოდა ხოლმე ყოველი ახალი ამბავი, ჩვენს სამკითხველოში შეკრებილნი შეჰხაროდნენ მარსელური სიმღერით ყოველ გამარჯვებას ჩვენი ჯარისას და ჩვენსავე სამკითხველოში შეაჩვენებდნენ ყოველ მტარვალს და მტერს თავისუფლებისას. რას იზამთ? მგონი სისხლში გვქონდა თავისუფლების სიყვარული და მასთან ერთად მარსელური სიმღერისა! დიდი ხანი გავიდა მას შემდეგ, მაგრამ ეხლაც, როგორადაც მაშინ, როცა კი ჩვენს სახლში მარსელური არ გაისმის, მთელმა ქალაქმა იცის, რომ გამარჯვება მეფის მომხრეებს დარჩენიათ.

იმ ზამთარში ისე მოვაგვარეთ საქმე, რომ სუყველაფერი გავიჩინეთ გასაყიდი და გარდა ამისა დიდძალი ნისია გავეცით ფალსბურგელებს და გარეშემო სოფლელებს. ხომ იტყვიან, ნისიად ვაჭრობა საქმის დაღუპვა არისო, მაგრამ, როდესაც ხედავ, რა გაჭირებაში იმყოფება სრულიად პატიოსანი და გამრჯე ხელმოკლე კაცი,

ქვის გული უნდა გქონდეს, რომ არ ანისიავო მისთვის აუცილებლად საჭირო საქონელი; ეგ შეუძლებელია! ჩვენს მუშტარს ჩვენი ემართა, ჩვენ კიდევი სიმონისა გვემართა თითქმის იმოდენივე; მაგრამ სიმონი არ გვაწუხებდა; პირიქით, თითონვე გვწერდა, ნუ შესწუხდებით, ნუ აჩქარდებით, სამი თვის შემდეგაც რომ ჩამაბაროთ, მითაც არა წახდება რაო; ვიცი, რომ ძალიან ცუდი დრო დაგვიდგა და სუყველა გაჭირებულიაო. თანაც გვთხოვდა, თუ საქონელი გაკლიათ რამე: შემატყობინეთ და გაახლებთო.

პირველ მარტს ვიანგარიშეთ ჩვენ აღებ-მიცემა: გვინდოდა გავგეგო, რა გექონდა გაყიდული და რა გვრჩებოდა გასაყიდი; რა გექონდა შემოსავალი და რა იყო ხარჯი; მოგება გვრჩებოდა, თუ ზარალის მეტი არა იყო რა. ამ ანგარიშიდან გავიგებდით, უნდა დაგვეკეტა ჩვენი ღუქანი, როგორც საზარალო, თუ განგვეგრძო და გავგვეფართოვებინა. თავისი მტერი უნდა იყოს კაცი, რომ ანგარიშს გაუბოლდეს და თვალდახუჭულივით განაგებდეს საქმეს იმ დრომდე, ვიდრე შემოსავალი ველარ გასწვდება გასაყალს, ვალები წამოედება და ბოქაული მიადგება კარხედ საქონლის ასაწერად და საჯარო ვაჭრობით გასაყიდად.

ვიანგარიშეთ და სიხარულით დავრწმუნდით, რომ სიმონის და მეწიგნეების ვალები რომ გავგვესტუმრებინა, კიდევაც დიდი მოგება გვრჩებოდა. იმისთანა გაჭირებაში რომ მოგებიანად ვივაჭრეთ, კარგ წელიწადში ხომ ერთიასად მეტს სარგებლობას ვნახავდით.

მამაჩემი და ნათლიაჩემი ყოველთვის ჩამოდიოდნენ კვირაში ერთხელ ჩვენს სანახავად; მამაჩემი კვირაობით ყოველთვის ჩვენთან იყო სადილად. საღამოზედ შინ წასასვლელად რომ გაემზადებოდა, წამოდგებოდა მარგალიტა და ერთ პურს და ცოტა რამ ხორცს გაუხვევდა თან გასატანებლად; რომ გავვჭირვებოდა, ჩვენ დაგვამშვევდა და თავის მამამთილს კი ხელცარიელს არ გაისტუმრებდა. მამაჩემი ყოველთვის ერთსა და იმავე დროს მოდიოდა, დილით, და შორიდანვე სიხარული და ღიმილი ეტყობოდა სახეზედ. ქალაქში დიდი და პატარა ყველა იცნობდა და ყველა სალამს აძლევდა; მეტადრე ბავშვები, რომელნიც მხიარულად უძახდნენ:

— პაპას გაუმარჯოს!

ისიც სიცილით და ალერსით პასუხს აძლევდა. მერე შემოაღებდა ჩვენს კარს და შემოგვძახებდა:

— ხომ კარგადა ხართ, მიშელ, მარგალიტა?

— კარგად გახლავართ, მამა.

და გადავეხვევოდით ერთმანეთს. მერე შედგებოდა, თოვლს გაიბერტყავდა და ისე შემოვიდოდა შინ.

ჯერ სამკითხველოში შევიდოდა, ბუხართან ხელებს გაითბობდა და თან მარგალიტას შეჰხაროდა. მამაჩემმა იცოდა, რომ მოლოდინში ვიყავით, იმ ნეტარების მოლოდინში, რომლის სწორი სხვა არა მოაბოვება რა ამ წუთისოფელში. არა მგონია იმ დროში სხვაც ყოფილიყო ვინმე იმისთანა ბედნიერი, როგორაც მამაჩემი იყო: რომ არ შერცხვენოდა, ცეკვას და სიმღერას დაიწყებდა; სიხარული-საგან მორეულ ცრემლს ველარ იმაგრებდა და ღმერთს მადლობას სწირავდა:

— გმადლობ შენ ღმერთო, რომ ასეთი ბედნიერება მომანიჭე და ამ სიბერის დროს შეილიშვილითაც გამახარე!

სადღა ახსოვდა ჩვენი მოვანზე რობენი, ბეგარა, მთელი ორმოცდაათი წლის შიმშილი და ვაება, ნიკოლოზის წასვლა, დედაჩემის ჩხუბები და სხვა და სხვა! ჩვენს მეტი იმას აღარავინ უნდოდა: სტეფანე თითქმის ვაჟაკი იყო, მე შინა ვყავდი და მარგალიტა ჩემად ეგულებოდა, სხვა ქვეყანაზედ იმას აღარა აწუხებდა რა.

ხანდახან შოველის წერილსაც მივიღებდით ხოლმე და უნდა გენახათ, რა გახარებული იყო მაშინ მარგალიტა! სამწუხაროდ ძალიან მოკლე წერილებს გვიგზავნიდა; ძველებურად დაწერილებით აღარას გვატყობინებდა და უფრო ხშირად რამდენიმე სიტყვას გვწერდა:

„ბევრს გაკოცებთ, შვილებო! თქვენმა ამბავმა ძალიან მასიამოვნა. იმედი მაქვს, კიდევ ველირსები თქვენთან ყოფნას. მეჩქარება, საშინელ ყოფაშია ჩვენი საქმე. მომიკითხეთ ივანე ლერუ, კოლენი და სხვ.“ -

ცხადად ეტყობოდა, რომ არ ენდობოდა წერილს, ეშინოდა, ვერა ბედავდა ყველაფერი მოეწერა; მაგრამ უარარაობას ესა სჯობდა: ის მაინც ვიცოდით, რომ კარგად იყო; და რადგან ალპის ჯარიდან პარიზში უნდა დაბრუნებულიყო, იმედი გვქონდა, გზად ჩვენკენ გამოივლის და მაშინ მაინცა ვნახავთ.

1795 წ. მარტის უკანასკნელ დღეს დაიბადა ჩვენი პირველი ბავშვი. იმისთანა ზორბა ბიჭი იყო, იმისთანა ჩასუქებული და ლამაზი, რომ მტერს თვალს დაუყენებდა. დიდი ტანჯვის და მღელვარების შემდეგ, როდესაც ბავშვი ზეწარში გახვეული დაეინახე თავის დედის ხელში, როგორაც უცბათ დამიმშვიდდა გული, თითქო თვით უზენაესი არსება დაესწრო ჩემი ბიჭის დაბადებას და ჩემს მისდამი მოვალეობას მახარებდა:

— მე მოგეცი შენ ეს ბავშვი, რათა კეთილ მამულიშვილად აღზარდო იგი და თავისუფლების მუშაკად.

და აღთქმასა ვდებდი ჩემს გულში, შეძლებისდა გვარად კეთილ მამულიშვილად ამეზარდა ჩემი პირმშო. მარგალიტაც მხიარულად

დაპხაროდა, თუმცა არას ამბობდა. მოხუცებული ბებია და სხვა დედაკაცები კი ალტაცებულნი იყვნენ ბავშვის სილამაზით და ხმამალა გაიძახოდნენ:

— ოჰ, რა მშვენიერი რამ არის! რამოდენა რამ არის!

ლუქანში სავაჭროდ მოსულთ რომ გაეგოთ, ვაჟი ჰყავსო, მოლოცვა შემომითვალეს. ცოტა ხანს უკან მამაჩემი და ნათლიაჩემიც შემოვიდნენ.

— ჰა, ყოჩაღ, მიშელ! — მიყვიროდა შორიდანვე ნათლიაჩემი. — ემაგრე უნდა, აი!

მამაჩემმა ერთი კი დახედა პატარას და ქვითინი დაიწყო. მოვიდა ჯერ მე გადამკოცნა, მერმე მარგალიტა.

— ახლა კი აღარა აკლია რა ჩვენს ბედნიერებას, არა შვილო, — ეუბნებოდა თავის რძალს, ნეტავი ერთი მალე წამოიზარდოს, რომ ერთად წავიდეთ ხოლმე სასეირნოდ.

ადვილი წარმოსადგენია, რა ბედნიერი ვიქნებოდით ყველანი. პირველი შვილი შუქს მოჰფენს ოჯახს. მარგალიტას მეტი სიხარულისაგან ენა ჩაუვარდა და ხმას ვეღარ იღებდა. ერთმანეთს ვუყურებდით გაჩუმებულნი და როცა ენა ამოიდგა, პირველად ესა სთქვა:

— შენა გგავს, მიშელ! რა კმაყოფილია მამაშენი!

კიდევ ბევრ რასმე მოგახსენებდით იმ დღისას, მაგრამ როგორ ვაგრძნობინო ჩემი ნეტარება იმას, ვისაც შვილი არა ჰყოლია ღირსეულ ცოლისაგან? და ვისაც შვილი ჰყავს, მე ახალს ვერაფერს ვეტყვი.

V

ომი ყველგან გათავებული გვექონდა; ბელგია ჩვენ დავიჭირეთ. ჰოლანდია, რეინის მარცხენა მხარე, ნაწილი პიემონტისა და ესპანიისა. სხვა მეფეები მორიგებას გვეხვეწებოდნენ. თვით შარტიც კი, ვანდეს ქაობებში მიმალული, უკიდურეს მდგომარეობამდე მიეყვანათ ჩვენს ჯარებს და ცოცხალი დავეჭირათ. რესპუბლიკამ აპატია აჯანყებულთ და ნება მისცა თავთავიანთ სოფლებში დაბრუნებულიყვნენ და თავიანთ სახლ-კარისთვის და მამულისთვის მოევლათ; იმასაც კი დაჰპირდა, ნაზარალევს გადაგიხდით, ოღონდ დამშვიდდით და დაცხრითო. რა უნდა მოეთხოვათ ამაზედ მეტი ვანდელებს? გვეგონა, გონებაზედ მოვლენ და ამ მხრივ მაინც დამშვიდებულნი ვიქნებითო. მაგრამ აქაც არ მოისვენეს იმ ხელმწიფეებმა, რომელთაც ამ სამი წლის წინად საფრანგეთის განაწილება ნებავდათ, და ახლა პოლონეთს ეცნენ. გაზეთებში სულ რუ-

სეთის ხელმწიფის ეკატერინეს ამბებსა სწერდნენ, გენერალ სუვო-როვისას და პოლონელ გმირის კოსტიუშკოსას.

კოსტიუშკო სჯობნიდა რუსებს, მაგრამ მერე ამბავი მოვიდა რუსებისაგან პრაგელების ამოყლელისა. შემდეგ ამისა პოლონეთის თავისუფლების დამცველთა დამარცხება მოხდა და ბოლოს შეკავ-შირებულ ხელმწიფეთა განცხადება: „რადგან პოლონელნი ვერ შეთანხმებულან და ღირსეული მართებლობა ვერ დაუწესებიათ, იძულებულნი ვართ საზოგადოებრივი სიკეთის დასამყარებლად პოლონეთი სამად გავიყოთ“. და რომელი ქურდი იქნება, უუსაძაგ-ლესი ქურდი, რომელიც ციხეში ზის სახლების გატეხის და გაქურ-დვისათვის, რომ სწორედ მაგ ლექსით არ იმართლებდეს თავს? რას იზამთ? უბრალო მომაკვდავის ქურდობა ქურდობაა, და პრუსიის, ავსტრიის, რუსეთის ხელმწიფეთა საქციელი კი... საზოგადოებრივი სიკეთის დამყარება! მღვდლებმა და ბერებმა მადლობა შესწირეს ღმერთს ამისთანა სიკეთისათვის და შეევედრნენ, ღვგრძელად ამყოფე დიდებული ხელმწიფენიო!

ცოტა რამ დაფიქრება, და ყველა მიხვდებოდა, რომ ამ მტარვალთ არ უნდოდათ, რომ სადმე თავისუფალი ხალხი ყოფილიყო და, რადგან პოლონეთი საფრანგეთს ეხმარებოდა, ადგნენ და ეს ერთად-ერთი ჩვენი მოსარჩლეც მიწასთან გაასწორეს, რომ მერე უფრო ადვილად დაემარცხებინათ თვით საფრანგეთი. ცხადი იყო, რომ თავისუფალ რესპუბლიკას და მტარვალ ხელმწიფეთა შორის მორი-გება შეუძლებელი იქნებოდა. ან მთელი ევროპა უნდა განთავისუფ-ლებულიყო, ან ჩვენი კვლავ მონებად გავმხდარიყავით. და სწორედ ამ დროს, როდესაც ასე გამწვავებული იყო ჩვენი მდგომარეობა, საფრანგეთის მართებლობა მეფის მომხრეთ ჩაიგდეს ხელში და მათთან ერთად ჟირონდელებმა, რომელნიც რობესპიერის სიკვდილის შემდეგ ისევ პარიზში დაბრუნდნენ და კონვენტში გამოიჭიშნენ. თავისუფლების მტერი ხელმწიფენი და ჩვენი ჟირონდელები დიდი მე-გობრები ბრძანდებოდნენ და ერთად სთხრიდნენ რესპუბლიკისათ-ვის სამარეს. სწორედ ამიტომ ცდილობდნენ ხალხის დამშვებასაც: უნდოდათ დაემშათ ხალხი, აეჯანყებინათ და ეთქვათ:

— განა ასეთ გაჭირვებაში იქნებოდით, თქვე უბედურნო, მეფე რომ გყოლოდათ! უცხოეთს მოკურიგდებოდით, ყოველი მხრიდან პური შემოვიდოდა, ვაჭრობა და მრეწველობა გაჩაღდებოდა, მუშა კაცი საქმეს იშოვიდა და სხვ. და სხვ.

და მიმდევარიც ბეგრი ჰყავდათ, სახელდობრ რობესპიერის მკვ-ლელნი, ვაჭრები და სოფდაგრები. მთიულნი კიდევაც იყვნენ კონ-ვენტში, მაგრამ თითო-ოროლა და მათი ხმა აღარც კი ისმოდა მო-

წინააღმდეგე უმრავლესობაში; აღარც ლაპარაკი შეეძლოთ, აღარც ხალხის დახმარება. თვით კარნოც კი არ დაინდეს და მის ადგილზე ქვეყნის მფარველი კომიტეტის წევრად ჟირონდელი ობრი ჩააყენეს, რომელმაც გადააყენა ყველა პატრიოტი გენერალი. ეს ვაჟბატონიც სწორედ ისე იქცეოდა, როგორადაც მეფე ლუი XVI მინისტრი და საძღვარზედ, ყველა ციხეში, მეფის მომხრე კაცებს გზავნიდა უფროსად. ყველა ხედავდა ამას, მაგრამ რა გვექნა? ძალა ჩვენს მტერთ ჰქონდათ იმ უამად და აქა-იქ იმდენად წათამამდნენ, რომ სრულიად დაურიდებლად ხოცავდნენ მთიულთ.

ჩემი ბიჭიკოს დაბადების მეორე დღეს მოიტანეს გაზეთებმა ამბავი, დამშეული ხალხი აიშალა, კონვენტს შეუვარდა და პურის თხოვნა დაუწყო. „ქურდებმა“, ესე იგი რობესპიერის მკვლევლებმა, ცოცხებით დაირიქეს საერო კრების დარბაზიდან და ახლა აშლილია მთელი ხალხი და შეძლებულთ ებრძვისო.

იმავე გაზეთებში ეწერა, ხალხის აჯანყებით ისარგებლა კონვენტმა და კოლოდერბუა, ბილიოვარანი და ბარრერი კალედონიაში გაისტუმრა, ისე რომ არც კი გაუსამართლებია. გარდა ამისა დაიჭირა და ციხეში ჩაყარა კამბონი, მენიე, მოსე ბაილი და ყველა ისინი, ვინც მტერს წინ აღუდგა და არ შეალახვინა საფრანგეთი. ქვეყნის ერთგულნი შვილნი ან განდევნილნი იყვნენ, ან ციხეში ლებოდნენ და ბურთი და მოედანი იმათ რჩებოდათ, რომელნიც ქვეყანას კი არა, თავის თავს და თავის სულს გაჰყიდდნენ, მუშტარი რომ ეშოვათ!

მართალია, ჩემს ოჯახში ვიყავ იმ დღეს, გარშემო ჩემი საყვარელი ცოლ-შვილი, მამა და მეგობრები მეხვივნენ, მაგრამ დიდი სიამოვნებით გავტენიდი ჩემს თოფს და კვლავ ჯარში წავიდოდი მოღალატეთა დასასჯელად. და განა მარტო მე? ბევრი სხვა იყო მზად და ბრძანებასლა ელოდა. მაგრამ ჩვენი უბედურებაც ის იყო, რომ მბრძანებელი აღარავინ გვყავდა: ხალხის უერთგულესი შვილნი, ხალხის სულის ჩამდგმელნი და მით მისი მბრძანებელნი, გილიოტინას დაეხოცა და უმწყემსოდ დარჩენილიყო ცხოვარი.

მამინ კი ცხადად დაინახეს პატრიოტებმა, რა გზასაც დასდგომოდა ჩვენი მართებლობა. პირად მე ჩემს სიცოცხლეს არ დავიშურებდი, რომ გამეცოცხლებინა რობესპიერი და სენჟუსტი, რომელნიც ჭირივით მძულდა; და ელოფ კოლენი კიდევ თავისას არ დაინანებდა, ოღონდ ქვეყანას კვლავ ჰყოლოდა იმისთანა თავგანწირული და ერთგული მოსამსახურენი, როგორნიც იყვნენ დანტონი და დემულენი, თუმცა ორივეს „გარყვნილებს“ უწოდებდა. მაგრამ რაღა ღროს სინანული და წუხილი იყო? ერთი ანდაზისა არ იყოს,

ჩვენი გზაც მაშინ გამოჩნდა, როდესაც ურემი გადაგვიბრუნდა.

რამდენიმე დღის შემდეგ „ქურდებმა“, ქირონდლებმა და მეფის მომხრეებმა თავი მოსპირეს გილიოტინით ფუკიე-ტანვილს, რევოლუციური სასამართლოს ბრალმდებელს, და თხუთმეტ მსაჯულს. დასახოცად რომ მიჰყავდათ ეს უბედურნი, თან აუარებელი ჯამუშები მისდევდნენ და დასცინოდნენ:

— ეხლა რაღას იტყვი, გილიოტინით რომ კვდები?

და ფუკიე უპასუხებდა:

— შენა, უტვინო ხალხო, შენ რომ შიმშილით კვდები!

და მართალსაც ეუბნებოდა, რადგან რესპუბლიკის მოწინააღმდეგეთ ისე მოეწყობოთ საქმე, რომ პარიზში გასაყიდი აღარა შედიოდა რა. ხაბაზებში გამომცხვარი პური თითო ლუკმა არ შეხვდებოდა ხოლმე ხალხს. ჩვენში კი, ღვთის მადლით, ძალიან კარგი მოსავალი იყო და შიმშილი აღარსად იყო. რასაკვირველია, პარიზშიც ასე იქნებოდა, მეფის მომხრეთ რომ არ გაეძვირებინათ პური: ყოველი ღონისძიებით ცდილობდნენ ხალხის აჯანყებას, რომ მისდგომოდნენ და იმ არეულობაში თავიანთი მტრის ჯავრიც ეყარათ და საფრანგეთის სრული ბატონი და მბრძანებელიც გამხდარიყვნენ. და ხალხის აჯანყება კი შიმშილით შეიძლებოდა.

აჯანყდა კიდეც დამშვეული ხალხი 20 მაისს 1795 წ. აიშალა პარიზელი ხალხი — კაცი, ქალი, ბავშვი და ხალხთან ერთად რამდენიმე რაზმი წმინდა-ანტონის უბნელი ერის მცველი ჯარი; აიშალა ხალხი და საშინელი ყვირილით შევიდა საერო კრების დარბაზში:

— პური და 93 წლის კონსტიტუცია!

თავადი ბუასსი დანგლა სრული ექვსი საათი იჯდა თავმჯდომარის ადგილზე და არც მოღერებულ ცულებს და ჯოხებს შეუშინდა, არც შუბებს და ხიშტებს. იმის ადგილზე რომ თავადი არტუა ყოფილიყო, მოკვურცხლავდა და ღვთის ანაბარად მიატოვებდა იქაურობას. ბუასსი დანგლა იმდენად გამბედავი და უშიშარი იყო, რომ მდებლად თავი დაუტკრა შუბზედ ამართულ დეპუტატის ფერის გასისხლიანებულ თავს, რომლითაც ხალხი მის შეშინებას ცდილობდა.

სამი დღე მღელვარებდა ხალხი. კონვენტმა ბევრი რამ დაადგინა ხალხის სურვილისამებრ, რადგან ეს ხალხი თვით დარბაზში იმყოფებოდა და ბრძანებლობდა; მაგრამ მოიშორეს თუ არა თავიდან, ის დადგენილებანი გააუქმეს. ხალხი მღელვარებდა, მაგრამ წინამძღოლი აღარა ჰყავდა და, თუმცა გამარჯვებული იყო, არ იცოდა, როგორ მოეხმარებინა ეს გამარჯვება; დანტონი რომ ცოცხალი ყოფილიყო, ხმას ამოიღებდა ხალხის სასარგებლოდ. მეორე დღეს

„ქურდების“ მიმდევართ და მეფის მომხრეებმა მიუჩინეს აჯანყებულ ხალხს ჯარი და ისევ იმ სოროებში შერეკეს, საიდანაც შიმშილს გამოერეკა უბედურნი. და ხალხიც დაიშალა, გაიფანტა, ბრძოლა ვერ გაბედა და მით დამარცხებულად აღიარა თავისი თავი შიგ პარიზში.

ეს უკანასკნელი მღელვარება იყო ხალხისა. რესპუბლიკის მოწინააღმდეგეთ რომ არა შინებოდათ, — ჯარები რესპუბლიკის მომხრენი არიან და მოვლენ და ისევ რესპუბლიკურ მართებლობას დაამყარებენო, — იმ გამარჯვებით ისარგებლებდნენ და მეფე ლუი XVIII დასვა მდნენ. უწინდელი ქვეყნის მფარველი კომიტეტის ყველა წევრები, — გარდა კარნოსი და ქვემო რეინელი ლუისა, — ოცდაერთი დეპუტატი, ერის მიერ არჩეული და მისი წარმომადგენელი, და ათი ათასი სხვა პატრიოტი დაიჭირეს იმ მღელვარების შემდეგ და ერთი კვირის განმავლობაში ზოგი კალედონიაში გაგზავნეს, ზოგი გილიოტინით დახოცეს. კიდევ კარგი, რომ შოველი ჯერ ისევ ჯარში იმყოფებოდა! ჩვენმა მტრებმა ვერაგობით და დალატით უფრო გვავენეს, ვიდრე ძალით. ძალით ვერას მოიგებდნენ, და დალატით კი ქვეყანა ხელთ იგდეს; უანდარმები ყველგან გამოსცვალეს და თავიანთ მომხრე კაცები დააყენეს; ერის მცველ ჯარს ზარბაზნები წაართვეს, მუშა ხალხს იარაღი აპყარეს; პარიზი თავიანთ ერთგული ჯარით აავსეს და რაღა ბევრი გავაგრძელო, ისე მოაგვარეს საქმე, რომ მარტოდმარტო მეფელა აკლდათ. ერთიღა აწუხებდა რესპუბლიკის მოწინააღმდეგეთ: ჯარები ისევ რესპუბლიკის მომხრენი იყვნენ და, მამასადამე, საჭირო იყო გენერლების მოსყიდვა. რაკი გენერლებს მიიმხრობდნენ, სრულ გამარჯვებას წინ აღარა უდგა რა და მეფეს მისწერდნენ: „მობრძანდით, თქვენო უდიდებულესობაჲ! მობრძანდით. შიში აღარაფრისა გაქეთ! მობრძანდით და მოეპატრონეთ თქვენს დაობლებულ ერს, რომელიც ცხარე ცრემლითა ტირის უმეფობას და უბატონობას! მობრძანდით, მეფეო! ქვეყანას უბრძანეთ, სასეირნოდ ვიყავ და ახლა შინ მოვდივარ-თქო. მობრძანდით, შიში ნურაფრისა გექნებათ, ბატონიშვილო, მამაპაპეული თქვენი სამეფო ტახტი მზად გახლავთ და თქვენდა გელით“.

დიად, სულ იმას გაიძახიან, ერონდელეები წამებულ იქმნენ მთიულთაგანო! მაგრამ, ნეტავი აგრეც ყოფილიყო, ღირსნი არ იქნებოდნენ თუ? დიდი ხანია ამზადებდნენ საფრანგეთში ხელახლად მეფობის დამყარებას და დარწმუნებულნიც იყვნენ, რომ ახლა კი სრულიად გაჩარხული ჰქონდათ საქმე. ოღონდ აჩქარდნენ ცოტათი, რადგან იაკობელები და კორდელიერები ჯერ ყველანი არ

დახოცილიყვნენ; გარდა ამისა გლეხკაცებს თავიანთვის უნდოდათ რესპუბლიკის მართებლობისაგან ნაყიდი გაზიზნულების და მონასტრების მამულები.

მიუხედავად ამისა პატრიოტები მთელს საფრანგეთში იულიტებოდნენ. ფალსბურგამდეც მოატანა პატრიოტების დევნამ და ძლივს გადავარჩინეთ სიკვდილს საუკეთესო ჩვენი მოქალაქენი — ელოფ კოლენი, რაფიელ მანკი, ლაფრენე, ლუსტო, ტევენო და აგრეთვე ყველა მოხელენი და კლუბის წევრნი. მამასახლისად ექიმი შტეინბრენენერი დაგვინიშნეს, რომელსაც წამლების და სნეულების მეტი არა ახსოვდარა და ყველა საქმეს მდივანი განაგებდა. თითონ მამასახლისი კი დღეში ნახევარ საათით თუ ავიდოდა სამსახურში და გაზეთებს ხომ სულაც არა კითხულობდა; მის თანაშემწედ იყვნენ სირაჯი ელინგერი, ლუდხანის პატრონი მიტტენჰოფი და ფოსტის გამგე მასსონი; იმათაც იმდენად აწუხებდა ქვეყნისა და ხალხის ვარამი, რამოდენადაც თვით მამასახლისს.

აი, როგორ გაირყვნება ყველა, როდესაც სათავეში მდგომნი თავიანთ გამდიდრების გარდა არასა ზრუნავენ და ხალხს ცხვარსავით კრეკენ და პარსავენ. ვაი პატიოსანი კაცის ბრალი ამისთანა დროში! ძალაუნებურად გულში უნდა დაიმარხოს ბიწიერთა სიძულვილი და ბრახი; უნდა მოერიდოს ქვეყნის წამპილწველთ და შესაფერ შემთხვევას ელოდოს თავის უფლებათა აღსადგენად.

VI

სწორედ იმ დროს გამოიარა ჩვენკენ შოველმა, სულ ნახევარი საათით. ის იყო დუქანი დავკეტეთ და შავ ფულსა ვთვლიდით, როდესაც, სრულიად მოულოდნელად შემოაღო კარი.

— მე ვარ, შვილებო! მინდა ერთი გადაგკოცნოთ და ისევ გზას გავუღგე.

წარმოიდგინეთ ჩვენი სიხარული.

იგივე შოველი იყო, ოღონდ ცოტა წელში მოხრილიყო და ჭადარა გამორეოდა. ბავშვი რომ აიყვანა და კოცნა დაუწყო, თვალი ცრემლით ავესო; რაც ხანი ჩვენსა იყო, ხელიდან აღარ მოუშორებია თავისი შეილიშვილი, სულ იმას შეჰხაროდა და უაღერსებდა:

— რა ლამაზი ბიჭია! ექვსი წლისას ზეპირად ეცოდინება ადამიანის უფლებათა კატეხიზმო.

სტეფანეს ვთხოვე ელოფ კოლენისთვის შეეტყობინებინა შოველის მოსვლა და თითონ ქუჩაში მდგარიყო, რომ დილიქანს არ გაესწრო, რადგან შოველი პარიზს მიდიოდა. მარგალიტა ტიროდა;

მეც ძალიან მეზარებოდა ჩემი სიმამრის ასე მალე განშორება და ფერმიხდილი შევეცქეროდი. ელოფი ძალიან გვიან მოვიდა, სულ რამდენიმე წუთიღა ნახა შოველი: შემოვიდა თუ არა მაშინვე სენ-ჟუსტის მოკვლახედ ჩამოაგდო ლაპარაკი და ქვითინი დაიწყო. შოველი სრულიად დამშვიდებული დარჩა.

— დიალ, დიდი უბედურება მოგვივიდა, მიუგო წყნარად შოველმა, დიდი უბედურება! მაგრამ რას იზამთ, ეგ ბუნების კანონია. ადამიანი — ადამიანია, მომაკვდავი ადამიანი და დიდად შესცდება, ვინც მის გაღმერთებას მოიწადინებს: ცოტა ხანს სძლებს ადამიანი, ცვდება. დანტონი და რობესპიერი ორივე ძლიერი პატრიოტები იყვნენ: დანტონს უყვარდა თავისუფლება, რობესპიერს კი სძულდა იგი, რადგან მას თავისებურად, ბრძანებით და ძალდატანებით უნდოდა ქვეყნის თავისუფლება. სწორედ ამ გარემოებამ მოუღოთ მათ ბოლო: არც ერთად ყოფნა შეეძლოთ და არც უერთმანეთობა. ამ გარემოებამ მოუღო ბოლო ადამიანებს, მაგრამ მათგან აღიარებული აზრები და პრინციპები კი დარჩა; რევოლუციამ ნახევარი გზა უკვე გაიარა: გლეხკაცი სრულუფლებიან ადამიანად იქცა, ბატონყმობიდან განთავისუფლდა, მამული შეიძინა. ახლა ნახევარი გზაღა გვაქვს გასავლელი: ისე უნდა მოვაწყოთ საქმე, რომ ხელოსანს და მუშასაც ერგოთ თავისი წილი, როგორაც გლეხკაცს ერგო; ისე უნდა მოვაწყოთ ჩვენი საზოგადოებრივი ცხოვრება, რომ ხელოსანი და მუშა თითონვე სარგებლობდნენ თავიანთი შრომის ნაყოფით. ამ წადილის განსახორციელებლად საჭიროა განათლება და თავისუფლება; თავისუფლება ყველას ათანასწორებს, უპირატესობათა დაწესება კი ერთის ხელში აგროვებს ათასს ნაშრომს. რევოლუცია მაშინ დასრულდება, როდესაც ყველა გათანასწორდება.

კიდევ ბევრს იტყოდა, მაგრამ დილიქანსმა ჩამოიარა და უნდა გავშორებოდით ერთმანეთს. ყველას ტირილი მოგვივიდა, ყველას ცრემლი წაგვსკდა, მაგრამ რაღას ვიზამდით? თითქო მოჩვენება იყო, ისე გვეჩვენა ის სამაგალითო პატრიოტი და ისევე მარტონი დაგვეტოვა.

სიზმარით მახსოვს ახლა ეს ამბავი. რამდენი ხანია მას შემდეგ, და დღესაც კი გული ამემღვრევა ხოლმე, როდესაც მომაგონდება, როგორ უაღერსებდა შოველი ჩემს ბიჭიკოს. თიბათვის დამდეგი იყო. ლიონში, მარსელში, არლში, ტარასკონში და სხვაგან ბევრგან მეფის მომხრენი იჭერდნენ პატრიოტებს და ციხეებში ხოცავდნენ; დააგროვებდნენ და თითონ დახოცილთა გარშემო ცეკვას დაიწყებდნენ. ჟირონდელები გზაში უხვდებოდნენ მგზავ-

რებს, რესპუბლიკელებს ხოცავდნენ და, საცა კი მოასწრობდნენ სახელმწიფო ფულს, იტაცებდნენ. მთელი საფრანგეთი ქურდებს და ყაჩაღებს უჩიოდა, მაგრამ კონვენტში რესპუბლიკის მოწინააღმდეგენი იყვნენ და ყურადღებას არაფერს აქცევდნენ. რობესპიერის მკვლელნი ხედავდნენ, რომ რაკი აღელვებულ ხალხს დაიმორჩილებდა კონვენტი, მერმე იმათთვის მოიცილიდა და ერთიანად ამოხოცავდა ყველას; განსაცდელში მყოფთ მომხრეების ძებნა დაიწყეს და ისევ მთიულთ დაუახლოვდნენ, რადგან კონვენტში, თუ იყო ვინმე ძალოვანი რესპუბლიკელი, ისევ მთიულნი იყვნენ.

დასამტკიცებლად იმისა, რომ ხალხის აჯანყება მეფის მომხრეთაგან იყო გამოწვეული, ისიცა კმარა, რომ რაკი ჯავრი იყარეს რესპუბლიკელებისა და უღმერთოდ ხოცეს ყველა იაკობელები, დანტონისტები, ჰეაერისტები და სხვანი, მაშინვე შეწყდა შიმშილი და პარიზი ხორაგეულით აივსო. პურები კი ჯერ მომკილი არ იყო; მაშ სად იყო დამალული იმოდენა პური, რომ ისე უცბად გაჩნდა ბაზარში? განა მკამდე შიმშილის მოსპობა გინახავთ სადმე? განა ცხადი არ არის, რომ რესპუბლიკის მოწინააღმდეგეთ მიზეზი უნდოდათ რესპუბლიკელების სახოცად და მიზეზად ხალხის აჯანყება მოიღეს? შიმშილი მახე იყო, რომელშიც მეფის მომხრეებს უნდოდათ ხალხი გაებათ, შეემუსრათ და მერე მეფეც ეთხოვნიებინათ.

კიდევა ბრძანონ, თუ უნდათ, საფრანგეთი მეფის მოყვარე ქვეყანააო. იცით, რამოდენი ხალხი ამოხოცეს, რომ მეფე მოენდომებინათ? კარგად რომ დასთვლიდნენ, დარწმუნდებოდა, რომ რობესპიერის მოკვლის შემდეგ გაცილებით მეტი ხალხი იქნა დახოცილი, ვიდრე მის მოკვლამდე! განა ხალხის ჟღერტაში და სამშობლოს დალატში მეფის მომხრეებს ცალი ეყოლებათ სადმე? შინ ისინი დათარეშობდნენ, თითქო დაამარცხებულ მტრის ბანაკს იკლებენო, გარედან კიდევ მტერი გვემუქებოდა. დაამარცხეს თუ არა პარიზელი ხალხი, მაშინვე ახალი ამბავი გამოაცხადეს გაზეთებმა: ინგლისელი ხომალდები მოადგნენ საფრანგეთს, დაამარცხეს ჩვენი ხომალდები, ნაპირს გამოვიდნენ უთვალავი იარაღით, ყალბი ფულით და გახიზნულ თავდაზნაურებითაო. ეგ კიდევ არაფერი! შიგ საფრანგეთშიც არ გვასვენებდა მტერი და ვანდლეები, თუმცა აღთქმა დასდეს, ამის შემდეგ რესპუბლიკას აღარას ვავნებთო, მოუსვენარი მატლივით მოძრაობდნენ და მტრის შემოსევასდა ელოდნენ, რომ იარაღი აეღოთ და გვერდში ამოსდგომოდნენ. ერთი, სულ მცირე, ბრძოლაც რომ წაგვეგო და დავმარც-

ხებულიყავით, სამეფო ტახტზედ მეფე ლუი მეთვრამეტეს აასკუ-
პებდნენ.

ლუი მეჩვიდმეტე, შვილი მოკლულის ლუი მეთექვსმეტისა,
რომელსაც, რაკი მეფობიდან გადავაყენეთ, ლუი კაპეტს ვეძახდით,
ერთ ხარაზს შეჰხაზნოდა და იქ მომკვდარიყო. მისი შვილი გახიზ-
ნულთ და ევროპიელ ხელმწიფეთ უკვე ელიარებინათ საფრანგე-
თის მეფედ და ლუი მეთვრამეტე ეწოდებინათ. სიცილად არ გვე-
ყოფოდა ეს ხუმრობა, მაგრამ ვაი, რომ კონვენტის სამი წილი
სწორედ ამ მეფე ლუი XVIII თანაუგრძნობდა! საშინელ მოლო-
დინში იყო მთელი ერი. გაზეთის კითხვას ველარ ვებდავდით, ისე
გვეშინოდა, კიდევ საზიზღარი რამ ღალატი არ ამოვიკითხოთო.

ჩვენდა საბედნიეროდ ვანდემი მყოფის ჩვენი ჯარის მხე-
დართმთავრობა გენერალ ჰოშს მისცეს. იმანაც საჩქაროდ შეაგროვა
თავისი ჯარები და მტრის წინ დასახვედრად დაიძრა. მტერი ქალაქ
რანისკენ მოდიოდა, პირდაპირ პარიზზედ; ოცი ათასი ვანდელი
იყო, ათი ათასი ინგლისელი და წინ სამი ათასი გახიზნული მოუძ-
ლოდა. ჰოში წინ შეეგება და ნახევარკუნძულ კიბერონში მოამწყვ-
დია. ხმელეთით ყოველი მხრიდან გზა შეუჟრა და ისე დაამარცხა,
ისე გაუჭირა საქმე, რომ შეშინებულნი წყალში ცვიოდნენ, სხვა
გზა რომ აღარა ჰქონდათ ხსნისა. ვინც ცოცხალი გადარჩა, ტყვედ
იქნა დაჭერილი.

ამ დროს რობესპიერის მკვლელნი მთიულეებს მიემხრნენ და გა-
მარჯვებულ ჯარში თავიანთი მომხრე ტალიანი გაგზავნეს. ტალიან-
მა რომ ნახა ტყვედქმნილი დიდებულნი, რომელნიც მტერს მოუძლო-
დნენ საფრანგეთის წინააღმდეგ, ბრძანება გასცა — ყველანი
დახვრიტეთო. შვიდას თორმეტი დიდებული იქმნა მაშინ დახვრე-
ტილი. უბრალო ხალხი კი ყველა გაანთავისუფლა. დიდი ზარალი
მოუვიდა მაშინ თავადაზნაურობას.

შეუძლებელია ასწეროს კაცმა, რა სიხარულით მიეგება ხალხი
ამ გამარჯვების ამბავს. იმდენ უბედურებისაგან გული გატეხილი
გვექონდა და მით უფრო მეტი იყო ჩვენი სიხარული. ყველგან ძლევა-
მოსილი ჰოშის სახელი და დიდებაღა ისმოდა. მოიგონეს მისი ვაე-
კაცობა რეინის და მოზელის ჯარებში და ყველა ერთხმად იძახდა:

— თუ გვიშველის, მარტო ჰოში გვიშველის!

მაგრამ რას გვიშველიდა, გახვრეტილი გროში აღარსად ჰქონდა
რესპუბლიკას! მილიონობით გამოდიოდა ასიგნაციები, მაგრამ ფუ-
ლად კი აღარავინ იღებდა. ხორაგზედ დადებული უმაღლესი ფასები
აღარ არსებობდა და, რა ფასადაც უნდოდათ, ისე ჰყიდდნენ ვაჭ-
რები. გირვანქა სანთელი მანეთნახევრად იყიდებოდა, გირვანქა თამ-

ბაქო სამ მანეთად და აგრეთვე სხვა ყველაფერი ასე ძვირად.

იქვე, რეინის გაღმა, ერთისამად იათად ფასობდა ყველაფერი. სიძვირე ხომ ვაი იყო, და იმაზედ უარესი ის იყო, რომ ფულის მაგვირად ასიგნაციებსლა ხარჯავდა მართებლობა და ასიგნაციებს კი აღარავითარი ფასი და გასაყალი აღარ ჰქონდა. ვინც იმ დროს არ მოსწრებია, ვერც კი წარმოიდგენს, რაოდენი საქონელი შემოდიოდა ჩუმად საზღვარგარეთიდან! ყავა, შაქარი, პილბილი და სხვა ოქროს ფასადაც აღარსად იშოვებოდა, რადგან ინგლისელები გზაში უხვდებოდნენ ჩვენსკენ მომავალ ხომალდებს და, ომით რომ ველარა გვჯობნიდნენ, ვაჭრობის შეყენებით და ხალხის დაშშევით გვიპირებდნენ დაჯაბნას. ბავშვებმა ფერიც აღარ იცოდნენ შაქრისა. თუ იშოვებოდა სადმე ყავა ან შაქარი, ისევე ჩუმად, საზღვარგარეთიდან შემოტანილი უბაჟოდ. ჯარებსაც ყველაფერი აკლდათ: ვისიც ჯერი იყო ჯარებზედ ზრუნვა, ისინიც სხვებივით თავიანთ ჯიბის გატენის მეტს არასა ფიქრობდნენ. უმაღლესი საზოგადოების გარყვნილება და გაიძვერობა მისაბაძავად შეიქნა. ქეიფი, დროს გატარება და კეკლუცად მორთვალა მიაჩნდათ ცხოვრების დაწინშულებად და, რას იტყვის კაცი, რომ არ ეკადრათ, ოღონდ ფული ეშოვათ და ცხვირამდე მოხვეულ თეთრ ყელსახვევით და სათვალეებით გამოპრანჭულნი გამოჩენილიყვნენ საზოგადოებაში.

ცული ის იყო, რომ გახიზნული ბერები და მღვდლები ისევე უკან დაბრუნდნენ იმ დროს და ისე დაძრწოდნენ ყველგან, ისე აფაციცებდნენ თვალებს, თითქო ბინდისას სოროებიდან გამოძქრალი თავგები ყოფილიყვნენ; ძველებურად თავისუფლად დადიოდნენ სოფელ-სოფელ და იმდენად წათამამებულებიყვნენ, რომ რესპუბლიკის მომხრე მღვდლებს და სხვათა შორის ლუტცელებურგელ შამა ქრისტეფორეს მოსვენებას აღარ აძლევდნენ.

შამა ქრისტეფორე, აგერ ხუთი წელიწადი იყო, ფეხუცკლელად იჯდა თავის სოფელში და თუმცა რესპუბლიკისაგან გროში არ იცოდა, მაინც თავისებურად კეთილსინიდიისერად ასრულებდა თავის შოვალეობას. მოძღვარიც ის იყო, სოფლის სკოლის მასწავლებელიც და ჯამაგირი კი არც ერთში ეძლეოდა, არც მეორეში. ცხოვრებით კი ჯვრებსა სთლიდა და იმითი ცხოვრობდა. ბოლოს დროს სუყველაფერს ჩვენსა ვაჭრობდა და ძალიან ნანობდა, რომ შოველს ჩვენსა არ დახვდა და არა ნახა.

მაგრამ იმ შორეული და არეული დროისა ისე კარგად არა მაგონდება რა, როგორადაც კერძო ჩვენი ცხოვრება და ბედნიერება: პირველი ღიმილი ჩვენი პატარა პეტრესი, მარგალიტას სიხარული, როცა ბავშვი კარგადა ჰყავდა, და შიში და გულისხმეთქა, უფრო ხში-

რად უბრალოდ და უმიზეზოდ. დედის სიყვარულისთანა მშიშარი ხომ არა იქნება რა! სუყველა იმას აშინებს, სუყველა იმას ერჩის და მოსვენებას უფრთხობს. ან სად იცის დედამ მოსვენება? დღე და ღამე ერთია მისთვის. კურდღლის ძილითა სძინავს დალოცვილს; ერთი კი გაიჩუჩუნოს ბავშვმა, და მაშინვე წამოვარდება, თითქო არც კი იცის, დაღლა რასა ჰქვიაო, და ხან უმღერის, ხან უცინის, ათამაშებს, ატარებს, არწევს ვიდრე კვლავ არ დააძინებს პატარას. თითი რომ წამოსტივდეს ბავშვს, დედას მოსვენება ეკარგება; დღე და ღამე თავით უზის და უვლის, არც დაიღლება, არც მოსწყინდება. თვე-თვეს მოსდევს, წელიწადი წელიწადს, ყველა იღლება, ყველა იცვლება და დედა კი ისევ ისე უღლეღალად ენაცვლება თავის შვილს.

მას შემდეგ რაც პეტრე მოგვეცა, ორჯერ სამჯერ მოვკარ თვალი დედაჩემს: ჩვენ პირდაპირ აიტუზებოდა, ამოეთარებოდა რასმე და იქიდან გვათვალეირებდა. ძალიან დაბერებულიყო და თმა სრულიად გასთეთრებოდა. პირველად რომ დავინახე ისე მიმალული, თავისი დაგლეჯილი კაბით, გული მომიკვდა და ცრემლი მომერია. მიწოდოდა გავარდნილიყავ, დედამვილურად გადამეკოცნა და შინ შემომეყვანა, მაგრამ, თითქო იგრძნო, რომ დავინახე, დაჰკრა ფეხი და ისე მიიმალა, რომ ველარსად ვიპოვე.

აღბად უყვარს ჩვენი ბიჭი, რომ მის სანახავად მოდის მეთქი, ვიფიქრე. თუ ასე იყო და მართლა თავის შვილიშვილის სანახავად ჩამოდიოდა იმ სიშორეზედ, იქნება სწორედ ამით შევერიგებოდით ერთმანეთს. და ისე გამიტაცა ამ ფიქრმა, რომ დღე და ღამე მოსვენებას აღარ მაძლევდა. მარგალიტას კი არას ვეუბნებოდი, რადგან დარწმუნებით ჯერ არა ვიცოდი რა.

ხშირად მამაჩემიც მეტყუოდა ხოლმე, როდესაც ნეტარებით საყვებოდი ღიმილით აკვანს არწევდა და ოთანში ჩვენს მეტი არავინ ეგულებოდა:

— როგორ დაგლოცავს, მიშელ, დედაშენი, ეს პატარა რომ აჩვენო!

— დარწმუნებული კი ხარ, მამა?

— დარწმუნებულიო?! განა ეჭვი გაქვს? იცი, როგორ იამება! განა თითონ კი არ უნდა მოსვლა? ვერა ბედავს! იმდენი ლანძღაშენი ცოლი, რომ სირცხვილით ახლო ველარ გაუვლია.

— რაკი აგრეა, აი, ეხლავ წავიდეთ, მამა!

წამოვდექი, პეტრა ხელში ავიყვანე და ქუდი დავიხურე.

— სადა, შვილო? — მკითხავდა განცვიფრებული მამაჩემი.

— სადა და შინ, ჩვენსა.

— მერე შენი ცოლი?

— მარგალიტაც კმაყოფილი დაგვრჩება, ნუ გეშინია.

წამოდგა საწყალი კაცი და კანკალით უკან გამომყვა. მარგალიტა ღუქანში იყო. გავედით და ვუთხარი:

— დედაჩემს ძალიან ნდომებია პეტრეს ნახვა. ხელად ავირბენ და სადილად ისევ შინა ვარ.

მარგალიტას ფერი ეცვალა: გაგონილი ჰქონდა დედიჩემის ლანძღვა და წყევლა, მაგრამ კეთილი გულისა იყო და სიმართლის მიმდევარი:

— წადი! დაე დარწმუნდეს დედაშენი, რომ ჩვენ იმისავით გულქვანი არა ვართ. დაე დარწმუნდეს, რომ შენი მშობელი დედა ყოველთვის პატივცემული იქნება ჩემგან.

ეს რომ გაიგონა მამაჩემმა, მივარდა, ორივე ხელები დაუჭირა მარგალიტას, თითქო რიდასივ ტყმა უნდოდა, მაგრამ ვერ უთხრა და მაშინვე გზას გავუღიქით. კარგა ხანს შემდეგ, როდესაც ჩვენი სოფლის აღმართს შევეუღიქით, ამოიღო ხმა: მარგალიტას აქებდა, ლოცავდა და თან ცრემლს იწმენდდა. მე არაფერს ვუპასუხებდი, რადგან დარწმუნებული არ ვიყავ, რომ კარგად მიმიღებდა დედაჩემი.

შევედით სოფელში, შევიარეთ დიდი ქუჩა, გვერდს გავუარეთ ნათლიაჩემის ღუქანს, ისე რომ არსად გავჩერებულვართ. ქუჩაში არავინ იყო, რადგან ყმაწვილკაცობა სულ ჯარში იყო გასული და სხვანი კიდევ თავიანთი ურმებით ჯარების ბარგსა ზიდავდნენ; სოფელში მოხუცებულების და ქალ-ყრმათა გარდა აღარავინ მოიპოვებოდა ყანების მოსამკლად.

მოხუცებული დედაჩემი დილიდან საღამომდე მატყლს ართავდა და მითა შოულობდა ცოტა რამ გროშებს. მამაჩემი ძველებურად კალათებს სწნავდა და ყიდდა; ახლა კლოდი, მატურინი და მე ვშველოდით და აღარა უჭირდათ რა საწყალ მოხუცებს. სიბერე ბრძანეთ. ადამიანის გამტეხი და დამადონებელი სიბერე, თორემ ისე კარგად თავის ღღეში არა ყოფილან ჩემი მშობლები!

მშვენიერი დარი იღდა. აქეთ-იქით ბალებში მეტი სხმისაგან, ტოტები ემტვრეოდა ვაშლს, მსხალს და ჰანჭურს, სწორედ ისე, როგორც ჩემს პატარა ბიჭობაში მახსოვს, როდესაც მე, ნიკო, კლოდი და ლიზა ფეხშიშველნი დავბროდით ორლობებში და ლობეზედ გადმოწვდილ ტოტებს ხილს ვაყრევინებდით. მომაგონდა ჩემი ბავშვობა, მომაგონდნენ ამხანაგები, რომელთაგან ბევრმა უკვე თქვენი ჰირი წაიღო და გულმა კენესა დამიწყო.

დედაჩემი გარეთ იჯდა. კვირა დღე იყო, ახალი კაბა ჩაეცვა და ფეხსაცმელი. იჯდა და ლოცვანს კითხულობდა. ჩვენი ფეხის ხმა

რომ შეესმა, გადმოგვხედა, მაგრამ არ გაინძრა. მეგონა, ისევ მიჯავრდება-მეთქი, მაგრამ ძალიან შევეციდი: დაინახა თუ არა ბავშვი, წამოიწია, ადგომა ვერ მოახერხა და ხელები გამოგვიწოდა, თითქო გვევედრება — ჩქარა მომეცით ეგ პატარა, რომ გულში ჩავიკრაო. ხმის ამოუღებლივ მივეცი ბავშვი, რადგან ისე მიცემდა გული, რომ ლაპარაკი აღარ შემეძლო. აიყვანა, დაჰკოცნა და ცრემლი წასკდა.

— მოდი, შეილო, შენც გაკოცო, — მითხრა ბოლოს, როდესაც გული მოიბრუნა, — ეს არის, ეხლა თქვენზედ ვფიქრობდი, ძალიან მინდოდა თქვენი ნახვა. ალბად, ღმერთმა მისმინა და მოგავლინა ჩემს დასამშვიდებლად, თორემ ძალიან მეძნელებოდა თქვენსა ჩამოსვლა და შენი ურჯულო ცოლის ნახვა.

გადამეხვია და მაკოცა.

მერე ბავშვი გაათიტვლა და ჩასუქებული ზორბა ბიჭი რომ დაინახა, ისე გაიხარა, რომ ყვირილი დაიწყო:

— ქალო, მარიაში გერტრუდა! არ გესმით, ქა?! მოდით, ჩემი შვილიშვილი გაჩვენოთ! ჩემი მიშელის ბიჭი! ერთი უყურეთ ამ ანგელოზს, ამას! გენაცვალეთ, ჩემი ნიკოა, ენაცვალოს იმას დედა, პირწავარდნილი ნიკოა!

მოვიდნენ დედაკაცები, ყველამ ბავშვს დაუწყო სინჯვა და აღერსი. ვიციანოდით, ვხუმრობდით; ყველაზე მეტად დედაჩემი იყო მხიარული: ბავშვს უღიტიანებდა, ეხუმრებოდა, უაღერსებდა და ისე უხაროდა იმისი სიცილი, თითქო ამ ქვეყნად ამაზედ უკეთესი არა სცოდნოდეს რა. ცოტა ხანს უკან მოხუცებული სენტილერიც მოვიდა თავისი ხის ფეხით.

— კეთილი გულისა ყოფილხარ, მიშელ, მეუბნებოდა დედაჩემი, კარგი ქენ, რომ ეს ბიჭი მაჩვენენ.

მამაჩემი ფიცავდა, ასე მხიარულად ჩემს დღეში არსად მინახავსო. იმასაც უხაროდა ჩვენი შერიგება და წამდაუწუმ წამჩურობებდა:

— აკი გითხარ, იამება-მეთქი! ხელავ, როგორ შესტრფის პატარას.

სამწუხაროდ ისა ჰქონდათ, რომ ბავშვი ჯერ პატარა იყო და ვაშლს ვერ გაკბეჩდა, თორემ ხილით აავსებდნენ.

შუაღღემ რომ მოატანა, ბავშვმა ტირილი დაიწყო და დედაჩემმაც იგრძნო, რომ დრო იყო გამოთხოვებისა. ისევ ისე შეახვია, სოფლის ბოლომდე ჩამოგვაცილა და ისეთი ამაყად, ამპარტავნად მოკყავდა თავისი შვილიშვილი, იტყოდით, ქვეყანა ამას დარჩენიაო.

ვეხვეწე, ჩვენსა წამოდი-მეთქი, მაგრამ არ ინდომა:

— მერე იყოს, მიშელ, მერე!

მამაჩემიც მიჩურჩულებდა, ნუ აუტყდები, არ გაგიბრაზდესო. ბოლოს გამოგვეთხოვა, ბავშვი მომცა და მითხრა:

— ახლა კი ჩქარა წადით, თორემ ძუძუ უნდა მაგ საწყალს.

კარგა ხანი იდგა ერთ ალაგს და გვიყურებდა. შორიდან ერთხელ კიდევ დამიყვირა:

— არ დამივიწყო, მიშელ! ჩქარა მნახეთ!

მეც თავი დავუქნიე, ბატონი ხარ-მეთქი.

ასე კი შვევურიგდი დედაჩემს. მარგალიტაც ძალიან კმაყოფილი დარჩა, ეს ამბავი რომ გაიგო. ახლა კი რიგზედ იყო ყველაფერი და ადრე იქნებოდა თუ გვიან, დედაჩემი გაბედავდა და ჩვენსაც ჩამოვიღოდა. მეცა და მარგალიტასაც გადაწყვეტილი გვქონდა, კრინტიც არ დაგვეძრა წარსულზედ. ან რა უნდა გვეთქვა? თუ კი საწყენის მეტს ვერას ეტყვი კაცს, ისა სჯობია თევზით წყალი ჩაიყენო პირში და გული არ მოუკლა. თუ არა და დღევანდელი ვარამი არ გვეყოფა, რომ გუშინდელიც ზედ არ დავურთოთ?

მართლაც და იმოდენა ვარამი მოქონდა თან დროებას, რომ წარსული აღარავის აგონდებოდა. აგერ სამი თვე სრულდებოდა, სრულიად უძრავად იდგნენ ჩვენი ჯარები. აღარც ტანისამოსი ჰქონდათ, აღარც იარაღი, აღარც ტყვია-წამალი, ღირსეულს წინამძღოლებს ვილა ჩივის, ქვეყნის მთარველ კომიტეტში კარნოს ადგილზე ობრი ჩააყენეს და ის კიდევ მისდგა და, საცა კი ხელი მიუწვდა, ყველგან გადააყენა რესპუბლიკელი წინამძღოლნი და მათ მაგიერ მეფის მომხრენი დანიშნა.

მართებლობას ჯერ არ გამოეცა ბრძანება, რომ ნახევარი ხარჯი ხალხს შეეძლო მოსავლით გადაეხადა, — თივით, ქერით, ბზით, პურით, — ისე რომ რესპუბლიკა ყველაფერს ყიდულობდა და რადგან ფული არა ჰქონდა, ასიგნაციებს ავრცელებდა, რომელსაც არავითარი ფასი აღარა ჰქონდა ხალხის თვალში.

შემოდგომას ფალსბურგი ჯარებით აივსო და ჩვენმა ვაჭრობამაც თვალსაჩინოდ იმატა. გაჩქარებულნი მიდიოდნენ ჯარები სტრასბურგისკენ და მთელი დღე ნაღარა-საყვირის ხმა და მარსელური სიმღერა ისმოდა ქალაქში.

ჯარისკაცნი ზოგნი კიდევ მცნობდნენ: გაჩერდებოდნენ და ხელს ჩამომართმევდნენ. თრთოლა ამიტანდა ხოლმე ნაღარის ხმას რომ გავიგებდი და ვფიქრობდი: მოდი, ავიღებ ჩემს თოფს, წამოვიკიდებ გულას და მეც ჯარს გავყვები-მეთქი. მომაგონდებოდა წინამძღოლების ბრძანება: ხიშტი მაგათ, ბიჭებო, ხიშტი! და ძაგაძუგს დამიწყებდა გული. მაგრამ რა? გადავხედავდი ჩემს ბიჭიკოს, დამიმშვიდებოდა გული, ლოკოკინასავით ჩავიმალებოდი ჩემს ოჯახში და ძალი-

ანაც მიხაროდა, რომ სამსახურისთვის უვარგისადა მცნეს და დამი-
თხოვეს. ესეც რომ არა ყოფილიყო, ვინ იქნებოდა გიყი, რომ თავი
შეეკლა იმ რესპუბლიკისთვის, რომელიც რესპუბლიკას ღალატობ-
და! ჩვენც რომ დავიხოცნეთ, ვილა დარჩება, — ფიქრობდნენ პატ-
რიოტები, — მეფის მომხრენი და დიდებულნი თავიანთი მოსამსა-
ხურეებით, ეპისკოპოსები და ბერები თავიანთი გარყვნილებით და
ფარისევლობით! ქვეყანას ბატონი აღარავინ ეყოლება, სამეფო ტახ-
ტზედ ლუი XVIII ააბრძანებენ და კვლავ გააბატონებენ უგანათ-
ლებულეს თავად არტუას და სხვა ბრწყინვალე თავადაზნაურობას.

ოქროს ვინა ჩივის, ვერცხლის ფულიც ძნელი საშოვარი გახდა.
ხუთ მანეთიანი ოქრო ასიგნაციებად ოთხმოც თუმნად ფასობდა და
კიდევ რომ მოეტანა ვისმე, ხურდას ვერ მიცემდით. შავ ფულ-
ზედლა ტრიალებდა ვაჭრობა; მოვაგროვებდით ხოლმე ერთი კვი-
რის დახლს, სულ შავ ფულს, მანეთ-მანეთად შეკრულს ჩავალაგებ-
დით ყუთში და ისე ეუფავნოდით სიმონს, რომელიც სამაგიეროს
ან ბარათით გვიგზავნიდა ან არა და საჭირო საქონლით.

მას შემდეგ რაც პარიზში ხალხი დამარცხდა, მართებლობა სრუ-
ლიად უყურადღებოდ სტოვებდა მრავალგვარ უწყესობას, რომლი-
თაც მეფის მომხრენი რესპუბლიკის დამხობას ცდილობდნენ. მეფის
მომხრენი დარწმუნებულნი იყვნენ, რომ ძალა იმათკენ იყო და აღ-
რათერს მალავდნენ; გახეთქებში რესპუბლიკის ლანძღვასა ბეჭდავ-
დნენ, კლუბებში რესპუბლიკის წინააღმდეგ აჯანყებასა ქადაგებ-
დნენ. ჩვენი ხომ იმისთანა ავაზაკობა გაჩნდა, რომ ძველთაგანაც კი
არავის გაეგონა ისეთი საშინელება; მგზავრს ველარ გაეგლო გზაზედ
და დილიყანს: დაუხვდებოდნენ ჩასაფრებული ყაჩაღები და დედი-
შობილად სტოვებდნენ ყველას, დიდსა და პატარას, ქალსა და
კაცს. სახლშიც ბევრს უცვივდებოდნენ, სადაც კი ფული ეგულე-
ბოდათ; მოხუცებულ ლეიზერს შესცვივნიყვნენ მიტტელბრონში და
ისე შეეშინებინათ, სადა გაქვთ ფულიო, რომ შიშით მომკვლარიყ-
ვნენ ცოლიცა და ქმარიც. საშინელი შიშიანობა იყო და ჩვენი ბა-
ტისტი ისე არ წავიდოდა თავისი დილიყანსით სტრასბურგს, რომ
ერთი წყვილი დამბაჩა არ გაერტო ქამარში: კარგი ხმალი და გატე-
ნილი თოფიც კიდევ თივაში ჰქონდა ხოლმე ჩამალული. ერთხელ
ხმა გავარდა, ავაზაკები აქვე ჩვენს ახლო დათარეშობენო, და ბა-
ტისტიმაც ველარ გაბედა სიმონთან ჩემი ამანათის წაღება: ღამდება,
რა ვიცი როგორ იყოს საქმე, მაგოდენი ფული როგორ ვიტვირთო?

სხვა გზა არა მქონდა, ავდექი და სავერნამდის მე ჩავაცილე-
გვერდით ვუჯექი ბაპტისტს და თოფი ხელში მეჭირა. იმ ღამეს რომ
შეგვეკროდნენ საღმე ყაჩაღები, მე ვიცოდი, როგორც დაუხვდებო-

დი, მაგრამ არავინ დაგვხვედრია და სავერნამდის მშვიდობით ჩავედით. სავერნიდან იმავე ღამეს ფეხით წამოვედი, რადგან არ მინდოდა მარგალიტა ჩემი უამბობით შემეწუხებინა. ამას იმიტომ მოგახსენებთ, რომ უკეთ დაგიხატოთ, რა ყოფაში ჩააგდეს მეფის მომხრეებმა ჩვენი ქვეყანა. შევაწუხებთ, საქმეს გაუფჭირებთ და იქამდის მივიყვანთ, რომ თვითონ ხალხი თხოულობდეს მეფესაო, ფიქრობდნენ ჩვენი მოწინააღმდეგენი, რომელნიც თავის დღეში ვერ გაბედავდნენ ნიღაბი მოეხადათ და პირდაპირ ეღიარებინათ — ჩვენ რესპუბლიკელნი კი არა, მეფის მომხრენი ვართო, რადგან იცოდნენ, რომ ჯარი ამას არ მოუთმენდა და სასტიკად დასჯიდა მოღალატეთ.

კონვენტმა თერთმეტი კაცი ამოირჩია კომისიაში და იმათ მიანდო ახალი კონსტიტუციის შედგენა. წარმოიდგინეთ, რა უნდა ყოფილიყო მეფის მომხრეთაგან შედგენილი კანონები?!

ეს ახალი კონსტიტუცია გამოაცხადეს 17 მარტიდან იმდღეს 1795 წელს. იგი აღიარებდა უპირველეს ყოვლისა, რომ საზოგადოება საკუთრებაზედ არის დამყარებული და მასასაღამე, ვისაც მემკვიდრეობა არა ჰქონდა რა ან მამული ან ფული, ან კიდეც, ვინც ყოველი ღონისძიებით არა ცდილიყო და ფული არ ეშოვა, ის არც თავისი ქვეყნის შვილი იყო და არც რაიმე უფლება ჰქონდა სამშობლო ქვეყნის მართვა-გამგეობაში. პატიოსნება, ნიჭი, სამშობლოსათვის თავგანწირვა და ყველა სხვა სათნოება აღარაფერი იყო! ბურთი და მოედანი ფულს დარჩენოდა!

შემდეგ ამისა ერის წარმომადგენელთა არჩევანს შეეხებოდა ეს კონსტიტუცია. ახალი კანონის ძალით ხალხი ირჩევდა ა მ მ რ ჩ ე ვ ე ლ თ, ორას კაცზედ ერთს: ამომრჩეველთა არჩევანში მარტო იმას ჰქონდა ხმა და კენჭი, ვინც სახელმწიფო ხარჯს იხდიდა; ამომრჩეველნი კიდეც თავიანთ შორის დეპუტატებს ირჩევდნენ. ამომრჩეველად ან დეპუტატად ყოფნა იმას შეეძლო, ვინც სახელმწიფო ხარჯს იხდიდა არა ნაკლებ ორასი მუშის ფასისას.

სანთლითაც რომ გვეძებნა, ვერსად ვიპოვიდით ჩვენს მთებში ასეთ შემძლებელთ და, მასასაღამე, ჩვენს წარმომადგენელად საერო კრებაში ისინი უნდა გავვეგზავნა, ვინც პრუსიელებს და ავსტრიელებს საფრანგეთისკენ გზას უკვლევდნენ და მეფეს ტახტს უმზადებდნენ. ტყუილად კი არა სძულდათ მარატს, დანტონს, რობესპიერს და სხვა მთიულთ ყირონდელეები: იმავ თავითვე სულ იმას ცდილობდნენ, რომ ხალხს თავისი გამარჯვებით არ ესარგებლა და არავითარი უფლება არ შეეძინა.

ერთი კრებულის მაგივრად ახალი კონსტიტუცია ორს აწესებდა: კრება — ხნიერთა, რომელშიც ორას ორმოცდაათი წევრი უნდა

ყოფილიყო, არა ნაკლებ ორმოცი წლისა; და კრება ერის წარმომადგენელთა, რომელშიც ხუთასი დეპუტატი უნდა ყოფილიყო. ერის წარმომადგენელთა კრება განსჯიდა ყოველ კანონს, მაგრამ მის მიღება, ესე იგი, გაკანონება, ან დაწუნება კი მარტო ხნიერთა კრებას შეეძლო. ქვეყნის მფარველი კომიტეტის ნაცვლად „გამგეობა“ დააწესეს, რომელიც ხუთი კაცისაგან შესდგებოდა; გამგეობა ვალდებული იყო აღსრულებაში მოეყვანა კანონები; ამისთვის იგი თავის ნებით ნიშნავდა მინისტრებს, პირდაპირ მიმართავდა უცხოეთს ყოველი სახელმწიფო საქმისა გამო და, გარდა ამისა, სრული მბრძანებელი იყო ჩვენი ჯარებისა.

93-ში რომ გენახათ ეს ვაჟბატონები, თავს შეგაბრალებდნენ თავის გოდებით — რესპუბლიკის მომხრენი ვართ, სულით და გულით მისი კეთილდღეობა გვინდა და ხედავთ, რას გვიშვრებიან ჩვენი მტრებიო? და ორი წლის შემდეგ კი სწორედ იგივე კანონები უწყალობეს საფრანგეთს, რაც მეფე ლუი XVI დროს იყო:

1) მაშინ თუ მარტო მეფეს შეეძლო ეთქვა, სამაზრო პარლამენტისთვის, მ ე ვ ა რ დ ა ა რ მ ი ნ დ ა ო, ეხლა ესევე უფლება ხნიერთა კრებას ჰქონდა მინიჭებული.

2) მაშინ თუ მეფე ირჩევდა მინისტრებს, ეხლა „გამგეობას“ ჰქონდა ეს უფლება, ესე იგი, ხუთ კაცს.

3) როგორც მაშინ მარტო მეფეზედ იყო დამოკიდებული ომის ატება, ისე ახლა მარტო გამგეობას ჰქონდა ეს უფლება.

4) როგორც უწინ, ისე ახლა სამშობლოს ბედს მარტო შემძლებელნი განაგებდნენ და დანარჩენნი „უხმოდ“ იყვნენ ჩარიცხულნი.

5) როგორც 89-დე იყო, ისე ეხლა, თავის წარმომადგენელს ხალხი კი არა, მისგან არჩეული ამომრჩეველნი ირჩევდნენ. გამგეობის, ესე იგი, ხუთი კაცის ნაცვლად რომ ერთი კაცი დაენიშნათ, სხვა აღარ აკლდათ რა მეფის მომხრეთ! ეს იმას ნიშნავდა, რომ რევოლუციას ყურადღებასაც აღარ აქცევდნენ და გამარჯვებულნი ის მეფენი და ხელმწიფენი ბრძანდებოდნენ, რომელნიც დამარცხებულნი იყვნენ რესპუბლიკის ჯარებისაგან.

მიუხედავად ამისა, ხალხმა დიდი უმრავლესობით მიიღო ეს კონსტიტუცია. რა ექნათ? იმისთანა გაჭირვებაში ვიყავით ყველანი, რომ ამაზედ უარესსაც მივიღებდით, ოღონდ ცოტა მოსვენებას ვღირსებოდით. ფალსბურგში მარტო მე, კოლენმა, მანკმა, გენტიმ და ხუთმა თუ ექვსმა სხვა პატრიოტმა გამოვაცხადეთ უარი მის მიღებაზედ.

მაგრამ ესეც არ გვაკმარეს და, რადგან ეშინოდათ, თავის წარმომადგენელად ხალხმა ვაი თუ სულ რესპუბლიკელნი აირჩიოსო. გამოაცხადეს: ერის წარმომადგენელთა კრებისთვის, ხუთასიდან სა-

მას ორმოც დეპუტატს თვით კონვენტი აირჩევს თავის წევრთა შორის და დანარჩენი ას სამოცი ხალხმა გამოგზავნოსო. დიდი ალიაქოთი ასტეხა ამ განკარგულებამ, დიდი უსიამოვნება ჩამოაგდო მეფის მომხრეთა შორის და ძალიანაც აცინა ყოველი კეთილსინდისიერი კაცი: ბევრი დიდებული ცდილობდა დეპუტატობას და რაკი ამ დადგენილებისა გამო იმედი გაუცრუვდათ, ერთი ვაი-ვაგლახი ასტეხეს:—კონვენტმა შელახა ხალხის უფლებანიო! მაშინ გამოჩნდა, რა კაცებიცა ბრძანდებოდნენ ეს ვაჟბატონები, რომელთაც პირადობის გარდა არა სწამთ რა და საკუთარ პარტიასაც კი ვადუდგენენ, რაკი ნახეს, რომ უპირველესი ალაგები მათ არ შეხედებოდათ. რაც კი პარიზში მოქეიფე დიდებული ყმაწვილკაცობა იყო და მდიდარი ვაჭრები, აჯანყდნენ და ცუდად იქნებოდა კონვენტის საქმე, რომ ამ ვაჭირვების დროს იაკობელებისთვის არ მიემართა საერო კრებას და იარაღი არ დაერიგებინა ხალხისთვის აჯანყებულთა დასამშვიდებლად.

იაკობელებსაც ეს უნდოდათ. რობესპიერის მოკვლის შემდეგ სულ იმასა ნატრობდნენ, ნეტავი ჯავრი ამოგვაყრევინა როგორმეო. კონვენტის ზოგ-ზოგი მოხუცებული წევრი კარგად ხედავდა ამას და, თუმცა ყმაწვილკაცობა თავისკენ იწევდა სახელმწიფო ქადას და მოხუცებულები თავისკენ, მაინც ერთნი იყვნენ და... ყმაწვილებისა მართო დასჯა და დაშინება უნდოდათ, და არა სიკვდილი. მოხუცებულები კარგად ხედავდნენ, რომ ყმაწვილების ადგილზე თითონაც სწორედ ასევე მოიქცეოდნენ! ამიტომ ბრძანება მისცეს გენერალ მენუს, ფრთხილად იყავ და სისხლი არ დააქციოო. ისიც ისე ფრთხილად იყო, რომ პირობა ჩამოართვა აჯანყებულთ — დავიშლებითო, და თავისი ჯარით უკან გაბრუნდა.

საქმე ამით უნდა გათავებულყო, მაგრამ აჯანყებულთ რომ ნახეს ჯარის გაბრუნება; იფიქრეს, ძალიან შინებია ჩვენი კონვენტისაო და, არა თუ არ დაიშალნენ, წინაც წაიწიეს. მაშინ მწუხარებით აღსავსე კონვენტმა გენერლობა მენუს მაგივრად ბარრას უბოძა და მან კიდევ თავის თანაშემწედ ერთი ყმაწვილი, რობესპიერის მომხრე, იაკობელი, მამულიშვილი ბონაპარტი დანიშნა; ბონაპარტი მენუსავით ფრთხილი არ გამოდგა: იცოდა, რომ გარეუბნელებს ძველი ჯავრი სჭირდათ აჯანყებულ დიდებულების და მდიდარი ვაჭრებისა და იარაღი დაურიგა. წამოუძღვა წინ გარეუბნელებს და ისე გახადა აჯანყებულნი, რომ კუდით ქვა ასროლინა. კონვენტი ძალიან სწუხდა და გლოვობდა თავის უძღებ შვილთა სისხლის ღვრას, მაგრამ რას იზამდა, ჭკუა უნდა ესწავლებინა ყმაწვილკაცობისათვის. ხუთასი კაცი მეტი მოკვდა იმ დღეს და საღამოს ცხრა საათზედ სრულიად დამშვიდებული იყო ქალაქი.

ესლა კი ისე სასტიკად არ მოექცა კობვენტი აჯახებულთ, როგორც უკანასკნელად მისში აჯახებულ ხალხს. პირიქით ძალიან ტკბილად და დიდსულოვნად მოეკიდა ყველა დაჭერილებს და ორი კაცი დახვრიტა მარტომმარტო; კალედონიაში ხომ სულაც არავინ გაგზავნა. ან როგორ დაესაჯა? სულ თავისი ღვიძლი შვილები იყვნენ, სულ მეფის მომხრენი, და დამნაშავენი მარტო იმაში იყვნენ, რომ ძალიან ეჩქარებოდათ ხელი ჩაეყოთ სახელმწიფო ხაზინაში და ჯიბეები დაეტენათ. ამისთვის როგორ დაესაჯათ იმდენი ყმაწვილ-კაცობა?

იაკობელებმა თოფ-იარაღი მიიღეს. განა არ შეეძლოთ ეს იარაღი კონვენტის წინააღმდეგ მოეხმარათ, მაგრამ რილასათვის? გული გატეხილი ჰქონდათ და იმედი ჩამქრალი. ვინც უყვარდათ, აღარა ჰყავდათ, სულ მკვდრები იყვნენ. კაცი აღარა ჰყავდათ, რომ დაეყენებინათ დანტონის, დემულენის, რობესპიერის, სენეჟუსტის ალაგას. ლეჟანდრს, ტალიანს, ფრერონს და სხვებს რობესპიერის მოკვლის შემდეგ, აღარავის პატივისცემა აღარა ჰქონდა.

მთელი ჩვენი ყურადღება პარიზზედ იყო მიქცეული და სალაპარაკოდ ეს აჯახებულა გვქონდა, მაგრამ ამ დროს მეომარმა რაზმებმა ჩვენკენ წამოიწიეს და პარიზიც დაგვაიწიეს და აჯახებულთა დაუსჯელობაც. ყველგან სამხედრო მზადება იყო, როგორადაც 92-ში, და დილით სადამომდე შეუწყვეტლივ მიმდინარეობდნენ ჯარები; ზოგი ალპიდან მოდიოდა, ზოგი ვანდედან, რადგან ომი ყველგან გათავებული იყო და მარტო ჩვენს მხარეშილა მაგრობდა მტერი. იმდენი ხალხი ირეოდა ჩვენს დუქანში, რომ ვერც კი ვასწრებდით ყველა დაგვეკმაყოფილებინა.

ის იყო სადილად დავსხედით. მარგალიტამ წერილი მომაწოდა და მითხრა:

— ამ დილით მოიტანეს. მგონი ვილაცა ვანდელი ჯარისკაცი გწერს, გთხოვს ფენეგტრანში დამხვდი, შენი ნახვა მინდაო; მაგრამ აქ იმოდენა საქმეა, რომ შენი წასვლა შეუძლებელია.

შევხედე: ჩემი ძველი მეგობრის ივანე სომის წერილი იყო. ჩვენი რაზმი მაინცისკენ თურმე მიდიოდა და საწყალ მოხუცს არ დაზარებოდა თხუთმეტი ვერსი მეტი გადმოეხვია გზიდან მარტო იმიტომ, რომ ერთს წამს ვენახე და მოვეკითხე.

რომ წავიკითხე ეს ამბავი, ფერი მეცვალა და მარგალიტას ვუთხარი:

— არ შეგეძლო მაშინვე გეჩვენებინა, როდესაც მოგივიდა? ხომ შეიდ საათზედ მიიღე ეს წერილი, რას ფიქრობდი, რომ მიმალავდი? გულითადი მეგობარი, რომელთანაც ერთად ვიბრძოდ, ჩემს სანა-

ხვად თავის რაზმს დასცილებია, ამოდენა მანძილი გამოუვლია, და შენ წერილსაც არ მაჩვენებ? რას იტყვის საწყალი მოხუცი, დანიშნულს ადგილზე რომ ვერა მნახავს?

— მე მეგონა ლოთია ვინმე და ისა გწერს, — მიპასუხა მარგალიტამ.

თრთოლამ ამიტანა ეს რომ გავიგე. ისე ავშფოთდი, რომ ხმა ვეღარ ამოვიღე. სწორედ ამ დროს უნდა გაველო ფენეტრანგისკენ მიმავალს დილიჯანს. წამოვავლე ქუდს ხელი და გარეთ გავვარდი. გავაჩერე დილიჯანსი. ჩაეჯექი, მაგრამ გროში არა მქონდა ჯიბეში. კარგა ხანი ვიჯექე გაჩუმებული, რადგან მღელვარებისაგან ხმა ვერ ამომელო. და რადგან მეეტლე გაშტერებული მიყურებდა, დავმშვიდდი როგორც იყო, და დაწვრილებით ვუამბე ჩემი მწუხარება.

— ეგ არაფერი, ჩემო მიმელ, მაგისთვის გულს როგორ იშფოთებ! გაჯავრებით კი კარგი გიქნია, რომ გასჯავრებიხარ: დედაკაცისთანა უგულო არ იქნება რა! ოღონდ კი გათხოვდეს და, თავისი ქმარ-შვილის გარდა, თუნდა სულ წარღვნამ წაღეკოს ქვეყანა!

და განაგრძო ამ კილოთი ლაპარაკი. მე ყური აღარ ვუგდე. კარგა ხანს შემდეგ ვეშაბის აღმართს რომ შევეუდექით, რაკი ვნახე, რომ ძლივსლა მიდიოდა დილიჯანსი, ლოდინი ვეღარ შეეძელ, მეეტლეს ცოტა რამ ფული ვესესხე, ჩავხტი და ირემივით შევეუდექე მთას; პირდაპირ გადავჭერ, ბილიკით. მივრბოდი, რაც ძალი და ღონე მქონდა, ძლივსლა ვსუნთქავდი და ჭირის ოფლს მასხავდა ფიქრი, რომ საწყალი ივანე იქნება კიდეც მივიდა დანიშნულ ადგილზე და, რაკი იქ არ დავხვდი და ლოდინი არ შეეძლო, წავიდა კიდეც ჩემზედ გამწყრალი. ისე ავიარე მეტტონი, დრულინგენი და რამდენიმე სხვა სოფელი, რომ ერთს წამს არსად გავჩერებულვარ. სამი საათი იქნებოდა, როდესაც ფენეტრანგში მივედი, შევარდი დუქანში და დახლიდარს ვკითხე:

— იქნება წავიდა კიდეც?

— ვინა?

— ვინც მე შელოდა.

— მოხუცებული ჯარისკაცი?

— დიად.

— კარგა ხანი გელოდა, მაგრამ, ერთი საათი იქნება რაც წავიდა. ძალიან მეწყინა: საწყალი ჩემი სომის იმ სიშორეზე ამოვიდა და მე კი აქ არ დავხვდისი რა წელმოწყვეტილი წავილოდა!

სადილი იქვე დუქანში გიახლით; იქვე დავწერე ჩემს მეგობართან წიგნი და დაწვრილებით ავუხსენ ჩემი დაგვიანების მიზეზი. წერილი მევე ჩავიტანე ფოსტაში. დაღონებული, გაჯავრებული გა-

მოგრობდი შინისკენ; ტყუილი უთქვამს, ვისაც დედაკაცის გულჩვილობა უთქვამს: დედაკაცი თავმოყვარეა და ასე ჰგონია, ჩემს მეტი არავინ არ უნდა უყვარდეს მამაკაცსო.

ფალსბურგში ძალიან გვიან მივედი. ქალაქის კარი დაკეტილი იყო და ბევრი ვუყვირე, მანამ მეკარე გაიღვიძებდა და კარს გამოიღებდა.

ჩვენს დუქანთან რომ მივედი, სინათლე დავინახე დარაბებიდან. კარი დაფარაკუნე და მაშინვე მარგალიტა გამოვიდა. თვალები დაწითლებული ჰქონდა, ეტყობოდა ბევრი ეტირა. მინდოდა ბოდიში მომეხადა, რომ ისე გაჯავრებული წავედი, მაგრამ ისე გაეხარდა ჩემი მოსვლა, რომ ხმაც არ ამომადებინა და პირიქით, თითონვე აღიარა თავის შეცდომა. მეგონა გაჯავრებული იქნება-მეთქი ჩემზედ, მაგრამ ბოდიში თითონვე მოითხოვა და მას შემდეგ უფრო პატივისცემით მექცეოდა, ვიდრე მანამდე.

უნდა იცნოთ ქალის გული, რომ უკეთ დაიმორჩილოთ. ქალს დაურიდებელი, პირში მთქმელი კაცი უყვარს, რომელიც ყოველთვის პირდაპირ ეტყვის თავის შეხედულობას; ქალს მართო მაშინ უნდა შეუხირდეს კაცი, როდესაც დარწმუნებით იცის, რომ მართალი თითონ არის; თუ ერთი გამტყუნდა, წასულია იმის საქმე: ისე დაამცირებს, რომ ფლოსტში ჩაკუმშავს და სულ ასკიკუკას ათამაშებს.

ამ ამბავმა უფრო დამიტკბო მარგალიტა. ის დღე იყო და ის: დილით წერილებს მე ვხსნიდი და ბრძანებას და განკარგულებას მე ვაძლევდი; რასაკვირველია, მარგალიტას დავეკითხებოდი ხოლმე, როცა სამძიმო საქმე გამოჩნდებოდა რამე.

ეს ყველა კარგი, მაგრამ ივანეს რომ ვერ დავხვდი, ეს კი ძალიან მაწუხებდა, რადგან ომი თანდათან ცხარდებოდა და იქნება ისე მომკვდარიყო სადმე, რომ მკვდარიც ველარ მენახა. ჟურდანი რეინს გავიდა თავისი ჯარით და მარჯვენა ნაპირს აჰყვა. ყველას გვეგონა, პირობა შეუტრავთ და, ახლა პიშეგრუ გავა წყალს, რომ ერთად დაეცნენ მტერსაო. სულ იმის მოლოდინში ვიყავით, შეერთებული ჩვენი ჯარი დაეცემა მტერს და წინ გაირეკსო; მაგრამ აგერ სამი კვირა გადიოდა, და პიშეგრუ არც კი იძროდა. ჟურდანი ამ დროს პიშეგრუს იმედით წინ მიიწევდა და ერთხანად ძალიან საშიშ ყოფამიაც იყო, რადგან ორივე მხრიდან მტრის ჯარებს შუა მოექცა. იჭვი აღგვიძრა პიშეგრუს საქციელმა, — აქაც ხომ დალატი არ არისო, და ბოლოს რწმენადაც გადაგვექცა, რომ, თუ არ მოლალატე, ისე უმწეოდ ჟურდანის ჯარს კაცი არ დასტოვებდა. ბოლოს ხმა გავარდა, პიშეგრუ დაიძრა, რეინს გავიდა და მანჭეიმი აიღო უომრადო. მთელი აღზას-ლორენი გამარჯვებას ხარობდა. ის-ღა გველანდებოდა ყვე-

ლას, რომ ყურდანი და პიშეგრუ შეერთდებიან ჰეიდელბურგში, მტრის ჯარს ორად გაჰყოფენ და ჯერ ერთს დაამარცხებენ, — მერე მეორეს. ძნელი კი არ იყო ამ ოცნების განხორციელება: პიშეგრუს რომ წინ წაეწია მთელი თავისი ჯარით, ჰეიდელბურგი ჩვენი იყო. მაგრამ სულ სხვანაირად მოიქცა: ჯარი გააჩერა და ყურდანისკენ მარტო მცირე ორი რაზმი გაგზავნა, რომელიც მტერმა შეიმწყვდია და შემუსრა. ჰეიდელბურგი გამარჯვებულ მტერს დარჩა. ყურდანი იძულებული შეიქნა რეინს უკანვე გამოსულიყო, თორემ გზას შეუკრავდნენ. ამის გამგონე პიშეგრუს უკანვე დაბრუნდა, ოღონდ გაღმა მანქანებში სრულიად უსაფუძვლოდ დასტოვა ცხრა ათასი კაცი, რომლებიც ტყვედ დარჩა მტერს.

ამ ხნის განმავლობაში ათასობით მოჰქონდათ ჩვენსკენ დაჭრილები. საავადმყოფოებში ნახევარიც ვერ დაეტიეთ და კერძო სახლებში ვაწვენდით. მოქალაქეებმა ათხოვეს ლოგინი. ვინც პირველად ხედავდა დაჭრილებს, გულგახეთქილები იყვნენ იმდენი სისხლით და ტანჯვა-კვნესით; უკვირდათ: ომის ამბებს რომ იწერებინა გაზეთებში, სულ ათს, ოცს კაცს ასახელებენ მოკლულს და დაჭრილს და, რა ღვთის რისხვა იყო, ამდენი ხალხი სად დაიჭრაო? ის კი არ იცოდნენ, რომ გენერლები, ათასი კაცი რომ მოჰკლდომოდან ბრძოლაში, თავიანთ მოხსენებაში ათსა სწერდნენ და ასე ატყუებდნენ საზოგადოებას.

ერთ დილას, როდესაც დუქანი გავალე, რამდენიმე ურემი კიდევ შემოვიდა დაჭრილებით. ჩვენს პირდაპირ დახურულ ბაზარში დოშაკები გაეშალათ და ახლა იქ უნდა დაეწვინათ უბედურები, რადგან სხვაგან ადგილი აღარსად იყო. გიორგობისთვის დამღევი იყო, საკმარისად ციოდა. კიდევ კარგი, რომ სიცივეები დაიჭირა, თორემ ისე მოსწამლავდა ჰაერს იმდენი ხალხი, რომელთაგანს ათში ერთს არა ჰქონდა ჭრილობა შეხვეული, რომ ჰიერი გაჩნდებოდა ქალაქში.

ურემები რომ გაჩერდნენ და დაჭრილები გადმოჰყავდათ, სამხედრო აფთიაქის გამგე დაპრეო მოვიდა: ერთ დაჭრილს შენი ნახვა უნდაო. მაშინვე წავედი და დედა ბოძის ძირში, შიგ შუა ბაზარში, ივანე სომი კი დამხვდა დოშაკზედ მისვენებულს. ისე გაყვითლებულიყო, ისე ჩასცივიწონდა თვალები, რომ ძლივსლა ვიცანი.

— მე ვარ, მიშელი. ნუ თუ ველარა მცნობ?

დავიწიე, მინდოდა მეკოცნა, მაგრამ იმისთანა საშინელი სუნი მეცა, რომ კინალამ გული წამივიდა და ბოძს მოვეჭიდე. ივანემ ეს შენიშნა და მითხრა:

— ტყვია მაქვს ბარძაყში. იქნება მომიხერხო როგორმე, მიშელ, რომ სხვაგან დამაწვინონ. ჭრილობას მე თითონ შევიხვევ.

მაშინვე ვიფიქრე, შიხ წავიყვან-მეთქი, მაგრამ იმ საშინელი სუნისთვის რა მექნა?.. ჩემდა სანუგეშოდ მარგალიტა უკან დამდევენებოდა.

— ამ კაცს იცნობ, მიშელ? — მკითხა სრულიად მოულოდნელად.

— როგორ არ ვიცნობ, ეს ჩემი ძველი მეგობარია, ივანე სომია.

ჯარისკაცებს უბრძანა, ჩვენსა აიყვანეთო. ზემო სართულში ერთი ოთახი გვქონდა, იქ დააწვინა. მე კი ველარ გავუძელ იმ საშინელებას და იქით წავედი.

— ღმერთო ჩემო! საშინელება არ არის, რომ უძვირფასესი მეგობარი ასე საზიზღრად და გულის ასარევად გამიხადე!

მართალი უნდა თქვას კაცმა, ამისთანებში დედაკაცი მეტისმეტი გულმაგარი და ამტანია: ალბად ღვთის განგებამ მოგვანიჭა იგი ნუგეშისმცემლად, თორემ ავადმყოფს მომვლელი არავინ ეყოლებოდა.

მარგალიტას ყველაფერი მოემზადებინა ზემოთ და, სომი რომ მოიყვანეს, სრულიად მზად დახვდა. მე ვერ შევძელ კიბეზედ მაინც მივშველებოდი საბრალოს. ღმერთმა ხომ იცის, ათასი იმისთანა და უფრო უსაშინელესი მინახავს ვანდეში, მაგრამ ზიზღი კი არსად მიგრძენია. ან როგორ უნდა შეიზიზღებოდა ვინმე, როდესაც მეც იმავე განსაცდელში ვიყავ და დღეს თუ არა ხვალ შეიძლებოდა მეც სხვასავით დავეჭერ ერთ უპატრონო ტყვიას და უარესი საზიზღარი გავმხდარიყავ.

ისე გავიდა მთელი ერთი კვირა, რომ მარგალიტას და ექიმ შტეინბრენერის გარდა სომის ოთახში არავინ ასულა. მოხუცებულმა ბებებამ დამელმა, რომელიც ლუკმაპურს ავადმყოფების მოვლითა შოულობდა, ვერ გაუძლო იმ სუნს და თავი დაანება ავადმყოფს. კრილობას მარგალიტა უხსნიდა, ჰბანდა და უხვევდა. ბოლოს ტყვიაც ამოაცალეს ექიმმა შტეინბრენერმა და მისმა თანამემწემ პიეფორმა; ხომ კაჟივით მაგარი კაცი იყო სომი, და ისე გმინავდა, რომ ქვემოდ ღუქანში ველარ გავძელ და სხვაგან წავედი.

ერთი სიტყვით, საშინელება იყო იმისი კრილობა.

მესამე კვირის დამლევს ჩვენი სომი წამოდგა კიდევ ლოგინიდან და ყავარჯენზედ დაყრდნობილმა სიარული დაიწყო ოთახში. თან ძველებურად ხუმრობდა:

— ჰა, მიშელ! ერთხელ კიდევ დავახწიე თავი სიკვდილს! ასე ეგონა სულელს, ეს არის ვაჯობეო! მაჯობებდა კიდევ, შენი ცოლი რომ არ მოველინა ღმერთს! მოვლას ნუ იტყვი შენ, მკვდარს გააცოცხლებს შენი ცოლის გაკეთებული შეჭამადი!

მართალსაც ამბობდა: რამდენი უბედური გამოესალმა წუთისო-

ფელს მართო იმიტომ, რომ მოვლა არა ჰქონდა? მრავალი ხალხი დაიხოცა მაშინ ჩვენს ქალაქში და სულ ერთად ვმარხავდით ახალს სასაფლაოზე. დიდი ხნის შემდეგ, გზა რომ გაჰყავდათ, იმ სასაფლაოს კრა დაუწყეს და ძვლები ამოყარეს. განცვიფრებული დარჩა ყველა მნახველი: — საიდან შეარჩიეს სულ ასეთი ყმაწვილი ბიჭები, რომ ერთი არ არის, რომ კბილი აკლდესო.

მართლაც სულ ყმაწვილი ბიჭები იყვნენ, 20 — 30 წლისა.

პიშეგრუსა და უბრწყინვალეს თავად კონდეს ჩუმი მოლაპარაკება ჰქონდათ; პიშეგრუს ჰუნინგის ციხე უნდა დაეთმო მტრისთვის და მერე ერთად მისულ იყვნენ პარიზის ასაღებად. პიშეგრუსმ ფულის და წარმატების გულისთვის გააწყვეტინა მტერს თავისი ჯარი: მეფის მომხრე იყო და ორი კვირის განმავლობაში დალატით უფრო მეტი რესპუბლიკელი დაახოცვინა, ვიდრე ქვეყნის მფარველმა კომიტეტმა მოლალატენი და დიდებულნი დახოცა გილიოტინით თვრამეტი თვის განმავლობაში! მოგვდგომიან და უსინიდისოდ ჩვენ კი გვიკეთინებენ: ტერორს! იქნება ჰგონიათ, ჩვენი გლეხკაცი ვირი იყოს და ავისა და კარგის გარჩევა არ იცოდეს? სცდებიან! თუ აქამდე არ იცოდა, და ვისაც მიენდო, ყველამ უღალატა, დღეს კარგად იცის: დღეს ჩვენს გლეხკაცს დიდროვანი და კაზმული სიტყვები კი არა, ჭეშმარიტებადა უნდა.

ხმამალა კი ვერაგინ ამბობდა პიშეგრუს დალატს: პოლანდიაში გამარჯვებული გმირი იყო და ძნელი იყო სამშობლოს მასახლებელი შვილი გაგვეწირა და მოლალატედ გამოგვეცხადებინა. მეც დაჩუმებული ვიყავ, მაგრამ ჩამოვიდა თუ არა დუქანში სომი და დაწვრილებით მიაბმო ჩვენი ჯარის მოძრაობა, მაშინვე დავრწმუნდი. რომ ორივეს ერთი და იგივე შიში გვიდრღნიდა გულს. იმანაც აღარ დამალა და პირდაპირ წამოიძახა იმავე კილოთი, რომლითაც პარიზელი შეთქმულნი ლაპარაკობდნენ 92-ში:

— სად არის მარატი, ერთგული მეგობარი ხალხისა?! აბა მაშინ განეზრახა ვისმე ლალატი? განა მარატს გამოეპარებოდა რამე? ამიტომ დასცეს გულში დანა და! მომავალს მართო ისა ხედავდა: იმან წინადვე იცოდა, რა კაცები იყვნენ დიუმურიე, კუსტენი, ლაფაიეტი. აბა ცოცხალი ყოფილიყო, თუ თავისივე ხელით არ წაეხრჩო პიშეგრუს! ასე კი არ აცლიდა, წადი და ჩვენი ჯარები მტერს ახოცვინეო!

და თვალცრემლიანი შორს, შორს, სადღაც გაიციქრებოდა, თითქო იქიდან მოელის მარატის გამოჩენასო. მარგალიტა, ელოფ კოლენი, რაფიელ მანკი და სხვა პატრიოტები დანტონზედ და რობესპიერზედ ლაპარაკობდნენ, მაგრამ სომმა შეაწყვეტინა სიტყვა:

— მართალია, ძალიან ყოჩაღი კაცები იყვნენ... მაგრამ ბალები იყვნენ, ბალები! ერთმანეთში ჩხუბი დაიწყეს. მარატი რომ ყოფილიყო, მოარიგებდა, იმიტომ რომ იმას უფრო მეტი ჭკუა და შორსმჭვრეტელობა ჰქონდა, ვიდრე სხვებს ყველას ერთად. მარატი რომ ცოცხალი ყოფილიყო, რობესპიერი თავის დღეში ვერ მოჰკლავდა დანტონს, და ტალიენი რობესპიერს! მაგაზედ მგონი ყველანაირადამეთანხმებით. მეფის მომხრეებმა ძალიან კარგად იციან ეს და, მერწმუნეთ, მარატისთანად დიდებულებს არც არავინ სძულვობიათ და არც არავინ შესძულდებათ. ეს სიძულვილი გახლავთ მარატის დიდება! მარატის სახელი უკუნიითი-უკუნისამდე საშინელებად დარჩება არისტოკრატებისათვის და ეს დარჩება იმის ხელუქმნელ ძეგლად.

ჭრისტეშობისთვეც ჩვენთან გაატარა სომმა. მართალია, რაზმიდან თავისას იღებდა, მაგრამ პურს ჩვენთან ჭამდა და სულ „ხალხის მეგობრის“, ესე იგი მარატის ხსენებაში იყო. ჭრილობა მოუჩა, მაგრამ გული გაუტეხა და აწმყოში და მომავალში კარგს აღაჩანს ხედავდა. ჩვენი ბიჭიკო ძალიან უყვარდა და ხშირად ეთამაშებოდა.

ნეტავი რესპუბლიკა განსაცდელში არ იყოს, რომ დავრჩე და ამ პატარას ადამიანის უფლებანი შევაგნებინო, იძახდა ხოლმე სომი.

მაგრამ უიმისოდაც ყოჩაღი ბიჭი იყო ჩემი პეტრე: იმოდენა ხალხი, — მამაჩემი, მარგალიტა, ელოფ კოლენი და სხვა პატრიოტები სულ იმას შევხაროდით და ხელისხელ საგომანებელ მარგალიტივით ვათამაშებდით. ახლა პაპაც უნდა მოსვლოდა და შოველისთან კარგად, მგონი, ვერავინ შეავგნებინებდა ადამიანის და მამულიშვილის უფლებებს და ვალდებულებებს.

VII

სწორედ იმ დროს, როდესაც პიშეგრუ რეინს გამოვიდა და ისე უღვთოდ ახოცვინა თავისი ჯარები, მოხდა ახალი არჩევნები დეპუტატებისა. ცოტა ხანს უკან გაზეთებში კონვენტის განცხადებაც გამოვიდა, რომლითაც იგი აღიარებდა დამთავრებულად თავის მოვალეობას. ახალი დეპუტატები, წლოვანებისდა გვარად, განაწილებულიყვნენ საერო კრების და ხნიერთა კრების წევრებად. საერო კრებას თავისთავანი ორმოცდაათი კაცი დაენიშნა, რომელთაგან უფროსთა კრებას ამოერჩია ხუთი გამგე სახელმწიფოისა: ლარევეირ-ლეპო, ლეტურნერი, რევებელი, ბარარი და კარნო, რომელიც სიესის ალაგას დაენიშნათ, რადგან სიესს უარი განეცხადებინა. გამგეთაგანი თითო უნდა გამოცვლილიყო ყოველ წელს, თუმცა შეიძ-

ლებოდა ხელმეორედაც ამოერჩია გამავალი წევრი გამგეობისა ხნიერთა კრებას.

კონვენტი 26 ღვინობისთვის დაიშალა 1795 წ. სრული სამი წელიწადი და ოცდათხუთმეტი დღე განაგებდა საფრანგეთის ცხოვრებას და რვა ათასზედ მეტი განაჩენი დაადგინა სხვადასხვა საქმეებზედ. თავდაპირველად ერთგულად ემსახურებოდა რესპუბლიკის დამყარებას, მაგრამ რობესპიერის მოკვლის შემდეგ, ვინც კი ნამდვილი რესპუბლიკელი იყო, იძულებული შეიქნა ჩუმად ყოფილიყო, რადგან უმრავლესობა მეფის მომხრეთ და ექირონდელებს დარჩათ და კონვენტი ბოლოს დროს რესპუბლიკის მტრად გადაიქცა. ამიტომ იყო რომ ყველა პატიოსან მამულიშვილს გაუხარდა კონვენტის დაშლა.

იმავე დღეს შოველის წიგნი მივიღეთ, ხვალ მოვდივარო და მეორე დღეს, სამშაბათს, როდესაც ბაზრობისა გამო ღუქანი საესე იყო ხალხით, თითონაც შემოვიდა თავისი პატარა აბგით. როგორ იამებოდა, იმდენ მუშტარს რომ ნახავდა! დავინახეთ თუ არა, მაშინვე გამოვცვივდით დახლიდან და წინ მივაკვებენით. მხიარულად გადაგვკოცნა და გვითხრა:

— კმარა, შვილო, კმარა! თქვენს საქმეს მიხედეთ.

ბიბლიოთეკაში შევიდა, გათბა და მთელი სამი საათი იქ იდგა და თვალყურს ადევნებდა ჩვენს ვაჭრობას. ეტყობოდა, ძალიან კმაყოფილი იყო ჩვენი საქმისა. რაკი ხმა გავარდა, შოველი მოსულაო, დამრულიყო დიდი და პატარა და ყველა იმის სანახავად მოდიოდა. ხანდახან, როცა კი ცოტა თავისუფლად დავრჩებოდით, ჩვენც შევიდოდით ხოლმე, ერთ-ორ სიტყვას ვეტყოდით და ისევ ღუქნისკენ მივეშურებოდით.

პირველი საათი იყო, როდესაც ბაზრობა გათავდა, სოფლელი ხალხი შინისკენ გაემგზავრა და ჩვენც პურის საქმელად დაესხედით. მარტო მაშინ მოვახერხეთ შოველთან დალაგებით ლაპარაკი. ძალიან უხაროდა, რომ ვაჭრობა დავიწყეთ და ამოდენა მუშტარი შემოვიჩვიეთ: რაკი აგრე მოიზიდეთ ეს ხალხი, ახლა პატრიოტულის წიგნების და გაზეთების გავრცელებაც გავგვიადვილდებაო. პატარა პეტრე ხელში ეჭირა, მიდი-მოდოდა ოთახში და ამბობდა:

— თავდაპირველადვე რომ ასე დაგვეწყო, ეჯობინებოდა. მთელს ალზას-ლორენს შემოვივლიდი ხოლმე წელში ორად მოხრილი ტვირთისაგან და გაყიდვით კი ბევრს არა ვყიდდი. ეხლა კი თითონ ხალხი მოდის ჩვენსა და ჩვენც უნდა ვეცადნეთ სულ ყველაფერი გვქონდეს, რასაც კი მუშტარი მოგვთხოვს. კლუბებს გვიკეტავენს ყველა ოჯახში, თვით მიუვალ მთაშიც კი, კლუბი გვიქნე-

ბა გამართული; იმის მაგივრად რომ საღამოობით ძველებურად ხლაპრებს ისმენდნენ, პატარ-პატარა წიგნაკებს შევაჩვევთ, რომლებშიც აწერილი იქნება თავგანწირული მოღვაწეობა მამულიშვილთა, მათი გმირული თავგამოდება სამშობლოს დიდებისათვის და სხვადასხვა გამოკვლევანი და გამოგონებანი მრეწველობის წინმსვლელობისათვის. იმ წიგნაკებში იქნება სუყველაფერი, რაც ადამიანს გამოადგება, გონებას გაუხსნის, ასწავლის და მოუტლავს ცრუმორწმუნეობას, რომელიც ღუპავს მას სულიერად და ხორციელად.

ძალიან კმაყოფილი იყო, ჩემი ძველი მეგობარი სომი რომ ნახა. ერთი შეხედვითვე ღირსეულად იცნეს ერთმანეთი და ისე მიესალმნენ, თითქო დიდი ხნის მეგობრები ყოფილიყვნენ.

იმ საღამოს კიდევ მოვიდნენ რაფიელ მანკი, ელოტ კოლენი, ახალი რაბბი გუგენჰეიმი, არონ ლევი, ნათლიაჩემი და მამაჩემი და მხიარული მისალმების შემდეგ პოლიტიკაზედ დაიწყეს ლაპარაკი.

შოველმა გვიამბო, რა მდგომარეობაში იყო ჩვენი საქმეები: იმისთანა უთანხმოება ჩამოვარდა დღეს ჩვენში, იმისთანა მტრობა და ერთმანეთის გაუტანლობა, რომ ხალხი სრულიად დაჰკარგავს რესპუბლიკის იმედს და რწმენას, თუ არ შევერთდით პატრიოტები და ერთად არ შევებრძოლეთ მეფის მომხრეებსო. ამაზედ ნათლიაჩემმა მიუგო, ახალი კონსტიტუციის ძალით უზრუნველყოფილია ყოველი კაცის საკუთრება და მონაგები და რევოლუციაც დამთავრებულად უნდა ჩაითვალოსო. ეს სიტყვები არ მოეწონა შოველს და აი, რა პასუხი უთხრა:

— ძალიან სცდები, ჩემო ივანე, თუ გგონია, რომ ახალმა კონსტიტუციამ დაამთავრა კიდევ რევოლუცია! დაამთავრა კი არა, პირიქით სუყველაფერი ხელახლად განსახილველად გაგვიხადა. ეგ კონსტიტუცია მეფის მომხრეთა და ბურჟუაზიის, ესე იგი შემძლებელთა კონსტიტუცია არის, რომელთაც ისე მოაწყეს საქმე, რომ ხალხს ხელიდან გამოაცალეს მართებლობა და ყოველი უფლება, რომელიც მას მიანიჭა მტარგალებზედ გამარჯვებულმა რესპუბლიკამ. რომ მოგახსენებთ, ხალხს ყოველივე გამოაცალეს ხელიდან მეფის მომხრეებმა და შემძლებლებმა-მეთქი, მე იმ შემძლებელთა შესახებ მოგახსენებთ, რომელნიც თუმცა ხალხის შვილნი არიან, მაგრამ თაკილობენ ხალხს. აქაოდა ფული ვიშოვეთო, დიდკაცობაში უქანასკნელობა ურჩევიათ თავიანთ სწორებში პირველობას. ჩვენდა სანუგეშოდ შემძლებელნი სუყველანი ასეთი საზიზღარნი არ არიან, არიან იმისთანებიც, რომელნიც თუმცა შეძლებით და სწავლა-განათლებით ძალიან დაწინაურებულან და დაშორებიან თავიანთ მშობელ

ხალხს, ძაიხც ხალხის უერთგულეს შვილად დარჩებილახ; ზოგი ქარხანის პატრონია, ზოგი ვეჟილი, ზოგი მართლმსაჯულების მოხელე, ზოგი ექიმი, ზოგი მწერალი, არტისტი, — ერთი სიტყვით ყველანი საქმის კაცები არიან და სამშობლოს დიდებისათვის იღწვიან სწორედ ისევე დაულალავად, როგორც გლეხკაცი.

ამათ თავისუფლების მეტი არა უნდათ რა; თავისუფლება არის მათი ძალა და მომავალი. მეფეს საერო კრება ამ ბურჟუაზიამ დაანიშნინა და თავისი სიმაგრით და გამჭირახობით იმდენი ქნა, რომ მეფესაც აჯობა, დიდებულთაც, სასულიერო წოდებასაც. მაგრამ, თუ თავისუფლება არ იქნა, ეს ბურჟუაზიაც დაიღუპება... საუბედუროდ, იმ ბურჟუაზიასთან ერთად, რომელიც სათავეში უდგა საფრანგეთის ცხოვრებას და განათლებისკენ მიუძღოდა სამშობლო მხარეს, დიად, ამ ბურჟუაზიასთან ერთად, სხვაც არის, რომელიც წელან მოგახსენე და რომელიც ყოველთვის ფინია ძალღვივით ერთგული ყოფილა მართებლობისა და დიდებულების ნასუფრალში გაუცვლია ყოველი თავისი ღირსება; ესენი ყოველთვის უერთგულესი მონები ყოფილან მართებლობისა და მამასადაჟე მოსისხლე მტრები ხალხისა: ამათ არ უნდათ თავისუფლება. თავისუფლება — გამარჯვებაა შრომისა, ნიჭისა და პატიოსნებისა და აბა რაში ენდომებათ მუქთახორა გაიძვერებს თავისუფლება? ის არ ურჩევნიათ, მის უდიდებულესობისაგან მზამზარეულად მიიღონ წყალობა, — წადით და, როგორც გენებოთ, ისე კრიკეთ და პარსეთ ხალხიო? რა ეხარჯებათ ამაში? ბავშვობიდანვე გაწვრთნილნი არიან დიდებულთა თაყვანის საცემლად და ისე იხრებიან წელში, ისე იშვლენ პენ ქუდს და ისე ხობავენ მუხლის თავებზედ, რომ... დიდებულთა თაყვანისცემაა, სხვა ხომ არაფერი! დიდი რამ არის, წელში საჰად მოხრა და მუხლის თავებზედ ხობიალი?! დაჩოქილნი კი არა, ყირამალა ივლიან, თუ კი ამით ასიამოვნებენ ვისმე და წყალობას დაიმსახურებენ! იმსახურებენ კიდევ: აკი სიმდიდრე მათ ხელშია და ძალა. სწორედ ამ წუწკამ ბურჟუაზიამ შექმნა უკანასკნელი ჩვენი კონსტიტუცია; მართალია, ჩვენც იქ ვიყავით, მაგრამ რობესპიერის მოკვლის შემდეგ 63 ჟირონდელი ჰიემატა მეფის მომხრეებს და უმრავლესობა იმათ დარჩათ. ბევრიც რომ გვეთქვა, არა გამოვიდოდა რა, რადგან კენჭითა გვჯობნიდნენ. გვაჯობეს კიდევ და ყველაფერი თავისებურად მოაწყეს: დეპუტატების არჩევნებიც, რომელნიც პირდაპირ ხალხს კი არა, ამომრჩეველთ ამოარჩევიან, საერო კრებაც, რომელიც ორად გაყვეს, და გამგეობაც.

ვინ რას უპასუხებდა შოველს? ყველანი ვგარძნობდით, რომ თვით ქვეშაირიტება ღალადებდა მისი პირით.

— დიად, — განაგრძო შოველმა, — ესეც არ იკმარეს და საშინელი მტრობა და განხეთქილება ჩამოაგდეს ხალხსა და მის ერთგულ ბურჟუაზიას შორის: ერის წარმომადგენელის არჩევა და თვით დეპუტატობა მარტო იმას აქვსო, — გამოაცხადეს; — ვისაც შემოსავალი აქვს არა ნაკლები ორასი მუშის დღიური ქირისა. ამით ერთმანეთს შეაძულეს ხალხი და შემძლებელნი მისი შვილნი, ერთმანეთს გადაამტერეს. რაღა აკლიათ ახლა? დარწმუნებულნი არიან, რომ როგორც რევოლუციამდე არას ზოგავდა დიდებულთა და შეძლებულთათვის ხალხი, ახლაც არას დაზოგავს და გარეთ მტერს მოუგერებს და შინ კიდევ არჩენს და აფუფუნებს მათ; ხალხი იმუშავებს, — თუ საჭირო იქნება, სისხლს დაღვრის და ისინი კი... ისინი განაგებენ საფრანგეთის ცხოვრებას, მისდგებიან და ისე გაყვლეფენ ქვეყანას სვავივით გაუშაძღარნი, რომ უწინდელი ბატონყმობა დაგვანატრონ. ხალხს დაამშევენ, ჯიბეებს დაიტენენ, მაგრამ თითონ არც კი გამოჩნდებიან და პასუხისგებას მეფეს აკისრებენ. ახალ კონსტიტუციაში ცხადად არის ნაჩვენები მეფის საჭიროება: მეფის ნაცვლად დროებითი „გამგეობა“ არის დაწესებული. რამდენიმე დეპუტატმა კიდევ ითხოვა, ეხლავე ამოვირჩიოთ მეფეო. მათდა საუბედუროდ, ლუი XVIII არაფრად ეჭაშნიკება კონსტიტუციით შეზღუდული მეფობა და იმედი აქვს ისე აბრძანდეს მამაპაპურ ტახტზედ, რომ სრული ბატონი და პატრონი იყოს თავისი ერის და ქვეყნისა; მას, როგორადაც ლუი XVI და ლუი XVII, ღვთისაგან აქვს მინიჭებული მეფობა და მაშასადამე ვერავის შეალახვინებს თავის უფლებებს! ლუი XVIII ნებავს ძველებურად ყოვლად შემძლებელი ბრძანდებოდეს და ძველებურად დიდებულნი ახლდნენ და არა ბურჟუაზია! ამაში კი ველარ რიგდებიან მეფე და ბურჟუაზია... მაგრამ ეგ არაფერი! არა ნებავს? გამგეობა ხომ აქ არის! საქმე ის იყო ხალხი დაემორჩილებინათ! ახლა დარწმუნებულნი არიან, რაკი ყოველი უფლება გამოეცალეთ, ხალხი ქედს მოიხრის და ძველებურად გვემსახურებაო. უგუნურნი!

მწარედ ჩაიცინა. და, რადგან ყველანი სმენად ვიყავით გადაქცეულნი, განაგრძო: იცით ეს რას მოასწავებს? გაუთავებელ რევოლუციას. ბრმა უნდა იყოს კაცი, რომ ამას ვერა ხედავდეს. ერთი კი გაჩნდეს დანტონი და, დღეს იქნება თუ ხვალ, წლეულს თუ ოცის წლის შემდეგ, ეგ სულერთია, — ჯარი მზად დახვდება; მზად დახვდება რევოლუციის მონატრე ჯარი, ხალხი, რომელსაც ყოველი უფლება წაართვეს და სამართალს დაანატრულეს. ერთი კი გაჩნდეს დანტონი, ერთი კი სთქვას რამე, და რევოლუცია კვლავ დაიწყობა: მეფეს განდევნიან, დიდებულნი და მოღალა-

ტენი გაიხიზნებიან და პატიოსანი მშრომელი დაიღუპება და გადატაცდება, რადგან მას დააწვება ყოველი ხარჯი. გაიძვერები და ქურდბაცაცები კი, ღვთის წყალობა გაქვთ, ხელს მოითბობენ და ჯიბეებს დაიტენენ; თუ გაჭირდა, ისინიც გაიქცევიან და მოპარულ ფულსაც გააპარებენ, ვიდრე კვლავ მეფობა, ესე იგი მათთვის სასურველი სიმშვიდე და მყუდროება დამყარდება, რომ კვლავ შეუდგნენ ხალხის პარსვას და კრეჰას. სახელმწიფო კვლავ იწყებს ცხოვრებას, მაგრამ ჭირი განუკურნავი რჩება. დანტონის მაგივრად ახლა ვინმე გამოჩენილი, ჯარის საყვარელი, მხედართმთავარი მონღოლებს ქვეყნის წყლულის გამთელებას. აშლის ჯარს, და პარიზს შეესევა, — ხალხის უფლებანი უნდა აღვადგინო!

— გიჟი იქნება ხალხი, რომ წინააღმდეგობა გაუწიოს ამისთანა მხედართმთავარს, და კვლავ იწყობა რევოლუცია და ყოველთვის ასე იქნება, ვიდრე ხალხის შვილნი, რაც უნდა შემძლებელნი იყვნენ, არ დაშორდებიან დიდებულთ და მოღალატეთ და ხალხს არ მიუღებებიან! ბურჟუაზია ხალხის განათლებული და შემძლებელი ნაწილია და სწორედ ეს ბურჟუაზია უნდა ამოუდგეს მხარში ხალხს და მოითხოვოს თავისუფლება, თანასწორობა, მართლმსაჯულება და რესპუბლიკური მართებლობა, რადგან ჩვენი ქვეყანაში სხვაგვარი მართებლობა შეუძლებელია. მაშინ გათავდება რევოლუცია. ვინდა რას გაბედავს მაშინ ხალხის წინააღმდეგ, როდესაც ხალხი და ბურჟუაზია შეერთებულნი იქნებიან? ყოველი მამულიშვილი დაჯილდოებული იქნება თავის შრომის, ნიჭის და პატიოსნების დაგვარად. დამშვიდდება, დაწყნარდება ჩვენი ცხოვრება და შიში აღარავის ექნება, რომ წამომვიღოს ვინმე და მთელი წლის ჭირნახულს ისე წამართმევს, რომ ლუკმა მენატრებოდესო. დაიხსომეთ ჩემი სიტყვა, და ყმაწვილკაცობა ჯერ კიდევ მრავალ რევოლუციას ნახავს, ჯაჭვივით გაბმულს და დაუმთავრებელს იმ დრომდე, ვიდრე ხალხი და ბურჟუაზია სრულიად შეერთდება. უკანასკნელი ჩვენი კონსტიტუცია კი ხალხის და ბურჟუაზიის დაშორებაზედ არის დამყარებული და მრავალ უბედურებას გვიქადის. რევოლუციის დამამთავრებელი კი არ არის ეს კონსტიტუცია, როგორც ჩვენი ივანე ბრძანებს, რევოლუციის ამტეხია და ნახავთ, რა საშინელი ბრძოლა გამოიწვიოს ამ ცოტა ხანში და როგორ გადაჰკიდოს ძმას ძმა და მამას შვილი.

ყველანი გაჩუმებულნი ვისხედით; სომმა კი ვეღარ გაუძლო თავის გულისთქმას, მივიდა შოველთან, ხელი ჩამოართვა და უთხრა:

— ჭეშმარიტია, მამულიშვილო, ჭეშმარიტი, რასაც ბრძანებ. მე

სწორედ მაგ აზრისა ვარ. რევოლუცია მარტო მაშინ გათავდებდა. როდესაც ხალხის განათლებულნი და შეძლებულნი შვილნი, რომელთაც თქვენ ბურჟუაზიას უწოდებთ, წინ გაუძღვებიან ხალხს და მკიდრო საძირკველს ჩაუყრიან რესპუბლიკას. ბურჟუაზია თავია ხალხისა, მისი მასწავლებელი და წინამძღოლი. საუბედუროდ, ხალხს აღარა ჰყავს მარატი, დანტონი, რობესპიერი, სენჟუსტი, კაპილ დემულენი; ესენიც ხომ ბურჟუაზიის წოდებისანი იყვნენ? — ზოგი ვეჭილი იყო, ზოგი ექიმი, ზოგი მასწავლებელი, — მაგრამ მხარში უდგნენ ხალხს, წინ მიუძღოდნენ, გზას უკვლევდნენ და სწორედ იმათი წყალობით გავიმარჯვეთ 1789 წ.

— მართალია, — უპასუხა შოველმა, — აღარა გვყვანან ეგ სამავალითო ხალხის შვილნი; რევოლუციამ ინაცვალა ყველანი. კიდევ მაგითომ წათამამდნენ დიდებულნი, რომ დარწმუნებულნი არიან პარიზელ ხალხს მოთავე აღარა ჰყავსო. გარდა ამისა, თვით ხალხიც მოიქანცა ამდენი არეულობით და შიმშილით. ეხლა მეფის მომხრენი გაფაციცებით დაეძებენ გამბედავ გენერალს, რომ ჯარის ნდობა მოიპოვოს და რესპუბლიკა დაამხოს. თუ იპოვეს ამისთანა გენერალი, ცუდადაა ბურჟუაზიის საქმე! ბევრიც რომ იყვირონ, გვიშველეთო! ხალხი იმათ აღარ მიეშველება, რადგან ხალხა აგრე მალე არ დაივიწყებს გუშინდელ მათ ლალატს. ასე ეგონათ, გათავდა ბრძოლა და, მაშასადამე, რაღად გვინდა ხალხი? ბატონობა ჩვენ და შრომა მაგათო!... სულ სხვა იქნებოდა, რომ ძმურად მოჰქცეოდნენ ხალხს. ცდილიყვნენ მის განათლებას და წინსვლას; თავისი წილი გავლენა მიენიჭებიათ ქვეყნის მართვა-გამგეობაში და ერთობ ღირსეულად დაეჯილდოვებინათ ღირსეულნი. დრო არის, პანღურის ცემით დავირეკოთ ის ვაჟბატონები, რომელნიც სრულიად არას გვირიგებენ და ასის ოდენას კი მიირთმევენ! დრო არის, მათ ადგილზე პატიოსანი მშრომელი კაცები ჩავაყენოთ! დრო არის, კაცის ღვაწლს ვცემდეთ პატივს და არა მის სიმდიდრეს და ჩამომავლობას. ჩვენი რევოლუცია — ხალხის გამარჯვებაა. თუ ეს ვერ შეუდგნია ბურჟუაზიას, და მეფის მომხრეთ მისდგომია, ისიც ისევე წაილეკება ქვეყნის პირიდან, როგორადაც მეფობა და მტარვალობა, რადგან გამარჯვებული რესპუბლიკა დარჩება და არა მარტო საფრანგეთში, არამედ მთელს ევროპაში.

დიდი აღტაცებით ლაპარაკობდა შოველი. სუყველა ვერ დამახსოვდა, რაც იმ ღამეს თქვა, მაგრამ მთავარი აზრი კი კარგად მახსოვს და, მართალია მას შემდეგ დანტონი აღარავინ მოგველენა ჩვენდა სანუგეშოდ, მაგრამ გენერლები კი რესპუბლიკის დასამხობად, რამდენიც გენებოთ.

ძალიან კმაყოფილნი დავიშალენით, რადგან აზრი გავუგეთ ახალს კონსტიტუციას. გადავწყვიტეთ, ხანდახან შევიყარნეთ ხოლმე და საქვეყნო საქმეებზედ ვილაპარაკოთო.

მეორე დღეს შოველი მარტო ჩვენს ვაჭრობაზედა ზრუნავდა. დეთრები გასინჯული ჰქონდა და კარგად იცოდა ჩვენი ქონებაც და ვალიც, მოგებაც და ზარალიც. მახსოვს, მესამე თუ მეოთხე დღეს იმდენი გაზეთები და რესპუბლიკური კატეხიზმომები დაიბარა, რომ, მეგონა, შესცდა-მეთქი: ჩვენს დღეში ვერ გავყიდდით იმდენს. შოველი კი იცინოდა:

— დაშვიდლა, მიშელ! დარწმუნებული ვარ, რომ გავასაღებ, თორემ ამდენს არ გამოვიწერდი. ნახავ, როგორ დაიტაცებენ!

იმ კვირის დამლევს სარბურგიდან წვრილად დაბეჭდილი განცხადებები მოუვიდა, რამდენიმე ათასი იქნებოდა; ხელის გულის ოდენა ქალაღზედ დაბეჭდილი იყო შემდეგი სიტყვები: ბასტიენ-შოველის დუქანში იყიდება ქალაღი, საწერ-კალამი, წიგნები, გაზეთები. ყოველგვარი საწვრილმანო და სასმელები. იქვე აქირავებენ წიგნებს ორ შაურად თვეში და სხვა და სხვა.

— რად გინდათ ამდენა, ჩემო სიმამრო? — შევეყირე გამწარებულმა, — სად დავარივებთ მაგდენს? ქუჩაში? კაცს ხომ არ დავიჭერთ, რომ სოფელ-სოფელ ვატაროთ და! თქვენ კარგად მოგეხსენებათ, რომ ჩვენმა ხალხმა ოთხში ერთმა არ იცის წიგნი და ტყუილად ჩაგვივლის ეს ხარჯი.

— არა, მიშელ, ვისაც კი ჩვენ ამ განცხადებას გავუგზავნით, ყველამ იცის კითხვა. ვისაც კი წიგნი ან გაზეთი მიჰყიდო, ან მიაქირავო, ეს განცხადებაც თან გააყოლე და, გარწმუნებ, წაუკითხავი არ დარჩება. დეე. გაიგოს ქვეყანამ, რომ ბასტიენ-შოველის დუქანში ყველაფერს იშოვის კაცი.

საუცხოო აზრი იყო სწორედ! მთელი ორი კვირის განმავლობაში ყოველ საღამოს ვისხედით ყველანი და წიგნებში და გაზეთებში ჩვენს განცხადებას ვღებდით, მეტადრე ადამიანის უფლებათა კატეხიზმომში და კალენდრებში, რადგან ყველაზედ მეტად ესენი იყიდებოდა.

სხვა ვაჭრებს კი გული უსკდებოდათ, ყოველთვის ხალხით სავსეს რომ ხედავდნენ ჩვენს დუქანს და შურიანად გაიძახდნენ:

— ნეტავი რით მიიზიდა ბასტიენ-შოველის დუქანმა ამდენი ხალხი? ისე მიეშურება იქით მთელი ჩვენი მაზრა, თითქო დღეობა იყოს რაჰე.

ზოგნი ამბობდნენ, ეგ იმიტომ, რომ ღუქანი ქუჩის კუნძულში არისო; ზოგი — იმიტომ, რომ ბაზრის პირდაპირ არისო; და ის კი არ იცოდნენ, რომ ამისი მიზეზი ერთი ბეწვა, სულ უბრალო განცხადება იყო, რომელმაც სახელი გაუთქვა მთელს ჩვენს მაზრაში ბასტიენ-შოველის ღუქანს. ხშირად მოხდებოდა ხოლმე, ჩვენი მეზობელი მეტოქე ვაჭრები სწორედ იმავე საქონელს შეიძენდნენ გასაყიდად, რასაც ჩვენ ვყიდდით. მომივიდოდა ბრაზი, მაგრამ შოველი გამოცდილი კაცი იყო და ის მამშვიდებდა:

— მით უკეთესი, ჩემო მიშელ! ვერა ხედავ, რომ უბედურთ საქთარი მოსაზრებაც კი არა აქვთ და ყველაფერში ჩვენ გვბაძვენ და უკან მოგვდევენ? აი, ამას ჰქვიან თავისუფლება ვაჭრობისა და, თუ შენთვის გინდა ეს თავისუფლება, შენი მეტოქისთვისაც უნდა გინდოდეს. ჩვენ მარტო ერთის აკრძალვა შეგვიძლია: შეიძლება, ჩვენი განცხადებისთანა იმათაც დააბეჭდინონ და უვარგის საქონელს მიაღვენონ, — სახელი გაუუტეხთ ბასტიენ-შოველსაო; ამის ნებას არც ჩვენ მივცემთ და არც კანონი: მაშინვე საჩივარს შევიტანთ და დავასჯევინებთ დამნაშავეთ.

შოველის მოსვლის შემდეგ თანდათან უკეთ მიდიოდა ჩვენი ვაჭრობა, თუმცა იმდენი ასიგნაციები დადიოდა იმ ზამთარს, რომ ფასი თითქმის აღარა ჰქონდათ რა.

გამგეობა იძულებული იყო ახალ-ახალი ასიგნაციები მოექრა, რადგან ფული აღარ იყო და ჯარისთვის და მოხელეთათვის კი ჯამაგირი უთუოდ უნდა ეძლია. იქამდის გაჭირდა საქმე, რომ ბრძანება გასცეს, ნახევარი ხარჯი ხალხმა პურად და თევად გადაიხადოს, რომ ჯარი შიმშილით არ ამოგვიწყდესო. ამ დადგენილებამ საშინლად ააღელვა ხალხი: გლეხკაცობას თითქმის ჩალის ფასად ჰქონდა ნაყიდი საეკლესიო და განიზნულთა მამულები და ახლა ფეხებზედ ეკიდა ქვეყანა და ქვეყნის ბედი; იმისთანა უმადურობა და პირადობა გამოიჩინა მაშინ ჩვენმა გლეხკაცმა, რომ საუკუნოდ შეირცხვინა თავი. ან რასა ფიქრობდა ნეტავი? თუ კი ჯარისთვის საჭიროს აღარას გაიღებდა, ვილა შეაყენებდა ჩვენზე ამხედრებულ მტერს? დაბრუნდებოდნენ ჩვენი დიდებული ბატონები და ნაყიდს ვილა ჩვენის, იქნება მამაპაპეულიც აღარ შეერჩინათ ჩვენი გლეხკაცისთვის.

იმ ზამთარს დაამშვიდა ჰოშმა აჯანყებული ვანდელეები, რომელნიც ხელახლად აიშალნენ, — უგანათლებულესი თავადი არტუა უნდა მობრძანდეს ჩვენს საშველადო; იმათდა საუბედუროდ, დიდებულ და ბრწყინვალე მეფეთა შთამომავალი იმისთანა მხდალი რამ გამოდგა, რომ სამი დღის სავალზედ უვლიდა ყოველ არეულობას: თავადი არტუა ერთ პატარა კუნძულს მიაღდა ვანდეს მხარეს, მაგრამ

რაკი გაიგო, გენერალი ჰომში აქ არისო, ინგლისს შეათარა თავი და ისე უმწეოდ დასტოვა მისთვის აჯანყებულნი თავგანწირული ხალხი.

ჰომმა უცბად დაამშვიდა ვანდე: აჯანყებულნი ამოსწყვიტა, ვინც აჯანყებულთ არ მიემხრო თავ-თავის სოფლებში დააბინავა და დაეხმარა კიდევ, რომ სახლკარი და ეკლესიები აეშენებინათ; სტოფლე და შარეტი შეიპყრო და დახვრიტა. იქიდან ბრეტანში გადავიდა და იქაც ისევე სწრაფად დაამარცხა აჯანყებულნი. მიიწვედა წინ და გლახკაცობას ასე არიგებდა:

— რა გინდა, ხალხო? რას ღელავ? ვინ რას გართმევს? ვინ რას გიშლის? რესპუბლიკაში ყველა თავისუფალია, სრულიად თავისუფალი, გარდა ყაჩაღისა, რომელსაც ძარცვა-გლეჯით უნდა შეიძინოს სხვისი ნაჭირნახულევი. იყავით თქვენთვის. როგორც გიწირავთ, ისევე სწირეთ, თქვენი წინააღმდეგი არავინ არის.

ისე დადლილიყო იმდენი არეულობით და სისხლის ღვრით უმრავლესობა, რომ მართლა და მოსვენების მეტს აღარას ნატრობდა. თვით პარიზშიც კი ქეიფის და ლხინის მეტი აღარავის რა აგონდებოდა და მართებლობის წარმომადგენელნი — საერო კრება, ხნიერთა კრება და გამგეობა — ხომ უარესნი იყვნენ: ქეიფი, ლხინი, წარმოდგენები, ფსონით ვახშმები, საცეკვაოდ გამართული წვეულობანი და სხვანი და სხვანი! სხვა იმათ საქმე და საზრუნავი აღარა ჰქონდათ რა. გაზეთებში, რასაკვირველია, დაწვრილებით იყო აწერილი საერო კრების წევრთა ცოლების ძვირფასი სამკაული, და მოხდენილი ცეკვა და დროს ტარება. წაიკითხავდა შოკელი და თავს გაიქნევდა:

— ავი დღე დადგება ჩვენს გამგეობას, ძალიან ავი, მაგრამ თავისი ბრალი კი არ იქნება; დიდი ტანჯვა გამოიარა ხალხმა, მრავალი სისხლი დაღვარა, და ამასთან ძალიან სასტიკი კაცებიც ყავდა მოთავედ; მეტისმეტად სასტიკნი იყვნენ დალოცვილები და იმდენი ქნეს ერთმანეთას ჯიბრით, რომ ხალხს ნდობა დაუქარგეს — ქვეყნად პატროსანი არავინა ყოფილაო. ნდობა აღარავისი აქვს ხალხს, იმედი აღარაფრისა, აღარავითარი რწმენა და თავი მიუწებებია ცხოვრებისათვის, — რაც მოხდეს, მოხდესო. ჩვენი ბედი ეხლა გენერლების ხელშია: თუ ღმერთმა ინება და ჩვენი გენერლები კეთილსინიღისიერი პატრიოტები არიან, რესპუბლიკას არა უჭირს რა. და თუ ღმერთი გაუწყრა ვისმე და რესპუბლიკის დამხობა მოინდომა... სადღა ჰყავს ხალხს პატრონი და გულშემატკივარი, რომ მიუხვდეს ბოროტმომქმედს, დაიჭიროს, სასამართლოს მიჰგვაროს და დაასჯევიონოს? რაც ლაფაიეტმა და დიუმურიემ ვერ მოახერხეს, დღეს ყველა გამბედავ გენერალს შეუძლია მოახერხოს.

ამ დროს ამბავი მოვიდა, გენერალი პიშეგრუ დაითხოვესო და

ძალიანაც გვიამა ყველას; ივანე სომი ხომ ცას დაეწია სიზარულით. პარიზში ვილაცა ლემეტრთან ქაღალდები ეპოვათ, რომლებშიც უტყუარი საბუთით დამტკიცებულიყო, რომ პიშეგრუს, ტალიენს, ბუასსი დანგლას, კამპასერეს, ლანჟუინს, ისნარს და რამდენსავე სხვას მიწერ-მოწერა. ჰქონოდათ უგანათლებულეს თავად პროვანსელთან, რომელიც უკვე ლუი XVIII ისენიებოდა. უნდა დაეჭირათ მოღალატენი და სამართლის დადგენილებისამებრ დაესაჯათ, ყველანი, როგორც მანამდე იყო; უნდა დაეჭირათ, ეგ მართალია, მაგრამ გინ იყო დამპყერი? მას შემდეგ რაც გამგეობა დაგვიწესეს, იმისთანა მისუსტებული იყო რესპუბლიკა, იმისთანა მიმტკნარებული, რომ სიკვდილივით ეჯავრებოდა ყოველი საქმე და განკარგულება. და არცა სცალოდა ამისთვის მართებლობას: მთელი თავისი ძალით და შეძლებით სდევნიდა და ხოცავდა პატრიოტებს, რომელთაც გახედეს და 93 წლის კონსტიტუცია ითხოვეს; მართებლობა მარტო იპათ დასჯასდა ცდილობდა, თითქო ისინი უფრო მეტად დამნაშავენი ყოფილიყვნენ, ვიდრე ის მოღალატენი, რომელნიც რესპუბლიკას ძირს უთხრიდნენ და თავად პროვანსელს სამეფო ტახტს უშზადებდნენ.

ამგვარად გაიარა ზამთარი. ალზასსა და ლორენზედ მომდგარი მტერი ჯერჯერობით არ იძვროდა: ალბად ხედავდნენ, რომ მეფის მომხრენი უდიდოდაც გამარჯვებულნი იყვნენ და იმედოვნებდნენ, ცოტა ხანს უკან სასხლის დაუღვრელადაც შევალთ პარიზშიო.

მარტის გასულს ისევ თავის რაზმში წავიდა ჩვენი სომი, რეინის ჯარში, და ექვსი კვირას შემდეგ ჩემი სიძის მარესკოს წიგნიც მივიღე, აპრილის დამდეგს 1796 წ. იტალიიდან.

VIII

განათხულზედ ხმა გავარდა, ჩვენს ჯარს იტალიაში დიდად გაუმარჯვიაო, მაგრამ ჩვენში უმთავრესი ყურადღება ჩვენს საზღვრებზედ მდგომ ჯარებზედ ჰქონდა ყველას მიქცეული. იტალიის ამბებისა ისიცა კმაროდა, რომ დაწმუნებული ვიყავით, მტერი ვერ შემოგვივიდოდა: ალბის მთაზედ გადმომავალ გზებს ოთხმოცი ათასი ყაცი ავსტრიელი მოსდგომოდა, მაგრამ წინ ჩვენი ჯარი უდგა, სულ ოცი ათასი კაცი, და გზას უკრავდა. ამ მხრივ კარგად იყო ჩვენი საქმე, რადგან ვიწრო ხეობებში სულ მცარეოდენი ჯარით ვიმაგრებდით მტერს.

ჩვენს განცვიფრებას საზღვარი არა ჰქონდა, მარესკოს წერილი რომ წავიკითხეთ. წერილს ბონაპარტის პროკლამაციით იწყებდა:

„ჯარისკაცნო! თქვენ მშვიერ-მწყურვალნი ხართ და თით-

ქმის ტიტველნი; მართებლობას ჯამაგირი მართებს თქვენი, და გადახდა კი არ შეუძლია. მე მინდა იმისთანა მდიდარ ქვეყანაში წაგყვანოთ, რომ იქ ჰპოვოთ დიდება, სახელი და ს ი მ დ ი დ რ ე. ხომ არ გიმტყუნებთ ვაჟკაცობა, ჯარისკაცნო?!“

ამ პროკლამაციის შემდეგ მარესკოს წერილში მრავალი გამარჯვება იყო აწერილი და აგრეთვე ჩვენი ჯარისაგან აღებულ ქალაქების სახელები. ისეთი ცხოვლად იყო დაწერილი ეს წიგნი, რომ მაშინვე თვალწინ წარმოგიდგა მარესკო, რომელიც ერთ წაშს ვერ მოისვენებდა და სულ ხტოდა და ცეკვავდა თავის პატარა კასსიუსით ხელში. იმდენი ომი, ბრძოლა და სისხლის ღვრა სულ აზაფერი იყო იმისთვის, ოღონდ შემთხვევა ჰქონოდა ძარცვისა და გამდიდრებისა. ფული, ფული და ფული! სხვა იმას არა აწუხებდა რა. წერილი სავსე იყო ბონაპარტის ქებით; მარესკოს აზრით ქვეყნად ერთის მეტი მხედართმთავარი აღარსად მოიპოვებოდა და ეს ერთი მისი ქებული ბონაპარტი იყო; სხვები კი ბონაპარტის ფეხის თითის ფრჩხილადაც არა ღირან, არც კლებერი, არც მარსო, არც ჰოში, არც ურდანი. ბონაპარტის შემდეგ შეიძლება კიდევ ახსენოს კაცმა გენერლები მასსენა, ლარპი, ოყერო და რამდენიმე სხვა, ბონაპარტისავე ხელქვეითნი. ამის შემდეგ დაწვრილებით იყო აწერილი, სად რა ეშოვა და რა შეეძინა ჩემს სიძე-ბატონს, როგორა კმაყოფილი იყო ჩემი და ელისაბედი, და როგორი გასუქებული ჰყავდათ კასსიუსი; ბოლოს კვლავ ბონაპარტის ქება იყო, გამარჯვებათა აღრიცხვა და აღებულ ქალაქების სახელები.

ძნელი წარმოსადგენია, როგორ ჩააფიქრა შოველი ამ წერილმა; ღრმა ფიქრებით მოცული იჯდა დიდხანს პირმოკუმული და წარბშეხრილი; ბოლოს ისევ წერილის კითხვა დაიწყო და განსაკუთრებით პროკლამაციებს უკვირდებოდა; რამდენჯერმე გადაიკითხა ბონაპარტის პროკლამაციები და ბოლოში რომ ჩაივლიდა, სადაც მარესკო ასწერდა თვით ბონაპარტს — „ერთი ბეწვა კაცია, ორი გოჯის სიმაღლე, მაგრამ მდევევით აწოწილ კლებერზე ერთითად ძლიერიო“, შოველს ღიმილი მოუვიდა და თქვა:

— ძლიერი მარტო დიდსულოვანია. ბონაპარტი კი მეც მინახავს, ვიცნობთ ერთმანეთს.

წერილს მარესკო ასე ათავებდა:

„მთელი ლომბარდია თვალწინა გვაქვს გადაშლილი, თითქო ხელის გულზედ გვედოს თავისი ტყეებით და ველებით, ქალაქებით და სოფლებით; აქაურობა უკვე ჩვენია, დაპყრობილია და ახლა ჩვენზედ არის დამოკიდებული, რომ ხელცა-

რიელნი არ დავბრუნდეთ; უზენაესმა არსებამ ქვეყანა მარჯვეთათვის გააჩინა — წადით და გაიხარეთო“!

ბოლოს რჩევას მაძლევდა, — წამოდი, ჩვენს ჯარში ჩაეწერე, ძალიან წინ წახვალ... საკმელ-სასმელიც ყოველთვის საკმარი გვაქვს, ჯამაგირიც ყოველთვის დროზედ გვეძლევა და ნადავლიც, რამდენიც გენებოს, ოღონდ ზიდვა შეიძელიო.

ელისაბედ-ქალმა არც ა-ნ ი იცოდა, არც ბ-ა ნ ი და, მაშასადამე, ვერ წაიკითხავდა თავის ქმრის წერილს; მაგრამ, ეტყობოდა, ქმრისთვის წაეკითხვინებინა და ბოლოში ხუთი ჯვარი დაესვა სრული თანხმობის ნიშნად: „მართალია!... მეც ამ აზრისა ვარ!.. გაუმარჯოს ომს, ოქროს და სიმხიარულეს!.. მე მინდა ოქროთი გავივსო ჩემი სკივრები და ბრწყინვალე კნეინა გავხლდე“.

დიდი შთაბეჭდილება მოახდინა ამ წიგნმა ჩვენს მხარეში: მე ნათლიაჩემს ვათხოვე წასაკითხად, იმას კიდევ სხვებისთვის ეთხოვებინა და... სოფლიდან სოფელში უგზავნიდნენ თურმე ახალ ამბად. კითხულობდნენ და იძახდნენ:

— ბონაპარტი იაკობელია, რობესპიერის მეგობართაგანი; იმან ამოგვეყარა აჯანყებული მეფის მომხრეების ჯაგრი და ადამიანის უფლებათა დამყარებაც მარტო იმას შეუძლია!

ყოველ დღე ეს ისმოდა მაშინ ბონაპარტზედ.

ჩვენი ძველი კლუბი ხელახლად გაიხსნა რობესპიერის მოკვლის შემდეგ და უკანასკნელ ხანში ისე დაგვიჯაბნეს მეფის და ეპისკოპოსების მომხრეებმა, რომ პირდაპირ ურჩევდნენ კლუბის წევრთ, — გახიზნული დიდებულები დავაბრუნოთ, თავიანთ მამულზე დაუყენოთ ან არა და სამაგიერო გადაეუხადოთო. პატიოსანი კაცი იქ აღარავინ დადიოდა და მეფის მომხრენი ერთმანეთს უქადაგებდნენ მეფისა და დიდებულების სიყვარულს.

მაგრამ მარესკოს წერილის მიღების შემდეგ, ერთ პარასკევს, ბაზრობა დღეს, რაც კი სოფლებიდან პატრიოტები ჩამოსულიყვნენ, სულ კლუბში შეკრებილიყვნენ. ელოფ კოლენს უშველებელი სიტყვა მოეშაღებინა სათქმელად; ნათლიაჩემი იძახდა, იტალიაში მყოფ ჩვენს ჯარს და მეტადრე მის მხედართმთავარს გენერალ ბონაპარტს ქება შეეუთვალათო. 11 საათზედ, როდესაც ბუზივით ირეოდა ჩვენს დუქანში მუშტარი, უცბად ქუდი დაიხურა ჩემმა სიმამრმა და ქუჩაში გავიდა. არც კი ვიცოდით, სად წავიდა.

ცოტა ხანს უკან საშინელი ხმაურობა გაისმა მოედანზე. დუქანიდან გავიხედე: ერთი ბრბო ასდევნებოდა შოველს... უყვაროდნენ, უსტვენდნენ, საშინელი ლექსითა ლანძღავდნენ და სცემდნენ კიდევ, იქვე სამამასახლისოში რომ არ შეეარდნილიყო.

რასაკვირველია, მაშინვე მისაშველებლად გავვარდი. შოველი ფერმიხდილი იღვა სამამასახლისოს შესასვლელში და იქ მყოფის რაზმის უფროსს ეუბნებოდა:

— გარეკეთ ეს წუწკები!... ვერა ხედავთ მაგ ლაჩრებს, რასა შერებიან! დიდი რამ არის ერთი მოხუცებულის დაჯაბნა! შე თქვენგან ვითხოვ მფარველობას!

სამამასახლისოდან რამდენიმე ჯარისკაცი გამოვიდა. ძალიან მეწყინა, რომ საწყალი მოხუცებული სრულიად მარტო მიეტოვებინათ მის მეგობრებს და არც ნათლიაჩემი მიშველებოდა, არც რაფიელ მანკი, არც კოლენი: კლუბში კარგა ხანი ელაპარაკა და კარგა ლამაზადაც გამოელანძღა ის უაზრო, ყოველ მიმართულებას მოკლებული პატრიოტები, რომელნიც ყოველთვის ძალოვანისკენ არიან, ყოველთვის გამარჯვებულს ექომაგებიან და ხან ლაფაიეტს უცვივიან ფეხქვეშ, ხან დიუმურიეს და ხან ბონაპარტს, რომ სახელმწიფო ქადისა ცოტა რამ იმათაც ერგოთ. სულ სამშობლოს გაიძახიან, მარტო სამშობლო აკერიათ პირზედ და საქმით კი თავიანთი ჯიბის მეტი არა სწამთ რა და გროშად არ აფასებენ არც სამშობლოს და არც მის დიდებას.

ეს ცრუ პატრიოტები რომ გამოელანძღა, უფრო ცუდად მოეხსენებინა ბონაპარტის პროკლამაციები, რომელთაც ალტაცებაში ზოპყავდათ მთელი ქვეყანა: რა არის მათში მოსაწონი, ეთქვა შოველს, განა ყაჩაღების უფროსი კი მაგ ლექსით არ ამხნევეს თავის კაცისმკვლელ ამხანაგებს: ბიჭებო, თქვენ გიყვართ კარგი ღვინო, კარგი ტანისამოსი და ლამაზი გოგოები!... ფული თქვენ არა გაქვთ და ნისიად არავენ რას გენდობათ. ჰოდა მე მომყევით! ალზასში ერთი გაკეთებული ოჯახი ვიცი; მივიდეთ და ავიკლოთ იქაურობა. ნუ თუ შეშინდებით, ბიჭებო?!“

ამ სიტყვებზედ გაჯავრებულიყვნენ ყველა იქ მყოფნი და საშინელი ღრიალი დაეწყათ. სენვიტელი ყასაბი შლახტერი მივარდნოდან შოველს და ჩამოეთრია ტრიბუნიდან; შოველიც, თუმცა პატარა კაცი იყო, ფოლადის მკლავები ჰქონდა და, მაგრა დახვედროდა; მაგრამ შლახტერს სხვებიც მიშველებოდნენ... ზოგს პუშტი წაეკრა საბრალო მოხუცისთვის, ზოგს წიხლი... ლანძღვით კი ყველანი თურმე უშვერი პირითა ლანძღავდნენ. ერთი ბლუჯა თმა ამოეგლიჯათ, ცალი ლოყიდან სისხლი სდიოდა... მორბოდა და თან გაშმაგებული ბრბო მოსდევდა, ქალი და კაცი, საზარელი ყიყინითა და სტვენით. „დაიცადეთ! დაიცადეთ!—შეპყვირა მათ შოველმა სამამასახლისოს კარებიდან,—თქვენს შვილებს გადახდება თქვენი დანაშაული... თქვენი შვილების სისხლით და ხორცით აღადგინენ მე-

ფეს... მაშინ იტირებთ, თქვე უგუზურნო, მაგრამ გვიანლა იქნება! მაშინ მოითხოვთ თავისუფლების და თანასწორობის დამყარებას. მაგრამ გვიანლა იქნება! თქვენ თქვენი შესაფერი ბატონი გინდათ და გეყოლებათ კიდევ! დღევანდელი დღე დაისწავლეთ, იმდენი ღმერთმა მიშველოს, რამდენჯერ თქვენ მაშინ შოველი მოიგონოთ!

— ჩუმაღ, შე მხეცო!... გაჩუმიღ! შენც მარატი ხარ, მარატი! — უყვიროდნენ ბრაზმორეულნი.

სამამასახლისოში შევიდა და სკამზე დაჯდა. მე ისე ვიყავ შემეკრთალი, რომ სისხლი გამიშრა და გაშეშებული ვიდექ უძრავად. შოველმა სისხლი მოიწმინდა, მერე წყალი დალია, და მითხრა:

— ნუ გეშინია, მიშელ, საშიში არაფერია. ეს ისეთი დრო არის, რომ ამაზედ უარესსაც ბევრსა ნახავ. შინ წადი, მარგალიტა შეწუხებული იქნება, დაამშვიდე, მალე წადი, დუქანში არ მოგიხდნენ ის უმეცარნი და ფანჯრები არ ჩაგიღწონ.

ის იყო უნდა წავსულიყავ, რომ მარგალიტაც შემოვიდა. სამარიდან ამოღებულს ჰგავდა. ბავშვი ხელში ეჭირა. იმ დღესა ვნახე მარგალიტა მტირალი, და რომ არ მენახა, არც კი დავიჯერებდი, რომ ტირილი შეეძლებოდა. შოველსაც გული აუჩქროლდა და სთქვა:

— სატირალნი ჩვენ კი არა ვართ, შვილო, სატირალნი ის უბედურნი არიან, რომ თავყანსა სცემენ ბონაპარტისთანა გაიძვრა კაცებს.

ბავშვი მე მომცა, თითონ ხელი დაუჭირა თავის ქალს და შინისკენ წავედით. თან რამდენიმე ჯარისკაცი მოგვდევდა, მაგრამ, ვვიშველა ღმერთმა და, შინ ისე მივედით, რომ ხმა აღარავის გაუცია: ხალხი უკვე დაშლილიყო.

ერთადერთი შეგობარი, რომელიც ერთგულად შეგვჩა იმ დღეს, მამა ქრისტეფორე იყო. შინ რომ მივედით, იქ დაგვხვდა. თურმე იფიქრა, შეიძლება ხალხმა დუქანის აკლება მოინდომოსო, და კიბეში იდგა თავისი მსხვილი ყავარჯენით. რომ დავგინახა, წინ მოგვეგება და შემოგვძახა:

— შენ გიშველა ღმერთმა, შოველ! რაცა სთქვი, ჰეშმარიტი სთქვი და სულით და გულით ვუერთდები შენს აზრებს. ჩემდა საუბედუროდ, მე გარედან გიგდებდი ყურს, შიგ ველარ შემოვატანე და ამიტომ ვერას დაგენმარე.

— მით უკეთესი, — უპასუხა შოველმა, — მე რომ მომშველებოდა ვინმე, ცოცხალი ველარ გადავრჩებოდიო. კარგი ის არის, რომ ამავე ხალხმა ორჯერ მომანდო თავის ინტერესების დაცვა და თავის წარმომადგენელად გამგზავნა საერო კრებაში. ღმერთმა ხომ უწყის, სინიღისიერად ავასრულე ხალხის მონღობილება. ეხლა სხვა

არჩიონ, რა მენაღვლება! მე მაინც ყოველთვის და ყოველგან ვიტყვი ჩემ აზრს ბონაპარტის შესახებ, რომელიც თავის პროკლამაციებში არც სათნოებას ახსენებს, არც თავისუფლებას, არც თანასწორობას და მარტო გამარჯვებას, დიდებას და სიმდიდრეს აპირდება თავის ჯარს.

იმდენად ნაცემი იყო საწყალი მოხუცი, რომ ერთი კვირა ლოგინში იწვა. მარგალიტა უვლიდა. მეც ყოველ საათს ავდიოდი მის სანახავად. იწვა და ხალხის უმადურობას და უგუნურებას ჩიოდა:

— რესპუბლიკა კი უნდათ მაგ უბედურებს, მაგათ! — იძახდა შოველი:— ჩვენი უბედურება ის არის, რომ მართებლობა მეფის მომხრეებმა და მდიდარმა ბურჟუაზიამ იგდო ხელთ და ხალხი ცარიელზედ დასვა. კიდევ უნდა ხალხს თავის უფლებათა აღდგენა, მაგრამ რა ქნას, რომ წინამძღოლი და სულის ჩამდგმელი აღარავინ ჰყავს? მარტო ჯარის იმედიღა აქვს, — იქნება ამან მიხსნას ამ სამარცხვინო მდგომარეობიდანო. ამ ერთი თვის წინად ჟურდანის იმედი ჰქონდათ, — ის არის ჩვენი მხსნელი! ჟურდანის შემდეგ ჰომისა, მოროსი და ახლა ბონაპარტისა!

— ბონაპარტი ერთი უბრალო გენერალი არისო, — ამბობდა შოველი, — პატარა კაცია, ჩამომხმარი, შავგვრემანი, ყბებწამოშვერილი. საშინელი თავმოყვარეა და თვალებში ეტყობა, რომ მოუთქენლად ელის მთელი ჯარის მხედართმთავრობას, რომ მბრძანებელი აღარავინა ჰყავდეს; საერო კრების წარმომადგენელთ ყოველთვის აღშფოთებული ემორჩილება. საერო კრებაში მარტო რობესპიერი გააჩნდა ღირსეულად; რობესპიერის უმცროსს ძმას დაუმეგობრდა, რომ მის წყალობით უფროსის გულიც მოეგო. მაგრამ როდესაც რობესპიერი მოკლეს, უცბად იცვალა ფერი და ახლა ბარას დაუმეგობრდა, სწორედ იმ ბარას, რომელმაც მისი სათაყვანო რობესპიერი მოკლა.

— მე ბონაპარტი უკანასკნელ აჯანყების დროს ვნახე. — განაგრძო შოველმა, — როდესაც მენუმ ვერა გააწყო რა აჯანყებულ ბურჟუაზიასთან და ბარამ ბონაპარტი დაიბარა და ჰკითხა: — იკისრებ თუ არა პარიზის დამშვიდებასო? საერო კრების დარბაზის შესავალში იყო ეს ბაასი. ბონაპარტმა ოცი წუთი ითხოვა მოსაფიქრებლად. იქვე კედელს მიეყრდნო, თავი დაღუნა, ხელები წელზედ გადაიდო. ხალხით სავსე იყო იქაურობა, ბუზივით ირეოდნენ დეპუტატები და უცხოელები; იმასთანა ყაყანი იღვა დარბაზში, რომ მოლაპარაკეთ ერთმანეთისა არა ეყურებოდათ რა; ის კი იღვა ღრმად ჩაფიქრებული!.. და გარწმუნებ, მიშელ, იმ ხმაურობასა და არეულობაში იმას კი არა ფიქრობდა — როგორ ავისრულო ეს ძნე-

ლი მონდობილობაო? — არა! ის სულ სხვას ეკითხებოდა თავის თავს: შემიძენს რასმე მე ეს საქმე?.. სახელს გამითქვამს?.. მეფის მომხრენი და იაკობელები ერთმანეთს ებრძვიან... ღმერთმა შეარცხვინოს ერთიც და მეორეც! მეფის მომხრეებს ბურჟუაზია ეხმარება, იაკობელებს ხალხი. მაგრამ რადგან საერო კრების განახლება მთელმა საფრანგეთმა მიიღო და წინააღმდეგობა მარტო პარიზელმა ბურჟუაზიამ გამოაცხადა და აჯანყდა კიდეც, მგონი ამ საქმით მე არაფერი წავიხდინო და რგებით კი ძალიან ბევრი ვირგო. გარეუბნელ იაკობელებს იარაღს დაუჭრიგებ და ბურჟუაზიას მივეუსევ; იაკობელების გულსაც მოვიგებ და უმრავლესობის ბრძანებასაც ავასრულებ. მე კარგ ჯილდოს გავიკრავ, იქნება ჯარის წინამძღოლობაც მომცენ და სისხლის ღვრა და ხალხის ჟლეტა კი ამ გამოტვივინებულ ბარჩას დაბრალდება“.

— თუნდა დავიფიცავ, მიშელ, რომ ამას ფიქრობდა იმ დროს ბონაპარტი, რადგან სხვა საფიქრებელი არა ჰქონდა რა. ოცს წუთს არც კი გაეცლო, რომ მივიდა და გამოუცხადა, ვკისრულობ თქვენს ბრძანებასო. ჯერ ერთი საათიც არ გასულიყო; რომ მან ყველაფერი გაარიგა და ყოველი ბრძანება გასცა; იმავე ღამეს შემოვიდნენ ზარბაზნები; იმავე ღამეს დაუჭრიგდა გარეუბნელებს იარაღი. მეორე დღეს ოთხ საათზედ ზარბაზნები უკვე თავ-თავის ადგილზე იყო და მეზარბაზნენი ანთებული ჭრაქით ბრძანებასდა ელოდნენ; ხუთს საათზედ დაიწყო ბრძოლა და... ცხრა საათზედ სუყველაფერი გათავებული და დამშვიდებული იყო. ბონაპარტმა მაშინვე მიიღო თავისი ჯილდო — გენერლობა. ცოტახანს უკან ბარჩა გამგეობის წევრად დანიშნეს და ერთი თავისი მეგობართავანი ჟოზეფინა ბოარნე შერთო ცოლად; მზითვად იტალიაში მყოფი ჯარის მხედართმთავრობა მისცა. ბონაპარტი ძალიან ფრთხილი და ვერაგი კაცია და თავის დღეში არ იტყვის — მე ბურჟუაზიისაკენა ვარ ხალხის წინააღმდეგო. სხვა ჩვენი გენერლები გაუბედავნი არიან, არ უნდათ არც ხალხი მოიმღურონ, არც მეფის მომხრენი; კიდეც რომ მოინდომოს კაცმა, ვერ გაიგებს, ვის ემსახურებიან, რესპუბლიკას თუ მეფეს... ერთი სიტყვით, — ან მწვადი არ დაგვეწვას ან შამფურიო, სულაც აღარ მიირთმევენ მწვადს. ბონაპარტი კი დაუჭრიდებლად გაიძახის, მე იაკობელი ვარო, სრულიად თავისუფლად მოქმედებს და ნადავლს ღიღძალ ფულს და დროშებს უგზავნის პარიზს.

— ბონაპარტისთანა საშიშარი რესპუბლიკას ჯერ მტერი არ გამოსჩენია. თუ შემდეგშიც ასე გამარჯვებული იქნა, მთელი ხალხი იმას მიემხრობა. ბურჟუა ყოველთვის თავის პირად კეთილდღეობაზე ზრუნავს მარტო და ამიტომ წინ კი არ გაუძღვება ჩვენს რეს-

პუბლიკას, სულ უკან დარჩება და იქნება არც კი მიჰყვეს. ხალხი ვერ მიემხრობა ბურჟუაზიას, რადგან უკვე იწვნია მისი მუხანათობა და თავის დაუნდობელ მტრად მიაჩნია, თუნდა იმიტომ, რომ ამოდენი ტანჯვა-ვაებით და სისხლის ღვრით შეძენილ გამარჯვებით მართო შემძლებლებმა ისარგებლეს და ხალხს კი ახალი კონსტიტუციით აღარავითარი მოქალაქეობრივი უფლება აღარ შეარჩინეს; ხალხი თავის დღეში არ დაივიწყებს ამას და, თუ არჩევანზე მიდგა საქმე, ბონაპარტის ჯარში უბრალო ჯარისკაცად წავა, და ნაქურდალით გამდიდრებულს თავისსავე სწორსა და ტოლს კი არ დაუდგება ყმად და მონად. ორ ცეცხლ შუა არის დღეს ხალხი: აქეთ ვერაგობა და გაუტანლობა ბურჟუაზიისა, იქით ძალადობა ბონაპარტისა. შემძლებელთ აღარ მიჰყვება, რადგან დარწმუნებულია, რომ კიდევ მოატყუებენ. ბურჟუაზია უნდა გრძნობდეს, რომ ეშმაკობა აღარ გაუვა და, თუ მაინცა და მაინც არ დაიშალა თავისი, გამოტყვერება ვინმე ბონაპარტი და გამოაცხადებს: მთელი საფრანგეთის ხალხის სახელით ყოველ ადამიანს აქვს და უნდა ჰქონდეს მოქალაქეობრივი უფლებანი, რომლებსაც მას ვერავინ წაართმევს; ვისაც გახიზნულების მამული უყვია, ველარავინ შეეცილება უკუნიით უკუნისამდე“. და ისე მიჰყვება მას ხალხი, რომ სულ ცოცხით გარეკავენ ბურჟუაზიას. მართო მართლმსაჯულებას შეეძლება წინააღუდგეს ამ ძალას, მაგრამ ისიც იმისთანას, რომელიც სამართლიანად ეკიდებოდა ხალხს: მართლმსაჯულება, რომელმაც ხალხს ყოველი უფლება წაართვა, უკანონობად იქცა და მამასადამე არც ის იქნება დასანდობი.

ასე სჯიდა ჩვენს საქმეებს შოველი.

მაგრამ ერთი რამ უნდა მოგახსენოთ... შემდეგში ბევრი ვინანე, — რა ღმერთი გამიწყრა, რამ შემშალა-მეთქი... ღვთის წინაშე, გაჩუმება მირჩევნია, მაგრამ რაკი მართალს დაგპირდით, აქაც მართალს მოგახსენებთ და დაუფარავად აღვიარებ ჩემს ცოდოს: სიყმაწვილეში გამოვლილ ტანჯვა-წვალების, შიმშილ-სიცივის და მრავალ დამციარების შემდეგ ისე გამიტკბა ახალი ბატონკაცური ცხოვრება, რომ ჭირივით მეჯავრებოდა ყველა, ვინც ჩემს განცხრომას შეეხებოდა. დიად, ჩემდა სამარცხვინოდ, მართალს მოგახსენებთ. დუქანი სავსე გვექონდა საქონლით, დახლი — ფულით და, რომ მომაგონდებოდა ჩვენი ქოხი, ან კიდევ შუა ზამთარში გამვლელ-გამომვლელის უკან დევნა და ლაღადი — მოწყალება მოიღეთ! გამიკითხეთ ღვთის გულისთვის! — ჩემისთანა ბედნიერი ადამიანი აღარსად მეგულებოდა. ოცნებითაც კი ვერ წარმოვიდგენდი ასეთ ნეტარებას! კაცი ვიყავ, სახლ-კარი მქონდა, ცოლ-შვილი მყავდა! ცოლხ თავს მეველებოდა, პატარა შვილი უღვაშს მაგლვეჯდა თავის ფუნთუშა ხე-

ლებით და თან, მამაო! — შემომძახოდა... და შოველი კი თავისას არ იშლიდა, გამგეობასაც რაღასაც ემდუროდა, საერო კრებასაც, გენერლებსაც და სულ იმას იძახდა: ხელმეორედ უნდა მოვახდინოთ რევოლუცია, რომ რიგზე მოვიდეს ყველაფერიო! ბასრი ნესტარით მხვდებოდა ჩემი სიმამრის სიტყვები და ძალიანაც ვამტყუნებდი ჩემს გულში:

— ეგ კი მეტიმეტი! ძლივს დამშვიდდა ქვეყანა და ეს კი ისევ არევისა ნატრობს. რა უნდა ნეტავი? ვაჭრობა ისევ ძველებურად გაჩაღდა, გლეხკაცობამ მამული შეიძინა... რაც არის, არის, ოღონდ ნულარას შეარყევენ და დღევანდელიც გვეყოფა; ღმერთმა შეარცხვინოს, ვინც იმაზედ მეტი ინატროს რამე! აბა გაბედონ განიზნულებმა და ბერებმა ჩვენი მართებლობის გაუქმება! ქუღზედ კაცი გავალთ და ჩვენს მამულს კი აღარავის მივცემთ! ჯარიც ჩვენს იქნება, რადგან ჯარი რესპუბლიკის მომხრეა!..

ღიად, ასე ვსჯიდი, ჩემდა სამარცხვინოდ.

მგონი მიმიხვდა შოველი: წამდაუწუმ დაუწყებდა ხოლმე ლანძღვას იმ „უსინიღისოებს“, რომელთაც კუჭი და ჯიბე გაივსეს და თითქო მთელი ქვეყანა მადლარი იყოსო. თავიანთ საქმეების გარდა აღარას ზრუნავენ. ის კი არ იციან, რომ თუ საქმეში არ ჩაერივნენ და ხალხის სურვილისამებრ არ აირჩიეს მართებლობა, ისე გამოცლებათ ხელიდან ყველაფერი, რომ ლუკმაპურს დანატრულდნენო.

რასაკვირველია, ვგრძნობდი, რომ უმთავრესად მე შემეხებოდა იმის სიტყვები, მაგრამ პასუხს არ ვაძლევდი, თუმცა გულში კი ძალიან ვემდუროდი, — ჩემი კეთილდღეობის დარღვევა უნდა-მეთქი.

IX

1796 — 97 წლის ზამთარმა საკმარისად მშვიდობიანად გაიარა. უურდანი დამარცხდა ვურცბურგში და მაშინათვე გადააყენეს. მის ადგილზე მხედართმთავრობა გენერალს ბერნონვილს უბოძეს, რომელმაც დაითხოვა ვინც კი ჯარში საეჭვო კაცი ეგულებოდა; გადააყენა რესპუბლიკის მოწინააღმდეგე კომისრები, დახვრიტა ქურდები და ერთობ რიგიანად მოაწყო ჯარის საქმე. მაგრამ უურდანსაც მრავალი მომხრე ჰყავდა ჯარში და ყველა მის მხარეზე მყოფმა ოფიცრებმა ერთად დაანებეს სამსახურს თავი; ჯარისკაცების გაპარვა ზომ ვერაფრით შეეყენებინათ.

ავსტრიელები რეინს გამოვიდნენ, მაგრამ იქვე, ჩვენს ახლო, დამარცხდნენ. იმავე დროს ზავი ჩამოვარდა და შეწყდა ბრძოლანოემბრის დამდეგი იყო.

ზავის ჩამოვარდნამდე კი ძალიან საქმე დავმართეთ ავსტრიელებს: გენერალ მოროს რეინს გაღმა მცირეოდენი ჯარი დაეტოვებინა. დეზეს წინამძღოლობით და ძალიანაც გაემაგრებინა. ავსტრიელები გარს შემოერთყვნენ ციხეს და ოცდაათათასამდე კაცი ანაცვალეს მის აღებას. აღებით კი მაინც ვერ აიღეს და ძალიან კმაყოფილნი დაგვრჩნენ, როდესაც ზავი ჩამოვარდა და მუჰის ტოლი ჩვენი გამარჯვებული ჯარი რეინს გამოვიდა და დაფხრეწილი დროშების ფრიალით და მარსელურის სიმღერით ჩვენს უმთავრესს ჯარებს შეუერთდა.

გენერალი ჰოში ირლანდიის ასაღებად ამხედრებულიყო, მაგრამ აღელვებულ ზღვას ისე დაეთანტა მისი ხომალდები, რომ უკან დაბრუნება არჩია. ბევრს ლაპარაკობდნენ აგრეთვე ბონაპარტის ტიროლში გადასვლაზე და ბერნადოტის წინამძღოლობით ჩვენი ჯარების გამგზავრებაზედ რეინის გაღმა, გერმანიისკენ.

ხალხი აღტაცებული იყო ჩვენი ჯარების გამარჯვებით, მაგრამ შოველი კი ამას ყურადღებასაც არ აქცევდა და სულით და გულით მისცემოდა არჩევნებს, რომლითაც საერო კრების მესამედა უნდა განახლებულიყო; დარწმუნებული იყო, რომ, თუ საიმედო კაცებს აირჩევდა ხალხი, მტერი ვერას დააკლებდა.

— რესპუბლიკას უცხოელთაგან შიში აღარა აქვს, — იძახდა შოველი, — რადგან თითქმის ყველანი დაამარცხეს ჩვენმა ჯარებმა; კიდეც შეგვეხვეწებიან მორიგებას, თუ კი მოვისურვებთ და მოლაპარაკება დავუწყეთ. ოღონდ პირობანი მორიგებისა საერო კრების, ესე იგი ხალხის, წარმომადგენლებმა უნდა დაადგინონ, და არა რესპუბლიკის მოწინააღმდეგეებმა, რომელნიც ჩვენი გამარჯვებით ჩვენს მტერს ასარგებლებენ. უნდა ვეცადნეთ, ღირსეული კაცები ავირჩიოთ დეპუტატებად, რადგან ამ არჩევნებზედ არის დამოკიდებული მთელი ჩვენი მომავალი.

ყველგან საარჩევნო კრებები იმართებოდა და შოველიც ძველებურად სიარულს მოჰყვა. ხან სარბურგში იყო საწყალი მოხუცი, ხან დრულინგენში, ხან სავერნში. გათენდებოდა, და ის ფეხზედ იყო. ხუთ საათზე ფეხაკრებით ჩამოვიდოდა სამზარეულოში, კიღობნიდან ერთ პურს ამოიღებდა და გასწევდა! საცა კი კრება იყო, ისიც იქით მიეშურებოდა, ხშირად რამდენიმე საათის სავალზედ. პატრიოტებს აერთებდა და ამხნევებდა, რესპუბლიკის მოწინააღმდეგეებს ამხელდა. კიდეც კარგი, რომ მამა ქრისტეფორე და ორი მისი ძმა თან დასდევდნენ, თორემ მოასწრებდნენ სადმე არისტოკრატები და ჩააქვავებდნენ. ტყუილად კი არ მაფრთხილებდნენ ნათლიაჩემი, კოლენი, ლეტუმიე და ყველა ჩვენი მეგობრები:

— ღვთის გულისთვის, მიშელ, შეიმაგრე როგორმე შენი სიმამრი, თორემ ცოდოს დაატრიალებენ მეფის მომხრენი. ხომ იცი, რა მძლავრი არიან ჩვენი მოწინააღმდეგენი დაგბურგის მაზრაში: გაუნათლებელ, გულუბრყვილო მთიულთ ღმერთივით სწამთ მეფე და შენი სიმამრიც სწორედ იმათ მორჯულებას ცდილობს. მარტო ხალხი იყოს, კიდევ ჰო, მაგრამ ხალხს ისეთი დამრიგებლები ჰყავს, რომ კეთილს არ დააყრიან. უანდარმებიც კი ვერა ბედავენ დაგბურგის ვიწრო ხეობებში შესვლას, იციან, რომ იქაური მთიულები ჭკუით კი არა, ხანჯლითა სჯიან საქმეს. გაათრთხილე, შეიმაგრე, თორემ მკვდარს ან დასახიჩრებულს მოგაყენებენ კარზედ.

მეც კარგად ვიცოდი, რომ სრულიად მართალს მეუბნებოდნენ, მაგრამ რა მექნა? ერთ დილას მითხრეს, დღეს მთაში კრებას აპირებენ და მთიულებს უთქვამთ, თუ გაბედა ვინმემ რესპუბლიკის მომხრემ და ჩვენში წარმოსდგა, ცოცხალი აღარ გადაგვრჩებაო. ეს მუქარა მაშინვე ვაცნობე შოველს და თანაც ვთხოვე, — ნუ წაბრძანდები, რადგან სრულიად უსარგებლოდ ჩაივლის შენი ცდამეთქი.

უნდა გენახათ, როგორ გამიწყრა! მომყო პირი და იმდენი მლანძღა.. მეც და ჩემსავით კუჭმაძღარანიც... რომელნიც გუშინ შიმშილით კვდებოდნენი წარმოიდგინეთ, როგორ მეწყინებოდა მაგრამ მოვითმინე, ავიტანე ყველაფერი და გარეთ გავედი. მარგალიტა უკან გამომყვა. მინდოდა თავი დამენებებინა ყველაფრისთვის და შინისკენ წავსულიყავ, მაგრამ მარგალიტას ცრემლებმა შემაყენეს. ჩემი სიმამრიც გზას გაუდგა. მაგრამ იმავე დღეს, სადილს უკან, ოთხ საათზედ ხმა გავარდა, ლუტცელბურგში რესპუბლიკელებს და მეფის მომხრეებს ჩხუბი მოსვლიათ და მრავალი ხალხი დაჭრილა და დახოცილაო. გაჯავრებული ვიყავ შოველზედ, მაგრამ ამ ამბავმა სრულიად გამინელა გული; მომაგონდა მისი მამაშვილური დარიგება და სიყვარული, მომაგონდა, რაოდენი სიკეთე ექნა ჩემთვის და შიშით გული გადამიბრუნდა. სირბილით გავწიე ლუტცელბურგისაკენ. ბინდისას მივედი! უკვე ბნელოდა და კრების ველი მაშხალებით იყო გაჩაღებული. ჯობნით პატრიოტებს ეჯობნათ.

აუარებელი ხალხი ეხვია, — გარშემო სოფლებიდან მოგროვილი ქალი და კაცი — და თუმცა იქვე წისქვილის წყალი ხუოდა, იმისთანადა კრიალებდა ჩემი სიმამრის ხმა, რომ ზარი გეგონებოდათ:

— ერი ჩვენა ვართ, მამულიშვილნო, ჩვენა! ჭეშმარიტი მბრძანებელი მარტოდმარტო ჩვენა ვართ — გლენხკაცები, ხელოსნები და მუშები. ერი ჩვენა ვართ — ხ ა ლ ხ ი და მ ა რ თ ე ბ ლ ო ზ ა ც

ხალხისა უნდა იყოს, რადგან მშრომელიც ხალხია, ხარჯის გამლებიც ხალხია და მთელი ქვეყნის მკვებავი და მაცხოვრებელიც იგივე ხალხია! სულით ხორცამდე დავიღუპებით, თუ გავვიწყრა ღმერთი და ერის წარმომადგენლად ის მუქთახორა გაიძვერები ავირჩიეთ, რომელთაც თავის სამშობლოს ავსტრიელები, პრუსიელები და ინგლისელები შემოუსიეს და მიუხედავად მტრის ჯარებისა მაინც დამარცხებულ იქმნენ, თუნდა ასჯერ ზედიზედ! დიაღ, სულით ხორცამდე დავიღუპებით, თუ გავვიწყრა ღმერთი და ისინი ავირჩიეთ ჩვენს წარმომადგენლებად: ჩვენი გამგენი, ჩვენი მსაჯულნი, ერთობ ყველა ჩვენი მოხელენი ჩვენი მტრები და მოღალატენი იქნებიან, რადგან ჩვენ მტერთაგან იქნებიან დანიშნულნი, არა ჩვენთვის, არამედ ჩვენდა საწინააღმდეგოდ; არა ჩვენდა სასარგებლოდ, არამედ ჩვენდა სავნებლად! მოგვდგებიან და არც კრეჟას დაგვაკლებენ და არც პარსევას. იმისთანა უღელში შეგვაბმენ, რომ ძველი გვენატრებოდეს. ჰოდა, გაფრთხილდით თქვენს წარმომადგენლად რომ კაცებს აირჩიეთ, იმათზედ იქნება დამოკიდებული თქვენი და თქვენი ცოლ-შვილის კეთილდღეობა. კენჭი რომ აიღოთ ხელში, თქვენი ცოლ-შვილი მოიგონეთ. იცოდეთ, ნელ-ნელა მოიწევს მტერი, ფრთხილად, ჩუმად, ისე ჩუმად, რომ მოყვარე გეგონებათ. არ მოგეპაროთ იჟუდა ვინმე! თქვენს წარმომადგენლად იმისთანა კაცები აირჩიეთ, რომ სალოცავად გლახკაცობა გაეხადოს.

დიდი ხანი ილაპარაკა შოველმა. ხალხს ძალიან მოსწონდა მისი სიტყვა და გულმოდგინედ უსმენდა.

მას შემდეგ მამა ქრისტეფორემ ილაპარაკა, მერე სხვებმა. ცხრა საათზე ჟანდარმები მოვიდნენ და ხალხიც მაშინვე დაიშალა, ისე რომ ჟანდარმებს ხმაც არ ამოვალდებინეთ. მე და შოველი ერთად წამოვედით. დილანდელისა აღარათფერი ახსოვდა და ისე დამელაპარაკა, თითქო ჩვენს შორის თავის დღეში არა მომხდარიყოს რა:

— ხომ ხედავ, მიშელ, რომ ჯერ კარგად მიდის ჩვენი საქმე! ჩემი ამხანაგებიც რომ ასევე ეცადნენ — კონვენტის წევრებზე მოგახსენებ — და ყველამ რომ თავის მაზრაში გააფრთხილოს და გაამაგროს ხალხი, გარწმუნებ, საერო კრებაში უმრავლესობა ისევე ჩვენი იქნება. ისეთი უვარგისი არ არის ჩვენი გამგეობა, როგორც ამბობენ! უნდა გავამხნევოთ, ძალა გამოვაჩინინოთ, რომ იმისიც ისევე ეშინოდეთ, როგორც ქვეყნის მფარველი კომიტეტისა ეშინოდათ. თუ ხალხი კარგად მოიქცა და უმრავლესობა რესპუბლიკელებს დაგვრჩა, გამგეობაც ჩვენი იქნება. იცი, რამ შემოგვძღვნა ჩვენ ამოდენი არეულობა, ყაჩაღობა, ხალხის თითქმის სასოწარკვეთილებამ-

დე დაცემა და ჩვენი მტრების თავხედური გათამამება? უკანასკნელმა არჩევნებმა! როდესაც ხალხს უფლება არა აქვს თავისი წარმომადგენლების არჩევისა; როდესაც კაცს ადამიანობის დაკვალად კი არა, გადასახადის კვალობაზე სცემენ პატივს და ანიჭებენ მოქალაქებრივ უფლებებს, მაშინ ერის წინამძღოლობა თავხედთ და გაიძვერებს რჩებათ და, რასაკვირველია, ისე მოაგვარებენ ყველაფერს, რომ თავიანთი ჯიბეები დაიტენონ და თავიანთი საქმეები გაირიგონ. იმათი ღმერთი ფულია და სულს გაჰყიდიან, არამც თუ სამშობლოს.

როგორ არ დაეთანხმდებოდით, როდესაც კარგად ვხედავდი, რომ ყოველი ჩვენი უბედურება, შოველისა არ იყოს, იმ ქირონდლების ბრალი იყო, რომელთა საცოდობით ერთ დროს გული გვეწოდა დიდსა და პატარას. ბევრი მათგანი, როგორც შემდეგში გამოირკვა, მეფე ლუი XVIII ჩუმი მსახურნი ყოფილიყვნენ; ენაზედ რესპუბლიკა ეკერათ და გულში კი რესპუბლიკის მტრობის მეტი არაფერი ჰქონდათ; რესპუბლიკით სარგებლობდნენ, რომ ერთიანად ამოეხოცათ რესპუბლიკელნი; ყველაფერს კადრულობდნენ, რომ თავიანთ ფარულ წადილს მისწოდნენ როგორმე და ბაბუის * შეთქმულობითაც კი ისარგებლეს, რომ ბრალი დაედოთ რამდენიმე ასი რესპუბლიკელისთვის და გილიოტინით დაეხოცათ; სულ უბრალოზედ — ასობით რესპუბლიკელს ხოცავდნენ და იმავე დროს თვალს არიდებდნენ მეფის მომხრეთაგან რესპუბლიკელების ჟღერს და ჰყვინის არევას. თვალს არიდებდნენ გახიზნულების და ბერების დაბრუნებას და ქადაგებას — საფრანგეთი მაშინ იქნება ბედნიერი, როდესაც მეფე ეყოლებაო. იმდენად გამძლავრებული იყო მტერი, რომ გამგეობაც კი ვერა ბედავდა მის წინააღმდეგობას. ერს სათავეში მოღალატენი დასდგომოდნენ და როგორც ნებავდათ, ისე განაგებდნენ. თვით რესპუბლიკელნიც გრძნობდნენ, რომ ჩვენი ხსნა ჯარსდა შეეძლო და ამიტომ გაფაციცებით დაეძებდნენ იმისთანა გე-

* ბაბუი, რეაქტორი ვაზეთისა „ხალხის ტრიბუნი“, მაშინდელ მწერლობაში „კაიუს გრაცხუსად“ ცნობილი იყო. ბაბუი ამტკიცებდა, — რაც დაუშუავე ბელი მიწებია და საზოგადო მამულები, ღარიბებს უნდა მიეცეთო. მისმა ქადაგებამ ძალიან გაიტაცა ღარიბი მუშა ხალხი, მეტადრე პარიზელი გარეუბნელები. ამ ქადაგებისთვის რამდენჯერმე იჯდა ციხეში; ბოლოს მართებლობის წინააღმდეგ შეთქმულობა შესწამეს და მასთან ერთად დაიჭირეს დართე, ბუონარტტი, ანტონელი, როსსინიოლი, ვადიე, ამორი, შოლიო და კარჩინი. სამი თვის შემდეგ ბაბუის და დართეს ვადაუწყვიტეს გილიოტინით თავის მოკრა. იმათ ხანჯლით თავის მოკვლა განიზრახეს, მაგრამ დროზედ მიასწრეს დარაჯებმა და გილიოტინზედ სრულიად დასისხლიანებულნი წაიყვანეს.

ნერალს, რომ მეფის მომხრენი აელაგმა. ჩვენი უბედურება ის იყო, რომ ვინც ძმობას გვეუბნებოდა, ჩვენც ძმად მიგვაჩნდა და ის კი ვერ წარმოგვედგინა, რომ ეს ფარისეველი იმ თავითვე ჩვენი მოსისხლე მტრები იყვნენ და ჩუმად, ფარულად, გველივით გემტრობდნენ და ორმოს უთხრიდნენ ყოველ ჩვენს დაწყებულებას ხან ძალით, ხან ვერაგობით, ხან ღალატით. ხალხი დაღალეს დაგვიღალეს საუკეთესო, მართლა და დაუღალავი, მამულიშვილისი ჩვენი უბედურება ის იყო, რომ რესპუბლიკის დასადუშავად შეთქმულთ კარგად იცოდნენ, რაც უნდოდათ — ხალხის დამონავეება და ბატონყმობის ჩამოგდება — და ჩვენ კი ერთმანეთის ჯიბრით გატაცებულნი მტერს ვერ ვხედავდით და ერთმანეთს ვხოცავდით.

1797 წლის მარტის და აპრილის განმავლობაში ერთს კრებას არ დაჰკლებია შოველი. მაგრამ არჩევნების გარდა სხვაც ბევრი რამ იყო მაშინ საინტერესო: გენერალი მორო რეინის გაღმა გასასვლელად ემზადებოდა; ბერნუეილის მაგივრად მხედართმთავრობა ჰოშს უბოძეს; სამამასახლისოების და კლუბების კარგებზე გაკრული იყო ბონაპარტის პროკლამაცია, ბონაპარტისა, რომელიც ის იყო ამხედრებისათვის ემზადებოდა. აი, თვით პროკლამაცია:

იტალიაში მყოფი ჯარის მხედართმთავარი ბონაპარტი

თავის ერთგულ და მამაც ჯარისკაცთ.

ბასსონის უმთავრესი ბანაკი 10 მარტი 1797.

ქ. მანტუს აღებით დამთავრდა წარსული ჩვენი ომიანობა, რომლითაც უკუნითი-უკუნისამდე დაუფიწყარი დიდება შესძღვენით თქვენ თქვენს სამშობლოს. წარსულ ომიანობაში თოთხმეტ დიდ ბრძოლაში დარჩით თქვენ გამარჯვებულნი და სამოცდაათ მცირე შეტაკებაში; ასიათასი კაცი ტყვე იშოვეთ, ხუთასი ზარბაზანი წაართვით მტერს, ორიათასი ყუთი ყუმბარა; თქვენგან დამორჩილებულ ქვეყნებში გაწერილმა და აღებულიმა ხარჯმა ასაზრდოვა ომიანობის დროს მთელი ჩვენი ჯარი და გარდა ამისა სახელმწიფო ხაზინაშიც გაგზავნეთ 30 მილიონი, რათა შეძლებისადაგვარად დახმარებოდით გაჭირებულ სამშობლოს. თქვენ შეამკეთ პარიზის მუზეუმი სამასზედ მეტი ხელოვნური ნივთით, იტალიის წარჩინებულ ხელოვანთა ნაწარმოებით, რომლის შექმნას სამიათასი წელი მოანდომა ამ ძლიერმა ერმა. თქვენ შესძინეთ რესპუბლიკას უმშვენიერესი ქვეყნები ევროპისა; რესპუბლიკები ლომბარდიისა და ცისპადანისა თქვენი წყალობით არიან ღღეს თავისუფალნი;

საფრანგეთის დროშა თავისუფლად ფრიალებს ადრიატიკის ზღვის პირად, ოცდაოთხი საათის სავალზედ ძველ მაკედონიამდე; მეფენი სარდინისა და ნეაპოლისა, პაპი და თავადი პარმისა, ჩამოეცალნენ ჩვენს მტრებს, და ჩვენთან მეგობრობა ირჩიეს; თქვენვე განდევნეთ ლივორნოდან, გენუიდან და კორსიდან ინგლისელები... მაგრამ ჯერ დამთავრებული არ არის სამშობლოსადმი თქვენი ღვაწლი; დღეის იქით ერთიათასად მეტი დიდება მოგელით თქვენ, რადგან თქვენი იმედილა აქვს დღეს სამშობლოს თავისი დიადი დანიშნულების აღსასრულებლად. და თქვენც ეცდებით, ღირსეულად აასრულოთ თქვენი ვალდებულება! რესპუბლიკის დაარსებისთანავე ამხედრდა ყველა მეფე და ხელმწიფე მის დასამხობად, მაგრამ ყველანი სძლია რესპუბლიკამ, გარდა იმპერატორისა, რომელიც თავისდა სამარცხვინოდ ინგლისელი ვაჭრების ყურმოჭრილ ყმად გამხდარა და აღარც ნება აქვს საკუთარი, აღარც პოლიტიკა და იმას სჩადის, რასაც ჩასძახებენ მას ბრიტანიელები, რომელნიც არიან დამშვიდებულნი თავიანთ კუნძულზედ და ევროპიელთა ომების სეირით ტკბებიან“.

პროკლამაციის აზრით, იტალიაში მყოფი ჩვენი ჯარი უნდა გადასულიყო ავსტრიაში და გაეუქმებინა ავსტრიის სახელმწიფო, „რომელიც უკანასკნელი სამი საუკუნის განმავლობაში ყოველი ომის შემდეგ ჰკარგავდა რომელსამე თავის მხარეს... მართებლობამ ყოველი უფლება წაართვა ავსტრიაში მცხოვრებ სხვადასხვა ერებს. დაამცირა ისინი, ყოველი ღირსება აპყარა და ამ მხრივაც დასამხობია ეს სახელმწიფო“.

ცხადი იყო, ომი ხელახლად იწყებოდა და ბელგიიდან მოყოლებული იტალიამდე ყველგან ბრძოლა ატყდებოდა. მართალია, ისე ცუდად აღარ იყო ჩვენი საქმე, როგორაც 92 და 93-ში, რადგან მაშინდელივით შინ კი აღარა გვყავდა მტერი, ახლა ჩვენ თითონ ვაპირობდით ტიროლის მთების გადავლას და უცხოეთში შესევას. ავსტრიის ხელმწიფის მემკვიდრე კარლი უკვე ამზადებდა თავის ჯარებს ბონაპარტის დასახვედრად. დილით საღამომდე ჯარები დიდნენ ჩვენს მხარეში და ბოლო არსად უჩანდათ.

ჯარების მოძრაობამ ძალიან გააცხოველა ვაჭრობა მთელს ჩვენს საზღვარზედ; ჩვენსა იმდენი მუშტარი შემოდოდა, რომ ვეღარ ავდიოდით. მაგრამ შოველი ყურადღებასაც არ აქცევდა ჩვენს გაჭირვებას და საზოგადო საქმეების გარდა არასა ზრუნავდა. საცა კი კრება იყო რამე არჩევნების შესახებ, ისიც იქ უნდა ყოფილიყო; მეფის მომხრენი ძალიან ავი თვალთ უყურებდნენ და ყველა გზებ-

ზედ კაცები ეყენათ, იქნება მოვასწროთ სადმე და ჩავადრძოთო. მარგალიტას მოსვენება აღარ ჰქონდა; მართალია, მე არას მეუბნებოდა, მაგრამ ცხადად ეტყობოდა შიშიც და მწუხარებაც. საღამო ხანს გაშეშებულივით იდგა ხოლმე კარში და სულ გზას გასცქეროდა. დაინახავდა შორიდან მომავალს თავის მამას და იმისთანა ხმით შესძახებდა — აგერ, მოდისო! თითქო ცოცხალი აღარ ეგულებოდა.

წინ გაეგებებოდა, ბავშვს მიაგებებდა. ისიც გადაჰკოცნიდა ბავშვს, წყნარი ნაბიჯით შემოვიდოდა შინ, პურს მოიტეხდა, ღვინოს დალევდა და აღელვებული ხმით გვიამბობდა იმ დღის ამბებს და ბრძოლას. და მართლა რომ ბრძოლა იყო ყოველი კრება, ბრძოლა საფრანგეთში დაბრუნებულ გახიზნულთა და რესპუბლიკელთა შორის.

რომ მომაგონდება, რა თავგანწირვით იბრძოდა ის დალოცვილი მოხუცი თავისუფლებისათვის და რა გატაცებით უნდოდა რესპუბლიკის გამარჯვება, დღესაც ალტაცებით ვახსენებ მის სახელს და, — დმერთო შეგცოდე, — თუ წმინდანი ადამიანთაგანნი იყვნენ, შოველიც წმინდანი უნდა ყოფილიყო.

მაგრამ მაშინ კი სულ სხვა ფიქრები მიტრიალებდა თავში: წარმოიდგინეთ ეგოიზმი იმ კაცისა, რომელსაც გუშინ გახვრეტილი გროში ენატრებოდა და დღეს კი ათასობით სთვლის; წარმოიდგინეთ ეგოიზმი ამ კაცისა, მეტადრე თუ ხელავს, რომ მის სარჩო-საბადებელს დღითიდღე ემატება და ემატება და ამასთან ერთად მისი ოჯახიც მატულობს (მარგალიტა ისევ ორსულად იყო); წარმოიდგინეთ ამ კაცის ეგოიზმი და ადვილად დამეთანხმებით, რომ იმისთვის სულ ერთი უნდა ყოფილიყო, როგორი მართებლობა იქნებოდა საფრანგეთში — რესპუბლიკა თუ მეფე — ოღონდ მის ღუქანს მუშტარი არ დაჰკლებოდა და მის დახლს ფული.

— სწორედ გიყია ჩემი სიმამრი!.. — ვიძახდი ჩემს გუნებაში. — ქვეყანა ასე ტრიალებს და მაგან უნდა გამოსცვალოს ჩვენი ცხოვრება? რას დაგვაყვედრებს სამშობლო? განა პირნათლად არ ავასრულებთ ჩვენი მოვალეობა? განა არა კმარა, რაც, აგერ ექვსი წელიწადია, ტანჯვა-წვალება გამოვიარეთ? აბა ახლა სხვებმა გასწირონ სამშობლოსათვის თავი, როგორც აქამდინ ჩვენ ვიყავით თავგანწირულნი? ჩვენ ჩვენი გავათავეთ, ახლა სხვების რიგია! სად არის სამართალი? სულ ხომ ჩვენ არ უნდა ვზიდოთ ქვეყნის ტვირთი?

და სხვანი და სხვანი...

შოველისა ისა მწყინდა, რომ ბაზრობა დღეს, როდესაც ღუქანი საფხვე იყო მუშტარით, ის თავს გვანებებდა და თავის კრებებისკენ მიეშურებოდა. ეგ კიდევ არაფერი: უბედურება ის იყო, რომ

კრებებზედ ყველას დაურიდებლად პირში ეუბნებოდა, რაც სათქმელი ჰქონდა, და ბევრი კარგი მუშტარი დაგვიკარგა თავისი ენით. ისე იყო გატაცებული არჩევნებით, რომ ჩვენი ვაჭრობა აღარც კი აგონდებოდა. თუნდა დავიფიცავ, ჩვენთან იმიტომღა რჩებოდა ბინად, რომ პატრიოტული გაზეთები და წიგნაკები გაესაღებინა, თორემ, ეს რომ არა ყოფილიყო, ძველებურად სიარულს დაიწყებდა მთელს ალზას-ლორენში.

მაგრამ სრულიად ამოდ ჩაუარა იმდენმა ცდამ შოველსაც და მასთან ერთად სხვა იაკობელსაც. რევოლუცია საშინელი სისასტიკით გადაახდევინებს ხოლმე ყველას თავ-თავის შეცდომას და შეცოდებას. რობესპიერის, სენჟუსტის და კუთონის მიერ განწირულნი რესპუბლიკელები რომ ცოცხალნი ყოფილიყვნენ, არჩევნები სულ სხვანაირად გათავდებოდა, მაგრამ გვიანდა იყო! ჩვენ ერთმანეთის ზოცვა-ჟღერტას მოვუნდით და დაღალული, იმედმიხდილი და ცხვარივით უფიცი ხალხი კი მგლებს ჩაუუგდეთ ხელში.

ახალი არჩევნები უფრო ცუდად გათავდა, ვიდრე წინანდელი; და ასეც უნდა ყოფილიყო, რადგან ხალხში, ვისაც გარკვეული შეძლება არა ჰქონდა, არც ხმა ჰქონდა და აღარც მონაწილეობას იღებდა არჩევნებში. რესპუბლიკელების მაგივრად არჩეულ იქმნა მეფის ორას ორმოცდაათი მომხრე. უმრავლესობა, რასაკვირველია, იმათ დარჩებოდათ და საერო კრების თავმჯდომარედ პიშეგრუ ამოირჩიეს. ეს იმას ნიშნავდა, რომ კონსტიტუციას და ადამიანის უფლებებს მასხარად იგდებდა საერო კრება და ყველაფერი მზად მიაჩნდა მეფის ლუი XVIII მოსაწოდებლად.

გამგეობა ხელს უშლიდა, რადგან „ღვთისაგან კურთხეულის მეფის“ ადგილი თითონ ეჭირა. ხელს უშლიდა გამგეობა და, მაშასადამე, მის გაუქმებასაც უნდა ცდილიყვნენ. შეუდგნენ კიდევ საქმეს: გამგეობის წევრად ბართელემი დანიშნეს, მეფის მომხრე. მერე გააუქმეს კანონი, რომლითაც გახიზნულთა ნათესავთ აკრძალული ჰქონდათ ყოველივე თანამდებობის აღსრულება სახელმწიფო სამსახურში; გააუქმეს კონვენტის დადგენილება, რომელიც სჯიდა ტულონში ინგლისელების შემყვან მოლაღატეებს; შარი მოუდეს გამგეობას, — უფლება არა გქონდა, იტალიაში მტერს მორიგებოდი ჩვენდა დაუკითხავადო... ეს პირდაპირ ნაპოლეონს ხვდებოდა საყვედურად... ამასთან, არც თუ არავითარ ყურადღებას არ აქცევდნენ მეფის მომხრეთაგან რესპუბლიკელების ზოცვას, პირიქით, აქეზებდნენ გათამამებულ თავადაზნაურობას. ძველი მონასტრების განახლებას და ბერების გამრავლებას ცდილობდნენ, — ჩვენი ქვეყანა საარწმუნოების წყალობით იყო და არის ძლიერიო! თითქო მარ-

ტო ბერების სიმრავლეზედ ყოფილიყოს დაწყარებული სარწმუნოების სიწმინდე.

ორი თუ სამი იაკობელიდა ბედავდა ხმის ამოღებას! კიდევ კარგი, რომ პარიზელი ხალხი ავი თვალით უყურებდა საერო კრებას, თორემ იქნება მაშინვე გაეუქმებინათ რესპუბლიკა და მეფე აებრძანებინათ ტახტზედ. ყოველი უბედურება და ნაკლო, თვით ასიგნაციების დაცემა და სახელმწიფო ხაზინის დაცარიელებაც კი, გამგეობას დააბრალეს. და იმავე დროს არაფრის გაკეთების ნებას არ აძლევდნენ. ქვეყანას თუ იხსნის ამ გაჭირებიდან, „ერის მკველი რაზმი“ იხსნისო, ბრძანებდნენ, მაგრამ ერის მკველ რაზმში მართო „შემძლებელთ“ მიანიჭეს უფლება სამსახურისა, ისე რომ პარიზში ყველა შემძლებელს — ბურჟუას — იარაღი უნდა ჰქონოდა და მუშას და ხელოსანს კი არა! ამაზედ მეტი რაღა გნებავთ? რიღას ან ვიღას შიში უნდა ჰქონოდათ მეფე ლუი XVIII, გახიზნულ დიდებულთ და ეპისკოპოსებს, თუ კი პარიზელ ხალხს იარაღი აღარ ექნებოდა? ვიღას მოერიდებოდნენ? არხეინად მობრძანდებოდნენ, თავიანთ მამულს მოეპატრონებოდნენ და კვლავ დაიჭერდნენ იმ ადგილს, რომელიც მათ რევოლუციამ წაართვა!

მაგრამ ხალხისთვის თვალი არ უნდა აებათ რითიმე? მთელი სამი თვე აწვალეს ბაბეფი და ბუკსა და ნალარას სცემდნენ, — ქვეყანა ჩვენ გადავარჩინეთ, თორემ ბაბეფი შთანთქმას უპირებდაო! ბწორედ ასე იციან იარაღკაზმად ჯიბიგირებმა: ორნი ჩხუბს ასტეხენ, ხალხს შემოიგროვებენ და მესამე კი ჯიბეებს უცარიელებს სეირის მაყურებელ დოყლაპიებს.

ბეგრგან გაიმარჯვეს ჩვენმა ჯარებმა, თითქმის მთელი ევროპა გადავლეს, მაგრამ ამით მაინც ვერ მოტყუვდნენ პატრიოტები და კარგად ხედავდნენ, რომ მეფის მომხრენი ვერავგობით ღუპავდნენ რესპუბლიკას: ერის შემძლებელი ნაწილის მიმხრობას ცდილობდნენ. რომ წინააღმდეგად დაობლებული ხალხის მეტი აღარავინ ჰყოლოდათ. და აღარც მალავდნენ თავიანთ განზრახვას! აღზას-ლორენი სავსე ყოო გახიზნულებით და ბერებით. უმრავლესობა საფრანგეთის ქალაქებისა უკვე „ჰკუთაზედ მოდიოდა“, ესე იგი ქედს იხრიდა და ხელსაც არ გაანძრევდა, მეფეც რომ შემობრძანებულოყო. ეკლესიებში ხმამალა დაღადი გაისმოდა, — ღმერთო შენ დაგვობრუნე გახიზნულებიო! ეკლესიებში რევოლუციის მოწინააღმდეგე მღვდლები სწირავდნენ... ეს ყველაფერი კარგად იცოდნენ მართებლობის მოხელეებმა, მაგრამ თვალს არიდებდნენ.

შოველიც ძალიან დაღონებული იყო. იჯდა ღუქანში, ქალღალის პარკებს აკეთებდა და ამბობდა:

— არა, ისე როგორ წავხდით, რომ ერთი უბრალო გენერალი, ვილაცა ბონაპარტი ბედავს და მთელი ერის წარმომადგენელთ განადგურებას უქადის, — როგორ თუ საყვედურს მიბედავთ? სირცხვილი არ არის, რომ ერის წარმომადგენელი, რომელთაც ხალხმა მიანდო რესპუბლიკის დამყარება, ძირს უთხრიან ამ რესპუბლიკას და ხალხი კი ხედავს ამას და ყურსაც არ იბერტყავს ერთი ჩახველების მეტი კი არა უნდა რა ხალხს, რომ მიწასთან გაასწოროს ის ქვემძრომნი, რომელნიც დევის დამონავებას ცდილობენ? რას იზამთ, რომ საღათას ძილითა სძინავს ამ დევს?

ორ ამერიკელს ჩხუბი მოუფიდათ, გვიამბობდა შოველი, და ძან-ძანაც წაუთაქეს ერთმანეთს. იქვე ზანგი იდგა, სიცილით კვდებოდა და ყვიროდა: ჰა, ყოჩაღ!.. მაგრე აი! მუშტი მაგისთანა უნდა!.. ვაცხონე მამაშენი!... რას იცინი, შე საწყალო შენა? ჰკითხა ვილაცამ. იცი რისთვის ჩხუბობენ ეგ კაცები? შენთვის, შე უბედურო! ვინც აჯობებს, ის მოგიჭერს თოკს, და გასაყიდად წაგიყვანს შენა და შენს ცოლ-შვილს. ვირივით გამუშავენს; ციხეებს ავაშენებინებს, რომ შენვე ჩაგამწყვდიოს შიგ; იარაღს გაგაკეთებინებს, რომ შენვე გაწამოს და გველივით აგიჭრელებს ტყავს მათრახის ცემით...“ მახ შემდეგ აღარ გაუცინია იმ ზანგს, მაგრამ ჩვენი ხალხი კი დღესაც იცინის.

შოველი რომ თავისას გააბამდა, მე ბრაზი მერეოდა ძლივსღა ვიკავებდი თავს:

— მე რა, მე რომ მეუბნები მაგას? — ვიძახდი ჩემს გუნებაში.

მერე რა კარგი ვაჭრობა გვექონდა! დახლი სავსე იყო ფულით, ბელელი პური, მარანი ღვინით და არაყით, დუქანი საქონლით. დულდა და გადმოდოდა ჩემი ოჯახი და, თითქო რაღაცამ შემშალაო, ჩემი პირადი კეთილდღეობის იქით მე აღარა მწამდა რა. განა მარტო მე? სხვანი უარესნი იყვნენ; ქვეყანა მდიდრებისა გვეგონა და ჩვენც გამდიდრება გვენატრებოდა. არა ვმაღავ ჩემს შეცდომებს, რადგან ძალიან ძვირად დამიჯდა იგი.

თანაც, თითქო გულში საიდუმლო რაღაც გრძნობა ღვივისო, სულ ადამიანის უფლებანი და მამულიშვილის მოქალაქებრივი ვალდებულებანი მაგონდებოდა... ბოლოს დავრწმუნდი, რომ შოველი სრულიად მართალი იყო, რომ გვიჩვენდა, — გაფრთხილდით, მოუარეთ საზოგადო საქმეს, თორემ მაგასაც დაჰკარგავთ, რაც შეგიძენიათო.

გაზეთებში დიდი ქება იყო ვილაც ფრანკონისა, რომელიც პარიზში განთქმულ მოჯირითედ ითვლებოდა. ბაბეფის საქმისა და ბონაპარტის მრავალ გამარჯვებათა შემდეგ გაზეთებს ამ კაცის

განსაცვიფრებელი მხედრობადა გაეხადათ სალაპარაკოდ. მკათათვის დამღევს, ფალსბურგში რომ ბაზრობა იყო, ის ფრანკონიც იქ გაჩნდა. შამპანზედ გამოველო, ლორენს შემოჰყოლოდა და ჩვენში კი მობრძანდა თავის ამხანაგებით. უშველებელი ფიცრული ააგო მოედანზე და ყველგან განცხადება გააკრა, — ვისაც გნებავთ საკვირველის მოჯირითეების ნახვა, მობრძანდით და დასტკბითო. თან მთელ ქალაქში თავის ცხენებს ატარებდა, მოედანზე საყვირს უკრავდა და ბუქსა სცემდა. დიდძალი ხალხი დადიოდა მის სანახავად. მეც მინდოდა მარგალიტასთვის მეჩვენებინა პარიზული ჯირითი, მაგრამ დუქანში ბუზივით ირეოდა მუშტარი და თავის დანებება შეუძლებელი იყო.

ყველაფერი რიგზე იქნებოდა, ჩვენებურები რომ არ მოსულიყვნენ და არ შეეტყობინებინათ, — შენი ძმა ნიკოლოზი ფრანკონის მოჯირითეებში არისო. მე კარგად ვიცოდი, რომ ნიკო ვერ გაბედავდა საფრანგეთში ფეხის შემოდგმას, რადგან ჯარიდან გაიქცა, მტერს მიუდგა, თავისი იარაღი სამშობლოს წინააღმდეგ იხმარა და, მაშასადამე, დაიჭერდნენ თუ არა, მაშინვე ჩამოახრჩობდნენ. ეს ვიცოდი და ყველას ვეფიცებოდი, ნიკო არ იქნება, ნიკომ რამდენი ხანია თქვენი ჭირი წაიღო და კანონიერი მოწმობაც მოგვივიდა იმის სიკვდილისა-მეთქი; მაგრამ ჩემი არავის სჯეროდა. ერთს საღამოს, როდესაც სწორედ ამ ლაპარაკში ვიყავით, ერთი უზარმაზარი კაცი მოადგა ჩვენს დუქანს. ტანთ მშვენიერი, ბუზმენტით ნაკერი ტანისამოსი ეცვა, ძვირფასი ქუდი ეხურა და უძვირფასეს იარაღში იჯდა თავით ფეხამდე.

შემოვიდა მათრახის თამაშით და დამიყვია:

— მე ვარ, მიშელ, მე!.. შენ არ ინებე ჩემთან მოსვლა და, რა გაეწყობოდა, აი მე თითონ გიახლები შენ სანახავად.

ნიკოლოზი გახლდათ! დუქანი საცხე იყო ხალხით და ყველანი იმას უყურებდნენ. შემეშინდა, მაგრამ ვიფიქრე, — თუ კი თითონ არ იმაღავს თავს, მე რად უნდა ვმაღავდე-მეთქი? გადავეხვიე და ძმურად გადავკოცნე. სტეფანემაც კოცნა დაუწყყო. ნიკოს არყის სუნი ამოსდიოდა. შოველი სამკითხველოში იჯდა და იქიდან გამოიციქირებოდა. მარგალიტა თრთოდა, რადგან კარგად იცოდა, რა სასტიკად სჯიდა რესპუბლიკა მოღალატეებს. რაღა გვეთქმოდა, უნდა მიგველო და მეც სამკითხველოსკენ წავიყვანე, რადგან იმ დროს იქ უცხო არავინ იყო.

— ვაზშმად შენთანა ვარ, მიშელ! ღვინო კარგი გაქვს? სამწვაღესაც ხომ კარგს იშოვი? ახლავე გეუბნები, პირის პატივი ვიცი და

თუ არ საგანგებო რამ, არას დავექარები... ბიჭო!.. რა კარგი გოგ-
ნუცაა ეს გასაგლეჯი ესა!

— ჩემი მეუღლეა, ნიკო.

— ჰოო! შოველის ქალი... მარგალიტა! მეწვრილმანე შოველის
ასული... ვიცი, ვიცი!...

მარგალიტა ცეცხლივით აენტო. ხალხმა სიცილი დაიწყო. რო-
გორც იყო, შევიყვანე სამკითხველოში.

— ოჰო! ბებერი შოველიც აქ ბრძანდება!... რა უყავ შენი სა-
წვრილმანო, ბებერო?

— განა ახლა კი მეწვრილმანე არა ვარ? — უპასუხა შოველმა
და თან ბურნუთი მოსწია. რაცა კაცსა ბედმან მისცესო, ხომ გაგი-
გონია. ყველანი ხომ შენსავით ფრანკონის მეჯინიბედ არ გახდ-
ბიან?

ნიკოს ძალიან ეწყინა ეს სიტყვები და მრისხანედ გადუბღვირა
ჩემს სიმამრს, მაგრამ აღარა უთხრა რა. იქნება თავიდან მოვიშორო-
მეთქი, ვუჩუროხლუე: ღვთის გულისთვის, ნიკო! ქვეყანა გიცნობს!
თუ გაიგეს შენი აქ ყოფნა... ხომ იცი რა სასტიკად სჯიან გახიზნუ-
ლებს...

მაგრამ არც კი გამათავებინა. სკამზედ დაეშვა, ფეხები გაშხლარ-
თა და ყვირილი დაიწყო:

— გახიზნულებსაო! ჰოდა, რა? მეც გახიზნული ვარ! პატიოსა-
ნი ყველა გაიხიზნა! რეგენი, ველური ხალხილა დარჩა გაუხიზნა-
ვი! მიცნონ რაი მეც ეგ მინდა! ყურებზედ ხახვი არ დამაპკრან თქვენმა
რესპუბლიკელებმა! მარტოდმარტო კი არ გეგონო ჩვენი მფარ-
ველნი სულ ბრწყინვალე გვარიშვილები ბრძანდებიან და კარსაც
ისინი გვიღებენ და დარიგებასაც ისინი გვაძლევენ!... თქვენ ეი
იცი თუ ეს რა არის? თქვენს ასიგნაციებს კი არა გავს! აი, თქვენი
რესპუბლიკის გასაღები!

ჯიბეში ხელი ჩაიყო. ათიოდე ოქრო ამოიღო და შეათამაშა ხელ-
ში; თან საზარლად ხარხარებდა.

უბედურება არ არის კაცს, ამისთანა ტყის ნადირი ძმა ჰყავდეს?
ლოთი, იუდასავით მოღალატე და სამშობლოს გამყიდავი!

შოველი კარგად ხედავდა ჩემს გაჭირვებას და შერცხვენას. მე
რომ ხმა ველარ ამოვიღე მან თქვა:

— კარგ დროს მოვიდა ჩვენი ნიკოლოზი. მოდი, მიშელ, სუფ-
რა გავშალოთ, ცოტა შევნაყრდეთ და რესპუბლიკის სადღეგრძე-
ლოც დავლიოთ.

სუფრა გაშლილი იყო. მარგალიტას საჭმელი მოჰქონდა სამზა-

რეულოდან, სტეფანე ღვინის ამოსატანად მიეშურებოდა. ერთი ხელი დანა-ჩანგალიც ნიკოსთვის, და სხვა აღარა აკლდა რა.

ნიკო გვერდ-გვერდ გამოიციქირებოდა: ეტყობოდა, არ მოეწონა შოველის სიტყვები:

— ლობიოს შექამადი, განა, და შინაური, ძმარივით მკავე ღვინო არა, ძმავ ისევ სასტუმროში წავალ!

წამოდგა და ჩემს სიმამრს მიუბრუნდა:

— შენ ეი, ქოფაკო! შენ კი ველარსად წაგვიხვალ! რესპუბლიკის სადღეგრძელო უნდა დამალევიწო, რაღა?! — და თან მედიდურად აავლებდა და ჩამოაველებდა თვალს. — ვე, ნიკოლოზ ბასტიენმა, მეფის ერთგულმა ჯარისკაცმა, რესპუბლიკის სადღეგრძელო დავლიო?! დამაცადე შენ! ეს უღვაში მომჭერი, აი, ეს უღვაში მომჭერი, თუ ჩემი ხელით არ ჩამოგახრჩო, შე...

შოველი არც კი დაძრულა თავის სკამიდან, იმისთანა ზიზლით და დაციწვით გამოსცქეროდა მეფის ერთგულ ჯარისკაცს. ან რა ექნა? მოხუცი იყო და უძლური; ერთი რომ შემოეკრა ნიკოს, სულს გაანთხევიწებდა.

თავში ამივარდა სისხლი, ბრაზმა ენა დამიბა და სხვა რომ ვეღარა მოვახერხე რა, ეს ვუთხარი:

— ფრთხილად, ნიკო!... ფრთხილად! შოველი მამაჩემია!..

— გაჩუმდი შე... შენ რომ კაცი ყოფილიყავ, ურჯულოს, მეფის მკვლელის ქალს კი არ შეირთავდი!... თითქო არ ვიცოდეთ, რა წმინდა წყლისა ბრძანდებოდა შენი მარგა...

მაგრამ ველარ დაამთავრა თავისი სიტყვები: ავიტაცე, გავიყვანე ღუქანში, მთელი ღუქანი გავატარე და, — კარიც ღია იყო — ათ ნაბიჯზედ მაინც გადავტყორცნე! კიდევ კარგი, რომ 97-ში ქუჩები მოუკირწყლავი იყო, თორემ შემომაკვდებოდა ის წუპაკი! ქვეყანა შესძრა იმისმა ყვირილმა და გინებამ. ჩემს უკან სტეფანე და მარგალიტა გაჰკიოდნენ. მთელი მოედანი ჩვენ გვიყურებდა. მკვდარივით ფერმიხდილი წამოდგა ნიკო და კბილების ღრქენით წამოვიდა ჩემსკენ. მეც ველოდი. მაგრამ ველარ მოვიდა: ალბათ, იგრძნო, რომ ვაჯობებდი და აღარც დავინდობდი. შორიანლო გაჩერდა და დამიყვირა:

— შენ ჯარისკაცად იყავი, ვიცი... ჰოდა, არსენალის უკან გელი.

— ძალიან კარგი, მეგინიბევ! ჯერ არ დაჩლუნგებულა მგონი ჩემი ხმალი. მოწმებები იზრუნე; ოცი წუთის შემდეგ იქა ვარ. აბა, ვნახოთ, დამჭრი თუ არა მარჯვენა ძუძუს თავში!

სტეფანე ცხარე ცრემლითა ტიროდა. ღუქანი დავკეტე და შინ შევედი. მარგალიტა ფერმიხდილი მომვარდა და შემომძახა:

— არა, შენ შენს ძმას არ შეებრძოლები!

— ვინც ჩემს ცოლს შეურაცყოფს, ის ძმა კი არა, მტერია ჩემი. და შეურაცყოფას მარტო სისხლით ჩამოიბანს კაცი!

შოველიც ცდილობდა, შევემაგრებინე: — პატიოსანი კაცი მოლაღატეს არ შეებრძოლებათ! მაგრამ მე ყურიც არ ვათხოვე, ხმალი შემოვიკარ და წავედი. მინდოდა ლორანი და პეტრე ჰილდებრანგი წამეყვანა მოწმეებად. ბინდებოდა. თვალი მოვკარ, რომ შოველი უკან გამომყვანა და სამამასახლისოსაკენ გავშურა, მაგრამ ყურადღება არ მივაქციე და ჩემს გზას გავეშურე. ცოტა ხანს უკან შე და ჩემი მოწმეები არსენალისაკენ მივდიოდით. იმათაც წამოეღოთ ხმლები: — კაცნი ვართ, ვინ იცის, რა მოხდესო? მაგრამ გავედით თუ არა არსენალთან, შორიდანვე ყვირილი შემოგვესმა:

— გაჩერდით! გაჩერდით!... დაიჭირეთ, არ გაუშვათ!

იმავე დროს ნიკოც გამოჩნდა: მშვენიერ ცხენზე იჯდა და ისე მოაჭენებდა, რომ იქვე მდგომმა დარაჯმა ხიშტის ამართვაც ვერ მოასწრო; უკან ჯარისკაცი მოსდევდნენ საშინელი ყვირილით: დაიჭირეთ! არ გაუშვათ!

დავბრუნდით, რაღა გავწყობოდა? შოველი კარებში მელოდა და მითხრა:

— მამასახლისთან ვიყავ. მინდოდა შემეტყობინებინა ნიკოლოზის აქ ყოფნა და დამეჭერინებინა; მაგრამ ტყუილად გავისარჯე: შენი პატიოსანი ძმა სრულიადაც არა ჰფარავდა თავის ვინაობას, ყველგან თურმე ოქროებს ათამაშებდა და ბლამონიდანვე დასდევნებოდნენ დასაჭერად. ეს არის ეხლაც ფრანკონისთვის საუკეთესო ცხენი მოუპარავს და იმითი გაქცეულა. ეტყობა, დაინახა თუ არა ქანდარმები, მაშინვე მიხვდა, რომ იმის დასაჭერად იყვნენ მისულნი და თავს უშველა. ფრანკონი იძახის, მე ეგ კაცი სულ ორი კვირა არ არის, რაც გავიცანიო. წარმოიდგინე, გახიზნულებისაგან გამოგზავნილი ჯაშუში ყოფილა შენი ძმა.

აშ ამბავმა უფრო მომიკლა გული. ჩემი ძმა საჯამუშოდ შემოსულიყო თავის სამშობლოში!

ვახშმად დავსხედით. მარგალიტა ძალიან კმაყოფილი იყო. ჩემი სიმაპრი წამდაუწუმ მოსწევდა ბურნუთს და დაიძახებდა:

— ვაჟკაცი ამისთანა უნდა, აი! ისე წამოიტაცა იმოდენი მთა კაცი, რომ სხვა ბაღსაც ვერ აიყვანდა. რამდენ შაქრის თავს წაჰკრა ცხვირი იმ უბედურმა, დუქანში რომ მიაქროლებდი.

უნდა მოგახსენოთ, რომ დუქანში ჭერში გვეკიდა შაქრის თავები. და მართლაც ძალიან ძალა უნდა დასდგომოდა საწყალ ნიკოს ცხვირს. ყველანი იცინოდნენ.

მაგრამ ამით არ გათავდა ეს სამწუხარო ამბავი. მეორე დღეს დი-

ლით დედაჩემი შემოვარდა ღუქანში. კალაოი დახლზე დაახეთქა, და ცოფიანივით მომვარდა. სწორედ ცოფიანიჭით, რადგან თმა გასწეწოდა, თვალები სისხლით ავსებოდა და პირიდან დორბლი სდიოდა. მომდგა და ღმერთიც კი არ შემარჩინა უხსენებელი მარგალიტას ხელში ეჭირა ჩვენი ბიჭი და ისიც კი დაგვიწყევლა!... კაინი ხარო, იუდაო! მეფის ჯარები შემოვლენ და ყველას ჩამოგახრჩობენ, ღიღსაც და პატარასაც, რომ თქვენი თესლი არსად დარჩესო. დახლზედ გადმოეყუდა და მუშტს მიღერებდა. — მე გაჩუმებული ვისმენდი იმდენ წყევლას და უწმაწურ ლანძღვა-გინებას, მაგრამ ღუქანში მყოფმა ხალხმა ველარ მოითმინა და აქეთ-იქიდან შეუტიეს:

— კარგი, გაჩუმდი!.. ღმერთი არა გწამს?!.. ეგერ როგორ უნდა გაიმეტოს დედაკაცმა თავისი ღვიძლი შვილი.. სირცხვილი არ არის?!.. კაი მოგივა, კარგი დედა შენა ყოფილხარა...

და მე რომ ვერა დამაკლო რა — დახლს უკან ვიყავ — მივარდა და იმათ დაუწყო ცემა. იმათაც, რასაკვირველია, არ მოუთმინეს და წაჰკრეს. მაშინვე გადავხტი და შუაში ჩავდექი. მაგრამ ამაზედ უფრო ცეცხლი მოიკიდა და შემომიტია:

— შორს ჩემგან, იუდავ! მე შენი წამოსარჩლება არ მინდა! შენი ძმა ხომ დააბეზლე! წადი და ახლა მე დამაბეზლე! — იმისთანა ხმითა კივოდა, რომ მთელი ქალაქი თავს დაგვახვია. ამ არეულობაში ჟანდარმებიც შემოვიდნენ. ისინი რომ დაინახა, ენა ჩაუვარდა. მაშინვე გავვარდი და ხეეწნა დაეუწყე: — მოხუცებულია და შეიბრალებთ, ნუ დაიჭერთ-მეთქი, მაგრამ ვერა გავაგონე რა. კიდევ კარგი, რომ შოველს უკანიდან გამოეპარებინა საწყალი, თორემ შერცხვებოდა სიბერის დროს. დედაჩემმა თავი დაახწია, მაგრამ ჟანდარმები თავისას არ იშლიდნენ და უთუოდ უნდოდათ დაეჭირათ ვინმე. მთელი ნახევარ საათი ვეხვეწეთ: — რაც მოხდა, მოხდა, ვითომც არაფერი გაგიგონიათო.... ბოლოს ერთი ხელადა ღვინო გამოცალეს და თავი დაგვანებეს.

ისე შემაწუხა ამ ამბებმა, რომ ქვეყნად ჩემისთანა უბედური სხვა არავინ მეგონა. მართალია, კაცი მარტო თავის საქციელის პასუხისმგებელია და სხვის, თუნდა მშობელი დედის, საქციელისთვის არ უნდა იძრაებოდეს; მაგრამ მე რომ დავემწყვდიეთ ციხეში ის მერჩივნა, ვიდრე მოხუცებული დედაჩემი ციხეში დაჭერილი მენახა, თუნდა ძალიან ღირსიცა ყოფილიყო ამ სასჯელისა. სირცხვილით ვიწოდის ჩემდა სანუგეშოდ, იმ დღის აქეთ, ამ ამბავზედ ხმა არავის ამოულია ჩემთან, არც ჩემ ცოლს, არც სიმამრს. ან რა უნდა ეთქვათ, რომ გულის წყლულში არ მომხვედროდა ყოველი სიტყვა? განუქურნავ ჰირს ყვირილით ვერ შეიმსუბუქებს კაცი.

ეს პირველი და უკანასკნელი მოსვლა იყო დედაჩემისა. ღმერთს მადლით, მას შემდეგ აღარც მოსულა და აღარც ის ლაფი დაუსწავს ჩემთვის.

აქედან ცხადად დაინახავთ, რა გაბედვით და უშიშრად იქცეოდნენ მეფის მომხრენი; ეგონათ, გათენდება და რესპუბლიკასაც დავმარხავთო. მაგრამ ბედმა უმუხბოდა და ისე ჩასცხო, რომ თავი მაღლა ვეღარ აიღეს.

საერო კრება და მასთან ერთად უფროსთა კრება დიდად უსაყვედურებდა გამგეობას, იტალიაში მორიგება ერის წარმომადგენელთა დაუცილებლად რად მოახდინეთო. ბონაპარტს ძალიან სწყენოდა ეს საყვედური და გაცოფებულს შემდეგი წერილი მიეწერა პარიზში: „საფრანგეთზე ამხედრებული მტერი გავანადგურე. ხუთი მეფე დავიმორჩილე და საფრანგეთს მივუბრე... ნუ თუ ჯილდოდ ამოდენა სამსახურისა დამშვიდებულ, მყუდრო ცხოვრებასაც დაიშურებს ჩემთვის ჩემი ქვეყანა? ჩემი სახელი სამშობლოს ეკუთვნის და ჩემს შეურაცყოფას არავის მოვუთმენ, მეტადრე როდესაც ამას ინგლისისაგან შესყიდული კაცები ცდილობენ. იცოდეთ, დიდი ხანია გაქრა ის დრო, როდესაც ჯარისკაცის სიცოცხლე მხდალი ვეჭილეების და უბედური ყბედების ხელთ იყო და გილიოტინით თავსა ჰკვეთდნენ გამოჩენილ მხედართმთავრებს. აგრე ნუ იქნება, თორემ იტალიაში მყოფი ჯარი თავისი გენერლით ძალიან მალე მოადგება პარიზის კარებს...“ ეს წერილი გაზეთ „დარაჯში“ იყო დაბეჭდილი. შოველმა რომ წაიკითხა, წითელი ხაზით შემოფარგლა, ზედ მიაწერა სიტყვები: „რას იტყვი ამისას, მამულიშვილნო?“ და ვინც კი ქალაქში გამოჩენილი პატრიოტი იყო, ყველას გაუგზავნა.

იმავე დღესვე შეიკრიბნენ ჩვენი მეგობრები ჩვენი სამკითხველოში და დაადგინეს შემდეგი საკითხი: „რა სჯობს: საუკუნოდ მთამდნებში სამუშაოდ გაგზავნილ ვიქმნეთ საერო კრებისაგან, რომელშიც უმრავლესობას მეფის მომხრენი შეადგენენ და, რომელნიც, მეფეს დასვამენ და ძველებურ ბატონყმობას შემოიღებენ, თუ ამ უბედურობისაგან ბონაპარტის და მის ჯარის წყალობით ვიხსნათ თავი და მერმე, თუნდა, უარეს დღეშიაც ჩავარდეთ?“

ძნელი იყო ამის გადაწყვეტა და დიდი კამათიც გამოიწვია.

შოველი ამტკიცებდა, ამის გადაწყვეტა დღეს შეუძლებელი არისო: — რესპუბლიკის სიცოცხლე ერთს გარემოებაზე არის დამოკიდებული: თუ ამ წერილმა გონებაზე მოიყვანა საერო და უფროსთა კრების წევრები, ისინი პირდაპირ გამოაცხადებენ, — მეფის მოწინააღმდეგენი ვართ და ვთხოვთ ხალხს, მხარი მოგვეცეს და თავისუფლება დაგვამყარებინოსო. ამ შემთხვევაში ხალხი, რა ნახავს, რომ

წინამძღოლები ჰყავს, იარაღს აიღებს; მაშინ გამგეობა იძულებული შეიქნება, სრული ანგარიში წარმოადგინოს თავის მოქმედებისა, და ბონაპარტები იძულებულნი შეიქნებიან ქედი მოიხარონ და კილო შეიცვალონ. მაგრამ თუ საერო და უფროსთა კრება თავისას არ დაშლის და რესპუბლიკის გაუქმებას ეცდება, ხალხს უკვე გადაგლებული მეფის და გამარჯვებული მხედართმთავარის შუა მოუხდება არჩევანი და რასაკვირველია ყველანი ბონაპარტისკენ იქნებიან.

ვინც კი იქ იყვნენ, ყველანი გამგეობას ემდურებოდნენ: ქვეყანასა სძარცვავს, ჰქურდავს, უსირცხვოდ და გაუმადლად ისაკუთრებს მილიონებს და ლაჩრად ქედს უხრის ვიღაცა გენერლის თავზედ მუქარასაო. მაგრამ ამასაც ამბობდნენ, რომ თუმცა ჩირაღაც არა ღირს, მაინც გაცილებით სჯობია საერო და უფროსთა კრებაჲ, რომელთა წევრნი თითქმის საერთოდ მეფის ტახტის აღდგენას ცდილობენ და, მაშასადამე, თუ გამგეობასა და ორ კრებას შორის რაიმე შეტაკება მოხდა, ყველა კეთილი პატრიოტი გამგეობას უნდა დაეხმაროსო.

ქალაქის კარები დიდი ხნის დაკეტილი იყო, როდესაც დაიშალა ჩვენი პატარა კრება. ნეტავი უფრო ადრე დაშლილიყო, გულს დაემშვიდებდი: ერთ წამს არ მომისვენია და რაც ხანი ისინი პოლიტიკაზე ლაპარაკობდნენ, მე სულ პოლიციის მოხელე მელანდებოდა თავისი კაცებით... ცხადლივ მესმოდა კარზე კაკუნი და ბრძანება:

— კანონის ძალით, გაგვიღეთ კარი!

ჩემდა საბედნიეროდ ამგვარი არა მოხდა რა და პირველ საათზე სრულად მშვიდობიანად დაიშალა ჩვენი კრება. ეს იყო 1797 წლის მკათათვეში. რამდენიმე დღის შემდეგ გაზეთებმა ამბავი მოგვიტანეს, გენერალი ჰოში მთელი თავისი ჯარით პარიზზედ მიდის საშინელი სიჩქარითო. ორივე კრება აღშფოთებული იყო, ჰოშის პარიზზედ წამოსვლას გამგეობას აბრალებდნენ და ვინ იცის რამდენ ლანძღვას და მუქარას სწერდნენ გამგეობის და თავიანთ ურჩი გენერლების წინააღმდეგ! ჰოშის ჯარის მიახლოვებით შეშინებულმა საერო კრებამ კანონი გამოაცხადა, რომლითაც მართებლობის მოწინააღმდეგედ და სიკვდილით დასასჯელად აღიარა ყოველი მხედართმთავარი. რომელიც ნებადაურთველად პარიზიდან ცხრა ვერსის მანძილს გამოაცილებდა თავის ჯარებს. ბრძანება გასცა: ყველა გზებზე პარიზიდან ცხრა ვერსის მანძილზე ბოძები იქმნას დადგმულა და ზედ წარწერა იქმნას გაკრული, რომლითაც სცნას ყველა მხედართმთავარმა და მთელმა ჯარმა, რომ ამ საზღვრის გადმოთელვა სიკვდილს უქადის დამნაშავესაო.

ეტყობა, შეაფიქრიანა გამგეობა ამ კანონმა და გაზეთების მუ-

ქარამ, რომ პოშს ბრძანება მისცეს, უკან გაბრუნდით. ისიც გაბრუნდა, მაგრამ ეს კი ყველასთვის უეჭველად დამტკიცდა, რომ გამბედავ მხედართმთავარს ადვილად შეეძლო ხელთ ეგდო მართებლობა. დღეს პოში იყო ეს მხედართმთავარი, პატიოსნებით აღსავსე კაცი, რომელსაც თავის სახელის უძვირფასესი არა გააჩნდა რა ამ ქვეყნად; გარდა ამისა, გამგეობაც სუსტი იყო, ვერ გაბედა განეხორციელებინა თავისი წადილი, და ამიტომ ჩაიარა ასე მშვიდობიანად ამ ცდამ. ცოტა ხნით კიდევ შეურყევლად დარჩა ყველაფერი, მაგრამ ძალიან ცოტა ხნით. იმავე დროს, 14 მკათათვის დღესასწაულის გამო, იტალიელმა ჯარმა საშინელი მუქარა გამოუცხადა მეფის მომხრეებს. ყველაზედ

მრისხანედ გენერალი ოყერო იმუქრებოდა, პარიზელი წმინდა-ანტონის უბნელი ხალხის შვილი; იმან პირდაპირ გამოაცხადა, მე გამგეობის მომხრე ვარ და ორივე კრების წინააღმდეგეო. გამგეობამ ოყერო პარიზში მდგომ ჯარის მხედართმთავრად დანიშნა. მკათათვის გასულს ოყერო უკვე პარიზს მივიდა და მიიღო თავისი ჯარი. გაზეთები სავსე იყო იმისი ტანისამოსის აღწერით: — თავით ფეხამდე ოქროში ზის და ღილები აღმასისა უკერიაო... ტყუილად კი არა მწერდა ჩემი სიძე-ბატონი, ჩავიქეციოთ ამოდენა თვალ-მარგალიტითო!

პიშეგრუ, საერო კრების ერთგული გენერალი, დარიბ-ლატაკი კაცი იყო ოყეროსთან შედარებით, რომელსაც ბევრნი თვით ბონაპარტეზედ უკეთესად სთვლიდნენ.

ამგვარად განვლო მკათათვემ და მარიამობისთვემ. პურის მოსავალი კარგი იყო იმ წელს; ყურძენი შეთვალული იყო და სხრთვლოდ ვემზადებოდით. დამშვიდებული გვეგონა ყველაფერი. მაგრამ რამდენიმე დღის შემდეგ მთელს ქალაქს პროკლამაციები მოჰფინეს ცხენოსანმა შიკრიკებმა. ყველანი იღებდნენ და შინისაკენ მიეშურებოდნენ წასაკითხად. ჩვენსაც გიჟივით ყვირილით შემოვარდა ელოფ კოლენი პროკლამაციით ხელში:

— რესპუბლიკას გაუმარჯოს! მეფის მომხრეთ თქვენი ჭირი წაუღიათ!

იქვე დუქანში დაიწყო ხმამაღლა პროკლამაციის კითხვა; ყველანი გაკვირვებულნი ვუსმენდით. მაგრამ სადღა იყო რევოლუციის პირველი წლის აღტაცება? ბევრი რამ იცვალა მას შემდეგ და ისე მოგვიჩლუნგა ყოველი გრძნობა, რომ ჩვენთვის გასაკვირველი აღარა იყო რა. არ მოველოდით კი, ღვთის წინაშე, ამ ამბავს. ღიმილით ვეკითხებოდით ერთმანეთს, ნუ თუ ეს მართალია? შოველი კი იჯდა თავისთვის კუთხეში, ბურნუთს შეექცევოდა და პირს ღიმი მოს-

ლიოდა, თითქო გვეკითხება: — რაღას კითხულობთ, მე უმაგისო-
დაც ვიცი, რომ საერო კრებას ჯარმა აჯობაო!

ის პროკლამაცია გუშინ ვიპოვე ჩემს ქალაქებში. მინდოდა
მთლად გადმომეწერა, მაგრამ ამდენი პროკლამაციებით თავი შე-
გაწყინეთ მგონი, და გარდა მაგისა, ცოტა არ იყოს, სულ ერთმა-
ნეთსა ჰგვანან და ერთი-ორიც კმარა წასაკითხად.

მეფის მომხრეებმა ერთხელ კიდევ სცადეს რესპუბლიკის და-
ღუპვა, ეწერა ამ პროკლამაციაში. ერთი წელიწადია, ძირს უთხრიან
და ბოლოს, ალბად საკმარისად მისუსტებულად ეჩვენათ იგი, რომ
ყოველი მხრიდან გახიზნულები დაიბარეს. ვანდედან და ლიონიდან
თავიანთი მომხრენი, და გამგეობის გაუქმება მოინდომეს. მაგრამ ვე-
რას გახდნენ. გამგეობა ამით დაწვრილებით, უტყუარი საბუთებით
დამტკიცებულს მათს განზრახვას აცნობებს ერს, რომ იცოდეს ხალ-
ხმა, რას უპირებენ მეფის მომხრენი რესპუბლიკას და მასთან ერთად
ყოველი მამულიშვილის თავისუფლებას, მოქალაქებრივ უფლებას
და საკუთრებას, რათა ამით ერთხელ კიდევ განამტკიცოს ის აზრი,
რომ ადამიანს ადამიანურად ცხოვრებას მარტო კონსტიტუცია ანი-
ჭებს.

ეს პროკლამაცია და მასთან ერთად მეფის მომხრეთა შეთქმუ-
ლობის დაწვრილებითი აღწერა მრავლად დაურიგდა ხალხს ქალაქ-
შიც და სოფლებშიც.

მეორე დღეს გავიგეთ, — და მეფის მომხრენი არც კი მალავ-
დნენ, — რომ გამგეობის გასაუქმებლად თურმე ემზადებოდნენ. რაღა
დავატადოთ, მანამ საკმარის ძალას მოიკრებენ, ჩვენვე დავასწროთ
და შევმუსკროთო, — გამგეობას გენერალი ოჟეროსთვის მიენდო შე-
თქმულების დასჯა. ოჟერო თორმეტი ათასი კაცით დარეოდა პარიზს
და დაეჭირა ყველა შეთქმულნი და აგრეთვე ბევრი საერო და უფ-
როსთა კრების წევრი იმავე დღეს უმთავრეს დამნაშავეთათვის,
ორმოცდაცამეტი კაცისთვის კალედონიაში გაგზავნა გადაეწყვი-
ტათ და ზედ მეფის მომხრე გაზეთების რედაქტორები და გამომცემ-
ლებიც მიეყოლებინათ.

კალედონიაში გაგზავნილთა შორის ბევრი ცნობილი მოღვაწე
იყო, მაგალითად ბუასისი დანგლა, პიშეგარუ და სხვ. აი, როგორ აღმო-
ჩენილიყო ეს შეთქმულობა: ბონაპარტს რომ ვენეცია აედო, უწინა-
რეს ყოვლისა ინგლისის კონსულის დაჰერა და ერთიც ფრანგის —
მეფე ლუი XVIII ერთგულად ცნობილის მსახურის ანტრეგის და-
ჰერა ებრძანებინა. ამ ანტრეგთან ეპოვათ მისი ხელით ნაწერი ქა-
ღალდები, რომელშიც აღწერილი იყო თურმე, როგორ დაიყოლია
გენერალი პიშეგარუ მეფის მოხელემ, თავადმა მონგაიარმა. თავადმა

კონდემ იცოდა, რომ მონგაიარს საფრანგეთში დიდი ნათესავობა ჰყავდა და 1795 წ. შვეიცარიაში დაიბარა და სთხოვა: — უნდა მოახერხოთ როგორმე და პიშეგრუ მოგვისყიდოთო. მეტად ძნელი იყო ამ ბრძანების ასრულება, რადგან პიშეგრუს ოთხი კომისარი ჰყავდა საერო კრებისაგან მიჩენილი და დღე და ღამ თვალს არ არიდებდნენ.

მიუხედავად ამისა მონგაიარმა ექვსასი ბაჯალლო ოქრო ჩაიჩხრიჩა ჯიბეში და შეუდგა საქმეს. შვეიცარიაში, ნეფშატელში ერთი მესტამბე ფოშბორელი შეიამხანაგა და ერთი იქაურივე ვილაც კურანი, რომელთაგანი პირველი ღმერთსავით ლოცულობდა საფრანგეთის მეფის გვარს და მეორე კიდევ ფულისათვის სატანას არ დაუჭერდა თავის სულს. მონგაიარმა იმათ საჭირო დარიგება მისცა, პასპორტები უშოვა და საფრანგეთში შეგზავნა, როგორადაც უცხოელი სოფლაგრები. თითონ კი ბაზელში დარჩა.

ახლა კი სიტყვასიტყვით გადმოვწერ იმ ქალალდს, რადგან ამ საბუთებს თვით მეფის მომხრენიც არ უარობენ და, გარდა ამისა, კარგი იქნება ნახოთ, როგორა სჯიან თავის თავს მოლაღატენი:

„13 აგვისტოს 1795 წ., — ამბობს მონგაიარი, — ფოშბორელი და კურანი პიშეგრუს ბანაკისკენ გაემგზავრნენ; რვა დღე იყვნენ იქ, ყოველ დღე ხედავდნენ გენერალს, მაგრამ მას ყოველთვის კომისარები და აფიცრები ჰყვანდნენ თან და ლაპარაკი შეუძლებელი იყო. პიშეგრუმ კი შეამჩნია იგინი, მეტადრე ფოშბორელი. და რადგან თავის გზაზე ყოველგან იმასა ხედავდა, მიხვდა, — ჩემთან სალაპარაკოდ არის მოსულიო, და ერთხელ მარტოდ მიმავალმა ანიშნა, — უნინგში მივდივარო. ფოშბორელიც იქით გაეშურა. პიშეგრუს ოთხივე კომისარი თან ჰყავდა. მაინც მოახელა ერთ წამს მარტოდ დარჩენა და, თუმცა კოკისპირულად წვიმდა, უთხრა, — სადილად ქალბატონ სალომონთანა ვარო. ქალბატონი სალომონი პიშეგრუს საყვარელი გახლავთ და ქალაქ გარეთ დგას ერთი საათის სავალზედ. ფოშბორელი მაშინვე გზას გაუდგა. დანიშნულ ადგილზე სადილს უკან მივიდა და პირდაპირ გენერალი პიშეგრუ იკითხა. გენერალმა მარტო მიიღო, თან ყავას მიირთმევდა. მესტამბემ მოახსენა, — უანუაჟ რუსოს ხელნაწერი მაქვს, და თუ ნებას მიბოძებთ, მინდა თქვენ გიძღვნათო. — „ძალიან კარგი, — უპასუხა პიშეგრუმ, — ოლონდჯერ ხელნაწერს წავიკითხავ, რადგან რუსოს იმისთანა აზრები აქვს თავისუფლების შესახებ, რომელთაც მე ვერ ვეთანხმები და, მაშასადამე, არ მინდა, რომ იგინი ჩემი სახელით გავრცელებდნენ“.

— მაგის გარდა სხვაც მინდა მოგახსენოთ რამე. — უთხრა ფოშბორელმა.

— რა და ვისგან?

— უგანათლებულეს თავად კონდესგან.

— გაჩუმდით!

ერთ მიყრუებულ ოთახში გაიყენა და იქ დაუწყო ლაპარაკი:

— ამიხსენით თქვენი სიტყვები. რას მიბრძანებს უგანათლებულესი თავადი კონდე?

ფოშბორელმა უცბად ვერ მოახერხა პასუხი და შემკრთალი ბუტბუტს მოჰყვა.

პიშეგრუმ უთხრა:

— დამშვიდდით. მე იმავე აზრებისა ვარ, რა აზრებისაც უგანათლებულესი თავადი კონდე ბრძანდება. მითხარით, რას მიბრძანებს?

ფოშბორელიც დამშვიდდა და უთხრა:

— უგანათლებულეს თავადს ნებავე, თქვენ მოგენდოთ... თქვენი იმედი აქვს... თქვენთან შეერთება სურს.

— ეგ სიტყვებია, ცარიელი, უსარგებლო სიტყვები, — უთხრა პიშეგრუმ. — სიტყვა ქარია და ქარივით ქრება. წადით, სთხოვეთ, ხელნაწერი ბრძანება მოგცენ და სამ ღლეხედ ისევ დაბრუნდით ჩემს სანახავად. სადამოს ექვს საათზე მარტო ვიქნები.

„ფოშბორელი მაშინვე ბაზელში მოვიდა და გახარებულმა მიამბო ეს ამბავი. მთელი ის ღამე წიგნის წერას მოვუნდი, რომელიც პიშეგრუსთან უნდა გამეგზავნა; უგანათლებულესმა თავადმა, რომელსაც მეფე ლუი XVIII-გან მინიჭებული ჰქონდ: ყოველივე უფლება, თავის ხელმოწერილი ბრძანებით მე მომანიჭა მრავალი თავისი უფლებანი და, სხვათა შორის, უფლება მიბოძა, გენერალ პიშეგრუს გამოვლაპარაკებოდი და, თუ შეიძლებოდა, დამეყოლია კიდევ. მე ამ უფლების ძალით შევეუდექ მასთან წიგნის წერას. ჯერ დიდი ქება შევძლვენი, რომ გული მომეგო და აღმეძრა მასში სიამაყე, რომელიც განაგებს დიდსულოვანთა ყოველს მოქმედებას; ავუწერე, რა სიკეთეს უზამს იგი სამშობლოს, თუ ჩვენ მოგვიდგა და მამაპაპეული ტახტის შოვნა უშველა ჩვენს მეფეს. აღვნიშნე აგრეთვე, რა მადლიერი იქნება მისი მეფე და რა სამაგალითოდ დააჯილდოვებს მის სამსახურს; მივწერე: — მის უდიდებულესობას ნებავე, მარშლობა მოგცეთ და ამასთანავე აღზასის მოურავობა, რადგან აღზასს ვერავინ მოუვლის ისე კარგად, როგორაც ის, ვინც იგი მტერთაგან დაცვა-მეთქი; გარდა მოურავობისა მეფე უწყალობებს მას შამპორის ციხეს თავისი მამულებით, თორმეტი ზარბაზნით, ერთ მილიონს ვერცხლის ფულად, ორას ათასს წლიურ შემოსავალს საშვილიშვილოდ და სასახლეს პარიზში. ყველა ამას ისიც დაეძინე, რომ მეფის ბრძანებით ქალაქი არბუა, სადაც პიშეგრუ დაიბადა, პიშეგ-

რულ იწოდება და თხუთმეტი წლის განძავლობაში განთავისუფლებული იქნება ყოველი გარდასახადისაგან; რომ მის ცოლს ორასი ათასი და მის შვილებს და შვილიშვილებს თითოს ორმოცდაათი ათასი ექნებათ პენსიად ვიდრე არ ამოწყდება მისი შთამომავლობა.

„ეს შევაძლიე პიშეგრუსს. რაც შეეხება მის ჯარს, აი, რას შევპირდი მეფის სახელით: ყოველი რაზმის უფროსი დამტკიცებული იქნება თავის ხარისხში; ყოველი რაზმის უფროსი ან ჯარის კაცი, რომელსაც კი პიშეგრუ დაგვისახელებს, წარჩინებული იქნება; წარჩინებული იქნება აგრეთვე ყოველი ჯარის უფროსი, რომელიც რაიმე ციხეს დაგვანებებს. განთავისუფლებულ იქნება ყოველივე ხარჯიდან ყოველი ქალაქი, რომელიც დაგვენბდება. ხალხს ერთიანად მივუტყვევებთ ყოველს მეფისადმი შეცოდებას და არავის დაესჯით.

„ბოლოს დავუმატე უბრწყინვალესი თავადი კონდეს სურვილიც: თავადსა სურს, რომ თქვენ ბანაკში ლუი XVIII აღიაროთ მეფედ, ქალაქი ჰუნინგი ჩვენ დაგვითმოდ, შემოგვიერთდეთ თქვენი ჯარით და ჩვენთან ერთად პარიზის ასაღებად წამოხვიდეთ..

„პიშეგრუმ გულმოდგინედ წაიკითხა. ჩემი წერილი და ჰკითხა ფოშბორელს:

— ძალიან კარგი, მაგრამ ვინა ბრძანდება ეს მონგაიარი; რომ ამ უფლებებით აღჭურვილსა ხდის თავის თავს? მე არც თითონ იმას ვიცნობ, არც იმის ხელწერილს. ეს იმის ნაწერია?

— დიად, ბატონო.

— ჰოდა, უწინარეს ჩემი პასუხისა, მე მსურს. დავრწმუნდე, რომ უბრწყინვალესმა თავადმა კონდემ თავისი ხელით შეამოწმა, ყოველი პირობა, რომელსაც მე მონგაიარი მიდებს. მე კარგად მახსოვს თავადის ხელნაწერი. მაშ დაბრუნდით მონგაიართან და სთხოვეთ, შეატყობინოს უბრწყინვალეს თავად კონდეს ჩემი პასუხი.

„ფოშბორელი მაშინვე ჩემკენ გამოეშურა, პიშეგრუსთან კურანი დასტოვა. ბაზელში საღამოს ცხრა საათზე მოვიდა და ყოველივე მაცნობა. მაშინვე თავად კონდეს ბანაკისკენ გავწიეთ და პირველის ნახევარზედ მივედით, როდესაც თავადს უკვე ეძინა. გავაღვიძებინე და ლოგინში მწოლარემ მინახულა. თავის ლოგინზე დამსვა და დავიწყეთ სჯა. შევატყობინე მის უბრწყინვალესობას საქმის ვითარება და ვთხოვე, წიგნი მისწერეთ პიშეგრუსს, რათა დარწმუნდეს, რომ ყოველივე, რაც მე თქვენი მონდობილობით და სახელით მივწერე, სრული ჰუმარიტება გახლავთ, რომელსაც თქვენ თქვენი ხელის მოწერით ამტკიცებთ-მეთქი. ამ უბრალო და ამასთან საჭირო თხოვნის განსჯას, რომლის წინააღმდეგ ვერავითარ შენიშვნას ვერ იპოვის კაცი, მთელი ღამე მოვანდომეთ. თავადი კონდე საკვირველი გულა-

დი ვაჟკაცია, ღირსეული შვილი ღირსეული მამა-პაპისა, მაგრამ როცა საქმე სხვას რასმე შეეხება, საკვირველი გაუბედავი კაცია. უხასიათოა, უფიცი და გარს იმისთანა ვერაგი და საკუთარი ინტერესებით გატაცებული კაცები ახვევია, რომ...”

მონგაიარი დაწვრილებით ასწერს მეფის მხლებელთა სულმდაბლობას, ლაჩრობას და უპატიოსნობას. მერე განაგრძობს:

„მთელი ცხრა საათი ვეწვალე, ვიდრე გავაბედვინებდი და პიშეგრუსთან ცხრა სტრიქონს დავაწერიებდი. ხან იძახდა, ჩემი ხელით არ დაწვირო; ხან იძახდა, თარიღს არ დაუუსვამო; ხან იძახდა, ჩემს ბეჭედს არ დავასვამო; ბოლოს, როგორც იყო დავიყოლიე და მისწერა, სრული ნდობა გქონდეს მონგაიარის წინადადებისა, რომელიც ჩემი მონდობილობით და ჩემი სახელით მოქმედობსო. ეს გავათავეთ, მაგრამ ახლა სხვა ჭირი აგვიტყდა: ჩემი წერილი უკანვე დამიბრუნოსო. მე ჩემი დამემართა, მანამ დავარწმუნებდი, რომ თუ წერილის უკანვე მიღება უნდა, ეს პიშეგრუს არ უნდა აგრძნობინოს; რომ წერილს წაეკითხებო, და რაკი ვნახეთ, რომ საქმე გარიგდა, უკანვე გამოვცინულავთ.

ინათა და ბაზელისკენ გავეჩეთ. ფოშბორელი იმ დილითვე გავისტუმრე პიშეგრუს ბანაკისკენ. ერთი კი გადაეკითხა გენერალს თავად კონდეს წერილი და მაშინვე უკან მოეცა: — მე ვიცნობ მის უბრწყინვალესობას და ჩემთვის ესეცა კმარა. მისი სიტყვა სრულიად საკმარისი უნდა იყოს ყოველი ფრანგისთვის და საცა მისი სიტყვაა, იქ საბუთი მეტია. აი, ისევე თავადს მიართვით ეს წერილი.

მაშინ ფოშბორელმა აუხსნა, რას სთხოვდა მას მეფის მინდობილობით თ. კონდე: 1) პიშეგრუს ლუი XVIII მეფედ გამოაცხადებს თვის ჯარში და თეთრ დროშას ამართავს; 2) ქ. ჰუნინგს თავად კონდეს დაანებებს.

„პიშეგრუსმ ამაზედ უარი განაცხადა: მე ყველაფერი დასრულებული მიყვარს და ნაწილით ვერ დავკმაყოფილდები; მე სრულიადაც არ მინდა ლათაიეტის და დიუმურისაგით დავაბოლოო ჩემი ცხოვრება: მე კარგად ვიცი ჩემი ძალა და საშუალებანი; თქვენ ვერც კი წარმოიდგენთ, რა დიდია ეს ძალა; მას ღრმა ფესვები აქვს გადგმული არა მარტო ჩემს ჯარში, არამედ პარიზში, თვით კონვენტში, მთელს საფრანგეთში და სხვა ჯარებში, რომელთა მხედართმთავარნი ჩემი აზრისანი არიან... დრო არის ამ ყოფას ბოლო მოვუღლოთ! საფრანგეთი რესპუბლიკად ვერ დარჩება! საფრანგეთს მეფე უნდა, ლუი XVIII. მაგრამ რევოლუციის გაუქმება მაშინ უნდა დავიწყოთ, როდესაც დანამდვილებით გვეცოდინება, რომ უცბად და უთუოდ მივალწევთ ჩვენს მიზანს. თავადის გეგმა გროშად არა ღირს, რადგან

ოთხ დღესაც ვერ გამაგრდება ის ჰუნიგში და არ გაეა ორი კვირა, რომ მეც დავიღუპები. ჩემს ჯარში ყოჩალი ბიჭიც ბევრია და საძაგელიც; საჭიროა მათი განწორება; საჭიროა იმგვარ გარემოებათა შექმნა, რომ ძალაუვნებურად უკან გამოიყვეს ჩემი ჯარი და გრძნობდეს, რომ ხსნა მარტო ჩემს გამარჯვებაშილა აქვს. ამის ასასრულებლად მე გაღმა გამოვალ. პირობას გაძლევთ, რომ დანიშნულ ადგილზე და დანიშნულ ღროს თქვენგანვე დანიშნული ჯარის ნაწილებით გამოვალ რეინს. მაგრამ თქვენსკენ გამოსვლამდე ყველა ციხე-სიმაგრეში ჯარის უფროსად ჩემს ერთგულს და თანამოაზრე უფროსებს დავაყენებ ერთგული ჯარებით. იმ საძაგლებს კი, რომელნიც ჩემს ჯარშიც ბევრნი არიან, იმისთანა ადგილებში გავგზავნი, რომ ვერავითარი წინააღმდეგობა ვერ გაუწიონ ჩვენს განზრახვას და ვერც შეერთდნენ. ამის შემდეგ, რაკი გაღმა ვიქნები, მეფედ აღვიარებლუი XVIII, და ავმართავ თეთრ ღროშას; თ. კონდეს ჯარები და აგრეთვე პრუსიელები შემოგვიერთდებიან და ერთად შევალთ საფრანგეთში. ციხეები თავისთავად დაგვნებდებიან და პირდაპირ პარიზისკენ გავწევთ. ორ კვირაზედ პარიზს მივადგებით. მაგრამ ეს კი არ დავაიწყებთ, რომ ჯარისკაცს ის უყვარს, ვინც ხახას გაუსველებს. რომ დაიძახებს, — მეფეს გაუმარჯოსო! — ერთი ჯამი ღვინო უნდა გადააკრევინოთ და ერთი ოქრო ჩაუღოთ ხელში. პირველ ხანებში მას არა უნდა აკლდეს რა და მთელს ჯარს თავსაყრელი უნდა ჰქონდეს ყველაფერი... მიბრძანდით, მიართვიოთ მის უბრწყინვალესობას ჩემი პასუხი, ჩემი წერილი, და პასუხი მოიტანეთ“.

აქ კი შევჩერდები! იმ მოღალატისათვის ესეც კმარა. ჩემი საწყალი მოხუცებული სომი პიშეგრუსაგან „საძაგლებად“ წოდებულთა რიცხვში იყო და მართლა ისეთ ადგილებში გაფანტა ივინი მოღალატე მხედართმთავარმა, რომ ათიათასი კაცი დაღუპა! როგორ გაბრაზდებოდა სომი, ეს წერილი რომ წაეკითხა, როგორ შეაღრქიალებდა კბილებს! განა არა, სულ იმას იძახდა საწყალი, გენერალი გვლაატობსო! მაგრამ ვინ იყო გამგონი? რა მწარე უნდა ყოფილიყო უბედურისთვის გრძნობა, რომ მახეში გააბა ისა და მისი ამხანაგები მტრისგან შესყიდულმა მისმა მხედართმთავარმა!

ქვეყანა შესძრა ამ ამბავმა. და განა მარტო ამან? ამას ზედ ერთოდა დიუვერნიეს, ბროტტიეს და სხვების შეთქმულობა, რომელნიც გამგეობამ გამოაქვეყნა. მათი წერილები ცხადად ამტკიცებდა, რომ შეთქმულნი საზღვარგარეთ კი არა, საფრანგეთშიც ბევრნი ბრძანდებოდნენ და უმთავრესნი შიგ საერო კრებაში იყვნენ ვითომდა ერის წარმომადგენლებად.

ბარამ, რეზელმა და ლარევეიერმა „რესპუბლიკის მხსნელის“

სახელი მოიხვეჭეს მაშინ. მრავალი დამნაშავე გაგზავნეს კალედონიაში; გახიზნულების წინააღმდეგ სასტიკი კანონები გამოაცხადეს; გახიზნულთა ნათესავებს ყოველივე სახელმწიფო სამსახური აუკრძალეს; მოსპეს თავისუფლება მწერლობისა და თავისუფლება ერის მცველი ჯარისა... ჩვენდა სამწუხაროდ, იმისთანა ყოფაში იყო ჩვენი მომავალი, რომ მწერლობის თავისუფლების მოსპობაც კი აუცილებელ საჭიროებას წარმოადგენდა. დიუვერნიეს დალატმა რეინზე მყოფი ჯარის მხედართმთავარი გენერალი მოროც ჩაითრია და მის ალაგს გენერალი ჰოში იქნა დანიშნული.

მეფის მომხრეებმა, რომელთაც ათასობით ხოცეს პატრიოტები და ათი ათასობით გაგზავნეს კალედონიაში, როცა ძალა ხელთა ჰქონდათ, ახლაც ქვეყანა აიკლეს გოდებით: — რესპუბლიკა უღმერთოდ გვეკიდება და იმისთანა საშინელ ქვეყანაში გვგზავნის, რომ იქაურ სიცხეებს და ციებ-ცხელებას ხორციელი ადამიანი ვერ გაუძლებსო! მართალია, კალედონია ცუდი, დამცდელი ქვეყანაა, მაგრამ რად ეგონათ, რომ ჩვენ კი ავიტანდით? ნუ თუ ისინი ჩვენზედ ნაზის აგებულებისა ბრძანდებიან? ნუ თუ არ იციან, რომ კალედონიაში სისხლისმწოველი დიდრონი ბუზებია, ისინი ღმერთმა მარტო რესპუბლიკელებისათვის კი არა, მეფის მომხრეთათვისაც გააჩინა? ძალა ხელთა ჰქონდათ... რატომ არ გააუქმეს ეს საშინელი სასჯელი? ახლა ხომ იმათაც აღარავინ დასჯიდა კალედონიის სიცხეებით? რატომ არ იცოდნენ, რომ ჰკვიანი კაცი სხვას არ უზამს იმას, რაც არ უნდა, რომ თითონ უყონ.

რესპუბლიკამ გაიმარჯვა. კარნოს და ბართოლემის მაგივრად გამგეობის წევრებად დანიშნულ იქმნენ მერლენი და ფრანსუა. იაკობელებს ეგონათ, ახლა კი დამშვიდდა ყველაფერიო, მაგრამ ცოტახანს უკან კვლავ ატყდა ბრძოლა კლუბებში და ახლა იაკობელები და გამგეობის მომხრენი შეიბნენ.

მართალია, დიდი ღვაწლი ელო გამგეობას მეფის მომხრეთა განადგურებაში, მაგრამ ნამდვილი რესპუბლიკელები მაინც არ ემხრობოდნენ მას: გამგეობა გაძლიერდა, საერო კრების და უფროსთა კრების დაშლას აპირებდა და ქვეყნის სრულ დამშვიდებამდე თითონ უნდოდა სრული ბატონობა და ბრძანებლობა. ხმას ვერავინ იღებდა. რადგან თითქმის ყველგან აწვდიდა გამგეობა თავის გრძელ ხელს. თვით შოველიც კი ფრთხილად იყო; ბევრსა კითხულობდა და ჩუმად იყო. მეგონა, ჰკუაზედ მოვიდა-მეთქი და ძალიანაც მიხაროდა, მაგრამ ძალიან თურმე ვცდებოდი, რადგან შოველს ყოველგვარ მართებლობაზე მეტად გამგეობა თურმე სძულდა, რადგან მან დაისა-

კუთრა უფლება, რომლითაც თავის ხებად აყეხებდა და სცვლიდა მსაჯულებს, მამასახლისებს და ერთობ ყველა მოხელეებს მთელს საფრანგეთში; გამგეობა თავისი ნებით სპობდა გაზეთებს, კეტავდა კლუბებს, აგვიანებდა ერის მცველი ჯარის მოგროვებას და სხვა და სხვა.

ერთ საღამოს ველარ მოითმინა შოველმა და თქვა:

— რაღა ვართ ჩვენ ამ გვარი მართებლობის ხელში? საღლაა ერის უფლებანი? ეგენი კი არა, ხუთივე გამგე რომ სულ დანტონები იყვნენ, დანტონისავეით შორს გამჭვრეტნი და სამშობლოს ერთგულნი, მაინც საზიზღარ მტარვალებად მეჩვენებიან, თუ კი ამდენი განუსაზღვრელი უფლებებით იქნებიან აღჭურვილნი. ესენი გამგენი კი არა, ძველი ქვეყნების მტარვალნი არიან! კიდევ კარგი, რომ ასეთი სულელნი და მხდალნი არიან, თორემ ამერიკელ მონებსავეთ გვაწამებდნენ თავისუფალ მამულიშვილებს. ძალიან გაიკვირვე! მოვა ვინმე ერთი მამაცი გენერალი, გამგეობის ხუთი წევრის ადგილზე მარტო თითონ გამოიჭიმება და, თუ არ გინდა, ნუ უწოდებ მას მეფედ, შენ მაინც მონა იქნები. ჯერ ახლაც პირს კლიტე გვადევს, რადგან კედლებსაც კი ყურები შეასხა გამგეობამ და კრინტი რომ დაეძრათ, დაგვიჭერენ, ხელშეკრულს წაგვათრევენ და საუკუნოდ გამოგვასალმებენ სამშობლო ქვეყანას. საღლაა ერი! საღ არის ჩვენი თავისუფლება? საღ არის ჩვენი უფლებანი? აღარსად! გამგეობა განაგებს ყოველსავე თავისნებად! და საერო კრებას და უფროსთა კრებას, თუ არ დაგვშლიათ, ნება აქვს გამოსთქვან თავის სურვილი... მარტო გამოსთქვან, ინატრონი და ცარიელ ნატვრას რა თაბაუთი აქვს!

საერო კრების თითქმის გაუქმებაზედ არა ნაკლებ აღშფოთებდა შოველს გამგეობის შეშინება გენერალი ბონაპარტისაგან. ბონაპარტი სრულიად თავისუფლად დაიარებოდა იტალიაში, და საერო კრების დაუკითხავად ეომებოდა იტალიელ სამეფოებს, ხარკს ადებდა, ისევ ურიგდებოდა და გამგეობას ვერც მისი გადაყენება გაეებდა, ვერც პარიზს დაბარება ანგარიშის საკითხავად. საერო კრება სიცოცხლის ნიშანს აღარ იძლეოდა. გამგეობა რაღასაც ელოდა და მთელი საფრანგეთის ყურადღება სიცოცხლით სავსე ბრწყინვალე გენერალზედ იყო მიპყრობილი. გაზეთებში ნაპოლეონის მეტს ველარას ნახავდით: პროკლამაცია „იტალიაში მყოფი ჯარების მხედართმთავრის ნაპოლეონ ბონაპარტისა“; „ნაპოლეონ ბონაპარტის მობრძანება პასერიანოში“, „წმ. პაპისგან იოსებ ბონაპარტის, საფრანგეთის ელჩის მიღება“; გენერალი ბონაპარტისაგან ციზალპინის რესპუბლიკისთვის წესწყობილების შექმნა... ერთი სიტყვით, გენერალი ბონაპარ-

ტის ამბებით სავსე იყო გაზეთები! ნაპოლეონი იქ მიბრძანდა, ნაპოლეონმა ეს ბრძანა და სხვა და სხვა.

იტყოდით, ნაპოლეონი საფრანგეთიო. გენერალი ჰოშის მიცვალება, ოქროს დანიშვნა მის ადგილზე, ინგლისთან მორიგებაზე მოლაპარაკება — ეს ყველაფერი შეუმჩნევლად რჩებოდა ჩვენი ერისთვის და ყველას ყურადღება ნაპოლეონს წარეტაცა. ნაპოლეონს შეეძლო ეთქვა, რომ ძალიან კარგად იცოდა გაზეთების მნიშვნელობა ჩვენი გაზეთები მარტოდმარტო ნაპოლეონზე და მის იტალიაში ბრძოლაზე უფრო მეტსა წერდნენ, ვიდრე ყველა ჩვენ მხედართმთავრებზედ და სხვა ბრძოლებზედ ერთად.

ნაპოლეონს მორიგებას ეხვეწებოდნენ იტალიელი სამეფონი და იმოდენი ბრძოლების და გაჭირვების შემდეგ ყველას გვინდოდა ომის გათავება, რომ ცოტაც არის დაემშვიდებულიყავით და მიგვეხედა ჩვენი ცოლ-შვილისთვის და მამულ-დედულისთვის. ყველას მორიგება გვენატრებოდა და ხალხზედ რომ ყოფილიყო დამოკიდებული, ომი თავის დღეში არ ატყდებოდა.

ბოლოს მორიგებაც მოხდა. რეინის მარცხენა მხარის შესარჩენად, რომელიც ჩვენ ნაპოლეონის წინაღვე ავიღეთ და უკვე გვეჭირა, გენერალმა ბონაპარტმა აესტრიის იმპერატორს დაუთმო იტალია, დალმაცია და ვენეცია; დაუთმო, თუმცა ჩვენი არ იყვნენ. დაუთმო, რადგან დამარცხებულთ არასა ჰკითხავენ. გარდა ამისა, აესტრიის ხელმწიფე საფრანგეთს უთმობდა იონიის კუნძულებს, რომელნიც უინისოდაც ჩვენ გვეჭირა.

არა, მართლა ბრმა უნდა იყოს ხალხი, რომ ამისთანა თვალთმაქცობაც კი ვერ გაუგოს კაცს! როგორც ვეჭილები მოდავეთა სისულელეზედ ამყარებენ თავიანთ კეთილდღეობას, ისე მხედართმთავრები ხალხის უფიცობაზედ აშენებენ თავიანთ დიდებას და ძლიერებას. ხომ არაფერი შესძინა საფრანგეთს ამ მორიგებაში, მაგრამ ხალხს თვალეები აუბეს, დაარწმუნეს, — დიდი ღვაწლი დასდო საფრანგეთს ნაპოლეონმა ამ მორიგებითო, — და სწორედ აქედან იწყება ბონაპარტის უცნაური ამალეება და გაძლიერება.

მაშინაც ბევრნი გაიძახდნენ ამათ, მაგრამ ხალხი, უფიცი და შეუგნებელი ხალხი კი, ალტაცებული იყო თავის „ერთგული და დიდებული გენერლის“ მოღვაწეობით. განა ახსოვდა ვისმე, რომ უქანასკნელი ოთხი წლის განმავლობაში სხვებმაც მრავალჯერ დაამარცხეს. იცოდეთ? უკვე თოვლი იდო, მაგრამ მთელი გზა, რომელზედაც ნაპოლეონს უნდა გამოეელო, ფიჭვის და ნაძვის მწვანე ტოტებით იყო ორივე მხრივ შეღობილი. რომ გენახათ, რა გულჩათუთქული დაიშალა ხალხი, როდესაც გაიგეს, ნაპოლეონს გაუეღია კიდევცო.

ნათლიაჩემი, ლეტუშიე და ძაძაჩემი ჩვენსა შემოვიდნენ გასათობად. სამღურავის თქმასაც კი ვერა ბედავდნენ; პირიქით — უკან რომ დაბრუნდება, აქეთ გამოივლის და მაშინ გამოგვადგება დღევანდელი სამზადისიო.

მარგალიტამ მაშინვე ერთი ხელადა ღვინო ამოუტანა შეცივებულებს. ის იყო დავასხით, რომ ელოფ კოლენი, რაფიელ მანკი და ღვინის თევნო შემოვიდნენ. ყველანი ძალიან ნაწყენნი იყვნენ, მეტადრე ელოფი, რომელსაც დიდი, მჭევრმეტყველებით აღსავსე სიტყვა მოემზადებინა მამულიშვილ ბონაპარტისთვის. შოველი გაჩუმებული უსმენდა, მაგრამ უტბად იმისთანა სიცილი წასკდა, რომ ყველანი საღტად დაერჩით.

— რას იცინი, შოველ? — ჰკითხა ნათლიაჩემმა.

— იმას ვიცი, ჩემო ივანე, რომ ჩვენისთანა კერპთაყვანისმცემელი ხალხი სხვა არსად შეიძლება. ჩვენ კერპი გვინდა რომ თაყვანი ვცეთ და ოღონდ კი იყოს, სულ ერთია, ვინც უნდა იყოს! ზის ეხლა ლამაზად ჩათბუნებული თავის ეტლში ნაპოლეონი, ბურნუთს შეეჭყევა და ფიქრობს: — ძაან კარგად არის საქმე!.. იაკობელებიც ჩემკენ არიან, მეფის მომხრენიც და ყველა სხვა პარტიებიც! ან რა პარტიები, რის პარტიები?! ბრბო უტვინოთა, რომელთაც ორი სამი კაცი ათამაშებს თავის გუნებაზე! ვინ იტყოდა ამ სამი წლის წინათ, როდესაც ყოველ დილით რობესპიერს სანახავად ვეახლებოდი ხოლმე და ადამიანის უფლებათა დამყარების ერთგულებას ვიჩემებდი, რომ დღეს ფეხქვეშ გამეგებოდა საფრანგეთი? შარშან არ იყო, მოწყალეებისავით ვთხოვდი მამულიშვილ ბარროს, — თქვენი ნახვის ნება მიბოძოთ-მეთქი! ისიც, თუ კარგი სადილი მიერთმია, კარგად მიმიღებდა, თუ არა და!.. მოსამსახურენიც კი მასხარად მიგდებდნენ: რაკი ნახავდნენ, რომ მათი ბატონი ცუდად დამიხვდა, თვალს უშვრებოდნენ ერთმანეთს, — ჰეე, მოხვდა თუ არაო! მაგრამ რა გაეწყობოდა, თავს ვიმაგრებდი, ვითმენდი; ვიცოდი, რომ ვისაც ამალგება უნდა, ძლიერთა წინაშე ქედის მოღრეკაც უნდა იცოდეს; ვიცოდი, რომ ვისაც დიდება უნდა, შეურაცხყოფის ატანაც უნდა იცოდეს... ვერ მიმიძღვის წინ შიკრიკი! ვერ მახლავს თან მეფური ამალა! იაკობელებიც და მეფის მომხრენიც ჩემს ქებას გაიძახიან და ხოტბას მასხამენ! ყველას თავისი ვგონივარ და ჩემგან მოეღიან ზოგნი ავსტრიელები... ვილას ახსოვდა გუშინდელი, როცა ასე კარგად ჰგვიდა ახალი ცოცხი!

ახლა განვაგრძოთ, რადგან საქმე დასასრულია.

ბონაპარტისას ისევე დაწვრილებითა სწვრდნენ ყველაფერს, თითქო უდიდესი ხელმწიფე ყოფილიყოს: „მილანი, 4 ნოემბერს. გე-

ნერალი ბონაპარტი გუშინ დილით რაშტადს გაემგზავრა“. „მანტუ, ნოემბერს. გენერალი ბონაპარტი სასახლეში იქმნა მიღებული. მამასახლისი და ყველა მოხელენი მოსაკითხად ეახლნენ“. ან კიდევ: „შვეიცარიაში მგზავრობის დროს გენერალმა ბონაპარტმა სრულიად დაამშვიდა იქაურნი, რომელთაც დიდი ხანია ეშინიათ ჩვენი ჯარების შესევისა“. „ბონაპარტი 21 ნოემბერს ქენევაში ბრძანდებოდა და საფრანგეთის ელჩთან ისაძლია. დიდი ხანია მოუთმენლად ელოდა მის მოსვლას ხალხი...“ „გენერალ ბონაპარტს ავანშის ახლო ეტლი გაუტყდა; მშვიდობით გადაჩა და თავისი ამალით ფეხით მიბრძანდა ქალაქში. ხალხი წინ გაეგება. ერთი უზარმაზარი კაცი იდგა ხალხში; რომ დაინახა ნაპოლეონი, თქვა: რა პატარა კაცი ყოფილა ეს დიდებული გმირიო! გენერალს აღტაცებით უხედება მთელი შვეიცარია. ლოზანი ჩირაღდნებით განათებული დაუხვდა; ბაზელში ზარბაზნების სროლით მიეგება მამასახლისი“ და სხვა და სხვა.

პარიზში უარესი იყო. ყველა აღტაცებით მიელოდა გამარჯვებული მხედართმთავრის მისვლას, რომელმაც „ასეთი სასარგებლო“ პირობებით მოგვარიგა ავსტრიის ხელმწიფეს. საერო კრებაში ბევრი მომხრე ყავდა და ისინიც სულ იმის ქება-დიდებაში იყვნენ: ახლა კი დამშვიდდება ჩვენი ქვეყანა, კვლავ შრომას და მრეწველობას შეუდგება და აყვავდება! ახლა კი შეგვეძლება ამოდენა ომებისაგან გადატაკებული ხალხის შველა, ქვრივ-ობოლთა შემწეობა, ვაჭრობის და მრეწველობის დახმარება და სახელმწიფო ვალების გადახდაო!

სხვა რაღა მოგახსენოთ? ხალხი ფეხქვეშ უვარდებოდა ამ სალდათის ცხენს; ფეხქვეშ ეგებოდნენ და დიდ ბედნიერებად თვლიდნენ ბონაპარტის ფეხის მტვერის ლოკვას. აღმატებულად ისინი ირიცხებოდნენ, ვის ზურგსაც ბონაპარტი გააბედნიერებდა თავისი ფეხის შეხებით... გასაკვირველი რამ ყოფილა ადამიანის სულმდაბლობა! და თუ იმისთანა გმირს, როგორც ბონაპარტი იყო, ხალხი ცხერის ფარად მიაჩნდა, ეს თვით ხალხის ბრალია და მარტო ხალხისა: ვინც თავის თავის პატივისცემა არ იცის, არც სხვის პატივისცემის ღირსია.

ეტყობა თვით ბონაპარტს მოსწყინდა იმოდენი სიმდაბლით აღსავსე თავყვანისცემა, რომ თავი აარიდა შვეიცარიას და ალზასს და პირდაპირ პარიზისკენ გაეშურა. მერე როგორ ვეშაადებოდით, რომ თავის უფლებას, ზოგნი მ ე ფ ე ს და ზოგნი კონსტიტუციას!...

და უფრო მწარედ ჩაიცინა.

ელოფ კოლენი ამტკიცებდა, ნაპოლეონი ნამდვილი იაკობელია, ამას იმისი პროკლამაციებიც მოწმობენ, და კარგი არ არის, უსაბუ-

თოდ გაამტყუნონ კაციო!.. შოველი გაბრაზდა, თვალები აენთო და აღელვებით წარმოსთქვა:

— საბუთი გნებათ? მოიგონეთ შარშანდელი თავმდაბლობა ამ კაცისა და ახლა ეს თავხედური სიამაყე! იტალიაში გამარჯვების შემდეგ — და იქნება თქვენც დამეთანხმოთ, რომ უფრო ხშირად სამარცხვინოდ გაზვიადებულს ამბებს აწერინებდა გაზეთებში, — ისე ექტეოდა საერო კრებას და გამგეობას, თითქო ბატონი თავის ყმბსაო! სულ უბრალო, უმცირესი შენიშვნა რომ ეთქვათ, ის მაშინვე ყალყზედ დგებოდა და სამსახურიდან გასვლას აპირობდა; თან თავისი ჯარით აშინებდა და ემუქრებოდა: — ჭკვიანად, თორემ პარიზშიც მალე მოვალო! თუ რამე კეთილი გვქირს, ჩემი წყალობითაო, იძახის, და იმავე დროს თავისავე შეცდომას მარცხს სხვებს აბრალებს ყოვლად უსაბუთოდ. გამგეობის წევრთა ყოველი ბიწიერება მისხლობითა აქვს აწონილი და სამარცხვინოდ პირმოთნეობს და ხელის გულს ულოკავს, რომ მათი წყალობით ამადლებული პირველად იმათვე გადაუდგეს. იცით, რითი მოივო გამგეობის გული? პირმოთნეობით, გველაძეობით და ფულებით. დიად, ფულებით! ისე მოხსენება რა მოუწერია მართებლობისთვის, რომ თან ფულიც არ გამოეგზავნა. ერთ მოხსენებას ვერ ნახავთ მისას, რომ პირდაპირ ურცხვად არ ეწეროს შიგ: ხვალ აქა და აქ მიედღივარ და ამდენს მილიონს მოგკრებო. განა იმიტომ ანთხევს რესპუბლიკა თავის საუკეთესო შვილთა სისხლს, რომ ფული შეიძინოს?! განა ნაპოლეონამდე შეეძლო ვისმე ასე შებღალვა რევოლუციისა?! განა კუსტენს თავი არ გაუაგდებინეთ, — დამარცხებულთ ხარაჯა რად გადაახდევინეო?! განა რისთვის იბრძვის რესპუბლიკა? იმისთვის, რომ დამარცხებულთ ფულიც წაართვას, საქონელიც, ავეჯიც, ერთი სიტყვით, სულ ყველა, რაც აბადიათ და რაც დაკარგულ თავისუფლების სახსოვრად უნდათ იქონიონ? ამაზე უკეთესი საბუთი განაღა შეიძლება?! ქრისტე-ღმერთი ჭკუით იცნესო, ნათქვამია, ბონაპარტიც თავისი საქციელით არ უნდა ვიცნათ? განა სხვა იქნებოდა ვინმე, რომ თავის ჯარისთვის აეკლებინებინა იმისთანა გაკეთებული და განათლებული ქალაქები, როგორც პავი და ვერონი? უკუნითი უკუნისამდე ჩირქად შერჩება საფრანგეთს ეს საქციელი. ან რას უნდა გამოველოდეთ იმ გენერლისაგან, რომელიც ურცხვად ეუბნება თავის ჯარს: მე იმისთანა ქვეყანაში ჩაგიყვანთ, რომ დიდებაც შეიძინოთ, სახელიც და სიმდიდრეცაო! განა ნაპოლეონის ჯარისთვის ახლა წმიდა და ხელშეუხებელი არსებობს რამე? აღარაფერი! აღამიანი, ოჯახი, სამშობლო, ცარიელი სიტყვებიდაა მის ჯარისთვის, რომელიც მარტო იმისთვის იბრძვის, რომ დაამარცხოს და დაარბიოს, აიკლოს, გასძარ-

ცოს!... არა, თავდაპირველად სულ სხვა სახით ეჩვენა კაცობრიობას რესპუბლიკა. რესპუბლიკას უნდოდა სხვადასხვა დამონავეებული ერების აღდგენა, თავისუფლების მინიჭება და არა მათი გაძარცვა. ჩვენი ომი იტალიაში ყაჩაღური ომი იყო ვაჟკაცური ბრძოლა კი არა, ავანაჟური თარეში ნადავლის საშოვრად და ჩვენდა სამწუხაროდ იტალიაში გამარჯვებული ყაჩაღები და მათი სარდალი ჩვენც იმავე თვალთ გვიყურებენ, რა თვალთაც დამარცხებულ იტალიელებს — ზიზღით და სიძულვილით. იქნება ცოტაოდენი პატივისცემა ხალხისა კიდევაც ჰქონოდა ნაპოლეონს, მაგრამ ჩვენ იმისთანა ქებითა და დიდებით დავუხვდით „გმირთა-გმირს“, ისე გავეგენით ფეხქვეშ, რომ ზიზღის მეტს აღარას უნდა გრძნობდეს ჩვენდამი... იტალიაში დაჩვეულებს შემდეგაც მოგვინდება მილიონები და ახლა სხვაგან გავათარეშებთ ჩვენს ჯარს. იმას ხომ არ ვიტყვი, რომ მილიონები და მილიარდები შევიძინოთ შრომით და ყაირათითაო! ნუ მოგიკვდეთ ჩემი თავი! ის არა სჯობია სარჩოს საშოვნელად მეზობლები დავაწიოკოთ! ჰოდა, დავაწიოკებთ კიდევ! და რადგან ამ საქმეში ბონაპარტს ვერავინ აჯობებს, ჩვენი ბატონიც ბონაპარტი შეიქნება. რაც იმან ფული და ძვირფასი ნივთები შეგვძინა, არც კი ვღირვართ ჩვენ იმ ფულად! ფულით დავვიმორჩილა ბონაპარტმა და დღეს ბონაპარტისანი ვართ. თუ კაცია, ამის წინააღმდეგს იტყვის ვინმე!

ხშირად არ მინახავს ჩემი სიმამრი ისე აღშფოთებული, როგორც იმ დღეს იყო. ყველანი გაჩუმებულნი უსმენდნენ. შოველის ხმა მგონი ქუჩაშიც ისმოდა. ჯერ ხომ არაფერი იყო ბონაპარტი, მაგრამ მაინც საშიში იყო მისი ძაგება: ჩვენი გამგეობა იმდენად სუსტი იყო, რომ როგორც მოისურვებდა, ისე ათამაშებდა მას ნაპოლეონი და მაშასადამე ვილაცა შოველსაც ადვილად დააჭერინებდა.

პასუხი მართლაც არავინ გასცა შოველს და დაღონებულნი ხმისამოუღებლივ დაიშალნენ პატრიოტები. ნათლიაჩემი და მამაჩემიც კი არ დარჩნენ ვაჭშმად, — დავვილამდება, შინ ველარ ავალთო.

იმ საღამოს ხმა აღარ ამოგვიღია პოლიტიკაზედ, მაგრამ ისიც კმაროდა, რაცა თქვა შოველმა. მაშინ ვერა, მაგრამ შემდეგში კი დავრწმუნდი, რომ ჩემს სიმამრს კარგად ეცნო ბონაპარტი და კარგად იცოდა, რის იმედი უნდა ჰქონოდა მისგან რესპუბლიკას.

X

რამდენიმე დღის შემდეგ ხმა გავარდა, ბონაპარტი პარიზს მიბრძანებულაო. გაზეთებში ეწერა:

გენერალი ბონაპარტი გუშინ საღამოს ხუთ საათზე მობრძანდა. ამ ორ-სამს დღეში გამგეობას ნახავს ლუქსემბურგის სასახლეში, რომელსაც უკვე რთავენ მის მისაღებად. გამგეობა სადილს უმზადებს და 80 კაცი ჰყავს დაპატიყებული“.

მეორე დღეს ეწერა:

„გენერალი ბონაპარტი თავის მეუღლესთან ჩამოხტა, ერთ პატარა სახლში. ქალაქის მოხელეთ გამოეცხადებინათ სურვილი გენერლის ნახვისა. გაიგო თუ არა ეს ბონაპარტმა, თითონვე მიბრძანდა სამამასახლისოში; თან გენერალი ბერტიე ჰყავდა. სამამასახლისოში დახვდა მას კონვენტის წევრად ნამყოფი მათიო და შესაფერი სიტყვა მოახსენა. გენერალმა თავმდაბალი და ღირსეული პასუხი უთხრა“.

„პარიზის უმაღლესმა სამჯავრომ დეპუტატები აახლა ბონაპარტს მისასალმებლად. დეპუტატები დიდი პატივისცემით იქმნენ მიღებული“.

„ბონაპარტთან მოსაკითხავად მივიდა მსაჯული იმ უბნისა, რომელშიც გენერალი დგას. ბონაპარტმა მაშინვე გადაუხადა ეს პატივისცემა“.

„ბონაპარტი იშვიათად გამოდის და ისიც უბრალო, ორ ცხენიანი ეტლით“.

„ბონაპარტი საღრილად ფრანსუა ნეფშატელელთან ბრძანდებოდა და ყველანი გააკვირვა თავისი ცოდნით: ლაგრანეს * და ლაპლასს ** მათემატიკაზე ებაასებოდა. სეიესს — მეტაფიზიკაზე, შენიესს — პოეზიაზე, გალუას — პოლიტიკაზე, დონუსს — კანონმდებლობაზე. „საკვირველი იყო, რომ მან უფრო მეტი იცოდა, ვიდრე ყველა იქ მყოფმა სტუმრებმა“.

ერთი სიტყვით, გაზეთებში დაწვრილებით იყო აღწერილი ყოველივე, რაც კი ბონაპარტს შეეხებოდა.

მეორე დღეს ბონაპარტს დაეთვალა იერებინა პარიზის უმაღლესი სამსჯავრო. თერთმეტ საათზე მისულიყო. სამსჯავრო დარბაზში დახვდომოდნენ ყველა მსაჯულები და იქაც ცხადად დამტკიცებულიყო, რომ გენერალ ბონაპარტს უფრო უკეთ სცოდნოდა კანონები, ვიდრე ყველა მსაჯულებს ერთად.

დანიშნულ დღეს, როდესაც ბონაპარტს გამგეობა უნდა ენახა

* ლაგრანეი (1736 — 1813) გამოჩენილი გეომეტრი და მათემატიკოსი.

** ლაპლასი (მარკიზი 1749 — 1827) ვარსკვლავთმრიცხველი და გეომეტრიკოსი „ციური მეხანისა“.

ლუქსემბურგის სასახლეში, დილითვე ზარბაზნების სროლა დაეწყო. მერმე ბონაპარტს მოსაყვანად ხლებოდნენ ყოველი დაწესებულების წარმომადგენელი: წინ პოლიციის მოხელენი თურმე იყვნენ, მერმე სასამართლოსი, მერმე ქალაქის გამგეობისანი, და ბოლოს მაზრისანი. ამათთანავე იყვნენ წარმომადგენელი სახელმწიფო ხაზინისა. სამეცნიერო და სახელოვნო ინსტიტუტისა, სამხედრო სამინისტროსი და მრავალი სხვანი, რომელთა სახელების ჩამოთვლა მგონი რომ საჭირო არ იყოს.

მუსიკა რესპუბლიკურ სიმღერებს უკრავდა.

აწერილი იყო ამ კორტეჟის სვლა პარიზის ქუჩებში, მერე ბონაპარტთან მისვლა, მის გამობრძანება, დროშების სიმრავლე და აღტაცებული ხალხის ყვირილი. მოყვანილი იყო გარეშე საქმეთა მინისტრის ტალეირან-პერიგორის სიტყვა, რომელიც რევოლუციამდე ოტუნის ეპისკოპოსად ბრძანდებოდა, და მერმე კი კონვენტის წევრად; ეს ის ტალეირან-პერიგორი ბრძანდებოდა, რომელმაც მიუხედავად პაპის ბრძანებისა, წირვა-ლოცვის ნება მისცა რევოლუციის მომხრე მღვდლებს. მოყვანილი იყო აგრეთვე ბონაპარტის პასუხი, სამხედრო სიმღერები და სხვ. და სხვ.

ვილას ახსოვდა მაინცელი ჯარის სამსახური და მრავალი თავგანწირვა! ვილას ახსოვდა ჩვენი სხვა ჯარების ურიცხვი გამარჯვება საფრანგეთის თითქმის ყველა საზღვრებზედ! ვილას ახსოვდა ვანდელეებთან ბრძოლა და აჯანყებულების დამშვიდება! ღმერთმა ხომ იცის 92, 93, 94, 95 მთელი ოთხი წლის განმავლობაში მართლა რომ ურიცხვი ბრძოლა ჰქონდათ ჩვენს ჯარებს, ურიცხვ მტერს აჯობეს, უკვდავი დიდება შესძინეს საფრანგეთს, და ოცჯერ მაინც დაიხსნეს იგი სირცხვილისა და მტრის შემოსევისაგან; ღმერთმა ხომ იცის, ერთი-ათასად უფრო ძნელი და გასაჭირი იყო ჩვენი ყოფა, ვიდრე ბონაპარტის ჯარებისა იტალიაში, რადგან მაშინ არც ტანისამოსი იყო ჩვენთვის, არც სურსათი, არც ფეხსაცმელი... იმდენი ღმერთმა მე შველა მომცეს, რამდენჯერაც ჩვენ პური დაგვკლებოდეს... და ჩვენთაგანს ერთს არავის რგებია მეთათსელი მაინც იმ ქება-დიდებასა, რომელიც ბონაპარტსა ხვდა წილად. განა ჩვენი მხედართმთავარი კი არ ვარგოდნენ? მაშ როგორ ვიმარჯვებდით, თუ არა? მაგრამ აკი მოგახსენებთ, იმათი ხსენებაც აღარსად იყო. ქვეყანა აღტაცებული იყო ბონაპარტით, ქვეყანა მუხლმოდრეკილი იყო ბონაპარტის წინაშე. ეეჰ! პატიოსნად ასრულება მოვალეობისა არაფერი ყოფილა ჩვენს წუთისოფელში! საქმე ის არის, კაცმა ბუკი დაჰკრას და გაზეთები აალაპარაკოს! ისე უნდა ასტეხოს გაზეთები, რომ იმის მეტი აღარა ახსოვდეთ რა და ყოველ სტრიქონში იმის ამბავს გაიძა-

ხოდნენ, ყველგან ის იყო, ყველგან, ბონაპარტი ესა ქნაო, ბონაპარტი ესა თქვაო, ბონაპარტი გენიოსიაო! ბონაპარტი მილიონებს გზავნის, დროშებს, ძველი ხელოვნების ნაშთებსაო! გამოცდილი მაჭანკალი ვერ გააჭრელებს იმისთანა სიას, როგორსაც ბონაპარტი აბეჭდვინებდა გაზეთებში, როდესაც გამგეობას იტალიიდან უგზავნიდა რასმე. თან ყოველ დღე იმას გაიძახოდა, რომ ჩემი ჯარი პირველია მთელს ქვეყანაზედო!.. ესე იგი მე პირველი მხედართმთავარი ვარო!

წაიკითხავდა ნაპოლეონის ქებას შოველი და მწარედ წამოიძახებდა:

— საბრალო ხალხო! შენისთანა ერთგული და თავგანწირული მოსამსახურე არავინა ჰყავს თავისუფლებას, მაგრამ ვაი, რომ თვლებში გაქვს ჰყუა! ოღონდ მოგელაქუცოს ვინმე, თანაც შეგაქოს და ერთგულება შემოგფიცოს, შენ სალოცავ ხატად დაისვენებ და აზრადაც არ მოგივა, რომ შეიძლება გატყუებდეს, თავის საქმეს ირიგებდეს და კიდევ დაგცინოდეს. რობესპიერი თავის დაღვრემილი სახით და დიდროვანი სიტყვებით არა ნაკლები თინთლიბაზი იყო, ვიდრე ნაპოლეონი თავისი დიდებით და ძლევამოსილი ვაჟკაცობით; ორივენი თვალთმაქცობენ ხალხის მოსალორებლად და ღმერთმან ინებოს, რომ ნაპოლეონი ისე ძვირად არ დაგვიჯდეს, როგორც რობესპიერი.

შოველს დიდი იმედი ჰქონდა კლებერისა, ოჟეროსი, ბერნადოტისა და ჟურდანისა — რესპუბლიკას ისინი იხსნიანო და ძალიან სწუნხა გენერალი ჰოშის სიკვდილს. ხშირად იტყოდა ხოლმე:

— „არა ჯერ არ გათავებულა ბრძოლა! ჯერ ვერ შევიხსნით იარაღს, რომლითაც მთელს ევროპას შევებრძოლეთ. დამარცხებული მტერი თავისას არ დაიშლის, ვიდრე ან სულ არ ამოწყდება, ან ჩვენს ხალხს ძველებურად დამონავებულს არა ნახავს. თუ ძალით ვერ გვაჯობა, ახლა ვერაგობით, ღალატით, მოხელეთა შესყიდვით და რესპუბლიკურ დაწესებულებათა გარყვნით ეცდება თავისას: მეგობრად გვაჩვენებს თავს, ყველგან შემოგვეპარება, ჩირქს მოსცხობს, რასაც კი შეეხება, და მერმე ნიშნს მოგვიგებს: ხედავთ, რა უვარგისი გამოდგა თქვენი რესპუბლიკა: პატიოსანი კაცი აღარსად არის და ზეირიანი დაწესებულებაო!.. ბრძოლა ესლა იწყება, თორემ აქამდე რა ბრძოლა იყო? დიდი რამე კი არ არის მტერს შეხვდე და ზედ შეაკვდე! საქმე ის არის, მტერი იცნო, ყველგან წინ უდგე და პატიოსნებით, უანგარობით, სამშობლოს სიყვარულით და სათნოიანი ცხოვრებით დასჯაბნო ყოველი მისი განზრახვა“.

კარგი და პატიოსანი, მაგრამ გენერალი ჰოში ცივ მიწაში იღო და

უანგარობა, პატიოსნება და სათნოება კი მკვდრებით ვერავის ააყენებს.

რალა თავი შეგაწყინოთ, რევოლუციის ყოველი გაჭირვება და წვა-დაგვა ჩვენი იყო და სახელი და დიდება კი იტალიაში მყოფ ჯარს ერგო. რევოლუციის ნაყოფი სრულიად უსამართლოდ მარტო ნაპოლეონს მიართვეა ხალხმა და ძალიან ძვირადაც დაუჯდა ეს უსამართლოება.

პარიზი დღესასწაულობდა საყვარელი მხედართმთავრის მობრძანებას და სწორედ ზღაპრული ქეიფებით და ლხინით უმასპინძლებოდა თავის სტუმარს. ოქეროს არაფრად მოსწონდა ასეთი თავყვანისცემა ბონაპარტისა და ხმამალა აცხადებდა თავის უსიამოვნებას. ჩვენ შენისთანა ავი არავინ გვინდაო, პერპინიაში გაისტუმრეს. იტალიაში მყოფი ჯარის მხედართმთავრად ბერტიე დანიშნეს; ბონაპარტი კი პარიზში დარჩა და აკადემიის წევრად იქნა არჩეული.

საფრანგეთი საომრად ემზადებოდა და დიდი ჯარით უნდა მიხტომოდა ინგლისს. ამ ჯარის მხედართმთავრობა ბონაპარტისა უნდა ყოფილიყო. მაგრამ ინგლისში ჯარის მისაყვანად ხომალდები იყო საჭირო და თვით ჯარისთვის თოფ-იარაღი, ტანისამოსი და სურსათი. ამას ფული უნდოდა, და ფული კი არსად იყო. ამბობდნენ, ფული შვეიცარიაში ქ. ბერნში ბევრი არისო... ბერნელებს მილიონები უწყევიათ სრულიად უსარგებლოდო... მართალია, ბერნელებს ჩვენთვის თავის დღეში არა დაეშავებინათ რა, მაგრამ... ვოდღელები უჩიოდნენ, ხარჯს გვახდევინებენო.

იქნება მართალსაც ამბობდნენ ვოდღელები, მაგრამ შვეიცარიელების ერთმანეთში უსიამოვნება ჩვენ სრულებითაც არ შეგვეხებოდა და ბერნში რომ ხაზინა არა ჰკულებოდა, ჩვენი გამგეობა ყურადღებასაც არ მიაქცევდა ვოდღელების ჩივილს. საუბედუროდ ინგლისზედ ამხედრებას ფული უნდოდა და ბერნელების ფული სულ თვალწინ უდგა ბარბას, რეგებელს და გამგეობის სხვა წევრებს. იტალიაში ნაშოვნმა მილიონებმა მადა გაგვიხსნა და ახლა სხვაგან უნდა გვეძება საშოვარი.

იანვარში გენერალი რამპონის წინამძღოლობით ჯარები გაგზავნეს ვოდღელების დასახმარებლად. რამპონს გენერალი მონარი მიჰყვა თავისი ჯარით და ქ. ლოზანი დაიჭირა. აი, რა სიტყვით მიმართა მონარმა თავის ჯარს:

„თქვენ თავისუფლების მოციქულნი ხართ, ჩემო გმირთ-გმირნო მეომარნო, და თავისუფლების დასამყარებლად მიმყავხართ ვოდის მაზრაში. საფრანგეთის რესპუბლიკასა სურს, რომ დღეიდან ვოდელი ერი თავისუფალი და სრულიად და-

მოუკიდებელი იყოს ბერნელებისაგან“.

მთელი შვეიცარია შეინძრა. ბერნი, ფრიბურგი და სოლერი ძალიან კარგად ხედავდნენ, რომ საფრანგეთს მათი ფულების მეტი არა უნდოდა რა და, რასაკვირველია, ჯარები გამოგვისიეს. განა უბრძოლველად ფულს გაიმეტებს ვინმე? ბაზელი, ლუცერნი და ცურიხი კი უფრო ჰკუიანად მოიქცნენ და მათგან დამოკიდებულ მაზრებს მიანიჭეს ყოველი უფლება, რომელსაც კი მათი ქვეშევრდომნი თხოულობდნენ. ეს მორჩილება ხომ სრულიადაც არ უნდა მოსწონებოდა ჩვენს გამგეობას და ახლა სხვა მიზეზი მოუღო: შვეიცარიაში იმისთანავე რესპუბლიკა უნდა იყოს, როგორც საფრანგეთშიაო, იძახოდნენ, ერთი და განუყოფელი... შვეიცარიაში კი ყოველი მაზრა ცალკე რესპუბლიკას წარმოადგენს და ერთმანეთში ძლივს არიან შეკოწიწებულნიო. ორი ჯარი შეაერთეს, მხედართმთავრობა ბრუნს უბოძეს, იტალიაში ვაჟაკობით განთქმულს გენერალს და უბრძანეს: დაიჭირე შვეიცარია და... ჩვენებური რესპუბლიკა დაამყარეო. შვეიცარიის ყველა მაზრები შეერთდნენ მაშინ ჩვენდა საბრძოლველად, გარდა ბაზელისა. დაიწყეს ისევ ჯარებმა დენა ჩვენს მიდამოში და გაჩაღდა ისევ ვაჭრობა. ლომივით იბრძოდნენ შვეიცარიელები, მით უფრო რომ ყველანი საუკეთესო მსროლელნი არიან და საუცხოოდ იციან ყოველი ბილიკი თავიანთ მთიან ქვეყანაში. მაგრამ რას გააწყობდნენ ერთიორად მძლავრ მტერთან, რომელიც ორი მხრიდან — ბაზელიდან და ქენევიდან — შეესია ამ პატარა და სრულიად უბრალო ქვეყანას.

მიუხედავად იმისა, რომ სამარცხვინო ავკაცობას ჩავდიოდით, მიუხედავად იმისა, რომ უსინდისოდ ვძარცვავდით შვეიცარიელებს, მაინც ძალიან მესიამოვნებოდა ჩვენი ჯარების გამარჯვება, მეტადრე მაინცელი რაზმის და მაშინდელი ჩემი უფროსებისა.

ბოლოს ბერნი და სოლერი დაგვმორჩილდნენ და გამგეობამაც ხელთ იგდო, რაც უნდოდა: დღე და ღამ შეუწყვეტლივ დიოდნენ დატვირთული ურმები პარიზისკენ. ასე გასინჯეთ, დათვებიც კი წამოიყვანეს ბერნიდან*. ამბობდნენ მამულიშვილი რაპინა, გამგეობის წევრის, რეგბელის ქვისლი ბძანდება ბერნში და ის გზავნის პარიზისკენ ამდენ ურმებსო.

ბერნელები და სოლერელები დაგვმორჩილდნენ 1798 წ. თებერვალში და მარტში.

ამ დროს ხმა გავარდა, რომში, ჩვენის ელჩის იოსებ ბონაპარტის სასახლის ახლოს, გენერალი დიუფო მოუკლავთო. გენერალი დიუ-

* ბერნი გერმანული სიტყვაა, დათვს ნიშნავს.

ყო საფრანგეთის ქვეშევრდომი იყო და... რადგან პაპს ბევრი ფული ჰქონდა, ამაზედ უკეთეს მიზეზს ომის ასატეხად ველარსად ვიპოვი-
ლით. მაშინვე ჯარი შეევუსიეთ რომს ბერტიეს წინამძღოლობით.
მაშინ კი დამშვიდდა ყველა, რომ ინგლისზედ ასამხედრებლად
აღარა დაგვაკლდება რა, რადგან რაც ბერნელებს ვერ წავართვით,
იმას წმინდა პაპი შეგვისრულებსო.

ერთ დილას დუქანში ვიდექ და ფანჯარაში ახალ-ახალ ჩითებს
ვალაგებდი, — უნდა მოგახსენოთ, რომ იმ ხანებში, რაკი ვაჭრობა
კარგი გვქონდა, ცოტა რამ მიტკალი, ტილო და ჩითეულობაც გავი-
ჩინეთ. — დიად, ფანჯარასთან ვიდექ, ახალ-ახალ ჩითებს ვალაგებდი
და თან მოედნისკენ ვიყურებოდი. შორიდან თვალში მეცა ერთი
წარმოსადეგი, რაღაცა უცნაურად აჭრელებული ტანთსაცმელით
შემოსილი ქალი. მოდიოდა და ათასფრად ელავდნენ მისი ძვირფასი
ნიეთები, რომლებიც მრავლად ეყარა თავიდან ფეხამდე. თან პატა-
რა ბიჭი მოჰყავდა ჰუსარის ტანისამოსით. აქეთ-იქიდან ფანჯრები-
დან გაშტერებული უყურებდა ხალხი და მეც ვეკითხებოდი ჩემს
თავს, — ნეტავი ვინ უნდა იყოს ეს დიდებული ქალბატონი მეთქი?
სადღაც მენახა, ეჭვი არ მქონდა, მაგრამ სად? იმისთანა მსხვილი
იაგუნდები უჯდა საყურეებში, რომ თითო თხილის ოდენი იქნებო-
და. ნელ-ნელა მოდიოდა ჩემსკენ, ნარნარით და კეკლუცი რხევით.
მერე რაკი მოახლოვდა დუქანს, შურდულის ქვასავით გამოიქცა და
თან ყვირილი მორთო:

— მე ვარ, მიშელ, მე!...

მომაგონდა მაინცი, ჩვენი გაჭირვება და ქალაქის მიტოვება. თა-
ვიდან ფეხამდე თრთოლამ ამიტანა. ჩემი ლიზა კი მეხვევოდა და
გულში მიკრავდა. ისე მოულოდნელი იყო ეს ამბავი, რომ ხმის ამო-
ლებას ვერ ვახერხებდი. მე ჩემს დღეში ვერ წარმოვიდგენდი, რომ
ისე მიყვარდა ლიზა და ისე გამეხარდებოდა მისი და პატარა კასსიუ-
სის ნახვა.

ამ ხმაურობაზე მარგალიტა გამოვიდა, და მერმე ჩემი სიმამრი.

— აკოცე, ბიჭო, ბიძაა შენი! — ეუბნებოდა ლიზა პატარა კას-
სიუსს. — მიშელ, გახსოვს, ბინა რომ დაგვინგრის მაინცში. გახ-
სოვს რა პატარა იყო მაშინ კასსიუსი?

მარგალიტა გადაჰკოცნა და მერე სიცილით შოველს მოეხვია.
შოველი კარგ გუნებაზე იყო და სიამოვნებით შესტკეპროდა ჩემს
დისწულს. კასსიუსი წამოზრდილიყო, დამშვენებულიყო, დაკონტა-
ვებულიყო. დიდად გახარებულნი ვიყავით ყველანი, დიდად ბედ-
ნიერნი. დუქნიდან სამკითხველოში გავედით. რაკი ნახა, არავინ

არისო, ლიზამ სიცილით ერთ კუთხეში ძვირფასი შლიაპა გაღის-როლა, მეორეში ქირმანის შალი და შემოგვძახა:

— თქვენ თუ არა, ღმერთი ხომ ხედავს, რომ ისე მიხდება ეს საშკაული, როგორც ძროხას უნაგირი. ბაზელის სასტუმროში ზუთი ზანდუკი მაქვს ემაგეებით გატენილი. საყურეებს, ძეწკვებს, სამა-ჯურებს და ბეჭდებს ხომ ნულარ იტყვით. ქირივით მეჯავრება ასე მორთვა, მაგრამ აქაური დიდებული ქალბატონების ჯიბრით ამას კი არა, თუნდა ათ ამდენს ავიკიდებ. სულ ჯავრით უნდა გავხეთქო, თვალები უნდა დავუყენო... თორემ რა ჩემი საქმეა, გენაცვალეთ, შლიაპა? ერთი კარგი თბილი თავსახვევი, მორჩი და მოისვენე! ან კიდევ ეს კაბები! რა სჯობს ერთ უბრალო დაბამბულ კაბას და თუ ცივა, ერთ ყანწ არაყს?!.

ამ დროს სტეფანეც შემოვიდა. უნდა გენახათ, რა სიყვარულით მიესალმა იმას ლიზა. მიაპა ღვთის წინაშე და ღმერთს მადლობა შეეწირე, რომ ჩემს დასა და ნიკოლოზს შუა დიდი ზღვარი იყო.

სტეფანე სიხარულითა ტიროდა. დაიჩინა, ეხლავე ავირბენ და დედას და მამას შევატყობინებო, მაგრამ ლიზამ არ გაუშვა: — სა-დიღს უკან მე თითონ ავალ ჩვენების სანახავადო. გულიანად დაპ-კოცნა ჩემი ბალები და თქვა:

— ეს ბიჭი... შოველია, გენაცვალეთ, შოველი! სხვაგანაც რომ მენახა, მაშინვე ვიცნობდი. ეს გოგო კი — დიდდაჩემი ელისაბედი, იპასავით ზორბა და მაგარი. იი, გენაცვალე მაგ ყუყუნა თვალებში!..

მანამ ჩვენ ერთმანეთს შევხაროდით, ქალაქში ხმა გაეარდნი-ლიყო, მიშელს და მოსვლიაო, და ბევრი კარგი ნაცნობი და მეგო-ბარი მოვიდა ლიზას სანახავად, როგორც კი დაინახავდა, ვისმე ლიზა, მაშინვე წინ მიეგებებოდა და ყველას შენობით მიმართავდა.

— ბიჭო! ჩვენი კოლენი! როგორა ხარ, კოლენ? აგერ რაფიე-ლიც მოდის!.. რაფიელს გაუმარჯოს, რაფიელს!..

რასაკვირველია, ყველას უკვირდა ასეთი უცნაური ქცევა; მაგ-რამ ხედავდნენ, რომ თვალ-მარგალიტით ბრწყინავდა და ფიქრობ-დნენ: ალბათ, უფლება აქვს, რომ ასე დაურიდებლივ გვექცევაო.

სადილი ძალიან მხიარულად გაიხელით და რამდენიმე ბოთლი ძველი ღვინოც გადაკარით. ლიზა ალტაცებით აგვიწერდა ჰავის, პლეზანსის, მილანის, ვერონის და ვენეციის ალებას და აუარებელ სარჩო-საბადებელს, რომელსაც ჩვენი ჯარი შოულობდა. ცოცხლად გვისახავდა დამარცხებულთ, რომლებსაც სძარცვავდნენ ჩვენი ჯა-რები, და თან გულიანად ხარხარებდა და კისკისებდა.

შოველიც კი გაიტაცა იმისმა გულიანმა სიცილმა. მაგრამ ეს ძარცვა-რბევა არ მოეწონა და უთხრა:

— ოჰ!.. ოჰ, ელისაბედ-ქალო! თქვენ ომით კი არა, ყჩაღურად დასცემიხართ იტალიელებს!

— კარგი ერთი! — შეჰყვირა ლიზამ, — შენგან არ მიკვირს! ვისთან უნდა მივსულიყავით ომით? არისტოკრატებთან და საშობაო კურატებით ჩასუქებულ ბერებთან? აბა ეჯობნათ, დიდი-პატარამდე შამფურზედ აგვაგებდნენ! ჩვენ ხომ არავინ დაგვიხოცნია!.. ის წუბაკები, ისინი! ვაჯობებდით, დავიმორჩილებდით და, ავიშლებოდით თუ არა სხვაგან წასასვლელად, ისინიც აიშლებოდნენ, უკანიდან აჯანყებულები დაგვედევნებოდნენ! ის შეჩვენებულნი, ისინი! ჰოდა, რაც ჩვენ იქ ბერები დაეხვრიტეთ, აჯანყებული ბებერები!.. დავიჭერდით თუ არა, მაშინვე დაეხვრეტდით, ალილუიას კი არ გაეუბამდით! ბონაპარტმა ეგენი არ იცის! ჭირივით ეჯავრება ფიქრი და დროს დაყოვნება: „აჯანყებულებთან ერთად დაგიჭირეს? ცხადზედ ცხადია შენი საქნე! ათი კაცი და შენი ჯანი! კედელზე მიგაყუდებენ, დაგიმიზნებენ და მშვიდობით!... ჩვენებურები თუ ნახო საიქიოს, მოკითხვა მოახსენე!“ ისე დავაშინეთ ხალხი, რომ გაციებულებით თრთოდნენ, ჩემო შოველ.

— აგრე, აგრე, ელისაბედ-ქალო!

— აგრე, მაშ არა?! — ხარხარებდა ლიზა. — გამარჯვებას გარჯაც უნდოდა! (ხელით გვანიშნებდა, როგორ იტაცებდა, რაც კი ძვირფასი შეხვდებოდა და ჯიბეში იტენდა). ჩვენი მღვდლის ჯიბეები გახსოვთ?.. ხარის ბეჭს რომ ჩაიდებდა ხოლმე?.. იმაზედ მეტი ჯიბეები მე დავიკერე... ფეხის კოჭამდე დამთრევდა. ხანდახან მარესკოც კი გამიჯავრდებოდა ხოლმე: — კმარა, შე ურცხვო. თორემ დაგახვრეტიანებ მთელი რაზმის წინაშე, რომ სხვებმა ველარ გაბედონო! მაგრამ სიცილად არ გვყოფნიდა მისი მუქარა და თითონაც სიცილს მოჰყვებოდა ხოლმე. არა, ერთი მითხარი, შოველ, აიყები არ ვიქნებოდით, ხელცარიელნი დავრჩენილიყავით და იმოდენი თვალ-მარგალიტი გენერლებისთვის დაგვენებებინა? არა, კაცმა სისხლი ღვაროს, ყოველ წამს სიკვდილის პირს იღვეს და საშოვარი კი შორიდან მბრძანებელ ჯარის უფროსთ დაანებოს?!

— არა, ეგ მართალია, მაგრამ სახელმწიფო ხაზინას რომ?..

— სახელმწიფო ხაზინაო? ეჰ, კარგი ერთი, ბალღი ხომ არა გგონივარ! სახელმწიფო ხაზინა ცარიელი სიტყვაა და სხვა არაფერი! სახელმწიფო ხაზინა ფლიდების და გაიძვერების ჯიბეა. სახელმწიფო ხაზინას ისიც ეყოფა, რაც ჩვენ მას დროშები გავუგზავნეთ, ზარბაზნები, მილიონები და ხელოვნური ნივთები! წაიკითხავდი სიას?

— ღიად, წაიკითხე.

— ჰოდა, ვინ შესძღვნა სახელმწიფო ხაზინას თუნდა მეოთხედი ჩვენგან გამოგზავნილისა?

სადილს უკან ერთი ჭიქა არაყი გადაჰკრა ელისაბედ-ქალმა, თავისი შლიაპით და შალით მოიბრანჭა და შინისკენ წავიდა დედისა და მამის სანახავად. თან სტეფანე და კასსიუსი წაიყვანა. ჩვენ კარებში ვიდექით და ვუყურებდით მიმავალთ. შოველი ამბობდა:

— ეგ ქურდი, ეგ ყაჩაღი ეგ! არა, ჩემო მიშელ, ნათესაობა კარგია, მაგრამ შენი ნათესავებისთანა კი მე ჩემს ღლეში არა მინახავს რა.

და თანაც ვულიანად იცინოდა, რადგან ლიზა იმისთანა გულუბრყვილოდ გვიამბობდა ყველაფერს, რომ ცხადად სჩანდა, როგორც ჭამა-სმამაში არაფერს ჰპოვებდა საძრახისს, ისე ძარცვა-გლეჯაში. პირიქით, საკვებარად ჰქონდა თავისი ყაჩაღობა და გამბედაობა.

საკვირველი ის იყო, რომ მთელი ქალაქის ქალები აღტაცებულნი იყვნენ ლიზას კაბებით, სამკაულით, შლიაპებით და დიდებულნი ქცევით! დიად, დიდებულნი ქცევით! ის კი არ იფიქროთ, არ ეცოდინებოდათ ვინ ბრძანდებოდა ელისაბედ-ქალიო! თქვენც არ მომიკვდეთ! დიდმა და პატარამ ყველამ იცოდა ჩვენს პატარა ქალაქში რომ კაპიტანი მარესკოს მეუღლე მეკალათე ბასტიენის ქალი იყო, რომელიც პატარაობისას ფეხშიშველი მისდევდა ხოლმე გამვლელ ეტლებს და მოწყალებას სთხოვდა... მერმე ვინ იცის, სად არ ეთრია, ვიდრე ამ „დიდებულ ქცევას“ შეიძენდა. ერთი კვირა დარჩა ჩვენში ლიზა და ყოველდღე სულ ახალ-ახალ კაბას იცვამდა და იმასაც ღლეში ორჯერ იცვლიდა: ხან აბრეშუმისას ჩაიცვამდა, ხან ხავერდისას და ყველა კაბისთვის სხვადასხვა სამკაული და შლიაპა ჰქონდა შეხამებული. ზოგი იმისთანა მაგარი და მოუხეშავი კაბა ეცვა, რომ ფარდაგი გეგონებოდათ, იმოდენა ოქრომკედი ჰქონდა ზედ. ვინ იცის, რომელი წმინდა ტაძარი აიკლეს ან დიდებულის ვისიმე ძველებური ოჯახი, სადაც საუკუნეთა განმავლობაში დუფასებელ განძივით ინახებოდა წინაპართა სამკაული და კაბები?

სულ ლიზას გზაზედ ეჭირათ ჩვენებურ წარჩინებულ ქალებს თვალი და გამოვიდოდა თუ არა, მაშინვე ფანჯრებში გადმოეყუდებოდნენ და სინჯვას უწყებდნენ.

— მოღის, ქალო, მოღის! შენ იმის ფინიკას უყურე! სად იშოვნა, მაგ...

არც კი სცხვენოდათ და ბაზელის სასტუმროში მოსამსახურეებს გზავნიდნენ, რომ ქალბატონი მარესკოს კაბის და შლიაპის ფასონი აეღებინებინათ. ელისაბედ-ქალს მოსაკითხად ეახლნენ და თავისთან

პატივებდნენ მამასახლისი და სხვა წარჩინებული მოხელენი. რაღა გავაგრძელო, სწორედ ისე დაუხვდა ლიზას ფალსბურგი, როგორც ბონაპარტს პარიზი.

სანთლით საძებნი ყოფილა იმისთანა კაცი, რომ გამდიდრებულს, — სულ ერთია, როგორ და რით გამდიდრებულს, — თავი არ მოუხაროს და მუხლი არ მოუყაროს. მე მრცხვენოდა ფალსბურგელების მაგივრად. ხოლო კარგი ის იყო, რომ შინ რომ მოვიდოდა, ყველას მასხარად იგდებდა ლიზა და ზიზლით იხსენიებდა პირმოთნე და თავმოყვარეობას მოკლებულს ჩემს თანამოქალაქეებს:

— საკვირველი ურცხვი რამ ყოფილა ადამიანი! — იძახდა ლიზა: — როდესაც დილით ჩაუცემელს დამინახავენ, ფლოსტებით. წითელი თავსახვევით და დახეული კაბით, თავხედად მიყურებს ყველა და იძახის: აგერა პარიზელ შეთქმულთა რაზმის მიკიტანო! მაგრამ როდესაც ჩემს ძვირფას ფარჩეულობაში გამოვიკაზმები და ნივთეულობას ავისხამ, ყველა მოწიწებით მომესალმება: აგერ კაპიტანის მარესკოს მეუღლე, ელისაბედ-ქალიო. თითქო ჩაცმულ-დახურული იგივე ადამიანი არ ვიყო, რაც ჩემი ფლოსტებითა ვარ. ან იქნება ჩემს სამკაულს სცემენ პატივის ოპ, რა ურცხვი და უგუნური რამ ყოფილა ადამიანი! ჭკუა თვალებში ჰქონია და მარტო თვალებში!

მამაჩემი ყოველდღე ჩვენსა იყო სადილად და კალთანი უჯდა კასიიუსი. იმისთანა ბედნიერი იყო საწყალი მოხუცი, რომ ქეშინოდა, არ შეიშალოს-მეთქი. თვალი ცრემლით ევსებოდა და წამდა-უწუმ იძახდა:

— ღმერთმან აკურთხა ჩემი შვილები. ჩემს სილატაკეში მე ვერც კი წარმოვიდგენდი, რომ შესაძლებელი იქნებოდა ამოდენა ბედნიერება.

აღტაცებით შესცქეროდა თავის ქალს; რაც უნდა ეთქვა ლიზას, იმას ჭეშმარიტად მიაჩნდა და ხშირად იტყოდა ხოლმე:

— იცით, შვილო! ეხლა რომ წამოიხედონ ბებიათქვენმა ანამ და პაპათქვენმა მატურინმა, დაგსბურგის მებატონენი ეგონებით.

ამაზედ ჩემი სიმამრი ბურნუთის კოლოფს მიაწოდებდა და ეტყოდა:

— სწორედ, ჩემო პეტრე, სწორედ დაგსბურგის მებატონენი ეგონებათ და, იცი, რამ მოგვანიჭა ჩვენ დღევანდელი ჩვენი კეთილდღეობა? რევოლუციამ. რევოლუციამ ყველა გაათანასწორა და გაათანაბრა. რევოლუციამ გააუქმა შთამომავლობითი უპირატესობანი და ფართო გზა მისცა ნიქს და შრომას. ეხლა ერთილა გვაქვს

სასურველი—რომ გუშინდელმა ყმებმა ხეალ ბატონობა არ მოგვინდომონ. მაგრამ რა! ჩვენ ჩვენი ვქენით! გავათავისუფლეთ ყმანი და ახლა თითონ უპატრონონ თავის თავს და ძველის, დიდებული ბატონის ადგილს ახალი ბატონი არ გამოსჭიმონ.

დედაჩემი არ დადიოდა ჩვენსა: მე იმ კაინისას რა მიმიყვანსო! ლიზას სანახავად სასტუმროში დაიარებოდა. გაკვირვებული თურმე სინჯავდა ლიზას ნივთებს და ხელაპყრობით შეჭლადებდა ღმერთს მადლობას:

— გამდლობ შენ, ღმერთო, რომ შენი მადლი არ მოაკელ შენს უღირსს მონას!... იპ, რა კარგი რამ არის, ლიზა!... ეს მე მაჩუქე!

მაგრამ ლიზამ უკვე იცოდა, რომ რასაც კი მისცემდა, ის მაშინვე ღვთისმშობლის ხატს შესწირავდა წმინდა ვიტის ეკლესიაში, და ფასიანს არას აძლევდა. საღამოზე სიცილით გვიამბობდა ხოლმე ყველაფერს:

— მე რომ იმას ავყვე, დედიშობილად დავრჩები და რაც რამა მაქვს, სულ ბერების ხელში ჩავარდება.

ბოლოს ლიზაც წავიდა. ბერტიე რომში შევიდა და მარესკოსაგან წიგნი მოუვიდა რომიდან. ლიზა ძალიანა სწუხდა, რომ რომის ალებას ვერ დაესწრო და გაფაციცებით ემზადებოდა წასვლას... ჩემი კასსიუსი წმ. პაპს უნდა დავალოცვინოო, ფალსბურგელ ქალებს წმინდათა ნაწილებს დაჰპირდა და დედაჩემს და ნათლიჯალაბს აღთქმა დაუდო, ჩავალ თუ არა რომში, მაშინვე ნაწილს გამოგიგზავნით იმ ჯვარისას, რომელზედაც ჯვართ აცვეს იესო ქრისტეო: რევოლუციისაგან განდევნილი ბერები უკანვე ბრუნდებოდნენ და თან წმინდათა ნაშთების და ნაწილების თაყვანისცემაც უკანვე შემოჰქონდათ.

წასვლას წინა ღამეს თავისთან წაგვიყვანა მე და მარგალიტა, ბაზელის სასტუმროში და ერთი მშვენიერი საათი თითქო ძალად ჩამიღო უბეში. დღესაცა მაქვს ის საათი და დღესაც კარგად დიდის. იმისთანა საგანგებო, ხელოვნური ნივთია, რომ ჩემს დღეში არსად მომიშორებია. არ ვიღებდი, მაგრამ ლიზა შემომეხვეწა:

— იცი, მიშელ, მაგ საათს მარესკო გიგზავნის სახსოვრად იმ დღისა, როდესაც შენ სიკვდილს გადაგვარჩინე მე და ჩემი პატარა კასსიუსი.—თან იმისთანა სიყვარულითა მკოცნიდა, რომ უარის თქმა ყოვლად შეუძლებელი იქნებოდა.

— ჩემი კასსიუსის სახსოვრად, მიშელ! იცი, რომ მოვდიოდი, მარესკომ ეგ საათი ჩამიგდო ზანდუკში და მითხრა: ეს ნივთი შენ ძმას წაუღე; მე ეგ ბრძოლის ველზე ვიშოვე, კინაღამ ჩემი სისხლით შეგვვარე და მინდა ჩემს ცოლის ძმას ვუფეშქემო. აგრე უთხარი,

ჩემს მაგივრად ჩემგან გქონდეს და შენს დისწულს ნუ დაივიწყებ-
თქო.

რალა გაეწყობოდა, საათი უკვე უბეში მდებოდა. ეგეც რომ არა
ყოფილიყო, ძალიან მასიამოვნა ჩემი სიძე-ბატონის სიტყვებმა და
თავაზიანმა მოკითხვამ.

მერმე მარგალიტას გადაუშალა კალთაში ერთი ყუთი ბეჭდები
და აუტყდა,—აირჩიე, რომელიც გინდოდესო. მარგალიტამ მე გად-
მოშხედა. ვანიშნე, აილე რამე, ნუ აწყენინებ-მეთქი. იმანაც ერთი
პატარა ოქროს ბეჭედი აირჩია, ობოლი მარგალიტით, რომელიც
ცრემლივით კრთოდა. მაგრამ მას შემდეგ, რაც ლიზა წავიდა, ერ-
თხელაც არ გაუკეთებია:—თუნდა დავიფიცავ, ეს ბეჭედი, მოკლეს
და ისე წაგლიჯეს თითიდან საწყალ ქალს, როდესაც ახლად აღე-
ბულ ქალაქს იკლებდნენო და რადგან ამას მეც დავიფიცავდი, გა-
ჩუმებული ვიყავი და ბეჭედი სადღაც მიმალული გვქონდა.

წასვლისას ცოტა რამ ფულიც მომცა მამაჩემისათვის და ძალიან
მთხოვა, გამოუზოგე და დედაჩემს კი არა მისცე რა, თორემ მაშინ-
ვე ბერებს აურბენინებსო.

ხუთ საათზე სადილს უკან ყველანი ჩვენს სამკითხველოში შეი-
ყარნენ ლიზას და კასიუსის გასაცვილებლად. დიდძალი ხალხი მო-
გროვილიყო ჩვენს კარებზე ლიზას სანახავად და ბევრი წარჩინე-
ბული ქალებიც მობრძანებულიყვნენ თავიანთი ქმრებით. ბოლოს,
ბევრი ხვევნა-კოცნის და ქალური წრიპინის შემდეგ დაიძრა, რო-
გორც იყო, დილაქანსი. კარგა ხანს კიდეც ისმოდა ლიზასი და კა-
სიუსის ძახილი:

— მშვიდობით, მიშელ! მშვიდობით, მარგალიტა! მშვიდობით!

წავიდნენ, მაგრამ საწყალი მამაჩემის გულიც თან წაიყოლეს.
დიდი ხანი იტირა საბრალომ, ვიდრე გულს მოიბრუნებდა და
ცრემლს შეიწყვეტდა. ნეტავი, კიდეც ვნახავდით ერთმანეთს? ან
როდის?

XI

აპრილის დამდეგი იყო. დიდ მოლოდინში ვიყავით ყველანი,—
რაკი გაზაფხულდა, საცაა ამხედრდება ჩვენი ჯარები ინგლისის
ასაღებადო. ჯარს სუყველაფერი თავსაყრელი ჰქონდა, რადგან
ბერნი რომ ავიკლეთ, მარტო იქიდან გამოვიტანეთ 25 მილიონი
ნაღდი ფული, სულ ოქრო და ვერცხლი, გარდა იარაღისა. ზარბაზ-
ნებისა და სხვა.

იმ დროს შოველს ერთი თავისი კარგი მეგობარი, სტრასბურგე-

ლი „ძმათა და მეგობართა კლუბის“ თავმჯდომარედ ყოფილი ექი-
მი შვანი ეწვია და სადილადაც ჩვენსა დარჩა. დიდად განათლებუ-
ლი და სწავლული კაცი იყო, დაწვრილებით იცოდა სუყველა, რაც
კი საფრანგეთში და გერმანიაში ხდებოდა არა მარტო პოლიტიკა-
ში, არამედ ყოველგვარ მეცნიერებაშიც. იმისგან გავიგეთ, რაძოდენ-
ნი ჯარით ვემზადებოდით ინგლისზედ მისვლას და ჩვენს განცდიფ-
რებას საზღვარი არა ჰქონდა. რაც კი საფრანგეთს საუკეთესო
გააჩნდა რამე—ჯარები, მხედართმთავარნი და, ასე გასინჯეთ,
სწავლულნი და მეცნიერნი, ყველა ინგლისზედ მიმავალ ჯარში
ჩაერიცხათ. გენერლები კლებერი, დეზე, რეინიე, ლანი, პიურატი,
დავუ, ყუნო, ანდრეოსი, კაფარიელი და ბერტიე. ერთი სიტყვით,
გამოჩენილი, გამოცდილი, სამშობლოს ბურჯი გენერალი ყველა
იქ მიდიოდა. თვით შვანიც იმიტომ მიდიოდა პარიზს, რომ ერთს
მის მეგობარს ბერტოლეს შეეტყობინებინა, — თუ გინდა, ბონა-
პარტს მოვახსენებ და შენც წამოდი ჩვენს ჯართანო. ამასთანავე
თურმე სწერდა, — სხვათა შორის იმისთანა გამოჩენილი სწავლულ-
ნი მიჰყვებიან ჩვენს ჯარს, როგორც, მაგალითად, მონაჟი, ეო-
ფრუა, სენტილერი, დენონი, ლარეი, დეგენეტი და სხვანი.

— რა ვქნა, მაგდენი სწავლულები რაღად უნდათ? — უკვირდა
შოველს. — იქნება ინგლისს არავინა ჰყავს და ჩვენებურები უნდათ
მიჰყვარონ? იქნება ინგლისელები ველურებად მიაჩნიათ და განათ-
ლებას უპირობენ?

— ღმერთმა მკითხოს, თუ ვიცოდე რამე! — შეჰყვირა შვანმა. —
განა მე კი არ მიკვირს? თუ საომრად მივდივართ, სწავლულნი და
მეცნიერნი რად გვინდა? იმათ ხომ არ ვაომებთ და! ალბად არის
რამე აქ საიდუმლო, რომლის გაგება ჩვენ არ ძალგვიძს.

— ძალიან კარგი, მაგრამ ერთიც ვნახოთ, გვიმტყუნა ბედმა და
ღავმარცხდით; ვიღამ მოუაროს სამშობლოს, თუ კი საუკეთესოს
ყველას ინგლისში გარეკავენ? გენერლებია, იქ მიგიდით; სწავლუ-
ლებია, იქ მიგიდით და ჯარები ხომ იმდენი მიგყავთ, რომ საფრან-
გეთს ოხრად სტოვებთ! განა არ შეიძლება, ერთხელ კიდევ აგვი-
ღელდეს ზღვა და ისე დაფანტოს ჩვენი ზომალდები, რომ ერთმა-
ნეთს ვეღარა ჰპოვებდნენ, როგორც ამ ცოტა ხნის წინად მოგვი-
ვიდა? ხომ შეიძლება, ჩვენი ჯარების და მხედართმთავრების ინ-
გლისში ყოფნით ისარგებლონ გერმანელებმა და შემოგვესივნენ!
მით უფრო მოსალოდნელია მათი შემოსევა, რომ ჩვენგან შევიცა-
რის და რომის დაჭერა მთელს ევროპას აშფოთებს, ყველანი „ავა-
ზაკებს“ გვეძახიან და ვენელი ხალხი ხომ აშლილა კიდევ და ისე
გამოუტყნადებია ჩვენდამი თავისი სიძულვილი; წაიკითხავდი „მოამ-

ბეში“, როგორ ჩაუპტერევიათ ჩვენი ელჩის სასახლას ფანჯრები და როგორ დაუშვებინებიათ ჩვენი დროშა! განა ამისთანა დროს ქვეყნის მიტოვება შეიძლება? დღეს მეფობა ან რესპუბლიკა კი არ არის საფრთხეში, არა, განსაცდელში თვით სამშობლო და ჩვენი დამოუკიდებლობა არის. ნუთუ ფრანგები არ არიან ჩვენი გამგენი?| თუ გიყები არიან?!. არა, მტერს კარი გაუღო და თითონ სხვაგან წავიდე!.. გიყი თუ იზამს ამას, თორემ... ან რად, რისთვის გვინდა ინგლისთან ომი? რომ მხედართმთავრობა მივცეთ ბონაპარტს, სხვა ხომ არაფრისთვის!

— რისთვის გვინდა?— შეეკითხა ექიმი შვანი:— ჩემო შოველ... მეტად კარგი რამ არის გამგეობის ადგილი... თუ ბონაპარტი დარჩა, გამგეობის ალგას მარტო თითონ დაიჭერს და ისინი ცარიელნი დარჩებიან.

შოველმა აღარა უთხრა რა, რადგან თითონაც კარგად იცოდა, რომ გამგეობა ბონაპარტის თავიდან მოსაშორებლად სწადიოდა ამას. შვანი წავიდა და რამდენიმე დღე სულ იმის მოლოდინში ვიყავით, რომ ჩვენი ჯარების ამხედრების ამბებს მოგვიტანენ გაზეთებში.

გაზეთები მიწის პირიდან ადგვას და განადგურებას ემუქრებოდნენ ინგლისს. ყველა ინგლისს ლანძღავდა, ყველა ინგლისს აშინებდა და უცბად 26 თუ 27 მაისს 1798 წ. ხმა გაეარდა,— ჩვენი ჯარი დაიძრა და ეგვიპტისკენ წავიდაო. ცოტა ხანს უკან პროკლამაციებიც მოგვივიდა.

— ხედავთ, — წამოიძახა შოველმა, — ნაპოლეონ ბონაპარტს ინგლისთან ბრძოლას ეგვიპტელებთან ბრძოლა ურჩევია! ევკ, ჩემო მიშელ, ახლა კი ცხადია, რომ თუ ომი ატყდა სადმე, ისეე ჩვენს საზღვარზედ ატყდება და არა ინგლისში და ეგვიპტეში. სად საფრანგეთი, სად ეგვიპტე? მართალია, ოთხმა თუ ხუთმა საზარელმა ყაჩაღმა—კამბიზმა, ალექსანდრე მაკედონელმა, კეისარმა და მაკმადმა,—სწორედ ეგვიპტეში ისახელეს თავი, მაგრამ ღმერთმა მკითხოს, თუ გამეგებოდეს, რად მიდიან ჩვენი ჯარები იმ სიშორეზედ? იქნება იმითომ, უკვდავი გმირის სახელს მარტო იქ შეიძენს კაცი! სად ნაპოლეონის სიგმირე და სად ჩვენი ჯარების უსარგებლოდ ჟლეტა და ხოცვა. ეგვიპტეში რომ არ წავიდეთ, თუ კი ომი გვინდა, აქ ვერ ვიპოვით მტერს, როდესაც მთელი ევროპა ჩვენ ვაღაკვიდებია!

გაშლიდა რუკას და დაუწყებდა სინჯვას. ხანდახან რამდენიმე საათი დასცქეროდა და რალსაც ნიშნავდა. ჩვენებური პატრიოტიზმი ხშირად მოდიოდნენ შოველის სანახავად. ხმა დადიოდა, ბონა-

პარტი ინდოეთში მიდის რომ იქ შეებრძოლოს ინგლისელებსო; ამ აზრით გატაცებულნი იყვნენ რაფიელ მანკი და მოხუცებული დიმერინგენში მასწავლებლად ნამყოფი ტუბა. გაზეთებში ეწერა, ჩვენი ჯარები ინდოეთს მიდიან, რათა დაიმორჩილონ ის ქვეყნები, საიდანაც ყავა, პილპილი და მიხაკ-დარიჩინი მოდისო. შოველი პირ-მოკუმული ისმენდა ამ სისულელეს, მაგრამ ვერ მოითმენდა და გაბრაზებით წამოიძახებდა:

— ნეტავ რამ დააბრმავა ასე ხალხი, ღმერთო! რამ აუხვია თვალი! ამისთანა უბედურება იქნება?!

ერთხელ ერთი უშველებელი წიგნი ამოედო ტუბას ილიაში და ისე შემოვიდა ჩვენსა. წიგნი ჩემს სიმამრს გადაუშალა და უთხრა:

— იცი, შოველ, ის ქვეყანა, საიდანაც ყავა, პილპილი და მიხაკ-დარიჩინი მოდის, სავსე თურმე ყოფილა თვალ-მარგალიტით და ოქროს მადნებით... ამ წიგნში წერია, წაიკითხე. ეხლა ხომ გესმის, რისთვის უნდა ბონაპარტს ინდოეთის აღება?

ეს კი ველარ მოითმინა შოველმა და შეჰყვირა:

— დიად, მე კარგად მესმის, რომ შენცა და საუბედუროდ ბერი სხვაც, ვირები ხართ, რომელთაც დღეს აღვირი ამოსდეს და ხვალ კურტანსაც შეადგამენ! იცით, რამოდენი მანძილია ეგვიპტიდან ინდოეთამდის? ჯერ რამდენიმე ათასი ვერსი ზღვით არის და ახლა ზმელეთით რამდენია! რამდენი გადაუვალი მთებია და ქვიშნარი უდაბნოები! რამდენი ველური ხალხია, უფრო ავი და მოსარიდებელი, ვიდრე ჩვენებური მგლები! ეგვიპტიდან მეკვას რომ წავლენ ხოლმე სალოცავად არაბები თავიანთი აქლემებით, რამდენიმე თვეს მგზავრობენ; გზაში იმდენი ხალხი იხოცება სიციხისა და წყურვილისაგან, რომ გზა მოკირწყლულია მათი ძვლებით! და თქვენ გგონიათ, რომ ბონაპარტმა ეს არ იცის, თავის დღეში თვალი არ გადაუვლია რუკასთვის და ინდოეთში ეგვიპტეზედ მიდის ოქროს და თვალ-მარგალიტის საშოვნელად? არა, ჩემო ტუბა, ბონაპარტმა ძალიან კარგად იცის ესენი, ოღონდ იცი, რა თვალთ უყურებს ხალხს? იმისთვის ხალხი სასუქია, რომელმაც გენერლები უნდა ამრავლოს! და წარმოიდგინე, ლამის მეც დავეთანხმო, რომ სრულიად სამართლიანია მისი შეხედულება. მას შემდეგ, რაც უკანასკნელმა ჩვენმა კონსტიტუციამ ორად გაჰყო ხალხი—შემძლებლად და შეუძლებლად,—ხალხს ტვინი გამოეცალა, და შემძლებელთ გული და მკლავი. ამ უთანხმოებაზე აღორძინდება და გაძლიერდება ის მხედრული მართებლობა. რომელიც ერთსაც დალუპავს და მეორესაც. ბონაპარტს რომ ინგლისელებთან შეებრძოლება სდო-

მოდა, იმ სიმორეზე რად წავიდოდა: რამდენიმე საათის სავალია ჩვენგან ინგლისი. ინგლისელები შინ იყვნენ, თავიანთსა და ძალიან მშვიდად მოელოდნენ ჩვენს ჯარებს! ჩვენთან საბრძოლველად ისინი ინდოეთში არ გაპარულან!

— მაშ რა უნდა ეგვიპტეში? — შეჰყვირა ტუბამ.

— რა უნდა? ის უნდა, რომ ბონაპარტზე ალაპარაკოს დიდი და პატარა. საუკეთესო ჩვენი ჯარებით და სამაგალითო გენერლებით შეესევა სრულიად გაუნათლებელს, თითქმის პირვანდელ ხალხებს, რომელთაც არც თოფი აქვთ, არც ზარბაზანი, არც ჯარი ჰყავთ და არც რაიმე წყობილება აქვთ. შეესევა და, რა თქმა უნდა, მიწასთან გაასწორებს ყველას; დაარბევს იმ უბედურთ, ძვირფას განძეულობას გამოუგზავნის პარიზს და ალაპარაკებს ქვეყანას. ნაპოლეონს ჯერჯერობით სხვა არა უნდა რა, ოღონდ კი ყველგან იბისი ხსენება იყოს. ნაპოლეონი თავისას ირიგებს და ჩვენ კი... ჩვენ ხარჯი უნდა გავიღოთ და შევიწახოთ ჯარი — რამდენიმე ასი ათასი კაცი. თუ გავვიწყრა. ღმერთი და შემოგვესია მტერი, ახლა სხვა, ახალი ჯარები უნდა შევადგინოთ მტრის მოსაგერებლად, ჩვენი უმცროსი შვილები გავგზავნოთ საბრძოლველად და კიდევ რომ გავიმარჯვოთ, შურიანები თავისას არ დაიშლიან და ჟურდანის, ბერნადოტის და მოროს დასამცირებლად, გამარჯვებულ მარტო ეგვიპტელი ჯარის გამარჯვებას აღიარებენ და მხედართმთავრად მარტო ბონაპარტს. გაუმარჯოს ძლევა მოსილ ბონაპარტსო! დი-წყებენ ყვირილს, და ბონაპარტს მიაწერენ ყველა ჩვენი ჯარების გამარჯვებას.

„ეგ, თუ გავიმარჯვებთ! მაგრამ უფრო ადვილი წარმოადგენია, რომ ვერ გავიმარჯვებთ, რადგან ამოცდილი ჯარები შორს არიან და, თუ შემოგვესია მტერი, დიდი ხანი ვერ გავუმარჯვებთ. მაშინ ხომ სწორედ მთარველ ანგელოზად მოეცლინება სამშობლოს ბონაპარტი! საჩქაროდ გამოეჩანება თავისი ჯარით, მტერს გარეკავს და... მაშინ უყურეთ, რა ყვირილს მორთავენ: — გაუმარჯოს ძლევა მოსილ ბონაპარტს! გაუმარჯოს სამშობლოს განმათავისუფლებელს ბონაპარტსო! ბევრიც რომ გვინდოდეს, ხმასაც ვერ ამოვიღებთ, რადგან სამშობლოს ღალატად ჩამოგვართმევენ ბონაპარტის კიცხვას. ან როგორღა ვიტყვი რამეს? ბონაპარტი ბურთს ჩაგვჩრის პირში, რადგან ბატონიც ის იქნება და მბრძანებელიც. თავისთვის ყავაც ბევრი ექნება აქვე ჩვენში. პილპილიც, მიხაკ-ღარიჩინიც, ოქროს მადნებიც და თვალ-მარგალიტიც! ისე გაიკეთებს თავის საქმეებს, რომ ინდოეთი აღარც კი აგონდებოდეს.

ტუბა თვალდაჭყეტილი შესცქეროდა შოველს და იძახდა:

— ახლა კი მივხვდი! ახლა კი მესმის!

ის კი არა ბრძანოთ, რომ მარტო შოველი მიუხვდა ბონაპარტს წადილს. შოველისთანა ათასი სხვა იყო. იაკობელები ერთმხრივ გაიძახდნენ:

— ბონაპარტი თავის საქმეს ირიგებს და არა რესპუბლიკისას! ის თავის თავის მოტრფიალეა და თავის გაძლიერების და განდიდებისათ!

მაგრამ სიტყვა სხვაა, საქმე სხვაა... იქნება ძალიან მრავალნიც იყვნენ შოველის აზრისანი, მაგრამ ბონაპარტის წინააღმდეგობას კი ვერავინ ბედავდა. და განა მარტო მაშინ, ყველგან და ყოველთვის ასეა. ყველას თავის თავი გასჭირებია; ზოგს ცოლის შერთვა უნდა, ზოგს წვრილშვილი ახვევია, ზოგს გული აქვს გატეხილი, რადგან, ვისაც კი მინდობია, ყველა სულმდაბალი და მუხნათი გამოსდგომია, და რა ქნას? არის თავისთვის და თავს იმართლებს:

— მე რა, ერთი მკითხოს კაცმა! მე რას გავაწყობ, ბევრიც რომ ვთქვა? დამიჭერენ არამკითხე მოამბეს და მგონი... ის რომ ყველაზედ ძლიერი და მოხერხებული იყოს; ხალხიც, გამგეობაც, ორივე კრებაც და გენერლებიც რომ ფეხქვეშ ეგებოდნენ და მუხლზე ჰკოცნიდნენ, მე მარტო რად დავრჩე მალა აწოწილი? ან რას მოვიგებ? მატლსავით გამსრესენ და მერე ვისთვის? ვინ დამითასებს ამ მსხვერპლს? იქნება ხალხმა დამითასოს? დიად, ეგ არის! ახია იმაზედ, გიჟი იყო, იტყვიან, და უსირცხვილოდ დაისაკუთრებენ ჩემს მამულს და სარჩო-საბადებელს. დამრჩება ობლად ცოლ-შვილი, უღუკმაპუროდ და ყოვლად უმწეოდ... არა, გიჟი უნდა იყოს კაცი, რომ თავი ამსხვერპლოს ამ ბრბოს! სულ ერთია, ლანძღვითა და გინებით მოიხსენიებს იგი მის საქციელს.

სხვანი უფრო შორსაც მადიან თავიანთ მსჯელობაში:

— ჰოდა, მოდი, ჩვენც ძლიერთ და მოხერხებულთ მივემხროთ, რომ ადგილიც კარგი ვიშოვოთ, სიმდიდრე და პატივისცემაც მოვიპოოთ და ჩვენს შვილებს და შვილიშვილებსაც უზრუნველი ლუკმაპური დავუტოვოთ! კაცი კაცის მკამელია; თუ არ შევქამთ, ჩვენ შეგვჭამენ და ბარემ ჩვენ შევჭამოთ! წამოვასხდეთ ქეჩოზე იმ სულელებს, რომელთაც მუხლის დრეკა ვერ მოუხერხებიათ და ვიხაროთ იმათი ნამუშევართ.

მაგრამ განვაგრძოთ, თორემ ძალიან უსიამოვნო ფიქრები ამეშლება და თქვენც შეგაწყუბებთ.

გავიდა რამდენიმე დღე და ბონაპარტის და მისი ჯარის ამბავი არა მოდიოდა რა. შვეიცარიაში ზემო-ვალე დავიჭირეთ ჩვენი ჯარებით, ქ. ცურინში კომისრები გავგზავნეთ დამალულ საუნჯეთა

აღმოსაჩენად; ყირიმიდან რუსის ზომალდების გამოსვლა გავიგეთ ბონაპარტთან შესაბრძოლებლად და თვით ბონაპარტის ამბავი კი არა ვიცოდით რა.

ბონაპარტი რომ აღარსად იყო, გაზეთები იმის ნაცვლად რაპინას გამჭირაზობას ასწერდნენ: ისე შეეწუხებინა შვეიცარიელები, რომ კვერცხის მდებელი დედალივით თურმე კაკანებდნენ უბედურნი და, რაც კი რამ მოეძებნებოდათ, სულ იმას აძლევდნენ. ისიც პარიზისკენ გზავნიდა.

ბოლოს, 8 მკათათვეს ამბავი მოგვივიდა, კუნძული მალტი ავიღეთ, ბრძოლაში სულ სამი კაცი დავეკარგეთ... რუსეთის წარმომადგენელს ბრძანება მივეცი, რომ სამი დღის განმავლობაში დაეტოვებინა კუნძული... და აქედან ის დაეასკვენით, რომ ინგლისელებს და გერმანელებს ჩვენთან საბრძოლველად ახლა რუსეთიც მიმატებოდა.

იმავე დროს მოლაპარაკება გვექონდა გერმანელებთან და ავსტრიელებთან, რომელთაც მაინცის სამაგიეროდ ვენეცია დაუთმინეთ. გერმანიისაგან შენაძენ მაზრებში საეკლესიო მამულები ჩვენის კანონისამებრ სახელმწიფო საკუთრებას შეადგენდა, მაგრამ ახლად შემოერთებული რესპუბლიკის ქვეშევრდომნი ამის უარს აცხადებდნენ: რომ დაეყოლოდით, ორგვარი წესწყობილება იქნებოდა რესპუბლიკაში; არა და—აჯანყებისა გვეშინოდა.

ღიაღ, მორიგებით, მოვრიგდით, მაგრამ დამორჩილება არ უნდოდა ახლად შეძენილ მაზრებს? ძალი და შეძლება არ უნდოდა? ნაპოლეონი ეგვიპტეში დათარეშობდა და ხალხს კი ტყავს აძრობდნენ. გამგეობამ ხარჯი დაადო მარილს, სწორედ ისე, როგორც 1789-მდე იყო; ხარჯი დაადო კარებს და ფანჯრებს; ოცდახუთი მილიონისა სახელმწიფო მამულები გაყიდა და ჟურდანის წინადადებისამებრ ბრძანება გასცა, — დღეის იქით ყველა მამაკაცი 20-იდან 25 წლამდე ჯარში უნდა იმყოფებოდესო. ცხადი იყო, მართებლობას ბლომად უჭირდა ფული და ჯარი; ხალხის ერთგული რომ ყოფილიყო ჩვენი გამგეობა, განა ამისთანა სასტიკი კანონებს მიმართავდა? სადღა იყო ის დრო, რომ მთელს ერს თავის ნებისად მიჰქონდა სამშობლოს სახსნელად ფული და თავისი ნებით ჯარში გასულნი თავგანწირვით იგერებდნენ მტერს? აგრეა: როდესაც ხალხს არავითარი უფლება არა აქვს, თოკი უნდა მოაბა და ისე წაიყვანო მტრის მოსაგვრებლად; მაშინ სამშობლო აღარაფერია და თავყანსაცემი ის არის, ვინც გაიმარჯვებს და უხვად აჯილდოებს სამსახურს.

მთელი ექვსი კვირა გავიდა და ოცდაათი ათასი ოჯახი მოუთ-

ძეხლად ძოელოდებოდა ეგვიპტელი ჯარის ამბავს. გვეგონა, ზღვამ შთანთქა იმდენი ჯარიაო. ბოლოს 15 ენკენისთვის 1798 ოთხის თვის უამბობის შემდეგ „მოამბეში“ შემდეგი ცნობა წავიკითხეთ: 8 კათათვეს გენერალი ბონაპარტი ქ. ალექსანდრიაში შევიდა და არაბულ მთავრებთან კავშირი შეჰკრა. ალექსანდრიის შემდეგ კაირი ააღო და მერმე მთელი ქვემო ეგვიპტე. ჩვენი ხომალდები აბუკირის ნავთსადგურში იდგნენ და ის იყო საფრანგეთისკენ დაბრუნებას ემზადებოდნენ, რომ უცბად ინგლისელი ხომალდები დაეცნენ ერთიორად უძლიერესნი და იმისთანა საშინელი ბრძოლა აუტეხეს, რომ ისტორიაში იმის მსგავსი სხვა არა ყოფილა; ადმირალის ხომალდი და რამოდენიმე სხვა დაიმტვრა და წყალმა დასძირა; რამდენიმე დამტვრეული გარეყა წყალმა და დანარჩენნი იმდენად დაზიანებული არიან, რომ სამგზავროდ აღარ ვარგანან.

ძნელი ასაწერია, როგორ შეგვაწუხა ამ ამბავმა.

— ახლა გაგვიწყრა ღმერთი, აი!—იძახდა შოველი. ხომალდები დამტვრეული და დაღეწილი, საუკეთესო ჩვენი ჯარი საღდაც ეგვიპტის უდაბნოში გადაკარგული იმ სიშორედ, რომ ვერც შინ დაბრუნდება და ვერც ჩვენგან მიიღებს დახმარებას; ესლა რომ შეერთდნენ ინგლისელები, იტალიელები და გერმანელები და ჩვენი ამ ყოფით ისარგებლონ, ქრისტე ღმერთიც ველარ გვიხსნის მათი ხელიდან. ევროპიელი ხელმწიფენი ერთხელ კიდევ შეერთდებიან ჩვენთან საბრძოლველად და, თუ ეს მოხდა, მარტოდმარტო ნაპოლენ ბონაპარტის გამო მოხდება.

ცოტა ხანს უკან ისიც გავიგეთ, რომ აბუკირში ჩვენი ხომალდების შემშუსვრელი ინგლისელი ადმირალი ნელსონი ნეაპოლში აღტაცებით მიეღო მეფეს, საგანგებოდ გამასპინძლებოდა და იქვე შეეკეთებინებინა იმისი დაზიანებული ხომალდები.

მერმე უფრო უარესი მოხდა: რუსები პოლონეთში შევიდნენ; ნეაპოლის მეფე ჩვენს მტრებს მიემხრო; პიემონტი და ტოსკანი აგვიჯანყდნენ. რომში მყოფი ჩვენი ჯარი შამპიონეს წინამძღოლობით გაეშურა ნეაპოლელების დასამორჩილებლად და ძალიანაც დაამარცხა: ჯარს ნეაპოლელი გლეხები გამოეშველნენ და დიდი ბრძოლის შემდეგ სულ მთლად ამოკლიტა ისინი შამპიონემ. ერთი ჩვენებური ბიჭი ერია რომაელ ჯარში და იმან მიაგებო ნეაპოლელი გლეხების ამბავი: ეკლესიების გაღავანში ყრიან მთელ დღე გულდაღნა და ცარიელი მაკარონით საზრდოობენ; ადამიანისა სახის მეტი აღარა აქვთ რა, იმდენად გამოტვინებულნი და განადირებულნი არიანო!.. მე კი არ ვიცი! ჩვენს მეფეებს, ბერებს და ბატონებსაც კი ნებავდათ, რომ ჩვენც ავრე გამოტვინებულნი ვყოფილიყავით და სრუ-

ლიად უშიშრად დაჰპატრონებოდნენ ჩვენს ნამუშევარს! ვისაც ხალხის ოფლით ცხოვრება უნდა, ვისაც ხალხის დამონავება უნდა, პირივით უნდა სძულდეს განათლება, ვაჟკაცობა და თავმოყვარეობა ხალხის შვილისა. და სძულთ კიდევ! მზის დაბნელება რომ შეეძლოთ, მზესაც კი დააბნელებენ, ოღონდ ხალხს განათლება არ შეეპაროს! ისინი ბედნიერად მაშინ იგრძნობენ თავს, როდესაც კაცობრიობას მწველელ ფურად გადააქცევენ და თითონ წურბელსავე მოეკიდებიან ძუძუზედ. ერთი სიტყვით, საშინლად დამარცხდა ნეაპოლელი მეფის ჯარი თავისი გლეხებით. თვით მეფე და დედოფალი, მარიამ-ანტუანეტას და, რომელსაც ჟამივითა სძულდა რესპუბლიკელები, გაქცეულიყვნენ, თან წაეღოთ რაც კი რამ ძვირფასი ჰქონოდათ და უბედური გლეხები ბედის ამარად დაეტოვებინათ.

შამპიონემ ნეაპოლშიც რესპუბლიკა დააარსა. ეს მეზუთე რესპუბლიკა იყო ჩვენგან იტალიაში დაარსებული. მანამ შამპიონე ნეაპოლს ებრძოდა, გამგეობამ გენერალი ჟუბერი გაგზავნა პიემონტის ასაღებად... ვაი თუ ნეაპოლელებს მიეშველონო. ჟუბერმა აიღო პიემონტი, მაგრამ მეფე პიემონტისა სარდენში. გაექცა. მერვე სარდენში ვადავიდა და მთელი ის კუნძული დაიმორჩილა.

ამგვარად 1798 წ. დამლევს მთელი ეს ქვეყანა ჩვენ ხელთ იყო ალპის მთიდან დაწყებული სიცილიის ზღვამდე.

XII

მომავალი წელიწადი კარგს არას გვიქადდა: რუსეთის იმპერატორი პავლე პირველი, რომელიც დედამისმა ეკატერინემ და მამამ პეტრე მესამემ ძალად გააგიყეს, რადგან მთელი წლობით დამწყვდეული ყავდათ სრულიად მარტოდმარტო, ღიად, პავლე პირველი საომრად ემზადებოდა, ჩვენს გახიზნულებს სამსახურს აძლევდა და ლუი XVIII ძმად და მეგობრად აღიარებდა. „მე მალტის კუნძულზედ მყოფის მხედრობის წინამძღვარი ვარ და ღრმად შეურაცხყო ბონაპარტმა. რომ ის კუნძული დაიჭირაო“, ბრძანებდა. ტყუილი მიზეზის მოღება კი იყო, ღვთის წინაშე, რადგან მალტის კუნძულზედ სულ ორას, სამასი კაციღა იყო იმ დროს; მალტის მხედრობას უწინ ჰქონდა მნიშვნელობა, როცა ურჯულონი წმ. იერუსალიმის დაქერას ცდილობდნენ; ნაპოლეონის დროს კი, როდესაც იერუსალიმს არავინ რას ერჩოდა, სულ უსაფუძვლო იყო ამ მხედრობის არსებობა. ან რაღა მხედრობა იყო, კაცი რომ დაუკვირდეს! ჩვენნი ჯარისა ერთი ოცდახუთი ბიჭი უფრო გაუმავრდებოდა მტერს,

ვიდრე მთელი მათი მხედრობა თავისი ციხე-სიმაგრეებით ბონა-პარტს გაუძალიანდა. მაგრამ ეგ არაფერი! საქმე ის იყო, რომ პავლეს მილიონობით ჰყავდა ჯარი თითონაც იმისთანა კაცი აყო, რომ ვერავინ რას შეაგნებინებდა. ათასსა და ათიათასს კაცს ააკუწვინებდა, ოღონდ თავისი უინი კი მოეკლა! ვინა ჰყავდა დამშლელი? ხელმწიფე იყო, მბრძანებელი და პატრონი თავის ქვეშევრდომებისა და მის უინს წინ ვერა აღუდგებოდა რა.

ამას წინათ მოგახსენეთ ექიმი შვანის გამგზავრება პარიზისკენ. მისდა საბედნიეროდ, ცოტა გვიან მისულიყო, ისე რომ ყველა კარგი ადგილები დაჭერილი დახვედროდა. დაბრუნებისას, რამდენიმე თვის შემდეგ ისევ ჩვენსა ჩამოხტა და ერთი იმისთანა უცნაური ამბავი გვიამბო, რომ არავისა სჯეროდა. არავისა სჯეროდა, რომ ასე ადვილად შეიძლებოდა საშინელი მომაკვდინებელი ჭირას აცილება. დღეს ვერც კი წარმოიდგენთ, რას გვიშვრებოდა მაშინ ყვავილი! მუსრს ავლებდა ბავშვებს! ხან აქ გაჩნდებოდა, ხან იქ, და ცეცხლივით მოედებოდა გარშემო სოფლებს. ყველა თრთოდა, ყველას გული უწუხდა მისი შიშით, მეტადრე წვრილშვილის პატრონ დედ-მამას.

„გაღმა მხარში ყვავილი გაჩენილა!.. ჩვენკენ მოიწევს!.. ისე დაუსახიჩრებია მარწყვივით გოგოები, რომ თვალს აარიდებს კაცი... ახლა რამდენი იხოცება თურმე!“..

საშინელება იყო, საშინელება! დაერეოდა სოფელს და ადარც დიდს ინდობდა, ადარც პატარას. გაივლიდა რამდენიმე კვირა და ისე შესცვლიდა ლამაზ ქალებს, რომ ვეღარც კი იცნობდით:

— ღმერთო ჩემო! ნუ თუ შენ ეკატერინე ხარ!... ელისაბედ, შენა? ოპ, საცოდავო! ჩვენი იაკობი?.. ღმერთო, ღმერთო! შენ მაინც რატომ არ გეცოდება ეს საბრალონი!...

იმდენი მე ღმერთმა დღე მომცეს, რამდენი დანიშნულები გაუყრა ყვავილს!

ბავშვებისას ხომ ნულარა ბრძანებთ. მუსრს ავლებდა, საცა კი გაჩნდებოდა.

„იცი, ამბობენ ყვავილიანს გვერდით უნდა მიუწვინო ბავშვი და, კიდევ რომ შეეყაროს, ადვილად იხდისო... ბარემ ახლავ დაიხოცნენ, თუ დასახოცნი არიან; პატარებს ისე არ ინანებს კაცი, როგორც მოწიფულს და დავაჟაკებულს! თხელია ბავშვის ტყავი და იმიტომა ხოცავს ისე ყვავილი“. ასჯერ მაინც უთქვამთ ჩემთვის ესა და მრავალი სხვა ამისთანავე სისულელე, რომელიც მაშინ სისულელედ არ მიგვაჩნდა. აიყვანდა უბედური ვინმე მამა თავის ერთადერთ შვილს და გასწევდა ყვავილიან ავადმყოფისკენ, — გვერდით

მიუხედავად, უფრო ადვილად იზღისო. წავიდოდა უბედური, მაგრამ შუა გზამდეც ვერ მიაღწევდა და, — არა!.. ჯერ არა!.. განა მერმე კი არ შეიძლებაო!... უკანვე გამობრუნდებოდა.

შევადოდა სახლში და შერცხვენილი, ათრთოლებული ხმით მოახსენებდა თავის უფროსებს, დედას ან მამას:

— რა ვქნა, თუ კი არ შემიძლია აი, ეს თქვენ და ეს ბალდი! თქვენ წაიყვანეთ!

და უფროსნიც გახარებულნი ფიქრობდნენ თავიანთ გუნებაში:

— შენ გიშველა ღმერთმა, რომ უკან დაბრუნდი... მოვაცადოთ, განა მერმე კი არ მოვესწრებით!..

მოვიცადოთო! გაჩნდებოდა იქვე ახლო სადმე მეზობლისას ყვავილი, და... მე იმისთანა საშინელო ჩემს დღეში ჭირიანობის მეტი არა მინახავს რა. ათში ორი რომ გადარჩენილიყო, დიდი ღვთის წყალობა იყო; რვას უთუოდ დაასახიჩრებდა.

რამდენჯერმე მითხრა შოველმა, პატარა ანიყო აიყვანე ან როდორღში, ძალიან ადვილად თურმე ხდილობენო, მაგრამ არ ვინდომე. არც მარგალიტას უნდოდა. ეგეც რომ არ იყოს, იმდენი ვაივაგლახი დაგვატყდა იმ დროს ომის მოლოდინში, რომ თავბედისა ველარა გაგვეგო რა.

საშინლადა მძინეარებდა ყვავილი, როდესაც ექიმი შვანი ჩამოვიდა პარიზიდან. მათუსაილის დროისა რომ გავხდე, მინც მეხსომება, რა შთაბეჭდილება მოახდინა ჩვენში იმ ამბავმა, რომ ერთ ინგლისელ ექიმს, ჯენნერს, უებარი წამალი გამოუგონია ყვავილის მოსარჩენად — ყვავილის აცრა; აგერ თხუთმეტი წელიწადია, რაც ჯენნერი ამგვარად სწამლობს თავის ავადმყოფებს და აღარავინ უკვდებო... ყვავილიან ძროხის ჩირქს წასცხებენ ბავშვს ოღნავ დასერილ ალაგას და მით გადაარჩენენ ავადმყოფობას და სიკვდილს... შენიშნულია, რომ ვინც საქონელშია, და მეტადრე ძროხებსა სწველის, და მამასადამე ყვავილიანი ძროხის ჩირქიცა ხვდება, იმას თავისდღეში არ შეხვდება ყვავილიო.

ძალიანაც გვინდოდა დაგვეჯერებინა, მაგრამ ვიცოდით, რომ ამდენს სიკეთეს ჩვენ არავინ გვადირსებდა.

— ოჰ, ნეტავი კი მართალი იყოს! — ვიძახდი ჩემს გულში და თან ჩემს გოგო-ბიჭს გადავეყურებდი. — თქვენ რომ ემაგრე ანგელოზით ლამაზები შემრჩეთ, სხვას აღარასა ვთხოვ უფალს.

მარგალიტაც, ეტყობოდა, ამავე ფიქრებს გაეტაცა.

შოველს უნდოდა დაწვრილებით გაეგო, რაში მდგომარეობდა აცრა, და რადგან შვანი, როგორადაც ყოველი მოხუცებული სწავლული, ბუნებრივად მოლაპარაკე იყო, ისე აუხსნა, თითქო გარს

შეგირდები ახვევია და იმათ ჩასჩინებებსო. წაკითხული ჰქონდა ყველაფერი, რაც კი აცრის შესახებ წიგნები იყო და დარწმუნებული იყო, რომ აცრილს ყვავილი ველარას დააკლებდა.

— მე ძალიან ხშირად მინახავს ყვავილიანი საქონელი, — წამოიძახა შოველმა. — და ისიც გამიგონია, რომ საქონლის ყვავილი საშიში არ არისო. მოთეთრო, მსხვილი მუწუჯი იცის...

— დიად, დიად, — გააწყვეტინა სიტყვა შვანმა და დაწვრილებით, მეცნიერულად ასწერა ძროხის ყვავილი.

— სწორედ ის არის, სთქვა შოველმა, წყალივით გამსჭვირვალეა. ღებრთსა ვფიცავ, მე რომ ყვავილი არ მეხადა, ღღესვე ავიცრიდი, ოღონდ კი მეცადა, რამდენად მართალია ეს გამოგონება.

— მეც აგრევე, — სთქვა მარგალიტამ.

მეც მწამდა, რომ შვანის ამბავი მართალი უნდა ყოფილიყო, მაგრამ ნახადი ვიყავ და საკმარისად დაკენკილიც გახლდით. ცოტაოდენი მარგალიტასაც ემჩნია. შრველის და შვანის სახე ხომ სწორედ ცხრილი გეგონებოდათ.

ყველანი ბავშვებზე ვფიქრობდით, მაგრამ ხმის ამოდებას კი ვერა ვბედავდით.

— ჩავალ თუ არა სტრასბურგში, — დაიწყო შვანმა, — მაშინვე ავუცრი ჩემს შვილიშვილებს: სამი მარგალიტით ბავშვი მყავს, ჩემი ქალის შვილები, და ცოდო არ იქნება ყვავილს გაფუჭებინო!

— თუ პატიოსანი პატრიოტის სიტყვას მომცემ, რომ საენებელი არაფერია, მეც ეხლავე ავუცრი ჩემ შვილიშვილებს. მერე მივყვები და, ვინც შემხვდება, ყველას შეეთავაზებ ჩემს ცოდნას.

შვანმა შემოგვეფიცა, მავნებელი არა არის რაო და დაგვარწმუნა კიდევ. იმ ღღეს ხუთ საათზე წავიდა ჩვენი სტუმარი და დაგვპირდა, შეგატყობინებთ, რითი გათავდება ჩემი ცდა და ჩირქსაც გამოგიზავნითო. მოუთმენლად მოველოდით დაპირებულს, ღღე და ღამ იმის ლაპარაკში ვიყავით, მაგრამ აგერ ექვსი კვირა სრულდებოდა და შვანისგან კი არა მოგვსდიოდა რა. გადავწყვიტეთ, ტყუილი გამომდგარა და იმიტომ არას იწერებო. ერთი მხრით, კიდევ მიხაროდა, რადგან ამისთანაში პირველობა არად ვარგა და, თუ ცდაზე მივარდებოდა საქმე, მე იმას ვირჩევდი, რომ სხვას ეცადა და მე შეყურებინა.

თებერვალში ისე მოედო ჩვენს გარშემო სოფლებს ყვავილი, რომ საფლავის თხრას ველარ ასწრობდნენ.

ერთ დილას გიჟივით შემოვარდა ჩვენს ღუქანში ივანე ბონომი და სასოწარკვეთილებით დაიძახა:

— დავიდუპე, ხალხო! მიშველეთ ჩამე, ლამის ამომიწყდეს ცოლ-შვილი!

ბონომი მეზობელი იყო ჩვენი და ორი იმისთანა კარგი ბიჭი ჰყავდა, რომ მტერსაც კი ეამებოდა. ახლო ვიდევით ერთმანეთზედ და ბავშვები ერთად თამაშობდნენ. ბონომს ლეტუმის ქალი ჰყავდა, რომელსაც... ჯერაც არ დავიწყებოდა, როგორ ჩამომივილიდა ხოლმე, ვითომ წყალზედ მივდივარო, და სამკვდლოში რომ დამინახავდა, დამიძახებდა ტკბილი ხმით:

— დილა მშვიდობისა, მიშელ!

ძალიან უყვარდათ ერთმანეთი ჩვენს ბავშვებს. მოეხგეოდა ხოლმე იმისი უფროსი ბიჭი ჩემს ანიკოს და დამიძახებდა:

— აი, ჩემი ცოლი! სხვას არავის შევირთავ!

ჩვენ კი სიცილით ვიხოცებოდით.

წარმოიდგინეთ, როგორ შეგვაწუხებდა ამ ბავშვების ავადმყოფობა. დიდი ხნის ნაცნობები იყვნენ და ისე გვიყვარდა ერთმანეთი, როგორც ახლო ნათესავებს. მინდოდა ნუგეში მეცა, გამემხნევენინა საწყალი კაცი, მაგრამ ის თავისას გაიძახდა:

— უნდა ნახო, რა საცოდაობაა, მიშელ, რომ ტყუილი იმედით აღარ გამამხნევო! ისე აყრიათ საწყალ ბავშვებს, რომ მეც ველარო ვცნობ. ახლა დედაც ავად გაუხდათ... დღეს ისიც დაწვა, ის ჩემი ცოდვით სავსე, ისა.. ღმერთო, ღმერთო! ჯერ მე მომკლა და გამათავო, ის არ მიჩვენია...

იქვე ტრიბოლენის აფთიაქში შევარდა და წამალი იყიდა. ორი დღის შემდეგ ხელიდან გამოეცალა ორივე ბავშვი და ცოლსაც ყვავილი გამოაჩნდა.

მოხუცებული ლეტუმის ჩამოვიდა საწყლების დასასაფლავებლად და სწორედ შეშლილი გეგონებოდათ, ისე სწუხდა შვილის-შვილების დაკარგვას. ჩემი თვალით რომ არ მენახა, არც კი დავიჯერებდი: „შავი ცხენის“ სასტუმროში შევიდა და ღვინის სმა დაიწყო. თან საშინელი ხმითა ყვიროდა:

— არ არის, არა უზენაესი არსება!... ჩვენს იქით არაფერია!.. არაფერია!... ღმერთი რომ იყოს, განა ასე უსამართლოდ დაგვხოცამდა!

გაზაფხული იყო. ერთ დილას, ის იყო დილიყანსში ჩაჯდომას ვემზადებოდი, სიმონთან ანგარიშების გასასწორებლად, რომ დუქანში ექიმი შვანი და ორიც წარჩინებული ვიღაც კაცი შემოვიდნენ და ღიმილით სალაპი მომცეს. შოველს ხმაზედ ეცნო თავისი ძველი მეგობარი, და სამკითხველოს კარი გამოაღო. შვანმა შეჰყვირა:

— მე ჩემს შვილიშვილებს ავუცერ ყვავილი თქვენ როგორა ხართ თქვენს სიტყვაზედ?

— მერე ჩირქი სადა გაქვთ?

— აი, ჩემს ჩანთაში.

და მაშინვე გახსნა თავისი ბარგი და ჩირქი გვაჩვენა. ღუქანში მყოფი ხალხი განცვიფრებული შესცქეროდა ექიმ შვანს.

სამკითხველოში შევედით და შვანის თანამგზავრიც თან შემოგვყვნენ, ისინიც ექიმები ყოფილიყვნენ. იმათ გვიამბეს, რაში მდგომარეობს აცრა, როგორ დამუწუკდება დასერილი ადგილი, როგორ გამოირწყვის და შეშრება... ზოგი აცრილი ვერც კი იგრძნობს ავადმყოფობას და, კიდევ რომ იგრძნოს, ცოტა სიცხეს მისცემს, სხვა არაფერიო. ჩვენ ჩვენებს ავუცერით და ყველანი კარგად არიანო.

მიუხედავად ამისა ვერც მე და ვერც მარგალიტა ვერ გავბედავდით ბავშვების აცრას, შოველს რომ არ წამოეძახა:

— ეგეცა კმარა, შვან. რაკი შენ შენს შვილიშვილებზედ სინჯე. ეგ საშუალება და ეს ორი მამულიშვილიც გემოწმება, მე აღარაფრისა მეშინია და ახლა ჩვენებს ავუცრათ. თქვენ რას იტყვი? მოგვიბრუნდა მე და მარგალიტას, რომელსაც ფერი ეცვალა. მე თავი დავღუნე და ხმა ველარ ამოვიღე. ცოტა ხანს გაჩუმებული იყო მარგალიტა და მერმე ჰკითხა:

— ძალიან ეტკინებათ, რომ აუცრით?

— ეტკინებათ კი არა! ერთ კიკნას გავუფხაჭნით მკლავს, არც კი იგრძნობენ.

გავიდა მარგალიტა და პატარა ანიკო გამოიყვანა. აკოცა, მერე შოველს მისცა და უთხრა:

— აჰა, მამა!... შენ უფრო გწამს ეგ ახალი წამლობა.

მე კიდევ მომაგონდა, რომ იქვე ჩვენს მეზობლებს ყვავილი უღვათ და, ხომ იცით წყალწალღებული ხავსს ეჭიდებოდაო, მოდი ამასა ვცდი-მეთქი, ვიფიქრე და პეტრეს საძებნელად გავედი.

— აქ მოდი, პეტრე! პაპაშენი გიძახის.

ამ დროს სამკითხველოდან ანიკოს ტირილი შემომესმა. მარცხენა მკლავი ტიტველი ჰქონდა საწყალ გოგოს და ცოტაოდენი სისხლი უჩანდა. მე რომ დამინახა, ჩემკენ გამოიწია, მეც ავიყვანე და, პეტრეს მაინც ავაცდინო ეს ტანჯვა-მეთქი, ჩემს სიმამრს ვუთხარი:

— მოდით, დღეს ამითი გავათავოთ. ანიკოზედ ვსინჯოთ და, თუ ივარგა, პეტრესაც ავუცრათ მერე.

— არა, არა! — წამოიძახა შოველმა, — ყვავილზე უარესი ზაუნდა მოუვიდეთ!

— კარგი ერთი, ჩემო მიშელ! განა ასე თამაშად ვიქნებოდი, სრულიად დარწმუნებული რომ არ ვიყო! — მისაყვედურა შვანმა.

პეტრე გაშტერებული უყურებდა გასისხლიანებულ მკლავს ანიკოსას და ბოლოს თავის პაპასა ჰკითხა:

— რას შვრებით, პაპა?

— არაფერს, ჩემო ბიჭიკო! პერანგი გაიძრე შენა! კი არ შეგეშინდეს, არ შემარცხვინო!

ხმის ამოუღებლივ გაიხადა ბავშვმა პერანგი და მკლავი მიუშვირა შვანს. მე კი ველარ დავდექი და გარეთ გავვარდი გაბრაზებული, რომ ასე ადვილად დავთანხმდი და გავიმეტე ჩემი შვილები.

ერთი კვირა ისე ვიყავ, რომ ცოფიანივით ვიღრინებოდი; სულ იმის შიშში ვიყავ, ბავშვები დამეხოცებიან-მეთქი და ხან შოველს ვაბრალებდი ამ უბედურებას, ხან მარგალიტას, ხან სხვებს. მარგალიტაც ძალიან შეშინებული იყო, მაგრამ არას იმჩნევდა, მიშელი არ შევაწუხხო. ბოლოს შეაშრათ როგორც იყო მუწუქები. მაშინ კი დავმშვიდდი და იმასდა ვნატრობდი, რომ დიდხანს გაეძლო აცრის ძალას და სნეულება არ მიეკარებინა.

ახლა ჩვენს გარშემო მძვინვარებდა ავადმყოფობა. ხან ერთი სახლიდან გამოასვენებდნენ ცხედარს, ხან მეორედან. ბავშვებს ხომ ხოცავდა და ხოცავდა, არც დიდებს აყრიდა სიკეთეს. სამხედრო საავადმყოფო სავსე იყო სნეულებით.

ჩვენები კი მთელი დღე მოედანზედ თამაშობდნენ სრულიად დაურიდებლად. მთელი უბანი მოიარა, გარშემო შემოუარა ჩვენს სახლს ყვავილმა და ჩვენსა კი ვერ შემოვიდა. შვანი გვწერდა სტრასბურგიდან, ვისაც კი ავუტყერით, ერთს არ შეჰყრია ყვავილიო. უნდა გენახეთ, რა გახარებულნი ვიყავით, მეტადრე შოველი. აიტეხა, უთუოდ უნდა ვისწავლო აცრაო და ცოტა ხანს უკან სტრასბურგს წავიდა შვანის სანახავად. ისწავლა კიდევ და დაიწყო სოფელ-სოფელ სიარული და ხალხის აცრა.

მაგრამ ის კი არ იფიქროთ, ყველა სიამოვნებით აცრევივინებდა თავის შვილებს, პირიქით, მარტო ღმერთმა იცის, რამდენი ტანჯვა-წვალემა მოუნდა საწყალ მოხუცს, ვიდრე შეაგნებინებდა ჩვენ მეზობლებს, რომ აცრაში საშიში არა არის რა. ხალხს ადვილად სჯერა და სწაშს ყოველი სიცრუე და სისულელე, რომელშიც იმას ფულს ართმევენ გაიძვერა ვიგინდარები, მაგრამ ურწმუნო თომად ხდება, როდესაც მის სასარგებლოს რასმე ეუბნება კაცი. სწორედ ნათლია-ჩემის ამბავი მოუვიდა შოველსაც, კარტოფილი რომ დასთესა და

მასხარად აიგლო მთელმა სოფელმა: იქ მალე დარწმუნდა ხალხი, რომ კარტოფილი სასარგებლო მცენარე იყო და მეორე წელს არამც თუ აღარ დაგვიცინოდნენ, თესლსაც გვთხოვდნენ. აცრაში კი უფრო დიდი ხანი დასჭირდა შოველს, ვიდრე დაარწმუნებდა ხალხს, რომ მისდა სასარგებლოდ იღვწოდა და არა პირად თავისთვის. ლაპარაკს რომ დაუწყებდა, იმ სახით უსმენდნენ, თითქოს სიკეთეს უშვებდნენ, რომ ამისთანა სისულელეს ყურს უგდებენ და დროს კარგავენო. თანაც დასცინოდნენ, — ვაგიჟებულა სიბერის დროსო.

არა, შენი ჭირიმე! მე რომ ვყოფილიყავ შოველის ადგილზე, ისე თავს კი არ დავიმიცირებდი. მე ჩემსას ვეტყოდი, ვურჩევდი... გამიგონებდნენ, კარგი! არა და — თავში ქვა და მუცელში სამართებელი!

მაგრამ შოველი სულ სხვა კაცი იყო. ბევრჯერ გალანძღეს, ბევრი შეურაცყოფა მიაყენეს და ის კი თავისას არ იშლიდა. უგუნურნი არიან და იმიტომ მოსდით, ეგ როგორ უნდა მეწყინოსო. დადიოდა და კველგან აცრის მნიშვნელობას ქადაგებდა. მამა ქრისტიფორეც ძალიან შველოდა და დღეში ათი-თორმეტი ბავშვი ყოველთვის მოჰყავდა ასაცრელად. ჩვენი სამკითხველო ახლა სადოსტაქრო პალატად იყო ქცეული: წარმოიდგინეთ ბავშვების ჩხავილი, დედების და ძიძების ლაპარაკი და შუაში მოხუცებული შოველი თავისი ნეშტარით.

აუცრიდა და ეტყოდა:

— გაუფთხილდი, არ შესწმინდო სისხლი, მინამ თავისთავად არ შეშრება. ხვალ-ზეგ დაუმუწუკდება, მაგრამ ფიქრი ნუ გაქვს, არას შეაწუხებს; მერე თავისთავადვე შეშრება და მოვარდება.

ხშირად მოხდებოდა, გაუძალიანდებოდა ასაცრელად მოსული, შეუშინდებოდა, გაქცევას დააპირებდა. ისიც ხან გაუჯავრდებოდა, შეუტევდა, ხან დაუტკებოდა, უალერსებდა და გაამხნევებდა. იტყოდით, ამ მოხუცებულისათვის დაუვალეზია ღმერთს ქვეყნის ხსნა ყვავილისგანაო. რომ ვერა და ვერ დაიყოლიებდა ჯიუტს, გამოვარდებოდა ღუქანში, დახლიდან ერთ ორ აბაზ თეთრ ფულს აიტაცებდა, ხელში ჩაუდებდა კერპს და შეუტევდა:

— დაჯე, უნდა აიცრა!

მე, რასაკვირველია, არად მომწონდა ამგვარი გატაცება; მე ის მერჩივნა, რომ ჩვენი ფული ჩვენს დახლშივე დარჩენილიყო, მაგრამ შოველს როგორ რასმე ვეტყოდი. მისდგებოდა და ისე გამოლანძღვდა „ევგოისტებს, რომელთაც პირადი კეთილდღეობის მეტი არა სწამთ რა...“ მარგალიტაც თავის მამისკენ იქნებოდა.

ჩვენს ღუქანში და სამკითხველოში იკრიბებოდნენ ყველანი, ვი-

საც აცრა უნდოდა და შოველიც მთელ ღღეს დაუღალავად მუშაობდა და ყველას აკმაყოფილებდა. გარდა ამისა, რაც უნდა დაბეჭდილიყო აცრის შესახებ, წიგნი თუ გაზეთი, ყველას იწერდა და გაფაციცებით კითხულობდა. სალაპარაკოდ იგივე საგანი ჰქონდა და ხშირად მარგალიტასაც აიყოლიებდა. მე კი გული მომდიოდა:

— სირცხვილი არ არის, ასე უსარგებლოდ დაკარგოს კაცმა დრო და ფული! ნაცნობნი მაინც მოსდიოდნენ! სრულიად უცნობნი არიან ეს ოხერ-ტიალნი და ლამის ზედ გადააგოს ჩვენი ცხოვრება! ვინა ჰყავს ნეტავი მადლიერი?!

კიდევ კარგი, რომ ვაჭრობა კარგი გვქონდა, თორემ ჯავრით გავსკდებოდი. უიმისოდაც ხომ ცნობილი კაცი იყო შოველი და ახლა ერთიასად გაითქვა სახელი და, ვისაც სავაჭრო ჰქონდა რამე, ჩვენსკენ მოეშურებოდა, რომ ენახა „საერო კრების წევრად ნამყოფი, მეწვრილმანე და ყვავილის ამცრელი შოველი“.

XIII

რაკი გააგეს ევროპელ ხელმწიფეებმა, რომ საუკეთესო ჩვენი ჯარი ეგვიპტეში იყო და ვერც მალე დაბრუნდებოდა, რადგან ხომალდები აღარა ჰქონდა, ერთხელ კიდევ შეერთდნენ რესპუბლიკის დასამხობად. ომისთვის საჭირო ფულს ინგლისი ჰპირდებოდა, ჯარს ავსტრიის იმპერატორი და, გარდა ამისა, ორმოცი ათასი კაცი რუსეთის ხელმწიფემ პავლემ შეაწია, — როგორ გაბედეს, რომ მალტის კუნძულს შეეხნენ ფრანგებიო! გაზეთებიდან გავიგეთ, რომ რუსის ჯარის მხედართმთავრად დანიშნული იყო საუკეთესო მთელს რუსეთში გენერალი სუვოროვი, რომელმაც კალიასავითა ელიტა პოლონელები და ცეცხლი წაუჟიდა ქალაქ პრაღას.

ჩვენ კი ყურსაც არ ვიბერტყავდით: ქ. რაშტადში მთელი ევროპის სახელმწიფოთა წარმომადგენელნი იყვნენ შეკრებილნი და საზოგადო მშვიდობიანობასა და მორიგებაზედ ბჭობდნენ.

გამგეობა მარტო მაშინ მიუხვდა მტერს განზრახვას, როდესაც რუსის ჯარმა თითქმის მთელი გერმანია გადმოვლო და საფრანგეთს მოადგა. შეუთვალეს გერმანელ მეფეებს და ავსტრიის ხელმწიფეს, — შეაჩერეთ, თორემ რუსის ჯარის წინსვლა ომის გამოცხადებად იქნება ჩვენგან მიღებულიო. ამაზედ პასუხიც კი არ გაგვეცეს და რუსის ჯარს მიემხრნენ გერმანელი მეფეებიც და ავსტრიის ხელმწიფეც. ცხადი იყო, რომ ახლა უფრო საშინელი მტერი

გვიქადდა ბრძოლას და რესპუბლიკის გაუქმებას. გამგეობაც შეუდგა ძველებურად ჯარის შეგროვებას, მაგრამ ისე ადვილად ველარავინ გაჰყავდა: 1791 ას ორმოცდაათი ათასი კაცი გაიყვანეს, 1793 თებერვალში სამასი ათასი, აპრილში ოცდაათი ათასი და აგვისტოში ათას ორმოცდაათი ათასი. ამ ჯარმა დაიმორჩილა ჰოლანდია, რეინის გაღმა მხარი, შვეიცარია, იტალია, დაამარცხა და საიმათოში გადაარეკა ესპანელები და გაილაშქრა ეგვიპტეზედ.

და მანამ ახლად გაყვანილს ჯარს მოაგროვებდნენ, 190 ათას კაცს, და ცოტათი მაინც გასწორებდნენ, ძველ ჯარებს გზავნიდნენ ჩვენს საზღვრებისკენ. მიდიოდნენ და მიდიოდნენ, ბოლო აღარ უჩანდათ. სულ ასი ათასი კაცი იყო ამ ჯარში და იმათ უნდა გაემაგრებინათ შვეიცარია, იტალია, რეინი და ჰოლანდია, ვიდრე ახლად გამოყვანილნი მიეშველებოდნენ.

მტერს ერთიათად მეტი ჯარი ჰყავდა და იმისთანა საძხადისით მოდიოდა, რომ ეტყობოდა, დიდ ხნის განზრახვის ასასრულებლად მოიწევდა რესპუბლიკისაკენ. რა კარგი იქნებოდა, რომ ეგვიპტეში წასული ჯარი შინა გვეყოლოდა? მაგრამ მაინცდამაინც უიმი-სოდაც არ დავუარდით მტერს და ჩვენი დამარცხება არავის დავაყვებთ. ბონაპარტი მერე დაბრუნდა, უფრო გვიან და, გახურებული ომი რომ ნახა, ძალიან გაიკვირვა.

— რაზე ამოახოცვინეთ იმოდენა ჯარი, — ჰკითხავდა გამგეობას. მე რომ წავედი, მორიგებულნი ვიყავით ყველასთან და რად დაარღვევინეთ ჩემგან შეკრული პირობებიო?

გეხსომებათ მისგან შეკრული პირობები მორიგებისა: ჩვენი ჩვენ დაგვრჩესო, ავსტრიას იტალია დაუმორჩილა. რაც შეეხება ჯარს, ჩვენი ჯარები იბრძოდნენ სამშობლოზე ამხედრებულ მტერთან და არა სადღაც ეგვიპტეში არაბებთან, რომელთაც ჩვენთვის თავის დღეში არაფერი დაეშავებინათ. ჯარის ამოხოცვაზე ნუ იქნებოდა, თორემ ჩვენ უფრო ვუსაყვედურებდით, — რად მიატოვე ეგვიპტეში იმოდენი ჯარი და რას მორბოდი, რომ მორბოდიო მაგრამ რა? ალბათ რეგვენად და ლაჩრად იცნა მან მთელი ჩვენი ხალხი, რომ ამდენ თავხედობას ბედავდა. დიად, იქნება უცნაურადაც გეჩვენოთ, მაგრამ ის კი მართალია, რომ ზოგი გენიოსი თავხედობით არის გენიოსი.

განვაგრძოთ.

გამგეობამ პროკლამაციით მიმართა ხალხს, რომელშიც აცნობებდა საქმის ვითარებას:

„ავსტრიის ხელმწიფე-იმპერატორის ჯარები, მიუხედავად ქ. რაშტადის მორიგებისა, საფრანგეთისკენ მოიწვივნ

საომრად გამზადებულნი. იმავე დროს ჩვენს საზღვრებს თითქმის მოადგა რუსის ჯარი, რომელიც პირდაპირ ცხადებს, — საფრანგეთის ჩესპუბლიკის გასაუქმებლად მივდივართო...”

მაგრამ ნუ გავყვებით ამ საშინელი ომიანობის ამბებს, მით უფრო, რომ მე ჯარში არა ვყოფილვარ და ჩემზე უკეთ სხვანი მოგითხრობენ დაწვრილებით ყოველი ბრძოლის გარემოებას. მე მარტო იმას მოგახსენებთ, რომ კვლავ გაივსო ჩვენი პატარა ქალაქი დაჭრილებით და კვლავ გაისმა საზარელი კენესა-ტირილი! სახლებში რომ ვეღარ ეტეოდნენ, ქუჩებში ეყარნენ ზოგი დაჭრილი, ზოგი გაყინული, ზოგი შიმშილითა და დაღლილობით მისუსტებულნი.

ამ საზარელ ომის დროს მოხდა გამგეობის წევრთა არჩევნები და რევბელის მაგივრად ცნობილი მღვდელი სეისი აირჩიეს. მაგრამ ის სეისი აღარ გახლდათ, რომელსაც რევოლუციის პირველ ხანებში ვიცნობდით; სეისი მთელი ექვსი წლის განმავლობაში ხმის ამოუღებლივ იმალებოდა საერო კრების იმ ნაწილში, რომელსაც ვაკეს, ჭაობს, უძახდნენ და იკვებნიდა კიდეც, — მინამ თქვენ ერთმანეთს გილიოტინითა ხოცავდით, მე ჩუმად ვიყავ და იმიტომ გადავრჩი ცოცხალიო! ამას ის კაცი ამბობდა, რომელსაც რამოდენიმე მახვილი სიტყვისთვის ერთ დროს თავყანსა სცემდა მთელი საფრანგეთი.

ამბობდნენ, სეისს ძალიან კარგი კონსტიტუცია შეუდგენია და ჯიბეში უდევსო; და ჩადგან ჩვენს კონსტიტუციაში ბევრს ნაკლოვანებას ვხედავდით, სეისი ამოვირჩიეთ, — იქნება ახალი გველირსოს რამეო. ხომ იცით, გაგიჟებული ვართ ახლისთვის, სულ ახალ-ახალი ხილი გვენებავს და სეისსაც ავიტომ მივანდეთ ჩვენი ბედი.

საერო კრების წევრად ლუსიენ ბონაპარტი ავირჩიეთ... ნაპოლეონი ხომ გვყავდა, ახლა ლუსიენიც უნდა კაცად გაგვეხადა! სწორედ ბედი ეწვიათ ბონაპარტებს, რომ კორსიკის კუნძული საფრანგეთმა აიღო, თორემ ისე დაიხოცებოდნენ, რომ მათი ხსენება არსად ყოფილიყო. იქნებოდნენ თავის მამულში, ხან მშვიდნი, ხან ტიტველნი და თხებს აძოვებდნენ კლდეებში... ჩვენში კაცებად იქცნენ: ერთი საერო კრების წევრი იყო, მეორე ელჩი, მესამე გენერალი. არა, აღბად ძალიან უშნოდ და უტვინოდ გვიცნია ჩვენი თავი, რომ ჩვენი ცხოვრების გამგებლად სხვაგან მოგვიძებნია კაცები.

საერო კრება წინააღმდეგი იყო გამგეობისა და იმდენი ქნა,

რომ თავისი კაცი აარჩევინა წევრად. უნდოდა ლარევეიერი და მერლენიც გაერქვა, მაგრამ მათ საქვეყნოდ გამოაცხადეს: — ჩვენ იმისთვის გვდევნიან, რომ უნდათ საფრანგეთი ბონაპარტებს ჩაუგდონ ხელშიო! ამ სიტყვებმა იხსნა ისინი, მაგრამ დიდი ხნით კი არა: 18 თიბათვეს ისინიც გავიდნენ გამგეობიდან. ძველი წევრთაგანი გამგეობაში მარტო ბარა და რჩა, თაყვანისმცემელი შემწე ბონაპარტისა და შემარცხენელი რესპუბლიკისა. ახალმა გამგეობამ სულ თავისი მომხრე მინისტრები დანიშნა: რობერ ლინდე, ფოშე, ბერნადოტი. ამას ყველაფერს კარგად ხედავდა ხალხი, მაგრამ წინამძღოლი აღარა ჰყავდა და ვერასა ბედავდა.

შოველი ძველებურად გაიტაცა პოლიტიკამ, თუმცა არც აცრას ანებებდა თავს. კითხულობდა გაზეთებს და ლანძღავდა სეისს: — ის იმისთანა კაცია, რომ თავის პირად კეთილდღეობისათვის მთელს საფრანგეთს გასწირავსო!.. თუ მართლა კონსტიტუცია შეუდგენია, თუნდა დავიფიცავ, ისე იქნება შედგენილი, რომ მასი წრის კაცნი სარგებლობდნენ ყველაფრით! იქ ხალხისა ხსენებაც არ იქნება... აგრე რომ არ იყოს, არც ასე დამალავს, გამოაქვეყნებს და დაგვაფასებინებს! თუ მალავს, იმიტომ მალავს, რომ ყოველი პატიოსანი რესპუბლიკელი წინააღმდეგი გაუხდება.

ერთი სიტყვით, ქვეყანა მგლებს ჩაეგდოთ და სჭამდნენ! ვიღას ახსოვდა ხალხი და მისი კეთილდღეობა, თავისუფლება, თანასწორობა?

სწორედ იმ დროს მომივიდა იტალიიდან ლიზას წიგნი: საწყალს ტიბრებზე გადასვლის დროს წყალში ჩასცვენოდა რაც კი რამ ჰქონდა. კიდევ კარგი, რომ თითონაც არ დამხჩვალყო.

რომი ჩვენს საზღვარზედ იყო. მთელს ჩვენს მხარეში კაცები დადიოდნენ და ჯარისთვის აგროვებდნენ საქმელ-სასმელს, თივას და სხვ. ფასს დიდს იძლეოდნენ, მაგრამ ფულის მაგივრად ბართებს არიგებდნენ და ხალხიც მალავდა. რაცა ჰქონდა. გაძვირდა ყველაფერი, გაჭირდა ცხოვრება.

სუეოროვი თავის ჯარით და ორმოცი ათასი ავსტრიელით სენგოტარის მთას მოსდგომოდა და იქიდან გვიპირებდა შემოსევას. ყველანი განცვიფრებულნი იყვნენ, რადგან იმ სიმაღლე მთის გადმოთელვა სრულიად უგზო-უკვლოდ ჯერ აზრადაც არავის მოსვლოდა. მაგრამ სუეოროვი ჯერ არსად დამარცხებულისყო და მამაცურად მოუძლოდა თავის ჯარებს. ამბობდნენ, მთელი დღე და ღამე ცხენს აკვრიათ... ხელში ლოცვანი უჭირავს და ბრძოლის დროსაც კი წმიდათა ცხოვრებას უამბობს თავის ჯარებსო... იმისთანა კაცია, რომ სენგოტარსაც აჯობებსო... მე კი მგონია, რომ დი-

დი ნიჭი არ უნდა მთებზედ ასვლას, სოფლების დაწვას და ხალხის ელეტას. თუ ნიჭზედ მიდგა, მე ასანთის მომგონი უფრო უძლიერესის ნიჭის პატრონად მიმაჩნია, ვიდრე ყველა სუვოროვები ერთად. იმას მოგახსენებდით: ყველანი შეშინებულნი იყვნენ სუვოროვის მოახლოებით და ამბარებდნენ ციხე-სიმაგრეებს. მეფის პომზრენი კი ღვთისაგან აღთქმულ მესიასავით მოელოდნენ რუსის ჯარის შემოსვლას. სწორედ ამ დროს მომივიდა ჩემი ძველი მეგობრის ივანე სომის წიგნი:

„გამარჯვება, ჩემო მიშელ, გამარჯვება! მერე რა გამარჯვება, რომ იცოდლე! მთელი საში თვე ისე გაატარა ჩვენმა ჯარმა, რომ ფეხები ტბაში ჰქონდა და ზურგი თოვლში ამასთან შიმშილით ვიხოცებოდით. დავდიოდით სოფელ-სოფელ მშიერი მგლებივით და გამგეობას ვლანძღავდით: — ბრძანებას ბრძანებაზედ გვიგზავნის, ბრძოლა აუტეხეთ მტერსო, და იმას კი არა კითხულობს, მაძლარნი ვართ თუ მშიერი-მწყურვალნი?!... წინ ავსტრიელი ხელმწიფის შვილი გვიდგა, აქეთ-იქით გერმანელები და რუსები კორსაკოვის წინამძღოლობით, უკან აჯანყებულები... ხუმრობის გუნებაზე აღარავინ იყო, ჩემო მიშელ... კორსაკოვიც სიჩქარით მოიწევედა ჩვენსკენ და თან წმინდა ნიკოლოზს და ყველა წმინდანებს ლოცულობდა. მაგრამ ვაჯობეთ, დავამარცხეთ და წმინდა ნიკოლოზი ქვანჯრავივით გარბის მოსკოვისკენ თავისი ყავარჯენით და დახეული გუდით. რა ომი გვქონდა! როგორ დავამარცხეთ! ქვეყანა შეინძრა!

წარსულ კვირას ჯერ ისევ ბანაკში ვიყავით და — ნეტავი მალე მოვშორდეთ აქაურობასაო, — ვნატრობდით. შემოდგომის ქარი ქროდა და საყინულეებიდან ძალიან სუსხიანი სიცივე მოჰქონდა. იმისთანა მალაზე ვიყავით, რომ მკვდარი ვირი რომ გვებოვა საღმე, გავატყავებდით და შეეკვამდით. გაღმა ავსტრიელები უკანვე მიდიოდნენ და მათ ადგილს რუსები იჭერდნენ, გენერალი კორსაკოვის რუსები. გადმოდგებოდნენ გერმანელი ჯარისკაცები და დაგვცინოდნენ: „მოდით რალა, თქვე უნიფორმებო! მოდით რალა, თქვე მატლიანებო! ვერა ბედავთ განა! თქვე ლაჩრებო, თქვენა!“ ღვთის წყალობა გაქვს, ჩვენ მისვლა გვინდოდა, მაგრამ ბრძანება გვქონდა, — პასუხი არ გასცეთ, თუნდა თოფიც გესროლონო, და ჩვენც გაჩუმებულნი ვიყავით.

ბოლოს შიკრიკი მოვიდა, — სუვოროვი უკანიდან გვეპარება: სენგოტარს გადმოვა. რადგან გზაზე ძალიან მცირე ჯა-

რები გვიდგას და ვერ შეიმაგრებნო. ეს ამბავი რომ მივიღეთ, მიშელ, ერთი აზრი მოგვივიდა ყველას: ალბად, ულალატეს რესპუბლიკას, თორემ სენგოტარს როგორ გადმოატარებდნენ! კიდევ კარგი, რომ იტალიელებმა თავი მოიმკდარუნეს, სწორედ ისე, როგორც კატამ იცის: თვალს დახუჭავს და ყურებსა ცქვიტავს, — ვნახოთ, რითი გათავდება საქმეო. მეორე ღღეს დილის ოთხ საათზედ ჩვენი რაზმის წინამძღოლმა სებასტიენ ფუამ ბრძანება მოგვიტანა, ჩადით და წყლის პირი დაიჭირეთო. გაღმა რუსის ჯარი იდგა. დაგვინახეს თუ არა, მაშინვე სროლა დაგვიწყეს. სამჯერ გადავაგდეთ წყალზე ხიდი და სამჯერვე დაგვინგრის. ბოლოს, როგორც იყო, გავამაგრეთ ფიცრები და დაიწყო დენა ჩვენმა ჯარმა. ცხრა საათზედ ათი ათასი კაცი გვყავდა გაღმა. ორასი კაცი ცურვით გავიდა წყალში და ისე დაერივნენ მტერს.

ბევრი ომი მინახავს, ჩემო მიშელ, ბევრს ბრძოლას დავსწრებივარ, მაგრამ ამისთანა საზარელი კი ჩემს დღეში არა მინახავს რა. მთები იძროდნენ, დედამიწა ინძრეოდა ზარბაზნების სროლისაგან. წინამძღოლების ბრძანება ორ ნაბიჯზედაც აღარ ისმოდა. ბრძოლის ველზედ იმისთანა საშინელი კვამლი იდგა, რომ ერთმანეთს ვეღარა ვხედავდით. საღამო ეამს დავძარით კიდევ რუსები. ერთს სოფელს შეეფარნენ და იქ გამაგრდნენ. ბრტყელი შუბლი ჰქონიათ რუსებს, ჩაწყლუტილი ცხვირი, მომცრო, ვიწრო თვალები და მსხვილი ტუჩები, ერთი სიტყვით, სულ სხვაგვარი კაცნი ყოფილან, ვიდრე ჩვენ. ბრძოლაში კი ყოჩაღნი ყოფილან, სულ ველურებით იბრძვიან. დაუნდობლად ხოცავენ დამარცხებულთ... ჩვენც მივდექით და ისე ვზოცეთ, რომ მკლავები დაგვეღალა. მეორე ღღეს ციურბისში შევედით და იქ ხომ სულ სისხლის ღვარით შევსვარეთ ციურბისის ტბა. ჩვენ რომ ციურბისში შევედით, კორსაკოვი მეორე მხრიდან გარბოდა თავისი ჯარით, მაგრამ ყველამ ვერ მოასწრო გაქცევა და დიდძალი ჯარი დავიჭირეთ ტყვედ; გარდა ამისა ჩვენ დაგვრჩა მთელი მათი ბარგი და სამხედრო სამზადისი. ერთი უბრწყინვალესის თავადის კონდეს რაზმი ერია მტრის ჯარში და ისე ამოვზოცეთ წინამძღოლიდან დაწყებული უკანასკნელ ჯარისკაცამდე, რომ, ერთი რაზმის, ერთი არ გადაგვრჩენია ცოცხალი.

— ნუ მომკლავთ! შემობრალეთ, ღვთის გულისათვის! — გვევედრებოდნენ გუშინდელი ჩვენი ბატონები, მაგრამ შენდობის ნაცვლად ჩვენ ხიშტსა ვცემდით. განა ჩვენსა და იმათ

შორის შებრალებდა შეიძლება? ან სიკვდილი, ან გამარჯვება! ჩვენ ამის მეტი არა ვიცი რა. ქალაქიც ძალიან დავენგრეთ, რადგან ამას წინათ ჩვენს გაგზავნილ კაცებს თურმე სროლა დაუწყეს. ბრძოლის ველზედ ჭერეხივით ყრიან რუსები და გუშინ რომ ჩვენ დაგვცინოდნენ გერმანელები — მატილიანე-ბოო! აბა მივიდნენ და თავიანთი მეგობრები დასინჯონ... ნეტავ მაშინ რაღას იტყვიან!

მთელი ქვეყანა შესძრეს, მიშელ, ჩვენთან საბრძოლვე-ლად. აზიდანაც კი მოიყვანეს ჯარები ჩვენს დასამარცხებ-ლად და თავისუფლების დასამარხავად. მანამ ჩვენში ძველე-ბურად შეფეს არ დაინახავენ, მანამ არ მოისვენებენ ეს მხე-ცები. საქმე ეხლა იმაზე არის დანაკიდებული, ადამიანიშვი-ლები გაიმარჯვებენ ამ ბრძოლაში, თუ მხეცები.

ჩვენს რაზმს ორი აფიცირი დააკლდა გუშინდელ ბრძო-ლაში. სებასტიან ფუამ მე წარმადგინა და, ვიცი, აფიცრო-ბას მიბოძებენ. მაგრამ ეგ სულ ერთია ჩემთვის: დავბერდი, ჩემო მიშელ. რაც ხანი ვემსახურე სამშობლოს, ისიც კმარა და გათავდება თუ არა ოპი, მაშინვე ჩვენს სოფელში დავსახლ-დები... ვიდრე კვლავ ომიანობა არ დაიწყება.

უმთავრესი ნაწილი ჩვენის ჯარისა სუვოროვის დასახვედ-რად წავიდა, რომელიც სენგოტარის მთაზედ გადმოდის. ჯერ არ გვიცნობს რესპუბლიკელ ჯარებს და ასე ჰგონია, ერ-თი შებერვით ვაჯობებ და პირდაპირ პარიზისკენ დავირეკე ჩემს ყაზახებსაო. ეს კორსაკოვი ხომ გავუღახეთ! მისი რიგიც მა-ლე მოვა და მგონი ისე გავუხადოთ საქმე, რომ წმ. ნიკოლო-ზიც დავავიწყოთ და თავისი ლოცვანიც.

ბევრს გაკოცებთ ყველას, ჩემო მიშელ: პატარა პეტრეს, მარგალიტა-ქალს, მამულიშვილს შოველს და შენ, ჩემო ძვე-ლო ერთგულო მეგობარო! მოვიკითხავ ყველა კარგს პატ-რიოტს და ყველას ძმობას და გამარჯვებას ვუთვლი.

შენი ერთგული ივანე სომი“.

ციურ მანანასავით გვაამა ამ წერილმა. შოველი ხომ ისე ასია-მოვნა, რომ გამოაცოცხლა სწორედ, რადგან უკანასკნელ ხანში ცოტა არ იყოს სასოწარკვეთილება მოერია. მაშინვე სამამასახლი-სოში გაიქცა და ყველა მოხელეს წაუკითხა სომის წერილი; მერე ჩვენსა მოიწვია ყველა იაკობელი — ნათლიაჩემი, ელოფი, რაფიე-ლი, გენტი და სხვანი და იმ ღამეს იმისთანა ღზინი და მხიარულე-ბა იდგა ჩვენსა, რომ უკეთესი არ შეიძლება.

რამდენიმე დღის შემდეგ პარიზელ გაზეთებში წავიკითხეთ დაწვრილებითი აწერა ციურიხის ბრძოლისა და მის შემდეგ მომხდარი ამბებისა: სუვოროვმა გადმოვლო სენგოტარის მთა, მაგრამ ძალიან კი ეწყინა, რომ გაიგო რუსის ჯარების დამარცხება; და რადგან გარს ყოველ მხრივ ჩვენი ჯარები ერთყა, იძულებული შეიქნა უკან გაბრუნებულიყო. გზები ყველა შეკრული ჰქონდა და საშინელ მთას შეუყენა თვისი ჯარები, საყინულეებით სავსე მთას; თან ჩვენები მისდევდნენ და საცა კი იმას გაევილო, ყველგან მრავლად ეყარნენ მკვდრები და დაჭრილები. გერმანიაში შესვლამდე ერთხელ კიდევ დამარცხდა რუსის ჯარი და საშინლადაც დამარცხდა. ათასრვაასი ტყვე ვიშოვეთ მაშინ, რომელთაგანი რვაასი დაჭრილი იყო, რუსთაგან უპატრონოდ დატოვებულნი; ასი ზარბაზანი, ცამეტი ბაირალი, ოთხი გენერალი ტყვე, ხუთი გენერალი მოკლული. ყველა ამას თან მოჰყვა ჩვენი ჯარებისაგან კვლავ აღება გლარისისა და სენგოტარისა. ბერნი უკვე დამარცხებული გეყავდა.

იმავე გაზეთებში აწერილი იყო ჰოლანდიაში ჩვენი ჯარებისაგან დამარცხება ინგლისელების და რუსებისა. რესპუბლიკას შიში აღარაფრისა ჰქონდა.

ამ ამბების გვერდით გაზეთებში მოხსენებული იყო, რომ გენერალი ბონაპარტი უკვე მობრძანდა ეგვიპტიდან და პარიზს მიეშურებო.

უნდა გენახათ, რა გულიანად იცინოდა შოველი, ეს რომ წაიკითხა!

— ვერ დაუჯდა კოჭი აღჩუს, ვერა! — იძახდა შოველი. — კაცი ეგვიპტიდან მოეშურებოდა რესპუბლიკის საშველად და რესპუბლიკას კი სრულიადაც არა უჭირს რა საამისო. რამდენს ინანებდა, ნეტავი არ დამეგვიანაო! ნუ თუ ეხლაც არა სთხოვენ ანგარიშს! არა, ამაზედ მეტი უგუნურება შეიძლება? საუკეთესო ჩვენი ხომალდები იმას მივეციო; საუკეთესო, ბრძოლებში გამოცდილი ჩვენი ჯარი — ოცდათხუთმეტი ათასი კაცი — იმას მივეციო; ზარბაზნები, თოფ-ბაირალი, ყველაფერი, რაც კი უნდოდა და არ უნდოდა, ყველა თან გავატანეთ. და ის კი მოსულა მარტოდმარტო, ხელები ჯიბეში ჩაუწყვია და გაიძახის: სუყველაფერი სრულად არის... იქ არის... წადით და იქა ნახეთო! ამისთანა სამარცხვინო, უმაგალითო საქციელმა თუ თვალი არ აუხილა ერს, მაშ სულაც ბრმა ყოფილა. ოცდათხუთმეტი ათასი კაცი დასტოვა ღვთის ანაბრად ეგვიპტეში, ოცდათხუთმეტი ათასი ოჯახი დააობლა; ზოგს მამა დაუკარგა, ზოგს

შვილი, ძმა, ქმარი. განა პასუხს არ მოსთხოვენ დაობლებულნი? არა ჰკითხავენ: რა უყავი ჩვენი შვილებიო? თუ კი შენ აქა ბრძანდები, რომელსაც გებარა იმდენი ხალხი, თუ კი შენ სალსალამათი დაბრუნდი, ისინი რაღად დასტოვე იმ უდაბნოშიო? არა, ახლა კი უნდა მოვთხოვოთ ვრცელი ანგარიში, თორემ გათამამდება და კისერზედ წამოგვაჯდება. რაც უნდა სულმდაბალნი და მხდალნი იყვნენ ჩვენი გამგეობა და საერო კრება, მაინც ხმა უნდა ამოიღონ და თავისი მიუტრწყან ამ წათამამებულ სალდათს.

მართალი რომ სთქვას კაცმა, არცა სტყუოდა შოველი. ბონაპარტმა თითონვე სთქვა შემდეგში, — კლებერი რომ ნებადაურთველად დაბრუნდეს ეგვიპტიდან, მარსელშივე დავაჭერინებ, სამხედრო სამართალში მივცემ და 24 საათის განმავლობაში დავახვრეტინებო. რომ უფრო კარგად დაგიხასიათოთ ბონაპარტი, ისიც უნდა მოგახსენოთ, რომ მთელი ჩვენი ჯარი ეგვიპტეში ბონაპარტს ებარა და პასუხისმგებელი მარტო ის იყო. მიუხედავად ამისა, მაინც თავი მიანება ყველას; კლებერს, თავის მოადგილეს, არც კი აცნობა წამოსვლა, და კისერზედ მოახვია ყოველი პასუხისგება იმ დროს, როდესაც საფრანგეთის ბედი ბეწვზედლა ეკიდა. და თანაც იძახდა, კლებერი რომ ასე მოქცეულიყო, 24 საათში დავახვრეტინებდიო. ამ სიტყვებით საქმარისად ჩანს, რამდენად უსამართლო და უმართებულო უნდა ყოფილიყო ნაპოლეონი. იქნება ფიქრობდა, რაც მე მეპატივება, კლებერს არ ეპატიებაო? მე უფრო მეტი უფლება მაქვს, ვიდრე იმასაო? არა. ამას ვერ იფიქრებდა, მაგრამ ის კი კარგად იცოდა, რომ მთელს საფრანგეთში ვერავინ იქნებოდა იმისთანა ბარბაროსი, რომ ისე უჯიათად დაესაჯა იგი, როგორც ის კლებერს უპირებდა.

შოველი იძახდა, ანგარიშს მოსთხოვენო, მაგრამ გაუცრუვდა იმედი: სწორედ იმ დღეს, როდესაც გაზეთებში დაბეჭდილი იყო ციურჩხის ბრძოლა და რუსებისა და გერმანელების დამარცხება, სწორედ იმ დღეს, როდესაც ციურჩხის გამარჯვებული ჩვენი მხედართმთავარი, გენერალი მასსენა, გამგეობას უტყუარს მოხსენებას უგზავნიდა ბრძოლისას, სწორედ იმ დღეს გაზეთებში ხსენებაც არ იყო იმისი, ვინც ციურჩხის ბრძოლით საფრანგეთი დაღუპვისაგან იხსნა; გენერალი მასსენასის ხსენებაც არ იყო და ბონაპარტისა კი იმისთანა ქება-დიდება ეწერა, თითქო მის სახელის გაგონებაზედ გაქცეულიყოს მტერი. ბონაპარტს ყოჩაღი ძმები ჰყავდა — იოსები, ლუი და ლუსიენი და ღვთის წყალობა გაქვთ, ისინი გაზეთებში ნაპოლეონის ქებას აწერინებდნენ! მანამ ის ეგვიპტეში ბრძანდებოდა, ისე გაზეთს ვერ აიღებდით, რომ პირველსავე გვერდზე ნაპო-

ლენ ბონაპარტის ამბავი არა გცემოდათ თვალში; კედლებზე მრავლად გაკრული განცხადებანი ხომ სათქმელიც არ არის. „გენერალი ბონაპარტი ამ თვის 17 მობრძანდა ფრეიუსს. თან ახლდნენ გენერლები ბერტიე, ლანი, მარმონი. მიურატი, ანდრეოსი და მამულიშვილნი მონჟი და ბერთოლე. დიდი ხალხი მიეგება წინ. ეგვიპტეში მყოფი ჩვენი ჯარი ძალიან კარგად ყოფილა“.

„ძნელი სათქმელია, რა სიხარულით მიიღო წუხელ საზოგადოებამ თეატრებში ნაპოლენ ბონაპარტის მოსვლის ამბავი. — რესპუბლიკას გაუმარჯოს! ბონაპარტს გაუმარჯოს! — იძახდნენ ერთხმად ყველანი და თან ტაშს უკრავდნენ ალტაცებულნი. ნეტარებისაგან გახელებულს გავდა ყველა. აქამდე გამარჯვება თან ახლდა ბონაპარტს, უკანასკნელად კი წინ უსწრო და ახლა გაქცეულ მტერს თუ გამოუყენებს თავის საყვარელ გმირს, რომ საუკუნოდ ჩააკვლევინოს ჩვენზედ აშლილი მტერი. რა სასიამოვნო ამბები მიუვა ინგლისს, ორ-ორი ერთად: რუს-ინგლისელების დამარცხება პოლანდიაში და ნაპოლენის დაბრუნება. ინგლისს ის ერჩივნა, ერთი სამჯერ დამარცხებულიყო და ნაპოლენის სახელი კი აღარ გაეგონა“.

და იქვე ერთად ერთი სტრიქონი იყო:

„გენერალი მორო მოვიდა იტალიიდან“.

მორო ეგვიპტიდან კი არ მოდიოდა, რომ მისი ქება-დიდება დაებეჭდათ! მას სხვასავით ღვთის ანაბარად კი არ მიეტოვებინა თავისი ჯარი!.. ის პატიოსნად ასრულებდა თავის ვალდებულებას და აბა რა საქმები იყო? რას იზამთ, საფრანგეთს პატიოსანი მოღვაწენი კი არა, მარტო თინთლიბაზები უყვარს!

მეორე ღღეს ეწერა:

„ბონაპარტი თავისას ჩამოხტა. ღღეს გამგეობას ნახავს“.

მას შემდეგ:

„გუშინ შუადღისას ბონაპარტმა გამგეობა ნახა. მრავალი ხალხი მოგროვილიყო გზაში და თვით სასახლეშიც მის სანახავად. გენერალმა რამდენსამე ჯარისკაცს მეგობრულად ჩამოართვა ხელი, ისინიც იტალიაში ყოფილიყვნენ მის ჯარში. გენერალს თმა გაუკრეჭია: ამ ერთი წლის განმავლობაში ეგვიპტის სიცხეს თავისი ელფერი დაუღვია. გამგეობის შემდეგ გენერალმა მინისტრები ნახა და სხვათა შორის მინისტრი კანონმდებლობისა:“.

ცოტა ხანს უკან უფრო კარგი ამბები მოგვიტანეს გაზეთებმა:

„ლუისიენ ბონაპარტი არჩეულ იქმნა საერო კრების თავმჯდომარედ“. ან კიდევ: „გუშინწინ გენერალი ბონაპარტი სადილად გამგეობის თავმჯდომარე გოიესთან ბრძანდებოდა. ყველამ შენიშნა, რომ უფრო ჰკითხავდა, ვიდრე, თითონ ლაპარაკობდა. ვილაცამ

პითხა: ჩვენი სწავლა-განათლებისა რა უფრო გაუკვირდათ ეგვიპტელებსო? ამაზე ბონაპარტმა უპასუხა: — ის, რომ ესვამთ და ვკამთ ერთს და იმავე დროსო“.

და სხვა და სხვა — მთელი ერთი თვის განმავლობაში აღარც მასსენა მოგვეგონებია, აღარც სუვოროვი, აღარც რუსები და ინგლისელები! ყველა გაზეთები პირველი სტრიქონიდან უკანასკნელამდე მარტო ნაპოლეონის ამბებსლა წერდნენ: იმის ბრძოლას ეგვიპტეში, სხვადასხვა ქალაქების აღებას, იმის პროკლამაციებს.

მართალია, ჩვენ საუკეთესო ხომალდები ბონაპარტს ვანაცუაღეთ; მართალია, გაგებული გვექონდა, რომ ბონაპარტს სწორედ რომ ეწამებინა უბედური იაფელები, ისე თურმე აიკლო ქალაქი და დახოცა მცხოვრებნი; მართალია, ვიცოდით, რომ დაღლილ-დაქანცულ ჩვენს ეგვიპტელ ჯარს ჭირი შესდგომოდა და მუსრს თურმე ავლებდა; მაგრამ აბა ეს რა სათქმელი იყო, როცა ბონაპარტი სალსალამათი დაგვიბრუნდა?

ვინც იცოდა, უჯობდა და ჩუმად იყო; ხალხი კი ტაშს უკრავდა თინთლიბაზებს. ხალხის სიბრყვე და საზარელი უვიცობა; სულმდაბლობა მწერლობისა, რომელიც იმას უკმევს გუნდრუქს, ვინც თაფლის გუდაში ჩააყოფინებს ხელს; სიმდაბლე და სიმხდალე ბრბოსი, რომელსაც ცხოვრება არ შეუძლია უბატონოდ; პირადი სარგებლობით დაბრმავება იმ უგუნურთა, რომელთაც სამშობლო ქადად გაუზნიათ და ცდილობენ, რაც შეიძლება მეტი მოიტეხონ. — ყველა ამას გნებავთ ბედი უწოდეთ, გნებავთ ნიჭი, სულ ერთია; ყველა ეს მიზეზები რომ შეერთდებიან, ერს ვინმე მოხერხებული წამოაჯდება კისერზედ და ზიზლით და სიძულვილით აღსავსე მათრახის ცემით დააჯილდოებს თავის თავყანისმცემლებს.

ხალხს სალოცავად გაეხადა ბონაპარტი. ერთი თვე არ იყო ჯერ, რაც ეგვიპტიდან დაბრუნდა, რომ „მოამბეში“ პროკლამაცია წაევიკითხეთ ბონაპარტისა, რომლითაც იგი აცნობებდა საფრანგეთს, — საერო და უფროსთა კრება მრავალი მიზეზისა გამო, კონსტიტუციის 102 და 103 მუხლის ძალით, გადაყვანილ იქნენ პარიზიდან სოფელ სენკლუში. საერო კრების წევრთა სხვაგან სადმე შეკრება და სჯა აკრძალულია, როგორადაც უკანონო... ამ დადგენილების აღსრულება უფროსთა კრებამ მე მომანდო, — სწერდა ნაპოლეონი, — და იმედი მაქვს, თუ საჭიროება მოითხოვს, ყველა ჯარები და მამულიშვილნი დამეხმარებიანო.

„უფროსთა კრებამ დამავალა ყოველი ღონისძიება ვიხმარო, რათა საერო კრების თავისუფლად ბჭობას ხელს არა უშლიდეს რა; ამისთვის უმთავრესად საჭირო იყო პარიზიდან გა-

ყვანა კრებისა. უფროსთა კრება დარწმუნებულია, რომ ყოველი პატიოსანი პატრიოტი მოგვემხრობა ჩვენ და მით შეგვაძლებინებს დავამყაროთ რესპუბლიკა მკიდრო და ურყევ საფუძველზედ, რომელიც განამტკიცებს თავისუფლებას და საყოველთაო კეთილდღეობას... რესპუბლიკას გაუმარჯოს!”

ბონაპარტი.

ნამდვილთან სწორეაო, — ხელს აწერდა ალექსანდრე ბერტიე. ამას მოსდევდა პროკლამაცია ჯარისადმი:

„ჯარისკაცნო! უმფროსთა კრებამ, თანახმად კონსტიტუციის 102 და 103 მუხლისა, მე მომანდო გამგებობა ქალაქისა და ჯარისა.

მეც მივიღე ეს მონდობილება, რომ შეძლებისადაგვარად გავუადვილო კრებას განზრახვა, რომლითაც იგი ხალხის ბედნიერების და კეთილდღეობის დამყარებას ზრუნავს. რესპუბლიკას ცუდად განაგებენ აგერ ორი წელიწადია. თქვენ ფიქრობდით, რომ მოვიდოდი და ბოლოს მოვუღებდი ამდენს უბედურებას. თქვენ აღტაცებით მიეგებენით ჩემს დაბრუნებას და მით მატვირთეთ ეს ძნელი ვალდებულებანი. მე კეთილსინდისიერად ვზიდავ ჩემს ტვირთს, ოღონდ თქვენც არა ნაკლები მეცადინეობით, ვაჟაკობით და ნდობით უნდა დაეხმაროთ თქვენს გენერალს, რომელიც ყოველთვის ერთგული მონა ყოფილა სამშობლოს კეთილდღეობისა. თავისუფლება, გამარჯვება და მტრებთან მორიგება კვლავ აამაღლებენ რესპუბლიკას იმ ხარისხამდე, რომელიც საფრანგეთს უწინ ეჭირა ევროპაში და რომელიც დავაკარგვინა დაუდევრობამ და ღალატმა.

გაუმარჯოს რესპუბლიკას!”

ბონაპარტი.

ვერა კალამი ვერ ასწერს, რა გაკვირვებული ვკითხულობდით ამ პროკლამაციებს. სრულიად დამშვიდებულნი ვიყავით ყველანი, რადგან რესპუბლიკამ სამარცხვინოდ დაამარცხა თავისი მტრები ჯერ ციურიხში და მერე პოლანდიაში, და უცხად, სრულიად უსაფუძვლოდ ბონაპარტი აცხადებდა თავის პროკლამაციაში, რომ რესპუბლიკას ის ადგილი აღარ უჭირავს ევროპაში, რომელიც საფრანგეთს შეშვენისო და... მე ავამაღლებ მას და ძველებურ დიდებას მოვფენო. ეს იმისთანა სიცრუე იყო, რომ სულ უტვინონიც კი მახვდნენ. ამას ზედ ერთოდა საერო და უფროსთა კრების გადატანა სოფელში, სადაც ისინი ნაპოლეონის ყურმოჭრილ ყმად უნდა გამხდ-

რიყვენს, და ის დაედგინათ, რასაც ეს სალდათი უბრძანებდა. ღალატი ცხადი იყო და პატრიოტების აღშფოთებას საზღვარი არა ჰქონდა; დარწმუნებულნი ვიყავით, რომ ამას კი აღარ მოითმენდა პარიზელი ხალხი, აჯანყდებოდა და ჭკუას ასწავლიდა ბონაპარტს. ჩვენი მეგობრები თითო-თითოდ იკრიბებოდნენ ჩვენს სამკითხველოში და თან იმედიანად გაიძახოდნენ:

— ახლა აჯანყებული უნდა იყვეს პარიზელი ხალხი!

შოველი კი დაღონებული, თავდაღუნული ბოლთასა სცემდა და მწარე ღიმილით უპასუხებდა:

— „პარიზელი ხალხი ახლა სრულიად დამშვიდებულია. პარიზი სიამოვნებით უყურებს ბონაპარტის ბრწყინვალე ამალას და არის თავისთვის ჩუმად. ან რად აჯანყდება, რისთვის, როდესაც კარგად იცის, რომ მთელი საფრანგეთი ბონაპარტს შესტრფის და „ბონაპარტს გაუმარჯოსო“ იძახის. რისთვის ან ვისთვის უნდა გასწიროს თავი პარიზელმა ხალხმა? რას ჰკარგავს, რომ საბუთი მაინც ჰქონდეს აჯანყებისა? რაღა აქვს ხალხს? კონსტიტუციამ ყოველი მოქალაქეობრივი უფლება წაართვა და თქვენ გინდათ, რომ სწორედ ამ კონსტიტუციის დასაფარავად აიშალოს ხალხი? არა! მე ნათლად ავიხსენით დღევანდელს ჩვენს ყოფას: დღეს ბრძოლა შემძლებელთა და ჯარსა აქვთ ერთმანეთში. აქ ხალხი რა შუაშია! მართალია, ჯარი ყოველთვის ხალხისკენ იქნება, ჯარი ხალხის ღვიძლი შვილია, და ვინც ხალხის მომხრე ყოფილა, ჯარიც თავისკენ ჰყოლია; ამით აიხსნება, რომ კონვენტს ყოველთვის ერთგულად ემსახურებოდნენ ჯარები, თუმცა არც ჯამაგირი ეძლეოდათ ხეირიანად და არც საჭმელ-სასმელი; საყვარელმა გენერლებმაც კი ვერ გაიყოლეს მაშინ ჩვენი ჯარისკაცი, რადგან ცხადად ხედავდა, რომ კონვენტი ხალხის მომხრე იყო და ის გენერლები კი ხალხის მტრები. ბონაპარტი კი არა, ათი ბონაპარტიც რომ გვეყოლოდა მაშინ, მაინც არ უღალატებდა ჯარი რესპუბლიკას, რადგან მაშინ რესპუბლიკაზე იყო დამოკიდებული ჯარისკაცების და მათი ცოლშვილის, ნათესაების, მეგობრების და ერთობ ქვეყნის კეთილდღეობა. ღმერთმა ჰკითხოთ ყირონდღეებს! „ვაკელეზი“ მიიყვანეს და ისე მოაგვარეს საქმე, რომ ხალხი ორად გაჰყვეს: ერთ მხარეს შემძლებელნი გავიდნენ—ბურჟუაზია და მეორე მხარეს შეუძლებელნი; მერე იმ გვარად შეადგინეს კონსტიტუცია, რომ ხალხის შეუძლებელ ნაწილს ყოველი მოქალაქეობრივი უფლება წართმევოდა და ქვეყნის მართვა

მარტოდმარტო შემძლებელთ დარჩენოდათ. მას შემდეგ დღითი დღე იზრდება და პატულობს ბურჟუაზიასა და ხალხს შორის უთანხმოება. ტყუილადღა ვიძახით — „საფრანგეთის რესპუბლიკა ერთი და განუყოფელიო!“ დიდი ხანია გაყოფილია რესპუბლიკა. ბურჟუაზიას თავისი ინტერესები აქვს და ხალხს—თავისი. ამ ორთა შუა დღეს ჯარი ჩამდგარა და ბატონობაც იმას დარჩება. ჯარი შემთხვევასღა ელოდა და შემთხვევაც მისცა გამგეობის წევრმა სეისმა: აგერ ექვსი თვე სრულდება, სულ იმას გაიძახის, იაკობელები რესპუბლიკის წინააღმდეგ შეთქმულანო. მე ჩემს დღეში არავინ მინახავს იმისთანა უმსგავსი და ამოებით სავეე კაცი, როგორც სეისია; ჭირივით სძულს ხალხი, რადგან ხალხს უყვარს ნათლად, ცხადად და ამასთან მარტივად გამოთქმული აზრი, და ვერა გაუგია რა სეისის ჯანყითა და ბურჟუსით მოცულ აზროვნებაში“.

„ხალხმა ძალიან მალე დაივიწყა იგი და შემძლებელნი კი ყოველთვის პატივისცემით და მოწიწებით ეკითხებოდნენ: „რა ექნათ, მამაო? როგორ გავუძღვეთ საქვეყნო საქმეს?... რატომ არას ბრძანებთ, მამაო!? თუ თქვენც აგრე დადუმდებით, მაშ ვიღას დავეკითხოთ?...“ დიად, ხალხსა და მის წარმომადგენლებს აღარც კი აგონდებოდათ მღვდელი სეისი, და უიმისოდ, ბევრში მის საწინააღმდეგოდაც დაამყარეს რესპუბლიკა და ის კონსტიტუცია, რომელმაც ხალხი ჩვენი ცხოვრების ბურჯად და დედებოდად აღიარა. ეს ყველაფერი უიმისოდ გაარიგეს ხალხის წარმომადგენლებმა, ერთხელ არაფერს დაჰკითხვიან და, რასაკვირველია, რომ იმისთანა ამოთავმოყვარეობით გატაცებული კაცი ხალხს მოსისხლე მტრად გადაჰკიდებოდეს“.

„შემდეგში უფროსთა კრებაში მოექცა და იქ კპოვა თავისი მეგობრები, რომლებსაც ეწინოდათ ხალხისა და, მაშასადამე, ისევე სძულდათ ხალხი, როგორც მას. მათდა დასამშვიდებლად ბურჟუაზიამ გაიმარჯვა და ახალი კონსტიტუცია იმ განზრახვით იქნა შედგენილი, რომ ბატონობა და პატრონობა შემძლებელთ დარჩენოდათ... მაგრამ ესეც არ იკმარა სეისმა, და ისე მოაგვარა საქმე, რომ, თითონ იქმნა არჩეული გამგეობის წევრად და მაშინვე თავისი ბეჭედი დაასვა ჩვენ ცხოვრებას: პატრიოტული გაზეთები აკრძალა, მათი რედაქტორები და გამომცემლები კალედონიაში გავზახნა, კლუბები დააკრტინა, იაკობელებს დევნა დაუწყო. აკი მოგახსენეთ,

აგერ ექვსი თვე სრულდება, სულ იმას იძახიან, რომ იაკობელები შეთქმულან რესპუბლიკის საწინააღმდეგოდო! იაკობელები კი არ შეთქმულან, თავისივე ოცნებით შეთხზულ შეთქმულობით სარგებლობს სეასი და თავიდან იშორებს, ვინც არ მოსწონს და ვისიც ჯაგრი სჭირს. მაგრამ ეგეც არ იკმარა: კონსტიტუცია შეუღგენია ჩვენი რესპუბლიკისთვის და ჯიბით ატარებს. და რადგან ის კონსტიტუცია სრულიადაც არ შეფერება ჩვენს აზრებს და შეიძლება ხალხმა დაიწუნოს და არ მიიღოს იგი, საჭიროა კარგი მამაცი გენერალი, რომ ხალხს ქვეა ასწავლოს და ძალად მიაღებინოს. ჯერ გენერალი ბოროტ სინჯა, ბერნადოტი; მერე ყობერი, მაგრამ ყობერმა თქვენი ქირი წაიღო. ამ დროს ბონაპარტიც დაბრუნდა ეგვიპტიდან. ბონაპარტი ყველაფერში ეთანხმება სეასის კონსტიტუციას... ბონაპარტი იარაღს იხმარს და თუ გაჭირდა ძალით მიგვადებინებს სეასის კონსტიტუციას... სხვა კი არა უნდათ რა სეასს და მის მეგობრებს. შენთვის დაგვიმორჩილება საერო კრებაო, ეუბნებიან ბონაპარტს და ბრძანებას აძლევენ—სოფელ სენკლუსში გადაიტანე, რომ თუ გაჭირდა, პარიზელი ხალხის იმედი აღარა ჰქონდესო! საერო კრება ხელშეკრული მისცეს ბონაპარტს. ბონაპარტსავე მისცეს მხედარმთავრობა საერო კრების მცველი ჯარისა, მიუხედავად იმისა, რომ ეს წინააღმდეგია კონსტიტუციისა. დანარჩენს ხვალ ვნახავთ. მე რომ მკითხვით, თუ კარგად წაიყვანეს საქმე და თავიანთ წადილს მიაღწიეს, ბონაპარტს და ჯარს უნდა გადაუხადონ რითიმე ჩვენმა შემძლებელმა ძმებმა ეს სამსახური და რით გადაუხდიან, თუ თვით მართებლობაში არ დაუდეს წილი? ხვალ ბურჟუაზია იქნება ჩვენი ბატონი და ბურჟუაზიასთან ერთად სალდათიც!“.

თუმცა იძახდა, დიდი ხანია ვიცოდი, რომ მახეში გაგვამდნენო, მაგრამ მაინც ძალიან გაჯავრებული იყო შოველი: არ მეგონა, რომ იმისთანა დროს მოგვიხერხებდნენ ამას, როდესაც გამარჯვებულმა რესპუბლიკამ საუკუნოდ დააფრთხო თავისი მტრებიო. თუნდა მომკლან, მაინც ვიტყვი, რომ სეასი რომ არა ყოფილიყო, ბონაპარტი, მიუხედავად უზომო თავხედობისა და გამბედაობისა, თავის დღეში ვერ გვიგდებდა ამ ხრიკს. მღვდელმა სეასმა მოამზადა ყოველიფერი და ბონაპარტმა ასრულა მისი განზრახვაო.

მეოთხე დღეს იმდენი ხალხი მოაწყდა ჩვენს სამკითხველოს, რომ რამდენსამე წუთში სულ გაიყიდა გაზეთები. სამკითხველოში შეიკრიბნენ ჩვენი მეგობრები, ერთი თხუთმეტიოდე კაცი და ისე

წავიკითხეთ 10 გიორგობისთვის ს. სენკლუში მომხდარი საერო კრების ამბავი. საერო კრების თავმჯდომარედ ლუსიენ ბონაპარტი ბრძანდებოდა. აი, რა ეწერა გაზეთებში:

„კრება გაიხსნა ორის ნახევარზედ. მდივანმა მოახსენა კრებულს განაჩენი წარსული სხდომისა.

გოღენი. მამულიშვილნო, უფროსთა კრებამ თავისი დადგენილებით პარიზიდან სოფელში განდევნა კანონმდებელი კრება. ამ სასტიკ ღონისძიებას უფროსთა კრებამ იმიტომ მიმართა, რომ სამშობლო განსაცდელში ეგულებოდა. თქვეს კიდევ, შეთქმულან რესპუბლიკის მტერნი და მიწის პირიდან აღგვას უქადიანო; საჭიროა, დავასწროთ, ყოველი იმედი წავართვათ რესპუბლიკის გაუქმებისა და არ შევარყევინოთ საფრანგეთის და მასთან ერთად მთელი ევროპის მყუდროებაო...

გოღენმა ამგვარადვე განაგრძო სიტყვა და ბოლოს წინადადება შეიტანა, კომისია ავირჩიოთ და დავევალოთ, გამოიკვლიოს და მოგვახსენოს, რა მდგომარეობაშია დღეს რესპუბლიკა და რა ღონისძიებანი ვინმართ, რომ განსაცდელი ავაცდინოთო. მაგრამ სიტყვა არ გაათავებინეს:

დელბრელი. ჯერ კონსტიტუცია...

გრანმეზონი. ნება მიბოძეთ, მოგახსენოთ...

დელბრელი. კონსტიტუცია, ანუ სიკვდილი! ჩვენ ჯარისა არ გვეშინია! ჩვენ აქ თავისუფალნი ვართ!

რამდენიმე ხმა: ჩვენ დიქტატორები არ გვინდა! დაიკარგენ დიქტატორები!

მრავალი ხმა. კონსტიტუციას გაუმარჯოს!

დელბრელი. ხელახლა შევფიცოთ კონსტიტუციას ერთგულება.

ხმები აირევიან. კრების წევრები აიშლებიან. კვლავ ისმის ძახილი: დაიკარგენ დიქტატორები!

თავმჯდომარე ლუსიენ ბონაპარტი. მე მოვალე ვარ, დავიცვა ღირსება საერო კრებისა და ნებას არავის მივცემ ასეთი მღელვარება და მუქარა შემოიტანოს ჩვენს ბჭობაში. მე ვაზხოვ კრების ერთ ნაწილს წესიერება არ დაარღვიოს.

გრანმეზონი. ერის წარმომადგენელნო, საფრანგეთი განცვიფრებული დარჩება, როდესაც გაიგებს, რომ კრებული ერის წარმომადგენელთა უფროსთა კრების დადგენილებისამებრ განდევნილ იქმნა დედაქალაქიდან სადღაც სოფელში და განდევნილ იქმნა ისე, რომ ჯერ არავინ იცის, რა განსაცდელის ასაცდენად იყო საჭირო ამისთანა უმაგალითო განკარგულება. აქ ბრძანეს, კომისია

დავნიშნოთ და იმას დავევალოთ გამოიკვლიოს, რა ღონისძიებანი უნდა ვიხმაროთ, რომ განსაცდელი ავიცილინოთ. კომისია მაგისტვის კი არა, უფრო იმიტომ უნდა ამოვიჩინოთ, რომ გამოიკვლიოს, რა საშუალებანი იხმარა დღემდე, ვისიც ჯერ იყო, განსაცდელის ასაცდენად.

გრანმეზონმა სიტყვა ასე გაათავა:

„ათი წელიწადია თავისუფლებისთვის იბრძვის საფრანგეთი; მთელი ევროპა თავისი სისხლით მორწყო თავისუფლების მოსაპოვებლად. შევიფიცნეთ, ერის წარმომადგენლნო, და უკანასკნელ სისხლის წვეთამდე ვეწინააღმდეგოთ ყოველგვარ მტარვალობის დამყარებას. მეფე ერჰმევა მას, თუ დიქტატორი, სულ ერთია.

მ რ ა ვ ა ლ ი ხ მ ა. აგრე იყოს! აგრე იყოს! რესპუბლიკას გაუმარჯოს! კონსტიტუციას გაუმარჯოს!

როდესაც შეიფიცნენ ერის წარმომადგენლნი, ბიგონემ თქვა:

— ჩვენ მიერ განახლებული ფიცი, მამულიშვილნო, დაუვიწყარი დარჩება ისტორიაში. დღევანდელი ჩვენი ფიცი უნდა მოგაგონებდეთ საერო კრების პირველად გაფიცვას, როდესაც ერის წარმომადგენლთ იარაღით ემუქრებოდნენ მეფის ჯარები; როდესაც საერო კრების წევრთ ბინა ვერ ეპოვათ, რომ ბჭობა დაეწყოთ. დღეს ჩვენდა საბედნიეროდ, თავისუფლებისთვის მებრძოლი ჯარი რესპუბლიკისკენ არის...

ხ მ ე ბ ი. აგრეა, აგრე!

ბ ი გ ო ნ ე. ჩვენ ფიცს მნიშვნელობა არ ექნება, თუ უფროსთა კრებას არ შევატყობინეთ იგი და ამასთანავე არა ვთხოვეთ, რომ გვაცნობონ, რა მიზეზებმა გამოიწვია საერო კრების სოფელში განდევნა.

კრება დიდად აღელვებული იყო. ამ დროს გამგეობის წევრის ბარასს მოხსენება მოუვიდა თავმჯდომარეს.

აი, რას სწერდა საერო კრებას ის შერცხვენილი:

ერის წარმომადგენლნო!

საზოგადო საქმეში მე იმიტომ ვიღებდი მონაწილეობას, რომ შეძლებისდა კვალად დავხმარებოდი თავისუფლების დამყარებას. გამგეობის წევრის, ესე იგი რესპუბლიკის პირველი მოხელის თანამდებობა იმიტომ ვიტვირთე, რომ დამეფარა იგი განსაცდელისაგან. დღეს აღარავითარი განსაცდელი აღარ მოელის რესპუბლიკას და აღარც ჩემს სამსახურს საჭიროებს იგი. დღეს რესპუბლიკას იმისთანა დიდებული პატრონი გამოჩენია, როგორიც არის ძლევაშოსილი გენერალი ბონაპარტი, რომელსაც ყველგან და ყოველთვის წინ უძღვის დიდება, და რომელიც, ჩემდა საბედნიეროდ, მე დავაყენე

დიდების გზაზედ. უფროსთა კრების უკანასკნელმა დადგენილებამ, რომელმაც იმოდენა შუქი მოჰფინა ბონაპარტს და იმოდენა ნღობა აღმოუჩინა მას, მე დამარწმუნა, რომ რესპუბლიკას ყოველი გაჭირვება და განსაცდელი დაუჯაბნია და თავისუფლებას აღარაფრის შიში აღარა აქვს...

ეს ხანგრძლივი ბკობა და კამათი საერო კრებისა, ეტყობა, მოსწყინდა ბონაპარტს, უეჭველია, საერო კრების დარბაზში თვისი ჯაშუშები ჰყავდა, რომლებიც სიტყვასიტყვით ატყობინებდნენ ყველაფერს. სწორედ იმ დროს, როდესაც ერის წარმომადგენელი გრანმეზონი მოახსენებდა კრებას, — გამგეობის წევრის ბარბაას სამსახურიდან გასვლა მე როგორღაც საეჭვოდ მიმაჩნია, რადგან შეიძლება ძალა დაატანეს და ისე მოაწერინეს ხელი ამ ქალაქისუფროსად, — უტბად საშინელი ხმაურობა გაისმა და ყველანი დიდი კარისკენ მიბრუნდნენ, სადაც უკვე შემოდოდა გენერალი ბონაპარტი თავისი ამალით და ჯარისკაცებით. მაშინ ფეხზედ წამოდგა მთელი კრებული, აღშფოთებული ამ სალდათის საქციელით, რომელიც ასე თავხედურად ბედავდა კანონმდებელი კრების დარბაზის კარის შეღახვას, და ერთხმად შეჰყვირა:

— აქ რა გინდათ თქვენ? რა უნდათ აქ ჯარისკაცთ?!

ბევრნი წინ გადუდგნენ ბონაპარტს, საყულო დაუჭირეს და გარეთ აგდებდნენ. სხვები კი თავიანთ სკამებზე ასულიყვნენ და ყვიროდნენ:

— კანონის მფარველობა მოვეუსპოთ მაგას! კანონის გარეშე მყოფად გამოვაცხადოთ!

ამ საშინელმა სიტყვებმა ფერი უცვალეს ბონაპარტს, სწორედ ისევე, როგორღაც რობესპიერს. ამბობენ, გული შეულონდა და თავისმა ოფიცრებმა ძლივსღა შეიმაგრესო. მაგრამ ამ დროს საერო კრების დარბაზში შემოვარდა გენერალი ლეფევერი, ერთი გაუთლელი სალდათი, რომელსაც თავის მხედართმთავრის იქით არა სწამდა რა ქვეყანაზე, და შეჰყვირა მის უკან მომავალ ჯარს:

— ბიჭებო! ვუშველოთ ჩვენს გენერალს!

საერო კრების დარბაზი ჯარით აივსო.

საშინელი ღრიანცელი ატყდა. თავმჯდომარე ლუსიენ ბონაპარტი, თითქო შერცხვა თავის ძმის საქციელისო, დამშვიდებას სთხოვდა კრებას და საშინელი ხმითა ყვიროდა:

— აგრე რად ახსენით, წარმომადგენელნო, გენერლის შემოსვლა ჩვენს დარბაზში! განა არ შეიძლება, გენერალი იმიტომ მოსულიყოს, რომ საერო კრებისთვის საჭირო და აუცილებელი რან

ცნობანი შეეტყობინებინოს საზოგადო საქმის შესახებ? მე დარწმუნებული ვარ, რომ თქვენგანს ეჭვი არავისა აქვს...

ე რ თ ი წ ე ვ რ ი. ბონაპარტი ანდერჰი აუგო დღეს თავის დილებას!

მ ე ო რ ე. რომელი მეფე მოგვექცეოდა აგრე ურცხვად?

მ ე ს ა მ ე. შემოიყვანონ ბონაპარტი და უბრძანონ, გაგვაგებინოს თავისი საქციელი.

ლ უ ს ი ე ნ ბ ო ნ ა პ ა რ ტ ი. ნება მიბოძეთ, თავმჯდომარეობა სხვას გადავცე.

თავმჯდომარის ალაგი შაზალმა დაიქირა.

დ ი ნ ე ფ ი. უფროსთა კრებამ რომ ამ სოფელში გამოგზავნა საერო კრება, ეჭვი არ არის, მკიდრო საფუძველზე დაამყარა ეს ღადგენილება: რესპუბლიკა განსაცდელში იყო. მამ შეგვატყობინონ, ვინ არიან რესპუბლიკის წინააღმდეგ შეთქმულნი? ვინ არიან მოთავენი და ვინ არიან მათი მომხრენი? გარდა ამისა ჩვენ ახლავე უნდა ვიზრუნოთ რამე, რომ კვლავაც ხელშეუხებელნი დავრჩეთ და თავისუფლად შეგვეძლოს შეკრება და საზოგადო საქმეზე ბჭობა.

მ რ ა ვ ა ლ ი ხ მ ა. აგრე იყოს! აგრე იყოს!

ბ ე რ ტ რ ა ნ ი. უფროსთა კრებამ რომ აქ, სოფელში, გამოგვგზავნა, კონსტიტუციის წინააღმდეგ, უკანონოდ მოიქცა. უფროსთა კრებამ გენერალ ბონაპარტს დაუმორჩილა. საერო კრების მცველი ჯარი, კონსტიტუციის წინააღმდეგ და უკანონოდ მოიქცა. ამიტომ ჩვენ უპირველეს ყოვლისა უნდა გამოვაცხადოთ, რომ გენერალი ბონაპარტი უკვე გადაყენებულია იმ თანამდებობიდან და ამიერიდან იმას აღარ ემორჩილება საერო კრების მცველი ჯარი.

მ რ ა ვ ა ლ ი ხ მ ა. აგრე იყოს! აგრე იყოს!

ტ ა ლ ო. უფროსთა კრებას უფლება არ ჰქონდა, ჩვენი მცველი ჯარისთვის უფროსი დაენიშნა. ბონაპარტს უფლება არ ჰქონდა, ჩვენს ღარბაზში შემოსულიყო, ვიდრე თითონ ჩვენ არ დავიბარებდით. ჩვენ კიდევ არ უნდა წამოვსულიყავით პარიზიდან. ჩვენ ახლავე პარიზს უნდა დავბრუნდეთ. წავიდეთ, ერის წარმომადგენელნო, მფარველობას ხალხი და ჯარი გაგვიწევს. წავიდეთ, მამული-შვილნო, თქვენი თვალითა ნახეთ და დარწმუნდით, რომ ჯარა სამშობლოს და რესპუბლიკის მომხრე და მფარველია. დავადგინოთ ეხლავე, რომ ის ჯარები, რომელნიც ახლა აქ იმყოფებიან, საერო კრების მცველ ჯარებად არიან ჩარიცხულნი, და უფროსთა კრებას ვაცნობოთ, რომ ჩვენ ისევ პარიზს მივალთ და იქ გვექნება ჩვენი კრება.

დ ე ს ტ რ ე მ ი. მეც ტალოს აზრისა ვარ.

ბ ლ ე ნ ი. ექვსი ათასი კაცი გვახვევია გარს. დაეადგინოთ, რომ ისინი საერო კრების მცველნი და მფარველნი არიან.

დ ე ლ ბ რ ე ლ ი. გარდა გამგეობის მცველი ჯარისა. თავმჯდომარევე, ხმები შეკრიბე.

კრება ხმების შეკრებას ითხოვს.

ლ უ ს ი ე ნ ბ ო ნ ა პ ა რ ტ ი. მე წინააღმდეგი არ გახლავართ მაგ წინადადებისა, მაგრამ არ შემიძლია არ გამოვაცხადო, რომ აქ ეჭვები უფრო მეტი სისწრაფით ვრცელდება, ვიდრე საჭირო დასაბუთებით. რა შეგცოდათ გენერალმა? ნუ თუ ერთმა შეცდომამ, რომ თქვენდა უნებურად აქ შემოსვლა გაბედა, დაგავიწყათ, რამდენი ღვაწლი დასდო მან თავისუფლებას?

მ რ ა ვ ა ლ ი ხ მ ა. არა, არა, მის ღვაწლს არავინ ივიწყებს!

ლ უ ს ი ე ნ ბ ო ნ ა პ ა რ ტ ი. მე გთხოვთ, ჯერ გენერალი დაიბაროთ და ალაპარაკოთ, და მერმე სასჯელი დასდოთ.

მ რ ა ვ ა ლ ი ხ მ ა. ჩვენ იმას აღარ ვიცნობთ!

ლ უ ს ი ე ნ ბ ო ნ ა პ ა რ ტ ი. მე თავს აღარ შეგაწყენთ. როდესაც ამ დარბაზში მყუდროება ჩამოვარდება, როდესაც აღელვებულნი ვნებანი დაწყნარდებიან და უინი და შური დაცხრება, თქვენ თითონვე იგრძნობთ...

მ რ ა ვ ა ლ ი ხ მ ა. კმარა! საქმეს დავუბრუნდეთ!

ლ უ ს ი ე ნ ბ ო ნ ა პ ა რ ტ ი. მე ვხედავ, რომ აღარ მომისმენენ, და რადგან სხვა აღარა დამრჩენია რა, ამით უარს ვყოფ ჩემს თანამდებობას და ტრიბუნაზე ვაწყობ ნიშნებს თავმჯდომარისას.

ტრიბუნაზე დააწყო და ჩავიდა. ამ დროს საერო კრების მცველი ჯარის ერთი რაზმი შემოვიდა დარბაზში აფიცრის წინამძღოლობით, და ტრიბუნამდის მივიდა. ისე იყო მოხერხებული, ვითომც თავმჯდომარე ლუსიენ ბონაპარტი საერო კრებამ თავის ჯარს გაათრევიანა ძალით: — ხედავთ, ძალმომრეობა იხმარა საერო კრებამ თავის თავმჯდომარეზე, თავის მცველ ჯარს უბრძანა და გაათრევიანა... ვერაგობა და სიცრუე მეტი გინდათ!

ისევ ხმაურობა ატყდა და გაბრაზებული, აღშფოთებული ყვირილი. საერო კრების დარბაზისკენ მიმავალ კიბეებზე ჯარის ფეხის ხმა გაისმა. მაყურებელნი ფანჯრებს მისცივდნენ. ერის წარმომადგენელნი ფეხზე წამოდგნენ და ყვიროდნენ: რესპუბლიკას გაუმარჯოს!... საერო კრების დარბაზი ჯარით აივსო. წინ გენერალი ლეკლერი მოუძლოდა.

გ ე ნ ე რ ა ლ ი ლ ე კ ლ ე რ ი. ერის წარმომადგენელნო, დაიშალენით, თორემ თქვენი მფარველობა შეუძლებელი შეიქნება! უფრო შედგარად გაისმა კრების ძახილი:

რესპუბლიკას გაუმარჯოს!

ამ დროს თავმჯდომარის გვერდით ერთი აფიცერი წამოიჭიმა და დაიძახა:— დაიშაღენით, წარმომადგენელო! გენერალმა ბრძანება გასცა...

უფრო საშინელი ხმაურობა ატყდა. საერო კრების წევრები თავთავის ალაგს იყვნენ. მაშინ ერთმა აფიცერმა დაიძახა:

— აბა, ბიჭებო, მომყევით!

გაისმა ნალარის ხმა და საერო კრების დარბაზი ჯარმა დაიჭირა. გენერალმა ლეკლერმა ბრძანება მისცა საერო კრებას, — მიბრძანდით აქედანო! ჯარს უბრძანა—გარეკეთ ეგენიო! და რომ არავის გაეგონა კრების წევრთა უარი და ძახილი, უბრძანა, — ბუკი და ნალარა დაჰკართო!

იმ დროს ბევრმა მწერალმა შეაქო ამ საქციელისთვის ბონაპარტი. მაგრამ ბონაპარტის სხვები მოჰყვნენ და იმ სხვებმა დაიჭირეს და ციხეში ჩაყარეს ის მწერლები, როგორც უკანასკნელნი ქურდები. ახიცი იყო მათზე! ვინც ხალხს ვერაგობის და ძალმომრეობის თაყვანისცემას უქადაგებს; ვინც აღშფოთებული ხმას არ აიმაღლებს პატიოსან კაცთა გასამხნეველად და ბიწიერთა დასათრგუნავად, იმან თითონვე უნდა მოჰკოს თავისი ნათესი და თითონვე უნდა სწვნიოს თავისი გესლი. მათი დასჯა დიდად ამხნევებს, ზნეობრივად მაინც, იმ პატიოსანთ, რომელთაც სწამთ, რომ სიმართლე უძლეველია და აღრე თუ გვიან თავისას იზამს.

რალა მოგახსენოთ იმ დღისა? თქვენ უკვე იცით, რომ უფროსთა კრების უმრავლესობა სეისის წყალობით ბონაპარტისკენ იყო. ისინიც იქვე ბრძანდებოდნენ, მეორე დარბაზში და შიშით თრთოდნენ. იმ დღიას, ვიდრე საერო კრების დარბაზში შევიდოდა, ბონაპარტი მათთან მისულიყო და იმისთანა კილოთი შეუტია, თითქო თავის ჯარს უბრძანებსო; რალაცები მოეჩმახა, — შეთქმულება არის რესპუბლიკის დასამხობადო... საერო კრებას სურს კონვენტის დრო დაგვიბრუნოს და გილიოტინა განაახლოსო... გამგეობის წევრებმა ბარამ და მალენმა მთხოვეს, — დაამხე მართებლობა და შენ გახდი საფრანგეთის ბატონი და პატრონიო... საბუთებიო, თურმე დაუძახეს. მას საბუთები არა ჰქონდა. პასუხის ნაცვლად მიუბრუნდა თურმე ჯარისკაცთ, რომელნიც შემოჰყოლოდნენ და იქვე კარებთან იდგნენ და დაუყვირა:

„თქვენი იმედილა მაქვს, ჩემო ერთგულო ჯარისკაცნო! მე აქედან ვხედავ თქვენს ქუდებს და ხიშტებს. თქვენ მე არ მიმტყუნებთ, ჩემო ერთგულო მეგობრებო. მე თქვენს მეტა

აღარავინა მყავს დღეს; ნუ დაივიწყებთ, რამდენჯერ წამიყვანიხართ გამარჯვებისკენ!“

და მანამ საერო კრების წევრნი პარიზს მიაღწევდნენ, — იქნება პარიზელი ხალხი ავშალოთ როგორმეო — იმ დამესვე საერო კრების დარბაზში მოგროვილიყვნენ ბონაპარტის მომხრე 26 წევრი და ლუსიენ ბონაპარტის თავმჯდომარეობით დაედგინათ, 1) გამგეობის გაუქმება, 2) საერო კრების 61 წევრის საფრანგეთიდან განდევნა, და 3) გამგეობის ნაცვლად „კონსულის“ დაწესება, კონსულად ნაპოლეონ ბონაპარტი დაენიშნათ და მის ამხანაგებად, მღ. სეისი და რაჟე. გარდა ამისა დაედგინათ, რომ საერო კრება მხოლოდ სამი თვის შემდეგ შეიყრება, დაარსებულ იქნება ორი კომისია, რომელთაგან ერთს კანონმდებლობა ებარება და მეორეს — კონსტიტუციის გადასინჯვა.

უფროსთა კრება არ დაშლილა ამ არეულობის დროს და, რაღა ჩემი თქმა გინდათ, ყველაფერი მოიწონა და დააკანონა. ხალხი არც კი შეინძრა, რადგან კონსტიტუციის გაუქმებით იგი სრულიად არას ჰკარგავდა.

ამგვარად შეჰკრა და ფეხქვეშ ამოიღო ნაპოლეონ ბონაპარტმა საფრანგეთი. მთელი 16 წელიწადი სთელა ფეხქვეშ და იქნება დღესაც ისევე ყოფილიყო, გერმანელები, ინგლისელები და რუსები რომ არა ყოფილიყვნენ. დიად, იქნება სამძიმოც იყვეს ამის თქმა, მაგრამ ვაჟკაცობა ის არის, რომ კაცმა თავისი შემარცხვენილი სიმართლე არ დამალოს: ბონაპარტის წინააღმდეგ რომ მთელი ევროპა არ შეერთებულიყო, რომელსაც ის არბევდა და სძარცვავდა, ჩვენი ძველი წესწყობილება თავისი ბერებით, დიდებულებით და სამარცხვინო მტარვალობით, დღესაც ლოდსავით აწვებოდა უბედურს ჩვენს ქვეყანას. განსხვავება ის იყო, რომ ლუის მაგიერ ჩვენს მტარვალს ნაპოლეონი ერქვა.

ხალხის შემძლებელ ნაწილს — ბურჟუაზიას, თუ ცოტაოდენიც არის შეგნება შერჩენოდა, უნდა გაეგო, რომ ვერაგობით და საკუთარი ჯიბის ტენით რაც არ იზარალა, ვერა მოიგო რა; ცოტა რამ თავაზიანობით და სიმართლით რომ მოჰქცეოდა ხალხს, შეუძლებელ ხალხს, და კონსტიტუციაში მისთვისაც წილი დაედო, იმდენი თავგანწირული მფარველი გამოუჩნდებოდა, რომ ასი ნაპოლეონიც ვერას დააკლებდა. მაშ არ იცოდნენ?! ვისაც სულ ყველაფერი თავის უძღები მუცლისთვის უნდა, სხვის იმედიც აღარ უნდა ჰქონდეს. ბევრიც იძახა ბონაპარტმა, „მე უნდა აღვადგინო ხალხის უფლებანიო“, მაგრამ ხალხს უკვე ჰკუთნებოდა ესწავლა და არ აჰყვა ცარიელ სიტყვას. ხალხს კარგად შეეგნო ბურჟუაზიის მრწამ-

„ყველა თავისთვისაო“ და სავსებით წაპბაძა ბურჟუაზიის მაგათს.

მაშ, ახლა სალდათების გამგეობა უნდა ენახა საფრანგეთს!

XV

ნაპოლეონმა მეფის ადგილი დაიკირა და გენერლებმა, ვინც კი იმ დროს პარიზში იყო, ყველამ საკმარისი ჯილდო მიიღო დახმარებისათვის. გენერალი მორო იმდენად გატაცებული მომხრე გახლდა ბონაპარტისა, რომ ლუქსემბურგის სასახლეში დაამწყვდია გამგეობის ორი წევრი — გოიე და მულენი, რომელთაც სამსახურიდან გასვლა არ ინდომეს: — ჩვენ ამორჩეულნი ვართ და თანამდებობას ვერავის დაეუთმობო! მაგრამ რას გააწყობდა ორი კაცი, ბევრიც რომ ეყვირათ, — უკანონობას სჩადიხართო?

მეორე დღეს ნაპოლეონმა დაცალა თავისი პატარა სახლი და ლუქსემბურგის სასახლეში გადაბრძანდა. კონსულებმა პროკლამაციით მიმართეს ხალხს და ჯარს. ჯარისკაცთ ღვინო დაალევივნეს და „გაუმარჯოს ბონაპარტსო!“ აყვირეს. ჩვენში ჯარისკაცებთან ერთად ხალხიც გაიტაცა სიმზიარულემ და იმ დღეს უფრო მეტი ლუდი დაიხარჯა ფალსბურგში, ვიდრე სხვა დროს ორ-სამ თვეში დაილევდა. პატრიოტები კი გაყუჩებულნი იყვნენ: ჩუმად უნდა იყოს კაცი, როდესაც ჯარი და ხალხი ერთად არის. მამასახლასმა და სხვა მოხელეებმა ბრძანება მიიღეს და — კიდევ კარგი ფალსბურგი ერთა ბეწვა ქალაქია და ყველანი იცნობენ ერთმანეთს — ჩუმად შეგვატყობინეს, — ფთხილად იყავით, თორემ ბრძანება გვაქვს და იძულებული ვიქნებით დაგიჟიროთო. ჩვენც მართლა რომ ფრთხილად ვიყავით. შოველს არც კი უნდოდა გაფრთხილება, რადგან უკვე იცნობდა ბონაპარტს.

გაზეთები სავსე იყო ბონაპარტისადმი მორჩილების და მადლობის გამოცხადებით. ყოველ მხრიდან ერთგულებას უთვლიდნენ და გამარჯვებას ულოცავდნენ. ბრუნმაც კი მოსწერა ბონაპარტს მორჩილების წერილი და ბრუნი დანტონის მეგობარი იყო და დიდად დამსახურებული მხედართმთავარი. გენერალი მასსენა არას ამბობდა. ან რალა უნდა ეთქვა გულდამწვარს: უმადურმა ხალხმა მისი ნათესი სხვას მოამკვიცნა. ბონაპარტს, რასაკვირველია, არად ესიაშოვნებოდა ახლო ყოლა ციურისის გმირისა და იტალიაში მყოფის ჯარის მხედართმთავრად გაისტუმრა. გენერალი ბერნადოტიც გაჩუმებული იყო, რადგან ხედავდა, რომ ბონაპარტი გამარჯვებული იყო. შამპიონეს სიხარულს და ოქროს სიყვარულს ბონაპარტისადმი ენა ვერ იტყვის.

ეგ არაფერი. საშინელება მაშინ ვნახეთ, როდესაც გაზეთებმა იმ მამულიშვილთა სია გამოაქვეყნეს, რომელთაც კაიენში გზავნიდა ბონაპარტი. საერო კრების წევრთ, რესპუბლიკის უერთგულეს მოღვაწეებს და უპატიოსნეს პატრიოტებს ავაზაკებთან და კაცისმკვლელებთან ერთად სჯიდა ბონაპარტი.

საერო და უფროსთა კრება ისევ პარიზში გადაიყვანეს, საერო კრების თავმჯდომარედ ისევ ლუსიენ ბონაპარტი იყო, უფროსთა კრებისა — ლებრუნი. ორივე კრებამ კომისიები ამოირჩია კონსტიტუციის შესადგენად. მთელი საფრანგეთი ამ კონსტიტუციის მოლოდინში იყო, რადგან ძველი გაუქმებული იყო და ერთს კაცსა ვყავდით წიხლქვეშ, თითქო უზბედურესი ყმანი ვყოფილიყავით მისი. მოქალაქეობრივი უფლებანი აღარავითარი გექონდა და ვფიქრობდით, რაც უნდა წუწკი იყოს, მაინც რაიმე უფლებებს მოგვანიჭებს ეს კონსტიტუციაო. შოველი მწარედ ურწმუნოდ იცინოდა, — ეგ იმედიც გაგიცრუვდებათ, როგორადაც სხვა მრავალიო.

ახალი კონსტიტუციის ძალით საფრანგეთის მართებლობის სათავეში იდგა „პირველი კონსული“, რომელიც მარტოდმარტო განაგებდა სამეფოს ცხოვრებას: ის ნიშნავდა ყველა მოხელეებს, ის აცხადებდა ომს, ის უდებდა პირობებს და ურიგდებოდა სხვა სახელმწიფოებს. თან ორი სხვა კონსული ჰყავდა, მაგრამ იმათ მარტო რჩევას მიცემა შეეძლოთ. სამივენი ამორჩეული იყვნენ ათი წლით. პირველს, ბონაპარტს, წელიწადში 125,000 მანეთი ეძლეოდა. სამივენი სასახლეში იდგნენ, რომელზედაც ამართული იყო საკონსულო დროშა.

ყველა ფრანგი 21 წლისა უნდა ჩაწერაღიყო სამოქალაქო სიაში და ათზე ერთი ამოერჩიათ თავიანთ შორის. ამათ ეწოდებოდათ „სასოფლო ამომრჩეველნი“. ესენი თავიანთ შორის ირჩევდნენ ათზე ერთს — სამაზრო ამომრჩეველებს“; და სამაზრო ამომრჩეველები ირჩევდნენ ათზე ერთს — რომელთაც „საერო ამომრჩეველებს“ უწოდებდნენ. სასოფლო ამომრჩეველთაგან ნიშნავდნენ მამასახლისებს და სოფლის მოხელეებს; სამაზრო ამომრჩეველთაგან — ქალაქის მოხელეებს და საერო ამომრჩეველთაგან — მინისტრებს, უმაღლეს მსაჯულებს, სახელმწიფო რჩევის და კანონმდებელი კრების წევრებს.

— კანონმდებლობა განაწილებული იყო ოთხ დაწესებულებათა შორის:

1) სახელმწიფო რჩევა — მართებლობის ბრძანებისამებრ ადგენდა კანონს და წარუდგენდა

2) კანონმდებელ ტრიბუნას — რომელიც ასი კაცისაგან შესდგებოდა, სახალხოდ სჯიდა ყოველ კანონს და დასაკანონებლად გადასცემდა

3) კანონმდებელ კრებას. იგი საშასი წევრისაგან შესდგებოდა და ისმენდა კანონის ავკარგიანობის სჯას; თვითონ ამ სჯაში მონაწილეობას არ იღებდა, და კენჭით აცხადებდა მის გაკანონებას, ან უარყოფას

4) სენატი — ასი წევრისაგან შესდგებოდა და ვალდებული იყო თვალყური ედევნა, რომ კანონი ასრულებულიყო.

სეისს უნდოდა პირველი კონსულისთვის მარტო იმის უფლება მიენიჭებია, რომ მას ამოერჩია ორი კონსული: ერთი უნდა ყოფილიყო საფრანგეთის გამგე და მეორე სამხედრო მინისტრი — „ომიანობის კონსული“. თვით პირველ კონსულს ამის მეტი უფლება არა ეძლეოდა რა. მაგრამ ბონაპარტმა არ ინდომა „უქმ მეფედ ყოფნა ოქროს პატივზე“ და ისე შეაცვლევინა, რომ ამ კონსტიტუციით მას უფრო მეტი უფლებანი ჰქონდა მინიჭებული, ვიდრე 1789 წლამდე მეფე ლუი XVI-ს. ნაპოლეონი თითონაც გრძნობდა ამას და თითქო რცხვენიაო, ერიდებოდა ძველებურ სიტყვებს, რომელნიც მეფეების დროიდან შერჩენოდა მართებლობას; ამ სიტყვების მაგივრად ის ლათინურებს ხმარობდა — კონსული, — სენატორი, ტრიბუნი, პრეფექტი... 1808 წელს კიდევ ტრიალებდა ფული, რომელზედ ერთ და იმავე დროს ეწერა: „საფრანგეთის რესპუბლიკა. ხელმწიფე — იმპერატორი ნაპოლეონი“.

სეისის კონსტიტუცია, ბონაპარტის ბრძანებისამებრ შეცვლილი, გამოაქვეყნეს 13 დეკემბერს 1799 წ. და პირველ კონსულად ნაპოლეონ ბონაპარტი დაამტკიცეს.

პირველი კონსული უნდა ყოფილიყო ყველაფერი, პირველ კონსულზე უნდა ყოფილიყო დამოკიდებული მთელი სამეფოს ცხოვრება. ფულიც კი მისი სახელით უნდა მოჭრილიყო. პირველ კონსულს უფლება ჰქონდა დაეჭერინებინა და ციხეში ჩაეღობო ყველა, ვისიც კი ეჭვი შეეპარებოდა, რომ მართებლობის ერთგული არ უნდა იყო. ის იყო შინაგანი და გარეგანი პატრონი საფრანგეთისა; მარტო მას ჰქონდა მინდობილი დიპლომატიური მოლაპარაკებანი უცხოეთთან.

ერს რაღა რჩებოდა, იკითხავთ. დიდაც არაფერი, მაგრამ ვის შეეძლო ხმა აემალღებინა პირველი კონსულის წინააღმდეგ? საფრანგეთი მისი იყო და თავიდან ბოლომდე ყველგან თავისი ერთგული მოხელეები დააყენა, რომ სრულიად გაეუქმებინა ძველი კონსტიტუცია.

იქნებ გეგონოთ, რომ საერო ამომრჩევლები. ერის წარმომადგენელთ ირჩევდნენ? თქვენგან არ მიკვირს! საერო ამომრჩეველთაგან

იჩვენდა ბონაპარტი მინისტრებს და უმაღლეს მოხელეებს. თვით სენატიც კი ბონაპარტის დანიშნული იყო.

მეტს აღარას მოგახსენებთ. რადგან ესეცა კმარა ჩვენი მდგომარეობის დასახატავად. პირველი კონსული იყო მეფე, ხელმწიფე, და ერი კი აღარათერი. რაც შეეხება კანონების განსჯას კანონმდებელი ტრიბუნისა და სახელმწიფო რჩევისაგან, ეს უბრალო თვალთმაქცური ხერხი გახლდათ: ხედავთ, ბატონად ერთი კაცი კი არა, მთელი მართებლობა გვყავს; რომელიც ასე სასტიკადა სჯის ყოველ კანონსაო! თვალთმაქცობა იყო, რომელშიც ყოველთვის ერთი და იგივე პირნი ესარჩლებოდნენ, რაც უნდა კანონი ყოფილიყო შემოსაღები. და ერთი და იგივე პირნი ეწინააღმდეგებოდნენ. სახუმარო გაზეთებმაც შენიშნეს და სასაცილოდ გახადეს ეს ტაკიმასხარობა. მაგრამ ეტყობა დიდ მნიშვნელობას აძლევდა ბონაპარტი თავის თვალთმაქცურ კრებებს, რომ ერთ მშვენიერ დღეს შემდეგი ბრძანება წავიკითხეთ სახელმწიფო „მოამბეში“:

„რესპუბლიკის კონსულებმა, რომელთაც ვალად ადევთ საფრანგეთის მშვიდობიანობა და კეთილდღეობა, მხედველობაში მიიღეს რა, რომ ზოგ-ზოგი გაზეთი რესპუბლიკის მოწინააღმდეგეთა მოქმედება იარაღს შეადგენს, დაადგინეს შემდეგი: „მინისტრი პოლიციისა აღარ დააბეჭდვინებს და აღარ გაავრცელებინებს; მანამ ომი არ გათავდება, არც ერთ გაზეთს, გარდა აქ დასახელებულისა“... დასახელებული იყო სულ 13 გაზეთი.

და რადგან ჩვენს ომებს ბოლო არ უჩანდა, ამ 13 გაზეთის ანაბრად უნდა ვყოფილიყავით. ეს 13-ც, რაღა თქმა უნდა, ყურმოჭრილი ყმანი იყვნენ ბონაპარტისა.

რა სიკეთე დაეყრებოდა ერს, თუ კი გაზეთების ბეჭდვასაც აგვიკრძალავდნენ? წინსვლა და განათლება კი არა, პირიქით, უკან დაიწია ხალხის სწავლა-განათლებამ და ეროვნულმა შეგნებულებამ ბონაპარტის დროს, მით უფრო, რომ პირველი კონსული — შემდეგში ხელმწიფე-იმპერატორი ბონაპარტი — გროშს არ იმეტებდა სახალხო განათლებისათვის. სამაგიეროდ რაც ხალხს დააკლო, დიდებულთ შესძინა! საცა გახიზნული დიდებული იყო, საცა კი მიმალული მსახური და მოახლე იყო დიდებულებისა, ყველამ მაშინ წამოჰყო თავი — თავადებმა, აზნაურებმა, გრაფებმა, ბარონებმა, იმათმა მეჯინიბეებმა, ბაზიერებმა, მოურავებმა, მოახლეებმა და სხვ. და სხვ. ან როგორ შეიძლებოდა, არ გამოჩენილიყვნენ: მეფის ადგილზე ძლივს კაცი დაინახეს და არა ხლებოდნენ და პირქვე არ დამხობილიყვნენ! მართალია, კანონიერი მეფე არ იყო!... ევტ, არ იყო კანონიერი მეფე!... ცოტა არ იყოს, სასტიკი კაცი იყო, თავხედი, უზრდელი, სალ-

დათი... მაგრამ მაინც მეფის ადგილი ეჭირა! და როგორც თავლზე ბუზი მიდიოდეს, ისე მიეშურებოდნენ ბონაპარტის სასახლისკენ დიდებულნი, რომ იქ, მისავალ ოთახში ან კიბეზე მაინც ღირსებოდათ ბატონის კალთის ამბორება: ოჰ, რა ტკბილია დიდებულთა სამსახური!

ბონაპარტსაც ძალიან უყვარდა ეს ხალხი, კარგად ყავდა მიღებული და ამბობდა, — ძველი გვარიშვილობა ზრდილობიანობაში ეტყობათო... ზრდილობა შთამომავლობითია და არა ახლად, ფულით, შეძენილიო.

მაგრამ რადგან ჯერ ბონაპარტი ისე არავის შეჰყვარებოდა, რომ ისევე თავგანწირულად ებრძოლა მისთვის, როგორადაც აქამდე სამშობლოსთვის იბრძოდა, ბრძანება გამოსცა: — ჯარისკაცთაგან ვინც მამაცობას რასმე გამოიჩინს ბრძოლის ველზე, ვერცხლის ნიშანი მიეცემა გულზე დასაკიდებლად და ჯამაგირიც მიემატებაო... გაისარჯე და ფულით გადავიხდო! სწორედ ისე, როგორც ჩვენს ღუქანში: შაქარი — გირვანქა აბაზი; ღვინო — თუნგი ათი შაური... ჯარისკაცის გარჯა და მამაცობა — ვერცხლის ნიშანი!.. აფიცრისთვის ოქროს ნიშნები დააწესეს... შენ მე მემსახურები, მე შენ გაჯილდოებ; ჩვენ ერთმანეთს ვერას დაეყვედრებთ, და თუ ღმერთი გწამს, ნულარც შენს თავგანწირვას გამაგონებ, ნულარც წამებას და ტანჯვას! რაც კი ფულით არის შეძენილი, საქონელია და სხვა არაფერი, სავაჭრო, გასაყიდი საქონელი, და ვაჭრობასთან დიდებას რა ხელი აქვს? დიდება მაშინ იყო, როდესაც რესპუბლიკას ემსახურებოდნენ უურდანი, ოში, კლებერი, მარსო და თავგანწირულ ხალხთან ერთად ათასობით იხოცებოდნენ თავისუფლების, თანასწორობის და ძმობისთვის, — დიად, ერთად-ერთი ჯილდო იმ დალოცვილებისა დიდება იყო. იმათ არც წარჩინებული სახელწოდება უნდოდათ, არც ოქროს ნიშნებო. არც პენსიები! კაცმა თავის სამსახურში მშვენიერი ჯამაგირიც აიღოს, თქვენი მოწონებული საჩუქრებიც, ოქროს ნიშნებიც, პენსიაც და დიდებაც! სიკვდილის უკან ძეგლიც კი აუგონ! კარგია, თქვენმა მზემ! თუ აგრეა, მაშ მეც უნდა ვთხოვო ფალსბურგის მამასახლისს, რომ ძეგლი დამიდგას სამხედრო მოედანზე, რადგან 15 წლის განმავლობაში მე ვაწოდებდი მთელ ფალსბურგს შაქარს, ყავას, სანთელს, საპონს, ღვინოს, არაყს, ჩითს, მიტკალს და სხვას და სხვას... მართალია, ფულს ვიღებდი, მართალია, მეწვრილმანედ იმიტომ გავხდი, რომ სარგებლობა მენახა... მაგრამ სამხედრო სამსახურიც კარგ სარგებლობას აძლევს კაცს! რატომ მე კი არ უნდა ამიმართონ ძეგლი, მე, ფალსბურგის პირველს და წარჩინებულს მეწვრილმანეს, .თუ კი იმ

საღდათს დაუდგამენ ძეგლს, რომელსაც ბედმა ორივე ხელით უყაოა ჯიბეებში ოქრო?

სულ ტყუილია! დიდება თავგანწირვის შვილია! და ბონაპარტმა ისე კარგად იცოდა ეს ჭეშმარიტება, რომ თავის ჯარებს ყოველთვის ფულსა და საშოვარსა პირდებოდა: იცოდა, რომ პირად მის გულისთვის თავს არავინ გასწირავდა. „ჯარისკაცნო, მე იმისთანა მდიდარ ქვეყანაში ჩაგიყვანთ, რომ ნაშოვარი ველარა ზილოთ“!.. „ჯარისკაცნო, ომიდან რომ დაბრუნდებით, ყველა თქვენგანს შეეძლება ხუთი-ექვსი დღის მიწის შეძენა!“ ბოლოს ხომ ისე მოაწყობა საქმე, რომ მიწის ზურგზე უმდიდრესი ქვეყანა დაიჭირა, — თვით საფრანგეთი — და ნაშოვარის შორს ზიდვა აღარ დასჭირდა! რას ინატრებდა იმისი გული, რომ მით სავსე არა ყოფილიყო ჩვენი ქვეყანა: ღვინო, პური, ფული და მეტადრე ჯარი! ბონაპარტმა და ჯარმა შეიძინეს ყველა უფლება, რომელიც ხალხმა მეფეს და დიდებულთ წაართვა.

ჩვენ ხომ ასე გაგვაცურა ყინულზე და ახლა ევროპას მოუნდომა გადაყლაპვა. ბონაპარტს ძმები ჰყავდა და როგორ იქნებოდა, იმათთვისაც სამეფოები არ ეშოვა! ამისათვის ჯარები იყო საჭირო და ეს ჯარები ჩვენს ერს უნდა მიერთმია თავის „პირველ კონსტულისთვის“. მაგრამ რა ექნა, რომ თითონვე დაჰპირდა, — მშვიდობიანობას აღარავის დაეარღვევინებო. რა ექნა? აქაც ხრიკი იხმარა და კიდევ ალჩუს დაუჯდა კოჭი.

ინგლისის მეფეს გიორგი III-ს მისწერა, — ინგლისელები და ფრანგები ძალიან კარგად მორიგდებიან ერთმანეთში და ორივე ერის სასიკეთოდ ააყვავებენ ვაჭრობას და მრეწველობას... პირდაპირ თქვენ იმიტომ მოგმართეთ, რომ ჩვენ ერთმანეთში ძმურად, მეგობრულად უფრო ადვილად გავათავებთ საქმეს, ვიდრე მინისტრების, საერო კრების და სახელმწიფო რჩევის ჩარევითაო...

მეფე გიორგი ამპარტავანი კაცი იყო და ძალიან იწყინა და იუკადრისა ვიღაცა კორსიკელი აზნაურისაგან ამ გვარი თავხედობა. პიტი ჯერ იქვე ჰყავდა, ის პიტი, რომელმაც ორჯერ შეაერთა რესპუბლიკის წინააღმდეგ ევროპიელი სახელმწიფოები. პიტი მაშინვე მიხვდა, რომ ბონაპარტს მორიგება კი არა, ომის გაგრძელება უნდოდა და შესაფერი პასუხი მოსწერა, რომელიც მაშინვე საქვეყნოდ გამოაცხადეს: „საფრანგეთის რევოლუციას ქვეყნის დამხობა უნდა, რადგან იგი წინააღმდეგია საკუთრებისა, საზოგადოებრივ წესწყობილებისა და სარწმუნოებრივ თავისუფლებისა. მისი უდიდებულესობა ინგლისის მეფე გიორგი მესამე აღარაფერში ენდობა საფრანგეთის მართებლობას, ვიდრე საფრანგეთის ერი ძველებურად ქედს არ მოი-

ზრის კანონიერ მეფის წინაშე, რომლის მამა-პაპანი საუკუნეთა განმავლობაში განაგებდნენ სამეფოს და შინ კეთილდღეობასა სძენდნენ ხალხს და გარეთ გამარჯვებას და მეზობელთაგან პატივისცემას. თუ ჰკუთხედ მოვიდა საფრანგეთი და ღვთისაგან კურთხეულს თავის მეფეს მოუწოდა, ინგლისი მაშინვე განუახლებს ძველებურს მეგობრულს განწყობილებას და აღთქმას დაუდებს, რომ თავის დღეში ვერავინ შეეხება უწინდელს მის საზღვრებს. მარტო ამით შეიძლება ევროპის დამშვიდება და ვიდრე ეს არ მოხდება, ევროპიელი სახელმწიფონი იძულებულნი იქნებიან ცეცხლითა და მახვილით ებრძოლონ საზოგადო მშვიდობიანობის დამშლელს“...

ერთი სიტყვით, შავჭირად ეჩვენებოდათ ჩვენი რესპუბლიკა მეფეებს, რომელნიც თითონ არა არიან რა და ხალხის ოფლითა ცხოვრობენ. შავჭირად ეჩვენებოდათ და იძახდნენ:

— ან რესპუბლიკა უნდა იყოს, ან ჩვენი! როგორ შეიძლება ხალხს ამოდენა უფლება ჰქონდეს, როდესაც ჩვენ ღვთისაგან ვართ მეფედ კურთხეულნი“.

მართალი იყო და ბონაპარტმაც იმიტომ წაართვა ხალხს ყოველი უფლება. ღვთისაგან კურთხეულთ რომ ისიც ღვთისაგან კურთხეულად მიეჩნიათ, მაშინვე მშვიდობიანობა ჩამოეარდებოდა; მაგრამ არც ინგლისის მეფეს გიორგი III-ს, არც ავსტრიისას ფრანსუა II-ს და არც რუსეთის ხელმწიფეს პავლეს, ტოლად და სწორად არ უნდოდათ იგი და, მასასადამე, ომიც აუცილებელი იყო.

რესპუბლიკამ დაამარცხა ევროპის ყველა მეფეები და ხელმწიფენი, იმიტომ რომ მეფეებს ებრძოდა და არა ხალხებს; ხალხთან მას საომარი არა ჰქონდა რა და ყველგან ძმობის, ერთობის, თავისუფლების და ადამიანის უფლებათა ქადაგებას მიიძღოლებდა წინ. მზის სხივებივით მოეფინა ეს ქადაგება ყველა ხალხებს, თვით რუსეთშიც კი შეაწია, და აათრთოლა მტარვალეები. დარწმუნებული ვარ, ცოტა ხანს უკან ყველა ხალხები შეიგნებდნენ ჩვენს წმინდა წადილს და ყველაფერში ჩვენებრ მოიქცეოდნენ. უკანასკნელი ჩვენი გამარჯვება, როდესაც საუკეთესო ჯარი და საუკეთესო მხედართმთავარი ეგვიპტეში იყვნენ, ამტკიცებდა, რომ ჯერ კიდევ დიდი ძალა ჰქონდა საფრანგეთს და ბრძოლას იმდენ ხანს გაუძლებდა, ვიდრე ქვეყნად სრული თავისუფლება და სამართლიანობა დამყარდებოდა.

ღიად, კიდევ დიდი ხანი გაუძლებდით ბრძოლას, ბონაპარტი რომ არ ჩარეულიყო საქმეში. ბონაპარტმა ჩვენი წმინდა მიმართულების და წადილის მაგივრად პირადი სარგებლობა გაიხადა მიზნად. მე მინდა მეფე ვიყო, ევროპელ მეფეთაგან მეფედ აღიარებულიო — და ჩვენით მოინდომა მეფობის შოვნა. ომი აუცილებელი იყო. შორს

გამჭვრეტი ვერაგი კაცი იყო ნაპოლეონი, ხედავდა, რომ დიდი ხანი გასტანდა ბრძოლა და მზადებას შეუდგა; უნდოდა რიგზე დაეყენებინა არა მარტო ჯარები, არამედ მთელი საფრანგეთიც, რომ საჭიროების დროს, ყველა საკმარისად ჰქონოდა და გაუჭირებლივ გამოეტანინებინა ხალხისთვის ფული. ამ მიზნით დაჰყო ნაპოლეონმა საფრანგეთი დეპარტამენტებად და თავისებური წესწყობილება შემოიღო, თუმცა კარგად იცოდა, რომ ეს წესწყობილება წინააღმდეგი იყო თავისუფლებისა და სამართლისა.

რევოლუციის წინათ „სამაზრო კრებები“ ვიცოდით, დიდებულთა და სასულიერო წოდების წარმომადგენელთაგან, რომელნიც განაგებდნენ სამაზრო საქმეებს და ხარჯს გააწერდნენ ხალხს. შემდეგში რევოლუციის დროს დაწესებული იქმნა „სასოფლო კრებები“, რომელშიც მონაწილე იყო ყველა მამულიშვილი, და რომელიც ირჩევდა ერის წარმომადგენლებს, თავის მსაჯულებს და მოხელეებს; ყველა კმაყოფილი იყო, ყველას, მდიდარსაც და ღარიბსაც, შეეძლო თავის სოფლის, მაზრის, თემის და სამშობლოს საქმეებში მონაწილეობის მიღება.

მას შემდეგ იცვალა დრო და ახალი კონსტიტუციის ძალით მარტო შემძლებელთა შერჩათ ეს უფლება. მაგრამ ეგ არაფერი: ყველას თუ არა, ზოგს მაინც შეეძლო საზოგადო საქმეების მართვა და გამგეობა; ასე იყო, თუ ისე, სოფელში კრებები იმართებოდა და ყველა ჩვენგანი იქ სწავლობდა საზოგადო საქმის სამსახურს. ყველა არჩეულს შეეძლო ეთქვა: მე ჩემ თანამემამულეთა წარმომადგენელი ვარ; ჩემი შრომა სასარგებლოა ჩემთვისაც, ჩემი ოჯახისთვისაც, ჩემი სოფლისთვისაც. მაშინ უტყბო ვერაგინ ჩაერეოდა სასოფლო საქმეებში. მართალია, რობესპიერმა კაცები გამოგზავნა თვალ-ყურის სადევნელად, მაგრამ იმისი გამოგზავნილი კაცებიც კი ვერა ბედავდნენ სასოფლო საქმეებში ჩარევას: ოღონდ ხალხს ფული და ჯარისკაცები ეძლია გაჭირვებულ რესპუბლიკისთვის, და იმათ სხვა არა უნდოდათ რა.

ხალხისთვის ეგეც ბევრიაო, ბრძანა ნაპოლეონმა! რად უნდა ხალხს მაგდენი თავისუფლება? მაგრე რომ იყოს, მე რილას მაჩანჩალა ვყოფილვარო? და ბრძანება გასცა, — მამასახლისს მე გამოვიგზავნით, თქვენ ნულარას შესწუხდებით, თქვენთვის განცხრომით ბრძანდებოდეთ და განისვენებდეთ, ყველაფერს ის გაარიგებს ჩემი ბრძანებისამებრ და თქვენც აგასრულებინებთ ჩემს ბრძანებასო. მართალია, სამამასახლისო საბჭოს წევრებს ჩვენ ვირჩევდით, მაგრამ როდესაც რაიმე წინააღმდეგობას გამოიჩენდნენ და მამასახლისის აზრს არ მიიღებდნენ, იმათაც ზრდილობიანად დაითხოვდნენ ხოლმე,

ნულარ შესწუხდებითო — და მამასახლისი თავისებურად განაგებდა ყველაფერს.

სულ უკანასკნელ მოხელეს ვისმე რომ შეურაცყოფა მიეყენებინა პატიოსან, ყველასაგან პატივცემულ მამულიშვილისთვის, ვერ უჩივლებდა, ვიდრე სახელმწიფო რჩევისაგან ამის ნებას არ აიღებდა. და რადგან მთელ საფრანგეთში ყველა მოხელე პირველი კონსული-საგან იყო სამსახურში ჩარიცხული და სახელმწიფო რჩევის წევრებსაც იგივე პირველი კონსული ირჩევდა, თავის დღეში არავის აძლევდნენ ნებას ჩივილისას. იძულებული ვიყავით შინ ვყოფილიყავით, ყველას მოვრიდებოდით და, თუ გარეთ გამოვიდოდით, მდაბლად თავი დაგვეკრა ყველა ჯაშუშისთვის, თორემ რომ გავგეჯავრებოდა და კაი-კაი სილებიც შემოეთავაზა, ხმას ვერ ამოვიღებდით. პასუხს გავცემდით და, ისე ჩავვალბოდნენ ციხეში, თითქო ცოცხალი დამარხესო. ყველაფერში ასეთი იყო ნაპოლეონის წესწყობილება; სათავეში პირველი კონსული ბრძანდებოდა გამოჭიმული და ყველაფერი იმისაგან გამომდინარეობდა, როგორადაც სხივოსან მზისაგან.

ერი მარტო იმისთვისლა იყო, რომ ბონაპარტისთვის ფული და ჯარი მიერთმია. არც ერთი ხალხი არ დაცემულა თავის დღეში ისე, როგორც მაშინ ჩვენი ხალხი დაეცა.

XVI

რაკი თავისებურად მოაწყო ყველაფერი და რამდენიმე აჯანყებული კაცი დაახვრეტინა, მერე თავის განზრახვის ასრულებას შეუდგა და დიჟონის ახლო დაუწყო ჯარებს მოგროვება. მერმე გადავიდა იტალიაში, რამდენჯერმე დაამარცხა ავსტრიელები და ისე გაუჭირა საქმე, რომ შეეხვეწნენ, — მოვრიგდეთო. უნდა გენახათ, რა დიდებით დაბრუნდა გამარჯვებული ნაპოლეონი!

ხალხის აღტაცებას საზღვარი არა ჰქონდა. ისე გაეგნენ ფეხქვეშ, თითქო ადამიანიშვილი კი არა, ღვთაება არისო. ლოცულობდნენ და თავყანსა სცემდნენ. მაგრამ ესეც არ იკმარა: მაინც ხომ მუხლმოდრეკილი დგას ჩემს წინაშე ეს ხალხიო, ბრძანა ნაპოლეონმა, და ბარემ ძველებური დიდებაც აღვადგინო და ხელმწიფური სხივი მოვფინო ჩემს გვარსაო! და როგორადაც უწინ იყო, რომ ათასობით ახლდნენ მეფეს და დედოფალს მოსამსახურენი და მოახლენი, ისე ბონაპარტმა დააწესა; ზოგს წითელი ტანსაცმელი ჩააცვა, ზოგს ცისფერი, ზოგს მწვანე, სულ ოქრომკედით ნაკერი... თითონაც რომ ვერ მოეხერხებინა. გახიზნულები მოუხერხებდნენ, ის გახიზნულები, რომლებიც ისევ საფრანგეთისკენ მოეშურებოდნენ. ხალხს ოფლი სდის და ოფლის სუნი უდისო!.. გახიზნულები კი... იმისთანა სუნენ-

ლოვან წყლებს ისხურებენ, რომ საამურია მათი საზოგადოება... ნაპოლეონმაც მეფური დიდების მოწმე დიდებულნი ირჩია! დიდებულნი ხართ და მე რომ მახლდეთ, მეც დიდებულ მეფეთა შორის ჩავირიცხებიო. ხალხის შვილნი კი, რომელთაც ვაჟკაცურად ებრძოლათ სამშობლოს განდიდებისთვის, აღარ ინდომა და ყველანი მოიშორა. დაითხოვა აგრეთვე რევოლუციის მომხრე მღვდლები და პაპს დაუმორჩილა ეკლესია. კვებულობდა კიდევ, თვით სახელმწიფო საბჭოში:

— ჩემი პრეფექტებით, ჟანდარმებით და მღვდლებით, რაც მინდა, იმას ვიზამო!

და მართალიც იყო: რასაც მოინდომებდა, იმას იზამდა.

მაგრამ კმარა! ნაპოლეონის ეგოიზმმა მოკლა ჩვენში აზრი თავისუფლებისა, თანასწორობისა და კაცობრიობისა; ნაპოლეონის ეგოიზმმა წურბელასავით ამოსწოვა სისხლი საფრანგეთს და ორ მილიონ ნახევარი კაცი იმსხვერპლა, რომ მათ ნაშთებზედ დაემყარებინა თავისი და თავის შთამომავალთა დიდება; ნაპოლეონის ეგოიზმმა განაახლა ჩვენში უწინდელი ხარისხები და ბარბაროსული განაწილება ერისა სხვადასხვა წოდებად; ნაპოლეონის ეგოიზმმა შეაყენა და უკან დასწია საფრანგეთის განვითარება და გადაგვიკიდა მთელი ევროპა, რომელმაც ორჯერ შემოუსია ჩვენს უბედურს სამშობლოს ყაზახები, გერმანელები და ინგლისელები. ეგოიზმი ნაპოლეონისა იმისთანა საგანი არ არის, რომ იმაზედ შეჩერება სასიამოვნო იყოს.

შოველი გულგრილად უყურებდა ამ ამბებს; პირმოკუმული და თავდაღუნული დასცქეროდა მიწას, თითქო რაღაც საშინელი უდგას თვალწინო. ხანდახან თუ გაბედავდა ბედის დამდურებას:

— რა უბედურებაა ამოდენა ხანი ცხოვრება! ნეტავი ლანდაუში მოვმკვდარიყავ, როდესაც ზარბაზნების ჭექა ისმოდა და ალტაცებული ხალხი მარსელურს მღეროდა!

დროს სულ ბავშვებთან ატარებდა. პეტრეს და ანიკოს მესამეც მიემატა, პატარა მიშელი. პეტრეს თითონა ზრდიდა და უნდა გენახათ, როგორ უხაროდა, როცა შვილიშვილი მოსწრებულ პასუხს მისცემდა, მეტადრე ადამიანის უფლებათა შესახებ კითხვაზე.

— რა არის ადამიანი, პეტრე? — ჰკითხავდა შოველი.

— ადამიანი არის ჰკუიერი და თავისუფალი არსება.

— ყოჩაღ, ბიჭო! მოდი ერთი გაკოცო!

გადაჰკოცნიდა და ისევ ბოლთას მორთავდა.

მარგალიტა ძალიანა სწუხდა მამის ასეთ ყოფას. მეტი მწუხარებდა იქნება, ადამიანს ეჭვი ერეოდეს: ღმერთი რომ ყოფილიყო, ამოდენი უბედურება არ დატრიალდებოდა წუთისოფელშიო.

დიად, ხშირად გვითქვამს ეს სიტყვები. იმისთანა გაჭირვება მოგვაყენა ნაპოლეონმა, რომ 15 წლის განმავლობაში ყოველი პატიოსანი კაცი ამას იძახდა: ღმერთი რომ ყოფილიყო, ამდენ ტანჯვას ბოლოს მოუღებდაო. ან როგორ არ გვეთქვა? სასულიერო წოდებამ და პაპმა, რომელიც ჯვარცმულმა თავის მაგივრად დასტოვა ქვეყნად, რათა სიმართლე არ დაიჩაგროს უსამართლობისაგან, მუხლი მოიყარეს ნაპოლეონის წინაშე და ხელზედ ემთხვივნენ. ნაპოლეონმა სასულიერო წოდება და პაპის უფლებანი აღადგინა, ისინიც სამაგიეროდ თავყვანსა სცემდნენ ახალს ხელმწიფეს.

ამ გვარად ჩემს დროში ხალხმა თავის თვალთა ნახა კეისარი და მასთან სასულიერო წოდება, რომელსაც ერთადერთ სალოცავად ხორციელი სიკეთე გაეზადა და მისთვის ენაცვალებინა საიქიოც და სულიერი განსვენებაც.

მაგრამ უზენაესი არსება ზედ დაგვცქერის, როგორაც ქვეყნის მანათობელი მზე. ზედ დაგვცქერის თავის შვილებს და ხშირად გვამხნეებს კიდევ:

— ნუ გეშინიათ!... ნუ შეუშინდებით დღიურ ვარამს! მე ვარ თქვენი მფარველი. თავისუფლება, თანასწორობა და ძმობა — ჩემი კანონებია და, თქვენი ძვლებისა მტვერიც რომ აღარსად იყოს, მე მაინც შთაგებრთ თქვენ სიცოცხლეს და გაჩვენებთ სიმართლის გამარჯვებას. მაშ რისა გეშინიათ! ყველას თავისას მიუწყავს მომავალი და მეტადრე იმათ, ვინც სიმართლის დამამხობელია! მე ყველას ვზედავ, ყველას ვსჯი და იცოდეთ, მალე მოეღება ბოლო უსამართლოთა ბატონობას.

დასასრულ მინდა ერთი საშინელი ამბავი გიამბოთ, რომელიც პირად ჩემს ოჯახს შეეხება, მაგრამ იმისთანა საზარელი რამ არის, რომლის მსგავსს დღეს სიზმრადაც, ვედარსად ნახავს კაცი, თუ არ პირვანდელ, ბარბაროსულ ხალხებში, სადაც კანონი, სამართალი და თავისუფლება ჯერ არავის მოლანდებია.

მას შემდეგ, რაც ნაპოლეონმა ახალი კონსტიტუცია გამოაცხადა, რომელმაც მას მიანიჭა ერის ყოველი უფლება, შოველი დარწმუნდა, რომ რესპუბლიკას უკვე აუგეს ანდერძიო, და გაჩუმებული იყო. პოლიტიკაზე ხმას არ ვიღებდით; ვაჭრობა კარგი გეჭონდა, სამივენი მუშტარს ვუნდებოდით და საქმეში ვერთობოდით. ნათლიაჩემი მაშინვე მიემხრო ახალ კონსტიტუციას: — გლეხკაცობას გახიზნულთაგან შესყიდულ მამულს არავინ ედავება და, მაშასადამე, ამაზე უკეთესი აღარა იქნება რაო... რევოლუციის საშინელი არეულობის შემდეგ ჯერ რიგიანი წესწყობილება შემოვიღოთ და ადამიანის უფლებანიც თან მოჰყვებიანო...

დაბერდა ნათლიაჩემი!.. ეს ვერ მოუთმინა შოველმა და ერთ საღამოს ჩვენს სამკითხველოში რამდენიმე მწარე სიტყვა აკადრა ამის შესახებ, რომ მაძლარს მშვიერიც მაძლარი ჰგონიაო.

ნათლიაჩემს მას შემდეგ აღარ გაუვლია ჩვენსა. მე სიყვარულით მომესალმებოდა, სადაც კი შემხვდებოდა, და მეტყუდა:

— არ ვემდური შენს სიმამრს, ჩემო მიშელ, არ ვემდური, მაგრამ ვერიდები კი. რა ვქნა? შეუძლებელია იმასთან ლაპარაკი! როგორცაა გაავდა ამ ბოლოს დროს, აღარც ხათრი იცის კაცისა, აღარც რიდი და პატივისცემა.

მე კი ვფიქრობდი ჩემს გულში:

— გაავდა კი არა, მართალი გითხრა და ის გეწყინა, იმიტომა გწყინს, რომ პასუხი ვერ მოგიხერხებია.

კვირაობით მამაჩემი ყოველთვის ჩვენსა იყო სადილად; იმისთვის რომ გეკითხათ, ქვეყნად სიმართლე მაშინ დამყარდა, როდესაც ამისი შვილები ფეხზე წამოდგნენ და აღარა უჭირდათ რა.

შოველს ძალიან უყვარდა იგი და პატივისაც სცემდა, თუმცა პოლიტიკაზე თავის დღეში არ ელაპარაკებოდა. სტეფანე, რამდენიმე თვე იყო, რაც სტრასბურგში იყო სიმონთან ვაჭრობაში გასაჩვევად. სრულიად მარტონი ვიყავით, დუქანში გართულნი, ისე რომ ჩვენი ძველი მეგობრები და პატრონობებიც კი აღარ მოდიოდნენ საღამოობით სალაპარაკოდ. ვინც უწინ ყველაზე მეტსა ყვიროდა, ეხლა ყველაზე მეტად ფრთხილობდა და იმალებოდა.

24 დეკემბერს, 1800 წ. საღამოს 8 საათზე წმინდა ნიკეზის ქუჩაში, როდესაც ნაპოლეონი ოპერაში მიდიოდა, გზაში ერთი დატვირთული ურემი დახვდა, და გვერდით რომ გაუარა, ურემზე თოფის წამალმა იფეთქა და 52 კაცი დახოცა და დააზიანა.

პარიზელი გაზეთები 13-ვე ერთხმად ამტკიცებდნენ, ნაპოლეონის მოკვლა იაკობელებს უნდოდათო. და დამეთანხმებით, რომ სიფრთხილისა და სიჩუმის მეტი აღარა დაგვრჩენოდა რა იმ დროში.

ერთ საღამოს 11 იანვარს... რა ადვილად გვაგონდება ის დღეები, როდესაც მწუხარება გვწევია!... სამკითხველოში ვისხედით და რაღასაც ვლაპარაკობდით. მარგალიტამ ის იყო დააწვინა მიშელი და ანიკო; პეტრე კი იქვე იჯდა მაგიდასთან — ჯერ არ მეძინებო, და ზედ მაგიდაზე კი მისძინებოდა; გარეთ საშინელი ქარი ქროდა. შოველი ქალაღდის პარკებს სჭრიდა, მე და მარგალიტა წებოს ვუსვამდით. ათი საათი რომ დაპკრა, მარგალიტამ მძინარე პეტრე აიყვანა და საწოლ ოთახში ავიდა.

ას იყო ავიდა კიბზე, რომ საშინელი ხმაურობით შემოალო ვიღამაც დუქნის კარები და რამდენიმე კაცი გამოექანა ჩვენკენ,

უცხონი იყვნენ, პოლიციის ტანისამოსით. მანამ გონებაზე მოვიდო-
დით, შემოვარდნენ სამკითხველოში და ერთმა მათგანმა, რომელიც
უფროსი უნდა ყოფილიყო, უბრძანა სხვებს:

— ემაგას ვეძებდით, აი! მე კარგად ვიცნობ მაგას! დაიჭირეთ!

შოველს ფერი ეცვალა, მაგრამ მაინც მაგრა დაუხვდა:

— მე უნდა დამიჭიროთ? რისთვის? ან რა უფლებით? გაქვე-
თი ამისი ბრძანება? კონსტიტუციის 76 და 81 მუხლის ძალით...

— კმარა, კმარა, — შეუტია პოლიციელმა, — მე შენი მუხლე-
ბისა არა ვიცი რა! შეჰკარით!

ამასობაში გონებაზე მოვედი და ჩემს ხმალს გადავხედე, რომე-
ლოც იქვე კედელზე ეკიდა. თითქო მიმიხვდაო პოლიციელი, მომი-
ბრუნდა და მითხრა:

— შენ ეი... ეცადე ჰკვიანად იყო, თორემ უბედურება შეგე-
მთხვევა... ჩამოიღეთ ეგ იარაღი! — უბრძანა თავის ბიჭებს. — აბა
გასაღები! სახლი უნდა გავჩხრიკოთ!

ორმა პოლიციელმა ხელები დამიჭირა. წამოვიწიე, დავძარ კი-
დეც ის წუწკები, მაგრამ მესამე უკანიდან მწვდა კისერში და გამა-
კავეს: შოველი უკვე გარეთ გაეთრიათ და გარედან შემომესმა იმი-
სი ხმა:

— თავი დაანებე, მიშელ, ნუ გაუძალიანდები. თორემ მოგკლა-
ვენ.

ეს იყო უკანასკნელი სიტყვები საწყალი მოხუცისა.

რადას გავუძალიანდებოდი, ხელები ზურგთ უკან გამიკრეს,
კაი კაი წიხლები დამაზილეს და ისე მიმაგდეს საღდაც კუნჭულში.

— თავი დაანებეთ, — დაუყვირა უფროსმა: — აგერ რამდენი
გასაღები ვიპოვე! შენ ეი! არ გაინძრე, თორემ ვაი შენი ბრალი!

დამტვრეული ვიყავ, შეგნება აღარაფრისა მქონდა. ვხედავდი,
რომ მთელი სახლი არივ-დარიეს, ყველა ყუთები და ზანდუკები
გადმოაპირქვეავეს, ქაღალდები გადაარჩიეს. უფროსი იქვე, ჩვენს მა-
გიდასთან იჯდა და რადასაც სწერდა, სხვები სახლსა სჩხრეკავდნენ.
მომერია ბრაზი, ტკივილი, მწუხარება, სასოწარკვეთილება, ამეშალა
ჩემი ძველი სენი და წამსკდა პირიდან სისხლი. შეგნება აღარაფრი-
სა მქონდა, თუმცა ყველაფერი მესმოდა, ყველაფერს ვხედავდი...
უფროსი ბრძანებას აძლევდა:

— აბა ეგ ყუთი გამოსწიეთ! გადმოყარეთ! რატომ კარს არ მი-
ზურავთ, გაიყინა აქაურობა! ცეცხლი მაინც იყოს ბუხარში! ღოშა-
კები გასინჯეთ! დასჭერით, გადმოყარეთ მატყლი! ახლა ბალიშები!
ეგრე!

მერე თანხიდან ერთი ბოთლი არაყი გადმოიღეს და იქვე სმა

დაიწყეს. შოველის ბურნუთის კოლოფი იქვე დარჩენილიყო და ერთმანეთსა სთავაზობდნენ.

გამოცალეს ბოთლი და წაეიდნენ. შუალაძე გადასული იყო, პირველი საათი იქნებოდა. მინდოდა ავმდგარიყავ, მაგრამ მუხლი აღარ მიჭრიდა. ცოცვით მივედი კარებამდე და ფეხი რაღასაც რბილს წამოვკარ. დავეწოდე... მარგალიტა იყო! მეგონა მკვდარია-მეთქი და უცბად მოვიკრიბე ძალ-ლონე. ხელები გამოვიხსენ, ავწიე, შევიყვანე ოთახში და ლოგინზე დავაწვინე.

როცა მოკეთდა, მიაბზო: მამაჩემის ხმა შემომესმა — მშვიდობით, შვილებო, მშვიდობით!.. მერე ეტლის გრიალი... და გული წამივიდაო.

ეს მერე მიაბზო, როცა ინება ღმერთმა და გონებაზე მოვიდა, თორემ კარგა ხანი ისე ავად იყო, რომ იმის მორჩენის იმედი აღარა გვექონდა და თანაც გვეშინოდა, ჭკუაზე არ შესცდესო.

ღიად, დავაწვინე ლოგინზე და მაშინვე ექიმის მოსაყვანად გავიქეცი. მოვიდა, გასინჯა, თავი გაიქნია და სთქვა:

— ფუ, შეარცხვინათ ღმერთმა ის შეჩვენებულნი!

ამას ჩვენი მამასახლისი მოგახსენებდათ... რა ექნა მოხელეს, როგორ მოეწონა ის, რასაც სინდისი უწუნებდა?

ის იყო და ის, მას შემდეგ შოველისა აღარა გავგივია რა.

ბევრი იტირეს იმ ღამეს ჩემმა ბავშვებმა. მეორე დილას ისე პოდიოდნენ ჩვენს სანახავად, თითქო სახლში მიცვალებულია და სამძიმრის სათქმელად მოდიანო. შოველისას არავინ რას კითხულობდა, გასაგონადაც კი საზარელი იყო ეს ამბავი. ეშინოდათ კიდევ, რადგან ნაპოლეონს ებრძანებინა სახელმწიფო რჩევისთვის:

— საქმის გამოძიება ძალიან გაგრძელდება და მე კი მინდა ელვასავით სწრაფი იყოს ამ საზარელი შეთქმულობის სასჯელი. სისხლი, სისხლი, რომ მეშვიდე თაობამდე არ დაავიწყდეთ ჩემი რისხვა! რამდენიც იმათ კაცი მოკლეს, მე იმდენსავე დავახვრეტინებ და ათჯერ იმდენს კიდევ კალედონიაში გავისტუმრებ. ზოგი ჭირი მარგებელიაო, სწორედ ამანედ არის ნათქვამი: „ამ გარემოებას მოვიმიზეზებ და გავწმინდავ რესპუბლიკას“...

— „ვინ განიზრახავდა ჩემს მოკვლას, თუ არ ის ყაჩაღები, რომელნიც რევოლუციის არეულობით სარგებლობენ და ქვეყანას იკლებენ? ახლა მე მიყურონ! წამოვუსვამ ხელს და ისე გავუხდო საქმეს ბრალიანს და უბრალოს, რომ ერთმანეთს თითონვე აბეზღებდნენ. მე თუ ჩემებური სუსხი არ გამოვიჩინე, რიგზე ვერ დავაყენებ ამ ხალხს. უნდა დავსაჯო, სასტიკად უნდა დავსაჯო ზოგნი, რომ დანარჩენები ჭკუაზე მოვიყვანო. უნდა შევაშინო ამ ყაჩაღების

მომხრენი, რომ უარპყონ ივინი და თავ-თავის საქმეს შეუდგენენ. უღირსი ჭიქნები იმ წმინდა მოვალეობისა, რომელიც მე ვიტვირთებ. თუ გულჩვილად მოვიქვც და სასტიკად არ დავსაჯე დამნაშავენიც და მათი თანამგრძობელნიც. საფრანგეთი და მასთან მთელი ევროპა მასხარად აიგდებს ჩვენს მართებლობას, თუ იმავე კანონებით დავსაჯეთ შეთქმულნი, რომლითაც უბრალო კაცისმკვლელებს სჯიან. ეს საქმე სახელმწიფოს შეეხება და სულ სხვაფრივ უნდა იქნას განსჯილი. დარწმუნებული ვარ, თუ დღეს სასტიკად არ მოვიქვც, ჩემს დღეში ველარ დავიმორჩილებ ამ ხალხს. ისეთი სასჯელი უნდა მივაყენო, რომ საუკუნოდ დავავიწყო მეფის და ხელმწიფის წინააღმდეგ შეთქმულობა“.

როგორც ხედავთ, ბონაპარტი ჩვენ გვაბრალებდა აფეთქებას და ყაჩაღებს და ქურდებს გვიწოდებდა, თუმცა ძალიან კარგად იცოდა, რომ ასაფეთქებელი მანქანა იაკობელებმა კი არა, ინგლისისაგან შესყიდულ მეფის მომხრეებს გაეკეთებინათ. არ შეიძლებოდა ეს არ სცოდნოდა, რადგან ნამდვილი დამნაშავენი დაჭერილი ჰყავდა და ცოტა ხანს უკან დაახოცვინა კიდეც. მიუხედავად ამისა, მაინც იაკობელებს სწამებდა ყველაფერს. შოველი ყაჩაღი იყო, ქურდი, რესპუბლიკის მტერი, და თითონ ბონაპარტი კი პატიოსანი კაცი ბრძანდებოდა. მაინც ყოველთვის ასე იცოდა: ვისაც კი მოიძულებდა, მაშინვე იმას შესწამებდა, რესპუბლიკის მტერიაო! საერო კრებასაც და გამგეობასაც ნაპოლეონმა იმითი აჯობა, რომ ცილი დასწამა, რესპუბლიკის დამხობას ცდილობენო. რესპუბლიკის ერთგული მარტო თითონ ბრძანდებოდა, და სხვა არავინ!

ასოცდაცამეტი მამულიშვილი გაგზავნეს კალედონიაში პირველი კონსულის ბრძანებით და ხუთს თავი მოსჭრეს გილიოტინით. შემდეგში ხშირად უთქვამს ნაპოლეონს, ამ გადაწყვეტილებამ დაიფარა რესპუბლიკა, რადგან მას შემდეგ მართებლობის წინააღმდეგობა ფიქრადაც აღარავის მოსვლიათ. მართალია, წინააღმდეგობას ვერავინ ჰხედავდა, მაგრამ მადლიერი და მომხრეც კი აღარავინ ჰყავდა! და ისე მოადგნენ პარიზს შეერთებული ჯარები რუსებისა, გერმანელებისა და ინგლისელებისა, რომ ხალხიდან აზრადაც არავის მოსვლია იარაღის აღება და სამშობლოს დახმარება. ხალხს სულს უდგამს და ერად ხდის თავისუფლება და თანასწორობა. სადაც დათრგუნვილია თავისუფლება და თანასწორობა, იქ აღარც ეროვნული თვითშეგნებაა და აღარც სამშობლოს სიყვარული.

მაგრამ დროა დავაბოლოო ეს გრძელი ისტორია.

არ გასულა დიდი ხანი, ნაპოლეონმა ხელახლა დააწესა იგივე წყობილება სასულიერო წოდებისა, რომელიც რევოლუციის წინ

იყო და რომელიც რევოლუციამ გააუქმა. იგივე ეპისკოპოსები, მონასტრები, ბერები, საეკლესიო გადასახადი და სხვანი და სხვანი. ხელი ხელსა კბანსო, ამის სამაგიეროდ პაპმა პიი მეშვიდემ შიგ პა-
რიზში უკურთხა მას სამეფო გვირგვინი... ეგონა, ქვეყნის მპყრობელი მეღა ვარო. მთელს ევროპასთან ომი ჰქონდა. ის ბატონი იყო, და ჩვენ... ჩვენ მწველელ ფურად მივაჩნდით და ისე წელიწადი როგორ გავიდოდა, რომ სამასი ათასი კაცი მაინც არ გაეყვანა ჯარში. ახლა ფული ბრძანეთ თქვენ, იმოდენა ომებს ფული არ უნდოდა? იმისთანა ხარჯი გვედო, რომ სანატრელად გვქონდა ბატონყმობის დრო. გატყავდა, გაღატაკდა ხალხი. ბრძოლის ველზე დაიხოცა ვაჟკაცობა, შინ ქალები და უძლურნიღა დაარჩნენ. ნაპოლეონი კი დათარეშობდა და სისხლის ღვარს აგუბებდა მთელს ევროპაში.

უნდა გენახათ იმ დროის ჯარისკაცი, რომ დარწმუნებულყავით, რა გარყვნილება და გახრწნილება შეჰქონდა ჩვენს ცხოვრებაში ჩვენს ახალ ხელმწიფეს. უნდა გენახათ, რა ზიზლით ექცეოდა ჯარისკაცი მუშას და მოქალაქეს. იტყოდით, ჯარისკაცი ხალხის შვილი კი არა, სულ სხვა მოდგმის კაცია და სულ სხვა, დაწმენდილი ანკარა სისხლი უდგასო. გლეხკაცი, მოქალაქე, ვაჭარი მარტო იმიტომ გაეჩინა ღმერთს, რომ ეშრომათ და ჯარი ეცხოვრებინათ. — ჩვენ ბრძოლა და ქეიფიო, იძახდნენ ჯარისკაცნი, და ისპანიაში, გერმანიაში, პოლონეთში და იტალიაში ძარცვა-რბევას ჩვეულთ წმინდა აღარა გააჩნდათ რა და სამშობლოც დასარბევ ქვეყნად გაეხადათ. ვიღას ახსოვდა თავისი სოფელი, მაზრა, ღედ-მამა და ნათესაობა? დიდი და პატარა იმასღა ცდილობდა, ხელმწიფე-იმპერატორის გული მოეგო და წარჩინება მიეღო რამე.

სამწუხარო კიდევ ის იყო, რომ გულში უნდა დაგვეტრიალებინა ამოდენა ჩვენი ვარამი. მაგრამ რა! თევზი ხომ არ ვიყავით, პირში წყალი ჩაგვეყენებინა. ხშირად მოხდებოდა, გაივსებოდა ფილა მოთმინებისა და ღირსეულ პასუხს ვახლიდით თავხედთ. სულ იმას მეხვეწებოდა მარგალიტა, — გაფრთხილდი, არა წამოგცდეს-რაო, მაგრამ მაინც ვერ შევიკავებდი თავს და ერთი ორჯერ ხმალში გასვლაც მომიხდა დასამტკიცებლად იმისა, რომ 1792 წლის ხმალი ჯერ ისე არ დაჩლუნგებულყო, რომ 1808 წლის ხმალისთვის ვერ ეჯობნა. ეხლაც მეტყობა კრილობა, მაგრამ არც ჩემს მოპირდაპირეთ დავაყარე სიკეთე.

ჩემი დროისა ჯერაც ბევრნი არიან და ისინიც დამემოწმებიან, რომ იმისთანა სამარცხვინოდ დამდაბლებული თავის დღეში არ ყოფილა ჩვენი ხალხი. რუსის ჯარმა გადმოვლო მთელი ჩვენი ქვეყანა, დონელმა ყაზახებმა გადმოთელეს საფრანგეთი და ისინიც კი ვერ

უბედავდნენ ჩვენ ქალ-რძალს იმას, რასაც ჩვენივე ჯარისკაცნი გვიშვრებოდნენ. ნაპოლეონის ჯარმა ძარცვა-რბევით დაიწყო თავისი მოღვაწეობა და ბოლომდე არ დაუშლია იგი. რა არის ჩვენი ცხოვრება, თუ არ სმა-ჭამა კეთილა, ლამაზი გოგოები და ფულიო! იძახდა ეს ჯარი და... როცა მოედება ხოლმე ღვარძლი მთელ ყანას, რომ პური პურად აღარა ვარგობს, ეს ყველამ იცის.

ხალხიკ გაიყოლია ავმა მაგალითმა. ჩვენისთანა მდიდარი, ყველაფრით შემკული ქვეყანა განა გარეთ უნდა ეძებდეს რასმე? რას იტყვის ენა, რომ შინ არა გვექონდეს, — პური, ღვინო, ცხვარი. ყოველნაირი წარმოება და მრეწველობა. შრომა და ყაირათი, თორემ ჩვენისთანა ბედნიერი სხვა არავინ იქნებოდა. ჩვენდა საუბედუროდ, ბონაპარტი სულ სხვაფრივ სჯიდა და შრომის ყაირათის ნაცვლად ყაჩაღობას და ძარცვა-რბევას ასწავლიდა ჩვენს ჯარებს. ომი რომ ატყდებოდა, წინაღვე ანგარიშობდნენ, რას წაართმევდნენ დამარცხებულ მტერს, რას გადაახდევინებდნენ „საბრიყვოს“ დარამდენს მოიტანდნენ ნადავლს. მოდიოდა და მოდიოდა დატვირთული ურმები. თან ჯარისკაცები მოსდევდნენ და იძახდნენ:

— იქით! ეს ურმები ამა და ამ მარშლისაა, ან გენერლისა.

მერე ჯარი შოდიოდა სავსე ჯიბეებით და გულებით.

ღმერთო, ღმერთო! იმოდენა სისხლი დავღვარეთ სიმართლის და სათნოების აღსადგენად და ყაჩაღებად კი ვიქვეცით.

იმოდენა აღმართს დაღმართიც უნდა ჰქონოდა. თქვენ უკვე გეცოდანებათ, რომ მოსწყინდათ ევროპელებს ჩვენი თარეში, შეერთდნენ რუსები, გერმანელები, ინგლისელები, სვედელები. იტალიელები, ესპანელები და ისე გაგვიხადეს საქმე, რომ უკანვე წაგვართვეს, რაც იმათში გვეშოვა, და ერთი მილიარდიც კიდევ მეტი, ესე იგი ათასი მილიონი. დაიჭირეს საფრანგეთი, ყველა ციხე-სიმაგრეში თავისი ჯარები ჩააყენეს, წაგვართვეს, რაც კი შეძენილი ქვეყნები გვექონდა, და აღარ მოგვშორდნენ, ვიდრე უკანასკნელ გროშამდე არ გადაგვახდევინეს შემოწერილი ხარჯი.

აი, რა სიკეთე დასდო საფრანგეთს ბონაპარტმა.

მაგრამ თავი დავანებოთ, თორემ ვინ იცის რამდენი მაქვს კიდევ სათქმელი. დავუბრუნდეთ ჩემს ისტორიას.

რალა საჭიროა მოგახსენოთ, რა აზრისანი ვიქნებოდით მე და მარგალიტა ბონაპარტზე, მას შემდეგ, რაც შოველი მოგვტაცეს და ისე გააქრეს, რომ იმისი აღარა გაგვიგია რა. არც იმას მოგახსენებთ, როგორ ვიტანჯებოდით, როდესაც ბავშვები ჩაგვაცივდებოდნენ, — პაპა რა იქნაო? და ხეირიან პასუხის გებას ვერ ვახერხებდით. ჩემი ცოლი ამ სევდამ მოიდნო. თხუთმეტი წელიწადი სულ იმის ფიქრში

იყო, — ნეტავ მამაჩემს რა უყვესო? ფერზე მაშინ მოვიდა, როდესაც ნაპოლეონი წმ. ელენეს კუნძულზე დაამწყვდიეს და მით მოუღეს ბოლო მის მტარვალობას. მაგრამ მანამ ნაპოლეონს დაიქვერდნენ, კიდევ ბევრი სხვა ტანჯვა მოგვაყენა.

1802 წელს ნაპოლეონმა ერთი უწინდელი კონვენტის წევრად ნამყოფი, სენტანდრე გამოგზავნა მაინცში ყაჩაღების დასასჯელად, რომელნიც რეინის გაღმა-გაშოლმა მხარეს იკლებდნენ. 70 კაცი იყო დაქერილი და მათ შორის ჩემი ძმა ნიკოლოზი. კიდევ კარგი, რომ დიდი ხანი იყო, გულიდან ამორეცხილი მყავდა. მე ყოველთვის იმ აზრისა გახლდით, რომ ყოველ ჩვენგანს მარტო საკუთარი თავისი საქციელი უნდა ეძრახოდეს და არა ნათესავეებისა, თორემ რამდენი ოჯახია, რომ ზოგი კარგი შვილი ჰყავს, ზოგი ავი, ზოგი ჰქვიანი, ზოგი რეგვენი; მოდით თქვენ და ავის გამო კარგსაც ავი უწოდეთ. დიად, მე და ჩემმა ცოლმა არაფრად მივიჩინეთ ეს ამბავი, მაგრამ საწყალი მამაჩემი კი თან გადაიტანა მწუხარებამ: გაიგო თუ არა, მაშინვე ლოგინად ჩავარდა და ის იყო და ის, ველარ მოიხედა. რამდენჯერაც კი ავედი სანახავად, სულ ნიკოსა სტიროდა:

— ეჰ, მიშელ! ნეტავი ღმერთმაც ისე შეუნდოს, როგორც მე შემიხდვია.

საწყალმა მამაჩემმა თქვენი ჰირი წაიღო 1803-ს. ბევრი ვეხვეწე დედაჩემს, — წამოდი, ჩვენთან იყავ და შენი შვილიშვილები დაზარდე-მეთქი; არ ინდომა: დადიოდა მთელ აღზას-ლორენში და ყველა ეკლესიაში და მონასტერში ნიკოლოზის სულს ავედრებდა ღმერთს. რამდენიმე თვის შემდეგ ამბავი მოგვივიდა, სენტოდილში მოკვდა და იქვე დაასაფლავეს ქრისტიანულადო. იქაურ მღვდელს მაშინვე გავუგზავნე საწირავი. ძალიან ვინანე, ღვთის წინაშე... იქნება ისე არ მენანა, ერთმანეთში ტკბილი განწყობილება რომ გვქონოდა. ჩემთვის რომ დაეჯერებინა, ათ წელიწადს კიდევ იცოცხლებდა, ცხონებული.

ამგვარად ნელ-ნელა გვაკლდებოდნენ ოჯახის ბურჯნი და აგრეთვე მეგობრებიც. სომისაც დიდი ხანი იყო აღარა ვიცოდით რა: მოკვდებოდა სადმე ბრძოლის ველზე. მარესკო და ელისაბედი კი ძალიან კარვად იყვნენ და ძალიან წარჩინებულნიც ბრძანდებოდნენ. იმდენად წარჩინებულნი, რომ ჩვენ აღარც კი ვაგონდებოდით. ცოლიც და ქმარიც ბონაპარტის მომხრენი იყვნენ და ჩვენ კი რესპუბლიკის მომხრებად დავრჩით. მიწერ-მოწერა აღარა გვქონდა, — აბა რაღას გვიკადრებდნენ, — მაგრამ გაზეთებიდან ვიცოდით იმათი ამბავი: „ბარონ მარესკოს მეუღლე დღეს... მალაზიაში ბრძანდებოდა!“ ეწერა გაზეთებში, „ბარონი მარესკო თავისი მშვენიერი მე-

უღლითურთ წუხელის სასახლეში იყო საღამოზე მოწვეული...“ ერთი სიტყვით, ჩემი და თავის ქმრით დიდებულნი, სასახლეში მიღებულნი, და სასურველი სტუმრები ბრძანდებოდნენ.

ნათლიაჩემს ჯერ არა უშავდა რა. ჩვენს სოფელში სამჭედლოს თავი დაანება და თავის პიკოლციის მამულში გადავიდა. ნათლი-ჯა-ლაბი, ნიკოლი, ჩემი ძმა კლოდი და ჩემი და მატურინი: იქა ჰყავდა. ყოველ ბაზრობა დღეს ქალაქში ჩამოდიოდა და ყველაფერს ჩვენსა ვაჭრობდა. ძალიან აწუხებდა შოველის დაქერა, მით უფრო, რომ თავდაპირველად ბონაპარტს ამართლებდა, — წესრიგი აკლია ჩვენს ცხოვრებასო, იძახდა... შესყიდულ მამულს არავინ გვედაგვებო... მაგრამ შოველის დაქერა რომ გაიგო, მაშინვე ჩამოიჭრა და ისე სწუხ-და, თითქო საყვარელი ძმა დაუკარგავსო. მარგალიტასთან ვერა ბე-დავდა შოველის ხსენებას, მაგრამ მარტონი რომ დავრჩებოდით, მა-შინვე იმის ამბავს მკითხავდა:

— ზომ არა გაგიგია რა, მიშელ!?

— არა, არაფერი!

— დასწყევლა ღმერთმა, რა უყვეს იმ კაცს? რა ღმერთი გამი-წყრა, რომ არ დავუჯერე, როდესაც მეუბნებოდა, — ნაპოლეონი მტარვალა და არა ქვეყნის ერთგული მოსამსახურეო.

ძალიან უყვარდა ჩვენი ბავშვები და სულ იმასა გვთხოვდა, ერთ-ერთი მე მომანდეთ, მე გავზრდიო. სამი ბიჭი მყავდა, ორი ჯოგო და თითქმის გადაწყვეტილი გვქონდა, რომ ერთ-ერთი იმისთვის უნდა მიგვეცა: ვიცოდით, რომ ჩვენზე არა ნაკლებ ეყვარებოდა და კარგა-დაც გაზრდიდა.

— თუ უნდა, პატარა მიშელი წაიყვანოს, — მითხრა ეროხელ მარგალიტამ. — ჩვენს შვილებში ყველაზე. ღონიერი მიშელი არის.

— არა მგონი, მიშელი ინდომოს. არ უთქვამს, მაგრამ ვიცი, რომ პეტრესა გვთხოვს.

— პეტრეს? ვითომდა რაღაო?

— იმადაო, ჩემო მარგალიტავ, რომ პეტრე ძალიანა ჰგავს სა-წყალ მამაშენს.

მარგალიტასაც სწორედ ამიტომ უნდოდა შინ ჰყოლოდა თავისი პირმშო. ბევრი იტირა, მაგრამ ბოლოს დაგვთანხმდა.

გათენდებოდა სამშაბათი და კარს მოგვადგებოდნენ ნათლიაჩემი და ჩვენი პეტრე; სადილს ერთად გიანლებოდით. მარგალიტაც ხში-რად აღიოდა პიკოლციში პეტრეს სანახავად.

1809 წ. შემოდგომაზედ ნათლიაჩემი ავად გახდა. პეტრე მამინე 14 წლისა იყო და ის ჩამოვიდა დილაადრიანად:—წამოდი, ნათლია ვიბარებს, რაღაცა უნდა გითხრასო. მაშინვე გავექანე. შევხედე თუ

არა, მაშინვე მივხვდი, რომ საწყალი ნათლიაჩემი ამ ქვეყნისა აღარ იყო. ექიმი ხუთჯერ ყოფილიყო ავადმყოფის სანახავად. ნათლი-ჯალაბი იმისთანადა ქვითინებდა, რომ ეტყობოდა, იმისთვის არა-ფერი დაემალა ექიმს.

მე რომ მოვედი, ენა აღარა ჰქონდა, უჯრა დამანახვა და მა-ნიშნა,—გააღეო.

გავადე, შიგ ქალაღი იყო, მისი ხელით დაწერილი. შოველის შვილიშვილებსო, წაილულულა საწყალმა და ცრემლი წასკდა. უნდოდა, კიდევ რაღაცა ეთქვა, მაგრამ სუნთქვა ეკვროდა.

თითქო მეღა მელოდაო, მაშინვე ბალიშზედ დაეშვა სულთმო-ბრძავი. ცოტა ხანს უკან სულიც განუტევა. მშვიდად, წყნარად მია-ბარა ცხონებულმა სული, პირს ღიმილი არ მოსცილებია, იტყოდით თავის სამკედლოში დგას ჩაქუჩით ხელში და ვალენტინს არიგებსო.

ღიღი მწუხარება გამოვიარეთ მაშინ. ნათლიაჩემს მამაჩემის ად-გილი ეჭირა ჩემს ცხოვრებაში, შვილივით ვუყვარდი და ღიღი სი-კეთეც მახსოვდა მისი; მასთან ვიყავ აღზრდილი; სულიერი შვილი ვიყავ მისი.

ამით გავათავებ ჩემს ესტორიას; კმარა თორემ, ვაი თუ სიკვდილ-მა მისწროს. ჩემი რიგია ახლა. დროა, ცოტა დავისვენო, და საი-ქაოზედაც ვიფიქრო.

ნათლიაჩემმა ჩვენ გვიანდერძა, „შოველის შვილიშვილებს“ პიკ-პოლცის მამული, იმ პირობით, რომ ნათლი-ჯალაბი, ნიკოლი, კლოდი და მატურინი ჩვენთან უნდა ყოფილიყვნენ, ვიდრე ცო-ცხალნი იყვნენ.

ადვილი პირობები იყო, უიმისოდაც აგრე იქნებოდა.

ცოტახანს უკან მე და მარგალიტა პიკპოლცში გადავსახლდით და დუქანი ჩემს ძმას სტეფანეს დავუთმეთ.

მას შემდეგ ვარ ჩემთვის და მამულს ვუვლი, ღმერთმა თქვენც; ნუ მოგიშალოთ წინაპართა სისხლით მორწყული მამულ-დედულის მოვლა და დამშვენება.

ჩეღაქიისაგან

ერკმან-შატრიანი — ლიტერატურულ აახელია ორი ფრანგი მწერლისა, ემილ ერკმანის (1822 — 99) და ალექსანდრე შატრიანისა (1826 — 90).

მრავალი ისტორიული რომანი, პიესა თუ ოპერების ლიბრეტო მათ ერთად შეუქმნიით. დაიბადნენ და ცხოვრობდნენ ელზასში. მათთვის კარგადაა ცნობილი ლორტარინგია, ქ. ფალცებურგის მიდამოები. ფალცებურგი თითქმის ყოველ მათ რომანში გვხვდება, ადგილსამყოფელი მათი გმირებისა მუდამ ამ ქალაქის მახლობლად მდებარეობს.

ერკმანი და შატრიანი დიდის სიმართლით აგვიწერენ ელზასელი გლეხებისა და წვრილბურჟუაზიის ცხოვრებას. ისინი ყველა თავის რომანში მტკიცედ ადგანან ერთ ძირითად გზას, შეხედონ დიდ ისტორიულ მოვლენებს იმ თვალთ, რომლითაც უყურებდა ხალხი. ხალხი, რომელიც საუკუნეების განმავლობაში დუმდა და მწარედ ითმენდა აურაცხელ გაკირებებას, ხალხი, რომელსაც ძვირად უჯდებოდა სასახლის კარის ინტრიგანების, მოქიშპეების, საშობლოს გამყიდველების, ბიუროკრატების და მექრთამეების საზიზლარი მოქმედება.

ერკმანი და შატრიანი თავიანთ რომანებში ცენტრალურ ფიგურებად სახავენ ხალხის წიაღიდან გამოსულ ადამიანებს. ეს ადამიანები მკაცრ ანგარიშს უყენებენ თავიანთ თავს იმაზე, თუ რა უშლის მათ ხელს იცხოვრონ ჯანსაღი ადამიანური სიცოცხლით.

ერკმან-შატრიანის რომანებს უწოდებენ ისტორიულს. და ეს სამართლიანიცაა, რადგან ისინი ცოცხლად, მხატვრული ფერებით, ნათლად გადმოსცემენ იმდროინდელი ეპოქის სულს.

ერკმან-შატრიანის რომანებში შეჯახებულია ხალხისა და გაბატონებული კლასების ინტერესები (ციკლი ე. წ. „ნაციონალური რომანებისა“ რევოლუციის და იმპერიის მრისხანე წლებზე — „ტერეზა“ 1863 წ., „გლენჯაკის ისტორია“ (1868 — 70). ავტორები თავგამოდებით იცავენ საფრანგეთის ბურჟუაზიული რევოლუციის იდეებს და ავლენენ თავიანთ უარყოფით შეხედულებას ნაპოლეონ I-ის დამპყრობლური პოლიტიკისადმი.

ეს რომანები ახსენებენ მკითხველს, რომ ცხოვრების მთავარი მამოძრავებელი ძალა და ყოველი პოლიტიკური მოვლენის მყარი ფუნდამენტი მაინც ხალხია.

ერკმან-შატრიანის რომანები დიდი პოპულარობით სარგებლობდა 60 — 80-იან წლებში. „ტერეზა“ 1868 წლამდე 13-ჯერ გამოიცა, „ეატერლო“ — 17-ჯერ, „რეკრუტის მოგონებანი“ — 21-ჯერ.

ერკმანისა და შატრიანის კალამს ეკუთვნის აგრეთვე პიესები („ძმები რანკაუ“, რომელიც 1882 წელს დაიდგა, გამოიცა 1884 წ. და სხვა).

ერკმან-შატრიანის პიესების საფუძველზე შეიქმნა რამდენიმე ოპერა და ერთი ოპერეტა.

თავის დროზე ჩვენშიც დიდის პოპულარობით სარგებლობდა ერკმან-შატრიანის „გლენჯაკის ისტორია“. იგი ქართულ ენაზე რამდენჯერმე გამოიცა. ალბათ მკითხველთა შორის ამ წიგნის პოპულარობის ერთ-ერთ მიზეზს მთარგმნელის, განსვენებულ ივ. მაჭავარიანის, კარგი ქართული ენაც წარმოადგენდა.

წინამდებარე გამოცემისას ჩვენ ვისარგებლეთ 1931 წლის გამოცემით.

შინაარსი

	გვ.
	გვ.
ნაწილი პირველი	
საერთო კრება	3
ნაწილი მეორე	
სამშობლოს განსაცდელი	236
ნაწილი მესამე	
წელიწადი პირველი რესპუბლიკისა	448
ნაწილი მეოთხე	
მამულიშვილი ბონაპარტი	646
რედაქციისაგან	837

რედაქტორი ზ. ჯამასიშვილი
მხატვარი ვ. ალიმბარაშვილი
მხატვრული რედაქტორი ჯ. ყავლაშვილი
ტექნიკური რედაქტორი ვ. ხუციშვილი
კორექტორები {
 ვ. უნდილაშვილი,
 ნ. აფხაზავა,
 ე. ტრიპოლსკაია

ხელმოწერილია დასაბეჭდად 15/VI-59 წ. ქალაქ-
დის ზომა 60×92¹/₁₆. ნაბეჭდი თაბახი 52.5.
სააქტორო თაბახი 46,99. სააღრ.-საგამომც.
თაბახი 47,73.
უე 03386. ტირაჟი 20.000. შეკვ. № 601.
ფასი 18 მან. 50 კაპ.

საქართველოს სსრ კულტურის სამინისტროს
მთავარბოლიგრაფგამომცემლობის ბეჭდვითი სიტყვის
კომბინატი. თბილისი, მარჯანიშვილის ქ. 5.

Комбинат печати Главполиграфиздата
Министерства культуры Грузинской ССР,
Тбилиси, ул. Марджанишвили, 5.